

清  
實  
錄



聖祖仁皇帝實錄(二)

卷一〇〇至卷一九六  
康熙二十一年至三十八年

# 清實錄

第五冊

中華書局影印

清 實 錄

(第 五 冊)

聖 祖 實 錄 (二)

\*

中 華 書 局 出 版

(北京王府井大街 36 號)

北京市中國書店發行

中國建築工業出版社印刷廠印刷

\*

787×1092 毫米 1/16 · 67 1/2 印張

1985 年 9 月第 1 版 1985 年 9 月北京第 1 次印刷

印數 0,001——1,500 冊

統一書號: 11018 · 1355—5 定價: 50.00 元



# 清實錄第五冊目錄

## 聖祖仁皇帝實錄(二)

卷一〇〇	康熙二十一年正月	一
卷一〇一	康熙二十一年二月至三月	九
卷一〇二	康熙二十一年四月至五月	二二
卷一〇三	康熙二十一年六月至七月	三六
卷一〇四	康熙二十一年八月至九月	四八
卷一〇五	康熙二十一年十月	六三
卷一〇六	康熙二十一年十一月至十二月	七一
卷一〇七	康熙二十二年正月至二月	八四
卷一〇八	康熙二十二年三月	九五
卷一〇九	康熙二十二年四月至五月	一〇六
卷一一〇	康熙二十二年六月至閏六月	一二九
卷一一一	康熙二十二年七月至八月	一三八
卷一二二	康熙二十二年九月至十月	一四五
卷一一三	康熙二十二年十一月至十二月	一六一
卷一一四	康熙二十三年正月至三月	一七四
卷一一五	康熙二十三年四月至六月	一九〇
卷一一六	康熙二十三年七月至九月	二〇四
卷一一七	康熙二十三年十月至十一月	二一九
卷一一八	康熙二十三年十二月	二三六
卷一一九	康熙二十四年正月至二月	二四四
卷一二〇	康熙二十四年三月至四月	二五六
卷一二一	康熙二十四年五月至八月	二七〇
卷一二二	康熙二十四年九月至十月	二八五
卷一二三	康熙二十四年十一月至十二月	二九九
卷一二四	康熙二十五年正月至二月	三一一
卷一二五	康熙二十五年三月至四月	三二三
卷一二六	康熙二十五年閏四月至六月	三三五
卷一二七	康熙二十五年七月至十月	三五〇

卷一二八	康熙二十五年十一月至十二月	三六六
卷一二九	康熙二十六年正月至三月	三七九
卷一三〇	康熙二十六年四月至七月	三九二
卷一三一	康熙二十六年八月至十一月	四〇六
卷一三二	康熙二十六年十二月	四二一
卷一三三	康熙二十七年正月至二月	四三三
卷一三四	康熙二十七年三月	四四九
卷一三五	康熙二十七年四月至六月	四五九
卷一三六	康熙二十七年七月至八月	四七二
卷一三七	康熙二十七年九月至十一月	四八六
卷一三八	康熙二十七年十二月	五〇〇
卷一三九	康熙二十八年正月至二月	五一二
卷一四〇	康熙二十八年三月至四月	五三八
卷一四一	康熙二十八年五月至八月	五四四
卷一四二	康熙二十八年九月至十月	五五七
卷一四三	康熙二十八年十一月至	
卷一四四	康熙二十九年正月至二月	五八一
卷一四五	康熙二十九年三月至四月	五九四
卷一四六	康熙二十九年五月至六月	六〇四
卷一四七	康熙二十九年七月	六一八
卷一四八	康熙二十九年八月至九月	六三三
卷一四九	康熙二十九年十月至十二月	六四三
卷一五〇	康熙三十年正月至三月	六五八
卷一五一	康熙三十年四月至五月	六七一
卷一五二	康熙三十年六月至八月	六七九
卷一五三	康熙三十年九月至十二月	六八七
卷一五四	康熙三十一年正月至三月	六九八
卷一五五	康熙三十一年四月至七月	七〇九
卷一五六	康熙三十一年八月至九月	七二八
卷一五七	康熙三十一年十月至十二月	七三五
卷一五八	康熙三十二年正月至三月	七三五
卷一五九	康熙三十二年四月至七月	七四五



卷一六〇	康熙三十二年八月至十月	七五二	卷一七五	康熙三十五年八月	八八九
卷一六一	康熙三十二年十一月至十二月	七六二	卷一七六	康熙三十五年九月	八九六
卷一六二	康熙三十三年正月至三月	七六九	卷一七七	康熙三十五年十月	九〇三
卷一六三	康熙三十三年四月至閏五月	七七九	卷一七八	康熙三十五年十一月至十二月	九一〇
卷一六四	康熙三十三年六月至八月	七八八	卷一七九	康熙三十六年正月	九一九
卷一六五	康熙三十三年九月至十二月	七九五	卷一八〇	康熙三十六年二月	九二三
卷一六六	康熙三十四年正月至四月	八〇四	卷一八一	康熙三十六年三月	九三三
卷一六七	康熙三十四年五月至七月	八一二	卷一八二	康熙三十六年閏三月	九四三
卷一六八	康熙三十四年八月至十月	八二〇	卷一八三	康熙三十六年四月至五月	九五四
卷一六九	康熙三十四年十一月至十二月	八三〇	卷一八四	康熙三十六年六月至七月	九六六
卷一七〇	康熙三十五年正月	八四一	卷一八五	康熙三十六年八月至十月	九七四
卷一七一	康熙三十五年二月至三月	八四六	卷一八六	康熙三十六年十一月至十二月	九八三
卷一七二	康熙三十五年四月	八五八	卷一八七	康熙三十七年正月至三月	九九〇
卷一七三	康熙三十五年五月	八六六	卷一八八	康熙三十七年四月至六月	九九八
卷一七四	康熙三十五年六月至七月	八七九	卷一八九	康熙三十七年七月至八月	一〇〇五
			卷一九〇	康熙三十七年九月至十月	一〇一三
			卷一九一	康熙三十七年十一月至十二月	

## 四

十二月	一〇二〇	
卷一九二	康熙三十八年正月至三月	一〇三〇
卷一九三	康熙三十八年四月至六月	一〇四一
卷一九四	康熙三十八年七月至八月	一〇五〇
卷一九五	康熙三十八年九月至十月	一〇五七
卷一九六	康熙三十八年十一月至十二月	一〇六五



大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十一年壬戌春正月己酉朔

實錄卷一百

上詣

堂子行禮還宮拜神畢率諸王貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮御太和門王以下文武各官外

藩王及使臣等上表朝賀筵宴如例○朝鮮

國王李燾遣陪臣李湛等表賀冬至元早

萬壽節及進歲貢禮物宴賚如例○壬子

上詣

太皇太后

皇太后宮問安○乙卯

世祖章皇帝忌辰遣官祭

孝陵○丙辰孟春享

太廟

上親詣行禮○遣官祭太歲之神○丁巳

上詣

太皇太后宮率王以下滿漢文武二品官以上

實錄卷一百

進慶賀

太皇太后七十聖壽金銀綬疋等物○戊午

上詣

太皇太后

皇太后宮問安○辛酉祈穀於

上帝

上親詣行禮○

上詣

太皇太后

皇太后宮問安○壬戌以上元節賜外藩科爾沁巴林蘇尼特阿霸垓兵喇忒杜爾伯特土默特翁牛特郭爾羅斯貝勒貝子公台吉及內大臣大學士上三旗都統副都統尚書侍郎學士侍衛等宴○

上御乾清宮宴內閣大學士學士各部院寺堂官翰林院學士講讀學士侍讀侍講及日講官編修檢討詹事府坊局等官科道掌印官九十三員

上命學士張英侍講高士奇傳諭曰向來內殿筵宴諸臣未與今因海內乂安時當令序特於乾清宮賜宴君臣一體共樂昇平同昭上下泰交之盛諸臣當懽忭暢飲以副朕懷大學士李蔚奏曰

皇上特恩曠典千載一遇臣等不勝感激奏畢分左右班以次序進樂作各就位叩頭坐上進膳諸臣乃飯

上命各飽飲盡量少選徹饌更設有核酒觴既

陳大學士勒德洪至御前跪進酒上壽畢

上命大學士尚書都御史侍郎學士以次至御座前親賜飲以下諸臣俱命至御前賜飲又命學士張玉書張英傳諭曰今日內殿嘉宴特敕諸臣笑語無禁諸臣奉詔暢飲極歡樂奏二闕

上復命張玉書張英傳諭曰宴畢時諸臣可近御座前觀燈朕更賜以卮酒於是大學士尚

書都御史以次至

御座傍觀鰲山燈又命侍郎以下諸臣俱至御前賜飲特命光祿寺卿馬世濟右通政陳汝器至

御座前親賜飲以馬世濟為殉難巡撫馬雄鎮之子陳汝器為殉難副使陳啓泰之子也既撤筵諸臣以次出

上命羣臣有霑醉者令內官扶掖而行

上召張玉書陳廷敬張英諭曰每見漢唐以來



君臣同樂。有賡和之詩。今朕雖不敢效古先聖王。亦欲紀一時之盛。可做柏梁體賦詩進覽。陳廷敬奏言。臣等草野賤士。得觀

天家景物。蒙

聖恩深厚。真明良喜起之休。且百工熙庶事康。皆君臣交儆之辭。自是唐虞盛事。臣等身際休明。受恩愈深。但愧報稱愈難。於是陳廷敬等。出宣旨。羣臣奏曰。臣等敢不歌詠太平。但恐不能賡颺。

聖德。大學士李蔚言。柏梁體詩。首一句。當恭請皇上御製。陳廷敬復入奏。

上曰。明日早發。遣中使至大學士杜立德第。賜酒饌。諭曰。卿弼亮老臣。久任機密。端醇恪恭。勤慎素著。茲海宇蕩平。時當令序。內殿賜宴。廷臣念卿卧病。不克同此歡譚。特遣中使慰問。賜以醴饌。卿其加餐珍攝。以副朕惓惓至意。○癸亥。上元節。賜外藩王。貝勒。貝子。公。台吉等。及內大臣。大學士等宴。翰林院掌

院學士陳廷敬。內閣學士張玉書。至乾清門候旨。侍衛捧

御製詩序出。羣臣集太和殿下。以次各賦詩九十三韻。序云。朕於宣政聽覽之餘。講貫經義。歷觀史冊。於書見元首股肱賡颺喜起之盛。於詩見鹿鳴天保諸篇。未嘗不慕古之君臣一德一心。相悅若斯之隆也。今際海內宴安。兵革偃息。首春令序。九陌燈輝。豐穰有徵。吾民咸樂。思與諸臣。欣時式燕。爰於乾清宮廣集簪裾。肆筵授几。斯時也。蟾光熬炬。焜耀堂廉。綠樹瓊葩。雜羅樽俎。許笑言之勿禁。寬儀法之不糾。復令次登文陛。渥以金罍。咸俾有三爵油油之色焉。易曰。上下交而志同。傳曰。享以訓恭。儉宴以示慈惠。則今日之兕觥旨酒。豈徒以飲食宴樂云爾哉。顧瞻諸臣。或位居諧弼。或職任卿尹。或典文翰。或司獻納。宜共成篇什。以紹雅頌之音。朕發端首倡。微柏梁體。班聯遞賡。用昭昇平盛事。冀垂不朽云。

製御麗日和風被萬方。卿雲爛熳彌紫閣。內閣大學士臣大

德洪勒一堂喜起歌明良。內閣大學士臣明珠止戈化

洽民物昌。內閣大學士臣李蔚蓼蕭燕譽

聖恩長。內閣大學士臣馮溥天心昭格時雨暘。吏部尚書臣黃機

豐亨有兆祝千箱。戶部尚書臣梁清標禮樂文章仰

聖皇。禮部尚書臣吳正治

廟謨指授靖八荒。兵部尚書臣宋德宜春回

丹詔罷桁楊。刑部尚書臣魏象樞河清海宴禹績彰。工部尚書臣朱

之珩百度胥飭綱紀張。都察院左都御史臣徐元文千官

濟濟盈巖廊。吏部左侍郎臣張士甄天工無曠勤贊襄。

吏部右侍郎臣楊永寧有年歌協臣所望。戶部左侍郎臣李天馥

共期紅朽答殊常。戶部右侍郎臣李仙根轉漕億萬充

天倉。戶部倉場侍郎臣馬汝驥邦禮叨贊慚趨蹌。禮部左侍郎臣楊正

中職司寅清佐垂裳。禮部右侍郎臣富鴻基天河洗

甲通蠻鄉。兵部左侍郎臣焦毓瑞

皇威四暢咸來王。兵部右侍郎臣陳一炳祇承欽恤和氣

翔。刑部左侍郎臣杜琳刑措不用民壽康。刑部右侍郎臣葉方鵠

八材庀化師爰旌。工部左侍郎臣趙璟左平右城開明

堂。工部右侍郎臣金羅仰窺神策驅天狼。內閣學士臣李光地膏

以大澤人胥慶。內閣學士臣張玉書

帝庸作歌追虞唐。翰林院學士臣陳廷敬身依雲漢賡

天章。翰林院學士臣張英恪秉訓厲敦羔羊。左副都御史臣宋文選

奉宣仁風之吳疆。原左副都御史臣余國柱九閭

誅蕩瞻龍光。通政使司副都御史臣余國柱斗杓高掩貫索

芒。大理寺卿臣張雲翼圖列養正親羹墻。詹事府詹黃

鐘大鏞諧禎祥。太常寺卿臣崔澄郊衢擊壤歡豐穰。

順天府府尹臣熊一滿大官珍膳羅酒漿。光祿寺卿臣馬世濟調

閑六御騰康莊。太僕寺卿臣張可前忝預風紀凜清霜。

詹事府詹事臣張吉午出入玉珮聲鏘鏘。左通政臣崔官納言惟

允尚職詳。右通政臣吳興褒忠厲節感

賜觴。右通政臣陳汝器園扉閒寂春草芳。大理寺少卿臣大

拜手好生頌禹湯。少卿臣徐旭齡前星令望欽顙印。

少詹事臣王澤弘終始念典用斯臧。少詹事臣崔蔚林言謨

行範輝縹緗。侍讀學士臣蔣弘道倚歟

至德日就將。侍讀學士臣胡簡敬叨塵侍從恩莫量。侍讀臣朱

之佐靖共夙夜無怠遑。侍講學士臣嚴我斯梧桐生矣

于高岡侍講學士 細書東觀翰墨香侍講學士

琦三德六行為士坊國子監祭酒 宮官備位

滋悚惶右春坊右庶子 六經義叶如笙簧侍讀

典奎文煥若森琳瑯侍讀 朝朝橐筆侍

御床侍講 紀載

聖治金匱藏侍講 頻年宣室虛對揚侍講

宸篇揆藻燭吳蒼侍講 承華毓德成圭璋左

青宮琪樹棲鸞鳳右諭德 金輿導從

駢雲驤司經局洗馬 果愚流影耀壁璫左

仁波溟渤同濺汪左 鸞旂乘春

零露灑右 爰賡天保矢勿忘右

表同軌來梯航大理寺 雲門磬管聲

惶右中允 泰交天闕開春陽左中允 惟

睿作聖金玉相右中允 珥筆何辛日月傍

瑞逾寶鼎兼芝房左 堯尊

夜醉星低昂右 在廷悅豫和宮商右

濫典樂正董上庠司業 治登三五

休聲颺修撰 睿謨典誥同洋洋編修

清 實 錄 康熙二十一年正月

神聖功臣職當編修 琅函瑤版書焜煌檢討

石渠高議芟秕糠檢討 日侍青禁研

鉛黃編修 願言直節謹自防史科

帝心勤民重農桑戶科 具舉細目恢

弘綱禮科 誕敷文德四國匡兵科

嘉禾既殖鋤莠狼刑科 屈軼朱草紛

琛執玉輸篚筐工科 屈軼朱草紛

兩廂掌河南道御史 封章問夜檢皂囊掌江南

擬將勁操堅蒼筤掌浙江道御史 朝無闕

事聯班行掌山西道御史 千門燎火宵未央掌

昇平高宴邁栢梁掌陝西道御史

乙丑諭禮部比年以來逆賊吳三桂背恩反

叛擾亂地方仰荷

祖宗在天之靈默垂庇佑克奏蕩平應躬詣

山陵展祭以告成功前初聞捷音即謁

孝陵行禮茲奉

太皇太后慈諭

五

太祖

太宗山陵亦應親往祭告。隨命議政王大臣等會議僉謂事關大典。允宜舉行。今擬即謁

太祖

太宗山陵。虔申昭告。用展孝思。應行事宜及需用各項。著各該衙門速行備辦。爾部即遵諭行。○丙寅。

上詣

太皇太后

皇太后宮問安。○調湖廣總督蔡毓榮為雲南貴州總督。○丁卯。議政王大臣會議。逆賊吳三桂骸骨。分發各省。吳世璠首級。交與刑部懸掛示衆。逆黨夏國相。應凌遲處死。及勢迫投降巴養元等五人。應立斬梟示。

上曰。此中尚有可議者否。大學士勒德洪。明珠奏曰。此輩罪犯已極。應正國法。似無可議。又逆賊耿精忠等十人。應凌遲處死。其逆黨黃國瑞等十九人。應立斬。

上曰。耿精忠身造罪孽。應當極刑。其子等俱行凌遲。亦有可憫。可改為斬否。明珠奏曰。耿精忠之罪較尚之信。尤為重大。尚之信不過縱酒行兇。口出妄言。耿精忠負恩謀反。且與安親王書內。多有狂悖之語。甚為可惡。

上又曰。賊黨官員內。尚有可矜者否。明珠奏曰。此內有陳夢雷。金鏡。田起蛟。李學詩四人。犯罪固應處死。然尚有可宥之處。

上曰。耿精忠等事關重大。著議政王大臣。九卿。詹事。科道。會同詳議。其吳三桂骸骨。分發各省。及吳世璠首級。懸示夏國相凌遲。巴養元等梟示等事。亦示九卿等知之。明珠奏曰。春正雖不用刑。但此輩罪惡甚大。與尋常不同。應於兩三日完結。○以翰林院侍講董訥。提督順天學政。○戊辰。議政王大臣等會議。逆賊耿精忠等。分別凌遲處斬。具題。得旨。耿精忠。革去王爵。著即凌遲處死。其子耿顯祚。革去散秩大臣。著即處斬。徐文耀。王世瑜。白顯

中江元勲曾養性王振邦蔣得輅劉進忠俱即凌遲處死黃國瑞林芳孫廖廷雲李似桂夏李旺呂應斗武灝司定猷沈偉郭景汾羅萬里祖弘勲陳儀陳斌呂八俱著即處斬耿精忠劉進忠首級著梟示田起蛟金鏡李學詩陳夢雷俱從寬免死內係旗人給與伊本主為奴係民入官給披甲新滿洲為奴餘如議○陞監察御史塞克德為都察院左副都御史○已巳諭理藩院尚書阿穆瑚瑯等曰

近見內外蒙古接壤地方互相攘奪盜竊者甚多遇此等事遣爾衙門官員前往察閱不思調和兩國裨益地方據實奏聞以副朕驅使但苟且竣局希圖脫免凡事有問諉云不知此等事情皆朕親行諮訪得之爾等堂司官何曾啟奏一事爾衙門司官筆帖式並無一人克盡職掌著將此諭傳知以後務期勤慎効力不得仍前草率疎忽○封和碩安親王岳樂子岳希為多羅僖郡王輔國公綽克

託子蘇嚴為輔國公○授輔國將軍巴爾善之子永壽墨美之子拜塞俱為三等奉國將軍奉國將軍費揚午之子畢喇錫為奉恩將軍○調江西總督董衛國為湖廣總督○裁江西總督缺歸併江南總督為江南江西總督○戶部議覆廣西巡撫郝浴疏言粵西地丁錢糧每銀一兩折收米一石原係一時權宜之計今二省之運既停八旗之兵又撤康熙二十一年分折徵米石請照舊徵銀應如

所請從之○磔逆貴州提督李本深於市伊孫李象乾李象坤及民籍親弟之子李濟祥李濟民並立斬○辛未諭戶部漕糧定例官收官兌獨浙江民兌另立私截之名困苦百姓著檄巡撫嚴禁違者即行叅劾○壬申上詣

太皇太后宮問安○鐫

御製昇平嘉宴詩序及詩於石貯翰林院敬一亭○禮部題琉球進貢來使毛見龍等請命



廷臣往封伊國王。今議將封敕交與來使齎回。得旨。伊等輸誠懇求遣使。應特遣官往封。○癸酉。禮部議覆浙江道御史任珦請定典禮一疏。嗣後凡遇

太皇太后

皇太后聖壽節。

萬壽節及元旦冬至令節慶賀行禮之儀在京文武各官并直隸各省進表官員在午門外排班聽鴻臚寺官員接傳於

皇上行禮時跟隨行禮。從之。○甲戌。禮部題鎮國將軍品級馬喀納之母守節年五十歲。應照例給與銀兩緞疋獎諭旌表。正紅旗八品官覺羅鄂信妻常氏隨夫殉節。應遣官致祭。從之。○乙亥。以故一等公噶布喇子長泰襲爵。○以內閣學士格爾古德為直隸巡撫。○兵部議覆土科給事中碩穆科疏言吳逆叛亂暫停軍政。今滇逆蕩平。軍政大典應仍舉行。查軍政自康熙十一年舉行之後。至康熙

十六年暫停。今仍應舉行。各官所行之事。併事故履歷。應從康熙十一年軍政後開起。九門千總等。今設有九門提督。應聽該提督填註考語。造冊開送。舊例止有見任總兵官自陳。今候補及隨征總兵官等均令其自陳。副將以下候缺官員。仍照例各原任考察。從之。○丙子。陞光祿寺卿馬世濟為都察院左副都御史。○兵部議覆河南道監察御史孫必振疏言吳逆變亂。李師膺為陝西韓城縣城守武弁首先倡亂。後又隨王輔臣為賊投誠。後雖立有微功。不足贖其倡亂之罪。查李師膺原係陝西神道嶺遊擊。於康熙十四年二月內。將韓城縣知縣翟世琪殺害。至康熙十五年六月內。在撫遠大將軍圖海軍前投誠。後安遠靖寇。大將軍多羅貝勒察尼取岳州。叙招撫難民功。將李師膺授為隨征湖廣岳州總兵官。但李師膺背恩謀叛。勢迫投誠。雖有招撫難民之處。並非立有剿賊効力之功。

應將李師膺革職其員缺見在議裁不必推補從之○戊寅

上詣

太皇太后宮問安○授故固山貝子顧爾瑪渾之子薩山為三等輔國將軍

實錄卷一百

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百一

監修總裁官光祿大夫太保無太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十一年壬戌二月己卯朔庚辰陞

實錄卷一百一

吏部左侍郎達都為都察院左都御史○陞

正紅旗滿洲副都統殷圖為護軍統領○調

正黃旗蒙古都統侯巴渾德為滿洲都統○

議政王大臣等議都統根特不請旨擅拘禁

提督佟徽年又不進重慶輒以山大路險題

請又令進剿譚弘彭時亨復推諉規避應削

職得旨根特才具頗優人亦勇健情罪不甚

重大即行削職似屬可惜著降級從寬留任

○旌表江南烈女程道翼聘妻汪氏夫亡聞

計自縊給銀建坊如例○辛巳。

上詣

皇太后宮問安○裁鄖陽提督缺設副將一員中軍都司一員左右二營守備二員留兵一千六百名○議政王大臣等察議護軍叅領圖爾度渾等軍機情罪分別革職降級。

上諭大學士等曰此議尚輕圖爾度渾原係侍衛朕甚優眷彼應率先衝鋒比衆倍加奮力為是反以行軍大道為狹隘妄稱不能旋馬後知事悞又巧稱並無此言若此輕擬何以勉勵後人我朝用兵全賴前鋒哨探倘皆效尤如何行師伊等罪犯革率輕擬不合爾等傳諭議政王大臣等知之○壬午。

上詣

皇太后

皇太后宮問安○陞詹事府詹事達岱為內閣學士兼禮部侍郎○陞偏沅按察使馬斯良為福建布政使司布政使○以故歸化城都

統托波克子佐領吳巴錫為歸化城都統○免廣西柳州府貴州慶遠府康熙十八年民欠額賦○予故太子太傅都統三等公議政大臣中和殿大學士兼吏部尚書圖海祭葬加祭二次諡文襄○先是左副都御史余國柱請釐正

郊廟燕享樂章。

上曰饗祀樂章一代制作所係禮部翰林院集議以聞至是部臣等議自古廟樂原以頌述

祖宗功德本朝郊祀

天地各

壇廟樂章曲名曰平見今遵用已久況

太祖

太宗

世祖同在

太廟致祭不便分廟另撰宜如舊惟朝會燕饗等樂會典所載曲調風雅未備宜敕下所司酌古準今求聲律之原定雅奏之節進呈請

定嘉名以昭盛典從之○癸未。

上御太和門視朝文武陞轉各官謝恩○以滇省蕩平遣官祭嶽鎮海濱歷代帝王陵寢先師闕里○陞大理寺少卿榮國祚為光祿寺卿○宗人府題閒散宗室勒爾錦贈朱方旦至人里聖人堂扁額○原任湖廣巡撫張朝珍贈聖教帝師扁額○應行文巡撫王新命查其果有憑據否○或係朱方旦自行標榜俟問明具題到日再議。

上諭大學士等曰此事無庸行查○前勒爾錦領兵在荊州時朕已聞此等事○曾諭彼時差去之人朕知朱方旦係狂妄小人軍機大事萬不可聽其蠱惑○又對秦遣往軍前○回時路經武昌原任巡撫張朝珍向對秦云朱方旦果一奇異神人○爾宜相會遂接見以賓禮優待○由此觀之勒爾錦等所贈扁額是真○著即議結○尋議勒爾錦見在羈禁○張朝珍已經病故○俱無庸議○得旨張朝珍所刺世襲官革去○刑部等衙門議覆投賊奔回護軍傳客應即

處絞○將妻孥交與內務府。

上曰此非甚可惡之人○且自行奔回○著從寬免死○發落○喀爾喀多羅貝勒滾布伊爾登故遣官致祭○甲申。

上詣

太皇太后

皇太后宮問安○

上御經筵○以吏部尚書黃機工部尚書朱之

弼為會試正考官翰林院掌院學士陳廷敬

戶部左侍郎李天馥為副考官○裁江西饒

州總兵官缺○設叅將一員○乙酉○轉吏部右

侍郎覺羅沙賴為左侍郎○調戶部左侍郎科

爾坤為吏部左侍郎○管右侍郎事○調正紅

旗蒙古副都統公彭春為滿洲副都統○調

山東提督何傳為四川提督○丙戌。

太皇太后聖壽節值祭

社稷壇齋戒未行慶賀禮○

上詣

太皇太后宮問安○以內大臣舅舅佟國維為領侍衛內大臣○調河南巡撫董國興為福建巡撫○陞江西布政使王日藻為河南巡撫○戶部議覆湖廣巡撫主新命疏言從前楚省漕糧留充兵餉其里民交納盤運腳米亦令折銀以濟兵需今大兵盡撤漕米已經起運其里民交納盤運腳米仍請復給應如所請從之○丁亥遣大學士李蔚祭

先師孔子○陞浙江嘉湖道王定國為江南安徽按察使司按察使○旌表山西陽城縣烈婦張任妻王氏夫亡自盡給銀建坊如例○戶部議覆浙江巡撫李本晟疏言浙省漕糧舊例每石貼給漕截銀三錢四分七釐前因籌餉每石裁銀一錢四分七釐以佐軍需今天下盡已平定各省錢糧俱行酌復請將浙省所裁貼給漕截銀給還并丁應如所請從之○戊子祭

大社

大稷

上親詣行禮○已丑

孝康章皇后忌辰遣官祭

孝陵○諭烏喇將軍巴海等今以雲南等處底

定躬詣盛京告祭

三陵意欲於扈從人等餽養馬匹之暇省觀烏喇地方將軍應從何處帶領兵丁候迎可與

盛京將軍定議行之再產鱣鯉等魚之處爾

即詢明烏喇西特庫會同將需用諸物悉加

備辦完整特諭○陞翰林院侍讀學士牛紐

為詹事府詹事○贈四川殉難廣安州知州

徐盛四川布政使司叅議夔州府通判薛人

鳳營山縣知縣廖士貞渠縣知縣王質四川

按察使司僉事各予祭葬○營山縣典史劉廷

臣潛江縣主簿予祭銀各廕一子入監讀書

○庚寅春分朝

日於東郊

上親詣行禮○

上率諸王文武大臣侍衛詣

慈寧宮補行慶賀

太皇太后聖壽節禮遵

懿旨停止筵宴（辛卯）

上為

太皇太后祝釐居景山齋戒祭星遣近御侍衛

關係慈寧宮首領太監牛之奇乾清宮首

領太監顧文興祭星三年○議政王大臣會

議原任布政使成額筆帖式巴席書舒從賊

應立斬得旨伊等情罪法難寬宥且巴席係

滿洲人與巴三綱聯為兄弟情罪甚為可惡

依議立斬成額書舒改立絞○叙恢復海澄

廈門金門功給福建總督姚啟聖拜他喇布

勒哈番又一拖沙喇哈番○

上以親祭盛京

陵寢暫停殿試俟回鑾日舉行○壬辰諭學士

張英爾素性醇樸侍從有年朝夕講筵恪共

盡職茲因爾父未葬具疏請假朕念人子至

情忠孝皆出一理准假南旋特賜白金五百

兩表裏二十疋既旌爾勤勞無資墓田之用

爾其欽悉朕惓惓至意○直隸巡撫格爾古

德陸辭

上諭曰凡為官者承貪吏之後名譽甚易承廉

吏之後名譽甚難金世德于成龍居官有聲

爾繼其後得名必遲爾母欲速以求名速則

恐致貽害直隸旗下莊頭與民雜處朕聞所

在尤惡莊頭自以旗下倚恃其主甚為民害

爾到任後加意嚴查務期懲創即皇莊亦毋

寬宥○轉戶部右侍郎額庫禮為左侍郎調

刑部右侍郎宜昌阿為戶部右侍郎○賜朝

正外藩王貝勒貝子公台吉等銀幣鞍馬有

差○九卿議覆給事中雅齊納條奏請將九

江權關移於湖口地方一議不准行一議准

行

上命畫一議奏尋九卿議暫移九江關於湖口

收稅以一年所得為定額若有不便具題另

議從之○癸巳

上以雲南底定。海宇蕩平。躬詣

永陵

福陵

昭陵告祭。命皇太子允初隨駕。是日啓行。駐蹕

三河縣采果營。○陝西岷州衛圓覺等六寺

番僧進貢。宴賚如例。○裁山東提督缺。○甲

午。

上駐蹕薊州賢渠莊。○遣官祭

先農之神。○外藩王貝勒貝子公台吉等請

上

尊號。得旨。朕自御極以來。夙夜孜孜。勤求化理。

期於中外乂安。生民樂業。今逆寇雖已蕩平。

治化尚未孚洽。前諸王大臣等請上尊號。已

經有旨。這外藩王等所請。亦不必行。○以實

授都統。未指旗分。穆占為正黃旗蒙古都統。

○九卿詹事科道等議。覆翰林院侍講王鴻

緒疏。恭楚人朱方旦。詭立邪說。妄言休咎。煽

惑愚民。誣罔悖逆。經湖廣巡撫王新命審實。

具題朱方旦應立斬。顧齊弘。陸光旭。翟鳳彩。

甘稱弟子。造刻邪書。傳播中外。俱應斬監候。

從之。○乙未。遣多羅惠郡王博翁果諾告祭

孝陵。遣多羅平郡王羅可鐸告祭

仁孝皇后。

孝昭皇后陵。

上親率內大臣侍衛等詣

孝陵行禮。奠酒舉哀。次至

皇后陵。奠酒舉哀。○遣官祭

歷代帝王。

上駐蹕玉田縣。○丙申。

上駐蹕豐潤縣。○丁酉。

上駐蹕灤州王家店。○戊戌。奏

太皇太后書曰。臣躬詣

陵寢。暫別庭闈。叨蒙庇佑。一路安善。可慰

聖懷。因此恭請萬安。臣引領殿陛。不勝瞻切之

至。○奏

皇太后書同。

上遣領侍衛內大臣舅舅佟國維大學士明珠  
往伯夷叔齊廟行禮。諭曰。伯夷叔齊。古之聖  
人。清風可仰。爾等前往。可焚香展敬。

上駐蹕盧龍縣范家莊。○已亥。

上駐蹕撫寧縣。○陞江西袁臨總兵官趙應奎  
為廣西提督管左江總兵官事。○庚子。

上駐蹕山海關二十里舖。○免江南海州沐陽  
等三州縣康熙二十年分水災額賦。○陞右  
通政吳璵為太僕寺卿。○以山西冀寧道焦

榮為雲南按察使司副使。提調學政。○以故

二等精奇尼哈番薩哈納親弟之子智勇襲

職。○以候補總兵官張永祥為湖廣襄陽總

兵官。○調貴州大定總兵官四什六為雲南

鶴慶麗江總兵官。○旌表江南節婦梁氏等

二十一人。烈婦張氏等三人。各給銀建坊如

例。○偏沅巡撫韓世琦疏言料理廣西軍務

督捕右理事官麻勒吉移稱逆賊黃明已被

苗人殺死。應撤兵回楚。下部知之。○辛丑。

上出山海關行圍射殪二虎。駐蹕王保河地方。  
○壬寅奏。

太皇太后書曰。臣自東行以來。於二十三日已  
出山海關。恐煩垂念。特此奏知。謹請

聖躬萬安。曷勝懸想之至。○奏。

皇太后書同。○

上行圍射殪二虎。駐蹕中後所。○癸卯。

上行圍射殪二虎。駐蹕寧遠州。○甲辰。

孝昭皇后忌辰。遣官祭

陵。○

上駐蹕錦縣七里河。○乙巳清明節。遣官祭

永陵。○

福陵。○

昭陵。○

孝陵。○

仁孝皇后。○

孝昭皇后陵。○

上駐蹕大凌河。○丙午。



上行圍射。殪二虎。駐蹕廣寧縣閭陽驛。○丁未。

上駐蹕廣寧縣羊腸河。○遣領侍衛內大臣舅

舅佟國維、大學士明珠往北鎮廟行禮。○戊

申。奏

太皇太后書曰。臣睽離訓誨。思念日增。戀戀之

心。須臾不能忘也。日前請候起居。定蒙

慈鑒。再此恭請

萬安。曷勝嚮往之至。○奏

皇太后書同。是日。

上駐蹕滾諾爾地方

三月。己酉朔。

上駐蹕白旗堡。○陞福建按察使張所志為江

西布政使。司布政使雲南永昌道范時秀為

湖南按察使。司按察使。○予故二等精奇尼

哈番晉布。祭葬如例。○禮部議陝西岷州衛

圓覺寺番僧厚只即丹子當逆賊變亂之時

糾合土兵攻取城池。已封弘濟光教大國師

再撥給陝西岷州衛屬官地五頃。免其納糧。

從之。○庚戌。

上於遼河網魚。賜扈從諸王貝子公等內大臣

侍衛部院大臣官員。是日駐蹕遼河西。○辛

亥。盛京將軍安珠護等及文武各官迎

駕。是日駐蹕永安橋西。○壬子。

上謁

福陵行禮。奠酒舉哀。又謁

昭陵行禮。奠酒舉哀。是日駐蹕盛京。○癸丑。

上率諸王貝子公內大臣侍衛文武三品以上

官及蒙古王台吉等詣

福陵。以雲南底定。海宇蕩平。大祭

寶城。○奏

太皇太后書曰。臣於初四日至盛京謁

陵已畢。祭告之事次第舉行。盛京風土淳厚。仰

見

祖宗創立鴻基。庇蔭子孫不淺也。專此遣人恭

請

萬安。○奏

皇太后書同○甲寅

上率皇太子諸王大臣官員等詣

福陵大祭

隆恩殿文曰孝曾孫嗣皇帝玄燁敢昭告於

太祖承天廣運聖德神功肇紀立極仁孝睿武

弘文定業高皇帝

孝慈昭憲敬順慶顯承天輔聖高皇后尊靈曰

臣祇承鴻緒撫蒞多方惟逆賊吳三桂叛自

滇南煽動閩粵黔蜀楚南等地興師四征以

次底定遺孽吳世璠敗遁竊伏滇城遣定遠

平寇大將軍固山貝子章泰征南大將軍都

統賴塔等進攻克復殄滅兇渠顧此一方反

側遂致海內騷騷將士疲於征調生民困於

轉輸於茲八載疆宇靡寧惟

祖宗之靈遏除亂畧獲奏蕩平此皆仰賴

先德默垂眷祐今臣躬詣

山陵率諸王文武羣臣以告捷禮虔祀

隆恩殿伏惟歆鑒○乙卯

上率諸王貝子公內大臣侍衛文武三品以上  
官及蒙古王台吉等詣

昭陵以雲南底定海宇蕩平大祭

寶城○遣領侍衛內大臣舅舅佟國維祭功臣

額親王薩哈廉墓內大臣都統巴泰祭克勤

郡王岳託墓內大臣伯費揚古祭武勲王揚

古利墓內大臣索額圖祭直義公費英東墓

內大臣坤巴圖魯侍衛祭弘毅公額亦都墓

內大臣覺羅鄔默納祭忠義公圖爾格墓○

予四川萬安縣陣亡三等護衛塞稜祭葬如

例○兵部議覆吏部郎中薩畢圖等往浙江

察審左都御史徐元文疏叅浙江副都統高

國相一案高國相奪民居屋放債取利擅派

民夫干預民詞各款俱實應革職援赦免罪

從之○丙辰

上率皇太子及諸王大臣官員等詣

昭陵大祭

隆恩殿祭文與祭

福陵文同○賞賚

陵寢官員及盛京大臣官員有差。又偏賜盛京年老致仕官員及中傷殘疾老病告退甲士人等○遣尚書郭四海祭多羅靖定貝勒飛揚武多羅安平貝勒都督鎮國公馬占墓。侍郎覺羅沙賴祭碩翁科羅巴圖魯圖魯什墓。侍郎額星格祭輔國公塔拜鎮國將軍聶克塞墓。侍郎郭丕祭都統納穆泰都統楞額禮墓。侍郎黨務禮祭大學士達海巴克什大學士雅秦都統達爾哈額駙墓。副都御史塞克德祭鎮國將軍湯伍泰墓。侍郎溫代祭內大臣伊爾登尚書薩穆什喀墓。侍郎阿喇尼祭領侍衛內大臣精奇尼哈番多爾濟內大臣諾爾布占圖謝土墓。侍郎明愛祭二等伯明阿都統覺羅拖博輝墓。學士庫勒納祭原列五大臣內碩翁科羅巴圖魯尚書伊孫墓。詹事牛紐祭額駙李永芳都統博爾金侍衛墓。通政使席蘭泰祭鎮國將軍慕爾察內大臣

宗室額克泰墓。大理寺卿恕舒祭盛京昂邦章京葉克書尚書冀孫墓。少詹拉巴祭內大臣公常龍一等精奇尼哈番巴奇蘭墓。太僕寺卿色楞祭精奇尼哈番侍衛席爾巴墓。鴻臚寺卿安太祭隨從

太宗文皇帝安達理敦達理墓。太常寺卿席爾達祭尚書車爾格墓。光祿寺卿鄂哈祭盛京將軍阿穆爾圖墓。少卿護穆布祭內大臣覺羅色勒墓。司業葛思泰祭尚書馬福塔墓○  
奏

太皇太后書曰。臣於初五日遣人回京陳述愚款。必蒙

聖覽。今者

福陵

昭陵告祭方畢。擬初九日率領諸王大臣往謁永陵。為此恭請

萬安○奏

皇太后書同○又奏

太皇太后書曰。臣自山海關至盛京。水土皆佳。獸多魚鮮。每當食頃。輒念不能馳奉。

太皇太后聖祖母甚歎於懷。到盛京後。身親網獲鯉魚。鯽魚。設法成段。浸以羊脂者一種。鹽醃者一種。星馳遞送。心期奉到之日。倘得味仍鮮美。庶可稍見微誠。山中野燒自落榛實。及山核桃。朝鮮所進柿餅。松子。白菓。栗子。附候。

安奏啟同往。伏乞

俯賜一笑。不勝欣幸。○諭戶部。刑部。朕承

祖宗丕緒。撫御區宇。日以子育。元元為念。自逆賊吳三桂倡亂滇南。多方煽動。軍興八載。中外騷騷。仰賴

祖宗在天之靈。默垂眷佑。殄滅兇渠。民生久安。疆圉底定。特行偏祀。

山陵之禮。用告成功。茲恭詣

福陵

昭陵。謁祭禮竣。惟盛京為國家肇基重地。朕躬

親幸。宜沛大澤。以示殊恩。山海關以外。及寧古塔等處。地方官吏軍民人等。除十惡死罪不赦外。其餘已結未結。一切死罪。俱著減等發落。軍流徒杖等犯。悉准赦免。奉天錦州二府屬。康熙二十一年地丁正項錢糧。著通行蠲豁。其官役墊補包賠等項。應追銀兩。察果家產盡絕。亦并豁免。用稱朕加惠根本。優恤黎民至意。特諭。○丁巳。

上自盛京詣祀

永陵。行圍射殪一虎。駐蹕琉璃河。○戊午。

上行圍射殪三虎。駐蹕扎凱地方。○己未。

上率扈從諸王貝子公。內大臣侍衛。文武三品

以上官及蒙古王。台吉等。謁

永陵。行禮奠酒。舉哀。以雲南底定。海宇蕩平。大

祭

永陵祭文與祭

福陵文同。○遣內大臣覺羅塔達。祭武功郡王

禮敦巴圖魯墓。內大臣公福善。祭恪恭貝勒

塔察篇古墓。又遣內大臣覺羅塔達祭

陵寢附近地方。覺羅祖墓。○庚申。

上巡行烏喇地方。是日行圍射殪一虎。駐蹕嘉祜禪地方。○予故二等精奇尼哈番沙哈納祭葬如例。○予故副都統一等阿思哈尼哈番席布祭葬如例。○辛酉。

上行圍射殪三虎。駐蹕鄂爾鐸哈達曾家寨地方。○奏

太皇太后書曰。臣初九日自盛京啟行。十一日

詣

永陵告祭。環視地形。山迴水繞。佳氣鬱蔥。真是

興王基業也。茲因大典已畢。敬想

祖宗開疆非易。臣至此甚難。故欲躬率諸王。貝勒大臣。蒙古等。周行邊境。親加撫綏。兼以畋獵講武。俟所至何處。再當具奏。專此恭請

萬安。○奏

皇太后書同。○壬戌。

上行圍射殪二虎。駐蹕哈達畢喇地方。○吏部

議

永陵殿瓦蓋造不謹。以致滲漏。將掌管關防官托倫。員外郎吳庫。應革職。得旨朕至此親閱此地極寒。冰凍特甚。其修造時。如值冰凍。難於堅固。伊等姑行寬免。令其再行加意修造。○癸亥。

上行圍射殪一虎。駐蹕喇湖塔鄂佛羅地方。○甲子。

上行圍射殪五虎。駐蹕庚額地方。○乙丑。

上行圍射殪三虎。駐蹕庫魯地方。○奏

太皇太后書曰。十三日。曾有賤奏。奉達

慈聽。巡狩東行。皆平山巨澤。日間行五六十里。

今至布爾哈扎色地方。專此恭請

萬安。○奏

皇太后書同。○以故三等伯阿喇密孫雅爾護襲爵。○丙寅。

萬壽節。以

上恭祭

陵寢停止行禮筵宴○遣官祭

福陵。

昭陵。

孝陵。

仁孝皇后。

孝昭皇后陵○遣官祭真武東嶽城隍之神○

上御行在黃幄扈從諸王貝子公等及蒙古諸

王台吉等內大臣侍衛及盛京文武官員行

慶賀禮是日駐蹕宜闡穆哈連地方○丁卯

上行圍射殪四虎駐蹕夸闡畢喇地方○以真

定總兵官石文炳為杭州左翼副都統○戊

辰。

上行圍射殪一虎駐蹕阿爾灘諾門地方○奏

太皇太后書曰臣雖屢有奏章言未盡意京師

地暖時屆春深遙知

聖體康和

聖情嘉悅臣心殊為欣慰也專此恭請

萬安○奏

皇太后書同○寧古塔將軍巴海來朝○巳巳

上行圍射殪二虎駐蹕色穆懇畢喇地方○庚

午。

上駐蹕蘇瓦顏畢喇地方○辛未。

上駐蹕薩隆畢喇地方○壬申。

上駐蹕搜登地方○癸酉。

上至吉林烏喇地方率皇太子及扈從諸王貝

子公等蒙古諸王台吉等內大臣侍衛文武

官員詣松花江岸東南向望秩長白山是日

上駐蹕吉林烏喇軍屯地方○予故兵部侍郎

項景襄祭葬如例○甲戌奏

太皇太后書曰臣蒙

溫諭緩行深加慰勞頃者所歷邊境頗近烏喇

二十五日已至其處因思長白山乃

祖宗發祥重地臣叨繼大統不能躬行祭祀故

於烏喇地方遙拜名山以展望祀之典暫停

一二日即可回盛京矣所有愚款另遣人陳

奏先此恭請

萬安○奏

皇太后書同○乙亥

上登舟。泛松花江。往大烏喇。駐蹕捕塔海噶山。蒙古諸王。台吉。並內大臣。侍衛等。扈從其諸王。貝子。公等。部院大臣。官員。俱留住烏喇地方。○以科爾沁故多羅貝勒鄂緝爾子巴克什古爾襲爵。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二

監修總裁官光祿大夫太保無太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十一年壬戌夏四月戊寅朔享

太廟遣輔國公葉伯舒行禮○

上於松花江網魚。賜外藩諸王。台吉。並內大臣。

侍衛等○奏

太皇太后書曰。臣於二十六日。曾將情節詳行陳奏外。烏喇等處地方。於二十六。二十七日。又經大雨。道路甚是泥濘。河渠水漲。渡橋盡行衝決。一二人尚可行走。行營人衆跋涉殊屬艱難。故臣與諸臣。公同商議。少延數日。俟水勢稍掣。即當速回。總不越八十日之限也。



為此恭請

萬安○奏

皇太后書同○已卯兵部議覆寧古塔將軍巴海疏言巡躡採參官兵請議給賞定例以示勸懲應如所請視緝獲多寡分別議叙得旨盜採人參官兵蹤跡緝獲者視所獲多寡議叙甚為允當但恐非係採參之人妄有拘執奪其資財俾子身採捕他物者無故罹害亦未可知嗣後有犯此者作何處分爾部再議以聞尋議巡踪章京兵丁誣拏無辜之人將章京革職兵丁枷號兩個月鞭一百若奪取財物者將章京革職交與刑部議罪兵丁枷號三個月鞭一百其打蜂窩水獺人等執信票在分內地界行走如巡踪章京兵丁圖功誣拏奪取財帛等物者亦照誣拏無辜之人治罪或無信票或有信票而不在分內地界行走往別地界行走或於信票內人數之外多帶偷創人參等行走者仍照常緝拏從之

○辛巳

上回鑒駐蹕烏喇吉林軍屯地方○壬午調刑部左侍郎杜臻為吏部左侍郎管右侍郎事○一等阿思哈尼哈番又一拖沙喇哈番多爾濟故無應襲之人以其堂弟巴瑯襲職○補行貴州鄉試以編修沈旭初為正考官戶部主事陸鍾呂為副考官○癸未賜烏喇將軍副都統佐領等宴并袍服緞疋鞍轡等物有差兵丁均賜銀兩賚烏喇致仕官員及中傷殘疾老病告退甲士人等○甲申

上駐蹕薩隆畢喇地方○乙酉

上駐蹕伊爾門畢喇地方○丙戌

上駐蹕蘇瓦顏畢喇地方○丁亥

上駐蹕伊巴旦噶山○加欽天監治理曆法通政使南懷仁工部右侍郎銜以製造礮位精堅議叙也○陞河南河北道趙進美為福建按察使司按察使○宴衍聖公孔毓圻等於禮部○禮部題雲南土司副將因殉難贈左



都督徐升耀家口在雲南武定府靈樞在四川保寧府應遣官前往保寧致祭得旨徐升耀招撫逆賊殉難深為可憫著該地方官將骸骨馳驛送回原籍到日爾部遣官致祭○兵部題偽將軍王公良王仲禮偽巡撫吳讜偽侍郎劉國祥偽太僕寺卿蕭應秀偽員外郎劉之延等值逆賊吳三桂變亂即助惡反叛擾害地方應行文將軍馬緝總督蔡毓榮巡撫王繼文即行處斬至原任鎮遠副將從逆為偽將軍鎮遠伯江義不思

皇上擢用封疆之任以圖報効乃背恩反叛助吳三桂行惡情罪甚重及大兵恢復雲南仍隨逆賊胡國柱逃匿勢窮始來歸誠應行文將軍馬緝等即凌遲處死并王公良等首級懸示伊等十六歲以上子亦俱在彼處處斬家產籍沒其妻并未及年歲之子查交內務府其餘微員該督撫等分發山東河南湖廣江西省安插投誠偽總兵以下人等應歸入

凱旋官兵六起內赴京從之○兵部題原任經畧中軍總兵官吳石珊係留軍前効力贖罪之人今雲貴恢復應令吳石珊同大兵來京到日再議得旨吳石珊係包衣佐領下舊人順從王輔臣深為可惡著拏送來京○兵部題逆賊胡國柱王緒李匡等各處抗拒大兵及恢復雲南潛身逃竄屢次招撫不即投誠被大兵迅追緝拏情極始行自縊蹈火而死情罪重大伊等子弟法難寬宥應行文將軍總督等悉行處斬妻女家口財物籍沒送交內務府從之○兵部議覆廣西巡撫郝浴疏言安南都統使莫元清同弟莫敬光為安南鄭祚攻逼投奔內地並無從逆助惡擾害地方之跡但先經原任將軍莽依圖疏稱莫元清棄高平敗奔富州又安南國王黎維正疏稱吳三桂變起莫元清同惡相濟為賊辦糧莫元清蒙

皇上鴻恩封為都統使駐防高平不圖報恩吳

三桂反叛。即從賊助惡。理應從重治罪。但已身故。應免議處。革去都統使之職。莫敬光既經帶領家眷。繳印投誠。免其應擬之罪。係外國之人。不便居於內地。應行該督撫將莫敬光及伊帶來家眷。一并發回安南。移咨國王。將莫敬光等。毋致殘害。務令安插得所。從之。  
○勇畧將軍趙良棟疏言。臣於二月十二日。抵鎮遠府。已出雲貴之境。而大將軍貝子章泰等。尚在雲南。臣應否先至京師伏候

聖諭得旨。趙良棟不必候大將軍著即先來。  
戊子。

上駐蹕阿濟格雅哈畢喇地方。○己丑。

上行圍射。殪一虎。駐蹕噶哈達巴漢地方。○庚寅。

上駐蹕葉赫和屯西塔克通阿地方。○辛卯。

上行圍射。殪一虎。駐蹕威遠堡。○免湖廣沔陽潛江等三州縣。沔陽荊州等四衛。康熙二十年分水災額賦十之三。○命翰林院檢討汪

輯為正使。內閣中書舍人林麟煊為副使。往封琉球國世子尚貞。為琉球國中山王。詔曰。朕恭膺

天眷。統御萬邦。聲教誕敷。遐邇率俾。粵在荒服。悉溥仁恩。奕葉承祧。並加寵錫。爾琉球國地居炎徼。職列藩封。中山王世子尚貞。屢使來朝。貢獻不懈。當閩疆反側。海寇陸梁之際。篤守臣節。恭順彌昭。克殫忠誠。深可嘉尚。茲以序當續服。奏請嗣封。朕惟世繼為國家之常經。爵命乃朝廷之鉅典。特遣正使翰林院檢討汪輯。副使內閣中書舍人林麟煊。齎詔往封。為琉球國中山王。爾國臣僚。以暨士庶。尚其輔乃王。慎修德政。益勵惇忱。翼戴天家。慶延宗祀。實惟爾海邦無疆之休。○壬辰。

上行圍射。殪一虎。駐蹕三塔堡地方。○奏太皇太后書曰。臣於十六日。回至盛京矣。自謁陵望祀長白山以來。經過之處。軍民人等。無不懽忻鼓舞。喜見太平。皆仰賴

聖祖母鴻庥福庇所致也。專此恭請

萬安○奏

皇太后書同○癸巳。

上駐蹕盛京○甲午。

孝端文皇后忌辰。遣官祭

昭陵○先是福建提督施琅奏賊踪久泊澎湖。悉力固守。當此冬春之際。颶風時發。我舟驟難過洋。臣見在練習水師。又遣間諜通臣舊時部曲。使為內應。請俟明年三四月間進兵。可獲全勝。

上允之。至是施琅又奏夏至南風盛發。不可進兵。請至十月大舉。

上命議政王大臣等集議。僉謂師期不便屢遷。應檄總督姚啟聖提督施琅克期於夏至後進取臺灣。得旨進剿海寇關係重大。總督姚啟聖提督施琅身在地方。務將海面形勢賊中情狀審察確實。如有可破可剿之機。著協謀合慮。酌行剿撫。毋失機會○丙申。

上以回鑾率扈從諸王貝子公等內大臣侍衛文武三品以上大臣官員及外藩王台吉等詣

福陵。

昭陵奠酒。舉哀○以阿霸哈納故固山貝子董宜斯噶卜子滾楚克扎卜襲爵○丁酉。命皇太子量帶內大臣侍衛文武大臣官員從勾驪河大路還。

上率諸王貝子公等及內大臣侍衛文武大臣官員往遼陽州。諭大學士明珠曰。朕巡行沿邊地方。凡設立界限處墳墓毀損。枯骨暴露者甚多。著盛京將軍安珠護徧察瘞埋○遣內大臣公坡爾盆致奠達爾漢巴圖魯親王墓。和碩額駙訥爾杜致奠卓爾圖貝勒墓○

上駐蹕遼陽州城內○戊戌。

上駐蹕吉黃屯○兵部題懷忠將軍海潮龍咨稱吳逆叛時。偽總兵劉芝林將伊舉家擒拏。俱行分散。資財抄洗。應行文鎮安將軍馬緝

并雲貴督撫將所抄海潮龍見貯家財及家  
口查還其入在來京六起之內者亦查明發  
還從之○已亥

駕過海城縣遣內大臣公坡爾盆往平南親王  
尚可喜墓奠酒是日

上駐蹕牛莊城內○庚子

上行圍射殪一虎駐蹕沙嶺城內○辛丑

上駐蹕壯鎮堡地方○禮部題廣東節婦海陽

縣周氏夫亡毀容守節烈婦歸善縣胡氏海

陽縣張氏夫亡自盡烈女順德縣李氏簡姑

琬姑玠姑潔姑寅姑璇姑不受賊汚連臂投

淵貞女南海縣譚氏盧氏三水縣梁氏未婚

守節應照例給銀建坊旌表從之○壬寅

上駐蹕大凌河西○癸卯

上駐蹕七里河地方○甲辰

上行圍射殪一虎駐蹕寧遠州城西南○乙巳

上駐蹕中後所○尚陽堡流犯王廷試子王德

麟叩闕稱伊父以窩逃充發今年老懇發回

原籍願以身代督捕議不准行

上曰王德麟控稱伊父年已衰老願以身代罪  
情實可憫且過朕來此得以陳情叩闕此亦  
伊難得之遇其父子又俱係讀書人著一併  
發回原籍後不為例○丙午

上駐蹕王保河地方○丁未

上入山海關駐蹕撫寧縣鹽務里○奏

太皇太后書曰臣久別

庭闈急欲瞻仰

聖顏四月三十日進山海關五月初一日留皇

太子同大營按程緩行臣當先詣

宮闕恭請

萬安初四五之間必可到都瞻

慈雲之日近奉

教誨之有期謹奏○奏

皇太后書同

五月戊申朔

上駐蹕永平府○以廣西平南縣知縣周岱生

閩門殉難。贈按察使司僉事。予祭葬。廕一子。入監讀書。○予湖廣長沙陣亡拖沙喇哈番齋薩泰。沙禮。各祭葬如例。○己酉。

上駐蹕豐潤縣。○庚戌。

上以回鑾。率內大臣侍衛等詣

孝陵。奠酒舉哀。次至

仁孝皇后

孝昭皇后陵。奠酒舉哀。是日。駐蹕薊州。○

仁孝皇后忌辰。遣官祭

陵。○辛亥。

上回京。詣

太皇太后

皇太后宮問安。○以江西建昌府知府鄒暉為

雲南按察使司副使。提調學政。○壬子。

上詣

太皇太后宮問安。○

上諭大學士等曰。流徙寧古塔烏喇人犯。朕向

者未悉其苦。今謁

陵至彼。目擊方知。此輩既無屋棲身。又無資力耕種。復重困於差徭。況南人脫弱來此。苦寒之地。風氣凜冽。必至顛踣溝壑。遠離鄉土。音信不通。殊可憫惻。雖若輩罪由自作。然發遼陽諸處安置。亦足以蔽其辜矣。彼地尚有田土。可以資生。室廬可以安處。且此等罪人。雖在烏喇等處。亦無用也。○廣西巡撫郝浴條奏。撫標官兵。不應裁去。九卿會議。山東江寧河南山西直隸兵丁。應俱留一千名。其餘各省。俱留一千五百名。得旨。巡撫舊制。管兵至輔政諸臣時。始行停止。朕思裁兵一事。關係最為緊要。必措置得宜。地方始得安寧。每見武弁額兵有名。無實。虛冒錢糧。又徇情將年老有疾者。存留強壯者。反行裁去。則老弱徒然充伍。虛糜兵餉。強壯棄置不用。豈能安靜。若將此情弊清除。則兵自俱心服。而地方亦保寧謐矣。可將此本文議政王大臣九卿詹事科道會議具奏。○癸丑。陞廣西蒼梧道李

世昌為湖廣按察使司按察使○陞護軍叅領護巴為正紅旗蒙古副都統○戶部題請差往湖口收稅官員得旨湖口收稅曾經兩議爭辨今差滿漢司官各一員湖口可否收稅自然明曉其擇賢能者開列○甲寅

御書清慎勤三大字頒發直隸各省督撫○乙

卯

上詣

太皇太后

皇太后宮問安○兵部題

福陵

昭陵兵丁叩關懇將伊等頂補撥什庫驍騎校得旨此等守

陵兵丁居住年久終身並無陞轉殊為可憫且

此若干人豈無一驍健俊拔之人或在

兩陵或在京師有撥什庫驍騎校員缺應行調

用遣戶部尚書伊桑阿左副都御史宋文

運戶科給事中王口溫監察御史伊喇喀前

往江南勘閱河工○以原任雲南巡撫朱國治當逆賊吳三桂反叛之初抗不從逆捐軀殉難贈戶部右侍郎予祭葬廕一子入監讀書○丙辰諭刑部頃以逆寇殲滅海宇蕩平朕躬詣盛京展謁

永陵

福陵

昭陵以告成功因而巡行邊塞諮詢民間疾苦東至烏喇地方見其風氣嚴寒由內地發遣安插人犯水土不習難以資生念此輩雖干憲典但既經免死原欲令其生全若仍投畀窮荒終歸蹈斃殊非法外寬宥之初念朕心深為不忍以後免死減等人犯俱著發往尚陽堡安插其應發尚陽堡人犯改發遼陽安插至於反叛案內應流人犯仍發烏喇地方令其當差不必與新披甲之人為奴以昭朕軫恤民隱哀矜保全之意爾部即遵諭行○議政王大臣等議覆廣西巡撫郝浴所題操

兵准留一半。得旨。這所裁兵丁。著該管大小各官實心料理。務將老弱者裁汰。強壯者補伍。於二年之內裁完。勿得因循積弊。濫留私人。隱冒充數。令強壯兵丁。不得食糧。以致失所。若經發覺。必從重治罪。通行曉諭兵丁。咸令知悉。○鴻臚寺卿陳壽泰。臣兄原任陝西提督陳福。殞命行營。妻子淪陷川中。蒙恩授世襲三等精奇尼哈番之職。暫令臣子陳世怡承襲。今四川恢復。臣兄陳福之子陳世琳等。已經尋獲。應將前職。仍還陳世琳襲替。允之。○丁巳。諭戶部。兵部。工部。從前盛京看守陵寢。及山海關等處。城守章京員缺。俱令其子弟頂補。後停止此例。悉由京師補授。頃朕以昭告成功。展謁

永陵

福陵

昭陵。因周視所歷地方。見道里遼遠。往返艱難。若章京員缺。盡從京師補授。則家口遷移重

為貧窶者之累。且將前任章京房屋田地。掣給新補之員。以致前官孤孀無倚。不能回京。如欲即留彼地。則田廬既空。資生何策。困苦日甚。深用憫然。嗣後盛京看守

陵寢。及山海關等處。城守章京員缺。不必自京補授。著於伊等子弟內。令該將軍選擇賢能者。具題引見。頂補。以免往返遷移之苦。倘伊等子弟無人堪用。別有補授發往之員。可另撥田房給與。其前任章京田房。仍行留給。不必掣出。令其孤孀得所。○陞翰林院掌院學士庫勒納。為刑部右侍郎。○予故原任福建閩安總兵官韓尚亮。祭葬如例。○山東提督調補四川提督何傳疏言。東省為九省通衢。臣思兵以餉為命。各兵一聞奉裁。號呼失所。臣愚以為。或將通省營兵。合算清汰。務足二千五百餘名。以抵所裁提標兵數。或遇老弱逃故。止許開除。候開除至。應裁二千五百餘數之後。再准募補。既有節省之實。又無裁兵



之名。而地方獲安靜之福。下部議行。遣內閣學士阿蘭泰。冊封朝鮮國王李焞。繼室閔氏為妃。○戊午。

上詣

太皇太后宮問安。○遣刑部右侍郎庫勒納。侍衛常保。攜茶酒。往奠故刑部右侍郎葉方藹。賜白金二百兩。○陞左副都御史宋文運。為刑部左侍郎。○調陝西漢中總兵官周球。為直隸真定總兵官。○予廣東虎門寨陣亡千總王起龍。把總岑嗣恪。黃德貴等卹銀。各廕一子。以衛千總用。○議政王大臣等議。逆賊彭時亨。譚天秘。先於四川地方反叛。助惡騷擾。投誠之後。復叛。抗拒大兵。情急歸降。罪惡重大。應交刑部。即凌遲正法。梟示。從之。○鄂爾多斯多羅郡王索諾慕故。遣官致祭。○己未。太子太傅保和殿大學士杜立德。以病乞回籍調理。得旨。卿輔弼重臣。端醇恪慎。簡任機務。効力有年。勤勞素著。倚任方殷。覽奏年

邁。患病情詞懇切。准解任調理。乘驛回籍。著差官護送。以示眷懷。○免河南靈寶縣包荒地。康熙十七八九年分應徵銀兩。○庚申。

上詣

太皇太后

皇太后宮問安。○遣官祭

關聖帝君。○癸亥。夏至。祭

地於

方澤。

上親詣行禮。○甲子。命工部尚書薩穆哈。同順天府府尹熊一瀟。察看石景山至蘆溝橋隄岸。確估修治。○乙丑。候補布政使崔維雅奏。呈所輯河防芻議。兩河治畧二書。上曰。治河之道。順水性以治之。易於成功。古之治黃河者。惟在去其害而止。今則不特去其害。并欲資其力。以輓運漕糧。較古更難。崔維雅所奏。著差往勘閱。河工大臣。將伊帶往。會同總河靳輔。確議具奏。書并發。○丙寅。



上詣

太皇太后

皇太后宮問安。諭寧古塔將軍巴海副都統薩布素瓦禮祐等朕幸吉林地方訪詢民隱見兵丁役重差繁勞苦至極此等情由回鑒之日將軍以下至於兵丁教諭大意已有特旨朕自至京師復為思繹不將各種無益差徭顯與革除兵丁人等終無裨補且不得害實惠矣。一鷹鷄窩雛於三月尋覓四月內捕取最妨農事兼屬無益況所得鷹鷄不諳呼飼難至京師徒勞人力應行停止。一自八月放鷹原欲令之熟習以便齎送數年以來並無名鷹貢至京師在烏喇地方兵丁於冬寒之時尋覓山雞人馬勞頓應行停止。一圍獵以講武事必不可廢亦不可無時冬月行大圍臘底行年圍春夏則看馬之肥瘠酌量行圍令貧人採取禽獸皮肉須預先傳明日期以便遵行所獲禽獸均行分給圍獵不整肅

者照例懲治不可時加責罰竒求瑣屑遇有猛獸須小心防禦以人為重勿致悞有所傷。一打鯁鯉等魚既有專管西特庫等烏喇兵丁應停差役其搬移新滿洲採取造房并船隻挽木等項及偵探巡邏等差俱係軍務乃駐防官兵專責不可寬假應照常行此外偶爾差遣大臣侍衛督看採取東珠砍伐木植尋覓鷹鷄不涉每歲定例所行之事似無過勞此後將軍以下撥什庫以上應念兵丁遠居邊境無市貿易身冒嚴寒往採山木妻子汲水操作備極艱辛時加憐憫吉林烏喇田地米糧甚為緊要農事有悞關係非細宜勸勉之使勤耕種朕軫念滿洲人民生理欲遣人專往以驛遞疲弊故因筆帖式來奏特諭○調潮州水師總兵官劉顯芳為廣東左翼總兵官○雲南批督桑格以衰病乞休慰留之○兵部題查看陝西應留應裁兵丁開列差徭大臣得旨著折爾肯去但折爾肯議行

間情罪多姑息輕縱軍法從來尚嚴故簡親王到日朕將失機上三旗包衣佐領下護軍校以上官員盡行拘禁前螺子山之戰賊衝王中營失去蜈蚣旗折爾肯等將王府長史護衛及包衣佐領等官並不奏請拏問此非顯然徇情乎所議簡親王疏著交議政王將朕旨盡行傳諭令其再議具奏○福建將軍馬九玉疏請罷職得旨馬九玉於耿精忠叛時曾哭勸再三及歸正後又甚効力非他人可比著以原官解任來京○丁卯陞詹事府詹事牛鈕為翰林院掌院學士兼禮部侍郎○宗人府題奉國將軍哈爾薩告稱曾襲父謙郡王瓦克達爵封鎮國公於康熙八年因黃緣鰲拜革去公爵食奉國將軍俸撤去兩佐領但念父爵係軍功所得不准承襲實屬冤抑應將哈爾薩仍襲鎮國公其兩佐領亦仍給還從之○戊辰戶科給事中孫惠條陳臺灣進兵宜緩

上諭大學士等曰朕昨覽此本意以其言為當今據報總督姚啟聖提督施琅於五月初四日已帥師進取臺灣大兵啟行之後金門廈門及陸路諸隘口所關甚要速移文福建將軍巡撫陸路提督總兵官等務期有裨地方協志和衷嚴加防禦以固守要隘○以原任兵部尚書王熙為保和殿大學士○

上召伊桑阿等至御座前諭曰黃河潰決關係運道民生深切朕懷歷觀史書所載及從前條議章奏治河不在空言而在實行慎未可輕言河工之易也若以為易恐難刻期成功即收實效若以為難由楊家莊至清口一百二十餘里係漕艘往來必由之要路修築隄堰豈容稍忽爾等前去務與靳輔公同商酌加意看驗勿各執己見凡有會議事宜必逐一陳奏○喀爾喀額爾克戴青台吉遣使進九白年貢宴賚如例○命陝西巡撫鄂愷將楊起隆案內所獲逃犯王建中解送來京嚴

審揚起隆情由○庚午

上詣

太皇太后

皇太后宮問安○諭差勘河工戶部尚書伊桑阿等曰淮安等處河道頻年衝潰靳輔作何修築工程堅否特遣爾等往勘若到彼處各宜秉公持正悉心詳盡庶稱任使如有通同徇私或行欺罔者必加重處又顧侍郎宋文運曰伊桑阿前曾閱過河道一次今爾係初往如有確見務必堅持詳議毋以伊桑阿為尚書已為侍郎阿意順從治河最為難事崔維雅所奏款項爾等帶往會同靳輔詳加確議務期堅久以濟河工除河患勿視為尋常玩忽貽悞也○

上御乾清宮講官牛紐等進講睽卦象象畢。

上曰講義云一國非之而不顧天下非之而不顧此必認得道理真乃為無弊否則反為乖戾矣牛紐等奏曰誠如

聖諭○陞順天府府尹熊一瀟為刑部右侍郎

內閣學士兼禮部侍郎李光地以送母回籍乞假允之○辛未副都御史馬世濟條陳吳三桂尚之信耿精忠屬下為外官者咸宜罷黜回京

上諭大學士等曰前大兵進剿時有本身陷在賊中其子弟仕宦各省亦有備辦草料轉輸糧餉者今事平輒行追論奪其官爵撤回殊覺煩擾況漢官如曹申吉羅森等亦有子弟親戚若皆不許仕宦應鄉會試可乎照此旨傳諭將原本給還○壬申陞貴州按察使李輝祖為湖廣布政使司布政使○廣西巡撫郝浴疏言粵西武生僅得百名請暫停武闈鄉試從之○兵部議覆浙江總督李之芳疏言仙霞重地岐路叢雜實屬浙閩咽喉應將楓嶺營循照舊制仍聽兩省分轄兩省支餉改為浙閩楓嶺營庶汛守各有責成應如所請從之○甲戌陞河南南汝總兵官周邦寧

為鑲紅旗漢軍副都統。以翰林院侍讀學士傅臘塔充日講起居注官。吏部題編修杜訥呈請復勵姓允之。三法司議偽大學士方廣琛之弟方廣揚反叛情實。應行立斬從之。乙亥。安塘筆帖式報稱大兵進取臺灣。以風大不得前。總督姚啟聖高駐銅山。提督施琅移泊雲霄。聞海賊劉國軒等扼守澎湖諸隘。聞我兵前進。即抄襲其後。於是議政王大臣等會議。請檄總督姚啟聖提督施琅。若目前風太未便進剿。即統官兵回汛整飭舟師。相機再舉。從之。丙子。

上詣

太皇太后

皇太后宮問安。諭大學士等曰。朕觀部院衙門大小官員。俱分班啟奏。甚或一部分作數班。朕與爾等皆每日曉起。部院官員分數班啟奏。殊非上下一體勵精圖治之意。嗣後滿漢大小官員。除有事故外。凡遇啟奏事宜。俱

著一同啟奏。都察院衙門及科道官員無逐日啟奏本章。著每日黎明齊集午門。如滿漢部院官員有怠惰規避者。即行察參。又大小各衙門滿漢官員。雖該衙門無啟奏事宜。亦著每日同啟奏。官員黎明齊集午門。俟啟奏事畢。同散。有怠惰規避不於黎明齊集者。亦著都察院及科道官員察出參奏。陞內閣侍讀學士圖納為詹事府詹事。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十一年壬戌六月丁丑朔議政王大

實錄卷一百三

臣等奏已薨簡親王喇布於螺子山對敵退

回一案前議將隨從王護衛散騎郎及在陣

失燾長史護衛等拏禁俟同事大兵到日再

行議罪後議將護衛散騎郎等停其拏禁餘

俱照前議

上曰簡親王敗回是實軍法應嚴此前議甚當

後議顯係徇情殊為不合著嚴飭○戊寅

上詣

太皇太后宮問安是日移駐瀛臺避暑○江西

袁臨總兵官趙應奎疏奏逆賊黃明已死臣

標官兵應撤回原汛從之○已卯諭部院諸

臣朕因天氣炎熱移駐瀛臺今幸天下少安

四方無事然每日清晨御門聽政未嘗暫輟

卿等各勤職掌時來啟奏曾記宋史所載賜

諸臣於後苑賞花釣魚傳為美談今於橋畔

懸設罾網以待卿等遊釣可於奏事之暇各

就水次舉網得魚隨其大小多寡攜歸邸舍

以見朕一體燕適之意誰謂東方曼倩割肉

之事不可見於今日也特諭○陞內閣侍讀

學士王國安為內閣學士兼禮部侍郎太僕

寺卿吳琬為都察院左副都御史○命浙江

總督李之芳回省城駐劄○予故原任吏部

侍郎楊永寧祭葬如例○予福建陣亡拜他

喇布勒哈番張應鰲祭葬如例○旌表陝西

安定縣烈婦岳存虎妻王氏夫亡自盡給銀

建坊如例○庚辰

上詣

太皇太后

皇太后宮問安○予福建陣亡二等阿達哈哈

番叅領裴應虎佐領張璣各祭葬如例○江

西袁臨總兵官趙應奎疏言袁臨路通兩粵

實係緊要門戶宜設城守副將彈壓兵丁即

將鎮標及袁臨城守兵內挑選補伍將備諸

員應即以隨征功加之員揀選題補兵部議

不准行得旨袁臨地方關係緊要應將本省

不緊要地方經制兵丁內作何抽調防守該

督撫提督會同定議具奏○壬午以內閣學

士張玉書充經筵講官○予浙江陣亡駐防

杭州叅領楊廷瑜陝西陣亡佐領李六江西

陣亡佐領高爾瞻各祭葬如例○癸未陞左

僉都御史張吉午為順天府府尹○甲申翰

林院請補纂修明史總裁葉方藹員缺得旨

此缺著補用陳廷敬纂修明史事關緊要更

極繁難若監修總裁人少恐或偏執私見不

符公論可將滿漢大學士以下編修檢討以

上職名開列具奏○予福建陣亡拜他喇布勒哈番寶成傑祭葬如例○乙酉

上詣

太皇太后宮問安○陞翰林院侍讀學士胡簡

敬為內閣學士兼禮部侍郎○陞正黃旗叅

領查庫為奉天副都統○以正黃旗叅領佟

寶為

昭陵總管○以原任提督佟國瑤為福州將軍

○調湖廣援剿右路總兵官王度冲為河南

南汝總兵官○丁亥諭刑部尚書魏象樞等

今天氣炎熱可將兩部事件次第速行審結

勿得遲延使犯人於應得罪外更受餘辜○

戊子諭戶部漕糧關係國儲理應早登倉庾

向因經管各官及旗丁人等怠緩遷延每致

遲悞故嚴定處分之例以警積玩但定例過

嚴期限迫促經管文武大小各官及旗丁人

等不無苦累爾部會同吏兵二部將見行之

例再加詳酌定議務期不悞漕運不病官民

寬嚴適中。永可遵守。以副朕軫恤至意。○陞左通政崔官為太僕寺卿。○己丑。

上詣

太皇太后宮問安。○諭大學士等。日來天時亢暘。猶望雨澤之降。今觀亢旱已甚。天行之愆。人事之失也。如有應行應革事宜。令九卿詹事科道官員會議。於是九卿諸臣會議。請清理刑獄。并敕刑部督捕直隸各省督撫。於應結事件。速行結案。又漢科道官員。請暫釋江西吉安出征官拘禁者。俟同事大兵還日。議罪。大學士等。即為轉奏。

上曰。清理刑獄等事。可如所議。其所議省釋拘禁人員。亦寬政之一端也。見在拘繫者。俱令暫釋。俟大兵還日。再行議罪。○調正黃旗蒙古副都統喀齊藍為滿洲副都統。○庚寅。諭刑部。時已季夏。雨澤愆期。邇來亢旱益甚。農事堪憂。朕思天人一理。感格之道。必有未孚。且刑獄或有淹滯。寬抑之氣。最能上干天和。

內外大小問刑各衙門審讞案件。恐有聽斷不公。曲直顛倒。以及草率怠忽。任意遲延。致無辜之人。久羈狴犴。爾部即通行申飭。今後問刑各官。凡應速結事情。即為歸結。勿得借端稽緩。苦累平民。務期虛公明允。詳慎得情。以副朕欽恤刑獄。感召休祥至意。特諭。○陞鑲黃旗滿洲副都統公倭赫為蒙古都統。○議政王大臣等題。新補奉天副都統查庫。規避不赴任。應革職。得旨。查庫著革去副都統。并遇恩詔。所得拖沙喇哈番。其所襲拜他喇布勒哈番。係伊父世襲之官。彼無兄弟。可以承襲。著姑留此職。○辛卯。諭大學士等曰。自古聖主。每遇水旱災侵。未有不行虔禱者。今亢旱已甚。朕欲虔誠齋戒。親行祈禱。爾等查例來奏。○壬辰。陞陝西督糧道李國亮為貴州按察使。司按察使。○癸巳。授差往蘇尼特蒙古處散米被害郎中額爾濟圖拖沙喇哈番。照陣亡例。予祭葬。○贈湖廣殉難四品官



董重民。都司僉書。給卹銀三百兩。予祭葬。○甲午。

上詣

太皇太后宮。問安。○裁湖廣省行都司缺。○乙未。命多羅順承郡王勒爾貝弟楊起。襲封多羅順承郡王。○封鎮國公哈爾薩子海清。為輔國公。○以大學士勒德洪。明珠。李蔚。王熙。為纂修明史監修總裁官。內閣學士阿蘭泰。王國安。翰林院掌院學士牛紐。侍讀學士常書。侍講學士孫在豐。侍讀湯斌。侍講加侍讀學士王鴻緒。為總裁官。○以侍講學士葛思泰。修撰歸允肅。充日講起居注官。○吏部議覆。禮科給事中李迴疏言。河南等六省學道督撫。皆以公明尤著保舉。此等希圖內陞。不無奔競之弊。請敕部確議定額。嗣後各省學道。令督撫於三年報滿日。以公明尤著者保題。吏部開列。欽定一員。以京堂錄用。其餘陞一級。以道員先用。其未經保題者。仍照見行。

例行。從之。○丙申。

上詣

太皇太后

皇太后宮。問安。○丁酉。兩。

上御瀛臺門。顧大學士等曰。甘雨既降。良可喜也。明珠奏曰。霖雨大沛。田禾霑足。誠為可喜。

○陞

昭陵總管佟寶。為奉天副都統。○戶科給事中孫蕙。題叅原任廣東提督。今陞鑾儀使嚴自明。任廣東提督時。甘心從逆。反正之後。

皇上寬恩。待以不死。且授以將軍。陞為鑾儀使。自應聞命馳赴。乃嚴自明。遲至二年後。始行到任。莅任未幾。又疏請往雲南找尋眷口。行至揚州。托疾逗留。日肆聲歌。且縱其子嚴愈。在泰州地方。肆虐殃民。請斥革職。疏入。下部察議。尋兵部議。嚴自明。應革職。并革三等阿達哈哈番。妻子家產。交內務府。伊子知州嚴愈。交吏部議。得旨。嚴自明。著革去鑾儀使。

三等阿達哈哈番。從寬免交內務府。著入旗。  
餘如議。○己亥。

上詣

太皇太后宮問安。○辛丑。陞護軍叅領喀岱。為  
正黃旗蒙古副都統。○陞正白旗叅領邵鳳  
翔。為杭州副都統。○旌表山東節婦。臨淄縣  
齊氏。壽光縣王氏。烈婦曹縣石氏。濰縣孫氏。  
並給銀建坊如例。○壬寅。

上詣

皇太后宮問安。○予故輔國公華安。祭葬如例。  
○癸卯。予福建陣亡佐領張廷福。祭葬如例。  
○甲辰。

上詣

太皇太后宮問安。○文華殿大學士馮溥。以老  
乞休。得旨。卿輔弼重臣。端敏練達。簡任機務。  
効力有年。勤勞素著。倚毗方殷。覽奏。以年邁  
請休。情詞懇切。准以原官致仕。乘驛回籍。著  
差官護送。以示眷懷。○以內閣學士王國安。

為浙江巡撫。○乙巳。命奮威將軍平涼提督  
王進寶。馳驛來京。兵馬事務。令伊子王用予。  
暫行帶管。○翰林院掌院學士陳廷敬。謨擬  
樂章十四章進呈。得旨。該衙門敬慎肄習。○  
以故三等公圖海子諾敏。襲爵。○陞護軍叅  
領巴去。為鑲黃旗滿洲副都統。

秋。七月。丙午朔。享

太廟。

上親詣行禮。○戊申。理藩院題。進貢厄魯特丹  
津鄂木布來使額爾克等。因無噶爾丹博碩  
克圖汗票文。不許進關。令回歸化城貿易。得  
旨。丹津鄂木布來使。如不許進關。恐非柔遠  
之道。著進關貿易。○己酉。

上詣

太皇太后宮問安。○諭吏部。圖治首在安民。勸  
善莫先懲惡。必咨詢廉訪。責有專官。而後民  
隱得以上聞。奸頑為之斂戢。近聞直隸各省  
地方。多有紳衿勢要。土棍豪強。及旗下兇惡

人員并莊頭等。縱暴恣行。武斷鄉曲。有司畏威而不敢問。大吏徇隱而不能糾。非特遣大臣巡察。難以祛除積弊。直隸為畿輔重地。尤宜首先澄清。今應遣大臣一員。前往會同該撫。巡歷地方。有勢要豪強。旗人莊頭。大為民害者。廉訪確實惡跡。指名題參。重加懲處。以警奸徒。用安良善。副朕移易風俗。愛養民生至意。應遣大臣。爾部開列具奏。○以故二等精奇尼哈番晉布子蘇爾泰襲職。○予故一等精奇尼哈番噶爾瑪。祭葬如例。○予湖廣陣亡六品官覺羅郭和禮。八品官覺羅薩魯。江西陣亡七品官覺羅達林。覺羅呈德。致祭銀兩。○庚戌。

上詣

太皇太后宮。問安。○陞盛京刑部侍郎杭艾。為都察院左都御史。○壬子。陞內閣侍讀學士金世鑑。為內閣學士兼禮部侍郎。○癸丑。上詣

太皇太后

皇太后宮。問安。○旌表福建烈婦何氏黃氏鍾氏鄭氏。貞女林氏。給銀建坊如例。○甲寅。遣刑部尚書魏象樞。吏部侍郎科爾坤。巡察直隸地方。○以二等阿達哈哈番佐領頒迪。為昭陵總管。○戶部題。工科給事中姚締虞條奏。常平等倉積貯。應行嚴察。查常平等倉。前經嚴飭。加意收貯。應無庸議。得旨。各省常平等倉。積貯米數。甚屬要務。有此積貯。偶過年穀不豐。被地人民。即大有裨益。雖先經奉旨通行。恐有名鮮實。一遇水旱議賑之時。未能接濟。致民生艱困。今將某省實心奉行。某省奉行不力。其逐一察議具奏。尋議。州縣衛所官員。設法勸捐。一年內勸輸米二千石以上者。紀錄一次。四千石以上者。紀錄二次。六千石以上者。紀錄三次。八千石以上者。紀錄四次。一萬石以上者。准加一級。如定有處分之例。恐有不肖官員。畏罪過派。苦累小民。是以難

定處分之例。從之。○乙卯。先是。

上以三逆蕩平。武功著定。諭大學士覺羅勒德洪。明珠等曰。今天下乂安。應遣大臣。使厄魯特。喀爾喀。大加賞賚。俟時和草青。舉行。至是。議政王大臣等。奏請遣使。擇吉起行。得旨。厄魯特。噶爾丹。博碩克圖。汗處。著內大臣奇塔特。一等侍衛覺羅孫果。阿南達等去。喀爾喀。左翼土謝圖。汗處。著領侍衛內大臣伯費揚古。一等台吉額駙阿喇布坦等去。澤卜尊丹巴胡土克圖處。著大喇嘛垂重格隆去。車臣汗處。著散秩大臣博落特。一等台吉吳爾圖。納蘇圖等去。額爾克戴青台吉處。著精奇尼哈番副都統班達爾沙。二等台吉額駙諾木齊等去。墨爾根台吉處。著內大臣壽世特。副都統楊岱等去。右翼扎薩克圖汗處。著都統阿密達。二等台吉根都什。席布等去。盆楚克台吉處。著內大臣覺羅吳默納。一等塔布囊鄂摩克圖等去。厄爾德尼濟農處。著都統宗

室喇克達。二等台吉扎木揚等去。色冷阿海台吉處。著一等侍衛拜音察克。一等台吉拉第等去。達爾瑪希里台吉處。著一等塔布囊鄂齊爾。前鋒叅領札木素等去。羅卜臧台吉處。著一等侍衛多爾濟扎卜。二等台吉額林辰等去。各加賞賚。

上召奇塔特。費揚古等。諭曰。爾等俱係貴顯之臣。凡事須仰副盛典。以正大行之。爾等皆屬一體。勿以滿洲蒙古各分彼此。務須同心協和。滿洲大臣。不諳蒙古語言。凡議事。爾台吉塔布囊等。譯宣於滿洲大臣。一同商酌。確妥對答之。勿致失言。爾等所言。伊等所答。及一切傳聞事件。俱備錄來奏。至內地蒙古。向與喀爾喀互相盜竊。以致盜風大作。如妄行作亂生事者。各自擒拏懲究。盜何自生。盜賊既弭。則牲畜可以散放牧養。牲畜既肥。則入冬不瘦。春時孳孕。無復可虞。蒙古何至貧困。又加以各置汛哨。遇有妄行作亂之令。即從公

究處。則民庶得安其生矣。其以此曉諭之。奇塔特等奏曰。敕書賞物。臣等作何交授。

上曰。我朝威靈德意。天下外國。無不知之者。諒厄魯特。喀爾喀。必大加恭敬。然伊等向行之例。俱用蒙古禮。今若凡事指授而去。或致相岐。行事反多滯礙。厄魯特。喀爾喀。依彼蒙古之例。大加尊敬。則已。奇塔特等又奏曰。厄魯特。喀爾喀之汗。貝勒。有赴達賴喇嘛。或至他處者。則待之乎。

上曰。在旬日半月內歸者。則待之。如遲。則不必待。誰為之首。即交為首之人而來。多爾濟扎卜等奏曰。近聞人言。羅卜臧台吉。已為扎薩克圖汗所執。如其說果真。則敕書賞物。將如之何。

上曰。爾等可於沿途。細加採探。如果被執。爾等即歸可也。多爾濟扎卜等又奏曰。羅卜臧設有子弟代襲。則敕書賞賚。可與之乎。

上曰。不可與也。雖有子弟代襲。須喀爾喀通國

保奏。授為扎薩克。准納九白之貢。始可加以

恩賚。奇塔特等奏曰。理藩院移文。令臣等查詢定議。收捕厄爾德尼和碩齊。巴圖爾額爾克濟農等。并給發貢使符驗之事。伏請訓旨。上曰。此無庸多議也。厄爾德尼和碩齊等。如係噶爾丹屬下。即限日收捕。如非彼屬下。不能收捕。我朝另有裁奪。至給發貢使符驗前。已諭檄噶爾丹矣。近見來使。有給符驗者。亦有不給符驗者。何項人等。給以符驗。須詢明。至無符驗。不准放入之例。亦明白曉諭之。爾等行路。如馬駝等物。被小盜偷竊。當優容之。勿令追賠。更須約束隨從人等。毋使妄行爭鬪。厄魯特。喀爾喀。有至爾等旅寓者。須以禮貌和藹接待之。和則可以識其心志。奇塔特等又奏曰。厄魯特。喀爾喀。如因

皇上重加恩賚。有所餽遺。臣等可受之乎。

上曰。受之。○賜厄魯特噶爾丹博碩克圖汗敕曰。朕惟自古帝王。統馭富內。遐邇同仁。無分

中外沛恩膏於萬方。布聲教於四海。其歷年久遠。誠敬職貢者。愈加隆眷。優錫殊恩。爾噶爾丹博碩克圖汗。自爾父兄。歷世相承。虔修禮好。敬貢有年。延及爾身。篤盡悃忱。往來不絕。殊為可嘉。朕久欲加恩賚。以示優恤。至意祇以機務殷繁。是以未逮。茲海寓昇平。惠澤宜溥。特遣大臣侍衛官員等。齎捧重賞。大沛恩施。爾承此寵錫。當益戴德意。殫心敬順。以仰副朕柔遠同仁。協和萬邦之至意。賜喀爾喀汗。濟農。台吉等敕。亦如之。○丙辰。予故江西巡撫劉如漢。祭葬如例。○丁巳。

上詣

太皇太后宮問安。○鑲紅旗三等阿思哈尼哈番孟熊。弼病目失明。以其子孟繹祖襲替。○戊午。

上詣

太皇太后

皇太后宮問安。○多羅平邵王羅可鐸薨。

上輟朝一日。予祭葬。謚曰比。○庚申。中元節。遣官祭

永陵。

福陵。

昭陵。

孝陵。

仁孝皇后。

孝昭皇后陵。○兵部議覆廣西提督哲爾肯疏言。懷集營官兵。已經奉裁。但僻處深山。必得官兵彈壓。今議酌撥潯協守備一員。兵三百名。佈防歸并潯州副將兼轄。應如所請。從之。○辛酉。陞內閣學士噶爾圖為盛京刑部侍郎。○癸亥。

上詣

太皇太后宮問安。○吏部題一等精奇尼哈番阿拉密故。開列應襲之人。奉旨著與原立職准塔巴圖魯親近之人承襲。應將此一等精奇尼哈番。以准塔巴圖魯兄子抒翰襲職。其

阿拉密襲職後。遇恩詔所加拜他喇布勒哈番。應銷去。從之。○貴州威寧總兵官柯彩。以不服水土致病。乞休。得旨著來京候缺。○甲子。

上詣

太皇太后宮問安。○台岳州投誠新補南汝總兵官王度冲。至瀛臺門。

上問曰。岳州陸路兩次攻戰。并湖中對敵情形。爾在岳州。知之宜悉。遂一詳奏。王度冲奏曰。

岳州初戰。賊衆被吳三桂誑稱滿洲兵力衰弱。無知者信從。遂敢對敵。以致被殺幾盡。及滿兵二次攻取岳州。賊兵藏在鹿角楯牌內。死拒。被殺被傷者。又甚於前。故畏懼滿洲鋒銳。再不敢出敵。賊船高大。火器甚多。必待順風。始行出戰。然每戰受傷失船。且吳應麒驕惡。運道斷絕。饋運不至。屬下俱思離散。又畏皇上天威。遂率兵來投。吳應麒無以自存。故即逃遁。

上諭曰。爾到南汝任。必須安輯兵民。協和文武。愛惜兵丁。不可扣剋錢糧。及生事地方。負朕任用之意。○乙丑。

上詣

太皇太后宮問安。○予故原任尚書品級副都統覺羅外庫。祭葬如例。○丙寅。

上詣

太皇太后宮問安。○陞侍讀學士喇巴克。為內閣學士兼禮部侍郎。○戊辰。予故都察院左都御史達都。祭葬如例。○己巳。彗星見井宿度。尾長二尺餘。○辛未。陞廣東按察使郎廷樞。為廣東布政使司布政使。○壬申。以左贊善徐乾學。充纂修明史總裁官。○兵部題。尚之信。屬下精奇尼哈番。許弘德等。耿精忠屬下精奇尼哈番。呂雲翔等。因其祖父航海投誠。准與世職。令其承襲。今伊等附從尚之信。耿精忠。受其偽銜。均應革職。但蒙皇上寬宥。入旗。應以原品隨旗上朝。伊等世職。



不准承襲得旨此內亦有堪用之人如過旗下缺出著具題酌量補用○癸酉

上諭大學士等曰天道關於人事彗星上見政事必有闕失其應行應革者令九卿詹事科道會議以聞於是尚書介山侍郎沙賴科爾坤等奏請安插裁汰各省兵丁令其得所尚書魏象樞奏請察裁兵中或有効力行間者不令裁汰尚書梁清標奏今天下太平凡事不宜開端當以安靜為主左都御史徐元文奏請暫停臺灣進剿侍郎杜臻奏請全復浙省運丁裁扣錢糧漢給事中御史等奏請潼關收稅免差少詹事及滿給事中等奏大同宣府宜設滿洲官兵則無田產滿兵皆有裨益

上曰裁兵務使得所慎勿汰及効力之人另降諭旨梁清標所言凡事不宜開端當安靜甚得為治之要近總督姚啟聖疏稱十月進剿臺灣可暫行停止俟十月後再行定奪復運

丁錢糧及免差潼關收稅令各所司議奏大同宣府設滿洲官兵事宜令該部於議覆凱音布噶爾泰等條奏時一并確議以聞又諭曰近觀凡事不論是非大小滿官則徇親戚朋友情面漢官則徇同年門生情面相為鑽營奔競者甚多從之則已拂之則妄議謗訕然此皆存乎其人尤甚者科道官員條奏事宜原期除弊及行其言後反滋弊爾等可將此傳諭九卿詹事科道官員○甲戌諭兵部

近因逆賊蕩平四方底定將經制之外增設綠旗兵丁議令裁汰於二年內陸續報完原以寬恤民力敕寧地方今思各處兵丁多有隨征進剿効力行間綿歷歲時備嘗艱苦事平回汛若漫無分別一概裁汰深為可憫著該督撫提鎮等官於裁汰之時詳加察閱不得混留私人反將曾經効力兵丁輒行裁退至於已裁兵丁及投誠歸農人等恐有無籍可歸艱於生計者著各該地方官設法安插

善加撫輯。務俾有以資生。毋致流離失所。擾累平民。爾部即通行申飭。經管文武大小官員。實心奉行。殫力料理。以副朕恤兵愛民至意。○雲南貴州總督蔡毓榮題。請以援剿總兵官馬山。為雲南臨元。潞江總兵官。隨征總兵官偏圖。為永順總兵官。隨征總兵官李懋功。為曲尋武甯總兵官。隨征左都督管遊擊事牛鳳翔。為楚姚蒙景總兵官。隨征左都督原任廣信營叅將高必盛。為開化總兵官。調委署鶴麗總兵官海潮龍。為貴州大定總兵官。從之。○乙亥。宗人府會同議政王大臣等題。臣等會議間。散宗室噶爾齊。燕代。叩閣控告。內大臣宗室額奇。侍衛伯爾赫一案。額奇收受原任侍衛梁鼎金碗銀兩等物。應將議政大臣。領侍衛內大臣。輔國將軍。革去。永不叙用。伯爾赫。收受原任兵部尚書王弘祚銀五千兩。應將一等侍衛。輔國將軍。革去。永不叙用。其應得重罪事在赦前。俱免議。應追贓。

入官。從之。○議政王大臣等題。瓊州總兵官佟國卿降賊。受偽將軍銜。應革職。鞭責。籍沒家產。并未分家子。交該主為奴。從之。○理藩院題。科爾沁貝勒沙津。於吳逆蕩平。不行朝賀。又

上詣盛京祭

陵。不行扈從。應革去貝勒。罷管扎薩克。罰九九牲畜。得旨。先前沙津。曾著勞績。著免革去貝勒。罷管扎薩克。仍罰牲畜。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四

監修總裁官光祿大夫太保燕太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保燕太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十一年壬戌八月丙子朔

實錄卷一百四

上詣

太皇太后

皇太后宮問安○諭大學士等學士乃內閣參贊政事之官如有所見應行啟奏近來並無與議者若惟送本接本用一筆帖式足矣何必設立學士此後各有所見俱令敷陳○以詹事府詹事圖納充經筵講官○丁丑遣大學士王熙祭

先師孔子○戊寅祭

大社大稷

上親詣行禮○

上幸玉泉山駐蹕○已卯以故三等侯海爾圖

孫李廷燮襲爵○翰林院奏經筵講章得旨

經筵所以講學修德大典也講章須有勸誡

箴規之意乃稱啟沃今講章內有道備君師

功兼覆載二語太過其易之○監察御史拉

塞奏天下已定除陝西近邊及沿海地方外

實錄卷一百四

其別省火器應概行禁止毋許存留得旨朕

思治天下之道在政事之得失於火器何與

夫火器孰有多於吳三桂者乎因其所行悖

逆即致滅亡觀此則火器之不足恃可知矣

所奏不必行○奉使侍衛多爾濟扎卜台吉

額林辰等至張家口外空郭爾鄂波之地遇

厄魯特噶爾丹貢使薩拉巴圖爾問羅卜臧

台吉為喀爾喀扎薩克圖汗所執果有此事

否其同來有布庫班第者係扎薩克圖汗之

人對曰。羅卜臧欲與鄂羅斯合謀攻我汗。我汗遣其子率兵萬人。於今歲二月終旬夜。乘羅卜臧酣寢執之。其屬下人俱為俘擄。財物及馬駝牛羊俱為我軍所獲。我曾執燾隨行。此目擊之事也。多爾濟扎卜等據此奏報。得旨。羅卜臧台吉被執既真。爾等攜賞物即回。○庚辰。科爾沁和碩卓禮克圖親王鄂輯爾以罪革退。命其叔杜爾巴襲爵。○辛巳。杭州副都統邵鳳翔陛辭。請訓旨。

實錄卷一百四

三

上御玉泉山東門面諭曰。朕聞杭州駐防官兵將地方民人商賈甚加刻害。官兵駐防省會原以鎮守地方。使民生有益。乃反行刻害。是何理也。今任爾為副都統。爾須留心此事。嚴束官兵。以副朕簡用。如仍前恣行。決不輕恕。聞鎮江更甚。今爾往。將朕諭傳與彼處將軍。副都統知之。○先是。潼關額稅七千餘兩。有司徵收。康熙十九年。始遣郎中敦多禮督徵。得稅四萬餘兩。至是奉

上諭曰。數年以來。秦省兵民苦於輓運。潼關收稅。仍照舊額。著停止。差遣部員。○以故二等阿思哈尼哈番特爾赫孫額爾得襲職。○兵部議覆雲南貴州總督蔡毓榮疏言。雲貴督標。向設四營兵四千名。但總督節制兩省險要之地。況當恢復之初。苗蠻錯處。非設重兵。不足以資彈壓。查各省督標。俱設五營。應如所請。從之。○壬午。

上回宮。○癸未。

實錄卷一百五

四

上御經筵。○召講官牛紐。陳廷敬。至乾清宮。諭曰。大學士杜立德。贊襄機密。積有歲年。敬慎公忠。實多勞績。今請老還鄉。朕念老臣遠去。親製詩章。揮灑翰墨。為一卷軸。又書唐詩二軸。及怡情洛社篆章一方。墨刻二冊。爾等齎賜。以昭朕優禮眷顧之意。○又召牛紐等近御榻前。指示所臨法帖。諭曰。此黃庭堅書。朕喜其清勁有秀氣。每於暇時。輒一臨摹。隨命取晉唐宋元明人字畫真蹟卷冊。置榻上。

上手自指點開示。或誦其文句。至於終篇。或詳其世代。爵里事實。論其是非成敗美惡之迹。至顏真卿書。

上曰。此魯公書。嚴氣正性。可想見其臨難風節也。○以喀爾喀故多羅貝勒滾布伊爾登子羅卜臧襲爵。○甲申。

太宗文皇帝忌辰。遣官祭

昭陵。○

上幸玉泉山駐蹕。○乙酉。福建道御史戴王縉疏言。

太祖高皇帝

太宗文皇帝

世祖章皇帝聖訓。應行纂修。及比年以來。凡係用兵詔命。密旨征剿機宜。並應編輯成書。以垂不朽。內閣翰林院。會議准行。得旨。

太祖

太宗

世祖聖訓。垂法萬世。關係重大。理應纂修。至朕

所行之事。編纂成書。古人雖有其例。尚於朕心有歉。爾等可將此意。述與九卿確詢。再奏。○先是。厄魯特噶爾丹巴台吉之子。鄂齊爾圖汗之孫。羅卜臧滾布疏稱。我祖父向曾往來入貢。後以內亂。往依達賴喇嘛。今幸得稍寧。伏乞

皇上俯鑒。我等饑渴。撫而恤之。請率所轄。居龍頭山之地。理藩院轉奏。得旨。此龍頭山。在邊關何處。自邊關行幾日可到。與內地有關係否。或向係邊外無用之地否。著即檄拉篤祜察明原委。作速奏報。至是。拉篤祜覆奏。蒙古稱龍頭山。謂之阿喇克鄂拉。乃甘州城北東大山之脈絡。綿衍邊境。山之觀音山口。即邊關也。距甘州城三十里。距山丹城三里。其夏口城。距山口而建。自夏口城至湟川堡。相去五里。山盡為寧遠堡。此堡在邊外龍頭山。與寧遠堡相去里許。其間有長寧湖界之。蒙古所謂鄂爾通也。寧遠堡有內地人民。種植輸

賦沿湖有兵民收養。今諸蒙古俱於龍頭山北游牧。羅卜臧滾布之意欲占長寧湖耳。邊汛要地似不宜令不諳法紀之蒙古居住。理藩院兵部議以羅卜臧滾布所請應不准行。從之。○丙戌。

太祖高皇帝忌辰。遣官祭

福陵○

上回宮○丁亥。秋分。夕

月於西郊。

上親詣行禮○

上詣

太皇太后

皇太后宮。問安○戊子。大學士明珠等奏。臣等

奉旨傳集九卿。將前戴王縉疏奏。逐一與閱。

九卿等言。

祖宗聖訓。固應編輯。至逆賊變亂以來。

皇上宵旰憂勤。運籌決勝。八年之間。殲滅賊寇。

克奏膚功。復見昇平。皆

皇上神明獨運。指授方畧所致。若不纂輯成書。

恐鴻功偉績。或有遺漏。況古來帝王武功告

成。無不將所行之事。逐一紀載。今宜如御史

所請。勒成一書。以垂永久。得旨。衆議如此。可

著編纂成書○旌表直隸孝子趙名元。劉祚

永。王錄。王之俊。節婦師氏。張氏。李氏。楊氏。張

氏。劉氏。方氏。烈婦陸氏。趙氏。各給銀建坊如

例○己丑。

上詣

太皇太后宮。問安○以故三等阿思哈尼哈番

巴靈之子賽音察克。襲職○庚寅。初鄂羅斯

所屬羅剎。時肆掠黑龍江邊境。又侵入淨溪

里烏喇諸處。築室盤踞。

上命大理寺卿明愛等。諭令撤回。猶遷延不去。

而恃雅克薩城為巢穴。於其四旁。耕種漁獵。

數擾索偷赫哲。飛牙喀。奇勒爾居民。掠奪人

口。

上遣副都統郎談。公彭春等。率兵往打虎兒索

倫聲言捕鹿。以覘其情形。將行。

上諭之曰。羅刹犯我黑龍江一帶。侵擾虞人。戕害居民。昔發兵進討。未獲翦除。歷年已久。近聞蔓延益甚。過牛滿。恒滾諸處。至赫哲。飛牙喀。虞人住所。殺掠不已。爾等此行。除自京遣往叅領。侍衛。護軍外。令畢力克圖等五台吉。率科爾沁兵百人。寧古塔副都統薩布素等。率烏喇寧古塔兵八十人。至打虎兒。索倫。一面遣人赴尼布潮。諭以捕鹿之故。一面詳視陸路近遠。沿黑龍江行圍。徑薄雅克薩城下。勘其居址形勢。度羅刹斷不敢出戰。若以食物來餽。其受而量答之。萬一出戰。姑勿交鋒。但率衆引還。朕別有區畫。爾等還時。須詳視自黑龍江。至額蘇里。舟行水路。及已至額蘇里。其路直通寧古塔者。更擇隨行之叅領侍衛。同薩布素往視之。賜郎談。彭春。

御衣弓矢。隨行者。亦量加賞賚。○吏部等衙門議覆。工科給事中姚締虞疏言。奸棍布散揭

帖。有司官不行察緝。請定處分之例。嗣後應交與五城三營。八旗步軍。不時嚴查。凡不係兩造對理。布散匿名揭帖。首告部院衙門投送者。將出首送揭之人。緝拏移送刑部。照律治罪。不行拏送者。降四級調用。若接受具題審理者。革職。不肖官唆使劣棍。粘貼布散首告。亦照此例治罪。其粘貼布散之人。地方該管官。不行查拏。從旁發覺。分別罰俸。步軍營兵。司坊衙役。枷責。應通行部院衙門。直隸各省。八旗。及包衣佐領。遵行。從之。○癸巳。

上詣

太皇太后宮。問安。○予江南陣亡佐領門篤遜外山。各祭葬如例。○甲午。

上諭大學士等曰。近見各省督撫。因有展限之例。將易結之事。亦借端請展限期者甚多。嗣後如果限內實有不能完結之事。准令督撫明白具題。該部議准展限。其餘一切易結之事。借端展限者。俱不准行。○予故刑部右侍



郎。魚翰林院學士。加禮部尚書銜。葉方藹。祭葬。加祭一次。謚文敏。○以貴州陣亡護軍叅領阿爾賽。効力行間。勞績素著。從優照副都統例予祭葬。謚壯愍。○陞湖廣糧儲道胡戴。任為廣東按察使司按察使。○乙未。原任拖沙喇哈番祁塔特叩闕。稱自幼從征得官。與子都爾壽承襲。緣事革職。今年踰七十。乞一養贍地。部議不允。

上曰。祁塔特効力戎伍得官。與子承襲。今其子革職襲次已完。而祁塔特乃身得世職者。竟無資生之計。朕心憫之。以後凡革去承襲之官。其襲次已完者。原得世職人員。應給與半俸。○喀爾喀扎薩克圖汗遣使進九白年貢。宴賚如例。○丙申。

上詣

太皇太后宮問安。○免直隸元城等十二縣本年分旱災額賦有差。○丁酉。旌表安慶節婦鄭氏。丁氏。黃氏。烈婦尤氏。甯氏。各給銀建坊。

如例。○兵部議覆雲南巡撫王繼文疏言本年係會試武舉之年。查滇省陷賊。有年。所有歷科中式武舉。既無舊案可稽。其間不無頂冒情弊。與曾受偽職者。自應詳慎查明。方可給咨赴試。壬戌科請暫停。統俟乙丑科照例會試。應如所請。從之。○己亥。

上詣

太皇太后

皇太后宮問安。○厄魯特噶爾丹博碩克圖汗遣使進貢。賞賚如例。○庚子。

上御太和門視朝。文武陞轉各官謝恩。次厄魯特使臣行禮。○

上諭大學士等曰。建太和殿。搜採楠木。恐致貽累地方。其嚴飭差員及地方官。慎勿生事擾民。有不遵者。從重治罪。○九卿議准土司田舜年請開礦採銅。

上曰。開礦採銅。恐該管地方官員借此苦累土司。擾害百姓。應嚴行禁飭。以杜弊端。○奉使

琉球翰林院檢討汪楫。內閣中書舍人林麟煥。陛辭。

上諭曰。琉球海外小國。爾等前往。務持大體。待以寬和。以副朕懷柔遠人之意。○賜琉球國王。

御書中山世土四大字。○辛丑。

上諭講官牛紐。陳廷敬曰。大學士馮溥。効力有年。請老歸里。今特賜詩一章。適志東山。篆章一方。墨刻一冊。爾等傳諭朕意。朕聞山東之

仕於朝者。大小固結。彼此援引。凡有涉於已私之事。不顧國家。往往造為議論。彼倡此和。務使有濟於私而後已。又聞其居鄉多擾害地方。朕皆稔知其弊。馮溥久在禁密之地。歸里後。可教訓子孫。務為安靜。故大學士衛周祚。居鄉謹厚。在閭里中。若未嘗任顯秩者。必如此人。方副朕優禮之意。爾等偕侍衛二格。往宣朕旨。○壬寅。免直隸廣宗等六縣。本年分旱災額賦有差。○調湖廣襄陽總兵官張

永祥。為貴州大定總兵官。四川重慶總兵官王朝梅。為貴州威寧總兵官。○禮部議覆。欽天監治理曆法。南懷仁疏言。新法照各省北極之高度。另有推算日月交食表。名為九百度表。惟盛京無本地之表。今春隨

駕。測得盛京北極之高。較京都多二度。應照各省製九十度表。以憑推算。從之。○福建總督姚啟聖疏言。閩省有綠旗兵。又有漢軍甲兵。進取臺灣。防守地方。業已足用。大兵似宜撤回。○

上命將軍喇哈達等。盡率福建大兵還京師。○癸卯。福建總督姚啟聖題。請將襄橋東邊房屋。給與駐防兵丁居住。其襄橋西邊房屋。前為耿逆所占甚多。查明應變價者。變價。應給民者。給民。戶部議覆。俟該督查明到日。再議得旨。這所查房內。與民房相雜。或有不肖官員。及衙門蠹役。因稽查房屋。借端生事。嚇詐良民。故滋擾害。亦未可知。應概行嚴飭。務令

詳察分晰。毋致良民受害。若有不肖人員。違法妄行。必重加處治。決不輕恕。○刑部題。逆賊譚弘案內。譚天倫等九人。應即伏法。得旨。逆賊之子弟。應照定例正法。但其中有身與其事行惡者。亦有無知牽累者。若概置於法。尚覺可憫。譚天倫既係譚弘之子。可即正法。陳樸等八人。乃無知連累。俱從寬免死。撥與盛京披甲新滿洲為奴。○甲辰。諭戶部。朕聞先由水路出征大兵。因晝夜趲行。以致緯夫死者甚多。深軫朕懷。今爾部差去催趲糧船官員。恐欲糧船速抵水次。致緯夫苦累。著行文申飭曉諭。

九月。乙巳朔。諭內閣。王進寶。趙良棟。當逆賊竊據漢中。四川等處地方。悉力固守。在外領兵諸將。咸以恢復為難。因特遣學士禧佛。馳往傳諭。從來漢將所轄地方。猝有變亂。即用漢兵戡定。原無待借力於滿兵之事。爾等皆封疆大臣。久歷戎行。應各率所隸部曲將士。

相機進取。時趙良棟。即首先倡議。應行恢復。隨允趙良棟議。刻期進剿。於是二人協力。克取漢中。王進寶自蘭州失守。遂率兵乘筏渡河。恢復蘭州。鞏昌等處。剿禦賊寇。所向奏功。及同取漢中之後。二人意見不合。嫌隙漸生。遂爾分路進兵。趙良棟直取成都。王進寶恢復保寧。若成都不下。則雖攻保寧未易即拔。若保寧未克。則雖下成都。難以固守。勢必復退。是伊等二人。功績俱著。封疆使能。公爾忘私。和衷共濟。即統士卒。乘勝長驅。則滇黔賊寇。可以計日殄滅。何復遷延歲月。遲至一二年之久耶。且二人既克成都保寧。賊眾膽落。遂悉其精銳。入川抗拒。雖中路空虛。大兵得乘機進取。沅州。鎮遠。貴陽等處。而川中賊勢復張。已恢之疆土。幾至再陷。此皆由不能和衷之所致也。二人賦性鹵莽。不諳大體。各懷私忿。互相攻訐。屢疏求勝。交圖陷害。朕當二人訐奏之初。即已洞悉情事。念二人功績並

茂。惟欲保全。絕無深究之意。且一切投誠人員。有免其前罪者。有仍加錄用者。況似此建功之臣耶。今二人俱至京師。如欲治罪。何難逮問重處。但朕意終以保全為念。特將二人互許章奏。俱行發還。概不究問。其遲於救援。失陷地方。關係軍機等事者。仍照例察議。此非為二人調解。朕深惟國家大體。務欲保護勞臣。用全終始。故茲申諭。自今以往。其洗心滌慮。各改前愆。消釋私嫌。共矢忠蓋。以副朕優待功臣至意。且傳集議政王大臣九卿詹事科道等官。先行宣示。然後傳諭。○策試天下貢士金德嘉等。於

太和門前。制曰。朕惟自古帝王。治定功成。尤加意乎人心風俗之所尚。以圖萬世治安之本。維時禮教明於上。仁讓興於下。俗重敦龐。人多謹慤。國計豐裕。而比屋盈寧。四方清晏。而川嶽效順。朕綜覽前史。心實慕之。茲仰荷上天眷佑。

祖宗鴻庥。耆定武功。削平逆亂。亟思覃敷德教。釐正典章。庶幾海寓化成。茂臻上理。顧令甲屢頒。而奉行不力。末作之纖靡未息。閭閻之嗜慾猶滋。豈閑情節性。坊表斯民之方。尚有未備者歟。夫醇厚以立德。節儉以足用。屬俗之良規也。而民心日偷。澆漓益甚。何以使孝友之行。篤於門內。奢淫之習。絕於里閭。歟。從來安上治民。莫善於禮恭敬廉讓。則德化易成。何以整齊其心志。移易其好尚。俾有所持循歟。抑慎辨等威。納諸軌物。使貴賤少長。無相凌競。果何道之從歟。圖治之要。首重天儲。兼禦民患。比年河決為災。修築鮮效。隄防方報竣工。洪流旋復他潰。豈信河勢之危險歟。抑人事未盡善也。歲漕數百萬粟。轉輸於黃運兩河。所繫綦重。或疏濬下流。或固築隄岸。前人之成法具在。豈在昔則有明效。而今不可踵行歟。使實意討究。修濬得宜。上不梗運道。下不病民生。必有策以處此。爾多士胸蘊

經術。將以善世澤民。其各抒所見。詳切敷陳。  
朕將親覽焉。○以輔國公瓦山。為宗人府右  
宗人。○喀爾喀車臣汗。遣使進九白年貢。宴  
賚如例。○丙午。禮部遵旨議覆纂修  
三朝聖訓。暨  
皇上武功方畧。應照例賜宴。得旨。纂修  
太祖  
太宗  
世祖三朝聖訓。典禮重大。筵宴事宜等。俱依議  
行。其編輯朕躬用兵以來征剿機宜。不必照  
纂修  
聖訓例筵宴。○丁未。  
上詣  
太皇太后  
皇太后宮。問安。○免江南沐陽宿遷二縣本年  
分水災額賦十之三。○戊申。  
上御太和門傳臚。賜殿試貢士蔡升元等一百  
七十六人進士及第出身有差。○己酉。

上御太和門視朝。文武陞轉各官謝恩。次朝鮮  
國使臣等行禮。○諭福建將軍佟國璘。國家  
設立督撫提鎮。原以為民。向來駐防鎮江杭  
州。福建等處漢軍官兵。皆恣意妄為。侵占厘  
市。擅放私債。多買人口。如哈喇庫諾邁等。止  
知營私。罔遵法紀。買人至盈千百。此等匪人  
用之何益。昔孟喬芳總督陝西。李率泰總督  
福建時。能潔已奉公。愛民恤士。秦閩人至今  
思之。爾到地方。宜恪遵國憲。安戢兵民。毋負  
朕委任至意。○兩淮巡鹽御史堪泰疏言。鹽  
商故意遲延納稅。請每引加課銀三錢。  
上諭大學士等曰。此乃堪泰因欠課甚多。恐任  
內不能追徵足額。故作此急迫之狀。若依其  
言。必致商民交困。不准行。○以故一等精奇  
尼哈番噶爾瑪孫劉保住襲職。○庚戌。浙江  
總督李之芳疏言。據杭嚴道王樑詳報。北關  
門外居民罷市。稱被土棍勾旗放債。準折子  
女。貽累親鄰。不能安生。次日。上公衙門會審。

有旗兵王和尚等。率數百人。辱罵行兇。毀裂輿蓋。臣思旗兵聚衆。辱毀道員。大千功令。一面傳諭市鋪。照舊開張。一面會同將軍馬哈達。據實具題。得旨。旗丁土棍。放債害民。逞兇辱官。大千法紀。王和尚等。著該督等嚴究具奏。○辛亥。

上詣

太皇太后

皇太后宮問安。○壬子。昇平嘉宴詩及序刻成。

賜與宴大臣官員。各一冊。又賜不與宴大學士王熙。學士牛紐。各一冊。○朝鮮國王李燾遣陪臣李倭表賀蕩平。加上

兩宮徽號。謝頒詔恩。進貢宴賚如例。○癸丑。

上詣

太皇太后

皇太后宮問安。○甲寅。

上幸南苑行圍。○免浙江富陽等十縣嚴州一所。本年分旱災額賦有差。○調河南南汝總

兵官王度冲。為四川重慶總兵官。江南京口右路水師總兵官蔡元。為湖廣襄陽總兵官。○京師地震。○大理寺司務趙時楫疏言。我皇上宵旰精勤。命部院全班奏事。日集午門。兢業咨儆。誠太平萬世之基。但諸臣每夜三更早起。朝氣耗傷。未免日間辦事。反難精密。不若分班啟奏。俾其精神。遞相節養。至於官員中。有住居僻遠者。有拮据輿馬者。有徒行策蹇。及抱病勉行者。或令滿漢正佐輪流。或將

朝期。比前量為增益。以立不刊之典。且

聖躬亦宜節勞。平日本章。但須封進。其緊要事宜。必須面陳者。分班啟奏。得旨。九卿詹事科道會議具奏。○乙卯。遣官祭

歷代帝王。○遣官祭城隍之神。○戊午。免江西寧州。進賢等五州縣。袁州衛。本年分水災額賦十之三。○以吏部左侍郎管右侍郎事杜臻。為武會試正考官。侍講學士孫在豐。為副考官。○予貴州陣亡一等侍衛署護軍叅

領覺羅努赫勒。祭葬如例。○已未。

上自南苑移駐玉泉山。○免湖廣黃梅廣濟蘄州三州縣。本年分水災額賦十之三。○議政王大臣等議覆。綏遠將軍雲南貴州總督蔡毓榮疏言。中甸在金沙江之外。舊係麗江土府所轄。從未安兵設汛。自吳逆謀叛。將地方割與蒙番。為交好之計。通商互市。今互市雖經禁止。而蒙番所設喇嘛營官。尚未撤回。欲議設兵撥防。必驅其人。復其地。而後可。據土知府木堯議稱。願遣土人進藏。致書達賴喇嘛。宣示。

皇上德威。說令歸還原地。且藉此往回之間。寢彼番目前之狡謀。備我師進取之實計。應如所請。遣土人宣示。令歸還中甸地方。再行奏聞。從之。○辛酉。

上回宮。詣

太皇太后

皇太后宮。問安。○免山東長山新城二縣。本年

分水災額賦十之三。○喀爾喀土謝圖汗遣

使進九白年貢。宴賚如例。○壬戌。諭大學士等曰。自用兵以來。百姓供應煩苦。朕前屢言。俟天下蕩平。將錢糧寬免。爾等可同戶部。先將天下錢糧出納之數。通籌啟奏。至陝西一省。供應較他省苦累加倍。錢糧尤宜寬免。○癸亥。吏部尚書黃機。以老乞休。慰留之。○廣西提督管左江總兵官事趙應奎。以病乞休。慰留之。○巴圖爾額爾克濟農疏言。尼魯特時值敗壞。饑餓來歸。蒙

皇上帡幪之庇。得居邊境。不意屬下人等。不知法紀。妄行盜竊。悔罪無及。除將厄爾德尼和碩齊所掠人口。追還上納外。其竊馬人等。窮困已極。不能償還。臣與眾屬裔竭力捐輸。共得馬百匹。解送交納。伏乞

聖主睿鑒。又臣之屬裔貧困無聊。寧夏地方與臣相近。伏懇

天恩。許在寧夏貿易。理藩院議。應檄諭巴圖爾



額爾克濟農。將盜竊鄂爾多斯馬羣人等。照彼例治罪。缺解馬匹。補償完日。將巴圖爾額爾克濟農。一併從重議處。見解馬匹。交發鄂爾多斯旗下。其寧夏地方。向無厄魯特喀爾喀貿易之例。所請不准行。得旨。已圖爾額爾克濟農等。自本地敗奔。來至邊境。因不諳法紀。迫於饑困。盜竊牲畜等物。今陳其苦情。諄諄奏請。可將追償缺解馬匹。并議處之處。俱行寬免。仍移文嚴禁。嗣後毋得違法妄行生事。此文即發拉篤祐。轉行曉諭之。○甲子。大學士等遵旨議覆。大理寺司務趙時楫條奏。部院奏事。或令滿漢正佐輪流。或將朝期量為增益一疏。臣等公議。九卿詹事科道官員。皇上不時召問議事。應仍令每日上朝。其餘無事官員。及閒散衙門官員。停其每日上朝。照舊一月三次上朝。又查自古人君。從未嘗每日親御聽政。即定期視朝。亦未有甚早者。今因

皇上宵旰勤勞。每早聽政。故啟奏官員。惟恐遲悞。必四五鼓趨朝。難免夜行風寒之苦。若皇上於辰刻御朝。則遠居大小各官。黎明而入。亦不致遲悞。上曰。朕每日聽政。自不可已。若定時視朝。可免庶僚早起風寒之累。此言亦是。黃機。魏象樞。皆年踰七旬。不堪逐日趨走。故具疏乞休。已經留任。伊等或過勞頓。及有恙時。可令報知本部。免其啟奏。其餘官員。如有疾病。不能上朝。啟奏者。亦著報部。爾等可傳諭九卿詹事科道官員。觀衆意何如。再行具奏。○裁廣西桂林城守營守備一員。千總一員。添設泗城營副將一員。左右二營守備等員。○乙丑。大學士等奏。昨日宣諭。九卿各官皆云。皇上洞悉下情。慮及下僚風寒。欲限時聽政。即同天地之心。無不懽忭。上曰。朕御朝太早。各官於三四鼓趨赴朝會。殊為勞瘁。自今以後。朕每日御朝聽政。春夏以

辰初刻。秋冬以辰正初刻為期。啟奏各官。從容入奏。九卿詹事科道。原係會議官員。仍每日於啟奏時。齊集午門。如有年力衰邁。及偶患疾病。俱向本衙門說明。免其入奏。齊集。此外各衙門。及部院司屬官員。俱停其每日齊集。著各赴本衙門辦事。每月常朝。仍應照舊行。爾等可即傳諭。○以興建

太和殿。命刑部郎中洪尼喀。往江南。江西。吏部郎中崑篤倫。往浙江。福建。工部郎中龔燮。

往廣東。廣西。工部郎中圖彛。往湖廣。戶部郎

中齊穡。往四川。採辦楠木。○丙寅。

太宗文皇帝實錄告成。

上御太和門。立視捧送。

實錄進宮。陞座。總裁官。副總裁官。纂修各官。上

表行進。

實錄禮。諸王。貝勒。貝子。公。率文武羣臣。行慶賀

禮。鴻臚寺官宣制曰。

太宗文皇帝聖德神功。編輯成書。朕心忻悅。與

卿等同。各賜茶。○安南國王嗣黎維正遣陪臣申全等。表賀蕩平。并進歲貢方物。宴賚如例。○安南國王嗣黎維正奏。臣親兄黎維禔。於乙卯年三月內。違世。臣俯徇輿情。權理國事。以中國適有外警。下情難以上達。茲值貢期。備因陳奏。得旨。安南國王嗣黎維禔。曾進貢。免効。悃誠。遽爾奄逝。深可憫惻。應得恩卹。著察例議奏。○丁卯。

上詣

太皇太后宮。問安。○戊辰。諭刑部。朕閱三法司會奏人命事。強盜罪案甚多。按律。凡強盜情實。務行梟示。強盜情罪。因為可惡。較之反叛重案。猶屬稍輕。向來反叛牽連之人。尚有擬死罪。而不行梟示者。此等關係人命大辟。朕每欲得良策。澄清本源。使遠近清平。永行遵守。近見光棍事案。較前差少。惟強盜一事。常厯朕懷。未能即得良法。夫人非至窮迫。孰肯甘為盜賊。每見盜案有獲贓甚少。牽連多人。

此類若不置之重典。則匪人不知畏懼。無以警戒將來。若概置重典。朕心又復惻然。此皆不得澄清本源之道。故致如此耳。今如何使盜賊屏息。良善獲安。爾等會同三法司詳議以聞。○授一甲進士蔡升元。為翰林院修撰。吳涵。彭寧求。俱為編修。○以故三等阿思哈尼哈番佟世德子佟銓襲職。○以原任貴州威寧總兵官柯彩。為河南南汝總兵官。○已已。

上御太和門視朝。文武陞轉各官謝恩。次喀爾喀。安南國使臣等行禮。○以鎮國公準達。為鑲紅旗蒙古都統。○卒未。

孝慈高皇后忌辰。遣官祭

福陵。○

上詣

太皇太后

皇太后宮。問安。○癸酉。

上以翰林院學士張英。內廷供奉。敬慎勤勞。今

告假回籍營葬伊父張秉彝。特命照張英。見在學士品級。賜卹致祭。○命京口鎮標廣東鎮標官兵。原係將軍管轄者。今聽提督管轄。○戶部保舉關差官員蘇赫臣等。辦事有才。上曰。凡部院司官。果能謹慎奉職。方不債事。如蘇赫臣及科臣莫羅輩。俱狂妄自恃。雖有才幹。亦無足取。可另行保舉以聞。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十一年壬戌冬十月甲戌朔享

實錄卷一百五

太廟

上親詣行禮○遣官祭

永陵

福陵

昭陵

孝陵

仁孝皇后

孝昭皇后陵○頒康熙二十二年時憲曆○乙

亥諭差往採辦楠木郎中崑篤倫等爾等俱

清 實 錄 康熙二十一年十月

以才能簡選查採楠木所至地方爾等會同

督撫務要實心詳察毋得借端擾害原任巡

撫張德地曾經具題四川多有楠木及出征

班師人員亦云楠木頗多據此峨眉嘉定等

處必多產此木凡督撫藩臬在外俱成積習

爾等不得推諉地方官所有之處必身到察

採凡房屋衙門寺廟墳墓毋得拆毀採取恐

地方棍徒借此詐害平民可將此等緣由曉

諭地方知悉○裁江南分守江鎮道分巡徽

寧道山東分巡驛傳道陝西分守關西道關

南道分巡驛傳道浙江分巡杭嚴道江西分

守湖西道湖東道廣東分守嶺西道嶺東道

羅定道分巡雷廉道嶺南道廣西分守蒼梧

道江右道分巡桂平道江右道鬱林道四川

分守督糧道貴州分守貴東道雲南分守臨

元道洱海道缺○丙子

皇太后聖壽節

上率王以下文武大臣侍衛等詣

六三

皇太后宮行禮。遵

懿旨。停止筵宴。○丁丑。策試天下中式武舉。胡世芳等。於

太和門。○大學士等奏。臣等遵諭。同三法司會議。強盜皆係刦掠良善。為惡之徒。如不置之重典。則匪類無所畏懼。欲求澄清本源之道。又無良策。惟厚風俗。崇節儉。庶幾盜風可息。得旨。強盜罪案。關係人命。爾等會同九卿。務求寧息盜賊。以安良民之處。詳議以聞。○

戊寅。

上御紫光閣。閱中式武舉騎步射。並試技勇。○廣西提督趙應奎。以病乞休。得旨。前吳三桂叛逆時。各處乘勢震動。是時趙應奎。以一副將。孤身堅守袁州。於是衆心始定。袁州係緊要城池。倘或失陷。江西全省。恐亦難保。此人功績甚大。朕聞其病勢危篤。深為憫惻。著趙應奎子督捕理事官趙衍祥。馳驛往省其父。以見朕優恤至意。○喀爾喀墨爾根台吉等。

遣使進九白年貢。宴賚如例。○己卯。免山東鄒平縣本年分水災額賦十之二。○福建提督施琅疏言。臣於水師營中。簡精兵二萬餘。戰船三百艘。已足破滅海寇。請令督撫。趣辦糧餉。給臣軍。而獨任臣以討賊。無拘時日。臣整理舟師。時加操練。但遇風利。即可進兵。得旨。進剿海寇。關係緊要。著該督撫同心協力。催趲糧餉。勿致遲悞。前姚啟聖具題功罪定例。交與施琅遵行。海寇固無能為。鄭錦在時。猶苟延抗。拒鄭錦死。首寇既除。餘黨彼此稽疑。各不相下。衆皆離心。乘此撲滅。甚易。施琅相機。自行進剿。極為合宜。○庚辰。

上御太和門傳臚。賜殿試武舉王繼先等一百八人。武進士及第出身有差。○辛巳。

上詣

太皇太后宮問安。○予陝西陣亡佐領佟世功祭葬如例。○壬午。

上詣

太皇太后

皇太后宮問安○癸未。諭翰林院。選取庶常。原以作養人才。今科進士。特加簡閱。取中史夔。王九齡。吳一蜚。王誥。孫岳頌。吳晟。張禹玉。沈愷。曾許汝龍。余泰來。周金然。尤珍。劉國鼐。張廷樞。阮爾詢。朱珊。金德嘉。吳范。周蒲。龔。曾炳。路元升。潘麒。牛哀拱。李復泌。王思臧。胡作梅。魯德升。武維寧。許嗣隆。王紳。姚文光。黃軒等三十二員。俱著改為庶吉士。并修撰蔡升元。編修吳涵。彭寧求。分別滿漢書教習。爾衙門即遵諭行○甲申。

上以定遠平寇大將軍貝子章泰。征南大將軍都統賴塔。自雲南凱旋。率在京諸王貝子。公等。內大臣。侍衛。八旗都統。精奇尼哈番。副都統。阿思哈尼哈番。及滿漢大學士。尚書。侍郎。學士等官。郊勞。越蘆溝橋駐蹕○乙酉。上自駐蹕所。親率諸王大臣等。前至二十里外。凱旋大軍既至。列八旗大纛八杆。鳴號。

上率諸王大臣等。及凱旋貝子。大臣官員等。拜天行禮。

上御黃幄。大將軍貝子章泰。大將軍都統賴塔。率凱旋大臣官員等行禮。

上召貝子章泰。及都統賴塔。進前行抱見禮。命貝子章泰。近御座左側坐。出征諸大臣官員。依次列坐。其行間効力軍士。亦依次列坐。賜茶畢。

上回宮○丙戌。

上詣

太皇太后宮問安○出征雲南病故鑲紅旗都統趙璉。正藍旗都統勒貝。正藍旗都統釋迦保。長至。遣散秩大臣圖爾巴。和碩額駙訥爾杜。散秩大臣桑閣。分往致奠○勘閱河工戶部尚書伊桑阿等題。臣等奉命。前往至黃河。將兩岸隄工。逐段丈量。所築隄工。及減水壩等處。有不堅固。不合式者。俱一一註明冊內。聽工部查核外。查河道關係運道民生。當軍

需浩繁之際該督題請大修河道一勞永逸皇上特允所請給銀二百五十一萬餘兩令其修治一切事宜俱照該督所題准行今限期已逾錢糧俱已用過見在蕭家渡決口九十餘丈宿遷沐陽等處田地淹沒黃河不歸故道本年糧艘雖已北上將來運道尚屬可虞至所修工程多有不堅固不合式之處與一勞永逸之言大不相符應將該督並監修各官交與該部從重治罪其不堅固不合式等處責令賠修得旨九卿詹事科道會議具奏

○伊桑阿等又奏臣等帶領崔維雅將黃河兩岸隄工并歸仁隄高家堰運河皂河等處看畢回至徐州會同河道總督靳輔公議將崔維雅條陳二十四款隨問靳輔靳輔逐款登答兩人各執已見靳輔係專管治河之人限期已滿迄無成效其言難以再信若照崔維雅所議另行修築亦難保其必能成功河道關係重大兩人所議懸絕臣等難以定議

因將崔維雅靳輔所議之處逐款對寫繕疏具題得旨九卿詹事科道會議具奏○福建總督姚啟聖疏言興化一郡濱海要衝原設興化總兵一員管轄中左右三營今將中營兵一千名改設水師銅山營左營兵一千名改設水師平海營止存右營兵一千名未免汎廣兵單茲准陸路提臣咨報興化鎮總兵林承病故要地似難乏員臣查同安地方向因寇踞金廈諸島題設總鎮今外有水師提鎮官兵內有陸路提標官兵擬將同安鎮標中左二營官兵二千員名并入興化鎮標湊足三千就近彈壓將同安總兵吳英調補其同安鎮標右營補入同安城守營歸副將管轄部議不准行得旨吳英著照該督所題調補興化總兵官應設兵丁兩部議奏○丁亥綏遠將軍雲南貴州總督蔡毓榮疏言滇省漢土交錯最稱難治自吳逆構叛悉徵土兵濫加品秩迨我大兵深入大將軍等鼓舞招



徠。各照偽銜。換給劄付。彼一時權宜。今已廓清。請將所給銜劄追繳。各照應襲職銜量加一等服色。下部議行。○河道總督靳輔疏言。江南河道。在康熙十六年以前。敞壞至極。蒙皇上俯念運道。關係民生。當軍興需餉之候。特奮乾斷。不惜正帑。命臣大為修治。臣欽遵竭蹶。於今年。原估續估工。俱次第告竣。不意又有蕭家渡民隄坐陷一事。以致黃流旁洩者。十居其七。仍未歸還故道。此皆臣無識無才。綢繆不善。悔恨靡寧者也。但河道全局。已成十之八九。止有楊家莊以下。一百四五十里河身。未經大通。蕭家渡新決口。未經堵塞。見在一面繕疏估計。一面設法興舉。據臣之愚。必可無悞。乃候補布政使崔維雅。將臣數年來。請旨建築如許工程。紛紛議拆議毀。臣驚駭恐懼。萬難緘默。除將崔維雅條議二十四款。登答明白。移送欽差大臣科道。聽其復旨外。伏念蕭家渡雖有決口。而海口大閘。下

流疏通。河道腹心之患已除。堵塞此口。其事實易。斷不宜有所更張。以隳成功。而釀後患。得旨。九卿詹事科道會同。一并議奏。○戊子。上御太和門視朝。文武陞轉各官謝恩。次厄魯特使臣等行禮。○以左都督管隨征湖廣岳州前營總兵官事陳華。為江南京口右路水師總兵官。○議政王大臣九卿詹事科道等奏。會議強盜分別首從一案。刑部尚書郭四海奏曰。

皇上好生如天。故欲將強盜分別首從。以寓哀矜至意。諸王及臣等。皆以為可行。惟漢戶部尚書梁清標等。以為強盜原係兇惡不良之徒。若從寬典。恐盜案滋多。故後議諸臣。再行面奏。伏候

聖裁。

上問曰。爾等後議之意若何。梁清標奏曰。

皇上法外施仁。原屬至美之事。但臣等以強盜皆係兇惡。難分首從。若行分別。有司反得上

下其手。或罪果可矜。

皇上間行寬免。則伊輩自感再生之恩。若預定一例。則伊輩將僥倖於不死。而愈恣為盜。

上曰。論理本無可寬。第朕見每歲盜案。處決甚多。而究其所劫之物甚微。豈盡甘於為盜。或亦饑寒所迫。朕心深為憐憫。思立一法。以弭盜源。故與爾等商之耳。左都御史徐元文奏曰。此等古來原不待教而誅。按律竊盜三次者。比照強盜例處絞。而強盜行劫。或兩三次後發覺者甚衆。今若從寬是竊盜反重於強盜矣。

上曰。爾等所言極是。九卿出。

上顧學士牛紐曰。直隸各省盜案。每歲處決甚多。朕心不忍。故止傳口諭。與諸臣商議。原非有必行之意。適九卿所奏極是。爾可將朕旨傳諭之。○兵部題。副都統孫塔哈。縱兵搶掠民物。議降四級調用。得旨。孫塔哈係蘇祿邁巴圖魯之子。聞其材力壯健。為人亦優。可問。

貝子章泰都統賴塔。其為人果何如此事實否。著貝子章泰等據實直奏。若事跡不甚明白。遽行罷斥。似覺屈抑。且人材亦可惜耳。○已丑。

上詣

太皇太后

皇太后宮問安。○大學士勒德洪等奏。昨將聖諭傳九卿。皆云。

皇上納言如流。千古未有。臣等不勝歡慶。

上曰。朕前所諭。欲於應死之中。求可生之路。故令諸臣會商。至當原非必以為當然也。漢九卿兩次執奏。甚善。凡事既知其理。即能如此力行。何事不治。若但順從。不復察理。豈不負朕委任耶。爾等將朕旨傳諭九卿。皆令知之。○以吏部尚書黃機為文華殿大學士。禮部尚書吳正治為武英殿大學士。○予故原任浙江巡撫李本晟祭葬如例。○命停止本年分秋決。其有可矜者。俱著免死。照例減等發。

落○庚寅。

上諭九卿詹事科道等曰。河工關係國計民生。甚為緊要。朕時時在念。今爾等所議若何。工部尚書薩穆哈等奏曰。肅家渡決口。應令靳輔賠修。

上曰。修治河工。所需錢糧甚多。靳輔果能賠修耶。如必令賠修。萬一貽誤漕運。奈何。朕思河工一事。治淮尚易。黃河身高於岸。施工甚難。先是崔維雅條奏二十四款。朕初覽時。似有可取。及覽靳輔回奏。則崔維雅所奏事宜。甚屬難行。爾等可有定見良策否。戶部尚書伊桑阿奏曰。靳輔身任河工。已經五六年。必有確見。似宜令其來京面奏。再行詳議定奪。上曰。此本姑留內閣。俟靳輔來京。爾等會同再行確議具奏。○以左都御史杭艾。為兵部尚書。○以鄂爾多斯故多羅郡王索諾慕子松阿喇布。降襲為多羅貝勒。○辛卯。

上詣

太皇太后

皇太后宮問安○重修

太祖高皇帝實錄。以武英殿大學士勒德洪為監修總裁官。大學士明珠。李蔚。王熙。黃機。吳正治。為總裁官。內閣學士薩海喇巴克。侍讀學士胡簡敬。為副總裁官。○纂修

三朝聖訓。以大學士勒德洪。明珠。李蔚。王熙。黃機。吳正治。為總裁官。內閣學士席柱。王守才。翰林院掌院學士陳廷敬。為副總裁官。○纂

修

皇上平定三逆。神武方畧。以大學士勒德洪。明珠。李蔚。王熙。黃機。吳正治。為總裁官。內閣學士阿蘭泰。達岱。張玉書。翰林院掌院學士牛紐。為副總裁官。○免山西清源縣。平定州。本年分旱災額賦有差。○議政王大臣等議。吳丹遲延。失救永寧。應革去護軍統領。佐領。籍沒家產鞭一百。不准折贖。其未分家之子。一并入辛者庫。鄂克濟哈。既失救永寧。又將建

昌失陷。應革一等侍衛。籍沒家產。趙良棟。應革將軍總督。得旨。吳丹。鄂克濟哈之罪相同。無甚分別。吳丹所議稍過。吳丹著免入辛者庫。鞭責。與鄂克濟哈一例定罪。趙良棟。首先進取漢中四川。著有功績。著寬免革職。補鑾儀衛鑾儀使。至趙良棟之罪。不止於此。伊每參人擄劫良民。却自縱兵掠民。又擅責滿洲護軍。若將此等事深究。其罪尚重。但朕欲始終保全功臣。故寬赦耳。○壬辰。

上謁

孝陵。於是日啟行。駐蹕三河縣河東。○免江南安東縣本年分水災額賦十之三。○以穆敦為

福陵總管。○癸巳。

上駐蹕薊州。○甲午。

上駐蹕劉家莊。○乙未。

上駐蹕石門驛。西。○丙申。

上率內大臣侍衛詣

孝陵行禮。奠酒。舉哀。次至

仁孝皇后

孝昭皇后陵奠酒。舉哀。是日。駐蹕湯泉。○丁酉。

上詣

孝陵致祭。○轉兵部尚書宋德宜。為吏部尚書。

以原任禮部尚書沙澄補原官。○陞總督倉

場戶部侍郎喀爾圖。為都察院左都御史。○

兵部題議。叙應陞京堂刑部郎中姚儀。奉有

才幹素優。准改武職之旨。查郎中與叅領對

品。叅領既以總兵官用。郎中姚儀。應授為都

督僉事。以總兵官推用。從之。○戊戌。遣官祭

仁孝皇后

孝昭皇后陵。○是日。

上駐蹕冷水頭。○己亥。

上駐蹕羅文峪。○庚子。

上駐蹕攔羊口。○以內閣學士兼禮部侍郎阿

蘭泰。張玉書。教習庶吉士。○予出征陝西病

故都統覺羅紀哈里。祭葬如例。○壬寅。

上駐蹕龍灣地方○癸卯  
上駐蹕漢莊城西

大清聖祖合天弘運文武睿哲恭儉寬裕孝敬  
誠信中和功德大成仁皇帝實錄卷之一百五

大清聖祖合天弘運文武睿哲恭儉寬裕孝敬  
誠信中和功德大成仁皇帝實錄卷之一百六

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十一年壬戌十一月甲辰朔

實錄卷二百六

上駐蹕澈河西○乙巳

上駐蹕三屯營城南○丙午

上駐蹕金山寺○戶部議覆廣東巡撫李士正

疏言渡口鹽埠等項較舊額增銀六萬五千

餘兩又尚之信別項私徵均請豁免應如所

請從之○丁未

上駐蹕湯泉○遣官發大同宣府倉糧賑濟四

子部落蘇尼特窮困人等○己酉調山西太

原總兵官吉孫畧為廣西左江總兵官○庚

戌。

上以回京率內大臣侍衛部院三品以上官詣孝陵行禮奠酒舉哀。又至

仁孝皇后

孝昭皇后陵奠酒舉哀。是日駐蹕孫家莊。○辛亥。

上駐蹕邦均南。○禮部題安南國王嗣黎維正進貢金銀器皿。與本內數目缺少不符。得旨外國貢獻其物本無足重。特以傾心向化。誠

聖祖實錄卷一百六

二

意可嘉耳。金銀器皿短少。乃是細事。其餘各種物件。爾部亦酌減定例。尋部議嗣後免其進白絹。降真香。白木香。中黑線香等物。從之。○遣領侍衛內大臣噶都福善。內大臣索額圖。及每旗侍衛各十人。詣和碩純親王隆禧墓奠酒。○壬子。

上回宮。詣

太皇太后

皇太后宮問安。○

上率內大臣侍衛等臨

孝康章皇后母佟夫人覺羅氏喪。奠酒舉哀畢。

回宮。隨賜銀一萬兩。緞百疋。鞍馬十四。○調鑲白旗蒙古副都統索諾木。為滿洲副都統。

○免山東淄川縣本年分旱災額賦十之三。

○癸丑。諭理藩院尚書阿穆瑚瑯等曰。京城痘疹盛行。今年朝賀元旦。蒙古王貝勒貝子。公。台吉。塔布囊等。已出痘者。許其來朝。其未出痘者。可俱令停止。各屬護衛隨從人等。亦

聖祖實錄卷一百六

一

如之。速行宣示。○定駐防旗人犯罪處分將軍副都統及該管官例。○銅山總兵官黃錫以自陳不實革職。○甲寅。陞浙江總督李之芳為兵部尚書。○命吏部侍郎覺羅沙賴。以原銜管總督倉場。戶部侍郎事。○以正紅旗都統希福為西安將軍。○乙卯。諭理藩院尚書阿穆瑚瑯等曰。博穆布齊隨朕年久。今聞其歿。朕甚憫焉。遣侍衛往弔。賜帑金三百兩。令其以蒙古禮治葬。此乃於部祭常典外。另

行遣帛也。爾部可傳諭知之。○以三等公諾敏為正黃旗護軍統領。○四川巡撫杭愛疏言康熙十一年分前任撫臣羅森報開墾地共五千六百一頃四十畝。查係羅森希圖議叙捏報。非實在開墾。應徵錢糧。仰請豁免。部議不准。得旨這捏報墾地錢糧著照該撫所題豁免。○丙辰河道總督靳輔面奏蕭家渡工程。至來歲正月必可告竣。其餘隄工須銀一百二十萬。可以全完。

上曰。爾從前所築決口。楊家莊報完。復有徐家溝。徐家溝報完。復有蕭家渡。河道衝決。爾總不能預料。今蕭家渡既築之後。他處爾能保其不決乎。前此既不足憑。將來豈復可信。河工事理重大。乃民生運道所關。自當始終酌算。備收成效。不可恃一己之見。靳輔奏云。總之人事未盡。若人事盡。則天意亦或可回。上曰。前崔維雅條奏等事。亦有可行者否。靳輔奏云。所奏起夫挑濬。每日用夫四十萬。自各

省遠來。尤為不便。必不可行。又稱河隄以十二丈為率。亦不便行。河隄須因地勢高下有應。十五丈者有應。七八丈者豈能一槩定其丈尺。

上曰。崔維雅所奏無可行者。靳輔退。

上諭大學士等曰。靳輔胸無成算。僅以口辯取給。執一己之見。所見甚小。其何能底績。大學士勒德洪等奏云。誠如

聖諭。

上曰。海運可行與否。再著九卿科道議。○賜雲南陣亡把總傅應龍卹銀。准子弟一人。以衛千總錄用。○丁巳。諭吏部。殫心効職者。臣子之常經。贈爵酬庸者。朝廷之大典。茲

太宗文皇帝實錄告成。克昭一代之典章。永垂萬世之模範。原任太子太傅吏部尚書中和殿大學士都統公圖海。曾為監修總裁官。著有勤勞。宜行追叙。著加贈少保。仍兼太子太傅。爾部即遵諭行。○加總裁武英殿大學士



禮部尚書勒德洪明珠太子太傅太子太傅保和殿大學士戶部尚書李蔚太子太師予告太子太傅保和殿大學士禮部尚書杜立德太子太師予告文華殿大學士刑部尚書馮溥太子太傅副總裁以下各議叙有差賞賚如例○陞鑲黃旗護軍統領瓦岱為江寧將軍○戊午。

上御太和門視朝文武陞轉各官謝恩次喀爾喀使臣等行禮○以吏部左侍郎管右侍郎事科爾坤轉補左侍郎調兵部右侍郎禧佛為吏部右侍郎○吏部題主輔臣雖經投誠但曾從逆受偽職應革去原有之三等精奇尼哈番不准承襲從之○命立雙忠祠於廣西祀殉難廣西巡撫馬雄鎮撫蠻滅寇將軍廣西巡撫傅弘烈從廣西巡撫郝浴請也○己未調正藍旗蒙古都統宗室喇克達為滿洲都統○庚申以工部左侍郎趙璟為鑲紅旗漢軍都統○陞貴州提督趙賴為正藍旗

漢軍都統○武英殿大學士覺羅勒德洪等疏辭官銜得旨。

太宗文皇帝實錄告成關係大典卿等董率纂修著有勞績所加官銜已有諭旨著祇遵成命不必控辭該部知道○大學士等同戶部尚書伊桑阿等覆奏海運事宜伊桑阿奏曰黃河運道非獨有濟漕糧即商賈百貨皆賴此通行實國家急務在所必治至海運先需造船所需錢糧不貲而膠萊諸河停運年久諒已淤塞若從事海運又當興工開濬其費益大據臣等之意似屬難行得旨是○九卿等會議尚書伊桑阿察勘河工一疏查冊開不堅固不合式隄工共一萬五千餘丈漏水隄工四千餘丈及減水壩二座不堅固之處應將河道總督靳輔即行從重治罪但康熙二十年四月內已將靳輔革職戴罪督修且該督疏稱蕭家渡雖被衝決海口大閘下流疏通此口堵塞亦易應暫停處分將監修各

官俱行革職戴罪賠修。若仍踐前轍將該督并監修各官加倍從重治罪。不得濫派民間限六個月修竣。得旨。靳輔仍著革職戴罪督修。修築各官俱著革職戴罪監修。勒限將蕭家渡決口堵塞。但河工關係重大。所需錢糧浩繁。若責令賠修。恐致貽誤。仍准動用錢糧。勿得借端科派。擾累小民。○九卿等又議。崔維雅所議修築需用錢糧甚多。而河道難保其必能疏濬。應將崔維雅條奏二十四款。無庸議。從之。○辛酉。諭禮部。古帝王敦崇孝治。恩篤懿親。生則被以寵榮。歿則優加追卹。歷稽往牒。典例攸存。

孝康慈和莊懿恭惠崇天育聖章皇后之母。誥贈一等公佟圖賴妻。誥封一等公妻一品夫人。覺羅氏毓秀名門。作儷巨室。誕育

聖妣。衍慶弘長。奄逝遽聞。朕心深為軫悼。應作何恩卹。著察例從優議奏。○裁山東沂州鎮總兵官缺。改鎮標左營為膠州營。後營為沂

州營。各設副將一員。前營為臺莊營。設遊擊一員。將右營裁去。共裁遊擊二員。千把總各二員。兵丁五百六十一名。○壬戌。兵部議覆廣東將軍王永譽疏言。廣省濱海。在在宜防。請於陸路兩鎮標每鎮裁去一營。將從前所裁之水師補入。以為鎮屬之水師。應如所請。從之。○癸亥。

上詣

太皇太后

皇太后宮問安。○丙寅。冬至。祀

天於

圜丘。

上親詣行禮。○遣官祭

永陵。

福陵。

昭陵。

孝陵。

仁孝皇后

孝昭皇后陵○丁卯。

上率王以下文武大臣侍衛等詣

太皇太后

皇太后宮行冬至慶賀禮。

上御太和門王以下文武各官及外藩使臣上

表朝賀○戊辰議政王大臣等奏口外一年

兩次行獵講武事宜。

上曰一次行獵每佐領派護軍三名驍騎七名

甚多若口外一時不得水草不亦難乎尚書

杭艾等奏曰議政王大臣曾議及此但既為

講武不便太少在外分作兩班行獵亦不為

多口外地方水草似不缺少。

上曰一年兩次行獵專為講武與行兵無異校

獵紀律自當嚴明從前行獵之人聚令帶旗

不許擅射今既講武若聚令帶旗不許馳射

何以習武此行獵於三四人內令一人帶旗

其餘俱令馳射如此遞換帶旗遞換騎射則

均可練習武事其尊獵章京最為緊要應於

章京侍衛內揀選才優者委任其行獵紀律

當作何嚴明預令通曉著議政王大臣再議

具奏○調刑部右侍郎庫勒納為兵部右侍

郎○陞山東巡撫施維翰為浙江總督○已

已。

上詣

太皇太后宮問安○以工部郎中張衡為浙江

按察使司僉事提調學政○調正紅旗蒙古

都統噶爾漢為滿洲都統○陞散騎郎鄂托

渾為正藍旗蒙古都統鑲黃旗滿洲副都統

巴土為護軍統領○命左副都御史塞克德

馬世濟督造漕船○吏部等衙門會議定南

王下阿思哈尼哈番孟一茂胡同春李一第

等因與孫延齡有互告私仇及孫延齡反叛

被殺非盡節捐軀可比應將孟一茂胡同春

李一第等之職不准承襲從之○以原任湖

南布政使崔維雅為廣西布政使司布政使

○兵部議覆四川提督何傳疏言蜀省兵丁

多非土著將弁多非實授必藉滿兵彈壓以計萬全。應如所請。從之。○庚午。

上御乾清宮。講官進講。夫卦畢。

上顧講官曰。從來君子得志。猶能容小人。小人得志。必不肯容君子。講官等奏曰。誠如

聖諭。

上詣

太皇太后宮問安。○予出征陝西。病故都統侯海爾圖。祭葬如例。○調陝西固原總兵官王

用予。為山西太原總兵官。○辛未。以吏部左

侍郎杜臻充經筵講官。○免江南興化六合

二縣本年分水災額賦有差。○多羅平郡王

羅可鐸妃薨。遣官致祭。○予廣西陣亡弁兵

王勝等卹銀有差。○壬申。兵部以問取長沙

軍罪口供啓奏。得旨。康熙十六年三月初一

日。長沙攻戰。朕知之甚悉。度其勢安親王官

兵與穆占官兵互相樹敵。前穆占詣長沙於

三月初一日。率兵逼近長沙城池。逆賊出城。

擺列挨牌鳥鎗迎敵。我軍前鋒殺敗逆賊。直

抵城下。其護軍驍騎官兵已隨尾前進。彼時

報知安親王。官兵不暇甲冑。或十或二十。不

成隊列。隨到亟進。我軍陣所去長沙城。其間

有一小河。我軍臨戰時。已被損傷。在河溺水

陣亡者甚多。其故如此。此兩路應分析。問取

口供。○予陝西陣亡佐領高攀龍祭葬如例。

○陞護軍叅領華繕為鑲紅旗蒙古副都統。

○癸酉。以翰林院侍讀學士傅臘塔充經筵

講官。

十二月甲戌朔。調鑲黃旗蒙古副都統包柱

為滿洲副都統。○議政王大臣等遵旨議奏

行獵紀律。得旨。兵數太多。駐營之地。水草必

致艱難。朕意一年派兵一萬二千名。分為三

班。一次行獵。撥兵四千。於四月十月十二月。

令其前往行獵。則兵既少。水草易得。人馬俱

不致困乏。近見部院衙門官員不諳騎射者

多。以前亦有派往出征者。此行獵亦著一并

派出令其嫺習騎射。其餘所議俱當。惟離諸王等十步內騎射者。所定處分例內。並未分析响箭。兔叉。大箭等名色。及射馬者。令其賠馬。著一并再議。○戶部議建義將軍林興珠。應歸并鑲黃旗漢軍。令該都統歸與缺少壯丁。其佐領下應給地畝籽粒口糧。照例支給。俟支俸後裁去。所居房屋。工部給發。從之。○乙亥。轉工部右侍郎金鼎。為左侍郎。陞內閣學士金世鑑。為工部右侍郎。○陞光祿寺卿鄂哈。為刑部右侍郎。○免直隸唐山等十一縣。本年分旱災額賦。有差。○丙子。

上詣

太皇太后宮問安。○調廣東提督侯襲爵為貴州提督。○丁丑。

上詣

太皇太后

皇太后宮問安。○以原任雲南巡撫李天浴。為山東巡撫。○戊寅。

上御太和門視朝。文武陞轉各官謝恩。次喀爾喀使臣等行禮。○己卯。

上幸南苑行圍。○革福建漳州總兵官吳三畏職。以曾經降賊。自陳不實也。○免湖廣江陵沔陽等八州縣。及沔陽荊州衛。本年分水災額賦十之三。○考察天下軍政。貪酷官四十員。不謹官五十一員。罷軟官一百五十一員。年老官一百二十九員。有疾官六十一員。不及官一百六十三員。浮躁官四十八員。分別處分如例。○厄魯特噶爾瑪戴青和碩齊等遣使進貢。賞賚如例。○喀爾喀多羅卓禮克圖郡王達爾札故。遣官致祭。○庚辰。議政王大臣等議。原任廣西巡撫陳洪明。從賊應革職。立絞。得旨。陳洪明前赴任時。朕召至乾清門。奏稱臣一介草茅。蒙皇上簡任。務期勉効愚誠。以報知遇。及粵東被陷。朕尚意此人未肯從賊。且彼並無父母妻子牽制之情。隻身何難自拔。而乃深負國恩。受賊偽職。又具

啓與吳三桂情殊可惡。理應正法。姑從寬免。死著流徙寧古塔。籍其家。○大學士等奏安親王岳樂以軍機議罪。

上曰。安親王遣護衛雅圖來奏。將三月初一攻取長沙。我兵受傷情節。曾經口奏。其石匣失機緣由。亦未隱諱。據實奏聞。勒德洪明珠阿蘭泰可詣會議處。將安親王并護衛雅圖傳來問明具奏。○辛巳。調鑲紅旗蒙古副都統苗齊納為滿洲副都統。○戶部議覆江寧巡撫余國柱疏言。請令江北回空漕船於九月內抵河次。江南回空漕船於十月內抵河次。應咨行該督撫會同漕運總督河道總督確議具奏。得旨。回空漕船九月十月起程。若及河凍將如之何。漕船關係緊要。著戶部堂官一員前往會同該督撫並漕運總督河道總督確議。務使漕船永遠通運。不致遲悞。○工部題寧古塔將軍巴海等移咨修理戰船。得旨。寧古塔地方與羅刹甚近。戰船關係緊要。

戶部尚書伊桑阿帶領良匠前往修理。前投誠入旗林興珠等係福建人。今著彼前往演習。庶有裨益。○予故兵部尚書折爾肯祭葬如例。○壬午。諭兵部。國家撫定寰區。削平逆亂。必資將士之力。我

太祖

太宗訓誥戎兵。申嚴紀律。信賞必罰。懲勸維彰。其時行間將帥。爭自奮勵。所向奏功。後因歷年既久。奉行少寬。人情不無怠弛。朕御極以來。恪守

祖宗成憲。每於戎政兵機。加意整飭。自逆賊叛亂各路將帥。統兵征剿。行間功罪。屢經奏報。朕念我國家軍法。自昔嚴明。稽核殿最。務從詳確。頻頒詔旨。炳如日星。今逆賊殄滅。武功告成。振旅班師。正分別功罪。昭示懲勸之時。因思軍法固不可寬。功罪自宜相抵。必酌量重輕。情法允協。庶俾羣心悅服。激厲將來。凱旋大兵將帥內。見在應議者。有直抵雲南建

立功績人員應詳察功過准其相抵雖未至雲南果立有大功亦應准抵其未至雲南及並無大功者仍照軍法處分爾部即遵諭行○兵部議覆雲南貴州總督蔡毓榮疏言請禁民人及土司攜藏兵器並不許漢人將鉛硝硫黃貨與彝人應如所請得旨衆土司人等全賴弩弓長鎗捕獵以為生計今槩行禁止則土司俱失其生業治民惟在所司官撫綏安戢若不愛惜兵民肆其殘虐民操白挺亦可為非九卿詳議以聞○癸未九卿會議雲南貴州總督蔡毓榮條奏土司事宜

上諭大學士等曰此內土司承襲事宜似屬有理昔吳三桂未叛時構怨征討水西曾滅土司安坤其妻率所屬奔於烏蒙地方後生子安世宗今此子尚幼朕觀平越黔西威寧大定四府土司原屬苗蠻與民不同以土司專轄方為至便又諭曰大兵進取雲南此土司曾前來接濟著有勤勞爾等可傳出征大將

軍貝子章泰都統賴塔等詢問情形來奏○陞內閣侍讀學士金汝祥為內閣學士兼禮部侍郎○陞護軍叅領賽哈納為鑲白旗蒙古副都統○調江西提督許貞為廣東提督○喀爾喀土謝圖汗瓦齊賴等感戴皇仁優加恩賚各遣使護送欽使大臣等還朝并各遣子弟台吉來京謝恩

上命給賞如順治十四年例○甲申戶部會同內務府議山海關外大凌河地方展拓牧場事宜

上問曰爾等所看牧地內有民田否管牧御馬侍衛馬錫奏曰圈內亦有民田

上曰民居村落若何可有墳塋否馬錫奏曰每村或十數家或二三十家共有六十餘村居住年久亦有墳塋

上曰小民居住年久邱墓已成今若圈為牧場遽令遷移必至失所朕心不忍應將民地盡行開除○禮部遵旨議覆一等公佟圖賴妻



一品夫人覺羅氏誕育

孝康章皇后衍慶弘長。理應從優追卹。遣堂官四次致祭。照一等公例給葬銀立碑從之。○予廣東殉難千總何亮卹銀。廕一子以衛千總用。○乙酉。

上詣

太皇太后宮問安。○予故禮部侍郎兼翰林院學士史大成祭葬如例。○丙戌。陞前鋒叅領扎木素為鑲黃旗蒙古副都統。○丁亥。諭禮部農事為民生之本。必雨雪以時。庶春耕不悞。秋成可期。今歲入冬以來。尚未降雪。愆陽日久。時序失宜。田畝膜乾。恐妨明年東作。應虔行祈禱。爾部照例作速舉行。○

上詣

太皇太后

皇太后宮問安。○戊子。

上問大學士等曰。達海巴克什有子孫登仕籍者否。大學士明珠奏曰。聞有一孫。見為鴻臚

寺官其餘不知

上曰。達海始作滿書。大有裨於文治。其子孫理應錄用。爾等詢明來奏。尋吏部將達海巴克什親孫叅領陳布祿等十二人引見。得旨。陳布祿著以刑部郎中用。○禮部議覆順天府府丞張鵬疏言。學宮門旁所住俱係鑲黃旗都統聽事之人。應交該都統嚴行禁止。查學宮重地。理宜肅清。嗣後如有仍前穢污穿穴牆垣。侵佔基址者。該府丞即時呈報。臣部將該管官一并題叅。交部議處。得旨。儒學文廟關係文治。理宜嚴肅潔清。乃令聽事及居住人等污穢侵佔。殊屬不合。著速遷移。嚴加禁飭。如有不遵者。爾部察叅治罪。向來該管各官因循日久。並未察糾。張鵬莅任。即行陳奏。具見實心任事。可嘉。餘依議。○庚寅。免江西宜春等八縣及贛州衛吉安所本年分旱災額賦十之三。○辛卯。裁江西提督廣信總兵官二缺。仍設南瑞總兵官一員。○壬辰。諭大

學士覺羅勒德洪等曰。國子監乃國家養育人才之所。近聞司教之官。不將監生嚴加約束教誨。縱之游戲。又其甚者。閒雜之徒。任行出入。竟以國子監為游戲之地矣。爾等傳祭酒司業等官。嚴行申飭。○癸巳。議政王大臣等。奏安親王岳樂軍機議罪。得旨。和碩安親王岳樂。身係主將。賊自長沙出戰。不能摧鋒致陣。亡七十餘人。骸骨未收。失陷造船物料。但功罪相抵。從寬免革議政。宗人府罰俸一年。○議政王大臣等。奏康親王傑書軍機議罪。得旨。和碩康親王傑書。率領大兵前往浙江。不能剿滅賊寇。平定地方。以慰朕懷。但於杭州金華。優游駐劄數年。徒費糧餉。著削去軍功。罰俸一年。○議政王大臣等。奏簡親王喇布軍機議罪。得旨。和碩簡親王喇布。身為大將軍。征剿江西。不知預為調度。以致螺子山等處失利。著削去王爵。○禮部尚書帥顏保。以病乞解任。不允。○江寧巡撫余國柱疏。

言江鎮道已經奉裁。但地方緊要。與其裁江鎮道。毋寧裁蘇松道。以常州一郡并隸江鎮道。其蘇松二郡。比江安糧道帶管池太道之例。令江蘇糧道帶管。庶江鎮得彈壓之官。蘇松無廢事之慮。下部議行。○予故禮部尚書管刑部尚書事郭四海祭葬。謚文敏。○甲午。陞護軍叅領佛可託為鑲紅旗蒙古副都統。○調江南狼山總兵官金世榮為福建漳州總兵官。○以軍政自陳革隨征總兵官李國樞。曾童牛耀。張宗雲職。○庚子。上詣太皇太后。皇太后宮問安。○副都統郎談等。自打虎兒索倫還。以羅刹情形具奏。上諭。議政王大臣等曰。據郎談等奏。攻取羅刹甚易。發兵三千足矣。朕意亦以為然。第兵非善事。宜暫停攻取。調烏喇寧古塔兵一千五百。並置造船艦。發紅衣礮。烏鎗及演習之人。

於黑龍江呼馬爾二處建立木城與之對壘。相機舉行。所需軍糧。取諸科爾沁十旗。及席北烏喇之官屯。約可得一萬二千石。可支三年。且我兵一至。即行耕種。不致匱乏。黑龍江城。距索倫村不遠。五宿可到。其間設一驛。俟我兵將至。淨溪里烏喇。令索倫接濟牛羊。甚有裨益。如此。則羅刹不得納我逋逃。而彼之逋逃者。且絡繹來歸。自不能久存矣。其命寧古塔將軍巴海。副都統薩布素。統兵往駐黑龍江。呼馬爾。○壬寅歲暮。給祭。

太廟遣內大臣護軍統領伯噶都行禮。○遣官祭。

永陵。

福陵。

昭陵。

孝陵。

仁孝皇后。

孝昭皇后陵。○遣官祭太歲之神。○賜朝正外。

藩科爾沁烏朱穆秦翁牛特扎魯特土默特郭爾羅斯四子部落喀爾喀巴林敖漢鄂爾多斯杜爾伯特奈曼吳喇忒克西克騰扎賴特。阿祿科爾沁歸化城土默特。阿霸垓喀喇沁王貝勒貝子公額駙台吉塔布囊并內大臣大學士。上三旗都統副都統尚書侍郎學士侍衛等宴。賜喀爾喀達喇瑪希禮之孫諾爾布班第台吉鑲貂朝服。貂裘使坐貝勒下。○是歲人丁戶口。一千九百四十三萬二千

七百五十三。田地山蕩畦地五百五十二萬三千五百六十八頃八十四畝有奇。徵銀二千六百三十三萬一千六百五十八兩有奇。米豆麥六百三十四萬一千三百九十四石八斗有奇。草二百二十九萬八千一百六十三束。茶十五萬九千二百一十五引。行鹽四百三十五萬六千一百五十引。徵課銀二百七十六萬一千二百五十八兩有奇。鑄錢二萬九千四百八十五萬一千四百八十有奇。

大清聖祖合天弘運文武睿哲恭儉寬裕孝敬  
誠信中和功德大成仁皇帝實錄卷之一百六

大清聖祖合天弘運文武睿哲恭儉寬裕孝敬  
誠信中和功德大成仁皇帝實錄卷之一百七

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十二年癸亥春正月癸卯朔

上詣

實錄卷一百七

堂子行禮還宮拜神畢率諸王貝勒貝子公內  
大臣大學士都統尚書精奇尼哈番侍衛等  
詣

太皇太后

皇太后宮行禮御太和門王以下文武各官外

藩王及使臣上表朝賀照例筵宴○朝鮮國

王李燾遣陪臣金錫胄等表賀冬至元旦

萬壽節及進歲貢禮物宴賚如例○甲辰

上詣

太皇太后宮奏樂筵宴○乙巳

上詣

太皇太后

皇太后宮問安○己酉

世祖章皇帝忌辰遣官祭

孝陵○

上詣

太皇太后

皇太后宮問安○庚戌孟春享

太廟遣內大臣伯費揚古行禮○遣官祭太歲

之神○辛亥祈穀於

上帝遣領侍衛內大臣伯噶都行禮○壬子

上詣

太皇太后

皇太后宮問安○乙卯召滿漢大學士尚書左

都御史侍郎學士副都御史通政使大理寺

卿詹事日講官科道掌印官賜上元節宴於

乾清宮宴畢諸臣謝恩出復召大學士明珠

學士張玉書牛紐陳廷敬諭曰今日因上元

令節特賜卿等宴以示優眷尚有馴馬內帑

令於掖門外頒賜朕念諸臣中有年力衰老

不能久坐者故夜漏未闌遂爾罷讌恐口諭

未悉朕懷茲書諭旨一道示卿等可傳示諸

臣知之諭曰從來君臣之分雖甚尊嚴上下

之情貴相浹洽常觀唐宋盛時堂廉不隔以

成交泰之治卿等朝夕勤勞出入奏對朕心

時切嘉念今將內廐馬匹及滇中新到馬匹

擇其馴良易於控御者頒賜卿等加以內紆

卿等其各承受示朕優眷之懷大學士各表

裏六匹馬一匹尚書左都御史各表裏五匹

馬一匹侍郎學士副都御史各表裏四匹馬

一匹通政使大理寺卿詹事日講官各表裏

三匹科道官各表裏二匹○丙辰賜朝正外

藩科爾沁烏朱穆秦翁牛特扎魯特土默特

喀爾喀郭爾羅斯巴林敖漢鄂爾多斯杜爾

伯特柰曼吳喇忒克西克騰扎賴特阿祿科爾沁阿霸垓喀喇沁等王貝勒貝子公台吉塔布囊及內大臣大學士上三旗都統副都統尚書侍郎學士侍衛等宴是日賜噶爾旦台吉龐木扎布台吉巴郎台吉各貂鑲朝衣貂裘珊瑚數珠○丁巳。

上詣

太皇太后宮問安○上元節賜外藩王貝勒貝子公台吉等及內大臣大學士上三旗都統副都統尚書侍郎學士侍衛等宴○戊午。

上詣

太皇太后宮奏樂筵宴○己未。

上率諸王內大臣侍衛及外藩王貝勒貝子公台吉等幸演武場觀射○庚申議政王大臣等題大兵向駐永興城中與賊對壘仰荷上天眷佑靈神顯助於鷄公山真武廟旁豎旗列隊一時官兵及賊衆無不共見於是我軍氣奮賊勢退沮此皆我

皇上奠安元元至意上格

天心因而靈神助順其鷄公山廟神理應特致褒旌載之祀典以垂永久命春秋致祭○賜朝正外藩王貝勒貝子公台吉等銀幣鞍馬有差○辛酉。陞正紅旗滿洲副都統彭春為蒙古都統○壬戌。賜喀爾喀噶爾旦台吉貂帽貂裘各一。行幕一架駱駝三隻散馬十五匹。賜扎薩克龐木扎布台吉巴郎台吉貂帽天馬裘各一。行幕一架駱駝三隻散馬十五匹○叙平定察哈爾功陞扎魯特二等台吉根都西希布為輔國公○癸亥。陞通政使席蘭泰為盛京禮部侍郎○免廣西平樂縣藤縣康熙二十一年分水災額賦十之三○左都御史徐元文疏言三年大計藩臬兩司並令赴京朝覲蓋將以閭閻之利病上陳而皇上因以鑒察其才能為進退之地舊例藩臬入覲俱許條奏地方事宜但僅得由通政司投遞引見後即行臣請各省藩臬朝見之後

即將所屬地方應行事宜各具本面奏

皇上鑒其才具優劣於察吏用人之典不為無補下部確議○甲子

上詣

太皇太后

皇太后宮問安○奉天將軍安珠護以疾乞休上曰安珠護自擢用將軍以來惟務巧飾乖張立異邀譽沽名於職掌毫無補益大負委任聞伊每向人言願來京師作部院文官為人

臣者苟能盡力報稱文武本屬一體有何分別如瓦禮祐先任文職今陞寧古塔副都統極踴躍任事何常以武職為嫌且去歲安珠護與新任副都統佟寶在圍場大肆角口殊失官箴著革退發往寧古塔烏喇等處地方効力○乙丑復設南瑞總兵官以撫建廣總兵官裁缺候補陳平補授其鎮標三營遊守等官及兵額三千名即以撫建廣鎮標下官員兵丁調補○喀爾喀厄爾德尼濟農遣使

進九白年貢宴奏如例丁卯

上御太和門視朝文武陞轉各官謝恩次喀爾喀進貢使臣等行禮○以左僉都御史徐旭齡為山東巡撫○禮部尚書帥顏保再引疾乞解任得旨帥顏保准解任調理病痊起用○以都督僉事候補總兵官姚儀為江南狼山總兵官○戊辰

上詣

太皇太后

皇太后宮問安○命翰林院侍讀明圖為正使編修孫卓為副使往封安南國王嗣黎維正為安南國王冊文曰適安遠至敷天懷嚮化之心道一風同率土凜來庭之義惟尊親之戴世篤忠貞斯帶礪之盟慶延苗裔爾安南國王嗣黎維正地宅南交心懸北闕千秋茅土常遵聲教之頒萬里車書時奉享王之會茲當嗣爵請命於朝既舊服之克光益弘令德宜新恩之加賁用沛褒綸特遣使封爾為



安南國王爾其恪守藩封長為屏翰虔共匪懈庶無戢乎前修忠孝相承尚永綿夫世澤欽哉母替朕命○己巳命多羅平比郡王羅可鐸之子訥爾都襲封多羅平郡王○封鎮國公高色之子貞泰為輔國公授輔國公陶色之子永吉為三等鎮國將軍和碩顯懿親王福壽庶出之子伽藍保為三等輔國將軍輔國將軍齊穆布之子勒特渾輔國將軍喇克達之子佛倫為三等奉國將軍○陞督捕理事官拉篤祐為通政使司通政使○先是安南國王黎維禧故因廣西用兵未經遣祭其後王嗣黎維錠復故至是始來告哀遣翰林院侍讀鄔赫為正使禮部郎中周燦為副使前往諭祭○吏部議覆左都御史徐元文疏言藩臬入覲例有條陳請敕令面奏應如所請其代藩臬入覲道員亦照藩臬面奏條陳事宜得旨朝覲各官面奏時令通政使司堂官引奏科道官侍班○

上幸南苑行圍○辛未調正紅旗蒙古副都統噶哈為滿洲副都統○壬申

上回宮○免四川建昌永寧夔州等處康熙十九年分額徵銀米以連年用兵故也

二月癸酉朔翰林院奏康熙二十一年起居注冊應照例會同內閣諸臣看封貯庫

上曰記注起居事跡將以垂之史冊所關甚要或在朕前原未陳奏乃在外妄稱如何入奏如何奉旨私自緣飾開寫送起居注館且每日止該直官二員記注或因與已相善特美

其辭與已不相善故抑其辭皆未可知起居注官能必其皆君子乎記注冊朕不欲親閱朕所行政事即不記注其善與否自有天下人記之爾等傳諭九卿詹事科道等官會議應作何公看如以所無之事誣飾記注者將嚴懲焉○陞左都御史喀爾圖為刑部尚書○甲戌

上詣

太皇太后

皇太后宮問安○大學士明珠等奏奉

上諭以起居注檔冊事問九卿僉云起居注皆記載機密事宜垂諸史冊所關重大臣等不敢閱且滿漢起居注官共二十二員日直記載俱係公同校閱凡九卿官員所奏之事從無私自繕寫送進史館記注之例如有繕寫送進者起居注衙門必進呈

御覽方敢入冊向來定例如此得旨著仍照舊例○乙亥免廣西河池州康熙二十一年分蟲災額賦十之二○議政王大臣等會議固山貝子章泰身領大兵在岳州相拒未能前進坐延歲月應議罪但恢復岳州雲南等城在歸化寺剿賊功罪相抵得旨所議章泰功罪相抵甚當其歸化寺殺賊恢復雲南省城之功仍著議叙○丙子

上詣

太皇太后

皇太后宮問安○以重修

太祖高皇帝實錄聖訓命內閣侍讀學士翁英丹岱吳喇岱拜禮吳興祖侍讀博際安褚庫孟額圖翰林院侍讀學士朱之佐孫在豐侍講學士阿山祖文謨朱典侍讀鄔赫為纂修官又纂修

太宗文皇帝

世祖章皇帝聖訓命內閣侍讀學士徐廷璽侍讀達哈塔庸愛常明尹泰王三省典籍倭赫臣翰林院侍讀學士傅臘塔多奇嚴我斯侍讀湯斌施閏章侍講戴通編修曹禾檢討潘耒詹事府右春坊右諭德朱世熙左春坊左贊善徐乾學司經局洗馬田喜霽為纂修官諭監修總裁官大學士勒德洪等卿等督率各官敬慎纂修速竣大典表彰謨烈以副朕繼述顯揚

先德之意○以編輯平定三逆方畧命內閣侍讀學士阿哈達洪尼喀侍讀尹泰常保蒼柱

班第董昌國典籍穆世哈翰林院侍讀學士  
常書侍講學士朱馬泰葛思泰侍講傅繼祖  
侍讀王鴻緒侍講郭棻修撰歸允肅編修王  
項齡檢討嚴繩孫秦松齡詹事府左春坊左  
庶子王封滌右春坊右庶子邵吳遠為纂修  
官○大計天下各官卓異五十三員貪酷一  
百四員不謹五十三員罷軟四十五員年老  
一百十七員有疾五十三員才力不及八十  
九員浮躁四十三員陞賞處分如例又從逆  
官二百四十員亦照不謹例革職○丁丑遣  
大學士吳正治祭  
先師孔子○調吏部尚書介山為禮部尚書  
○戊寅祭  
大社  
大稷  
上親詣行禮○己卯陞吏部右侍郎禧佛為都  
察院左都御史○叙剿平川東逆賊功加四  
川陝西總督哈占兵部尚書銜○庚辰

太皇太后聖壽節  
上率諸王文武大臣侍衛等詣  
太皇太后宮行禮遵  
懿旨停止筵宴○辛巳  
上御經筵講畢賜大學士九卿詹事及講官等  
宴○陞前鋒統領伊巴漢為奉天將軍○禮  
部遵旨議覆凡遇喜慶  
皇上在  
太皇太后  
皇太后前行禮時和碩親王以下入八分公以  
上內大臣侍衛大學士等照常隨行禮八旗  
一品大臣并部院衙門滿漢尚書俱令在午  
門外衆班內行禮從之○兵部議覆廣東將  
軍王永譽疏言廣州守城兵雖有千名而舊  
城內止有旗下兵三千名不足調遣請將二  
鎮標兵量留四千駐防舊城應不准行得旨  
廣東省城關係緊要所奏量留二鎮標兵似  
屬有益可再詳議以聞尋部議應如該將軍

所請從之○壬午

上諭直省朝覲各官曰爾等各有職掌關係國計民生自宜實心辦理如奏銷錢糧採買米石借端浮冒希圖侵剋審理刑獄顛倒是非稽延歲月致累平民皆因爾等因循怠玩積弊未除嗣後俱應潔已奉公殫心盡職諸凡公務俱照在內各衙門事例勤慎料理著實遵行乃副朕察吏安民之意爾等若謂道途遙遠所行弊端未必盡知仍沿陋習漫無省改憲典具存決不姑貸○山東巡撫徐旭齡陛辭

上諭曰爾任言官時素稱能言凡民生利弊言之殆盡今簡爾巡撫一方必實心任事言行相符斯不負朕委任至意○癸未

孝康章皇后忌辰遣官祭

孝陵○諭大學士等曰閱朝覲布按各官條奏於治民弭盜非不鋪張累牘然如何綏戢則盜源可靖如何儲備則凶歲無饑未見確切

敷陳裨於實用惟麻爾圖所稱陝西積欠錢糧應分四年帶徵其言頗當朕軫念陝西地方連年寇警輓運艱苦每欲蠲除宿負以兵革未息時方需餉未及豁免冀佳育言江邊蘆田坍塌無常應五年一丈量其在內田地原無增減請免丈量等語亦屬可行餘皆諸司瑣事若槩令議覆徒煩章奏爾等於朕出巡之後傳九卿詹事科道將各朝覲官奏疏同閱會議如有益於國計民生者始下所司確議否則擬旨報聞足矣九卿詹事科道既全見伊等所奏本章則將來會推亦易知其賢否至所頒諭旨原為察吏安民若伊等各自收藏無益其令刊刻頒發府州縣衛所使兵民一體通知不肖官員雖欲敗檢虐民亦知所忌憚不敢恣意以逞矣○議政王大臣等會議原任都統覺羅巴爾布因不渡江致悞軍機擬革職立絞籍沒家產妻及未分家子編入包衣佐領又副都統託岱宜思考於

永興河濱交戰。既不能克敵。又不能固守營壘。以保永興。棄營奔辰州。擬革職立絞。籍沒家產。妻及未分家子編入包衣佐領。又精奇尼哈番碩塔。不守吉安。棄城奔回。法應處死。因前奉有免死効力之旨。擬革職鞭一百。籍沒家產。本身並妻及未分家子編入包衣佐領。又原任尚書哈爾哈齊。將突出吉安屯劄螺子山賊衆。不能攻克。擬立絞。籍沒家產。妻及未分家子編入包衣佐領。又和碩額駙華善。原任左都御史。多諾不行疾救永興。擬革職。籍沒家產。

上曰。巴爾布情罪重大。理宜正法。但念伊伯扎布海。曾戮力行間陣亡。著免死。發往烏喇地方。託岱。宜思孝。著從寬免死。并碩塔發往寧古塔地方。哈爾哈齊之伯王喇嘛。亦曾効力行間陣亡。著從寬免死。并免交內務府。華善雖未疾救永興。但亦未嘗失利。著革職免其籍沒。多諾情罪與華善同。著依華善例處分。

餘依議。○兵部等衙門會議。原任總兵官朱衣客。不能破賊。救援建昌。失利敗回。擬斬。隨征總兵官王好文。在天王廟被賊圍困。因朱衣客救兵不至。糧絕失守。免死枷責。得旨。朱衣客著從寬免死。給與該主為奴。餘依議。○甲申。遣官祭

先農之神。○

上諭大學士等曰。察議軍罪時。若將鎮守永興都統喇賽等議處。似屬寬抑。因係滿洲官兵。故能拒守二十餘日。不分晝夜。保全倒塌之城。伊等尚屬有功。不應議罪。又諭曰。凡在永興地方及都統宜理布。護軍統領哈克山。被陷之處。所有官員兵丁。俱應寬恕。爾等識之。○福建提督施琅。疏請調興化江東等處陸路官兵。同水師進剿澎湖臺灣。從之。○

上幸五臺山。命皇太子允初隨駕。是日啓行。駐蹕琉璃河。○乙酉。

上駐蹕涑水縣。○戶部議覆河南巡撫王日藻

疏言豫省漕糧二十五萬餘石。歷來各州縣僉差官役。前赴大名府小灘地方買米交兌。越境採辦。罔戶牙行。任意騰貴。官民交困。請行改折。查豫省漕米原係徵銀買米起運。康熙十五年緣需用兵餉改折。後因各省漕米截留京城米穀不敷。仍令買米起運。今既苦累小民。應仍令改折解部。其通省漕糧既不運京糧道亦相應裁去。從之。○丙戌。

上駐蹕易州丁哥莊。○丁亥。

上駐蹕易州白澗村。○戊子。

上駐蹕滿城縣大冊河。○己丑。

上駐蹕唐縣。○革四川隨征總兵官劉之衛。蔣榮德。注文元。注時。瀕職。以吳逆變亂。曾受偽將軍職銜。照軍政不謹例議處也。○廣西巡撫郝浴疏言。原任潯州府知府劉浩於逆賊孫延齡叛時抗賊不屈。全家殉難。應請恩卹。得旨著贈太僕寺卿。廕一子入監讀書。○庚寅。

上駐蹕王快鎮。○辛卯。

上駐蹕真定府龍泉關。○壬辰。

上駐蹕五臺山菩薩頂。山西巡撫穆爾賽按察使庫爾喀來朝。○旌表廣西節婦灌陽縣唐允隆妻鄧氏。時正煜妻鄧氏。各給銀建坊如例。○福建巡撫董國興以病乞解任。允之。○癸巳。

上登南臺。○甲午。

上登東臺北臺。○乙未。春分朝。

日於東郊。遣兵部尚書杭父行禮。○寧古塔副都統瓦禮祜奏請往黑龍江呼馬爾地方効力。得旨瓦禮祜奏請軍前効力可嘉。但烏喇寧古塔地方甚屬緊要。將軍巴海副都統薩布素既領兵前往。瓦禮祜仍著駐守本處嚴輯地方。加意哨探。撫綏軍民。勤力田畝。○上登中臺西臺。○丙申。

上回鑾。於長城嶺西路傍射殪一虎。是日駐蹕龍泉關。○丁酉。

上諭巡撫穆爾賽等曰。五臺繁峙靜樂寧縣等處。地瘠民貧。爾等既膺簡用。必持己廉潔。恪共職業。務期利興害除。使民生各得其所。方副朕委任之意。不然。罪有所歸矣。○調正黃旗蒙古副都統喀岱為滿洲副都統。○贈陝西殉難西安府知事張文選衛經歷司獄周勝驤典史趙煥文俱縣主簿各廕一子入監讀書。○

上駐蹕行唐縣長壽莊。○戊戌。

孝昭皇后忌辰。遣官祭

陵。○

上駐蹕唐縣西電水。○己亥。

上駐蹕慶都縣。是日。巡察直隸地方。刑部尚書魏象樞吏部左侍郎科爾坤直隸巡撫格爾古德來朝。○庚子。

上駐蹕清苑縣東閭村。○辛丑。

上駐蹕新安縣。○壬寅。

上駐蹕任邱縣趙北口。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百七



大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百八

監修總裁官光祿大夫太保兼太子太傅保和殿大學士兼戶部尚書二奇伯加四

級臣馬齊光祿大夫經筵日講官起居注少保兼太子太傅保和殿大學士仍無

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍無理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十二年癸亥三月癸卯朔

實錄卷一百八

上駐蹕霸州苑家口○甲辰

上駐蹕霸州信安鎮○丙午遣官祭

歷代帝王○是日

上駐蹕永清縣南哥驛○丁未

駕至南苑駐蹕晾鷹臺南○命改折河南應解

德州臨清二倉米石○免福建侯官等二十

六州縣被兵後久荒田地康熙十八年以後

積欠錢糧銀三萬三千餘兩米四千六百餘

石○戊申

上回宮詣

太皇太后

皇太后宮問安○戶部議覆臨清關監督戶部

郎中高拱乾疏言關差辦銅多寡不均今臨

清關額稅止二萬四千餘兩而辦銅銀二萬

兩應請酌減查太平關二處額稅三萬餘

兩從不辦銅應減臨清辦銅額銀一萬兩分

令太平關採辦從之○己酉議政王大臣

等會議坤巴圖魯在軍前令其開通棧道往

實錄卷一百八

救漢中違約不進雖有効功績未足相抵

仍應將其一等阿思哈尼哈番及巴圖魯名

並內大臣太子太保佐領俱革去

上曰此巴圖魯之名

太宗文皇帝時所賜著仍留其世襲官職著留

一半革去一半又議原任護軍統領莽依圖

統領大兵不能誅討逆賊恢復地方因有効

力功績可抵應籍沒家產一半革去恩詔所

得拜他喇布勒哈番

上曰莽依圖在行間頗有勞績且伊屬下兵丁俱稱其善凡經過地方亦不擾害百姓著從寬免籍沒將恩詔所得拜他喇布勒哈番革去○庚戌清明節遣官祭

永陵

福陵

昭陵

孝陵

仁孝皇后

孝昭皇后陵○諭大學士覺羅勒德洪等饋運烏喇軍糈自遼河溯流運至等色屯隨用蒙古之力陸路運至伊屯門自伊屯門船載順流運至松花江甚善內府佐領下屯莊糧米充足需用幾何即以屯丁之力運至遼河津要船載趣運并備畚具樁木若逢淤淺束水以行糧米或於等色屯伊屯門伊屯口或於我河口築倉收貯船在邊內我兵衛送邊外蒙古兵衛送宜少載糧米多備輓夫俾船行

輕利兩河中阻陸路酌派車載其船準何式置造錢糧需用若干爾等與戶工二部理藩院及郎談觀圖詳議至造伊屯門以北運船運至松花江及築倉收貯事宜應否交與留鎮烏喇副都統其并定議以聞勒德洪等議覆巨流河渡口應造船六十艘以長三丈寬一丈為度每船載米百石用水手六名水手即派民夫操演自起運日每人月給銀一兩運到米於巨流河渡口等色屯築倉收貯悉交與奉天將軍大臣等監理船在邊內酌派盛京官兵衛送邊外自等色屯至伊屯門派蒙古官兵車輛陸續運往所派蒙古官兵車輛理藩院另行請旨伊屯門諸地築倉貯米及造伊屯河運船運至松花江悉交留鎮烏喇副都統議覆

上以所議尚未周詳遂分遣內府營造司郎中佛寶及戶部侍郎宜昌阿等以瀛臺通州船載米試之復令盛京刑部侍郎噶爾圖等自

巨流河至等色屯。驗視遼河深淺。寧古塔副都統瓦禮祜等。自伊屯口。至伊屯門。伊爾門河口。驗視水勢。尋噶爾圖奏遼河可行三丈之船。請以此式。於巨流河渡口。造船六十艘。瓦禮祜奏。伊屯河可行三丈五尺之船。吉林地方。伐木造船百艘。由伊屯河運米松花江。於伊屯門伊屯口。築倉收貯。從之。又諭前薩布素來奏。明年六月前。兵食伊等齎行。餘悉存留爾時。曾諭以六月後。所需運黑龍江松花江交匯處。令其迎取。今應於烏喇造大船五十艘。或以薩布素等所留蒙古席北米。或以盛京所發米。計口運往。烏喇寧古塔兵皆貧乏。見在出征者半。任輸輓。復用餘兵。恐致困苦。烏喇席特庫所屬八家獵戶。停獵一年。令其輸輓。庶兵力稍紓。黑龍松花兩江交匯處。自吉林順流而往。薩布素等。自彼駐兵之所。順流而來。水路遠近相等。俟明春水解。即運兩江接界。令薩布素等量發官兵船艘。前

來迎取。○諭議政王大臣等。心裕素行懶惰。屢次空班。朕交與伊親兄索額圖議處。乃止。議罰俸一年。又法保係懶惰革職。隨旗行走之人。並不思効力贖罪。在外校射為樂。索額圖亦不教訓。且索額圖巨富通國。莫及朕以其驕縱時。加戒飭。並不悛改。在朝諸大臣。無不懼之者。索額圖。心裕。法保。科爾琨。著嚴加議處。具奏。議政王大臣等。議覆索額圖。應革去議政大臣。太子太傅。內大臣。佐領。心裕。應革去鑾儀使。佐領。其所襲伯爵。與應襲之人承襲。法保。應革去太子太保。公爵。不准承襲。科爾琨。應鞭一百。不准折贖。得旨。索額圖。著仍留佐領。心裕。著留伯爵。罰俸一年。餘依議。○陞正白旗副都統郎談。為前鋒統領。○議政王大臣等。會議宗室公瓦山。在長沙與賊交戰。不能取勝。遂爾退回。擬革公爵。又太子太保都統公倭赫。用雲梯往攻長沙城時。抵賊鹿角挨牌。不能攻破。遂爾退回。擬革職。

上曰。瓦山才具甚優。況其公爵乃伊父顧爾瑪  
渾貝子効力年久。恩賜之爵著革去。宗人府  
右宗人從寬留其公爵。倭赫為人尚優。其所  
襲公爵原係其祖之職。即革去亦應子弟承  
襲。著從寬留其都統公爵。革去太子太保。  
議政王大臣等又議。原任都統覺羅畫特在  
石匣地方交戰。不曾收取官兵骸骨。并失礮  
位。擬革職。籍沒家產。編入包衣佐領。又原任  
精奇尼哈番署副都統穆承格。在滕縣不能  
禦賊。未曾收取官兵骸骨。擬革職。籍沒家產。  
編入包衣佐領。

上曰。覺羅畫特失誤軍機。甚多。無甚効力之處。  
理應依議。但係覺羅。編入包衣佐領為奴。似  
屬不便。著免其編入包衣佐領。穆承格亦著  
從寬免其編入。辛亥。調盛京戶部侍郎色  
赫為吏部右侍郎。甲寅。

上詣

太皇太后

皇太后宮問安。○以一等侍衛噶思哈為正黃  
旗蒙古副都統。○乙卯。宗人府題分派諸王  
三班行獵事。

上曰。爾等如何分派。和碩安親王岳樂奏曰。臣  
等為便於行走。各視其家族分派。

上曰。行獵雖係習武。亦有整飭號令之事。一班  
之內。皆派一旗一家之王。恐圍場中不便。彼  
此論辨。隨取擬派人名。參互更定。○

上御乾清宮。講官進講易經萃卦。講章中有六  
二。惟有中德。其忠君報主之念。出於至誠。未  
嘗稍變。初志故能薦賢為國。而誠可格君等  
語。

上首肯良久。曰。所講極是。人惟不忘其初心。始  
終克盡忠愛。乃為人臣之善道。講官牛紐陳  
廷敬等奏曰。誠如

聖諭。○丙辰。陞左副都御史莽色為盛京戶部  
侍郎。○以兵部督捕右侍郎金鉉為福建巡  
撫。○贈雲南殉難按察使李興元太常寺卿。

予祭葬。廕一子入監讀書。刑部等衙門議覆山西道御史蔣鳴龍疏言舊例奸宄畧賣人口。止將該管官處分。未嘗定有佐領驍騎校。小撥什庫犯人家主作何處分之例。嗣後城內旗人犯者。本佐領驍騎校知而不首革職。失於覺察罰俸。小撥什庫知而不首。枷責。失於覺察鞭五十。旗下家人犯者。家主知而不首。係平人。枷責。係職官革職。失於覺察。係平人。鞭五十。係職官罰俸。其城外園內所住家人犯者。本主照此例議處。在屯內住者。將屯撥什庫照佐領下撥什庫處分。其關外住之人。來京買人者。呈明宛大二縣五城正印官取文契用印。稟明該都統咨行兵部給發印票。若無印票令其出口。守關章京等俱罰俸一年。披甲之人。鞭八十。領出之人。鞭一百。增入定例從之。江南江西總督于成龍等疏言江蘇布政使丁思孔歷任既久。因多叅罰既不敢違例以入卓異之列。又不敢拘例

以蹈蔽賢之愆。請破格獎勵。得旨丁思孔供職勤慎。著准為卓異。丁巳復設廣西蒼梧守道一員。管轄桂平梧三府。右江巡道一員。管轄柳慶思三府。戊午諭派出行獵諸王大臣等曰。圍獵之制。貴乎整嚴。不可出入叅差。令左翼官在左右翼官在右。統轄而行。宗室公等毋得越圍場班次。在後逗留。如或逗留。則衆人停待圍場。必致錯雜。爾等須嚴加管轄。以正紅旗都統噶爾漢為鎮守荊州等處將軍。陞叅領郝佛為荊州左翼副都統。阿際禮為荊州右翼副都統。議政王大臣等會議提督孫思克。凡事不加詳審。搖惑進剿軍心。種種巧飾。虛誕具奏。應將三等阿思哈尼哈番及提督總兵官盡行革去。上曰。孫思克身任封疆。不思速滅賊寇。當進兵之際。種種造言。搖惑軍心。妄行入奏。理應從重議處。但聞其頗善養兵。且有微勞。伊所有阿思哈尼哈番及提督銜著革去。仍留總兵

任○貴州提督趙賴疏言土司安勝祖宜授以文職若授武職恐致妄為。

上曰土司事宜或云宜補流官或云宜補土官或云可令管兵或云不可令管兵種種陳奏不一雲南貴州離京甚遠往來移文多需時日遣該部賢能司官一員前往會同雲貴督撫提督酌量彼處情形詳加定議具奏則一舉可畢矣○厄魯特噶爾丹博碩克圖汗遣使進貢賞賚如例○己未。

上詣

太皇太后

皇太后宮問安○議政王大臣等會議都統阿密達在平涼攻戰時我兵退回不能禁阻擬革都統佐領。

上曰阿密達為人頗優且勞績甚多著革去佐領降五級從寬留都統任○陞叅領阿毓璽為歸化城右翼副都統○以鎮國公哈爾薩為宗人府右宗人○戶部議覆河南巡撫王

日藻條奏開墾豫省荒地事宜○宜借給牛種請將義社倉積穀借與墾荒之民免其生息令秋成完倉○宜招集流移凡外省民墾田者如遇他處已往事發罪止坐本人勿得株連容隱○宜嚴禁阻撓凡地土有數年無人耕種完糧者即係拋荒以後如已經墾熟不許原主復問○新墾地畝請暫就該縣下則承認完糧俟三年後仍照原定等則輸糧均應如所奏得旨依議這開墾荒田地方仍著該管官員嚴行稽察勿得借端招集逃盜奸頑匪類致滋擾害○庚申。

萬壽節。

上率諸王貝勒貝子公內大臣大學士侍衛等詣

太皇太后

皇太后宮行禮畢御太和門王以下文武各官上表行慶賀禮次厄魯特使臣等行禮停止筵宴○遣官祭

福陵。

昭陵。

孝陵。

仁孝皇后。

孝昭皇后陵○遣官祭真武東嶽城隍之神○

辛酉。陞叅領張素義為正白旗漢軍副都統。

○復設直隸阜平縣知縣典史。教諭各一員。

○兵部議覆雲南驛傳道郭廷弼等解送部。

撥賴塔軍前馬二千匹止。送到七百餘匹。其

餘馬匹。行查違限未報。應交與吏部議處。其

馬匹仍令該撫確查。

上曰。此馬原撥閩省。由閩省轉送粵東賴塔軍

前。因賴塔進剿雲南。又追送至滇中。此三省

路途遙遠。山徑崎嶇難行。馬匹多斃。是實。伊

等不能賠補。故不報明。以致違限。如責令賠

補。似屬寬抑。從前定例。令賠補馬匹者。因用

兵之際。不如此。恐送馬人員。任意怠惰。以致

馬匹多斃耳。今四方平定。著免行查賠補。其

遲報各官亦免議。○壬戌。大理寺卿張雲翼

疏請回籍省親。允之。○以三等阿思哈尼哈

番蘇永祚為正白旗滿洲副都統。○癸亥。

上幸南苑行圍。○調刑部右侍郎熊一瀟為兵

部督捕右侍郎。○甲子。諭刑部。國家設立問

刑衙門。期於明罰敕法。弼教化民。必審鞠精

詳。讞決平允。而後民情悅服。冤抑畢伸。近見

兩部審理大小事件。每多草率。因循瞻徇。舛

錯全無振刷。省改。如聽訟之時。兩造是非。自

應分別定案。因意有偏私。往往不問曲直。勒

令和息。或逼撤原狀。含糊完結。以致奸頑倖

免。良善含冤。又如入官財物。奉差籍沒。官員

不能廉潔。自持據實冊報。乃恣意侵盜。竟飽

私囊。貪黷成風。醫不畏罪。殊非人臣奉公守

法之誼。至於審事官員。膠執已見。聽斷不公。

或更改口詞。圖遂私意。或恐嚇犯証。不令直

供。或妄肆株連。稽延月日。或怠玩疎忽。苟且

告竣。此等弊端。種種難以枚舉。嗣後堂司各



官俱著洗心滌慮。痛改前非。一切刑名事務。必令情法允協。無枉無縱。恪遵法紀。持廉秉公。以副委任之意。○又傳諭前朕知工部情弊。逐一釐剔。今少覺整理。爾刑部弊端。朕無不悉知。自後永行改革。則已。倘仍因循如故。將爾等弊端摘發一事。毋望倖免。亦毋望止於罷斥已也。伊等又每云。身為堂官。筆帖式胥吏所作弊端。焉能悉知。止因才力不及。未能察出。伊等暨禪塔海。豈非筆帖式出身乎。斷難以不知情。弊為辭。朕時加諮訪。諸事尚且知覺。伊等諉為不知。可乎。朕已洞鑒。故爾申飭。務將夙弊盡行除革。毋忽。○宴衍聖公孔毓圻等於禮部。○理藩院議覆多羅貝勒松阿喇布遊牧地方狹小。應令於定邊界外。暫行遊牧。

上問大學士。此事爾等云何。明珠奏曰。臣等之意。若此地暫予遊牧。將來撤還。彼必謂久許遊牧。又何撤為。如此。則日後似有未便。

上曰。理藩院甚為含糊。並未詳加揆度。著遣該衙門堂官一員。詳閱地方情形來奏。○乙丑。陞甘肅布政使雅思哈為都察院左副都御史。○二等侍衛梁鼎。以行賄革職。將所襲三等阿思哈尼哈番世職。以其子梁祚昌襲替。○丙寅。

上詣

太皇太后宮問安。○貴州貴西道楊大鯤疏言。貴州平大黔威四府。原係水西一隅。吳逆務張其功。設立四府。并設流知府。通判。經歷。各四員。及三鎮一協。其實民少。官多。請將四府酌改二府。其糧差各務。仍設土官分掌。至協鎮官兵。亦行裁并。量留二鎮。得旨。著差兵部侍郎庫勒納。會同該督撫提督。一并議奏。○丁卯。

上御太和門視朝。文武陞轉各官謝恩。○福建提督施琅疏言。進剿臺灣。選派水陸官兵。已足辦賊。平陽總兵官朱天貴所部之兵。似不

必更留福建虛糜糧餉請發回原汛議政王大臣等議如所請得旨提督施琅進剿臺灣深入海島朱天貴及原帶官兵仍留福建在後策應聽施琅調遣○戊辰賜軍政卓異山東文登營副將王秉耀等八人蟒袍有差○己巳諭差往貴州酌議土司事宜兵部侍郎庫勒納等曩時逆賊吳三桂見土司富厚因起兵收服之今既歸順議者往往不同或云土司係外尋即令土官管理易於行事不可遂取其地或云土司予以大職令其管理事務恐有權柄不為我節制或云我所取之地何復令彼管理仍取之為便或云設流官管理可多得錢糧朕思土司地方止有大定黔西威寧平遠四府錢糧亦不甚多今遣爾等前往務善為區處使可永遠遵行爾等即定議來覆毋得游移兩可○議政王大臣等議正黃旗蒙古都統穆占行間情罪應即行處絞籍沒家產

上曰穆占在保寧謊稱糧米已經運到在秦州交戰時不臨陣指揮遠立觀望在辰州推諉不救永興以此坐罪固宜但伊勞績約有二百六十處他人勞績四五十處尚行抵罪伊有如許勞績獨不可相抵乎這所議稍過著再議尋議覆穆占應革去都統阿達哈哈番籍沒家產妻及未分家子交內務府得旨著革職餘俱從寬免○和碩簡親王喇布以軍機削爵命以其弟雅布襲封和碩簡親王○以左春坊左庶子王封滌右春坊右庶子邵吳遠俱充日講起居注官○調正紅旗蒙古都統彭春為滿洲都統○庚午議政王大臣等會議原任正紅旗都統今陞西安將軍希福與長沙出城拒敵之賊交戰失利應革去將軍及恩詔所得拜他喇布勒哈番至伊父所有二等阿達哈哈番仍令應襲之人承襲上曰希福勞績甚多著革去拜他喇布勒哈番從寬仍留將軍及伊父二等阿達哈哈番又

議鑲藍旗蒙古都統喇賽在永興時賊兵來犯尚未立營不能攻破應革去都統佐領上曰喇賽在永興固守甚力頗有勞績為人亦優著革去佐領仍留都統○給廣東南澳陣亡官兵卹銀有差○戶部等衙門議覆各省糧船重運回空違限處分得旨漕運關係重大一切定例務期永遠可行河道淺深風勢順逆各有不同或遇積雨泥濘繚路阻壞易致稽遲若一槩從嚴處分恐經管各官徒被參罰旗丁人等亦受苦累究於輓運無濟漕運總督管理糧船是其專責漕糧過淮及回空之時應令漕督親身往來催趲毋致貽誤○辛未。

上詣

太皇太后宮問安○先是。

上諭秦省地方遼濶西安漢中關係更為緊要應將八旗滿洲蒙古漢軍官兵添設鎮守省城於此內酌量分撥駐防漢中尋兵部議江

南乃承各省水陸要地亦應與西安一體均派添設八旗滿洲蒙古兵丁駐防請將西安右翼四旗三千滿洲兵丁內留兵二千其一千兵丁發往江寧再將京城右翼四旗滿洲蒙古一千兵丁發往江寧添設駐防江寧左翼三千兵丁內留兵二千其一千兵丁發往西安再將京城左翼四旗滿洲蒙古一千兵丁發往西安添設駐防再從京城將八旗漢軍甲兵撥出二千名發往西安此二千漢軍甲兵內每翼設漢軍副都統一員每旗設駐防協領各一員防禦各四員驍騎校各四員於西安駐防兵內撥出滿洲兵丁一千名漢軍兵丁一千名在漢中駐防其副都統等官量其兵丁派出駐防仍令西安將軍統轄查近議荊州駐防發往兵丁三千六百餘名每旗設駐防協領各一員佐領七員防禦七員驍騎校七員今西安江寧設八旗駐防官員亦應照荊州設立將西安江寧所有兵丁及

從京發往左右二翼兵丁抽調分駐得旨江寧西安官兵互相抽調駐防道路遙遠恐驛站煩擾致累兵民應將自京發往荊州官兵分駐江寧西安將江寧西安互調官兵移駐荊州著再確議具奏至是部覆將江寧西安所調兵丁各一千名佐領各三員驍騎校各三員移駐荊州見從京師撥往荊州八旗滿洲蒙古每佐領下甲兵各六名內左右兩翼各兵一千名每旗佐領各三員驍騎校各三員發往江寧西安餘俱照前議從之○陞奉天府府尹高爾位為刑部右侍郎○陞叅領畢力克為歸化城左翼副都統○以內大臣伯四格掌鑾儀衛事務

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百九

監修總裁官光祿大夫太僕寺卿太子太傅保和殿大學士戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣劉世明

總裁官光祿大夫文華殿大學士兼吏部尚書臣朱軾等奉

敕修

康熙二十二年癸亥夏四月癸酉朔享

太廟

上親詣行禮○

上幸王泉山○甲戌議政王大臣等議將軍噶

爾漢既聞賊信不即親統官兵赴房縣救援

以功抵罪應革將軍免籍沒

上曰噶爾漢原因其人堪用簡授將軍著降五

級留任○乙亥命添造京倉廩八十一座○

兵部議覆都察院左都御史禧佛疏言海內

大寇提鎮諸臣宜次第入覲以重閭寄應如

所請

上曰在外提督總兵官等或地方緊要亦有不  
可離任者若俱令來朝則遠離汛地必致曠  
職如有應陞見者奏請候旨定奪又諭大學  
士等曰邊疆提鎮久據兵權殊非美事兵權  
久握心意驕縱故每致生亂常來朝見則心  
知敬畏如吳三桂耿精忠尚之信輩亦以不  
令來朝心生驕妄以致反叛此等事關係甚  
大況邊陲將士惟知其統轄之主不習國家

守至本年九月

二

法度曩者朕曾降敕於廣西將軍馬承廕馬  
承廕跪受其下諸人皆驚曰我將軍亦跪人耶  
即此觀之兵權不可令久擅也○又議覆貴州  
巡撫楊雍建疏言平溪清浪鎮遠偏橋四衛  
地土錢糧隸於湖南驛站夫馬則屬黔省以  
楚屬之衛弁管黔省之驛站甚為不便其平  
清二衛原係湖南地方應將驛馬總歸湖南  
驛道管轄其鎮偏二衛地土錢糧歸於黔省  
每年夫糧馬料即在黔省撥給實為兩便應

如所請。從之。○丙子。

上詣

太皇太后

皇太后宮問安。○工部題修

孝陵五空橋甬道。估計工價一千五百兩。

上曰。

陵寢關係重大。前監修各官草率修理。因致損壞。今若以節省之故。估價短少。錢糧不敷。將舊存碑石充用。恐不能堅固。寧使價值寬餘。

務令永遠堅固為善。著董修。

陵寢堂司官詳勘議奏。○諭議政王大臣等。今

我兵移駐黑龍江。當乘此發烏朱穆秦兵聲言捕鹿。以疑羅刹。復遣大臣一員至索倫。預

備軍需。亦聲言捕鹿。人將至。其令理藩院尚

書阿穆瑚瑯往烏朱穆秦。阿達哈哈番馬喇。

往索倫。○陞前鋒叅領查喇克圖為正紅旗

蒙古副都統。○以四川殉難提督三等伯王

之鼎子王毓秀襲爵。○戶部議覆奉天府府

尹高爾位疏言。奉錦二府所屬二州七縣。供

應南北二十餘站草豆。地方寫遠。有一邑而

供應二三四五站者。一站民夫十數名。伺候

草豆。不能分身南畝。況遼海蓋三州縣。離鳳

凰城甚遠。南陸站無一民居。又非州縣所屬

之界。州縣官不能分身供應驛站。請仍照舊

例。令各驛站供應。應不准行。得旨。各省往來

文移。俱由鋪遞傳送。奉天等處。亦應照例遞

送。如有緊要事情。該衙門應給火牌。其因私

入京。借稱傳送公文。經過驛站。供應到京。又

支草料。糜費甚多。且擾累驛站。作何嚴禁。更

定著確議具奏。○丁丑。

上御太和門視朝。文武陞轉各官謝恩。次厄魯

特進貢使臣等行禮。○諭西安將軍希福。陝

西地方甚為緊要。因爾効力行間。練習軍務

特簡此任。爾到西安。須嚴束兵丁。加意操演。

不得騷擾百姓。督撫布按。俱封疆重臣。地方

大吏。乃有駐防防禦等官。公然騎馬入伊衙

門。平行抗禮者。大夫體統。倘知縣等官。與爾將軍副都統平行。爾等之意。若何。近見浙江福建將軍。副都統。督撫。彼此不睦。題請坐見禮儀。豈不負朕視文武一體之意乎。又漢中地方。必簡選精兵。發往戍守。不得以強壯兵丁。留置本標。止以疲弱者發往。爾其識之。○賜安南國王黎維禎。

御書忠孝守邦四大字。○兵部題。各省副將以下。從賊武弁。投誠後。立有軍功八次者。議留。不及八次者。議革。

上曰。此議革各弁內。如有効力行間。素著勞績。才堪任周者。應俟該督提保題到日。引見錄用。○河道總督靳輔疏言。蕭家渡合龍。大溜直下。七里溝等處。逐漸坍塌。險汛日加。應行修理。共有四十餘處。并黃河之天妃壩。王公隄。運河之一切閘座。修防約需工料銀十五六萬兩。查原額河道錢糧。有二十六萬兩。因捐除荒災。止有十八萬餘兩。內除夫食歲修

等項。止存八萬餘兩。請照原額撥補。務於每年三月內。盡行解足。則工程永固。運道永通。民生亦永遂矣。得旨。蕭家渡決口堵塞。黃河大溜直下。七里溝等處。逐漸坍塌。險工甚多。關係緊要。應速行修築。務令隄岸堅固。不致再有衝決。所需銀兩。著將就近見在錢糧。先行動用。後以河銀補項。○戊寅。

上詣

太皇太后

皇太后宮問安。○議政王大臣等會議。都統席卜臣。副都統翁愛。原任副都統擴爾昆等。出兵功罪。

上曰。席卜臣尚有勞績。翁愛因大兵平雲南。亦有微勞。俱革職。免籍沒家產。擴爾昆無甚大罪。陣亡可憫。著議叙。○議政王大臣等議叙固山貝子章泰功。查貝子以上。從無議叙之例。惟信郡王剿滅察哈爾。曾以功績。寫入冊內。頒賞。應否亦遵此例。請旨定奪。



上命照例入冊。賜黃金二十兩。白金千兩。○一等海澄公黃芳慶。乞假回籍營葬。允之。○己卯。陞太常寺卿崔澄為大理寺卿。○庚辰。

上詣

太皇太后宮。問安。○先是。令烏喇寧古塔兵。往黑龍江。呼馬爾。尚未啓行。尋尚書伊桑阿以造船赴寧古塔。

上命傳諭巴海等兵。抵黑龍江。應駐何地。其詳議以聞。至是。巴海等奏言。黑龍江。呼馬爾。距

雅克薩城遼遠。若駐兵兩處。則勢分道阻。難於防禦。且過雅克薩。有尼布潮等城。羅刹倘水陸運糧。增兵救援。更難為計。宜乘其積儲未備。速行征剿。俟造船畢。度七月初旬。能抵雅克薩。即親統大兵。直薄城下。宣諭招撫。否則駐扎墨克頂諸地。即遣官兵與奉命赴羅刹甲士宜番。馳至雅克薩宣諭。兼觀其形勢。若何。再議進止機宜。令宜番一併奏聞。烏喇官兵乘往馬匹。恐長途疲羸。不任馳驅。索倫

近墨克頂。宜令選肥馬五百匹。送呼馬爾河口。酌量給用。議政王大臣等議如巴海等所請。

上諭。所議進征羅刹軍務。殊為疎畧。烏喇寧古塔兵。未歷征戰。不諳行陣紀律。將軍巴海及副都統官兵。又彼此不合。巴海著留守烏喇。薩布素。瓦禮祐。俱以副都統領兵前往。不必授為將軍。至所議七月兵到。即行攻戰。亦屬未可。俟抵彼相度。形勢奏請。可進之時。京城每旗精簡五十人。叅以軍前獲罪人員。委授夸蘭大叅領。別遣將軍。由陸路直趨。五旬可達。我兵至冬時攻戰。乃能有濟。若今冬不便克取。來夏令烏喇寧古塔兵。仍駐彼地。或撒還。至期酌行。又郎談言。取馬蒙古。不能即得。可選兵部。上駟院肥馬二千匹。於本年七月內。預發索倫地方收放。俟禁旅到後。留其羸馬。更以所備肥馬乘往。其傳集郎談。彭春。再行確議。於是議政王大臣等奏。

上諭深中事宜。固應祇遵。但前奉暫停攻取。相機舉行之旨。尤為切當。烏喇寧古塔兵。不須往墨克頂。勘得黑龍江呼馬爾之間。額蘇里地方。可以藏船。且有田隴舊跡。即令大兵建立木城。於此駐扎。宜番回自羅刹。再議派京師兵。或撤烏喇寧古塔兵。至巴海留守。烏喇薩布素。九禮祐。統兵以行。及預備馬匹於索倫。悉應遵旨。額蘇里。索倫。村莊之間。應設四驛。令赴索倫理藩院大臣董其事。從之。○陞吏部郎中拔錫為甘肅布政使司布政使。○陞叅領祖植檜為西安副都統。○辛巳。諭戶部。黔省為滇南孔道。地瘠民貧。大兵凱旋。輓輸芻糗。供應人夫。極其浩繁。且起解吳逆家口。絡繹運送。不無苦累。恐小民竭力供應。生計艱難。朕心深為憫惻。所有本年秋冬。及來年春夏。應徵地丁正項錢糧。盡行蠲免。以示朕軫恤民隱至意。○議政王大臣等會議。副都統魯西巴圖魯在岳州耽延時日。逗遛不

前。應行議罪。但乘船遇風。陷敵身亡。應免議。上曰。魯西巴圖魯雖行間有罪。但已陣亡。情屬可憫。其陣亡之處。仍著議叙。○壬午。

上詣

太皇太后宮問安。○癸未。議政王大臣等會議。署副都統雅哈喇在螺子山地方失利。又屢經退却。擬革職。立絞。籍沒家產。妻及未分家子。交內務府。又署副都統額思黑在永興地方。不能擊敗迎拒之賊。反率兵退回。亦擬革職。立絞。籍沒家產。妻及未分家子。交內務府。上曰。雅哈喇從寬免死。其妻子亦免交內務府。所有二等阿達哈哈番佐領。俱著革去。額思黑從寬免死。革去一等侍衛。妻子一併交與內務府。○授鎮國公鄧色之女為鄉君。壻喇穆蘇為鎮國公壻。秩四品。○甲申。

上詣

太皇太后宮問安。○陞護軍統領殷圖為正紅旗蒙古都統。○乙酉。

上幸南苑行圍○丙戌。予福建海澄陣亡正藍旗佐領李經世祭葬如例○丁亥。

上御太和門視朝。文武陞轉各官謝恩。次喀爾喀進貢使臣等行禮○戊子。

上詣

太皇太后

皇太后宮問安○陞督捕理事官董秉忠為奉天府府尹○予福建海澄陣亡鑲白旗佐領何世榮祭葬如例○己丑。

孝端文皇后忌辰遣官祭

昭陵○禮部右侍郎富鴻基以病乞解任。命回籍調理。病痊補用○旌表江南安慶烈婦朱子才妻胡氏給銀建坊如例○庚寅。諭大學士等。大凡貪生惡死。人之常情。朕見旗下僕婢。往往輕生投河自縊。必因家主責治過嚴。難以度日。情極勢迫使然。朕心深為憫惻。應如何教誡。此風可絕。明珠奏曰。此等事往日極多。蒙

皇上軫念。立法禁止。邇來此風較前差息。至殉葬一事。多屬逼迫。

皇上憐其無辜。再四嚴禁。今亦不聞有此等事矣○陞正紅旗滿洲副都統紀爾他布為護軍統領。叅領張所知為正黃旗漢軍副都統○九卿議。漕船過淮。應令漕運總督親身催督。如致違限。從重處分。其回空船隻。些少攬載。亦不致遲悞。且有益於運丁。但母得借裝載貨物家口。以致違限。從之○辛卯。添設工部滿洲主事八員。筆帖式十六員○以公坡爾盆為正黃旗蒙古都統○陞叅領佟嘉年為西安副都統○予雲貴陣亡左都督管總兵官事陳珣。都司僉書贈遊擊閔洪標。署守備贈都司僉書包汝才。都司僉書贈遊擊張璉。革職帶罪圖功遊擊林宗珍。各祭葬如例○壬辰。

上詣

太皇太后

皇太后宮問安○諭福建巡撫金鉉爾歷外職地方情事知之素矣。但古來有治人無治法。在奉行之善不善耳。苟善於奉行。則地方自然受福。若不善奉行。雖有良法。豈能有濟。爾須督率司道有司。實心料理。以副朕委任之意。○陞鑲白旗護軍統領塞格為蒙古都統。○免湖廣華容平江安鄉三縣康熙二十一年分水災額賦十之三。○予故廣西左江提督贈太子太保趙應奎祭葬如例。謚襄壯。○鑾儀衛鑾儀使左都督趙良棟疏言。臣於康熙十八年四月。疏請進兵。不十日而取徽州。十一月疏請兩路進兵。不十日而取成都。奉有

上諭趙良棟若不克取成都。保寧如何而得。若不得保寧。成都如何能守。是保寧成都兩路官兵功勞我

皇上無不知之。而部議保寧一路官兵功加十等。成都一路官兵功加一等。若是懸殊。伏乞

照例議叙。又言。臣於康熙二十年九月內抵滇。在總督金光祖營內會議。令臣進重關下營。取得勝橋。翊日章泰改令蔡毓榮取得勝橋。而蔡毓榮之兵。在重關已十四日。未能取橋。二十日。又公議令臣破南壩之賊。取雙塔。臣隨於二十二夜。破南壩。奪王皇閣安營。二十五夜。奪新橋等處。賊兵見我兵扼吭。人心始亂。郭壯圖自縊。吳世璠自盡。二十九日城開。此臣親率官兵。不三日而奏捷者也。今蔡毓榮官兵議叙加十三等。而臣下官兵直入取城。竟未議叙。乞敕部查叙。得旨著議政王大臣等會議。○癸巳。

上幸玉泉山。○陞安徽布政使龔佳育為太常寺卿。○予湖廣陣亡鑲黃旗佐領巴雅思呼郎。正黃旗佐領圖布深。正白旗二等侍衛白思虎郎。正紅旗三等護衛隨哈。正藍旗山海關佐領額爾遜。各祭葬如例。○乙未。陞翰林院掌院學士陳廷敬為禮部右侍郎。○丙申。

宗人府議。輔國將軍惠蘭墨梅。螺子山失利。擬革職。從之。○諭大學士等。賞賜外藩蒙古王。台吉等。牛羊等物。銷算價值。頗多浮費。與其多費價值。市牛羊以備賞賜。不若即將價值估計銀兩。給與蒙古。在伊等亦覺甚便。○已亥。議政王大臣等會議。螺子山交戰。失去龍纛。長史索拜。因伊父吳達禮陣亡功。免死革職。籍沒家產。本身及妻子。給該主為奴。其散騎郎一等阿思哈尼哈番羅詹。及護衛等官。俱分別定罪。

上曰。長史索拜。情罪可惡。理應正法。以伊父陣亡。免死革職。鞭責。發寧古塔。餘如議。又議都統喇哈達。自到浙江。並不前進剿賊。及降諭嚴趣。方進衢州。閩省初定。又不能攻破海澄縣賊眾。功罪相抵。應革去都統。及恩詔所得拜他喇布勒哈番佐領。其父兄之三等阿達哈哈番。與應襲之人承襲。

上曰。喇哈達。不能攻破海澄賊眾。以致賊眾圍

困海澄。其後賴塔雖至。亦不能救援。情罪頗重。但隨康親王平閩有功。又歷任年久。能勝都統職任。且多有勞績。從寬降五級。留都統任。并所襲阿達哈哈番。革去拜他喇布勒哈番佐領。○庚子。陞鑲白旗副都統莽奕祿。為護軍統領。調正紅旗蒙古副都統護巴。為滿州副都統。○予陝西殉難西安府知事贈衛經歷張文選。司獄贈主簿周勝驤。白水縣典史贈主簿趙煥文。浙江陣亡千總王天才。吳泗。徐天平。潘上吉。把總陳永祿。朱必勝。楊向春。閩有功。左朝極。張斌。各致祭銀兩。○戶部議覆。山西巡撫穆爾賽疏言。太原大同二府屬地畝荒蕪。人丁逃亡。無徵錢糧三萬四千四百餘兩。均請蠲免。應自康熙二十一年起。准其豁免三年。得旨依議。人民逃散。皆由地方巡撫以下。及有司各官。平日不能撫養百姓。督勸力田。於常平等倉。不行積穀備荒。以致倖遇凶年。小民失業。該撫以下各官。本應

從重處分。今姑寬免。著嚴飭行。

五月。壬寅朔。

上自玉泉山回宮。移駐瀛臺。○陞山西按察使柯永昇。為安徽布政使。司布政使。山東按察使張仲舉。為湖南布政使。司布政使。以原任山東按察使何毓秀。為四川按察使。司按察使。○議政王大臣等議。覆鑾儀衛使趙良棟奏。攻克成都雲南省城。二次功績。未經優叙。兩疏。查趙良棟。因不急救建昌。以致建昌等處陷賊。功罪相抵。無庸再叙。其標下官兵。交與兵部。仍令照例議叙。從之。○癸卯。

上以天時炎熱。恭請

太皇太后

皇太后避暑。

太皇太后移駐五龍亭。

皇太后移駐紫光閣。○予故鑲紅旗漢軍都統

趙璉。祭葬如例。○甲辰。

仁孝皇后忌辰。遣官祭。

陵。○乙巳。

上詣五龍亭問

太皇太后安。詣紫光閣問

皇太后安。○以故茅岡土司安撫使覃洪治弟

覃洪潮襲職。○丙午。

上御太和門視朝。文武陞轉各官謝恩。次厄魯

特噶爾瑪戴青和碩齋進貢使臣等行禮。○

調內閣學士張玉書為翰林院掌院學士。兼

禮部侍郎。○左僉都御史陳汝器條奏。每旗

應設一營操練火器。

上曰。所奏甚是。漢軍兵丁不能騎馬者甚多。每

旗應設一營操練火器。議政王大臣等集議

以聞。○禮部等衙門會議。外任滿漢文武各

官排班行禮次序。凡將軍總督及加將軍銜

提督在一班。副都統提督巡撫及加左右都

督銜總兵官在一班。加都督同知總兵官以

下總兵官協領。參領。巡鹽御史。織造府郎中。

關稅郎中。布按兩司在一班。佐領。關稅員外。

郎各道員。副將。叅將。掌印都司。在一班。防禦。關稅主事。知府。司庫。同知。通判。遊擊都司。在一班。驍騎校。知州。知縣。守備。在一班。有品級筆帖式。有品級烏林人。經歷。州同。州判。縣丞。千總等官。在一班。凡遇慶賀禮節。照此定例。頒行直隸各省。從之。○丁未。

上詣五龍亭問

太皇太后安。○予故正黃旗一等精奇尼哈番唐翰輔。祭葬如例。○戊申。

上幸南苑行圍。○陞陝西西安城守副將孫惟統。為浙江定海總兵官。鑲紅旗叅領監察御史張泰。為西安副都統。○庚戌。以翰林院掌院學士張玉書。充日講起居注官。○吏部題部院堂官保舉屬員事。

上諭大學士等。保舉官員。本求得人。部院堂官。應加意詳審。舉所深知之人。此所舉太多。且才不甚優。著再詳酌。據實保舉。○辛亥。

上詣五龍亭問

太皇太后安。○陞湖北糧道章欽文。為江西按察使。司按察使。貴西道楊大鯤。為山東按察使。司按察使。○壬子。恭親王常寧府第失火。上親臨救熄。○癸丑。

上詣五龍亭問

太皇太后安。詣紫光閣問

皇太后安。○陞翰林院侍讀學士孫在豐。為內閣學士兼禮部侍郎。○甲寅。遣官祭

關聖帝君。○補行雲南省辛酉科鄉試。命編

修米漢雯。為正考官。戶部主事高瑄。為副考

官。○乙卯。

上詣五龍亭問

太皇太后安。詣紫光閣問

皇太后安。敬奉

太皇太后

皇太后還宮。○諭大學士等。部院堂官。惟敬慎廉潔。方可無玷厥職。今觀各部侍郎。內雖辦事有才。而操守不足者有之。應將伊等改授



武職。向來副都統員缺。有將侍郎改授之例。自後副都統缺出。可將侍郎職名。一併開列。朕將酌而用之。○兵部議覆福州將軍佟國瑤疏言。京口將軍所統官兵。每旗協領。叅領防禦驍騎校。共十七員。今福州駐防每旗止有四五員。閩省邊海重地。軍務不可乏員料理。請添設協領以下。驍騎校以上等官。查福建左翼四旗。共兵二千名。今應每旗設駐防協領各一員。叅領各一員。防禦各五員。驍騎校各七員。今應將防禦驍騎校各裁去二員。留五員。京口八旗。馬兵二千名。步兵一千名。共三千名。每旗舊設駐防協領各一員。叅領各一員。防禦各十員。驍騎校各五員。今應將防禦裁去五員。留五員。廣州八旗。共設三千名。每旗舊設駐防協領各一員。叅領各一員。防禦各十員。驍騎校

各五員。今應將防禦裁去五員。留五員。又駐防漢軍。驍騎校有陞缺。防禦並無陞缺。以協領叅領。俱係三品。與防禦品級不符。不應補授。應將各省駐防漢軍。見有叅領外。嗣後補授之叅領。俱改為四品。又陝西八旗。二千漢軍。每旗舊設駐防協領各一員。防禦各四員。驍騎校各四員。此兵丁在西安漢中分駐。每旗駐防協領一員。難以分開。每旗各添四品叅領一員。防禦驍騎校各添一員。從之。○丁巳。吏部議覆福建總督姚啟聖疏言。汀漳道未經添設之先。原屬巡海道管轄。今既裁去。則二府地方職掌事宜。請仍歸巡海道兼理。應如所請。從之。○吏部議覆甘肅巡撫巴錫疏言。慶陽府同知一官。原司軍糧事務。而軍糧奉裁已久。毫無責任。地方多盜。請更為捕盜同知。應如所請。從之。○戊午。予故正藍旗都統勒貝祭葬如例。○己未。調四川北總兵官高孟為陝西寧夏總兵官。陝西寧夏總

兵官趙弘燦為四川北總兵官○議政王大臣等會議八旗漢軍馬兵鳥鎗手每佐領增十八人共二十人演習鳥鎗得旨火器開係武備甚為緊要應嚴加操演以裨實用○戶部題湖口關差應差二員或差一員。

上曰前因九江權關初移湖口故差二員各處開差止一員應照例亦著差一員○刑部等衙門會議革職銅山總兵官黃鎬先照謀叛律擬立決奉有從寬免死作何撥給之旨應將黃鎬及妻妾子女財產籍沒交內務府得旨黃鎬投誠之後多有勞績從寬免其籍沒併連坐人等俱令入旗○貴州巡撫楊雍建疏言新興一所設有千總專理驛站事務但該所人民稀少無錢糧徵收以致餉鞘停滯請以普安縣知縣移駐新興再割安南衛之仁讓二里附入普安版圖則供應夫役可無缺額其新興千總裁去以省冗員從之○庚申。

上詣

太皇太后宮問安○調鑲白旗蒙古副都統達克薩哈為滿洲副都統○巴林多羅郡王鄂齊爾故遣官致祭○辛酉刑部議覆直隸巡撫格爾古德條奏凡賣身旗下之人仍居本地方肆行詐害應盡令歸旗如有容隱者分別多寡將地方官議處。

上曰朕因旗下人雜居民地倚勢妄行欺壓百姓前于成龍格爾古德陛見時俱經面諭今其嚴察究處故格爾古德有此條奏今部議分別容隱多寡以定處分條例殊為未當。吾良之人安處地方雖多亦不為害若兇惡之徒恃強逞勢恣行不法雖一人亦為地方之累其原有田產家口素不為害於地方者若盡令歸旗又恐致其失業其確議以聞○偏沅巡撫韓世琦因搜採楠木請展欽部事件限期部議如所請。

上曰近見督撫將所理之事不為速結每借端

題請展限。以致遲延貽誤。滋弊累民。嗣後槩不許展限。如有因公出境。不能兼理完結之事。作何令其展限。九卿詹事科道。可會同確議。定例以聞。尋九卿等議。督撫往來本省。槩不展限。惟以公事出境。與監臨鄉試。及越省拘提人犯者。方許展限。仍計日扣算。從之。○壬戌。

上問兵部尚書杭艾曰。近議行間情罪如何。杭艾奏曰。大案俱已完結。見今所議皆細小情罪。

上曰。行間功罪相抵。難以允當。即如螺子山失利人員。其後効力功績。應得世職者。亦有之。侍郎郭丕奏曰。凡行間情罪。以敗績為重。議處最嚴。是以勞績多寡。未行分晰。

上曰。螺子山。石匣。祖山頭等處。較他處更甚。若槩行處分。不加分晰。似屬冤抑。此後功過相抵。務須妥確。○陞正紅旗前鋒叅領希禪。為蒙古副都統。○癸亥。

上詣

太皇太后

皇太后宮問安。○甲子。以右春坊右贊善翁叔元。充日講起居注官。○先是。福建總督姚啟聖疏言。海賊劉國軒。遣偽官黃學。齎書至請。照琉球高麗等外國例。稱臣進貢。不雜髮登岸。應否如所請。請旨定奪。

上曰。臺灣賊皆閩人。不得與琉球高麗比。如果悔罪。雜髮歸誠。該督撫等。遴選賢能官前往。招撫。或賊聞知。大兵進剿。計圖緩兵。亦未可料。其審察確實。倘機有可乘。可令提督即遵前旨進兵。至是。姚啟聖奏。遣福州副將黃朝用。往諭。劉國軒等。仍如前言。

上乃趣施琅速進兵。○丙寅。

上自瀛臺回宮。○丁卯。

上詣

太皇太后

皇太后宮問安。○戊辰。夏至。祭

地於

方澤

上親詣行禮○己巳陞長史博霽為鑲白旗蒙

古副都統○庚午

上詣

太皇太后宮問安

大清聖祖合天弘運文武睿哲恭儉寬裕孝敬  
誠信中和功德大成仁皇帝實錄卷之一百九

大清聖祖合天弘運文武睿哲恭儉寬裕孝敬  
誠信中和功德大成仁皇帝實錄卷之一百十

監修總裁官光祿大夫太僕寺卿兼太子太僕寺卿和碩大學士兼戶部尚書二等伯加四

級馬齊光祿大夫經筵日講官起居注少保兼太子太僕寺卿和碩大學士仍兼

管史部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十二年癸亥六月壬申朔○癸酉

上詣

太皇太后宮問安○陞參領吳際為正紅旗漢

軍副都統○甲戌阿達哈哈番馬喇等以茶

布往征羅刹軍前市易

上諭茶布不必攜往可於戶部支銀四千兩量

買諸物馳驛抵彼換取牛羊糧米以備軍需

勿得脅制民間各任其便○乙亥

上詣

太皇太后

皇太后宮問安○予故盛京禮部侍郎哈爾松阿祭葬如例○丙子。

上御太和門視朝。文武陞轉各官謝恩。次厄魯特進貢使臣等行禮○予廣西潯州府殉難知府贈太僕寺卿劉浩祭葬如例○吏部題故三等精奇尼哈番劉光世職。應令劉光之子劉文環承襲。得旨。此世職著劉光之弟劉邦桂承襲○丁丑。

上幸內庫。賜大學士勒德洪明珠李蔚王熙黃機吳正治金杯盤各一副。緞各二疋。紗各三疋。學士薩海等。緞各二疋。紗各一疋。詹事沈荃等。緞紗各一疋。內閣侍讀蒼柱等。紗各一疋○工部議覆河道總督靳輔疏言康熙二十一年以前江南決口未堵。上流不致壅滯。今決口全堵。除減水壩之外。更無旁洩之途。江南運道費如許金錢。甫有頭緒。若河南一有疎失。則全功盡棄。其開封歸德兩府隄工。通長一千餘里。或照往例撥歲修人夫興築。

或照近例。動帑金興築。查前經原任河撫佟鳳彩具題。停止淤夫。今應動河庫錢糧修理。總河豫撫會同詳定。務須修築堅固。得旨。河工關係緊要。蕭家渡決口。築塞方完。河南隄岸工程。專令河南巡撫暫行料理。如有應會同總河事情。仍移文商榷。勿致貽誤○戊寅。

上詣

太皇太后宮問安○調戶部尚書伊桑阿為吏部尚書○庚辰。議政王大臣等遵旨議覆。閒散宗室十五歲以上。及未滿歲數。無父幼子。俱給以拖沙喇哈番俸。至革職閒散宗室。俱不准給。內革退微職章京等。或貧不能度日。聽其具呈宗人府。察明具奏。月給銀四兩。從之○兵部議覆寧古塔將軍巴海誣奏叟登等處田禾未收。應革去將軍世職。

上曰。巴海遷移新滿洲。不可全謂無功。著留其阿達哈哈番世職。餘世職及將軍悉革去○兵部等衙門議覆。發往荊州漢中江寧西安

駐防官兵給房居住。派戶兵二部賢能司官各一員會同督撫量度。圈給民房作何給價。并添造房屋價值若干。令其報部。得旨依議。房屋未造完之前。若將官兵發往。無處棲止。必致借住民房。兵民受累。著俟房屋蓋造將完。具報到日。再將官兵發往。○刑部等衙門遵旨議覆賣身旗下之人。原有房田。守分度日。與地方無擾者。仍令居住原處。無田房者。俱令伊主收回。若在原處有生事犯法者。地方官申解治罪。仍令伊主收回。倘再留原處容留之主。及地方文武官各分別降罰。得旨依議。凡賣身之人。或曾經犯罪處分。或見有犯法事情。賣身旗下。希圖倖免者。從重治罪。買主知情。一併從重治罪。○壬午。

上詣

太皇太后

皇太后宮問安○

上御乾清宮講官牛紐張玉書湯斌進講。

上親講易良卦。諭曰。易經義理精微。無所不該。但人不能一一體認。見諸躬行耳。牛紐等奏曰。易理只是一時中。

皇上聖學淵深。以此理措諸政事。正是體用合一學問也。○癸未。

上奉

太皇太后出古北口避暑。命皇太子允初。皇長子允禔。皇三子允祉。隨駕。

上親扶

太皇太后陞輦。隨行。至牛欄山駐蹕處。

上步送

太皇太后至行宮門。親扶降輦。入行宮。

上始回行宮。○調兵部尚書杭艾。為戶部尚書。

○命太原總兵官移駐平陽。○以廣東嶺東守道事務歸併嶺東巡道。改為惠潮道。嶺南巡道事務歸併南韶巡道。改為廣南韶道。併肇高廉三府羅定一州。於嶺西巡道。改為分巡肇高廉羅道。併雷州一府。於瓊州道。改為

分巡雷瓊道○甲申。

上駐蹕密雲縣○陞都督同知管副將事王秉耀為直隸真定總兵官○乙酉。

上駐蹕陳穀莊○丙戌。

上駐蹕古北口內西山○丁亥。

上出古北口。駐蹕舍里烏朱地方○戊子。

上駐蹕恩格木噶山○庚寅。

上駐蹕上都畢喇地方○辛卯。

上駐蹕喇門嘉渾噶山○命鑲黃旗一等公內

大臣都統舅舅佟國綱。正黃旗副都統張所知。為兼管教習烏鎗兵丁總管○一等阿思

哈尼哈番覺羅蘇爾瑪。緣事革職。以其子覺

羅郎唐襲替○予故散秩大臣色勒。祭葬如

例○戶部題。臣部專治錢糧。而錢糧事務。莫

大於漕運鹽法。但漕鹽二項條款繁多。隨時

因革。如撥餉裁員。截漕增引。以及商民旗弁

之優恤。鹽課運艘之增減。合應彙摺。查臣部

主事趙吉士。張琦。纂修會典。將次告成。應即

令其續修漕運鹽法二書。臣等覆加檢閱。再行翻譯進呈。從之○叙温州金華等處剿賊功。授温州總兵官陳世凱。拜他喇布勒哈番。叅將吳英。拖沙喇哈番○壬辰。

上駐蹕博洛河屯○甲午。

上駐蹕烏爾格蘇台○禮部侍郎吳努春。以買良為奴。復行掠死。革職。並削佐領○丙申。

上駐蹕宜孫喀布泰昂阿地方○翁牛特多羅

杜楞郡王畢禮袞達賴。二等台吉鄂齊爾克

西克騰。一等台吉阿玉西等。率官兵來朝○丁酉。

上駐蹕拜巴哈昂阿地方○戊戌。

上駐蹕烏喇岱地方○庚子。以天氣亢旱。

上命建壇祈禱。是日甘霖大沛。

閏六月。辛丑朔。奉天將軍伊巴漢等議。覆臣

等遵旨。差官三路勘驗。渾河太子河根源。應

砍木植之山。及所砍之木。離水路遠近情形。

據稱杉木廠木植。離太子河三十餘里。栗家



口。哈爾山索爾擴木植離蘇子河六十餘里。自此運至界凡方入渾河。又納魯窩濟內有小河五道。此河兩邊山上木植離納魯河俱有二十餘里。自此運至杭家方入渾河。此兩河根源如運放木植俱可入海。應通行曉諭八旗。並府州縣有情願至天津貿易者該部給發執照。准其貿易。有借此夾帶禁物偷打貂鼠。私創人參等物者嚴行禁止。從之。○旌表山東濮州孝子祁三奇。給銀建坊如例。○癸卯。

上詣

太皇太后行宮問安。○乙巳。補投誠候補總兵官陳昌為銅山總兵官。○丙午。

上詣

太皇太后行宮問安。隨巡視營西爾哈和羅地方。是日。

上駐蹕柏敦昂阿地方。○丁未。

上駐蹕烏里雅蘇台。○補行四川省辛酉科鄉

試。以編修方象瑛為正考官。吏部員外郎王材任為副考官。○戊申。

上駐蹕西爾哈地方。○兵部議覆綏遠將軍雲南貴州總督蔡毓榮題。叅湖廣總督董衛國不聽調度。任意抗違。貽誤軍機。應行議罪。但董衛國奉

上指授。從鎮遠間道前進殺賊。恢復鎮遠府。應免議。

上曰。軍機最要。不容稍緩。董衛國能遵指授。剿殺賊寇。恢復鎮遠。實為可嘉。蔡毓榮何用題叅。且自恢復黔省以後。蔡毓榮亦無甚勞績。董衛國勞績甚多。此直蔡毓榮妒董衛國之功。故耳。蔡毓榮董衛國俱係敵體大臣。而不聽調度。違誤軍機。題叅。軍令至嚴。若罪坐董衛國。必罹重罰。陷人於死。反坐自有定例。著另議。尋部議降二級。得旨。蔡毓榮著削所加五級。○巳酉。

上駐蹕英西爾哈地方。○庚戌。

上駐蹕色爾白昂阿地方○予故內閣學士兼禮部侍郎達岱祭葬如例○辛亥。

上駐蹕納林郭爾地方○壬子。

上駐蹕格德爾庫地方○癸丑。

上駐蹕噶海圖地方○甲寅。

上還烏喇低地方詣

太皇太后行宮問安○以原任江西巡撫安世

鼎補原官○予四川陣亡陝西波羅營副將

郝善祭葬如例○丙辰以故真定總兵官周

球効力行間著有勞績贈太子少保○予故

浙江定海總兵官牟大寅祭葬如例○旌表

山東節婦濱州王氏城武縣王氏郟城縣李

氏濮州宋氏烈婦費縣宋氏威海縣盧氏烈

女費縣李氏各給銀建坊如例○戊午福建

總督姚啟聖題報提督施琅進剿臺灣克取

澎湖

上召學士薩海等傳諭曰施琅大敗海賊克取

澎湖此乃捷音爾等偏諭扈從八旗諸王貝

子公大臣侍衛各官知之○庚申。

上奉

太皇太后往拜察地方駐蹕烏里雅蘇台達巴

漢○諭刑部人命關係重大凡見審人犯自

應早取口供速行完結庶不致無辜久禁圜

圉淹滯斃命其中有應行詳審及等候質對

者或暫行監候或羈禁各門該管官員亦當

嚴加稽察不時照管毋令獄卒及守門人等

借端需索恣行凌虐且各犯雖有應得之罪

若未死於法先死於獄既非憲典亦干天和

朕心尤為不忍向來在外各衙門審理人犯

或係監斃或在路物故凡一起內至三人以

上者定有處分之例今思內外刑獄事屬一

體嗣後在內各衙門及各門監禁人犯一起

至斃幾人以上者作何處分著九卿詹事科

道詳議定例具奏○辛酉。

上駐蹕英昂阿地方○壬戌。

上駐蹕渾德地方○癸亥諭學士等曰一切政

事皆國計民生所關。最為重大。必處置極當。乃獲實效。朕每詳覽奏章。內有所疑。或折五六本。七八本。咨詢爾等者。務欲得至當耳。今爾等不各以所見直陳。一切附會。迎合朕意。則於事何益。朕從來不憚改過。惟善是從。即如乾清門聽政時。雖朕意已定之事。但視何人之言為是。朕即擇而行之。此爾等所共知也。堅執已見。獨持議論之人。朕素所不悅。觀今之大臣。甚不如昔之大臣。今之政事。亦甚不如昔日。部院無事無弊。大臣無人無私。外間之弊。較內更多。朕知之久矣。欲嚴治之。則其人甚多。難於盡處。所以朕數年來。屢下嚴旨。加意剔釐。今雖較前差善。而弊尚未除。且部院堂官。止圖已身安逸。辦事不勤。堂官推諉。司官司官推諉。筆帖式早歸私家。詭稱終日在署。此何理也。阿蘭泰奏曰。臣等蒙皇上拔用。惟是識見淺陋。不達事體。如果確有所見。敢不陳諸。

皇上之前。

上曰。爾等俱自筆帖式遞遷為大僚。云不達事體可乎。但恐開罪於人。故緘默不言耳。聞爾衙門滿洲大學士等。每當票擬。及與學士議事時。某某如此。票擬某某如此。持論惟恐。爾衙門中書輩漏泄。致部院大臣懷憾。漢大臣亦然。內閣最為機要之地。爾等亦議政之臣。宜各抒胸臆。直言無隱。但求事當於理。互相商酌。即小有得失。亦復何傷。朕焉有因議事而加罪者乎。且人資稟不齊。不可云事事盡知。此人所知。而彼不知者有之。彼人所不知。而此或知者亦有之。譬如京官不知外州縣之事。八旗人員。惟知本旗之事。不知別旗之事。必云彼盡知之。已所知者。置而不言。不可也。爾等其益勉之。○陞陝西臨洮道白應科為雲南按察使。司按察使。○給奪取貴州高家橋陣亡官兵卹銀。○三等精奇尼哈番穆承格。因軍機革職。以其弟監察御史辛桂襲。

替○甲子。

上駐蹕拜察地方○丙寅。

上御黃幄。設儀仗。賜進貢科爾沁。敖漢。奈曼。阿霸垓。喀爾喀。土默特。喀喇沁。翁牛特。克西克騰。王。貝勒。貝子。公。額駙。台吉等。及蒙古衆官兵宴。並賜蒙古親王。郡王。公等。及管領圍場各郡王。公等。袍帽靴帶等物有差。以故二等阿思哈尼哈番。孫達禮。巴圖魯。子抗受襲職。旌表江南烈婦傅氏。拒姦不從。殞命。給銀建坊如例。○己巳。陞安徽按察使王定國。為湖廣布政使司布政使。○福建水師提督施琅題報臺灣逆賊劉國軒。知臣等將乘南風進剿。傾巢而來。堅守澎湖。凡沿海之處。小船可以登岸者。盡築短牆。安置腰銃。臣總統舟師。於六月十六日進發。署右營遊擊藍理等。以烏船首先攻敵。時值潮水正發。前鋒數船被賊圍困。臣親駕船衝入。殺退賊艘。興化鎮臣吳英。繼後夾攻。焚殺偽將軍沈誠等。大

小賊目七十餘員。賊兵三千餘名。十八日進取虎井。桶盤嶼。二十二日。遣總兵官陳蟒。魏明等。領船五十隻為奇兵。直入雞籠嶼。四角山夾攻。又遣隨征總兵官董義。康王等。駕船五十隻為疑兵。直入牛心灣牽制。又將大烏船五十六隻居中。分為八隊。每隊駕船七隻。各作三疊。留船八十隻為後援。臣指揮督率直進撲剿。賊船齊出迎戰。總兵官林賢。朱天貴等。繼進夾擊。自辰至申。我師奮不顧身戮力殺賊。擊沉大小賊船一百九十四隻。焚殺偽官三百餘員。賊兵一萬二千有奇。劉國軒力不能支。乘快船從吼門潛遁。偽將軍楊德等一百六十五員率賊兵四千八百餘名。倒戈投降。是役也。以七日夜破數十年盤踞之賊。抵澎之後。海不揚波。進師之時。潮漲四尺。以佐成功。此皆皇上天威所致。至各將士戮力用命。督臣姚啟聖。親來廈門。餉運不匱。並請議叙。又總兵官

朱天貴遊擊趙邦弼陣亡。亦請優卹。得旨。據奏總統舟師。分配將士。將年久盤踞海逆。深入進剿。屢次擊敗賊衆。斬殺甚多。燒燬打沉賊船。克取澎湖。招降偽官兵丁。得獲礮位等項。具見卿籌畫周詳。調度有方。官兵奮勇。攻拔海洋險要重地。深為可嘉。在事有功人員。從優議叙。姚啟聖親至廈門彈壓。殫心催餉。糧運鼓勵將士。克奏捷功。亦從優叙。朱天貴等。從優議卹。議政王大臣等。會議以聞。○議政王大臣等。會議奉差閱勘定邊等處。理藩院侍郎阿喇尼奏稱。多羅貝勒松阿喇布。所請暫給遊牧。邊外蘇海阿魯諸地。離定邊興武營等邊。或五六十里。或百里不等。並非邊內耕種之地等語。應如松阿喇布所請。暫給遊牧。從之。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百十一

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣赫廷錫

總裁官光祿大夫文華殿大學士兼吏部尚書臣朱斌等奉

敕修

康熙二十二年癸亥秋七月庚午朔享

平餘卷一百十一

太廟遣吏部尚書伊桑阿行禮

上在拜察地方御黃幄賜管領圍場阿祿科爾

沁多羅郡王額駙色楞岡山額駙巴特瑪並

台吉等宴○是日

上奉

太皇太后自拜察回鑾

上親扶

太皇太后登輦乘馬隨行至湖都克土布拉克

地方駐蹕○賜阿祿科爾沁多羅郡王額駙

色楞等袍帽韉帶弓矢各有差其兵丁各賜緞足銀兩○辛未

上召科爾沁達爾漢親王額駙班第阿祿科爾

沁多羅郡王額駙色楞翁牛特多羅杜楞郡

王畢禮袞達賴喀喇沁多羅杜楞郡王扎什

及公台吉官兵等諭曰人生以道理為重人

為情欲所牽恣意妄為以致喪身者皆由不

明道理故耳朕見其無知陷罪甚為可憫即

今阿祿科爾沁翁牛特三旗盜賊甚眾為盜

賊而致富者能有幾人身受惡名被獲則死

凡貧富皆由天命違理妄求能必得乎爾等

若遵法守分有一二牲畜者擇水草善地畜

牧能耕田者勤於耕種則各得生理天亦佑

之如此豈不善乎倘有貧困至極無以聊生

者該管之主宜加撫恤使之得所坐視其迫

於饑寒以致離散爾等之心何安朕本內外

一視並無分別爾外國過年歲荒歉朕即運

糧米賑濟或有困乏即賜牲畜緞足無非慮

爾等失所之意。況此番巡幸爾等或有過犯朕竝不執法治罪且頻加賞賚優待爾等於此可見嗣後爾等宜遵守教諭革除惡習以副朕好生之意。額駙班第等奏曰。

皇上憐憫訓誡臣等惟有銘刻肺腑竭力遵行。衆官兵俱鼓舞踴躍合詞奏曰。

皇上聖明於我等生理歷歷洞悉。此後我等當盡改前非共遵國法以無負

皇上聖心也○壬申。

上駐蹕齊老圖地方○癸酉。

上駐蹕碩隆哈達地方○甲戌。

上駐蹕孟克昂阿地方○丙子。

上駐蹕哈瑪爾瑚爾希勒畢喇地方○丁丑。

上駐蹕喀拜和洛昂阿地方○戊寅。旌表河南

臨潁縣節婦程可玉妻唐氏守節六十三年。

夏邑縣烈婦陳裔方妻賈氏夫亡自盡各給

銀建坊如例○乙卯。

上駐蹕上都畢喇地方○

上奏

皇太后書曰臣隨侍

聖祖母臨幸烏喇岱興安拜察地方。朝夕欣奉慈顏。今已回鑾。將至京師。但還宮日期。未便豫定。凡所經過皆大山茂林。竝無土產佳物。惟畋獵所獲鹿尾鹿脯。因時當盛暑。醃晒成乾。曾經進奉。未知到日。其味何如。蒙加餐否。臣自拜違。漸及兩月。欲表思念

聖母之心。將臣烏鎗所得鹿尾親手法製并揀榛令坐塘筆帖式等馳送。伏冀垂鑒。少賜七著○庚辰。兵部題發往荊州江寧駐防官兵需用船隻。請將廣西回京官兵家口所坐船隻封撥。係民船給與僱值。係官船給與工食。得旨將廣西等處官兵家口坐來船隻令其裝載前往。恐該管官員濫行封撥。借端需索。累小民著差部院堂官一員會同直隸巡撫酌定官兵乘坐數目量行撥留。毋得多留滋擾○壬午。

上駐蹕三道河○癸未。



上駐蹕夏克圖地方○諭戶部兵部海洋險遠風濤不測自有明以來賊寇盤踞島嶼出沒靡常為害已久本朝平定閩省逆賊鄭成功竄伏海島侵擾沿海一帶地方雖屢經剿殺未盡根株逆孽遁踞臺灣蠢爾遊魂尚恣窺伺自滇黔底定賊寇殄除獨茲海外鯨鯢猶梗王化必須用兵撲滅掃蕩逆氛庶海隅安全民生樂業特命施琅為水師提督統領舟師並飭該督調度會商相機征剿今克取澎湖已扼險要臺灣逆穴指日殲滅立見廓清凡進剿軍前所需兵餉米折應用器械及修理船隻預備物料各項錢糧所關甚為緊要應差部院堂官一員前往會同督撫速為料理不拘何項錢糧儘見在者准其動用毋致貽誤其同施琅進剿官員兵丁著照進剿雲貴事例從優加級賞賚以示朕鼓勵將士優恤兵丁至意○甲申中元節遣官祭永陵。

福陵  
昭陵  
孝陵  
仁孝皇后  
孝昭皇后陵○  
上駐蹕西喇塔拉地方○理藩院題鄂爾多斯貝勒松阿喇布等報稱厄魯特巴圖爾濟農於黃河崖駐牧議遣司官二員諭使歸部上諭學士等曰此事朕知其故初厄魯特鄂齊爾圖汗為噶爾丹博碩克圖所殺其國被奪其子衮布喇卜坦其姪巴圖爾濟農敗遁求達賴喇嘛指授所居之處達賴喇嘛令衮布喇卜坦住居阿喇克山自此遂居彼地先是巴圖爾濟農於我定邊界緣邊駐牧曾移文噶爾丹博碩克圖言此乃爾厄魯特之人爾若收取則取之若不收取我自處置噶爾丹覆云且過來年俟後年收之今聞衮布喇卜坦取喀爾喀土謝圖汗之女為妻兩處互

相犄角。噶爾丹博碩克圖欲以兵向衮布喇卜坦。巴圖爾濟農則恐喀爾喀土謝圖汗躡其後。欲以兵向喀爾喀則恐衮布喇卜坦等躡其後。蓋斷不能收取巴圖爾濟農者也。且噶爾丹衆最貧苦。有一馬者。即稱為富饒。勢必內生變亂。此事暫留。俟回京再奏。○諭兵部奏事章京南岱。攜至羅刹二人。所司加意贍養。時其飲食。毋得缺乏。以示軫恤之意。○乙酉。

上駐蹕喀喇巴克什地方。○丙戌。

上駐蹕恩格木噶山。○戊子。命兵部右侍郎熊一瀟會同直隸巡撫察撥發往荊州。江寧官兵船隻。○命工部右侍郎蘇拜。往福建料理軍前糧餉事務。○陞湖廣武昌道盧崇興。為安徽按察使。司按察使。○己丑。

上駐蹕舍里烏朱地方。○庚寅。

上進古北口。駐蹕潮河營西山之東。○辛卯。

上駐蹕陳毅莊。○諭八旗護軍統領夸蘭大等

穀者生民之命。一歲不登。則一歲乏食。今正秋收之時。由穀未獲。向恐擅放馬匹。蹂踐禾苗。屢降明諭傳飭。今觀隨從人等。尚有不遵法令。蹂踐民田者。爾等各嚴緝以聞。○以故二等阿思哈尼哈番魯西巴圖魯之子布納海襲職。○免甘肅靖遠衛。本年分旱災額賦有差。○工部題駐防外省官兵。在京房屋。應令戶部給發房價。其房屋。給本佐領內無屋窮兵居住。從之。○壬辰。

上駐蹕王家莊。○皇子生。週歲薨。未命名。○癸巳。

上駐蹕三家店。○廣西巡撫郝浴題報。投誠安南國都統使莫敬光等。並帶來家眷。先經奉旨。發回安南國安插。除莫敬光續經病故。及族眷百姓陸續逃故外。共計三百五十名口。於本年五月二十四日。押出南關。交該國差員申公才等。領回安插。下部知之。○給廣西紫荆山陣亡都司吳錫綬等。及兵丁卹銀有

差○甲午。

上奉

太皇太后回京。親扶降輦。入宮。隨詣

皇太后宮。問安○乙未。

上詣

太皇太后

皇太后宮。問安○陞內閣學士薩海為禮部右

侍郎○吏部題正一真人張繼宗疏請恩詔

誥命及父母祭葬。查正一真人故從無賜卹

致祭之例。應不准行。其恩詔誥命。應如所請。

得旨。張繼宗見號真人。即著照所襲銜名。給

與誥命。一切僧道。原不可過於優崇。若一時

優崇。日後漸加縱肆。或別致妄為。爾等識之。

○丙申。三等阿思哈尼哈番朱伸保軍機革

職。以其親叔之子。黑色襲替○海逆鄭克塽

遣偽官鄭平英等。齎降表至提督施琅軍前。

總督姚啟聖轉奏。請頒赦招撫。

上命撰敕發姚啟聖。同施琅酌行。敕曰。

皇帝敕諭鄭克塽。劉國軒。馮錫范等。帝王撫御

寰區。仁覆無外。即海隅日出之邦。無不欲其

咸登衽席。共享昇平。爾祖父自明季以來。出

沒海洋。盤踞島嶼。本朝定閩之後。爾祖鄭成

功。竊據一隅。甘外王化。以及爾父鄭錦。苟延

歲月。假息偷生。勾引奸倭。窺伺內地。屢經剿

撫。仍執迷不悟。頑梗怙終。至爾年方童穉。惑

於黨類之言。妄思效爾前人。竄伏臺灣。恃為

窟穴。倚險負固。飄突靡常。以致沿海地方。里

閭不寧。時遭兵燹之厄。朕念中外兵民皆屬

赤子。何忍聽其久罹水火。不加拯救。故特命

提督施琅。選將練兵。整飭戰艦。揚帆進剿。直

出大洋。旋據奏報。已克澎湖。爾等抗拒大兵。

者。殲滅殆盡。餘衆敗遁臺灣。目今舟師進剿。

指日蕩平。近據總督姚啟聖。奏爾等具疏請

降。又據來使呈乞恩赦。朕體

上天好生之心。薄海內外。率俾安全。特頒敕旨。

前往開諭。爾等果能悔過投誠。傾心向化。率

所屬偽官軍民人等悉行登岸。將爾等從前抗違之罪盡行赦免。仍從優叙錄。加恩安插。務令得所。煌煌諭旨。炳如日星。朕不食言。倘仍懷疑畏。猶豫遷延。大兵一至。難免鋒鏑之危。傾滅身家。噬臍莫及。爾等其審圖順逆。善計保全。以副朕宥罪施仁至意。○刑部等衙門遵旨議覆內外刑獄事。屬一體處分。之例。理宜畫一。嗣後問刑部院衙門。承審官員。凡審案件。限內不取供。審理與雖取供不行審結。以致犯人。並牽連之人。監禁斃命。或羈門斃命。將承管官照外官例處分。堂官不據實題。參照督撫例處分。若禁卒守門人役將監禁羈門犯人。恣行凌虐致斃。應處分司獄城門尉等官。斃三四人者。罰俸三月。五六十人者。罰俸六月。七八十人者。罰俸九月。九十人者。罰俸一年。十人以上。革職。從之。○丁酉。上諭。差往臺灣料理兵餉。工部侍郎蘇拜等曰。方今區宇悉平。僅餘海寇。因此事重大。特遣

爾等往理官兵糧餉。與各項錢糧。宜措備豐足。其進取臺灣官兵。勤勞奮力。攻克澎湖。深為可嘉。爾等至彼。專遣人宣諭慰勞官兵。更念以兵力攻取臺灣。則將士勞瘁。人民傷殘。特下詔旨招降。倘其來歸。即令登岸。善為安插。務俾得所。勿使餘衆。仍留原地。此事甚有關係。爾等勉之。○叙攻取雲南玉皇閣等處功。加川北總兵官趙弘燦。西寧總兵官李芳述。隨征總兵官偏圖。為左都督。隨征總兵官馬山。為拖沙喇哈番。餘各進秩有差。并給陣亡官兵卹銀。○叙恢復徽州。成都等處功。浙江衢州副將呂自魁。四川建昌總兵官王進才等。三百八十六員。各進秩有差。并給陣亡官兵卹銀。○贈澎湖陣亡左都督平陽總兵官朱天貴。太子少保。准一子為廕生。○戊戌。上詣太皇太后。皇太后宮問安。○陞陝西布政使麻爾圖為內

閣學士兼禮部侍郎○陞浙江台州副將黃鉉為平陽總兵官○出使厄魯特內大臣奇塔特等還奏。臣等於十二月二十八日。至噶爾丹所居帷幕。噶爾丹跪受敕書及賞賚諸物。隨請

皇上起居。臣等答曰。

皇上萬安。既坐。噶爾丹問曰。聞中國有寇賊。今已平定。信乎。臣等答曰。比年曾有寇盜竊發。我

皇上仁慈。恐用兵擾民。故漸次收服者有之。剿滅者有之。今已盡皆底定矣。至正月初九日。臣等召其車臣寨桑吳爾占扎卜。以部發查訊厄爾德尼和碩齊。巴圖爾額爾克濟農之文。授之。曰。此項事情。先已檄行兩次。並無回文。故因我等此來之便。令定議。如厄爾德尼和碩齊。巴圖爾額爾克濟農係爾屬下人。當限日收捕。照例治罪。齎罰贖送部。若非爾屬下人。或不能收捕。我朝另有裁奪。車臣寨桑

等來覆曰。我汗言前所行兩檄。第以為部文。所以未答。既係

聖旨。敢不以覆。厄爾德尼和碩齊。巴圖爾額爾克濟農皆我所屬。此二人已歸達賴喇嘛。我當遣人往召之。倘如命而至。我治其罪。若復他遁。則無如彼何也。臣等令彼約期。期以丑年四月。臣等曰。厄爾德尼和碩齊等向在邊境作亂。但念汝等職貢年久。所以姑待。今約期既遠。其間未必不又作亂也。彼稱噶爾丹之言曰。其間或又作亂。惟

上處分。臣等又問。去年七月。有稱為汝汗之姪丹津鄂木布之使者。並無符驗。前來進貢。汝處何項人等。給之符驗。何項人等。不給符驗。彼復稱噶爾丹之言曰。我遣使請安進貢。必有印文。至我屬下之人。各處貿易。潛至中國。冒稱我使。亦未可定。自今以後。我若遣使。當用印文。開注年月日期。正月二十七日。臣等起行。噶爾丹博碩克圖汗。遣其額爾克格隆

察漢溫卜卓禮克圖溫卜盆楚克等四人貢馬四百匹。駱駝六十頭。貂皮三百。銀鼠五百。捨剌獐皮三張。沙狐皮一百。黃狐皮二十。活雕一隻。貼金牛皮五張。厄魯特烏鎗四桿。隨臣等來謝恩。奇塔特等又疏奏曰。臣等去年十二月初至噶爾丹地方。有歸化城都統古睦德所屬班達爾善之子巴朗來投。臣等告曰。我於康熙十八年正月自歸化城歸途。遇厄魯特所使阿卜都拉額爾克寨桑。同入貢之格楚爾者。將我綑縛帶至此地。今聞大人至此。特來相投。臣等召其車臣寨桑等問之。車臣寨桑來覆我汗言。我國一切罪犯。從無殺之之例。可罰格楚爾以十五九牲畜。乞諸大人稍候帶歸。臣等言。我等奉差頒恩賞而來。並非來取罰贖。不便等候。俟有貢使之便。將罰贖附解。得旨。令議政王大臣等逐一詳議。尋議政王大臣等議。噶爾丹博碩克圖汗累代進貢。往來通好。今將敕書賞物。照彼蒙

古禮接受。恭請

聖安。又稱嗣後遣使俱給用印符驗。填注年月日期。應無庸議。其厄爾德尼和碩齊等事。約以丑年四月為期。約期之內。如仍復作亂。悉聽

皇上處分。應俟所期之年再議。攜回之巴朗交都統古睦德。其格楚爾應俟照彼國例治罪。將罰贖牲畜解送到日。所司再議。從之。先是阿達哈哈番馬喇等奏。索倫總管博克等所獲羅刹及軍前招降者共選五人。遵旨送京。餘二十六人皆迫於大兵始行投誠。索倫距羅刹近。不宜久留。應一併解至。議政王大臣等議。送京交戶部安插。博克等所獲宜番米海羅莫羅對二人。賞以衣帽。遞至薩布素處放還。請飭理藩院作書。即令宜番持去。其書畧云。前遣孟額德等曾與爾約。各毋收納通逃。并以先年逸去根特木爾歸我。乃背前約。入我邊地。擾害打虎兒索倫。焚劫飛牙喀。

奇勒爾。今故命將出師。永駐額蘇里。爾若離我邊境。還爾本土。以逋逃來歸。則已。否則。我亦納爾逋逃。即往來之人。亦必擒戮等語。從之。○己亥。工部議覆總河靳輔大修清水潭。蕭家渡等口。并歲修工程。共二十八本。奏銷錢糧。

上曰。河道關係國計民生。最為緊要。前見靳輔為人。似乎輕躁。恐其難以成功。今聞河流得歸故道。深為可喜。以後宜加嚴密。勿致疎防。方為盡善。其各本俱依議。○陞左都督管副將王珍為雲南鶴麗總兵官。○翁牛特多羅達爾漢貝勒搜色。吳喇忒鎮國公諾門故。各遣官致祭。

八月。庚子朔。

上諭大學士等。近觀厄魯特。噶爾丹博碩克圖來使。較前漸多。每一次。常至數百人。聞其沿途過邊外。遊牧蒙古。肆行擾害。外國之人。若行痛懲。又恐失柔遠之意。彼處遣來人員。當

有定數。不可聽其意為多寡。嗣後正使頭目。酌量數人。令進關口。其餘人等。或令在張家口外。或在歸化城交易。事畢。應即遣回。此事著議政王大臣。會同確議具奏。○諭講官。朕每旦未明求衣。坐待部院奏事。奏事既畢。然後入講。不惟遲延晷刻。亦且稽誤工夫。自後於未啟奏前進講。方得從容議論。多所發明。自是講官待漏宮門。甫辨色。

上已御講筵矣。○二等精奇尼哈番畢力克軍機革職。以其子南第襲替。○予故滿洲副都統覺羅席布。永興陣亡護軍。叅領色黑。各祭葬如例。○辛丑。

上詣

太皇太后宮。問安。○諭經筵講官等。經筵關係大典。自大學士以下。九卿詹事科道俱侍班。所講之書。必君臣交儆。上下相成。方有裨於治理。向來進講。俱切君身。此後當兼寓訓勉。臣下之意。庶使諸臣皆有所警省。○陞詹事



府詹事圖納為內閣學士兼禮部侍郎○予雲南陣亡三等阿達哈哈番查慕素祭葬如例○壬寅秋分夕

月於西郊遣左都御史禧佛行禮○諭大學士等朕觀靳輔所繪黃河圖淮黃交會之處形勢頗相脗合其河北一帶於所題本章矛盾者甚多應令工部行文該地方官繪送兵部以備披覽至塞外地名或為漢語所有或為漢語所無應察明編入一統志○以正紅旗蒙古都統殷圖為寧古塔將軍○以侍讀學士恭領洪尼喀為杭州副都統○癸卯議政王大臣等會議內大臣奇塔特奉差頒賞蒙古擅娶寨桑之女為妻辱罵博碩克圖汗箭射引導之人乘醉刃刺其弟諸罪論死得旨奇塔特從寬免死減等發落○予江西陣亡千總馬成麟戚大奇張士傑李龍陳應龍曾珍王炳把總楊國龍周焜高虎關茂雲蔡美蔡

廷珍曾龍殉難千總鄭華馮啟奉李明把總陳潤黃勝黃啟龍致祭銀兩○甲辰

上御太和門視朝文武陞轉各官謝恩次喀爾喀進貢使臣等行禮○二等阿思哈尼哈番託岱軍機革職以其弟噶思哈之子姜密襲替○乙巳封鎮國公蘇努女為鄉君授其婿科爾沁阿弼達為鎮國公壻秩四品○予陝西陣亡西安佐領木臣額得爾格爾各祭葬如例○丁未遣大學士黃機祭

先師孔子○

上詣

太皇太后宮問安○陞內閣侍讀學士阿哈達為詹事府詹事○旌表福建節婦徐氏廖氏彭氏各給銀建坊如例○戊申

太宗文皇帝忌辰遣官祭

昭陵○陞四川陝西總督哈占為兵部尚書○

己酉刑部題發掘故明廢藩墓盜案

上諭大學士部議照盜發常入墳墓律擬絞盜

發藩王等墳墓。何得與平人一例。凡歷朝俱應稱某代。必稱故明。深覺未當。以後本章。凡故明廢藩字樣。應悉除之。其盜發墳墓與撥人看守之處。著九卿詹事科道議奏。○理藩院題。打虎兒哈納烏爾等三人。告稱貧苦。難以聊生。懇入內地。應編入旗下。得旨。哈納烏爾等。以貧苦無聊。來投內地。甚為可憫。務令安插得所。○免甘肅莊浪所。本年分電災額賦十之三。○旌表山西節婦永寧州邢氏。臨晉縣楊氏。各給銀建坊如例。○庚戌。

太祖高皇帝忌辰。遣官祭

福陵。○辛亥。

上御經筵講畢。賜大學士九卿詹事及講官等宴。○刑部議覆。正藍旗副都統孫塔哈與都統俄托渾。爭論詒言。孫塔哈應革去。阿思哈尼哈番。副都統佐領鞭責。副都統方額。應革去。加一級。仍降一級調用。叅領勞代等各降二級調用。

上曰。凡事必各出所見。互相論辯。則是非方明。情理可得。若止為首之人。獨理事務。更無他人與之爭辯。豈有不致錯悞者乎。副都統與都統。乃敵體共理事之官。非屬官比也。今因一爭詈之事。坐孫塔哈如此重罪。自此以後。為副都統者。又誰敢與都統折辯。即如部院衙門之事。止有尚書立議。侍郎知其非而緘默不言。可乎。孫塔哈人尚可用。在軍前頗有効力之處。從寬降三級留任。罰俸一年。方額革去所加級留任。○壬子。

上詣

太皇太后

皇太后宮問安。○戶部議覆。山西巡撫穆爾賽巡鹽御史馬爾漢疏言。前撫圖克善清查鹽丁。將老少病廢。盡行開報。迨鹽池水患。仍責鹽丁修築。以致力役交困。里甲包賠。今通計包賠一萬七千一百餘丁。銀一萬五百餘兩。請行豁免。應如所請。從之。○予江西陣亡二

等侍衛貴傳祭葬如例○工科給事中許承宣題請修葺天下學宮以崇文教從之○復廣西省賑濟貧生學租銀米從巡撫郝浴請也○甲寅

上御太和門視朝文武陞轉各官謝恩次厄魯特進貢使臣等行禮○先是

上以八旗貧兵養贍不給命議政王大臣等會議資生之策至是議政王大臣等議旗下兵丁貧無妻室者官給資婚娶無房屋者令八旗王以下官員人等以上有房屋四十間者分撥一間給與居住無田土者以戶部所存未分撥田土撥給并丈量王以下官員人等以上戶內田土有較原數浮溢者令存留候撥

上曰所議尚未盡善每四十間撥給一間如在住室牆垣之內恐有未便或別所房屋或空地築室撥給庶不涉於強派其皇莊地土未經議及亦非公私一體之誼應令一并丈量

若親王以下富戶以上有空閒園地房屋情

願捐輸入官者著該部奏聞分別議叙○予故輔國公英格理祭葬如例○予故副都統根特巴圖魯祭葬如例○福建水師提督施琅題報七月十五日鄭克塽遣偽官馮錫珪等偽侯劉國軒偽伯馮錫范遣其弟偽副使劉國昌馮錫韓等齎降表文稿詣臣軍前請繳偽冊印率眾登岸以求安插臣隨遣侍衛吳啟爵筆帖式常在同馮錫珪等持榜示往臺灣曉諭偽官兵民驗視薙髮即令鄭克塽等繕寫降表并偽冊印一并齎送以便代奏至臺灣雖在海外地方千餘里戶口數十萬或棄或守伏候

上裁得旨海洋遠徼盡入版圖積年逋寇悉皆向化具見卿籌畫周詳剿撫並用克奏膚功朕心深為嘉悅在事有功人員該部一并從優議叙餘令議政王大臣會議以聞尋議政王大臣等議臺灣應棄應守俟鄭克塽等率

衆登岸。令侍郎蘇拜與該督撫提督會同酌議具奏。從之。○乙卯。陞吏部郎中席格為陝西布政使。司布政使。○以禮部郎中袁時中為貴州按察使。司僉事。提調學政。○鑲白旗漢軍都統朱延禧。以老病乞休。允之。○理藩院題蘇尼特四子部落台吉及屬下人等。無以聊生者。先曾遷至八旗遊牧地方養贍。今該扎薩克王並協理旗下事務台吉等既請收回撫養。應准發回。

上曰。此不能資生之台吉人等。遷至遊牧地方給贍牲畜糧米。已經三年。今該扎薩克王等既請收回撫養。應遣大臣一員前往。親行驗明。交與扎薩克王等。內有不能前去。願留者。仍准存留。嗣後如再不能養贍。則該扎薩克王及協理旗下事務台吉等。俱應處分。著申飭曉諭。○諭大學士等曰。近見刑部事件。延挨稽遲。不作速完結者甚多。因一人犯法。牽累多人。徒受縲紲之苦。朕心深為不忍。凡事

雖皆有限期。而一遇齋戒。又復扣除。齋戒雖不用刑。若尋常聽斷及審取口供。有何不可。如何速令完結。犯人不致苦累。著九卿詹事科道會議以聞。○丙辰。大學士等遵旨議覆刑部事件。遇齋戒日。雖不動刑。仍令取供定罪。以便速結。

上曰。朕於刑部事件。所以念念不忘者。特以別部事件。雖少遲延。不過牽累一二人而已。不致大害。若刑部事件。遲延太久。則正犯暨無辜牽累者。身家性命。受害無窮。朕念及此。每為惻然。其借行提兩造干証。故意稽遲時日。應作何立法。盡除弊端。著再議具奏。又諭曰。刑部不獨人命大事。遲延日期。即杖笞鞭責之罪。亦復延挨。雖都察院及該科衙門。每月稽察檔案。不過虛名而已。何益實事。嗣後照熟審例。十日內所結事件。造冊奏報。則事不致稽遲。而定罪之當否。亦可盡知。此等小事。朕不應苛察。但刑部事務漸至頽廢。恐人犯

無辜受害。故爾頻加稽察。爾等可傳諭此意。一併會議。○丁巳。轉宗人府右宗人鎮國公喀爾薩。為左宗人。以輔國公瓦山。為右宗人。○以刑部郎中李質素。為廣西按察使司僉事。提調學政。○戊午。祭。

大社

大稷。

上親詣行禮。○

上詣

太皇太后

皇太后宮問安。○諭荊州將軍噶爾漢。副都統郝佛。阿際禮。曰。朕以荊州地方。極其緊要。故特戍兵鎮守。爾等至彼。務令兵民相安。方稱委任。荊州自兵燹以後。地方殘壞。民生困苦。曩時爾等親歷其地。必知其詳。自將領以至兵丁。宜嚴行禁飭。凡市肆要地。毋得侵占。至秋成之後。爾等可親率兵丁。不時操練。務期隊伍整肅。紀律嚴明。毋得借端擾害百姓。凡

爾等舉動。皆為兵丁之表率。其所行若正。不獨官兵有益。即地方亦受其福矣。近見西安官兵。尚有滿洲舊制。杭州駐防滿兵。漸習漢俗。此等情事。皆責在爾等。可勉力圖之。至於爾等乘往船隻。皆係雲南廣西回京官兵所坐之船。其船夫勞苦已極。爾等最宜體恤。勿加凌辱。聞船夫受兵丁凌辱不堪。皆棄船逃遁。深為可憫。爾等所宜切戒。○以都察院左都御史禧佛。為四川陝西總督。○以刑部郎中姚淳憲。為湖廣按察使司僉事。提調學政。○庚申。翰林院題覆工料給事中許承宣疏。請刊刻。

御製詩文。臣等詳考經史。自古帝王制作。煥然可紀者。莫著於詩書。嗣後西漢文最近古。史稱孝文。詔令有三代遺風。唐宋明歷代。各有刊刻。帝王文集。典例昭然。我皇上聖德神功。卓越千古。道統治法。無總百王。而猶日御講筵。典學不倦。睿思所及。發揮理

道。迥出諸臣意表。間以手詔申誠。羣下辭旨深淵。同符典謨。萬幾之餘。留心著作。或發為文章。或形諸篇什。鎔鑄六經。包蘊萬象。為歷代帝王所未及。允宜刊刻頒布。用昭典冊之極觀。文明之盛事。伏乞俯允科臣之請。簡發御製詩文。敕下臣衙門。鳩工鑄梓。頒示中外。流徽億禩。得旨。歷代帝王詩文。俱造詣精工。堪以傳布。朕萬幾餘暇。留心經史。雖間有著作。較之往代。自覺未能媲美。本不欲遽行刊布。今既援據典例。懇請勉從。所議刊行。○喀爾喀車臣汗遣使進九白年貢。宴賚如例。○辛酉。

上御乾清宮。講官進講畢。

上曰。易理精微。難以意測。就講章披覽。詞意亦甚分明。然尋繹聖人繫詞取象之旨。實非言語所能盡意。故易學最難。牛紐張玉書等奏曰。易理甚深。後人所解。不能盡暢其理。

皇上聖學淵通。默契古聖人之心。故深知義理。

無窮言不盡意。○議政王大臣等會議。永興過河交戰。失利。官員分別處分。

上曰。我朝軍法。從來嚴明。雖承平時。不少寬假。然尚有未盡處。因定例內。擊敗賊寇。凡受傷回營之人。俱准論功。又我軍退却。凡受傷退回者。亦得免罪。於是不肖之徒。怯於戰鬥。故將伊身自作傷痕。希圖規避者。不無其人。更有甚者。因一人受傷。即數十人扶擁送回。規避不前。如此。則軍法豈不縱弛。今雖殲滅賊寇。海內寧一。所有軍法未盡處。不可不詳議改定。特諭爾等知之。○壬戌。

上御乾清宮。講官進講易豐卦三節彖傳。講章內云。驕心一生。何所不至。故聖人急急惕之以憂。以為安者危之伏也。治者亂之機也。

上曰。此所發明極是。滿招損謙受益。聖人久安長治之道。只在能持滿而已。牛紐等奏曰。

皇上此言真保治之宏謨也。○諭吏部凡職官宜論俸次陞用。若越次用之。則倖得者必多。

況希圖速遷者豈安常守分之人耶○調偏沅巡撫韓世琦為四川巡撫○免甘肅慶陽衛安化縣本年分旱災額賦十之三○宗人府遵旨議覆一等阿思哈尼哈番覺羅蘇爾馬之世職係伊祖業穆濟所得蘇爾馬軍機革職不應與伊子承襲因更無承襲之人仍令蘇爾馬之子郎唐承襲今查原任副都統莽嘉之子馬克蘇係業穆濟親姪應將郎唐所襲之職改授馬克蘇從之○癸亥

上詣

太皇太后宮問安○陞吏部左侍郎科爾坤為都察院左都御史○予故副將管鼻陵總兵官事胡世英祭葬如例○乙丑一等阿思哈尼哈番准塔軍機革職以准塔兄子長在襲替○廣東廣西總督吳興祚疏言廣東兩鎮官兵奉旨酌量緊要地方駐扎今議左鎮統領陸兵一千水兵二千駐扎廣州分防要汛右鎮統領陸兵三千駐扎韶州居中調度分

防連陽英清一帶地方下兵部知之○丙寅皇子允禔生○一等阿思哈尼哈番羅詹軍機革職以其堂叔圖思海襲替○丁卯遣官祭

歷代帝王○遣官祭城隍之神○

上問學士牛紐張玉書湯斌等曰爾等所修明史如何牛紐等奏曰嘉靖以前已纂修過半萬曆朝事蹟甚多天啟朝實錄有殘缺崇禎朝無實錄今就所有邸報編纂事蹟方可分作紀傳所以萬曆以後成書較難

上曰時代既近則瞻徇易生作史昭垂永久關係甚大務宜從公論斷爾等勉之○戶部遵旨議覆盛京寧古塔將軍各部衙門有緊要事件差官給與火牌照舊從驛站供應平常移文一概停其差遣官役無舖兵地方交與驛站傳送有舖兵地方交與舖兵傳送又每年取領官兵俸餉及緞疋等物所差官兵太多嗣後取領俸餉止許差部官一員旗下章



京一員。烏林人一名。撥什庫披甲三十名。取領緞疋等物。止許差司庫一員。烏林人一名。著為令。從之。○戊辰。

上幸南苑行圍。○刑部題。原任漳州總兵官吳三畏。先曾在溫州從逆。自陳本內。隱瞞欺誑。應仍照謀叛律立決。得旨。吳三畏投誠後。曾經効力。從寬免死者流徙寧古塔。○刑部等衙門遵旨議覆。歷代帝王名臣先賢墳墓。令地方官不時查看。倘有曾被發掘者。量為修葺。其發掘開棺見尸。為首者立決。為從者立絞。發掘見棺。為首者立絞。為從者監候絞。發掘未至棺槨。為首者監候絞。為從者充發。著為令。從之。○福建水師提督施琅題報。臣於八月十一日。率領官兵。自澎湖進發。十三日。入鹿耳門。至臺灣。十八日。鄭克塽。及偽文武官俱已薙髮。宣讀赦詔。鄭克塽等歡呼踴躍。望闕叩頭謝恩。所有鄭成功之子偽輔政公鄭聰等六人。鄭錦之子鄭克塽。及其弟偽恭

謹侯鄭克舉等九人。偽武平侯劉國軒。偽忠誠伯馮錫范等子弟。及明裔朱桓等十七人。并續順公下官兵家口。海澄公家口。俱撥船配載官兵陸續護送移入內地。并移咨侍郎蘇拜。及督撫聽其安插。其餘偽文武各官家口。見在趣令起行。兵丁有願入伍及歸農者。聽其自便。至於江浙閩粵各省。被獲男婦。臣仰體

皇仁。已悉令回籍。其偽冊印劄付。已次第追繳。倉庫人民戶口冊籍。船艘軍器。俱令巡海道線一信等察收。下所司知之。

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百十一

聖祖實錄卷一百十一

三十五

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百十二

監修總裁官光祿大夫太僕寺卿太子太傅保和殿大學士兼戶部尚書二等伯加四

級馬齊尼祿大夫經筵日講官起居注少保兼太子太傅保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣劉世明

總裁官光祿大夫文華殿大學士吏部尚書臣朱軾等奉

敕修

康熙二十二年癸亥九月己巳朔庚午

聖祖實錄卷一百十二

上御乾清宮講官進講易旅卦象曰旅小亨一  
節象曰山上有火旅一節

上曰君子明慎用刑即是刑期無刑之意張王  
書奏曰

聖諭誠然比來屢次

上諭申飭刑部令其慎刑清獄天下民命皆全  
於

皇上好生一念中矣

上曰只是使民無訟難耳牛紐奏曰

皇上愛民如此。日久自臻刑措之盛。張玉書奏曰。堯舜在上。亦須從容化導。乃能至於無刑耳。○轉吏部右侍郎色赫為左侍郎。調禮部左侍郎額星格為吏部左侍郎。管右侍郎事。○辛未。以故一等阿思哈尼哈番張應慧之子張松齡襲職。○鑲藍旗蒙古都統喇賽以老病乞休。慰留之。○壬申。調正白旗蒙古副都統得爾德為滿洲副都統。○兵部遵旨議覆世職官員及有職任官員。併王府有世職散騎郎典儀官員。假稱患病。具呈告退者。俱行革職。有世職者。令應襲之人承襲。若本身所得世職亦革去。其不行嚴查徇情具保之都統副都統長史等官。俱降級罰俸。至前鋒叅領護軍叅領前鋒侍衛鑾儀衛官員及有世職侍衛藍翎護軍校等。假病告退及不行詳察該管大臣俱照此例議處。從之。○喀爾喀額爾克戴青台吉等遣使進九白年貢。宴賚如例。○癸酉。

上御太和門視朝。文武陞轉各官謝恩。次厄魯特噶爾丹博碩克圖使臣等行禮。○陞江蘇布政使丁思孔為偏沅巡撫。○以投誠候補總兵官陳耀為廣東碣石總兵官。○議政王大臣等遵旨議覆。凡係逆犯應行入官匠役家屬人口有私帶入京者。令其首送到部。若已經私自放出為民者。亦令呈首。嗣後隱匿不首者。係官交部從重議處。係平民照例擬罪。其不行詳查之都統等官下部議處。小撥什庫鞭一百。各省將軍副都統以下。披甲以上。總督巡撫以下。兵丁以上。均照此例遵行。得旨。若係將軍等分撥及軍功被傷賞給者。仍留與原主。餘依議。○甲戌。以喀爾喀故多羅卓禮克圖郡王達爾札子顧魯希席襲爵。○乙亥。諭差往廣東察審欺隱尚之信家產郎中常保等曰。此案關係侵蝕入官財物。尚逆家產。先係金傷。宜昌阿總理。後禪塔海。亦曾往彼察審。今以爾等堪任。是以擇遣前往。

務須從公覈審。此事顛末。朕皆洞悉。勿以干涉大臣勢要。妄徇情面。株累無辜。○奉天將軍伊巴漢疏言。錦州寧遠水手六百名。遷移巨流河地方。其運送米石時。請免征錢糧。部議不准。

上曰。水手運送糧米。往來甚屬勞苦。運米時。著將地丁錢糧。悉行蠲免。○丙子。

上詣

太皇太后

皇太后宮。問安。○轉禮部右侍郎薩海為左侍郎。調刑部右侍郎鄂哈為禮部右侍郎。陞內閣學士佛倫為刑部右侍郎。○吏部題。原任雲南府知府高顯辰。同知劉崑。抗逆不從。被賊酷刑。遣戍。高顯辰服毒死。劉崑在戍所。始終不渝。高顯辰應贈太僕寺卿。廕一子入監讀書。劉崑仍以原官補用。從之。○丁丑。

上諭理藩院尚書阿穆瑚琿曰。朕統一寰區。無分中外。凡爾民人。咸吾赤子。惻然憐憫。皆欲

使各樂其居。各安其業。鄂羅斯國羅刹等。無端犯我索倫邊疆。擾害虞人。肆行搶掠。屢匿根特木爾等逃入。過惡日甚。朕不忍即遣大兵剿滅。屢行曉諭。令其自釋過愆。速歸本地。送還隱匿逃人。前次所差彼使尼過來。亦經曉諭。但羅刹尚執迷不悟。反遣其部下人。於飛牙喀奇勒爾等處。肆行焚殺。又誘索倫打虎兒。俄羅春。之打貂人額提兒克等二十人入室。盡行焚死。此曹雖經曉諭。藐不畏法。因特遣將軍統兵駐守黑龍江。呼馬爾等處。不許羅刹仍前恣意妄行。遇即擒殺。頃者羅刹諸人。經過黑龍江地方。遇我將卒。降其三十餘人。奏至。朕體好生之德。未戮一人。皆加養。使各得其所。今雅克薩尼布潮羅刹等。若改前過。將根特木爾等逃人送來。急回本地。則兩相無事。於彼為益不淺。倘猶執迷不悟。留我邊疆。彼時必致天討。難免誅罰。如路遠難歸。傾心投誠者。朕亦納之。必加恩恤。使各

得其所。爾院即遵旨明白具文。遣招降羅刹。內宜番米海羅莫羅對。執書曉諭。彼有何言。令其回奏。○甘肅提督侯張勇。以病乞解任。慰留之。○先是。副都統薩布素等奏。冬時進征。礮具軍糈。輸運維艱。倘過大雪。亦未便用兵。今冬可暫駐額蘇里。俟來年四月冰解。即往攻雅克薩城。命議政王大臣會議。尋議政王大臣等議覆。前奉暫停攻取。相機舉行之旨。薩布素請於來年四月進征。無庸更議。

上諭。我兵既命永戍額蘇里。應派烏喇寧古塔兵五六百人。打虎兒兵四五百人。於來秋同家口發往。設將軍。副都統。協領。佐領等官鎮守。深為有濟。至來年。運席北諸地糧米於額蘇里。若止用獵戶。必致稽遲。薩布素等業已支取來年六月前兵食齎行。今又停止進征。應量發薩布素等軍前水手。由陸路直往席北。俟來年冰解。與獵戶協運。可否如此施行。令郎談馳驛速往薩布素處確議。尋薩布素

等奏。額蘇里今年七月。即經霜雪。烏喇寧古塔兵家口。若令來秋遷移。恐地寒霜早。諸穀不獲。難以餬口。應於來春就近移打虎兒兵五百人。先赴額蘇里耕種。量其秋收再遷家口。以烏喇寧古塔三千餘兵分為三班。將軍副都統等。更番統領駐防。議政王大臣等議如所奏。

上復諭曰。果如薩布素等所奏。兵丁頻事更番。必致困苦。非久長之策。其在黑龍江建城永戍。豫備礮具船艦。令設斥候於呼馬爾。自黑龍江至烏喇置十驛。驛夫五十人。遇有警急。乘蒙古馬疾馳。尋常事宜。則循十驛以行。由水路陸續運糧積貯黑龍江。此兵既往。且立二年之業。仍設將軍副都統領之。如羅刹船由黑龍江下。我舟師尾擊甚易。況黑龍江地勢遼濶。照內地置十驛。又易安置家口。如此一一區畫。則羅刹自窮蹙歸誠矣。其遣理藩院郎中額爾塞與薩布素確議以聞。至是薩

布素等奏。永戍黑龍江諸務。

上諭周詳。悉宜遵奉。但來年遷移。兼以築城屯田。力不能支。請發烏喇寧古塔兵五百人。協力築城。工竣即回。

上諭烏喇寧古塔兵。別有調遣。毋得發往。令副都統穆泰。率盛京兵六百人。於來年三月抵彼處。築城器具。悉備以行。餘俱如前議。○戊寅。

上詣

太皇太后宮。問安。○諭寧古塔將軍殷圖曰。南方各省。人人願往。至寧古塔。則不願者多。朕以爾才能可用。故簡任為將軍。烏喇別無他事。彼土之人。惟好訐訟。爾至當敷布教化。俾識理義。令俱改過遷善。尤宜愛養兵丁。令各得所。我兵逼近羅刹。須時加操練。以修武備。巴海。暴戾貪污。不恤士卒。遂致失所。其新滿洲。皆求主來歸。理應撫綏慰勞。施以教化。俾安其生。盛京副都統佟寶。是一堪用之人。在

烏喇將及一載。彼處地方情形。必能洞悉。爾到日。可暫留佟寶。一二月。奏明後方遣回。○諭杭州副都統洪尼喀曰。杭州駐防滿兵。漸染陋俗。多不束帶。鞞履而行。既為滿洲。則當遵滿洲職業。勤於騎射。爾到日。可勉力奉行。○諭吏部。兵部。向來海寇。竄踞臺灣。出沒島嶼。窺伺內地。擾害生民。雖屢經剿撫。餘孽猶存。沿海地方。烽烟時警。邇者滇黔底定。逆賊削平。惟海外一隅。尚梗王化。爰以進剿方畧。諮詢廷議。咸謂海洋險遠。風濤莫測。長驅制勝。難計萬全。朕念海氛不靖。則沿海兵民。弗獲休息。特簡施琅為福建水師提督。前往相度機宜。整兵進征。該提督忠勇性成。韜鈴夙裕。兼能洞悉海外形勢。力任剋期。可奏蕩平。遂訓練水師。整頓戰艦。揚帆冒險。直抵澎湖。鏖戰力攻。大敗賊眾。克取要地。立奏膚功。餘眾潰遁。臺灣懾服。兵威乞降。請命。已經納土登岸。聽候安插。自明朝以來。通誅積寇。始克

殄除瀕海遠疆。自茲寧謐。此皆該提督矢心報國。大展壯猷。籌畫周詳。布置允當。建茲偉伐。宜沛殊恩。施琅著加授靖海將軍。封為靖海侯。世襲罔替。以示酬庸。前進剿雲南官員。曾各加一級。兵丁賞賚一次。頃因該提督所統官兵。出海進剿。勤勞堪念。已經照雲南例。加級賞賚。復思官兵遠抵海疆。冒險剿寇。非滇黔陸地用兵可比。在事官員著再各加一級。兵丁再賞一次。以示特加優渥至意。○理藩院覆奏。厄魯特巴圖爾額爾克濟農移近黃河對岸游牧。請遣官往會松阿喇布等。諭令退回。得旨。不必遣官。其以此情節。檄發拉篤祐。曉諭退回。拉篤祐久勞於外。事畢。令來京回奏。○予故雲南鶴麗鎮總兵官四什六祭葬如例。○己卯。

上奉

太皇太后。巡幸五臺山。

太皇太后。陞輦降輦。

上皆親扶。及駐蹕。復步送。

太皇太后入行宮。

上始入行宮。是日。駐蹕萬安寺。○以詹事府詹事阿哈達。充經筵講官。○予故吏部尚書郝惟訥祭葬。諡恭定。○庚辰。

上駐蹕董家林。○陞通政使司左通政席特納。為內閣學士兼禮部侍郎。○予故真定總兵官贈太子少保周球祭葬如例。○辛巳。

上過涿州。以長城嶺一帶。山徑險峻。先往親視。所修道路。命裕親王福全。恭親王常寧。隨太皇太后駕行。是日。

上駐蹕劉家中王地方。諭扈從科員顧圖。刑部郎中趙山。凡經過地方。不許隨從人等。借名市物。擾害小民。爾等宜嚴加察訪。犯者並其本主。題參治罪。○壬午。

上駐蹕大馬家莊。○福建巡撫金鋆。題參屬官七員。

上諭學士等。總督巡撫。一到地方。即題參屬員。



甚多。及到任既各反無糾劾。官員賢否必須日久體訪。方能悉知。其入境即參。無非欲屬吏畏己之意。積習相沿。殊為未當。爾等識之。○直隸巡撫格爾古德來朝。

上以地方緊要。命即回保定。不必扈行。○癸未。上駐蹕完縣白廟村。○敕諭厄魯特噶爾丹聲教既一以來。爾歷世相承。虔修職貢。聘問有年。朕嘉爾盡心敬順。往來不絕。故向來爾處所遣之使。不限人數。一槩俱准放入邊關。前此來使無多。且頭目人等。善於約束。是以並無妄行作亂者。比年爾處使來。或千餘人。或數千人。連綿不絕。沿途搶奪。塞外蒙古馬匹牲畜。進邊之後。任意收放。牲畜踐食田禾。網縛平民。搶掠財物。妄行者甚多。邊外蒙古與內地百姓。非不能相拒報復。祇以凜遵朕之法度耳。朕俯念爾等素行恭順。不將若輩照內地律例究處。遂致妄行殃民。日以益眾。用是限定數目。放入邊關。嗣後爾處所遣貢使。

有印驗者。限二百名以內。准入邊關。其餘俱令在張家口。歸化城等處貿易。其向來不用爾處印驗。另行納貢之厄魯特噶爾馬。戴青和碩齊。和碩特之博洛庫濟台吉。杜爾伯特之阿爾達爾台吉。圖爾古特之阿玉奇台吉等。所遣貢使。放入邊關者。亦不許過二百人。爾噶爾丹博碩克圖汗。尚毋違朕視四海一家。中外一體至意。敬慎遵行。嗣後遣使。必選賢能頭目。嚴行約束。若仍前沿途搶掠殃民作亂。即依本朝律例。傷人者。以傷人之罪罪之。盜劫人財物者。以盜劫之罪罪之。特此先行曉諭。爾其知之。○甲申。

上駐蹕曲陽縣北鎮里地方。以行近五臺。傳諭自明日始。扈從人等勿射生。○免寧夏平羅所水澆沙壓田賦。○免山東新城縣本年分水災額賦十之三。○兵部議覆。原任四川陝西總督哈占疏言。潼關商州神道嶺金鎖關四營。向屬慶陽協管轄。途路寫遠。一切緊急。

軍務必致遲悞。請將神道嶺等營令潼關營管轄。聽固原鎮總轄。至富平營分防六縣。況廣兵單。將鄜縣營兵五百名內。撥馬兵五十名。守兵五十名。給富平營防禦。應如所請。從之。○乙酉。

上駐蹕長壽莊。○丙戌。

上駐蹕龍泉關。○丁亥。

上駐蹕菩薩頂。○陞甘肅平慶道王業興為四川按察使司按察使。○戊子。

上途次。遇村民負米豆等物。詢之。云備臨幸之用。隨傳諭學士阿蘭泰曰。

太皇太后駕臨五臺。一切應用之物。皆出內帑預備。原無絲毫取給小民。此所備物件。何處應用。可察明具奏。隨詢五臺知縣趙繼晉及村民等。皆云。五臺地方偏僻。恐

太皇太后駕到。物用不敷。故給價小民。令預備以待用。原非出於科派。

上曰。因公事預備。可免究處。但云知縣曾經給

價。未可深信。今一切物用。內庭既備。此後太皇太后駕到。俱不必再行齎送。可傳諭直隸山西沿途官民知之。○庚寅。以

太皇太后聖駕近龍泉關。

上自菩薩頂往迎。是日駐蹕龍泉關。○辛卯。

上自龍泉關行二十里迎。

太皇太后聖駕。請安畢。隨行抵龍泉關。

上以長城嶺道路。雖經修治。而地勢險絕。恐鑾輿登陟維艱。特赴長城嶺。用輦親試。每至陡

峻處。校尉舁輦。步履欹側。不能徑上。

上還。奏聞。

太皇太后。

太皇太后曰。予以積誠瞻禮五臺。今行至此。遽爾中止。予心未安。明日至長城嶺。如萬不能登。可再酌行止。於是

上諭校尉及隨侍內監等。務勤加演習。小心扈行。○壬辰。

上詣

太皇太后行宮。候

駕發隨行。至長城嶺。

上侍左右。親督校尉。及隨從人等。前後扶行。歷嶺路數盤。山勢巉嶮。險隘殊甚。

太皇太后諭曰。嶺路實險。予及此而止。積誠已盡。五臺諸寺。應行虔禮者。皇帝代我行之。猶我親詣諸佛前也。

上下馬。謹受

太皇太后命。遂躬導

鑾輿還龍泉關。仍命和碩裕親王福全。扈

太皇太后聖駕前發。○諭工部。明歲甲子年。一

切工程。俱宜停止。○戶部議覆。廣東廣西總

督吳興祚疏言。舊例廣西南。太。思。三府。俱食

廉鹽。鬱林等處。俱食高鹽。拆運甚便。後因鹽

田盡遷。改銷梧孔。今高廉二府。鹽田既復。請

仍照舊例。改食高廉之鹽。路近價賤。有便於

民。應如所請。從之。○旌表安慶節婦馬氏。黃

氏。吳氏。烈婦趙氏。烈女姚氏等。各給銀建坊

如例。○癸巳。

上還菩薩頂駐蹕。○發白金三百兩。綿四百觔。命山西巡撫穆爾賽。分給所過地方貧民。○甲午。

上承

太皇太后慈諭。代禮諸寺。○刑部等衙門。遵旨議覆。旗下家人莊頭等。在外倚勢害民。霸佔子女。把持衙門。及擎人到家。網縛打死者。內包衣人。將該管官降級留任。王貝勒貝子公家。將該管家務官降級留任。民公侯伯大臣官員家。將伊主降級留任。係平人。鞭責著為令。從之。○乙未。

孝慈高皇后忌辰。遣官祭

福陵。○

上自菩薩頂回鑾。駐蹕龍泉關。○戶部議覆。羅刹歸順人機里郭禮等。應交與正白旗。編入佐領下。

上曰。羅刹歸順人頗多。應令編為一佐領。令其

彼此相依。庶有資藉。○丙申。

上駐蹕阜平縣。○丁酉。

上駐蹕長壽莊。

冬。十月。戊戌朔。享。

太廟。遣戶部尚書杭父行禮。○遣官祭。

永陵。

福陵。

昭陵。

孝陵。

仁孝皇后。

孝昭皇后陵。○頒康熙二十三年時憲曆。○

上駐蹕北鎮里地方。○己亥。

上至五郎河。率內大臣等詣。

太皇太后行宮問安。是日駐蹕白廟村。直隸巡。

撫格爾古德來朝。

上以地方事務緊要。命還。○以故一等伯釋迦。

保之子長生襲爵。○喀爾喀澤卜尊丹巴胡。

土克圖遣使進貢。賞賚如例。○庚子。

皇太后聖壽節。遵。

懿旨。免行禮。○

上駐蹕滿城縣方上地方。○辛丑。

上駐蹕易州大方地方。○壬寅。

上駐蹕冊上村。○福建陣亡二等阿達哈哈番。

達色無子。命以達色堂兄二等阿達哈哈番。

發色并為一等阿思哈尼哈番承襲。○以故。

三等阿思哈尼哈番宜廷輔之子宜兆熊襲。

職。○予澎湖陣亡平陽總兵官左都督贈太。

子少保朱天貴祭葬。謚忠壯。○保靖州宣慰。

使彭鼎患病。以其子彭澤虹襲替。○山西太。

原府地震。○癸卯。

上駐蹕松林店。○甲辰。

上駐蹕董家林。○乙巳。

上駐蹕長新店。○丙午。

上奉。

太皇太后回京。詣。

皇太后宮問安。○吳喇忒輔國公褚崇克故。遣。

官致祭○丁未九卿詹事科道以海寇底定請加

尊號

上曰加上尊號典禮甚大臺灣屬海外地方無甚關係因從未嚮化肆行騷擾濱海居民迄無寧日故興師進剿即臺灣未順亦不足為治道之缺朕觀古來史冊盛世無屢赦之事此時雖頒赦加恩小民未必均沾實惠治天下之道但求平易宜民而已何用矜張粉飾且吳三桂剿滅後頒赦未久今又以昇平行赦殊覺太煩朕但願以平易之道圖久安長治不願煩擾多事可將朕意傳諭九卿詹事科道知之尋大學士等奏臣等遵旨傳諭諸臣諸臣言臺灣雖在海外乃海賊歷年佔踞憑恃其險侵擾沿海居民今皇上指授廟畧剿撫兼行海賊遂爾向化皇上威德加於海外自古以來未有能及臣等非不知

皇上以易簡之道治天下不尚粉飾惟皇上功德實越古昔帝王非加上

尊號無以慰臣民仰戴之願

上曰海賊乃疥癬之疾臺灣僅彈丸之地得之無所加不得無所損若稱尊號頒赦詔即入於矜張粉飾矣不必行○戊申皇子允禔生○陞原任副將鑲白旗佐領雷繼宗為漢軍都統○予殉難陝西經畧武英殿大學士刑部尚書管兵部尚書事莫洛祭葬諡忠愍○以戶部侍郎額庫禮為正白旗蒙古副都統○陞江西按察使章欽文為江寧布政使司布政使○已酉陞山東布政使施天裔為廣西巡撫○陞廣西左江總兵官吉孫畧為廣西提督○禮部議覆山西道御史張集疏言臺灣既平請修輯平海廟謨頒示史館與平逆方畧一同編纂又從前剿滅流賊平定各省及今蕩平吳逆皆行祭告典禮今臺灣係從未開闢之地盡入版圖鄭逆乃積紀負固

之餘。一朝歸命。祭告之禮。亦宜舉行。從之。○  
庚戌。予故原任內大臣二等阿思哈尼哈番  
教塞。祭葬。謚勤僖。○辛亥。

上詣

太皇太后

皇太后宮問安。

上御懋勤殿。召大學士學士等入。酌定在京秋  
審情實重犯。

上取各犯罪案。逐一親閱。再三詳審。其情罪斷  
無可恕者。始定情實。又諭曰。人命事關重大。  
故召爾等入內殿。共相商酌。情有可原。即開  
生路。以事繁時。各賜諸臣飯。○陞陝西督糧  
道張汧為貴州按察使。司按察使。○壬子。  
上御太和門視朝。文武陞轉各官謝恩。○癸丑。  
上詣

太皇太后宮問安。○以故二等阿思哈尼哈番  
阿哈納親弟豐忠襲職。○甲寅。調兵部右侍  
郎庫勒納為戶部右侍郎。陞內閣學士阿蘭

泰為兵部右侍郎。○乙卯。調禮部左侍郎薩  
海為戶部左侍郎。轉禮部右侍郎鄂哈為左  
侍郎。調兵部督捕左侍郎溫代為禮部左侍  
郎。管右侍郎事。○廣西道御史劉超凡疏言。  
奉天錦州二府屬州縣。應各設教官一員。從  
之。○丙辰。廣東廣西總督吳興祚疏言。廣州  
七府沿海地。畝請招民耕種。

上諭大學士等曰。前因海寇未靖。故令遷界。今  
若展界。令民耕種採捕。甚有益於沿海之民。  
其浙閩等處地方。亦有此等事。爾衙門所貯  
本章。關係海島事宜甚多。此等事不可稽遲。  
著遣大臣一員。前往展立界限。應於何處起  
止。何地設兵防守。著詳閱確議。勿悞來春耕  
種之期。○兵部題。江西等處戰傷殘廢官兵  
賞給銀兩。

上曰。內一等待衛穆森所受箭傷甚微。乃向部  
中稱中箭重傷。以致殘廢。由此觀之。則訛稱  
受傷者。不知凡幾矣。該都統副都統兵部堂

官一并嚴加察議。尋都察院議覆穆森革職鞭責。都統副都統兵部堂官各降罰有差。從之。○左副都御史吳璵丁父憂。命回籍守制。○鑾儀衛鑾儀使趙良棟以病乞解任。命回籍調理病痊起用。○丁巳。

上幸南苑行圍。○予海澄殉難一等阿達哈哈番李顯孝祭葬如例。○琉球國王嗣尚貞遣陪臣毛文祥等進貢。宴賚如例。○兵部遵旨議覆鑾儀衛官缺出。向以掌房掌案貼房貼案人等補授。今應停止。令於漢軍漢人世職並武進士內選擇輪用。從之。○戊午。予故原任太子少傅都統道喇祭葬。謚勤襄。○予故山東巡撫李天浴祭葬如例。○二等精奇尼哈番碩塔軍機革職。以碩塔親叔之孫額爾錦襲替。○己未。

上詣

太皇太后

皇太后宮問安。○

上御乾清宮。講官進講易渙卦六三渙其躬二節。

上曰。公爾忘私。國爾忘家。欲得其人甚難。張玉書奏曰。此全在居心如何。外貌殊難知也。○喀爾喀扎薩克圖汗遣使進九白年貢。宴賚如例。○庚申。吏部等衙門以尚之信名下應入官婦女為都統賴塔帶回。請取口供。

上曰。賴塔自福建直抵廣東雲南。係効力勤勞。樹立大功之人。帶回婦人。事甚微細。無大關係。因此遂與眾犯一同取供。覺有未當。如事有牽連。應取口供。爾等親詢。勿因取供遂以無禮加之。致失朕眷顧功臣之意。○陞左通政達哈他為兵部督捕左侍郎。○辛酉。

上御乾清宮。講官進講畢。

上問理學之名始於宋否。張玉書奏曰。天下道理具在人心。無事不有。宋儒講辯更加詳密耳。

上曰。日用常行無非此理。自有理學名目彼此



辨論。朕見言行不相符者甚多。終日講理學。而所行之事。全與其言悖謬。豈可謂之理學。若口雖不講。而行事皆與道理脗合。此即真理學也。○陞詹事阿哈達為內閣學士兼禮部侍郎。○陞廣西按察使黃元驥為山東布政使司布政使。○以故二等阿思哈尼哈番阿賴親弟之孫高亮襲職。○壬戌。上御太和門視朝。文武陞轉各官謝恩。次厄魯特喀爾喀進貢使臣等行禮。○命翰林院掌

院學士牛紐教習庶吉士。○陞江南廬鳳道孫蘭為江西按察使司按察使。○改宿桃同知為分管宿虹河務同知。添設同知一員。分管桃源河務。添設睢寧縣安東縣管河縣丞各一員。山陽縣外河縣丞一員。裁高家堰大使缺。改設主簿一員。○癸亥。諭吏部朕夙夜孜孜。勤求治理。務期紀綱整肅。吏治澄清。庶績咸熙。民生樂業。以幾邅隆之化。部院衙門事務屢加申飭。近皆修舉職業。勉力清釐。惟

在外直隸各省督撫等衙門。積習相沿。未盡整飭。一切事務。不能恪恭勤勵。實心辦理。督撫為地方大臣。果能潔已率屬。公正無私。則大法小廉。交相儆惕。吏治自當振興。閭閻克臻康阜。且糾劾官員。關係激勸。必莅任既久。賢否洞知。方可據實指叅。貪劣知儆。向來督撫有入境即行糾叅者。既未夙悉官評。止據下屬揭報。即行題叅。則所劾未盡得實。徒為具文塞責。果係真知灼見。自當不時指叅。何必拘定遲速。又廣西四川地處邊疆。選補官員赴任。每多遲悞。懸缺久待。料理乏人。著九卿詹事科道會同詳議。以聞。○諭刑部明罰敕法。民命攸關。必讞決精詳。案無留滯。而後聽斷得情。民免株累。向因刑部等衙門事務審理遲延。屢加申飭。今積案已寔。宿弊漸革。惟在外直隸各省督撫等衙門。因循積習。怠忽稽遲。一切刑名案件。有經年不結者。有數年不結者。或因承審官員不能恪秉虛公。安

招定案。每多草率含糊。希圖苟且完結。以致上官屢行批駁。沉案積久不清。或因上官意有偏徇。借端頻行駁審。因而營求滋弊。顛倒是非。冤抑無辜。莫由申訴。此等情弊。皆由聽斷不公。完結不速。牽連淹滯。苦累小民。應作何立法。俾在外各衙門。痛改積習。永絕弊源。訟簡刑清。克稱平允。著九卿詹事科道會同詳議以聞。○陞寧古塔副都統薩布素。為黑龍江將軍。○以禮部左侍郎管右侍郎事溫代。為黑龍江左翼副都統。陞工科給事中雅齊納。為右翼副都統。○以故三等阿思哈尼哈番巴拜之子賴珠襲職。○治理曆法南懷仁。進盛京九十度表。令永遠遵行。○甲子。上詣

太皇太后宮問安。○陞貴州鎮遠副將唐光堯為廣西左江總兵官。○乙丑。福建提督施琅疏言。舟山等處偽總兵有兵丁船隻在海島者。俱遣人招撫。令聚集一處。以杜奸宄。

上曰。施琅所奏招集各島船隻。籌畫周詳。甚為可嘉。此等見在海島船隻及偽官兵丁。著施琅嚴加確察。俱行收撫。務盡根株。毋貽後患。○上御內殿。大學士學士等捧京師秋審罪犯三覆奏本。面奏請旨。

上取招冊逐一披閱。曰。各犯或盜竊銀兩。至於滿貫。或拐賣人口。得財未傷人。或鬪毆傷人。而非立斃。或手執凶器。而未殺傷。雖情罪確實。法當處死。而人命關係甚重。朕於一切應死人犯。有一線可生之路。即令緩決。飭所司再行研審。此各犯姑緩勾。又詳閱情實罪案。仍向大學士等再三詢問。欲求所以生之道。至萬無可緩。乃置之於法。○命吏部侍郎杜臻。內閣學士席柱。往勘福建廣東海界。工部侍郎金世鑑。副都御史雅思哈。往勘江南浙江海界。○調鑲黃旗蒙古副都統佛爾諾為滿洲副都統。○戶部題。黑龍江至烏喇。須設十驛。但設驛之地。不行相度。難以懸議。應

俟來年三月雪消遣戶兵二部理藩院官各一員并令寧古塔將軍選熟知地勢者偕行就近派郭爾羅斯二旗杜爾伯特一旗嚮導各二人詳加丈量。

上命戶部郎中包奇兵部郎中能特理藩院郎中額爾寨前往○丙寅禮部議覆國子監祭酒王士正疏言明代南北兩雍皆有十三經注疏二十一史刻板今國學所藏漫漶殘缺宜及時修補至南監板請敕該督撫查明行令學臣收貯儒學尊經閣中毋致遺失應如所請從之○丁卯

上幸南苑行圍○陞翰林院侍讀學士傅臘塔為詹事府詹事○陞湖廣按察使李世昌為雲南布政使司布政使

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百十三

監修總裁官光祿大夫大學士兼太子太傅保和殿大學士兼戶部尚書二等伯加四級日馬齊光祿大夫經筵日講官起居注少保兼太子太傅保和殿大學士仍兼

御史都戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣許廷錫

總裁官光祿大夫文華殿大學士兼吏部尚書臣朱軾等奉

敕修

康熙二十二年癸亥十一月戊辰朔湖廣總

督董衛國陸辭

上諭之曰爾在外任二十餘年地方事宜民生利病知之已悉何待朕言第總督為一省大吏惟以奉公秉法潔已愛民為要從前用兵之際未免騷擾閭閻今天下承平休養民力乃治道第一義何利當興何弊當革俱宜從實詳酌舉行惟時當承平而常若民生未遂民困未蘇則地方自然受福若謂地方已經寧謐不復時加體恤則所失多矣至一切事

務本可速結者自應速結每見在外官員故意遲延致滋民累爾宜申飭所屬各官實心任事又在外官員行事京師無不悉知爾從前在任所行朕皆洞曉爾在軍中克有勞績朕即下旨褒獎嗣後務加砥礪爾為部院官亦久在京部院大臣何須結納爾行事無疵何畏人言若行事失當雖結納大臣亦復何益董衛國奏曰臣惟知敬奉朝廷實不敢與諸大臣私相交結

上曰前事不必復言惟嗣後實心秉公斯為盡職耳○已已

上詣

太皇太后

皇太后宮問安○辛未冬至祀

天於

圜丘

上親詣行禮○遣官祭

永陵

福陵。

昭陵。

孝陵。

仁孝皇后。

孝昭皇后陵○壬申。

上率王以下文武大臣侍衛等詣

太皇太后

皇太后宮行冬至慶賀禮。御太和門。王以下文

武各官。上表朝賀○喀爾喀土謝圖汗車臣

汗額爾克戴青台吉墨爾根濟農各遣子弟

請安入貢。並口奏曰。去歲蒙

皇上諭令各牧地。設立汛哨。以警寇盜。但我等

就水草遊牧。居止不定。難以置哨。

皇上限以何處為界。請遵旨而行。隨賜敕曰。爾

喀爾喀等。向來不越噶爾拜瀚海之地游牧。

康熙三年七月內。爾等越界而來。朕念亂之

所生。皆此之故。特頒敕旨。曉諭爾等部下屬

衆。道後喀爾喀間。有一二違禁來近境游牧。

以致逃盜紛紛不絕。故令爾等設哨立界。今爾等既稱就水草遷徙居止不定。難以置哨。請限以何地為界。可停其置哨。限以噶爾拜瀚海為界。不得越此游牧。噶爾拜瀚海之地。距我邊境有三日程。其瀚海盡界之東。亦須離我邊境三日之地。不得入內。朕視天下為一體。率土之人。靡不撫恤。我邊境地方。芻牧美好。朕亦知之。若喀爾喀遇災旱。芻草不生。必不得已。具奏請旨。方可內向游牧。俟草生時。仍回原處。如不請旨。擅入內地。即令我邊地官兵驅逐○癸酉。先是雲南貴州總督蔡毓榮疏言。土司世相承襲。不由選舉。罔識禮義。嗣後土官族屬子弟內。有通曉經義。志圖上進者。請就郡邑一體應試。至是。差往區畫。土司事宜侍郎庫勒納疏請。如蔡毓榮言。尋禮部議。雲貴二省。應各錄取土生二十五名。其土司隸貴州者。附貴陽等府學。隸雲南者。附雲南等府學。不准科舉。亦不准補廩出貢。

從之○吏部尚書伊桑阿等題奉命議運糧黑龍江事宜。臣等議烏喇造船五十艘。除將軍薩布素所發水手一百五十人。再派烏喇兵二百。獵戶四百。候明年冰解時。即以伊屯口席北米。每船載五十石。並副都統穆泰兵三月坐糧。運至黑龍江。二十四年應運者。於前項水手。添發烏喇兵六百運送。得旨。應增船艦。并運二年食糧。二十四年不必運送。其再行確議。以聞。尋議。二年食糧。一次全運。船五十艘不足。應增造三十艘。每船設運丁十五人。共需一千二百人。除薩布素處所發水手一百五十人外。再派烏喇八旗獵戶六百九十。寧古塔兵三百六十。選才能協領等官督運黑龍江。從之。又諭。所發獵戶甚多。其令總管席特庫。轄之前往。兵丁獵戶水手。各給餉一月。○甲戌。山西巡撫穆爾賽。察報地震。被傷人數。得旨。著尚書薩穆哈。帶司官一員。明日即前往親履詳勘。應作何拯救。會同該

撫確議。以聞。○乙亥。厄魯特厄爾德尼布穆台吉等。遣使進貢。賞賚如例。○丙子。陞寧古塔協領雅泰。為寧古塔副都統。○予故正白旗副都統博濟。永興陣亡。阿達哈哈番蓋思海。各祭葬如例。○丁丑。

上召入大學士等。問曰。所修明史若何。李蔚奏曰。草本已有大畧。自萬曆以後。三朝事煩而雜。尚無頭緒。方在忖酌。

上曰。史書永垂後世。關係最重。必據實秉公論斷。得正。始無偏諂之失。可以傳信後世。夫作文豈有一字一句。不可更改者。當彼此虛心互相推究。即如朕所製之文。亦常有忖酌更定之處。今觀翰林官所撰祭文碑文。亦俱不樂改易。若不稍加更定。恐文章一道。流於偏私矣。爾等將此諭。傳示修史各官知之。○調工部右侍郎蘇拜。為禮部右侍郎。○陞右通政趙士麟。為都察院左副都御史。○理藩院題。古北口外鞍匠屯。西巴爾泰喜峰口外王

霸垓三處應添驛站。

上曰此等邊外添設驛站使內地百姓遷住則安業之人家口搬移甚為苦累見今出征兵帶回之人無田產開曠者甚多此等合宜安插於彼處驛站其作何安插之處再議以聞尋議覆每驛應設人丁五十名管轄撥什庫二名馬五十匹牛車三十輛此安插人丁應令內務府派出其管轄撥什庫亦令內務府派曾受賊偽職有妻奴之人但遠來入官窮丁驟派安插力量不給應給以房屋田地其起程時仍給與驛站從之○戊寅

上諭差往福建廣東展沿海邊界侍郎杜臻等曰遷移百姓事關緊要當察明原產給還原主爾等會同總督巡撫安插務使兵民得所須廉潔自持勿似從前差往人員所行鄙瑣也○諭理藩院羅利增發人衆亦未可料其移文馬喇令加意防禦不時偵探應奏事宜速行奏聞○己卯陞廣東南韶道金維藩為

廣西按察使司按察使○陞護軍叅領蘇爾達為鑲黃旗蒙古副都統○科爾沁多羅郡王布達禮故遣官致祭○庚辰

上詣

太皇太后宮問安○以故三等阿思哈尼哈番馬斯雲之子馬世偉襲職○戶部等衙門會議旗下官兵須用奴僕除直隸各省大小文武官員及駐防將軍副都統不准買所屬之民外其餘仍照舊買人在京許令宛大二縣五城兵馬司官用印在外許各州縣官用印取具本人情願賣身及保人口供申報戶部至康熙二十二年十月以前白契賣身之人有自供情願中証明白者斷與買主此斷過之人逃走照逃人例治罪從之○議政王大臣等奏尚之孝隨兄尚之信反叛後復投誠授以一品官職銜乃不思報効止圖晏逸前赴海州久住又躲避効力奏請欲守陵寢應革去職銜並子弟交內務府得旨尚之



孝革去職銜。隸旗下。免交內務府。○辛巳。以翰林院侍讀學士常書堯經筵講官。○以原任建義將軍侯林興珠為鑾儀衛鑾儀使。○壬午。吏部等遵旨議覆廣西四川二省官員舊算邊俸。自康熙二年改四川為腹俸。康熙八年。改廣西為腹俸。今應將二省。仍改為邊俸。官員赴任。照雲貴例。給與勘合。庶不致赴任遲延。懸缺久待。從之。○陞湖南布政使薛柱斗為光祿寺卿。○以故三等阿思哈尼哈番梁貴之子薩賴襲職。○癸未。黑龍江將軍薩布素等疏報牛滿河之奇勒爾奚魯噶奴等殺十餘羅刹。攜其妻子來歸。鄂羅春之朱爾鏗格等。於淨溪里烏喇殺五羅刹。並獲其烏鎗來報。又聞飛牙喀之人。擊殺羅刹甚眾。應乘此時。酌給新投誠羅刹吉禮過里。鄂佛那西馬克西木等官職。舊投誠羅刹宜番鄂噶番席圖頌三人。効力勤勞。亦宜給以官職。得旨。宜番近已授駙騎校。鄂噶番席圖頌及

新投誠之吉禮過里。鄂佛那西馬克西木。俱授七品官。其新投誠羅刹內鄂佛那西費禮普令馳驛至薩布素處。酌遣招撫。時值沴寒。并以裘帽賜之。○乙酉。九卿詹事科道等遵旨會議。○直隸各省人命事件。原限一年審結。因限期甚遠。以致牽連苦累。竇緣索詐等弊。今應改限六個月完結。○越訴雖有處分之例。近來竟不遵守。嗣後事款有礙本官。即便控告。或審斷不公。須於狀內將控過衙門審過情節開載明白。方許准理。○惡棍包攬詞訟。從重治罪。承問官不依律定罪。嚴加議處。○州縣官自理事件。原限一月完結。今改限二十日完結。逾限者議處。其不行查叅之督撫。亦交部議處。○督撫以下道府以上官員。除緊要重大事情。許差人至州縣。其餘小事。止許行牌催提。不許妄差人役。○下屬審詳事件。原批某衙門。即於某衙門完結。不得一官未結。又委別官。○詞狀止許一告一訴。

告狀之人。止告正犯確証。不許波及無辜。牽連婦女及續行投詞。牽連原狀無名之人。一事主報盜。止令聽審一次。認贓一次。不許往返拖累。以上各款。應行直隸各省遵行。從之。  
○三等阿思哈尼哈番噶爾畢。病故無嗣。命原得官額爾濟根親弟之子莫新襲職。○予陝西陣亡正紅旗佐領布善。祭葬如例。○予出征陝西。創發身故。鑲藍旗叅領木成額。祭葬如陣亡例。○丙戌。

上詣

太皇太后宮問安。○命改雲南省平遠縣。西二府為州。○丁亥。陞甘肅巡撫巴錫。為工部右侍郎。○戊子。以平定海寇。

上親往

孝陵祭告。命皇太子允初隨駕。是日啓行。駐蹕夏店。○予故太子少保內大臣一等精奇尼哈番賚圖庫。祭葬如例。○己丑。

上駐蹕薊州。○庚寅。

上詣

孝陵。率王以下。內大臣。侍衛。部院大臣。官員。奠酒。行禮。舉哀。次至

仁孝皇后

孝昭皇后陵。奠酒。舉哀。畢。駐蹕馬蘭峪。○辛卯。

祭

孝陵。

上率王以下。大臣。官員。行禮。是日。駐蹕湯泉。○

壬辰。分遣扈從官至

仁孝皇后

孝昭皇后陵。致祭。○癸巳。

上巡幸邊界。駐蹕羅文峪。○改宿桃河營守備為宿虹河營守備。添設桃源河營守備一員。裁徐州北岸。安東北岸。山陽外河南岸。千總各一員。添設山陽雲梯關外海口千總一員。○福建水師提督施琅。疏辭靖海侯世爵。得旨。卿親統官兵。直入大洋。平靖海氛。勞績茂著。特封侯爵。以示酬庸。其祇遵成命。不必控

辭○甲午。

上駐蹕沙河峪○乙未。

上駐蹕漢兒城○丙申。

上於路殪一虎。是日駐蹕三屯營○二等阿思哈尼哈番齊錫惠病解退。以其子朱良襲替。

○丁酉。

上駐蹕米峪口

十二月。戊戌朔。

上駐蹕三屯營○己亥。

上於遵化州北山殪一虎。是日駐蹕遵化州○

吏部議覆一等阿思哈尼哈番胡拉禪軍機革職。應與其弟吳舒承襲。

上以此職係伊祖洪尼雅喀所立。命伊叔朱麻

喇承襲○予故護軍統領傑殷副都統花色

各祭葬如例○庚子。

上駐蹕湯泉○辛丑。

上將回鑾。率王以下大臣官員詣

孝陵奠酒。舉哀。次至

仁孝皇后。

孝昭皇后陵奠酒。舉哀。復至乳媪奉聖夫人墳前奠酒。是日駐蹕孫家莊○壬寅。

上駐蹕薊州○授故輔國公英額理之子吳爾登為三等奉國將軍○轉禮部右侍郎陳廷敬為左侍郎。陞翰林院掌院學士張玉書為禮部右侍郎○予出征廣東創發身故拖沙喇哈番車柳祭葬如陣亡例○癸卯。

上駐蹕三河縣○甲辰。

上回宮。詣

太皇太后

皇太后宮問安○予殉難雲南府知府贈太僕

寺卿高顯辰祭葬如例○乙巳。以故一等阿

思哈尼哈番常保之子巴徒襲職○丙午。九

卿詹事科道議覆左都御史徐元文疏言。外

官丁憂候代。其治理公事無異常日。安有方

寸憤亂之時。而可責之以政理者。請自今丁

憂之官。無錢糧舛誤。即聽奔喪。至近日士大

夫鮮克由禮或絳經婚娶或喪中聽樂或易衣從吉干謁遊玩此皆薄俗傷化宜嚴行申飭查凡丁憂官無未完錢糧盜案上司勒指遲延及服中娶妻喪服未終即行釋服等類俱有定例處分嗣後若服內有此等行事令督撫科道指名題叅從之○丁未兵部議覆舒玉崑等誣告土司阿五叛逆總兵官張永祥用非刑考訊應論死

上曰總兵乃邊疆大帥因用非刑考訊阿五遽擬大辟恐土司自此意氣驕縱漸至不遵法紀此議太過可令該部另議以聞尋議舒玉崑擬斬監候張永祥革職從之○陞陝西按察使葉穆濟為甘肅巡撫○予故都統朱延禧祭葬如例○刑部議覆土司陸道清同王輔臣投誠給與總兵劄付令招撫吳三桂復受吳三桂偽將軍職銜後在永寧勢迫投誠陸道清應立決妻妾子女給功臣家為奴財產入官父母祖孫兄弟流徙二千里安置得

旨陸道清著即處斬其妻子財產從寬免入官父母祖孫兄弟俱免流徙○戊申一等阿思哈尼哈番張朝璘因病解退以其子張聖鐸襲替○宗人府題舊例四時致祭盛京三陵派盛京官致祭

孝陵

仁孝皇后

孝昭皇后陵遣貝勒以下奉國將軍覺羅阿思哈尼哈番以上往祭若遇大事則

四陵暨

仁孝皇后

孝昭皇后陵俱將和碩親王以下覺羅阿思哈尼哈番及文武大臣以上題請遣祭今議

孝陵

仁孝皇后

孝昭皇后陵四時祭祀及遇大事致祭

四陵俱將和碩親王以下宗室公以上派出遣祭得旨是○吏部議覆差往貴州料理土司

事宜兵部侍郎庫勒納會同雲南貴州總督蔡毓榮疏言平遠。大定。黔西三處原係水西宣慰司安坤所屬。威寧一處原係土知府安重聖所屬。自康熙四年改為四府設立流官相安已久。糧差諸務並未違誤。不便復設土官。應如所請。從之。○己酉。授固山貝子章泰之女為縣君。壻那穆達為固山額駙。○差往山西查勘地震工部尚書薩穆哈等疏言。寧縣。忻州定襄五臺代州五州縣振武衛一衛被災人民共賑過銀九千八百六十五兩。下所司知之。○庚戌。以海逆蕩平遣官告祭天地。太廟。社稷。福陵。昭陵。孝陵。仁孝皇后。

孝昭皇后陵。○調內閣學士孫在豐為翰林院掌院學士兼禮部侍郎。○以故二等阿思哈尼哈番阿濟圖親叔之子龔額襲職。○辛亥。上御景山前殿諭浙江温州總兵官陳世凱。江西南贛總兵官許盛。自吳逆叛亂以來爾等提兵征剿戮力用命掃蕩逆氛建立功績朕甚嘉之。但為將之道務在戢兵愛民使兵民相安。則地方受福。汝等亦可永保勲名。朕每見功大者易生驕傲。以致文武不和地方多事。爾等當以此為戒。○壬子。上御太和門視朝。文武陞轉各官謝恩。次厄魯特進貢使臣等行禮。○陞護軍統領紀爾他布為正紅旗蒙古都統。○以故一等伯巴特馬藏之子索訥穆喇錫襲爵。○癸丑。上詣太皇太后。皇太后宮問安。○三等阿思哈尼哈番秦布因病解退。以其子嘉爾泰襲替。○命尚之孝尚

之隆等家下所有壯丁。分為五佐領。隸鑲黃旗漢軍旗下。○議政王大臣等會議青海地方墨爾根台吉之來使寨桑和碩齊等陳奏伊車臣鄂木布戴青台吉在時。曾於西寧等處効力有功。懇請黃成爾灘地方游牧。應不  
准行。

上曰。墨爾根台吉之父。雖邊疆効力有功。但黃成爾灘。乃邊內之地。蒙古與民人。生計不同。斷不可容其游牧邊內。以啓後日釁端。今止應酌量獎賞。至不宜在內游牧緣由。可諭彼知之。○甲寅。以翰林院掌院學士孫在豐充經筵講官。○以內廷供奉翰林院侍讀高士奇充日講起居注官。○予故副都統布舒庫祭葬。謚剛壯。○吏部題舊例。按察使員缺。由布政使司叅政陞任。如無叅政。方以按察使司副使陞任。今會推時。叅政副使內。合例之人少。難以選擇。嗣後按察使員缺。將叅政副使。叅議僉事。四項道員。不論歷俸已滿未滿。

有無罰俸。一體會推。從之。○以故翁牛特多羅達爾漢戴青貝勒搜色子額林臣襲爵。○乙卯。

御製日講易經解義序曰。朕維帝王道法載在六經。而極天人窮性命。開物前民。通變盡利。則其理莫詳於易。易之為書。合四聖人立象設卦繫辭焉。而廣大悉備。自昔庖羲神農黃帝堯舜王天下之道。咸取諸此。蓋詩書之文。禮樂之具。春秋之行事。罔不於易會通焉。漢班固有言六藝具五常之道。而易為之原。詎不信歟。朕夙興夜寐。惟日孜孜。勤求治理。思古帝王立政之要。必本經學。嘗博綜簡編。玩索精蘊。至於大易。尤極研求。特命儒臣叅考諸儒註疏。傳義撰為解義一十八卷。日以進講。反復卦爻之辭。深探作易之旨。大抵造化功用。不外陰陽。而配諸人事。則有貞邪淑慝之別。運數所由盛衰。風俗所由治亂。君子小人所由進退消長。鮮不於奇偶二畫。屈伸變

化之間見之。若乃體諸躬行。措諸事業。有觀民設教之方。有通德類情之用。恐懼修省。以治身。思患預防。以維世。引而伸之。觸類而長之。而治理備矣。於是刊刻成書。頒示天下。朕惟體乾四德。以容保兆民。且期庶司百執事。矢于野渙羣之公。成拔茅允升之美。則泰交。嬾於明良。而太和溢於宇宙。庶稱朕以經學為治法之意也夫。

上因禮臣奏筵宴事宜。諭議政王大臣等。元旦賜宴。布設滿洲筵席。甚為繁瑣。每以一時宴會。多殺牲畜。朕心不忍。自後元旦賜宴。應改滿席為漢席。尋命禮部詳議。酌定肴核酒醴之品。悉有常制。○陞左春坊左庶子王鴻緒為內閣學士兼禮部侍郎。○以故三等阿思哈尼哈番鄂義托之弟珣色襲職。○丙辰。順天府進春。○宗人府題。正藍旗輔國公化善奏請隨旗上朝。以其子於內廷効力。應如所請。從之。○刑部題。在獄病故罪囚四十餘人。

上諭大學士等曰。人命關係重大。無辜枉死。上千

天和。朕念獄中犯人。自作罪孽。理固應死。但恐死於非命。曾命御醫。給與藥物。療治有疾之人。聞今歲獄囚。患病者甚多。何故不將見給醫藥療治。秋決之犯。尚不及四十餘人。今乃病死若干人。豈皆命耶。朕心甚為不忍。此皆該部怠忽之故。爾等傳刑部堂官。傳朕諭旨。嚴加申飭。令伊等不時親自巡視。仍令該管官員。加意存恤。無致濫斃。以副朕慎重人命至意。○諭大學士覺羅勒德洪等。大兵見駐黑龍江。所需軍食。雖已運送。而科爾沁之漠爾渾屯。亦宜多備。造倉儲積。其令戶部。理藩院。同吏部尚書伊桑阿。詳議以聞。尋戶部等議。漠爾渾屯。運米一萬石存貯。其米自包衣屯莊撥給。運費於盛京戶部動支。工部遣官至漠爾渾屯。堅固造倉。米至。交彼處都統。副都統。加意守護。從之。○諭戶部。陝西西安甘



肅等處前當大兵征剿之時。轉輸糧糗。辦運芻茭。一應軍需。取給閭里小民。由陸路供億。勞費繁多。今既經蕩平。朕心時切軫念。康熙二十三年。應徵地丁各項錢糧。著蠲免三分之一。以昭朕睦念民生勞苦之意。又山西寧縣。忻州。定襄。五臺。代州。振武。衛。新經地震。被災頗重。雖經遣官賑濟。仍應量行加恩。以示軫恤。其被壓身故民人。所有康熙二十三年應徵地丁錢糧。著與全免。其房舍倒塌。力不能修者。丁銀全免。地畝錢糧。著免十分之四。爾部速行該地方官。曉諭小民。務俾各沾實惠。如有司官役。借端朦混。私行重徵者。或經叅奏。或被告發。將經管各官。從重治罪。○工部尚書朱之弼。左都御史徐元文。以會推湖廣按察使員缺。所舉非人。各降三級調用。○調浙江總督施維翰為福建總督。○陞監察御史布喀為陝西按察使。司按察使。○以原任滇西總兵官葛秉貞為貴州大定總兵官。

○戊午。

上詣

太皇太后宮問安。○壬戌。

上幸南苑行圍。○癸亥。

上詣

太皇太后

皇太后宮問安。○以原任太僕寺卿張可前補

原官。○調太常寺卿龔佳育為光祿寺卿。陞

光祿寺卿薛柱斗為太常寺卿。○乙丑。歲暮。

祫祭

太廟。

上親詣行禮。○遣官祭

永陵。

福陵。

昭陵。

孝陵。

仁孝皇后

孝昭皇后陵。○遣官祭太歲之神。○丙寅。

上詣

太皇太后宮問安○賜朝正外藩科爾沁蘇尼特高齊武扎魯特烏朱穆泰翁牛特土默特郭爾羅斯四子部落鄂爾多斯教漢喀爾喀阿霸垓阿霸哈納扎賴特巴林吳喇忒喀喇沁克西克騰阿祿科爾沁杜爾伯特歸化城厄魯特主貝勒貝子公台吉等及內大臣大學士上三旗都統副都統尚書侍郎學士侍衛等宴○旌表八旗節婦滿洲伊白里妻關氏等四十四人蒙古拜西里妻莽氏等六人漢軍于宇政妻韓氏等三人烈婦滿洲胡什他妻佟氏等三人各給銀建坊如例○是歲人丁戶口一千九百五十二萬一千三百六十一田地山蕩畦地五百六十一萬五千八百三十七頃六十八畝有奇徵銀二千六百三十九萬八百四十三兩有奇米豆麥六百三十五萬二千一百七十二石有奇草二百二十九萬一千五十四束茶十五萬九千二

百一十五引行鹽四百三十五萬一千二百三十三引徵課銀二百七十五萬九千八百六十七兩有奇鑄錢二萬九千四百八十五萬一千四百八十有奇

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百十四

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管文部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加三級又加二級臣翁同書

總裁官光祿大夫文華殿大學士兼吏部尚書臣朱軾等奉

敕修

康熙二十三年甲子春正月丁卯朔

上詣

實錄卷一百十四

堂子行禮還宮。拜神畢。率諸王貝勒貝子公內

大臣大學士侍衛等詣

太皇太后

皇太后宮行禮。御太和門。王以下文武各官外

藩王及使臣等上表朝賀。照例筵宴。朝鮮

國王李堉遣陪臣趙師錫等表賀。冬至元旦

萬壽節及進歲貢禮物。宴齊如例。○辛未

上詣

大皇太后

皇太后宮問安。○癸酉。

世祖章皇帝忌辰。遣官祭

孝陵。○

上詣

太皇太后

皇太后宮問安。○甲戌。孟春。享

太廟。遣領侍衛內大臣公舅舅佟國維行禮。○

遣官祭太歲之神。○庚辰。以上元節。賜外藩

實錄卷一百十四

科爾沁蘇尼特高齊忒扎魯特烏朱穆秦翁

牛特王默特郭爾羅斯四子部落鄂爾多斯

敖漢喀爾喀阿霸垓阿霸哈納扎賴特巴林

吳喇忒喀喇沁克西克騰阿祿科爾沁杜爾

伯特王貝勒貝子公額駙台吉及內大臣大

學士上三旗都統副都統尚書侍郎學士侍

衛等宴。○辛巳。

上詣

太皇太后

皇太后宮問安○上元節。賜外藩王貝勒貝子  
公額駙。台吉。及內大臣大學士。上三旗都統  
副都統。尚書侍郎。學士。侍衛等宴○

上幸南苑行圍○癸未。

上回宮。詣

太皇太后

皇太后宮問安○乙酉。黑龍江將軍薩布素等  
疏言。牛滿羅利。抵恒滾。同來自北海之羅利。  
與飛牙喀戰。退居河洲。若不速計剿撫。則赫  
哲飛牙喀。奇勒爾人民。必被殘害。且恐羅利  
復增發前來。宜乘四月冰解時。即遣夸蘭大  
二員。率官兵三百人。并發紅衣礮四具。令附  
近恒滾口飛牙喀。噶克當阿等。嚮導抵羅利  
所據地。先行招撫。不即歸降。則進兵剿滅。如  
羅利聞風先遁。所發之兵。即乘機安輯。赫哲  
等處人民。未經來附者。亦招撫之。報聞○陞  
浙江溫州總兵官陳世凱。為浙江提督○丙  
戌。陝西按察使布喀陞辭。

上諭曰。按察使職司一省刑名。必事到隨結。不  
使遲滯。方有益於事。凡弊之生。及百姓苦於  
牽累。皆由遲延不速結之故。爾當潔己勤政。  
將遲延牽累積弊。詳行糾察。勿致煩苦良民。  
庶可表率屬員○諭刑部。禪塔海自為刑部  
侍郎以來。並無効力處。每緣事降級。戴罪留  
任。仍不悛改。盡職。凡事遣大臣往審者。求其  
得實。沈上達事發覺後。朕知巡撫金鵠。行事  
污濫。故遣禪塔海前往嚴審。乃不將金鵠污  
濫。及致死沈上達。滅口之處審出。妄奏縊死  
是實。朕面質其妄。禪塔海堅稱縊死是實。如  
有別情。願甘受死。即此觀之。雖下等司屬。亦  
不如矣。此人不行懲治。則污濫者不知畏懼。  
著將禪塔海拘禁。與此事一并嚴議具奏○  
封和碩安親王岳樂子。索端。為多羅勤郡王。  
多羅貝勒魯克度子。魯賓。為固山貝子。鎮國  
公蘇努子。蘇爾錦。為輔國公。授輔國公法塞  
子。鄂密。輔國將軍。吳錫子。齊克。吞輔國將軍。

德倫子額爾赫圖俱為三等奉國將軍○陞吏部左侍郎杜臻為工部尚書江寧巡撫余國柱為都察院左都御史○以翰林院掌院學士孫在豐充日講起居注官○陞陝西西寧河州副將馮德昌為江南京口右路總兵官○丁亥福建提督靖海將軍侯施琅疏請設臺灣鎮守官升

上問大學士等曰爾等之意若何李蔚等奏曰據提督施琅奏云臺灣有地數千里人民十萬棄之必為外國所踞奸宄之徒竄匿其中亦未可料臣以為守之便

上曰臺灣棄取所關甚大鎮守之官三年一易亦非至當之策若徙其人民又恐失所棄而不守尤為不可爾等可會同議政王大臣九卿詹事科道再行確議具奏尋議政王大臣等議覆行令福建督撫提鎮詳議從之○予故原任禮部左侍郎兼翰林院學士楊正中祭葬如例○調直隸天津總兵官陳奇為江

南京口左路總兵官○廣西道御史錢珏疏言請申刑具畫一之令刑部議覆有司濫用酷刑已經通禁毋庸再議得旨刑罰關係人命凡審讞用刑理應恪遵定制精詳慎重不得恣行酷虐致滋冤濫這本內事情雖經條奏申飭恐不肖官員日久玩忽仍於法外妄用重刑有負欽恤之意爾部仍通行內外問刑各衙門嚴加申飭如有故違即行指叅從重治罪○賜朝正外藩王貝勒貝子公台吉等銀幣鞍馬有差○戊子

上詣

太皇太后

皇太后宮問安○辛卯祈穀於

上帝

上親詣行禮○壬辰禮部題嗣後筵宴請撥兵部司官及每旗護軍叅領護軍校監察得旨筵宴關係大體百僚齊集宜各加敬謹始無失儀之愆朕見元旦朝會旗下官員雜坐無

紀大禮所在。豈容慢忽。禮部可會同兵部。及八旗都統。嚴加申飭。○陞山西雁平道張道祥。為湖北按察使。司按察使。○諭大學士等。各部院司官內。才具庸劣者。曾經有不時糾叅之旨。然叅處者甚少。雖有一二糾叅。皆係末員。其實係庸劣無能者。多徇情面。不行叅處。其狂妄好勝。專恣行事者。較之庸劣無能。為害更甚。各部院中。有朕所明知而徇情不叅者。亦有之。可嚴諭部院衙門。各該所屬司官內。有庸劣無能。狂妄好勝。專恣行事之員。即行指名題叅。○癸巳。命翰林院掌院學士孫在豐。教習庶吉士。○陞正紅旗滿洲副都統護巴。為護軍統領。○乙未。

上詣

太皇太后

皇太后宮問安。○諭大學士等曰。朕思京口有兩總兵。似應裁去一員。李蔚奏曰。京口之兵。原因防禦海寇而設。今海疆大定。裁去總兵

一員極當。

上曰。總兵官雖裁。但京口之兵。向稱精練。不可遽行撤散。當以漸去之。再提督總兵標下兵丁數本不足。而頂名冒餉者甚多。若裁總兵。宜專遣司官一員。將實數察明減汰。所餘之兵。設立營伍可也。其總兵官應裁之處。著議政王大臣九卿詹事科道會議具奏。○調禮部左侍郎陳廷敬。為吏部左侍郎。管右侍郎事。○丙申。諭大學士等曰。副都御史塞克德。自簡任以來。並未見陳奏一事。才具庸劣。且非淳良之人。可令解任。朕觀部院官員。懶惰者甚多。一遇苦差。或有稱病規避者。嗣後部院官員。或病或有事故。俱著註冊。以憑分別勤惰。今觀尚書薩穆哈。黽勉供職。部務漸覺整理。且各處工程錢糧。俱得節省。著察所降之級復還。又諭曰。督撫乃封疆大臣。通省民命所關。

世祖皇帝時所用者。尚屬循良。逮至輔臣時。自

用張長庚。白如梅。張自德。賈漢復。屈盡姜韓世琦等。匪人以來。擾害地方。以致百姓困苦已極。今之督撫。較前雖覺稍愈。而相沿成習。尚未盡改。見在浙江湖廣總督江寧巡撫員缺。最為緊要。必擇賢能補授。方於地方有濟。如不得其人。則百姓受害。不可勝言矣。此三缺。爾等加意詳審。務得相宜之人補授。為當。尋大學士等遵旨。公同舉出浙江巡撫王國安。湖廣巡撫王新命。安徽巡撫徐國相等。得旨。王國安。陞補浙江總督。徐國相。陞補湖廣總督。王新命。調補江寧巡撫。○以內閣學士胡簡敬。充經筵講官。

二月。丁酉朔。遣大學士李蔚祭。

先師孔子。○刑部尚書魏象樞。以病乞休。慰留之。○戊戌。祭。

大社。

大稷。

上親詣行禮。○己亥。諭翰林院掌院學士牛紐。

孫在豐翰林院。乃儲養人材之地。教習庶常。當以品行文章為事。一切交際禮文。皆宜杜絕。近聞有餽送重禮者。庶常等俱甚寒苦。自翰墨外。不應別有所取。前拉薩禮在時。待伊等甚善。所以至今有感念者。至庫勒納以來。交際之風寢盛。爾等宜加洗剔。無負朕簡任之意。○庚子。春分。朝。

日於東郊。

上親詣行禮。○

上詣。

太皇太后。

皇太后宮。問安。○先是。喀爾喀右翼扎薩克圖汗兩次疏言。自康熙元年。羅卜臧變亂以來。我弟兄子姪多投左翼。屢索不還。曾往訴達賴喇嘛。蒙諭七旗曰。爾七旗當共尊扎薩克圖汗。其投左翼人民。俱應發還。為此差札爾布奈前來莅盟。而左翼土謝圖汗不至。皇上係我大衆之主。謹以此情上聞。至是。



上念喀爾喀累世恭順。職貢有年。不忍其子弟人民離散。遣阿齊圖格隆等齎敕往諭達賴喇嘛。令彼遣使議和。敕曰。朕統御寰區。願中外無征戰之勞。離散之苦。使羣生皆臻安樂。近者喀爾喀扎薩克圖汗。屢次疏言。右翼子弟人民離散。奔入左翼。索之未還。爾喇嘛從來積大福力。永遠真誠。慈悲濟眾。聲聞炳著。無不欽乃高行而讚頌之者。喀爾喀諸汗貝子。皆供奉爾喇嘛。信爾之教。而尊崇道法。爾於本朝亦誠心敬慎。進貢來往不絕。今天下共享太平。而扎薩克圖汗人民離散。未得完聚。朕心大為軫惻。念其中必有父子兄弟骨肉分離者。未必不生事互殺。交相戰爭。兵戎一起。姑不論人民困苦。即兩汗亦豈能並存。伊等於朕。向來恭順。竭誠奔走。於爾喇嘛亦為護法久矣。何忍默視。使至此極乎。朕與爾俱當遣使往諭。將扎薩克圖汗離散人民給還。俾兩翼永歸於好。既副朕一視同仁之至

意。而於爾喇嘛六度之行。四無量之心。亦符合矣。爾喇嘛其遣大喇嘛一人。與朕去。使會於喀爾喀境內。定期而遣之。朕於此亦遣使臣赴所約之地。與爾使同往。○辛丑。上御太和門視朝。文武陞轉各官謝恩。○轉刑部右侍郎佛倫為左侍郎。補原任刑部侍郎鄂爾多為右侍郎。○予故四川巡撫杭愛祭葬。謚勤襄。○調正紅旗蒙古副都統查喇克圖為滿洲副都統。○壬寅。江南狼山總兵官姚儀丁父憂。命回旗守制。○甲辰。太皇太后聖壽節。上率王以下。文武大臣侍衛等詣太皇太后宮行禮。遵懿旨停止筵宴。○乙巳。上御經筵。講畢。賜大學士九卿詹事及講官等宴。○諭兵部。步兵看守街道。司更巡警。原以防閑匪類。近見凡係貴顯之人。多帶僕從。夜行並不緝拏。惟微賤單身行走。即行緝拏。勒

索財物。甚而向負販者索取所賣薪炭等物。以致民人嗟怨。似此必特加究治。庶幾此風可息。可將步軍統領。嚴行申飭。爾等亦宜不時加意巡視。○轉禮部右侍郎張玉書。為左侍郎。陞內閣學士胡簡敬。為禮部右侍郎。○丙午。遣官祭

先農之神。○予故鎮國公拔喀祭葬。立碑如例。○丁未。

孝康章皇后忌辰。遣官祭

孝陵。○陞太常寺卿席爾達。為都察院左副都御史。○九卿等議覆。四川陝西總督禧佛疏。言漢中有駐防滿洲大兵。并城守副將一員。兵八百餘名。此外又有漢中所屬畧陽陽平。寧羗漢鳳等營官兵。將及二千。分駐各處。迤東有興安州。迤西有褒城縣。係北棧道。西南有沔陽縣。係南棧道。凡此深山要隘。之俱有駐防官兵。臣標官兵七千有餘。并家口共三四萬餘。今又移往漢中駐劄。距四川西安

甚遠。南北皆有棧道相隔。臣身駐劄彼地。無益於兩省。且漢中所屬州縣。歲徵糧米。散給本處城守各營。尚且不敷。又加以臣標下官兵。漢中無糧。勢必令西安州縣饋餉。西安去漢中。千有餘里。棧道相隔。若值雨雪。轉運更難。請撤漢中駐防。仍照舊例。駐劄西安。臣撥標下將官馬兵五百名。火器營兵五百名。同滿洲兵輪班前往駐防。臣於秋收之後。一年一次。親往巡察。如此。則兵民俱無所累。應如所請。得旨。著撥該督標下官一員。兵一千名。駐守廣元縣。其廣元駐防川北鎮標官兵。仍令回保寧。餘依議。○戊申。遣官祭

歷代帝王。○予貴州陣亡鑲黃旗一等待衛護軍叅領薄洛。正紅旗護軍叅領覺羅戴家。各祭葬如例。○己酉。

上詣

太皇太后

皇太后宮問安。○以左副都御史趙士麟為浙

江巡撫太常寺卿薛柱斗為安徽巡撫○予岳州陣亡鑲黃旗副都統二等阿思哈尼哈番魯西巴圖魯正紅旗蒙古副都統穆舒泰州陣亡正紅旗佐領護圖各祭葬如例○青海厄魯特古魯木西台吉遣使進貢宴賚如例○庚戌遣往設立自烏喇至黑龍江一路驛站之郎中包奇能特額爾塞等奏請訓旨上諭曰此乃創立驛站之地關係緊要爾等會同彼處將軍副都統詢明熟識地方之人詳加確議安設凡住驛人役及馬匹牲畜需用之物并所食糧米今歲耕種不及須計及明年多為儲備倘過於儉嗇食用諸物或至匱乏宜從長計議使其久遠可行毋得狃於目前之見草率完事○福建提督靖海將軍侯施琅疏請將揀選征臺官兵九百餘名補入內地官兵數內

上曰進剿臺灣官兵衝冒險阻遠涉波濤効力甚久今海逆方平即行裁去殊屬可憫理當

存留應行文展界尚書杜臻學士席柱并料理錢糧侍郎蘇拜等公同會議將閩省陸路官兵內裁汰老弱即以征剿臺灣官兵補額務令得所○內閣及各部院寺等衙門遵旨糾劾才力不及暨狂妄行事內閣侍讀王三省等三十八員分別降革有差○辛亥

上御太和門視朝文武陞轉各官謝恩次厄魯特使臣等行禮○吏部題故定南王孔有德下阿思哈尼哈番胡同春親弟胡同文等叩闕言胡同春與提督王永年等俱被孫延齡所害求賜恩卹查無城守功績應不准行得旨王永年等雖無守城功績但不肯從逆被害可憫其世職著九卿再議具奏尋會議阿思哈尼哈番胡同春孟一茂李一第阿達哈哈番王永年洪恩廣張明德拜他喇布勒哈番徐文登等世職俱准應襲之人承襲從之

○壬子

上詣

太皇太后宮問安○提督九門步軍統領費揚古以老病乞休。允之○陞左春坊左庶子湯斌為內閣學士兼禮部侍郎○癸丑

上巡幸畿甸。命皇太子允初隨駕。是日啓行。駐蹕南苑○甲寅。諭扈從大學士等曰。朕凡理政事務得其當。故於部院所上奏章。雖小事未有不盡心窮究者。近見戶刑二部啓奏之事。最為繁冗。皆錢糧刑名所關。若一時不加詳閱。恐有遺悞。前此奏章。俱三日一送。此後令兩日一送○乙卯

上駐蹕南哥驛○陞翰林院侍講學士葛思泰為太常寺卿○丙辰。清明節。遣官祭

永陵。

福陵。

昭陵。

孝陵。

仁孝皇后。

孝昭皇后陵○

上駐蹕霸州南關○以太僕寺卿張可前為太常寺卿○丁巳。

上駐蹕雄縣南十里鋪○戊午。

上駐蹕段村北○己未。

上駐蹕趙北口○以原任江寧巡撫慕天顏為湖廣巡撫○大學士黃機以老病乞休。允之○庚申。

上駐蹕范家口○辛酉。

上駐蹕信安鎮○黑龍江將軍薩布素等疏報。夸蘭大鄂羅舜等。今年正月十一日。抵羅刹地方。遣宜番等。造其居。開諭之。先取其烏鎗二十具。并鄂羅春留質之子三人。招撫羅刹。米海羅等二十一人。

上命遞送米海羅等至京。交戶部安插○壬戌。孝昭皇后忌辰。遣官祭

陵○癸亥。

上駐蹕范甕口○以故吳喇忒輔國公褚崇克子達爾瑪襲爵○乙丑。

上駐蹕洛發村○吏科給事中王承祖疏請巡狩。燔柴泰山。即過孔林。觀禮器。九卿等議應准行。得旨著候旨行。其合行典禮。察明具奏。○以兵部督捕右理事官麻勒吉為提督九門步軍統領。○旌表陝西節婦高拱極妻袁氏。給銀建坊如例。○丙寅。

上回駐南苑

三月丁卯朔。裁河南衛輝府管河同知缺。將河務歸衛輝府通判兼理。添設南陽府同知。分轄鄧州。內鄉。新野。淅川。鎮平。五州縣。駐劄淅川。專司捕務。○三等阿思哈尼哈番胡圖克故。無應襲之子。以其從兄那木僧襲職。○戊辰。

上回宮。詣

太皇太后

皇太后宮問安。○諭吏部。州縣官遇易結之事。曠日遲延。竟不完結者甚多。其違限三四月者。即係不能稱職。應行罷斥。以疏進士出身

之仕路。令九卿詹事科道會同確議定例具奏。尋議。州縣官將易結之事。遲延不結。除違限一月二月者。照舊例處分外。違限三月者。降三級調用。違限四月者。革職。再查吏部定例。知縣出有十缺。除推陞二缺外。其大選八缺。進士舉人貢監。選授三缺。捐納人員。選授五缺。嗣後大選八缺。議將進士。選授二缺。舉人貢監。以知縣用者。選授三缺。捐納人員。選授三缺。庶進士仕路疏通。從之。○己巳。

上詣

太皇太后

皇太后宮問安。○庚午。陞右通政邊聲廷為太僕寺卿。○辛未。福建巡撫金鉉疏報。海上烏洋舟山。偽將軍房錫鵬。周雲隆。偽都督阮繼先。率偽官一百餘員。兵四千一百餘名。投誠下部知之。○以吳喇忒故鎮國公諾門子達喇瑪迪襲爵。○壬申。

上詣

太皇太后宮問安○陞太常寺卿張可前為都察院左副都御史○以福建投誠偽將軍劉國軒為直隸天津總兵官○癸酉。

上諭大學士等曰。戶部管理各省錢糧。一時難以清楚。地方督撫。將在庫銀兩。那移私用。雖云補墊。及題奏時。每多朦混銷算。部內無憑稽察。百姓深受其害。即今原任廣西巡撫郝浴。侵欺銀至十九萬兩。由此觀之。天下類此者不少。朕日夜思維。欲清查各省錢糧。訪之外任官員。及督撫等。皆云清出存留錢糧。則別項錢糧。自必清楚。朕思此事一行。雖在外督撫司道。不無被罪。實於國家有益。果錢糧充足。更可為加恩百姓之用。今九卿曾為外官者多。知之必詳。爾等會同詳議。以聞。尋大學士會同九卿等條議具覆。一。凡奏銷錢糧。應將存留起運。逐項分晰。并報部年月明白造冊。毋致朦混駁查。如有駁回者。將該督撫照朦混例處分。戶部司屬。不行詳查。亦交吏

部議處。一。支給各省駐防官兵。綠旗官兵。米豆草束。除折價地方不議外。如支本色地方。儘本省所收支給。如有不敷。照時價給發。官兵自行採買。如有將價值浮折具題者。將該管官並督撫照例處分。一。各省採買米豆各項。從前有價值浮多者。有支領並無實據者。應行令該督撫清查。定限一年追完。如不完處分。一。兵馬錢糧數目。有舛錯者。應令各省將軍督撫提鎮。將各弁印領結狀。按季送部。以便查對。如有不符。照朦混例處分。一。直隸各省奏銷錢糧。凡有駁查者。俱令具題完結。不得以咨文塞責。得旨。本內第一款奏銷駁察事情。著照見行例行。餘如議。○吏部兵部刑部會議。廣東查看尚之信家產。侍郎宜昌阿。同巡撫金僑。侵蝕兵餉。及入官財物。又乾沒尚之信商人沈上達財賄。恐後告發。將沈上達謀害滅口。應立斬。道員王永祚等。分取

財物。又同金僞謀死沈上達。應立斬。郎中宋  
俄託員外郎卓爾圖等。應擬斬。秋後處決。伊  
等共侵銀八十九萬餘兩。并財帛等物。應追  
入官。差審金僞刑部侍郎禪塔海將沈上達  
事不行審出。及

皇上問時。又奏稱沈上達。謫死是實。應擬絞。秋  
後處決。都統賴塔。私取入官之人。亦應從重  
治罪。得旨。金僞居官。本無善狀。所行貪穢。罪  
應如是。宜昌阿事有不同。一例問罪。稍過。此  
係大案。仍令議政王大臣九卿詹事科道三  
法司衙門會議。使衆知之。

上幸鑲黃旗演武場。閱滿洲蒙古漢軍文武大  
臣官員騎射。○甲戌。予雲南陣亡三等阿達  
哈哈番舍爾圖祭葬如例。○乙亥。

上詣

太皇太后

皇太后宮問安。○予故一等伯巴特馬藏祭葬  
如例。○丙子。正陽門外民居失火。

上幸正陽門樓遣內大臣侍衛撲滅之。○丁丑。

諭大學士等。昨正陽門外被火。朕數遣人往  
視。該城及司坊巡捕營等官。並無一人在者。  
亦無一救火之人。因遣內大臣侍衛往救。火  
勢方熾。未能旋熄。朕親往登城指揮。方得撲  
滅。該城及司坊巡捕等官。是其該管之處。職  
分所在。平日不加謹隄防。遇災又不急救。殊  
為怠忽。左都御史科爾坤。兵部侍郎郭丕阿。  
蘭泰奏稱。臣等留視。俟火勢熄滅。方回。及朕  
還宮。使人看時。伊等亦已散去。城外係漢官  
所居之地。遇此等事。亦應協力料理。乃置若  
罔聞。袖手不顧。則他事亦因循坐視。可知。伊  
等皆國家大臣官員。凡事當視若一體。乃於  
身外一不關心。可乎。爾等可將此旨。傳諭吏  
兵二部。及都察院知之。

上幸正黃旗演武場。閱滿洲蒙古漢軍文武大  
臣官員騎射。○以翰林院侍讀學士多奇廬  
琦。侍讀郭蔭左贊善李元振。俱充日講起居



注官○已卯。

上幸正白旗演武場。閱滿洲蒙古漢軍。文武大臣官員騎射○庚辰。

上詣

太皇太后宮問安○辛巳。

上幸正紅旗演武場。閱滿洲蒙古漢軍。文武大臣官員騎射○壬午。以太僕寺卿邊聲廷為太常寺卿○癸未。諭戶部。民為邦本。必年穀順成家。給人足。乃愜朕撫育羣生之意。比者

巡行近畿。見閭閻生計。僅支日用。乃米價漸貴。民食維艱。又聞河南地方。年歲荒歉。所在苦饑。小民無以資生。恐致流移失所。朕心深切軫念。直隸應作何平糶。及勸諭捐輸。河南應行緩徵。并鼓勵捐輸。設法賑濟等項事宜。著九卿詹事科道會同確議具奏○河南巡撫王日藻疏請。以常平積穀散賑饑民。得旨。設立常平。原以備荒。著速行賑濟○甲申。

萬壽節。

上率諸王貝勒貝子。宮內大臣大學士。侍衛等詣

太皇太后

皇太后宮行禮。御太和門。王以下。文武各官。上表慶賀。停止筵宴○遣官祭

福陵。

昭陵。

孝陵。

仁孝皇后。

孝昭皇后陵○遣官祭真武東嶽城隍之神○上幸鑲白旗演武場。閱滿洲蒙古漢軍。文武大臣官員騎射○陞前鋒叅領穆呈額為正紅旗蒙古副都統。步軍總尉朱山為杭州副都統○丙戌。戶部等衙門議覆錢法侍郎李仙根。將寶泉局康熙二十二年分鼓鑄。用過銅勛具題。得旨。管理錢法。俱應另行選差。將鑄錢事宜。并耗費等項。詳加察看。親督鑄造。務期盡除積弊。永為定式。應差各官。該部開列。

具奏。尋戶部將各部院堂官列名請旨。

上命吏部侍郎陳廷敬、兵部侍郎阿蘭泰、刑部侍郎佛倫、都察院左副都御史馬世濟管理錢法。○浙江巡撫趙士麟、安徽巡撫薛柱斗陛辭。

上諭曰：在內部院在外督撫，職任最為緊要。爾等至地方，務期實心任事，潔己愛民，奉公守法，方為盡職。近見各省督撫行事多涉虛偽，若能行事以實，乃於國家有益。○丁亥，諭大學士等朕前奉

太皇太后詣五臺山，覽觀山川形勢，一一親歷其地，每臺各製碑文，今錄出。翻譯滿書與漢書並勒於石。朕所撰碑文，一時結構，爾等可與漢大學士等詳加斟酌。近見漢人中有自負才高，每一文出，不容人點竄，此習俗之可鄙。文之所以不工也。大學士明珠等奏曰：皇上聖學天縱，睿藻夔絕，出入經史，臣等豈能仰窺萬一，而諱抑之懷，尤為古帝王所不及。

上曰：文章貴於簡當，可施諸日用。如章奏之類，

亦須詳明簡要，明朝典故朕所悉知。其奏疏多用排偶蕪詞，甚或一二千言，每日積滿几案，人主詎能盡覽？勢必委之中官。中官復委於門客，此輩何知文義，訛舛必多。奸弊叢生，事權旁落。此皆文字冗穢，以此極也。又諭曰：爾等所修之書，往日告成呈覽，朕萬幾之餘，講求經史，無多暇晷，而成書盈帙，堆積几案，一時急於披閱，未得從容研索，體驗於身心政事。今聞明史將次告成，若將已成者，以次進呈，亦可徐徐繙閱，考鏡得失，不致遺漏。○江寧巡撫余國柱疏言：

上用緞疋，皆係寬機織造，請增設機房四十二間，得旨寬大緞疋亦間時所用，非常用物也。何為更勞民糜費？余國柱所奏不准行。○上幸鑲紅旗演武場，閱滿洲、蒙古、漢軍文武大臣官員騎射。○戊子。

上詣

太皇太后

皇太后宮問安○予故正藍旗滿洲副都統阿思哈尼哈番佟世德祭葬如例○己丑

上幸正藍旗演武場閱滿洲蒙古漢軍文武大臣官員騎射○庚寅宴衍聖公孔毓圻等於禮部○辛卯陞護軍叅領阿第為歸化城副都統○

上幸鑲藍旗演武場閱滿洲蒙古漢軍文武大臣官員騎射○旌表陝西節婦孟氏給銀建坊如例○壬辰諭兵部朕閱視八旗文武大臣官員騎射八旗驍騎校五旗護軍校盡屬庸劣此輩官資雖小協理佐領事務統轄大眾將來即陞章京之職今見除授時不過以此為陞階捱次充補並未選擇可否嗣後令該旗擇其向曾効力能為統御者坐名保舉咨送爾部補授爾等將此意嚴加傳諭俾悉知之又諭曰凡賞罰為勸賢懲奸語云使功不如使過近見緣事宗室及有罪大臣行間

得罪官員優閒者甚眾此輩與其置之閒散何如查出委以一職則賢能者可得其用況伊等或任統兵或歷部院較之旗下人等必優已為大臣者姑勿論其以下者應行選用護軍令其効力如此可漸得陞遷之路今如譚泰席漢等子孫朕試用之頗有優者又鑲藍旗原任郎中鍾俄爾岱人材壯健為人亦優但以體陵軍前不得已治罪似此者各旗亦殊不乏爾等即照此諭遵行○以故三等精奇尼哈番薩爾圖之子三太襲職○癸巳上詣

太皇太后

皇太后宮問安○諭大學士等曰滿文中書筆帖式皆論旗分漢文中書筆帖式不論旗分如此則一旗或多一旗或少殊屬不均今應照旗均分其有餘者令解任候缺不足者即為增補且讀書之人明於理道與不讀書者不同況中書筆帖式乃滿洲人進身之階不

可不加選擇嗣後部院各衙門中書筆帖式  
缺出俱令考試補授如是則人人鼓舞勤於  
誦習而學問優長之人必衆矣又諭曰凡政  
事必勤敏速結方有實益朕於部院大臣屢  
經嚴飭今事務較前漸簡爾等可傳知部院  
大臣見在事件咸令速結○九卿等議賑濟  
直隸河南除將存倉米穀令各該撫確查賑  
給外如米穀不敷請暫開捐例限三個月停  
止再移咨豫撫本年錢糧於秋收後徵收一  
半次年帶徵一半得旨捐納事例無益不准  
行著戶部賢能司官一員前往會同該撫鼓  
勵地方官員設法散賑并將饑荒最甚地方  
速行察明具題到日將應徵錢糧酌量蠲免  
餘依議 甲午陞左僉都御史陳汝器為太  
僕寺卿

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百十五

監修總裁官光祿大夫侍衛兼大學士戶部尚書二等伯加四

級臣馬齊光祿大夫經筵日講官起居注少保兼大學士內閣

學士戶部尚書翰林院掌院事加二級又加一級臣張廷玉光祿大夫經筵講

官大學士內閣學士華殿大學士仍兼理戶部尚書事務加五級又加二級臣麟慶錫

總裁官光祿大夫文華殿大學士吏部尚書臣朱軾等奉

敕修

康熙二十三年甲子夏四月丙申朔享

太廟

上親詣行禮○丁酉遣戶部郎中吳什已往河

南賑濟饑民

上諭曰賑濟饑民最為迫切爾其馳驛速往同該撫確察務令得沾實惠其被災地方錢糧亦詳查奏請酌量蠲免不得借端將未被荒地方錢糧混入數內稟行奏請須嚴飭該司道官員令其確查申報○天津總兵官劉國軒陛辭

上諭曰臺灣地方阻聲教者六十餘年爾素懷忠誠值施琅督兵進剿首先歸命是以特授為總兵官以示優眷但天津地方近在畿輔與別省不同爾宜加意撫輯使兵民相安盜賊屏跡且爾從閩海來歸並無親知故舊當盡職以副朕懷又諭曰朕嘉爾海外倡率歸誠且孤身遠來今當赴任殊為可念故於常例之外賜爾白金二百兩表裏二十疋內厩鞍馬一匹以示異數○予故西安副都統岳勇巴圖魯祭葬如例○己亥予故三等精奇尼哈番劉光祭葬如例○庚子

上御乾清宮親講亢龍有悔一節講畢顧講官

等曰亢龍有悔一節何以注在不應講之列

天道人事亢則有悔易中所言無非此理正

宜以此為戒不必避忌以後繫辭講章不分

應講與不應講俱以次逐節進講○諭大學

士等曰凡為臣子必實心任事興利除弊不

苟且塞責俾衙門事一切整頓無有廢弛斯

不負職業。若循分碌碌。因人成事。雖小有勤勞。殊無足取。○予故原任江西巡撫佟康年。祭葬如例。○和碩康親王傑書等。會議江寧。杭州。荊州。西安等處駐防官兵。雖為地方緊要。分撥佐領駐防。伊等老病致仕退甲。與已故官兵家口。如不令回京。仍行留住外省。恐年久漸染漢習。以致騎射生疎。嗣後除盛京寧古塔不議外。江寧等各省駐防。凡有老病致仕退甲。及已故官兵家口。俱令回京。所缺之兵。即於彼處頂缺披甲。如不得人。該將軍申明原由咨部。自京補送。著為定例。得旨。依議。西安等各省駐防官兵。原非令其久住。若置立產業墳塋。遂同土著。殊屬不合。著該將軍等嚴行禁止。○辛丑。

上幸玉泉山駐蹕。○以故三等阿思哈尼哈番朱成額親弟之子查錫渣襲職。○旌表四川梁山縣烈女李氏。給銀建坊如例。○甲辰。調正白旗蒙古副都統傅爾祐為滿洲副都統。

○刑部尚書喀爾圖。以年老乞休。允之。○丁未。

上回宮。○戊申。大學士等奏。臣等遵旨傳諭六部堂官。應補各處開差將才。守俱優。小心謹慎之人。保舉開送。今六部滿漢堂官俱言。若保舉辦事有才。及謹慎者。尚有其人。至於操守知之實難。

上曰。清廉節操。如何可廢。凡犯貪惡之人。發覺後。自有應坐之罪。如郝浴在廣西。居官甚好。然猶侵蝕錢糧數萬。魏象樞曾薦過郝浴。此等情事。魏象樞安能預知。即如部院堂官。朕皆信其清操。而委任之。堂官亦信司官。而委任之。各衙門官員。或謹慎有守。或生事奔競。豈有不知者。但將有守之人舉出。則被舉者自能効力。爾等即行傳諭。○己酉。差往福建料理錢糧侍郎蘇拜。會同福建督撫提督疏言。臺灣地方千餘里。應設一府三縣。設巡道一員分轄。應設總兵官一員。副將二員。兵八

千分為水陸八營。澎湖應設副將一員。兵二千。分為二營。每營各設遊守千把等官。從之。  
○以翰林院編修王化鶴為雲南鄉試正考官。吏部員外郎李雲會為副考官。翰林院編修黃興堅為貴州鄉試正考官。戶部郎中毛漪為副考官。○庚戌。

上御太和門視朝。文武陞轉各官謝恩。○授輔國公瓦山女為鄉君。塔鑲黃旗阿達哈哈番洪奔污為輔國公塔。○予江西陣亡鑲藍旗拖沙喇哈番委署叅領吳達那。祭葬如例。○辛亥。

上詣

太皇太后

皇太后宮問安。○吏部題據陝西督撫咨稱。原任刑部主事桑阿布。隨經畧莫洛出征。不知下落。應暫註冊。俟其事白再議。得旨。桑阿布於亂軍中殉難是實。若註冊以俟事情明白。則何時得明。即著照例議卹。尋部議。桑阿布。

應給與拖沙喇哈番世職。從之。○九卿等議覆工部侍郎金世鑑疏言。

皇上德威遐布。海外悉寧。浙江沿海地方。請照山東等處見行之例。聽百姓以裝載五百石以下船隻。往海上貿易捕魚。預行稟明該地方官。登記名姓。取具保結。給發印票。船頭烙號。其出入。令防守海口官員。驗明印票。點明人數。至收稅之處。交與該道。計貨之貴賤。定稅之重輕。按季造冊報部。至海口官兵。請於溫台二府戰船內。各撥二十隻。平定臺灣。所獲哨船。撥八十隻。令其分泊防守巡邏。俱應如所請。從之。○封鎮國公拔喀子阿布蘭為輔國公。○內大臣正黃旗漢軍都統巴泰。以年老乞休。命解任。以內大臣銜。同原品致仕。食俸大臣上朝。○壬子。

孝端文皇后忌辰。遣官祭昭陵。○刑部左侍郎宋文運。以病乞休。命加太子少保致仕。○陞護軍叅領巴圖為正白旗。



蒙古副都統○癸丑。以護軍統領公諾敏。為刑部尚書○以故三等阿思哈尼哈番朱延禧之子朱廷柱襲職○以天時亢旱。命大學士王熙尚書伊桑阿學士阿哈達。王鴻緒。審理刑部重犯○予故鑲黃旗副都統喇哈。祭葬如例○甲寅。

上詣

太皇太后

皇太后宮問安○丙辰。以原任安徽按察使王

國泰補原官○工部題請敕諭直隸河南巡撫嚴飭所屬官員。閉塞衛河水口。勿使旁洩。以濟漕運。俟漕船過完。照常聽其分流。

上曰。漕運所關。雖係甚重。但直隸河南之民。多資衛河水利。若水口盡行閉塞。不使稍溉田禾。一遇早乾。瀕河之民。必致艱苦。又部議俟漕船過後。方聽照常通流。耕種自有定時。如漕船過完。方許溉田。則田禾究竟無濟。朕聽理諸事。必於民生關係之處。詳悉籌度。而後

施行。該部所議。但期不悞漕運。初未嘗計及民生關係處也○丁巳。翰林院掌院學士牛鈕等進呈刻成日講易經解義。得旨。易經闡發。天人理數。道統攸關。朕朝夕披玩。期造精微。講幄諸臣。殫心剖析。深有裨於典學。著即頒行○陞正黃旗漢軍副都統張所知。為漢軍都統○戊午。喀爾喀阿海戴青台吉等遣使進貢。賞賚如例○庚申。

上御太和門視朝。文武陞轉各官謝恩。次喀爾喀使臣行禮○諭大學士等。朕觀部院衙門啟奏之事。雖俱有關係。然有一事而經兩部啟奏。方結者。即如兵部議叙軍功之事。必請下吏部。及至吏部。乃並無別用察核之處。復行啟奏。如吏兵二部議叙功牌。可以會同一次題覆。事既不繁。且經兩部詳確會議。不致舛錯。再議。至分編佐領事。戶部奏過。而兵部復行題奏。兩部啟奏重複。委屬繁冗。以後如此等事。

俱著兩部會同啟奏。爾等可傳諭知之。○辛酉。

上詣

太皇太后

皇太后宮。問安。○壬戌。轉刑部右侍郎高爾位。為左侍郎。陞左副都御史馬世濟為刑部右侍郎。○鑲藍旗滿洲都統根特。以老病乞休。允之。○以輔國公瓦山。為鑲藍旗蒙古都統。○調河南河北總兵官傅魁。為江南蘇松水師總兵官。○癸亥。靖逆將軍侯甘肅提督張勇病篤。

上命其子大理寺卿張雲翼。馳驛同御醫前往調治。○甲子。予湖廣沿山嶺陣亡正紅旗四品官阿思虎。致祭銀兩。○旌表湖廣節婦。襄陽縣李維權妻張氏。守節保孤。烈婦。麻城縣周方旦妻蔡氏。京山縣張橋生妻楊氏。夫亡自盡。給銀建坊如例。○乙丑。

上詣

太皇太后

皇太后宮。問安。○

上諭講官牛鈕等曰。講章辭取達意。以確切明晰為尚。如本文敷衍太多。則篇末未免重複。大約詮次本文。原在了徹聖賢意旨。而篇末該括數語。又貴闡明理道。務去陳言。朕閱張居正尚書四書直解。篇末俱精實之義。無泛設之詞。今後所撰詩經講章。亦須體要備舉。期於盡善。○調內閣學士王守才。為通政使司通政使。陞內閣侍讀學士吳興祖。為內閣學士兼禮部侍郎。○江寧將軍瓦岱疏言。請率標下官兵。一年兩次行圍。得旨。瓦岱所奏。極是。各省駐防官兵。若不令其每年行圍習武。漸致怠緩。軍士將流於玩愒。為非。但江寧地方。駐防雖久。向不曾令其行圍。恐民人不知。以為駭異。著該督撫將習武行圍之處。明白傳諭。又恐軍士行圍。借端搶奪騷擾地方。著該將軍嚴行禁戢。

五月丙寅朔。

上諭大學士等曰。前輔臣時。有包衣佐領下一人。外作善狀。內懷兇惡。屢經懲戒。全不知改。卒為強盜。於通州地方被擒。有包衣太。赴通領糧。遇見之。云爾不肯悛改。今事發矣。因歷數其惡。以鞭鞭之。後鞫審時。遂啣恨扳陷包衣太。同為強盜。其同夥盜皆云。勿妄陷無罪之人。其人不聽。此包衣太。竟坐強盜正法。包衣佐領下人。無不知此事者。由此推之。天下如此等事不少。朕常以此為念。凡裁決政事。遇有重罪。雖應死。必於死中求其生路。反覆推詳。下部再議。必無疑實。然後完結。此寧失出。無失入之意也。○丁卯。

上詣

太皇太后宮。問安。○調浙江總督王國安。為福建總督。裁浙江總督缺。○調鑲藍旗蒙古都統輔國公瓦山。為滿洲都統。○戊辰。  
仁孝皇后忌辰。遣官祭。

陵○

上移駐瀛臺。○己巳。

上詣

太皇太后

皇太后宮。問安。○纂修大清會典。命大學士勒德洪。明珠。李蔚。王熙。吳正治。為總裁官。內閣學士麻爾圖。阿哈達。金汝祥。王鴻緒。湯斌。為副總裁官。諭大學士等。朕聞一代之興。必有一代之治法。著為道揆。布在方策。用以昭示臣民。垂憲萬世。至弘遠也。我

太祖高皇帝。大業開基。規模肇造。

太宗文皇帝。膺功耆定。軌物聿興。暨我

世祖章皇帝。統一寰區。創垂兼裕。諸凡命官定制。靡不準今酌古。綱舉目張。郁郁彬彬。無以尚矣。逮朕御極以來。恪遵成憲。率由弗渝。間有損益。亦皆因時制宜。期臻盡善。俾中外羣工。知所稟承。勿致隕越。顧其條例事宜。多散見於卷牘。在百司既艱於考稽。而兆姓亦無

由通曉。今命部院大小等衙門各委屬員詳加察輯。用成會典一書。特命卿等為總裁官。其董率各員。恪勤乃事。務使文質適中。事理咸備。行諸今而無弊。傳諸後而可徵。悉心考訂。克成一代之典。俾子孫臣庶。遵守罔愆。以副朕法。

祖圖治之意。卿等其勉之。欽哉。○癸酉。上詣

太皇太后宮問安。○甲戌。夏至。祭

地於方澤。

上親詣行禮。○乙亥。陞叅領張俊為正黃旗漢軍副都統。叅領楊文魁為福建臺灣總兵官。○丙子。諭九卿詹事科道等。御史衛執蒲奏請御門聽政。或以五日。或以二三日為期。其意蓋欲君臣之間。政事餘暇。稍得休息也。朕自躬親庶政。宵旰弗遑。念致治之道。務在精勤。勵始圖終。勿宜有間。二十餘年以來。

於凡用人行政。事無鉅細。罔不殫心籌畫。早夜孜孜。有如一日。

郊

廟裡享必躬執祀事。間有不親詣之時。皆甚非不得已。至於內殿齋居。幾微悉謹。左右暫御。咸所稔知。在朕未明求衣。辨色視朝。日與大小臣工。率作省成。用熙庶績。近念爾諸臣奏事勞苦。少展御門晷刻。俾得從容入奏。非圖便安。適年海宇敕寧。政事漸簡。頃復諭部院事務。應得歸併者。酌量合奏。期於簡要清省。從此民生日康。刑清政肅。部院章奏。當不期省而自省。若必預定三日五日。以為奏事常期。非朕始終勵精之意也。○調前鋒統領沙納哈為正黃旗護軍統領。○陞陝西甘肅總兵官孫思克為甘肅提督。○丁丑。陞通政使拉篤祜為都察院左副都御史。○故三等伯穆赫林。因軍機追議革職。以穆赫林親叔之孫赫達色襲爵。○奮威將軍平涼提督王進寶。

以病乞休。

上命其子太原總兵官王用予。馳驛同御醫前往診視。○予故三等精奇尼哈番薩爾圖。祭葬如例。○予故江南江西總督于成龍祭葬。諡清端。○旌表浙江節婦錢塘縣趙氏。胡氏。沈氏。趙氏。汪氏。富陽縣方氏。秀水縣曹氏。山陰縣錢氏。會稽縣施氏。諸暨縣蔣氏。西安縣鄭氏。各給銀建坊如例。○戊寅。

上詣

太皇太后宮。問安。○遣官祭

開聖帝君。○己卯。陞直隸霸昌道黃性震。為廣西按察使。司按察使。○予故都察院左副都御史雅思哈。祭葬如例。○以巴林故多羅郡王鄂齊爾子納木達克襲爵。○庚辰。

上御太和門視朝。文武陞轉各官謝恩。○添設山東濟南城守叅將一員。裁臨清營都司。安東營守備二缺。○辛巳。諭大學士等。凡居官以清廉為要。今九卿若有所知者。勿論內外

大小官員俱令舉出。○陞右通政張鵬為都察院左副都御史。○壬午。戶部題丈量過旗下大臣官員及投充民人溢額地畝。暫留原主名下。需用時再行撥給。

上諭大學士等。曰。田地為民恒產。已經給與者。不便復取。其旗下大臣官員。既有溢額之地。理宜註冊。俟需用時再行撥給。民地不可輕動。○九卿詹事科道遵旨舉出清廉各官。直隸巡撫格爾古德。吏部郎中蘇赫范。承勳。江南學道趙崙。揚州府知府崔華。兗州府知府張鵬翮。靈壽縣知縣陸隴其等。

上曰。格爾古德。居官本好。近聞患病。亦甚羸弱。已差御醫前往調理。陸隴其。向亦聞其居官甚好。今諸臣俱各稱善。想當不謬。但從此以後。果操守不改。永著清名。方為真實好官。這舉出各官。已悉。○以禮部郎中郭茂泰。為四川鄉試正考官。兵部主事涂銓。為副考官。戶科給事中王又旦。為廣東鄉試正考官。工部

主事劉長發為副考官。刑部員外郎王曰曾為廣西鄉試正考官。大理寺評事高層雲為副考官。翰林院侍講王頊齡為福建鄉試正考官。中書科中書舍人劉楨為副考官。○癸未。

上詣

太皇太后

皇太后宮問安。○議政王大臣等議多羅惠郡

王博翁果諾庸懦懶惰。祭

地壇時。未曾患病。不行齋戒。應削去王爵。

上命勒德洪明珠奏聞

太皇太后。尋勒德洪明珠回奏。奉

太皇太后懿旨。博翁果諾身膺王爵。不盡力事

上。彼荷誰之恩而致此。其爵自應削去。

上曰。博翁果諾著削去王爵。○議政王大臣等

遵旨議覆。廣東查看尚之信家產侍郎宜昌

阿。及巡撫金備等。分別定罪。

上曰。宜昌阿。金備。宋俄託。卓爾圖。尚之璿。寧天

祚。王瑜等俱依擬應斬。王永祚。依擬應絞。俱監候秋後處決。凡差往各處大臣司官。所帶筆帖式。必揀擇賢能帶往。苟不預事。何用選為。既經預事。其大臣司官妄行。豈可不行阻抑。有利則同。有害則於中脫免。非法之乎。且各部院私作弊端。皆起自筆帖式。本內伊色碩多禮情罪可惡。著改為應斬。監候秋後處決。禪塔海著革職。都統賴塔。征剿雲南。著有勞績。從寬留都統任。削去加級。罰俸一年。案內應追銀兩。不必令內務府追取。著交戶部撥充兵餉。餘如議。○臺灣總兵官楊文魁陞辭。

上諭曰。臺灣遠在海隅。新經底定。將弁立功者頗多。俱未簡用。因爾係舊人。可以委任。故特簡為總兵官。彼處新附兵丁。以及土人黑人。種類不一。向來未沾教化。不知禮義。爾莅任務期撫輯有方。宜用威者。懾之以威。宜用恩者。懷之以恩。總在兵民兩便。使海外晏安。以

稱朕意。至於海洋為利藪。海舶商販必多。爾須嚴飭。不得因以為利。致生事端。有負委託。○直隸巡撫格爾古德。以病乞休。慰留之。○以原任寧古塔將軍阿達哈哈番巴海為鑲藍旗蒙古都統。○調山西太原總兵官王用予。為陝西甘肅總兵官。○甲申。

上出古北口避暑。是日啟行。駐蹕三家店。○諭戶部。民間田地。久已有旨。永停圈佔。其部存地畝。分撥時。或不肖人員。借端擾害百姓。圈佔民人良田。以不堪地畝抵換。或地方豪強。隱佔存部良田。妄指民人地畝撥給。殊為可惡。直隸巡撫。可嚴察此等情弊。指名糾參。從重治罪。○陞江寧巡撫王新命。為江南江西總督。○陞吏部郎中蘇赫。為通政使司通政使。○予故鑲黃旗副都統寶住。祭葬如例。○阿達哈哈番馬喇等疏報。臣至索倫。屢行密詢羅刹情形。皆云。見在雅克薩。尼布潮。二城。各止五六百人。其得以盤踞多年者。惟賴額

爾古納口。至雅克薩十餘處。雅克薩至布爾馬大河口十餘處。築室散居。耕種自給。因以捕貂。尼布潮田畝不登。但取資納米。雅爾諸姓貢賦。喀爾喀巴爾虎人。時販牲畜等物。至尼布潮。尼布潮人。亦捕貂與之交易。得以生存。臣請敕喀爾喀車臣汗。收其所部附近尼布潮者。兼禁止交易。再請敕黑龍江將軍。水陸並進。作攻取雅克薩狀。因取其田禾。則羅刹不久自困。量遣輕騎剿滅。似易。

上諭兵部。據馬喇等奏。取羅刹田禾。當不久自困。又侍衛開保來奏。將軍薩布素等。亦以取羅刹田禾為然。則羅刹盤踞雅克薩。尼布潮。惟賴耕種。若田禾為我所取。誠難久存。其令薩布素等酌議。或由陸路進。或水陸並進。盡刈其田禾。不令收穫。由陸路進。以所刈之禾。投江下流。水陸並進。以所刈之禾。船載以歸。於未進兵時。先遣人傳示羅刹云。爾等據我雅克薩。尼布潮。多歷年所。屢令撤還。遷延不



去。且收我逃人。侵我邊民。今大兵水陸進剿。爾其遠退。以保餘生。并將馬喇等奏移文車臣汗知之。○乙酉。

上駐蹕河漕。○丙戌。

上駐蹕釣魚臺。○丁亥。

上出古北口駐蹕。○戊子。

上於偏嶺西山行圍。射殪一虎。駐蹕恩格木噶山。○辛卯。

上駐蹕喀喇巴克什地方。○壬辰。

上駐蹕鶴爾營北。○癸巳。

上駐蹕阿里木台地方。賜八旗護軍校護軍等牛羊。○以戶部郎中許孫荃為陝西按察使。

司僉事提調學政。○以故一等精奇尼哈番賚圖庫之孫席喇襲職。○甲午。

上駐蹕三道河地方。

六月。乙未朔。

上駐蹕湯泉。○己亥。九卿等議覆戶科給事中孫蕙疏言海洋貿易宜設立專官收稅。應如

所請。得旨。海洋貿易實有益於生民。但創收稅課。若不定例。恐為商賈累。當照開差例。差部院賢能司官前往酌定則例。○辛丑。陞貴州貴西道王樑為雲南按察使。司按察使。○以故三等阿思哈尼哈番吳爾鼎子吳子祥襲職。○壬寅。

上駐蹕蘇貝昂阿柏爾車爾地方。○領侍衛內大臣公福善有疾。

上幸福善幕。臨視。令醫診脈。賜內庫良藥。○諭扈從諸臣曰。小民賴穀以生。倘西成無望。必致凍餒。爾等宜嚴行約束。如人馬踐踏禾苗。定加重處。○

上出邊時。前數日天氣炎熱。因念從人恐致疾病。特命一應官兵。凡有病者。即行奏聞。賜醫調理。○癸卯。

上駐蹕庫赫哈達。○乙巳。賜隨駕八旗章京及護軍等蒙古察哈爾章京及護軍等牛羊。○丙午。

上駐蹕海拉蘇台昂阿之上都畢喇地方○丁未。

上於西爾哈莫林阿林行圍射。噶一虎○禮部議覆冊封琉球國王使臣翰林院檢討汪楫內閣中書林麟煥奏言中山王尚貞親詣館舍懇臣等轉奏願令陪臣子弟四人赴京受業考之史冊。唐貞觀中新羅百濟俱遣子入學。琉球自明初內附。洪武永樂宣德成化間琉球官生俱入監讀書。今國王尚貞遠被

皇仁傾心嚮學。應准所請聽其遣陪臣子弟入監讀書從之○以翰林院編修周慶曾為浙江鄉試正考官。中書科中書舍人蘇俊為副考官。翰林院編修錢金甫為江西鄉試正考官。行人司行人胡永亨為副考官。工科給事中任辰旦為湖廣鄉試正考官。內閣中書崔徵璧為副考官○己酉。

上駐蹕近博哲博格圖爾鄂莫地方○庚戌。扈從諸臣奏。

聖駕今往牧馬地方。可乘便經過烏蘭哈達等處。彼處水草甚佳。獸類繁多。誠為勝地。但無柴薪。今

御前所用柴薪已經預備。其餘官軍宜各帶柴薪前往。

上曰。此非為朕一人。要當為衆人計。朕所需用。豈至有悞。惟恐官軍不能攜帶柴薪。以致窘急。獸類雖多。衆人不免愁苦。朕有何樂。即今天下偶有一方。以水旱見告。朕必遣官支發倉庫。即行賑濟。雖邊疆海島之遙。朕尚惻然加念。豈於近侍官軍。令其忍饑行走乎。爾等另擇有柴薪地方來奏。在爾等有管軍之責。亦應體恤羣下也○辛亥。

上駐蹕烏爾圖布拉克地方○壬子。

上駐蹕額爾通色泰地方○甲寅。暹羅國王森烈拍臘照古龍拍臘馬噶陸坤司由提呀苦挨遣陪臣坤字述烈瓦提等奉表進貢。又疏言貢船到虎跳門。地方官阻滯日久。迨進至

河下。又將貨物入店封鎖。候部文到時。方准貿易。每至毀壞。乞敕諭廣省地方官。嗣後貢船到虎跳門。具報之後。即放入河下。俾貨物早得登岸貿易。又本國採辦器用。乞諭地方官給照置辦。勿致攔阻。又貢使進京。先遣貢船回國。次年再差船來廣省迎接。聖敕歸國。得旨覽王奏航海遠來進貢方物。具見惓誠可嘉。餘著議奏。尋部議應如該國王所請。從之。○諭副都統巴圖。一等侍衛阿南達等。邊外八旗蒙古。與在內八旗一體。朕未嘗分別內外。今朕巡行之次。見其衣食常乏。朕心深為惻然。著通行曉諭所過地方蒙古人等。有鰥寡孤獨老病不得其所者。令其來見。加恩賞賚。且因其來見。朕亦可以悉其生計。嗣是每日諸蒙古人等。各扶老攜幼。至行宮前叩首。

上命其中曉事者進見。詳問年齒生理。又降溫旨。均賜壺飧。酌量給與銀兩布疋。○乙卯。

上御額爾通阿拉所設黃幄。閱視馬駝牛羊牧羣。諭溫郡王延壽曰。朕雖未見先代。幼時好與諸故舊老臣談論得悉。

祖宗興隆時所行事宜。昔

太宗皇帝。凡閱視牧羣。令諸王親於羣內。選取良馬。今朕巡幸。諸王並未扈從。止汝一人在側。可往視朕親乘內廐之馬。選取二匹。溫郡王起立。即親揀馬二匹。其扈從內大臣。都統。前鋒統領。護軍統領等。賜內廐馬各一匹。侍衛。前鋒。叅領。護軍。叅領以下。及八旗前鋒。護軍。察哈爾蒙古官軍。並執事人等。各賜馬一匹。內正黃旗前鋒。叅領。西圖。鑲白旗前鋒。叅領。塔爾代。因効力行間。人材壯健。於常賜外。各賜內廐馬一匹。以獎之。○丙辰。

上駐蹕烏爾圖布拉克地方。○丁巳。

上駐蹕近博哲博格圖爾鄂莫地方。○

上諭大學士等曰。凡所貴道學者。必在身體力行。見諸實事。非徒託之空言。今漢官內有道

學之名者甚多。考其究竟言行皆背。如崔蔚林之好事。居鄉不善。此可云道學乎。精通道學自古為難。朕聞學士湯斌。曾與中州孫鍾元。相與講明道學。頗有實行。前典試浙江。操守甚善。可補授江寧巡撫。○己未。以翰林院侍講李振裕。為陝西鄉試正考官。吏部員外郎汪鐸。為副考官。左春坊左贊善徐潮。為江南鄉試正考官。吏科給事中楊周憲。為副考官。○庚申。

上駐蹕哈瑪爾昂阿地方。○陞陝西隴右道卞永譽。為江南江蘇按察使司按察使。○旌表河南節婦商邱縣曹氏。常氏。杞縣孫氏。烈婦夏邑縣楊氏。並給銀建坊如例。○辛酉。

上於逆哈瑪爾阿林行圍。射殪一虎。駐蹕孟克昂阿地方。○壬戌。予廣西陣亡拜他喇布勒哈番又一拖沙喇哈番何託。祭葬如例。○癸亥。

上駐蹕瑚爾希勒畢喇地方。○甲子。

上駐蹕近博哲博格圖爾鄂莫地方

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百十五

大清聖祖合天弘運文武睿哲恭儉寬裕考敬誠信中和功德大成仁皇帝實錄卷之一百十六

監修總裁官光祿大夫太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣翁同書

總裁官光祿大夫文華殿大學士兼吏部尚書臣朱軾等奉

敕修

康熙二十三年甲子秋七月乙丑朔享

實錄卷一百十六

太廟遣吏部尚書伊桑阿行禮○

上駐蹕崑都倫布拉克地方○賜隨行八旗官

兵及察哈爾蒙古官兵牛羊○丙寅黑龍江

將軍薩布素等疏言今年雅克薩地方暫停

進剿俟來年四月遣兵

上曰前馬喇等奏稱水陸兵丁佯為進取雅克

薩地方將所種田禾盡行踏毀則羅刹不久

勢窮其部人栖止地方亦必迫狹少引精兵

往剿亦易朕因諭伊等或由陸路或由水路

相機前進將所種田禾盡行芟刈旨意甚明

又遣侍衛關保去時薩布素等亦嘗言羅刹

田禾應行踏毀果將羅刹田禾盡行踏毀我

兵不必勞力羅刹已自困矣今薩布素等坐

失機會更借端題請殊屬不合又聞羅刹田

地甚為肥饒收穫極多將來伊等領兵直抵

羅刹城池若圍守日久勢必推託羅刹糧多

不能遽克遷延長久這本著發回大學士將

此意傳諭議政王大臣等令其嚴議申飭○

實錄卷一百十六

陞浙江按察使教化新為廣西布政使司布

政使○以故三等阿思哈尼哈番線應藻孫

線柱襲職○旌表山東節婦樂陵縣劉氏堂

邑縣楊氏膠州徐氏烈婦武定州李氏膠州

邱氏即墨縣何氏蓬萊縣孫氏並給銀建坊

如例○丁卯

上駐蹕圖爾根伊扎爾畢喇地方○己巳予故

福建總督施維翰祭葬加祭一次謚清惠○

辛未

上駐蹕納拉蘇台○壬申。

上駐蹕和諾忒地方○癸酉。

上駐蹕拜察地方○甲戌。領侍衛內大臣伯噶

都緣圍場不整。革領侍衛內大臣職。以侍衛

効力行走○乙亥。奉差福建廣東展界內閣

學士席柱復命。奏曰。臣奉命往海展界。福建

廣東兩省沿海居民羣集跪迎。皆云我等離

舊土二十餘年。已無歸鄉之望。幸

皇上威德。削平寇盜。海不揚波。今衆民得還故

土。保有室家。各安生業。仰戴

皇仁於世世矣。

上曰。百姓樂於沿海居住。原因海上可以貿易

捕魚。爾等明知其故。前此何以不議准行。席

柱奏曰。海上貿易。自明季以來。原未嘗開。故

議不准行。

上曰。先因海寇。故海禁不開。為是。今海氛廓清。

更何所待。席柱奏曰。據彼處總督巡撫云。臺

灣。金門。廈門等處。雖設官兵防守。但係新得

之地。應俟一二年後。相其機宜。然後再開。

上曰。邊疆大臣。當以國計民生為念。向雖嚴海

禁。其私自貿易者。何嘗斷絕。凡議海上貿易

不行者。皆總督巡撫。自圖射利故也。席柱奏

曰。

皇上所諭極是。

上問廣東督撫何如。席柱奏曰。據彼處人云。總

督吳興祚。居官頗善。巡撫李士楨。較前任巡

撫金鵠為優。

上曰。此言最是。凡居好官之後者。最難勝任。善

名亦未易得。居不肖官之後者。最易勝任。百

姓苦前官不肖。後官稍有好處。即易顯出。前

廣東巡撫內劉秉權。居官稍優。至盧興祖。王

來任。金鵠。品行貪劣。人民甚為受累。後李士

楨到任。稍優。所以稱善。即今原任總督巡撫

等。或有貪婪積惡者。今皆覆敗。於已何益。謂

天報甚速可乎。又問爾到江南。聞原任總督

于成龍。居官何如。席柱奏曰。臣過江南。人俱

說于成龍居官甚清。但因輕信被屬員欺罔。上曰。于成龍。因在直隸居官甚善。朕特簡任江南總督。後聞居官不及前。變更素行。至病故後。始知其居官廉潔。甚為百姓所稱。或于成龍素行梗直。與之不合者。挾讐讒害。造作屬下欺罔等語。亦未可定。是不肖之徒見嫉耳。居官如于成龍者有幾。又問總河靳輔爾曾見否。河道近日如何。席柱奏曰。曾見靳輔顏色憔悴。河道頗好。漕運無阻。臣來時見宿遷地方。將水分排築隄。共計五隄。其二隄已完。三隄正在修築。水盛時。開閘以殺其勢。令其循隄四散分流。無衝決之患。

上曰。河道關係漕運。甚為緊要。前召靳輔來京時。衆議皆以為宜更換。朕思若另用一人。則舊官離任。新官推諉。必致壞事。所以嚴飭靳輔。令其留任。限期修築。今河工已成。水歸故道。有裨漕運商民。使輕易他人。必至貽悔矣。學士圖納奏曰。臣曾數至江南。亦稍識河道

形勢。必順水性修理。始能有益。若逆其性。則不能治也。

上曰。順水性而治。此自古常談也。今則不然。黃河不循故道。渙散流決。今倒轉一百八十里。令其復還故道。所以為難。若但順水性修治。有何難哉。

上又問沿途田禾若何。席柱奏曰。福建田禾甚盛。江南浙江田禾亦好。山東雨水調順。彼處百姓皆謂豐收之年。但德州至真定。雨水不足。田禾稍旱。自此至京師。又覺好矣。

上曰。農事實為國之本。儉用乃居家之道。是以朕聽政時。必以此二者為先務。凡親民之官。能仰體朕意在竭力。何慮不家給人足乎。○賜克西克騰都統。叅領。佐領。驍騎校。及兵丁。蟒袍。綢緞。銀兩。布疋等物有差。○以吏部尚書宋德宜。為文華殿大學士。○以翰林院編修田需。為河南鄉試正考官。禮部郎中何棟。為副考官。○以原任湖北按察使吳毓珍。



為山東按察使司按察使○戊寅。以故一等  
阿思哈尼哈番李一第子李國華。三等阿思  
哈尼哈番孟一茂孫孟光前襲職○己卯。中  
元節。遣官祭

永陵。

福陵。

昭陵。

孝陵。

仁孝皇后。

孝昭皇后陵○辛巳。

上駐蹕英尼湯泉○以翰林院編修曹鑑倫為

山東鄉試正考官。戶部主事李孔嘉為副考

官。翰林院編修趙執信為山西鄉試正考官。

兵部主事戴璽為副考官○以故三等阿思

哈尼哈番胡同春孫胡維夏襲職○陞鑲紅

旗護軍統領佟佳為蒙古都統○癸未。

上駐蹕努湖岱畢喇地方○甲申。

上駐蹕舍爾圖地方○丙戌。

上駐蹕烏喇岱地方○召問學士席柱曰。朕前  
日未嘗問及提督萬正色。施琅。伊等品行若  
何。席柱奏曰。陸路提督萬正色。為人忠厚和  
平。居官亦優。

上曰。萬正色。前督水師時。奏臺灣斷不可取。朕  
見其不能濟事。故將施琅替換。令其勉力進  
剿。遂一戰而克。萬正色。施琅。二人。令和睦否。  
席柱奏曰。二人陽為和好。陰相嫉妒。

上曰。施琅何如。席柱奏曰。施琅人材頗優。善於  
用兵。但行事微覺好勝。

上曰。粗魯武夫。未嘗學問。度量褊淺。恃功驕縱。  
此理勢之必然也○調鑲藍旗蒙古副都統  
尼雅翰。為滿洲副都統○工部議覆管理錢  
法刑部左侍郎佛倫疏言。寶源局。每年鼓鑄  
用銅六十五萬八千一百觔零。以五萬觔銅  
為一卯。每月鼓鑄二卯。此六十五萬餘觔之  
銅。止可鼓鑄六個月有餘。其五個餘月。匠役  
無事。各歸鄉村。伊等俱賴手藝為生。為能保

其不行私鑄。請將蘆課。并各開稅。增買銅觔  
共一百二十萬觔。一年十二月。每月鑄錢二  
卯。不令匠役出局。可杜匠役盜鑄之弊。查見  
今蕪湖。龍江。杭州。荊州。四關。歲辦銅觔七十  
一萬九千六百五十四觔。尚不足銅四十八  
萬三百四十六觔。應將江蘇撫屬蘆課銀內。  
令其辦銅十七萬觔。安徽撫屬蘆課銀內。令  
其辦銅六萬觔。湖廣蘆課銀內。令其辦銅一  
萬觔。江西蘆課銀內。令其辦銅九千五百五  
十觔。許墅關。辦銅九萬五千觔。蕪贛二關。共  
辦銅三萬觔。湖口關。辦銅一萬四千觔。太平  
關。辦銅四萬觔。鳳陽關。辦銅二萬一千七百  
九十六觔。以康熙二十四年為始。解交寶源  
局。以足鼓鑄。從之。○辛卯。  
上駐蹕克勒昂阿地方。○二等阿思哈尼哈番  
胡秉嶽。因軍機革職。以其弟胡秉彝襲替。○  
壬辰。  
上駐蹕納林郭爾地方。○癸巳。

上駐蹕西爾哈烏里雅蘇台  
八月。甲午朔。  
上駐蹕愛里昂阿地方。○予故原任陝西興安  
總兵官喻明簡。祭葬如例。○乙未。  
上駐蹕烏喇岱地方。○賜科爾沁端敏公。蘇  
尼特和碩郡主。翁牛特和碩郡主。緞足鞍轡。  
巴林王納木達克。固山貝子烏爾占。溫春。袍  
帽金帶弓箭撒袋鞍轡。又賜多羅額駙阿拉  
布坦。一品台吉格勒爾圖等以下。護衛典儀  
以上。及隨圍都統。副都統以下。至兵丁。袍帽  
帶鞵弓箭撒袋紬緞布疋銀兩有差。○丁酉。  
遣大學士宋德宜。祭  
先師孔子。○  
上駐蹕森濟圖昂阿地方。○陞陝西潼商道佟  
國佐。為浙江按察使司按察使。○戊戌。祭  
大社。  
大稷。遣工部尚書薩穆哈行禮。○己亥。  
上駐蹕柏敦昂阿地方。○以左春坊左諭德秦

松齡為順天鄉試正考官。翰林院編修王沛思為副考官。○喀爾喀厄爾德尼戴青台吉等遣使進九白年貢。宴賚如例。○庚子。以內閣學士阿哈達為直隸巡撫。○予故歸化城副都統畢力克祭葬如例。○辛丑。  
上駐蹕坡瀨嚙山。○壬寅。  
太宗文皇帝忌辰。遣官祭昭陵。○  
上駐蹕森濟圖哈達地方。○賜隨行八旗護軍校及護軍等牛羊。○甲辰。  
太祖高皇帝忌辰。遣官祭福陵。○  
上駐蹕上都畢喇地方。○乙巳。  
上駐蹕恩格木嚙山。○丙午。  
上駐蹕古北口。○免山西遼州榆社縣。康熙二十三年分水災額賦有差。○琉球國中山王尚貞遣陪臣王明佐等進貢。并謝冊封恩。宴賚如例。○陞護軍叅領賽畢漢為鑲藍旗掌

古副都統。○旌表福建節婦葉氏。給銀建坊如例。○丁未。秋分。夕月於西郊。遣都統阿密達行禮。○  
上駐蹕河漕。○戊申。  
上回宮。詣太皇太后  
皇太后宮。問安。○庚戌。諭督捕侍郎達哈他曰。朕以爾素有操守。簡用侍郎。近見爾衙門事務弊端尚多。旗下人不無怨言。若但守己廉潔。而於凡事不能勉力肅清。究竟何益。嗣後爾當嚴率屬員。事務悉加釐剔。以副委任之意。○吏部題覆。國子監疏請助教官員。應加考試錄用。得旨。助教官員。職掌教習廕監官生。應選優於文學者補用。若用文學庸劣之人。何以表率生徒。以後著吏部考取。仍將試卷送內閣閱看具奏。○戶部右侍郎李仙根。工部左侍郎金鼐。右侍郎金世鑑。各降四級。右侍郎巴錫。降二級。俱調用。以管理錢法失

察弊端也○辛亥。轉兵部尚書李之芳。為吏部尚書○陞吏部郎中范承勳。為內閣學士兼禮部侍郎○以故二等阿思哈尼哈番敦塞親弟之子噶納海襲職○壬子。贈故少傅兼太子太師靖逆將軍侯甘肅提督張勇。為少師。仍兼太子太師。予祭葬。加祭二次。諡襄壯○陞鑲白旗蒙古副都統博靈。為蒙古都統○癸丑。

上詣

太皇太后宮問安○以鑲黃旗蒙古都統公倭赫。為領侍衛內大臣○以翰林院掌院學士牛紐。為內閣學士兼禮部侍郎○甲寅。諭大學士等。都統前鋒統領。護軍統領。副都統。皆管轄兵丁。職任最為緊要。朕觀正黃旗副都統噶思哈。正白旗前鋒統領郎談。皆才具庸劣。不能勝任。其八旗內有此等武大臣。可將職名開列來奏。有才力不及者。查革。又諭。從前漢軍人材勇健。騎射亦優。與滿洲相去無

幾。近日漢軍漸以庸懦。皆似綠旗。有時都統副都統缺出。欲選擇補授。急切難得其人。此等缺出。可否將滿洲補授。著議政王大臣會議具奏。尋議。嗣後漢軍都統。副都統缺出。將滿洲補授。滿洲都統。蒙古都統缺出。亦將滿洲補授。漢軍旗分之都統。副都統等職名開列。護軍統領。滿洲蒙古副都統缺出。將滿洲補授。漢軍旗分之副都統等開列。得旨。滿洲都統。副都統缺出。著開滿洲補授之蒙古漢軍都統。副都統。其蒙古都統。副都統缺出。不必開列。滿洲補授之漢軍都統。副都統○大學士李蔚病故。遣大學士明珠。同漢學士一員。往奠茶酒○以鑲紅旗蒙古副都統佛可託。為護軍統領○乙卯。兵部以八旗漢軍都統。副都統等職名進呈。

上曰。朕觀鑲藍旗護軍叅領篤庫。正紅旗護軍叅領克英額。為人庸常。不能馭下。理應解任。伊等可有勞績。諸王大臣有知之者否。著議

奏。其正白旗漢軍都統賽音達禮。鑲黃旗漢軍副都統王光宗。俱屬庸劣。此外更有不堪者。朕知之未詳。著議政王大臣會議具奏。○刑部尚書魏象樞。以病再疏乞休。允之。○丙辰。

上詣

太皇太后

皇太后宮問安。○以內閣學士席爾達。詹事府少詹事蔣弘道。充經筵講官。○丁巳。議政王

大臣等遵旨甄別。正紅旗滿洲副都統噶哈。鑲白旗滿洲都統馬緝。漢軍副都統盧仰祖。鑲紅旗滿洲副都統洪世祿。正藍旗滿洲副都統龔圖。漢軍副都統官保。喻維邦。鑲藍旗漢軍副都統劉顯忠等。皆係庸劣。不能彈壓下人。應革職。

上曰。洪世祿年老。龔圖前曾奏請休致。不可列衆人中黜退。喻維邦人材壯健。亦善騎射。將伊等仍留原任。餘俱依議。又奏正白旗漢軍

都統賽音達禮。鑲黃旗漢軍副都統王光宗。正紅旗護軍叅領克英額。鑲藍旗護軍叅領萬庫等。皆庸劣不能勝任。應解任。從之。○宗人府議奏。諸王之子。減等冊封。應將親王一子。冊封為世子。候襲親王。其餘諸子。皆授為貝子。將郡王一子。冊封長子。候襲郡王。其餘諸子。皆授為鎮國公。貝勒以下。皆有減等授封之例。仍應照見行例行。得旨。親王諸子。著授為貝勒。郡王諸子。著授為貝子。餘如所議。

○陞左副都御史席特納。為工部右侍郎。○陞江南驛鹽道黃桂。為福建按察使司按察使。○陞正黃旗二等侍衛吳啟爵。為山西太原總兵官。甘肅永昌副將康調元。為浙江溫州總兵官。福建署銅山總兵官事陳昌。為江南狼山總兵官。福建署漳州總兵官事金世榮。為福建漳浦總兵官。○戊午。調江南京口右路總兵官馮德昌。為河南河北總兵官。裁京口右路總兵缺。汰去所轄老弱兵丁。餘兵

暫歸左路總兵官統轄○己未。

上御經筵講畢。賜大學士九卿詹事及講官等

宴○遣官祭

歷代帝王○遣官祭城隍之神○陞內閣學士金汝祥。為工部左侍郎○庚申。

上詣

太皇太后宮問安○陞翰林院侍讀學士常書

為翰林院掌院學士兼禮部侍郎○癸亥。調

兵部左侍郎焦毓瑞。為戶部右侍郎。陞貴州

巡撫楊雍建。為兵部左侍郎○出征江西八

品官赫倖。創發身故。予祭銀。如陣亡例○以

理藩院左侍郎阿喇尼。兼鑲黃旗蒙古都統。

上駟院大臣馬錫。為正黃旗蒙古副都統。調

鑲藍旗護軍統領額赫納。為前鋒統領○阿

霸哈納多羅貝勒納木喀爾故。遣官致祭

九月。甲子朔。

上詣

太皇太后

皇太后宮問安○諭大學士等。向令開海貿易。

謂於閩粵邊海民生有益。若此二省民用充

阜。財貨流通。各省俱有裨益。且出海貿易。非

貧民所能。富商大賈。懋遷有無。薄徵其稅。不

致累民。可充閩粵兵餉。以免腹裡省分轉輸

協濟之勞。腹裡省分錢糧有餘。小民又獲安

養。故令開海貿易。今若照奉差郎中伊爾格

圖所奏。給與各關定例款項。於橋道渡口等

處。槩行徵稅。何以異於原無稅課之地。反增

設一關科斂乎。此事恐致擾害民生。爾等傳

諭九卿詹事科道。會議具奏○九卿等議覆

河南道御史李時謙疏言。今歲逢上元甲子。

請停止秋審。應如所請。從之○予故太子太

師保和殿大學士兼戶部尚書李蔚祭葬。加

祭一次。諡文勤○乙丑。轉禮部右侍郎胡爾

敬。為左侍郎。陞詹事府少詹嚴我斯。為禮部

右侍郎○原任內閣學士兼禮部侍郎王起

元。補原官○丙寅。陞吏部左侍郎張士甄。為

刑部尚書。山東巡撫徐旭齡。為工部右侍郎。以一等侍衛覺羅孫果。為都察院左副都御史。○調鑲白旗蒙古都統博霽。為滿洲都統。正紅旗蒙古副都統希禪。為滿洲副都統。陞長史班達爾沙。為鑲白旗蒙古副都統。○九卿等議覆管理錢法侍郎陳廷敬等疏言。民間所不便者。莫甚於錢價昂貴。定例每錢一串。值銀一兩。今每銀一兩。僅得錢八九百文不等。錢日少而貴者。皆由奸宄不法之徒。燬錢作銅。牟利所致。銅價每觔值銀一錢四五分不等。計銀一兩。僅買銅七觔有餘。而燬錢一串。得銅八觔十二兩。即以今日極貴之錢。用銀一兩。換錢八九百文。銷燬可得銅七觔七八兩。尚浮於買銅之所得。何況錢價賤時乎。欲除燬錢之弊。求制錢之多。莫若鼓鑄稍輕之錢。每錢約重一錢。燬錢為銅。既無厚利。則燬錢之弊自絕。錢價平而有利於民。再查產鉛銅地方。因地方官收稅。種種作弊。小民

無利。不行開採。此後停其收稅。任民採取。則銅日多而價自平。相應俱照所請。通行各省遵行。得旨。依議。開採銅觔。聽民自便。地方官仍不時稽察。毋致爭鬪搶奪。藉端生事。致滋擾害。○丁卯。

上詣

太皇太后

皇太后宮問安。○命戶部尚書梁清標。以原銜管兵部尚書事。以左都御史余國柱。為戶部尚書。○戊辰。

上御太和門視朝。文武陞轉各官謝恩。次琉球國。暹羅國使臣等行禮。○諭刑部。都察院及監察御史等官。近見奸徒。將人拐騙。設置窩子。隱藏私賣者甚多。此皆不將為首之人拏究。以致株連獲罪者多。而拐騙之事不已。又私燬制錢。鑄造小錢。為首之人。不曾拏獲。致牽連之衆。見禁刑部獄中。皆由五城巡捕三營步軍。不行嚴緝之故。設立監察御史。巡捕



三營官員。步軍副尉。步軍校。及步軍統領總尉等官。所司何事。爾等必曉諭該管官弁。將為首之人。嚴加稽查。盡行拏獲。若有疎縱。或旁人首告。或朕訪出。將爾等照錢法堂司官員議罪例處分。所司官員。毋得借此緝拏之端。妄行擾害良民。○調鑲黃旗蒙古副都統蘇爾達。為滿洲副都統。○庚午。

上詣

太皇太后宮。問安。○江寧巡撫湯斌。陛辭。

上諭曰。以爾久侍講筵。老成端謹。江蘇為東南重地。故特簡用。居官以正風俗為先。江蘇風俗。奢侈浮華。爾當加意化導。移風易俗。非旦夕之事。從容漸摩。使之改心易慮。當有成效。錢糧歷年不清。亦須留意。爾在內閣。曾閱章疏。在外督撫。所奏凡錢穀刑名大事。多有舛錯。致令駁察。爾到地方。尤當留意。近日江南吏治。稍稍就理。爾能潔已率屬。自然改觀。湯斌出。復傳諭曰。湯斌在講筵年久。今遠行。其

賜白金五百兩。表裏十端。臨行之日。仍令入朝。更有諭旨。○轉理藩院右侍郎明愛。為左侍郎。陞內閣學士喇巴克。為理藩院右侍郎。以鑲黃旗蒙古都統阿喇尼。兼理藩院尚書。命嗣後別部尚書缺出。不必調補。○壬申。予四川陣亡七品筆帖式錫理護。致祭銀兩。○陞驍騎參領沙那海。為鑲黃旗漢軍副都統。前鋒參領西伯赫。為鑲紅旗蒙古副都統。○癸酉。陞吏部左侍郎陳廷敬。為都察院左都御史。○陞驍騎參領伊壘。為正藍旗漢軍副都統。○以翰林院侍講學士鄔赫。充日講起居注官。○甲戌。諭大學士等。所修

太祖高皇帝實錄。朕已敬覽。滿漢文義俱符。能不失本意。其實錄內。勲舊及諸臣後裔。可察明另列一單進呈。如無後者。亦註明備覽。○陞長史鄂莫克圖。為鑲白旗漢軍副都統。○議政王大臣等。議將軍薩布素等。以失誤軍

機。上疏請罪。應即嚴加議處。但見領大兵臨  
羅刹境。姑俟事竣再議。其來歲進剿事宜。悉  
令遵前旨行。得旨。進取雅克薩機宜。關係重  
大。令都統公瓦山。侍郎郭丕。前往黑龍江。會  
同該將軍。將雅克薩地方。應否攻取。作何行  
事。方克有濟。逐一詳明議奏。○乙亥。

上詣

太皇太后

皇太后宮。問安。○禮部遵旨議覆。虞舜東巡至  
於岱宗。燔柴致祭。漢高過魯。以太牢祀孔子。  
俱係巡歷所至。行致祭禮。令

皇上聖德神功。同符堯舜。倣古之制。爰事東巡。  
經過泰山闕里。亦應致祭。泰山。照祀五嶽禮  
行。孔子。照闕里祀典行。從之。○諭戶部。工部。  
光祿寺堂司各官。朕凡巡幸。一應動用之物。  
皆從節儉。此番巡幸。戶部採買草豆。工部木  
炭。光祿寺食物。勿令地方官派取民間。擾害  
百姓。爾等衙門。前往官員。按每程所用。合其

時價。採買供給。倘有派取民間者。著令該督  
撫指名題叅。○以吏部右侍郎額星格。為正  
白旗蒙古副都統。陞鑲藍旗蒙古副都統尼  
雅翰。為護軍統領。○厄魯特博碩克圖汗。噶  
爾丹。遣使古爾班拜等。攜夥伴三千人入貢。  
理藩院奏。請遣官驗其符信。毋得過二百人。  
餘俱遣回。

上曰。來人浮於定額。著理藩院尚書阿喇尼前  
往酌量議遣。○丙子。以廣東高雷總兵官馬  
雲程。為鑲藍旗漢軍副都統。○兵部題。原任  
福建總督姚啟聖。修理兵船兵器。浮冒錢糧  
四萬七千餘兩。應行追賠。得旨。姚啟聖。攻取  
臺灣。著有勞績。著免其追賠。○丁丑。免湖廣  
江夏等三縣。及沔陽衛。本年分水災額賦有  
差。○戶部等衙門。遵諭議覆。福建。廣東。新設  
關差。止將海上出入船載。貿易貨物徵稅。其  
海口內橋津地方。貿易船車等物。停其抽分。  
并將各關徵稅則例。給發監督酌量增減定

例從之。○戊寅調戶部左侍郎李天馥為吏部左侍郎。○調湖廣巡撫慕天顏為貴州巡撫。○陞護軍統領莽齊祿為鑲白旗蒙古都統。調護軍統領塔爾代為前鋒統領。○己卯調禮部左侍郎胡簡敬為吏部左侍郎。管右侍郎事。陞內閣侍讀學士丹岱為內閣學士。兼禮部侍郎。○戶部等衙門議覆湖南岳州等十三衛所守城屯丁支給錢糧遵旨會同兵部詳議。查屯丁非係食正餉之兵。且每省防守地方捍禦盜賊。有經制綠旗官兵酌撥所屬就近列兵。令其防守未為不可。況各省並無屯丁守城。支給錢糧之例。應將岳州等衛所守城屯丁一項錢糧自二十三年起全停支給。從之。○禮部題磨勘順天鄉試卷文體不正三卷。文理悖謬二卷。正考官左春坊左諭德秦松齡副考官翰林院編修王沛思同考官內閣中書王鐸工部主事張雄俱應照例革職。候選主事張曾祚應照例革職。交

刑部提問。從之。○庚辰直隸巡撫阿哈達陞辭。

上諭曰。直隸地方旗民雜處爭訟繁多。爾先正已俾軍民和輯。此職分當然之事。至若皇莊及諸王大臣家人豪強擾害者甚衆。爾之盡力者在此耳。○調兵部督捕左侍郎達哈他為吏部左侍郎。管右侍郎事。○廣東廉州總兵官佟國璽以病乞休。允之。尋以海寇既平。裁廉州總兵官缺。改設遊擊一員。領兵一千。駐守廉州府城。○辛巳。

上詣

太皇太后宮問安。○調戶部右侍郎庫勒納為兵部督捕左侍郎。○以左副都御史張鵬為山東巡撫。○癸未。諭大學士等。近見凡朕諭令議奏之事。部院諸臣皆首以上諭。極是回奏。朕命諸臣會議者。但欲事得其理。與衆意相符否耳。並非必以朕言為是。令諸臣遵議也。爾等可將此旨曉諭諸臣。嗣後宜各抒所

見。勿復因循陋習。○諭戶部。朕軫念蒼生。勤求治理。適年以來。於畿輔郡縣。時行歷覽。補助兼施。今俯允廷議。諏吉東巡。正欲體察民情。周知吏治。一應沿途供用。皆令在京所司儲備。毫不取之民間。猶恐地方官役。不能悉體朕懷。借端支應。妄行濫取。今特加申飭。如有悖旨私徵。一經發覺。定行從重治罪。更念朕此番巡歷。原以撫恤編氓。問俗觀風。於閭閻休戚。務期洞曉。凡經過地方百姓。須各安生業。照常寧處。毋得遷移遠避。反滋擾累。爾部即行令該地方官。於府州縣城市村莊。窮鄉僻壤。大張告示。遍行曉諭。務令通知。以副朕惠愛元元至意。○甲申。以一等侍衛伯噶都。為鑲黃旗蒙古副都統。調鑲藍旗蒙古副都統葉儲赫。為滿洲副都統。○以科爾沁故多羅郡王布達禮子雅噶爾。襲爵。○轉戶部右侍郎焦毓瑞。為左侍郎。陞內閣學士王鴻緒。為戶部右侍郎。轉禮部右侍郎。嚴我斯。為

左侍郎。陞翰林院侍讀學士董訥。為禮部右侍郎。○厄魯特噶爾丹博碩克圖汗。遣使進貢。賞賚如例。○丙戌。調刑部右侍郎鄂爾多。為戶部右侍郎。○丁亥。以聖駕東巡。頒詔天下。詔曰。帝王誕膺景命。統御萬邦。道重觀民。政先求莫。是以虞廷肆覲。肇舉省方。周室懷柔。式歌時邁。詩書具在。典制丕昭。朕仰荷

天庥。續承

祖烈。撫茲兆庶。期底時雍。夙夜孜孜。懋求治理。以富以教。靡敢怠遑。猶慮鄙屋艱難。罔由上達。故於直隸郡縣。周覽巡行。勤施補助。更念山左等處。土宜俗尚。不加巡省。曷克周知。矧曆逢甲子。世際昇平。聿圖泰運之恒新。在措芸生於豫大。乘時命駕。咨彼民依。但樂利祇慰夫一方。而德澤未敷於九有。朕心歉焉。用是特昭公普。以弘仁庶。奏誠和之盛治。於戲。時臻熙皞。彌隆寬卹之恩。戶樂清寧。丕篤綿

長之慶。布告天下。咸使聞知。○詔內恩。歟。凡一十二條。○陞浙江衢州副將陳夢賜為廣東高雷廉總兵官。○戊子。

上詣

太皇太后宮問安。○

上御太和門視朝。文武陞轉各官謝恩。○陞護軍叅領羅滿色為正紅旗蒙古副都統。○喀爾喀土謝圖汗遣使進九白年貢。宴賚如例。○己丑。召山東巡撫張鵬諭曰。今見山東人

民逃亡京畿近地。及邊外各處為匪者甚多。皆由地方勢豪侵佔良民田產。無所倚藉。乃至於此。爾至任。務剪除勢豪。招集流亡。俾得其所。○陞大理寺卿崔澄為都察院左副都御史。○兵部等衙門遵旨會議續順公沈瑞於康熙九年襲伊叔沈永興公爵。康熙十三年邊賊劉進忠反。沈瑞被擄臺灣。雖受偽印。但其時沈瑞年纔十三。尚在幼小。且不忘國恩。協謀內應。以待我大兵至。康熙二十年十

一月為同謀偽鎮朱友出首。全家被害。此公爵仍應世襲。俟查明應襲之人。具題承襲。從之。○陞護軍叅領達爾泰為鑲藍旗蒙古副都統。○庚寅。

孝慈高皇后忌辰。遣官祭

福陵。○

上詣

太皇太后

皇太后宮問安。○陞詹事府少詹蔣弘道為內

閣學士兼禮部侍郎。○辛卯。

上東巡詣

太皇太后

皇太后宮問安畢。啟行。是日駐蹕永清縣南哥

驛。○陞浙江布政使石琳為湖廣巡撫。○以故三等阿思哈尼哈番蘇朗孫柱珥襲職。○

壬辰。

上駐蹕霸州苑家口

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百十六

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百十七

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十三年甲子冬十月癸巳朔享

實錄卷一百十七

太廟遣戶部尚書杭艾行禮○遣官祭

永陵

福陵

昭陵

孝陵

仁孝皇后

孝昭皇后陵○頒康熙二十四年時憲曆○

上駐蹕任邱縣李花村○甲午

上駐蹕河間府城南○乙未

皇太后聖壽節。遵

懿旨。免行禮○

上駐蹕獻縣單家橋○丙申。

上駐蹕阜城縣伊家村○以故三等阿思哈尼

哈番巴扎爾弟巴商襲職○丁酉。

上駐蹕德州南關○原任山東巡撫新陞工部

右侍郎徐旭齡。登州總兵官李林盛。布政使

黃元驥。按察使吳毓珍等。來朝○予故蒙古

都統夸扎。祭葬如例○戊戌。

平定縣志卷之二十一

上駐蹕平原縣七里鋪○己亥。

上駐蹕禹城縣二十里鋪○陞太常寺卿邊聲

廷。為大理寺卿○予故一等精奇尼哈番許

爾吉。祭葬如例○以鑲白旗副都統索諾木。

為護軍統領○庚子。

上幸濟南府。原任山東巡撫新陞工部右侍郎

徐旭齡。率所屬地方官員士庶等。跪迎於城

西。

上至趵突泉亭。命徐旭齡近前。諮詢地方利病

民風土俗。

上臨泉覽視久之。徐旭齡奏請

御筆留題以寵名泉。

上援筆大書激湍二字○徐旭齡又奏。署內有

珍珠泉。

上書清漪二字賜之。是日。

上駐蹕杜家廟○衍聖公孔毓圻。率四氏子孫

迎。

駕○辛丑。

平定縣志卷之二十二

上駐蹕長清縣大灣底地方○壬寅。

上至泰安州。登泰山極頂。又東至泰觀峯。及孔

子小天下處。東南至日觀峯。薄暮駐蹕行宮

○癸卯。侍臣請往觀捨身崖。

上曰。愚民無知。惑於妄誕之說。以捨身為孝。不

知身體髮膚。受之父母。不敢毀傷。故曾子有

臨深履薄之懼。且父母愛子。惟疾之憂。子既

捨身。不能奉養父母。是不孝也。此等事處處

有之。正宜曉諭嚴禁。使百姓不為習俗所誤。



觀之何為○

上詣東嶽廟躬祀泰山之神。是日駐蹕泰安州崔家莊○諭大學士明珠曰朕夙夜孜孜勤求治理深宮寧處軫念閭閻諏吉時巡省觀民隱經行所至登陟泰山至聖遺蹤緬然可觀一覽衆山臨眺九有洵足攬天下之勝察造化之奇因書普照乾坤四字可於孔子小天下處建亭懸額復書雲峯二字於極頂處磨崖勒石其本年泰山香稅免解該部用以鳩工庀材虔修泰山頂上各廟○甲辰。

上駐蹕新泰縣西舟村○調鑲紅旗蒙古副都統西伯赫為滿洲副都統○乙巳。

上駐蹕蒙陰縣○丁未。

上駐蹕沂州大石橋地方○先是一應本章俱三日遞到一奏。是日。

上坐待至二鼓數問本章到否。諭大學士等曰奏章關係國政最為緊要朕凡在巡幸之處奏到隨即聽覽未嘗一有稽留前此遞本官

員因其遲延已經議處此番本章何又來遲。今日奏章不拘時刻一到爾等即行呈進朕宵興省覽是夜四鼓本章遞到呈進。

上即起詳覽徹曙○戊申。

上駐蹕沂州華堡村○諭大學士明珠三冬時令嚴寒窮苦小民恐其無以資生餬口故於五城地方各支銀米設廠煮粥散給貧窮戶口原係朝廷撫恤小民之意今奉行日久經管各官視為具文虛應故事以致貧民嗷嗷待哺罔獲宿飽其令部院嚴飭巡城御史及司坊官員必令親視散給毋得假手胥役侵漁虛冒務俾小民均沾實惠部院堂官仍不時稽察如有故違者題叅治罪以副朕愛養窮黎至意○予江西陣亡鑲紅旗五品贊禮郎班塔哈正藍旗候補主事阿爾扈達各致祭銀兩○己酉。

上駐蹕郯城縣紅花舖○恭進太皇太后黃河鮮魚及地方土產鮮果等物。命

沿途敬慎。星速馳送。毋得遲延。○漕運總督邵甘。河道總督靳輔。及地方官來朝。○庚戌。諭河道總督靳輔。黃河屢次衝決。久為民害。朕欲親至其地。相度形勢。察視隄工。即於今日前往。○是日。駐蹕宿遷縣。○昭武將軍江南提督楊捷。江寧將軍瓦岱。副都統穆成額。及地方官來朝。○辛亥。

駕發宿遷。夾道叩閭者甚衆。

上諭侍衛等曰。此斷不可收覽。民人果有冤抑。地方督撫等官儘可申訴。今因朕巡幸。紛紜控告。不過希圖倖准。快其私怨。一經發審。其中事理未必皆實。地方官奉為欽件。轉轉駁訊。則被告與原告。皆致拖累。以小忿而破身家。後悔無及矣。有天下者。惟貴以德化民。使之無訟。即賢能官吏。亦當求訟簡刑清。與民相安於無事。若以多訟為喜。開爭競之風。俗疲民困。皆由於此。○

上駐蹕桃源縣。衆興集。○遣翰林院掌院學士

孫在豐。祭河神金龍四大王。○

上臨閱黃河北岸諸險工。諭河道總督靳輔曰。朕向來留心河務。每在宮中。細覽河防諸書。及爾屢年所進河圖。與險工決口諸地名。時加探討。雖知險工修築之難。未嘗身歷河工。其河勢之洶湧。溢漫。隄岸之遠近高下。不能了然。今詳勘地勢。相度情形。如蕭家渡。九里岡。崔家鎮。徐升壩。七里溝。黃家嘴。新莊一帶。皆喫緊迎溜之處。甚為危險。所築長隄。與逼水壩。須時加防護。大畧運道之患。在黃河。禦河全憑隄岸。必南北兩隄。修築堅固。可免決溢。則河水不致四潰。水不四潰。則濬滌淤墊。沙去河深。隄岸益可無虞。今諸處隄防。雖經整理。還宜培薄增卑。隨時修築。以防未然。不可忽也。又如宿遷。桃源。清河上下。舊設減水諸壩。蓋欲分洩漲溢。一使隄岸免於衝決。可引東水歸槽。一使下流疏洩。可無淮弱黃強。清河噴沙之慮。近來凡有決工處所。皆倣其

意。不過暫濟目前之急。雖受其益。亦有少損。倘遇河水泛溢。乘勢橫流。安保今日減水壩。不為他年之決口乎。且水流浸灌。多壞民田。朕心不忍。爾當籌畫精詳。措置得當。使黃河之水。順勢東下。水行沙刷。永無壅決。則減水諸壩。皆可不用。運道既免梗塞之患。民生亦無墊溺之憂。庶幾一勞永逸。河工可告成也。上。目擊隄夫作苦。駐轡久之。親加慰勞。復諭河道總督靳輔曰。隄上夫役。風雨晝夜。露宿草棲。勞苦倍常。所領工食。為數無幾。恐有不肖官役。從中侵蝕。必使人人得沾實惠。始無負朕軫恤至意。○三等侯桑閣。緣事革職。以其子偏圖襲替。○壬子。上臨視天妃閘。水勢湍急。指授河臣。改為草壩。另設七里。太平三閘。以分水勢。○上登舟。是日過清河縣。淮安府。○京口鎮海將軍楊鳳翔。江南江西總督王新命。巡視兩淮鹽課御史察哈納。京口水師總兵官陳奇等。

來朝。○癸丑。諭總督王新命曰。朕巡視直隸山東。江南諸處。惟高郵等地方百姓。甚為可憫。今雖水涸。民擇高阜棲息。但廬舍田疇。仍被水淹。未復生業。朕心殊為不忍。爾係地方大臣。作何籌畫。濬水通流。拯此一方民命。以副朕軫恤黎元至意。○甲寅。御舟過高郵湖。見民間田廬。多在水中。惻然念之。因登岸。巡行隄畔十餘里。召耆老詳問致災之故。復諭王新命曰。朕此行。原欲訪問民間疾苦。凡有地方利弊。必設法興除。使之各得其所。昔堯憂一夫之不獲。況目覩此方被水情形。豈可不為拯濟耶。○御舟過揚州。泊儀真江干。○乙卯。御舟自儀真渡揚子江。泊鎮江府西門外。○杭州將軍馬哈達。副都統石文炳。京口副都統張元勳。張思恭。安徽巡撫薛柱斗。江寧巡撫湯斌。及地方官來朝。○丙辰。上幸金山。乘沙船渡揚子江。風浪恬靜。舟行甚

速。

上顧侍臣曰。自兵興以來。恢復岳州。長沙。多得此船之力。今海宇承平。昔時戰艦。僅供巡幸渡江之用。然安當思危。治不忘亂。朕乘此舟。未嘗不念艱難用武之時。非以遊觀為樂也。

上登金山。遊龍禪寺。

御書江天一覽四字。又幸焦山。午後。自鎮江啟行。往蘇州府。○丁巳。

御舟過丹陽縣。常州府。無錫縣。○予福建陣亡

一等阿達哈哈番護軍叅領喇瞻。祭葬如例。

○予招撫吳逆被害漢川縣劉家隔巡檢贈

主簿章啟周。致祭銀兩。○九卿詹事科道遵

旨會議。今海外平定。臺灣。澎湖。設立官兵駐

劄。直隸。山東。江南。浙江。福建。廣東。各省先定

海禁處分之例。應盡行停止。若有違禁。將硝

黃軍器等物。私載在船。出洋貿易者。仍照律

處分。從之。○戊午。

上駐蹕蘇州府城內。○賜護軍校護軍前鋒。及

執事人役銀兩。○以翰林院侍講李元振。為順天武鄉試正考官。右春坊右贊善嚴繩孫。為副考官。○己未。

上幸虎邱。顧謂侍臣曰。向聞吳閭繁盛。今觀其風土。大畧尚虛華。安佚樂。逐末者衆。力田者寡。遂致家鮮蓋藏。人情澆薄。為政者當使之去奢反樸。事事務本。庶幾家給人足。可挽頽風。漸摩既久。自有熙皞氣象。○諭大學士等。明太祖一代開創令主。功德並隆。朕巡省方域。將及江寧。鍾山之麓。陵寢斯在。朕優禮前代。況於其君實賢。可遣祀如禮。○是日。往江寧府。

御舟泊無錫縣南門。○陞左僉都御史趙之鼎。為太常寺卿。○以故三等阿思哈尼哈番衮濟孫之子丹巴襲職。○調鑲白旗蒙古副都統賽哈納。為滿洲副都統。○庚申。

上幸惠山。○諭江寧巡撫湯斌曰。朕欲周知地方風俗。小民生計。有事巡行。凡需用之物。皆

自內府儲備。秋毫不取之民間。恐地方或有  
不肖官員。借端妄派。以致擾害窮民。爾其加  
意嚴察。如有此等。即指名題參。從重治罪。其  
沿途供役。緯夫及聞朕巡行至此。遠來聚觀  
百姓。恐離家已遠。不能自歸。爾逐一詳察。多  
方區畫。令其還家。爾巡撫率布政使。即從此  
回任。料理此等事。不必前送。湯斌再四懇奏。  
送

駕渡江。

上允之。又諭曰。吳中縉紳汪琬。原係翰林。為人  
厚重。學問優通。且居鄉安靜。不預外事。特賜  
御筆手卷一軸。爾遣人付與。不必令其來見。  
著即在家謝恩。

御舟泊丹陽縣南門。○辛酉。

上由陸路啟行。駐蹕句容縣長巷村。○以正黃  
旗蒙古都統公坡爾盆為領侍衛內大臣  
十一月。壬戌朔。

上過句容縣。問知縣陳協濬曰。爾所治縣。今歲

秋成若何。陳協濬奏。賴

皇上洪福。今秋收穫甚豐。

上曰。知縣係親民之官。與一縣民生休戚相關。  
朕巡行之次。見此處百姓困苦。爾當潔己奉  
公。愛民如子。不爾。則國法具在。爾其慎之。  
○上至江寧。登雨花臺。觀其城郭山川形勢。進江  
寧府城駐蹕。○癸亥。遣內閣學士席爾達。祭  
明太祖陵。

御製祝文曰。自古歷代帝王。繼天立極。功德並  
隆。治統道統。昭垂奕世。朕君臨海宇。運會昇  
平。軫念民生。省方問俗。途經白下。憑眺鍾山。  
緬憶前徽。興言往烈。園陵入望。瞻封樹之依  
然。史冊可徵。企芳規之儼在。儀章式舉。殷禮  
聿稱。敬遣專官。代陳牲帛。爰申禋祀之誠。用  
著景行之志。冀神爽其不昧。降雲車以格歆。  
○諭大學士明珠。尚書介山。明太祖陵。已遣  
官致祭。但朕既抵江寧。距陵非遠。其親為拜  
奠。是日。

上謁明太祖陵。過明故宮。慨然久之。

御製過金陵論曰。金陵。禹貢揚州之域。秦立郡縣。為秣陵。兩漢因之。孫權時。稱建業。東晉及宋齊梁陳。地號佳麗。隋唐之間。六朝舊跡。漸致湮沒。南唐李氏。始更築城。名金陵府。明有天下。建都於此。窺明太祖之意。以為宅中圖太。控制四方。千百世無有替也。歲在甲子。冬十一月。朕省方南來。駐蹕江寧。將登鍾山。酌酒於明太祖之陵。道出故宮。荆榛滿目。昔者鳳闕之崑莢。今則頽垣斷壁矣。昔者玉河之灣環。今則荒溝廢岸矣。路旁老民。跪而進曰。若為建極殿。若為乾清宮。階碩陛。級猶得想見其華構焉。夫明太祖。以布衣起淮泗之間。經營大業。應天順人。奄有區夏。頃過其城市。閭閻巷陌。未改舊觀。而宮闕無一存者。觀此興懷。能不有吳宮花草。晉代衣冠之歎耶。昔人論形勢之地。首推燕秦。金陵次之。然金陵雖有長江之險。為天塹。而地脈單弱。無所憑

倚。六朝偏安。弗克自振。固曆數之不齊。或亦地勢使然也。明自文皇靖難之後。嘗以燕京為行在。宣德末年。遂徙而都之。其時金陵臺殿。苑囿之觀。聲明文物之盛。南北並峙。遠勝六朝。迨承平既久。忽於治安。萬曆以後。政事漸弛。官寺朋黨。交相構陷。門戶日分。而士氣澆薄。賦斂日繁。而民心渙散。閭閻以烏合之衆。唾手燕京。宗社不守。馬阮以蠶偽之徒。託名恢復。僅快私仇。使有明艱難創造之基業。未三百年。而為丘墟。良可悲夫。孟子曰。天時不如地利。地利不如人和。有國家者。知天心之可畏。地利之不足恃。兢兢業業。取前代廢興之蹟。日加儆惕焉。則庶幾矣。○賜扈從內大臣滿漢大學士。都統。尚書。前鋒統領。護軍統領。副都統。學士。副都御史。侍衛。各執事人員。表裏綴足。○賜江寧將軍瓦岱。昭武將軍提督楊捷。鎮江將軍楊鳳翔。杭州將軍馬哈達。御用棉緞袍各一。江寧副都統胡圖。穆成額。總

兵官陳昌鎮江副都統張元勳。張思恭杭州副都統石文炳。棉蟒袍各一。總督王新命。巡撫湯斌。薛柱斗。狐腋蟒袍各一。及滿漢文武各官表裏緞疋有差。○甲子。

上幸江寧教場。命各將軍副都統總兵等官及內大臣侍衛等射。

上親射。右發五矢。五中。左發五矢。四中。士民觀者以數萬計。皆踴躍蹈舞。歡呼動地。○諭江南江西總督江蘇巡撫明太祖天資英武。敷

政仁明。芟刈羣雄。混一區宇。肇造基業。功德並隆。其陵寢在鍾山之麓。係江寧所屬地方。向已有旨。令有司各官春秋致祭。嚴禁樵採。並設有守陵人戶。朝夕巡視。但為日已久。不無廢弛。今朕省方江寧。親詣拜奠。見牆垣傾圮。林木凋殘。皆係無知民人。不遵約束。恣肆作踐。往來行走。殊干法紀。嗣後爾等督令地方各官。不時巡察。務俾守陵人役。用心防護。勿致附近旗丁居民。仍前踐踏。所有春秋二

祭亦必虔潔舉行。以副朕崇重古帝王陵寢至意。○命刑部郎中陳布祿兵部主事顧瓦喇。往福建。察審將軍佟國瑤題叅副都統胡啟元。脫逃耿逆家口案。○厄魯特憨都台吉額爾德尼和碩齊。遣使進貢謝罪。憨都台吉疏言。臣部運衰。遭噶爾丹執。臣祖楚呼爾吳巴什。滅臣父班第。臣時年十三。有陪臣額爾德尼和碩齊者。挈臣逃出。遵達賴喇嘛之諭。在額濟內託賴之地。與

皇上遷民同居。不謂其妄行刦掠。致干天討。臣誠懲之。今已悔過。伏望

聖主鑒宥。額爾德尼和碩齊疏言。臣之兩台吉乃噶爾丹之叔及弟也。無罪而噶爾丹執之。殺之。既蔑我主。何能與之共事。故掠其邊境。奔遁至此。

皇上聖德光昭。臣等本無為非之心。祇以惜死。遂致草竊。今日夜思維。無所逃於天壤。謹悚惶陳奏於



聖明之前得旨。已圖爾額爾克濟農。剗掠鄂爾多斯之事。已經寬免。則慙都台吉屬下額爾德尼和碩齊。亦應一體宥赦。所貢准其上納。

○乙丑。

上諭大學士等曰。朕於政事。無論大小。從未有草率完結者。每在宮中默坐。即以天下事。經營籌畫於胸中。簡任督撫之時。又必詳加察訪。蓋一方大吏。賢能。自能表率僚屬。令貪墨之風。未必盡除。然激勸澄清。正欲使之潛移默化也。○命大學士明珠。傳諭江寧府知府于成龍曰。朕在京師。即聞爾居官廉潔。今臨幸此地。確加諮訪。與前所聞無異。是用賜爾朕親書手卷一軸。嘉爾清操。以示旌揚。但人靡不有初。鮮克有終。爾必自始至終。毋有改操。務儆前總督于成龍。正直潔清。乃無負朕優眷之意。○

上自江寧回鑾。

御舟至儀鳳門外。督撫提鎮以下。大小文武官

員。及地方縉紳士民數十萬。於兩岸跪送。上停舟。諭曰。朕向聞江南財賦之地。今觀市鎮通衢。似覺充盈。其鄉村之饒。人情之樸。不及北方。皆因粉飾奢華所致。爾等大小有司。當潔已愛民。奉公守法。激濁揚清。體恤民隱。以副朕老安少懷之至意。○

上泊舟燕子磯。讀書至三鼓。侍講學士高士奇奏曰。

皇上南巡以來。行殿讀書寫字。每至夜分。誠恐聖躬過勞。宜少自節養。

上曰。朕自五齡。即知讀書。八齡踐阼。輒以學庸訓詁。詢之左右。求得大意。而後愉快。日所讀者。必使字字成誦。從來不肯自欺。及四子之書。既已通貫。乃讀尚書。於典謨訓誥之中。體會古帝王孜孜求治之意。期見之施行。及讀大易觀象玩占。實覺義理悅心。故樂此不疲耳。○丙寅。

御舟泊儀真。○陞江南安徽按察使王國泰為

浙江布政使司布政使○丁卯。

御舟泊江都縣邵伯鎮○命吏部尚書伊桑阿、工部尚書薩穆哈往視海口。諭曰：朕車駕南巡，省民疾苦，路經高郵，寶應等處，見民間廬舍田疇被水淹沒，朕心甚為軫念。詢問其故，具悉梗槩。高寶等處，潮水下流，原有海口，以年久沙淤，遂至壅塞。今將入海故道濬治疏通，可免水患。自是往還，每念及此，不忍於懷。此一方生靈，必圖拯濟安全，咸使得所。始稱朕意。爾等可往被水災州縣，逐一詳勘，於旬日內覆奏。務期濟民除患，總有經費，在所不惜。爾等體朕至意，速行。○予故內大臣沙濟祭葬如例。○予湖廣陣亡一等阿達哈哈番、俄爾和克三等阿達哈哈番和瑞各祭葬如例。○戊辰。

御舟泊高郵州界首鎮○己巳。

御舟泊淮安府南所壩○庚午。

御舟泊清河縣天妃閘○辛未。

上黎明登岸，臨閱高家堰隄工。諭河道總督靳輔曰：朕觀高家堰地勢，高於寶應、高郵諸水數倍，前人於此築石隄障水，實為淮揚屏蔽。且使洪澤湖與淮水并力敵黃，衝刷淤沙，開係最重。今高堰舊日及周橋、翟壩修築雖久，仍須歲歲防護，不可輕視，以隳前功。○

上至清口，復閱黃河南岸諸險工。諭河道總督靳輔曰：這運口閘，將來水緊難行，應再添造一座。又諭曰：今年黃水倒灌運河，爾須酌一至妥之策，務令永不倒灌。○

上駐蹕桃源縣北關○壬申。

上駐蹕宿遷縣○諭漕運總督邵甘曰：朕時巡之舉，原欲周覽民情，察訪吏治。爾身為大臣，理應潔己率屬，乃蒞任以來，並無善狀，且多不謹處。此朕得之輿情，訪聞頗確。邵甘奏曰：臣庸劣菲材，不知檢束，負

皇上委任。臣罪奚辭。但以滿人官此土者，惟臣一人，不免為衆所忌，豈能自致聲譽。

上曰。莫洛格爾古德。皆為督撫。歿後人猶思慕稱頌。居官苟善。豈有不致聲譽者乎。邵甘伏地謝罪。且乞扈從。

上命隨至京候旨。

上閱南岸煙燉險工。過白洋河。居人老幼數千。跪迎隄畔。其年老貧寒者。各賜白金。○癸酉。

上駐蹕紅花鋪。○甲戌。

上駐蹕郊城縣沙溝地方。○遣內閣學士范承勳等。祭長白山。嶽鎮海濱。

歷代帝王陵寢。

御製閱河隄詩。示扈從諸臣。諭曰。朕南巡。親觀河工夫役勞苦。閭閻貧困。念此方百姓。何日俾盡安。畎畝。河工何時方得告成。偶成一詩。聊寫朕懷。不在詞藻之工也。○以故一等阿思哈尼哈番李銍弟李鑄襲職。○免河南磁州。安陽。湯陰。三州縣。本年分電災額賦。有差。○旌表江南節婦。上元縣葉士瑛妻鄭氏。太倉州曹訥妻王氏。常熟縣賈玉如妻王氏。崇

明縣王宣哲妻盛氏。長洲縣郭繼昌妻王氏。崑山縣鄭嗣昌妻徐氏。吳江縣吳綸妻沈氏。陸尚忠妻潘氏。江都縣張復陞妻吳氏。儀真縣朱一緯妻吳氏。孝子陳其忠。各給銀建坊。如例。○戶部等衙門。會議左僉都御史趙之昂疏言。通惠河一差。每年帶徵稅銀溢額。有議叙之例。應歸入各關內。將部院衙門官員。照例掣籤。三年更差。應如所請。從之。○予故直隸巡撫格爾古德祭葬。諡文清。○陞長史郭布。為鑲白旗蒙古副都統。○陞山東登州總兵官李林盛。為廣西提督。○乙亥。

上駐蹕費縣探沂地方。○召河道總督靳輔。入行宮。諭之曰。爾數年以來。修治河工。著有成效。勉盡力。朕已悉知。此後當益加勉勵。早告成功。使百姓各安舊業。庶不負朕委任至意。因以

御書閱河隄詩賜之。○丙子。

上駐蹕費縣錦堡。○諭內閣等衙門。闕里係聖

人之地。秉禮之鄉。朕幸魯地。致祭

先師。特闡揚文教。鼓舞儒林。祀典告成。講明經書文義。窮究心傳。符合大典。應行事宜。內閣各部院會議具奏。尋內閣等議。應遣官先至曲阜。同衍聖公孔毓圻。於孔氏子弟內。選舉二人。撰次經書講義。進呈

御覽。屆期宣講。得旨。遣翰林院掌院學士常書侍讀學士朱馬泰。前往曲阜。○以故三等阿思哈尼哈番鄭人瑞子鄭佩蘭襲職。○丁丑冬至。祀

天於

圜丘。遣都統侯巴渾德行禮。○遣官祭

永陵。

福陵。

昭陵。

孝陵。

仁孝皇后。

孝昭皇后陵。○停止次日朝賀。○

上經泗水東境。幸泉林寺。

上瞻眺久之。指示侍臣曰。此相傳子在川上處。是日。駐蹕泗水縣大杆橋。○陞江南江寧府知府于成龍為安徽按察使。司按察使。○予福建陣亡二等阿達哈哈番莫羅渾。岳州陣亡拖沙喇哈番武禮。各祭葬如例。○予江西陣亡驍騎校袁泰。致祭銀兩。○戊寅。

駕幸曲阜。衍聖公孔毓圻。率博士孔毓埏等諸職官。及其族人暨四氏子孫年十六以上者。

於東郊跪迎。○

上駐蹕城南行宮。○己卯。

上御輦。設鹵簿。詣

先師廟。至奎文閣前。降輦。步入大成門。至大成殿。樂作。

上行三跪九叩禮。四配。十哲。兩廡。從官分獻。

御製祝文曰。仰惟

先師。德侔元化。聖集大成。開萬世之文明。樹百王之儀範。永言光烈。莫不欽崇。朕丕御鴻

圖。緬懷至道。憲章往哲。矩矱前模。夕惕朝乾。覃精思於六籍。居今稽古。期雅化於萬方。繫惟典訓之功。實覩乂安之效。茲者巡省方國。至於岱宗。瞻望魯郊。爰來闕里。空堂至止。恍聞絲竹之聲。舊寢徘徊。喜動宮牆之色。車服禮器。宛然三代遺風。几杖冊書。實矣千秋盛蹟。愜明靈之儼在。文治遐昌。肅禮祀以惟虔。精忱庶格。○遣國子監祭酒阿禮瑚。祭啟聖公。

御製祝文曰。維公系本神靈。生稱瓌偉。勇力聞於魯國。皆道德所發皇。政事紀於鄆邦。悉文章所宣著。篤生聖子。代為帝師。寰宇崇歲祀之儀。不先父食。古今奉斯文之統。共指家傳。茲值東巡。特臨曲邑。溯二千年之教澤。孰非厚德燕貽。垂七十世之孫謀。如見神明陟降。用修彝祭之典。代以扈從之臣。泗水環流。知發源之有自。防山聳峙。占積慶之無疆。牲醴式陳。尚其歆格。○

上幸詩禮堂。衍聖公孔毓圻。率五氏子孫行禮畢。監生孔尚任。進講大學聖經首節。舉人孔尚鉉。進講易經繫辭首節。

上命大學士王熙。宣諭衍聖公孔毓圻等曰。至聖之道。與日月並行。與天地同運。萬世帝王。咸所師法。下逮公卿士庶。罔不率由。爾等遠承聖澤。世守家傳。務期型仁講義。履中蹈和。存忠恕以立心。敦孝弟以修行。斯須勿去。以奉先訓。以稱朕懷。爾等其祇遵毋替。

上又諭。初至闕里。祀典既成。意欲徧覽先聖遺蹟。其令衍聖公孔毓圻。山東巡撫張鵬。口北道孔興洪。講書官孔尚任。孔尚鉉等。前引。

上步至大成殿。肅瞻

聖像。顧問衍聖公孔毓圻曰。像始於何年。孔毓圻奏曰。相傳東魏興和三年。兗州刺史李瑒。始塑像。

上以次觀顏子。曾子。子思。孟子像。又觀禮器有犧象雲雷三尊。

上問何代法物。孔毓圻奏曰。漢章帝元和二年。親祀闕里。所留祭器。又觀石刻吳道子畫魯司寇像。詣聖蹟殿。周覽圖畫。及憑几像。行教小影。立像。行像。諸石刻。顧問孔毓圻曰。何像最真。孔毓圻奏曰。惟行教小影。顏子從行者為最真。乃當年端木賜傳寫。晉顧凱之重摹者。

上問西偏是何處。孔毓圻奏曰。前為金絲堂。後為啟聖公祠。

上斂容。駐望久之。

上復至大成殿前。命大學士等宣諭曰。至聖之德。與天地日月同其高明廣大。無可指稱。朕向來研求經義。體思至道。欲加贊頌。莫能名言。特書萬世師表四字。懸額殿中。非云闡揚聖教。亦以垂示將來。又諭曰。歷代帝王。致祭闕里。或留金銀器皿。朕今親詣行禮。務極尊崇。至聖。異於前代。所有曲柄黃蓋。留供廟庭。四時饗祀。陳之。以示朕尊聖之意。

上出殿。問大成殿榜。孔毓圻奏曰。宋徽宗飛白書。至杏壇。孔毓圻奏曰。此先聖講道之所。

上覽金臣黨懷英篆杏壇二字碑。宋臣米芾書檜樹贊碑。及宋真宗君臣所製孔子與七十二弟子贊。觀先師手植檜。孔毓圻奏曰。明弘治十二年。廟燬於火。檜在門殿之間。經火。枝葉盡脫。孤幹獨存。今又二百年矣。不枯不榮。其堅如鐵。色亦如之。俗呼為鐵樹。前至奎文閣。孔毓圻奏曰。此歷代藏書之所。

皇上頒賜之書。皆藏其上。

上問曰。何處是先師所居之宅。今尚有遺址否。孔毓圻奏曰。

皇上所御講筵之後。有魯壁遺址。乃先聖燕居之所。

上復入承聖門。觀堂前太初石。唐槐及銀杏樹。升詩禮堂。孔毓圻奏曰。此當日鯉趨過庭。得聞詩禮之處。

上於堂後觀孔宅遺井。命汲水嘗之。顧問魯壁

遺址。孔毓圻奏曰。昔秦始皇焚詩書。臣九世祖孔鮒。預藏尚書論語。孝經諸書於壁中。至漢魯恭王。欲毀臣祖故宅。以廣其宮。聞壁中有金石絲竹之聲。發之得竹簡古書。故後世名其堂曰金絲云。

上詣孔林。於洙泗橋下馬步行。至墓前。酌酒行三叩禮。

上閱墓碑。問墓上是何草木。孔毓圻奏曰。孔林草木。皆當年羣弟子各自其國徙植。種類繁多。不能悉辨。

上問孔林周圍幾許。孔毓圻奏曰。共地一十八頃。今二千餘年。族人日繁。祔葬無所。

上曰。何不開擴。孔毓圻奏曰。林外皆版籍民田。欲擴不能。尚望特恩賜給。

上曰。即具疏來。孔毓圻等叩頭謝恩。○賜衍聖公孔毓圻。五經博士孔毓埏。顏懋衡等。及曲阜縣知縣孔興認。日講四書。易經書經。解義各一部。又賜孔毓圻。狐腋蟒服一領。黑貂褂

一領。表裏各五疋。賜孔毓埏。孔興認等。及四氏子孫。在仕籍者。蟒服有差。其孔氏子孫進士。舉人。貢生。各賜袍服。監生。生員。各賜白金五兩。仍命曲阜縣康熙二十四年地丁銀。盡行蠲免。賜衍聖公孔毓圻。

御製過闕里詩。

御書節並松筠四字。賜孔毓圻祖母陶氏。是日。上駐蹕兗州府西關。○諭大學士明珠曰。周公大聖人。制禮作樂。垂示萬世。今廟在曲阜。應行致祭。此係重大典禮。其遣恭親王長寧。及禮部尚書介山。偕往。以示朕尊崇元聖之意。御製祝文曰。惟公丕承聖緒。懋敘人倫。先烈覲揚。成一家之繼述。官禮制作。垂萬世之經常。道闡圖書。探六爻而易貢。心傳精一。兼三代以訐謨。啟東魯之典型。猶存故澤。入尼山之夢寐。未墜斯文。朕稽古省方。瞻言至止。郊原縱目。遙深松桷之思。廟貌崇觀。爰切羹牆之慕。特申祇薦。代以親藩。惟冀神靈。尚克歆饗。



○庚辰。

上駐蹕汶上縣李家莊○辛巳。

上駐蹕東阿縣楊古店○壬午。

上駐蹕東阿縣二十里鋪○癸未。

上駐蹕高唐州黃店村○甲申。

上駐蹕德州城西關○乙酉。

上駐蹕阜城縣阜莊驛○丙戌。

上駐蹕河間府秦家莊○丁亥。

上駐蹕雄縣○予故原任副都統蘇朗祭葬如

例○以杭州將軍馬哈達為正白旗滿洲都

統○戊子。

上駐蹕永清縣蔡家營○己丑。

上回駐南苑○一等阿思哈尼哈番又一拖沙

喇哈番金聲振病故。無應襲之人。以原立職

金礪親叔之孫金弘振承襲○予岳州陣亡

三等阿思哈尼哈番巴扎爾祭葬如例○庚

寅。

上回宮。詣

太皇太后

皇太后宮。問安○諭滿漢大學士九卿等。奉差官員。其特齎詔敕。及出使大臣。御前侍衛等。凡係經過地方。官接見。應有定體。至部院衙門。差遣筆帖式等。或有不肖之人。要挾地方官。以請安為名。恣其需索。外吏疲於供應。致累小民。奚以堪此。且伊等官職微末。何由自達於上。而有請安之舉。應行禁止。又諭大學士等。部院大臣。年高者。藉以料理政事。不以筋力為禮。即如勒德洪。亦有足疾。原無礙於機務。頃尚書李之芳。齎捧本匣。以衣裘厚重。偶致失足。此等倘或至損傷。朕心深為不忍。以後本匣。可令尚書侍郎。內年少壯者捧進。諭部院知之○講官常書等。奏冬至後。向有停講之例。

皇上聖學日新。寒暑無間。今易經講義已畢。將進講詩經。時值沍寒。應否停講。請旨。

上諭。天氣雖寒。朕於宮中煖閣。可以進講。且機

務少暇。每日披覽經義於學問多所裨益。不  
必停講。○辛卯

上詣

太皇太后

皇太后宮問安

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百十七

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百十八

監修總裁官光祿大夫太僕寺卿太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十三年甲子十二月壬辰朔陞通政

實錄卷一百十八

使蘇赫為刑部右侍郎○贈故江南江西總

督于成龍太子太保廕一子入監讀書○陞

正黃旗護軍統領沙納哈為蒙古都統奉天

副都統佟寶為正黃旗護軍統領杭州副都

統石文炳為正白旗漢軍都統○陞翰林院

侍講學士徐乾學為詹事府詹事○予故湖

廣總督董衛國祭葬如例○陞護軍叅領阿

爾法為鑲紅旗蒙古副都統○癸巳以鑲黃

旗滿洲副都統蘇爾達為護軍統領○甲午

戶部議覆福建巡撫金鉉疏言康熙二十年綠旗官兵俸餉不敷銀四萬五千六百兩請行撥補具題應如所請但冊內有海澄公黃芳世多支司庫銀二千三百六十兩相應著伊家屬賠完得旨黃芳世効力行間且又身故所用錢糧著免其追賠餘依議○予故致仕禮部尚書帥顏保祭葬如例○丙申

上御太和門視朝文武陞轉各官謝恩次厄魯特進貢使臣等行禮○陞江寧副都統胡圖

為杭州將軍○鄂爾多斯多羅貝勒古木布

拉錫故遣官致祭○丁酉一等伯長生故無應襲之人以其族弟田保襲爵○戊戌以禮

部右侍郎董訥為經筵講官○

上諭大學士等漕運總督邵甘人平常著革職

查有無世職酌量給與應得之官隨旗行走

○陞詹事府詹事傅臘塔為通政使司通政

使○乙亥山西道御史張集疏言學道一官

為國家文教所係應令九卿會同保舉擇其

清廉素著夙有文望者刻名上請恭候簡用

母得但循資俸掣簽庶衡文者得其人而海

內仰右文之化矣得旨學政關係文教造就

人才直隸各省督學各官必品行素優才學

兼長者方能稱職應不拘定例將內外各衙

門由進士出身官員作何選擇補授著九卿

詹事科道會同確議具奏○予故二等阿思

哈尼哈番額色祭葬如例○庚子

上詣

太皇太后

皇太后宮問安○以翰林院侍講王頊齡提督

順天等處學政○賜江南安徽按察使于成

龍之父原任阿達哈哈番于得水貂裘披領

諭之曰爾子于成龍居官清廉惟爾教子有

方特加賞賚爾其勗勉爾子殫心竭力始終

如一朕不難頻加顯擢苟末路不終辜負國

恩定行懲治亦爾家門之玷也又召八旗漢

軍都統副都統侍郎等官諭曰國家自

祖宗定鼎以來委任漢軍官員與滿洲一體其中頗有宣猷効力者如孟喬芳張存仁輩朝廷亦得其用比年漢軍居官者大不如初每赴外任多攜廉從汰侈糜費惟務黷貨累民恣肆放逸未能謹守法度如張長庚賈漢復白色純等不可勝舉屢加申飭尚多因循未見改轍茲者巡行江南見文武各官及軍民人等衆口一辭稱江寧知府于成龍清廉愛民朕心喜悅已面加獎勵超遷為安徽按察使又特召于成龍父賞賜以示褒美廉吏至意凡爾八旗漢軍人等自今以後悉宜洗心滌慮痛除舊習或子弟官守在外宜各貽書訓勉果有潔己愛民如于成龍者朕立行擢用如猶怙非不悛國有常法不能為此輩貸也○授和碩康親王傑書之女為郡主壻穆赫達為和碩額駙○陞河道總督標下中軍副將林宗為山東登州總兵官○九卿等議覆尚書伊桑阿等勘閱海口一疏請敕下河

臣親往車路串場等河并白駒丁溪草堰等口逐一確勘作何挑濬深濶使高郵等州縣減水壩一帶運河水口引流入海其所用錢糧細數題估到日工部確議具覆若興工之時見任官員不足應聽該督題請委用庶協力分辦底績可期得旨靳輔見在督理黃河隄岸又令兼海口必致兩悞且黃河海口係在兩處應另差官督理著再確議具奏○阿齊圖格隆等以達賴喇嘛奏疏復命疏言喀爾喀左右翼議好之事曾遣扎爾布奈往盟始則右翼不從繼則左翼不服是以未能協和但皇上安集流離使之和好誠善事也今仰遵聖旨復遣參巴陳布胡土克圖令於十二月到喀爾喀國定議謹遣拉木扎巴羅卜臧諾爾卜等齋奏以聞○辛丑浙江道御史梅鋞條奏科場事宜上諭大學士等曰疏中所言發榜太速似屬有

理凡人精神有限卷牘浩繁豈能一一徧閱  
竟有試卷未經考官點閱者倘致實學淪棄  
豈不可惜况弊之有無亦不在發榜遲速宜  
令寬展日期細加校閱以無虛國家求才至  
意著照所奏行○壬寅以右春坊右庶子儲  
振翰林院侍讀韓莢侍講李振裕右春坊右  
贊善王掞翰林院編修勵杜訥為日講起居  
注官○癸卯議政王大臣等會議黑龍江地  
方將士應遣大臣一員統轄又彼處田地應  
遣戶部大臣一員監督耕種

上曰軍機關係緊要非熟練戎行者不可公瓦  
山素諳行師以之遣往必能勝任護軍統領  
佟寶佛可託皆堪効力之人可令公瓦山為  
首統轄佟寶佛可託為叅贊遣往其監督耕  
種著侍郎薩海去○召都察院滿漢堂官暨  
五城御史等諭曰京畿重地理宜肅清近聞  
盜竊公行居民不得安靜且盜賊各有窩主  
馬匹器械晝則藏匿其家夜則出而為盜大

約多在墳園荒僻之處為其窟穴即如向所  
拏獲開人窩誘賣人口必有藏匿處所盜無  
窩主何以能行其令五城嚴緝務在必獲正  
法則盜源自絕矣○甲辰陞京口協領董元  
卿為杭州副都統○先是侍郎蘇拜等疏言  
鄭克塽劉國軒馮錫范明裔朱桓等俱令赴  
京其武職一千六百有奇文職四百有奇或  
願回籍或願受職應聽部察例議叙兵四萬  
餘人願入伍歸農各聽其便

上命鄭克塽家口親族及劉國軒馮錫范本身  
家口俱令遣發來京其偽官并明裔朱桓等  
俱於附近各省安插墾荒餘如議至是鄭克  
塽等至京

上念其納土歸誠授鄭克塽公銜劉國軒馮錫  
范伯銜俱隸上三旗仍令該部撥給房屋田  
地○乙巳禮部尚書介山以病乞休允之○  
調戶部尚書杭艾為禮部尚書以左都御史  
科爾坤為戶部尚書○陞翰林院侍讀學士

朱馬泰為詹事府詹事○諭兵部征剿羅刹所需藤牌官兵應分遣司員至山東河南山西三省於安插墾荒福建投誠官兵內選擇五百人令地方大臣給銀贍其妻子兼為整裝遣行又傳令八旗漢軍察明福建等處投誠官兵內善用藤牌及滾被片刀者勿論主僕開列名數并器具送部其在天津鄭克塽馮錫范諸處亦遣人察取前項人員器具聞福建有雙層堅好藤牌移文提督施琅選取四百并所用片刀速送至京○陞護軍叅領博定為奉天副都統○旌表湖廣節婦荆門州胡之明妻邱氏給銀建坊如例○丙午上御太和門視朝文武陞轉各官謝恩○刑部議覆刑科給事中楊爾淑疏言直隸各省軍流人犯請照流徙尚陽堡寧古塔例嚴寒盛暑之時宜停發遣應不准行得旨軍流人犯甫離刑獄一綫僅存盛暑尚可嚴寒發去恐致有死亡之患朕心不忍嗣後著過嚴寒之

時發遣○免江南宿遷縣本年分旱災額賦有差○以工部右侍郎徐旭齡為漕運總督丁未

上詣

太皇太后宮問安○諭吏部庶吉士吳一蜚等教習已久今加考試應分別授職除蔡升元吳涵彭寧求已經授職外滿書庶吉士吳一蜚李孚青路元升王喆生史夔張廷樞尤珍劉果實潘麒生魯德升王思軾李復泌許嗣隆漢書庶吉士孫岳頌王九齡吳晟金德嘉周金然吳苑許汝霖周蒲璧俱著授為翰林院編修檢討顧鐔劉國勳王紳阮爾詢陸祖修余泰來俱著以科道用曾炳姚文光方俸武維寧袁拱黃軒史陸興俱著以部屬用○吏部等衙門遵旨會議學政關係文教造就人才嗣後停其論俸補授順天學政缺應將侍讀侍講諭德洗馬蔡行開列恭請簡用江南浙江學道缺停其補用郎中道府應將侍

讀侍講諭德洗馬中允贊善亦察行開列恭請簡用其餘各省學道缺將應陞進士出身之五部郎中及叅議道知府等官選擇開列恭請簡用從之○議政王大臣等遵旨會議京師係緊要之地應將盜賊嚴行查拏以靖地方嗣後巡捕三營兵丁并番役司坊官與營官一同管轄嚴緝盜賊其村莊看墳屋內藏匿無藉之人為盜者亦令巡捕司坊官員不時嚴行查拏從之○戊申以右春坊右中允徐元夢為日講起居注官○九卿等遵旨議奏海口及下河事務應差官專任安徽按察使于成龍才守堪委請給發關防敕書差往經理但黃河海口雖在兩處必彼此協同方能有濟總河靳輔治河年久水勢地形其所熟悉應將一切事宜均申詳靳輔具題若工告成該部將靳輔一并議叙如無成效將靳輔一并議處其餘俱照前議從之○己酉貴州威寧總兵官王潮海陞見

上諭曰威寧乃獠蠻雜處之地性多驕悍今海內昇平邊陲無事爾在任宜加意撫恤務使牧寧以副朕意○陞吏部左侍郎管右侍郎事達哈他為都察院左都御史○免江西分宜等十五縣并袁州安福二衛所康熙二十二年分旱災額賦有差○湖廣永順宣慰使彭肇相病故無應襲之人以其叔祖彭廷椿襲職○庚戌以翰林院侍講李振裕提督江南學政右春坊右贊善兼翰林院檢討王揆提督浙江學政湖廣驛鹽道宮夢仁為山東按察使司副使提調學政江南鎮江府知府高龍光為山西按察使司副使提調學政廣東糧道蔣伊為河南按察使司副使提調學政禮部郎中何棟為江西按察使司僉事提調學政禮部郎中趙隨為福建按察使司僉事提調學政工部郎中裴憲度為廣東按察使司僉事提調學政廣西柳州府知府江臯為四川按察使司副使提調學政戶部郎中



毛漪秀為雲南按察使司僉事提調學政授多羅平郡王諾爾都之妹為縣主壻那穆素為多羅額駙○予故詹事府詹事加禮部侍郎沈荃祭葬謚文恪○予故正白旗滿洲都統賴塔祭葬加祭二次謚襄毅工部遵旨議奏黃河運河隄岸衝決河流遷徙者照舊例處分止於漫決河流不移者若在限年之內今經修官賠修如過年限令防守官賠修永為定例從之○旌表滿洲烈婦正白旗軍達妻葛氏鑲紅旗康武妻張氏夫亡自盡各給銀建坊如例○辛亥

上詣

太皇太后宮問安○丙辰

上以歲除親祭

孝陵是日啓行駐蹕薊州○丁巳

上率扈從諸王及內大臣部院大臣侍衛等詣孝陵行禮奠酒舉哀畢又率王大臣等至

仁孝皇后

孝昭皇后陵奠酒舉哀是日

上駐蹕湯泉賜守

陵官兵及上三旗護軍牛羊○戊午

上率諸王內大臣部院大臣侍衛等詣

孝陵大祭

隆恩殿又遣安親王世子馬爾渾祭

仁孝皇后

孝昭皇后陵是日

上回鑾駐蹕邦均○己未歲暮祫祭

太廟遣禮部尚書杭艾行禮○遣官祭太歲之神○遣官祭

永陵

福陵

昭陵○

上回宮詣

太皇太后

皇太后宮問安○庚申賜朝正外藩科爾沁烏

朱穆秦翁牛特蘇尼特扎魯特土默特喀爾

喀。四子部落。郭爾羅斯。萬齊忒。敖漢。阿霸垓。  
喀喇沁。鄂爾多斯。杜爾伯特。奈曼。阿霸哈納。  
吳喇忒。克西克騰。阿祿科爾沁。扎賴特。歸化。  
城。王貝勒貝子。公額駙。台吉。塔布囊。及內大。  
臣。大學士。上三旗都統。副都統。尚書。侍郎。學。  
士。侍衛等宴。旌表八旗節婦。滿洲瓦爾達。  
妻喀氏等三十七人。蒙古恩克妻薩氏等五。  
人。漢軍高如岱妻王氏等六人。各給銀建坊。  
如例。是歲人丁戶口。二千三十四萬六百。  
五十五。田地。山。蕩。畦地。五百八十九萬一千。  
六百二十三頃三十七畝有奇。徵銀二千七。  
百二十一萬六千四百三十三兩有奇。米。豆。麥。六。  
百九十一萬二千二百一十三石四斗有奇。  
草。二百二十九萬八千一百六十三束。茶。十。  
五萬九千三百一十五引。行鹽。四百三十五。  
萬六千一百五十引。徵課銀。二百七十六萬。  
一千三百八兩有奇。鑄錢。二萬九千四百八。  
十五萬一千四百八十有奇。

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百十九

監修總裁官光祿大夫太保兼太子太傅保和殿大學士吏部尚書二等伯四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣嵇廷錫

總裁官光祿大夫文華殿大學士兼吏部尚書臣朱軾等奉

敕修

康熙二十四年乙丑春正月辛酉朔

上詣

堂子行禮還宮拜神畢率諸王貝勒貝子公內

大臣大學士侍衛等詣

太皇太后

皇太后宮行禮御太和門王以下文武各官外

藩王及使臣等上表朝賀照例筵宴○朝鮮

國王李焞遣陪臣南九萬等表賀冬至元日

萬壽節及進歲貢禮物宴賚如例○順天府進

春○甲子

上詣

太皇太后

皇太后宮問安○達賴喇嘛所遣諭和喀爾喀

七旗之參巴陳布胡土克圖行至歸化城病

故

上遣阿齊圖格隆等齋敕往告其故○丁卯

世祖章皇帝忌辰遣官祭

孝陵○辛未

上詣

太皇太后

皇太后宮問安○癸酉孟春享

太廟

上親詣行禮祭畢顧內閣學士席爾達太常寺

卿葛思泰曰往見贊禮郎宣讀祝版至朕名

聲輒不揚父前子名禮經所載朕對越之次

惟懼誠敬稍有未至無以昭格神靈為子孫

者通名於祖父豈可涉於慢易嗣後俱高聲

朗讀無庸顧忌○遣官祭太歲之神○甲戌

以上元節賜外藩科爾沁烏朱穆秦蘇尼特  
翁牛特扎魯特土默特喀爾喀四子部落郭  
爾羅斯杜爾伯特高齊忒敦漢阿霸垓喀  
喇沁鄂爾多斯奈曼巴林吳喇忒克西克騰  
阿祿科爾沁扎賴特王貝勒貝子公台吉等  
及內大臣大學士上三旗都統副都統尚書  
侍郎學士侍衛等宴○乙亥上元節賜外藩  
王貝勒貝子公台吉等及內大臣大學士上  
三旗都統副都統尚書侍郎學士侍衛等宴

上幸南苑行圍○丁丑

上自南苑回宮○庚辰

上詣

太皇太后宮問安○辛巳祈穀於

上帝

上親詣行禮祭畢顧內閣學士席爾達太常寺

卿葛思泰曰前見

太廟致祭時執事官捧福胙由兩神位間趨走

於尊

祖敬

宗之意未協爾等曾稽舊例否席爾達等奏太  
常寺紀書禮部會典俱未載

上曰對越

祖宗典禮甚鉅惟嚴肅不懈始可薦馨在廟奔  
走之人亦當誠敬將事共襄大禮不應稍有  
褻慢且亞獻禮俱唱為次獻亦與漢文不符  
爾等會同內閣禮部察例奏聞尋太常寺等  
衙門奏執事各官應從外旁趨走唱次獻禮  
應改為亞獻得旨是○癸未先是

上因將軍薩布素等不能及時進取羅刹田禾  
坐失機宜降旨責之薩布素等上疏引罪

上命都統公瓦山侍郎郭丕往黑龍江與薩布  
素等詳議應否攻取雅克薩城并作何舉行  
擇其有裨於事者奏聞至是瓦山等與薩布  
素會奏我兵於四月杪水陸並進抵雅克薩  
招撫不行納款則攻其城倘萬難克取即遵

前旨毀其田禾以歸。議政王大臣等議如所奏。復請敕直隸山東山西河南巡撫。每省派熟習火器兵一百五十人。并選賢能官各四員。預備火器送京師。至日增發薩布素軍前協攻雅克薩城。

上諭議政王大臣等疏內不請發禁旅良是。但直隸各省綠旗兵未歷戰陣。且黑龍江火器甚多。不須增用。朕意選福建投誠善用藤牌官兵。見在八旗及安插山東山西河南者五百人。付臺灣投誠左都督何佑等率往薩布素一應咨題。多屬支吾。借端延滯。度四月進兵。不過刈取田禾。事必無成。此皆謫遣黑龍江狂悖之人。從中沮議。不欲成事。而薩布素出身微賤。高視若輩。毋敢有違。用兵所關甚鉅。宜周詳籌畫。期於必克。倘謀事草率。復似明安達禮等退兵。羅刹將益肆披猖。今自京城遣一賢能大臣總領軍事。俟克取雅克薩之日。班師又發盛京兵五百人。代黑龍江兵

守城種地。出征兵還亦令還盛京種地。事宜遣戶部大臣一員督理。所云早熟之穀。即內地春麥。今我兵亦多種春麥。及大麥油麥。於隕霜之前六月皆可收穫。則不以出師之故。致曠一年耕作矣。又藤牌兵給馬二千匹。帶往盛京盛京各佐領亦派馬二千。照舊制嚴督飼秣。候京城馬到更代北行。至馬喇等所養馬皆預備於齊齊哈爾屯。此間催趙月杪可到。聞此路間有缺水處。不免貽悞。今自盛京抵烏喇。自烏喇經新設驛站。路直且近。當從此徑抵黑龍江。沿途馬匹或有倒斃。馬喇以所備者足數補送。如此則我軍之馬不致缺乏矣。藤牌兵各帶礮彈或十圓或二十圓以行。其餉銀兵月給二兩。官月給三兩。又諭議政王大臣等。兵非善事。不得已而用之。向者羅刹無故犯邊。收我遁逃。後漸越界而來。擾害索倫赫哲飛牙喀奇勒爾諸地。不遑寧處。剝刮人口。搶擄村莊。攘奪貂皮。肆惡多

端是以屢遣人宣諭復移文來使羅刹竟不報命反深入赫哲飛牙喀一帶擄害益甚爰發兵黑龍江扼其來往之路羅刹又竊據如故不送還逋逃應即剪滅今仰副天心大兵逼臨雅克薩城姑再以朕諭旨遣人宣布羅刹諭之曰前屢經遣人移文命爾等撤回人衆以逋逃歸我數年不報反深入內地縱掠民間子女搆亂不休乃發兵截爾等路招撫恒滾諸地羅刹救而不誅因爾等仍不去雅克薩特遣勁旅徂征以此兵威何難滅爾但率土之民朕無不惻然垂憫欲其得所故不忍遽加殲除反覆告誡爾等欲相安無事可速回雅庫於彼為界捕貂收賦毋復入內地搆亂歸我逋逃我亦歸爾逃來之羅刹果爾則界上得以貿易彼此晏居兵戈不興倘執迷不悟仍然拒命天兵必攻破雅克薩城殲除爾衆矣如此宣諭後羅刹果能遵旨即回以雅庫為界我兵即駐劄於黑龍江設斥堠

於雅克薩令疆圉帖然倘仍行抗拒則大兵相機而行若不如是周詳區畫今縱克取雅克薩城我進則彼退我退則彼進用兵無已邊民不安可否舉行爾等其詳議之於是議政王大臣等奏言

上諭周詳遵此奉行甚禪於事統兵督耕大臣恭候

欽簡

上命都統公彭春統兵副都統班達爾沙偕佟寶等叅贊戶部侍郎薩海仍令督耕彭春等抵黑龍江後有移會雅克薩城文書用黑龍江將軍印○賜朝正外藩王貝勒貝子公台吉等銀幣鞍馬有差○以阿霸哈納故多羅貝勒納木喀爾子布綽襲爵○乙酉召試翰詹諸臣於

保和殿○封多羅平郡王羅可鐸子訥爾都為固山貝子固山貝子敦達子普奇傅善子富泰俱為鎮國公輔國公瓦山子齊克塔哈

為輔國公。授和碩恭親王常寧庶出子永壽為三等輔國將軍。以兵部右侍郎陳一炳管工部右侍郎事。禮部議覆廣西道御史劉超凡疏言會試中額舊例定南北中三項。後因滇黔川粵道路梗阻赴試無人。因與江南廬鳳各府分并南北卷內裁去中卷一項。今雲貴等四省已經再行鄉試請仍照舊例復分南北中卷三項。應如所請。從之。○河道總督靳輔遵旨陳奏河道善後事宜查徐州以上河道甚寬迨至徐州僅寬六十八丈。束水不能暢流是以徐州迤上歲歲漫溢。必須於毛城舖地方添建減水閘一座。王家山十八里屯添建減水閘三座。北岸大谷山添建減水閘二座。平日閉閘束流遇有大漲則啓閘分洩。以保徐城以上隄工。又河流下行至睢寧縣兩山夾峙。河面僅寬百丈。河流又為一束。應於峯山龍虎山之旁開鑿減水閘四座。又於歸仁隄添建石閘壩二座。並將便

民閘改深五六尺。以資分洩。又攔馬河應再添石閘一座。使河流由閘先進積水以養壩尾。又南岸各閘壩不特可以殺黃河怒漲。更可分引黃水注洪澤湖。使助淮流。但洪澤湖週圍數百里。一時不能灌滿。恐仍有黃水倒灌運河之患。必須再於清河縣西建雙金門石閘一座。并於閘下挑引河一萬餘丈。至於清河縣運口添建石閘一座。更屬保運濟漕要工。以上各工伏乞敕部確議得旨。九卿詹事科道會議具奏。○轉禮部右侍郎蘇拜為吏部右侍郎。○授鎮國公託克托慧子白努伊輔國公法塞子阿哈尼輔國將軍泰布子齊克滕巴爾善子德壽德倫子馬漆塞枯德子塞赫禮俱為三等奉國將軍。○丁亥。命康熙二十四年京察改於二十五年舉行。○上諭大學士等。阿達哈番馬喇。自遣用以來殊為効力。且頗知雅克薩諸地形勢。著授副都統銜。叅贊軍務。○戶部題黑龍江佐領鄂



色等咨稱耕牛盡斃農器損壞。今時近東作應遣理藩院官一員同馬喇如數購買耕牛送往農器。令薩布素等營造預備得旨。薩布素等故毀農器盡斃耕牛。其意在多方遲延。冀撤離黑龍江耳。凡受事者各宜殫心預籌以期有濟。詎可諉之於上。賴朕一切留意。悉加區畫。不致廢弛。倘謂責有攸歸。竟倚任之定悞軍機。宜即嚴治。念見同大兵進剿。姑暫停處分。俟回自雅克薩日再議。○予故散秩大臣墨勒根侍衛阿淑祭葬。謚勤僖。○刑科給事中楊爾淑疏言。試士三場。先以八股。首闡七藝。重在四書。請自乙丑科以後會試及順天鄉試。四書題目俱乞

皇上欽定。下部議行。○戊子  
上詣

太皇太后宮問安。○諭大學士等曰。總河靳輔所奏黃河南岸毛城舖等處北岸大谷山等處宜建減水壩。令水分流歸仁隄等處。宜建

石壩保護。曾命九卿等會議。朕南巡時靳輔亦稱自白洋河引黃水下流入洪澤湖。駱馬湖以助淮水。其下清河縣黃淮合流之處。因有洄渦。自能洗逐淤沙。朕思導流之水總會於清河縣。水勢既強。流湍激湧。必致踰越隄岸。愈損民間田廬。此減水壩雖有益於河工。實無補於百姓。不可不為熟計。爾等以朕意傳示九卿。務籌久遠。詳明議奏。

上諭議政王大臣等科爾沁十旗今年進貢牛羊諸物不必來京。其金送黑龍江軍前。仍籍其數奏聞。照進貢例賞賚理藩院。即傳諭科爾沁知之。○予故宗人府右宗人輔國公都統瓦山祭葬。謚襄敏。加賜銀五百兩。○予湖廣陣亡員外郎袁太筆帖式尼坎各祭葬。如例。○兵部題察取善用藤牌者。鑲黃旗咨送鑾儀使侯林興珠。應否遣發恭候上裁。又遴選上三旗兵一百七十人。山東等三省官一百五人。兵三百九十五人。何佑尚未

至應於官兵內委用首領幾員各約束本省人前往上三旗各遣漢軍官一員暫為管轄上諭黑龍江兵食所關最為重要必當謀恒足之道爾等與議政王大臣會同詳議以聞又遣往黑龍江管轄綠旗兵丁之官甚多兵少而管轄之官多甚無益也可度量派官而兵更宜酌減以四百名為率亦既足用而兵糧不致過費且近冬之際綠旗兵在彼地殊無所事可由蒙古境每百名分為一隊遞送之既不久可至而兵糧亦不致糜費矣其一并詳議以聞尋議政王大臣等議選派官二十員兵三百八十名共足四百名之額兵部給官印劄以便約束令林興珠及何佑統官兵以行上三旗各派漢軍賢能官一員管轄赴盛京付公彭春等率之進剿何佑至馳驛速去得旨著於官員外派足兵四百名前往餘依議尋又諭大學士勒德洪等林興珠曾効力行間且係侯爵其令叅贊軍務命彭春等

善視之○都察院左副都御史張可前疏言昔明太祖將當日政事輯成一書名曰寶訓我

皇上創守同揆文武兼濟超越明太祖萬萬臣請敕內閣翰林諸臣備輯睿謨聖政彙成一書刊布寰宇以昭法守得旨朕御極以來孜孜圖治勤政愛民日理萬幾常懷兢業雖海宇底定漸致昇平但風俗人心未臻上理這所請歷年政事彙集成書是否可行著內閣翰林院會議具奏○己丑

上幸玉泉山駐蹕

二月辛卯朔○江西陣亡驍騎校克禮祭葬如例○壬辰轉刑部右侍郎馬世濟為兵部右侍郎○以都察院左副都御史崔澄為直隸巡撫○癸巳以正白旗蒙古副都統額星格為禮部右侍郎○吏部右侍郎蘇拜以前任工部時管理錢法不核減耗費命原品隨旗行走○甲午以工部郎中畢忠吉為貴州

按察使司僉事提調學政○乙未

上自玉泉山回宮詣

太皇太后

皇太后宮問安○陞貴州按察使張沂為福建  
布政使司布政使○丙申命刑部尚書張士  
甄戶部右侍郎王鴻緒為會試正考官禮部  
右侍郎董訥翰林院掌院學士孫在豐為副  
考官○工部等衙門遵旨會議河道總督靳  
輔題修減水諸壩雖有益河道恐致淹沒房  
田民人受累應否建造令江南督撫山東巡  
撫會議具奏得旨建造減水閘壩若候該督  
撫等會議具題必致遲悞此事著差曾經看  
閱河道諳練河工司官一員速往與靳輔詳  
議若建壩分水不致多損民田著一面興工  
一面具題倘水無所歸多致淹沒民田著會  
同該地方督撫等官確議具奏○丁酉遣大  
學士吳正治祭

先師孔子○諭吏部國家設立翰林院衙門

原以儲養人材嫻習文學以備顧問編纂之

用必淹貫經史博極羣書方克諳練體裁洞

悉今古敷詞命意典贍弘通悉登著作之林

用佐右文之治始為稱職今將翰林各官特

行考試朕親加詳閱分別次第以示勸懲徐

乾學韓荃孫岳頒歸允肅喬萊學問優長文

章古雅宜加賞賚以示獎勵彭孫通等文學

亦通著照舊供職益勤研究以底精純周之

麟崔如岳龐塏錢中諧顏光猷李元振費之

達李復泌劉果實劉芳喆文理荒疎未嫻體

式難勝厥任除李元振劉芳喆已經降調其

餘俱著對品調用爾部即遵諭行○以伯莽

喀為鑲紅旗護軍統領○陞護軍叅領倭賀

為江寧副都統○兵部議覆廣西道御史錢

珏疏言秦蜀浙閩滇黔楚粵投誠之人安插

各省者請通行督撫確查務使得所願在他

鄉入籍者開明作何生理願屯田者編入保

甲官給牛種派以田畝開墾願為兵者補入

營伍應如所請從之○戊戌。

太皇太后聖壽節。

上率王以下文武大臣侍衛等詣

太皇太后宮行禮遵

懿旨停止筵宴○己亥諭大學士等曰朕聞向

來場中出題多有避忌字句者似屬無謂王

熙等奏曰

聖諭誠然今會場題目

皇上親出舉子無從揣摩此科人文自盛於往

日也○以掌院學士常書詹事徐乾學充會

典副總裁官○轉兵部右侍郎阿蘭泰為吏

部右侍郎○陞都察院左僉都御史胡昇猷

為左副都御史○陞淮揚道多弘安為安徽

按察使司按察使○庚子陞都察院左副都

御史張可前為刑部右侍郎○以編修孫岳

頌喬萊俱充日講起居注官○

上以周公承接道統繼往開來功德茂著命九

卿議授後裔五經博士撥給祀田修葺廟宇

○陞前鋒統領額赫納為鑲藍旗滿洲都統

調正藍旗蒙古副都統孫塔哈為滿洲副都

統○辛丑

孝康章皇后忌辰遣官祭

孝陵○

上詣

太皇太后

皇太后宮問安○壬寅戶部題臣部積弊難除

皆由款項多端所致嗣後將錢糧各項名色

刪去總修一冊應歸并者歸并應裁革者裁

革揀選滿漢官員內諳練錢糧事務者令專

管修纂滿漢新書得旨九卿詹事科道會同

確議具奏○癸卯

上御經筵講畢賜大學士九卿詹事及講官等

宴○諭兵部防禦

興陵官員近覺庸劣漸不如前事關

陵寢俱著加意謹守可傳諭之○漕運總督徐

旭齡陞辭

上諭曰。源清則流潔。爾為大吏。潔已率屬官吏。自不為奸。朕因前任諸臣均不稱職。聞爾向任山東。居官清慎。著有賢聲。故特簡茲任。爾當益勵勤恪。安輯軍民。以副朕委任至意。至於河漕事務。原屬一體。凡河工有關漕務者。爾便宜行事。不必推諉。其屬官賢否。宜從容廉訪。果有真知確見。方可入告。凡舉一人。務使千萬人知勸。効一人。務使千萬人知懲。至於待屬員。不可過刻。下吏亦各有艱難之處。惟心平氣和。則皆悅服矣。○直隸巡撫崔澄陞辭。

上諭曰。直隸地方旗民雜處。安輯匪易。爾為巡撫。須撫乂得宜。至潔已率屬。尤為要領。宜體朕意。毋忽。○廣東提督許貞陞辭。

上諭曰。爾在江西著有戰功。朕嘉爾勞。故簡任提督。近聞廣東盜賊未靖。爾宜加意緝捕。以安民生。許貞奏曰。廣東地方多有溪水盜賊。出沒其中最難捕治。臣今設法打造小船。安

設水路塘兵。晝夜巡哨。庶盜賊可息。

上曰。爾此去務加意綏輯。使兵民兩安。斯無負職掌。○以輔國公化善為宗人府右宗人。○陞浙江驛傳道李之粹為貴州按察使。司按察使。○予故致仕杭州副都統高國相祭葬如例。○以原任江南狼山總兵官姚儀為湖廣沅州總兵官。○先是兵部以福建送到雙層藤牌三十。單層藤牌三百七十呈閱。

上諭。藤牌稍薄。雙層者加舊綿一層。單層者加舊綿二層。庶堅固可用。官兵即於詰朝就道。侯林興珠與營造司郎中佛保監修。進式後速發。尋藤牌修畢。兵部奏並福建送至片刀四百。遞解至烏喇。公彭春等。同侯林興珠酌量齎行。

上諭。遞解藤牌關係緊要。爾部派賢能官一員。送至盛京。盛京工部派賢能官送至烏喇。○甲辰。

上詣

太皇太后

皇太后宮問安○調刑部左侍郎佛倫為兵部左侍郎管右侍郎事轉刑部右侍郎蘇赫為左侍郎陞內閣學士席柱為刑部右侍郎○吏部題廣西巡撫施天裔將康熙二十年二十一年存貯倉庫銀米捏稱民欠具題應照朦隱例革職從之○予故太子少保原任刑部侍郎宋文運祭葬謚端愍○乙巳。

上巡幸畿甸命皇太子允初隨駕是日啓行駐

蹕南苑○遣官祭

先農之神○丙午諭大學士明珠曰

太祖實錄先以小本兼滿漢字迅速繕寫送進

朕將恭覽焉若待白鹿紙謄寫大本

實錄同進則為時太遲矣○

上駐蹕蠡縣○陞太常寺卿趙之鼎為都察院

左副都御史○丁未

上駐蹕霸州○戊申祭

大社。

大稷遣刑部尚書公諾敏行禮○

上駐蹕雄縣十里舖○庚戌諭大學士明珠曰朕夙興夜寐勤求治理無非欲使小民遂其生計故每次巡幸必帶科道官或有不肖之人強行買賣擾害百姓者令其稽察此番因在近畿未經帶來著爾衙門學士不時嚴行稽察奏○陞翰林院侍講學士禪布為內閣學士兼禮部侍郎○予故陝西寧夏花馬池署都督同知管副將事石福祭葬如例○

辛亥

上諭大學士明珠曰朕觀古今文章風氣與時遞遷六經而外秦漢最為古茂唐宋諸大家已不能及凡明體達用之資莫切於經史朕每披覽載籍非徒尋章摘句採取枝葉而已正以探索源流考鏡得失期於措諸行事有裨實用其為治道之助良非小補也○又諭大學士明珠曰財賦出於閭閻凡查核錢糧必徹底澄清不致以完作欠額外科派方於

小民實有利益。朕於正供所入。毫無濫用。正以愛養物力。使國有三年九年之蓄。縱遇水旱民生。亦不致苦累。朕所以留意清覈。正欲加惠元元也。○癸丑。

上駐蹕霸州苑家口。○遣官祭

歷代帝王。○轉戶部右侍郎王鴻緒為左侍郎。調禮部右侍郎董訥為戶部右侍郎。陞左通政徐元琬為太常寺卿。○甲寅。

上駐蹕永清縣信安鎮。○乙卯。

上駐蹕武清縣王慶坨。○丙辰。春分。朝日於東郊。遣都統侯巴渾德行禮。○

孝昭皇后忌辰。遣官祭

陵。○戊午。

上駐蹕永清縣韓村。○

上命大學士明珠。一等侍衛通圖等傳諭天津總兵官劉國軒曰。朕撫御寰區。聿臻治理。止臺灣餘孽。一綫尚存。雖屬小島。未平。猶慮海濱弗靖。爾劉國軒身為渠黨。乃能仰識天時。

勸令鄭克塽納土來歸。朕心嘉悅。授爾總兵官之任。聞爾家口衆多。棲息無所。京城房舍人有定業。况價值不貲。爾安從得之。今特賜爾第宅。俾有寧居。以示優眷。○己未。

上駐蹕南苑。○以內閣學士范承勲為廣西巡撫。○庚申。

上回宮。詣

太皇太后

皇太后宮問安。○以吏部左侍郎色赫為正黃

旗滿洲副都統。○以鑲藍旗護軍統領尼雅翰為前鋒統領。○頒賜廣東左右兩鎮營在南寧豹子頭黃草壩等處傷亡官兵銀兩



大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百十九

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣翁廷錫

總裁官光祿大夫文華殿大學士兼吏部尚書臣朱軾等奉

敕修

康熙二十四年乙丑三月辛酉朔清明節遣

官祭

永陵

福陵

昭陵

孝陵

仁孝皇后

孝昭皇后陵

上諭大學士等曰光祿寺估計價值等項頭緒  
甚多各物俱照時價須詳察估計使公私俱

便釐剔諸弊。遂一定為條款。以便永久遵行。則國課不致妄費。戶部儲有餘財。凡遇有旱澇。可以酌量賑濟。蠲免無所顧慮。民間不致困苦。大有裨益。王熙等奏曰。此

皇上以節儉治天下。足國足民至意。凡有急需。自無匱乏之虞矣。○壬戌。吏部議覆江南道御史鄭為旭疏。言語命救命。皆係順治十年所撰舊文。今宜改撰。應如所請。從之。○陞內閣學士蔣弘道為禮部右侍郎。○禮部議覆

浙江道御史任珏疏言。

車駕東巡。特行尊師重道之禮。既蒙

御書匾額。賜懸廟廷。必求特賜碑文。勒之貞珉。應如所請。令翰林院撰擬碑文。交該撫刊刻。建立。得旨。孔子聖集大成。道隆德備。參兩天地。卓冠古今。歷代帝王咸取師法。朕研精經籍。志切欽崇。應勒廟碑。朕俱親行撰文書寫。以昭景行尊奉至意。○癸亥。諭大學士等曰。內閣翰林院。須用通曉漢文善翻譯者。其自

卿員以下。部院無品級筆帖式以上。及滿洲蒙古漢軍廢官與隨旗行走。暨閒散人。曉習漢文。能譯滿文者。統加考試。計其文理優長者。用之。其下所司。速察以聞。○以一等侍衛胡西塔為正白旗蒙古副都統。○九卿詹事科道等議。左副都御史張可前疏。請將皇上歷年政事纂集成書。昭示海宇。又疏請駕幸闕里。

御書萬世師表匾額。應勒石頒給直隸各省府州縣學懸掛。皆應如所請。從之。○九卿詹事科道等議。戶部題錢糧條款繁多。易於滋弊。應專委部院堂官同戶部將賦役全書。易知由單。酌量核定。編輯簡明。滿漢新書。其銀兩米錢絲忽抄撮等尾數。應否增入毫勺之內。著委出堂官等酌議編輯。進呈後頒行天下。得旨。編輯簡明賦役全書。著蘇赫胡昇猷龔佳育會同戶部監修。○乙丑。

上御太和門視朝。文武陞轉各官謝恩。次喀爾

喀進貢使臣等行禮○

上諭大學士等曰議政所關殊為機密重要。今見凡所議之事。方經議訖。即已宣露。又滿洲蒙古都統。本以人材勇健。授為都統。非以其練達事務而授之也。都統中。不克曉達事務者。甚多。諸若此者。宜罷其議政。至於兵事。乃都統之專責。仍照常預議。爾等以此意降旨於議政諸臣。又諭大學士等曰。戶部工部光祿寺。專司錢穀關係緊要。今聞招買書辦人等。與本衙門官。私自通賄作弊。甚有官員承認。事務代為包攬。此種情弊。永行革除。於事方有裨益。○左都督張琳等叩閣請議叙。部議不准。

上諭大學士等曰。朕觀張琳等皆人材壯健。効力行間。俱至左都督。有得拜他喇布勒哈番者。亦有得拖沙喇哈番者。其控籲若不允行。何以鼓舞後之効力者。可令該部議叙。○正黃旗漢軍公鄭克塽題請叙鄭聰等投誠功。

部議不准。

上諭大學士等曰。大兵進剿鄭聰等同鄭克塽。即獻臺灣投誠。久踞海島之寇。盡行消滅。伊等著准議叙。○奉天府府尹董秉忠疏言。錦州府州縣生聚日繁。人文漸盛。錦州府錦縣寧遠州三學。原各有廩生一名。今請各增四名。每學二年一貢。廣寧縣原有廩生一名。今請增一名。仍照舊例。五年一貢。下部議行。○丙寅。諭大學士等。朕巡省南服。見經過地方城垣圯壞者所在多有。夫城垣者。生民之保障。所以衛吾人者也。亟宜修築之。其令地方官何以葺治。爾等傳諭工部。確議以聞。○丁卯。陞鑲藍旗滿洲副都統馬爾翰為鑲藍旗護軍統領。長史查木揚為正藍旗蒙古副都統。○戊辰。

上考試滿洲官員翻譯。召大學士明珠提督麻勒吉學士常書至養心殿。命閱卷。

上顧麻勒吉問曰。爾曾閱性理大全否。其中意

義亦能通曉耶。麻勒吉奏曰：臣雖曾看閱。至皇極經世篇。茫然不得其解。

上曰：皇極經世。乃邵堯夫以數合理之書。所推先天卦畫。元會運世之數言之甚悉。非淺學所能窺測。其全書卷帙尚多。程朱恐其流於數學。摘取大要著之此篇。朕嘗細加研究。畧識其義。因出手批性理大全以示。

上又顧常書曰：爾曾讀何書。常書奏曰：文選離騷諸書亦曾看過。但其用字僻奧。比物連類多所未喻。

上曰：讀離騷當識其大意所在。屈原以忠君愛國之心。原本山川。極命草木。徵文見志。一篇之中。三致意焉。遂為千古風騷之祖。三百篇而後。以此為最。且讀離騷者。於作文深有裨益。非獨拾其字句而已。此學者所當知也。○陞詹事徐乾學為內閣學士兼禮部侍郎。○陞右庶子敦多禮為光祿寺卿。○己巳。戶部以纂修賦役全書擬滿郎中蒼柱等漢員外。

郎王之麟等六員引見。

上曰：賦役全書一定將來永為定例。爾等必須精心詳慎。務求要當。編纂成書。朕思田地一畝之外。亦有零星不足畝者。若將毫忽俱為一釐。雖目下易於辦理。誠恐有累小民。爾等尤宜詳加確議。尚書余國柱奏曰：臣等以為毫忽以下。民間無物可以稱量。賦役滿釐者。固一釐完納。即毫忽之微。亦必以一釐為斷。如此改定。想亦不至累民。

上曰：此事關係民間休戚。爾等不可不博訪詳議。○戶部議覆直隸巡撫崔澄疏言：順德廣平二府屬暨真定府屬之棗強縣。晉州。深州。被災窮民。宜加賑恤。見在勸諭捐輸。給散銀米賑濟。且嚴飭地方官。加意撫恤。勿使饑民失所。應如所題。得旨：順德等處饑民。當此青黃不接之時。恐致流離失所。該撫酌量動用正項錢糧。速行賑濟。務令各沾實惠。以副朕愛養至意。○庚午。

上詣

太皇太后

皇太后宮問安○予故廣西提督吉孫畧祭葬如例○壬申議政王大臣等議覆左都御史陳廷敬疏言官員士庶冠服衣裘飾用之制婚喪之禮祈教下廷臣博考舊章斟酌損益務合於中查順治九年已定婚喪之制康熙九年復定服飾之例見在遵行毋庸更議得旨如議凡服飾等項久經禁飭近見習俗奢靡服用僭濫者甚多皆因該管各官視為具文並未實行稽察以致不遵定例嗣後必須著實奉行時加申飭務期返樸還淳恪循法制以副朕敦本務實崇尚節儉至意○甲戌講官常書孫在豐等奏恭逢

皇上萬壽節請自十五日至二十一日暫停進講

上傳諭曰講書深有益於學問朕愛聽不倦前偶爾違和輟講數日心尚歉然朕意欲將詩

經速速講完不必停也○以候補庶子王維珍學問平常命對品調補京堂○乙亥陞翰林院侍講學士韓莢為內閣學士兼禮部侍郎○予故戶部侍郎焦毓瑞祭葬如例○予漢中陣亡守備李逢春祭葬如例○丁丑禮部議覆左副都御史胡昇猷疏請

皇上親定殿試題目並嚴飭閱卷諸臣以重大典應如所請

上傳大學士等曰殿試設有讀卷官俱係大臣豈不相信縱有他故亦自有定例若題目俱由朕親出不勝煩瑣即如會試題目乃偶一行之豈遂為例且朕所出之題乃試官不出人所不能預擬者若屢屢親出則人亦能預為揣摩矣著傳諭九卿詹事科道仍照舊例行○戊寅

萬壽節停止行禮筵宴○遣官祭

福陵

昭陵

孝陵。

仁孝皇后。

孝昭皇后陵○遣官祭真武東嶽城隍之神○

己卯。轉吏部右侍郎阿蘭泰為左侍郎。調戶

部左侍郎薩海為吏部右侍郎○庚辰。策試

天下貢士陸肯堂等一百二十一人於

太和門前。制曰。朕惟帝王撫馭寰區。覃敷治

化。必務本敦行。厚生正德。俾俗尚鴻龐。兆人

樂利。斯庶幾時雍風動之上理也。朕仰荷

天庥。續承

祖宗大業。孜孜宵旦。期登郅隆。念小民之依惟

農桑是重。而猶慮野餘曠土。室鮮蓋藏。耒底

家給人足之盛。將無游惰逐末者尚衆。而耒

耜耨者或寡歟。蠲租之詔屢下。墾荒之令時

舉。率作興事者素矣。其果爭趨本業否歟。行

莫大於孝。守莫重於廉。漢有孝廉之科。其法

猶為近古。自積習浮靡。人鮮門內之行。士昧

一介之操。今欲使束修砥節。何道而可。教化

之不興。以凡為士者從事虛名而未敦實學

也。矯偽相煽。中於人心。咸令惕然知返。著誠

去偽。抑何術之從也。夫野有醇風。斯朝多端

士。匿情飾貌。滋長澆凌。孝弟力田。幸臻美俗

其說可悉指歟。爾多士。盱衡古今。於民生士

習得失之數。籌之熟矣。其各抒所學。以裨教

養之隆。朕將親覽焉○辛巳。

上諭大學士等。朕南巡時。見閭閻疾苦深為軫

念。所經過地方如此。其他省可知。今國帑充

足。朕欲蠲免直隸各省明歲錢糧。以紓民困

爾等會同戶部預行酌議。俾天下均沾實惠

其直隸順德等府。正在饑荒。且此地供應甚

多。徭役殷繁。今宜即行議蠲。畿輔撫循得所

尤為有益。爾等會同戶部議奏○壬午。廣西

巡撫范承勳。陛辭

上諭曰。爾父兄俱曾宣力於國。爾今為巡撫。錢

穀刑名。雖係職任。其最要者在潔己愛民。若

聽信幕客。沽名妄作。強不知以為知。欺人欺

已大為不可。爾宜戒之。每見漢軍外任攜帶家口。動至數百人。爾今往廣西。料不能多帶。范承勲奏曰。臣量攜數十人以往。○福建興化總兵官吳英陛辭。

上問曰。爾有所陳否。吳英奏曰。臺灣設兵八千。請半為鎮守。半為屯種。

上曰。邊地屯田。古有成法。爾具疏來。朕自酌行。

○  
上御懋勤殿。殿試讀卷官大學士明珠等將策試天下貢士卷。選擇十卷進呈。

上覽畢。御筆批定一甲三名。餘俱列二甲。○癸未。

上御太和門。傳臚。賜殿試貢士陸肯堂等一百二十一人。進士及第出身有差。○甲申。陞翰林院侍講學士郭榮為詹事府詹事。○旌表江西節婦信豐縣王氏。進賢縣龔氏。各給銀建坊如例。○乙酉。

上御太和門親朝。文武陞轉各官謝恩。次喀爾

喀使臣等行禮。○先是朝鮮國民人聶那密以瘋病毀壞邊牆。私行入境。邊吏執送以聞。上命付貢使攜之歸國。仍諭國王善為收養。是人因病越界。毋得殺害。至是朝鮮國王李煥上表謝恩。報聞。○宴衍聖公孔毓圻等於禮部。○丙戌。旌表河南烈婦金才妻齊氏。強姦不從。捐軀全節。給銀建坊如例。○丁亥。福建提督侯施琅疏請卹賞進剿澎湖傷亡兵丁。部覆毋庸議。

上諭大學士等曰。凡軍功議叙卹賞。俱關緊要。如遲延日期往返咨查。恐奸宄之徒舞文作巧。易生弊端。朕思此等貧兵。早給一日卹賞。使得早受一日實惠。此後著一槩速行議叙。○調鑲藍旗蒙古副都統賽畢漢為滿洲副都統。○戊子。三等阿思哈尼哈番莽極圖故無子。以其叔卓諾和襲職。○己丑。宗人府以四月行圍。凡遣往王貝勒貝子公等請

上點定。



上諭安親王岳樂等曰朕觀此中絕少成材者雖點行圍豈能効力且觀其上朝時奔陋不嫺禮節惟外飾虛貌實無所有其所以致高位者不過承祖父之蔭耳曾有著績行陣者耶我先世曾見此輩否應嚴飭令其悔改務矢志奮勉○

上諭大學士等曰凡為大學士者以進賢退不肖為職不可稍存私意必休休有容知無不言言無不盡方可稱為大臣其他朕亦不須盡言王熙奏曰臣等敢不謹遵

聖諭

夏四月庚寅朔享

太廟

上親詣行禮○辛卯

上諭大學士等曰從來道德文章原非二事能文之士必須先明理而學道之人亦貴能文章朕觀周程張朱諸子之書雖主於明道不尚辭華而其著作體裁簡要晰理精深何嘗

不文質燦然令人神解意釋至近世則空疎不學之人偕理學以自文其陋如崔蔚林本無知識文義荒謬岸然自負為儒者真可鄙也○授宋儒周惇頤後裔五經博士世職○吏部議覆左僉都御史姚締虞疏言內閣中書缺出應令投供驗到方許補用嗣後考定中書令其驗到一次仍聽其回籍候補補授之後遲至一月以上不到任者照赴任遲延例議處從之○九卿等議覆差往閱河郎中杭霽疏言毛城舖等處建造閘壩有益黃河隄岸運道民生等語應令總河靳輔乘時建造從之○壬辰轉戶部右侍郎鄂爾多為左侍郎調刑部左侍郎蘇赫為戶部左侍郎管右侍郎事○以修撰彭定求蔡升元編修徐倬熊賜瓚俱充日講起居注官○癸巳議政王大臣等會議今海內一統寰宇寧謐滿漢人民俱同一體應令出洋貿易以彰庶富之治得旨開海貿易原欲令滿漢人民各遂生

息。倘有無藉棍徒。倚勢橫行。借端生事。貽害地方。反為不便。應嚴加禁飭。如有違法者。該督撫即指名題參。○甲午。以故三等阿思哈尼哈番胡納晉弟佛倫襲職。○乙未。

上諭議政王大臣等。黑龍江兵。於是月起行。五月中旬。可至雅克薩城。凡奏報軍機。自雅克薩至額蘇里。經黑龍江前來。恐紆道遲延。令理藩院侍郎明愛。於杜爾伯特。扎賴特。派兵五百人。並索倫兵。酌自墨爾根至雅克薩。設驛奏報軍機。庶免貽悞。明愛往來覺察。驛夫糧食。置之。以索倫所貯米支給。黑龍江以內。每驛原設二十人。應核減一半。并入蒙古。若蒙古兵五百人過多。再為核減。索倫効力勤勞。傳諭異日加恩。以示鼓勵。○先是。寧夏靈州民吳仲良等。隱匿地萬一千餘畝。甘肅巡撫葉穆濟咨報戶部。部議按畝徵糧。仍追地價入官。至是。葉穆濟以吳仲良等貧苦地價久未輸納。題參經徵同知邵逢春等。部議各

官如例處分。仍徵糧追價。得旨。寧夏邊方地瘠民貧。吳仲良等隱匿地畝價值。及賠補錢糧。悉行免徵。所參各官。亦從寬免議。○丙申。叙恢復江山。常山功。授浙江總督李之芳。拖沙喇哈番職。○諭大學士等。索倫打虎兒總轄之任。甚為要重。必得賢能之人。始能管理。今著理藩院撥什庫善馳馬者一人。由驛遞速遣至馬喇處。馬喇身在彼土。有賢能之人。堪任索倫打虎兒總轄者。馬喇以其名明白具疏。即付遣往。撥什庫齎奏。所遣撥什庫限往返在二十日之內。可傳諭理藩院。○丁酉。翰林院議覆左副都御史胡昇猷疏。請刊刻經筵講義。頒示中外。應如所請。乞敕下講幄諸臣。纂輯滿漢講義。進呈恭請

御製序文。以弁其端。從之。○戊戌。

上詣

太皇太后

皇太子宫問安。○大學士會同戶部。遵旨議覆

直隸順永保河等處圈占地方應徵康熙二十一年地丁錢糧已經奉詔蠲免所有直隸八府康熙二十三年未完地丁錢糧應盡豁免其順永保河未經圈占地方及真順廣太等處康熙二十四年地丁各項正賦俱免三分之一。

上問曰康熙二十三年直隸八府未完地丁錢糧其數幾何戶部尚書科爾坤奏曰約有六十餘萬。

上又問曰康熙二十四年所免三分之一其數幾何科爾坤奏曰約有五十餘萬。

上曰朕御極以來早作夜思惟以愛養民生為急邇來四方大定猶恐民氣未復時屢朕懷今軍國之需撙節制度自可足用必使百姓樂業家給人足無一夫不獲其所始慰宵旰。況畿輔重地頻年旱災尤可憫恤這所奏著候諭旨行。○轉刑部右侍郎席柱為左侍郎。陞通政使傅臘塔為刑部右侍郎。吏部等

衙門題禮部尚書杭艾原係宗室額奇屬下之人乃巧稱不係屬下控告又伊前任戶部尚書撥給地畝時檢取附近關廂園池善地殊屬不合應將尚書佐領拜他喇布勒哈番又一拖沙喇哈番俱革去從之。○戶部議覆順天府府尹張吉午疏請自康熙二十四年始凡民間開墾田畝永免圈取應不准行。

上諭大學士等曰凡民間開墾田畝若圈與旗下恐致病民嗣後永不許圈如旗下有當撥給者其以戶部見存旗下餘田給之。○副都統馬喇等疏言臣等今年正月二十八日遣打虎兒副頭目倍勒爾等率三十餘人往雅克薩城北務擒其生口並詳勘情形以報三月初五日倍勒爾等生擒羅刹七人回云雅克薩城垣廬舍如故又據生擒羅刹噶瓦力喇等云去歲雅克薩城內設立重木中實以土聞大兵至額蘇里即遣人各處求援援兵千人今年二月上旬隊已至後隊未來去歲新

到頭目額里克舍傳諭人衆。大兵來此。皆爾等殺掠所致。自後再聞有侵擾索倫打虎兒者。定行誅戮。是以我等往來。不敢持軍器。前者釋回二人。已送往國主處。迄今未得主命。雅克薩兵衆不滿千人。後增發者。未知其數等語。生擒羅刹逸去一人。見在六人。遞送至京。

上諭倍勒爾等直抵雅克薩。探其情形。生擒羅刹。可嘉。所司如例獎賞。其送至六人。各給時服一襲。送將軍薩布素處。俟大兵進剿時。示以寬大之意。悉行釋放。○諭兵部。人材不一。有騎射精熟者。亦有長於別技者。若概考以弓馬。恐淹没人材。況從來為將之道。全恃謀畧。不僅在武藝。嗣後凡投誠官員。俱視軍功為殿。最其無軍功者。試以弓馬。若既無軍功。又不嫻弓馬。以文官不及例引見處分。彼亦心服無怨矣。○授厄魯特伊拉古克三胡土克圖為歸化城掌印扎薩克。大喇嘛。○刑部

題易州知州韓文煜等誣良為盜。應革職。遣戍。知府以上。降革有差。得旨。此案可如所議。不肖官員止為一己考成。誣良為盜者甚多。百姓受冤莫訴。深可憫恤。自後應作何立法。勸懲。俾善良得安。民無冤抑。庶不負朕祥刑之意。其令九卿詹事科道集議。以聞。尋議凡有盜案。其關係人命之事。該督撫親加詳審。務得實情。使無辜良民不致冤抑。如有地方不肖官員。仍有誣良為盜。并關係人命之事。該督撫親行審出。據實題參。將誣良官員照律例從重治罪。督撫免其議處。若督撫不自審出。或部院衙門察出。或被害之人告發。將督撫一并嚴行議處。從之。○己亥。

上幸玉泉山駐蹕。○免江南徐州。康熙二十三年。分水災額賦。○免江西宜春。鄱陽。樂平。三縣。并袁州衛。康熙二十二年。分水災額賦。有差。○調福建興化總兵官吳英為浙江舟山總兵官。陞陝西提標中軍副將王萬祥為福

建興化總兵官（阿霸哈納固山貝子滾楚克扎卜故遣官致祭）（辛丑諭戶部朕撫馭方夏愛養黎元早作夜思勤求治理閭閻疾苦無時不深軫念欲使民生樂業比屋豐盈惟當己責蠲租萬姓得沾實惠直隸地方頻遇旱災小民匱乏宜加恩恤順永保河等處圈占地方應徵康熙二十一年地丁錢糧已經詔行蠲免所有直隸八府康熙二十三年未完地丁錢糧盡與豁除其順永保河未經圈占地方及真順廣大等處康熙二十四年應徵地丁各項正賦俱著免三分之一爾部速行該地方官遵行曉諭務使人人得被膏澤以副朕勤恤民隱至意如有不肖有司借端朦混私行重徵者或經叅奏或被告發定行從重治罪爾部即遵諭行特諭（諭太醫院官朕研究經史之餘披閱諸子百家至黃帝素問內經諸篇觀其義蘊實有惻隱之心民生疾苦無不洞矚其後歷代醫家雖多著

述各執意見若難經及痘疹諸書未能精思極論文義亦未貫通朕甚惜之當茲海宇昇平正宜懷保吾民躋春臺而登壽域爾等可取醫林載籍酌古準今博採羣言折衷定論勒成一書以垂永久副朕軫恤元元至意（調兵部尚書哈占為禮部尚書）（壬寅授一甲進士陸肯堂為翰林院修撰陳元龍黃夢麟為翰林院編修）（甲辰

上回宮詣

太皇太后宮問安（

上幸瀛臺（陞太常寺卿葛思泰為通政使司

通政使（命奮威將軍王進寶率標下官兵

由平涼移駐固原（丙午

孝端文皇后忌辰遣官祭

昭陵（兵部議覆四川陝西總督禧佛疏言洮

州接界諸番因逆賊變亂之際將守備駐洮

副將駐岷原為易於調遣今內地承平已久

邊疆為要宜照舊制令副將仍駐劉洮州守

備駐劄岷州應如所請從之○丁未翰林院奏

皇上聰明天縱好學敏求洵從古所未有臣等會同詹事等官正在晝夜撰擬日講講章伏乞

皇上少緩進講俾得陸續撰擬進呈得旨仍著按日進講其講章爾等撰擬後節次進呈○戊申

上詣

太皇太后

皇太后宮問安○議政王大臣等會議定例內旗人身故無子孫者其家產惟族人同旗者始准承受若別旗有一族之人不准承受情有可憫嗣後同祖子孫無論在別旗別屬視其近者令承受家產著為例從之○禮部議覆福建總督王國安疏言外國進貢船隻請抽稅令其貿易應如所請

上諭大學士等曰外國進貢船隻若行抽稅殊

失大體且非朕柔遠之意王熙等奏曰大哉王言非臣等所能見及也○兵部議叙秦州平涼諸處軍功

上諭大學士等曰朕觀所叙穆占希佛等擊秦州內外賊衆議為頭等第一功太過可改為頭等軍功翁愛等擊敗秦州後營賊衆議為頭等軍功可改為二等及議叙招降偽道員及沙窩擊敗賊衆等案俱應減等改定其平涼之賊為我兵擊敗王輔臣勢窮來歸遂得恢復平涼今所叙尚輕頭等軍功可改為頭等第一二等軍功可改為頭等擊敗護山墩賊衆頭等軍功亦改為頭等第一至鹽關諸處賊衆敗北並不窮追吳之茂等未曾擒獲佛羅諾等乃稱矢盡兵勞妄供覲倖情殊可惡佛羅諾等皆不許請功其官兵所叙二等軍功減為三等○兵部議覆戶科給事中王又旦疏言各省武闈一場二場校騎射試技勇乃監臨之責至三場閱卷各省參差似當

酌為一定經制查武闈鄉試例在京欽點主考官出題在外巡撫出題而監射衛文官員聽巡撫酌量選用遂至各省參差不一嗣後應令巡撫總任其事至同考官於有中進士出身者選用四員如無進士出身之有司乃以舉人貢生各官內選用從之○予福建海澄陣亡拜他喇布勒哈番陳振元祭葬如例○己酉福建興化總兵官王萬祥陛辭

上諭曰今天下太平爾到地方毋騷擾百姓務使軍民相安此爾統轄封疆之責也○庚戌諭內務府今見內府佐領人員善射及讀書善文者甚少可專設學舍選可教之人令其學書習射優者錄用劣者罷黜學舍應立於朕常見之處俾習學之人黽勉肄業○辛亥陞鴻臚寺卿穆稱額為太常寺卿○吏部議覆都察院左副都御史胡昇猷疏言京師首善之地藩臬責任歸之守巡兩道非尋常監司可比兩道員缺請以道府中廉明素著者

通行開列應如所請嗣後守道缺出開列監運使按察使司副使僉事等官巡道缺出開列布政使司叅議知府等官具題請旨從之○甲寅

上御太和門視朝文武陞轉各官謝恩次喀爾喀使臣等行禮○予故內大臣二等阿思哈尼哈番鄂摩克圖祭葬如例○乙卯免山東濟寧海豐霑化三州縣本年分水災額賦有差○丙辰命廣東花山地方設立縣治從戶科給事中王又旦請也○丁巳頒發

御製檜樹賦勒碑闕里孔廟



大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十一

監修總裁官光祿大夫太僕兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十四年乙丑五月庚申朔

實錄卷一百二十一

上御保和殿選進士張希良甯世簪許承家沈  
辰垣仇兆鰲宋大業李殿邦徐元正汪灝謝  
陳常采衡高曜馮瑞汪徽許賀來鄭崑瑛陳  
遷鶴李懋吳之瑜魏男俞長城安歲樊澤達  
王之樞吳垣魯瑗宋如辰李朝鼎鄧咸齊劉  
坤梅之珩張明先劉澐劉偉孫勳等為庶吉  
士諭之曰士子讀書稽古原期窮理致用平  
居砥礪廉隅敦修品行皆為異日服官莅政  
之本迨一登仕路志在功名未免專意求進

干營奔競喪其懷來往往有之爾多士從田間來甫通仕籍務宜率其素履不改初心凡授內外職任其各加黽勉清操自矢恬靜寡營循分盡職潔已愛民以副朕造就人才至意○戶部議覆郎中塞楞額疏言福建設爐二十座鑄錢將明代舊錢悉行銷燬應如所請。

上諭大學士等曰舊錢流布不止福建一省他省亦皆有之止可聽其從容銷去若驟為禁

止恐不肖之徒借端生事貽害平民亦未可定所奏不准行○壬戌

仁孝皇后忌辰遣官祭

陵○丙寅皇子允禔生○庚午

上詣

太皇太后宮問安○壬申遣官祭

關聖帝君○免山東臨清等四州縣本年分旱災額賦有差○癸酉旌表福建烈婦游氏捐軀殉節給銀建坊如例○己卯夏至祭

地於

方澤。

上親詣行禮○遣官動支宣府倉糧賑濟阿霸垓多羅郡王沙克沙僧尼屬下窮丁○庚辰

上詣

太皇太后宮問安○四川北總兵官趙弘燦疏言保寧地氣濕熱臣生長西土水土最不相宜以致抱病乞調臣邊方寒苦之地得以盡力報効部議不准行得旨趙良棟父子効

力行間勤勞素著著准趙弘燦所請以原銜調補直隸總兵官王秉耀以原銜調補四川總兵官○漕運總督徐旭齡疏言臣衙門向無滿洲披甲自康熙八年間漕臣帥顏保請撥給四十名見在漕標綠旗兵三千餘名儘足充用應將滿洲披甲撤回從之○辛巳吏部題漢軍官員既與漢官一體陞轉內外員缺必須通曉文義應行考試見任漢軍侍郎學士以下有無品級筆帖式以上及候選候

補內外員缺官員俱槩行考試其文義通者仍留任補用不曉文義者停其以文職用如無品級者即行罷斥得旨漢軍內見任及候補旗缺官員著考試翻譯有願作漢文者准其作漢文見任及候補漢缺官員著考試漢文有願翻譯者准其翻譯餘如議○壬午免湖廣沔陽州本年分水災額賦有差○癸未諭大學士勒德洪明珠巴圖爾額爾克濟農達離彼土嚮化而來宜加愛養經理其居處迺彼等原為鄂齊爾圖汗所屬累世進貢誠懇恪恭鄂齊爾圖汗之孫羅卜臧滾布與巴圖爾額爾克濟農當使聚合一處於所宜居之地為之經理令其居處賜之封號給以金印冊用昭示朕繼絕舉廢之至意焉可遣賢能台吉與理藩院堂官侍衛曉諭巴圖爾額爾克濟農云以爾等搶奪毛明安及三吳喇忒之故本宜遣兵征剿悉行翦滅但念鄂齊爾圖汗累世進貢誠懇恪恭特加矜恤爾等

罪戾盡皆寬宥羅卜臧滾布乃鄂齊爾圖汗之孫爾等皆屬一國為親近兄弟今令爾等皆與羅卜臧滾布等聚合封以名號與羅卜臧滾布等可以同居之善地相度定居遣使於達賴喇嘛以如此措置頒朕諭旨其宜居之地亦與羅卜臧滾布巴圖爾額爾克濟農等公同相視令所遣台吉等還奏此事於今年八月即宜舉行爾等與議政王大臣蒙古大臣會同詳議以聞○皇子允祚薨○九卿議覆左僉都御史姚締虞疏言凡大朝之期皇上視朝最早回宮進講後仍御門聽政恐聖躬太勞今四海昇平政事簡少請以後大朝之期及大雨大雪俱停止啟奏或遇大寒大暑之日亦當酌定間幾日一御門聽政應如所請上諭大學士等曰朕御極以來孜孜圖治固有暇逸惟期裨益國家又安能廢用臻上理非不自知其勞但念庶政叢集一日萬幾若從

所請未免始勤終怠。且恐不及詳察。致有疎畧舛錯。於政事得失。所關非細。自後大朝之期。一切章奏。交送內閣。遇大雨雪。臨時請旨。其祁寒盛暑之時。各部院果無應奏事宜。方許暫止。啟奏。朕始終不欲一念倦怠。晏安自便也。○四川陝西總督禧佛。疏請免追進川兵丁。長支錢糧。九卿等兩議。請命巡撫提督等詳察。請遣大臣嚴察。得旨。向年軍興之時。兵丁甚屬勞苦。若嚴行扣追。朕心深為不忍。此項錢糧。應與豁免。以示朕優恤士卒至意。○以大學士勒德洪。明珠。王熙。吳正治。宋德宜。戶部尚書余國柱。左都御史陳廷敬。為政治典訓總裁官。戶部侍郎王鴻緒。董訥。內閣學士李天馥。胡簡敬。丹岱。禪布。為副總裁官。○甲申。

上詣

太皇太后

皇太后宮問安。○諭戶部。原任廣西巡撫郝浴。

前差兩淮巡鹽。潔已奉公。恤商裕課。後經簡任廣西巡撫。清廉愛民。克稱厥職。其所動錢糧。非係入己。從寬悉免追取。以昭朕優恤廉吏至意。爾部即遵諭行。○乙酉。命翰林院掌院學士常書。內閣學士徐乾學。教習庶吉士。○以故二等阿思哈尼哈番額色子額爾敏襲職。○丙戌。工部議覆。湖廣巡撫石琳。浙江巡撫趙士麟。疏言楠木。杉木。不能如期運至。特請寬限。應不准行。

上諭大學士等曰。朕聞明時採運楠木。從山至河。民力告竭。地方苦累。今運各省所備楠木。杉木。若程限太迫。恐山路崎嶇。轉運艱難。地方雖有良吏。不能不苦累百姓。其令部臣詳議。緩運。勿致累民。○丁亥。宗人府等衙門議和碩安親王岳樂。違例將外藩喇嘛。留住伊廟。奉旨查通。醫喇嘛。隱瞞不行舉出。又偽稱喇嘛。瘋魔耳聾。擬革親王爵。得旨從寬免革王爵。將掌宗人府事。及議政。革去。罰俸三年。

○免湖廣黃岡等十一州縣康熙二十三年分旱災額賦有差○戊子考試漢軍官員於太和門前○諭大學士等九卿咸有條奏之責科道亦為耳目之官凡有見聞及應行事宜當不時入告以明盡忠補過之義今天下雖已昇平而兵刑禮樂之太國計民生之繁豈皆事事允釐無一可言者耶爾等其以此旨遍諭廷臣焉○諭大學士等今歲雨暘時若二麥已登他穀亦皆沃茂秋成可望黎民不致阻饑但豪強富室由土既多收穫亦豐往往用之釀酒又輕值糴藏以待重價貧民田少收穫有限更不節用效尤釀酒亦甚糜費雖遇豐年僅免饑饉倘遭荒歲何以自贍朕巡省閭閻歷歷親覩每一念及惻然於懷應作何禁止使家給人足爾等可籌良策以待秋期舉行○朝鮮國王李焞遣使謝東巡頒詔恩下部知之○己丑調吏部尚書伊桑阿為兵部尚書

六月庚寅朔

上巡幸塞外命皇太子允初皇長子允禔隨駕是日啟行駐蹕三家店○辛卯

上駐蹕河漕○廣西道御史錢珏疏言陋弊相沿厲民為甚者莫如山西火耗臣訪聞太原府諸州縣每經徵錢糧有司既收入己之耗而司道府廳又復多方需索有司不得不加派於民以致各州縣收銀每兩有加至三錢四錢不等者近聞晉撫穆爾賽曾經刊示傳諭禁止是知火耗之重而申飭也然露章糾劾者寂然無聞又何怪州縣之視為具文而貪饕成習耶臣欲指名入告則在在皆然不勝枚舉但採訪至確不敢不仰籲

宸聰急請禁止以甦一方之困得旨九卿詹事科道會同嚴加確議具奏○壬辰

上駐蹕釣魚臺○癸巳

上出古北口駐蹕是日

上駕行途次理藩院尚書阿刺尼奏曰侍郎明

愛遣撥什庫席納爾圖疾馳報稱。都統公彭春等帥師進發。五月二十二日抵雅克薩城下。遵諭旨將

皇上不忍加誅。洪恩悉著於書。致羅刹。羅刹恃巢穴堅固。不肯遷歸。於是二十三日分水陸兵為兩路列營。二十四日夜將神威將軍等火器移置於前。二十五日黎明並進急攻。城中大驚。羅刹城守頭目額里克舍等勢迫。詣軍前稽顙乞降。都統公彭春、黑龍江將軍薩布素等復宣

上恩德。羅刹頭目額里克舍所部官兵皆垂涕望闕稽首。於是遵

皇上諭旨。將羅刹所部官兵及婦女童稚立視還歸。收回逃人。恢復雅克薩城。

上顧阿喇尼曰。征剿羅刹衆皆以路遠為難。朕獨斷興師致討。今荷

天眷遂爾克之。朕心嘉悅。爾以捷音傳知諸王大臣。既至行宮。恭親王常寧等及文武官員

請慶賀。

上遣阿喇尼偕兵部侍郎佛倫傳諭曰。治國之道期於久安長治。不可圖便一時。當承平無事。朕每殫心籌度。即今征羅刹之役。似非甚要。而所關最鉅。羅刹擾我黑龍江。松花江一帶三十餘年。其所竊據。距我朝發祥之地甚近。不速加剪除。恐邊徼之民不獲寧息。朕親政之後。即留意於此。細訪其土地形勝。道路遠近。及人物性情。以故酌定天時地利。運餉進兵。機宜不徇衆見。決意命將出師。深入撻伐。然兵貴相機。而動變化無窮。惟恐諸將不遵朕指授。致失機宜。今收復雅克薩地。得遂初心。至於撫綏外國。在使之心服。不在震之以威。近遣親隨侍衛關保等往軍前。諄諭之曰。兵凶器。戰危事。古人不得已用之。朕以仁治天下。素不嗜殺。爾其嚴諭將士。毋違朕旨。以我兵馬精壯。器械堅利。羅刹勢不能敵。必獻地歸誠。爾時勿殺一人。俾還故土。宣朕柔

遠至意。茲一一奉行。朕甚嘉焉。諸王大臣等奏。征剿羅刹衆皆難之。我

皇上為根本計。獨斷興師。今羅刹歸誠。雅克薩城收復。悉如睿算。不爽毫髮。誠非臣等淺近之人。所能仰窺萬一也。且前獲羅刹。不加誅戮。迨大兵壓境。又遣關保等嚴諭將士。誠以勿殺。

皇上好生之德。覆被天下。匪獨羅刹戴恩。海外諸邦。莫不傾向聖化。臣等合行慶賀。阿刺尼等進奏畢。復出傳諭曰。朕思凡事必周詳審度。方獲實效。不可輕率從事。向者尚書明安達禮輕進。至糧餉不繼。將軍沙爾呼達。巴海等失計。半途而歸。遂致羅刹驕恣。而索倫奇勒爾。鄂羅春等。心懷疑貳。朕詢其失機情由。一一詳計。今始奏功。兵法云。多算勝。少算不勝。詎可忽視。且兵貴神速。前逆賊吳三桂等叛。朕思岳州係湖廣門戶。遣人指示速戰。始克岳州。遂一面進取四川。以分賊勢。一面密

諭大將軍賴塔從廣西趨雲南。於是諸省底定。兵革休息。然亦在將軍等奮勉効力耳。倘怠忽不奉行。雖有良策。亦何益焉。所以平定雲南。賴塔之功最大。縱有他過。為人控告。朕究不加罪。諸王大臣等奏。三逆叛時。在外將士。皆與賊相持。進取無期。賴

皇上神謀內運。決勝萬里。恩威並用。剿撫兼施。所以負固巨孽。刻日誅鋤。又俯念賴塔有功。曲賜保全。凡効力行間者。皆歡欣鼓舞。而臣等亦莫不感戴殊恩矣。

上復諭曰。前關保奏云。我兵擬於四月二十八日。水陸進發。先期雷雨大作。至二十六日。江水泛溢。又風逆。舟不得前。及二十七日。天晴水落。二十八日平旦。忽轉順風。我兵揚帆溯流直上。三日之程。一朝而至。陸路之兵。雖疾行不及也。又駐劄黑龍江兵丁。適當肉食匱乏。忽有鹿數萬。自山趨下。騎者馳射。步者挺擊。及駕船筏於江中。截獲者計五千有餘。朕



觀此二事。豫知可以奏功。因事未就。秘而不發。今既蕩平。故傳諭爾等知之。諸王大臣等奏。

皇上仁政。上合天心。故顯垂鑒佑。國祚綿永。萬年無疆之休。於此可卜。

上允行禮。於是王等及文武官員。行三跪九叩頭禮。尋彭春等捷奏至。得旨覽奏。官兵星馳直逼雅克薩城下。示以威德。招撫羅刹。免死放歸。克復其城。深為可嘉。在事人員從優議叙。投誠羅刹巴西里等。安插盛京。其被擄之索倫。打虎兒人衆。仍各發回原地。有喀爾喀厄魯特人口。俱察送到部。給發本主。○甲午。上駐蹕恩格木噶山。○免直隸邢臺等二十州縣。康熙二十三年分旱災額賦有差。○丁酉。上覽太醫院奏。知

皇四子偶爾患痢。體中違和。即命回鑾。○戊戌。

上回宮。詣

太皇太后

皇太后宮問安。○

上親視

皇四子疾。命醫療治。遂愈。○以內閣侍讀學士賽弼漢色勒布。吳拉岱。江有良。侍讀達哈塔。安褚庫希福納。翰林院侍讀學士多奇。阿山。侍講學士鄔赫。侍讀喬萊。侍講胡士著。修撰蔡升元。編修張烈。米漢雲。王九齡。孫岳頌。檢討徐嘉炎。充政治典訓纂修官。○陞浙江督糧道蔣寅。為雲南按察使。司按察使。○庚子。復直隸各省儒學廩生餼糧。三分之一。○壬寅。

上詣

太皇太后宮問安。○癸卯。諭大學士勒德洪。學士麻爾圖。圖納。鄂羅斯。入我邊塞。擾害鄂羅春。索倫。赫哲。飛牙喀等處人民。搶掠其家口。雖屢肆兇暴。朕不忍遽興兵革。故未即遣發大兵征討。數遣使曉諭。鄂羅斯恃其遼遠。仍復抗拒。益侵犯我邊鄙之人。肆虐不止。用是

遣大兵直抵雅克薩城。彼因困迫已甚。而後歸降。爰遵朕命。宥其困而後降之罪。釋之使還。大兵迅速征行。破四十年盤踞之鄂羅斯於數日之間。獲雅克薩之城。克奏厥績。薩布素向來逗遛不進兵之罪。應從寬免。又雅齊納鄂山。本獲罪發遣之人。其所互告之事。仍行察議。今進剿官兵殊屬勞苦。令伊等暫回吉林烏喇地方。於盛京打虎兒之兵酌量派往防守。至雅克薩城雖已克取。防禦決不可疎。應於何地永駐官兵彈壓。此時即當定議。著大學士勒德浩學士麻爾圖圖納同即談。關係與議政王大臣等會議具奏。○吏部題漢軍官員筆帖式及候補官員監生內。曳白卷八百人。俱應革職。得旨。此輩毫無學問。何可居官。俱著解任。令其讀書。俟學習之後。考試補用。內有弓馬嫻熟。願於武職効用者。應於各旗酌量補用。○兵部等衙門題。原任福建副都統胡啟元等。將耿精忠名下應撤

回兵丁張君錫等五十四人。受賄留住福建。應將胡啟元原叅領杜榮及遺賄兵丁張君錫等四人。皆擬絞。監候秋後處決。從之。○甲辰。

上詣

太皇太后

皇太后宮問安。○乙巳。

上巡幸口外。是日啟行。駐蹕前後屯。○丙午。

上駐蹕老鴉店。○丁未。

上駐蹕偏嶺。○己酉。

上諭扈從諸臣曰。朕喜觀書史。遍閱聖賢經傳。而通鑑一書。關於治道。尤為切要。雖不時繙閱。恐有闕畧。故將資治通鑑綱目大全諸書。皆以硃筆手自點定。以通鑑綱目卷帙繁多。未攜至此。攜綱目彙纂用備披覽。朕雖時時檢閱。然不能盡記。爾等職司文翰。其各以所攜書籍進覽。於是內閣翰林院詹事府諸臣。以通鑑文選諸書呈進。

上覽竟。復諭曰。凡文武官員。皆須讀書。於古今得失。加意研究。爾等各攜諸書。以備問答。甚善。朕所點定之書。爾等亦試觀之。內閣學士圖納。翰林院學士常書等。恭閱奏曰。

皇上萬幾之暇。經傳悉加博覽。又於通鑑諸書。御筆點定。自古帝王好學者。遠不能及。而諭旨猶謂不能盡記。仰見

皇上聖不自聖至意。○裁浙江杭嘉湖道。寧紹道。二缺。溫台運副一缺。改巡台道。為分巡寧台道。寧紹運副。為寧紹溫台分司。○旌表福建節婦侯官縣林氏。福寧州張氏。楊氏。陳氏。林氏。張氏。烈婦。閩縣林氏。王氏。長樂縣鄭氏。各給銀建坊如例。○喀爾喀墨爾根台吉。遣使進九白年貢。宴賚如例。○癸丑。旌表河南節婦。臨漳縣趙氏。祥符縣薛氏。烈婦。陳留縣王氏。太康縣李氏。烈女。汝陽縣黃氏。各給銀建坊如例。○甲寅。

上駐蹕恩格木噶山。○禮部題。朝鮮國王李焞

奏言。國內牛多疫死。民失耕種。請暫停互市。李焞託言妄奏。不合。應令回奏。到日再議。上問扈從兵部侍郎佛倫等曰。爾等云何。佛倫等奏曰。康熙十一年。朝鮮貢物與例不合。曾令其國王回奏。奉旨寬免。臣等思前此進貢違例事大。今請停互市事小。應如部議。俟回奏到日。

皇上再行寬免。

上曰。撫馭外國之道。不可太嚴。亦不可太寬。朝鮮之人。賦性狡詐。若遂如所請。此後未必不玩忽。其命禮部另議。尋部議。李焞應罰銀一萬兩。得旨。此事本當如議。但係外藩小國。姑宥此一次。仍令照常貿易。○乙卯。

上駐蹕上都畢喇地方。○旌表浙江烈婦陸升之妻張氏。拒姦不從。慘死全節。給銀建坊如例。○丁巳。兵部題。江南浙江兵丁。於台州等處陣亡被傷者。應給賞。得旨。賞賜本以酬功。倘實惠不及。何以鼓舞將來。可特遣兵部賢

能司官一人。明白詳察。務沾實惠。以副朕酬功至意。○諭侍郎佛倫。學士圖納。席爾達。牛鈕。錢糧所關甚重。宜詳加釐剔。以除虛冒濫支之弊。近見上駟院以假印誑領。太常寺亦以假印取絲。見今發覺者雖止此。其未發覺者。謂之無有可乎。此皆支給時不行詳察。怠玩疎虞之所致也。嗣後凡關係支用錢糧事務。必告之該部院堂官。稽核得實。用印文支取。其四五十兩以下者。遣筆帖式往領。若踰此數。則遣司官往領。其給與時。亦詳加稽核。告之該部院堂官。然後與之可也。如此。於職事亦無所曠廢。告於該堂官。及司員親往領取。亦豈難行之事。爾等可傳諭戶部。○科爾沁多羅郡王雅噶爾故。遣官致祭。秋。七月。己未朔。享太廟。遣戶部尚書科爾坤行禮。○上駐蹕宜孫畢喇地方。○庚申。上駐蹕博洛和屯。○辛酉。

上駐蹕烏爾格蘇台地方。○旌表四川節婦營山縣侯甸妻蘇氏。烈婦巴縣張國縉妻夏氏。各給銀建坊如例。○癸亥。上駐蹕宜孫喀布泰昂阿地方。○甲子。上駐蹕庫里業哈達地方。○乙丑。上駐蹕達顏達巴漢昂阿地方。○旌表山東節婦萊蕪縣李氏。郟城縣杜氏。日照縣安氏。烈婦萊蕪縣魏氏。沂州李氏。壽光縣隋氏。各給銀建坊如例。○丙寅。上駐蹕努湖岱地方。○蒿齊忒多羅郡王車布登。以伊旗下蒙古饑饉。題請賑濟。上諭理藩院尚書阿喇尼曰。朕頃見蒿齊忒郡王車布登奏。所屬旗下蒙古大饑。朕心深為憫惻。奚可坐視。任其艱阨。彼所居地。距此亦不甚遠。可亟遣爾院司官。速察饑民戶口。以聞。○丁卯。上駐蹕湯泉。○戊辰。上駐蹕楚虎爾蘇特地方。○己巳。

上駐蹕拜察地方。○壬申。先是。郎中包奇等奏。自吉林烏喇至黑龍江。計丈量共一千一百九十五里。應設十四驛。

上諭。驛遞關係緊要。凡丈量當以五尺為度。今程途太遠。令包奇等再馳驛前往。詳加丈量。至是。包奇等奏。自吉林烏喇城至黑龍江城。以五尺細丈。共一千三百四十里。應設十九驛。

上命如議行。復令每驛設壯丁。並撥什庫三十名。馬二十匹。牛三十頭。壯丁。自盛京。寧古塔。所轄各驛。柳條邊派出。馬。牛。令盛京戶部。照數採買送往。○癸酉。中元節。遣官祭

永陵。

福陵。

昭陵。

孝陵。

仁孝皇后。

孝昭皇后陵。○

上駐蹕西布赫海塔哈地方。○理藩院郎中蘇巴泰。差往蒿齊忒地方稽察蒙古饑民。還尚書阿喇尼引奏曰。蒿齊忒蒙古被災者。約三千人。皆以荒野草根為食。一聞遣官稽察賑救。皆環跪舉手加額曰。我等殘喘。自分旦夕就死。今幸天使至。我屬得生矣。

上顧阿喇尼曰。食為民天。朕先有諭旨。各處設立常平倉。令其儲積。以備賑饑。今歲畿內秋成大熟。正宜詳酌舉行。至救荒之道。以速為貴。倘賑濟稍緩。遲誤時日。則流離死喪者必多。雖有賑貸。亦無濟矣。朕每聞水旱災傷。即遣官動支正項錢糧賑濟。以此故也。今欲救蒿齊忒蒙古。若以畿內粟轉運至彼。恐不能待。可速以拜察地方儲備之粟。措支一千石。遣爾院賢能官。晝夜兼馳。運往賑濟。○甲戌。

上駐蹕孔俄羅鄂博地方。○乙亥。

上駐蹕海拉蘇台昂阿地方。○予故散秩大臣阿爾布潭。祭葬如例。○四川巡撫韓世琦。丁

母憂命回旗守制○丙子。

上駐蹕烏爾圖布拉克地方○丁丑。

上駐蹕鄂爾哲圖阿爾賓教拉地方○戊寅。

上駐蹕奎騰布拉克地方○贈貴州殉難鎮遠衛守備卜世儼署都司僉書廕一子以衛千總推用予祭葬如例○己卯黑龍江將軍薩布素等疏報無底兒河羅剎鄂衣多里遣羅剎宜番等四人來誘鄂羅春立克頂格等被擒送到。

上諭羅剎宜番等應即寘之重典。但大兵攻克雅克薩勢迫來歸之羅剎既悉加寬宥不行誅戮今宜番等亦免死。曉以前此釋歸羅剎之故。並用羅剎字作書。令彼送還我吉爾蒙阿等。毋得再犯邊境。其書即給與宜番等持去。立克頂格等所司照例獎賞○辛巳。

上駐蹕塔爾輝喀喇鄂博地方○壬午。

上駐蹕海拉蘇台地方○以禮部郎中申穆為

廣西按察使司僉事提調學政○厄魯特博

碩克圖汗噶爾丹為遣使事覆奏恭聞

皇上萬安。不勝欣悅。此地叨達賴喇嘛福庇。幸得無恙。蒙檄丹巴來文。貿易之人。入關定限人數。若妄行果實。

上諭誠是。但自古以來。西厄魯特貿易向有舊制。我等未便廢也。若仍遵舊制。則凡事皆宜矣。下理藩院議。尋議康熙二十二年議政會議已有定例。噶爾丹所奏舊制不便廢之語。應毋庸議。疏入。報聞○甲申。

上駐蹕布爾哈蘇台地方○乙酉。旌表雲南節婦路南州趙氏。給銀建坊如例○丙戌。

上駐蹕岳羅哈達地方○丁亥。

上駐蹕瑚爾布勒畢喇地方○頒發四書易經書經講義於白鹿洞書院○予故解任副都統龔圖祭葬如例○予福建陣亡佐領西圖庫祭葬如例。

八月己丑朔○庚寅。

上駐蹕察罕郭爾昂阿地方○吏部尚書李之

芳以病乞休。慰留之。○以都察院左僉都御史姚締虞為四川巡撫。○三等精奇尼哈番克什圖年老解退。以其子查密嚴襲替。○辛卯。

上駐蹕孟克昂阿地方。○癸巳。

上駐蹕齊老圖地方。○賜察哈爾官兵綉緞布疋銀兩袍褂有差。○予廣東陣亡佐領巴忒馬祭葬如例。○丙申。

上駐蹕伊瑪圖地方。○命理藩院尚書阿喇尼

等傳諭八旗察哈爾官兵曰。爾等自

太宗皇帝時。皆編旗分佐領。愛養有年。今朕巡行邊外。講習武備。見爾等人材壯健。頗諳體制。與京師八旗無異。朕所以獎勵爾等。不分內外。一視同仁。嗣後各宜善為畜牧。力勤農事。謹守成法。勿為盜賊。如此。不特人皆得所。即朕任使亦有裨益矣。爾等其謹誌之。總管遊牧叅領品級阿耀等。及八旗察哈爾官兵。皆懼忤稽首奏謝。又命領侍衛內大臣舅舅

佟國維公倭赫等傳諭總管遊牧叅領品級阿耀曰。爾自奉命管轄察哈爾兵丁以來。能敬慎奉職。馭下嚴明。且畜牧孳生頗盛。爾若在京當授散秩大臣。今任外職。此後進京。可即以内大臣品級行走。○丁酉。

太宗文皇帝忌辰。遣官祭

昭陵。○戊戌。祭

大社。

大稷。遣都統侯巴渾德行禮。○

上駐蹕伊瑪圖塞爾白黑里昂阿地方。○陞直

隸口北道孔興洪為福建按察使。司按察使

○己亥。

太祖高皇帝忌辰。遣官祭

福陵。○

上駐蹕森濟圖昂阿地方。○九卿等議覆御史錢珏疏。叅山西巡撫穆爾賽屬官多收火耗。不能察核。應降三級調用。得旨。穆爾賽居官何如。著大學士九卿從公詳議。將衆論寫明。



具奏尋大學士九卿回奏。山西巡撫穆爾賽。為人樸實不生事。得旨著原叅之人。指實陳奏。○庚子。賜翁牛特巴林。科爾沁。教漢諸王。貝勒額駙。台吉等袍褂。鞵帶等物。及官兵。緞布銀兩有差。○辛丑。陞鴻臚寺卿閻興邦。為光祿寺卿。○宿遷縣士民陸爾謐等叩閭。縣有暫加三餉。缺額丁銀。缺額糧地。及曠土虛糧。四項包賠之苦。籲請豁免。戶部以載在賦役全書。徵收已久。應毋庸議。得旨朕過宿遷。見小民窮苦情形。此事爾部再確議以聞。尋議暫加三餉一款。徵收與各州縣同。不便獨蠲。至缺額糧地。續報曠土。悉予蠲除。其缺額丁銀。應暫停徵。以待招徠之後起徵。從之。○壬寅。

上駐蹕格爾齊拉坤地方。○喀爾喀土謝圖汗遣使進九白年貢。宴賚如例。○甲辰。

上駐蹕烏喇岱地方。○乙巳。

上還森濟圖昂阿地方駐蹕。○兵部題侯林興

珠。及何佑等至日。旗下兵丁各歸本旗。其自山東。山西。河南。調至者。令本省官約束以行。何佑仍發回原安插處。

上諭。藤牌官兵。勤勞茂著。官員。俟後議叙。兵丁。令戶部以白金賞賚之。○丙午。

上駐蹕拜巴哈昂阿地方。○賜修路翁牛特官兵。緞布銀兩有差。○丁未。

上駐蹕愛里昂阿地方。○遣大學士宋德宜。祭先師孔子。○戊申。

上駐蹕克勒烏里雅蘇台地方。○己酉。

上駐蹕孟克昂阿地方。○壬子。秋分。夕月於西郊。遣刑部尚書公諾敏行禮。○

上駐蹕克爾和洛。○癸丑。

上駐蹕克爾色欽。○以故二等阿思哈尼哈番多爾集弟色冷襲職。○甲寅。

上駐蹕汗特木爾達巴漢昂阿地方。○乙卯。

上駐蹕烏爾格蘇台地方。○丙辰。賜喀喇沁多

羅杜稜郡王扎什以下。兵丁以上。涼帽袍褂。

帶韉鞵緞布銀兩有差 丁巳  
上駐蹕伊瑪圖宜孫畢喇地方

實錄卷一百二十一

三

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十一

清 實 錄 康熙二十四年九月至十月

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十二

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管史部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敬修

康熙二十四年乙丑九月戊午朔

上至博洛和屯和碩裕親王福全遣人奏八月

二十九日

太皇太后偶爾違和醫官診視進藥奏甫至

上即星夜回鑾○已未午刻

上還京師趨視

太皇太后慈體已安尚在服藥

上親視進藥侍奉至夜半自是遂康寧如常

以故一等阿思哈尼哈番徐承祖之弟徐紹

祖襲職○喀爾喀車臣汗遣使進九白年貢

二八五

宴賚如例○庚申。

上詣

太皇太后

皇太后宮問安○辛酉。

上詣

太皇太后宮問安○諭大學士等漢軍既有旗分缺。又補授漢缺。不但人不敷用。漢舉人進士。亦且壅滯。不得銓選。漢軍既有外任。該旗有缺。即以外任漢軍補授。亦無不可。著九卿

實錄卷一二二

等議奏。尋九卿等會議。漢軍官員應停補在京漢缺。於漢軍旗分內應補之缺。補授。從之。○壬戌。

上詣

太皇太后宮問安○

上御太和門視朝。文武陞轉各官謝恩。次喀爾喀進貢使臣等行禮○免江南邳州本年分水災額賦有差○陞護軍叅領對泰。為正白旗漢軍副都統○以廣東瓊州總兵官劉成

龍為鑲紅旗漢軍副都統○癸亥。

上詣

太皇太后宮問安○甲子。免江西上饒等四縣本年分旱災額賦有差○乙丑。

上詣

太皇太后

皇太后宮問安○陞協領納泰為黑龍江副都統○厄魯特噶爾瑪戴青和碩齊等遣使進貢。賞賚如例○丙寅。

實錄卷一二二

上御經筵講畢。賜大學士。九卿。詹事及講官等宴○漕運總督徐旭齡疏報。淮揚等處水災。請行賑濟。戶部議。賑濟事。應令地方官料理。得旨。淮揚等處。又罹水患。百姓甚苦。朕心深為憫惻。若令地方官賑濟。恐災民未沾實惠。應亟為拯救。使小民不致流離失所。著遣部院堂官一員。速往踏勘。詳議具奏○丁卯。

上詣

太皇太后宮問安○免山西徐溝縣本年分水

災額賦有差○戊辰

上詣

太皇太后宮問安○翰林院掌院學士常書題

羅剎既平請編輯方畧以光紀載從之○命

戶部侍郎蘇赫踏勘淮揚被災地方○調四

川提督何傳為陝西提督○己巳

上詣

太皇太后宮問安○

上命大學士等傳問宗人府左宗正貝子章泰

曰爾衙門既無刑名錢穀要務何以保舉之官甚多章泰引咎

上諭曰宗人府衙門既無事務且官員甚少著停保舉章泰品行不端著解任○庚午

上詣

太皇太后宮問安○辛未諭吏部督撫藩臬官

資相近請託易行每逢大計各省督撫多以

藩臬舉報卓異不無結納徇情之弊著通行

禁止○旌表浙江烏程縣烈女盛世瑞聘妻

嚴氏聞夫病故吞金絕食而死給銀建坊如例○壬申

上詣

太皇太后宮問安○以戶部左侍郎王鴻緒為

武會試正考官詹事府詹事郭茶為副考官

○九卿等議覆監察御史錢瑤遵旨指實陳

奏山西巡撫穆爾賽多加文水等縣火耗嫁

女時索屬官禮物革職通判張謙交結該撫

家人妄詐屬官財賄布政使那鼐收充多徵

銀兩事請將穆爾賽那鼐及本內有名官役

俱提至京師嚴審

上命依議行因問尚書科爾坤曰前者謂穆爾

賽為人樸實不生事孰倡此語耶科爾坤奏

曰穆爾賽為人樸實衆人皆知左都御史陳

廷敬山西人也先言穆爾賽不生事

上問陳廷敬陳廷敬奏曰臣等同內閣諸臣會

議時臣止言穆爾賽平常並未言其不生事

上復問科爾坤是誰為此言者科爾坤奏曰侍

卽蔣弘道亦有此言。

上問曰。蔣弘道爾所見若何。蔣弘道奏曰。臣離家年久。並不知穆爾賽行跡。

上曰。凡人臣事君。以竭盡忠誠為本。爾等皆朕信用之人。既已同議。今又推諉。陳廷敬等是何理也。卽今居官者。更有如穆爾賽貪汙者乎。如此之人。尚謂其不生事。嗣後九卿何可信用。○旌表浙江節婦仁和縣陳氏。長興縣錢氏。建德縣陳氏。各給銀建坊如例。○癸酉。

上詣

太皇太后宮問安。○以翰林院侍講學士顧沅。

充日講起居注官。○戶部進呈修成簡明賦役全書體式。得旨著九卿從公詳看議奏。○禮部尚書沙澄。以病乞休。慰留之。○直隸巡撫崔澄疏報。新安等五州縣被災。請蠲額賦。戶部議覆照例豁免。

上命卽中麻耐。明額禮員外卽多鼐卽前往踏勘。○甲戌。遣官祭。

歷代帝王。○遣官祭城隍之神。○免河南太康等十八州縣本年分水災額賦有差。○河道總督靳輔疏言。康熙二十三年冬。臣隨駕閱河。

皇上面諭。臣看河南工程。臣前赴河南確勘黃河兩岸工程。目前至急之務。如考城儀封等縣應築隄工。共長七千九百八十九丈。又封邱縣荆隆口應築大月隄三百三十丈。又滎澤縣應修築埽工二百一十丈。此工告成。不特河南無虞。又實可為江南保障。下部議行。○四川巡撫姚締虞陛辭。

上諭曰。四川省當明末時。遭張獻忠之亂。百姓凋敝。地亦荒殘。後又屢經賊變。人民愈加疲耗。爾宜正己率屬。愛養撫綏。俾遠方之人遂生樂業。以副朕簡用至意。○乙亥。

上遵

太皇太后諭。往白塔寺進香。適大雨如注。近侍請俟少霽。

上曰近因

聖祖母偶爾違和。朕心深切憂慮。今已痊愈。何憚此一往。以慰

慈顏乎。遂冒雨行。○丙子。

上詣

太皇太后宮問安。○旌表廣東節婦三水縣龐

氏烈女。南海縣鄧氏。各給銀建坊如例。○丁

丑。轉宗人府右宗正固山貝子傳善為左宗

正。以左宗人鎮國公哈爾薩為右宗正。鎮國

公蘇努為左宗人。○陞翰林院侍讀學士顧

八代為內閣學士兼禮部侍郎。○四川道御

史張志棟疏言。近見九卿每有會議。並不從

公確論。惟瞻顧推諉。苟且了事。仍然致煩

宸斷。即如山西巡撫穆爾賽為火耗一事。我

皇上諭內閣。將穆爾賽平日居官賢否。令九卿

從公確議。九卿不惟不據實以對。反曰為人

樸實。不聞其有劣蹟。即此一端。足見九卿平

日無任事實心。請敕部嚴加申飭。得旨。內閣

九卿詹事科道明白回奏。○戊寅。諭大學士

等曰。監察御史錢珏題。參巡撫穆爾賽加徵

火耗甚重一案。令內閣九卿詹事科道官員

持正詳議。備列公論具奏。內閣九卿官員以

穆爾賽為人樸實。不生事端。奏聞。穆爾賽居

官不善。朕所聞甚明。故命原參錢珏明白指

實具奏。今錢珏將加徵火耗甚重。並受禮物

款項。已經指陳。凡事令九卿官員會議。原期

公正得實。今所議穆爾賽事。朕意以為不公。

夫諸臣不從公詳議。如此徇庇具議。嗣後九

卿諸臣何以倚任。事務何以得理。即如溫待

達爾布等。最為大貪大惡之流。朕特加懲治。

發往黑龍江。前問九卿官員。以穆爾賽為人

樸實。不生事端。係誰所議。尚書科爾坤奏。係

陳廷敬。蔣弘道之言。及問陳廷敬等。皆奏稱

臣等不曾如此說。原說平常。且朕又聞此事

初議時。原有穆爾賽無劣蹟之語。後散訖。內

閣復追回九卿欲將無有劣蹟之語刪去。尚

書科爾坤說若將此語刪去。我不肯與議。遂未完竟而去。首先立議穆爾賽為人撲實。不生事端者。即係庇護穆爾賽之人。何官輒敢專擅殺人。何官輒敢專擅救人。此事斷不可仍前但稱係臣等公議。務須各陳所見。著隨朕行在之尚書。都御史。侍郎。學士等往聽之。○己卯。諭大學士等曰。朕近觀正陽門牌樓原基甚深。若將街衢掘至原基。兩傍房屋皆在浮土之上。難以久存。而於觀瞻亦不相稱。且所掘之土。運於何處。至濬治護城河。若積土城下。遇雨水流入河內。旋至淤塞。在鑿河掘基。需用帑金。尚屬小事。但慮興作無益。應何法挑掘。何方貯土。爾等會同八旗都統副都統及各部院大臣步軍統領。詳閱街衢議奏。○調山西太原總兵官吳啟爵為廣東瓊州總兵官。○陞叅領祖建極為福州漢軍副都統。○陞都察院左都御史達哈他為吏部尚書。○庚辰。

上詣

太皇太后宮問安。○諭大學士等曰。九卿詹事科道令其會議會推本期至公至正。務得真實。今聞九卿會議之事。間或不據實具議。草率苟且。因循而行。有此一次立議爭勝以冀下次不與相拂而從之者。或有此一次將彼意中之人薦出。冀下次將其親朋薦出。以相報者。或有薦其門生者。有薦其同年者。有薦其同鄉親友者。夫九卿會議會推理宜虛公持論。豈可一二人擅專以行。且設立科道。本欲其凡事從實建言。有執拗護庇者。即為指叅也。其專擅執拗護庇之人。何未見糾劾耶。衆議之時。亦有一同具議。後因其事不當。復云彼時我原如此說者。如果原議時衆論與伊意不合。即宜將已見明白敷陳。另立一議。既不另立一議。同列職名。又稱我曾如此說。是斷斷不可者。且今誰可以擅處誰耶。即如張志棟。近將九卿題叅。亦誰如彼何也。朕於



康熙十八年。因此等事。曾經有旨申飭。可察前旨。一併復行傳諭。凡事會議。不必詢問本省大臣官員。若每加詢問。或致不肖之人。益在地方生事橫行。本省督撫地方官。無不畏懼。且將凡屬會議之事。無不囑託本省大臣官員矣。政務何由得平。今會議山西巡撫穆爾賽。因係滿洲。恐致敗露。意欲從平易歸結耳。若是不於事前豫為勸戒。令其公廉。乃不為豫戒。徒於事發之後。欲如此結案可乎。爾等齊集滿漢九卿大臣。傳諭申飭之。○工部議覆河道總督靳輔疏言。淮揚徐一帶。自五月起至八月止。迭遭雨水。將攔馬河減水壩傷損。高家堰隄頂之土。衝去一半。徐州牛市口。衝開隄工二十餘丈。桃源曹家嘴坐陷百餘丈。山陽南岸韓家莊。河溜南徙。新增險工一百六十餘丈。俱應修築。應如所請。得旨。依議。今年雨多水大。河道隄岸。宜加防護。該管大小官員。各須盡心料理。相機修補。務保

無虞。○辛巳。免江西宜春等五縣本年分旱災額賦有差。○贈故奮威將軍陝西提督王進寶太子太保。予祭葬。謚忠勇。○九卿會議廣東雲南秋審人犯。

上曰。凡別項人犯。尚可寬恕。貪官之罪。斷不可寬。此等人藐視法紀。貪汙而不悛者。祇以緩決故耳。今若法不加嚴。不肖之徒。何以知警。此內貪官耿文明等正法外。其餘正犯俱照爾等所議完結。○壬午。大學士九卿等回奏。御史張志棟奏九卿因循成風。一疏奉旨。令臣等明白回奏。伏念

皇上澄清吏治。愛養民生。諄諄以砥礪廉隅。禁絕積弊。告誡臣上。即會議穆爾賽一事。奉旨問其居官賢否。臣等愚昧無知。不能稔悉其貪劣確蹟。據實直陳。臣等罪無可逭。伏乞敕部嚴加議處。得旨。未與會議。九卿詹事。科道會同察議具奏。○甲申。孝慈高皇后忌辰。遣官祭。

福陵○

上詣

太皇太后

皇太后宮問安○議政王大臣等遵旨議覆查墨爾根地方最為緊要。應築城設兵。令將軍薩布素及副都統一員。駐扎於此。黑龍江設副都統一員。其駐防五百兵。以烏喇寧古塔兵參用。先流徙寧古塔烏喇罪人。俱入兵數發往。既於墨爾根設兵。自須增驛。令戶部兵部理藩院各遣官一員。自吉林烏喇至墨爾根。自墨爾根至黑龍江。宜增幾驛。定議具奏。駐防黑龍江副都統鑄印信給之。副都統溫代。納秦。孰令駐防黑龍江。孰令築城恭候。欽簡。

上允行。令溫代。納秦。駐防黑龍江。副都統博定築城。築城兵丁外。再量增夫役。兼令種地○乙酉。九卿等議覆。總漕徐旭齡條奏。漕糧派索諸弊。應令徐旭齡將歷年派索官員指名

題參

上諭大學士等曰。此等弊端相沿已久。必令指名題參。則後來督撫難於條奏矣。可著該督嚴加禁飭。務在遵行○陞浙江舟山總兵官吳英。為四川提督○戶部題。張家口諸處倉廩。應令地方官設法修造。得旨。若令地方官設法。勢必加派於民。著即以本處稅銀修建○丙戌。戶部議覆。山東巡撫張鵬題報。兗州青州二府屬州縣被水災處。應委員踏勘。得旨。朕去歲巡行。經高唐濟寧等處。見小民生業艱難。今又值水災。恐致流離失所。著速遣才能官員踏勘。俟其到時。詳議蠲賑之法。奏聞○丁亥。諭大學士等。凡可一次會題完結之事。嗣後不必兩三次具題。於應會同之部院。即會議結案。奏聞。如有仍違誤具題者。爾等即隨簽以進○以內閣學士圖納為山西巡撫○鑲黃旗都統喇哈達。以老病乞休。得旨。喇哈達。為人庸懦。著解任○以鄂爾多斯

故多羅貝勒古木布拉錫子根都西希扎布  
為固山貝子○吏部議覆江蘇巡撫湯斌疏  
言常州府降調知府祖進朝請留原任應不  
准行得旨設官原以愛養民生巡撫湯斌保  
奏祖進朝清廉地方百姓莫不同聲懇留可  
從所請仍留原任以勸廉吏○旌表山西烈  
婦楊明于妻裴氏拒姦捐軀守貞全節給銀  
建坊如例  
冬十月戊子朔享

太廟

上親詣行禮○遣官祭

永陵

福陵

昭陵

孝陵

仁孝皇后

孝昭皇后陵○頒康熙二十五年時憲曆○命

廣東肇慶府開爐鼓鑄○庚寅

皇太后聖壽節

上率王以下文武大臣侍衛等詣

皇太后宮行禮遵

懿旨停止筵宴○

上詣

太皇太后宮問安○以內閣侍讀學士馬齊為

山西布政使司布政使○大學士等遵旨覆

奏九卿議福建等省秋審人犯內有曹亮侵

盜錢糧事擬緩決應改情實舒玉崑誣告人

反叛事擬情實應改緩決

上曰人命關係重大或致一人冤抑朕心不忍

俟秋審事竣奏聞之日朕逐一詳覽視其罪

之重輕持平酌定○吏部議覆都察院左都

御史陳廷敬疏言督撫保舉薦舉府州縣官

須令第一條實填無加派火耗字樣第二條

實填實心奉行

上諭十六條每月吉聚鄉村鄉約講解字樣餘

條仍照舊例開具實蹟應如所請嗣後督撫

保舉薦舉府州縣官員將此二條添註冊內。如保舉不實別經發覺者照徇情薦舉卓異例督撫各降二級調用。申詳之司道府等官各降三級調用。從之。○戶部題索倫打虎兒貢貂皮不及常額應停給賞。副都統品級渣木素等交理藩院分別處分。得旨索倫打虎兒為黑龍江大兵安設驛站効力可念從寬免議仍照例給賞。○陞湖廣長沙副將胡戴臣為山西太原總兵官。○辛卯策試天下武舉於

太和門前。○壬辰。

上御瀛臺紫光閣親試武舉騎射技勇。○癸巳上詣

太皇太后宮問安。○甲午。

上御太和門傳臚賜殿試中式武舉徐憲武等九十六人。武進士及第出身有差。○以故三等阿思哈尼哈番班塔哈親弟巴薩襲職。○調福建福寧總兵官黃大來為浙江舟山總

兵官浙江溫州總兵官康調元為福建福寧總兵官。○厄魯特厄爾德尼布穆台吉喀爾喀澤卜尊丹巴胡土克圖等遣使進貢賞賚如例。○丙申吏部等衙門察議奉旨問山西巡撫穆爾賽居官賢否時諸大臣不將穆爾賽貪劣據實陳奏應將大學士勒德洪等各降二級調用。九卿科爾坤等各降三級調用。加級紀錄俱不准抵銷。得旨勒德洪等降二級科爾坤等降三級從寬留任。漢大學士九卿等俱著寬免。尋吏部再議大學士勒德洪應削去太子太傅抵降一級再降一級留任。從之。○丁酉。

上幸南苑行圍。○戊戌。

上回宮詣

太皇太后宮問安。○陞刑部郎中布雅努為山西按察使司按察使。○戶部題黑龍江墨爾根地方駐防官兵於康熙二十五年未收穫以前給糧至秋成後停止。

上命以兩年口糧給之。○理藩院等衙門題厄魯特噶爾丹博碩克圖汗下沙里巴圖爾台吉來使伊特木根於北館中毆死正白旗西圖佐領下商人王治民。應論死。

上命將伊特木根立決。并傳諭厄魯特爾等進貢來使沿途往返擾害民生搶掠牲畜以致邊境內外百姓困苦者甚衆。朕雖稔知以爾等遠方之人本不諳中國法紀無知妄行未遽加罪。屢從寬免。嗣後貢使往來如有攘奪為非者爾等率領頭目並犯法之人皆依中國律令治罪。曾經頒旨曉諭。今爾進貢頭目並不嚴束。任其擾害。將內地人毆死干紀甚矣。先以爾等愚昧頑蠢。凡細微奪攘之罪。知而宥之。乃屢邀寬免。頻加曉諭。全不欽遵。竟至毆死內地之人。今若不按法抵罪。日後漸益恣肆。大起爭釁。未可定也。用是將毆死人命之伊特木根依律處斬。令爾等識之。觀之。此後爾等其謹遵成法。嚴戢從人。毋得

肆惡妄行。○己亥。

上詣

太皇太后宮問安。○陞太常寺卿穆稱額為內閣學士兼禮部侍郎。○以江寧將軍瓦岱為鑲黃旗滿洲都統。○庚子。諭大學士等。今年所擬秋決貪官甚多。若盡行處決。朕心不忍。若不行處決。貪劣之徒。何以知警。且或有贓犯雖多。而情有可矜者。或贓犯雖少。而情有可惡者。若一律議罪。殊屬未便。爾等將貪官所犯之情罪。分別輕重。朕當酌量定罪。○壬寅。

上詣

太皇太后

皇太后宮問安。○

上御太和門視朝。文武陞轉各官謝恩。次厄魯特進貢使臣等行禮。○癸卯。諭大學士等。今見外藩蒙古王。貝勒。貝子。公。台吉等。有因徵收年貢羊酒。借端多派。殊屬累民。可酌量大

加裁減歸於至約。令其進獻爾等會同該部確議具奏。尋議外藩王以下每歲止貢羊一隻酒一瓶。從之。○內閣工部進呈修治京城道塗冊。

上曰工價支給尚少宜稍增加。至修治小路若責之居民則貧人苦累矣。其令如大路估算亦以錢糧給之。○乙巳以續順公沈瑞在臺灣殉難命其從姪沈熊昭襲爵。○陞福建閩安副將蔣懋勛為浙江温州總兵官。○工部議覆河道總督靳輔題歲修急修工程俱應如所請。

上諭大學士等曰河工所關最要須及時速修方有裨益。若此等事必待題明議覆始行修治貽誤工程亦未可定。嗣後歲修急修應動支河工錢糧即行修理年終奏銷始於河工無誤。○予故浙江定海總兵官孫維統祭葬如例。○丙午五色慶雲見。○戊申。

上詣

太皇太后

皇太后宮問安。○吏部議覆原任四川巡撫韓世琦題叅酉陽土司運解楠木遲延查土司無俸可罰應免議。

上諭大學士等曰韓世琦前任江蘇巡撫居官狼藉後任偏沅巡撫時採辦楠木則稱四川酉陽土產楠木合式請令蜀省督撫勸諭捐輸及調任川撫又題稱酉陽地方楠木數目丈尺路遠不便察看請行湖廣督撫就近察明經部駁察今始委過土司稱大木難運等語前後題疏參差不合著吏部嚴加議處尋部議巡撫韓世琦應革職從之。○己酉九卿議覆總河靳輔疏言高寶等七州縣下河應築隄高過海潮於沿海口地方挑河白駒場等處建閘諸工需銀二百七十八萬餘兩請先發銀一半償工俟涸出額餘官田取佃價償還又高家堰應加密排椿丁頭小埽再於隄裏挑小河築束水隄共需銀五十三萬餘

兩請先撥銀三十萬兩。又黃河兩岸築隄工銀一百五十八萬餘兩。請先撥銀五十萬兩。俱應准行。

上諭大學士等曰。靳輔題請治下河之法。在築隄束水以注海。其工費將涸出田畝所佃價償還等處。九卿會議准行。朕思田畝涸出。便當與民墾種納糧。若取佃價償還。恐致累民。九卿等特不敢自為主張。故議准行耳。至高家堰幫築工程。實為緊要。朕舊歲南巡。量度水勢。見前人創築高家堰。以捍洪澤諸湖。頗有深意。今此堰若或潰決。則黃河亦難保固。至黃河兩岸隄工。似在可緩。況三工兼舉。需費錢糧甚多。倘他處或有水旱災荒。恐國用不敷。難供賑濟之用。此事關係最鉅。爾等當詳議具奏。○庚戌。兵部議。都統公彭春等。招撫雅克薩城羅刹。應作頭等軍功。

上諭大學士等曰。此番軍功。與明安達禮等不同。以歷年不能剿除之寇。不久奏績。尤屬可

嘉。此等招撫之功。議作頭等尚輕。著為頭等第一軍功。將軍薩布素。亦著議叙具奏。○命河道總督靳輔。按察使于成龍。馳驛至京師。與九卿詹事科道詳議河工事務。○諭大學士等。近見工部。凡於交送物件。皆耽延時日。抑勒不收。弊端滋多。此後其嚴禁之。可傳諭工部。○諭掌膳等官。天下之物力。有限。當為天下惜之。今酥油乳酒。供給有餘。爾等會同慶豐司酌量收取。足用則已。不可過多。蒙古甚窮乏。取者減少。則彼貧人日用。可以恒足矣。○旌表江西安義縣烈女楊昌裴聘妻李氏。給銀建坊如例。○辛亥。

上詣

太皇太后宮問安。○以詹事府詹事朱馬泰翰林院侍讀學士阿山。俱充經筵講官。○以故二等阿思哈尼哈番鄂摩克圖孫班岱襲職。○陞光祿寺卿敦多禮。為太常寺卿。○以隨征湖廣岳州總兵官李超。為貴州大定總兵。



官○壬子。

上詣

太皇太后

皇太后宮問安○以原任奉天將軍安珠護為索倫總管○先是議政王大臣等議巴圖爾額爾克濟農但奏請敕印彼欲永居何地未經聲明應遣大臣曉諭巴圖爾額爾克濟農問明到日定議

上命理藩院尚書阿喇尼前往至是阿喇尼還奏曰臣至巴圖爾額爾克濟農所宣諭聖旨巴圖爾額爾克濟農曰

皇上以我兄弟族屬離散欲使合處乃係非常殊恩何敢有違近者達賴喇嘛亦謂羅卜臧滾布阿喇布坦所居布隆吉爾之地地隘草惡難以容眾不若與濟農同居臣因問濟農欲居何地彼曰欲環居阿喇克山之陰以遏寇盜不使紛擾邊疆令部眾從此地而北當喀爾喀畢馬拉吉里第諾顏之地由噶爾拜

瀚海額濟內河姑喇耐河鴉布賴山巴顏努魯喀爾占布爾古忒空郭爾俄壠以內東倚喀爾喀丹津喇嘛之部眾西極高河而居之則咸沐

皇上恩澤而各得安生矣

上命俟遣往達賴喇嘛官員到日再議○癸丑上詣

太皇太后宮問安○

上幸南苑行圍○二等阿思哈尼哈番魏赫德因病解退以其子白遂襲替○甲寅戶部左侍郎蘇赫疏言臣踏勘江南被災邳州宿遷高郵邵伯鹽城興化等六州縣衛所黎庶罹災有房屋漂蕩見今貧乏不能餬口者有僅可度一二月者應蠲免賑濟查鳳陽徐州淮安等倉所有積年支給運丁餘剩米麥應行動用再於各府產米豐收地方採買及勸輸賑濟務使饑民得所仰副

皇上視民如傷至意下部議○以鑲白旗滿洲

都統博霖為鎮守江寧將軍乙卯

上回宮詣

太皇太后宮問安○以科爾沁故多羅郡王雅  
噶爾子代布阿霸哈納故固山貝子滾楚克  
扎卜子額林臣達西各襲爵

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十二

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十三

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十四年乙丑十一月丁巳朔日食○

實錄卷一百二十三

吏科給事中楊周憲疏言纂修簡明賦役全  
書無益於民請停止

上諭大學士等曰楊周憲奏稱纂修簡明賦役  
全書將銀之尾數收入釐內糧之尾數收入  
勺內所增銀米耳麥為數不多在部議所收  
者乃州縣之尾數州縣所收者則各圖各里  
各甲之尾數殊為繁多不無滋弊且歲造冊  
籍書吏需索恐致擾民伊言似是不知戶部  
初題時是何意見果能永久無弊否此事關

係國計民生。須求確當。方可永久遵行。勿以一人以為可而輒行。勿以一人以為不可而輒止。宜虛心公議。從容確定。務期可垂久遠。倘急遽議行。不過數年。又議更改。豈可為法。爾等再公同確議具奏。○下嫁鑲黃旗訥爾杜和碩恭愍長公主薨。遣官致祭。○命設浙江滿洲理事同知一員。○予雲南陣亡正紅旗七品官卦思哈祭葬如例。○戊午。

上諭大學士等曰。穆爾賽身為大吏。貪酷已極。

臣等又一二三

二

穢跡顯著。非用重典。何以示懲。且九卿會議穆爾賽事。瞻顧徇庇。並未詳明議罪。真有彌天之手。朕不行立斷。誰肯執法耶。治天下以懲貪獎廉為要。廉潔者獎一以勸眾。貪婪者懲一以儆百。爾等將此意傳問九卿。回奏。○己未。諭吏部。往者康熙十八年。曾諭九卿詹事科道。一同奏事。期於政治得失。互相討究。雖微員亦得於朕前各抒已見。前阿蘭泰於九卿啟奏時。言諸大臣跪列於臣之前。故未

說出。此則非朕令一同奏事之意矣。爾等將此再行曉諭九卿等。○戶部議。侍郎蘇赫住勘淮揚水災。疏請免被災百姓錢糧。將運丁所餘米麥賑濟。應如所請。

上諭大學士等曰。今國用亦云充足。前曾令詳察各省錢糧。於來歲蠲免。夫欲使民被實惠。莫如蠲免錢糧。朕南巡時。觀宿遷邳州百姓生計。今年尚可支持。淮揚等處饑民。已經被災。不能辦納錢糧。今僅免本年錢糧。百姓沾恩有限。須將明歲錢糧。一并蠲免。庶於民大有裨益。至直隸各省遇災錢糧。亦欲蠲免。爾等會同戶部。將被災地方。蠲免錢糧數目。一並察明詳議具奏。○庚申。

上詣

太皇太后宮問安。○諭戶部。朕惟自古帝王。統一寰區。懋宣德化。必于惠黎元。勤求民瘼。俾幹止寧成。家給人足。而後世躋雍熙治。登上理。朕御極以來。宵旰圖治。未敢即安。念切民

依思培邦本。雖編氓漸得遂生。而閭閻正資惠養。欲使羣生樂利。比戶豐盈。惟頻行減賦蠲租。庶萬姓得沾實惠。前此用兵以來。河南湖北兩省民人。轉輸供億。勞費繁多。特沛仁恩。以昭軫恤。所有康熙二十五年應徵地丁各項錢糧。著與蠲免一半。其康熙二十四年未完地丁錢糧。亦著盡與豁免。又直隸獻縣河間縣。河間衛。江南宿遷縣。興化縣。邳州。高郵州。鹽城縣。山東郯城縣。魚臺縣地方。今年重罹水災。小民艱苦。亦應加恩軫恤。所有康熙二十四年下半年。二十五年上半年。地丁各項錢糧。俱與豁免。爾部速行該地方官。通行曉諭。務使人人均沾恩膏。以副朕愛育蒼生至意。如有不肖有司官役。借端朦混。及私行重徵者。該督撫指名題參。從重治罪。如該督撫徇隱。不行糾舉。或經叅奏。或被告發。定行一並從重治罪。爾部即遵諭行。特諭。○調鑲白旗蒙古都統莽奕祿。為滿洲都統。陞前

鋒統領塔爾代。為鑲白旗蒙古都統。壬戌。上詣

太皇太后

皇太后宮。問安。○陞護軍統領伯莽喀。為鑲紅旗蒙古都統。○丁卯。陞翰林院侍讀學士阿山。為光祿寺卿。○戊辰。

上詣

太皇太后宮。問安。○庚午。九卿等議覆原任山西巡撫穆爾賽。應立絞。得旨。穆爾賽所承認贓數不符。姑改為監候。秋後處決。○辛未。

上御太和門視朝。文武陞轉各官謝恩。次喀爾喀進貢使臣等行禮。○以奉天將軍伊巴漢。為左翼前鋒統領。○壬申。

上詣

太皇太后

皇太后宮。問安。○禮部尚書哈占。以病乞休。得旨。哈占前任川陝總督。不能實心盡職。後值大兵進剿。屢經奉旨催促。始隨他人之後。前

往。並未著有勞績。乃稱捐軀。思効晝夜拮据等語。妄行陳奏。殊屬不合。著嚴飭行。仍留任。殫力供職。以贖前愆。○癸酉。命扎薩克喇嘛。垂木珠爾拉木扎木巴。得木齊商南多爾濟。副都御史拉篤祜等。齋教往諭達賴喇嘛。敕曰。朕統馭宇內。繼絕舉廢。欲期咸底隆平。厄魯特噶爾丹博碩克圖汗。滅鄂齊爾圖汗時。羅卜臧滾布阿喇布坦。巴圖爾額爾克濟農等。紛紛離散。來至邊境。竄跡於金塔寺。賀蘭山等處。乃巴圖爾額爾克濟農。額爾德尼和碩齊等。又以生計窘迫。在鄂爾多斯。毛明安。吳喇忒。寧夏等處。妄行剽掠。朕於此時。不即發兵剿滅者。乃軫念鄂齊爾圖汗。歷世職貢。誠敬奔走。是以寬宥其罪。巴圖爾額爾克濟農等。亦戴朕恩。願依朕為生。屢疏奏請敕印。前此朕曾諭厄魯特噶爾丹博碩克圖汗云。巴圖爾額爾克濟農等。如係爾所屬。當即收之。不能。朕另有裁度。乃彼約以丑年春為期。

如逾期。悉惟上裁。今逾期已數月矣。天下太平。惟伊等兄弟骨肉分離。散處失所。朕心殊為惻然。爾喇嘛素以惻隱之心。度此衆生。凡厄魯特諸貝子。皆供奉喇嘛。信崇爾法。朕思羅卜臧滾布阿喇布坦。巴圖爾額爾克濟農。皆鄂齊爾圖汗之苗裔也。鄂齊爾圖汗於喇嘛為護法久矣。何忍默視其子孫宗族。至於困窮。今朕欲將伊等歸併一處。安插於可居之地。以示興絕舉廢之至意。爾喇嘛其遣使與朕使臣定期往會。朕於此即遣大臣至所約之地。偕爾使人前往。○甲戌。諭大學士明珠。王等皆用紫韁乘騎。或以紫韁濫給微賤之人乘用。又其甚者。遂至給與外省官員商賈等輩。不待敕壞而更新。騎用者至多。大悖儀典。良由未經定例。以至於此。王等既束用金黃帶。若騎用金黃韁。則不得妄給微賤。而等威辨矣。其令宗人府。禮部。會同定例議奏。○先是。

上諭兵部。國家武備。不可一日懈弛。舊例。每歲必操練將士。習試火礮。爾部即傳諭八旗都統等。預為整備。朕於十八日。將親閱焉。時喀爾喀土謝圖汗子多爾濟厄爾德尼阿海台吉等。以朝貢在京。請於理藩院尚書阿刺尼轉奏。曰。臣等以朝貢而來。聞

皇上大閱甲兵。遠方之人。幸逢盛典。願一覩軍容。

上曰。從來撫綏萬邦。在德教。不在威武。故兵者。不得已而用之。今四海昇平。偃兵不用。然訓練士卒。簡閱軍器。所以修武備。昭法制也。喀爾喀台吉。既請往觀。可允其奏。又有厄魯特固魯木錫台吉。噶爾丹博碩克圖汗。來使塔西蘭和卓等。亦請往觀。

上亦命隨往。至是。

上由午門出宣武門。八旗都統。各帥所部將士。擐甲胄。佩弓矢。建旗纛。自灣子裏夾道分列。至拱極城。前鋒官軍。自蘆溝橋夾道分列。至

王家嶺山麓。其東。則有排鎗官軍。其西。則紅衣巨礮。皆次第陳列。

上乃登王家嶺陞御座。軍中吹螺角者三。發巨礮三。既而排鎗並發。前後相繼。聲絡繹不絕者久之。且無不中的。又命將士發紅衣巨礮。於是八旗所列紅衣將軍。及諸火器。一時盡發。凡二次。聲震天地。巨礮所擊。樹侯欄墻。莫不聲應而倒。是時阿海台吉。及衆蒙古等。皆驚懼失色。甚有匍匐仆地。戰慄不止者。有頃。阿海台吉少息。語阿刺尼曰。我等初見士馬精壯。兵甲堅利。已知

聖朝軍威。無敵於天下。今觀火器轟烈如此。尤耳目所未覩聞。愈覺驚心破膽矣。

上命阿刺尼傳諭曰。朕惟以寬仁撫馭。欲使薄海乂安。家給人足。近者悅。遠者來。此朕本懷也。至兵為凶器。非可輕試。第念古來世際承平。不忌武備。閱兵乃本朝常制耳。無足驚歎也。

上御行宮。召扈從諸王。內大臣。及阿海台吉等。賜食。旋復御黃幄。設布侯校射。

上先射。五發皆中。次令諸王。貝勒。八旗善射者。校射。中的者甚衆。

上將還宮。阿海台吉奏請送

駕。

上曰。朕知爾意誠。但今日勞頓。其徑歸館舍。

乙亥。琉球國中山王尚貞。遣使進貢方物。部議如例賞賚。得旨。觀所賜琉球等外國恩賚

之物甚菲。於厚往薄來之道。尚未允協。著內

閣會同禮部。察頒錫外國之例。酌量增益。所賞儀物。確議具奏。

○丙子。大學士等奏。河道總督靳輔。按察使于成龍來京。臣等遵旨問

河工事宜。靳輔議開大河。建長隄高一丈五

尺。束水一丈。以敵海潮。于成龍議開濬海口

故道。兩人各執已見。議不畫一。臣等與九卿

俱從靳輔議。通政使司叅議成其範。科道王

又旦。錢珏等從于成龍議。

上曰。朕聞自宋以來。河道不甚為害。明隆慶間。

諸口故道。始至淤塞。近自康熙七年。桃源隄

潰決。遂為七邑之患。今兩人各持一說。亦俱

有理。似皆可以建功。但不知其孰於民有益

無害。爾等可傳問高寶。興。鹽。山。江。泰。七州縣

見任京官。此兩說孰是。伊等係本地人。所見

必確。若因產業有礙。或徇私不以實對。雖掩

飾一時。將來朕必知之。務令直言無隱。

○翰林院侍講學士德格勒。充日講起居注官

○丁丑。

上御懋勤殿。大學士等。以處決重囚疏請旨。

上曰。茲事重大。人命所係。雖經廷臣詳訊。朕已

矜減多人。而情實各犯。苟可生全。姑令緩死。

朕與爾等詳議之。賜諸臣坐。

御案先設招冊。

上一一詳閱。諭大學士等曰。爾等攜有招冊節

畧摺子。各取出比對。因命大學士王熙。學士

牛鈕。執筆。於應勾者。先勾於摺子內。有擬議



未定者。姑點之。俟再議。重犯六十六人。讞詞一一覽畢。

上諮詢詳慎。至再至三。乃命牛鈕韓葵。於御案傍批紅。所勾者凡二十有九人。

上召大學士。學士起居注官等。至懋勤殿。

上問學士徐乾學起居注官喬萊河工事。喬萊奏曰。從于成龍議。則工易成。百姓有利無害。若從靳輔議。則工難成。百姓田廬墳墓傷損必多。且隄高一丈五尺。束水一丈。比民間屋簷更高。伏秋時。一旦潰決。為害不淺矣。

上諭大學士等曰。朕雖未歷下河。而上河情形。曾目擊之。高家堰之水。減入高郵寶應諸湖。由湖而至運河。河隄決。始入民田。今兩人建議。皆係洩水以注海。雖功皆可成。畢竟于成龍之議便民。且開濬下河。朕欲拯救生民耳。實非萬不可已之工也。若有害於民。如何可行。于成龍所請錢糧不多。又不害百姓。姑從其議。著往興工。如工不成。再議未遲。○戊寅。

大學士等。以翰林院侍讀喬萊等公議摺子進呈。

上覽畢。諭曰。鄉紳之議如此。但未知百姓如何。濬河原以救民。靳輔所請。既與于成龍不同。或有累百姓。亦未可知。宜遣滿漢大臣有識見者。往詢土人。詳閱形勢。必期允洽。民情有利無害。方可舉行。遂命工部尚書薩穆哈。學士穆稱額。速往淮安高郵等處。會同徐旭齡。湯斌。詳問地方父老。期於兩旬內回奏。○刑部題。叛犯侯滿英家奴僕。應交內務府。

上命發與戶部入官。因諭曰。嗣後反叛旗丁。仍如例交該管衙門。其奴僕俱發戶部入官。著為例。○己卯。諭領侍衛內大臣舅舅佟國維。伯費揚古曰。原任都統鄂內。內大臣坤巴圖魯。皆

太宗時舊臣。効力年久。前雖軍中獲罪。事非由己。今罷職閒居。朕心深為憫念。俱授為散秩大臣。二人俱年老衰邁。能步履。令其上朝。如

不能則聽其家居。勿強也。爾等可即宣召。示朕優恤者。舊至意。○辛巳冬至祀

天於

圜丘。

上親詣行禮。○遣官祭

永陵。

福陵。

昭陵。

孝陵。

仁孝皇后。

孝昭皇后陵。○壬午。

上率王以下文武大臣侍衛等詣

太皇太后

皇太后宮。行冬至慶賀禮。御太和門。王以下文

武各官。上表朝賀。○甲申。

上詣

太皇太后宮。問安。○命多羅信郡王鄂扎。掌宗

人府事。○江寧將軍博霖。陸辭。

上諭曰。前此將軍副都統與地方官不和。各不相能。自遣瓦岱為將軍。衆志克諧。彼此和協。爾莅任後。務在輯睦。將吏撫恤軍民。待以一體。毋縱滿兵。擾害百姓。其勉力以副朕簡用之意。○乙酉。

上諭大學士等曰。今月朔日食。十六日月食。且比日積陰無雪。朕思天象稍有愆違。即當儆戒修省。或施行政事。有未當歟。或下有冤抑未得伸歟。爾等傳諭九卿詹事科道。詳議以聞。九卿詹事科道因入奏曰。

皇上寬仁御下。勵精圖治。凡於用入行政吏治民生。莫不精詳周至。民皆遂生樂業。乃猶有日月薄蝕。積陰不雪之象。是皆臣等才識闇淺。弗克稱職。以上干

天和。今惟洗心滌慮。實圖修省。仰副我

皇上敬承天戒之至意。○大學士等奉命撰擬蠲免河南湖圻及直隸山東被水州縣錢糧。諭旨進呈。中有海宇昇平等語。

上曰。今四方雖定。民生未盡悅安。朕宵旰不遑。勤求閭閻疾苦。每遇有利民生之事。惟恐行之稍遲。致民失所。孜孜不已。庶幾漸見太平。且古帝王。已治益求其治。已安益求其安。朕深自省惕。常慮始勤終怠。不克底於化成。若遽謂昇平。而泰然自足。非朕勤求上理之初意也。自後諭旨中。凡此矜張盈滿之言。勿復擬入。

十二月。丁亥朔。四川提督何傳疏請武官亦應丁憂。

上諭大學士等曰。孝者治天下之本。理應丁憂。且武官久任。非善事。在昔唐朝藩鎮驕蹇跋扈。皆由久典兵權之故耳。丁憂之例既定。自不致久任矣。著九卿議奏。○戊子。

上諭大學士等曰。朕昨召靳輔。于成龍。至內廷。將河圖一一詳詢。又令二人各出已見。互相論難。朕又問以淮安揚州等地。原係低窪瀦水。遂致成湖。彼處百姓。倘遇年旱。仍資湖水。

灌溉。況地既屬窪下。縱盡力決導。能令水盡涸乎。二人俱奏稱。不能盡涸。朕意水勢稍減。即有益於民。應依于成龍所言。挑濬海口。俾所蓄之水。得以通流。其有無利益之處。不久便見。但不知所需錢糧若干。始可敷用。王熙奏曰。據于成龍疏稱。錢糧不能預行估計。想從故道挑濬。似不大費經營。○九卿等議覆。吏科給事中楊周憲疏言。錢糧絲忽以下細數。不應刪去。其簡明賦役全書。當停其刊刻。

應毋庸議。

上顧吏部尚書達哈他等曰。爾等之意。皆同否。達哈他奏曰。錢糧事件。臣不能洞悉。但微細之數刪去。則檔冊簡明。似易查核。臣等今議將忽以下細數刪去。所刪之銀。不過數千兩。數目不多。臣等故同一議。

上曰。朕原不從所刪。些微錢糧起見。但論有益於民否耳。吏部尚書李之芳奏曰。戶部前奏將絲歸於毫。今臣等議將絲以上之數仍存。

忽以下之數刪去。如此。則便於查核。吏胥不得作弊。實有益於民。九卿等出。

上又顧曾任有司科道錢珏。任辰旦等問曰。此議畢竟有益於民否。錢珏等奏曰。臣等任知縣時。頗有錢糧細數繁多。檔案冗雜。由部駁至藩司。由藩司駁至州縣。展轉駁查。滋累民間。吏胥藉此作弊。若刪去忽以下細數。實於民有益。

上命如九卿議行。○陞鑲紅旗副都統苗齊納為本旗護軍統領。○喀爾喀色冷阿海台吉等遣使進九白年貢。宴賚如例。○庚寅。皇子允禩生。○以多羅貝勒察尼為奉天將軍。○辛卯。

上御太和門視朝。文武陞轉各官謝恩。次喀爾喀。厄魯特。進貢使臣等行禮。○內閣禮部遵旨議覆。賚外國例。朝鮮。西洋。荷蘭賜物素厚。不必復增。及暹羅王妃賞賜。亦仍如常遵行。嗣後琉球國王。應增緞三十疋。安南國王。

增緞二十疋。暹羅國王增緞十六疋。凡表裏各五十疋。吐魯番亦增緞六疋。從之。○壬辰。兵部議都統希佛等於黃草壩地方擊敗賊衆。為二等軍功。又都統勒貝等於石門坎第一崖口。擊敗賊衆。及前鋒統領沙納哈等於桂花寺地方。擊敗賊衆。俱為一等軍功。

上曰。進取雲南之兵。甚為勞苦。此三處俱改為頭等第一軍功。○阿霸垓多羅郡王沙克沙僧厄故。遣官致祭。○甲午。

上詣

太皇太后宮問安。○宗人府禮部遵旨議覆。王等應用金黃色馬韁。其紫色馬韁。原非定例。當用。應禁止。得旨。郡王之長子。貝勒。貝子。著用紫色馬韁。餘如議。○丙申。予福建陣亡蒙古佐領克什土祭葬如例。○丁酉。調鑲紅旗蒙古副都統阿爾法為滿洲副都統。○戊戌。

上詣

太皇太后

皇太后宮問安○兵部題浙江提督陳世凱等將洪符璵等來降官兵招致並非冒險招撫不准議叙。

上曰此等若不議叙難以鼓勵將來著仍議叙又議原任護軍統領佟佳等於四川雲陽等處擊敗逆賊譚弘三萬餘衆應准為三等軍功。

上曰此議三等軍功稍輕著改為二等軍功○和碩額駙花善所尚郡主薨逝遣官致祭○山東巡撫張鵬疏請曲阜縣顏氏地畝照孔氏例從輕徵糧以昭朝廷優恤聖賢後裔之意從之○免湖南茶陵湘鄉邵陽等州縣本年分旱災額賦有差○免山東濟寧州本年分水災額賦有差○己亥

上以歲暮致祭

孝陵是日啟行駐蹕薊州○庚子

上率王內大臣侍衛部院大臣詣

孝陵行禮奠酒舉哀又率王大臣等至

仁孝皇后

孝昭皇后陵奠酒舉哀是日駐蹕湯泉○辛丑上率王內大臣侍衛部院大臣詣

孝陵於

隆恩殿行大祭禮○遣和碩恭親王常寧祭仁孝皇后

孝昭皇后陵是日

上回鑾駐蹕馬伸橋○壬寅

上駐蹕三河縣○癸卯

上回宮○甲辰

上詣

皇太后

皇太后宮問安○陞兵部左侍郎管右侍郎事

佛倫為都察院左都御史○陞護軍叅領康

喀喇為鑲紅旗蒙古副都統○諭戶部大通

橋等倉尚有積弊應將各部院曾經保舉者

差遣其內務府保舉者停差○兵部議副都

統額赫納等於廣東韶州擊敗馬寶賊衆為

二等軍功。都統勒貝等。於廣西新村。擊破吳世琮。為四等軍功。

上曰。馬寶。吳世琮。俱係逆賊渠魁。此處議叙尚輕。著各加一等。○刑部題。旗人史書等。辱罵順天府府丞王維珍。經王維珍舉首。應將史書等。枷一月。鞭一百。

上諭大學士等曰。旗下惡棍。辱罵職官。如此輕處。何以儆戒衆人。著查康熙十八年定例呈奏。於是大學士等奏康熙十八年曾經九卿定議。諸王及大臣僕人。有干預詞訟。索取財物者。其主知情。從重議處。僕人初三月。鞭一百。其主不知情。僕人以光棍治罪。

上曰。此情最為可惡。著從重治罪。伊主一併察議。此等事甚多。舉首者少。王維珍不顧情面舉首。可嘉。著議叙。勒德洪奏曰。其主乃康熙親王傑書也。

上曰。朕止論事之是非。不論其為何人也。○癸丑。

上詣

太皇太后宮問安。○甲寅。歲暮。祫祭

太廟。

上親詣行禮。○遣官祭

永陵。

福陵。

昭陵。○遣官祭太歲之神。○乙卯。賜朝正外藩

科爾沁扎魯特土默特。郭爾羅斯索曼喀爾喀。鄂爾多斯。扎賴特。杜爾伯特。吳喇忒。阿霸

垓諸王。貝勒貝子。公。台吉。及內大臣。大學士。

上三旗都統。副都統。尚書侍郎。學士。侍衛等

宴。○旌表八旗節婦。滿洲西忒庫妻覺羅氏

等三十五人。蒙古德伯楞妻顧氏等二人。漢

軍武景芳妻張氏等三人。烈婦滿洲朱麻喇

妻塞氏一人。各給銀建坊如例。○是歲。人丁

戶口。二千三十四萬一千七百三十八。田。地。

山。蕩。畦地。五百八十九萬一千六百二十三

頃。三十七畝有奇。徵銀二千七百二十一萬

六百四十九兩有奇。米、豆、麥六百九十一萬二千二百一十三石四斗有奇。草三百二十九萬二千二百八十七束。茶十五萬九千三百一十五引。行鹽四百三十五萬六千一百五十引。徵課銀二百七十六萬一千三百八兩有奇。鑄錢二萬九千四百八十五萬一千四百八十有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二十四

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣翁同龢

總裁官光祿大夫文華殿大學士兼吏部尚書臣朱軾等奉

敕修

康熙二十五年丙寅春正月丙辰朔

實錄卷一百二十四

上詣

堂子行禮還宮拜神畢率諸王貝勒貝子公內

大臣大學士侍衛等詣

太皇太后

皇太后宮行禮御太和門王以下文武各官外

藩王及使臣等上表朝賀照例筵宴朝鮮

國王李燾遣陪臣李侶等表賀冬至元旦

萬壽節及進歲貢禮物宴賚如例戊午

上詣



太皇太后

皇太后宮問安○壬戌。

世祖章皇帝忌辰。遣官祭

孝陵○乙丑。孟春。享

太廟。

上親詣行禮○遣官祭太歲之神○丙寅。順天

府進春○戊辰。

上詣

太皇太后

皇太后宮問安○先是。理藩院奏。尼魯特巴圖

爾額爾克濟農。攜其屬七百八十人將至。遣

官往迎。

上曰。巴圖爾額爾克濟農所屬亦限以二百人

入關。餘者留歸化城。則見在噶爾丹之貢使。

可無辭矣。茲當嚴冬之際。行李牲畜盜賊可

虞。歸化城都統古睦德見以年節來覲。可令

速回監視。著遣戶部理藩院司官各一員。前

往宣化府。優給供應。至是。巴圖爾額爾克濟

農至京朝見。筵宴畢。

上以御服貂裘賜之○己巳。以上元節。賜外藩

科爾沁。扎魯特。蘇尼特。土默特。郭爾羅斯。翁

牛特。四子部落。教漢。索曼喀爾喀。喀喇沁。鄂

爾多斯。扎賴特。巴林。杜爾伯特。兵喇忒。克西

克騰。阿霸垓。歸化城。駐扎土默特。尼魯特。諸

王。貝勒。貝子。公。台吉。及內大臣。大學士。上三

旗都統。副都統。尚書。侍郎。學士。侍衛等宴。宴

畢。復召滿漢大學士以下。科道掌印官等。以

上進。

乾清宮賜宴○庚午。上元節。賜外藩諸王。貝

勒。貝子。公。台吉等。及內大臣。大學士。上三旗

都統。副都統。尚書。侍郎。學士。侍衛等宴○辛

未。

上詣

太皇太后宮問安○

上幸南苑行圍○壬申。差副都統馬喇等往黑

龍江督理農務。因諭之曰。農事關係兵餉。須

積貯充足。其在驛遞人夫。亦令合力播種屯田。爾等前往。務期農政修舉。收穫饒裕。年勝一年。懋著成效。以副朕意。○甲戌。諭大學士勒德洪。學士麻爾圖。曰。者大兵往征鄂羅斯。破雅克薩城。釋鄂羅斯不誅。赦之。使生還。其時不並取厄布潮地者。蓋以厄布潮地畫為疆索。使鄂羅斯不得越厄布潮界。界外聽其捕牲也。今薩布素等奏言。鄂羅斯復來城雅克薩地。今當即往征而滅之。耶。抑或緩之。以待黑龍江墨爾根地。將士移家定。然後進兵為宜耶。令議政王。貝勒。大臣。及與鄂羅斯之役。彭春。佟寶。班達爾沙。郎談。同爾等會議以聞。○雲南貴州總督蔡毓榮題。逆苗王騰龍等聚眾剽掠。應行征剿。

上諭大學士等曰。苗蠻賦性樸實。不敢生事。祇以地方該管官。不克平情撫恤。反需索馬匹金銀。誅求無已。不能供應。遂生釁端耳。前逆賊吳三桂。亦因需索水西。不遂貪欲。捏奏水

西反叛。竟自發兵剿滅。盡取其利。以為已有。今苗蠻之事。恐亦類此。○賜朝正外藩王。貝勒。貝子。公。台吉等銀幣鞍馬有差。○乙亥。厄魯特巴圖爾額爾克濟農謝恩。入見。

上召近前。諭之曰。爾祖顧什汗。於

太宗文皇帝朝。輸誠進貢。是時同達賴喇嘛來通款。爾叔鄂齊爾圖車臣汗。當

世祖章皇帝時。竭抒忠悃。每年進貢請安。其土產白鷹。以時來貢。朕猶及見之。夫貢物何足

珍貴。正鑒其誠敬之心耳。及爾等厄魯特內亂。噶爾丹攻滅鄂齊爾圖車臣汗。並吞其眾。

遣使獻俘。朕念前此鄂齊爾圖車臣汗。勉効忱悃。聞其破亡。且加憫恤。何忍受之。因諭來

使。却其所獻俘獲。項者爾為噶爾丹擊敗。奔來邊境。將沿疆附近居民牲畜等物偷盜侵

奪。朕即應正爾犯邊之罪。何難遣兵剿除。但念爾昔時。頗竭誠款。爾復引罪自首。以迫於

饑窮。瀕死妄行等情奏請。朕即寬宥。今若徒

爾於邊境內外不拘何地居之。爾敢不凜遵。特念爾祖顧什汗。爾叔鄂齊。爾圖車臣汗。素效恭謹。故俾爾絕者復繼。散者復聚。欲使鄂齊。爾圖車臣汗之孫。羅卜臧。滾布阿拉布坦。與爾聚處。爾等宜相與輯睦。善自安業。至於爾等聚合與否。在朕本無損益。惟是朕為天下主。凡在函蓋。咸欲使之共樂太平。朕茲諭旨。自爾身及爾子孫當世。世念之勿替。○封和碩安親王岳樂子吳爾占為多羅貝勒。鎮國公蘇努子富爾金為輔國公。授多羅信郡王鄂扎庶出子扎爾布。輔國將軍吳錫子席津。輔國將軍巴爾堪子阿爾蘇。俱為三等奉國將軍。奉國將軍鄂內子僧保。席理。渾子達賚。俱為奉恩將軍。○辛巳。祈穀於

上帝。

上親詣行禮○

上詣

太皇太后宮問安○壬午。調刑部右侍郎傅臘

塔為兵部右侍郎○和碩額駙耿昭忠故。遣大臣一員侍衛十員。往奠茶酒。賜銀五百兩。發引時。遣內大臣侍衛等往送○癸未。降鎮國公白壽為鎮國將軍。以上元失朝故也○陞護軍叅領邁圖為正白旗蒙古副都統○甲申。

上詣

太皇太后

皇太后宮問安○吏部題定例。京官六年考察。自康熙十八年三月。扣至康熙二十四年三月。已滿六年。例應舉行考察。去年三月。臣部會同都察院題請。奉有今年著停止。俟來年舉行之旨。今康熙二十五年。應行京察。得旨。著候旨行○江南道御史嚴曾梁疏言。近禮部奉命開館纂修一統志書。適臺灣金門廈門等處。已屬內地。設立郡縣。文武官員。請敕禮部。增入通志之內。又廣東添設花山縣治。通志所未載。亦請照例增修。疏入。下部議行。

二月乙酉朔○丙戌大計天下。卓異官四十  
九員。貪酷官二十員。貪官五十五員。酷官四  
員。不謹官六十三員。罷軟官五十五員。年老  
官二百二十九員。有疾官七十二員。才力不  
及官一百十員。浮躁官六十七員。分別陞賞  
處分如例○給陝西陣亡八旗驍騎校馬喇  
希等三十三員。各一拖沙喇哈番世職○給  
四川陣亡二等阿達哈哈番叅贊副都統擴  
爾昆。拜他喇布勒哈番。又一拖沙喇哈番。為  
三等阿思哈尼哈番世職○九卿遵旨議覆。  
四川提督何傳請武官照文職丁憂一疏。仰  
惟我

皇上孝治天下。文武一體。嗣後提鎮以下。如奉  
特旨留任者。應令在任守制。其副將叅將以  
下等官。如係緊要地方缺。該督撫提鎮題留  
者。准其在任守制。餘俱令解任守制。得旨。依  
議。守制關乎孝道。人子之心。各宜自盡。文武  
一體。極為合理。間有應留者。候臨期酌定○

丁亥。遣大學士吳正治祭

先師孔子○陞內閣學士丹岱為刑部右侍  
郎○禮部議覆差往朝鮮國審事護軍統領  
佟寶疏言。朝鮮國王李煊。前屢次獲罪。俱荷  
皇上洪恩寬宥。理應益加恪慎。乃平日不將人  
民禁飭。以致韓得完等二十八人。違禁越江  
採參。復擅放烏鎗。將欽差繪畫與圖官役打  
傷。殊干法紀。請將該國王罰銀二萬兩。以警  
疎縱。應如所請。從之○戶部議覆廣東巡撫  
李士楨疏言。粵東濱海小民。藉鹽資生。從前  
江西南贛兩府。俱食粵鹽。因康熙元年禁海  
以來。粵東路阻。改食淮鹽。今粵省平定。請循  
舊例。令南贛兩府。仍食粵鹽。銷引。應如所請。  
從之○戊子。祭

大社

大稷。

上親詣行禮○己丑。喀爾喀扎薩克圖汗遣使  
進九白年貢。宴賚如例○庚寅。引見直隸各

省朝覲官員。

上詳問各官條奏事宜。及職銜履歷。諭科道等官曰。頃浙江按察使佟國佐奏。饑民為盜。請寬減其罪。天下焉有不饑不寒而為盜者。若以饑寒所迫為辭。將為盜者竟可不坐罪乎。藩臬條奏。應以地方利弊。關係重大者入告。今伊等所言。大都皆職司之內平等事務。非甚要緊於地方。亦未有裨益。○辛卯。吏部等衙門會題。直隸巡撫崔澄。於康熙二十四年大計。卓異。永平府知府佟世錫。查佟世錫聲名不好。應照例革職。該撫以應去之員。反舉卓異。應降四級調用。從之。○先是九卿等議覆工部尚書薩穆哈。學士穆稱額等。往勘下河。議海口暫停開濬。應如所請。得旨。海口不行開濬。則泛溢之水無歸。濬之使水有所洩。高郵等處淹浸田畝。可以涸出。令于成龍。薩穆哈。穆稱額。同九卿集議之。至是九卿奏奉差大臣。及該督撫親歷河干。問河濱百姓。僉

謂挑濬海口無益。應行停止。

上問大學士等曰。于成龍云何。大學士等奏曰。于成龍言。欲開濬海口。必修治串場河。其費約百餘萬。臣等議。以此工果有裨益。即費至千萬。亦所不惜。今以百萬帑金。嘗試於未必可成之工。不若留此以備各處賑濟。

上曰。海口關係民生。自應開濬。今九卿及于成龍等。僉議停止。且視今歲水勢如何。再酌之。

○壬辰。

太皇太后聖壽節。

上率王以下。文武大臣侍衛等詣

太皇太后宮。行禮。遵

懿旨。停止筵宴。○癸巳。

上御保和殿。直隸各省朝覲官員行禮。鴻臚寺

官宣讀

上諭。諭曰。國家三載考績。原以崇獎廉善。擯斥貪殘。必吏治澄清。庶民生安樂。今當大計。已

嚴飭所司。重懲貪酷。餘俱如例降革。其有眾

論不孚。是非失實者。特點一二。以警積玩外。姑准爾等仍服原官。爾等平日官評賢否。公論昭然。若值會推。輒鑽營奔競。以圖僥倖。居心先已不肖。何以率屬莅民。且凡朝覲之期。每因仍陋習。借端科派。大小相循。私通交際。是察吏本以安民。而反以擾民。甚非朕激揚清濁至意。嗣後務須洗滌肺腸。勉圖自新。毋貌承心違。蹈常襲故。國憲具存。決不爾貸。○甲午。

上詣

太皇太后宮問安。○理藩院左侍郎明愛。以老疾乞休。允之。○減廣東海關徵收洋船額稅十之二。○諭兵部。工部。黑龍江軍前需用火藥礮子。所關最要。俟草青時。派上駟苑。太僕寺。駱駝二百匹。量發火藥礮子。及新鑄之礮。再選藤牌兵百人。付班達爾沙。即談率往。令內府佐領下護軍校滿舍奇。宜番等偕行。○乙未。

孝康章皇后忌辰。遣官祭。

孝陵。○陞內閣侍讀學士賽弼漢為內閣學士兼禮部侍郎。○丙申。

上詣

太皇太后

皇太后宮問安。○先是。

上以各關採買銅餉價值不敷。恐累商人。令大學士等傳集舊任關差各員。逐一問明。并問四季造冊送部。果否有益。至是大學士等奏曰。臣等遵旨問舊任關差各官。據稱部定銅餉價值六分。採買不敷。其各差造冊。四季報部。不如改令差滿之日。一并彙送。

上曰。國家設關權稅。原以阜財利用。恤商裕民。必徵輸無弊。出入有經。庶百物流通。民生饒裕。近來各關差官。不恪遵定例。任意徵收。官役通同。恣行苛虐。託言辦銅價值浮多。四季解冊需費。將商人親填部冊。改換塗飾。既已充肥私索。更圖溢額。議叙重困商民。無裨國

計。種種情弊莫可究詰。朕思商民皆我赤子。何忍使之苦累。今欲除害去弊。必須易轍改絃。所有見行例。收稅溢額。即陞加級紀錄。應行停止。其採辦銅勛。定價既已不敷。作何酌議增加。其四季達部冊籍。應俟差滿一次彙報。嗣後務令各差潔已奉公。實心釐剔。以副朕體下恤商至意。如或仍前濫徵侵隱。藐玩不悛。作何加等治罪。至銅價既議加給。稅額應否量增。俱著九卿詹事科道詳議具奏。○

予廣西陣亡鑲白旗江寧佐領薩珠瑚祭葬如例。○丁酉。陞管理下河事務原任江南安徽按察使于成龍為直隸巡撫。○陞兵部郎中圖爾宸為甘肅布政使。司布政使。○衍聖公孔毓圻疏言。臣奉命纂修幸魯盛典。自維學問淺陋。不敢獨任搢觚。今採訪得江南進士金居敬。浙江進士俞兆魯。江南舉人孫致彌。叢克敬。直隸候選知縣章緯。山東候選小京職沙汝洛。江南貢生葉湜。浙江生員曹晃

等八人。人品純粹。學問優長。堪任纂修之役。請敕部咨取。赴館編纂。共襄厥事。從之。○予故廣西提督哲爾肯祭葬如例。○先是黑龍江將軍薩布素奏。驍騎校碩格色等。往探羅刹情形。至旁臥地方。因人少馬疲。未抵雅克薩而還。途遇奇勒爾勤定吉爾云。羅刹復來。雅克薩築城盤踞。臣請於冰消時督修船艦。親率官兵相機進剿。

上以薩布素所奏。乃傳聞之言。並非遣人親抵雅克薩偵取確音。不便遽爾用兵。因令薩布素及理藩院郎中滿丕等。確探情形以聞。至是滿丕奏。臣遣索倫副頭目烏木布爾代等。抵雅克薩城。生擒羅刹鄂克索木果。訊之云。去歲尼布潮頭目宜番。令大兵釋歸之額禮克謝。率五百餘人。復至雅克薩。依舊址築城。及訊以糧米可食幾月。又云所獲足支二年。疏入。

上諭。今羅刹復回雅克薩築城盤踞。若不速行



撲剿勢必積糧堅守圖之不易。其令將軍薩布素等姑停遷移家口。如前所請速修船艦。統領烏喇寧古塔官兵。馳赴黑龍江城。至日酌留盛京兵鎮守。止率所部二千人。攻取雅克薩城。并量選候補官員。及見在八旗漢軍內。福建藤牌兵四百人。令建義侯林興珠率往。○己亥。

上御太和門視朝。文武陞轉各官謝恩。次厄魯特喀爾喀進貢使臣等行禮。○

上詣

太皇太后宮問安。○庚子。諭大學士等。近雲貴督撫及四川廣西巡撫。俱疏請征剿土司。朕思從來控制苗蠻。惟在綏以恩德。不宜生事騷擾。今覽蔡毓榮奏疏。已稔悉其情由。蓋因土司地方所產金帛異物頗多。不肖之人。苛求剝削。苟不遂所欲。輒以為抗拒反叛。請兵征剿。在地方官。則殺少報多。希冒軍功。在土官。則動生疑懼。攜志寒心。此適足啟釁耳。朕

惟以逆賊剿除。四方底定。期於無事。如蔡毓榮主繼文。哈占等身為督撫。不思安靜撫綏。惟誅求無已。是何理也。前出征雲南。趙良棟將彼等過端。幾至發露。穆占之家人舉首。朕寢其議。若此等尚多。朕無不洞悉。但事係已結。朕不復究。置之寬宥。至雲貴督撫居官殊無善狀。或地處遼遠。朕不悉知。亦未可定。爾等將此諭旨傳示九卿詹事科道。令其詳議具奏。尋九卿等會議。王司剗掠應救該督撫剿撫並用。請頒

上諭通行曉諭。從之。○轉理藩院右侍郎喇巴克為左侍郎。陞內閣學士穆稱額為理藩院右侍郎。○辛丑。喀爾喀固山貝子巴忒瑪故遣官致祭。○癸卯。以監察御史傅拉塔為陝西布政使。司布政使。原任貴州按察使李國亮為江蘇按察使。司按察使。○甲辰。以蔡修太祖高皇帝實錄。聖訓告成。上御太和門。立視捧送。

實錄。

聖訓進宮畢。升座。監修總裁等官。上表行禮。次王以下。文武各官。行慶賀禮。鴻臚寺官宣讀上諭。諭曰。

太祖高皇帝。聖德神功。編輯成書。朕心忻悅。與卿等同。是日。賜監修總裁。總裁。副總裁。纂修各官。宴於禮部。并賞賚如例。

上詣

太皇太后宮。問安。○乙巳。旌表福建節婦林翊妻連氏。王章妻祝氏。包集球妻藍氏。魏大壯妻黃氏。烈女陳爾臯聘妻林氏等。各給銀建坊如例。○丙午。敕政治典訓總裁官大學士勒德洪等曰。朕繼承丕基。孜孜圖治。宵旰兢業。一十五年於茲。賴

天之靈。

宗廟之福。蠢爾小醜。以次削平。眷念吾民。雖甫休息。而閭井未盡安樂。風俗未臻淳古。永惟治忽所繫。實在朕躬。日不遑寧。勤求至道。行

一政。惟恐或戾舊章。發一言。惟恐未孚衆志。朕心乾惕。常用歎然。乃臣僚援古時政。日曆及前朝寶訓體例。請將歷年政令。編輯成書。朕未之許。在廷諸臣。合詞懇至再三。因思古之帝王。建極陳常。言期可法。行期可則。哀其政事。著為一編。用以式訓臣民。昭茲來許。厥有故事。方策具存。茲特允所請。定名曰政治典訓。命卿等為總裁官。其董率在館諸臣。恪勤乃事。以時綴錄。惟質毋飾。惟核毋浮。豈徒云徵諸庶民。質諸百世。朕夙寤晨興。思艱圖易。萬幾在御。日慎一日。藉用自考。以比古者省歲之意。庶幾茂登上理。久道化成。卿其勉之。○遣官祭

先農之神。○以司經局洗馬李應薦。充日講起居注官。○賑濟山東鄆城等五州縣饑民。○丁未。諭吏部。兵部。我國家掃除逆孽。平定遐荒。即負山阻箐之苗民。咸輸誠供賦。封疆大吏。自宜宣布德意。動其畏懷。俾習俗漸馴。

無相侵害。庶治化孚於遠邇。近見雲南貴州廣西四川湖廣等處督撫提鎮各官。不惟不善加撫綏。更爾恣行苛虐。利其土產珍奇貨藏。饒裕輒圖入己。悉索未遂。因之起釁。職為厲階。蠱爾有苗。激成抗拒。即擅殺一二。謊稱累百盈千。始贖貨以生端。既邀功而逞志。藐玩因循。殊負委任。朕思土司苗蠻。授官輸賦。悉歸王化。有何杌隉。互相格鬪。無有寧居。嗣後作何立法。務令該地方督撫提鎮等官。洗心易慮。痛改前轍。推示誠信。化導安輯。各循土俗。樂業遂生。亦令苗民恪遵約束。不致侵擾內地居民。以副朕撫馭遐方至意。著九卿詹事科道會同逐一詳議具奏。○陞太常寺卿敦多禮為內閣學士兼禮部侍郎。○戊申。上幸南苑行圍。○議政王大臣等議覆理藩院題外藩四十九旗管旗扎薩克及索倫總管。請俱照內都統例各頒給印一顆。應如所請。從之。○己酉。太常寺以文華殿告成。經筵前

一日。例應祭

先聖先師於傳心殿。或

皇上親詣行禮。或遣官恭代。請旨。

上曰。經筵大典。於文華殿初次舉行。先聖先師道法相傳。昭垂統緒。炳若日星。朕遠承心學。稽古敏求。效法不已。漸近自然。然後施之政教。庶不與聖賢相悖。其躬詣行禮。以彰景仰之意。○庚戌。

孝昭皇后忌辰。遣官祭

陵。○辛亥。春分。朝

日於東郊。遣內大臣舅舅佟國維行禮。○

上詣

太皇太后宮問安。○九卿等議覆入覲四川松威道王鵬條奏。四川楠木採運艱難。應行停減。

上曰。蜀中屢遭兵燹。百姓窮苦已極。朕甚憫之。豈宜重困。今塞外松木材大可用者甚多。若取充殿材。即數百年可支。何必楠木。著停止。

川省採運○工部右侍郎席特納以老乞休  
允之○壬子以舉行經筵大典

上詣傳心殿告祭

先聖先師○癸丑

上御經筵講畢賜大學士九卿詹事及講官等  
宴○吏部議覆入覲廣西按察使黃性震疏  
言粵西南寧太平慶遠思恩西府上司雜處  
瘴癘薰蒸官斯土者病亡接踵請敕該督撫  
就近選擇熟悉風土廉能官員如三年內果

稱厥職照臺灣例即加優陞以示鼓勵應如  
所請嗣後此四府所屬各官吏部停止銓選  
令該督撫於品級相當見任官員內揀選通  
判知縣以上具疏保題調補雜職等官止令  
報部註冊照臺灣例論俸陞轉從之○甲寅  
上詣

太皇太后

皇太后宮問安○裁陝西隴右道臨洮府同知  
平涼府通判布政使司都事按察使司知事

行都司司獄平涼府照磨固原州州同靜寧  
州州判寧州州同慶陽衛經歷鞏昌府照磨  
三岔驛驛丞西津驛驛丞殺賊驛驛丞摩雲  
驛驛丞等缺○賜直隸各省卓異官四十九  
員蟒服○以正白旗內大臣津進為領侍衛  
內大臣

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十四

大清聖祖合天弘運文武睿哲恭儉寬裕考敬誠  
信中和功德大成仁皇帝實錄卷之一百二十五

監修總裁官光祿大夫大學士兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣嵇廷錫

總裁官光祿大夫文華殿大學士兼吏部尚書臣朱軾等奉

敕修

康熙二十五年丙寅三月乙卯朔直隸巡撫

實錄卷一百二十五

于成龍陞辭諭曰爾自居官以來廉慎官方  
朕所素知今直隸地方關係緊要一切利弊  
應興應革者甚繁如何釐舉于成龍奏曰直  
隸地方以弭盜為第一要務為盜者倚仗旗  
下名色或嚇詐或剽掠無所不為有司明知  
而不敢深究嗣後旗下有如前不法者臣當  
執法究治

上曰直隸旗下各莊人戶不守法度爾須執法  
嚴治不得瞻徇顧忌朕留心民瘼外事無不

周知即如工部所用車輛係發價見催今俱  
派取州縣如此積弊不止一端爾到任逐一  
查明奏聞爾固宜正己率屬廉潔愛民亦宜  
寬以濟猛勿過刻也且居官不善縱或漏網  
亦將禍及子孫爾須有始有終實心實事從  
國計民生起見盡力為之于成龍辭出隨賜  
白金一千兩表裏二十端○予故太子太保  
和碩額駙耿昭忠祭葬諡勤僖○丙辰

上詣

太皇太后宮問安○遣官祭

歷代帝王○陞光祿寺卿阿山為太常寺卿

○戶部議覆人覲江蘇布政使章欽文疏言  
國家首重錢糧藩司一省總匯起解批收若  
非釐剔有法則百弊叢生臣到任後即將解  
批一項具詳撫臣檄行各屬凡州縣起解錢  
糧銀批同解銀存司堂批投撫署登記之後  
發司限日收掣當堂驗兌出具實收同批一  
并呈繳撫臣驗銷即從撫臣衙門遞發該州

縣存案。其有批無銀。并款項不符者。詳請提究。是以解夫清楚。並無纖毫淆混。臣思江蘇賦額繁重。行之而效。則他省易行可知。祈敕部通行各省。一例舉行。以清批收夙弊。應如所請。直隸各省一應起解錢糧。俱照江蘇例舉行。從之。○禮部議覆。入覲廣西布政使教化。新疏言粵西土司僻處邊徼。不識詩書。不明禮義。狠悍成性。請敕該撫諭令各土司官。有願送子弟就近府州縣讀書者。命該教官收納訓誨。應如所請。從之。○予故三等阿思哈尼哈番覺羅布祜祭葬如例。○丁巳。諭大學士等。各省晴雨。不必繕寫黃冊。特本具奏。可乘奏事之便。細字摺子。附於疏內。以聞。○戊午。命巡城御史修理五城棲流所。安插就賑流民。○己未。

上詣

太皇太后宮問安。○命纂修一統志。以大學士勒德洪。明珠。王熙。吳正治。宋德宜。戶部尚書

余國柱。左都御史陳廷敬。為總裁官。原任左都御史徐元文。內閣學士徐乾學。翰林院學士張英。詹事府詹事郭棻。翰林院侍讀學士高士奇。庶子曹禾。為副總裁官。翰林院侍讀彭孫適。編修黃士塤。錢金甫。田需。吳涵。史夔。許汝霖。周金然。檢討徐嘉炎。吳任臣。金德嘉。吳苑。王思軾。中允米漢雯。贊善黃與堅。候補中允胡會恩。吏部郎中顏光敏。大理寺評事高層雲。見修明史。食七品俸。姜宸英。萬言。二十人為纂修官。并命陳廷敬。徐乾學。專理館務。○吏部議覆。入覲廣東按察使胡戴仁疏言。粵東尚逆舊兵。編入將軍上三旗者。與粵民夙有恩讐。訟獄迭起。每委官審理。兩造爭執不服。若不設立專官。鮮能彈壓。惠州府郡小事簡。見有同知。通判。二員。請酌量改一官。為理事廳。查廣東原無理事員缺。應無庸議。得旨。旗兵駐防江寧。杭州。俱設理事廳官。其西安。荊州。鎮江。福州。廣州等處。均有旗兵駐

防。應將本省事簡地方官員內酌量改設理事廳官一員○旌表江南節婦錢氏顧氏文氏周氏沈氏湯氏潘氏李氏于氏曹氏周氏楊氏施氏金氏唐氏朱氏陸氏邱氏徐氏烈婦徐氏謝氏等各給銀建坊如例○壬戌。

上詣

太皇太后

皇太后宮問安○工部右侍郎金汝祥通政使司通政使王守才以不稱職解任○癸亥陝西布政使傅拉塔甘肅布政使圖爾宸陞辭諭曰凡外官赴任時每自稱可保無過及身至地方未見有為國利民者每與所奏之言大相違謬陝西百姓適來勞苦爾等宜殫心竭力為國為民以副職任○陞江西贛南道丁燾為湖北按察使司按察使○甲子調總督倉場侍郎沙賴為工部右侍郎○陞陝西漢中副將馬子雲為四川北總兵官○丙寅清明節遣官祭

永陵

福陵

昭陵

孝陵

仁孝皇后

孝昭皇后陵○

上幸玉泉山○丁卯。

上詣

太皇太后宮問安○禮部議覆入覲湖南布政使張仲舉疏言宋儒程顥程頤張載邵雍朱熹各有專祠祈賜

御書匾額應如所請得旨前哲有功聖學允宜表彰著依議行○予故原任工部侍郎高辛傳祭葬如例○戊辰轉工部右侍郎陳一炳為左侍郎陞翰林院掌院學士孫在豐為工部右侍郎○陞太常寺卿徐元珙為通政使司通政使○己巳。

上詣



太皇太后宮問安○庚午。召刑部。都察院。大理寺。大小諸臣。面諭曰。刑曹民命攸關。國典所係。今見法司讞鞫刑獄。或恐不得其情。專事苛刻。夫人命關係重大。必以中正之心。行平恕之道。使法蔽其辜。毋縱毋枉。必得真情。始免屈抑。若惟以深文為能事。鍛煉為盡職。及獄詞既具。奏牘既成。即反覆推詳。欲求其更生之路。亦甚難矣。朕於爾諸臣所上章疏。有情可矜疑。罪未允協者。皆駁令覆審。嗣後其各體朕懷。殫竭心慮。矢慎天明。以副朕祥刑之意。朕披閱史冊。採擇歷代賢臣慎刑事績。書之簡牘。內閣三法司官其詳加省視。

上又諭曰。刑法者。專以禁戢兇暴。若豪強奸慝。固難寬宥。其貧賤愚昧者。畧施寬貸。亦未嘗不可耳。○壬申。

萬壽節。停止朝賀筵宴○

上詣

太皇太后

皇太后宮行禮○遣官祭

福陵。

昭陵。

孝陵。

仁孝皇后。

孝昭皇后陵○遣官祭真武東嶽城隍之神○  
癸酉。調戶部右侍郎蘇赫為總督倉場侍郎。  
陞內閣侍讀學士索諾和為光祿寺卿○陞  
河南河北道田慶魯為福建按察使司按察  
使○甲戌。諭吏部。江寧巡撫湯斌在講筵時。  
素行勤慎。朕所稔知。及簡任巡撫以來。潔已  
率屬。實心任事。允宜拔擢大用。風示有位。特  
授為禮部尚書。管詹事府事。見任詹事郭蔭  
少詹廬琦。歸允肅。著照舊留任。詹事朱馬泰。  
著對品調用。少詹拉巴色度。著解任。照伊原  
品。隨旗上朝○乙亥。

上幸玉泉山駐蹕○以翰林院學士張英為翰林院掌院學士。仍兼禮部侍郎○禮部題。

皇上御門聽政。大典攸關。嗣後令滿漢科道官各一員侍班。糾叅一切失儀官員。從之。○丁丑。調兵部右侍郎傅臘塔為戶部右侍郎。○戊寅。

上移駐南苑。○賜衍聖公孔毓圻等宴於禮部。○以安南國進貢陪臣阮廷滾中途病故。命地方官致祭如例。○庚辰。

上回宮。○吏部等衙門議覆左都御史佛倫疏言。三年大計。令各省藩臬齋冊入覲。即將地方情形及興革利弊具疏陳奏。查藩臬專理一省錢穀刑名。伊等來京朝覲之後。委員代理。或致錢穀刑名款項舛錯稽遲。亦未可定。雖有條奏。不過細事塞責。況道途供應。或不肖官員借端私派。嗣後大計。請將各省藩臬及各府佐貳官員入覲之例。通行停止。照慶賀。

萬壽表章例。每省委道官一員齋冊入覲。至官員賢否去留。止以督撫文冊為憑。造五花冊。

三本。分送吏部、都察院、吏科。其藩臬二司所造冊籍。分送各部院科道司等項。亦請停止。以省無益繁費。均應如所請。從之。○陞內閣侍讀學士尹泰為詹事府詹事。○壬午。

上詣

太皇太后

皇太后宮問安。○陞廣東惠州副將劉詔為廣東順德總兵官。○予故蒙古副都統巴圖。祭葬。諡恪敏。○甲申。調刑部右侍郎丹岱為兵部右侍郎。○陞通政使司左叅議成其範為太常寺卿。○內大臣伯郎素故。遣領侍衛內大臣公頗爾。發引時。遣領侍衛內大臣公頗爾。盆侍衛十員往送。

夏四月乙酉朔。享

太廟。

上親詣行禮。

上詣

太皇太后宮問安○理藩院疏言達賴喇嘛所遣噶爾丹西勒圖約於今歲閏四月至喀爾喀墨爾根台吉處為期已近應遣大臣莅盟奏入。

上命尚書阿喇尼台吉巴忒馬什畢力克圖喇嘛阿齊圖綽爾濟前往又以喀爾喀七旗地方遼濶右翼扎薩克圖汗處遣歸化城鄂木布丹津扎木素格隆員外誥木齊岱去額爾德尼濟農盆楚克拉卜坦處遣德木齊達爾漢格隆員外馬廸去色冷阿海台吉處遣滾布格隆員外阿爾必特祜去達爾瑪希禮處遣大喇嘛丹津格隆員外巴牙思呼朗去遵義盆楚克台吉處遣德木齊卓特拔達爾扎格隆員外沙哈里去額爾克濟農處遣薩木坦額木齊格隆員外費顏圖去左翼土謝圖汗澤卜尊丹巴胡土克圖處遣大喇嘛垂重格隆郎中喀拉去車臣汗處遣喇克巴格隆員外達虎去信順厄爾克戴青處遣丹巴色

爾濟格隆員外保住去墨爾根濟農處遣額木齊格隆郎中安布祿去○賜喀爾喀七旗汗濟農台吉等敕曰朕統御寰宇中外一體務使交相輯睦共享昇平乃爾右翼扎薩克等內自相亂兄弟人民多歸左翼其左翼扎薩克兄弟人民亦有歸於右翼者爾等以兄弟之親互相吞并異日必致交惡生亂朕心惻焉康熙二十三年魯頒敕於達賴喇嘛議共遣使諭和爾等而達賴喇嘛亦謂朕俯念道法慈憫衆生有如父母意甚善也特遣噶爾丹西勒圖前來朕亦命尚書阿喇尼台吉巴忒馬什畢力克圖喇嘛阿齊圖綽爾濟等與之偕往爾汗濟農台吉等當仰體朕意及達賴喇嘛之心盡釋舊怨將兄弟人民各歸本扎薩克令其和協照舊安居不但仰副朕命與達賴喇嘛之意即爾七旗永無離散之苦爭鬪之害福祿所綏亦且無疆矣是時喀爾喀右翼扎薩克圖汗歿其子噶爾旦台吉請襲父職允之并命阿喇尼因便致祭○丙戌

免江南徽廬鳳三府屬州縣。康熙十七年。民欠地丁屯折等銀二萬九千五百餘兩。米一千一百九十八石零。○丁亥。

上詣

太皇太后宮問安。○調浙江巡撫趙士麟為江寧巡撫。福建巡撫金鑒為浙江巡撫。○戊子。戶部等衙門遵旨議覆。

皇上軫念商民。近因出差各官。希圖議叙。託言銅價浮多。不遵定例。任意苛徵。令臣等酌議加增銅價。停其議叙。臣等查直隸各省關差採買銅餉。原價六分五釐。今酌議加增三分五釐。每餉計算一錢。通共戶工二部。解銅三百六十四萬二千七百五十八兩零。共加增銅價銀一十二萬七千四百八十八兩零。即於各關差部定則例原額外。酌量派增。著為定額。以為採買之費。以康熙二十四年出差監督為始。如有例外苛索。徵多報少。將商人親填簿單。捏造改易。被參察出。從重治罪。至

見在出差各官。雖有溢額。俱不准議叙。并停其四季所報部科簿單。總俟任滿彙題。從之。○己丑。

上御太和門視朝。文武陞轉各官謝恩。次朝鮮國使臣行禮。○

上詣

太皇太后

皇太后宮問安。○

上幸瀛臺駐蹕。○調盛京刑部侍郎噶爾圖為刑部右侍郎。○朝鮮國王李煊疏言。臣忝守外藩。奉職無狀。從前邊民屢越疆界。觸犯憲典。輒蒙恩宥。恒懷感懼。時加嚴飭。不意邊地奸民。見利忘生。冒禁採參。其罪已不容誅。況將繪畫與圖官役。放鎗傷害。致煩遣官降救。嚴加警責。臣惶恐震越。無地自容。謹遵旨會同敕使。將各犯韓得完等二十八名。嚴行鞫訊。并按律擬罪。恭候聖裁。得旨。三法司核擬具奏。○庚寅。諭吏部。兵

部封疆文武大吏。當用兵征剿時。固在智勇兼優。亦重清廉。律已。原任鑾儀衛鑾儀使趙良棟。前值逆賊盤踞漢中。首先倡率入川。於漢中成都等處。効力剿賊。勞績昭著。復領兵直抵雲南。攻克省城之後。獨能恪守法紀。廉潔自持。深為可嘉。今已衰老解任。著復其勇畧將軍。兵部尚書兼都察院右副都御史總督原銜。以示眷注之意。○諭兵部。副都統郎談。班達爾沙。馬喇。諳悉地形。令赴黑龍江軍前。叅贊軍務。○癸巳。

上詣

太皇太后宮問安。○陞湖南布政使張仲舉。為福建巡撫。○添設盛京戶部員外郎二員。漢字主事一員。○以故一等阿思哈尼哈番。又加一拖沙喇哈番。魯西巴圖魯。子布納海。三等阿思哈尼哈番。多爾濟。子佛保住。各襲職。○給出征陝西病故平逆將軍都統畢力克圖。三等阿思哈尼哈番世職。陝西陣亡叅贊

副都統阿爾瑚。三等阿達哈哈番世職。○兵部議覆廣東廣西總督吳興祚疏。言潮州水師官兵船隻。先經裁并。潮鎮統轄。今值開洋貿易。恐海島中宵小潛踪。乘機竊劫。應將澄海協達濠營水汛官兵船隻。改歸南澳水師鎮就近統轄。其南澳與碣石海汛相連。應令互相聯絡。時加巡防。至潮陽等處水汛。令文武各官修造快船二十隻。照舊巡查。應如所請。從之。○先是工部等衙門遵旨會議河道總督靳輔疏言。高家堰一帶臨湖隄工。長一萬五千六百餘丈。必密釘排椿。加土壓埽。以禦風浪。再隄內離隄七八十丈。必另挑運料小河。即取所挑之土。築水隄一道。約長一萬一千五百丈。求大隄積水。以便運料運土。搶救工程。又上自武家墩。下至楊家廟。舊有河形。目今淤淺。應挑深復舊。約長四千丈。挑起之土。即幫兩岸隄工。又自楊家廟至寶應湖邊一帶平灘。計長四千丈。應挑河一道。以引

上流減洩之水。直達大湖。且為運料之路。以上四工。共計銀二十二萬四千餘兩。請先借撥庫銀。容臣飛星趙竣。其餘工程。俟收下河屯墾官田。籽粒佃價等項。陸續興舉。應如所請。奉有著總河靳輔。再行確議之旨。至是。靳輔回奏。復請照數撥給興工。下工部等衙門議行。○先是。工部等衙門遵旨會議河道總督靳輔疏言。黃河南北兩岸。應築束水隄。長三十萬丈。頂寬二丈。底寬六丈。高八尺。需費一百五十八萬四千兩。查各州縣被水淹廢湖灘。築隄束水之後。可以涸出閒墾。計得四萬餘頃。令民佃種納糧。則挑河築隄之費。可以稍補。乞准借撥庫銀五十萬兩。先為興工。其餘不敷。俟陸續分收籽粒。并佃價銀兩。逐漸接濟。定限六年告竣。工完之後。不特向來蠲除災荒額賦。可以盡復。而每歲更可加增新賦十餘萬矣。應均如所請。奉有著總河靳輔再行確議之旨。至是。靳輔回奏。復請照

數撥給興工。下工部等衙門議行。○甲午。諭禮部翰林院。自古帝王致治隆文。典籍具備。猶必博採遺書。用充秘府。蓋以廣見聞而資掌故。甚盛事也。朕留心藝文。晨夕披覽。雖內府書籍篇目粗陳。而衷集未備。因思通都大邑。應有藏編。野乘名山。豈無善本。今宜廣為訪輯。凡經史子集。除尋常刻本外。其有藏書秘錄。作何給值採集。及借本抄寫事宜。爾部院會同詳議具奏。務令搜羅罔軼。以副朕稽古崇文之至意。○丙申。

上詣

太皇太后宮問安。○吏部題。陝西巡撫鄂愷於陝西大計冊內。將不謹之布政使席格。註入優等。應將巡撫鄂愷降四級調用。從之。○一等公法喀。緣事削爵。以親弟阿靈阿襲替。○丁酉。

上自瀛臺回宮。○予故原任文華殿大學士兼吏部尚書黃機祭葬。謚文僖。○旌表浙江節

婦錢塘縣包氏凌氏餘姚縣張氏等各給銀建坊如例○戊戌旌表雲南節婦昆陽州洪氏楊氏雲南縣楊氏廣東節婦河源縣尹氏等各給銀建坊如例○己亥命翰林院掌院學士張英教習庶吉士○庚子

上詣

太皇太后

皇太后宮問安○以翰林院侍講學士顧沅充會典館副總裁官○辛丑

孝端文皇后忌辰遣官祭

昭陵○陞國子監祭酒阿禮瑚為盛京刑部侍郎○壬寅直隸巡撫于成龍疏請直隸每年辦解狐皮改為折色

上曰地方採買狐皮一倍費至十倍故百姓困苦此後俱著停止應用狐皮令戶部在京採買○諭吏部殫心効職者臣子之常經晉爵酬庸者朝廷之大典

太祖高皇帝實錄告成光昭一代之典章永垂

萬世之模範其監修總裁等官著有勤勞宜加寵錫監修總裁官禮部尚書武英殿大學士勒德洪著加太子太傅總裁官太子太傅武英殿大學士明珠著加太子太師禮部尚書保和殿大學士王熙禮部尚書武英殿大學士吳正治吏部尚書文華殿大學士宋德宜俱著加太子太傅副總裁以下各官俱照例議叙爾部即遵諭行○旌表陝西節婦楊氏給銀建坊如例○癸卯

上詣

太皇太后宮問安○陞甘肅布政使圖爾宸為陝西巡撫○以翰林院侍講星安亮日講起居注官○甲辰御試各部院漢軍官員及內外候缺漢軍官員監生○諭領侍衛內大臣公倭赫福善坡爾盆等曰學士常苦原係微賤之人理應仰體朕委任之意効力圖報考試之事乃伊職掌應立法嚴肅查察情弊乃於懷挾諸弊明知不舉惟於朕前蒙蔽行詐



見今發覺被獲。應將常書革去學士。改為三等侍衛。照常行走。○改四川松威道為松茂道。移駐茂州。○丙午。

上詣

太皇太后宮問安。○戊申。吏部題翰林院掌院學士缺。開列詹事尹泰等補授。

上曰。翰林院學士職任關係最重。必學行兼優。方為允當。滿漢學士得人。則詞林觀摩興起。咸勤學砥行。人材成就。有裨治道匪淺。曩者

喇沙里居是官。學問品行。詞林至今追述之。

後來者俱不能及。朕觀尹泰品有餘而才不足。任以詹事則相宜。若用為學士。恐辦事不

甚敏捷。庫勒納任此職時。較他人為優。通政使葛思泰。似亦可用。可將此二人酌議來奏。

○以原任湖北布政使李輝祖為四川布政使。司布政使。○以翰林院侍講學士孟亮揆侍讀彭孫通充日講起居注官。○調福建陸路提督萬正色為雲南提督。以大理寺卿張

雲翼為福建陸路提督。○己酉。

上御太和門視朝。文武陞轉各官謝恩。○

上詣

太皇太后宮問安。○以司經局洗馬李應薦提

督順天學政。○裁四川成都營都司僉書二

員。把總二員。永寧城守中營遊守把總八員

缺。○庚戌。旌表湖廣節婦常寧縣周氏。給銀

建坊如例。○辛亥。

上幸玉泉山。○以兵部督捕左侍郎庫勒納為

禮部左侍郎。管翰林院掌院學士事。○兵部

等衙門議覆直隸巡撫于成龍疏言。順永保

河。四府旗民雜處盜警時聞。非力行保甲。不

能寧謐。向例地方各官無管轄屯撥什庫之

例。各旗都統等官又遠在京城。竊恐屯撥什

庫不能嚴束旗丁及本身窩盜為盜不法等

項。難以稽察。應將各莊屯旗丁同民戶共編

保甲。令屯撥什庫與保甲鄉長互相稽查。如

旗丁居民犯法。許地方各官一體申報該撫

該都統究治。應如所請。從之。○壬子。

上詣

太皇太后

皇太后宮問安。○裁河南河北守道缺。○癸丑。諭吏部。國家選用臣工。必得才學通敏之人。畀以職任。斯庶官無曠。實得用人之益。朕見漢軍官員。起家多由捐納。從事學問者少。年未成材。便涉仕版。並無素抱。何以莅事臨民。去年特行考試。分別去留。曾將交白卷人員。從寬姑免處分。令其學習。俟通曉文義。該部題明考試錄用。朕因從前考較情弊多端。今特行親試。荒陋不堪者甚衆。朕不加搜索。私藏懷挾。自行發露者。已交刑部拏問外。其考列一等高璜等。及二三四等人員。見任者。仍照舊供職。候補者。照常補用。王撫民等。文理不通。及書寫履歷。提交白卷者。俱著以原品隨旗行走。其去年著令學習之人。今仍交白卷。及考置五等者。顯圖僥倖。著察議具奏。王

樑居官有聲。仍准候補。難蔭生馬世永。王琨。王鎬。胡枚。念伊父盡節可憫。著令學習。俟通曉文義之日。該部題請錄用。胡枚。交與該管衙門。另行請旨。程萬坦。曾効力行間。著以旗內武職補用。爾部即遵諭行。○禮部題。頃朝鮮國陪臣鄭載嵩等。以察議奸民韓得完一案。為伊國王辨冤。具呈臣部。臣查朝鮮僻處東服。最爾一隅。當念累朝興復殊恩。撫循至德。恪守藩翰。庶免隕越。顧其君懦弱。其臣恣肆。積有重愆。應加嚴治。

皇上憫其狂愚。悉從矜宥。去年更有奸民韓得完等。違禁採參。擅放烏鎗。殺傷官役一案。皇上始遣大臣嚴訊。猶念小民犯法。其主或未之知。僅以約束不嚴。罰鍰示警。乃陪臣鄭載嵩。妄為其主求寬。無禮已甚。臣等詳閱情詞。指摘謬戾。不止一端。濫引經史。尤多狂悖。果有寬抑。該王分屬外臣。應上章自明。乞哀祈請。豈有么麼卑賤。不告其君。而輕弄筆端。橫

開禍始法在有司必無可赦相應將鄭載嵩等嚴拏發與該國王從重治罪并將此情一傳與該國王知悉得旨鄭載嵩等免其嚴拏餘依議○吳喇忒鎮國公穆察輔國公達爾瑪故俱遣官致祭

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二十六

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級入加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級入加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十五年丙寅閏四月甲寅朔以禮部

學士兼太子太傅

左侍郎管翰林院掌院學士事庫勒納充日

講起居注官○乙卯

上詣

太皇太后宮問安○丙辰

上幸南苑行圍○丁巳兵部議覆四川陝西總

督禧佛疏言川省地廣民稀土司番蠻雜處

恐有私收軍器禁物妄意非為及射利姦徒

勾串賣給等弊請嚴行禁止定例處分應如

所請嗣後土司番蠻交界處有將軍器禁物

販賣者杖一百。發邊遠充軍。該管官知情故縱者。一例治罪。如失於覺察。州縣官并專汛武職。俱降四級調用。府道及兼轄武職官。俱降二級。該管總兵官降一級。督撫提各罰俸一年。從之。○戊午。

上諭大學士明珠等曰。居官清廉。如于成龍者甚少。世間全才未易得。但能於性理一書。稍加觀覽。則愧怍之處甚多。雖不能全依此書以行。亦宜勉強研求。明晰義理。若祇泥辭章字句。有何裨益。○調刑部左侍郎席柱。為兵部督捕左侍郎。○陞戶部郎中塞楞額。為甘肅布政使司布政使。○己未。

上詣

太皇太后宮問安。○

上諭翰林院掌院學士庫勒納。張英等曰。爾等每日將講章捧至乾清門豫備。詣講筵行禮進講。為時良久。妨朕披覽功。著暫停。春秋禮記。朕在內每日講閱。其詩經通鑑講章。俱

交與張英。令其齎至內廷。○以鑲紅旗故三等阿思哈尼哈番覺羅布祜子額納布襲職。○給湖廣陣亡鑲黃旗二等侍衛勒德善拖沙喇哈番世職。○庚申。增設黑龍江將軍衙門滿字筆帖式二員。○禮部等衙門遵旨議覆。購求遺書。應令直隸各省督撫。出示曉諭。如得遺書。令各有司會同儒學教官轉詳督學及該督撫。酌定價值。彙送禮部。其無刻板者。亦令各有司僱募繕寫。交翰林院進呈。有願自行呈送者。交禮部彙繳。得旨。自古經史書籍。所重發明心性。裨益政治。必精覽詳求。始成內聖外王之學。朕披閱載籍。研究義理。凡厥指歸。務期於正。諸子百家。泛濫詭竒。有乖經術。今搜訪藏書善本。惟以經學史乘實有關係。修齊治平。助成德化者。方為有用。其他異端詖說。槩不准收錄。○壬戌。

上詣

太皇太后

皇太后宮問安○陞廣西按察使黃性震為湖南布政使司布政使○旌表江南烈婦李昇妻朱氏給銀建坊如例○癸亥轉刑部右侍郎噶爾圖為左侍郎陞內閣學士敦多禮為刑部右侍郎○甲子以刑部左侍郎噶爾圖通政使葛思泰充經筵講官○浙江提督陳世凱疏言

上諭十六條訓飭臣民周詳盡善普天率土應一體講讀以昭一道同風之盛今各省文職已於月吉宣講獨武臣未有講讀定例臣思皇上以孝治天下培植倫常特允武職丁憂以端風化臣請敕直隸各省將軍提鎮諸臣率所屬營伍照文職例一體講讀庶荷戈將士咸知名教綱常永無匪行至各省土司亦屬武職尤宜亟為講讀更徵遠邇同風教化大行之治下九卿確議尋九卿議如所請得旨自古武職名臣如郭子儀李靖等皆讀書明理熟諳經史乃能保守功名克全臣節嗣後

武職官員應閱覽書籍講明忠孝大義著該管官勤加勸諭○革倉場侍郎馬如驥職以失叅通州監督桑隅打死兵丁一案反行徇庇也○予福建陣亡正藍旗杭州協領當阿禮祭葬如例○乙丑

上詣

太皇太后宮問安○禮部左侍郎鄂哈以病乞休允之○吏部題康熙二十四年五月內考試漢軍投交白卷人員蒙

皇上不即加處分從寬姑免令其習學再行考試錄用伊等應篤志習學通曉文義乃今考試仍有交投白卷者十四員考置五等者二百四十六員書寫履歷不堪者九員均應革職得旨各官俱從寬免革職內有願隨旗行走者著隨旗行走願學習者俟後再行一并考試○予正藍旗故漢軍都統一等伯釋迦保祭葬如例○刑部等衙門題朝鮮國韓得完等三十八人犯禁採參鳥鎗打傷繪輿圖

官役應將為首韓得完等六人及為從金太成等二十二人俱擬立斬其約束不嚴失於覺察之咸鏡道節度使尹時達平安道觀察使樸尚咸鏡道觀察使李秀彥三水郡守李觀國等應各降革調用有差得旨韓得完等六名著處斬立決金太成等二十二人俱從寬免死減等發落餘如議○丙寅以湖廣故永順宣慰使司宣慰使彭廷椿子彭弘海襲職○丁卯戶部左侍郎王鴻緒以本生母故疏請回籍治喪允之○戊辰

上御太和門視朝文武陞轉各官謝恩次喀爾喀使臣行禮○

上詰

太皇太后宮問安○陞通政使葛思泰為內閣學士兼禮部侍郎○庚午調理藩院右侍郎穆稱額為禮部左侍郎○辛未諭刑部獄訟重情關係民命當讞鞫時雖經詳慎始定爰書今值天氣炎熱其中恐有情可末減者久

繫囹圄或致瘵斃朕心不忍茲特遣科爾坤阿蘭泰董訥馬世濟等會同三法司將已結重案逐一詳加審鞫如有情可矜疑者即與察明事由開列具奏務期情法允協不致淹滯斃獄以副朕順時好生至意○調雲南貴州總督蔡毓榮為總督倉場侍郎陞廣西巡撫范承勲為雲南貴州總督○雲南貴州蔡毓榮疏報威寧逆苗王騰龍等擅兵刦殺經臣題明撲剿迨官兵圍攻時彼棄寨宵遁臣即檄令土官拏獲應請正法懸示得旨這案著新任總督范承勲詳審確議具奏○癸酉以禮部左侍郎兼管翰林院掌院學士事庫勒納教習庶吉士并充明史總裁官○甲戌禮部尚書管詹事府事湯斌由江寧巡撫陞任至京陞見

上曰天下官有才者不少操守清謹者不多見爾前陞辭時自言平日不敢自欺今在江蘇潔已率屬實心任事克踐此言朕用嘉悅故

行超擢爾其勉之。

上歷詢吳中年歲風俗并地方吏治民生縉紳居鄉若何。又問下河開海口事何如。湯斌奏曰。

皇上命尚書薩穆哈侍郎穆稱額等與總漕徐旭齡及臣詢問下河民情。臣等遍歷海口各州縣人衆言雜不能盡一。即州縣水道海口亦不相同。大約其言以開海口積水可洩。但今年荒歉四分工銀恐不足用。惟高郵興化之民聞築隄開河恐毀其墳墓廬舍甚言不便。部臣公議以築隄取土艱難工必不成。且毀人墳墓廬舍非

皇上軫念民生之意。而工程浩大恐多費帑金不能奏績。不如暫停為便。臣與徐旭齡議以日下遍地皆水工力難施。暫停未為不善。遂同具題。但念此事乃我

皇上巡狩江南親見民間房屋淹沒水中。痼癢念切。隨命大臣相視海口簡選賢能開口洩

水。真堯舜之心。今議暫停則可。若竟中輟。非臣子所敢擅議。且上流之水滔滔而來。下流無一去路。不但民間田地水無涸期。且恐城郭人民將有不測之患。如去年興化城內水深數尺。萬一再遇水災。一城付之巨浸。臣等何所逃罪。若云開海口則水遂盡涸。臣固不敢為此言。但水有去路。開一丈則有一丈之益。開一尺則有一尺之益。使浮溢之水漸去。則舊日湖河之形可尋。再加疏濬築防。工夫自有次第。然舉事當念民生尤當重國計。若多費帑金而水不能盡涸。非長策也。請無多發帑金。止於七州縣錢糧中酌量款項暫停一二年。起解留為修河之用。此外再行設法。總之以本地民力本地錢糧開本地海口。心既專一。工不誤用。不作大舉。不多設官。漸漸做去。當有成效。此意向曾與薩穆哈等言之。○陞太常寺卿阿山為通政使司通政使。○以戶部郎中謝于道為雲南按察使司僉事。



提調學政陝西平涼府知府趙濟美為廣西按察使司副使提調學政○乙亥召禮部侍郎穆稱額問曰昨湯斌奏稱前會議開濬下河時魯向薩穆哈等言若將下河高處挑濬使積水漸歸於海於民亦稍有益等語爾等回京時何以並不奏聞穆稱額奏曰臣等至江南地方與總漕徐旭齡巡撫湯斌同至河干看視入傳問七州縣民皆云此水漫決日久今欲開濬海口其事甚難故臣等公議暫停其挑濬下河高處使積水漸歸於海等語湯斌並未向臣言之又召問尚書薩穆哈奏曰臣等與徐旭齡湯斌會同踏看海口傳集七州縣民間時百姓各就地方情形而言臣等因其語言不一遂令每州縣派出通曉事體者十人於淮安集問皆言不便挑濬臣等以開濬下河所費不貲事關重大故議暫停至湯斌等挑濬下河高處使水歸海於民亦稍有益等語閒談時誠有之並非公同商確

時之語也

上入問曰今爾等意謂此河可以開濬否薩穆哈奏曰大隄恐不能築若將下河高阜處陸續挑濬使水漸入於海似亦可行

上曰著再議○諭大學士等曰學士徐乾學張英學問淹通文章事務著留辦理以後開列巡撫不必列名○諭督捕左侍郎席柱等曰今天氣漸熱爾等將罪犯速行審結毋得遲延○轉戶部右侍郎董訥為左侍郎陞都察院左副都御史胡昇猷為戶部右侍郎○吏部等衙門遵旨會推廣西按察使缺據吏部侍郎胡簡敬保舉江南淮揚道高成美擬正湖廣下荆南道沈志禮擬陪得旨凡職任緊要官員奉旨會推原期從公保舉務得真才有裨官守且官評賢否關係吏治民生若以本地方人推舉本省官員必致瞻徇滋弊前已經屢諭申飭甚明今胡簡敬以淮安府人推舉淮揚道高成美殊屬不合著嚴加議處

九卿等不加詳慎。草率擬推。亦屬不合。著通行申飭。○丙子。以內閣學士王起元為廣西巡撫。○以江南鳳陽徐州歲歉。遣內閣學士麻爾圖。戶部郎中席特庫。馳驛往賑。麻爾圖等請訓旨。諭之曰。爾等乘此行。可看沿途麥實及徐州等處情形。一并速行奏報。○予湖廣陣亡正藍旗三等阿達哈哈番又一拖沙喇哈番圖赫德。祭葬如例。○戊寅。予故致仕刑部尚書喀爾圖。祭葬如例。○庚辰。以原任詹事朱馬泰為太常寺卿。○以翰林院侍講朱都納充日講起居注官。

五月。甲申朔。夏至。祭

地於

方澤。

上親詣行禮。

上詣

太皇太后

皇太后宮問安。○諭三法司衙門。朕惟自古帝

王。撫御羣臣百姓。政教修明。治化洽暢。與其繩以刑罰。使人怵惕。文網苟牽。無罪不如感以德意。俾民蒸蒸向善。不忍為非。書稱協和萬邦。黎民於變時雍。又稱臨下以簡。御衆以寬。唐虞盛時。從欲風動。其效章章如是。朕嘗心慕隆古。力行教化。冀以感發天良。偕之蕩平正直之道。而人情囂偽。風俗頹弊。明罰救法。國憲不可以已。雖嘗屢行矜恤。絕去煩苛。終思尚德。緩刑。迺為至治之極軌。自康熙元年以來。中外臣民。習染澆風。爭事詐偽。公行賕賂。貪冒營求。因緣請託。作奸犯科。頑鈍者恬弗知恥。奸黠者習不畏法。以致是非乖謬。綱紀凌弛。朕親政以後。洞悉奸弊。加意釐惕。振飭憲章。務使軌律干紀之衆。莫能匿惡。法無旁貸。人無遁情。庶幾禁遏頑豪。杜塞僥倖。近見罹於罪罟者。漸覺減少。但革面未能革心。畏罪不如知恥。原夫立法之意。本欲使人難犯。今因法令嚴密。輒思苟免。苟免之心。切

則彌縫之弊深。羣心日夕恐懼不寧。巧偽滋多。亦未可定。今欲崇尚德化。務存惇大。蕩滌邪穢。一切令之自新。除前經審擬完結各案。及關係宮殿陵寢河道工程。侵欺正項錢糧。不議外。內外見經發覺。一應枉法得贓行賄。與受人員。仍革職。止免擬重辟。照例定罪追贓。其此等未經發覺者。悉與寬免。有以諭前事。叅奏訐告者。一概不准。自諭以後。中外臣民。須洗心易慮。省改前非。守法奉公。敦厲廉恥。以副朕使人寡過之至意。再有干犯。自難曲宥。至於旗下閒散官員人等。及民間豪惡黨類。並無職任。乃攬說公事。交結衙門。妄行訛詐。賄囑關通。實繁有徒。朕皆稔悉。嗣後益當恪遵法紀。勿蹈故轍。如怙終不悛。發覺之時。從重治罪。決不寬貸。爾法司即通飭內外大小各衙門。八旗。及內府佐領。曉諭知悉。一體遵行。○乙酉。陞通政使徐元珙為都察院左副都御史。內閣侍讀學士徐廷璽為內閣

學士兼禮部侍郎。○丙戌。

仁孝皇后忌辰。遣官祭。

陵。○陞左副都御史覺羅孫果為理藩院右侍郎。○陞江寧安徽糧道張永茂為廣西按察使。司按察使。○丁亥。

上幸瀛臺駐蹕。○敕直隸各省嚴禁淫祠濫祀。從禮部尚書湯斌請也。○己丑。以翰林院侍讀學士田喜霽充日講起居注官。○吏部右侍郎胡簡敬。以違例舉准揚道高成美。降二級調用。○庚寅。

上詣

太皇太后

皇太后宮問安。○諭一統志總裁勒德洪等。朕惟古帝王宅中圖治。總覽萬方。因天文以紀星野。因地利以兆疆域。因人官物曲。以修政教。故禹貢五服。職方九州。紀於典書。千載可覩。朕續紹丕基。撫茲方夏。恢我土宇。達於遐方。惟是疆域錯紛。幅員遼濶。萬里之遠。念切

堂階。其間風氣羣分。民情類別。不有綴錄。何以周知。顧由漢以來。方輿地理。作者頗多。詳畧既殊。今昔互異。爰敕所司。肇開館局。網羅文獻。質訂圖經。將薈萃成書。以著一代之鉅典。名曰大清一統志。特命卿等為總裁官。其董率纂修官。恪勤乃事。務求采蒐閎博。體例精詳。阨塞山川。風土人物。指掌可治。畫地成圖。萬幾之餘。朕將親覽。且俾奕世子孫披牒而慎維屏之寄。式版而念小人之依。以永我國家無疆之曆服。有攸賴焉。卿其勉之。○辛卯。諭新授廣西巡撫王起元曰。前任巡撫郝浴。范承勲。居官有聲。爾繼其後。殊難見長。但於伊等善政。便於民者。踵而行之。其錯悞處。亦當改正。勿得紛更成法。至苗蠻未嫻禮法。尤宜撫循得宜。向日武職各官。因彼愚蠢。妄加操切。或至生事邀功。爾須察訪情弊。嚴行禁止。○陞右通政鄭重為通政使司通政使。○癸巳。諭吏部。昨年

太皇太后。聖體偶有違和。命太醫院御醫李玉白。張世良。殫心診視。恭酌方藥。今已萬安。朕心歡悅。伊等克盡厥職。爾部可量加議叙。○甲午。

上自瀛臺回宮。詣

太皇太后

皇太后宮。問安。○陞監察御史席珠為都察院左副都御史。○丙申。遣官祭

關聖帝君。○丁酉。調戶部左侍郎董訥為吏

部左侍郎。管右侍郎事。○給浙江。福建。江西。

湖廣。陝西。八旗陣亡官。一等侍衛委署副都

統阿喀尼等五十二員。拖沙喇哈番世職。○

宗人府題。鑲藍旗佐領委署叅領覺羅薩克

素。出征浙江陣亡。應照例贈以拖沙喇哈番

世職。得旨。薩克素堅守黃巖。因叅將武瀨私

通逆賊。城陷陣亡。深為可憫。著加贈拜他喇

布勒哈番。○戊戌。

上御太和門視朝。文武陞轉各官謝恩。次喀爾

喀使臣行禮○

上詣

太皇太后宮問安○己亥。

上幸玉泉山○辛丑。予故原任太子太保保和

殿大學士兼禮部尚書加贈太子太傅魏裔

介祭葬如例○改浙江青田龍泉一縣學為

中學○癸卯。以禮部尚書管詹事府事湯斌

充經筵講官○轉戶部右侍郎胡昇猷為左

侍郎。調禮部右侍郎蔣弘道為戶部右侍郎

○禮部議覆甘肅巡撫葉穆濟疏言吐魯番

國地處遐荒康熙二十一年正月內蒙

皇上軫念遠人。停其進貢馬匹。止令進玉石金

剛鑽等物。今該國王遣使無路。大者進貢西

馬四匹。達馬十匹。單峯駱駝二隻。及鴉虎黑

鷹等物。應否令其一并進貢。聽候部議。查吐

魯番國既奉諭旨。應遵定例。但抒誠遠獻。此

番應准其入貢。嗣後仍照定例遵行可也。從

之○蒿齊忒多羅額爾德尼郡王阿賴充故

遣官致祭○旌表山東烈婦沂州陸氏。郟城  
縣徐氏。寧海州張氏等。各給銀建坊如例○  
乙巳。

上詣

太皇太后宮問安○丙午。御史敦拜條奏。關差

缺額。處分例輕。以致拖欠日重。應嚴定處分

則例。并賠補限期。

上曰。關差缺額處分。自有定例。若法令太嚴。必

致苦累商賈。所奏無益。不准行○以翰林院

編修陳元龍。充日講起居注官○陞兩江督

標副將劉澤深為廣東碭石衛總兵官○刑

部題旗人郭良臣。夥同督捕司書辦張子和

等。販買逃人。應按律追擬。其員外郎格塞禮

楊為梓。於張子和所犯之處。不行查出。應降

級留任。得旨。逃人一事。民多苦累。該管衙門

官員。理應整剔弊端。嚴稽奸頑。以安民生。今

員外郎格塞禮等。將蠹書買逃。藐法之處。不

行查出。格塞禮楊為梓。著隨旗行走。餘如議

○旌表山東掖縣孝子李樹。給銀建坊如例。  
○已酉。陞內閣學士徐乾學為禮部右侍郎。  
○以正紅旗故一等阿思哈尼哈番鄂爾輝  
孫馬珥圖襲職。○陞四川遵義副將鄭僑柱  
為重慶總兵官。○辛亥。以湖廣故忠尚宣撫  
使司宣撫使田桂芳子田雨公襲職。○壬子。  
上詣

太皇太后宮問安

六月。癸丑朔。○乙卯。吏部以湖北布政使王  
定國故員缺。開列湖南按察使范時秀。廣東  
按察使胡戴仁。得旨。胡戴仁。陞補湖北布政  
使司布政使。范時秀著來京。以旗缺用。○澤  
卜尊丹巴胡土克圖。遵諭覆奏曰。臣自幼皈  
達賴喇嘛之教。叨澤卜尊丹巴之名。普度為  
心。闡揚佛法。息列辟之爭。救生民之苦。扎薩  
克圖汗之子孫屬裔前已陸續給還。餘者正  
在察核。今蒙

聖慈。念喀爾喀七旗不睦。遣使於達賴喇嘛。而

達賴喇嘛亦遣噶爾賈西勒圖為使赴盟。諭  
臣亦至盟壇。共議其事。臣當遵旨同赴盟所。  
竭誠公議。以仰副

聖懷。疏入。

上命移文尚書阿喇尼。噶爾賈西勒圖等知之。  
○丙辰。諭大學士等曰。目今天早有蝗。恐政  
事或多闕失。民間疾苦。有不能上達者。即傳  
集九卿問之。俾各抒所見奏聞。九卿等皆曰。  
政事以愛民為本。愛民莫大於蠲租。今

皇上凡遇直隸各省水旱饑荒。蠲免正賦。雖數  
百萬亦所不惜。小民已沾實惠矣。愛民莫要  
於恤刑。

皇上每遇關係人命之事。其難其慎。詳審再三。  
務得實情。期於平允。亦無有冤抑之人矣。至  
於用人。尤行行政要務。

皇上每用一人。必加詳慎。務使人與職稱。黜陟  
賞罰。無不允當。政事豈有闕失。問有水旱。亦  
天行時令使然。皆由臣等奉職無狀。所行未

當致千天和。今公議在京重囚。

皇上特遣大臣清理。在外重囚。亦宜分遣大臣。會同督撫。一體清理。又各省常平一倉。須多積米石。以備賑救之用。洵為救荒良策。

上曰。朕自即位以來。二十餘年。凡民間之事。留心體訪。稍知情狀。古人不言救荒而言備荒。故三年有一年之蓄。九年有三年之蓄。雖間值水旱。小民不致失所。去歲可謂豐年。設今年歲不登。即致饑饉。總由素無蓄積耳。即常平一倉。積米太多。亦易朽爛。若臨時令有司捐貸。則又不可。縱有良法。奉行不得其人。終屬無益。苟得良有司。視民如一家。痛癢相關。始克有濟耳。○丁巳。

上詰

太皇太后

皇太后宮問安。○陞詹事郭榮為內閣學士兼禮部侍郎。○授鎮國公哈爾薩女為縣君。壻科爾沁吳勒木濟台吉為固山額駙。○督理

閩海稅務戶部郎中胡什巴疏言。閩省商賈貿易向無土著之人。亦無丈船抽稅之例。請照粵關一例。丈船抽稅。至貿易船隻原在某關印烙給照。准出海口者。別關不得羈留。仍令各回本關。庶人數軍器各有稽查。而奸宄不敢影射。得旨。凡收海稅官員。因係創行設課。希圖盈溢。將出入商民船隻任意加徵。以致病商累民。亦未可定。著嚴加申飭。務令恪遵定例。從公徵收。無濫無苛。以副朕軫恤商民至意。所請不准行。○戊午。先是。

上命大學士等以開濬海口事傳問九卿及淮揚所屬之在京官員。至是大學士等覆奏。臣等遵旨問九卿及淮揚等處。見任京官喬萊等。據喬萊等云。積水須有去路。開一尺。有一尺之益。開一丈。有一丈之益。雖低窪之地。未必盡涸。而諸壩所減之水。淹沒田地。斷能涸出。但得實心任事。為國為民之人。自然成功。七邑錢糧有限。又因災傷蠲免。畢竟



皇上發帑金救民更速等語。據九卿云。先薩穆哈穆稱額前往相度海口。以水勢甚太。難以開濬。因議暫停。湯斌原任江寧巡撫所見必確。今稱開海口有益。故復議應開。

上曰。衆議共稱應開。薩穆哈穆稱額為何以為不可。彼但憑信高成美之言。自己全不置詳察耳。此事必須委用得人。方可成功。孫在豐有才。著發內帑二十萬兩。前往督修。功若可成。再酌量動支正項錢糧。○戶部議覆四川

巡撫姚締虞疏言。四川鄉紳應回原籍。得旨。所奏甚是。四川土廣人稀。若居官者盡留他省。則川中人益稀少。愈致荒蕪矣。著如所請行。○以正黃旗故二等伯郎肅子斑第襲爵。○已未。諭三法司衙門。近因天氣炎熱。特遣部院大臣會同三法司。詳加審勘。將罪犯已經減等發落。其直隸各省。問刑衙門罪犯。雖經詳慎。始定爰書。但內外原屬一體。有情可矜疑者。亦未可定。著直隸各省督撫。將已結

案內。現在監禁者。逐一詳審。果可矜疑。開明具奏。爾三法司覆加詳核。照例減等。以副朕慎刑愛民至意。○旌表河南鄧婦。涇川縣張氏。商邱縣李氏。烈婦祥符縣吳氏。儀封縣劉氏。夏邑縣劉氏。陝州史氏。烈女尉氏縣傅氏。等各給銀建坊如例。○辛酉。工部疏。奏河道總督靳輔。修理河工。已經九年。並無成功。虛糜錢糧。應交該部嚴加議處。

上曰。河工重大。因一時不能成功。即行處分。或

另差人修理。恐致貽誤。且俟一二年後。看其若何。著九卿會議具奏。○甲子。奉差江南賑濟學士麻爾圖。回京啓奏。

上問鳳陽徐州等處饑民情形。麻爾圖奏曰。春間饑饉殊甚。臣於閏四月到彼。正遇下雨。百姓既蒙恩賑。又值甘霖。可以冀望秋成。上又問曰。彼處及江南一路田苗若何。近京一帶飛蝗為虐。果甚否。麻爾圖奏曰。沿途一帶禾苗俱佳。據百姓云。蝗生不久。飛去尚不為

災○諭大學士等。各省輿圖載入一統志。事殊重要。或一省有大圖而無小圖。或一省有里數程途。而無疆界。或一省有疆界。而無里數程途。各省皆不一例。何也。可詢之曾為總督巡撫者。○荷蘭國王耀漢連氏甘勃氏。遣使賔先吧芝。表貢方物。賞賚如例。○陞叅領田象坤為鑲黃旗漢軍副都統。○贈原任廣東殉難合浦縣知縣金世爵為布政司叅議。并予祭葬。廕一子入監讀書。○丙寅。吏部題。故廣西巡撫郝浴。先因那用錢糧革職。康熙二十四年五月。曾奉特恩寬免。今伊子進士郝林。援例呈請開復原官。應無庸議。得旨。郝浴准追復原官。○丁卯。

上御太和門視朝。文武陞轉各官謝恩。次荷蘭國使臣行禮。○

上詣

太皇太后

皇太后宮問安。○戊辰。革工部尚書薩穆哈禮

部左侍郎穆稱額職。以差往河工。詢問挑濬海口。回奏失實也。○陞湖廣下荆南道沈志禮為廣東按察使。司按察使。○癸酉。賑濟江西廣信府上饒等八縣水災饑民。○甲戌。九卿遵旨議覆河道總督靳輔應革職留任。

上曰。為人臣者。議論國家之事。當執中公論。據朕觀之。與靳輔善者為之稱美。與靳輔不善者言其過失。大臣等似此挾私意縱偏論。朝廷大事。欲望其修舉得乎。靳輔一人去留。有何關係。但河務甚要。若另補一人。必塞減水壩。減水壩一塞。則河隄萬不能保。爾等可有兩全之良法否。九卿等回奏曰。

皇上不惜數百萬金錢。原為運道民生起見。自修築以來。運道無阻。止因減水壩所洩之水。民田稍有淹沒。今

皇上又發帑修築河上遙隄。幫築高家堰。復遣部臣前往疏濬下河。民生自可樂業。若目前竟閉減水壩。恐一時潰決。受害重大。俟河底

漸漸刷深之後。減水壩方可不用。此外並無別法可行。

上曰。爾等意見皆同否。禮部尚書湯斌奏曰。臣原不知河道情形。因舊年奉旨往徐州一帶看視河形。見減水壩太多。舊時只有四處。今增至三十餘所。目前若竟行堵塞。恐黃河衝決隄岸。民田仍受其害。若不行堵塞。恐水勢分散。河流緩弱。則河底漸高。運道有礙。臣愚欲將減水壩稍築加高。若水大仍可分洩。水小俱使歸道。則河底日逐刷深。水無泛溢之患。減水壩亦漸可堵塞矣。工部尚書杜臻奏曰。築隄開減水壩。原是古人成法。但古人先開引河。使水有所歸。不致漫溢民田。今靳輔但開減水壩。未開引河。此民田所以淹沒也。尋大學士等奉

上諭。河務甚難。靳輔易視之。若遽議處。恐後任者益難為力。今暫免其革職。仍令督修。○乙亥。陞左都御史佛倫為工部尚書。○刑部左

侍郎高爾位。丁母憂。令離任守制。○叙浙江

福建江西湖廣陝西廣東廣西雲南軍功。授

征南將軍都統賴塔為一等阿思哈尼哈番。

一等阿達哈哈番。又一拖沙喇哈番。都統趙

璉。加一拜。他喇布勒哈番。又一拖沙喇哈番。

為一等阿思哈尼哈番。三等精奇尼哈番。副

都統馬錫泰。加一拜。他喇布勒哈番。為一等

精奇尼哈番。給八旗出征官二等阿思哈尼

哈番。塞精叩等七百零六員。各一拖沙喇哈

番。世職。餘功牌不及官職者。悉令註冊。○予

廣東陣亡三等侍衛僧色理。荊州陣亡護軍

校委署護軍叅領賈福塔各祭葬如例。○丁

丑。

上詣

太皇太后宮問安。○陞陝西甘肅道柴望為湖

南按察使。司按察使。○戊寅。陞吏部左侍郎

阿蘭泰為都察院左都御史。○辛巳。先是陝

省用兵時。以漢中地方緊要。撥西安滿洲漢

軍官兵各一千名戍防。後四方蕩平。部議將所撥官兵撤回其半。仍留一千名輪班戍守。至是西安將軍希福等以漢中棧道崎嶇行走不便。更番往返。民人遞送勞苦。請一并撤回。部議不准。

上曰。蕩平以來。漢中駐防原屬無益。朕不忍使兵民交困。其輪班戍守及永遠駐防俱令停止。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二十七

監修總裁官光祿大夫保舉太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十五年丙寅秋七月癸未朔享

太廟遣內大臣舅舅佟國維行禮○

上詣

太皇太后

皇太后宮問安○轉刑部右侍郎張可前為左

侍郎陞河南巡撫王日藻為刑部右侍郎○

以正白旗故一等阿思哈尼哈番賴塔長子

費業冷襲職○乙酉戶部議覆御史戴通條

奏坐糧廳監督員缺應將清廉賢能官員保

舉差往

上曰。各部院官員不稱職者。許堂官不時叅奏。傳諭已久。未見舉行。至於保舉揀選。不過特旨偶一行之。若以此為定例。則資俸深者。既有壅滯之患。而奔競之端。亦即由此而生。保舉著不准行。○丙戌。督修下河工部右侍郎孫在豐。及帶往司官鄭都等。陸辭。

上諭孫在豐曰。朕前因巡幸江南。見高寶興鹽山。江泰等處。積水汪洋。民罹昏墊。朕甚憫之。應行開濬下河。疏通海口。俾水有所歸。民間

始得耕種。特發帑金。拯救七邑災民。屢集廷議。兼詢輿情。允協僉謀。事當釐舉。茲命爾前往。淮揚所屬下河一帶車路等河。並串場河。白駒丁溪草堰場等口。挑濬事務。專屬於爾監修。爾宜往來親歷。多方經畫。講求源流。脈絡次第興工。督率帶去司官等。務實心任事。毋得怠忽。擾害其司道府廳州縣等官。如有違玩貽誤。及勢豪紳衿。妄行干預。包攬生事。阻撓工程者。指名叅奏。濬過工程丈尺。用過

夫料數目。造冊畫圖。貼說具奏。爾受茲專委。須竭忠盡力。悉心區處。速竣大工。使海口疏通。水消田墾。蒸黎復業。以副朕救民至意。如因循怠忽。虛費財力。責有所歸。爾其慎之。諭鄭都等曰。爾等雖經部院辦事。但治河非所熟練。今將爾等差往。必當同心協力。務期有成。毋得各執己見。侍郎孫在豐。將應修地方。派與爾等。須各遵所派料理。不得圖易辭難。互相推諉。○轉吏部右侍郎薩海為左侍郎。

調戶部右侍郎傅臘塔為吏部右侍郎。○轉禮部右侍郎額星格為左侍郎。調理藩院右侍郎覺羅孫果為禮部右侍郎。○丁亥。

上詣

太皇太后宮。問安。○己丑。陞內閣學士麻爾圖為戶部右侍郎。左副都御史拉篤祜為理藩院右侍郎。○庚寅。達賴喇嘛班禪胡土克圖遣使進貢。賞賚如例。○辛卯。兵部題西安等處已故兵丁子弟。有情願留彼處者。令其披

甲留駐。

上曰。駐防兵丁。關係緊要。歲月既久。恐致疎懈。必選嫻於騎射。膂力驍勇者。方准披甲。見在兵丁內。有庸弱不嫻騎射之人。應革退另補。不得虛充數目。著嚴飭該管將軍等知之。

工部題叅修造

陵工明樓等處。浮多錢糧一萬九千五百餘兩。應令監修官員賠補。

上曰。朕閱所修

陵工。堅固精好。著從寬免其賠補。○改廣西山。棗。山角。二驛。丞為巡檢。裁常平。廣盈。二倉。大使。北山寨巡檢。建武。火煙。州門。左江。四驛。丞。缺。○壬辰。

上詣

太皇太后

皇太后宮問安。○癸巳。達賴喇嘛遣使奏曰。

皇上俯鑒鄂齊爾圖汗職貢有年。不忍其後人骨肉分散。靡所止居。惻然垂照。欲已圖爾額

爾克濟農羅卜臧滾布阿拉布坦集居一處。特降恩綸。甚盛德也。第此青海之地。各有分屬。若使居天朝境內。又恐厄魯特或有異言。其阿刺克山之旁。亦屬狹隘。乞大君矜憐。擇水草寬濶處安插一隅。茲已遣車齊克他賴堪布羅卜臧。令於十月內。至阿刺克山。伏乞遣使往會。

上諭理藩院右侍郎拉篤祜。一等侍衛文達曰。爾等可與達賴喇嘛使者同往。召集巴圖爾額爾克濟農羅卜臧滾布阿拉布坦等。相度伊等可以遊牧之地。指而與之。仍會同提督孫思克。將地之界限。令伊標下官弁認記。如巴圖爾額爾克濟農等。因給地安插。欲來謝恩。則許之。來。達賴喇嘛使人欲來請安。亦許之。來。否則給以廩餼而遣之。其額爾德尼和碩齊等。欲與巴圖爾濟農等。一同遊牧。亦許之。爾等可與彼定沿邊為盜作亂之罰。著為令。前巴圖爾額爾克濟農來覲時。已自誓不

復令屬下為非。其羅卜藏滾布阿拉布坦亦須嚴禁所屬。兄弟既已完聚。從此和睦安居。倘再致流亡他往。殊負朕歸并眷恤之意。朕所以不憚諄切訓諭者。亦以其先世恭順有年。不欲令其子孫失所也。其一一傳諭之。○甲午。旌表福建節婦侯官縣王氏。烈婦閩縣陳氏。烈女林氏等。各給銀建坊如例。○乙未。予故貴州大定總兵官海潮龍祭葬如例。○丙申。禮部題。荷蘭國王奏。請定進貢限期。五年一次。又貢船例由廣東進路。但廣東路雖稍近。泊船之地甚險。福建路雖稍遠。泊船之處較穩。嗣後進貢。准由福建進路。應如所請。從之。○丁酉。中元節。遣官祭

永陵。

福陵。

昭陵。

孝陵。

仁孝皇后。

孝昭皇后陵。○陞江蘇布政使章欽文。為河南巡撫。○戊戌。陞大理寺卿舒淑。為都察院左副都御史。○己亥。宗人府題叙江西。陝西。廣西。雲南。軍功。請給正黃旗閒散章京覺羅畢雅祿等十人。拜他喇布勒哈番。拖沙喇哈番。世職。其功牌不及官職者。應悉注冊。從之。○辛丑。

上詣

太皇太后宮問安。○諭刑部。刑獄民命攸關。聽斷雖貴精詳。而案牘務無留滯。庶事得速竣。民免株累。向來凡朔一二日。及齋戒等期。不理刑名。爾衙門一切奏章。俱行停止。因而案件間有停積。恐聽審人犯。久候拖累。覆核事件。遷延滋弊。嗣後遇前項日期。除循例不行刑外。其餘照常章疏事件。仍行審理啟奏。務期獄無稽緩。案得早清。以副朕明慎用刑至意。○又諭大學士等。每月朔初二日。及齋戒日。刑部所上常事。照常發科。刑戮重罪。事關



人命者。勿發。可并數日章疏。於齋戒畢發之。或留中。或發內閣者。皆如之。○以原任內閣學士李光地。補授額外學士。○安南國王黎維禎遣使奉表謝冊封賜卹恩。并進方物。下所司知之。○予故內閣學士兼禮部侍郎牛紐。祭葬如例。○癸卯。

上詣

太皇太后宮問安。○陞宗人府理事官覺羅舜拜。為大理寺卿。○甲辰。

上詣

太皇太后宮問安。○陞內閣侍讀學士吳拉岱。齊禱。俱為內閣學士兼禮部侍郎。○乙巳。諭兵部。理藩院。我兵圍困雅克薩城。羅刹勢迫死守。今時序漸寒。自墨爾根至雅克薩。所設蒙古驛馬。冬月飼秣維艱。其免索倫打虎兒。今歲貢賦。俾之飼秣。并修整器械。以備調用。至蒙古每驛應設夫馬若干。令明愛馬喇等定議。移文索倫總管洪吉。即中滿丕等。如數

取用。索倫打虎兒夫役。與備養之馬。如數應用。又博定率往築城種地官兵內。選二百人。俱留墨爾根。亦候調用。餘悉遣還。○免江南沛縣本年分電災額賦有差。○丙午。

上詣

太皇太后

皇太后宮問安。○丁未。

上御太和門視朝。文武陞轉各官謝恩。次安南國使臣等行禮。○

上御經筵。講畢。賜大學士。九卿。詹事。及講官等

宴。○戊申。旌表廣西節婦。臨桂縣蔣士達妻

朱氏。劉翊妻朱氏。興安縣蕭齊蕃妻劉氏等

各給銀建坊如例。○己酉。

上詣

太皇太后宮問安。○賜荷蘭國王敕諭曰。朕惟柔遠能邇。盛代之嘉謨。修職獻琛。藩臣之大節。輸誠匪懈。寵賚宜頒。爾荷蘭國王耀漢連氏甘勃氏。屬在遐方。克抒丹悃。遣使齎表。納

貢。忠蓋之忱。良可嘉尚。用是降敕獎諭。并賜王文綺白金等物。王其祇承。益勵忠貞。以副朕眷。欽哉。○諭議政王大臣等。向者羅刹侵犯雅克薩。尼布潮諸地。戕我居民。邊境騷然。曾諭鄂羅斯察漢汗來使尼果賚等。撤回其衆。自後竟不覆奏。反在在侵犯。肆行擾害。意尼果賚未達前旨於察漢汗。復令被擒羅刹。持書從喀爾喀地宣諭之。亦不覆奏。因遣發官兵往雅克薩。招撫羅刹。不戮一人。令其頭目額禮克謝等。持書歸去。羅刹聞我師言旋。復回雅克薩。築城以居。朕思本朝頻行宣諭。曾未一答。而雅克薩羅刹。又死守不去。或尼布潮諸地阻隅。前書未達。或雅克薩羅刹。皆彼有罪之徒。不便歸國。俱未可知。今問荷蘭國貢使。稱伊國與鄂羅斯接壤。語言亦通。其以屢諭情節。備悉作書用兵部印。付荷蘭國使臣。轉發鄂羅斯察漢汗處。收回雅克薩。尼布潮羅刹。於何處分立疆界。各毋得踰越。則

兩界人民。均得寧居。不失永相和好之意。察漢汗覆奏時。令其使由陸路直來。若陸路難通。即以來疏付荷蘭國代奏。再依此作書發西洋國轉達之。○庚戌。

上詣

太皇太后

皇太后宮。問安。○吏部題翰林官請照例外轉。上曰。翰林官員內。或有不善書法者。或有不撰講章者。或有不善句讀通鑑者。甚有以飲酒宴會為事。博奕為戲者。以讀書立品。思副委用。裨益國事者甚少。今若依部議。道缺調用。恐伊等登第之後。未經敦歷。驟任監司。則無才之人。反為僥倖。何所懲創。應以學問不及者。分別一二人降謫。庶衆皆知儆。著吏部翰林院學士再議。尋吏部等衙門議覆。翰林院侍讀詹事府庶子以下各官。外轉道員例。相應停止。嗣後侍讀。庶子以下各官。有外轉者。應以同知運判提舉等缺補用。從之。○陞

江南蘇松道劉鼎為江蘇布政使司布政使

○辛亥。

上巡幸塞外。命皇太子允初。皇長子允禔。皇三

子允禔。

皇四子胤禩隨駕。是日啟行。駐蹕密雲縣河漕

莊。○以吳喇忒故鎮國公揀穆察子杜冷襲

爵。○壬子。

上駐蹕古北口城內

八月。癸丑朔。

上駐蹕古北口外上都畢喇地方。○甲寅。

上駐蹕博洛和屯。○乙卯。

上駐蹕宜孫喀布泰昂阿地方。○丙辰。

上駐蹕拍敦昂阿地方。○丁巳。遣大學士宋德

宜祭。

先師孔子。○

上駐蹕烏蘭哈達地方。○戊午。秋分。夕

月於西郊。遣都統伯莽喀行禮。○

上駐蹕森濟圖哈達地方。○己未。

上駐蹕烏喇岱地方。○庚申。

上駐蹕噶海圖昂阿地方。○辛酉。

太宗文皇帝忌辰。遣官祭

昭陵。○

上駐蹕巴顏喀喇地方。○壬戌。

上駐蹕克勒烏里雅蘇台。○癸亥。

太祖高皇帝忌辰。遣官祭

福陵。○

上駐蹕克勒地方。○乙丑。

上駐蹕西爾哈地方。○戊辰。祭

大社

大稷。遣吏部尚書達哈他行禮。○

上駐蹕西爾哈烏里雅蘇台。○己巳。

上駐蹕愛里地方。○庚午。

上駐蹕汗特木爾達巴漢地方。○辛未。

上駐蹕烏爾格蘇台。○賜翁牛特多羅杜稜郡

王畢禮衮達賴。蟒袍褂帽韉。喀喇沁多羅杜

稜郡王扎什以下。及台吉等。蟒袍褂帽帶韉

緞布銀兩有差○四川陝西總督禧佛疏叅陝西延綏總兵官李承恩年老總職不行自陳應勒令休致從之○予福建陣亡正白旗佐領海都祭葬如例○壬申。

上回鑾駐蹕商堅嘉澤噶山○癸酉。

上駐蹕恩格木噶山○甲戌。

上駐蹕遥亭○乙亥。

上駐蹕牛欄山○以正黃旗佐領索額圖為領

侍衛內大臣○裁雲南英武關土巡檢缺歸

并鎮南州管理○喀爾喀額爾克戴青台吉

遣使進九白年貢宴賚如例○旌表江南太

倉州孝子郁聖揆給銀建坊如例○丙子。

上回宮詣

太皇太后

皇太后宮問安○丁丑。

上詣

太皇太后宮問安○諭黑龍江將軍薩布素等

今天時漸寒河流將結宜每事籌畫預為之

備。觀羅刹復來雅克薩城必待援兵之至且

冀我兵於流澌時撤回耳。目前我兵雖掘壕

防禦至隆冬冰合後船艦若何收藏馬匹若

何飼秣敵兵來援若何撲剿勿令入城爾等

其詳加籌畫密以奏聞尋薩布素等奏臣等

凜遵諭旨已於城三面掘壕築壘壕外置木

椿鹿角分汛防禦城西對江另設一軍若截

江之東西以泊船水險難停恐未流澌時江

路有羅刹逸出尼布潮來援復派剿禦之兵

於東西兩岸泊船備之離城六七里上流有

港流澌時即藏船於內另設一軍守護兼令

堵尼布潮援兵至軍中馬匹有疲羸者一半

發黑龍江一半發墨爾根令駐彼盛京官兵

飼秣得旨發墨爾根處之馬匹如交駐彼盛

京官兵則更費食糧可令索倫總管洪吉等

飼秣盛京官兵仍行遣還其發黑龍江處之

馬匹即令黑龍江官兵飼秣○先是副都統

博定請率築城官兵二百人進剿事下將軍

薩布素等議。至是。薩布素等奏。臣等統率二千一百人。所在防禦。兵力尚單。得博定增兵前來。殊有裨益。

上因命博定。精選築城及種地官兵二百人。齎二月食糧。速赴薩布素等軍前。令其叅贊軍務。○戊寅。九卿議覆。江南學政李振裕疏言。學宮崇祀賢儒內。有於前明末年增改者。序列失次。請敕部詳考世代先後。依次改正。查明萬曆以後。增改賢儒祀典。明會典及曲阜誌。俱未及載。故各省學宮。未經改正。今應將太學。見在從祀位次。繪圖頒行直隸各省學宮。照式改正。從之。○己卯。遣官祭

歷代帝王。○遣官祭城隍之神。○陞正白旗滿洲副都統得爾德。為本旗護軍統領。○予故蒙古都統塔爾代。祭葬。謚勇壯。○庚辰。福建總督王國安。奏請臺灣駐防兵丁三年之中。陸續更換。下部議行。○賜安南國王黎維禎。表裏五十疋。貢使等賞賚如例。○免湖廣

興國。通山。二州縣。浙。江。西。安。等。九。縣。本。年。分。水。災。額。賦。有。差。○詔。增。孔。林。地。十。一。頃。有。奇。免。其。稅。糧。

九月。壬午朔。

上詣

太皇太后

皇太后宮問安。○喀爾喀土謝圖汗遣使進九白年貢。宴賚如例。○癸未。以內閣學士徐廷璽。詹事府詹事尹泰。充會典副總裁官。○甲申。

上幸玉泉山。○乙酉。

上詣

太皇太后宮問安。○丙戌。

上御太和門視朝。文武陞轉各官謝恩。次朝鮮國使臣等行禮。○丁亥。工部題。修理

陵工。所用浮多銀四千一百餘兩。應令內務府總管海喇遜等賠償。得旨著行豁免。○己丑。以吳喇忒故輔國公達爾瑪子鄂爾奔襲爵

○陞鑲白旗蒙古副都統班達爾沙為蒙古都統○庚寅先是議政王大臣等議覆差往盛京兵部尚書伊桑阿等回奏臣等會同盛京副都統穆泰議得盛京等處地方廣濶應請增兵防戍查烏喇寧古塔原有駐防兵三千名請分撥一千五百名移駐黑龍江將盛京兵一千五百名移駐烏喇寧古塔再將在京兵一千五百名移駐盛京庶就近遷移不致勞頓應如所奏

上諭大學士等曰今遣發兵丁使盛京之兵又行遷移必致苦累此本著存貯爾衙門俟秋後再奏至是大學士等復行請旨

上曰遣兵防戍所繫最要盛京雖云沃壤但人民稀少米糧未必饒裕恐大兵移駐米價一時騰貴議政王大臣等所議未悉著侍郎郭丕學士禪布速往問明該將軍副都統來奏尋郭丕等回奏臣等會同酌議烏喇寧古塔所補兵數應即將在京兵丁發往駐防不必

又將盛京兵分撥餘應如前議但目下糧食未足耕種不及一應口糧應令該將軍等於興京等處採買預備得旨此時天氣寒冷這派往駐防兵丁暫行停止俟來年秋收後陸續發往耕種地畝事務著戶兵二部議奏○諭戶部自古帝王撫馭九有軫念民依凡鞠謀生養為計甚周猶以賜復蠲租為布德行仁之要務朕嘉與海內元元共圖樂利弛徵減賦時厯於懷惟頻渙恩施俾萬姓得沾實惠念直隸畿輔重地天下根本寬租之詔屢沛但順水保河較之畿南諸府差役倍多供億尤劇應加軫恤又湖廣湖南福建四川貴州地方昔年為賊竊踞民遭苦累今雖獲有寧宇更宜培養以厚民生應一體蠲免用昭愷澤直隸順水保河四府及四川貴州兩省所有康熙二十六年應徵地丁各項錢糧俱著蠲免二十五年未完錢糧亦著悉與豁免湖廣湖南福建兩省所有康熙二十六年下

半年。二十七年上半年。地丁各項錢糧。及二十五年未完錢糧。亦與盡行豁免。爾部速行該地方通行曉諭。務使人民均被恩膏。以副朕愛育蒼生至意。如有不肖有司官役。借端朦混。反私行重徵者。該督撫指名題參。從重治罪。如該督撫徇隱。不行糾舉。或經叅奏。或被告發。定行一并從重治罪。爾部即遵諭行。

○調刑部尚書諾敏。為禮部尚書。○免直隸武清。文安。保定。三縣。本年分水災額賦。有差。

○壬辰。理藩院尚書阿喇尼。差筆帖式英古。奏報會盟日期。且言軍中所有糗糧。僅可食至十月中旬。恐致匱乏。

上命歸化城。動支二百餘人一月之糧。令喀爾喀和碩達爾漢親王諾內等六旗。選取駱駝解送。地方遙遠。仍遣歸化城副都統綽爾濟雅克。率佐領驍騎人等。一同解往。○癸巳。以原任副都統羅奇。為正白旗滿洲副都統。調鑲紅旗蒙古副都統康喀喇。為滿洲副都統。

○乙未。陞四川陝西總督禧佛。為刑部尚書。○調河南河北總兵官馮德昌。為陝西延安總兵官。○丁酉。厄魯特噶爾丹博碩克圖汗。遣使進貢。賞賚如例。○戊戌。前鋒統領伊巴漢。以老病乞休。久之。○己亥。禮部題。朝鮮國王李燾。遣使謝罪。進貢方物。應交內務府收貯。

上曰。朝鮮國因謝罪進貢。理宜不收。但恐發還。不惟齎送人役勞苦。亦且驛遞騷擾。可將此項。准作年貢。嗣後謝罪貢物。著停止。○予故廣西巡撫郝浴。祭葬如例。○諭大學士等曰。爾等職任朝廷重務。豈可專為一身一家之計。古有詔旨既下。大臣封駁之例。今滿大學士凡有所言。漢大學士惟唯諾諾。並不辨論是非。如此。則劉正宗。陳名夏之例。具在。學士等誠能各抒己見。共相叅酌。事務豈至舛錯。今爾等諂媚大學士。緘默不言。以為保身之計。吳格塞。卓靈阿之例。具在。至翰林院撰



擬文章俱關要務。今翰林撰擬不堪。漢掌院學士。漢大學士。俱不改正。誠恐改正一字。即為終身之仇。掌院學士畏懼翰林。大學士畏懼六部。此皆尸位素餐。患得患失之所致也。○庚子。以江西南康府知府周燦。為四川按察使司副使。提調學政。○禮部等衙門議覆。朝鮮國王李焞疏言。陪臣鄭載嵩等。具呈禮部。飾詞巧辨。蒙恩寬免嚴拏。令臣自行處分。今已將鄭載嵩等。褫其官職。依律定罪。應如所議。得旨。鄭載嵩等。本當依議處分。但念係愚昧無知。姑從寬免其革職發配。著各降四級調用。○辛丑。

上詣

太皇太后

皇太后宮問安。○工部尚書杜璵。丁母憂。令回籍守制。○壬寅。予故副都統西伯赫。祭葬如例。○癸卯。理藩院題。厄魯特土哈爾台吉。噶爾丹台吉等。遣使互市。

上曰。厄魯特部落。如噶爾丹等四大台吉。應令來京互市。其餘小台吉。俱於張家口互市。著為定例。○甲辰。

上詣

太皇太后宮問安。○以鑲黃旗護軍統領蘇爾達。為左翼前鋒統領。○乙巳。以庶子伊圖。充日講起居注官。○陞山西巡撫圖納。為四川陝西總督。○陞前鋒叅領牛鈕。為鑲紅旗蒙古副都統。○喀爾喀澤卜尊丹巴胡土克圖。遣使進貢。賞賚如例。○丙午。

上御太和門視朝。文武陞轉各官謝恩。次厄魯特使臣等行禮。○丁未。轉都察院左都御史陳廷敬。為工部尚書。○旌表山西烈婦盧氏。拒姦殞命。給銀建坊如例。○戊申。

孝慈高皇后忌辰。遣官祭

福陵。○陞山西布政使馬齊。為山西巡撫。○己酉。鄂羅斯察漢汗。遣使上疏言。

皇帝所賜之書。下國無通解者。及尼果賚歸問。

之述

天朝大臣。以不還逋逃根特木爾等。騷擾邊境。為辭。近者下國邊民。搆釁作亂。

皇帝遣師辱臨境上。恭請察明作亂之人。發回正法。除遣使議定邊界外。先令米起佛兒。魏牛高。宜番。法俄羅斯瓦等。星馳齎書以行。乞撤雅克薩之圍。仍詳晰作書。曉諭下國。

上諭大學士等曰。鄂羅斯察漢汗。以禮通好。馳使請解雅克薩之圍。朕本無屠城之意。欲從

寬釋。其令薩布素等。撤回雅克薩之兵。收集

一所。近戰艦立營。并曉諭城內羅刹。聽其出入。毋得妄行攘奪。俟鄂羅斯後使至。定議。

庚戌。陞吏部左侍郎管右侍郎事董訥。為都

察院左都御史。○陞鑲黃旗滿洲副都統佛

爾諾。為本旗護軍統領。護軍叅領那泰。為鑲

白旗蒙古副都統。○辛亥。禮部尚書沙澄。以

會推四川學道。徇情爭論。命原品休致。

冬。十月。壬子朔。享。

太廟。

上親詣行禮。○遣官祭

永陵。

福陵。

昭陵。

孝陵。

仁孝皇后。

孝昭皇后陵。○

上詣

太皇太后宮。問安。○

上幸玉泉山。○頒康熙二十六年時憲曆。○皇

子胤祥生。○甲寅。

皇太后聖壽節。

上率王以下。文武大臣。侍衛等詣

皇太后宮行禮。導

懿旨。停止筵宴。○丙辰。

上御太和門視朝。文武陞轉各官謝恩。次鄂羅

斯使臣等行禮。○

上詣

太皇太后宮問安○調刑部尚書張士甄為禮部尚書○陞四川夔州副將林寶為河南河北總兵官○丁巳

上幸南苑行圍○免順天府霸州寶坻縣本年分水災額賦有差○戊午調戶部左侍郎胡昇猷為吏部左侍郎管右侍郎事○陞山西按察使布雅努為山西布政使司布政使○理藩院尚書阿喇尼疏報臣等於八月十六日召集喀爾喀兩翼汗及濟農台吉等宣示聖諭令其同歸於好色冷阿海台吉等跪言曰我七旗喀爾喀向皆和好自羅卜臧肇亂以來互將人民隱占是以蓄怒交惡今皇上遣大臣使我等和睦安樂我等不勝懼忤土謝圖汗之弟西地西里巴圖爾台吉疏言曰我兩汗相惡俱係小人獻讒所致今使兩汗納忠言斥讒佞我竭力諫諍自當言歸於好兩翼汗曰

聖意諄復所以開示愚昧者甚至我等敢不祇遵臣等遂令兩汗及濟農台吉等於本月二十三日檢選所屬材能寨桑六十餘人俱至噶爾璽西勒圖澤卜尊丹巴胡土克圖前設立重誓兩翼互相侵占之台吉人民令各歸本主一切應結事件俱審擬完結仍令濟農台吉等設立重誓自今以往當永遠和協此皆

皇上非常威德之所致也謹以狀聞噶爾璽西勒圖亦以諭和事竣具疏陳奏得旨喀爾喀左右兩翼汗及濟農台吉等俱遵朕諭旨即行設誓和睦可嘉該部院知道○庚申陞吏部左侍郎管右侍郎事胡昇猷為刑部尚書○辛酉陞前鋒叅領朱爾素為鑲黃旗滿洲副都統○壬戌

上自南苑移駐玉泉山○轉戶部右侍郎蔣弘道為左侍郎調刑部右侍郎王日藻為戶部右侍郎○甲子旌表陝西節婦唐氏邢氏等

各給銀建坊如例○乙丑。

上自玉泉山回宮。詣

太皇太后

皇太后宮問安○以翰林院侍讀王尹方檢討徐嘉炎充日講起居注官○調兵部右侍郎馬世濟為吏部右侍郎。陞山東巡撫張鵬為刑部右侍郎○工部議覆監修下河工部右侍郎孫在豐等疏言疏濬之法開濬不如循舊築高不如就低。因勢利導。逐節疏通。一由

廟灣迎流而下。約洩水十分之四。一由天妃石碇順流而下。約洩水十分之二。一由白駒丁溪諸場分洩而下。約洩水十分之三。其餘一分由芒稻河導之入江。至若串場一河。綿亘范公隄一帶。既為鹽艘利涉。又會諸引河之水。傳送各場。以出海口。最為關鍵。而河身淤墊。亟宜開濬。上而涇河黃浦。子嬰之間。舊有通湖閘。減水閘。下而海口。舊有各場諸閘。并應修建。使上下相應。隨水消長。以時節宣

水得常流。潮無內灌。永杜淤墊之虞。則旱潦無憂。田饑不病。萬世利賴。臣等議。孫在豐身在河干。相度形勢。繪圖貼說。既稱若者宜先濬。若者宜後濬。俟挑完之日。改滾水壩為閘。將串場河。令鹽商挑濬。並不必挑濬等處。俱係詳審的確。均應如所請。速行挑濬。又稱興工之日。管理官員。最為緊要。合將內外候補病痊降調等官。有情願赴工者。速往侍郎孫在豐等工所。具呈揀用。工成之日。酌量議叙。得旨。如議。改滾水壩為閘。著孫在豐等會同靳輔。確議具奏○庚午。免甘肅歸德所所屬保安堡屯地。本年分水災額賦○辛未。

上詣

太皇太后宮問安○壬申。調總督倉場戶部右侍郎蔡毓榮為兵部右侍郎。陞都察院左僉都御史張集為總督倉場。戶部右侍郎○諭大學士勒德洪等。鎮國公哈爾薩為人鑽營。有玷公爵。應將此公爵。令伊兄六格襲替。蘇

努雖係宗室。其行事乃如人之奴僕。在安親王。及索額圖家。諂媚行走。至在議政處。但遇勢要之人。發一論議。伊輒唯唯聽從。不敢更有論說。其阿順之態。與家奴無異。爾等將此旨傳諭哈爾薩蘇努二人。○革哈爾薩之子海青。輔國公爵。○乙亥。以內閣學士顧八代。李光地。俱充經筵講官。○丙子。上御太和門視朝。文武陞轉各官謝恩。次厄魯特進貢使臣等行禮。○

上詣

太皇太后

皇太后宮。問安。○陞吏部郎中薩弼圖。為山西按察使。司按察使。○戊寅。監修總裁。總裁。副總裁。纂修等官。恭送。

太祖高皇帝實錄。聖訓。至

皇史宬尊藏。○

上諭大學士等曰。人命關係最重。各省所審錄強盜人命事件。文致周密。無隙可窺。故閱之

最難。此等事。皆深宜詳慎。○己卯。旌表山東節婦。鄒城縣徐氏。給銀建坊如例。○庚辰。吏部議覆。左都御史董訥。疏叅中書科掌印中書托鼐。將俸次在後之中書王緝植。咨送考選。查王緝植。係原任左都御史徐元文子壻。顯有情弊。據徐元文供。王緝植。並非子壻。咨送事。並不與聞。但如無營求之處。托鼐豈肯將王緝植。越次咨送。應將托鼐。王緝植。徐元文。俱革職。得旨。徐元文。從寬免革職。著降四級調用。餘如議。○雲南巡撫王繼文。丁母憂。命回旗守制。

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十七

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十八

監修總裁官光祿大夫太保兼太子太傅保和殿大學士兼戶部尚書一等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣劉世明

總裁官光祿大夫文華殿大學士兼吏部尚書臣朱軾等奉

敕修

康熙二十五年丙寅十一月辛巳朔

上詣

太皇太后宮問安○壬午以戶部左侍郎鄂爾

多為內務府總管○癸未陞河南布政使郎

永清為山東巡撫○丁亥冬至祀

天於

圜丘

上親詣行禮○遣官祭

永陵

福陵

昭陵。

孝陵。

仁孝皇后。

孝昭皇后陵○戊子。

上率王以下文武大臣侍衛等詣

太皇太后

皇太后宮行冬至慶賀禮。御太和門。王以下文

武各官上表朝賀。次厄魯特進貢使臣等行

禮○已丑。山西巡撫馬齊陛辭。

上諭曰。爾現在居官好。聲名亦佳。但朕觀各督

撫。其始未有不善。旋即改轍。爾若始終如一。

毋改其操。則善矣○免順天府玉田豐潤二

縣。本年分水災額賦十之二○庚寅。

上詣

太皇太后

皇太后宮問安○以鎮國公門度為宗人府右

宗正○

上諭大學士等曰。爾等所進平定三逆方畧四

冊朕已覽畢。其中舛錯頗多。如王輔臣為馬

鷄子。當年隨經畧洪承疇去時。並無此號。且

朕記其由雲南拔剿總兵官。授為陝西提督。

今謂由陝西總兵官陞任。竟未詳察。至論贊

中。援宋太祖杯酒釋兵權事。吳三桂等。非宋

功臣可比。乃唐藩鎮之流耳。大學士等奏曰。

聖見至當。宋臣時在輦下。釋其兵權甚易。豈可

與諸逆久在邊陲者比。

上曰。平逆始末。阿蘭泰知之甚詳。是非得失。天

下自有公論。豈譽之而增高。不譽而加損也

耶。大抵記事。欲得其實而已。其謬誤處。以簽

標識者。爾等其酌改之○辛卯。授故奉國將

軍德色禮子德雲為奉恩將軍○科爾沁和

碩卓禮克圖親王杜爾巴故。遣官致祭○壬

辰。轉戶部右侍郎麻爾圖為左侍郎。陞內閣

學士賽弼漢為戶部右侍郎○禮部等衙門

會議。浙江提督陳世凱。疏請令武臣陪祀

文廟。查凡行事例。



文廟春秋二祭。武官雖不陪祀。但康熙八年。皇上幸學。武官二品以上。亦令陪祀。應照此例。凡遣官春秋二丁致祭。

文廟武官二品以上。並令陪祀。其各直省府州縣等學春秋二丁祭。應令協領及副將以上。照例以文左武右行禮。其致祭。仍令地方正印官主祭。從之。○兵部題。自吳逆反叛以來。各省綠旗人。議叙軍功者甚多。此內不無匪人。並未身赴軍前。實緣假冒之事。嗣後功加各官內。除經制見任官。與部准効用官。及題帶征剿。并詳明報部帶去人員。仍照例錄用。其餘功加各項官。俱停其錄用。從之。○癸巳。理藩院侍郎拉篤祜等疏言。臣等出寧夏阿喇克山。閱視地形。得遇巴圖爾額爾克濟農。約其在東大山北。候聽宣旨。於九月十二日。在嘉峪關外。得遇達賴喇嘛使者車齊克他賴堪布。隨遣人召羅卜臧滾布阿拉布坦至。語之故。亦約會於東大山北。羅卜臧滾布

阿拉布坦曰。蒙

皇上洪恩。賜我等地方。當即偕諸大人往赴約會之地。但我姊阿奴。乃噶爾丹之妻。聞率兵千人。聲言往謁達賴喇嘛。從此而過。或中懷詭計。襲我。亦未可定。不得不整力待之。請即於此地宣旨。可乎。臣等隨同車齊克他賴堪布宣旨訖。羅卜臧滾布阿拉布坦回奏曰。

聖上俯念臣祖鄂齊爾圖汗。使臣兄弟完聚。給以土地。臣不勝懽懽。即當遷至濟農所居。一同遊牧。但正值冬月。屬下人民散處。使之遷移。貧人牲畜少者。難以度冬。請俟來年草青時。遷之。本月二十三日。臣等至東大山北。令巴圖爾額爾克濟農跪。宣旨畢。臣等又謂巴圖爾額爾克濟農曰。爾所請喀爾占布爾古忒。空郭爾俄壠。巴顏努魯雅布賴。噶爾拜瀚海等地方。給汝遊牧外。自寧夏所屬玉泉營以西。羅薩喀喇山嘴後。至賀蘭山陰一帶。布爾哈蘇台之口。又自西寧所屬倭波嶺塞口。

以北。奴渾努魯山後。甘州所屬鎮番塞口以  
北。沿陶闌泰薩喇春濟。雷渾希里等地。西向  
至厄濟納河。俱以離邊六十里為界。隨與巴  
圖爾濟農屬下。達爾漢噶卜楚喇麻波克寨  
桑。及提督孫思克標下遊擊李本善等。畫地  
為界而記之。臣等又與巴圖爾額爾克濟農  
定議罰例。蒙古如殺邊內之民。不論幾人。俱  
斬。其妻子牲畜入官。偷盜民人牲畜者。為首  
二人絞。仍將妻子牲畜入官。餘者罰以三九  
牲畜。仍鞭一百。其不為盜而私入邊遊牧者。  
台吉則罰以三九牲畜。寨桑等罰以一九牲  
畜。平人則鞭五十外。仍將所騎馬匹入官。其  
攜帶家口牲畜入邊遊牧者。不論幾戶。俱入  
官。至民人往邊外伐木刈草。蒙古有奪其食  
物者。不論幾人。將所乘馬匹。盡行給還民人。  
仍鞭三十。其屬下每犯一次。并罰濟農五九  
牲畜。俟羅卜臧滾布阿拉布坦來會之時。將  
此項情節。亦明告於彼。其額爾德尼和碩齊

亦須嚴禁。勿使妄行竊盜。又厄魯特胡土克  
圖之子噶爾豐多爾濟者。亦係鄂齊爾圖汗  
之嫡孫。應令與巴圖爾額爾克濟農等附牧  
上曰。噶爾豐多爾濟。既係鄂齊爾圖汗之孫。應  
令其與巴圖爾額爾克濟農等。一同遊牧。其  
拉篤祐等所定地界。并嚴禁盜竊之例。理藩  
院其移文督撫提鎮通行曉諭。○甲午。兵部  
議。正黃旗筆帖式額石黑家被盜疎防各員。  
應俱住俸。得旨。追緝盜賊。係步軍專責。今額  
石黑家。與防守汛地甚近。賊將額石黑所傷  
並未往救。且賊又不獲。安知守汛步軍。不與  
賊通同耶。該管各員。其一并嚴議以聞。尋兵  
部審奏。並無通同之處。應將步軍校。步軍撥  
什庫等。降級枷責。從之。○乙未。

上詣

太皇太后宮。問安。○給湖廣陣亡護軍校赫圖  
瓦爾達。各拜他喇布勒哈番世職。以攻長沙  
府時。首先登城故也。○丙申。諭禮部。朕惟敬

天奉

祖郊祀廟饗必精白厥心竭誠致慎庶幾有孚昭格用洽明禋朕於祭祀

壇

廟每躬詣行禮未嘗不齋明祓濯實圖感通凡從事於祀典者皆宜表裏精誠虔盡職掌近見執事陪祀各官間有因循怠忽視為具文不能盡志致慙共効昭事之忱殊為非禮嗣後務俾各秉誠心克恭祀事凡行禮儀節始終整肅毋得慢易用副朕敬

天奉

祖至意作何再加通飭永可遵行著九卿詹事科道會同詳加確議具奏○

御書學達性天四字匾額頒發宋儒周敦頤張載程顥程頤邵雍朱熹祠堂及白鹿洞書院又以湖廣長沙府嶽麓書院為宋儒張栻朱熹講學之所一體給匾并頒日講解義經史諸書○

御書定海山三字匾額懸於寧波府定海山○

免江南徐州本年分蝗災額賦有差○丁酉調湖廣巡撫石琳為雲南巡撫以原任雲南布政使田啟光為河南布政使司布政使○以湖廣故散毛宣撫使司宣撫使覃勲麟子覃弘基襲職○戊戌

上詣

太皇太后

皇太后宮問安○

上謁

孝陵是日啟行駐蹕邦均○陞內閣侍讀學士額爾黑圖為內閣學士兼禮部侍郎○己亥上率扈從王內大臣侍衛部院大臣等詣

孝陵行禮奠酒舉哀畢又至

仁孝皇后

孝昭皇后陵奠酒舉哀王以下大臣侍衛等行禮是日

上駐蹕馬蘭峪城內○兵部左侍郎楊雍建疏

請終養。允之。○庚子。

上率扈從王內大臣侍衛部院大臣等詣

孝陵

隆恩殿致祭行禮。又遣和碩顯親王丹臻詣

仁孝皇后

孝昭皇后陵致祭行禮。是日。

上駐蹕湯泉。○辛丑。

上駐蹕遵化州。○壬寅。

上駐蹕三屯營城內。○免江南六合沛縣蕭縣

本年分蝗災額賦有差。○癸卯。

上行圍射。殪二虎。駐蹕米峪口。○甲辰。

上行圍射。殪二虎。駐蹕灤河西岸。○乙巳。

上行圍射。殪一虎。駐蹕龍井關。○丙午。

上出龍井關。駐蹕攔羊口西。○叙蒙古出征浙

江福建軍功。給喀喇沁多羅杜楞郡王扎什

旗分叅贊都統巴雅爾等十員。二等阿達哈

哈番。拖沙喇哈番有差。餘功牌不及官職者。

悉令註冊。○予福建陣亡鑲紅旗前鋒叅領

喜佛。祭葬如例。○吐魯番阿布爾木薩布拍

爾馬哈馬特厄敏。巴土爾哈西汗疏言。我承

蘇喇伊滿汗之業。所居之地雖廣。惟知謹守

疆界。然道里云遙。向風殊切。今遣五祿合澤

等頭目五人。謹貢方物。但向進貢頭目。所帶

人役甚多。甘肅肅州亦有我土之人居住。因

遭賊亂。俱各星散。今聞流寓西寧地方。乞將

此等人。仍令居住甘肅。以便往返行走。臣係

青吉思汗後裔。故敢陳情。得旨。該國進貢方

物。具見悃誠。餘著該部議奏。尋禮部議覆。查

西寧地方。並無伊國中。人。不便令其移居。應

無庸議。從之。○丁未。

上行圍射。殪一豹。駐蹕孤山西南。○戊申。

上駐蹕湯泉。○己酉。

上率扈從王內大臣侍衛部院大臣等詣

孝陵奠酒舉哀。又率王大臣等至

仁孝皇后

孝昭皇后陵奠酒舉哀。是日。駐蹕孫家莊西。○

庚戌。

上駐蹕薊州城內

十二月辛亥朔。

上駐蹕邦均○免江南靈璧縣本年分蝗災額賦有差○故輔國將軍杜爾霸之妻趙氏殉節。給祭一次○壬子。

上駐蹕夏店○癸丑。

上回宮。詣

太皇太后

皇太后宮問安○丙辰。諭大學士等。日者遣部員自吉林烏喇至黑龍江。以蒙古席北。打虎兒。索倫等人力耕種。田穀大獲。夫民食所關至重。來歲仍遣前種田官員。以蒙古席北。打虎兒。索倫等人力耕種。郎中博奇所監種田地。較諸處收穫為多。足供驛站人役之口糧。又積貯其餘穀。博奇効力。視衆為優。其令註冊。此遣去諸員。可互易其地。監視耕種。博奇又復大獲。則加議叙○諭大學士等。聞有運

盛京糧米。於山海關內者。又泛海販糶於山東者。多有之。糧米所繫。最為緊要。況今防戍官軍。人口衆多。糧糶可以足用。不致缺乏耶。未可必也。宜止其販糶糧米。其下所司。密咨移盛京將軍。副都統。戶部侍郎。以已意禁之。○陞福建布政使張汧。為湖廣巡撫○戶部等衙門。遵旨議覆。鳳凰城等八處。耕種地畝。院堂官三員監督。得旨。鳳凰城等處。著遣賢能司官八員。令吏部侍郎薩海。戶部侍郎賽弼漢。內閣學士齊禱。前往監督○丁巳。

上詣

太皇太后宮問安○吏部尚書達哈塔母故。遣大臣一員。侍衛四員。往奠茶酒○戊午。調刑部左侍郎張可前。為兵部左侍郎。陞翰林院掌院學士張英。為兵部右侍郎。轉刑部右侍郎。張鵬。為左侍郎。陞左副都御史趙之鼎。為刑部右侍郎○予臺灣殉難續順公沈瑞。暨

妻鄭氏。及拖沙喇哈番沈璉。各祭葬。已故原任續順公沈永興繼母李氏。照伊子品級。給一次致祭。阿達哈哈番沈志魁之妻崔氏。原任續順公沈永忠之妾滿氏。子氏。沈瑞妹沈氏。俱照烈婦例旌表。各給銀建坊。○辛酉。賜吐魯番阿布爾木薩布拍爾馬哈馬特厄敏巴土爾哈西汗表裏緞絹三百九十七疋。其進貢使臣伍祿合澤等。賞賚如例。○予故二品散秩大臣一等阿達哈哈番坤巴圖魯祭葬如例。○壬戌。

上詣

太皇太后宮。問安。○癸亥。調內閣學士李光地。為翰林院掌院學士。仍兼禮部侍郎。○陞通政使鄭重。為都察院左副都御史。○禮部等衙門遵旨議覆。

天

地壇陪祀各官。向俱照加級四品以上。因人員衆多。以致失儀不敬。嗣後應不照加級。止論

職掌。武官公以下。阿達哈哈番佐領以上。文官尚書以下。員外郎以上。滿科道。并漢六科掌印給事中。武官遊擊以上。陪祭。隨皇上行禮。排列班次。有高声喧語失儀者。監察御史。禮部官員。即指名題參。太常寺人員。前二日齋戒。將供獻祭品等物。監察御史。禮部官員。逐一查看。其

太廟。

社稷。

日月壇。

歷代帝王廟陪祭官員。亦不照加級。武官公以下。叅領阿達哈哈番以上。文官尚書以下。郎中以上。滿科道。漢六科掌印給事中。武官叅將遊擊以上。令其陪祭。一應祭品等物。及查看失儀等項之處。一如

天

地壇例行。

上曰。這所議妥當。著如議。凡祭祀時。特遣御史

監禮專以糾劾。今觀御史。不過左右顧盼。聊以充數。未嘗糾叅一人。且非特諸臣而已。即朕設有不敬處。亦當舉奏也。○甲子。鑲黃旗滿洲副都統巴土。以老病乞休。允之。○以鑲黃旗故一等精奇尼哈番色梭子多爾濟。故二等阿思哈尼哈番畢力克圖親弟沙津達賴。各襲職。○乙丑。

上御太和門視朝。文武陞轉各官謝恩。次吐魯番使臣等行禮。○丙寅。福建提督張雲翼疏言。水師提督施琅。於泉州公廨建立

御書碑亭。各官不便行走。得旨。朕賜御書原以褒施琅之功。崇寵其一家。於伊家左右。猶可豎碑。今乃於公所建立。不獨張雲翼一人出入未便。即合省文武大僚。亦皆震悚迴避。比特借端招搖。欲引以為重。該部嚴飭施琅。不得於公所立碑。○大學士等奏。監修下河侍郎孫在豐與河道總督靳輔。會議改滾水壩為閘座之處。俟黃河刷深之日再議。又

孫在豐等題。先從海口應挑石碇等處興工。請敕河臣。如遇水勢稍減。即將滾水壩盡行閉塞。以便開濬下河。

上曰。項郎中鄭都至京。奏稱伊回時。即興工挑濬下河。朕諭云。此事恐未能即便興工。今孫在豐等果如此具題。其不能與靳輔抗明矣。今若不閉塞滾水壩等口。則下河一面挑濬。上河一面放水。何日方有成功。若即閉塞。日後運河潰決。則靳輔借以為辭。欲籌兩全之道。實為甚難。然靳輔前曾啟奏。築隄以來下河之水。使之歸海。此疏內有無閉塞滾水壩等口之語。爾等即會同九卿詳看。如向欲閉塞。今孫在豐修理下河。又云不可閉塞。可乎。是日大學士等會同工部尚書侍郎等奏曰。臣等與九卿查前靳輔于成龍會議。疏通下河疏內。欲將高郵州北小閘小隄。俱行閉塞。於高郵州南邵伯鎮南二處。修造大石閘兩座等語。今值寒冬。非大修時。且孫在豐尚未



興于。此二人應俱令來京。其滾水壩諸處。應否閉塞。令在九卿前。各陳已見。候

皇上親行詳詰裁定。然後興于似乎有裨。

上曰。此下河決宜開濬。斷不可止。孫在豐不必令其來京。堵塞隄閘之處。孫在豐何敢輕言。若日後上河潰決。渠能任其咎乎。孫在豐所請。不過上河不放水耳。假使靳輔治理下河。不塞水口。能於巨浸中從事乎。令靳輔為之。必欲閉塞諸口。今孫在豐為之。又云不可。豈非有阻撓之意耶。王熙等奏曰。

聖諭誠然。靳輔前疏。欲將諸口閉塞。今又云不可閉塞。前後之言。自相矛盾。

皇上聖明。且親歷河干。洞見河形。若召靳輔詳問。自不得有所隱蔽矣。

上曰。依爾等所議。召靳輔來京。朕有面問之處。

○翰林院編修勵杜訥疏言。

皇上點閱綱鑑大全。綱目全編二書。自康熙二十四年三月起。至康熙二十五年十二月而

竣。臣恭侍左右。仰見

睿照精深。參稽詳切。凡歷代興衰。昔人得失。一

經

聖諭煥若典謨。大義標新。動關建極。綏猷之至計。片語居要。必殫格物窮理之精思。所有記

注

聖諭。伏望頒付史館。宣示來茲。以發涑水所未詳。補紫陽之弗逮。得旨。勵杜訥朝夕侍從。勤勞可嘉。所奏著禮部翰林院會同議行。○丁

卯。以故輔國將軍臺音布祿子滿注習禮。為

三等奉國將軍。○以正藍旗故三等阿思哈

尼哈番葛穆岱子阿喇布坦襲職。○予故原

任四川永寧副將左都督拜他喇布勒哈番

張射光。祭葬如例。○旌表浙江節婦仁和縣

姚氏。錢塘縣呂氏。富陽縣屠氏。德清縣蔡氏。

山陰縣朱氏。胡氏。王氏。貞女。錢塘縣沈氏。賈

氏。烈女。金華縣葉氏等。各給銀建坊如例。○

戊辰。諭戶部。朕惟自古帝王。撫馭寰區。勤宣

德意必軫恤民隱。加惠閭閻。俾黎元樂業。比戶豐盈。而化洽時雍。治登隆理。朕念切民依。鞠謀生養。欲使羣生樂利。幹止寧成。惟頻行減賦蠲租。庶萬姓得沾實惠。前念直隸畿輔重地。王化所宜先。大沛恩膏。用培邦本。而順永。保。河。四府地方人民。較之畿南。差役倍多。繁苦。故將康熙二十六年地丁各項錢糧。同湖南。福建。四川。貴州。四省錢糧。盡與豁免。比慮兵餉。或有不敷。真。順。廣。大。四府地方。未經一體蠲免。今聞此四府人民。間有艱苦。朕心深為軫念。宜速施渥澤。均示仁恩。著將此四府康熙二十六年地丁各項錢糧。盡行蠲免。爾部速行該地方官。通行曉諭。務使人民均沾實惠。以副朕愛育蒼生至意。如有不肖有司官役。借端朦混。私行重徵者。該撫指名題參。從重治罪。如該撫徇隱。不行糾舉。或經參奏。或被告發。定行一并從重治罪。爾部即遵諭行。○先是。侍衛納爾泰。於內大臣前首告

兵部右侍郎蔡毓榮。在雲南時。侵沒逆藩吳三桂入官家財人口。因伊奉差雲南。恐致發露。送銀八百餘兩。蔡毓榮之子蔡琳。在京時。亦曾送銀一百兩。當時不即行出首。罪實難辭。應聽處分。舅舅佟國維等啟奏。事下吏刑二部。將蔡毓榮并子蔡琳。革職拏問。上諭刑部尚書禧佛等曰。蔡毓榮居官貪酷。品行污穢。伊恃財勢。籠絡人心。內外無不周到。得雲南城時。吳逆家貲等物。理應給賞兵丁。蔡毓榮將珍奇財貨。悉侵入私囊。餽送大臣官員。如此大惡之人。若不加懲創。何以使其餘警戒。爾等詳加嚴審。務將情弊盡行察出。又內務府奏。正黃旗薩哈廉所管文定園。首告蔡毓榮。隱匿吳逆嫡孫女郭壯圖之媳。佔據為妾。并受逆黨胡永賓重賄。釋放回籍等事。下吏戶刑三部。一并察審。至是三部題奏。蔡毓榮給送侍衛納爾泰銀八百餘兩。及恢復雲南城。得金二百兩。銀八千兩。將應入官

之吳氏為妾。俱實。胡永賓係吳逆同謀起事要犯。蔡毓榮朦混造入微員冊內。報部釋放。則得賄欺隱情弊亦實。查蔡毓榮前任湖廣總督失陷城池。蒙

皇上不即加誅。從寬優免。復授以封疆重任。不思効死贖罪。反負國恩。侵沒逆藩家財人口。行賄請託。受財縱犯。罪惡莫大。應擬立斬。將所欺隱金銀。照追入官。吳逆家口。除孫女吳氏已故外。俱應追取入官。伊子蔡琳。照以財

行求例。枷五十日。鞭一百。納爾泰受蔡毓榮父子銀兩。因伊自首。應免擬罪。所得銀兩。照追入官。胡永賓已經釋放。應免查議。

上諭大學士等。蔡毓榮當日棄常德退回。以致湖南被陷。徐治都死守。故彝陵僅存。後大兵進剿。恢復雲南。蔡毓榮不過隨大兵行走。並未建尺寸之功。且董衛國攻取楓木嶺。蔡毓榮方進辰龍關。美巧奪董衛國之功。兵部利伊財物。屢叙伊功。甚屬愚昧。且此案所議。缺

畧更甚。胡永賓為何不令解京。部臣之意。以若提胡永賓。未免蔓延牽累人眾。今且交三法司核擬具奏。納爾泰著革職。胡永賓著解京。照例發落。餘依議。○喀爾喀澤卜尊丹巴胡土克圖。遣使請安進貢。賞賚如例。○已巳。翰林院掌院學士李光地。充日講起居注官。○陞順天府府尹張吉午。為通政使司通政使。○陞廣西按察使張永茂。為福建布政使司布政使。○庚午。

上詣

太皇太后

皇太后宮問安。○辛未。順天府進春。○癸酉。和

碩康親王傑書府失火。

上親臨救視。火遂熄。○甲戌。

上幸南苑行圍。○戊寅。歲暮。祫祭

太廟。

上親詣行禮。○遣官祭

永陵。

福陵。

昭陵。

孝陵。

仁孝皇后。

孝昭皇后陵○遣官祭太歲之神○己卯。賜朝

正外藩烏朱穆秦。科爾沁翁牛特。扎魯特。郭

爾羅斯。四子部落土默特。阿霸喀。喀爾喀。敖

漢。喀喇沁。鄂爾多斯。杜爾伯特。奈曼。吳喇忒。

扎賴特。阿祿科爾沁。阿霸哈納。萬齊忒。玉貝

勒貝子。公。台吉等及內大臣。大學士。上三旗

都統。副都統。尚書。侍郎。學士。侍衛等宴○旌

表八旗節婦。滿洲烏楞額妻吳氏等三十一

人。蒙古布達禮妻博氏等十人。漢軍華有良

妻劉氏等六人。各給銀建坊如例○是歲。人

丁戶口二千三十四萬一千七百三十八。田

地。山。蕩。畦地。五百九十萬三千四百三十八

頃六十七畝有奇。徵銀二千七百二十四萬

一百八十九兩有奇。米。粟。六百九十一萬

二千二百九十三石二斗有奇。草三百二十  
九萬二千二百八十七束。麥十五萬九千三  
百一十五引。行鹽四百三十五萬六千一百  
五十引。徵課銀二百七十六萬一千三百八  
兩有奇。鑄錢二萬八千九百八十六萬九千  
八十有奇。

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百二十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二十九

監修總裁官光祿大夫保康大夫太傅保和殿大學士兼戶部尚書二等伯加四

級臣馬齊光祿大夫經筵日講官起居注少保康太子太傅保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十六年丁卯春正月庚辰朔

實錄卷一百二十九

上詣

堂子行禮還宮拜神畢率諸王貝勒貝子公內

大臣大學士侍衛等詣

太皇太后

皇太后宮行禮御太和門王以下文武各官外

藩王及使臣等上表朝賀照例筵宴○朝鮮

國王李焞遣陪臣李侯等表賀冬至元旦

萬壽節及進歲貢禮物宴賚如例○壬午

上詣

太皇太后宮問安○丙戌

世祖章皇帝忌辰遣官祭

孝陵○丁亥孟春享

太廟遣領侍衛內大臣公福善行禮○遣官祭

太歲之神○戊子諭黑龍江將軍薩布素等

自雅克薩城解圍以來聞軍士間有患疾者

此皆屬滿洲精兵朕甚憫焉今特遣太醫院

官二人齎藥前往治之至於羅刹雖與我兵

對壘但我兵攻雅克薩城從未誅戮其人如

城中有患疾之羅刹亦應聽其就醫使還彼

國傳布德意○己丑

上詣

太皇太后宮問安○癸巳以上元節賜外藩喀

爾喀科爾沁翁牛特扎魯特郭爾羅斯烏朱

穆秦四子部落王默特阿霸垓阿祿科爾沁

敖漢喀喇沁鄂爾多斯杜爾伯特奈曼兵喇

忒克西克騰扎賴特巴林厄魯特諸王貝勒

貝子公台吉等及內大臣大學士上三旗都

統副都統尚書侍郎學士侍衛等宴○甲午。上御太和門視朝。文武陞轉各官謝恩。次喀爾喀土謝圖汗之子噶爾旦台吉等行禮○上元節。賜外藩主貝勒貝子公台吉等及內大臣大學士上三旗都統副都統尚書侍郎學士侍衛等宴○丙申。大學士等遵旨覆奏。臣等詳問靳輔開濬下河塞減水壩之處。據云高郵州之南兩大減水壩。自正月可塞至五月。其三小減水壩。自正月可塞至三月。高郵州之北其壩亦有可塞之處。惟高家堰之壩斷不可塞。其應塞之處。前與孫在豐會議時並未議出。殊屬不合。應將靳輔文與該部議處。

上曰。開濬下河。其要不在高郵州之壩。惟在塞高家堰之壩。今不塞高家堰之壩。止塞高郵州之壩。何益之有。

上召問靳輔。九卿問爾之言。與朕所問有不同處否。靳輔奏曰。有一處不同。大臣云。爾若堵

塞淮水入黃河之口。令其流入七州縣。則下河修理。必致遲悞。臣謂修理正河錢糧尚憂不足。安得更更有錢糧。堵塞無用之口。且黃水強。則流入淮河。淮水強。則流入黃河。並非人力所能禁止者。臣若阻撓挑濬下河。能逃國法乎。湯斌奏曰。今雲梯關與前不同。若塞高家堰之壩。則淮水盡入黃河。黃水無倒入淮河之理。從前河隄單弱。不築減水壩。則黃河必致潰決。今隄既高堅。若塞隄壩。使水歸一路。則沙不停壅。河身漸深。今靳輔惟恐黃河潰決。於南岸毛城舖等處築減水壩。令黃河之水。入洪澤湖。洪澤湖不能容。又於高家堰築減水壩。令入運河。運河不能容。又於高郵州等處築減水壩。令入七州縣。今七州縣之水無所歸。不但七州縣之民被災。二三年間。黃水淮水。及三十六湖之水。並皆停蓄泛濫。則漕運亦甚可慮。今

皇上令堵塞高家堰之壩。修理下河。不止七州

縣之民漸安生理。即漕運亦永受其益。此臣據理而言。似屬可行。靳輔奏曰。挑濬下河。使積水入海。雖云善策。然下河既濬。恐海水倒灌可慮。

上曰。挑濬下河。海水斷無倒灌之理。今若將黃河南岸毛城舖等處減水壩閉塞。則黃河水不入洪澤湖。洪澤湖止有淮水。則高家堰隄可以暫塞一年。挑濬下河方能成功。爾等會同九卿再詳議以聞。○喀爾喀土謝圖汗察罕車臣汗訥爾布及七旗濟農台吉等合疏請上。

尊號。疏曰。臣等謹奏。

至聖皇帝睿覽。蒙

皇上鑒照時事。欲安輯遠方。往諭達賴喇嘛遣使。并差大臣會同七旗大喇嘛澤卜尊丹巴胡土克圖召集汗濟農台吉等宣讀訓旨。欽遵。

聖諭不敢有違。普濟衆生。得大安樂。道既蕩平。

法亦恢布。

聖主弘恩。無計酬報。口不能悉。敢竭悃忱。請上尊號。伏祈仁慈憐而受之。疏入。諭曰。喀爾喀諸汗貝勒等戴朕向來仁恩。恪恭敬順。請上尊號。具悉悃忱。但衆汗貝勒等宜仰體朕一視同仁。無分中外至意。謹識朕諭和之旨。自茲以後。無相侵擾。親睦雍和。永享安樂。更勝於上朕尊號也。況前者內外諸王貝勒大臣等請上尊號。未經允行。此所奏請亦不准行。著理藩院行文曉諭。○丁酉。

上詣

太皇太后宮問安。○大學士等遵旨覆奏。開濬下河。應塞減水壩。

上問靳輔曰。黃河南岸毛城舖一帶閘壩。可以閉塞否。靳輔奏曰。永塞不便。可以暫塞一年。上曰。閉塞此等閘壩。水勢可減幾分。靳輔奏曰。春夏可減十分之四。秋冬止減二分。臣仰體皇上愛民之心。故議閉塞一年。若黃河南壩永



塞。恐淮水弱。不能引入清口。黃河水發。反逆灌入淮河。

上曰。淮水原不弱。或恐河南等處水少。以致淮弱。若將高家堰減水壩堵塞。則淮水自不弱。黃水豈能逆入耶。靳輔奏曰。臣議將高家堰之古溝唐埂兩壩。自正月閉塞。至四月初一日開。其餘四壩。亦自正月閉塞。至六月初一日開。

上曰。塞此六壩。可無患否。靳輔奏曰。五月以前。猶可無患。六月以後。不可必矣。

上曰。欲開下河。須塞上流。若但塞高郵州之五壩。不塞高家堰。所謂不揣其本而齊其末。於事何益。靳輔奏曰。前孫在豐止議高郵州。未嘗及高家堰。故臣亦止云高郵州等壩宜閉耳。今

皇上所見。最為洞悉。臣何敢欺隱。高家堰之壩亦當如

聖諭閉塞也。○辛丑。祈穀於

上帝。

上親詣行禮。○壬寅。

上詣

太皇太后

皇太后宮。問安。○諭工部。下河工程。今年著止。將高郵州大小壩。及高家堰閘壩。照靳輔等所奏。定限堵塞。令孫在豐等。挑濬海口。其黃河南岸閘壩。著於來年堵塞一年。其高郵高家堰等閘壩。既限期堵塞。著孫在豐速備工料人夫。自今年十二月興工。挑濬下河。勿致違悞。○命翰林院掌院學士李光地。教習庶吉士。○以喀爾喀故固山貝子巴特馬子扎穆巴。鎮國公薩馬迪子滾布阿拉布坦。各襲爵。○癸卯。陞陝西巡撫圖爾宸。為禮部右侍郎。左僉都御史錢瑤。為順天府府尹。○賜朝正外藩王。貝勒。貝子。公。台吉等。銀幣鞍馬有差。○甲辰。授鎮國將軍祐世布子蘇荷。為三等輔國將軍。多羅溫良郡王孟我庶出子特

克新。輔國公英格理子吳爾德。輔國將軍圖薩子塞爾都。輔國將軍佛格子胡林。輔國將軍塞冷額子僧額。輔國將軍塞祜德子亞圖。俱為奉國將軍。奉國將軍吳禮子吳納。奉恩將軍顧祿固子舒祿渾。俱為奉恩將軍。○授鎮國公登色女。為鄉君。壻祖興茂。為鎮國公壻。秩四品。○乙巳。上謝圖汗奏請敕印。得旨。喀爾喀兩翼授受屬裔之事未結。未便遽與敕印。可將原疏發還。著傳旨諭之。○以禮部尚書公諾敏。為正黃旗蒙古都統。○太子太傅禮部尚書武英殿大學士吳正治。以衰老乞休。允之。○丙午。

上詣

太皇太后宮。問安。○喀爾喀盆楚克台吉等。遣使進九白年貢。宴賚如例。

二月。己酉朔。陞山西布政使布雅努為陝西巡撫。○以原任江南安徽按察使盧崇興。為廣西按察使。司按察使。○庚戌。刑部等衙門。

會審蔡毓榮。隱藏逆女。貪取逆財。種種不法。

上背國恩。應仍擬斬立決。得旨。蔡毓榮從寬。

免即處斬。籍沒家產。著枷號三箇月。鞭一百。

并分家子。發往黑龍江。○以福建臺灣總兵

官楊文魁。為正黃旗漢軍副都統。○辛亥。調

兵部尚書伊桑阿。為禮部尚書。○壬子。革內

閣學士郭榮職。以大學士勒德洪糾叅才品

平庸。戶位溺職故也。○癸丑。

上幸蘆溝橋。大閱軍容。試放火器。外藩喀喇沁

鄂爾多斯。吳喇忒。克西克騰。烏朱穆泰。喀爾

喀。科爾沁。敖漢翁牛特。扎魯特。諸王。台吉等。

以進貢來京者。皆隨行往觀。驚懼失色。隨設

布侯。

上率諸王射。次命八旗善射者較射。又命喀爾

喀。土謝圖汗之子噶爾旦。台吉所屬厄爾德

尼額爾克。寨桑等射。申刻。

上回宮。○甲寅。以戶部尚書余國柱。為武英殿

大學士。○和碩額駙耿聚忠故。遣大臣一員。

侍衛十員。往奠茶酒。發引時。遣大臣二員。侍衛二十員。往送。○乙卯。

上詣

太皇太后

皇太后宮。問安。○

上御經筵。講畢。賜大學士。九卿。詹事。及講官等宴。○以順天府府尹錢珏。為山東巡撫。○丙辰。春分。朝。

日於東郊。遣工部尚書佛倫行禮。○

太皇太后聖壽節。

上率王以下。文武大臣。侍衛等。詣。

太皇太后宮行禮。遵。

懿旨。停止筵宴。○丁巳。遣大學士明珠。祭。

先師孔子。○陞少詹事盧琦。為內閣學士兼。

禮部侍郎。○革刑部尚書禧佛。左侍郎噶爾。

圖。右侍郎敦多禮職。以宗人府題參。正黃旗。

少詹事覺羅僧參失盜一案。審理失實故也。

○戊午。祭。

大社

大稷。

上親詣行禮。○以阿霸垓故多羅郡王沙克沙僧尼子吳爾占。噶喇卜襲爵。○己未。

孝廉章皇后忌辰。遣官祭。

孝陵。○調工部尚書陳廷敬。為戶部尚書。○予。

廣東肇慶陣亡拖沙喇哈番鄂爾準。祭葬如。

例。○庚申。都察院議覆。原任刑部尚書禧佛。

審蔡毓榮一案。不秉公研訊。律擬失當。顯係。

徇庇。禧佛已經別案革職。應枷號兩月。鞭一。

百。刑部尚書胡昇猷。侍郎張鵬。趙之鼎。敦多。

禮。不嚴加審訊。俱係徇庇。應各降二級調用。

敦多禮已經別案革職。應將佐領降二級調。

用。得旨。禧佛著照部議完結後。發往黑龍江。

披甲効力贖罪。敦多禮亦著發往黑龍江。胡。

昇猷。補授刑部以來。並無効力處。照議降二。

級調用。張鵬。莅任未久。免罪。趙之鼎。從寬免。

調用。著降二級留任。○諭大學士等。昨夜正。

陽門外失火。漢官皆不事撲滅。但袖手旁觀。八旗都統。副都統。五旗護軍統領。向不預直宿。今可於要地。分班輪宿。若偶遇火。即為撲滅。倘有傳集之事。亦易齊聚。方今時際昇平。伊等並無効力之處。分班直宿。以盡勤勞。分所宜然。令滿洲。蒙古。漢軍。都統。副都統。五旗護軍統領。會議以聞。尋大學士等奏。臣等傳諭八旗都統等。據伊等公議。分班直宿。兩黃旗。於地安門。兩白旗。於東安門。兩紅旗。於西安門。兩藍旗。於東西兩長安門。更番豫備。如遇何方大災。即往撲救。其官兵應派數目。交兵部議奏。五旗護軍統領。或令入班豫備。或仍於該旗王等門上看守。請旨定奪。

上曰。所議甚善。其護軍統領。仍令照前。○辛酉。調工部尚書佛倫為刑部尚書。陞左都御史阿蘭泰為工部尚書。內閣學士葛思泰為刑部左侍郎。左副都御史席珠為刑部右侍郎。奉天府府丞楊素蘊為順天府府尹。○予故

散秩大臣帕克齊祭葬如例。○壬戌。陞內務府總管鄂爾多為兵部尚書。○癸亥。遣官祭先農之神。○工部奏。閩省所存銅礮。應令解部。

上曰。銅礮自陸路解送。恐為民累。其令裝載海船。運至鎮江。該撫另行撥船解京。爾部仍令嚴加申飭。沿途勿致借端擾害地方。○

上幸南苑行圍。○甲子。九卿議覆。刑科給事中劉楷條奏。請禁止淫詞小說。應如所請。

上曰。淫詞小說。人所樂觀。實能敗壞風俗。盡惑人心。朕見樂觀小說者。多不成材。是不惟無益。而且有害。至於僧道邪教。素悖禮法。其惑世誣民尤甚。愚人遇方術之吉。聞其虛誕之言。輒以為有道。敬之如神。殊堪嗤笑。俱宜嚴行禁止。○乙丑。

上詣

太皇太后

皇太后宮。問安。○遣官祭

歷代帝王○丙寅。贈永寧陣亡守備席豹為署都司僉書。廕一子。以衛千總用○丁卯。

上幸玉泉山駐蹕○陞原任侍郎張玉書為刑部尚書。戶部右侍郎王日藻為工部尚書○陞陝西按察使布喀為山西布政使司布政使○予故太子太保和碩額駙耿聚忠祭葬。謚懿敏○戊辰。陞通永道宋學為山東按察使司按察使○禮部議覆都察院左都御史董訥疏言。順天鄉試分房各官俱用直隸所屬進士舉人出身知縣。應如所請。從之○陝西甘肅總兵官王用予。以母老疏請終養。允之○己巳。內閣學士兼禮部侍郎韓葵。以病乞假。允之○庚午。

上移駐暢春園○理藩院議。嗣後凡食俸蒙古王。貝勒。貝子。公。官員等。有罪。俱免罰牲。九數量罪革俸。至各省之民。無牌票私出邊口者。將妻子一併發往烏喇。寧古塔。與新披甲之人為奴。得旨。百姓私出邊口。所議太過。著於

山海關外遼陽等處安插。餘依議○辛未。清明節。遣官祭

永陵。

福陵。

昭陵。

孝陵。

仁孝皇后。

孝昭皇后陵○陞甘肅布政使塞楞額為內閣學士兼禮部侍郎。大理寺卿覺羅舜拜為都察院左副都御史○以山東登萊道陸祚蕃為廣西按察使司副使。提調學政。廣東高州府知府王際有為河南按察使司副使。提調學政○壬申。戶部題。游墅關監督桑額任內。除徵收正額外。溢銀二萬一千二百九十六兩零。得旨。設立推關。原欲稽查奸宄。照額徵收。以通商賈。桑額徵收額課。乃私封便民橋。以致擾害商民。著該衙門嚴加議處。關差官員。理應潔已奉公。照例徵收。嗣後有不肖官

員希圖肥己。種種強勒。額外橫徵。致害商民。亦未可定。爾部通行嚴飭。○癸酉。陞盛京工部侍郎廖旦。為都察院左都御史。調刑部左侍郎張鵬。為戶部左侍郎。管右侍郎事。○甲戌。

孝昭皇后忌辰。遣官祭

陵。○乙亥。陞光祿寺卿索諾和。為大理寺卿。○丙子。喀爾喀車臣汗故。長子伊爾登阿喇卜坦。遣使奏聞。

上曰。喀爾喀七旗。誓和未久。車臣汗之位。不便久懸。其敕諭土謝圖汗。澤卜尊丹巴胡土克圖。扎薩克圖汗等。將車臣汗諾爾布長子伊爾登阿喇卜坦。連襲為汗。仍敕諭達賴喇嘛知之。賜土謝圖汗等敕曰。朕惟自古帝王統御寰區。遐邇一體。其歷年久遠。職貢恭順。竭盡誠心者。益加眷顧焉。爾等累世悃誠。遣使入貢。恭順有年。正在嘉賞。忽聞車臣汗身故。朕殊軫恤。特遣大臣。遺之賻贈。近念爾喀爾

喀。內自交惡。朕特遣大臣。諭令和睦。未久。車臣汗之位。不可久虛。爾喀爾喀。例以長子承襲。伊爾登阿喇卜坦。台吉。既係長子。且聞其人亦可著嗣。立為汗。爾等其遵諭行。賜達賴喇嘛敕。亦如之。○調寧夏總兵官高孟。為涼州總兵官。○丁丑。陞前鋒叅領吳西。為鑲藍旗漢軍副都統。○戊寅。

上自暢春園回宮

三月。己卯朔。○庚辰。陞翰林院侍講李振裕。為內閣學士兼禮部侍郎。○禮部題。請停天下歲貢生廷試。其中有情願入監讀書者。該學起文送部。到監肄業。至於舉人就教者。亦免廷試。具呈吏部。照次補用。允之。○辛巳。上移駐瀛臺。○調禮部右侍郎圖爾宸。為盛京工部侍郎。○轉刑部右侍郎趙之鼎。為左侍郎。以福建總督王國安。為刑部右侍郎。○陞兵部郎中吳赫。為陝西按察使司按察使。○萬齊斌多羅郡王車布登故。遣官致祭。○壬

午。山東巡撫錢瑯陛辭。恭請訓旨。

上曰。為治之道。要以愛養百姓為本。不宜更張生事。爾到地方。當務安靜。與民休息。地方文武各官。多不和協。文武不和。以致兵民不安。爾為封疆大吏。戒飭勸諭。務令相安。○陞工部郎中凱音布。為光祿寺卿。○癸未。

上御太和門視朝。文武陞轉各官謝恩。次喀爾喀進貢使臣等行禮。○甲申。陞叅領李嗣興為陝西寧夏總兵官。○乙酉。大學士等奏。臣等遵旨。傳諭九卿等集議。應行應改事務。諸臣僉云。

皇上夙夜孜孜。勤求治理。政務俱已全備。寰宇已極昇平。並無應行應革事件。前輔政大臣時。各省皆有總督。自

皇上親政以來。酌裁總督員缺。惟設江南江西一總督。廣東廣西一總督。雲南貴州一總督。湖南湖北一總督。四川陝西一總督。浙江福建一總督。後將浙江福建總督缺。改為福建

總督。然浙江福建。皆係近海地方。請仍改福建總督。為浙江福建總督。似屬有益。從之。○陞內閣學士顧八代。為禮部右侍郎。○調江南江西總督王新命。為浙江福建總督。○丁亥。以翰林院侍講高裔。左春坊左中允米漢雲。右春坊右中允胡會恩。俱充日講起居注官。○戊子。

上詣

太皇太后宮。問安。○己丑。以左都御史董訥。為

江南江西總督。○陞兵部郎中噶遜薩。為甘肅布政使司布政使。○庚寅。陞左副都御史覺羅舜拜。為內閣學士兼禮部侍郎。○翰林院掌院學士李光地。以母病請假歸省。得旨。李光地。准其歸省。俟伊母病稍愈。即來供職。不必開缺。○辛卯。以故奮威將軍王進寶子王用子。襲二等精奇尼哈番。○癸巳。

上自瀛臺回宮。○甲午。

上詣



太皇太后宮問安○命吏部尚書達哈他。工部尚書王日藻。監修賦役全書○陞原任戶部侍郎王鴻緒。為都察院左都御史○乙未。陞陝西布政使傅拉塔。為都察院左副都御史○丙申。

萬壽節。

上率諸王。貝勒。貝子。公。內大臣。大學士。侍衛等詣

太皇太后

皇太后宮行禮。停止朝賀筵宴○遣官祭

福陵。

昭陵。

孝陵。

仁孝皇后。

孝昭皇后陵○遣官祭真武。東嶽。城隍之神○

戊戌。

上詣

太皇太后

皇太后宮問安○陞貴州巡撫慕天顏。為漕運

總督○己亥。陞江南淮揚道魯超。為河南按察使司按察使○辛丑。諭大學士等曰。與孫在豐同往修河諸員。未嘗留心河務。惟事圖利。孫在豐以漢人不能約束若輩。原任淮揚道高成美。乃罷職之人。今猶不赴京。必與往修河工諸員。串通妄為。河工事關緊要。須與江南江西總督。總漕。總河。會同商酌修理。方克有成。著交九卿議○又諭曰。近來雨澤愆期。政事恐有未合者。爾等問九卿來奏○壬寅。宴衍聖公孔毓圻等於禮部○癸卯。上御太和門視朝。文武陞轉各官謝恩○九卿遵旨議覆。

皇上軫念高寶七州縣百姓。久罹水患。特遣大臣。挑治下河。甚盛心也。今所差司官。便已懷私。不聽侍郎孫在豐調度。請救下江南總督。巡撫。及總漕。總河。公同孫在豐監修。庶工程無所阻撓。原任淮揚道高成美。係降調之官。

乃淹留彼地。行事不端。實為可惡。應移文地方官。勒令回京。

上曰。朕特頒內帑。濬治下河。原為救民起見。今國計非絀。設錢糧不敷。何妨再請頒發。聞差往各官。初欲派之民間。後又中止。乃復按引派加鹽課。是未嘗救民。先已害民。豈不大負朕之初意乎。此事斷不可行。著停止。通行曉諭。差往各官著撤回。餘依議。○大學士等遵旨議奏。

皇上勵精圖治。加惠黎元。比年以來。將各省錢糧。屢行赦免。民皆得所。至如刑罰。

皇上念及人命所關。惟矜惟恤。務期平允。故天下無冤抑之民。國家政事。豈有闕失。今畿輔地方。雖雨澤愆期。而山東。河南。山西等處。雨澤應時。有年可望。臣等再三酌議。見今政務實無可更改釐定者。

上曰。堯舜之世。方可稱無闕失。然猶兢兢業業。不敢謂已治已安。漢文帝亦古之賢主。賈誼

猶指陳得失。直言切諫。今但云主聖臣賢。政事無闕。豈國家果無一事可言耶。況求言原屬要事。無論知愚。皆當各陳已見。以備採擇。始於政務有所裨益。大小臣工。各宜盡心職業。視國事如家事。方副委任之意。今每部滿漢堂官。各有六員。其間任事者。但一二人。餘則隨眾署名而已。即如各部啟奏本章。每日不過數件。其中情節。如漢侍郎等。未必了徹。設朕問之。諒有不能對者。朕觀今世之人。專務逢迎諂媚。鮮能直道而行。且已不勤。而每誚人為惰。已無能。而每咍人為劣。此不過徒工浮議耳。何益之有。○以吏部右侍郎馬世濟為貴州巡撫。○甲辰。江南提督楊捷。以老病乞休。慰留之。○陝西按察使吳赫陞辭。恭請訓旨。

上曰。諸臣以爾為善。故行揀選。爾到任之後。勿忘此時選擇。爾到西安。傳諭總督圖納。伊去時在乾清門所奉之旨。與伊所奏之言。極為

明白。但人初服官時甚好。日久必然變易。伊當謹誌前諭於心。聞西安各官。傅拉塔居官甚優。其餘尚未有表著者。武職大臣官員。止宜練兵。不應干預民事。聞有越俎干預者。傳諭將軍總督知之。○旌表廣西節婦。臨桂縣朱旦如妻王氏。鬱林州關于家妻文氏。各給銀建坊如例。○乙巳。以刑部尚書張玉書充經筵講官。○丙午。禮部議給征剿羅刹陣亡左都督侯推遊擊蘇曜祭葬。得旨。蘇曜効力行間。陣亡可憫。著從優照副將例賜卹。○丁未。以內閣學士覺羅舜拜充經筵講官。○調兵部督捕侍郎熊一瀟為吏部右侍郎。○陞工部郎中穆禮布為陝西布政使司布政使。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百二十九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十

監修總裁官光祿大夫太僕兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十六年丁卯夏四月戊申朔享

實錄卷一百三十

太廟

上親詣行禮○

上詣

太皇太后

皇太后宮問安○辛亥。

上諭吏部國家用人才優者固足任事然秉姿誠厚者亦於佐理有裨此部院中亦有一二才優之人所以未即陞擢者因其有才又能循分故久任之朕聽政有年見人或自恃有

才。輒專恣行事者。思之可畏。朕意必才德兼優為佳。若止才優於德。終無補於治理耳○

癸丑。

上幸玉泉山○甲寅。以

昭陵總管碩迪。為內務府總管○乙卯。諭大學士等曰。設官分職。原以為民。所在得一良吏。則民遂其生。今觀各官。雖有品行清潔者。但畏國法而然。如直隸巡撫于成龍之真實清廉者甚少。觀其為今天性忠直。並無交遊。惟

實錄卷一百三十一

知愛民。即伊本旗王等門上。亦不行走。直隸地方百姓旗人。無不感戴稱頌。如此好官。若不從優褒獎。何以勸眾。可令九卿集議。于成龍前。因九卿推薦。朕始擢用。若再有如此好官。不拘大小。亦令九卿保舉來奏○又諭大學士等曰。朕出城踏看田苗。甚為亢旱。著傳諭禮部。誠敬祈雨○陞江寧巡撫趙士麟。為兵部督捕右侍郎○諭工部。四川楠木多產於崇山懸巖。採取甚難。必致有累土司。且來

京甚遠。沿途地方。亦恐滋擾。著傳諭四川巡撫。免其解送。○丙辰。大學士等奏。九卿遵旨。會議直隸巡撫于成龍。實心任事。並無勉強。虛假之處。應賜獎勸。以勵官方。其優加宮保之處。出自特恩。至督撫各官內。如雲南貴州總督范承勳。山西巡撫馬齊。四川巡撫姚緯虞。居官皆優。

上曰。范承勳等居官果善。但伊等尚有勉強之意。于成龍。則出自誠心。毫無瞻顧。今人不往。

來大臣之家。則恐其意有不悅。如于成龍。介然自守。無所交遊。為大臣者。其奈于成龍何。著加太子少保銜。以為廉能稱職者勸。○陞直隸三屯營副將王化行。為福建臺灣總兵官。○丁巳。陞雲南按察使蔣賓。為貴州布政使。司布政使。○己未。諭大學士等曰。爾等纂修明史。曾參看前明實錄否。史事所關甚重。若不參看實錄。虛實何由悉知。他書或以文章見長。獨修史。宜直書實事。豈可空言文飾。

乎。如明代纂修元史。限期過迫。以致要務多漏。且議論偏謬。殊乖公正。俟明史修成之日。應將實錄並存。今後世有所考據。從來論人甚易。自處則難。若不審己之所行。而徒輕議古人。雖文詞可觀。亦何足道。朕嘗博覽羣書。於古之聖君哲后。未敢漫加評隲也。○予故漕運總督徐旭齡祭葬。又加祭一次。謚清獻。○旌表直隸烈女曹氏。拒姦殞命。給銀建坊。如例。○庚申。

上詣

太皇太后

皇太后宮。問安。○辛酉。以翰林院檢討盧熙。為雲南鄉試正考官。吏部主事張發辰。為副考官。翰林院檢討金德嘉。為貴州鄉試正考官。戶部員外郎趙作舟。為副考官。○壬戌。上御太和門視朝。文武陞轉各官謝恩。次喀爾喀進貢使臣等行禮。○

上詣

太皇太后宮問安○諭刑部時已入夏天氣亢  
暘雨澤尚爾愆期農事似有可慮或因刑名  
案件內無知罹法審擬失當情罪不符致干  
天和亦未可定茲特遣勒德洪余國柱達哈  
他科爾坤王日藻徐廷璽等會同三法司將  
已結重案見在監禁者逐一詳加審鞫如有  
罪可矜疑者即與查明事由開列具奏務期  
情法允協不致淹滯監斃以副朕欽恤刑獄  
感名休祥之至意○甲子。

孝端文皇后忌辰遣官祭

昭陵○丙寅陞鴻臚寺卿田雯為江蘇巡撫湖  
南按察使柴望為廣東布政使司布政使○  
丁卯。

上詣

太皇太后宮問安○庚午以護軍叅領岳拜為  
昭陵總管○諭刑部等衙門凡各省解送京城  
及京師解發各省人犯有解役中途凌虐及  
教唆犯人於沿途搶奪者甚至有將犯人拷

打致死者其所犯之罪不致於死而凌虐拷  
打以致斃命殊為可惡爾部會同督捕衙門  
定議條例以聞尋議覆凡解部及遞解外省  
各項犯人遵恩詔計程給與口糧嗣後凡僉  
差官役遣有家業正役押解沿途官員詳查  
有無解役勒指拷打之處如或有之地方官  
即將解役懲治若拷打致死地方官申報督  
撫嚴審從重治罪如有解役唆教人犯通同  
搶奪者以光棍例治之其在中途患病者原  
解即報地方官驗明出結如未取患病印結  
途中死者以死者之多寡名數分別治罪永  
著為例從之○辛未裁雲南復設左右二衛  
及平彝楊林等衛都司一員守備八員千總  
九員經歷七員教授一員○壬申。

上詣

太皇太后

皇太后宮問安○陞陝西督糧道許弘勲為雲  
南按察使司按察使○免直隸文安等四縣

康熙二十五年分水災額賦有差○癸酉諭大學士等曰聽政之時科道侍班言官自恐失儀心切畏懼以致條奏者甚少凡啟奏官員果有失儀朕自降旨或其人自為檢舉科道侍班罷之誠是且科道官多起自疎遠進退周旋未經嫻習朕欲以其建言為要務雖有小過朕亦不計也其宣旨於九卿詹事科道此後科道侍班其已之○甲戌以翰林院編修顧藻充日講起居注官○以兵部左侍郎郭丕為杭州將軍○乙亥

上詣

太皇太后

皇太后宮問安○宗人府題多羅平郡王納爾都打死無罪人羅米又折楊之桂菩薩保二人手足應革王爵監禁得旨納爾都著革去王爵免其監禁○准福建臺灣府鄉試另編字號額中一名從陸路提督張雲翼請也○旌表甘肅烈婦靖遠衛陳啟堯妻王氏給銀

建坊如例○丁丑

上詣

太皇太后宮問安

五月戊寅朔貴州巡撫馬世濟陛辭請訓旨上曰漢軍多有喜做外官者不過希有所得耳在部院衙門見聞甚近尚不敢為非一至遠處即便於行私今天下雖甚承平而百姓甚苦貴州殘破地方其苦尤甚不但火耗多派於民即一應供億動輒取之於民其何堪受此重困乎又雲南貴州往來差使甚多近聞驛遞中有應給一馬而多至數馬者豈得不為病民○已卯

上詣

太皇太后宮問安○諭大學士等曰各項採買估計價值前浮冒欺飾者甚多是以令其核減今所減者太過恐致苦累可令察訪時價量度估計又諭曰凡諸修造工程其估計在前今照新例銷算但新定之例凡物料匠役



工價核減太過。至於苦累。皆未可必。前此修造已完者。其仍照原估計銷算。凡各項物料所值之價。俱訪時價量度估計銷算。○陞陝西涼莊道鄭端。為湖南按察使司按察使。○庚辰。

仁孝皇后忌辰。遣官祭

陵。

上因天旱。頒詔天下。詔曰。朕統御天下。念切民生。夙夜圖治。罔敢少懈。邇來歲每不登。民食寡乏。今茲仲夏。久旱多風。農事堪慮。此由布政不均。寬嚴過當。或土木工興。或民瘼不達。事機之失。上千天和。陰陽不調。災孰大焉。朕用是靡寧。減膳撤樂。清理刑獄。求言省過。齋居默禱。雖雨澤薄降。尚未霑足。皆因朕之涼德。不能感

天心之仁愛。茲當布德行仁。赦過宥罪。特崇寬大。用廣好生。於戲。應天以實。誕施青災。肆赦之恩。敷政在寬。聿昭嘉與。維新之化。布告天

下。咸使聞知。○詔內恩款。凡十七條。○轉兵部右侍郎丹岱。為左侍郎。調理藩院右侍郎拉篤祜。為兵部右侍郎。陞內閣學士吳拉岱。為理藩院右侍郎。○辛巳。旌表江南節婦。江寧縣羅氏。長洲縣陸氏。趙氏。陸氏。徐氏。吳縣周氏。吳氏。申氏。李氏。吳江縣施氏。吳氏。崑山縣劉氏。朱氏。許氏。崇明縣周氏。上海縣程氏。余氏。無錫縣薛氏。睢寧縣房氏等。各給銀建坊如例。○禮部議覆。廣西巡撫王起元疏言。新陞廣西學道陸祚蕃。由原任登萊道任。赴粵路遠。秋闈甚邇。即改歲作科。亦難徧及。請展鄉試期於十月舉行。應如所請。從之。○甲申。

上詣

太皇太后

皇太后宮問安。○予故杭州將軍胡圖祭葬。謚敏恪。○廣州副都統巴喀。以年老乞休。允之。○旌表江南貞女。長洲縣華氏。武進縣王氏。

烈婦吳縣金氏。上海縣范氏。邳州陳氏。烈女江陰縣丁氏等。各給銀建坊如例。○乙酉。

上幸暢春園。是日回宮。○戊子。

上召尚書陳廷敬。湯斌。侍郎徐乾學。少詹事耿介。侍讀學士高士奇。德格勒。侍講學士孟亮。撥侍講徐元夢。諭德徐潮。中允徐嘉祿編修熊賜瓚。勵杜訥等。至。

乾清宮內考試。

上閱諸臣試卷畢。諭曰。朕政事之暇。惟好讀書。始與熊賜瓚講論經史。有疑必問。樂此不疲。繼而張英。陳廷敬等。以次進講。大有裨益。朕從來不輕評論古人。即如明史一書。朕亦不遽加論斷。然評論古人猶易。若評論時人更難。如德格勒。每評論時人學問。朕心以為不然。故召爾等面試。妍媸優劣。今已判然。總之。人之學問。原有一定分量。真偽易明。若徒肆議論。則不自量矣。○己丑。夏至。祭

地於

方澤。

上親詣行禮。○庚寅。

上詣

太皇太后

皇太后宮問安。○遣官祭

闕聖帝君。○辛卯。停止本年秋決。○壬辰。建

周公廟碑。

上親製碑文。

御書勒石。文曰。世運代嬗。隔越千載。則必有神哲挺生。其間以承大統。以作名世。惟公體上聖之質。紹祖考之德。孝友篤仁。左右寧王。厥勲爛矣。及乎負扆。能以勤勞寅恭。惇大忠信之道。翼贊其君。太和洽而頌聲作焉。夫功莫大於致治。綏邦業莫隆於制禮作樂。公身兼數器。開物成務。其龐鴻炳燁之烈。既已載於詩書。志諸史冊。至於繫爰辭。定官禮。撰爾雅。出言為經。又何博與難窮也。昔孟子論列古帝王。至於公。曰。無三王施四事。而韓愈亦歷

數堯舜禹湯文武以至公。蓋道統之傳如此。豈僅以治理之彰彰者與。遙想風徽官公遺嗣。俾昭世澤於無窮。既命有司。新公廟貌。希慕之餘。勒石頌德而繫之以詩。詩曰。邃古民樸。混混沌沌。列聖經綸。肇軒迄商。敘厥倫紀。賁以采章。公監二代。揆時立制。有因有除。禮明樂備。體國經野。成理萬彙。集武之勲。紹文以孝。代成誠民。並孔立教。為子為臣。是則是倣。宗邦綿歷。忠厚所貽。貞珉載鐫。作頌致思。

堯繹同時。億禩為期。○建

孔子廟碑。

上親製碑文。

御書勒石。文曰。朕惟道原於天。弘之者聖。自庖犧氏觀圖畫象。闡乾坤之秘。堯舜理析危微。厥中允執。禹親受其傳。湯與文武周公遞承其統。靡不奉若天道。建極綏猷。亶乎尚矣。孔子生周之季。希布以老。非若伏羲堯舜之聖焉。而帝禹湯文武之聖焉。而王。周公之聖焉。

而相也。歸然以師道作則。以及門賢哲。紹明絕業。教思所及。陶成萬世。伏羲堯舜禹湯文武周公之統。惟孔子繼續而光大之矣。間嘗誦習詩書之所刪述。大易之所演繫。春秋之所筆削。禮樂之所修明。本末一貫。根柢萬有。殆與覆載合其德。日月並其明。四時寒暑協其序焉。故曰。仲尼之道。一天道也。朕敬法至聖。景仰宮牆。嚮往之誠。弗釋寤寐。歲甲子。十一月。時邁東魯。躬詣曲阜。展修祀事。復謁聖墓。循撫松栢。儀型在望。優乎至德之親人也。朕忝作君。啓牖下民。深惟夫子。師道所建。百王治理備焉。舍是而圖。邇隆曷所依據哉。因勒文於石。彰朕尊崇聖教。以承天治民之意。系以辭曰。遐哉三五。維辟之式。於皇尼山。師道允植。天畀木鐸。覺彼羣生。百行以正。六籍以明。賢邁唐虞。聖則河洛。綏和動來。文博禮約。鳳衰雖歎。麟德感祥。學昌洙泗。統歸素王。炎漢崇儒。少牢用饗。厥後賢君。高山是仰。

子懷至聖。莅彼東方。音徽云邈。道德彌光。鬱鬱  
鬱壘林。我我祠殿。企慕安窮。美牆如見。泰岱  
匪高。東海匪深。敬揚懿軌。終古式欽。○建孟  
子廟碑。

上親製碑文。

御書勒石。文曰。自王迹熄於春秋。聖人之道。或  
幾於泯滅。卒之晦而復明。歷千百世而不泯  
者。特有孔子也。孔子沒百有餘年。浸假及於  
戰國。楊墨塞路。禍尤烈於曩時。子與氏起而

闢之。於是天下之人。始知誦法孔子。率由仁  
義斯道之有傳。至於今賴之。是以後世學者。  
如韓愈蘇軾之徒。咸推其功以配大禹。而閩  
洛之儒。咸遵為正學之宗。傳於戲盛已。夫洪  
水之禍。止於人身已爾。楊墨之禍。隱然直中  
於人心。不有孟子。使楊墨濫觴於前。釋老推  
波於後。後之人。雖欲從千載之下。探尼山之  
遺緒。其孰從而求之。因推述厥義。刻文於石。  
俾揭於鄒之廟。其詩曰。尼聖既往。覓矣音徽。

後百餘歲。聖緒浸微。尚異實繁。楊墨競煽。陷  
溺之禍。酷於昏墊。惟子與氏。距詖放淫。以承  
先聖。以正人心。述舜稱堯。私淑孔子。正學修  
明。百世以俟。不有是者。斯道孰傳。宇宙晦霧。  
萬物狂悖。我讀其書。曰仁曰義。遺澤未湮。聞  
風可企。嶽嶽亞聖。巖巖泰山。功邁禹稷。德叅  
孔顏。刻石茲文。於祠之下。誦烈揚休。用告來  
者。○陞翰林院侍讀學士多奇。為內閣學士  
兼禮部侍郎。○癸巳。

上詣

太皇太后宮。問安。○諭九卿等曰。京師為天下  
根本之地。今當耕種。雨澤愆期。雖秋成尚遠。  
而目前旱乾。朕甚憂之。今欲親行祈禱。爾等  
大小臣子。亦宜盡誠齋戒。實心祈禱。夫求雨  
乃為小民。如朕與爾等。共享富貴。朕之焦勞。  
豈為一身之計。祇念窮簷一歲不登。即至失  
所。不但朕心不忍。爾等皆國家大臣。亦何忍  
坐視。應各矢至誠。毋循故事。○命固山貝子

納爾圖襲封多羅平郡王。以其兄納爾都因罪革爵故也。○命多羅順承郡王楊起弟寵寶襲封多羅順承郡王。○刑部左侍郎趙之鼎以疾請假回籍。允之。○甲午。以翰林院編修許汝霖為四川鄉試正考官。戶部員外郎林麟煥為副考官。太常寺少卿黃斐為廣東鄉試正考官。吏部員外郎何天寵為副考官。禮科掌印給事中王連瑛為福建鄉試正考官。禮部員外郎許聖朝為副考官。○丁酉。

實錄卷一百三十一

二

上素服乘馬躬詣

天壇祈雨。自西天門步行。至

壇致祭畢。仍步行出西天門。乘馬回宮。是夜雨

○戊戌

上詣

太皇太后

皇太后宮問安。○己亥。

上移駐瀛臺。○庚子。

上回宮。詣

太皇太后

皇太后宮問安。○諭大學士等曰。部院事務稍簡。今時值暑熱。著間一日一面奏。凡不緊要事。徑交內院。若九卿會推緊要事務。仍於面奏之日。一併啟奏。○辛丑。都察院左副都御史徐元珙疏言。祀典所載。致祭北海。尚沿宋明舊制。於河南懷慶府。係在京之南。於義未合。況北嶽已改祀渾源州。則北海應請改祀於混同江。庶方位允協。下部議行。○命宋儒張載子孫世襲五經博士。○壬寅。

實錄卷一百三十二

二

上御太和門視朝。文武陞轉各官謝恩。次喀爾喀進貢使臣等行禮。○癸卯。

上詣

太皇太后宮問安。○轉刑部右侍郎王國安為

左侍郎。陞安徽巡撫薛柱斗為刑部右侍郎。

○予故原任都統沙納哈巴圖魯祭葬如例。

○甲辰。免湖南康熙二十五年未完額賦。并

康熙二十六年下半年。康熙二十七年上半

年額賦有差○乙巳。以鎮國公額爾圖之子愛音圖。為三等輔國將軍○丙午。免直隸豐潤縣。本年分水災額賦十之二

六月丁未朔。

上詣

太皇太后

皇太后宮問安○江蘇巡撫田雯。陞辭。請訓旨。上曰。向聞江蘇富饒。朕親歷其地。見百姓頗多貧困。爾至彼處。當以愛養民生為要務。至地

實錄卷一百三十一

一九

方豪強。亦往往為害於民。如此輩。不可不懲。然政貴寬平。不必一一搜訪。反致多事。至於文武。本屬一體。文武輯睦。則兵民自安矣○乙酉。

上詣

太皇太后宮問安○陞護軍叅領托賴。為正紅旗漢軍副都統○以翰林院侍講學士博際。翁叔元。侍讀戴通。俱充日講起居注官○辛亥。以宗室惠蘭。補授鑲藍旗護軍統領○以

順天府府尹楊素蘊。為安徽巡撫○壬子。上奉

太皇太后

皇太后。幸暢春園○丁巳。陞左僉都御史徐誥。武為順天府府尹○旌表河南節婦商邱縣高氏。虞城縣李氏。烈婦杞縣朱氏。烈女西平縣楊氏等。各給銀建坊如例○戊午。旌表山東節婦城武縣劉氏。烈婦即墨縣王氏。烈女嶧縣褚氏。城武縣邵氏等。各給銀建坊如例

實錄卷一百三十二

二

○庚申。改貴州大定府。為大定州○旌表福建節婦侯官縣陶氏。閩縣陳氏。烈婦閩縣張氏。烈女閩縣吳氏。連江縣楊氏等。各給銀建坊如例○壬戌。以翰林院編修熊賜瓚。為浙江鄉試正考官。吏部員外郎劉迪。為副考官。翰林院修撰陸肯堂。為江西鄉試正考官。戶部員外郎李振世。為副考官。戶科掌印給事中汪晉徵。為湖廣鄉試正考官。內閣中書馮廷樞。為副考官○乙丑。予故鑲藍旗護軍統

領馬爾翰。原任四川建昌總兵官。佟浩年。各  
祭葬如例。○丁卯。禮部左侍郎嚴我斯疏請  
給假葬親。允之。○戊辰。吏部議覆雲南貴州  
總督范承勲疏言。貴州所屬十五衛。十所請  
分晰裁改。偏橋衛裁併施秉縣。興隆衛裁併  
黃平州。移州治於衛治。新添衛裁併貴定縣。  
移縣治於衛治。貴州。貴前。二衛裁去。改設貴  
筑縣。鎮西。威清。二衛。赫聲。威武。二所裁去。改  
設清鎮縣。平壩衛柔遠所裁去。改設安平縣。  
安南衛裁去。改設安南縣。定南所裁併普定  
縣。普安衛裁併普安州。安籠所裁併安籠廳。  
敷勇衛。修文。濯靈。息烽。于襄。四所裁去。改設  
修文縣。永寧衛。普市所裁去。改設永寧縣。畢  
節。赤水。二衛裁去。改設畢節縣。烏撒衛。裁併  
威寧府。應如所請。從之。○辛未。旌表直隸貞  
女安氏。年。少。拒姦受傷殞命。給銀建坊如例。  
○癸酉。以翰林院侍講米漢雲。為江南鄉試  
正考官。檢討龔章。為副考官。翰林院侍講高

裔。為陝西鄉試正考官。內閣中書許曰琮。為  
副考官。○乙亥。轉禮部右侍郎徐乾學。為左  
侍郎。調兵部右侍郎張英。為禮部右侍郎。  
秋。七月。丁丑朔。享  
太廟。遣內大臣伯費揚古行禮。○戊寅。  
上奉  
太皇太后  
皇太后。自暢春園回宮。○己卯。  
上幸暢春園。○安徽巡撫薛柱斗疏報。康熙二  
十五年。安。寧。太。廬。鳳。滁。和。七府州屬。共墾過  
荒田三百八十八頃十五畝。照例起科。下戶  
部知之。○庚辰。陞正白旗副都統杭奇。為護  
軍統領。○癸未。陞太常寺卿成其範。為兵部  
右侍郎。○贈故太醫院院使加通政使銜馬  
之俊。為禮部侍郎。予祭葬如例。○丙戌。禮部  
議覆。福建巡撫張仲舉疏言。臺灣郡縣設立  
學校。但與考人數無多。未便照內地之額。請  
於府學量設廩增各二十名。縣學各十名。俟



人才漸盛。仍照直隸各省補足定額。至廩生出貢。挨年考取。請自康熙二十七年始。照例舉行。應如所請。從之。○丁亥。

上自暢春園回宮。詣

太皇太后

皇太后宮問安。○戊子。先是喀爾喀土謝圖汗

奉

上諭偵探鄂羅斯分界使臣消息。至是土謝圖汗奏鄂羅斯遣使請和已抵臣境。

上命薩布素等統率官兵乘天時未寒。還至黑

龍江墨爾根。修整器械。休息馬匹。以度隆冬。

仍於要地嚴設斥堠。并以鄂羅斯遣使請和。

撤還大兵之故。曉諭雅克薩城內羅刹知之。

○吏部等衙門議覆。江西道御史錢三錫疏

言。遠省微員病故者。向有給發勘合歸櫬之

例。或親僕同鄉。無人可以代領。勘合扶送歸

家者。請敕該督撫令地方官擇地安葬。查雲

南貴州四川廣西微員身故。理應歸櫬鄉土。

如無親僕并同鄉之人。令地方官選差的役

二名。給費送回原籍。取具本地方官印結為

憑。從之。○陞左僉都御史王遵訓為太常寺

卿。○以工部左侍郎党務禮為西安副都統

○辛卯。中元節。遣官祭

永陵。

福陵。

昭陵。

孝陵。

仁孝皇后。

孝昭皇后陵。○刑部題。浙江民張遘叩閭請發

與該撫審理。

上諭大學士等曰。此案若文與該撫審理。豈肯

將實情明白審出。著刑部擇選賢能司官往

審。近見奉差審事司官多不明晰。此皆瞻徇

各部院堂官。不敢結怨耳。大凡督撫無不與

部院堂官營求結納。分樹門戶。若司官與督

撫相悖。即結怨於堂官。尚能保其職乎。部院

堂官各援引親戚朋黨營求凡員缺未出之先其人預定及會推時惟贊揚援引而從公推擬者甚少又有為司官筆帖式時所行貪婪至於大僚偽稱清廉者若此居心深可鄙恥今部院官員亦稍知更改若循此而行固善倘仍蹈前轍貪汙不悛是自棄其身也雖或微倖苟免於刑鬼神豈肯宥耶○以刑科掌印給事中劉國黻為廣西鄉試正考官中書科中書衛秦翰為副考官翰林院編修陳捷為河南鄉試正考官內閣中書魯應星為副考官○壬辰予故太子太傅文華殿大學士宋德宜祭葬謚文恪○甲午

上移駐瀛臺○諭大學士等馬哈達補授都統以來凡咨補官員皆有情弊著將都統并所得世職俱行革去發往黑龍江効力○乙未上詣

皇太后宮問安○轉工部右侍郎沙賴為左侍郎陞左副都御史傅拉塔為工部右侍郎○

以左春坊左贊善周清原為山東鄉試正考官禮部主事柯願為副考官工科給事中何金蘭為山西鄉試正考官中書科中書徐樹穀為副考官○丙申以翁牛特故多羅達爾漢戴青貝勒額林臣子額爾德布鄂齊爾襲爵○己亥

上諭差往浙江察審張遼一案刑部郎中阿西潭等曰向來奉差官員往往騷擾驛遞貽累小民朕所深悉故數年以來概不差遣昨見張遼所告似有冤抑因遣爾等往理務須詳審公平慎毋顛倒是非奸民叩閭亦有巧為飾說者地方官員亦有善於夤緣者爾等不可偏私拘執專徇一面之詞必得兩造實情始副朕差遣至意若是非不明輿論不服則大負朕懷矣阿西潭奏曰臣等敢有偏私縱聖恩寬宥天亦降禍子孫

上曰此等語朕習聞之頗覺厭聽如向日禪塔海往審廣東沈志達案在朕前面奏何等懇

切。至廣東曲直不分。是非倒置。與前言迥異。如此舉動。豈不負朕耶。爾等其戒之。○陞通政使阿山。為都察院左副都御史。○喀爾喀土謝圖汗遣使進九白年貢。宴賚如例。○庚子。諭大學士等曰。民間用度充足。由於節儉。觀八旗之人。祭葬筵宴之事。踰分者多。都統副都統宜嚴行禁止。至三年之喪。武官雖不可行。而文官似屬可行。或有三年之服未滿。即會客宴飲。殊為不合。著禮部一併定議。○

予台州陣亡杭州副都統阿什圖祭葬如例

○壬寅。

上幸南苑行圍。是日回宮。○甲辰。

上詣

太皇太后宮問安。○乙巳。陞光祿寺卿凱音布。

為通政使司通政使。○丙午。

上詣

太皇太后宮問安。○

上以巴林淑慧公主所居地方馬牛羊多染疫

倒斃田禾。亦不收獲。命乾清門侍衛武格往迎公主。并令攜帶馬駝糗糧以濟之。○陞工部郎中党愛。為甘肅按察使司按察使。○大學士等奏。戶部請裁公費。

上曰。目下國計充裕。所爭不在於此。况貧官需此以資生者甚多。豈可盡裁。著仍照見行例行。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十

大清聖祖合天弘運文武睿哲恭儉寬裕考敬誠  
信中和功德大成仁皇帝實錄卷之一百三十一

監修總裁官光祿大夫太僕寺卿太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十六年丁卯八月丁未朔遣大學士

實錄卷一百三十一

余國柱祭

先師孔子○喀爾喀墨爾根台吉遣使進九

白年貢宴賚如例○禮部以順天鄉試同考

官開列知縣等請旨

上曰同考例用十六員此疏內進士知縣止有

十人若應試之令預擬此十人必為試官有

所鑽營則作弊更易著將員外主事以下小

京官及知縣守部進士一併開列著為令○

命武臣副將以上官員丁憂參將以下官員

在任守制從山西巡撫馬齊請也○戊申祭

大社

大稷

上親詣行禮○

上御經筵講畢賜大學士九卿詹事及講官等

宴○調正白旗蒙古都統阿密達為滿洲都

統○巳酉

上詣

太皇太后

皇太后宮問安○

上巡幸塞外命皇太子允初皇長子允禔皇三

子允祉

皇四子胤禩皇五子允祺皇七子允祐皇八子

允禩隨駕是日啟行駐蹕密雲縣河槽莊科

爾沁多羅扎薩克圖郡王鄂齊爾來朝○調

江南蘇松水師總兵官傅魁為福建海壇總

兵官○庚戌

上駐蹕古北口○辛亥

上駐蹕恩格木噶山○壬子。

上駐蹕宜孫畢喇地方○以翰林院編修楊大鶴為順天鄉試正考官。翰林院檢討王思載為副考官○癸丑。

上駐蹕博洛和屯。是日。

上行圍射。殪二虎。阿霸垓台吉德木楚克敦漢台吉額林陳喀爾喀台吉丹津等來朝○甲寅。

上駐蹕宜孫喀布泰昂阿地方。喀喇沁多羅杜稜郡王扎什都統巴雅爾翁牛特多羅杜稜郡王畢禮袞達賴等來朝○乙卯。

太宗文皇帝忌辰。遣官祭

昭陵○

上駐蹕柏敦昂阿地方。喀爾喀多羅貝勒羅卜

臧來朝○丙辰。

上駐蹕烏闌哈達地方○丁巳。

太祖高皇帝忌辰。遣官祭

福陵○

上駐蹕森濟圖地方。翁牛特喀拉車里克鎮國公奇他忒敦漢多羅郡王扎穆蘇多羅郡王薩穆珀爾等來朝○戊午。

上駐蹕森濟圖和洛昂阿地方○己未。

上駐蹕格爾齊老地方○庚申。

上駐蹕烏喇岱地方。蘇尼特台吉多爾濟扎斯喀布。奈曼固山貝子吳勒木濟翁牛特多羅達爾漢貝勒額爾德布鄂齊爾等來朝○壬戌。

上駐蹕巴隆桑古斯台地方。科爾沁台吉博第來朝○癸亥。秋分夕

月於西郊。遣兵部尚書鄂爾多行禮○

上駐蹕克勒烏里雅蘇台。巴林多羅郡王納木

達克來朝○甲子。

上駐蹕愛里昂阿地方。科爾沁台吉巴特瑪西畢力克圖等來朝○乙丑。

上駐蹕克勒昂阿地方○丙寅。

上駐蹕西爾哈地方○丁卯。科爾沁多羅貝勒

沙津額駙。台吉布達。扎魯特台吉畢里克圖。  
土默特固山貝子滾濟斯扎布等來朝。○戊  
辰。科爾沁和碩達爾漢親王班第額駙。台吉  
阿畢達。阿祿。科爾沁台吉滾塔爾等來朝。○  
庚午。科爾沁多羅貝勒巴克什古爾。土默特  
多羅達爾漢貝勒厄爾德木圖等來朝。○予  
陝西殉難漢軍叅領趙繼善祭葬如例。○辛  
未。

上駐蹕克勒和洛。翁牛特台吉伊特根等來朝。

○壬申。

上駐蹕汗特木爾達巴漢地方。○癸酉。

上駐蹕坡瀨噶山。○甲戌。

上駐蹕博洛和屯。○賜喀喇沁多羅杜稜郡王  
扎什。翁牛特多羅杜稜郡王畢禮袞達賴之  
母和碩公主。多羅杜稜郡王畢禮袞達賴。台  
吉鄂齊爾等銀幣有差。○乙亥。

上駐蹕宜孫畢剌地方。是日。

上行圍射。殪一虎。科爾沁多羅郡王代布。台吉

伊拉顧克山等來朝。○免山西沁州本年分  
電災額賦有差。○吏部尚書李之芳。以老乞  
休。慰留之。

九月。丙子朔。

上駐蹕恩格木噶山。○丁丑。

上駐蹕姚亭莊。○戊寅。

上駐蹕牛欄山。○己卯。

上回宮。詣

太皇太后。

皇太后宮問安。○庚辰。

上御太和門視朝。文武陞轉各官謝恩。○辛巳。

陞陝西延綏神木副將藍理。為宣府總兵官。

○直隸巡撫于成龍疏進嘉禾。

上曰。今歲三春首夏。雨澤愆期。耕耘幾致失望。

幸

天眷下民。大沛甘霖。秋成有賴。其三穗四穗禾  
苗。不足為瑞。如口外膏腴沃壤。多穗頻有。皆  
視以為常。該部知之。○壬午。以吏部尚書李

之芳。為文華殿大學士。○甲申。

上詣

太皇太后宮問安。○調戶部尚書科爾坤。為吏部尚書。陞少詹事。開音布。為光祿寺卿。○戶部議准。河南巡撫章欽文。題請陳州項城等處。改食蘆鹽。從之。○丙戌。遣官祭

歷代帝王。○遣官祭城隍之神。○賜臺灣總兵官王化行。貂裘一襲。銀五百兩。○丁亥。丑時。京城地震。○陞少詹事翁叔元。為內閣學

士兼禮部侍郎。○陞溫州副將李華。為浙江平陽總兵官。○喀爾喀車臣汗伊爾登阿刺卜坦等。遣使進九白年貢。宴賚如例。○戊子。陞正白旗副都統郎談。為蒙古都統。○調戶部尚書陳廷敬。為吏部尚書。刑部尚書佛倫。為戶部尚書。陞左都御史廖昇。為刑部尚書。刑部左侍郎葛思泰。為都察院左都御史。轉刑部右侍郎席珠。為左侍郎。陞內閣學士塞楞額。為刑部右侍郎。○辛卯。

上幸暢春園。是日回宮。○癸巳。

上詣

太皇太后宮問安。○乙未。大學士等奏。臣等遵旨查江寧七府。陝西全省。應免錢糧。共計六百萬兩有零。亘古以來。未有蠲免如此之多者。臣等因其為數太多。不敢遽議。

上曰。朕念切民生。即多蠲亦所不惜。爾等擬諭旨來奏。○丙申。調工部尚書王日藻。為戶部尚書。禮部尚書管詹事府事湯斌。為工部尚書。陞禮部左侍郎徐乾學。為都察院左都御史。○丁酉。

上詣

太皇太后宮問安。○陞正白旗滿洲副都統羅奇。為護軍統領。○己亥。免山東博興縣本年分水災額賦有差。○庚子。喀爾喀土謝圖汗。戴青墨爾根台吉。遣使奏言。噶爾丹書至。我等曾遣使致覆。彼意終不釋然。且喀爾喀之在厄魯特處者。及厄魯特之向與喀爾喀通



好者俱言噶爾丹分南北兩路來攻。喀爾喀右翼人等除扎薩克圖汗及得克得黑戴青台吉之外。餘俱言噶爾丹興兵是實。我界上人等驚惶。屢促出兵。赴彼應敵。是以率兵起行。再去年盟誓時。扎薩克圖汗之情形。非特尚書阿喇尼見之。他人亦盡知之。彼見今與厄魯特杜噶爾阿喇布坦台吉。一處遊牧。視其情狀。恐屬窺伺。為此馳奏。得旨。著議政王大臣等會議。安親王素諳蒙古事宜。亦令與議。尋議覆。厄魯特喀爾喀俱係本朝職貢之國。應遣敕令其罷兵。同歸於好。仍敕達賴喇嘛令其遣使。諭令罷兵。其土謝圖汗敕書。即發來使布延圖寨桑等齎去。噶爾丹敕書。即交來使陶賴哈什哈等。乘驛齎去。達賴喇嘛處敕書。發與喇嘛商南多爾濟。郎中布顏圖齎去。

上從之。賜噶爾丹敕曰。據喀爾喀土謝圖汗奏稱。厄魯特內向遊牧。兩路來攻。我界上人等。

屢請赴彼。故出兵迎之等語。朕統御宇內。無分中外。爾厄魯特喀爾喀兩部落若果互相殘害。朕心大不忍焉。曾於康熙十六年。檄諭爾等。務期共相和好。且爾噶爾丹博碩克圖汗。累世恭順。職貢有年。如果舉事。無不奏聞於朕者。因道路遼遠。真偽難明。朕尚未之深信。或不逞之徒。兩地構煽。亦未可定。爾兩部落。如果興兵。必有一方。至於敗亡。不但重負朕向來一視同仁之至意。羣黎之死亡離散。朕心深為憫惻。敕書到日。即為息爭修好。則爾恭順之心。朕實嘉之。已敕諭土謝圖汗。令其罷兵矣。特諭。又賜土謝圖汗及達賴喇嘛敕。畧同。○辛丑。

上詣

太皇太后

皇太后宮問安。○子故護軍統領杭奇。祭葬如例。○壬寅。

孝慈高皇后忌辰。遣官祭。

福陵○癸卯。

上詣

太皇太后宮問安○甲辰。轉禮部右侍郎張英為左侍郎。兼管詹事府詹事事。陞原任詹事府詹事王颺昌為禮部右侍郎○乙巳。調正白旗蒙古副都統胡西塔為滿洲副都統。陞護軍叅領拖倫為正白旗蒙古副都統○陞通政使凱音布為內閣學士兼禮部侍郎。工部郎中噶世圖為通政使司通政使

冬。十月。丙午朔。享

太廟。

上親詣行禮○遣官祭

永陵。

福陵。

昭陵。

孝陵。

仁孝皇后。

孝昭皇后陵○頒康熙二十七年時憲曆○諭

大學士等。黑龍江官兵口糧關係至重。屢次

轉運米數。並黑龍江墨爾根地方接續所種米數。宜加察明。自盛京等處廣運米石。以為久遠裨益之計。此皆當周詳區畫。又發遣彼處游手無事之人甚多。其口糧作何酌給。前至黑龍江一帶。乃徑直通衢。往來轉輸斷不致稍有阻滯。如蔡毓榮等巨富之人。並殷實之家。擬予口糧。殊覺未當。彼處漢軍。皆著察出。披甲當差。游手無事之人。可分設官莊。廣開田畝。以為恒產。令戶兵二部賢能司官。速往逐一察明。到日確議具奏○戊申。

皇太后聖壽節。

上率王以下。文武大臣。侍衛等。詣

皇太后宮行禮。遵

懿旨。停止筵宴○陞太常寺卿王遵訓為都察院左副都御史○己酉。

上詣

太皇太后

皇太后宮問安○

上幸南苑行圍○特准順天鄉試浙江錢塘縣

監生查嗣韓福建侯官縣貢生林文英五經

中式○癸丑

上巡幸畿甸命皇太子允初隨駕是日啟行駐

蹕永清縣○甲寅

上駐蹕霸州○乙卯

上駐蹕雄縣十里鋪○丁巳

上駐蹕趙北口○陞山東按察使宋瑩為江寧

布政使司布政使○陞護軍叅領洪海為鑲

黃旗蒙古副都統○裁京通巡倉御史二差

○戊午

上駐蹕霸州苑家口南○諭吏部庶吉士魏希

徵等教習已久今加考試應分別授職魏希

徵張希良甯世簪許承家沈辰垣仇兆鰲李

殿邦徐元正汪灝許賀來鄭崑璩陳遷鶴著

俱授為翰林院編修胡作梅俞長城樊澤達

王之樞吳垣李朝鼎鄧咸齊劉坤梅之珩張

明先劉涵孫勳著俱授為翰林院檢討爾部  
即遵諭行○己未

上駐蹕永清縣信安鎮○賜直隸巡撫于成龍

上乘黃鞍馬一匹銀一千兩○庚申

上駐蹕永清縣韓村北○湖廣巡撫張汧疏叅

上荆南道祖澤深勒詐婪贓十二款枝江縣

知縣趙嘉星私派殃民五款通山縣知縣邢

士麟才短誤公請分別革職究擬得旨這所

叅著刑部右侍郎塞楞額前往察審○辛酉

上駐蹕南苑○壬戌

上諭大學士王熙等曰鄉試為抡才大典出題

理宜詳慎今年鄉試主考朕未盡知於開列

中酌量分遣今覽各省所進題名錄中其題

目多有未當如福建三場策問臺灣事宜一

道於地方情形式勢毫未通曉乃茫昧命題

殊為悖謬其餘各省亦未盡當爾等將各省

呈覽題目及題名錄詳加檢閱若有悖謬最

甚者察出叅奏於是察看福建雲南河南三

省第三場策問命題詞義多有未當均屬悖謬部議將主考王連瑛等分別各降級調用從之○大學士等奏曰前總河靳輔疏稱高家堰之外再築重堤請停丁溪等處工程奉旨著問巡撫于成龍今于成龍覆稱挑下河有益於民若照靳輔之疏修理則民反受其害

上曰挑濬此河原欲有益七州縣生民靳輔疏稱高家堰等處築堤以為屯田可獲百餘萬錢糧朕從利益民生起見非為錢糧也此挑河關係緊要著戶部尚書佛倫吏部侍郎熊一瀟給事中達奇納趙吉士會同江南總督總漕確勘議奏○予故原任刑部尚書魏象樞祭葬謚敏果○予故散秩大臣葦齊爾祭葬如例○諭大學士等今當軍政之年聞直隸各省提鎮斂取兵丁以為定規餽送兵部此等情事朕不傳旨指明然亟應禁絕又聞每年奏銷兵馬錢糧冊亦稱定規斂取兵丁

餽送該部此皆勒索於軍民者也其弊亦宜永行禁止可傳諭兵部○甲子

上回駐暢春園○陞吏部右侍郎熊一瀟為工部尚書○以原任雲南按察使王樑為山東按察使司按察使○丙寅

上回宮詣

太皇太后

皇太后宮問安○戊辰

上諭大學士等侍郎拉篤祜宜以武職用著解任遇有副都統員缺即行補用左副都御史舒淑昏庸亦著解任交與該王為護衛○已諭兵部尚書鄂爾多等黑龍江至為要地兵丁勞苦朕罔不知曩者鄂羅斯漸次入犯占踞我打虎兒索倫等處擾害邊疆四十餘年未經安輯後備足軍食永戍黑龍江以困逼之鄂羅斯遂窘迫至極乃屢次求和今彼之使臣已來尚未曾至苟糧儲不足則如沙爾呼達塔海等之往征而不能成功矣此事

尚未年遠。朕親所聞知。且亦衆所共悉也。朕所委曲區畫。自盛京等處轉輸糧食。及令所種米穀。積貯至裕。彼地大臣官員。皆不思搏節。濫給與無用之人。苟且草率。希圖軍儲罄盡。勢必將彼等撤回。彼等誠能以身家性命。力保鄂羅斯斷不來犯。朕自撤之回也。我之官兵撤回。鄂羅斯大衆。難以齊來。彼地將軍官員。固皆稔知。然或一二人。或十餘人。陸續聚集於黑龍江。松花江之間。構造木城盤踞其地。則我取之維艱。是鄂羅斯為主兵。而我反為客兵也。今我惟多貯糧食。永戍官兵。則我兵得逸。而鄂羅斯兵為勞矣。如此。則鄂羅斯輕兵來犯。斷所不能。欲大隊侵入。則彼糧食何能輓運耶。若黑龍江我兵不行。永戍。自松花江。黑龍江以外。所居民人。皆非吾有矣。爾等皆係選擇差遣。往至彼處。殫心竭慮。務期為久遠充裕之計。詳加籌議。惟此一舉也。亦無事再遣矣。○理藩院題。巴圖爾額爾克

濟農移文自請往援土謝圖汗。如有奏報緊急大事。舊路甚遠。若由鄂爾多斯。河水未凍。時難渡。寧夏路近。又不敢擅行。上命滿大學士。及兵部。理藩院。會議。尋議覆。已奉。上諭。敕令喀爾喀。厄魯特。息兵修好。茲巴圖爾額爾克。濟農。請率兵往援之事。無庸議。倘有緊急事情。遇水凍之時。經鄂爾多斯。著貝勒松阿喇布。派人引路。送至京城。若凍消時。從寧夏入口。寧夏總兵官。派人引路。送出橫城。口。至鄂爾多斯。貝勒松阿喇布。仍派人引路。送至京城。其遣奏緊急重情。不許過三四人。若常貢遣使。仍照前行。議入。從之。○子故蒙古副都統二等伯噶都。祭葬如例。○喀爾喀額爾克台吉等。遣使進九白年貢。宴賚如例。○庚午。上御太和門視朝。文武陞轉各官謝恩。次厄魯特進貢使臣等行禮。○

上詣

太皇太后宮問安○調戶部左侍郎管右侍郎事張鵬為吏部左侍郎管右侍郎事○辛未諭大學士等凡人之行莫先於孝近者漢軍居父母之喪親朋聚會演劇飲酒呼盧鬪牌儼如筵宴毫無居喪之體至孝服鞍轡等類所用素帛皆異常華美喪禮止當服用粗惡豈宜華美耶居喪演劇滿洲所無漢人亦未有特漢軍為然耳百行以孝為太如此所行為孝道其他又何足觀也又漢軍外官赴任每借京債整飾行裝務極奇麗且多攜僕從致債主抵任索逋復謀贍僕從衣食勢必苛斂於民以資用度且親朋債主疊往任所請託需索不可數計是官雖一人實數人為之以致朘削小民民何以堪又漢軍外官不能騎射乃自稱行獵多帶鷹犬借宿村莊滋害於民禽獸本在山野豈在村莊耶又漢軍服用多僭越非分終日羣居以馬吊飲酒為

樂此等物力從何而出有非苛取諸民者乎漢軍習尚之惡已至於極如原任總兵諾邁原任提督哈喇庫祖永烈等於任所多買良民帶歸原任總督張長庚原任巡撫張德地韓世琦等皆貪婪虐民居官甚劣今著漢軍都統副都統等凡有居喪演劇飲酒呼盧鬪牌者照賭博例嚴行禁止在外漢軍官員任所有親朋債主前往請託需索貽累小民者亦令查訪指名題參朕此諭旨總為敦厚風俗陶淑人心而起使漢軍居官者皆似總督范承勲巡撫于成龍之善朕又何諭之有此旨令徐廷璽傳諭○諭滿洲管漢軍副都統叅領向因漢軍習俗不善故以爾等補授漢軍副都統叅領欲訓練其騎射導率以矩範一如滿洲也近見並不教以騎射凡事又不能使之效法滿洲反有不肖者恐嚇漢軍指摘其短希圖索詐此朕所深悉嗣後爾等務加悛改善為教訓漢軍可耳○壬申陞內閣

學士禪布為兵部右侍郎。光祿寺卿開音布為都察院左副都御史。○都察院題商人楊國清等捐送楠木日久未收。應將工部堂司官降調。

上曰。阿蘭泰。傅拉塔。在任未久。傅拉塔居外任。頗優。俱免調用。降級留任。沙賴。飲酒呼盧。陳一炳。曠職無能。俱著革去侍郎。餘依議。○癸酉。

上詣

太皇太后

皇太后宮。問安。○乙亥。陞左副都御史王遵訓。為戶部右侍郎。○漕運總督慕天顏疏言。江浙漕運過江間遇風濤。應設法救護。查民間有渡生船。甚為有益。請倣其式造船十隻。分泊兩岸。漕船遇風並出救護。部議不准。得旨。朕南巡時。親見京口與瓜洲對峙。往來過渡人等。所關甚重。預備船隻。拯救沉溺。多有裨益。此渡生船隻。令如該督所題行。

十一月。丙子朔。

上諭都統紀爾他布。御史巴什。錫米圖。郎中邁圖。員外郎沙拜。曰。喜峯口。冷口外。盜賊藏匿山谷。恃強霸佔人之妻女。剽掠財物。莊頭居民。受其擾害。爾等將喜峯口。冷口。滿洲綠旗官兵。酌量帶往搜緝。○戊寅。轉工部右侍郎孫在豐。為左侍郎。陞內閣學士徐廷璽。為工部右侍郎。○己卯。轉工部右侍郎傅拉塔。為左侍郎。以伊爾格圖。為工部右侍郎。翰林院侍講學士趙台。為內閣學士兼禮部侍郎。○庚辰。陞順天府府尹徐誥武。為都察院左副都御史。○子湖廣永興縣陣亡鑲白旗拖沙喇哈番吳魯禮。祭葬如例。○辛巳。以禮部左侍郎張英。充經筵講官。○壬午。吏部議覆左都御史王鴻緒疏。叅廣東巡撫李士楨貪污不法。年老昏憤各款。除事在赦前。及款無確據者。無庸議外。李士楨年六十九歲。昏憤是實。應照年老例休致。從之。○癸未。陞內閣侍



讀學士石文桂。為內閣學士。兼禮部侍郎。○甲申。以一等阿思哈尼哈番李正宗。為正藍旗漢軍都統。○陞左庶子伊圖。為光祿寺卿。○予故工部尚書湯斌祭葬如例。○乙酉。陞左僉都御史衛執蒲。為順天府府尹。○壬辰。冬至。祀

天於

圜丘。

上親詣行禮。○遣官祭

永陵。

福陵。

昭陵。

孝陵。

仁孝皇后。

孝昭皇后陵。○癸巳。

上率王以下。文武大臣。侍衛等詣

太皇太后

皇太后宮。行冬至慶賀禮。御太和門。王以下。文武各官。上表朝賀。○考察天下軍政。貪酷官

二十六員。不謹官四十二員。罷軟官四十四員。年老官八十三員。有疾官四十一員。不及官一百十二員。浮躁官五十八員。分別處分如例。○乙未。陞正白旗蒙古副都統拖倫。為護軍統領。○諭大學士等。近見支用修造等項。奏銷錢糧時。該部不准駁回者甚多。此等奏銷。屢行駁回。官員未必捐橐補給。亦止派取民間耳。如此。則百姓愈苦。向因需用孔亟。故奏銷者未即准行。今公帑並非匱乏之時。奏銷案件。不必駁回。即應完結。此等事不行。駁回。在官員既可省案牘。而於百姓尤大有裨益也。可傳諭九卿詹事科道。○又諭曰。凡叅劾貪官。其受賄作弊之處。因未曾親覩。無所憑據。畏縮而不行。叅劾者甚多。今問有彈章。亦止據風聞。叅劾耳。豈有身與之通同受賄作弊。而顧肯叅劾之耶。向者原有風聞糾彈之例。輔政大臣停止。今再行此例。貪官似有微懼。若有挾讎叅劾者。審明果係挾讎。自

有反坐之典在。可傳諭九卿詹事科道○又諭曰。今聞外藩蒙古。出汛界。侵害搶擄喀爾喀之巴爾虎等蒙古者甚多。以後著嚴行禁止。毋使妄行。可傳諭理藩院○直隸各省提督總兵官。以軍政自陳。福建海壇總兵官傅魁。山東登州總兵官林宗。各降二級調用。陝西涼州總兵官高孟。以原品休致○科爾沁輔國公圖納黑故。遣官致祭○丙申。太皇太后聖體違和。

上在

慈寧宮侍疾。親嘗湯藥。晝夜不離左右。傳諭內閣。非緊要事。勿得奏聞○丁酉。陞直隸守道朱弘祚。為廣東巡撫○已亥。調正白旗蒙古副都統邁圖。為滿洲副都統。以一等侍衛文達。為正白旗蒙古副都統○吏部題順天學政李應薦差滿。得旨李應薦聲名好。著留任三年○辛丑。諭戶部。朕惟自古帝王。統御萬方。又安九有。殫心懷保。節愛攸先。期於物力

充裕。爰以惠養黎元。俾膏澤旁流。咸蒙美利。朕自御極以來。軫恤民依。力圖休養。惟理財為裕國之大經。蠲貸為愛民之實政。歷年敦崇節儉。嚴核浮冒。蓋欲為布德行惠之資。頻年以來。各省錢糧。雖已次第蠲免。但江蘇所屬各郡縣。為財賦重地。額徵錢糧。甲於他省。且累歲輸將供億。効力惟勤。茲用大沛恩膏。除漕項錢糧外。所有康熙二十七年應徵地丁各項錢糧。俱令蠲免。二十六年未完錢糧。亦悉與豁免。又陝西省錢糧。前雖已行蠲免。但念該省人民。用兵之際。轉輸餽餉。効力可念。再宜加恩。以弘樂利。其康熙二十七年應徵地丁各項錢糧。及二十六年未完錢糧。亦俱與豁免。爾部速行該地方官。通行曉諭。務使小民均沾實惠。以副朕愛育蒼生至意。如有不肖官吏。借端朦混。及私行重徵者。該督撫指名題參。從重治罪。如該督撫徇隱不行。糾舉。或經叅奏。或被告發。定行一併從重治

罪。爾部即遵諭行。○以翰林院侍講孔俄岱充日講起居注官。○調河南南汝總兵官柯彩。為陝西涼州總兵官。湖廣襄陽總兵官蔡元。為山東登州總兵官。○壬寅。諭刑部。朕侍奉

太皇太后。朝夕承歡。祇遵

慈訓。竭誠奉養。今者

聖躬偶爾違豫。朕夙夜滋懼。寢食靡寧。仰冀

上天眷顧。俯垂默佑。惟思好生以迓

天庥。寬大以延遐壽。所有內外問刑衙門。見監重辟人犯。除十惡死罪。及貪官光棍不赦外。其餘已經奉旨監候死罪重犯。槩行減等發落。以昭朕祈

天永佑至意。○癸卯。以一等待衛郎伊達。為正白旗蒙古副都統。○吏部議覆。都察院左都御史徐乾學疏。叅江西巡撫安世鼎。才守俱劣。不宜久尸厥位。應照不謹例革職。得旨。安世鼎著革職。布政使張所志。係安世鼎同城

之官。巡撫科派營私。必與布政使通同作弊。布政使果能清正。巡撫豈能獨自妄行。張所志素行不謹。有玷官方。亦照不謹例革職。○旌表江南節婦吳縣陸禹鰲妻毛氏。朱尚仁妻錢氏。吳江縣陳孝若妻沈氏。崑山縣王思友妻張氏等。各給銀建坊如例。○甲辰。諭大學士等。自

太皇太后聖體違和以來。多方醫治。罔克奏效。病勢漸增。甚為可慮。朕夙夜憂懼。茲欲躬詣

郊壇虔行禱祀。保佑

太皇太后慈躬和豫。永獲康寧。可將朕意傳示

九卿。九卿等奏曰。

皇上至孝。超越萬古。

太皇太后違和。

皇上朝夕在

慈寧宮席地奉侍。親調藥餌。寢食俱廢。

聖孝之誠。必當感格

穹蒼。臣等愚見。似不必詣

壇致祭。

天心自為默佑。大學士等轉奏畢。復諭曰。自

太皇太后違和以來。朕在宮中。無日不虔潔精誠。默行祈禱。乃

太皇太后聖體大漸。似無一分可以冀望矣。如稍有可望之機。亦不敢起躬禱。

天壇之念。今竟毫無冀望。何計可施。惟有竭抒誠悃。叩祈

上天之眷佑耳。並非沽取虛名。徒事粉飾為也。

皇皇

上天。其可欺乎。將此諭旨。向諸臣傳示之。○禮部奏。請擇齋戒告祭日期。

上傳諭諸臣曰。朕在宮中。每日齋戒。可即於明早步行。恭祭祈禱。○吏部議。禮部左侍郎額

星格。理藩院左侍郎喇巴克。監養蒙古馬。司官侵蝕錢糧。失於覺察。又將私馬擅同飼養。

俱應革職。從之。○陞江西袁州副將梁鼎為江南蘇松水師總兵官。廣東肇慶副將史孔

筆為河南南汝總兵官。○免江西萬載等七縣本年分旱災額賦有差。○旌表直隸節婦大興縣黃鳳妻王氏。三河縣曹持裕妻張氏。固安縣周郁妻祖氏。吳橋縣劉接武妻丁氏。寶坻縣杜立言妻張氏。元城縣張鴻濤妻成氏。烈婦開州李大成妻張氏。長垣縣李鏞妻張氏等。各給銀建坊如例。○喀爾喀墨爾根濟農遣使進九白年貢。宴賚如例。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十一

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百三十二

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十六年丁卯十二月乙巳朔

實錄卷一百三十二

上率諸王貝勒貝子公及文武官員等步詣

天壇致祭

上親撰祝文曰嗣天子臣玄燁敢昭告於

皇天上帝曰臣仰承

天佑奉事祖母太皇太后高年倚庇藉得安康

今者疹患驟作一旬以內漸覺沉篤旦夕可

慮臣夙夜靡寧寢食捐廢虔治藥餌徧問方

醫罔克奏效五內憂灼莫知所措竊思

天心仁愛覆幬無方矧臣眇躬夙蒙

慈養憶自弱齡早失怙恃趨承祖母膝下三十

餘年鞠養教誨以至有成設無祖母太皇太

后斷不能致有今日成立罔極之恩畢生難

報值茲危殆方寸憤迷用敢潔蠲擇日謹率

羣臣呼籲

皇穹伏懇

憫念篤誠

立垂昭鑒俾沉疴迅起遐算長延若大數或窮

願減臣玄燁齡與增太皇太后數年之壽為

實錄卷一百三十二

此匍伏

壇下仰祈

洪佑不勝懇禱之至讀祝版時

上涕淚交頤陪祀諸王大臣等無不感泣祭畢

上即詣

慈寧宮侍疾○丙午以故鑲黃旗二等伯噶都

子唐保住襲爵○巳酉陞四川按察使王業

興為江西布政使司布政使○以蒿齊忒故

多羅郡王車布登子巴扎爾襲爵○柰曼多

羅達爾漢郡王鄂齊爾故遣官致祭○庚戌以禮部郎中任鑿為山東按察使司僉事提調學政江南松江府知府朱雲為山西按察使司副使提調學政刑部郎中邵延齡為江西按察使司僉事提調學政戶部郎中高曰聰為福建按察使司僉事提調學政山西太原府知府鄭僑生為湖廣按察使司副使提調學政禮部郎中黃雲企為廣東按察使司僉事提調學政禮部郎中張光參為陝西按察使司僉事提調學政刑部郎中吳自肅為雲南按察使司僉事提調學政禮部郎中張顧行為貴州按察使司僉事提調學政○辛亥以翰林院侍講高裔提督江南學政左春坊左贊善兼翰林院檢討周清原提督浙江學政○壬子陞太常寺卿席爾達為禮部左侍郎兼管太常寺事內閣學士多奇為禮部右侍郎○甲寅內閣及各部院衙門官員具疏公請

皇上少節勞悴。

上曰朕自

太皇太后違豫以來心懷憂慮日侍左右檢方調藥親視飲饌。

太皇太后寧懋之時朕隔幔靜俟席地危坐一聞

太皇太后聲息即趨至榻前凡有所需手奉以進因此晝夜不能少離。

太皇太后屢有慈旨命朕回宮少宜自愛朕念

幼蒙

太皇太后撫養教訓三十餘年罔極深恩難以報答今見病體依然五內焦灼莫知所措朕躬寢處何暇顧計覽奏具見大小臣子愛君誠悃但當此時不竭盡心力少抒仰報之忱異日雖欲依戀

慈闈豈易得耶所奏已知之○陞內閣侍讀學士拜禮為內閣學士兼禮部侍郎○丙辰諸王貝勒貝子令內大臣大學士尚書侍郎侍

衛等詣

慈寧宮門跪奏請

皇上間一回宮稍為休息得旨

太皇太后病勢漸覺沉篤朕心憂灼片刻難離

朕即回宮心亦不安所奏已知之○丁巳陞

廣西蒼梧鹽法道興永朝為四川按察使司

按察使○戊午以太常寺卿王隲為江西巡

撫○辛酉陞叅領穆維雍為福建海壇總兵

官○癸亥以廣州將軍王永譽為正紅旗漢

軍都統○乙丑陞內閣學士額爾黑圖為理

藩院左侍郎○山西道御史陳紫芝疏叅湖

廣巡撫張汧蒞任未久黷貨多端凡所屬地

方鹽引錢局船埠等無不搜括甚至漢口市

肆招牌亦按數派錢當日保舉之人必有賄

囑情弊請一并敕部議處得旨張汧著革職

所叅各款著直隸巡撫于成龍山西巡撫馬

齊左副都御史開音布馳驛前往提拏究擬

具奏○奉差湖廣審事刑部右侍郎色楞額

疏言湖廣巡撫張汧所叅上荆南道祖澤深

婪贓款內得枉法贓金七兩銀四十兩是實

枝江縣知縣趙嘉星私派款內得銀四百二

十兩是實祖澤深趙嘉星俱應革職擬絞監

候秋後處決其通山縣知縣邢士麟到任一

月並無才短誤公之處應毋庸議巡撫張汧

將邢士麟誤叅應降一級調用原揭布政使

胡戴仁按察使丁燁等各降二級調用得旨

所審未當著于成龍等嚴加究擬具奏色楞

額著嚴加察議○諭大學士等科道職在糾

叅張汧貪婪無人敢言陳紫芝獨能彈劾甚

為可嘉著傳諭吏部即令內陞以示鼓勵○

戶部尚書佛倫等查看河工回奏河臣靳輔

疏請修築高家堰重堤束洪澤湖水盡出清

口併黃河兩岸立閘分洩黃水而撫臣于成

龍又奏下河宜挑不宜停重堤宜停不宜築

彼此意見不合臣等會勘上下河道知高郵

等七州縣水患皆因洪澤湖水從減水壩東



注高郵寶應。邵伯三湖。流入漕河。又從高郵城東堤減水壩。流入下河。以致七州縣民田被水淹沒。故治下河。必先塞上流。使上流之水。不得東注下河。則保守高家堰。水出清口。自為第一要著。臣等閱視高家堰地勢。應如河臣原議。史家店以南。石堤以東。築一月堤。使六壩所減之水。由重堤以內。流出清口。自不致衝突堰堤。但洪澤湖之水。流入漕河。漕堤關係緊要。宜行減洩。應將淮安以北。五叉河。開開濬。引水由草灣入海。至淮安寶應。澗河等處。亦應開濬。引水由射陽湖達廟灣入海。其高郵城東堤。五座減水壩。係下河水患之原。今淮安府南北。既經開濬。此處俱應堵塞。黃河兩岸。仲家莊。草灣等處。建石閘三座。分洩黃水入海。仍照原議外。惟安東縣五里墩。建閘洩水。由鹽河入海。恐開閘之處。逼近安東。實屬危險。應將石閘。移建城東。再看得下河形勢。見在流通。今既堵塞上流。盡注清

口。則下河水勢。自然漸減。應將白駒。丁溪。草堰。三口各子。盡行停止。其修築月堤。并澗河等處。開濬建閘。所需錢糧。應令河臣確估題請。得旨。九卿詹事科道會議具奏。○己巳。子時。太皇太后崩於慈寧宮。遺詔曰。予以薄德。幼承太祖高皇帝登聘。獲奉太宗文皇帝。贊助內政。越既有年。不幸龍馭上賓。痛不欲生。誓以身殉。諸王大臣。以世祖皇帝方在冲齡。繼承大統。保護靡託。合辭堅請。勉留此身。撫育教訓。未嘗少懈。十有九年。重遭不造。世祖皇帝崩逝。悲悼予懷。益無意人世。告天籲衆。冀申初志。諸王大臣。復以今皇帝冲齡踐祚。正須鞠育。懇請再四。予顧此藐孫。難忍捐棄。勉抑哀衷。相依歲月。今皇帝至孝性成。誠切肫懇。視膳問安。朝夕罔間。備物盡志。無所不周。屢薦徽稱。尊崇斯極。終始惟一。幾三十年。予因茲敬養。遂使兩世哀感之懷。大為

寬釋。且皇太后奉事勤恪。予心甚安。但念世際昇平。皇帝純孝。亘古所無。予正可誕膺福祉。奈年齒逾邁。時用自傷。頃當寢疾。皇帝躬省藥餌。寢食捐廢。步禱

郊壇。竭誠呼籲。乃數盡難挽。遽至彌留。予壽七十有五。得復奉

太宗文皇帝左右。愜予夙心。夫亦何憾。今皇帝勵精圖治。愛育蒼生。海宇乂安。兆姓樂業。天下臣民頌太平之庥者。功歸啟佑。予歿有榮

施焉。惟是皇帝大孝性成。超越今古。恐過於悲痛。宜勉自節哀。以萬幾為重。中外文武羣臣。恪恭奉職。勿負委任。以共承無疆之福。其喪制。悉遵典禮。成服後三日。皇帝即行聽政。其持服。依世祖皇帝遺詔。以日易月。二十七日而除。

天地

宗廟

社稷之祭。不可以藐躬之故。致稽大典。及百神

祀事。照常無停。故茲誥諭。其各遵行。

上擗踊哀號。呼天搶地。哭無停聲。

皇太后。

上暨皇妃。皇子。俱成服。親王以下。文武大小官員。外藩王以下。及台吉等。王妃公主以下。八旗二品以上官員命婦。俱齊集成服。嗣是每日哭臨二次。凡二十七日。○諸王貝勒貝子。及文武大臣等。奏請節哀。

上諭曰。朕自八齡。

皇考世祖章皇帝賓天。十一歲。又遭

皇妣章皇后崩逝。二十餘年以來。全賴

聖祖母太皇太后撫育教訓。今遽遭捐棄。五內

摧迷。顧念

慈恩。罔極難報。哀號痛切。情何容已。所奏已知之。○諭諸王貝勒貝子。公內大臣大學士。九卿詹事科道等。自漢以後。帝王居喪持服。以二十七月易為二十七日。惟魏孝文帝欲行三年之喪。朕平日讀史至此。常稱贊之。今非

欲邁古賢君。祇念朕八歲。

世祖皇帝賓天。十一歲。

慈和皇太后崩逝。全賴

聖祖母太皇太后鞠養教誨。以至成立。遽遭大故。實增痛傷。哀疚靡盡。今定持服二十七月。少慰罔極之痛。朕獨持服於宮中。幾政毫無曠廢。不令臣民持服。一切俱不禁止。如此。可以遂朕本懷。諸王大臣各官。其集議之。諸王大臣等奏曰。

皇上至德純孝。自古無倫。但帝王之孝。與臣民不同。願

皇上仰遵

遺誥。博稽古制。上思

天地

祖宗付畀之重。下慰羣臣百姓仰賴之忱。以禮節哀。易月之典。守而勿更。得旨。朕事

太皇太后三十餘年。竭盡衷誠。無稍違拂。近者聖體違豫三十餘日。衣不解帶。必誠必敬。朕之

此志期在必遂。否則貴為天子。富有四海。亦奚以為。諸王大臣等聞諭。皆感悚嗚咽。又奏曰。

皇上一身為

宗廟

社稷所寄託。每當祭享。伏見

鑾輿親詣。竭誠盡敬。夫祭為吉禮。必除服後舉行。

皇上以

太皇太后之故。若使

郊

廟神靈。少有弗敬。即

太皇太后在天之靈。亦必不安。且君臣兆姓。本

屬一體。若

皇上持服宮中。聽臣民即吉。甚非一體之義。况

皇上奉事

慈寧三十餘年。晨昏侍養。罔不承順意旨。今於慈闈遺命。若不曲遵。恐有虛

太皇太后惓惓之意。臣等不揣愚賤。敢以固請。得旨。朕意已定。不必更奏。○禮部題。本朝后喪例。不割辦。又奉

皇太后傳諭。

太皇太后不豫時。曾向予云。我病若不起。皇帝斷勿割辦。應謹遵行。得旨。

太皇太后教育恩深。朕自盡其心。仍行割辦。

上遂割辦。○諭禮部。朕孝服用布。舊制國有大喪。自宗室公以上。服素帛。今孝服俱改用布。

○庚午。

上在

大行太皇太后梓宮前。晝夜號痛不止。水漿不入口。

天顏癯瘠。以致昏迷。諸王貝勒貝子公等。及外藩王貝勒貝子公等。皆跪奏伏望

皇上少自節哀。保護

聖躬。得旨。

親存則竭心力。以盡孝。歿則思報教育之恩。終

身不忘為子孫者。誼所當然。

太皇太后高厚之恩。可一刻忘乎。諭畢。復大慟不已。○禮部題。欽天監選擇十二月二十九

日癸酉卯時。

大行太皇太后梓宮發引。得旨。

太皇太后梓宮速行發引。朕心不忍。意欲久留。慈寧宮內。爾諸臣議奏。諸臣奏曰。素無久留

寢宮之例。應於二十九日發引。得旨。既如此。朕意欲停喪三七。另行選期。諸臣奏曰。我朝向

日所行。年內喪事。不令踰年。仍應於二十九日發引。得旨。爾等念朕躬勞苦。朕豈不自知。

但二十九日發引。為期太近。兩皇后梓宮尚遲至多日。若以

太皇太后梓宮拘舊例。謂踰年不便速行發引。於大義不合。舊例有可從者。有不可從者。朕意在正月十七十八日。方可發引。著另行選期具奏。諸王大臣等。又公同會議。奏曰。本朝向行之例。踰年為忌。似宜仍請於二十九日

發引得旨。爾等所云忌諱。祇為朕躬。朕殊不避忌。朕前禱

天壇。尚欲減朕年以增

太皇太后之壽。豈以

梓宮踰年發引。乃有避忌乎。如有所忌。朕躬當之。否則忌諱之說。虛誕不足信。亦可以破後人之疑。使皆以朕為法。

太皇太后梓宮。可擇正月十一日發引。○辛未。上在

大行太皇太后梓宮前。晝夜號慟不止。水漿不入口如前。內閣翰林院九卿詹事科道等齊集

慈寧宮門。公同具疏奏請

皇上節哀保護

聖躬。得旨。朕忽遭大故。五中憤懣。非不知恪遵遺誥。守身為重。勉自節哀。強進飲食。但悲從中來。情實痛切。莫由自主。以至昏迷。即欲少餐。饘粥亦不能下咽。非故却不御。覽奏具見誠

惻。朕當強支自愛。卿等無須過慮。○諸王貝勒貝子。公文武大臣官員。公同具疏奏請

皇上恪遵

遺誥。持服二十七日。以上慰

列聖之倚託。下憐臣子之惻忱。得旨。朕從來一言一事。必躬行實踐。並無故為文飾。邀取虛名。今於宮中持服二十七月。朕志已定。屢旨甚明。王等其體朕至意。遵行。○諭諸王大臣等。

皇太后聖躬素弱。近者

太皇太后病篤。朝夕奉侍。慈顏瘦減。又因

太皇太后上賓。悲哀過甚。晝夜不離

梓宮。飲食不御。愈加羸弱。當今最尊者。惟

皇太后一人。朕見

皇太后慈顏羸弱。力為勸慰。

皇太后不允。爾諸王大臣。俱係骨肉至戚。應公

同奏勸。諸王妃郡主等。舉哀時。

皇太后慟哭幾至仆地。眾所共睹。今已三日矣。

諸王大臣等隨奏請

皇太后節哀。回宮暫息。

皇太后諭曰。皇帝大孝。事

太皇太后及子三十餘年。承歡靡間。敬禮兼隆。

太皇太后聖體違和。皇帝躬親侍奉三十餘日。

席坐冷地。親奉湯藥。衣不解帶。極其誠孝。

太皇太后賓天。內廷一切事務。皆皇帝躬親料理。

所以諸事各得詳善。今已經三日。皇帝痛哭不止。容顏甚為瘦減。子心殊覺不寧。爾等

宜勸皇帝節哀。最為緊要。不必向予敦請。諸

王大臣等復再三叩請。

皇太后又諭曰。諸王大臣所奏。請予回宮。以少

慰皇帝之心。所言良是。下午上食畢。予即率

衆妃同散。然雖散。亦不各歸自己宮內。仍率

衆妃俱集於別宮。自明日為始。每日三次上

食後。即回別宮。○諸王大臣等復跪奏。

太皇太后上賓。已經三日。

皇上晝夜號慟不止。臣等惶懼。不知所措。伏乞

皇上暫離喪次。於乾清門內。不拘何處。少為休息。得旨。朕遭不幸。

太皇太后賓天。每思

高厚洪恩。寸衷如割。更何心緒回宮。以圖安逸。

況

太皇太后上賓以來。至今飲食不能入口。昨

皇太后再三勸進糜粥。朕雖勉啜少許。究不能

下咽。朕決意仍在喪次。以盡朕心。諸王大臣

等復再三叩請。

上不允。○禮部以

大行太皇太后常祭禮儀。請旨。得旨。俱照祭

世祖皇帝例。○壬申。

上在

大行太皇太后梓宮前。哀慟不止如前。諸王大

臣等跪奏。明日除名。請

皇上暫行回宮。得旨。除夕避忌。果有此說否。諸

王大臣等奏曰。元旦乃吉祥之日。今

聖躬不離喪次。臣等甚為不安。叩請

皇上於除夜回宮。元旦在宮中。停止哭泣。得旨數日以來。朕心甚覺憤迷。今據爾等所奏。稍有關係。元旦日。

太皇太后梓宮前。令宮人照常上食。

慈寧宮前院內。諸皇子等所住帷帳。朕當於此暫居一日。諸王大臣。又再三叩請回宮。

上不允。○諭大學士內務府總管等。

太皇太后疾大漸時。諭朕曰。

太宗文皇帝梓宮。安奉已久。不可為我輕動。況

我心戀汝。皇父及汝。不忍遠去。務於孝陵近

地。擇吉安厝。則我心無憾矣。諄諄降旨。朕何

敢違。伏思

慈寧宮之東。新建宮五間。

太皇太后在日。屢曾向朕稱善。乃未及久居。遽

爾遐升。今於

孝陵近地。擇吉修建

暫安奉殿。即將此宮拆運。所擇吉處。毋致缺損。

著揀選部院賢能官員前往。敬謹料理。天氣

甚寒。務期基址堅固。工程完備。爾等即傳諭行。○

上於

大行太皇太后梓宮前。行常祭禮。哀慟如前。內閣翰林院九卿詹事科道等。公同具疏。以元旦令節。叩乞

皇上節哀。并請回宮。得旨。據奏元旦請朕還宮。

人主宮殿原多。可以因時移蹕。若在庶民遭

此大故。所居止於一室。又遷避何所。回宮斷

不可行。卿等念切愛君。恐朕哀毀過甚。諄懇

再三。勉從所請。強節哀情。諸王大臣等。叩首

復奏曰。

皇上俯鑒下情。勉節哀痛。臣等不勝慰藉。但

皇上乃萬邦之主。元旦乃歲首之辰。特求

皇上於除夕回宮。元旦後再詣

慈寧宮。得旨。朕自幼蒙

太皇太后教育之恩。至為深厚。方且仰報難盡。

何云回宮。朕年正富。安享之日方長。報



太皇太后之日。從茲已盡。爾等諸王大臣再三奏請。朕因於元旦日暫移前院。此亦從爾等之請耳。諸王大臣又再三叩首奏曰。臣等焉敢求。

皇上回宮休息。但以元旦乃吉辰。局閉。

乾清宮所係甚大。得旨。朕不幸當此大故。設太皇太后之變。恰遇二十九三十日。將若之何。亦惟有聚集此處。豈可他避也。因爾等再三奏勸。止於元旦暫移。少忍哀慟。是亦從爾等之所請矣。今若瀆奏不止。則并此言亦不聽從。諸王大臣復叩請不已。復傳旨曰。朕意已定。並無他說。爾等如此執滯。朕愈不允從。著朕前諭遵行。○召集諸王大臣等。將所請以日易月之疏發出。諭曰。三年之喪。朕意在必行。將欲手書諭旨。而朕體疲憊。願爾等諸王大臣共諒朕懷。勉從前諭。諸王大臣等奏曰。聖諭必欲行三年之喪。臣等何敢違執。但聖躬乃

天地

宗廟及萬民生命所關。三年斷不可行。故自昔賢君皆從易月之制。臣等所托命惟有

皇上。若必令仰承。即加臣等以罪。亦所不辭。斷

斷不敢遵行。得旨。將本暫存閣中。過初一日

再行啟奏。○癸酉歲暮。祫祭

太廟。遣內大臣公舅舅佟國維行禮。○遣官祭

永陵。

福陵。

昭陵。

孝陵。

仁孝皇后。

孝昭皇后陵。○遣官祭太歲之神。○甲戌

上在

大行太皇太后梓宮前。哀慟不止如前。諸王大

臣等奏

皇太后曰

皇上在

慈寧宮明日元旦。乃天地人協吉之辰。

乾清宮不宜扃閉。臣等昨者再三跪奏。復具

疏陳請。

皇上未允。故臣等復懇祈於

皇太后。

皇上至孝。

皇太后敦諭庶幾勉從。

皇太后諭曰。予敦勸兩次。皇帝立意已定矣。○

旌表八旗節婦。滿洲伊那吳妻烏氏等十六

聖祖實錄卷一三三

二二三

人。蒙古奇他安妻西氏等四人。漢軍高雲桂

妻楊氏等四人。各給銀建坊如例。○是歲。人

丁戶口二千三十四萬九千三百四十一。田

地。山蕩畦地。五百九十萬四千一百八十四

頃八十四畝有奇。徵銀二千七百二十六萬

二千三百七十五兩有奇。米。豆。麥。六百九十

萬一千四十二石六斗有奇。草。二百五萬七

千九百六十四束。茶。十五萬九千三百一十

五引。行鹽。四百三十一萬八千五百六十九

引。徵課銀二百七十三萬九千六百一十二  
兩有奇。鑄錢二萬八千九百九十三萬六千  
七百有奇。

聖祖實錄卷一三三

二三四

大清聖祖合天弘運文武睿哲恭儉寬裕考敬誠  
信中和功德大成仁皇帝實錄卷之一百三十二

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百三十三

藍修德官光祿大夫太僕寺卿太子太傅和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍原

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十七年戊辰春正月乙亥朔諸王大

臣等以元旦令節奏請

皇上節哀回宮不允羣臣復敢請再四

上於是暫駐

慈寧宮前院幕次○丙子

上居

大行太皇太后喪次哀慟不止如前○國子監

題太學生劉枝桂等五百餘人呈請

皇上節哀循古服制以日易月章下內閣○丁

丑

上居

大行太皇太后喪次哀慟不止如前是日科爾

沁達爾漢親王班第額駙率蒙古王貝勒貝

子公台吉塔布囊等齊集永康門外跪奏曰

臣等一日三次哭臨雖不得近覲

天顏竊聞

皇上悲哀太過一日內三次哭臨懇請節為一

次得旨爾等聞喪自遠方速至晝夜齊集哭

臨此即情關一體之誼爾等奏勸節哀誠是

但

太皇太后恩深罔極朕年方富安享之日長仰

報

太皇太后之日少每念教育厚恩哀痛實難自

禁至爾等忠愛勸請節哀之情朕自當勉從

之○順天府進春○戊寅

上居

大行太皇太后喪次哀慟不止如前內閣以諸

王大臣及士民等奏請以日易月之疏一并

進呈。公同奏曰。

皇上欲行三年之喪。臣等再四思之。實有難行之處。請仍遵歷代定制。

上曰。朕凡事一本於誠。行三年之喪。朕意甚切。非飾虛名。仍宜遵照前旨行。諸王大臣等復再三懇請。

上曰。三年之喪。朕意以為可行。故有前諭。諸王大臣及百司士庶皆為阻止。屢行陳奏。此際朕心甚煩。俟再思之。○已卯。

上居

大行太皇太后喪次。哀慟不止如前。○王以下文武各官復奏請以日易月。

上諭曰。昨裕王恭王亦勸朕從王大臣士民之請。朕不得已。勉如所請。○庚辰。

上居

大行太皇太后喪次。哀慟不止如前。○辛巳。

世祖章皇帝忌辰。遣官祭

孝陵。○

上居

大行太皇太后喪次。哀慟不止如前。○

上諭禮部。

大行太皇太后聖德母儀昭示萬國。昔奉我

皇祖太宗文皇帝。贊宣內政。誕育我

皇考世祖章皇帝。顧復勛勞。受無疆休。大一統業。暨朕踐阼。方在冲齡。仰荷我

聖祖母訓誨恩勤。以至成立。晨昏依戀三十餘年。方期淳享遐齡。茂膺繁祉。詎意適遭違豫。奄忽上賓。朕哀疚之深。五中摧絕。昊天罔極。報德實難。緬維厚澤。深仁信足炳傳簡冊。非薦隆號。莫展哀誠。宜恪遵彝憲。恭上

尊謚。垂示無窮。以慰朕尊親之意。著內閣翰林院詹事府會同擬奏。其應行典禮。爾部詳議以聞。於是內閣等衙門。即恭擬

尊謚二道進呈。奉旨應上

太皇太后尊謚曰。孝莊仁宣誠憲恭懿翊天啓聖文皇后。又諭。

太皇太后升遐未久。祭文內遽改稱

尊諡。朕心深為不忍。應俟

梓宮奉安昌瑞山後始稱

尊諡以祭。○壬午孟春享

太廟。遣領侍衛內大臣公福善行禮。○遣官祭

太歲之神。○

上居

大行太皇太后喪次。哀慟不止如前。○癸未。

上因

大行太皇太后梓宮於十一日發引。率諸王以

下。文武大小官員及外藩王貝勒等讀文致

祭。○皇子允禔生。○甲申。

上居

大行太皇太后喪次。哀慟不止如前。○乙酉。奉

移

大行太皇太后梓宮安設於朝陽門外殯宮。發

引時。

上手攀

梓宮。稽顙痛哭。迨

梓宮啓行後。

上於

梓宮前步行。沿途哭不停聲。

梓宮更昇校時。必跪於道左。哀慟不已。至

梓宮奉安之後。號泣良久。致奠行禮。諸王大臣

等奏曰。

梓宮已經奉安。請

皇上回宮。

上曰。朕於

太皇太后無由復侍。此乃慎終之時。憔悴困憊。

皆所不恤。此刻殊覺委頓。胸臆煩熱。欲於此

尋一小室暫居之。視體中如何。尚未知明日

能回宮否。爾諸臣愛朕誠惻。朕知之矣。○丙

戌。

上詣

大行太皇太后梓宮前。三上食。舉哀。○丁亥。行

初次致祭禮。○戊子。行繹祭禮。諸王大臣固

請

皇上回宮。

上曰。朕連日居一小室。意欲久駐於此。爾等既再三奏請。今乃暫回。朕自幼讀書。稍知孝道。豈忍遽圖便安。茲雖暫回。亦不入宮內。姑設幕席地而處。少遲一二日。當復來此。是日。

上還幕居乾清門外之左。諸王大臣及外藩王。台吉等請。

上回宮。不久。九卿詹事科道等亦具疏請回宮。調攝。諭曰。朕遭

太皇太后崩逝。欲持服二十七月。立志甚堅。諸王大臣及百官士民。再三陳奏。情詞懇切。不得已。勉從所請。中心歉仄。因幕居乾清門外。以盡哀誠。今乃又請回宮。不過以朕躬為念。身為天子。豈不自愛。但人孰無祖父母。父母。為子孫。皆當盡孝。何分貴賤。朕孝治天下。思以表率臣民。垂則後裔。今距釋服之期。為時甚近。若從所言。以致異日稍留遺憾。恐非諸

臣愛君之意。諸王大臣激切奏懇。已有諭旨。不允。卿等其仰體朕心。勿復言。○己丑。

上幕居乾清門外。○庚寅。

上幕居乾清門外。○先是。諸王大臣及士民等。奏請以日易月之疏。俱未批答。至是得旨。朕以薄祐。幼失

怙恃。幸依

聖祖母膝下。如見

皇考妣音容。今遭遐棄。痛念慈恩。悲哀并集。欲持服二十七月。仰答

聖祖母鞠育深仁。兼報

皇考妣劬勞大德。諸王大臣及各官等援引歷代成例。堅請再三。並稱

郊廟祀典。不宜久輟。升祔大禮。及時舉行。且士民伏闕。披瀝衆情。謂國恤淹久。有妨民業。朕反覆思維。不得已。以禮抑情。勉從所請。該部知道。○辛卯。

上詣

大行太皇太后梓宮前。三上食。舉哀。是日。即居殯宮之側。○壬辰。

上詣

大行太皇太后梓宮前。三上食。舉哀。○奉差湖廣左副都御史開音布。直隸巡撫于成龍。山西巡撫馬齊等。疏請叩謁。

大行太皇太后梓宮。允之。○癸巳。

上詣

大行太皇太后梓宮前。三上食。舉哀。○甲午。

上詣

大行太皇太后梓宮前。三上食。舉哀。諸王大臣等奏曰。明日行大祭禮。釋服後乞。

皇上照定例回宮。乾清門外所設幕。請今日拆收之。不允。諸王大臣固請。

上曰。爾等奏請懇摯。朕於二十二日。繹祭畢。還宮。是日。亦欲遣外藩王等歸國。乾清門外所設之幕。至期拆收。○乙未。

上詣

大行太皇太后梓宮前。行大祭禮。釋服。傳諭內

大臣曰。科爾沁王。貝勒。貝子。公。台吉等。馳至

守服。應加賞賚。命出。

太皇太后宮內白金綵緞。分賜之。其先因出痘。令回部落者。亦令一體沾恩。諭曰。爾等皆

太皇太后姻戚。齊至喪次。克終其事。殊為可憫。因以。

太皇太后所遺之物。頒賜爾等。衆皆感泣。又諭曰。爾等不必向朕謝恩。可令詣

太皇太后梓宮前。謝恩行禮。是日。

上仍居殯宮之側。○丙申。

上繹祭

大行太皇太后。舉哀。行禮畢。回宮。居乾清門內

偏殿。諭曰。裕親王自

太皇太后違豫以來。與朕同處。殊為勞苦。可著皇長子。及領侍衛內大臣等。送王歸第。○丁酉。

上詣



皇太后宮問安○

上御乾清門。衣青色布衣。聽政。江南道御史郭琇疏。叅靳輔治河無功。聽信幕賓陳璘阻撓。下河開濬宜加懲處。又戶部尚書王日藻等。議靳輔疏請屯田一事。有累於民。請行停止。至高家堰之外。再築一隄。應如靳輔所請。

上曰。河道必親歷其地。然後可議其事。爾九卿等。俱未親歷。徒然懸揣。安有定論。隨令郭琇跪近御前。顧九卿等曰。朕南巡時。往勘河道。

高家堰南北。及清口以南。高郵等處。朕俱沿隄步行。親加詳覽。河上情形。頗深悉之。今欲築重隄。使水由清口入海。若果有裨益。則當日何以不早築耶。高郵等七州縣。百姓苦累異常。此朕目擊而心傷者。今於隄外又築一隄。是重困小民矣。至於屯田。有利於廷臣。而害民實甚。陳璘本一介小人。通國盡知。屯田之說。江南人莫不嗟怨。爾等寧不聞耶。兵部尚書梁清標奏曰。屯田實有害於百姓。斷不

宜行。

上以郭琇叅本。令九卿一并會同察議具奏。○禮部題本年二月初九日。屆會試場期。茲遇大行太皇太后賓天。典禮繁重。應展期一月。於三月初九日舉行會試。

上曰。會試士子。貧寒者多。展期一月。不無苦累。著展期十日。○江西巡撫王隲。廣東巡撫朱弘祚。陛辭。

上諭曰。巡撫為地方大吏。以操守為要。大法則小廉。百姓俱蒙福矣。王隲奏曰。臣向在四川時。不取民間粒米束草。惟帶一二家僮往家中取盤費。不敢有私。

上曰。身為大臣。尋常日用。豈能一無所費。若必分毫取給於家。勢亦有所不能。但操守廉潔。念念從愛百姓起見。便為良吏。督撫中。如兩于成龍及范承勲。誠良吏也。為督撫者在朕前。皆能言之。及至地方。與所言之往往不符。人貴始終如一。朕特簡爾等當砥礪清操。毋負

朕擢用之意。朕事事以百姓為念。爾等到地方。一切利害有關百姓者。不妨事事奏聞。王鵬奏曰。臣當嚴禁屬吏科派。及詞訟賄賂諸弊。

上曰。為大吏者。亦須安靜。安靜則為地方之福。凡貪污屬吏。先當訓誡之。若始終不悛。再行叅劾可也。大學士等奏曰。臣等瞻仰

天表。迥異往時。伏祈珍攝。

上曰。九卿所奏河工。關係重大。兩巡撫陞辭赴任。亦屬緊要。朕所以力疾御門。爾等所奏。朕自知之。是日。

上回乾清門內偏殿。諸王大臣等。以喪事既畢。請

皇上移駐瀛臺。稍遣

聖懷。

上曰。凡事皆有不易之理。朕因定例。不得已釋服。今於宮中。朕自盡孝。亦理所當然。並非好異沽名。爾等勿復奏。○監修下河工部左侍

郎孫在豐。江南江西總督董訥。漕運總督慕天顏各疏請叩謁。

大行太皇太后梓宮。允之。○戊戌。

上詣

大行太皇太后梓宮前。上食。舉哀。是日。諭大學士等曰。自

太皇太后違豫。

皇太后盡孝侍奉。甚為勞悴。

太皇太后賓天。復哀痛太過。

慈顏清減。昨者朕詣

皇太后宮問安。見癯瘦更甚。積勞成疾。服藥調理。

皇太后關係甚大。朕心深為憂慮。明日。

太皇太后一月之祭。爾等可奏請。不必前往。於

是大學士等詣

皇太后宮門。遵旨奏請。

皇太后諭曰。予之服藥。專為明日祭也。今亦稍安。明日決意前往。大臣等復行奏請。

皇太后終不久○已亥。

上詣

大行太皇太后梓宮前。行一月致祭禮○辛丑。祈穀於

上帝。遣領侍衛內大臣伯費揚古行禮○癸卯。

陞侍讀學士阿喇彌為內閣學士兼禮部侍

郎○河南巡撫章欽文。以庸劣革職○陞廣

東副都統拜音達禮為廣東將軍

二月甲辰朔。巴林固山貝子溫春故。遣官致祭○乙巳。

上詣

大行太皇太后梓宮前。上食。舉哀○丙午。

上詣

皇太后宮。問安○以原任工部尚書馬喇為鑲

白旗護軍統領○丁未。遣大學士王熙。祭

先師孔子○調南贛總兵官許盛為湖廣襄

陽總兵官。以左都督二等阿達哈哈番詹六

奇。為江西南贛總兵官○理藩院題科爾沁

和碩土謝圖親王阿拉善。於哭臨之時。不赴

朝集。慵懶失職。應革爵。得旨。阿拉善著革去

管五旗扎薩克土謝圖親王之爵。此王爵令

伊叔多羅貝勒沙津承襲。即著管轄五旗○

戊申。祭

大社。

大稷。遣吏部尚書科爾坤行禮○漕運總督慕

天顏疏言。前臣等會勘河工。河臣靳輔議築

高家堰重隄。臣等議修高家堰舊隄。後尚書

佛倫等奉命再行會勘。皆從靳輔臆說。臣不

敢附會。且河臣倡舉屯田一事。屯官丈占民

田。百姓苦累。臣據實奏聞。得旨。本內事情著

九卿詹事科道察議具奏○朝鮮國王李焞。

遣使表貢方物。賞賚如例○達賴喇嘛班禪

胡土克圖等。遣使表貢方物。賞賚如例○已

酉。陞安徽布政使柯永昇為湖北巡撫○琉

球國中山王尚貞遣使入貢。請以子弟梁成

楫等三人。入監讀書。允之○庚戌。

上詣

大行太皇太后梓宮前。上食。舉哀。是日。即居殯宮之側。○辛亥。

上詣

大行太皇太后梓宮前。上食。舉哀畢。回宮。○壬子。先是。江南道御史郭琇疏。叅大學士明珠等。至是。諭大學士等曰。國家建官分職。經理庶政。必須矢志精白。大法小廉。各守職業。實心任事。庶無負拔擢簡用之意。朕親理萬幾。歷有年所。於爾部院大小官員行事。無不深知。為臣子者。既儋爵受祿。榮及父母。庇其子孫。家能自給。便當知足。無致隕越。前已屢頒諭旨。嚴行申誡。又復諄諄面諭。訓誨再三。今在廷諸臣。自大學士以下。有職掌官員以上。全不恪勤乃職。惟知早出衙署。偷安自便。三五成羣。互相交結。同年門生。相為援引。傾陷商謀私事。徇庇同黨。圖取貨賂。作弊營私。種種情狀。確知已久。九卿詹事科道。皆朕委任

之員。凡遇會議。自當各出已見。公同商酌。乃一二欲行倡率之人。持議於前。衆遂附和。於後。雷同草率。一意詭隨。又其甚者。雖在會議之班。茫無知識。隨衆畫題。希圖完結。廷議如此。國是何憑。又有當集議時。緘默自容。及至債事。巧於推卸。朕深惡此等推諉苟容之輩。亦屢加嚴飭。至於用人。關係重大。羣臣賢否。難以周知。故遇緊要員缺。特令會同推舉。原期為國得人。實有裨益。亦欲令被舉者。警心易慮。恐致溺職。累及舉者。因而勉自刻勵。九卿諸臣。宜體朕心。從公選舉。方為不負委任。乃歷來所舉官員。稱職者固有。而貪黷匪類。往往敗露。此皆瞻徇情面。植黨納賄所致。凡茲情弊。朕非不知。前者班布爾善阿思哈等。身為大臣。所行悖亂。致干憲典。遂行正法。至今猶耿於懷。是以比來大小官員。背公徇私。交通貨賄。朕雖洞見。而不即指發。冀其自知罪戾。痛加省改。庶可終始保全。詎意積習深

錮漫無悛悔。如審擬蔡毓榮一案庇護挽救。瞻徇黨類。百計營求。因朕具悉其奸。私謀未遂。近差塞楞額往審張汧所叅事情。朕面諭塞楞額張汧居官貪穢。爾宜嚴行審出。迨差回時詢問塞楞額奏稱。臣於此案盡心研鞫。若有失實。甘受誅戮。及覽其奏案。惟恐累及保舉張汧之人。竟為庇護。朕知內閣原擬票簽將保舉張汧官員并未議及。業行折出。又念張汧審結定罪之後。自然發露。因仍用原簽票發。又靳輔下河工程。屯田之案。朕早已察其情弊。特遣佛倫等前往勘議。今所議殊屬偏私。且凡會議之時。科爾坤、佛倫等務執已見。持論好勝。苟非懷挾私情。何以力排衆議。朕亦曾面加誡諭。未見畏悔。如此積弊。愈久愈深。物議沸騰。輿情憤激。以致言官列款叅奏。本應發明其事。以肅官方。因不忍遽行加罪大臣。且用兵之時。有曾効勞績者。故免其發覺。勒德洪、明珠著革去大學士。交與領

侍衛內大臣酌用。李之芳著休致回籍。余國柱著革職。科爾坤著以原品解任。佛倫、熊一瀟等著解任。於河工案內完結。嗣後大小臣工各宜洗滌肺腸。痛改陋習。潔已奉公。勉盡職掌。以副朕寬大矜全。咸與維新之至意。○諭宗人府。自古帝王展親睦族。列爵錫封。原欲選賢建能。旌別淑慝。俾咸知勸勉。慶流奕世。此國家之常經。獎勸之至意也。朕篤念親親。恩禮罔替。年至十五。即行受封。但誼屬本支。必皆飭躬砥行。端良醇謹。益自刻勵。動不踰則。始無忝於宗潢。今親王以下奉恩將軍以上。年至十五。不問賢否。槩予封爵。以致視為故典。罔知激勸。嗣後親王以下奉恩將軍以上。子孫應俟其年至何歲。作何辨其賢否。定其品級等第。始應授封。著議政王、貝勒、大臣及親王以下。奉恩將軍以上。會同確議具奏。○以山東布政使黃元驥不職。革任。優陞原任檢討衛既齊為山東布政使。司布政使

○以正白旗蒙古副都統文達為理藩院右侍郎。仍兼管副都統事。○癸丑。

上詔

皇太后宮問安。○諭大學士等曰。朕躬不逮往時。自

太皇太后聖體違和以來。深覺迷憤。極切憂勞。頃所言者。旋即遺忘。昨一二要事。折票簽付與筆帖式。後竟遺忘。反覆思之。不復記憶。為何事。輾轉不寧。至中夜忽復憶得。乃大驚惕。謂已批發矣。急呼筆帖式問之。奏云。已折票簽。尚未批發。於是心始稍舒。或念所及。數欲降旨。令召其人至。而所念及之事。所思之言。乃皆遺忘。無如之何。此所書敕諭。乃朕所自為。而昨所更易者。今日視之。似有遺漏。爰加增益更訂。雖復更訂。仍覺未盡其意。似有遺缺者。以此之故。因念凡諸奏事。朕見所未到者。亦未可知。凡部院事。皆於國家關係重要。所奏聞之事。大臣庶官。益當敬慎。大學士。學

士。亦宜詳加看閱。爾等將此旨宣示九卿。此所書不必別騰。有所更易。即於此增入。奏聞。○戶部議覆四川巡撫姚締虞疏言。蜀省每歲解京白蠟。道路遼遠。無脚價開銷之項。請嗣後停止解送。令部臣就近採買。又歷年抽稅生鐵。積有一萬一千六百觔。有奇。亦難於起運。請變價充餉。查鐵觔沉重。解送維艱。准其變價報部。至白蠟。乃蜀產土物。應令依例起送。得旨。白蠟仍前解送。恐致累民。著一并免解。○以一等侍衛鄂倫岱為廣東副都統。○山東道御史陸祖修疏言。河工屯田二事。奉有九卿會議之旨。臣見總河靳輔身雖外任。與九卿呼吸甚靈。會議之時。吏部尚書科爾坤。戶部尚書佛倫。工部侍郎傅拉塔。左都御史葛思泰等。不顧公議。左袒河臣。竊思河屯利害。惟直撫于成龍首倡其說。或暫停九卿之議。俟于成龍等到京。一一面奏明確。加之。

乾斷則國是定而邪謀破矣。疏入得旨。河工屯田著暫停會議。俟董訥于成龍來京日。將本內事情。并嚴察會議具奏。○甲寅。

孝康章皇后忌辰。遣官祭。

孝陵。○以兵部尚書梁清標為保和殿大學士。禮部尚書伊桑阿為文華殿大學士。○調刑部尚書廖旦為吏部尚書。陞吏部左侍郎李天馥為工部尚書。○調偏沅巡撫丁思孔為河南巡撫。○丙辰。

上詣

大行太皇太后梓宮前。上食。舉哀。○調兵部尚書鄂爾多為戶部尚書。工部尚書阿蘭泰為兵部尚書。○丁巳。陞戶部左侍郎麻爾圖為禮部尚書。四川陝西總督圖納為刑部尚書。○以吏部左侍郎管右侍郎事張鵬轉補左侍郎。陞內閣學士翁叔元為吏部右侍郎。○內務府總管噶祿故。遣皇長子允禔及大臣二員侍衛二十員。往賜粧蟒緞疋等物。鞍馬。

四匹。銀一千兩。追賜勤恪貽休匾額。○己未。以大學士王熙。左都御史徐乾學為會試正考官。兵部右侍郎成其範。左副都御史鄭重為副考官。○以通政使張吉午。衰老失職。命原官休致。○刑部議覆翰林院疏。叅侍讀學士德格勒。私抹記注。大干法紀。侍講徐元夢與德格勒互相標榜。情罪可惡。應將德格勒擬斬立決。徐元夢擬絞監候。得旨。德格勒著監候。秋後處決。徐元夢著免死。枷號三月。鞭一百。入辛者庫。○庚申。陞總督倉場戶部侍郎蘇赫為工部尚書。○停止九卿詹事科道會推各省學道員缺。○陞湖廣按察使鄭端為江南安徽布政使司布政使。○辛酉。

上詣

大行太皇太后梓宮前。上食。舉哀。○春分。朝日於東郊。遣理藩院尚書阿喇尼行禮。○宗人府題固山貝子星尼。結交匪類。行止乖張。鎮國將軍白壽亦結交匪類。有玷宗室。應請革。



爵。鎮國公吞珠。為人庸懦。應革去公爵。降為鎮國將軍。間散宗室勒爾錦。係軍前獲罪。監禁之人。蒙恩寬釋。理應謹慎守分。反結交匪類。博戲鬪雞。甚屬不合。應交伊兄弟家中拘禁看守。從之。○轉戶部右侍郎賽弼漢為左侍郎。陞副都御史開音布為戶部右侍郎。○壬戌。

上詣

皇太后宮問安。○調刑部尚書張王書為兵部尚書。○旌表江西節婦都昌縣劉氏。星子縣宋氏。臨川縣袁氏。各給銀建坊如例。○厄魯特杜噶爾台吉等遣使進貢。賞賚如例。○癸亥。遣官祭

先農之神。○諭大學士等。近見科道叅疏甚多。果有大貪大惡。何不早為叅奏。有等人聲言糾叅。妄行嚇詐。希圖利己。以致各官不能自安。此等嚇詐之人。許即首告。著吏部都察院通行曉諭。○陞少詹事王封澤為內閣學

士兼禮部侍郎。以杭州副都統洪尼喀為總督倉場。戶部侍郎。○甲子。宗人府議覆親王以下奉恩將軍以上。子年十五。槩予封爵。恐致視為典故。罔知激勸。嗣後應停止此例。俟年至二十。辨其文藝騎射之優者。列名引見。請旨授封。惟親王以下奉恩將軍以上。有薨逝者。即准一子襲爵。不俟歲滿。得旨依議。如人材超卓者。不拘年歲。特予封授。○以左都御史葛思泰為四川陝西總督。陞四川按察使興永朝為偏沅巡撫。○兵部題雲南提督萬正色。鶴慶總兵官王珍。以婪贓侵餉。互叅。請遣官察審。

上命工部左侍郎傅拉塔。禮部右侍郎多奇。前往察審。○阿祿科爾沁多羅郡王色楞。坐酗酒不法。命革爵。○乙丑。

上詣

大行太皇太后梓宮前。上食。舉哀。是日居殯宮之側。○戶部議覆。江寧巡撫田雯疏言。康熙

二十六年分。蘇常等府起運漕糧。因秋禾將熟之時。風雨連綿。見在起運米色青白未純。合先題明。查漕糧關係積貯。應令該撫務將純色之米撥運。得旨。江南漕糧。已經起運。該部仍令易純色米。朦混具題。殊為不合。抵通目。著照該撫所請。察明文倉。○封和碩康親王傑書子扎爾圖。巴爾圖。和碩恭親王常寧子滿篤祜。鎮國將軍德寧子興泰。俱授為三等輔國將軍。輔國將軍德倫子納爾台。授為三等奉國將軍。奉國將軍費揚午子詹木布。授為奉恩將軍。輔國公納墨孫子訥圖。鎮國公劉格子台渾。鎮國公拔喀子法布蘭。俱封為輔國公。○陞廣東雷瓊道程憲為湖南按察使司按察使。○丙寅。

上詣

大行太皇太后梓宮前。行月祭禮。是日回宮。○

丁卯。纂修

玉牒。命宗人府左宗人鎮國公蘇努等為總裁。

官。○宗人府議覆吏科給事中高層雲疏。叅大學士王熙等。以議持服事。尚康親王傑書等跪語。王等坐受。俱屬不合。請下部議。上曰。朕召大臣議事。如時冬。每賜墊坐語。大臣與諸王會議。即行跪語。不合。嗣後凡會議公事。不必向諸王行跪。傑書。王熙等。從寬免議。○吏部題。通政使司右通政員缺。請以太常寺少卿李紹聞擬補。

上命問九卿。又諭大學士等曰。今用一人。外人即曰某大臣薦舉。故用之。或有商議之事。即聲言某大臣稱某官之優。言某官之劣。致躁進之徒。營求奔競。從此而起。凡官之優劣。若不問。何由而知。大臣雖有薦舉。用舍皆出於朕。間用一二人。亦朕所知而用者。若但因大臣薦舉而用之。朕所理者。又何事耶。雖有問九卿舉出之人。亦得者半。而不得者半。此皆倖遇耳。原任尚書佛倫。曾薦學士趙山。原任大學士明珠。曾薦學士齊穡。及學士舜拜。阿

刺彌朕皆知而用之。且屢次擢用並非聽人之言。朕曾以噶爾圖問詹事尹泰。尹泰啓奏後。即肆言於外。伊曾將噶爾圖薦舉。爾等豈不聞乎。至侍讀學士德格勒曾向朕奏云。有人問臣。臣即云宮內門戶亦復不知。後來即將某某優劣混行啓奏。尹泰但粗識幾字。凡事不堪任用。誠微賤小人也。又巡撫張沅亦係九卿薦舉之人。今張沅所行貪穢發覺。其保舉之人亦應議處。原任侍郎塞楞額差審張沅徇私失實。著將塞楞額看守議罪。○陞通政使噶爾圖為都察院左副都御史。○戊辰。原任大學士杜立德。馮溥。以赴謁大行太皇太后梓宮畢。辭歸原籍。上念効力舊臣。命禮部引見。諭之曰。爾等俱暮年歸家。宜加意調攝。命賜茶。各賚帛五表裏。○陞太常寺卿傅感丁為通政使司通政使。○予故原任副都統三等阿達哈哈番洪世祿。祭葬如例。○兵部議覆吏科給事中高層

雲疏。叅正黃旗都統張所知。哭臨坐班。不盡哀禮。應降五級調用。從之。○己巳。

孝昭皇后忌辰。遣官祭。

陵。○以都察院左都御史徐乾學為刑部尚書。○庚午。河道總督靳輔疏。叅漕臣慕天顏等朋謀陷害。阻撓河務。

上諭大學士等曰。凡事俱有是非。應據理直言。今觀有言人之過者。衆皆隨聲附和。以為不善。並不據理辨其是非。近因靳輔被叅。議論其過者甚多。靳輔為總河有年。挑河築隄。漕運並未遲悞。謂之毫無効力。亦屬不可。但其屯田下河之事。雖百喙亦難逃罪。即欲將靳輔置之重刑。亦須留七八年。俟繼用之人。河工告成之日。始可議罪。靳輔將何往耶。凡事有不可令其奏辨者。亦有宜令其奏辨者。語云。人窮則呼天。今若不令靳輔奏辨。則定案矣。靳輔不將情由陳辨。朕前後何所控告耶。且朕曾閱河防一覽。於治河之事洞悉。凡事

皆慮永冬不計目前。此事著九卿一併察議以聞。○陞貴州按察使李之粹為浙江布政使。司布政使。山東濟寧道董安國為四川按察使。司按察使。○予故欽天監治理曆法加工部右侍郎南懷仁祭葬。諡勤敏。○命直隸各省督撫提鎮確查功加人員有武藝優長材品堪用者保題考試分別錄用。其未及保題之格而曾有戰功者亦查明實績以各營千把總錄用。○辛未。

上詣

大行太皇太后梓宮前。上食。舉哀。○遣官祭歷代帝王。○以刑部侍郎薛柱斗衰庸不職令革退。○壬申。

上詣

皇太后宮問安。○調工部左侍郎傅拉塔為刑部右侍郎。○予故護軍統領索諾木祭葬如例。○旌表浙江節婦仁和縣項氏錢塘縣韓氏倪氏烏程縣吳氏鄞縣陳氏烈婦蘭谿縣

孫氏孝子於潛縣謝勛等各給銀建坊如例。○癸酉。轉工部右侍郎伊爾格圖為左侍郎。陞內閣學士齊穡為工部右侍郎。○以鑲黃旗護軍統領佛爾諾為前鋒統領。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十三

大清聖祖合天弘運文武睿哲恭儉寬裕考叡誠  
信中和功德大成仁皇帝實錄卷之一百三十四

監修總裁官光祿大夫太僕寺卿太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十七年戊辰三月甲戌朔吏部引見

平錄卷一百二十四

山東布政使衛既齊

上諭曰爾到地方。但當實意愛民盡心任事。不  
可博取虛名。朕聞州縣火耗止在附近孔道  
嚴行禁革。似乎分文無有。而窮鄉僻壤火耗  
偏重。是徒欲掩飾人耳目也。掩飾之事。斷不  
可行。至地方諸務。皆有成憲。如應行應革之  
事。可申詳該撫奏聞。○以編修馮雲驕修撰  
陸肯堂充日講起居注官。○工部左侍郎監  
修下河孫在豐疏言。前臣與佛倫等會勘河

工時。原議海口應行挑濬。擬有疏稿。後竟不  
以

上聞。雖係佛倫主稿。實靳輔陰謀也。其幕賓陳  
璜。蹟貨無藉。法所不宥。得旨。九卿詹事科道。  
一併察議具奏。○河道總督靳輔疏報中河  
工竣。運道新通。請加高築遙隄。以圖永保。從  
之。○乙亥。陞山西巡撫馬齊為都察院左都  
御史。○陞左副都御史鄭重為刑部右侍郎。  
左通政王承祖為太常寺卿。○以兵部左侍  
郎丹岱為杭州副都統。○巡城御史穆恕等  
題參旗人吳學經等。毆辱職官杜亮采。

平錄卷一百二十四

上曰。吳學經等。凌辱職官。殊為可惡。其家主平  
日不行嚴束。以致奴僕毆辱職官。亦應究擬。  
其後奴僕有如此者。其家主作何處分。著一  
并定例議奏。尋議監生吳世英旗人孫登高。  
平日不行嚴束。家奴應照例將吳世英於出  
仕之日。罰俸兩個月。孫登高鞭五十。嗣後若  
奴僕有犯毆辱官員者。其家主俱照此例治

罪從之。丙子。

上詣

大行太皇太后梓宮前。上食。舉哀。○時鄂羅斯察漢汗遣使費岳多羅等至色稜額地方。期我使至。彼集議定界。

上命領侍衛內大臣索額圖都統公舅舅佟國綱及尚書阿喇尼左都御史馬齊護軍統領馬喇等往主其議。并率八旗前鋒兵二百護軍四百火器營兵二百偕往。又命理藩院侍

平定光緒二十二年

一

郎文達副都統阿毓璽等設站運米至喀爾喀地方接濟大軍。以我軍經行喀爾喀之地。恐驚其衆。差阿喇尼往澤卜尊丹巴胡土克圖處。令曉諭喀爾喀等照常安居貿易。○陞四川建昌道曹熙衡為貴州按察使。司按察使。○陞正黃旗漢軍副都統楊文魁為漢軍都統。○丁丑。清明節。

上詣

大行太皇太后梓宮前致祭。遣官祭

永陵。

福陵。

昭陵。

孝陵。

仁孝皇后。

孝昭皇后陵。○戊寅。以刑部尚書圖納禮部左侍郎席爾達內閣學士趙山吏部右侍郎翁叔元充經筵講官。○陞侍講學士朱都納為內閣學士兼禮部侍郎。太常寺卿王承祖為

平定光緒二十二年

一

都察院左副都御史。○予浙江陣亡杭州協領孔可德祭葬如例。○庚辰。轉兵部右侍郎禪布為左侍郎。陞內閣學士舜拜為兵部右侍郎。○調甘肅巡撫葉穆濟為山西巡撫。○辛巳。

上御乾清門。召大學士學士九卿詹事科道及總督董訥總河靳輔巡撫于成龍原任尚書佛倫熊一蕭原任給事中達奇納趙吉士等入奏河工事宜。靳輔奏曰。臣專管上河。再四

籌度惟有高家堰外再築重隄。水不歸下河。庶有裨於淮揚七州縣。至開濬下河。臣恐有海水倒注之患。

上曰。朕不忍淮揚百姓遭罹水患。故令爾等公同詳議。海水倒注。無有是理。郭琇奏曰。靳輔於上河派民之事甚多。即如派車派驢在在騷動。況屯田之事。明係奪民產業。江南田畝。原有二畝算一畝者。因地勢窪下。坍長不常。若計畝重課。實為累民。

上曰。屯田害民。靳輔縱百口亦不能辨。開海口。乃必然應行之事。爾等但論下河之當挑與否。及重隄之築與不築耳。靳輔奏曰。高家堰修築重隄。將水截住。盡出清口。不令水歸下河。則七州縣被水之田可出。故特題請。即今猶以修築重隄為是。于成龍奏曰。修下河開海口之事。奉特旨而行。今高家堰修築重隄。停開海口。縱上流之水不來。而秋霖暴漲。天長六合等處奔赴之水。洩歸何處。臣意以為

海口仍應開濬。

上諭九卿曰。此事爾等將孰是孰非。及河務作何區畫之處。會同詳加議奏。九卿出。

上顧大學士等曰。河道實屬難知。朕留心已久。深悉情形。九卿各懷私意。畏懼靳輔。不肯定議。朕意且勿發明。若示以朕意。則九卿等必將承望風旨而言矣。此等大事。須至公持議。方有當於理耳。○陞鑲黃旗滿洲副都統朱爾素為護軍統領。○壬午。

上詣

大行太皇太后梓宮前。上食。舉哀。

上御乾清門。召大學士九卿等。入奏河工事宜。工部尚書李天馥奏曰。臣等遵旨問靳輔。于成龍皆堅執前說。與昨日所奏無異。臣等公同酌議。下河當開。重隄宜停止修築。

上諭九卿曰。靳輔舉行屯田之事。因取民餘田。小民實皆嗟怨。此在靳輔當亦無可置辨。靳輔奏曰。向者河道大壞。處處衝決。民田盡被



水淹。臣任總河將決口堵閉。兩旁築隄仰賴皇上如天之福。比年以來。河流故道。無有衝決之患。是以數年水淹之田。盡皆涸出。臣意將民間原納租稅之額田。給與本主。而以餘出之田。作為屯田。抵補河工所用錢糧。因屬吏奉行不善。民怨是實。此處臣無可辦。惟候處分。

上問靳輔曰。海口淤塞。起於何年。靳輔奏曰。據土人云。從明代隆慶年淤塞。至今每海潮來一次。即增一葉厚之沙。故漸致壅塞。

上曰。爾云海潮每至。即增一葉厚之沙。此言甚屬虛妄。凡河內遇海潮來時。水壅逆流。及潮退。則壅積之水。其流甚疾。即微有停蓄之物。亦順流刷去。尚何有沙之存積耶。大抵所開河道。久歷年所。兩岸隄工。為雨水傾塌。則河底漸淤。勢所必至。即如近水地畝。或以傾塌成河。河內或沙灘成地。豈因海潮灌注而然。據爾言開濬海口。海水必將倒合。將來海口

一開。便有明驗。朕記爾今日之言。留為後日之據。又問于成龍曰。減水壩可塞乎。塞減水壩。以開海口。河隄可不衝決乎。于成龍奏曰。不能保其不決。臣於上河實未明曉。焉敢妄對。

上又問于成龍曰。爾曾言崔維雅治河之論可行。果可行乎。于成龍奏曰。崔維雅之論可行。但聞人言如此。臣實未甚明曉。

上諭九卿曰。朕於河務。留心甚久。崔維雅治河書。亦曾細閱。其勢必不能行。即彼所云。自蕭家渡直開至清口。日用夫七萬。期於五旬告成。朕思夫役。安得如許之多。即夫役可得。而飲食柴薪之類。從何運濟。凡立說貴乎持平。要在當理。于成龍謂崔維雅治河之說可行。則於理難通。朕未之信也。又諭九卿曰。屯田害民。朕已洞悉。各省民田。未有不溢於納糧之額數。若以餘田作屯。按畝定額。豈不大擾民乎。屯田不行。無可復議。至下河作何開濬。

重隄應召停築爾等公同詳酌確議具奏。

上顧大學士伊桑阿等曰。于成龍亦未洞悉河務。朕以伊為直隸巡撫。頗優故未深難耳。總之有治人。無治法。只在實心任事。若徒以口舌爭。亦何濟乎。○癸未。

上詣

皇太后宮。問安。○甲申。以光祿寺卿伊圖為甘肅巡撫。○乙酉。九卿等遵旨會議。下河海口宜開。高家堰重隄宜停築。各減水壩俟海口開通之後。酌議緊要者留之。不緊要者塞之。至靳輔等應行議處之事。俟孫在豐慕天顏到京時。問明再議。

上曰。不必等候。董訥慕天顏。孫在豐等身為大臣。凡有所見。即當奏明。乃事前並未題參。於他人參奏之後。始行具陳。且今日之言如此。明日又復如彼。全無定見。可謂大臣乎。今下河海口應行挑濬。其各開壩。俟海口挑成。或留或塞。再行定奪。○刑部等衙門議。覆直隸

巡撫于成龍。原任山西巡撫馬齊。原任左副

都御史開音布。奉差湖廣。審湖北巡撫張汧。借稱前任閩省藩庫虧空。帑銀勒索。屬員胡戴仁等。出銀抵補。又派收鹽商之銀。共九萬餘兩。入已。上。荆南道祖澤深。勒索民人李二楊等銀。共八百餘兩。入已。總督徐國相與張汧同城失察。差往湖廣侍郎塞楞額。審事不實。請一并交部議處。查侍郎塞楞額。差審巡撫張汧。徇情失實。又回奏欺罔。應論斬監候。張汧。祖澤深。藐法受賄。應論絞監候。湖廣總督徐國相。與張汧同城。不行參奏。明係徇庇。應革職。布政使胡戴仁。按察使丁燦。應降二級調用。又查從前保舉張汧之人。有大學士梁清標。尚書熊一瀟。保舉張汧為布政使。戶部侍郎王遵訓。內閣學士盧琦。大理寺寺丞任辰旦。保舉張汧為巡撫。俱應革職。

上曰。塞楞額回奏時。原有審事不實。甘受誅戮之言。張汧。祖澤深。皆係貪官。著依議完結。至

保舉張沂之官俱議革職似無分別。張沂事犯於巡撫任內其保舉為巡撫者俱著革職其保舉為布政使者著從寬免革職降三級留任。徐國相著革職胡戴仁等著降二級調用。諭吏部總河靳輔總漕慕天顏侍郎孫在豐互相訐參靳輔慕天顏不便留任孫在豐亦不便修河伊等員缺應速行更換差遣。○陞驍騎叅領睦成額為正黃旗漢軍副都統。○丙戌陞工部郎中薩穆哈為內閣學士兼禮部侍郎。○調真定總兵官趙弘燦為黃巖總兵官。○以翰林院侍講學士達蘇喀侍讀思格色充日講起居注官。○丁亥。

上詣

大行太皇太后梓宮前上食舉哀。○戊子諭大學士等曰盛京寧古塔沿途驛站往來官員多索車馬鞭撻驛站人役所在多有嗣後如此苦累驛站者管理驛站官即行報部驛站官贍徇情面不報事發並驛站官治罪其下

兵部令定例議奏。○己丑封多羅貝勒昌阿武孫星海為鎮國公。○調福建浙江總督王新命為河道總督。○命戶部左侍郎開音布督理下河。○庚寅。

上詣

皇太后宮問安。○戶部議覆漕運總督慕天顏疏請蠲江南江西歷年帶徵漕項銀米毋庸議得旨康熙十七年以前所欠漕項銀米著盡行蠲免。○以阿祿科爾沁緣事革退多羅郡王色楞子楚依為多羅貝勒。○陞貴州巡撫馬世濟為漕運總督。○以一等侍衛黃海為鑲黃旗滿洲副都統。○戶部議覆原任戶部尚書佛倫疏言河工屯田累民業蒙皇上洞悉永行停止請敕該督撫逐一清查有丈出民間之田悉令給還原主其暫設屯田同知縣丞等官應行裁汰使赴部候補應如所請從之。○辛卯。萬壽節停止朝賀筵宴。○遣官祭

福陵。

昭陵。

孝陵。

仁孝皇后。

孝昭皇后陵○遣官祭真武東嶽城隍之神○

裁湖廣總督缺○陞左僉都御史郭琇為太

常寺卿○癸巳。

上詣

大行太皇太后梓宮前上食舉哀○裁直隸真

定總兵官缺○甲午議政王大臣等議覆左

都御史馬齊疏言差往鄂羅斯大臣請不分

滿漢一體差遣應如所請。

上曰此所議甚是著九卿選舉應遣者奏聞○

陞侍講學士彭孫適為內閣學士兼禮部侍郎

○乙未陞左副都御史徐誥武為戶部右侍

郎○丙申諭內閣今時畧早矣而欽天監奏

四月朔日食凡應行應革之事其令九卿詹

事掌印不掌印科道官集議以聞○陞江西

巡撫王鵬為福建浙江總督○以科爾沁故

和碩卓禮克圖親王杜爾巴之子巴特麻襲

爵○丁酉九卿等議覆河工一案將總河靳

輔擬革職其奉差閱河之尚書佛倫熊一瀟

給事中達奇納趙吉士督理下河之侍郎孫

在豐會勘河工之總督董訥總漕慕天顏俱

擬革職幕賓陳璜革去職銜擬杖流。

上諭大學士等曰凡為臣者懷挾私意互相陷

害自古有之不但漢官蹈此習俗雖滿洲亦

然爾等宜竭誠秉公變此習俗以盡臣職此

案著將靳輔革職佛倫任工部時極其勤勞

凡奉差遣亦能勝任但議此事舛錯殊甚著

留其佐領以原品隨旗行走董訥孫在豐在

翰林時頗優從寬免革職降五級仍以翰林

官用熊一瀟極其庸劣慕天顏居官不善俱

著革職趙吉士行止不端亦著革職達奇納

著降五級隨旗行走陳璜著革去職銜解京

監候○以故一等阿思哈尼哈番寶珠嗣子

保同襲職○陞吏部郎中邁塗為光祿寺卿  
○陞江西驛鹽道線一信為湖北按察使司  
按察使○戊戌。

上詣

大行太皇太后梓宮前行三月致祭禮○己亥。  
增差督捕理事官張鵬翮兵科給事中陳世  
倬往鄂羅斯會議○策試天下貢士范光陽  
等於

太和門前。制曰。朕惟自古帝王膺圖御宇。惠  
育黎元。必吏治澄清。而後民生安遂。用致運  
際邗隆。天人交應。理數符會。畢協休徵。至於  
海隅日出。罔不率俾。樂利阜成。彌宇宙焉。朕  
荷

天眷命。續嗣丕基。夙夜孜孜。勤求治理。每念民  
生之休戚。由於吏治之貪廉。激揚之典。數舉。  
其清操卓越者。時行拔擢。凡司民牧。其果蒸  
蒸丕變與。夫興事省成。因名責實。課吏之良  
規也。請託之習未除。則情面難破。喜怒之私

未化。則毀譽易徇。何以使殿最惟明。黜陟允  
當。抑正已率屬。大法則小廉也。崇獎潔清。  
以風厲有位。尚有可講求者與。道之大原出  
於天。而弘之者人。物必有理。而理以數顯。數  
以理神。天人相與之際。窮理極數。厥有與旨。  
可得而詳之與。善言天者。必有驗於人。極先  
天之數。而盡天地萬物之變化。該帝王聖賢  
之事業。殊途一致。其旨安在。古昔盛時。聲教  
遐訖。重譯來賓。獻琛貢賁。實裨民

上諭從前詣

兩宮請安。皆於起居注記檔。今詣

寧壽宮請安。朕因不忍過

慈寧宮。故從啓祥門行走。但此係宮禁之地。外官無由得知。此後每次請安。著令太監傳諭敦住。仍令起居注官記載。其不忍由隆宗門行走之故。亦令諭侍郎庫勒納知之。○吏部議覆。理藩院郎中員缺。舊例將本衙門員外郎咨送題補。與各部院事例不一。嗣後應停其咨送。與各部衙門蒙古員外郎。內閣蒙古侍讀。論俸陞補。其理藩院員外。亦照各部員外。一體論俸陞轉。從之。○辛丑。

上詣

皇太后宮問安。○

上御乾清宮。讀卷官大學士伊桑阿等。選擇殿試貢士策十卷。依例進呈。

上以次披閱。改擬第二名沈廷文為第一名。第五名查嗣韓為第二名。第四名張豫章為第三名。又以凌紹震試策。兼譯國書。准附二甲。諭大學士等曰。榜發之後。爾等將各試卷。一

并繳入。朕萬幾之暇。尚欲一一省覽。○壬寅。上詣

皇太后宮問安。○傳臚。賜殿試貢士沈廷文等一百四十六人進士及第。出身有差。○陞宗人府府丞李廷松為都察院左副都御史。○調江寧巡撫田雯為貴州巡撫。○陞直隸巡道胡獻徵為湖北布政使司布政使。○停止河道總督坐名題補河員。○諭兵部尚書張玉書。刑部尚書圖納。左都御史馬齊曰。前李光地。曾奏德格勒。徐元夢。所學甚博。作文甚優。漢官亦不能及。德格勒奏李光地。用為總督提督。令同伊母赴任。始肯就職。若用於別任。必不來也。朕因其互相陳奏。欲辨虛實。從前將德格勒親加考試。其文見存。今李光地已來京。爾等可將德格勒試卷。宣示九卿。并以問李光地。於是張玉書等傳集九卿。公閱德格勒試卷。奏稱德格勒之文。詞語粗鄙。毫無文氣。詰問李光地。亦自甘妄奏之罪。請將

李光地下部議處。

上曰。李光地本應治罪。念其任學士時。凡議事不委順從人。臺灣之役。人皆謂不可取。李光地獨言可取。此其所長。除此事外。別無妄奏之處。姑從寬免。令仍為學士。○兵部遵諭議覆。差往盛京寧古塔馳驛人員。有騷擾驛站者。照直隸各省騷擾驛站例處分。其管驛站官員。不將騷擾情由。申文報部者。照徇庇例降二級調用。從之。○兵部題。湖廣總督業經裁缺。所有督標官弁兵丁。俱應裁去。其見任副將。遊擊。守備等員。應赴部另補。其裁兵內。有仍願為兵者。准於通省各營中。查明革退老弱逃亡等項兵缺。連行頂補。有願為民者。交地方官安插。毋使失所。從之。○甘肅巡撫伊圖陞辭。

上諭之曰。陝西省寧靖日久。去歲又蠲免錢糧。想民生更為樂業。爾到地方。當潔已率屬。恪守成例。若多一事紛更。則民受一事之累。有

甚不便於民者。乃可議更。○喀爾喀車臣汗伊爾登阿喇卜坦故遣官致祭。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十四



大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十五

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十七年戊辰夏四月癸卯朔享

— 帝系卷一百二十五 —

太廟遣內大臣舅舅佟國維行禮○日食○甲

辰九卿等覆奏總河靳輔開濬中河果否可

永通漕運應交新任總河再行查明詳議具

奏

上曰中河糧船今年可行則每年亦可行此自

然之理也但靳輔已經革職新河臣尚未到

任見在河員或視河工與已無涉不盡心力

以致運艘阻滯亦未可定其即令學士凱音

布侍衛馬武等前往看閱○以原任尚書佛

倫為內務府總管○轉工部右侍郎徐廷璽

為左侍郎陞左副都御史王承祖為工部右

侍郎○戶部議覆一等公內大臣都統舅舅

佟國綱疏言臣族本係滿洲請改為滿洲旗

下應如所請將舅舅佟國綱等改入滿洲冊

籍但鑲黃旗舅舅佟國綱等一佐領及正藍

旗同族之十二佐領鑲紅旗同族之三佐領

下所有文武官員及監生壯丁為數甚衆不

便一并更改仍留漢軍旗下從之○戶部議

覆原任內大臣和碩額駙華善等疏言臣族

本係滿洲請改為滿洲旗下應如所請將華

善等同族之人准改入滿洲冊籍惟華善正

白旗下五佐領所屬文武官員及監生壯丁

甚多不便一并更改仍留漢軍旗下從之○

乙巳

上詣

大行太皇太后梓宮前行百日致祭禮畢回宮

○丙午

上詣

皇太后宮問安○吏部議覆左都御史馬齊疏言九卿等會推漢官差遣鄂羅斯議定邊界御史陸祖修狂妄不謹聲言抱病不能前往御史楊燦柔懦不及自稱年老查陸祖修楊燦俱託故規避應照例革職從之○丁未以是月初七日奉移

大行太皇太后梓宮至

暫安奉殿

上詣

梓宮前讀文致祭○陞江蘇布政使宋榮為江西巡撫○陞奉天府尹董秉忠為宗人府府丞○戊申

上詣

大行太皇太后梓宮前上食舉哀是日居殯宮之側○以刑部右侍郎傅拉塔為江南江西總督○調湖北布政使胡獻徵為江蘇布政使司布政使○予故原任都察院左副都御

史徐元珙祭葬如例○烏朱穆泰多羅額爾德尼貝勒鄂齊爾圖扎魯特多羅達爾漢貝勒巴達里故俱遣官致祭○己酉

大行太皇太后梓宮發引

上不勝哀慟親隨扶送步行三里餘方乘馬每昇校更換時必下馬旁跪哭不停聲遙見享殿即下馬步隨哭至

享殿奉安後仍哀慟不止是日駐蹕通州西五

里橋○庚戌雨

大行太皇太后梓宮未啓行

上詣

梓宮前上食舉哀畢回行宮○辛亥

大行太皇太后梓宮啓行是日駐蹕三河縣秀

屯莊○壬子雨

大行太皇太后梓宮未啓行

上詣

梓宮前上食舉哀畢回行宮○癸丑

大行太皇太后梓宮啓行是日駐蹕薊州新屯

莊之南○授一甲進士沈廷文。為翰林院修撰。查嗣韓。張豫章。為編修○陞通政使傅感丁。為都察院左副都御史○陞左僉都御史洪之傑。為江蘇巡撫○陞浙江按察使佟國佐。為湖北布政使司布政使○甲寅。大行太皇太后梓宮啓行。是日。駐蹕薊州嶺上莊之北○理藩院題。據達賴喇嘛疏稱。皇上撫視人民。中外一體。聞厄魯特喀爾喀。兩國相殘。即遣人齎敕諭和。今遵

聖諭。遣卜克岡喇嘛去矣。仍祈皇上睿鑒。或再頒敕諭。另遣人前往。令其無致相殘。

上乃遣內閣學士拜禮喇嘛。阿齊圖。緯爾濟。往諭噶爾丹○陞內閣學士阿喇彌。為刑部右侍郎○乙卯。

大行太皇太后梓宮啓行。是日。駐蹕薊州鮎頭莊之南○丙辰。

大行太皇太后梓宮啓行。將近

陵寢。

上隨步行。至

享殿。是日。

上駐蹕新城內○陞福建糧道楊鳳起。為河南按察使司按察使○雲南臨鎮總兵官馬山。以疾乞休。允之○丁巳。

上謁

孝陵。行禮。舉哀畢。回行宮○戊午。

上詣

大行太皇太后梓宮前。上食。舉哀○吏部尚書廖昇。以老乞休。命原官解任○朝鮮國王李焞。遣陪臣洪萬鍾等。進

大行太皇太后香。賞賚如例○己未。

孝端文皇后忌辰。遣官祭

昭陵○以十九日奉安

大行太皇太后梓宮。

上詣

梓宮前。讀文致祭。舉哀○陞內閣侍讀學士胡

什巴為內閣學士兼禮部侍郎○庚申。

上率扈從王以下文武各官詣

大行太皇太后梓宮前行禮舉哀奉移

梓宮於

暫安奉殿院內

享殿。

上隨步行。哭不停聲。親視奉安後哀慟良久。始回行宮。是日諸王大臣奏曰。本朝之制。奉安後。即離喪次。伏乞明日。

皇上循例移居。諭曰。舊例固然。但慎終大事。朕不親視封掩。遽行回京可乎。爾等既諄切奏請。朕當暫離此處。移駐湯泉。俟朕親閱封掩畢。始回京。○內閣學士凱音布。侍衛馬武等。奉差看閱中河回京。繪圖進呈。召大學士。學士九卿。詹事科道等。入行宮。諭之曰。前于成龍奏云。靳輔開中河。無所裨益。甚為累民。河道已為靳輔大壞矣。今凱音布等往勘中河。奏云中河內。商賈船行不絕。若塞支河之口。

則駱馬湖之水。滙流中河。水勢既大。漕艘可通。今數年以來。河道未嘗衝決。漕艘亦未至有悞。若謂靳輔治河。全無裨益。微獨靳輔不服。朕亦不愜於心矣。于成龍在直隸。愛民緝盜。居官頗優。但懷挾私。讐阻撓河務。殊為不合。朕非欲起用靳輔。祇以河務所關甚大耳。今九卿已將靳輔議罪。皆言其治河無益。若王新命聞之。亦順從于成龍之說。以靳輔所治不善。大壞河道。將原修之處盡行更改。是伊等各懷私忿。遂致貽悞河工。可乎。且黃河自宿遷以下。衝決猶可修治。若宿遷而上。或致泛濫。則為害甚大。前旨令馬齊往鄂羅斯。今河工緊要。停其前往。著即同張玉書。圖納往閱河工。務將毛城舖。高家堰等地方。徧閱就靳輔所修之處。其甚善而斷不可改者。有幾。不善而應更改者。有幾。詳悉商酌。其漢軍漢人官員。尚應添遣。著開列具奏。又凱音布等奏稱。中河所行漕艘。慕天顏勒令退回。支

河之口。不許閉塞。慕天顏如此阻撓。深屬可惡。爾等速回京。將慕天顏提挈夾訊。問誰為唆使。則實情畢露。此等之人。不重加懲治。不可也。朕素不食言。亦不為異日無驗之語。向者岳州洞庭湖進剿兵船。衆議謂宜撤回。朕獨以為不可。卒致成功。靳輔以丈出民間餘地。作為屯田。及阻抑開濬下河。其罪誠不可逭。至有言黃河沙底漸高。此斷不可信。譬之盆內貯水。遇風尚且溢。出使黃河沙底果高。一有風濤。其有不漫溢橫流。決隄潰岸者乎。

○辛酉奉安

大行太皇太后梓宮於

寶座。五鼓時。

上先詣

享殿內

梓宮之側。哀慟不已。屆奉安吉時。裕親王福全

等再三跪請。始移

梓宮。奉安

寶座畢。

上行三跪九叩禮。復痛哭良久。王大臣再三勸請。始出

殿。

上駐蹕新城內。是日。以奉安禮成。遣官告祭

孝陵。

仁孝皇后。

孝昭皇后陵。○諭內大臣曰。看守

暫安奉殿。極為緊要。露陳之器甚多。新派人員。

恐未諳練。雖令其看守。朕未釋於懷。

孝陵章京。本不敢輕用。因其看守年久。熟諳舊

規。且係內地。爾等就此章京內。親加選擇。以

其半。調往

暫安奉殿看守。○壬戌。

上駐蹕遵化州湯泉。○以原任江蘇按察使卞

永譽為浙江按察使。司按察使。○以順天府

府尹衛執蒲為通政使。司通政使。○甲子。

上詣

暫安奉殿內。恭視

大行太皇太后梓宮封掩畢。奠酒。慟哭良久。始出。是日。駐蹕薊州孫家莊西。扈從王大臣等奏曰。

太皇太后梓宮。今已奉安。喪禮告成。自古人君居喪。止二十七日。

皇上極其純孝。已閱四月矣。請即日遵例除髮。得旨。俟明日。至薊州除髮。○乙丑。

上駐蹕薊州城內。○是日。

上始除髮。○丙寅。

上駐蹕三河縣之西。○丁卯。

上駐蹕通州河之東。○戊辰。

上回宮。○庚午。陞太僕寺少卿金世鑑為奉天

府府尹。○增差兵部侍郎成其範。工部侍郎

徐廷璽。往閱河工。

五月。壬申朔。

上幸瀛臺。○兵部尚書張玉書。刑部尚書圖納。

左都御史馬齊。兵部侍郎成其範。工部侍郎

徐廷璽。以奉差看河。奏請訓旨。

上曰。爾等至彼處。從公詳看。是曰是非。曰非。據實具奏。顧張玉書曰。凡是非可否。爾當秉公陳奏。不可如熊一瀟。托疾推諉。又諭圖納等曰。朕聽政二十餘年。閱歷世務。已多甚。慄慄危懼。前者。凡事視以為易。自逆賊變亂之後。覺事多難處。每遇事。必慎重圖維。詳細商榷。而後定。凡所行事。起居注官。無不記注。歷年所奏河道變遷圖形。朕俱留內。時時看閱。朕素知河道最難料理。從古治河之法。朕自十四歲。即反覆詳考。人皆云。河道壞於靳輔。放水淹沒民田。朕意不然。靳輔果能收放河水。則其人亦非平常。必能成功。何云河道自彼而壞耶。宿遷高家堰等處。運河。朕所深知。他處未經親到。未能明晰。書云。無稽之言勿聽。弗詢之謀勿庸。爾等皆國家大臣。此係國家公務。爾等宜殫心盡力。若果有異常大水。隄岸衝決。亦非爾等所能保。爾等但據見在。從

公詳閱可耳。前佛倫往勘回奏殊多錯悞。今已處分。爾等前往會同總河王新命。將毛城舖高家堰諸處。從公詳看。三分之一中。得其一。二。便可遣人將情形大畧。先行陳奏。至公同看畢之後。再行具疏。其毛城舖減水壩無益。爾等將海口。亦行看閱。下河自有專遣之人。爾等但觀其大畧。不必繕入疏內。○九卿等覆奏。臣等遵旨。勘問慕天顏阻撓河工之處。據慕天顏供稱。于成龍曾寄伊書言。河工之事。不應順靳輔而言。故將靳輔另行參奏。以此問于成龍。亦云。寄書是實。至挑濬中河。無益得之傳聞。並無指實。自甘妄奏之罪。

上曰。于成龍巡撫直隸。居官甚優。仍著赴任。慕天顏居官不善。素行乖戾。仍著羈禁。俟看河大臣回時。定奪。凡會議政事。必詳察合理。不可怠忽輕易。朕每遇事之大者。即與內閣大臣商酌而後定。凡授大僚。無不如此。至吏部陞補官員。俱有一定之例。或有不肖之徒。賄

求不已。此皆習俗不良。今當痛改前轍。秉公而行。朕聽政年久。於人之善惡。事之是非。無有不知。其事屬微渺。每多寬恕。若果詳究過愆。當無人可免罪者。且朕所理之事。悉載記注。日後必有可徵驗者。當三逆變亂之時。亦有徬徨畏懼者。惟朕堅意主持。大小事宜。必詳審處斷。始得平定。今爾諸臣。凡事應各抒已見。一意秉公。不可碌碌徇人。且徇人何益。孰優孰劣。朕豈有不知者乎。○旌表福建節

婦閩縣伍氏烈婦。侯官縣周氏烈女。甌寧縣施氏等。各給銀建坊如例。○癸酉。吏部議覆都察院左都御史馬齊疏言。學士凱音布。侍衛馬武等。前閱中河回京時。奉旨召集九卿面問河工事宜。有大理寺卿邊聲廷。不能奏對。託詞耳蔽。應照才力不及。例降二級調用。從之。

上諭領侍衛內大臣索額圖等曰。羅刹侵我邊境。交戰於黑龍松花。呼馬爾諸江。據我屬所



居尼布潮雅克薩地方。收納我逃人根特木爾等。及我兵築城黑龍江。兩次進剿雅克薩。攻圍其城。此從事羅刹之原委也。其黑龍江之地。最為扼要。由黑龍江而下。可至松花江。由松花江而下。可至嫩江。南行可通庫爾喀。江及烏喇。寧古塔。席北。科爾沁。索倫。打虎兒。諸處。若向黑龍江口。可達於海。又恒滾牛滿等江。及淨溪里江口。俱合流於黑龍江。環江左右。均係我屬鄂羅斯。春。奇勒爾。畢喇爾等人民。及赫哲。飛牙喀所居之地。若不盡取之。邊民終不獲安。朕以為尼布潮雅克薩黑龍江上下。及通此江之一河一溪。皆我所屬之地。不可少棄之於鄂羅斯。我之逃人根特木爾等三佐領。及續逃一二人。悉應向彼索還。如鄂羅斯遵諭而行。即歸彼逃人。及我大兵所俘獲招撫者。與之畫定疆界。准其通使貿易。否則爾等即還。不便更與彼議和矣。是日索額圖等啓行。尋以喀爾喀。尼魯特。交相爭戰。

報至。

上遣侍衛夸塞。關保。往追索額圖等。令其退駐汎界地方。將遲滯緣由。遣人曉諭鄂羅斯使臣。於是索額圖等。以前情作書。令前鋒叅領索羅希等。持送彼處。鄂羅斯使臣答書。稱已遣人由尼布潮赴京。索羅希等。以書奏覽。上乃召索額圖等還。○甲戌。

仁孝皇后忌辰。遣官祭

陵。○乙亥。大學士等。以禮部具題山西省烈婦

荆氏等。照例旌表一疏。請旨。

上曰。夫死而殉。日者數禁之矣。今見京師及諸省殉死者尚衆。人命至重大。而死者。惻然之事也。夫修短壽夭。當聽其自然。何為自殞其身耶。不寧惟是。輕生從死。反常之事也。若更從而旌異之。則死亡者益衆矣。其何益焉。此後夫死而殉者。當已其旌表。王以下至於細民。婦人從死之事。當永嚴禁之。若有必欲從死者。告於部。及該管官具以聞。以俟裁

定議政王。貝勒大臣九卿詹事科道官會同確議奏焉。○丙子。旌表山西節婦絳州陳氏。蔚州魏氏。平定州楊氏。猗氏縣荆氏。裴氏。安邑縣周氏。祁縣程氏。王氏。烈婦猗氏縣荆氏。代州王氏。孝子蒲州李斗星等。各給銀建坊如例。○丁丑。以鑲黃旗護軍統領朱爾素為散秩大臣。陞前鋒叅領穆圖為鑲黃旗護軍統領。○旌表江南節婦桐城縣孫氏。霍邱縣裴氏。宿州張氏。烈婦泗州趙氏。宿州田氏。蔣氏。烈女歙縣吳氏。石埭縣桂氏。壽州夏氏。潁州劉氏。和州陳氏等。各給銀建坊如例。○戊寅。陞光祿寺卿閻興邦為順天府府尹。○己卯。吏部尚書陳廷敬。刑部尚書徐乾學。各以疾乞休。命原官解任。○辛巳。陞太僕寺卿陳汝器為大理寺卿。○以功加署都督僉事張英奇為廣東高雷廉總兵官。○刑部議覆都統紀爾他布等遵旨往喜峯口冷口外帶領官兵。至石柱子溝緝拏藏匿盜賊。賊首馬四

王被追情極自縊擒獲夏三等十四人。應俱擬斬立決。其占奪民人妻女財物查明給還原主。得旨依議。內崔二等著從寬免死。發遣黑龍江。○壬午。諭兵部。嗣後駐防協領佐領缺出。停止該將軍坐名擬補。爾部選取外省應補之人。交與該旗。同在京應補人員引見補授。○諭翰林院。選拔庶常。原以作養人才。今科進士特加簡閱。取范光陽邱昇。吳世燾。沈宗敬。湯右曾。姚士轟。劉灝。張尚瑗。王懿。張復史申。彭殿元。郝士鈞。李本涵。孫致彌。陳緯。梁佩蘭。凌紹震。寶克勤。陳大章。彭始搏。施震銓。李斯義。顏光燾。鄒士璵。林文英。葉濟。鄭梁。潘宗洛。宋朝楠。王翰。徐日暄。范光宗。高人龍等。三十四員。俱著改為庶吉士。并修撰沈廷文。編修查嗣韓。張豫章。分別滿漢書教習。○癸未。上御瀛臺勤政殿。江蘇巡撫洪之傑。陞辭。上曰。地方大吏。以安靜為主。江南所取火耗。聞

雖不重。爾須洗心滌慮。一除積弊。凡事不可過於刻薄。然亦不宜罷軟。至於糾叅屬員。尤當至公無私。若舉劾未當。便大負朕簡用之意。○調兵部尚書阿蘭泰。為吏部尚書。禮部尚書張士甄。為吏部尚書。工部尚書李天馥。為刑部尚書。○甲申。遣官祭關聖帝君。○乙酉。

上詣

皇太后宮問安。○以原任降調侍郎金鼎為光祿寺卿。○以功加署都督僉事王洪仁為雲南臨元。激江總兵官。○丁亥。以正紅旗都統紀爾他布。為兵部尚書。○戊子。

上幸暢春園。酉刻。回瀛臺。○己丑。兵部議覆。原任浙江福建總督王新命疏言。閩省各營官兵。前調防臺灣。澎湖所遺員缺。請於本省見任官升中。酌量調補。應如所請。從之。○甲午。夏至。祭

地於

方澤。

上親詣行禮。○

上往謁

暫安奉殿。命皇長子允禔隨駕。是日啓行。駐蹕

三河夏店。○乙未。

上駐蹕薊州馬伸橋。○丙申。

駕至淋河莊。距

陵十里許。

上哀不能禁。沿途哭泣。詣

暫安奉殿。行三跪九叩禮。奠酒。痛哭良久。出殿

後乘馬行。猶涕泣不止。又謁

孝陵。行三跪九叩禮。奠酒。舉哀。次至

仁孝皇后。

孝昭皇后陵。奠酒。舉哀。是日。駐蹕新城內。○丁

酉。

上復詣

暫安奉殿。痛哭良久。始出。是日。回鑾。駐蹕三河

縣。○戊戌。

上駐蹕通州城東關○旌表陝西節婦威寧縣劉氏臨潼縣李氏等各給銀建坊如例○己亥。

上駐蹕通州之新格莊○庚子。

上回宮詣

皇太后宮問安○辛丑。調鑲白旗蒙古副都統郭布為滿洲副都統

六月壬寅朔。陞大理寺少卿王維珍為太僕寺卿○以左副都御史噶爾圖為四川巡撫

○癸卯。命禮部左侍郎管翰林院掌院學士事庫勒納。內閣學士彭孫通教習庶吉士○

直隸巡撫于成龍疏言。順天府屬之通州。蘆溝橋黃村沙河。舊設有捕盜同知四員。但地方遼濶。難以週徧。今奉裁真定總兵員缺。其鎮標官兵。見議裁并。請分撥千總一員。把總一員。馬步兵一百名。歸捕盜同知管轄。以供指使。從之○甲辰。

上奉

皇太后幸暢春園○以翰林院侍講尹秦。充日講起居注官○荊州將軍噶爾漢。安徽巡撫楊素蘊等各疏報楚省裁兵。夏包子等鼓譟搶劫。聚眾作亂。巡撫柯永昇投井身故。賊等竊據武昌城。

上命都統瓦岱為振武將軍。率兵往討之○丁未。陞通政使噶世圖為都察院左副都御史○調河南巡撫丁思孔為湖廣巡撫。以順天府府尹閻興邦為河南巡撫○荊州將軍噶爾漢疏言。夏包子等倡亂。我師戰船未備。糧餉不敷。未能刻期進兵。

上命調回噶爾漢為正紅旗蒙古都統。以正黃旗滿洲都統侯巴渾德為荊州將軍。陞正黃旗副都統喀岱為滿洲都統○襄陽總兵官許盛以赴任道經武昌。適遇兵變。身陷賊圍。中流矢。乘間遁回九江。安徽巡撫楊素蘊以聞。命登州總兵官蔡元為湖廣襄陽總兵官○刑部題。侍衛常關保不能嚴束家奴。於放

鷹處縱僕星格禮等打死民人張守禮應降級調用。

上曰。凡差遣人員。朕必嚴加誡諭。不許生事擾民。常關保既不能管束家奴。以致濫斃人命。回時又不行奏明。顯係縱僕妄行。殊為可惡。著嚴拏。交兵刑二部。會同一并審擬具奏。尋議侍衛常關保應革職。從之。○庚戌。免江西宜春等三縣康熙二十六年分旱災額賦有差。○辛亥。敕諭都統瓦岱曰。茲以湖廣督標

裁兵鼓譟。特命爾瓦岱為振武將軍。馳驛前往江寧。爾到江寧。帶領江寧滿兵。京口漢軍兵丁。京口鎮標水師營兵。江南江西督標火器兵丁。戰船酌量帶領。水陸並進。星速前往湖廣。與荊州將軍巴渾德。江寧將軍博齊副都統倭賀商酌而行。務須平定亂兵。撫安黎庶。毋得遲延。致令滋蔓。仍宜剿撫並用。嚴加偵探。毋得疎虞。大兵一到。抗拒不順者。戮之。有先被賊脅從。即時迎降者。俱免誅戮。有能

擒殺賊渠。投誠者。分別陞賞。須嚴禁兵將申明紀律。經過地方。毋得騷擾百姓。歸順良民。加意撫綏。以副朕定亂救民之意。其行間將領功績及重罪。俱察實紀明彙奏。各官有犯小過者。當即處分。至於驍騎校以下。無論大小罪過。俱商酌徑行處治。務期速平。鼓譟兵丁。安定地方。爾受茲重任。宜殫竭心力。早奏捷功。欽哉。○諭吏部。刑部所奏之事。皆關係人命。甚為緊要。嗣後刑部滿員外缺出。爾部除擬正陪引見外。將伊本旗見任員外盡令引見。朕自行選用。○諭大學士等。近來科道官無條奏者。建言乃科道專職。祇在不存私心耳。可傳諭科道官有條陳事。赴暢春園面奏。○甲寅。陞左僉都御史李迥為順天府府尹。○陞護軍叅領尚圖為鑲白旗蒙古副都統。叅領科爾代為正紅旗漢軍副都統。○予故副都統賽喀納祭葬如例。○乙卯。陞吏部郎中朱善為通政使司通政使。○丙辰。以功

加左都督曹應鵠為山東登州總兵官○戊午調正白旗漢軍副都統睦成額為滿洲副都統○庚申尚書阿喇尼疏報噶爾丹率兵掠厄爾德尼沼居民直抵喀喇卓爾渾之地距澤卜尊丹巴所居僅一日程澤卜尊丹巴攜土謝圖汗妻與子媳及喇嘛班第等夜遁喀爾喀通國各棄其廬帳器物馬駝牛羊紛紛南竄晝夜不絕土謝圖汗不知存亡

上諭曰喀爾喀與厄魯特互相攻戰我邊塞地

方宜加防守翁牛特巴林克西克騰四子部落等旗共派兵二千五百名暫駐蘇尼特一帶汎地防守○辛酉

上詣

皇太后宮問安○壬戌以故一等精奇尼哈番諾爾布之子索諾木西喇布一等阿思哈尼哈番鄧志琳之子鄧其璋二等阿思哈尼哈番穆理渾之子薩爾禪三等阿思哈尼哈番莫新之子巴進泰各襲職○甲子

上詣

皇太后宮問安○丁卯轉吏部右侍郎翁叔元為左侍郎以總督倉場戶部右侍郎張集為吏部右侍郎○戊辰以原任大學士熊賜履為禮部尚書○陞吏部左侍郎翁叔元為工部尚書○以原任都察院左都御史徐元文補原官○予故漢軍都統吳熙一等精奇尼哈番諾爾布各祭葬如例○己巳予故蒙古都統俄托渾祭葬如例○庚午

上詣

皇太后宮問安○吏部題本月二十四日臣等遵奉諭旨湖廣藩臬等官關係緊要其布政使缺令御史于養志補授按察使缺令御史李鈞補授并令馳驛速往查見任湖廣布政使佟國佐按察使線一信應請撤回赴部另補從之

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百三十五

實錄卷一百三十五

三十七

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百三十六

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十七年戊辰秋七月辛未朔享

實錄卷一百三十六

一

太廟遣領侍衛內大臣伯費揚古行禮○壬申

澤卜尊丹巴胡土克圖遣使告急奏曰去年

噶爾丹率兵三萬餘分道而來誘我扎薩克

圖汗等叛去我土謝圖汗領兵追而執之以

歸後噶爾丹之弟多爾濟扎卜等領兵來掠

右翼班第戴青台吉卜圖克森色爾丹等人

畜而去土謝圖汗追殺多爾濟扎卜收回人

口噶爾丹又領兵三路而來土謝圖汗及西

海羅卜臧滾布領兵前至噶爾丹所駐之地



遇達賴喇嘛使者所遣人宣示

皇上諭和之旨。遂退駐楚克獨斯諾爾地方。今噶爾丹自抗愛山後。掠取左右翼台吉等。至忒木爾地方。土謝圖汗之子噶爾旦台吉與戰。大敗。僅以身免。又聞丹津溫卜等率兵來取厄爾德尼沼之地。其地距我地僅二日程。仰祈速賜救援。又理藩院題設站侍郎文達報稱喀爾喀人衆屯聚於蘇尼特汎界之地。內有台吉數人。率其屬裔來投。守邊將弁禁之。彼言我地被兵。不得已始進邊汎。

皇上聞之。亦必憐憫。逐之不去。澤卜尊丹巴亦率衆來至近邊駐劄。距設站之地僅半日程。上諭領侍衛內大臣舅舅佟國維等曰。見今窘迫來奔之喀爾喀等。應否令其出我邊汎。或將彼汎哨稍展。就伊等所居之地。另為設哨防守。此事關係重大。其令議政王大臣詳議。尋議喀爾喀人等窘迫來奔。不便即令出邊。若久留之。又恐牧地殘毀。姑俟一月以內。探

得實音將來奔之喀爾喀作何措置。再行確議。從之。○湖廣提督徐治都疏報。六月十四

日。官兵於應城縣地方。遇夏包子賊衆二千餘人。我師奮力攻擊。陣斬偽副將二員。守備三員。把總一員。殺獲甚衆。隨駐師應城縣內。嗣於十七八等日。賊首夏包子率賊兵萬餘圍攻應城。我師內外夾擊。大敗之。賊奔德安。請救調南陽總兵出師安陸。以資防守。得旨嘉獎。下部議叙。○癸酉。陞內閣學士石文桂

為總督倉場。戶部右侍郎○以輔國公宗人府右宗人化善為正藍旗蒙古都統。○甲戌。侍讀海三代往澤卜尊丹巴處。途遇厄魯特因攜噶爾丹奏疏歸。疏曰。澤卜尊丹巴。土謝圖汗達達賴喇嘛之教。不尊禮西勒圖。我告之以禮法。歸好為是。而彼反以為非。竟興兵而來。我於此仗達達賴喇嘛之靈來毀其居。彼兩人者。不為衆所許。殆無所往。即往亦不納也。噶爾丹又囑海三代轉奏澤卜尊丹巴來

投

天朝。或拒而不納。或擒以付之。奏入。

上命議政王大臣等集議。尋議我

皇上俯視天下萬國為一體。其職貢之國。凡有

困迫來投者。無不受而養之。澤下尊丹巴。以

敗奔入我汎界。豈有擒而畀之之理。此等情

節。應撰敕遣使往諭。

上遣一等侍衛阿南達喇嘛商南多爾濟。戶部

郎中西拉。工部員外郎穆朱瑚齋。敕往諭。敕

曰。朕統御寓內。胞與為懷。願率土共享太平。

無戰爭離散之苦。彼此協和。各得其所。前聞

爾厄魯特與喀爾喀交惡興兵。朕思爾等向

皆和好。恐致滅亡。以達賴喇嘛愛育衆生。令

同遣使諭和。達賴喇嘛欣然遣齊緝克他賴

堪布。朕亦遣阿齊圖綽爾濟學士拜里。前往

諭和。又前此遣爾貢使陶賴哈什哈等。齋敕

馳驛前去。未知到否。亦曾以此敕諭喀爾喀

土謝圖汗矣。今海三代歸奏。始知汝至喀爾

喀之地。海三代非朕所遣。乃奉差於鄂羅斯

議好定界。尚書阿喇尼所遣。其言不甚明悉。

且與爾未經面見。爾厄魯特喀爾喀俱遵行

達賴喇嘛道法。達賴喇嘛向來利濟衆生。欲

使同歸和睦。不致敗亡。是以皆遣人往諭。道

路遙遠。汝等交惡之故。所聞未明。茲特遣使

齋敕。詰問情由。其仍遵朕旨。與達賴喇嘛之

教議和。或別有行止。亦明悉具本。交此使來

奏。○命安親王岳樂。簡親王雅布。各率包衣

兵五百名。赴蘇尼特汎界駐防。○轉吏部右

侍郎張集。為左侍郎。陞內閣學士王封滌。為

吏部右侍郎。○禮部議覆。江南道御史梅鋞

疏言。

大行太皇太后違豫以來。

皇上步禱

郊壇。親調藥餌。身不解帶。自不交睫者。歷數十

日。於居喪時。則饘粥不入。席地露寢。屏去服

御者。又數十日。迨

梓宮啟行。

皇上徒步悲號。朝夕

行殿。哭奠如初。種種孝思。臣愚不能述其萬一。竊念會典一書。乃聖子神孫所法守。四海臣民所仰遵。聞會典見在纂輯。請敕編纂之臣。取史官注記。與諸臣章奏。詳慎登載。以光至治。應如所請。詳查起居日記。及王大臣等本章。凡關係

皇上孝思懿行。應載會典者。編入會典。應載政治典訓者。編入典訓。至恭上

大行太皇太后尊謚。及升祔

太廟

奉先殿典禮。亦應一併載入。則大禮始終俱備。昭垂萬世無窮矣。得旨依議。○丙子。裁真定鎮標遊擊一員。守備二員。把總一員。兵九百十二名。暫行分撥各營。遇有老弱逃亡事故者。停其頂補。○旌表山東歷城縣節婦楊氏。給銀建坊如例。○丁丑。

上詣

皇太后宮問安。○巴林王納木達克台吉阿拉卜坦等奏報喀爾喀兵。敗於厄魯特土謝圖汗。澤卜尊丹巴遁走。其屬下台吉等入內奔竄。來投者甚多。

上命領侍衛內大臣津進。郎中帕海侍讀學士馬拉。速赴烏朱穆秦巴林。科爾沁各駐汛界之地。偵探情形。又命侍衛關係傳諭侍郎文達。令其往會阿霸哈納班第戴青車陵戴青公同派發兩戴青之兵。於澤卜尊丹巴所居之地。設哨防護。其諭噶爾丹救及海三代攜來噶爾丹奏疏。俱令與澤卜尊丹巴視之。巴林王所奏。令與我邊汛駐劄大臣等視之。○四川巡撫噶爾圖陛辭。

上曰。爾在部院衙門辦事已久。何待指示。到任後。唯當潔已而行。前任杭愛姚締虞居官皆善。爾但照其行事可也。姚締虞曾奏四川縉紳遷居別省者甚多。應令伊等各歸原籍。則

地方富庶。於貧民亦有裨益。此事爾其次第行之。四川荒土甚多。爾當募民開墾。又聞彼處軍糧。往往不應時速給。爾到任。必須給發以時。毋致遲悞。噶爾圖奏曰。四川錢糧止四萬。因各省協濟不至。以致有悞。

上曰。運送軍餉。皆有定限。一到即行給散。何致遲悞。○戊寅。禮部題。四川巡撫姚締虞。病故。照例應給半葬致祭。得旨。姚締虞。居官素優。著給全葬。○己卯。陞內閣侍讀學士江有良。翰林院侍讀學士董納。為內閣學士。兼禮部侍郎。○壬午。

上奉

皇太后。自暢春園回宮。○兵部議覆。禮部侍郎多奇。主部侍郎傅拉塔疏言。臣等奉差審雲南提督萬正色。虛冒兵餉。貪取賄賂。是實。應按律論死。總兵官王珍。誣拏皮破玉等。以良為盜。例應發邊衛充軍。因熟審減等革職杖徒。准收贖。應如所奏。得旨。萬正色。前陷賊時。

抗志不屈。行間血戰。勞績甚多。從寬免死。著革去提督。留伊所得拜他喇布勒哈番。王珍著革職。○甲申。喀爾喀洪俄爾戴青台吉疏報。噶爾丹來掠達賴台吉。至枯倫貝爾地方。上諭和碩裕親王福全等曰。厄魯特已至枯倫。貝爾地方。去我汎界。僅七八日程。宜豫為備禦。其令科爾沁土謝圖親王沙津達爾漢親王班第。派所屬十旗兵一萬。量委才能都統副都統。叅領等管領。其盛京將軍副都統等。令派所部兵一千。副都統穆泰率往科爾沁地方。於所指之地備禦。尚書紀爾他布都統巴海。護軍統領佟寶等。自京城往科爾沁地方。傳諭土謝圖親王沙津等。主台吉量留數人於家。餘悉令前往。又叅領巴查爾。侍讀學士馬接速。會同科爾沁王等。點派出征官兵。○科爾沁一等台吉阿喇納故。遣官致祭。○乙酉。中元節。遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后陵○以禮部尚書熊賜履左都御史徐元文內閣學士董誥充經筵講官○以翰林院編修吳涵張希良充日講起居注官○江南江西總督傅拉塔陸辭。

上曰爾此去當潔已行事。前任江南總督諸人無過于成龍者。爾如其所行可矣。戰船關係軍務速行修理。毋致遲延。有妨於用。前者提督楊捷奏給發兵丁口糧。不曾給與。兵亂之際。行役為勞。當使得所。爾至彼時。須善撫恤之。○福建提督靖海侯施琅入京陛見。上召入乾清宮。諭之曰。爾前為內大臣。十有三年。當時因爾閩人。尚有輕爾者。唯朕深知爾。待爾甚厚。其後三逆反叛。虐我赤子。旋經次

第平定。唯有海寇游魂。潛據臺灣。尚為閩害。欲除此寇。非爾不可。爰斷自朕衷。特加擢用。爾果能竭力盡心。不負任使。舉六十年難靖之寇。殄滅無餘。誠爾之功也。邇來或有言爾恃功驕傲者。朕亦頗聞之。今爾來京。又有言當留爾勿遣者。朕思寇亂之際。尚用爾勿疑。況天下已平。反疑爾勿遣耶。今命爾復任。自此宜益加敬慎。以保功名。從來功高者往往不克保全。始終皆由未能敬慎之故。爾其勉之。更須和輯兵民。使地方安靜。以副朕愛兵恤民。并保全功臣至意。施琅奏曰。臣年力已衰。封疆重大。恐精神不堪。

上曰。為將尚智。不尚力。朕用爾以智耳。豈在手足之力乎。○丙戌。

上巡幸塞外。命皇長子允禔。皇三子允祉。隨駕啟行時。傳諭曰。今天時暑熱。大臣侍衛有體肥及老疾者。不必急行。可於陰涼之地。暫為止息。晚至行在。勿致勞苦。是日。

上駐蹕河漕莊○添設看守

孝陵千總二員把總四員兵四百名○吏部議覆四川陝西總督葛思泰疏言陝省黃龍山地方舊設捕盜同知一員後經裁缺歸西安清軍撫民二廳兼理查黃龍山係西延二府孔道山深人少盜賊易滋請復設捕盜同知專司捕務實資彈壓又理事同知係管理旗下事務嗣後請以滿員補授應如所請從之○丁亥

上駐蹕石匣城內○戊子

上出古北口駐蹕鵠鶉溝○己丑

上駐蹕八間房○庚寅

上駐蹕察罕郭爾地方○辛卯

上駐蹕新房○壬辰

上駐蹕喀爾必哈哈達地方是峯舊名納哈里狀如浮圖高百餘丈

上率文武諸臣以次仰射

上連發數矢皆過峯頂侍衛桑革納拉善二人

射至其巔餘不能至

上更其名為喀爾必哈哈達○癸巳

上駐蹕海拉蘇台敕漢二品台吉額林陳來朝○敕諭湖廣巡撫丁思孔曰楚省督標裁兵煽亂無知兵民或被迫脅或為招誘一時倉猝入其夥黨官兵一到若不分別加誅朕心深為不忍應速行開示此等亂兵原係食糧營卒各有室家均屬朝廷赤子乃為一二倡亂奸徒煽惑自新無路情屬可憫今特開一面以廣好生如有悔罪投歸即行免罪仍准安插務令得所果能將倡亂賊首擒獻軍前或殺賊來歸者仍與論功叙錄毋得心懷疑畏自失事機致罹大法爾奉敕諭即刊刻告示通行曉諭務令翻然悔悟爭先投首早平鼓譟夥黨奠安民生副朕寬大矜全至意○設站侍郎文達疏報七月十六日阿霸哈納班第戴青及車陵戴青等欽遵諭旨派兵一千五百名以二百防守澤卜尊丹巴以一千

三百往戍瀚海前後。又車卜登額爾克台吉索諾楚揚寨桑願以二十人前往。蹤踪設哨。報聞。○南陽總兵官史孔華疏報七月初十日。臣率師自雲夢起行。進討夏逆。賊據漢陽府城。我師破門直入。賊遁走武昌。十八日。恢復漢陽。得旨嘉獎。下部議叙。○湖廣提督徐治都疏報。七月十五日。逆賊夏包子親率賊衆駕舟至鯉魚漈地方。近岸駐扎。臣隨遣叅將鄭興等奮力剿殺。鎗礮並發。賊船盡遭焚毀。餘賊來犯大營者。官兵擊走之。陣斬及溺水死者四千餘人。生擒偽總兵一員。副將叅將。都司。千總。把總。二十餘員。偽兵三百餘人。賊首夏包子僅以身免。得旨嘉獎。下部議叙。○徐治都又疏報。七月十八日。武昌城內偽總兵胡耀乾。及偽文武官弁等獻城投降。差人齎獻偽軍師妖僧大原首級。并大元帥偽印一顆。總督巡撫叅將關防三顆。口稱逆首夏包子戰敗之後。帶領餘賊數百。逃回武昌。

在城偽官弁等閉門不納。夏賊復行逃竄。其妻子家口俱已收繫城內。臣於十九日。帶領官兵入武昌府。安撫軍民。又二十二日。振武將軍瓦岱移文內。稱我師至武昌縣。賊衆聞風逃遁。我師追剿至黃州府。偽總兵趙得等於二十日獻城投降。有黃岡縣生員宜畏生等擒獻賊首夏包子。磔斬軍前。武昌黃州等府俱已恢復。謹密疏奏聞。得旨嘉獎。下部議叙。○甲午。

上駐蹕塔爾虎地方○

上諭內閣。頃驛站筆帖式等所報。我兵近抵武昌。賊渠以三人遁去。武昌城中民羈賊渠妻子。獻城降。由此觀之。城中賊皆已降。餘賊畧盡。地方提督總兵綠旗官兵。自可追擒撫輯。江寧京口荊州諸路兵。仍赴武昌。則轉輸供應。民力維艱。滿洲漢軍。及調集綠旗兵。皆令各歸本汛。又遇難官民之妻子。或恐株累。可令其地巡撫。察明奏聞。○丙申。



上駐蹕鄂爾哲圖阿爾賓敖拉地方○先是喀爾喀厄魯特構兵。

上命追還赴鄂羅斯邊界會議官弁。令索額圖等率兵回駐汎界。至是調回尚書阿喇尼。諭之曰。索額圖等所帶官兵駐彼無用。著撤回。其索額圖。佟國綱。馬喇。仍前留駐○丁酉。教漢巴爾當台吉來朝○以故二等精奇尼哈番鄂特渾之子鄂都。二等阿思哈尼哈番雅岱之子僧保。各襲職○戊戌。

上駐蹕烏爾圖布拉克地方。蘇尼特喀喇沁。敖漢。王。貝勒。台吉。塔布囊等來朝○己亥。

上駐蹕海拉蘇台○庚子。

上駐蹕湯泉。科爾沁水圖郡王額濟音來朝。

八月。辛丑朔。盛京戶部侍郎莽色。以老乞休。允之○陞直隸三屯營副將林葵為雲南鶴慶總兵官○壬寅。諭大學士等。徐治都標兵。屢次大戰。受傷陣亡者必多。且係各營鎮調集之人。若待回汛察核。又需日月。今應遣戶

兵二部賢能司官。會同提督巡撫。即於武昌給賞。則窮兵得沾實惠。而日後無浮冒缺劣。遲延時日之弊矣。其令司官殷達禮。溫保。馳驛速往○癸卯。

上駐蹕巴顏溝地方。是日。

上行圍射。殪一虎○蘇尼特。敖漢。王。台吉等來朝○甲辰。

上駐蹕博哲博格圖爾地方。教漢喀爾喀。翁牛特。王。貝勒。台吉等來朝○吏部題。原任枝江縣知縣趙嘉星。係論絞監候之犯。於楚兵變動時脅逼不從。奔投前來。願伏國法。請令巡撫察明再議。

上曰。趙嘉星雖係重犯。兵變之日。脅逼不從。奔投願受國法。情屬可矜。其免之○丙午。以內閣學士趙山為盛京戶部侍郎○以鑲藍旗副都統諾穆圖為雲南提督○丁未。遣大學士梁清標祭

先師孔子○湖廣糧儲道葉映榴遺疏言康

熙二十七年五月初九日。臣署理湖北布政使印務。忽於本月二十二日。督標裁兵夏包子倡亂。開城造反。刦奪撫臣敕印。分兵圍臣衙署。百計脅從。臣幼讀詩書。粗知節義。雖白刃當前。豈肯喪恥苟生。臣此時微服匿影。或可倖免。以圖後效。伏念臣守土之官也。城存與存。城亡與亡。義所當然。臣於本月二十六日。朝服向闕。九叩謝恩。畢隨陞臣衙門公座。罵賊自刎。勉盡一死。以報國恩。

上覽畢。集諸王大臣等諭曰。凡地方官城存與存。城亡與亡者。乃人臣之分。近者武昌兵亂。葉映榴守義不屈。罵賊自刎。朕閱其遺奏。五內傷悼。王大臣等其共聽之。因令展讀奏疏。聞者莫不感泣。隨諭吏禮二部曰。葉映榴值裁兵鼓譟。抗志不屈。捐生殉難。忠節可嘉。今覽遺疏。情詞慘烈。朕心深為惻然。不忍披閱。應從優賜卹。以表忠貞。○戊申。祭大社。

大稷遣吏部尚書阿蘭泰行禮。○上駐蹕崑崙都崙布拉克地方。○已酉。太宗文皇帝忌辰。遣官祭。

昭陵。○理藩院題。據奉差侍衛阿南達等咨稱。職等於七月二十七日。行至克魯倫河迤北。喀喇烏蘇之地。探知噶爾丹因達賴喇嘛使人至。由克魯倫河託爾會之地。退回疾行。又聞噶爾丹向達賴喇嘛使人言。我若與土謝圖汗和。則吾弟多爾濟扎卜之命。其誰償之。我盡力征討。五六年必滅喀爾喀。必擒澤卜尊丹巴也。今噶爾丹退回。既過土喇。往索土謝圖汗。職當相機追往。於交戰之前。以敕書授之。

上諭尚書阿喇尼。撤料爾沁十旗所調之兵。其綽諾果爾河所駐之兵。應於阿南達未到之前。暫留防汎。○陞江西糧道吳廷貴為江西按察使。司按察使。○先是武昌兵變。湖廣總督筆帖式克錫類。探知賊有犯荊州之意。自

城溝內遁出。報荊州將軍噶爾漢令豫為防守。乃馳歸京師。

上以克錫類捐棄妻子。遁歸報信甚嘉。矜之。令兵部議叙。至是議克錫類應遇陞缺。即行擢用。從之。○庚戌。

上駐蹕烏爾哈爾地方。○辛亥。

太祖高皇帝忌辰。遣官祭

福陵。○科爾沁土默特奈曼阿祿科爾沁克西克騰。王貝子。台吉等來朝。○癸丑。

上諭理藩院尚書阿喇尼曰。聞萬齊忒貧困。實甚。應賑濟米糧。且賜以銀兩。買牲畜養庶有裨於生理。拜察地方有米五百石。并發白金千兩。令侍讀學生喀拉等持往量給之。○是日。

上駐蹕伊瑪圖地方。○陞江南安徽按察使多弘安。為江西布政使司布政使。○甲寅。賜隨圍管八旗察哈爾兵各官弁等。緞足銀布有差。○萬齊忒多羅郡王巴扎爾來朝。○乙卯。

上駐蹕色爾白格里昂阿地方。○阿霸璘。阿霸哈納。奈曼。科爾沁。王。貝子。台吉等來朝。○陞光祿寺卿邁塗為內閣學士兼禮部侍郎。○兵部尚書張玉書。刑部尚書圖納。左都御史馬齊等疏言。臣等欽奉

上諭。勘閱黃河水勢。兩岸出水頗高。河身漸次刷深。數年以來。雖遇大水。未經出岸。河身淤墊之說。甚屬虛妄。其海口兩岸寬二三里。黃水汎溜入海。並無阻滯。至黃河南岸減水各閘壩。見在雖不過水。但從前俱酌量形勢。建立以防異漲。俱無庸更易。北岸朱家堂等減水壩前。河臣靳輔。因修中河。有拆毀者。亦有閉塞者。應無庸議。其王家營西減水壩。向未過水。且在仲家閘下流。相應仍留。朱家堂等壩。既經閉塞。應將北岸之大谷山減水閘壩。并鎮口閘。照舊仍留。其減水閘壩之引河。既無常流之水。必致淤塞。除已經挑成引河者。不議外。應將未挑引河者。停止挑濬。至白洋

河之便民閘地勢視歸仁隄較高八九尺。見在之水俱可由歸仁隄五堡減水壩宣洩。則便民閘引河亦應停止挑濬。其高家堰等處有減水壩六座。內因武家墩高良澗等壩所減之水太甚。今移設於茆家園等高阜之處。則流入高郵寶應等湖之水較前差少。應將所移之壩仍留。清尸流入運河之水。一由太平閘。一由七里閘。兩道分行。水勢平緩。甚便漕輓。又使運口去黃稍遠。亦無倒灌之虞。此修建之處甚善。無庸更改。至洪澤湖所洩之水。由高郵寶應邵伯等湖流入運河。關係運道。應將高郵寶應等處所有減水閘壩照舊仍留。其微山湖荆山口。入裏運河之水。由貓兒窩馬莊集萬家莊等三座減水壩宣洩。入駱馬湖。仍應存留。至於中河寬八九丈至十餘丈不等。深五六尺至一丈四五尺不等。若從中河安流以濟舟楫。免黃河一百八十里之險事屬甚便。但中河逼近黃河不便挑寬。

而裏運河及駱馬湖之水俱入北河。河窄難以容納。勘閱蕭家渡楊家莊新莊口三處有黃河衝決入海舊河形。應交與河臣量建減水壩三座。水小之時勿致漫流。水大之時即行減洩。其河形稍有淺窄之處亦另行酌量挑濬。至駱馬湖進黃河之口應照靳輔原議建減水壩二座。今年水勢甚太。俟水落之時令河臣驗明建造。支河口亦應照靳輔原議開塞。於鄰近處建板閘一座。令隨時啟閉。仲家閘出黃河之口太直。如遇黃水泛漲必致倒灌。應稍向東南斜挑。於口西下埭以避黃流。庶免黃河倒灌。至中河既經挑濬。其宿遷縣北攔馬河減洩黃水壩三座。不便令更入中河。應將此三壩閉塞。又駱馬湖減水壩三座。內二座所減之水雖注入中河。但今中河建立閘壩減水。相應將此二壩仍留其一座。在遙隄外。從舊河形入海。而出水之口逼近遙隄。亦應交與河臣幫修隄根。保護遙隄。無

致他虞。至於運河內永安隄。兩面受水。勢甚危險。又歸仁隄五堡減水壩。被水衝壞。并黃運兩河被刷坍塌之處。俱一併交與河臣修理堅固。得旨。九卿詹事科道會議具奏。○丙辰。翁牛特克西克騰貝勒。台吉等來朝。○丁巳。

上駐蹕森濟圖和洛。○戊午。

上駐蹕烏闌哈達地方。○阿霸哈納多羅貝勒等來朝。○庚申。

上駐蹕格爾齊老地方。○扎魯特阿祿科爾沁克西克騰巴林科爾沁高齊忒貝勒。台吉等來朝。○辛酉。陞督捕理事官單璧為光祿寺卿。○盛京禮部侍郎席蘭泰。以老疾乞休。允之。○予四川陣亡佐領拖爾碧祭葬如例。○予故漢軍都統雷繼宗祭葬如例。○調福建福寧總兵官康調元為河南河北總兵官。陞陝西中衛副將許靖國為福建福寧總兵官。○壬戌。

上駐蹕烏喇岱和洛。○癸亥。喀爾喀洪俄爾戴青台吉等率其屬來朝。

上諭曰。爾等喀爾喀與厄魯特世世進貢。朕心寵眷從無偏庇。一體優待。恩賚有加。今聞喀爾喀厄魯特互相結怨。亟遣使臣令其和睦。使臣未至。而喀爾喀敗遁。悉至哨探地方。居牧。朕一體加恩。今亂尚未定。故留之未遣。爾母達賴達熙納聞朕大兵往尼布潮地方預備餵糧牛羊以待。朕甚嘉之。爾先衆人報厄魯特橫肆情形。又先衆人請安進貢。尤為可嘉。諭畢。

上取所帶珊瑚數珠賜之。以示優眷。○賜扈從諸王內大臣侍衛八旗文武官員兵丁及教漢翁牛特土默特喀爾喀扎魯特阿霸亥巴林諸王貝勒貝子公台吉塔布囊等宴。○是日。

上駐蹕烏里雅蘇台達巴漢地方。○甲子。  
上駐蹕烏里雅蘇台。○丙寅。

上駐蹕烏喇岱和洛○丁卯。

上駐蹕巴隆桑古斯台地方○設站侍郎文達侍衛阿南達疏報。土謝圖汗與噶爾丹於八月初三四等日。相遇於鄂羅會諾爾之地。鏖戰三日。厄魯特兵夜襲善巴額爾克戴青之營破之。喀爾喀屬下諸台吉星散。土謝圖汗力弱。乃越瀚海奔至澤卜尊丹巴所。

上諭領侍衛內大臣舅舅佟國維領侍衛內大臣伯費揚古內大臣明珠尚書阿喇尼等曰。今喀爾喀厄魯特交惡作亂。境上急宜防守。其令見隨八旗驍騎兵丁及下五旗護軍前鋒。以其半往駐張家口外形勢之地。以聽調遣。兩蘇尼特四子部落三旗派兵二千。以郡王薩穆扎額駙將之。貝勒博木博等副之。喀爾喀達爾漢親王毛明安三吳喇忒五旗派兵二千。以達爾漢親王諾內將之。於四旗扎薩克內選賢能善於約束者一人。又於三旗協理台吉內每旗派出一人副之。鄂爾多斯

旗分派兵二千。以貝勒松阿喇布將之。貝勒古魯西希布台吉阿爾賽等副之。此所撥兵俱令環我邊汛。駐備形勢之地。再令歸化城兩旗備兵一千。都統阿拉納副都統阿第等將之。於彼兩旗撥人材雄健善於約束之員。即令屯駐歸化城內。以備緊急調遣。○陞通政使朱善為盛京禮部侍郎。○陞陝西潼商道高夢說為安徽按察使。司按察使。○陞叅領張朝午為鑲藍旗漢軍副都統。○戊辰秋分。

月於西郊。遣禮部尚書麻爾圖行禮。○

上駐蹕噶海圖昂阿地方○護軍統領杭奇故遣大臣一員侍衛十員往奠茶酒。賜銀五百兩○已巳。

上駐蹕克勒烏里雅蘇台

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百三十六

大清聖祖合天弘運文武睿哲恭儉寬裕孝敬誠

信中和功德大成仁皇帝實錄卷之一百三十七

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十七年戊辰九月庚午朔

上駐蹕愛里昂阿地方○時澤卜尊丹巴胡土

克圖遣使報稱噶爾丹分兵三路沿途剽掠

約會於我邊哨愛必汗喀喇鄂博之地侍郎

文達以聞

上諭尚書阿喇尼等曰喀爾喀所告之言雖未

審虛實而我邊塞不可不為之防禦應派京

師八旗護軍每佐領七名驍騎每佐領二名

前鋒二百名火器營兵一千子母礮八門限

五日內起程再令大同宣府總兵官鮑敬藍



理。各選精兵一千。親率而來。我軍俱應在歸化城駐備。此係備兵。不用將軍印。每翼置都統一員。右翼著公蘇努率之。左翼著公化善率之。即以蘇努為統帥。左翼副都統邁圖。那泰查木揚。揚岱。右翼副都統希禪。阿爾法。牛尼有達爾泰。令一併前往。○雲南貴州總督范承勳疏言。楚省兵譁。滇南訛言四起。標兵郭之盈。密首營兵張豚子等。欲謀倡亂。旋擒獲叛首十三人。審實正法。得旨據奏營兵結黨欲謀譁。該督即行擒獲審明正法。消弭未形。安靖地方。深為可嘉。其出首人等。各加賞賚。以示鼓勵。○辛未。

上駐蹕穆祿喀喇沁昂阿地方。○壬申。諭兵部。前者侍郎文達奏言。噶爾丹分兵三路。追土謝圖汗。將近我汎界。朕以邊疆事關重大。故頒諭旨。派京師大兵以備之。今聞噶爾丹於我朝所遣使臣。待之有加禮。殊為恭順。且又聞其遣使與我阿齊圖。拜里等。偕來請安。應

將京城大兵暫且停其起程。仍令各為預備候旨。大同宣府總兵官之兵。亦暫停起行。令其候旨。行在所有之兵。每佐領派護軍二名。前鋒派二百名。火器營兵全派。令赴安親王軍前。其存留官兵。揀選肥壯馬匹。給發前去之兵。將青城運來之米。計口授之。此去之兵。著都統諾敏。彭春。護軍統領托倫惠蘭。副都統康喀拉。尚圖。酌量派發。章京統率前往。○癸酉。

上駐蹕克勒和洛。○陞光祿寺卿單壁為通政使司通政使。○乙亥。

上駐蹕西爾哈和洛。○丙子。科爾沁。巴林。喀喇沁。烏朱穆泰。扎魯特。克西克騰。王。貝子。公。台吉等。來朝。○丁丑。先是。巴林。烏朱穆泰。蒿齊忒。克西克騰。科爾沁。阿霸哈納。蘇尼特。阿霸垓。扎魯特。歸化城。土默特之各旗。蒙古王。台吉等。節次奏報。喀爾喀戴青台吉等。共二十八人。各率所屬人眾。入邊請降。奉旨。令來降

之喀爾喀准於汎界以內遊牧。至是土謝圖汗與其弟西地西里巴圖爾台吉率左右兩翼台吉等又澤卜尊丹巴胡土克圖亦率其弟子等偕入汎界乞降。沿邊一帶阿霸哈納諸台吉皆願從之內附。理藩院以聞。下議政王大臣集議。尋議厄魯特喀爾喀向來歸化職貢有年。今交惡相攻。喀爾喀國破土謝圖汗澤卜尊丹巴胡土克圖等誠心請降。應受而養之。俾其得所。即令尚書阿喇尼前往汎界面見澤卜尊丹巴胡土克圖。土謝圖汗等備宣諭旨。從之。○己卯。雲南巡撫石琳疏言滇省鶴慶劍川等處。於本年五月十七十九二十等日地震。得旨著該撫速發銀米賑濟災民。○命宋儒張載十七世孫張守先為五經博士。世襲。○陞翰林院侍讀學士達蘇喀為光祿寺卿。○庚辰。

上駐蹕克勒和洛。○辛巳。

上駐蹕布魯里昂阿地方。○壬午。

上駐蹕烏爾格蘇台。○癸未。以翰林院掌院學士李光地為武會試正考官。侍講學士朱臬為副考官。○甲申。

上駐蹕博洛和屯。○巴林一等台吉納木詹來朝。○噶爾丹遣使進貢請安并乞照常貿易。下議政王大臣集議。尋議噶爾丹許其始終誠心敬

上之意。又虔恭貢獻。請准其貿易。即應遣使往諭。但目今喀爾喀俱奔入我汎界。

皇上已令尚書阿喇尼往議安插。俾令得所。應俟阿喇尼前往汎界查明後作何遣使齎敕往諭噶爾丹之處另行奏請。從之。○乙酉。

上駐蹕喇門嘉澤噶山北。○陞成都副將劉廷傑為雲南曲尋武備總兵官。○丙戌。

上駐蹕捕塔海噶山。○丁亥。

上駐蹕恩格木噶山。○吏部議覆偏沅巡撫興永朝疏言楚省舊設驛道一員駐劄武昌管理全省驛務。但湖南湖北道里遼遠。以湖北

之道遙制湖南事多貽誤請改湖南驛站事務歸併湖南糧道兼理應如所請從之○

上諭大學士等曰佐領伊庫等所送黑龍江官

莊壯丁若至其地已過耕種之時則無所得

食矣可遣戶部司官一員往察之果逾耕種

之期無食者量與之粟以資贍養○戊子

上進古北口駐蹕南天門之東○巳丑

上駐蹕密雲縣界內石嶺○庚寅

上駐蹕三家店○以廣東布政使柴望年老廢

事褫職○辛卯

上回宮詣

皇太后宮問安○遣官祭

歷代帝王○遣官祭城隍之神○壬辰吏部

題殉難原任湖廣糧儲道葉映榴請加贈通

政使司通政使廕一子入監讀書得旨葉映

榴應予旌表著贈工部右侍郎餘依議○癸

巳吏部尚書阿蘭泰兵部尚書紀爾他布工

部尚書蘇赫奏湖廣地方遼濶統制兵馬應

復設總督於地方有益報可○命臺灣文職

員缺准該撫於閩省見任官內揀選調補○

甲午

上詣

皇太后宮問安○陞鑲白旗副都統郭布為漢

軍都統○先是戶部覆直隸巡撫于成龍疏

言直隸賦額刊刻由單不肖官吏指稱紙板

工費用一派十民受其困應請停止查各省

風土不一應並敕各省巡撫詳議具題到日

再議至是各省巡撫題覆由單款目與賦役

全書無異應照直隸一體停其刊刻從之○

乙未

上幸暢春園○丙申

孝慈高皇后忌辰遣官祭

福陵○以監察御史于三賢為雲南布政使司

布政使○廣東巡撫朱弘祚條奏粵省鹽政

一查從前食商掣鹽納餉等項上下大小衙

門皆有公費官役分派取用此乃正課之外

如出私派者請嚴行禁革。一埠商定例三年一換。倘商人內有公平交易。地方相安者。應令永遠承充。其欠課及作奸犯科者。即行驅逐。另募充補。一各州縣銷引。設有定額。如東莞。增城等縣。逼近海洋。無地非鹽。小民就便取食。官引難銷。其餘州縣戶口繁多。或有官引不敷之處。請酌量增減。又私廢埠商課餉。派徵田畝。有累居民。請仍令招商行運。一粵省舊駐尚逆。黨棍未靖。或冒名旗下。或投托見任。謀充客商。踞地為害。請敕查冒名旗人。及投托見任文武各官。佔奪民利者。嚴加處分。一粵省地方遼濶。易於行私。艱於巡緝。如虎門港口。惠州浮橋等處。皆為要津。請專委佐貳廉幹之員。駐守盤查。一粵省行鹽原有生熟二引。熟鹽出歸德等場。生鹽產淡水等場。民間嗜好不一。有食生鹽者。有食熟鹽者。自尚逆在粵時。以生熟鹽引。限令三七配搭。派往鹽埠行銷。民間多有不便。請嗣後隨商

掣運。隨民買食。不拘定額。以利商民。一掣鹽之地。多一次盤查。即多一次冗費。如佛山距省城。不過三十里。省城掣定之鹽。行至佛山。應免其復行秤掣。一粵省鹽價。奸商多任意增加。今各項陋弊。俱令禁絕。商人雜耗既少。鹽價自宜少減。請酌水陸運費之多寡。以定鹽價之低昂。遠者以一分二釐為準。近者以七釐為準。如遇陰雨。量加一二釐。商民兩便。其奸商攬和沙土等弊。一併嚴禁。得旨。本內事情。俱照該撫所題行。○丁酉。以烏朱穆泰故多羅貝勒鄂齊爾圖弟博木布襲爵。○工部尚書蘇赫奏曰。臣等遵旨會議。往看河工。大臣因中河狹隘。恐水大不能容蓄。欲於中河立三閘以減洩。又問靳輔據云。於二十里之間。應修小閘及涵洞。臣等請

皇上親臨河上。指示修築。不但於漕運生民有益。亦可折服衆論。

上曰。看河諸臣。欲修三閘。靳輔欲於二三十里

之間。修小閘及涵洞。所言雖異其意皆同。俟臨閱河工時定奪。○以監察御史張建績為廣東布政使司布政使。○戊戌。陞湖廣巡撫丁思孔為湖廣總督。○吏部議陝西巡撫布雅努於承審叅革陝西按察使索爾遜案內。有伊家人李二等。向索爾遜詐銀。布雅努失於覺察。又承審此案。並未令兩司會審。而其題疏內。謊稱會審。應照溺職例革職。從之。○刑部等衙門遵旨會勘革職陝西按察使索爾遜於承審叅革知縣王延齡等案。得枉法贓銀共一百六十兩。應按律論絞。從之。冬。十月。庚子朔。享

太廟。

上親詣行禮。○遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后陵。○頒康熙二十八年時憲曆。○諭領侍衛內大臣舅舅佟國維等安親王岳樂軍及諾敏。彭春等所率之軍。今漸寒冷。馬或疲瘦。且軍士乘暑而往。恐冬衣未備。應將是軍撤回。又侍衛阿南達去日已久。馬匹糗糧或至窘乏。尚書阿喇尼。侍郎文達等俱在汎界。其令阿喇尼等作速酌量備辦馬匹糗糧。往迎阿南達。毋致遲悞。○辛丑。刑部等衙門會議原任漕運總督慕天顏。阻撓河工。應杖一百。徒三年。不准折贖。直隸巡撫于成龍。陳奏失實。應削去太子少保。降二級調用。得旨。于成龍削去宮保銜。從寬免降調。慕天顏。從前造船有効力之處。亦從寬免罪。○壬寅。皇太后聖壽節。遵

懿旨。免行禮。停止筵宴。○以禮部尚書麻爾圖充經筵講官。○九卿等議覆。兵部尚書張玉

書刑部尚書圖納左都御史馬齊等疏言臣等公閱河工請將原任河道總督靳輔修築之閘壩引河隄埽及建造挑濬工程有應留應止閉塞增添之處又黃運兩河有受衝被刷應修築者一併交與河臣修理堅固以仰副

皇上軫念運道民生至意應如所請得旨攔馬河洩黃水之壩應否閉塞著河道總督詳看議奏○癸卯策試天下武舉於太和門前○以翰林院侍講顧儀充日講起居注官○調安徽巡撫楊素蘊為湖廣巡撫陞山西按察使薩弼圖為陝西巡撫○琉球國中山王尚貞以蒙恩准陪臣子弟入監讀書遣使入謝并貢方物宴賚如例○甲辰

上幸瀛臺御黃幄閱天下中式武舉馬步射技勇○盛京刑部侍郎阿禮瑚坐誣良為盜革職○乙巳

上幸瀛臺御黃幄閱天下中式武舉馬步射技

勇○尚書阿喇尼等疏報臣等於九月二十九日至喀爾喀問土謝圖汗澤卜尊丹巴曰汝等入汎界而居之意何也今又將何往告曰我等為厄魯特所敗奔進汎界永歸聖主乞救餘生作何安插一惟

上裁又曰我等敗遁盡棄部落牲畜而來雖少有所攜難以自存伏祈

聖上俯賜弘恩臣等遂令土謝圖汗澤卜尊丹巴等將彼從降台吉等名字及喇嘛班第部落人口數目查送計開見在偕來台吉三十餘人喇嘛班第六百餘人戶二千人口二萬在後未到者尚多俟到時另行開送

上命議政王貝勒大臣集議尋議土謝圖汗澤卜尊丹巴等累世恭順職貢有年今為厄魯特所敗其國殘破素仰

天朝覆庇萬邦養育無類來請歸命伏惟

皇上從來興滅繼絕中外一體寬仁恩育宜准土謝圖汗澤卜尊丹巴之降俾令得所命尚

書阿喇尼侍郎文達查明見在不能度日入等。將副都統阿毓璽所運歸化城米糧均散賑濟。土謝圖汗等本宜給以名爵。但各路請降喀爾喀首領甚多。應俟到日再議。從之。○丙午。傳臚。賜殿試武舉王應統等九十四人。武進士及第出身有差。○調鑲白旗漢軍副都統鄂莫克圖為滿洲副都統。○戊申。陞內閣學士吳什巴為盛京刑部侍郎。○庚戌。盛京刑部侍郎吳什巴。陛辭。

上諭曰。朕聞盛京地方。光棍匪人。聚集頗眾。互相告訐者甚多。爾往審理諸事。慎無偏向。須從至公。又聞盛京刑部。遇訊鞠時。或別部及旗下各官。皆得雜至並坐。干預所審之事。向日京師。亦往往有此。朕再三申飭。今已肅清矣。爾往其力除此弊。持正以行。○以內閣學士江有良為安徽巡撫。○陞郎中能特為山西按察使。司按察使。○免貴州黃平州水衝沙壓田畝本年額賦。○以輔國公綽克託為

奉天將軍。○裁涿鹿。永平。真定。河間。保定等衛。守備千總員缺。○辛亥。

上謁

暫安奉殿。是日啟行。駐蹕三河縣城內。○裁廣

西陀陵土知縣缺。歸永康州管轄。○壬子。

上駐蹕馬伸橋。○癸丑。

上自行宮啟行。將至

暫安奉殿。涕淚交頤。入

殿內。痛哭良久始出。尋詣

孝陵行禮。舉哀。復至

仁孝皇后。

孝昭皇后陵。舉哀。○是日。

上駐蹕新城內。○甲寅。

上詣

暫安奉殿。哭泣良久始出。回行宮。○是日。以恭

上

大行太皇太后尊謚遣官告祭

天地。



宗廟。

社稷○乙卯。恭奉冊寶上

大行太皇太后尊謚。冊文曰。坤順承天。懿德肇興。夫鴻業。萃亨假廟。隆稱永式於明禋。將崇升祔之儀。宜備顯揚之典。欽惟

皇祖妣大行太皇太后。徽音集慶。厚德凝符。同鳩汭以鍾靈。並洽陽而著範。歸我

太宗文皇帝。當金璽來嬪之日。正調戈啟土之年。內治克襄。

帝圖式廓。格精誠於

九廟。化洽蘋蘩。敷陰禮於六宮。祥徵種桂。薦生世祖章皇帝。永清四海。本胎教之虔恭。協正三辰奉

母儀之雍肅。每紆

睿照。瞻青原節屋之艱。實沛洪仁。頒紅粟太倉之賜。歡騰扶杖。惠溢歌衢。爰逮眇躬。益彰

慈訓。秉三十年之

聖善。克致太平。溥億兆姓之和恒。長開景運。懿

筐載績。勤勞不替於重闈。大練垂裳。節儉每先於下土。萬國共尊親之戴。兩朝備孝養之隆。壽考康寧。福駢臻於箕範。含弘光大。德莫罄於義圖。方承受日之歡。遽遘升遐之痛。終天銜恤。率土均哀。深惟薦祐所由來。永念發祥之有自。爰咨輿論。請命於

天。謹奉冊寶上

尊謚曰。

孝莊仁宣誠憲恭懿翊天啟聖文皇后。於戲。周

室展閼宮之祀。禮載升歌。漢廷表長樂之儀。史傳新注。伏冀

慈靈可接。陟降在茲。必得其名。垂休聲於琬琰。克昌厥後。流餘慶於球圖。彤管常新。瑤函永煥。寶文曰。

孝莊仁宣誠憲恭懿翊天啟聖文皇后之寶○是日。

上回鑾。駐蹕薊州城內○丙辰。

上駐蹕三河縣城內○裁盛京及山海關迎送

入貢官六員○丁巳

上回宮詣

皇太后宮問安○兵部題湖廣省復設總督應併設中營副將一員左右營遊擊二員守備三員千總六員把總十二員兵二千名從之

○都察院左都御史徐元文條奏一漢御史請照滿御史例不論掌道與否分派各道協同理事一法司會勘重案及各省揭帖送到都察院時應即令御史詳閱全招有無疑竇

或行或駁限三日內說堂其見審重案刑部定稿之前即應移送口供到各道御史預期察核一五城地方居住旗人甚多舊例巡城御史於詞訟內值兩造旗人概不審理請嗣後旗人控告詞狀笞杖以下准巡城御史審理完結下部議行○己未陞監察御史郭世隆為內閣學士兼禮部侍郎○吏部議覆都察院左都御史徐元文疏叅兵部侍郎成其範監試取中武舉內有王大猷等三人於紫

光閣

皇上閱射時不能開弓

皇上面問成其範又飾稱天寒弓勁成其範應照溺職例革職得旨成其範從寬免革職著降五級調用○庚申以恭奉

大行太皇太后神牌升祔

太廟

奉先殿遣官告祭○兵部題杭州防禦陳廷章將承襲管佐領之子攜之任所應罰俸一年

上曰陳廷章免罰俸此等承襲官及管佐領之員年幼未滿歲者若不隨父之任則無人教習勢必流為匪人且生計困乏矣向來上朝俱有一定年歲嗣後未滿歲之幼子皆許其隨父任所滿歲後送入京師著為令○以大理寺卿索諾和為內閣學士兼禮部侍郎○辛酉遣滿漢大學士各一員恭奉

大行太皇太后神主是日恭奉

神牌升祔

太廟

奉先殿

上親詣行禮○壬戌以恭奉

大行太皇太后神牌升祔

太廟禮成。頒詔天下。詔曰。朕惟禮先報本。推崇

備極。夫鴻名。孝重尊親。追遠特隆於廟享。載

稽往牒。鉅典維昭。欽惟

皇祖妣太皇太后。至德弘宣。深仁溥被。光贊我

太宗文皇帝。躬勤締造。啟式廓之鴻圖。篤生我

世祖章皇帝。統一寰區。懋永清之大烈。丕彰

聖善。撫育眇躬。殫三紀之恩勤。綿萬年之曆祚。

緬思

罔極。儼承

慈訓於栝捲。衍慶無疆。敬晉

徽稱於琬琰。博詢輿論。虔考隆儀。祇告

天地。

宗廟

社稷。於康熙二十七年十月十六日。率諸王貝

勒文武羣臣。恭奉冊寶。上

尊謚曰。

孝莊仁宣誠憲恭懿翊天啟聖文皇后。二十二

日升祔

太廟。既展追崇之報。宜弘錫類之仁。於戲。薦

九廟之馨香。孝思不匱。萃萬方之愛戴。純嘏彌

昌。率土揚庥。普天被澤。布告中外。咸使聞知

○詔內恩款十九條○癸亥喀爾喀厄爾得

尼阿海台吉等遣使進貢。賞賚如例○甲子。

陞內閣學士董訥為兵部右侍郎○乙丑。陞

江南督標副將劉含高為狼山總兵官○丙

寅。

上詣

皇太后宮問安○陞庶子喇弼為大理寺卿○

丁卯。諭兵部尚書紀爾他布等。朕聞綠旗兵

餉。兵丁照數得者甚少。皆由不肖武弁扣剋

黃緣。餽送兵部。夫兵所恃者餉耳。若果全得

自然精強。今在外各弁或將餉銀私侵入已。

又鮑遺兵部。是以兵不聊生。以致鼓譟。而總兵副將等官。亦不能彈壓。倉皇失措。惟有在通衢叩求而已。此等兵將來如何可用。凡事當窮根本。此事根本。全在兵部。爾等應通行嚴飭。○賑濟江南邳州等五州縣水災飢民。○戊辰。以科爾沁故輔國公圖訥赫之子布尼襲爵。

十一月。庚午朔。以扎魯特故多羅達爾漢貝勒巴達里之子畢立克土襲爵。○辛未。諭大學士等。兵部考武官射箭。合例者方記冊錄用。或有前在行間。顯著勞績。若以考校不合例之故。遂不得見用。事屬可矜。朕已屢有諭旨。且射而中者。人材皆優。射不中者。人材皆劣。不可以此一概論也。若執此用人。則人材優而有勞者。終身不得見用矣。又聞兵部閱射。有以中者為不中。以不中者為中。諸情弊。其飭兵部堂官。自是以後。其嚴之。其慎之。○上幸南苑行圍。○兵部議覆御史郭世隆疏言。

山海關城守禦章京等官職司稽察。每多懈弛。嗣後失察私參之例。請加嚴定處分。應無庸議。上曰。偷創人參禁絕甚易。但人參為物。治病有益。且無甚關係。故朕於偷創之人。亦未曾有一正法者。若如部議。山海關守禦官兵。嗣後停止。令盛京將軍管轄。照張家口例。一切事件。送部定奪。○癸酉。喀爾喀達賴台吉遣使進貢。賞賚如例。○陞太常寺卿郭琇為內閣學士兼禮部侍郎。○丙子。工部議覆尚書蘇赫等疏言。臣等遵奉諭旨。帶領原任河道總督靳輔往閱沙河南北兩河水勢。據靳輔奏稱。沙河城東呂閣莊土溝莊葛渠莊及通州兩河匯流之處。建立蓄水閘。可蓄水四百萬方。其通州以下東岳廟等處。水勢散漫。南營等處。因河中淤高。水分兩道。應於散漫分流之所。築建小隄。將水攔束。其所蓄之水。放洩時。可增兩捺以濟漕運。臣等公同詳議。謹將建閘築隄之處題明。應如所請。從之。○丁丑。

上幸晾鷹臺講武。閱火器營官兵。演放火器。又命設布侯。

上率諸皇子。及裕親王等射。○戊寅。陞太僕寺卿王維珍為都察院左副都御史。○己卯。以原任尚書胡昇猷為太常寺卿。○旌表浙江烈婦洪爾文妻史氏。逼姦不從。完貞被戮。給銀建坊如例。○庚辰。

上自南苑移駐暢春園。○以故一等阿思哈尼哈番尚世泰子杜泰襲職。○壬午。諭兵部。曩陵總兵官嚴弘。年紀哀邁。聞武昌兵丁鼓譟時。乘輜而往。著原品休致。其員缺。以辰州副將郭忠孝陞補。○甲申。侍衛阿南達喇嘛商南多爾濟等疏言。噶爾丹謂七旗喀爾喀非吾讐也。但土謝圖汗澤卜尊丹巴。殺扎薩克圖汗。及得克得黑墨爾根阿海。盡俘其國。又侵掠我境。殺我弟多爾濟扎卜。棄好搆難。誠無地可容之人也。臣等令商南多爾濟。派楚克達爾漢囊素轉說之。噶爾丹曰。汝等諭我。

以禮法。我甚悅。我並無自外於

中華皇帝。達賴喇嘛禮法之意。又噶爾丹以貿易事。遣滾楚克達爾漢囊素來告曰。厄魯特從來進貢貿易。各自分行。今概不得往來。我國之人。殊為憂苦。今請照常行走。候旨定奪。奏入。下議政王大臣集議。尋議。

皇上軫念兩國。原無異視。今土謝圖汗等。背棄盟誓。殺扎薩克圖汗。及得克得黑墨爾根阿海。又先犯厄魯特。殺噶爾丹之弟多爾濟扎卜。實係伊等之過。應遣人敕達賴喇嘛。命遣一有名大喇嘛。同本朝所遣大臣前往。召集噶爾丹。土謝圖汗等。令土謝圖汗等。自陳其過。大集會。閱永議和好。於未遣敕之前。以此等情節。先曉諭土謝圖汗。如皆允服。願行。則約期於來年會閱。如別有推辭。俟到日再議。噶爾丹奏請貿易之事。應俟遣使大臣時再議。從之。○乙酉。喀爾喀故車臣汗之子吳默赫遣使進九白年貢。宴賚如例。○丙戌。

上自暢春園回宮○陞內閣侍讀學士年遐齡  
為宗人府府丞大理寺少卿魏雙鳳為太僕  
寺卿○以兵部左侍郎禪布為江寧副都統  
○刑部題審擬各案有律者引律無律者引  
例此舊制也今督撫及承審各官多有律例  
兩引候部臣定奪者或有失輕失重之處可  
以規避處分且恐受人囑託借此作弊請嗣  
後將律例兩引者概行停止從之○戊子  
上詣

皇太后宮問安○兵部議覆湖廣總督丁思孔  
疏言武昌兵變地方官員有逃避及授偽職  
者請查明分別具題盡行拏問應如所請得  
旨授偽職官員著革職拏問餘從寬免○兵  
部題浙江將軍郭丕巡撫金鉉以旗兵擾民  
事互相叅訐未辨虛實請敕部院大臣勘問  
上命禮部尚書熊賜履工部尚書蘇赫前往察  
審○辛卯轉兵部右侍郎舜拜為左侍郎陞  
內閣學士沙穆哈為兵部右侍郎○兵部議

原任荊州將軍噶爾漢副都統郝佛於武昌  
兵變時率師進剿不能即行撲滅藉稱戰船  
未備糧餉不給自行退回應將將軍噶爾漢  
革職鞭責籍沒荊州副都統郝佛革職鞭責  
上曰噶爾漢著革職鞭一百不准折贖免其籍  
沒郝佛著革職免其鞭責○壬辰免湖廣崇  
陽等七州縣本年分旱災額賦有差○免江  
南亳州等三州縣本年分水災額賦有差○  
前鋒統領佛爾諾以病乞休允之○戊戌冬  
至祀

天於  
圜丘  
上親詣行禮○遣官祭  
永陵  
福陵  
昭陵  
暫安奉殿  
孝陵

仁孝皇后。

孝昭皇后陵○停止次日朝賀○已亥免江南興化縣本年分水災額賦十之二○改湖廣平溪青浪二衛學又貴州管轄○倉場總督戶部右侍郎石文桂丁父憂命離任守制

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十八

監修總裁官光祿大夫太保兼太子太傅保和殿大學士兼戶部尚書二等伯加四級臣馬齊光祿大夫經筵日講官起居注少保兼太子太保保和殿大學士仍兼管吏部戶部尚書翰林院掌院事加二級又加一級臣張廷玉光祿大夫經筵講官太子太傅文華殿大學士仍兼理戶部尚書事務加五級又加二級臣蔣廷錫總裁官光祿大夫文華殿大學士兼吏部尚書臣朱軾等奉

敕修

康熙二十七年戊辰十二月庚子朔陞內閣

侍讀學士星安為內閣學士兼禮部侍郎○以西安將軍希福為正紅旗蒙古都統○陞叅領燕泰為荊州副都統○兵部題禮部尚書熊賜履奉差浙江審事適丁母憂應回籍守制請另遣部院大臣一員前往得旨著兵部尚書張玉書前往審理○辛丑兵部遵諭議覆凡赴部候選武職人員應查有戰功實績者應免其部考即准註冊推補其餘各項人員仍照定例以考射合式者序用至考射



之時。臣部堂官親身分閱。從之。○壬寅。免江西宜春等十二州縣本年分旱災額賦。有差。○癸卯。陞左副都御史李廷松為總督倉場。戶部右侍郎。○以散秩大臣一等伯阿席坦為前鋒統領。○甲辰。恭建福陵神功聖德碑。

御製碑文曰。惟

天眷祐下民。綏靖方域。篤生我

皇曾祖太祖高皇帝。肇興東土。奮師一旅。式闢

皇圖。大武布昭。深仁洋溢。用造我國家萬億

年。丕丕基。駿德鴻功。於燦顯懿。駕軼亘古。予

小子纂承洪緒。既奉冊寶。崇上

尊謚。載輯徽猷。炳垂方策。惟

陵寢宜有功德之碑。敬述大畧。永勒貞珉。叙曰。

太祖承天廣運聖德神功肇紀立極仁孝睿武

弘文定業高皇帝。姓愛新覺羅氏。諱努爾哈齊

先世發祥長白山之陽。禎符神貺。歷著休徵。

至

皇始祖肇祖原皇帝。式廓舊業。寢熾寢昌。又五傳。至

顯祖宣皇帝。世濟其勤。流長積厚。景運懋集。神器攸歸。誕啟我

太祖高皇帝。

顯祖之長子也。

宣皇后娠十有三月。乃生。龍顏鳳目。豐頤大耳。

天表玉立。舉止非常。少不飲酒嬉戲。稱為聰

睿。月勒及長。騎射絕倫。雄畧蓋世。用兵無敵。

而又至誠御物。大度容人。先是有望氣者言

滿洲將生聖人。統一諸國。至是滿洲長白山。

及東海扈倫諸部落爭相雄長。癸未春。蘇克

蘇辭河部圖倫城有尼堪外蘭者。陰搆明軍。

首逞大難於我時。

太祖皇帝年二十有五。泣血誓師。枕干問罪。以

遺甲十三副。攻尼堪外蘭。克圖倫城。復攻之

於甲板。誅諾米納奈哈達。取撒爾湖城。時異

已猜忌。包藏禍心。伺間竊發。天威所懾。罔弗

獸驚鳥散。遂俘兆佳。城長李岱。取馬兒墩。平定董鄂哲陳。渾河等部。丙戌秋。擒斬尼堪外蘭於鶯爾渾城。戎首服辜。先聲震疊。環境諸國。相繼削平。既而葉赫。哈達。吳喇。輝發。科爾沁。國席北。卦爾察。朱舍里。納殷。路九姓之國。合兵三萬人。分道來侵。偵者夜告。

太祖皇帝安寢達旦。蓐食濟師。殲其渠首。餘部皆潰。斬級四千。獲馬三千匹。鎧胄千副。羣方警服。乃增築城墉。修飭法制。創製國書。開金銀鑛。鐵冶。所產墳珠。織皮。通厥貿易。財用殷阜。肇立軍制。師律精嚴。國勢日盛。丙午冬。蒙古五部落尊

太祖為神武皇帝。歲時朝貢。絡繹相望。而哈達。輝發。吳喇。數渝盟。先後征討。悉定其地。每當軍行。輒見五色雲。亘天。祥光四塞。立奏鉅功。遠邇翕服。益四旗為八。設固山。梅勒。申喇。牛录額真。遞相統轄。命佐領下。各出牛種。屯田。積穀貯倉。置理政聽訟大臣。緩刑慎獄。野無

剽竊。路鮮拾遺。國中大治。帝業已成。貝勒大臣。集議勸進。丙辰春正月。恭上

尊號曰。

覆育列國英明皇帝。建元天命。時年五十有八。越二年。定策征明。明政久弛。棄絕和好。援我仇讐。蕩搖我邊陲。於是誓告有衆。類帝禡旗而行。遂拔撫順。降臺堡五百所。繼下清河。明大舉稱兵。會於瀋陽。號四十七萬。張左右翼。左翼以杜松。王宣。趙夢麟。張銓。由渾河出撫順關。馬林。麻岩。潘宗顏。由開原合葉赫兵出三岔口。右翼以李如柏。賀世賢。閻鳴泰。由清河出鴉鵲關。劉綎。康應乾。合朝鮮兵出寬奠口。向董鄂四路來侵。

太祖皇帝分精騎奮擊。大破其衆。五日而悉殲之。城界凡取開原。破鐵嶺。滅葉赫。五年克遼陽。瀋陽。定議建都。始築東京。尋取廣寧。拔撫順。十年遷都瀋陽。由是東漸海。西訖遼。南及朝鮮。北暨嫩。烏龍江。以至使犬。諾落諸路。罔

不臣服

太祖皇帝神武天錫。決幾制勝。變化若神。每戰輒單騎深入。裹創斬馘。神色不動。善駕馭材雄。推心置腹。撫納降附。棄捐忿隙。恒予擢用法。所當坐。雖親昵罔所私。攻拔城邑。嚴禁軍士。安輯居民。是以羣策競奮。率土思歸。御極以後。拓地開疆。日不暇給。而躬勤於聽覽。留神於載籍。修德納諫。親賢遠奸。建二木於門。俾下情欲達者。書之以進。尚寬大。崇節儉。睦宗親。厚風俗。重農桑。賑窮乏。垂示典訓。蕩平正直。允為萬世法程。猗歟盛哉。天命十一年八月庚戌崩。

聖壽六十有八。在位十有一年。天聰三年二月己亥葬。

福陵天柱山。崇德元年四月上。

尊謚

承天廣運聖德神功肇紀立極仁孝武皇帝。廟號

太祖。康熙元年四月加上

尊謚。於戲。有明德衰。海寓板蕩之時。生民顛隳之會。我

太祖皇帝應運誕生。手提天戈。披榛辟萊。掃風沐雨。掃邊陲如破竹。定遼左。若建瓴。戡亂求寧。非富天下。功極於配

天。道隆於昌後。歷稽曩代創業垂統之君。未有邁此締造憂勤。經綸宏遠者也。瞻赫濯之如新。撫承平之永賴。歌思光烈。曷罄名言。謹拜手稽首而作頌曰。

天造大邦。勃興東極。長白山高。苞符開闢。駝鳥生商。履武誕稷。奕葉炳靈。肇基王迹。

太祖龍飛。旋乾轉坤。齊徽炎昊。叱烈羲軒。時惟草昧。陟嶽降原。一成奮起。雷動雲屯。蠢爾仇方。敢作牙孽。赫斯一怒。恭行天伐。寢甲枕鞍。神勇迅發。巨憝授首。戎心式遏。奇謀倜儻。遠畧深沉。內搆者挫。外訐者禽。單師十百。摧彼強鄰。九邦潰糜。四路掃塵。攜貳則誅。歸誠則

撫。義問宣昭。仁施恩普。大畏小懷。實揚我武。  
來庭來王。日闡疆土。疆土既闢。曆數在躬。膺  
圖受籙。響應景從。三才協軌。百靈潛通。指麾  
蕩滌。振落發蒙。覘敵烏集。濟師冰泮。夾日貫  
月。卿雲糾縵。不義是征。功成惟斷。秉鉞稱干。  
帝心厭亂。環山負海。風靡雲披。朱旗疾捲。汗馬  
爭馳。後我斯恫。歌舞迎師。紀元頒朔。建策開  
基。爰定軍營。森羅鷺鶴。步伐止齊。并牧相扞。  
爰建國都。屹峙屏翰。扼吭拊背。皇居攸煥。爰  
命分職。勗哉臣鄰。爰慎折獄。恤哉祥刑。爰達  
民隱。紹鐸重陳。爰製國書。蚪斗更新。訏謨孔  
彰。風規渾噩。禹誓湯征。千秋繼作。聲靈覃敷。  
東西南朔。大統廼膺。新命廼廓。既詒既翼。如  
鎬如豐。九圍是式。萬國來同。卜年卜世。惟  
太祖功。巍巍蕩蕩。昭格蒼穹。右享郊壇。敷時思  
繹。炳耀圖書。輝煌球壁。景瞻  
福陵神丘是宅。百川榮朝。羣山拱揖。蔥籠王氣。  
松揪鬱蒼。玉衣永鎮。弓劍長藏。億載顧慕。春

露秋霜。樹茲穹碑。錫嘏無疆。○恭建

昭陵神功聖德碑。

御製碑文曰。

天以神器畀我國家。洪惟

皇祖太宗文皇帝。智勇神聖。光照

太祖高皇帝。丕緒帝紘。皇綱是廓。是恢。幹不庭

方。構造鴻業。垂裕

皇考世祖章皇帝。大一統之基。貽億萬禩。無疆

之休。維予小子。繼承

聖緒。念

陵寢宜有功德之碑。敬勒貞珉。昭示無極。叙曰。

太宗應天興國弘德彰武寬溫仁聖睿孝隆道

顯功文皇帝。諱皇太極

太祖承天廣運聖德神功肇紀立極仁孝睿武

弘文定業高皇帝第八子也。

母孝慈昭憲敬順慶顯承天輔聖高皇后。生而

神靈。徇齊明敏。龍行虎步。顏如渥丹。嚴寒不

栗。舉止非常。

太祖皇帝特鍾愛焉。既長。英武豁達。孝弟恭敬。慈愛和順。秉心寬弘。好觀書史。一有聞見。終身不忘。沉幾果斷。羣望攸屬。天命十一年八

太祖皇帝升遐。諸貝勒大臣咸推我

皇祖才德冠世。宜繼承帝業。以九月朔。嗣登大位。建元天聰。時年三十有五。踐阼之後。愛養人民。撫綏中外。崇儉務本。修政任賢。仁聲義問。無遠弗屆。除惡討貳。用整六師。廼擊蒙古。執一十四貝勒。奏凱八纛下。廼征朝鮮。克義州。進拔漢山城。入安州。抵平壤。朝鮮王李倧遁江華島。遣其弟覺來行成。遂盡反所收地。與盟而還。廼征察哈爾。剪多羅特部落。編俘獲為氓。廼伐明。自遵化。臨北京。畧良鄉。斬其將滿桂。孫祖壽。擒其將黑雲龍。麻登雲。還拔永平。廼收大凌河。降其將士。於是孔有德。耿仲明等航海來歸。廼征黑龍江。瓦爾喀下之。察哈爾舉國來附。獲歷代帝王傳國之寶。天

聰九年冬。羣臣勸進

尊號。

皇祖辭讓再三。明年四月。表上

尊號曰。

寬溫仁聖皇帝。建國號大清。改元崇德。告於

皇天后土。追王

烈祖。上

太祖高皇帝

高皇后尊謚。羣臣咸上表賀。乃錫宴肆赦。是年朝鮮毀盟。討之。拔其都。載飛舸於車。凌江華島。李倧自縛。請為臣。釋之還。并歸其俘獲。朝鮮感服。勒石南漢。以銘勲德。遂率水師渡海。克皮島。既而大出師。遣將毀關入。分左右翼。由涿州畧地至山西界。復自臨清渡河。破濟南。克城四十有九。降者八。與明兵五十七戰。皆捷。六年。圍錦州。入其郭。洪承疇以兵來援。皇祖陳師於松山杏山之間。明兵號十三萬。望見。

皇祖張黃蓋。往來指揮。皆懼。謀夜遁。我師分道急擊。連大破之。擒承疇。降祖大壽。錦州松山杏山塔山悉下。又命將入關。破克州。東抵寧海。克城八十有八。降者六。陣敗明兵者三十九。於是天戈所指。罔不率俾。黃河之源。清海之濱。使犬。役鹿之國。來賓恐後。野駝奇獸。黑狐紫貂。重譯來獻。聲教之遠。功烈之盛。古未有也。於戲。惟我

皇祖克配天心。誕膺景命。聰明睿知。神武不殺。懷柔以德。變伐以威。大勲用集。大猷是程。無有內外。乃罔不即叙。親九族。正百官。修明典章。誕敷正教。隆郊丘廟祀之儀。定頒曆朝會之禮。辨鹵簿旗章服御之制。聲名文物。炳然弘備。釋奠孔子。以四子配。立文館。譯書史於翔鳳閣。俾儒臣記注得失。開科目取士。諭臣下盡言無隱。論功封兄弟子姪為諸王貝勒。外藩蒙古亦論功封爵有差。優禮降臣。寄以心膂。賞罰詳明。斷獄平允。綱舉目張。仁至義

盡。至於審制度。定律令。斥邪術。禁喪祭踰禮者。務農桑。廣漁獵。以豐民食。皆可為萬世法。凡勤勞國事者。賜與必優渥。召近臣入宮。日至再三。講論政事。以賓禮遇之。諸國新附之人。入見。必詢其姓名世系。慰勞如舊識。

天語藹然。以故雖至難馴者。無不悅服。如薩哈爾察。卦爾察。瓦爾喀。虎爾哈。諸國素不習禮法。亦貢獻稱臣。其貝勒大臣至。俱思遇之如子弟。故其部落降者相繼。常念中原生民塗炭。欲與明和好。惟務修德。不樂觀兵。屢移書明邊帥曰。朕意在講和。不忍無辜赤子。慘罹鋒鏑。明之君臣。置若罔聞。致煩

天討。然每出師。必諭諸將。授以兵律。嘗曰。明之土地人民。

天以與我。是民即我民也。故師行雖嚴寒不入屯堡。士卒死傷。弔問不遺。每戰勝攻取。符瑞駢集。必曰。

上天眷佑。惕然祇懼。克敵。必祇告於

廟蓋敬

天尊

祖勤民。若是其至。豐功厚澤。與天地同久。太有國史所不能盡書者矣。崇德八年八月庚午崩。

聖壽五十有二。在位十有七年。九月壬子葬昭陵隆業山。於戲。八音遏密。萬國感痛。實惟至德深仁。為生民主。以弘我國家之大寶命。儻倭見聞。陟降庭止。謹述盛概。拜手稽首而系之以頌曰。於赫

皇祖纘

太祖之緒。誕敷乃文。孔奮厥武。整我師干。拓我疆土。東奠朝鮮。西警蒙古。貳者獲之。服則釋之。降則憐之。賢則臣之。有言遜志。則必過之。有言逆耳。則必納之。治分六曹。職統三院。筆簪史臣。書譯文館。與神為謀。以古為鑑。制禮明刑。儀章是憲。一人有慶。肇域四方。四方來王。自天降祥。和鸞鏘鏘。旂旒央央。聿昭茂祉。

煇耀章光。乾符效珍。坤儀開奧。既協靈圖。誕升顯號。濟濟師師。羣工舞蹈。曆數攸歸。謳歌前導。乃禋乃祀。於

廟於

郊。乃燕乃射。於野於朝。乃赦乃宥。於犴於牢。乃漁乃獵。於狩於苗。乃命紫宮。清寧正中。麟趾在右。闕睢在東。崇政篤恭。翔鳳飛龍。文德武功。以綏萬邦。松山之陰。杏山之下。戰士連營。崇墉百堵。取彼元戎。繫之以組。肅將

天威。救民水火。屹屹榆關。王旅所經。而幽而并。而冀而青。而充而徐。克其百城。涉河踰濟。及於東溟。時乘以乾。帝出乎震。罔有遐邇。民莫不信。或獻其琛。或輸其賁。河源海隅。協靈効順。有典有則。貽萬子孫。言為丘墳。績婉農軒。佑我

皇考。大啟幅員。允

皇祖之德。

皇祖之勲。瞻仰



昭陵在盛京之北。雲霞所棲。松栢斯植。有穹者碑。昭宣世德。菲祿來崇。時萬時億。乙巳。

上謁

暫安奉殿。命皇長子允禔。皇三子允祉。

皇四子胤禩。隨駕。是日啟行。駐蹕煙郊。補原

任湖北按察使線一信。為湖南按察使司按

察使。以前鋒統領尼雅翰為西安將軍。

兵部題武進士推選守備舊例。分別名次。在

前半者候選營缺。在後半者候選衛缺。查營

缺多而衛缺少。甚有偏枯。請嗣後不拘營缺

衛缺。將武進士挨次補用。以免壅滯。從之。

丙午。

上駐蹕石碑村。丁未。

上駐蹕黃土坡。戊申。

上自行宮啟行。將至

暫安奉殿。即涕泗交流。至

殿中。痛哭良久。奠酒畢。始出。是日

上駐蹕新城內。己酉。

上詣

孝陵。舉哀。行禮畢。至

仁孝皇后

孝昭皇后陵。舉哀。是日。

上駐蹕湯泉。調兵部尚書張玉書為禮部尚

書。刑部尚書李天馥為兵部尚書。陞左都御

史徐元祿為刑部尚書。通政使衛執蒲為都

察院左副都御史。朝鮮國王李煊曾祖母

趙氏故。遣官致祭。庚戌。

上駐蹕冷水頭。辛亥。

上駐蹕四十里舖。壬子。

上駐蹕蘭河崖。是日。

上行圍。射殪一虎。戶部尚書王日藻乞假歸

葬。允之。以奈曼故多羅達爾漢郡王鄂齊

爾子班第襲爵。免雲南開化府本年分旱

災額賦有差。予故奉天將軍宗室察尼祭

葬。照輔國公例賜卹。諡恪僖。江西巡撫宋

犛疏言。江省每年採買竹木。名為官捐。實係

累民請嗣後動支正帑採買供用。並嚴禁科  
派採買。勒捐經收等弊。從之。○旌表山東益  
都縣節婦王氏。給銀建坊如例。○癸丑。

上駐蹕米峪口。○甲寅。

上行圍射。殪三虎。○乙卯。調湖北布政使于養  
志。為江蘇布政使。司布政使。○以順天府府  
尹李迥。為通政使。司通政使。○陞翰林院侍  
讀鄔赫。為光祿寺卿。○予殉難陝西漢鳳營  
千總魯仁圻。致祭一次。○和碩鄭親王之子

謚愍厚。世子富爾敦妃納喇氏。守節合例。

上賜敕書旌獎之。○予故散秩大臣萼內。祭葬  
如例。○予故左都督高雷廉總兵官陳夢暘  
祭葬如例。○以正黃旗護軍統領佟寶。為前  
鋒統領。○丙辰。

上駐蹕龍井關。是日。

上行圍射。殪一虎。○丁巳。

上駐蹕蘭營口。○戊午。調刑部尚書徐元文。為  
戶部尚書。○贈殉難湖廣掌印都司宣德仁。

副將職銜。予祭葬。廕子弟一人。以守備用。○  
京口副都統張元勳。以老乞休。允之。○工部  
議覆。管理下河戶部侍郎開音布疏言。開濬  
下河工程。需用夫役甚衆。請於高郵等十一  
州縣內。各派夫一千名。即有酌量添設。不得  
過二萬之數。其從前在工官員。諳練河務者。  
請選用五十員。以供指臂。應如所請。從之。○  
己未。

上駐蹕羅文峪口。○庚申。

上駐蹕湯泉。○陞廣東按察使沈志禮。為湖北  
布政使。司布政使。○免江南丹徒縣。坍江田  
地一百七十餘頃。舊欠糧銀。并除額賦。○刑  
部議覆。山東道御史趙廷珪疏言。律載。子報  
父仇。不告官。而擅殺行兇之人者。杖六十。蓋  
為未經審抵。冤抑無伸者言之也。如仇家已  
經審擬。或遇赦宥。復有藉口報仇。擅行殺害  
者。不得概引輕條治罪。應如所請。嗣後子復  
父仇。於告官審抵之後。仇家幸遇赦免。復藉

口復仇者流三千里。即著為令。從之。○辛酉。上詣

暫安奉殿。舉哀。是日。

上駐蹕新城內。○壬戌。

上率王。貝勒。貝子。公。文武大臣等詣

暫安奉殿。行期年致祭禮。○以大理寺少卿許

三禮為順天府府尹。○癸亥。

上駐蹕湯泉。○甲子。

孝莊文皇后忌辰。

上詣

暫安奉殿行禮。舉哀。是日。回鑾。駐蹕薊州城內

○乙丑。

上駐蹕三河縣城內。○喀爾喀厄爾克戴青台

吉戴青楚虎爾台吉等遣使進九白年貢。宴

賚如例。○丙寅。

上回宮。○丁卯。

上詣

皇太后宮問安。○歲暮。祫祭

太廟。遣領侍衛內大臣伯費揚古行禮。○遣官

祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后陵。○遣官祭太歲之神。○陞正黃旗

蒙古副都統班達爾沙為護軍統領。○以喀

爾喀故車臣汗伊爾登阿拉卜灘之子吳默

赫襲爵。○旌表八旗節婦滿洲塔泰妻尼氏

等五十九人。蒙古布達里妻博氏等五人。漢

軍王言昌妻彭氏等四人。各給銀建坊如例

○是歲入丁戶口二千三十四萬九千三百

四十一。田地山蕩畦地五百九十萬四千一

百八十四頃八十四畝有奇。徵銀二千七百

二十六萬二千三百七十五兩有奇。米豆麥

六百九十一萬六百五十三石有奇。草二百二十五萬二千八百四十一束。茶十五萬九千三百一十五引。行鹽四百三十五萬六千一百五十引。徵課銀二百七十六萬一千三百八兩有奇。鑄錢二萬八千九百八十六萬九千八十有奇。

聖訓錄卷一百三十八

三二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百三十九

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十八年己巳春正月己巳朔

實錄卷一百三十九

上詣

堂子行禮還宮拜神畢率諸王貝勒貝子公內

大臣大學士侍衛等詣

皇太后宮行禮御太和門王以下文武各官外

藩王及使臣等上表朝賀停止筵宴○朝鮮

國王李焞遣陪臣洪萬容等表賀冬至元旦

萬壽節及進歲貢禮物宴齊如例○庚午諭吏

部戶部兵部工部朕統蒞寰宇二十八年於

茲早作夜思勤求治理務恤黎庶永圖乂安

如黃運兩河運道民生攸係朕日切心勞比  
年工役雖漸有緒而應修應塞議論紛紜曩  
歲巡幸曾允淮揚士民所請疏濬下河前已  
興工尚稽底績屢經廷議請朕親行閱視今  
特諏吉南巡躬歷河道兼欲觀覽民情周知  
吏治所至沿途供億皆令在京所司儲備一  
切不取之民間即有日用應需該衙門於所  
在地方照市估平買不許錙銖抑勒小民猶  
恐地方官吏不能悉體朕懷借名科派供應  
今特頒諭嚴飭如有悖旨借端私徵者察實  
即以軍法從事地方文武大小官員不許與  
扈從官員指稱交戚輒通餽遺違者餽送收  
受人員並以軍法從事其扈從大小官員及  
隨往僚役如有橫行生事擾民者一并從重  
治罪朕茲巡省原以軫恤編氓咨諏風俗凡  
經過地方百姓各安生業務令塵無廢市隴  
不輟耕毋得倉皇驚避輒滋煩擾其軍民人  
等懷奸挾詐希逞私憤擅於駐蹕處所賣行

告訐者一槩嚴禁倘有妄控除所告事不與  
准理外仍嚴加治罪爾部即傳諭扈從大小  
官員人等並行令各該督撫於府州縣城市  
村莊窮鄉僻壤徧懸告示備行曉諭務令通  
知以副朕惠愛元元至意○辛未

上詣

皇太后宮問安○乙亥

世祖章皇帝忌辰遣官祭

孝陵○丙子

上詣

皇太后宮問安○

上南巡命皇長子允禔隨駕是日啓行駐蹕永

清縣南哥驛○丁丑孟春享

太廟遣內大臣舅舅佟國維行禮○遣官祭太

歲之神○

上駐蹕文安縣劉寨村○諭都察院左都御史  
馬齊等朕閱視河道巡察地方恐有司派民  
修路煩勞百姓朕不擇路而行何用修治徒

勞民力應通行嚴飭禁止。命直隸巡撫于成龍。危從南巡。其巡撫事著巡道程汲署理。  
戊寅

上駐蹕河間府石槽村。己卯。

上駐蹕獻縣馮家莊。庚辰。

上過獻縣。民有進嘉禾一莖。雙穗者。

上諭侍郎庫勒納等曰。自古聖王不貴金玉而

貴五穀。穀者民之命也。朕甚寶之。

上駐蹕阜城縣。辛巳。祈穀於

上帝。遣領侍衛內大臣公福善行禮。

上駐蹕德州。衍聖公孔毓圻。山東巡撫錢珏

登州總兵官曹應鵠等及原任大學士李之

芳。原任兵部侍郎孫光祀等來朝。壬午。

上駐蹕平原縣。順天府進春。諭山東巡撫

錢珏。朕軫恤民隱。載舉時巡。懋宣德化。勤求

疾苦。比至山東。所經城邑。百姓扶老攜幼。夾

道歡迎。朕問及連歲順成。民生稍得安業。第

思百姓足則國家充裕。若期比戶豐盈。必以

蠲租減賦。除其雜派。為先。邇年以來。各省地

丁錢糧。已經節次豁免。山東地丁正賦。意欲

來歲蠲除。茲因巡幸至此。特先諭該撫速行

曉示。日傳三百里。曉村僻壤。咸使聞知。以副

朕省耕問俗之意。癸未。

上駐蹕齊河縣晏城村。甲申。

上幸濟南府。閭閻士民迎

駕。以蠲免錢糧叩謝。

皇恩。懽聲雷動。

上觀趵突珍珠二泉。

御題作霖二大字。是日駐蹕長清縣張夏店。

乙酉。

上至泰山之麓。率文武諸臣。向岱宗行禮畢。遂

諭部院諸臣曰。朕巡歷所至。再經岱麓。重瞻

祠宇。詢其廟祝。知香火荒涼。日用難給。岱頂

諸廟亦復如之。念泰山為五嶽之長。載在祀

典。有功社稷。不宜使之漸就寥落。著將每歲

香稅錢糧內量給數百金。使上下嶽廟與元

君諸祠守祀者得有資賴。曉夜盡心。兼可時加修葺。以壯往來觀瞻。示朕崇祀之意。丙戌。

上駐蹕泰安州。○丁亥。

上駐蹕蒙陰縣。○喀爾喀土謝圖汗察漢。以奉旨令與噶爾丹會盟為難。具疏自陳。

上諭議政王大臣等曰。朕統御天下。凡窮者救之。絕者繼之。離散者使之完聚。交惡興戎者使之和協。一切生靈無不欲其咸底於安樂。

也。土謝圖汗澤卜尊丹巴胡土克圖等背棄盟誓。殺扎薩克圖汗。得克得黑墨爾根阿海。又加兵厄魯特。殺噶爾丹之弟多爾濟扎卜。今為厄魯特所敗。奔入我汛界請降。朕念土謝圖汗向來職貢惟謹。久在屬國之列。是以受而納之。留於邊境。矜其困窮。給以米粟。車臣汗之子亦准其承襲。但兩國相攻。生民不得又安。兵戎無日休息。今土謝圖汗澤卜尊丹巴等。又難於會盟。其以朕收養伊等中外

一體不忍。令人失所之德意。并將土謝圖汗等背盟興戎之過。一一申明。遣使齎敕宣諭噶爾丹。令達賴喇嘛亦遣使於噶爾丹。則案可結矣。其達賴喇嘛處著伊拉古克三胡土克圖。商南多爾濟。他巴克去。噶爾丹處應遣之人。俟草青時奏請。○賜達賴喇嘛敕曰。朕統御蒙區。惟願中外息征戰之勞。無敗亡之禍。率土共享昇平。前聞喀爾喀兩翼內自作亂。兄弟人民互相吞并。日後必成戰爭之禍。特敕諭爾喇嘛同遣使人諭和。爾喇嘛亦謂朕鑒恤衆生。心如父母。誠至善也。遣西勒圖來。朕特使台吉巴忒馬什。尚書阿喇尼等與西勒圖偕往。召集七旗喀爾喀會閱誓和。意謂從此兄弟相親。可永享安樂。後土謝圖汗奏言。聞厄魯特興兵兩路來伐。臣是以出兵往迎。朕軫念厄魯特喀爾喀兩國相攻。必有一傷。復遺書於爾喇嘛。息其干戈。仍敕諭喀爾喀土謝圖汗。以為厄魯特噶爾丹職貢恭



順往來有年。果似此大舉。諒必奏聞。朕心猶未深信。未必非不良之徒。從中離間。爾等慎毋先啓兵端。務體朕不忍生民死亡之至意。爾喇嘛亦遣齊緝克他賴堪布。偕朕所遣阿齊圖。緯爾濟。學士拜禮往厄魯特。諭和。朕與爾如此行事。原不忍視喀爾喀。厄魯特。至於塗炭。欲其相睦。衆生得安之意也。乃喀爾喀土謝圖汗。澤卜尊丹巴胡土克圖等。自取滅亡。違旨興戎。首先起兵。殺扎薩克圖汗。又殺

聖訓錄卷一百三十九

六

噶爾丹之弟多爾濟扎卜。噶爾丹遂起兵破喀爾喀。此喀爾喀先舉名譽之過。朕不以此責噶爾丹也。朕之初念。本欲率土之民。皆獲生成。原無樂他人敗亡。以為己利之意。今喀爾喀敗。汗及濟農台吉等。率其通國之人。決計歸降於朕。朕為天下主。來歸之人。不為收養。其誰收養之。爰納其降。安插於汎界之外。發粟賑濟。仍存其汗濟農台吉之號。嗣立車臣汗之子為汗。朕興滅繼絕之心。非特於喀

爾喀如是已也。諸國有窮迫來歸者。朕之愛養。皆與之同。不但朕之所行如此。喀爾喀等如往歸爾喇嘛。決不忍其死亡。亦必如此愛養之也。征戰非美事。互相報復。無有已時。亦豈能保其常勝乎。朕意欲使厄魯特喀爾喀盡釋前怨。仍前協和。各守地方。休兵罷戰。特遣使齎敕往諭噶爾丹。噶爾丹向遵奉爾喇嘛道法。爾喇嘛若遣使往諭。務令兩國嗣後永息兵戎。則朕與爾解紛恤難之本心。亦可

聖訓錄卷一百三十九

七

以慰矣。爾喇嘛可即遣使與朕所遣之人偕往。○戊子。

上駐蹕沂州青駝寺。○喀爾喀車零墨爾根戴青台吉遣使進九白年貢宴賚如例。○免浙江宣平縣康熙二十七年分旱災額賦有差。○陞二等侍衛岳干為正黃旗蒙古副都統。○己丑。

上駐蹕沂州李家莊。○庚寅。

上駐蹕郟城縣蒹花鋪。○江南江西總督傅拉

塔河道總督王新命漕運總督馬世濟江蘇巡撫洪之傑安徽巡撫江有良江寧將軍博爾濟口將軍楊鳳翔江南提督楊捷等及原任大學士吳正治原任吏部侍郎張鵬等來朝。辛卯。

上率扈從部院大臣及江南江西總督傅拉塔河道總督王新命漕運總督馬世濟等閱視中河至支河口下馬坐隄上。出河圖指示諸臣。諭曰河道關係漕運民生若不深究地形水性隨時權變惟執紙上陳言或徇一時成說則河工必致潰壞。且就目前觀之修治此處似乎有益然將來且連彼處受害矣。朕雖屢遣大臣來視而河工是非終無定論。朕夙念河道頻壞羣黎屢罹災害因詳閱河圖不離左右故地方隄岸河形朕衷深晰。今朕躬特來觀閱試以朕意言之朕觀此河陘隘逼近黃河之岸且自徐州北鎮口開所出黃水及微山湖荊山口之水俱歸內運河必流入

中河駱馬湖之水亦入此河。若遇霖潦之年水勢愈漲萬一黃隄潰決失於防禦中河黃河必將混而為一。此中河開濬後小民商賈無不稱便者蓋由免行黃河一百八十里之險耳。然此論徒知目前小利又安識日後長久有利無利也。因問學士凱音布曰爾等從前如何看閱此河。凱音布奏曰臣等但謂彼時可以行舟故云有益若水大堪虞見不及此。又問尚書圖納左都御史馬齊等曰爾等

看河時如此險處何未慮及圖納等奏曰臣等來看河時正值水大目擊中河逼近黃河之岸且河身陘隘恐內運河與駱馬湖之水不能容受故議於迤北遙隄修減水壩三座令水由昔日黃河所衝河形以入於海。上顧原任河道總督靳輔曰爾當日如何籌畫開濬中河。今又云何靳輔奏曰

皇上前東巡時曾諭云攔馬河減水壩所出之水如何方不致淹沒民田臣意開濬此河可

以束水入海。及濬畢觀之。漕艘亦屬可行。與其令漕艘行黃河一百八十里之險。不若行此河之為便也。今若將遙隄加增修築。以保固黃河隄岸。當不至有患。

上問河道總督王新命曰。爾意云何。王新命奏曰。以臣觀之。支河口止修一閘。鎮口閘。微山湖等處之水甚大。倘又遇靈潦之年。一閘不能支。必至衝壞。若下草埽。隨時啓閉。於駱馬湖口。將竹簍盛石。作減水壩。以為捍禦。令汛漲之水。歸入黃河。酌存其足用之水。再將郊城禹王臺修築。以禦流入駱馬湖之水。令歸沐河。則中河可無虞矣。

上曰。若重載與回空之船並行。則中河窄狹。且逼近黃河。朕意猶以為可慮。鎮口閘。微山湖等處水大。可仍開支河口。其黃河運道。原自不廢。仍並存之。

上駐蹕宿遷縣○壬辰

上御舟由中河閱視河道。遂自清河縣渡黃河。

是日。

御舟泊清口○癸巳

御舟泊山陽縣涇河○諭江南江西總督傅拉塔。江蘇巡撫洪之傑。安徽巡撫江有良曰。朕南巡以來。軫念民依。勤求治理。頃至江南。境上所經。宿遷諸處。民生風景。較前次南巡。稍加富庶。朕念江南財賦。甲於他省。素切留心。因尚有歷年帶徵錢糧。恐為民累。出京時。曾詢戶部。知全省積欠。約有二百二十餘萬。今

親歷茲土。訪知民隱。無異所聞。除江南正項錢糧。已與直隸各省節次蠲免外。再將江南全省積年民欠。一應地丁錢糧。屯糧蘆課。米麥豆雜稅。槩與蠲除。自此民免催徵。官無叅罰。爾督撫務須切實奉行。俾均沾實惠。副朕愛恤民生至意。如有以完作欠。侵收肥己等弊。一經發覺。定行從重治罪。夫民為邦本。足民即以富國。朕平日躬行節儉。一絲一粟。未嘗輕費。所以如此簡約者。無非愛養物力。為

優恤元元之地。在民間惟正之供。軍國所需。豈易驟言蠲免。邇年國用少裕。故能頻沛恩施。總期藏富於民。使家給人足。則禮讓益敦。庶漸臻雍穆之治。著速行傳諭。咸知朕意。甲午。

御舟泊高郵州○乙未。

御舟至揚州。闔郡士民迎

駕。是日泊黃金壩○丙申。

御舟泊江都縣陳家灣○

實錄卷一百三十九

十四

上諭江南江西總督傅拉塔。福建浙江總督王鵬。江蘇巡撫洪之傑。浙江巡撫金鉉等。朕因省察黎庶疾苦。兼閱河工。巡幸江南。便道至浙。觀風問俗。簡約儀衛。鹵簿不設。扈從者僅三百餘人。頃經維揚。民間結綵。懽迎盈衢。溢巷。雖出自恭敬愛戴之誠。恐至稍損物力。甚為惜之。朕視宇內編氓。皆吾赤子。惟使比戶豐饒。即不張結綵。慢朕心亦所嘉悅。前途經歷諸郡邑。宜體朕意。悉為停止。又見百姓老

幼男婦。奔走雜遝。瞻望恐後。未免誼譁擁塞。念此行原以為民。不嚴警蹕。但人衆無所區別。高崖水次。或有傾跌之虞。一夫不獲其所。足軫朕懷。此後止於夾道跪迎。勿得紊亂。追趨致有諸患。著即詳加曉諭。使知朕愛民切實。咸為遵行。○予故廣東廉州總兵官佟國璽。祭葬如例。○丁酉。

實錄卷一百三十九

十五

御舟泊鎮江府金山寺○諭河道總督王新命曰。朕過高郵州等處。見石隄間有損壞者。爾可即行修葺。○戊戌。

御舟泊丹陽縣七里廟○鑲白旗滿洲副都統達克薩哈。以年老乞休。允之。

二月。己亥朔。

御舟泊常州府海子口○杭州將軍郭丕。蘇松水師提督梁鼎等。來朝。○庚子。

御舟泊無錫縣放生池○福建浙江總督王鵬。浙江巡撫金鉉。平陽總兵官李華等。及原任工部尚書杜臻。禮部侍郎嚴我斯等。來朝。○

辛丑。

御舟至蘇州。闔郡士民迎。

駕是日。

上駐蹕蘇州府城。壬寅。大計天下官員卓異官三十二員。貪酷官四十八員。不謹官六十四員。有疾官八十員。年老官一百二十員。罷軟官三十五員。才力不及官五十一員。浮躁官四十九員。俱分別陞賞革降處分如例。癸卯。

上駐蹕萬峯山。甲辰。

御舟泊吳江縣龍王廟。戶部議覆四川陝西總督葛思泰疏言。陝西駐防兵馬歲需米豆草束。向派西安府屬州縣供辦。因各屬離省寫遠。且山路駝載。民力艱難。若全支折色。則省會採買糧草不敷。又恐累兵。請半支本色。半給折色。兵民兩便。應如所請。從之。乙巳。

御舟泊浙江秀水縣。丙午。

御舟泊仁和縣塘棲鎮。丁未。遣大學士王熙

祭

先師孔子。

御舟至杭州。闔郡士民迎。

駕是日。

上駐蹕杭州府城。戊申。祭

大社。

大稷。遣吏部尚書阿蘭泰行禮。己酉。

孝康章皇后忌辰。遣官祭

孝陵。諭扈從部院諸大臣。朕稽古省方。咨求

治理。閱視河道。期底平成。凡有利於民生。必令羣沾實惠。茲行次浙省。禹陵在望。念大禹功德隆盛。萬世永賴。應行親詣。以展企慕之忱。其致祭典禮。所司即察例舉行。政治所先在崇文教。江南浙江為人文萃集之地。入學額數。應酌量加增。永昭弘獎。著該督撫詳議奏請。江寧鎮江杭州駐防滿洲漢軍兵丁。鎮守要地。久歷歲時。深用軫念。應作何恩賚。以彰優恤。著該部議奏。自南巡以來。所經過地

方官員除八法處分及列款糾劾外。凡因公  
累誤降級留任者。俱准與開復。降級調用者。  
著帶所降之級留任。其經過地方。現在監禁  
人犯。除十惡及詔款所不赦等罪。並官員犯  
賊者不宥外。其餘自康熙二十八年二月十  
一日以前死罪及軍流徒罪以下。已結未結。  
俱准寬釋。以示朕赦罪宥過之意。備辦船隻  
地方各官。効力勤勞。著該督撫會同奉差官  
員確查具題。各加一級。緯夫供役勞苦。亦著

平定縣志卷一百三十九

十一

該督撫察明人數量給恩賞。朕厯念民依。特  
蠲租賦。總期實德潤澤蒼生。近見民間有建  
立碑亭。稱頌德意者。雖出羣黎感戴之誠。但  
恐各郡皆然。未免致損民力。誠使閭閻殷阜。  
則裨益良多。碑亭何與焉。嗣後亦宜停止。江  
浙錢糧既經蠲豁。猶慮有不肖有司。借端詞  
訟。朘削民生。著該督撫嚴行禁飭。至各處權  
關原有則例。朕舟行所至。諮訪過關商民。每  
不難於輸納額稅。而以稽留關次。不能速過。

為苦。權關官員。理宜遵奉。屢頒諭旨。恤商惠  
民。豈可反貽之累。自今應力除積弊。凡商民  
抵關交納正稅。即與放行。毋得稽留苛勒。以  
致苦累。違者定行從重處分。朕蚤夜孜孜。惟  
冀官吏軍民。士農商賈。無一人不獲其所。故  
於民生吏治。圖維區畫。務極周詳。爾等可即  
傳諭俾一體奉行。稱朕意焉。○禮部遵旨議  
覆。致祭禹陵典禮。應照康熙二十三年致祭  
明太祖陵例。遣官致祭後。

平定縣志卷一百三十九

十一

皇上親詣奠酒。

上諭曰。堯舜禹湯。皆前代聖君。遣官致祭後。方  
親詣奠酒。未為允愜。禹陵朕將親祭。祭文內。  
可書朕名。又諭曰。祭以敬為主。禹陵僻處荒  
村。恐致褻慢。凡供獻。崇盛禮儀。諸事令左都  
御史馬齊侍郎席爾達同往省視。○賜扈從  
王大臣侍衛執事人。護軍校護軍等銀幣有  
差。○賜扈從尚書以下主事中書以上各官。  
綵緞有差。○庚戌。賜杭州駐防八旗男婦年

六十以上白金 辛亥

上渡錢塘江舟泊紹興府會稽山麓 壬子

上親撰祭文詣禹陵致祭率扈從諸臣行三跪

九叩禮祭文曰惟王精一傳心儉勤式訓道

由天錫啓皇極之圖疇功在民生定中邦之

井牧四載昔勞胼胝永賴平成九叙早著謨

謀惟歌府事行其無間德遠益新朕省方東

南道經吳越親長江之浩渺心切溯洄瞻高

巘之嵯峨企深仰止幸矣松楸伊邇儼然律

度可親特薦馨香躬修祀事惟祈靈爽尚克

來歆

上登窆石亭留覽是日

御舟泊蕭山縣西興鎮先是

上欲親視下河命侍郎徐廷璽巡撫于成龍先

往閱視至是回奏往下河所經水路甚淺不

通舟楫陸路亦甚難行且宿頓無所各口工

程俱遵

皇上指畫今工已及半凡所修治無可疑者

皇上似可無行報聞 癸丑

上駐蹕杭州府城傳諭明日即回鑾啓行杭州

將軍郭丕等奏請

聖駕暫留數日以慰官吏軍民瞻仰下懷

上曰朕前往江寧僅留一二日且杭州地濕水

土不甚相宜朕意已定郭丕等再三叩請乃

允更留一日又諭刑部尚書圖納等朕茲行

特為百姓閱視河道諮訪閭閻風俗因禹陵

在邇躬往致祭歸時便道過西湖聊爾寓目

非為遊觀也 甲寅諭福建浙江總督王隲

曰朕巡行江表緬懷禹德躬率羣臣展祭陵

廟顧瞻殿廡圯傾禮器缺畧人役寥寥荒涼

增歎愚民風俗崇祀淫祠俎豆馨香奔走恐

後宜祀之神反多輕忽朕甚慨焉在昔帝王

陵寢理應隆重培護況大禹道冠百王身勞

疏鑿真寧率土至今攸賴特書地平天成四

字懸之宇下令地方官即加修理畢備儀物

守祀人役亦宜增添俾規模弘整歲時嚴肅



兼賜白金二百。給守祀之人。此後益令敬慎。守土之臣。亦須時為加意。稱朕尊崇遐慕之懷。其各祇遵毋忽。

御製禹陵頌并序。序文曰。朕閱視河淮。省方浙地。會稽在望。爰渡錢塘。展拜大禹陵廟。瞻眺久之。敕有司修葺春秋蒞禩盛饗醴。必豐必虔。以志崇報之意。時康熙二十八年二月十四日也。緬惟大禹。接二帝之心傳。開三代之治運。昏墊既平。教稼明倫。由是而起。其有

聖祖實錄卷一百三十九

三十一

功於後世不淺。豈特當時利賴哉。朕自御宇以來。軫懷飢溺。留意河防。講求疏濬。漸見底績。周行山澤。益仰前徽。爰作頌曰。下民其咨。聖人乃生。危微精一。允執相承。克勤克儉。不伐不矜。隨山刊木。地平天成。九州始辨。萬世永寧。六府三事。政教修明。會稽鉅鎮。五嶽婉靈。茲惟其巖。陵谷式經。百神守護。松柏鬱貞。仰止高山。時切景行。○賜福建浙江總督王

鵬御衣涼帽。諭曰。爾任總督。凡事實心辦理。

操守清廉。浙江福建黎庶俱稱爾為清廉總督。故有是賜。○賜杭州將軍副都統等蟒衣綵幣。協領以下筆帖式以上各官。綵幣有差。○上幸演武場。賜將軍副都統以下兵以上官兵筵宴畢。閱官兵騎射。○乙卯。

上自杭州回鑾。舟泊石門縣石門鎮。○諭扈從部院諸大臣等。朕巡省民生風俗。行次浙江。見省會兵民俱相和輯。生齒蕃庶。閭里乂安。但觀民間習尚。好為爭訟。爭訟一興。則不肖

聖祖實錄卷一百三十九

三十三

有司。因緣詐索。勢所必至。縱或官員無所腴削。而胥吏作奸。究不能無私行勒取之弊。小民之牽連苦累者多矣。夫微忿不捐。構成嫌怨。小則耗損物力。大則傾隕身家。其為蠹害不可勝言。矜此愚民。允宜深戒。地方大小衙門官員。亦應各簡詞訟。勸導閭閻。俾守分息爭。共安生業。又夙聞東南巨商大賈。號稱輻輳。今朕行歷吳越州郡。察其市肆貿遷。多係晉省之人。而土著者蓋寡。良由晉風多儉。積

累易饒南人習俗奢靡家無儲蓄目前經營  
僅供朝夕一遇水旱不登則民生將至坐困  
苟不變易陋俗何以致家給人足之風爾等  
可傳諭將軍總督等令家喻戶曉務使敦本  
興讓崇儉黜浮兵民日益協和風俗日益淳  
樸詞訟日益減少積儲日益豐盈則教洽化  
行朕心實嘉賴焉○丙辰

御舟泊吳江縣○丁巳

上駐蹕蘇州府城○戊午松江府屬百姓以蠲

免錢糧建亭立碑祈祝

聖壽齋集行宮門外獻所刻碑文

上諭曰民為邦本休養宜先年來蠲免江南正  
供兼及積逋惟望百姓家給人足以副嘉惠  
元元至意今閱所進碑文足見汝等愛戴之  
忱第慮不肖有司指稱建亭立碑借端科斂  
猶厘朕懷其將碑刻發還衆民間諭感泣伏  
地奏云闔郡公舉並無科斂

天心過慮堯舜憂民亦不能如此碑刻特少展

微忱衆民不敢領去

上鑒其誠命將碑刻收入百姓皆呼萬歲諭  
扈從部院諸臣曰楚省兵譁時湖廣糧道葉  
映榴盡節捐軀朕心深加憫悼特詔所司優  
贈亞卿兼予卹廕今巡行江南見其子葉粵  
迎伏道左彌增軫惻忠節之臣應特予謚以  
彰異數爾等其會議以聞諸臣擬謚忠節

上即親灑宸翰賜之○江南蘇松紳士軍民等  
叩請

聖駕暫留數日以慰萬姓瞻天覲日之私并獻  
本處所產土物

上曰國家之用雖盡出於百姓朕茲南行民間  
之物秋毫無擾爾等既各輸誠姑取米一撮  
果一枚以慰民慇慇來貢之意至朕時巡事  
畢已奏聞

皇太后矣明日發駕不必勉留臣民復再三叩  
請繼以泣下

上勉俞其請命再駐一日先是浙江巡撫金

鑄以民杜光遇條陳兵丁擾民十款內稱自有駐防兵丁以來百姓生則倒懸死無安土等語批發藩臬二司查訊布政使李之粹並不會同按察使查訊遽移咨將軍出示禁約將軍郭不據咨入告

上命兵部尚書張玉書等察審至是張玉書等奏稱徧查杜光遇並無其人明係金鉉捏造無影之款李之粹附合金鉉情罪可惡並擬絞立決得旨金鉉流徙奉天地方李之粹充

平定縣丞

二十二

發黑龍江○已未諭扈從部院諸臣曰大理寺少卿張鵬翮為人頗優前任兗州府時居官素善著從優陞補浙江巡撫浙江按察使卞永譽著陞補浙江布政使江蘇按察使李國亮著陞補江蘇布政使俱著明日即行赴任其先補江蘇布政使于養志仍回湖北布政使任○兵部議覆湖廣總督丁思孔疏言武昌荊州並控大江常德岳州俱臨湖匯誠水陸兼重之區今此四郡皆係陸營並未設

有水師請各設水師三百名再查湖廣見設辰州水師營額兵四百名戰船四十隻沅州水師營額兵五百零八名戰船四十隻宜都水師營額兵四百名戰船三十八隻除沅州重地仍應留戰船二十隻兵二百五十四名以備接應外餘兵二百五十四名應改為陸兵統入沅鎮陸營辰州既有副將其水師竟可裁去即以所裁兵分撥荆岳二營宜都水師亦應改為陸營其新設武昌水師應於督標兵內選用常德水師應於提標兵內選用至三處所餘戰船計九十八隻應於武昌常德各設二十五隻荊州岳州各設二十四隻再湖北驛道所管沙船五十隻請分四十隻於武荆常岳四府作為戰船每營設守備千總各一員把總各二員應如所請從之○庚申

上自蘇州府啓行舟泊無錫縣放生池○浙江巡撫張鵬翮江蘇布政使李國亮浙江布政

使卞永譽請訓。

上諭張鵬翮曰。今地方寧靖無事。最要者兵民相安耳。浙省向來文武兵民恒不相得。今則皆已協和。爾其益務輯睦兵民。凡事從公。則得其平矣。昔日江南將軍瓦岱總督于成龍和衷一體。文武官亦皆同心共事。毫無滿漢兵民之別也。又諭李國亮卞永譽曰。布政使與巡撫事體相關。布政使能潔已自愛。守法奉公。雖巡撫亦無如之何。張鵬翮等因奏請遠送。

上曰。地方事重。爾等果盡心殫力。為國家循吏。較遠送不更多乎。○辛酉。

御舟泊丹陽縣。○陞廣東總兵官馬三奇為貴州提督。○壬戌。

上由陸路啓行。駐蹕句容縣城。○癸亥。遣官祭先農之神。

上至江寧。闔郡士民迎駕。是日。駐蹕江寧府城。○諭刑部尚書圖納。左

都御史馬齊直隸巡撫于成龍曰。朕巡行所過。見兵民相安。地方寧靖。村居稠密。然猶恐比屋不登。小民有不得其所者。且兵民雖享太平之福。尚慮無知。或抵觸法禁。用是大沛恩澤。蠲免錢糧。赦宥罪犯。以至官兵商民咸加恩恤。至於舟楫不通之所。令營馬預備。以應一時之需。并綠旗兵丁護從隨行。此皆伊等分內專責。但兵丁備馬勞苦。馬亦稍疲。宜示軫恤。一體加恩。爾等將綠旗兵丁備馬來者。察明人數。奏聞酌量給賞。朕以綠旗兵止官馬一匹。恐隨行備用日久疲乏。已令各回汛地。駐防滿洲兵所有馬匹業已足用。揚州所備者亦著停止。爾等即傳諭通知。○甲子。孝昭皇后忌辰。遣官祭陵。○

上詣明太祖陵。進前殿行禮。復至陵前奠酒畢。賜守陵人白金百兩。○江南民王來熊獻鍊丹養身秘書一冊。

上諭扈從諸臣曰朕於經史之餘所閱載籍多矣凡鍊丹修養長生及師巫自謂前知者皆妄誕不足信但可欺愚民而已通經明理者斷不為其所惑也宋司馬光所論甚當朕有取焉此等事朕素不信其擲還之○諭扈從諸臣曰朕往者巡幸江寧地方情形既已熟悉茲以閱河之便復來至此頃謁洪武陵又過後湖見地方官裝飾舟船以待朕自出京以來緯夫之外所需一切皆出帑金採辦不許分毫派取民間所御沙船特發庫銀修造扈從人等需用小船俱僦以官價故於今日地方官預備之船非惟不御并未往觀欲爾等共悉此意並傳諭江南江西總督傅拉塔等朕回鑾後勿謂此船乃朕所御妄令存貯其將造飾物料俱行拆毀於應用處用之○賜江寧將軍副都統等蟒衣綵幣總督總漕巡撫布政使按察使并八旗協領以下筆帖式以上各官綵幣有差○賜江寧駐防八旗

男婦年六十以上白金○江寧士民數萬人各捧土產米果食物奏稱

萬壽聖節在邇叩留

皇上駐蹕江寧使兆姓得遂頂祝之願

上諭曰朕定期二十七日賜宴二十八日啓行不必勉強爾等所貢方物但取米一撮即如全納士民攀留再三

上以其誠懇命再留二日於三月初一日啓行  
乙丑

上幸演武場賜將軍總督以下兵以上官兵筵宴畢閱官兵步射○諭江寧將軍博齊曰朕未至時即聞爾遭母喪顧沿途扈從効力勤勞殊可嘉獎去歲武昌兵擾爾心懷奮勵且聞事母頗孝今事已竟又有兩副都統在爾可歸喪次隨遣都統郎談往奠茶酒○

上幸觀星臺召部院諸臣問漢臣中有知天文者否皆奏曰臣等未能通曉乃問學院學士李光地爾所識星宿幾何李光地奏曰二十

八宿臣尚不能盡識。

上因令指其所知者。又問古曆觜參今為參觜。其理云何。李光地奏曰。此理臣殊未曉。

上曰。以觀星臺儀器測之。參宿至天中。確在觜宿之先。觀此足信。今曆之不悞矣。又問堯時中星。今移幾度。李光地奏曰。據先儒言。已差五十餘度。

上又問恒星動否。李光地奏曰。臣不能知。惟新曆言恒星天亦動。但其動微耳。

上曰。郭守敬儀器。不可行於今。由不知恒星天動故也。自來史志曆法。多不可信。質之以理。類空言無實。如熒惑退舍之說。天象垂戒。理則有之。若果退舍。後來推算者。以何積算。

上又歷指三垣星座。問李光地。不能盡舉其名。上指示從官。歷歷明析。尚書張玉書圖納等奏曰。

皇上聰明天縱。觀文察理。誠非愚臣等所能仰窺也。

上又披小星圖。按方位指南方近地大星。諭諸臣曰。此老人星也。李光地奏曰。據史傳。謂老人星見天下仁壽之徵。

上曰。以北極度推之。江寧合見是星。此豈有隱見也。丙寅。予故三等阿思哈尼哈番伊山。祭葬如例。○賜京口將軍副都統等蟒衣。綵幣。協領以下筆帖式以上各官綵幣有差。○賜京口駐防漢軍男婦年六十以上。白金。○丁卯。春分。朝。

日於東郊。遣都統喇克達行禮。○陞山東東兗道李煒為廣東按察使。司按察使。

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百三十九

實錄卷一百三十九

三十一

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十八年己巳三月戊辰朔

實錄卷一百四十

一

御舟自江寧府啟行泊上元縣朱家嘴○陞揚  
州府知府高承爵為江蘇按察使司按察使  
○調鑲白旗蒙古副都統尚圖為滿洲副都  
統陞護軍叅領噶爾瑪為鑲白旗蒙古副都  
統○以功加左都督何應元為雲南楚姚蒙  
景總兵官○賞江寧鎮江杭州駐防兵丁一  
月錢糧○已巳

御舟泊金山寺○工部題前管理下河戶部右  
侍郎開音布等疏請挑濬串場河並丁溪草



堰。白駒石碓及車兒埠下。滔子河起至苦水洋之處。經臣部議如所請。嗣復差侍郎徐廷璽巡撫于戒龍。勘閱回奏。自丁溪至白駒有通海之口三處。又滔子窰上有歸入丁溪場之馮家壩小河一道。若將此處挑濬。則河埽之水。可由丁溪流入苦水洋。應如所題挑濬餘悉停止。再上河為下河本原。互有相關。責成一人總理。則上下河道可以兼顧。應將下河事務一并交與河道總督王新命管理。開

音布撤令回京。從之。○庚午。

實錄卷一百四十一

二

御舟泊揚州寶塔灣。○諭扈從諸臣曰。朕前閱中河。初疑狹隘。今行經丹陽。閱視河道。亦復狹隘。又聞衆官民俱言中河挑濬有益。所關甚大。爾等會同總河總漕確議以聞。○河道總督王新命遵旨議覆。尚書張玉書等奉命看河奏稱。攔馬河洩黃水三壩。原以宣洩黃河異漲之水。似應仍留。隨機開放。再駱馬湖減水壩三座。議留二座。減水入中河。留一座。

於遙隄之外。又以中河逼近黃河。而運河駱馬湖水俱入此河。恐河窄不能容納。令於中河往東蕭家渡楊家莊新莊口。有黃河衝決入海舊河形之處。量建減水壩三座。減洩。臣竊謂既以運河駱馬湖水俱入中河。河窄不能容納。何必又留此二壩之水。減入中河。復於蕭家渡等處建壩減出。不若將此三座減水壩俱留。遙隄之外。令由舊河形入海。於蕭家渡舊河形三處量留缺口二處。用竹絡裝入石塊。酌水勢高下堵塞宣洩。以免衝漫。又以支河口議令閉塞於鄰近處。建板閘一座。查支河口。乃北運河會同微山湖荊山口。彭河沂河。泗河白馬等河並鎮口間之水流入黃河之口。一板閘豈能宣洩。不若仍舊聽其流通。如水勢淺阻。則建草壩閉塞。令其全入中河。以濟運道。又駱馬湖入黃河之口。令臣驗明建減水壩二座。臣兩次親驗。隄外湖口水深二丈有餘。難以建壩。不若用竹絡裝石。

實錄卷一百四十一

二

高出水面二三尺成造堵塞再查駱馬湖原止匯沂河白馬河運河微山等湖泛溢之水會入黃河至沭河本東流由沭陽入海郟城之東八里許迎沭水之口有禹王臺相傳禹治水引沭水穿山而西恐其害郟故築此臺以遏水勢及明代毀臺取石修城以致數年來沭水西流由郟城北會白馬河沂河等水入駱馬湖不惟沂郟邳宿嶧各州縣歲受淹沒之害而駱馬湖黃河亦愈覺泛濫應於禹王臺舊基處亦迎水用竹絡聚石堵塞內築土隄斷流令其仍舊由故道入海非但駱馬湖黃河水勢得以減殺而沂郟宿嶧各州縣亦可免淹沒再歸仁隄五堡減水壩被水衝壞議令修理臣查倒壞漫溢之口不止一處若止修五堡減水壩仍然無益請暫停修築得旨本內事情著扈從諸臣確議具奏○辛未遣官祭

歷代帝王○

御舟泊揚州府○壬申御舟過淮安府○癸酉

御舟泊清河縣清口○甲戌

上率扈從諸臣自七里閘太平閘閱視高家堰一帶隄岸閘壩顧諸臣曰觀此隄岸頗為堅固此隄亦不可無減水壩若將減水壩輕塞湖水勢大隄岸安保無虞但舊隄之外更築重隄實屬無益蓋湖面高隄勢卑若舊石隄果不能保以上新築之重隄何足以遏之徒使石隄兩面皆受水耳凡事必親歷乃知爾等其詳加閱視又諭諸臣曰前總河王新命奏言天長盱眙六合等處雨水皆自洪澤湖入高郵諸湖湖水漸溢田廬往往淹沒聞天長盱眙六合舊有河通江其形尚存今若疏濬此河使諸處雨水歸之於江則淮流減而不溢隄岸不至衝決下河之水亦少而易涸矣朕於治河之事究心年久蓋黃淮水勢相敵則清口刷而海口開淮水弱則黃水倒灌

湖底淤墊隄勢危而海口閉塞矣。此千古不易之定理。先年因高家堰衝決。淮水東流。無敵黃之力。黃水倒灌。湖底淤墊。海口閉塞。此其實驗也。高家堰既有減水壩。不可又令分流。使淮河水弱。但遇大澇之年。淮水盛漲。出清口不及。則隄必受傷。故朕意以王新命所奏亦有可行。何則。通江之河。若果挑濬。必於淮水會合之處。修置板閘。苟淮水盛漲。則啓閘以分其流。黃淮均敵。則閉閘不令旁溢。如此庶可無患矣。○是日。

御舟過桃源縣○乙亥。

御舟泊宿遷縣○尚書張玉書圖納蘇赫左都御史馬齊侍郎賽弼漢席爾達張英徐廷璽河道總督王新命等會議中河事。奏言從前挑濬中河。原避黃河一百八十里之險。且東散漫之水。使不致淹沒民田。止因黃河逼近。不便挑寬。應將中河無庸另議。其駱馬湖減水三壩。應如張玉書等所奏。將二壩之水。令

流入中河。其一壩之水。留在遙隄之外。令流入海。至張玉書等奏駱馬湖入黃河口。建減水壩二座。支河口建閘一座。中河北隄建修減水壩三座。俱應停止。如王新命所議行。上曰。爾等疏言駱馬湖三減水壩。以二壩水歸中河。其一壩令水從遙隄外入海。不致淹損民田。否。張玉書等奏曰。遙隄外向有通流故道。可無淹損。

上曰。所建諸壩。爾等議用竹絡盛石。可保永遠乎。王新命奏曰。若建石壩。所費不貲。不如竹絡費省。易成。且臣鄉川江泛溢。亦常用此奏效。

上曰。中河之水。取資於駱馬湖。汝欲修禹王臺。以禦流入駱馬湖之水。倘遇大旱之歲。中河不致淺涸否。王新命奏曰。湖水甚大。似可無慮。

上又問諸臣曰。中河逼近黃河。黃水泛漲。恐為中河害。奈何。圖納奏曰。清江浦諸處隄岸。與

黃河止隔一線。從來亦未有衝決。

上又顧王新命曰。中河工尚未成。善後事宜。爾須留心。隨處修治。遙隄減水壩。所關尤要。天時旱潦。不齊。爾當相其緩急。先時整理。至於黃河險工。靳輔修挑水壩。令水勢迴緩。甚善。王新命奏曰。

聖諭至當。臣當竭力奉行。丙子。吏部等衙門議覆山西巡撫葉穆濟疏言。大計不謹。罷軟等官。雖經具疏。必俟部文到日。方行委官署理。交代離任。誠恐此等官員。自知被劾。官箴民瘼。益罔顧恤。且致銜役乘機滋弊。請嗣後計叅之官。及督撫不時題叅之官。於拜疏之日。即行遴官委理。再武職官有不職者。其被劾之後。亦照文職例。舉行應如所請。從之。○叙平楚逆。夏逢龍功。給湖廣提督徐治都。辰州副將郭忠孝。各一拖沙喇哈番。其餘將弁俱加等授職。有差。贈湖廣陣亡永定營守備孟泰。為署遊擊。廕一子以衛千總用。○戊

寅

御舟泊濟寧州天井閘。○吏部議覆工科給事中譚瑄疏言。各省大計。所叅年老一條。多開教職充數。臣思教職專司訓飭生員。無刑名錢穀之責。若果衰邁。聾瞶者。仍令照例題叅。其年紀雖老。而精力未衰。尚能課士者。停其開列。年老。應如所請。從之。○調杭州副都統董元卿為京口副都統。予故江西提督趙國祚祭葬。謚敏壯。○己卯

御舟泊壽張縣西河灣。庚辰。

御舟過東昌府。辛巳。

御舟過臨清州。○以盛京旗民日增。較前稠密。事繁員少。添設刑部郎中二員。員外四員。筆帖式十四員。○吏部議覆廣東道御史阮爾詢疏言。各部員外等官。由外官陞授者。歷久未經到任。以致事多廢弛。請嚴違限處分。之例。查定例。官員赴任。捏稱患病。遲延者。及出結各官。俱罰俸。今應將捏稱中途患病。遲延

者改革職出結之官改降級調用從之○陞  
杭州府知府馬如龍為浙江按察使司按察  
使○壬午清明節遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后陵○是日。

御舟過故城縣○乙酉。

萬壽節停止行禮筵宴○遣官祭

福陵。

昭陵。

暫安奉殿。

孝陵。

仁孝皇后。

孝昭皇后陵○遣官祭真武東嶽城隍之神○

是日。

上至天津皇太子諸皇子在京內大臣侍衛等  
迎

駕。

上由陸路啓行駐蹕武清縣○丙戌。

上進崇文門因和碩安親王岳樂薨逝未發引。

親臨其第奠酒舉哀畢還宮諸

皇太后宮問安○陞福建汀州副將薛受益為

廣東潮州總兵官○丁亥兵部議覆兵科給

事中能泰疏言考取滿洲生員宜試騎射應  
如所請。

上命如議又諭曰滿洲以騎射為本學習騎射

原不妨礙讀書考試舉人進士亦令騎射倘

將不堪者取中監箭官及中式令一并從重

治罪○諭大學士等總漕馬世濟有疾著原

品休致其員缺以兵部右侍郎董訥補授○

以鑲黃旗滿洲副都統黃海正白旗滿洲副

都統胡西塔懶惰才力不及俱著解任○戊

子諭大學士等朕巡行南省閱視河道江南淮安諸地方自民人船夫皆稱譽前任河道總督靳輔思念不忘且見靳輔濬治河道上河隄岸修築堅固其於河務既克有濟實心任事勞績昭然著復其原品○九卿等議覆戶部疏言各省藩司庫銀屢以虧空見告應於每年奏銷時該撫將新舊存庫銀兩清查一次如無虧空於奏銷本內保題倘保題之內仍有查出虧空者將巡撫照交盤例治罪又各州縣官虧空錢糧往往於去任之後始得發覺請敕藩司知府將州縣錢糧每歲察核如有隱匿不舉事發以徇庇議處又民間最苦私派乃私派之中有部費名色請敕各督撫嚴行禁飭又各布政司每年奏銷錢糧內有駁察核減者有不准支銷見在察核另案歸結者有民欠未完官役侵那者請令該布政司於每年終將歷年未清各案錢糧開明舊管新收開除實在并完欠細數造冊報

部俱應如所請從之○以福建海壇總兵官穆維雍為杭州副都統陞江南壽春營副將楊元弼為福建海壇總兵官○以杭州副都統朱山庸劣著解任○辛卯

上詣

皇太后宮問安○陞左副都御史王維珍為兵部右侍郎○以正白旗漢軍副都統對泰懶惰才力不及著解任○壬辰

上御太和門視朝文武陞轉各官謝恩次喀爾喀進貢使臣等行禮○以內閣學士彭孫遹郭琇充經筵講官○以原任工部尚書杜臻為刑部尚書○先是兵部議江西道御史錢三錫請定武闡條例一疏以馬箭中三箭步箭中二箭者為合式奉旨馬箭弓刀等項俱已合式惟因步箭中不及兩箭不准合式似屬屈抑著再議至是議步箭雖未中式其射法精善者亦准考取至比箭之時應令內大臣都統內閣大臣與臣部公同監試庶善射

者不致遺漏得旨嗣後武鄉會考試馬箭以中四箭為合式步箭以中一箭為合式餘依議○以武備院總管馬思喀為鑲黃旗滿洲副都統○癸巳以戶部右侍郎開音布為正白旗滿洲副都統○甲午

上奉

皇太后幸暢春園○乙未以翰林院侍講王頊齡編修曹鑑倫充日講起居注官○丙申諭大學士等凡地方文武官員務須各盡職掌

實心任事龜勉効力方為稱職今見直隸各省文武各官多有虛糜廩祿怠玩因循事務廢弛行伍虛冒船隻任其朽壞器械全不整理且有無多寡茫然不知總因分內職業視為具文漫不經心殊屬不合著各該督撫提鎮通行所屬官員嚴加申飭令其痛改積習力圖振刷恪勤守職如仍前玩忽定行從重治罪○丁酉以原任都察院左副都御史吳璵補原官○增設火器營操練官各五員派

每旗副都統一員兼管

閏三月戊戌朔陞左副都御史阿山為戶部右侍郎○吏部右侍郎王封滌丁母憂命回籍守制○己亥陞前鋒叅領色格印為正白旗漢軍副都統○陞前鋒叅領索羅希為杭州副都統○壬寅

上詣

皇太后宮問安○諭兵部朕幸江南浙江見驍騎校小撥什庫披甲內曾効力行間材力壯健者甚多此輩出兵時有雖得功牌未應得官者亦有因罪抵銷功牌者因是皆不得擢用淹滯可惜其行文江寧杭州荊州西安滿洲將軍副都統等如果有才堪管轄及曾經効力者選擇十人或十五人不拘旗分遇彼處佐領防禦品級官員驍騎校缺出即將選擇之人一并咨送來京爾部引見以備任用○正紅旗蒙古副都統穆呈額以老病乞休允之○賑濟江南亳州被水饑民○甲辰



上回宮。命八旗漢軍副都統田象坤張俊色格印科爾代。蘇曷郎化麟。翁維邦張朝午等。各兼管本旗火器營事。○乙巳。

上御經筵講畢。賜大學士九卿詹事及講官等宴。○陞內閣學士郭琇為吏部右侍郎。○丙午。

上幸暢春園。○丁未。免河東康熙二十八年分額徵鹽池地租。○諭戶部。國家設關權稅。原以通商裕課。利益民生。非務取盈。致滋紛擾。

朕巡行地方。軫恤民隱。諮諏利弊。有應興革者。即見諸施行。近聞江浙閩廣西省海關於大洋興販商船。遵照則例徵取稅課。原未累民。但將沿海地方。採捕魚鰕。及貿易小船。槩行徵稅。小民不便。今應作何徵收。俾商民均益。著九卿詹事科道會同確議以聞。○戊申。陞少詹事恕舒為都察院左副都御史。○庚戌。增造在京倉廩三十座。○壬子。

上奉

皇太后回宮。○陞翰林院侍讀學士顧汧為內閣學士兼禮部侍郎。○予和碩安親王岳樂祭葬。立碑。謚曰和。○乙卯。

上詣

皇太后宮問安。○旌表山西烈婦賈應鳳妻賈氏。拒姦殞命。給銀建坊如例。○丙辰。戶部議覆偏沅巡撫興永朝疏言。丈量湖南地畝。及豪強侵隱者。准自首免罪。應如所請。得旨。丈量地畝。地方經營各官。務須潔已奉公。實心任事。勿得借端生事。科派擾民。如有濫派滋擾者。事發。照貪官從重治罪。

上謁

陵。是日啓行。駐蹕夏店。○丁巳。

上駐蹕薊州。○戊午。

上詣

暫安奉殿。行禮。舉哀。隨詣

孝陵。行禮。舉哀。又至

仁孝皇后

孝昭皇后陵舉哀是日駐蹕湯泉（己未）

上詣

暫安奉殿奠酒舉哀是日回鑾駐蹕馬伸橋（

庚申）

上駐蹕夏店（辛酉）

上回宮詣

皇太后宮問安（壬戌）宗人府進呈

玉牒

上御中和殿受之隨御太和門總裁纂修等官

行禮賜總裁纂修等官銀幣有差（癸亥）遣

吏部尚書阿蘭泰戶部尚書徐元文審理在

京獄囚諭曰時已入夏天氣亢陽農事方殷

雨澤未降朕軫念民依深為惓切或因刑獄

中有無知罹法審擬失平情罪未符致干

天和亦未可定茲特遣阿蘭泰徐元文會同三

法司將已結重案見在監禁者逐一詳加審

理凡有罪可矜疑即與察明事由開列具奏

務俾情法允協不致淹滯國罪以副朕省刑

恤民至意丙寅陞京口協領栢天毓為西

安右翼副都統（江西南瑞總兵官陳平以

病乞休命原品致仕

夏四月丁卯朔享

太廟

上親詣行禮（戊辰）

上詣

皇太后宮問安（九卿遵旨議覆海關抽稅事

一議錢糧無多應交地方官徵收又一議交

與地方官則無專管之員應仍差官收稅至

海中船隻何者應免收稅惟候

聖裁得旨採捕魚鰕船隻及民間日用之物并

餉口貿易俱免其收稅嗣後海關著各差一

員（陸通政使李迥為都察院左副都御史

（己巳）

世祖章皇帝恭靖妃薨

上輟朝三日（辛未）

上詣

皇太后宮問安○癸酉陞廣東龍門副將趙彝鼎為江西南瑞總兵官○兵部左侍郎張可前以還葬乞假允之○甲戌以巴林故固山貝子溫春子俄爾得尼襲爵○乙亥頒

御製孔子贊序及顏曾思孟四贊命翰林官繕寫國子監摹勒分發直隸各省序曰蓋自三才建而天地不居其功一中傳而聖人代宣其蘊有行道之聖得位以綏猷有明道之聖立言以垂憲此正學所以常明人心所以不

泯也粵稽往緒仰溯前徽堯舜禹湯文武達而在上兼君師之寄行道之聖人也孔子不得位窮而在下秉刪述之權明道之聖人也行道者勲業炳於一朝明道者教思周於萬世堯舜文武之後不有孔子則學術紛淆仁義湮塞斯道之失傳也久矣後之人而欲探二帝三王之心法以為治國平天下之準其奚所取衷焉然則孔子之為萬古一人也審矣朕巡省東國謁祀闕里景企滋深敬摛筆

而為之贊曰清濁有氣剛柔有質聖人參之人極以立行著習察舍道莫由惟皇建極惟后綏猷作君作師垂統萬古曰惟堯舜禹湯文武五百餘歲至聖挺生聲金振玉集厥大成序書刪詩定禮正樂既窮象繫亦嚴筆削上紹往緒下示來型道不終晦秩然大經百家紛紜殊途異趣日月無踰羹牆可晤孔子之道惟中與庸此心此理千聖所同孔子之德仁義中正秉彝之好根本天性庶幾夙夜昂哉令圖溯源洙泗景躅唐虞載歷庭除式觀禮器擣毫仰贊心焉遐企百世而上以聖為歸百世而下以聖為師非師夫子惟師於道統天御世惟道為寶泰山巖巖東海泱泱牆高萬仞夫子之堂孰窺其藩孰窺其徑道不遠人克念作聖顏子贊曰聖道蚤聞天資獨粹約禮博文不遷不貳一善服膺萬德來萃能化而齊其樂一致禮樂四代治法兼備用行舍藏王佐之器曾子贊曰洙泗之傳魯

以得之一貫曰唯聖學在茲明德新民止善為期格致誠正均平以推至德要道百行所基纂承統緒修明訓辭子思子贊曰於穆天命道之大原靜養動察庸德庸言以育萬物以贊乾坤九經三重大法是存篤恭慎獨成德之門卷之藏密擴之無垠孟子贊曰哲人既萎楊墨昌熾子輿闢之曰仁曰義性善獨聞知言養氣道稱堯舜學屏功利煌煌七篇並垂六藝孔學攸傳禹功作配○陞正紅旗護軍叅領額爾贊為蒙古副都統○丙子調正白旗滿洲副都統開音布為步軍統領○已卯先是。

上以雨澤愆期命大學士等傳問九卿政事得失令詳議陳明至是大學士伊桑阿等奏九卿言

皇上仁恩浩蕩蠲免錢糧慎重刑獄諸事盡善臣等實無可言

上復傳諭曰自去秋以來雨雪不能霑足聞直

隸山西山東以至江南浙江皆旱心甚憂之屢諭九卿或有未當之事及應行之事令其陳奏曾不得一朕思政事失於下則災患應於上如影響然尚書洪範曰僭恒暘若蒙恒風若去歲將舊任諸臣罷斥甚多擇其有品有守者用之至於在外督撫司道等官近亦頗有令聞似應風雨以時以此觀之所關必在於上非由他故諸臣肯直言乎至祈雨一事朕非不留意前此屢率諸臣禱於

天壇幸皆遇雨此天愛蒼生於朕毫無與焉目今諸臣誠心祈禱與朕祈禱無異若能切直言事是即所以召甘霖也朕自幼過勞知慮所及弗復如前目力不能書寫細字諸疾時作不離灼艾今一身之識見精力不敢自恃惟爾諸臣之勤慎是賴明示朕懷與諸臣共悉之○諭大學士等頃者時已初夏雨澤雖降而猶未霑足其命禮部照前祈禱之禮三日禁止殺牲不理刑名事務虔恭齋祓以祈

甘雨。遣理藩院尚書阿喇尼、散秩大臣吳巴錫、歸化城札薩克大喇嘛阿齊圖、綽爾濟一等侍衛阿南達、使厄魯特。諭曰：噶爾丹必問及巴圖爾額爾克濟農之事。爾等但述丑年四月之約，並言達賴喇嘛向亦遣使至西海，及我使者定議，令羅卜臧滾卜阿喇布坦與巴圖爾額爾克濟農等同居一處。至今尚未同居。且巴圖爾額爾克濟農雖在我地駐扎，並未受彼歸順，分為旗隊。況厄魯特喀爾喀交惡之後，巴圖爾額爾克濟農請曰：乘此機會，欲復我讐。但我兵器已易粟而食，乞賜我等兵器。亦曾諭而遣之曰：厄魯特喀爾喀向俱誠心朝請職貢，朕未嘗異視。但欲使兩國罷兵安生而已。豈肯給爾兵器，使爾與戎耶。其以是答之。將此等案卷俱錄之。以往爾等間論時，當以已意語濟爾噶郎。寨桑曰：噶爾丹倘不奉詔，則絕爾等每年進貢貿易之路。厄魯特人衆必大失利矣。阿喇尼等又奏

噶爾丹有請安進貢貿易等使，欲與臣等偕發。臣等應令其同來。

上是之。賜噶爾丹敕曰：朕統御宇內，率土生民，皆朕赤子。一夫失所，朕心憫焉。雖窮鄉異域之民，亦必撫養，俾以安和，各得其所。前聞喀爾喀右翼札薩克內自作亂，兄弟屬裔多歸左翼。其左翼札薩克兄弟屬裔亦有歸右翼者。喀爾喀兩翼七旗汗濟農台吉等皆累世職貢，與本朝通好。今彼兄弟互相吞噬，特敕達賴喇嘛約同遣使，諭令和好，共享安樂。達賴喇嘛謂朕垂憐衆生，同於父母，故遣使與朕所遣使臣等偕往，使七旗喀爾喀會閱，令其兄弟立誓。此乃朕欲喀爾喀汗濟農台吉等式好無尤，同享安樂之意也。其後土謝圖汗奏至云：聞厄魯特兩路來攻，因而興兵迎敵。朕念厄魯特喀爾喀皆累世職貢不絕，並無異視。若果交惡，有一殘毀，朕心殊為不忍。故敕所司傳檄於爾，復諭喀爾喀土謝圖汗

曰厄魯特噶爾丹恭順職貢有年果舉此大事豈有不奏聞於朕者或係不逞之徒從中交構離間若厄魯特未動而爾等先舉則此亂自爾始矣達賴喇嘛亦遣使與爾解紛朕又遣阿齊圖綽爾濟學士拜里前往此朕待厄魯特喀爾喀一體無異之至意也乃喀爾喀上謝圖汗澤卜尊丹巴胡土克圖等自作弗靖違旨興戎又先發兵殺札薩克圖汗及得克得黑墨爾根阿海又殺爾弟多爾濟札卜。是自取滅亡耳。爾因彼先舉遂興兵破喀爾喀其過在喀爾喀不在爾也。爾本敬奉佛教之人雖焚喀爾喀地方廟宇毀其佛像朕亦不深責爾。今喀爾喀為爾所敗其汗濟農台吉等率舉國之人前來歸朕朕矜其流離窮困雖向非屬國而隨屬國之列誠心職貢且追念彼為元之苗裔窮而來歸即以所屬待之朕統御天下來歸之人若不收撫誰撫之乎故受而安插於汎界之外其窮困人民

賑以米糧而嚴責其興戎之罪復其汗濟農台吉之號以車臣汗之子仍襲為汗朕興滅繼絕之念非特於喀爾喀已也諸國有窮迫來歸者朕皆一體撫養不但朕所行如此即達賴喇嘛養育衆生之心亦與朕同伊若歸達賴喇嘛亦必如是撫之戰爭非美事展轉報復將無已時讐敵愈多亦不能保其常勝是以朕欲爾等解釋前讐互市交易安居輯睦永息戰爭特遣使齎旨前來汝果遵朕諭旨自今以後各守疆界不興兵戎既不失輯睦之道爾兩國人民亦免塗炭朕普恤羣生俯念爾素不違旨特遣尚書阿喇尼等諭意又令伊拉古克三胡土克圖商南多爾濟等與達賴喇嘛使人同往吏部議覆江南江西總督傅拉塔疏叅贛縣知縣劉瀚芳科派婪贓江西布政使多弘安按察使吳延貴等不行詳究明係徇庇查官員徇庇例降三級調用今多弘安等於屬縣私派之案不行詳

究恐別有情弊不便照常例議處請將多弘安等革職發審從之○庚辰

上詣

皇太后宮問安○壬午喀爾喀班第達厄爾德

尼台吉遣使進貢賞賚如例○癸未

孝端文皇后忌辰遣官祭

昭陵○甲申

上詣

皇太后宮問安○調正白旗蒙古副都統郎伊

平定縣志卷一

二十八

達為滿洲副都統陞正白旗護軍叅領雅途

為蒙古副都統○河道總督王新命疏言下

河七邑民田久罹淹沒我

皇上念切拯救再行巡視河工命臣兼理臣詳

勘下河形同側釜丁溪草堰白駒等海口誠

洩水要道自開岡門白駒二口以來勢雖疾

趨東下但深淺不等尚未一律深通應速行

挑濬惟是目今已屆孟夏伏水將至白駒一

工去海不遠潮水甚大草堰一工挑過無幾

應俟今冬明春水退潮消之日尅期興作止

丁溪一口去海稍遠臣相度形勢自沈家竈

至撈魚港及丁溪閘下木挑工程次第先行

挑濬至串場河為西來諸水匯歸下丁溪草

堰白駒等河入海之要道所有應挑三十七

里已經乘時趲挑矣下所司知之○乙酉陞

山東按察使王樑為江西布政使司布政使

○丙戌

上詣

平定縣志卷一

三十九

皇太后宮問安○丁亥轉兵部右侍郎王維珍

為左侍郎陞左副都御史吳璥為兵部右侍

郎○陞按察司副使管福建臺灣府事蔣毓

英為江西按察使司按察使○戶部議覆直

隸巡撫于成龍疏報昌平州民馮三等自首

出開墾地共一百二十一頃查從前隱地不

報例應治罪但既經自首應免議至錢糧應

自開墾之日起科從前不行查出之該管官

亦應處分得旨馮三等既行自首免其按年



追徵該管官員不必查取職名嗣後民人自首地畝不必拘定年限俱自出首之年起科該管官員亦免議處○己丑以翰林院編修史夔周金然充日講起居注官○辛卯上詣

皇太后宮問安○壬辰鄂羅斯遣使費要多羅等至尼布潮地方請議分界事宜

上復遣領侍衛內大臣索額圖等赴尼布潮就議索額圖奏言尼布潮雅克薩既係我屬所

居地臣等請如前議以尼布潮為界此內諸地皆歸我朝

上曰今以尼布潮為界則鄂羅斯遣使貿易無棲託之所勢難相通爾等初議時仍當以尼布潮為界彼使者若懇求尼布潮可即以額爾古納為界并調黑龍江兵一千五百人往會之○喀爾喀岳蘇圖阿海台吉率所屬來歸命駐牧烏闌地方○陞順天府府尹許三禮為都察院左副都御史○命臺灣府開爐

實錄卷一百四十一

三

鼓鑄○甲午先是喀爾喀王謝圖汗等以米糧將盡續到二萬餘人不能贍給奏請賑濟

上命領侍衛內大臣伯費揚古等齎銀兩茶布

前往散給至是諭大學士等曰朕聞喀爾喀

乏食有至餓死者深為軫念頃雖令內大臣

費揚古等齎茶布銀兩採買牲畜賑其乏絕

但採買尚需時日若不速發糧以拯之則死

者愈多矣澤卜尊丹巴胡土克圖見有貿易

駱駝百餘在張家口並內駟廠及太僕寺駱

駱駝共發一百

三

駝共發一百將張家口倉米星速運到散給

計支一兩月間費揚古等所買牲畜可繼之

矣如此則喀爾喀可活也其令侍衛吳達禮

侍讀學士西拉投廠侍衛太僕寺堂官戶部

賢能司官各一員前往經理○乙未禮部議

覆巡視南城御史阿通賽疏言亳州民李殿

機於康熙二十三年賣身鑲紅旗護軍厄爾

庫為奴厄爾庫給婢蕭氏為妻其李殿機幼

時聘妻王氏在籍未娶王氏年三十四歲被

伊叔伊兄逼嫁不從。偵知李殿機尚存。千里尋夫。誓圖完聚。厄爾庫重王氏節義。不取身價。願將李殿機並蕭氏放出為民。給與完聚。查旗人無斷出為民之例。但王氏天心守節。冒死尋夫。有關風化。應如所題。並令王氏母家給與資陪。令其得所。從之。

實錄卷一百四十

三十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十一

監修總裁官光祿大夫太僕寺卿太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院學士加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十八年己巳五月丙申朔傳雲南省

鼓鑄○丁酉

上詣

皇太后宮問安○戊戌

仁孝皇后忌辰遣官祭

陵○庚子夏至祭

地於

方澤遣領侍衛內大臣舅舅佟國維行禮○諭

大學士等近聞山海關外盛京等處至今無

雨尚未播種萬一不收轉運維艱朕心深為

憂慮且聞彼處蒸造燒酒偷採人參之人將米糧糜費頗多著戶部左侍郎賽弼漢前往奉天會同將軍副都統侍郎等將此等糜費米糧之處嚴加禁止○壬寅

上詣

皇太后宮問安○以天時亢旱命停止一應修葺工程○甲辰調翰林院掌院學士李光地為通政使司通政使○乙巳以吏部尚書阿蘭泰為武英殿大學士戶部尚書徐元文為文華殿大學士○轉戶部尚書鄂爾多為吏部尚書禮部尚書麻爾圖為戶部尚書陞內廷行走侍郎顧八代為禮部尚書○陞左通政黃斐為順天府府尹○旌表河南節婦蘭陽縣尹氏杞縣林氏各給銀建坊如例○丁未遣官致祭

天地

社稷壇禱雨○陞吏部右侍郎郭琇為都察院左都御史○陞福建浙江總督王鵬為戶部

尚書○陞山東濟寧道楊廷耀為山東按察使司按察使○戊申遣官祭

關聖帝君○諭大學士等翰林掌院一官職任緊要必文學淹通衆所推服者始克勝任凡翰林撰擬之文亦須掌院詳加刪潤然後成章朕觀邇來皆草率從事衙門事務隳廢殊甚聞明代大學士有兼管掌院之例大學士徐元文著兼管翰林院掌院學士事○一等精奇尼哈番席喇緣事革職以其子薩來襲替○巳酉

上詣

皇太后宮問安○庚戌大學士九卿等奏曰近聞山東河南大雨霑足直隸大名諸府皆有雨京城昨晚亦已得雨

皇上於宮中日日虔禱朝夕微惕茹素修省憂勞過甚請稍舒

睿懷以頤養

聖躬

上曰朕可與他人比耶先人而憂後人而樂理固宜然近因久旱無雨憂勞過甚以致羸弱人或可欺天亦可欺耶日前祈雨朕雖未躬往而每次祈禱朕皆竭誠齋戒荷天之眷得降雨澤此後雨澤霑足朕庶解焦勞也又命禮部侍郎張英傳諭諸臣曰朕從來覽觀載籍備悉古帝王遇災修省之道所以深加儆懼遇有災變即小心兢業朕之憂慮恒在衆人之先今畿輔地方亢旱日久念係根本之地故朕心甚為憂惕寢食靡寧耳可傳諭諸臣知之○壬子陞內閣學士李振裕為吏部右侍郎○陞偏沅巡撫興永朝為福建浙江總督○癸丑禮部奏自雨澤愆期先後祈禱皇上當致齋之日齋居殿右兩餐進粥朝夕靡寧本月十四日雷電大作繼以甘雨萬口懽騰皆謂天心默佑自此霑足有期請聖躬調攝起居服御一切如常又查祈禱之後遇有雨澤必行報祭應照例舉行得旨屢經

虔禱雨澤雖降尚未霑足朕焦勞猶甚所奏辭語太過著飭行○甲寅予故貴州大定總兵官葛秉貞祭葬如例○丙辰陞江南安徽布政使鄭端為偏沅巡撫○戊午陞翰林院侍讀學士孫在豐為內閣學士兼禮部侍郎○辛酉上幸暢春園○以刑部尚書杜臻充經筵講官○壬戌禮部右侍郎張英等以編纂孝經衍義告成進呈御覽得旨孝經一書皇考世祖章皇帝以孝為萬事之綱五常百行皆本諸此命儒臣博採羣書加以論斷名曰孝經衍義朕繼述先志特命纂修今書已告成著刊刻頒發以副皇考孝治天下至意○刑部等衙門議黑龍江協領楊武代等將運至軍需米石用大斗量收侵漁入已反稱米石缺少勒令車戶賠補應論死其副都統瓦禮祜失於覺察應革職

將軍殷圖以患病未經理事。罰俸一年。得旨。殷圖著革去將軍任。餘依議。○陝西提督孫思克疏言。厄魯特羅卜臧滾布病故。其妻與寨桑等。以噶爾璽多爾濟係車臣汗嫡孫。乃羅卜臧滾布叔伯之子。欲遣人往召。令其統領部落。得旨。羅卜臧滾布率所屬來歸。恪守法度。誠心職貢。可遣官致賻。羅卜臧滾布既亡。部落人民。無所統屬。其弟噶爾璽多爾濟名之。恐未能即到。聞巴圖爾額爾克濟農意欲先往。令馬迪等傳諭巴圖爾額爾克濟農。與之同去。噶爾璽多爾濟未到之先。令巴圖爾額爾克濟農暫為約束人民。俟其到日。仍歸本地。毋得以噶爾璽多爾濟年幼欺凌謀占。務期同心一意。共相扶掖。馬迪等仍遣人往召噶爾璽多爾濟。○癸亥。理藩院題。前因喀爾喀厄魯特於邊境構兵。奉上諭。蘇尼特。四子部落。毛明安。吳喇忒。鄂爾多斯等旗。共派兵六千。俱令於沿邊形勝之地。

駐防。又令歸化城兩旗。派兵一千屯駐城內。以備緊急調遣。今既傳聞厄魯特發兵二支。一支從阿爾泰之後。攻昆都倫。一支從達爾漢親王旗分之北前進。應較去歲所發之兵。量減其半。仍令前所派領兵王。貝勒。台吉等照常備之。八旗遊牧之地。所有察哈爾兵內。不論護軍驍騎。選人材健壯者一千備之。得旨。著各在家預備。以俟調遣。○甲子。陞正藍旗滿洲副都統楊岱為護軍統領。○乙丑。工部尚書翁叔元以遷葬乞假。允之。六月。丙寅朔。以翰林院檢討吳苑充日講起居注官。○丁卯。以原任湖廣布政使佟國佐為江南安徽布政使司布政使。○戊辰。刑部題。費嶺溝地近陵寢。有關風水。民人徐度忠私開煤窯。應充發其總領以下各官並降罰有差。所開之窯永行禁止。

上曰。風水處俱築牆立界。費嶺溝去

陵十三里。離風水較遠。將此等處俱稱有礙風水。則此十三里內所有村井將如之何。一槩皆禁將來何所底止。著問明欽天監官再議具奏。尋議挖煤窰之處雖與風水無礙。但挖窰非樵採可比。應行禁止。從之。○庚午。

上自暢春園回宮。○以一等侍衛巴爾達為寧古塔副都統。○予故護軍統領覺羅夸代祭葬如例。○西安副都統張泰以老病乞休。允之。○甲戌遣官致祭。

天壇祈雨。

上奉

皇太后幸暢春園。○乙亥。陞前鋒統領佟寶為寧古塔將軍。○丙子。

上詣

皇太后宮問安。○丁丑。廣江南浙江生員入學額數。府學大學各五名。中學小學各四名。著為令。○喀爾喀達爾漢台吉遣使進貢賞賚如例。○戊寅。陞長史海瀾為正藍旗滿洲副

都統。○旌表浙江仁和縣孝子羅萬國給銀建坊如例。○己卯。予故二等精奇尼哈番蘇爾泰祭葬如例。○辛巳。陞正紅旗滿洲副都統查喇克圖為前鋒統領。○壬午。以刑部左侍郎王國安管奉天府府尹事。○甲申。湖廣道監察御史李時謙條奏弭盜事宜。

上諭大學士等曰。李時謙以盜案令文官舉報緝拏。則責之武官如此。而盜賊可弭。朕就根本處言之。若果家給人足。孰肯為盜。然亦託之空言。則易行之實難。朕自聽政以來。早夜孜孜。惟以吏治民生為務。凡事之可行與否。俱加詳審。文官管民。凡巡察鄉村嚴緝奸宄。是其專責。今若置之不論。獨責之武官。則州縣兵少。不但不足以緝盜。即使業已緝獲。文官審訊時。又謂其誣良為盜。此豈可行者耶。朕欲即降旨申飭。恐言官畏懼不言。此本不准行。○乙酉。戶部議覆原任奉天府府尹金世鑑疏言。奉天等處地方旗民田畝。互爭訐

告。請將八旗莊頭餘地荒地另行丈出給民。則錢糧可增有裨國用。查奉天田地康熙十九年業經原任將軍安珠護等丈明立界。今因無檔可查。欲另行丈出給民。殊為不合。應不准行。得旨。奉天等處旗民田地所立界限不明。著將各部賢能司官差往會同盛京戶部侍郎及該府尹將旗民田地及牧廠逐一確察。各立界限。詳定具奏。○丙戌。以盛京戶部侍郎趙山為正紅旗滿洲副都統。○丁亥。

上詣

皇太后宮問安。○戊子。轉刑部右侍郎鄭重為左侍郎。以原任刑部左侍郎高爾位為本部左侍郎。管右侍郎事。○都察院遵旨議覆。給事中錢晉錫御史王君詒疏。奏廣東廣西總督吳興祚鼓鑄浮冒。戶部不行稽覈一案。查吳興祚先經題請鼓鑄銀兩。就本省司庫支銀三十萬兩。於康熙二十六七兩年止奏銷十二萬九千餘兩。餘銀十七萬餘兩。並未奏

銷。又戶部據咨私撥江蘇銀三十萬兩。未經題並無著落。應將吳興祚降三級調用。其據咨撥給不行稽覈之原任戶部尚書科爾坤見任尚書。今陞吏部尚書。鄂爾多原任侍郎。今陞總漕。董訥見任侍郎。傅臘塔俱降二級調用。得旨。鄂爾多董訥居官尚優。著帶所降之級留任。餘依議。○己丑。

上詣

皇太后宮問安。○庚寅。奉天府府尹王國安陞

辭

上曰。府尹無甚要務。但奉天為根本重地。今聞遊民甚多。務農者少。一遇旱潦。即難補救。今年亢旱。朕遣賽弼漢往奉天諸處。將糜費米糧。如蒸酒等項。悉行禁止。爾至任當勸民務農。嚴察光棍游手之徒。奉天田土旗民疆界早已丈量明白。以旗下餘地付之莊頭。俟滿洲蕃衍之時。漸次給與耕種。近金世鑑奏請將旗下餘地俱與百姓耕種。徵收錢糧。所增



錢糧亦復有限。所見何淺陋也。今已另遣官前往丈量。雖係彼處戶部之事。爾在地方亦須公同詳察。永定則例。毋忽。○諭大學士伊桑阿等。八旗叅領佐領有職任之官。多有以疾告休者。此中亦有以不能騎射畏憚而求罷者。夫管轄職任。須得舊人為佳。其傳諭八旗都統副都統等。自是以後。若有告休者。詳察之。果疾病不可支者。允其休致。若雖不能嫻於騎射。而能管轄者。仍留用之。○陞正黃旗佐領巴襲為西安副都統。○辛卯。

上詣

皇太后宮問安。○壬辰。調刑部右侍郎阿喇彌為盛京戶部侍郎。○甲午。陞內閣學士索諾和為吏部右侍郎。

秋。七月。乙未朔。享

太廟。遣領侍衛內大臣舅舅佟國維行禮。○丙申。陞左副都御史噶世圖為刑部右侍郎。○予海澄陣亡杭州佐領何忒祭葬如例。○戊

戌。

上詣

皇太后宮問安。○己亥。以禮部右侍郎多奇內閣學士李振裕充經筵講官。○陞雲南巡撫石琳為廣東廣西總督。○福建浙江總督興永朝疏言。臣自偏沅巡撫蒙

皇上命臣總制閩浙。臣在湖南尚有二事未竟。一。清丈荒熟地畝。見在舉行。恐臣赴閩之後。有司官吏因而怠玩。乘機作弊。一。長沙城西。即瀕湘江。中多暗石。行舟棲泊於此。一遇風濤。觸裂覆溺。近擬於江岸掘口。繞城而北。挖土成渠。直至城東蓄水廢塘。此渠一成。江邊檣櫓來泊於此。所全實多。一。湖南文風不振。士習多乖。臣通行各學。月舉一課。數月以來。諸生既以誦習為功。武斷把持之事。亦覺漸減。伏祈

皇上再頒天語。語誠湖南各官。逐一遵行。期收實效。得旨。所奏三事。振興士子。裨益生民。著

接任巡撫督率屬員務期實心奉行毋得怠玩以致擾害小民其考校勸懲亦必從實奉行勿飾虛文該部知之○庚子諭兵部軍罪犯人身故無子其孤寡之婦仍留配所情實可矜著令回籍○陞內閣侍讀學士王國昌為內閣學士兼禮部侍郎○免甘肅涇州本年分電災額賦有差○赦漢多羅郡王薩穆珪爾故遣官致祭○旌表直隸烈婦孫氏孀居拒姦守貞殞命給銀建坊如例○辛丑

上奉

皇太后自暢春園回宮○壬寅

上詣

皇太后宮問安○諭禮部奉

皇太后慈諭皇貴妃佟氏孝敬性成淑儀素著鞠育衆子備極恩勤今忽爾遭疾勢在瀕危予心深為軫惜應即立為皇后以示寵褒欽此前者九卿諸臣屢以冊立中宮上請朕心少有思維遷延未許今祇遵

慈命立皇貴妃佟氏為皇后應行典禮爾部即議以聞○領侍衛內大臣伯費揚古奏臣遵旨往喀爾喀附近地方採買牛羊散給喀爾喀無食窮民以為永久生業人民感戴饑饉復甦其土謝圖汗等俱南向叩首仰謝天恩報聞○癸卯以冊立

皇后遣官告祭

天地

太廟○冊立皇貴妃佟氏為

皇后冊文曰朕惟德協黃裳王化必原於宮壺芳流彤史母儀用式於家邦秉令範以承庥錫鴻名而正位咨爾皇貴妃佟氏乃領侍衛內大臣舅舅佟國維之女也系出高閥祥鍾戚里矢勤儉於蘭掖展誠孝於椒闈慈著蠡斯鞠子洽均平之德敬章翬翟提身表淑慎之型夙著懿稱宜膺茂典茲仰遵

慈諭命以冊寶立爾為皇后爾其祇承景命善保厥躬化被縈蘋益表徽音之嗣榮昭璽紱

永期繁祉之綏。欽哉。○是日。頒詔天下。詔曰。帝王受

天明命。撫御萬方。莫不端本宮闈。化行海宇。矧承奉宗廟。敦睦本支。皆於內助。是賴。茲者聖母仁憲。恪順誠惠。純淑端禧。皇太后。以坤教不可久虛。壺政必資懿德。皇貴妃。孝敬性成。淑範素著。鞠育衆子。備極恩勤。宜立為皇后。正位中宮。母儀天下。欽遵。

慈命。虔告

天地。

宗廟。於康熙二十八年七月初九日。冊立領侍衛內大臣。舅舅佟國維之女。皇貴妃佟氏。為皇后。尚其聿修令範。益篤教勤。仰嗣

徽音。永綿福祉。肇化原於倫紀。溥仁惠於寰區。布告中外。咸使聞知。○詔內恩款共十條。○一等精奇尼哈番。瓦爾達。因病解退。以其子仲申保襲替。○甲辰申刻。

皇后崩。

上輟朝五日。諸王以下。文武官員及公主。王妃以下。八旗二品命婦以上。俱齊集舉哀。持服二十七日。○丁未。奉移。

大行皇后梓宮。至朝陽門外享殿。

上親臨送。諸王以下。文武官員及公主。王妃以下。八旗二品命婦以上。俱齊集舉哀。○己酉。中元節。遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后陵。○常祭

大行皇后。

上親臨舉哀。○諭禮部。皇后佟氏。淑德夙成。芳徽懋著。侍奉

皇太后。克盡孝誠。撫育諸子。悉均慈愛。提躬敬

慎御下寬仁。式備儀型。宮闈胥化。頃遵

慈諭作配朕躬。尚期內治之永襄。何意沉疴之難起。茲於康熙二十八年七月初十日崩逝。睽懷懿範。痛悼良深。宜有稱謚。以垂永久。著內閣翰林院會同擬奏。其應行典禮。爾部詳察速議以聞。○壬子。予故三等阿思哈尼哈番沙思體理。祭葬如例。○乙卯。初祭。

大行皇后。

上親臨舉哀。是日。

上除服。○丙辰。繹祭。

大行皇后。

上親臨舉哀。○諭戶部。今歲天氣亢陽。雨澤鮮少。畿輔地方。雖間已得雨。然或甘澍未敷。或播種已後。收穫失望。窮民閱歷冬春。難保必無艱食。用是朕衷預念。軫恤加殷。著差爾部賢能司官。會同該撫。於州縣等處。徧行親歷。詳加察勘。其有果係被災。作何贍救。使不罹患。害確議以聞。○又諭朕巡幸江南。凡所經

歷於編氓疾苦。必詳加體察。如傷念切。每沛恩膏。朕過邳州。親見彼處田地。多為水淹。耕耘既無所施。賦稅於何取辦。其見在被淹田畝。應納地丁及漕項錢糧。俱行蠲免。歷年逋欠。亦盡與豁除。該督撫即行出示。徧曉窮鄉。仍不時廉察。倘有仍行私徵者。題參從重治罪。以副朕愛恤民生至意。○丁巳。陞翰林院侍講學士博際。為內閣學士兼禮部侍郎。○陞通政使單璧。為都察院左副都御史。○戊午。以原任雲南巡撫王繼文。補原官。○予故原任京口副都統張元勳。祭葬如例。○己未。

上詣

皇太后宮問安。○庚申。諭吏部。自古帝王撫馭寰區。端賴宮闈之助。惟后德之賢淑。主化本源繫焉。內治綦重。典禮宜隆。爰考歷代冊立中宮。即推恩所生。錫之封爵。載在彝常。其來舊矣。惟大行皇后性秉柔嘉。心存恪慎。溥寬仁而逮下。崇節儉以持躬。奉事

重闡克抒誠孝。撫育衆子。均被恩勤。方作配於朕躬。冀永資夫壺教。忽爾崩逝。殊悼朕懷。禮已備乎榮哀。恩未加於戚畹。內大臣舅舅佟國維。乃大行皇后之父也。勲舊懿親。忠貞世篤。勞勩夙昭。乎環衛謀謨。允贊乎巖廊。茲奉皇太后慈諭。大行皇后誕秀名宗。丕彰令範。懿徽遽謝。悲怛滋殷。思后德之流芳。洵良臣之毓慶。宜加峻秩。以協典章。朕恪遵

慈命。特錫殊恩。佟國維著封為一等公。給與誥命。世襲罔替。

八月甲子朔。○乙丑。旌表湖南烈婦嘉禾縣李尚祜妻胡氏。夜遇強暴。持刀力拒。反被刺腹。殞命。給銀建坊如例。○丁卯。陞兵部督捕左理事官噶爾泰為通政使司通政使。○戊辰。

上詣

皇太后宮問安。○庚午。大祭

大行皇后。

上親臨舉哀。諸王以下文武官員俱齊集舉哀。除服。○辛未。繹祭

大行皇后。

上親臨舉哀。○壬申。

太宗文皇帝忌辰。遣官祭

昭陵。○滿月。致祭

大行皇后。

上親臨舉哀。○癸酉。秋分。夕

月於西郊。遣刑部尚書圖納行禮。○

上巡幸邊外。命皇長子允禔。皇三子允祉。

皇四子允禩。隨駕。是日啓行。駐蹕牛欄山。○甲

戌。

太祖高皇帝忌辰。遣官祭

福陵。○

上駐蹕南新莊。○乙亥。

上駐蹕古北口。○丙子。

上駐蹕恩格木噶山。○賞居民白金。○諭扈從

諸臣曰。前諸王大臣。以朕因歲旱之故。抑鬱

靡寧兼遇喪事體加勞瘁再三懇請行幸郊外以養朕躬朕允所請而行內地荒旱已遣官往察今觀口外田畝亦因旱歉收故朕於此處貧民悉行補助又聞此地馬斃甚多恐無知者因識朕心乃謂朕以遊嬉而來也諸臣叩首奏曰天下所賴以生者

皇上耳

聖躬大安則臣等不勝懼忤若有謂遊嬉而來者必非人類臣等仍叩請行幸邊外以養

聖躬報聞○丁丑遣大學士徐元文祭

先師孔子○

上駐蹕富爾堅噶山○諭內大臣大學士等朕自春至今緣茲旱災無日不殷憂軫念近出口閱視更不堪寓目當此仲秋之時即以山核桃作粥而食若時屆冬春何以存活且聞諸蒙古所在亦然如此情形躬親目擊憂憫不能自止前於口上積糧特為衆蒙古計今蒙古牲畜目前尚可支持若不預給米糧則

牲畜羸瘦至極窮困之時雖再議給賑無論彼不能承領此間亦無術可以運致矣今擇賢能官分遣諸處察其實不能存活極困窮者一面令帶人夫車輛駱駝而來何旗於何口相近即以就近口上所收糧食量給之則所需之糧不至萬斛而衆蒙古之困苦可救矣糧食足而牲畜存漸遇豐年庶可得濟其集議以聞尋議差理藩院官前往會同各扎薩克等令於喜峯口古北口殺虎口張家口獨石口相近之處領賑再行文戶部於五口上預備米糧確查蒙古貧人每口給米以五斗為率

上曰爾等議人給米五斗悞矣應遣蒙古侍衛及通蒙古語滿洲侍衛前往會同該王協理旗下事務台吉等明白清察窮人數目若干應給米若干可以度日處細加詳算交與王台吉等瞻養則速而且易王台吉等皆朕所信任之人有何不可信散米時令王台吉等

親身來領以巴林翁牛特三喀喇沁為一起。二土默特教漢柰曼為一起。蘇尼特察哈爾八旗為一起。扎魯特阿祿科爾沁為一起。詳查實數散給。○戊寅祭

大社。

大稷遣吏部尚書鄂爾多行禮。

上駐蹕博洛和屯。○賜西巴爾台居人銀米。

○巳卯。

上至張三營。賜居人銀米。是日駐蹕宜孫喀布

秦昂阿地方。○庚辰。

上駐蹕穆祿喀喇沁昂阿地方。○辛巳。

上駐蹕愛里色欽地方。○旌表陝西烈婦楊奉

魁妻雷氏。拒姦殞命。給銀建坊如例。○以故

二等精奇尼哈番蘇爾泰之子額爾赫德襲

職。○癸未。

上駐蹕克勒和洛。○甲申。予故內閣學士兼禮

部侍郎孫在豐祭葬如例。○乙酉。

上駐蹕噶海圖地方。○丙戌。

上駐蹕巴隆桑古蘇台地方。○丁亥。免湖廣鍾祥等六州縣及沔陽衛本年分旱災額賦。有差。○戊子。

上駐蹕烏喇岱昂阿地方。○原任福建浙江總督王鵬疏言。日本商船應令停泊定海山。遣官察驗。方許貿易。

上諭大學士等曰。此事無益。朕南巡時見沿途設有臺座。問地方官及村莊耆老。據云明代備倭所築。明朝末年日本來貿易。大船停泊海口。乘小船直至湖州。原非為劫掠而來。乃被在內官兵殺盡。未曾放出一人。從此釁端滋長。設兵防備。遂無寧期。今我朝凡事皆詳審熟計。務求至當。可蹈明末故轍乎。且善良之民屢遭水旱。迫於衣食。亦為盜矣。武備固宜預設。但專任之官得其治理。撫綏百姓時時留意。則亂自消弭。否則盜賊蜂起。為亂者將不知其所自來。不獨日本也。○庚寅。

上駐蹕烏里雅蘇台達巴漢地方。○辛卯。遣官



祭

歷代帝王○遣官祭城隍之神○壬辰

上駐蹕森濟圖和洛

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十一

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十二

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十八年己巳九月甲午朔

上駐蹕色爾白格里昂阿地方○乙未

上駐蹕瑚爾布勒畢喇地方○丙申

上駐蹕湯泉○丁酉

上駐蹕察罕郭爾地方○予故正白旗蒙古散

秩大臣阿穆瑚琅祭葬如例○戊戌

上駐蹕拜察和洛○理藩院題喀爾喀信順額

爾克戴青等六台吉奏稱所屬牲畜盡斃饑

荒不能度日祈賜恤養應遣官清察得旨此

六台吉饑荒不速行拯救則死亡愈多著速

行差官確查○理藩院議。蘇尼特滿濟思哈碩色等。搶奪喀爾喀多爾濟巴爾桑之駱駝行李。又喀爾喀朱布爾哈什哈等。搶奪哨探人之馬匹。應將為首者論絞。餘各罰牲畜有差。

上諭大學士等曰。滿濟思哈碩色。朱布爾哈什哈等。並從寬免死。照為從例完結。至求入內地之喀爾喀等。互相殺奪。若不速為安插。漸致流亡。今宜專遣大臣。收集喀爾喀散亡之

衆。又諭曰。昔

太宗文皇帝。以次收定四十九旗蒙古。後欲全收北邊喀爾喀。未及行而

太宗文皇帝賓天。後蘇尼特騰機思懷恨睿王。反入喀爾喀。喀爾喀欲殺騰機思。尚我國公主。騰機思向喀爾喀哭云。我如何負

太宗文皇帝仁恩。殺我妻耶。爾等欲殺我妻。將我一並加戮。如此堅執。故我國公主未曾遇害。今聞喀爾喀國內饑荒。互相殺擄。朕欲普

天萬國。皆得其所。一體加恩。喀爾喀流離至此。故特遣大臣。收集流亡。使安插得所。伊桑阿等奏曰。

皇上聖諭。誠天地覆載之心也。○己亥。

上駐蹕興州。○庚子。

上駐蹕恩格木噶山。○湖廣巡撫楊素蘊疏言。湖北各屬。亢旱異常。請將湖北本年分應徵漕糧。分年帶徵。使百姓得一意辦納。南糧。以給兵餉。得旨。近因直屬地方亢旱。朕心深切

焦勞。已經遣官詳察。今據奏湖北地方亢旱。小民饑饉等語。朕心益屢憂慮。著差戶部賢能司官。速往會同該督撫詳察。以聞。尋戶部議。將本年應徵正耗漕糧。漕項錢糧。准康熙二十九三十兩年帶征。從之。○辛丑。

上駐蹕老鵠店。○壬寅。

上駐蹕羅山。○達賴喇嘛班禪胡土克圖達賴汗等。遣使進貢。賞賚如例。○癸卯。

上回宮。詣

皇太后宮問安○甲辰諭大學士等理藩院事務所關最要官員缺出應用之人甚少蒙古旗分阿達哈哈番拜他喇布勒哈番拖沙喇哈番及侍衛可令各旗都統奏聞引見此中有通習文字者選用○丙午月祭大行皇后

上親臨舉哀○戊申旌表四川烈婦譚氏孀居拒姦致被斧砍殞命給銀建坊如例○庚戌戶部議覆郎中殷特等會同直隸巡撫于成龍疏言臣等察勘直屬被災地方宣府廣平真定等府所屬被災十分者共四十四州縣衛所請將本年未徵錢糧豁免并發各屬所貯倉糧通行賑濟若米穀不敷動正項錢糧折米支給又保定順德大名順天河間等府五十六州縣衛所被災七八九分不等請照定例按被災分數酌免錢糧應如所請上諭大學士等曰小民生計最多苦辛今人勦稱耕九餘三談何容易農家終歲勤動幸遇

有秋而穀價又賤欲辦八口衣食與來歲耕種之資猶恐不足安得寬然有餘一遇歉歲不免顛連困苦矣惟富饒業戶陳陳相因賤買貴賣每獲厚利然賴有富戶居積猶得散糶民間以濟荒歉若使盡為災黎其何以堪自古帝王生長深宮少知稼穡艱難與民生疾苦朕軫念民艱時常巡省周諮博訪悉知窮簷困踣之狀實可哀憐直隸被災地方本年未徵錢糧及康熙二十九年上半年錢糧俱應蠲免著候諭旨行○予故原任吏部侍郎張鵬祭葬如例○以正白旗漢軍都統伯石文炳為福州將軍○辛亥

上詣

皇太后宮問安○諭戶部朕勤求治理篤念民依欲使婦子幹寧用是頻蠲租賦至於時值荒歉倍切焦思賑贍之恩尤宜亟沛今歲畿輔亢暘為虐播種愆期年穀不登小民艱食早災情形朕所親見夙夜殷勞軫念已久顧

此荒荒之民。餬口尚不能給。若更責以輸賦。必致流移失業。直隸被災州縣衛所。所有本年地丁各項錢糧。除已徵在官外。其餘未經徵收。及康熙二十九年上半年錢糧。盡行蠲免。爾部速行該撫通行曉諭。務使均沾實惠。以副朕拯恤窮黎至意。如民人仍致流散。或不肖官役朦混侵蝕。及復行私徵者。將該撫一并嚴加處分。爾部即遵諭行。○壬子。大學士伊桑阿等進纂輯

政治典訓式樣。得旨。朕御極三十年來。惟兢兢祇畏。常存始勤終怠之虞。孜孜不已。每思滿損謙益之戒。今閱此書。增愧於懷。況比年不登。民生未遂。地震星變。往往頻仍。正當君臣上下。協心同慮。撫綏萬邦。夙夜黽勉。尚且不暇。豈容自矜自伐。以重已過。違道取譽。以務虛名。欲將此書停止編摩。卿等其議之。○都察院左都御史郭琇疏。奏原任少詹事高士奇。植黨營私。與原任左都御史王鴻緒。見任

科臣何楷。翰林陳元龍。王項齡等。招搖納賄。請賜罷譴。得旨。高士奇。王鴻緒。陳元龍。俱著休致回籍。王項齡。何楷。著留任。○甲寅。以冊謚

大行皇后。遣都統喇克達。告祭

太廟。○乙卯。命和碩簡親王雅布。多羅信郡王鄂扎。齋冊寶。上

大行皇后尊謚。冊文曰。道弘地載。六宮資陰。教之修。化始人倫。萬國仰母儀之重。壺闈擅燬

音足嗣於前徽。圖史流馨。德常新於奕禩。皇后佟氏。英鍾戚畹。瑞衍名宗。克秉淵心。協女箴之婉婉。式昭玉度。本天賦之溫莊。自媯水以嬪虞。比周京之纘女。佐晨昏而將敬。勤著雞鳴。溥鞠育以宣慈。慶貽麟定。仁能逮下。木樛曲以堪縈。志在進賢。符參差而必采。世方逢乎豐豫。儉德滋彰。名已冠乎宮庭。謙懷彌篤。珮環有節。恒贊宵衣。織紉惟勞。允師內職。二南之風。繼軌九御之屬。傾心乃正。坤維洵

推哲配禕禴初御方期延祉於長秋總帳旋陳遽悼韜輝於永夜雖此日之芳華易謝而千年之令譽靡窮考古彝章稱茲顯謚聿煥丹青之采丕揚金石之光特以冊寶謚曰孝懿皇后於戲淑淑型於桂館婉美姜任播嘉則於瓊章垂聲穹壤榮哀具備寵渥祇承○戊午以翰林院侍講學士席密圖充日講起居注官○以鑲黃旗蒙古都統蘇爾達為領侍衛內大臣領侍衛內大臣公倭赫為鑲黃旗蒙古都統○喀爾喀扎薩克墨爾根濟農等遣使進九白年貢宴賚如例○公圖海妻故遣大臣一員侍衛十員往奠茶酒○已未公額必隆妻故遣大臣二員侍衛二十員往奠茶酒○庚申。

孝慈高皇后忌辰遣官祭

福陵○

上詣

皇太后宮問安○辛酉諭戶部今歲畿內亢暘

田畝鮮獲朕所深悉被災人民已加恩蠲賑八旗田莊俱在畿輔近地同屬災傷滿洲蒙古漢軍甲兵皆須養馬原資禾稼以供飼秣今穀既不登芻豆必致湧貴雖給有月餉銀米可以贍育家口貧乏兵丁經營草料恐滋困累朕殊用軫念著詳察實係窮兵無力養馬者開列名數送部自本年十月起至來年秋成時止其馬匹所需錢糧應加給賜以昭朕一體愛恤兵民之意作何恩給爾部確議具奏尋議無力養馬兵丁月給銀三兩從之○喀爾喀額爾德尼濟農等遣使進九白年貢宴賚如例○壬戌吏部題理藩院郎中缺出例將叅領阿達哈哈番掣籤擬正陪具題今員外郎缺出亦應將步軍副尉拜他喇布勒哈番佐領侍衛等掣籤擬正陪具題得旨理藩院郎中員外等官缺出停其掣籤將八旗移送應補官員引見補授其應補郎中之人己補員外主事應補員外之人己補主事

若遇伊等應補缺出。仍令一并引見。○癸亥。前鋒統領查喇克圖。以行圍時約束不嚴。革職。○兵部尚書紀爾他布等疏言。臣等奉命往查汎界內蘇尼特等地方。所駐喀爾喀汗。濟農。台吉等。遊牧之處。水草俱佳。其內地蒙古水草。亦不至匱乏。惟偷竊小盜。或時有之。得旨。竊盜時有。皆本管人員怠玩所致。著爾部嚴行禁約。○以和碩額駙穆赫達為正白旗漢軍都統。

冬十月甲子朔。享。

太廟。遣領侍衛內大臣索額圖行禮。○遣官祭。

永陵。

福陵。

昭陵。

暫安奉殿。

孝陵。

仁孝皇后。

孝昭皇后陵。○頒康熙二十九年時憲曆。○疏。

球國中山王尚貞。遣陪臣毛起龍等進貢。賞賚如例。○乙丑。內閣學士兼禮部侍郎拜禮。以病乞假。允之。○吏部議覆。刑科給事中陳世安疏言。吏部文選考功二司。向有調取才能之例。夫選司之升選。有俸冊可憑。功司之處分。有則例可考。但得老成廉靜之令。查冊籍奉行足矣。請嗣後兩司缺出。止依俸次陞補。若老邁庸劣。不時叅處。應如所請。從之。○丙寅。

皇太后聖壽節。遵。

懿旨。停止行禮筵宴。○以正白旗滿洲都統阿密達為領侍衛內大臣。調正白旗蒙古都統郎談為滿洲都統。○戊辰。月祭。

孝懿皇后。

上親臨舉哀。○己巳。免江南邳州等九州縣衛本年分水災額賦有差。○戶部題。冬月五城煮粥賑濟。應照例行三月。得旨。今歲年穀不登。民人就食者必多。朕深為軫念。煮賑銀米。

著加一倍。展限兩月。專差官員親身散給俾貧民得沾實惠。勿致胥役侵蝕中飽。仍著都察院堂官不時察看。○庚午。行

孝懿皇后百日祭禮。

上親臨舉哀。○琉球國中山王尚貞疏言舊例外國進貢船定數三隻。船中貨物免其收稅。今琉球進貢船止二隻。尚有接貢船一隻。未蒙免稅。請照例免收。以足三隻之數。又人數許帶一百五十人。萬里汪洋。駕船人少。不能遠涉。乞准加增。部議接貢船准免收稅。其增添人數不准行。得旨。琉球國誠心進貢年久。該王具疏懇請增添人數。准加增至二百人。○辛未。諭議政王大臣等。喀爾喀來降者。饑困已極。自相刦掠。應速置扎薩克遣賢能蒙古王。台吉等。曉示法度。收集離散。爾等其確議以聞。尋議喀爾喀扎薩克內有已至者。有未至者。除左翼土謝圖汗。澤卜尊丹巴墨爾根濟農。羅卜臧台吉等。分編旗隊之處。暫置

不議外。左翼車臣汗協理納木扎爾額爾德尼濟農。益楚克伊爾登濟農。車臣伊爾登濟農。洪俄爾戴青。台吉車卜登額爾克。台吉信順額爾克。戴青所屬。敖巴額爾克。阿海。台吉右翼白蘇特察罕巴爾。車臣台吉。額爾德尼哈灘。巴圖爾。台吉等。皆大台吉也。俱宜授為扎薩克。仍存其喀爾喀名號。又陸續來降喀爾喀沙布隆。胡土克圖所屬。阿爾達兒諾爾卜等。扎薩克。俱未到。各隨彼所願歸旗分收附。俟扎薩克到日再議。至土謝圖汗所屬。齊巴克。台吉之夥伴等。皆令并與土謝圖汗。及信順額爾克。戴青。其車臣汗之信順額爾克。戴青等。俱照四十九旗編為旗隊。於陰山後各旗蒙古賢能都統。副都統。長史。泰領之中。每一扎薩克。選二人與派出之蒙古王等帶去。令其駐扎彼地。以來年草青時為期。指示法禁。如四十九旗一例施行。喀爾喀所居遙隔。應以車臣汗為兩路。信順額爾克。戴青為



一路教巴額爾克阿海台吉察罕巴爾為一路車臣台吉額爾德尼哈灘巴圖爾台吉為一路遣行所遣蒙古王台吉與理藩院大臣官員候

皇上簡用至彼處明諭扎薩克等限來秋各將散失之人盡行收集若過期即給與收養之旗分倘仍有應授扎薩克者即會同扎薩克等授為扎薩克列名奏聞該衙門注冊其車臣汗之信順額爾克戴青等向係扎薩克伊等所屬後授小扎薩克如有大事仍令稟聞完結右翼扎薩克察罕巴爾額爾德尼哈灘巴圖爾車臣台吉等其舊扎薩克未到伊等事件即令伊等自行完結得旨車臣汗之兩路著為一路遣土謝圖親王沙津台吉阿喇布坦台吉巴忒馬什侍郎文達去信順額爾克戴青教巴額爾克阿海台吉為一路遣達爾漢親王諾內台吉畢力克圖台吉德木楚克郎中布彥圖馬迪去察罕巴爾車臣台吉

額爾德尼哈灘巴圖爾台吉為一路遣台吉多爾濟思希卜台吉吳爾圖納蘇圖副都統馬錫侍讀學士達虎郎中巴扎爾去賜喀爾喀敕曰朕統御宇內撫育萬邦率土人民皆我赤子倘一夫失所朕心惻焉雖窮荒異域之民亦必撫養使之各得和樂此朕本意也前聞喀爾喀兩翼之汗濟農台吉等互吞屬裔不相親睦恐兄弟不和異日必致有侵凌之禍特遣尚書阿喇尼台吉巴忒馬什等會盟令爾兄弟誓和後果以不和之故與厄魯特噶爾丹交惡相攻爾為所敗棄其妻子土地屬裔牲畜迫而來歸朕念爾歷世誠心職貢不忍爾之散亡安插於汎界內外賑其窮餓令爾汗濟農台吉等安集如故以車臣汗之子襲其汗號朕暫留爾等收集散亡俟厄魯特事定之日仍歸故地駐牧今見爾等並無法度不能約束以強凌弱自相剽奪倘不速行曉諭定法督察則汝見在人民益至離

散矣。是以將車臣汗旗下納木扎爾額爾德尼濟農、益楚克伊爾登車臣伊爾登濟農、洪俄爾戴青台吉、車卜登額爾克台吉、信順額爾克戴青旗下敖巴額爾克阿海台吉、右翼白蘇特察罕巴爾、車臣台吉、額爾德尼哈難巴圖爾台吉等，增設扎薩克，收集離散之衆，分為旗隊，以便督察，禁止盜賊妄行，教以法度。特令土謝圖親王沙津、達爾漢親王諾內、台吉多爾濟、思希卜等，齎敕諭扎薩克王等，旗下都統、副都統、長史等官，每扎薩克著二員，駐至來年草青之時，示以規模，安插前去。爾等自今以後，果能欽遵朕旨，謹守法度，寇盜不興，禍亂不作，爾等遺民漸次得所，庶副朕撫育歸降、愛養羣生至意。○陞內閣侍讀學士西拉為內閣學士兼禮部侍郎。○吏部議覆都察院左副都御史許三禮疏，奏原任刑部尚書徐乾學革職之後，留戀長安，以修史為名，與高士奇招搖納賄，並其子徐樹穀

違例考選。奉有徐乾學回奏之旨。今據徐乾學回奏。臣從前具本辭職。蒙

皇上隆恩。留京充各館總裁。並非私行潛住。臣子徐樹穀考選時。亦係請旨准行。非敢違例。查徐乾學係奉旨留充各館總裁。徐樹穀亦係請旨考授御史。其與高士奇招搖納賄之處。並無實據。許三禮所奏不實。應降二級調用。得旨。許三禮著降二級。從寬留任。○壬申。以十一日奉移。

孝懿皇后梓宮往山陵。

上親臨致祭。王以下三品官以上。齊集舉哀。○以故三等阿思哈尼哈番孟繹祖之弟孟維祖襲職。○癸酉。

上詣

皇太后宮問安。○先是。山西道御史張星法疏。忝山東巡撫錢珏貪惡穢跡。

上命錢珏明白回奏。錢珏奏。臺臣所忝諸款。毫無影響。不知何所從來。後接御史盛符升寄

臣書始知臺臣張星法所奏皆左都御史郭琇吏部侍郎王颺昌之指使。蓋郭琇曾以私書致臣囑薦山東知縣教諭等官。臣槩不允。王颺昌曾以臣訪拏豪民手書求寬。臣亦拒絕。因而觸怒。捏造虛款。囑託臺臣以致無罪被糾。事下吏刑二部。及都察院嚴審。至是刑部等衙門審據郭琇供稱並未囑託張星法疏叅錢珏。但曾寄私書與錢珏囑薦知縣等官。應革職。擬杖折贖。其私書同列名之太常寺少卿趙崙御史鹿廷璣馬光郎中高啓元並應革職。據張星法供稱並未聽郭琇私囑疏叅錢珏。但張星法差段惟永往山東訪問錢珏款跡。據段惟永供稱曾聞張星法有本堂郭琇令叅錢珏之語。張星法亦應革職。擬杖折贖。御史盛符升身為言官將糾叅錢珏之處寄書錢珏不合。應降三級調用。王颺昌所寄錢珏原書錢珏並未首送。應俟到部之日再議得旨。郭琇本當依擬處分。念其鯁直

敢言屢經超擢。從寬免革職治罪。著降五級調用。張星法降二級留任。凡言官理應各盡職業。不得扶同結黨。趙崙鹿廷璣馬光高啓元居官無所表見。乃依郭琇同致私書明係黨附。殊為可惡。俱革職。流徙奉天地方。盛符升降三級調用。錢珏既接私書。彼時不行奏聞。今被糾叅始行舉出。殊屬不合。著以原品解任。餘依議。○大學士伊桑阿等奏。

政治典訓一書。前奉諭停止編纂。臣等再三集議。自二帝三王迄明洪武歷代紀載皆有成書。仰惟

皇上聖德神功超前軼後。美不勝書。懇賜仍行編纂。昭示臣民。得旨。政治典訓朕欲停止編摩。覽卿等奏歷代俱有成書。懇請仍行纂修。著依議行。○甲戌奉移。

孝懿皇后梓宮往山陵。

上親臨送。王以下文武官員及公主王妃以下二品命婦以上俱齊集舉哀跪送。命皇長子

允禔皇三子允祉

皇四子胤禩隨駕。是日

上駐蹕五里橋○乙亥

上駐蹕雙九村○丙子。以雨。駐蹕雙九村○丁

丑。以雨。仍駐蹕雙九村○戊寅

上駐蹕屈投莊○諭大學士等。山東紳衿最稱

桀驁。且好結朋黨。巡撫宜簡用風力之人。著

以內務府總管佛倫補授○己卯。以

孝懿皇后梓宮奉安地宮。遣官告祭

天地

宗廟

社稷

暫安奉殿

孝陵

仁孝皇后

孝昭皇后陵○

上駐蹕薊州○庚辰

上親詣

暫安奉殿

孝陵行禮。奠酒。舉哀畢。至

仁孝皇后

孝昭皇后陵。奠酒。舉哀。駐蹕行宮○是日

孝懿皇后梓宮至山陵。奉安享殿○辛巳。戶部

題盛京遼陽興京屯莊所種田地。頃因亢旱

及霜隕。米穀不收。應免其納租。移咨盛京戶

部。詳計所需米數。發銀採買賑濟

上曰。盛京地方。今年亢旱。米糧不收。聞兵丁見

在買米而食。朕心深切軫念。其令戶部侍郎

阿山。東驛速往。與盛京各部大臣。公同察明

量其度歲所需。令內務府官。往取莊上所有

之米。散給。俾得均沾實惠○理藩院議喀爾

喀信順額爾克戴青等六台吉所屬之。今饑

饉難。以度日。應遣官將殺虎口倉內所貯之

米給發

上曰。給發此米。可差賢能司官前往。毋令減少

照數取給。務令得沾實惠。若米內有雜和糠

士及給發短少等弊。發覺之日。將給發官員。從重議處。○壬午。奉移

孝懿皇后梓宮於地宮前享殿。遣皇長子允禔。讀文致祭。○遣官祭

昌瑞山

后土之神。○戶部議覆直隸巡撫于成龍疏。言。本年散給浩繁。各屬存倉米穀不敷。請將各府州縣與被災地方相近者。搬運米穀接濟。其與被災地方遙遠者。照依時值。盡數發賣。齋銀分賑。應如所請。得旨。倉廩積糧。專為本處災歉而設。若因應賑州縣無糧。將彼處倉糧賣銀給被災之處。以致見今有糧州縣無備災之糧。且一時發賣價值必賤。於賑濟亦無甚裨益。其倉糧不敷之處。著發戶部庫銀三十萬兩。解往。速為賑濟。○諭直隸巡撫于成龍。直隸地方。朕屢蠲免錢糧。百姓竟無起色。今年亢旱。比往年更甚。朕在深宮俯念民生困苦。衣食艱難。宵旰焦勞。時欲流涕。業

經遣官察賑。復與蠲免正供。地方大小各官。遇此荒年。束手無策。於民何益。爾等受國厚恩。為民父母。寧獨不愧於心。當思良法。使貧民不填溝壑。以副朕軫念閭閻至意。○甘肅巡撫伊圖疏報。岷州衛邊外生番黃高僧登燭堅錯。率番目部落一千三百餘人。歸誠納款。願入版圖。下戶部知之。○湖廣巡撫楊素蘊。以病乞休。得旨。楊素蘊居官並無善狀。被災處所。不親行察勘。託病求罷。殊為可惡。著革職。○漕運總督董訥疏。言。濟寧從無額設船隻。凡有回京官兵家口。乘坐淮船至濟。無船更換。津貼銀米北上。所坐船隻大小。津貼俱有定例。軍興之時。節減三分之一。乃一時權宜。今海宇昇平。請復舊額。部議不准。得旨。船戶津貼銀米。著照舊支給。○癸未。巳時。奉移

孝懿皇后梓宮。安葬地宮。上親臨奠酒。王以下。文武大臣等行禮。是日

上駐蹕湯泉○乙酉。

上駐蹕遵化州金山寺西北○理藩院尚書阿喇尼自厄魯特歸。疏言臣等八月初七日抵厄魯特噶爾丹之地。頒敕書賞物畢。臣等與噶爾丹行抱見禮。既坐。問臣曰爾即來盟喀爾喀七旗之尚書耶。曰然。又問云聞爾去歲往色稜碩地方。以何事而去。亦有兵否。臣答曰鄂羅斯察罕汗。以東方邊境之事。奏請會議。

聖上遣我往諭。所攜兵僅及二千而已。中途值汝厄魯特與喀爾喀之亂。

聖上聞之。念厄魯特喀爾喀交戰。我等經行。汝等必各疑為援兵。故令駐境上。今年復遣議此事。語畢。乃饗臣等。本月十八日。噶爾丹招臣等入其廬。屏人言曰。

聖上洪仁惠育羣生。欲使協和共享昇平。我亦與其中也。我身安樂之策。孰者為善。伏祈聖上指示。願得遵行。但澤卜尊丹巴王謝圖汗

等首亂。無故起兵。殺扎薩克圖汗。及得克得黑墨爾根阿海達。

聖上之旨。前此再三陳奏。為此兩人耳。臣等答之曰。澤卜尊丹巴王謝圖汗等窮迫亡命。來歸我。

皇上為統馭天下中國之主。此一二人之命。有不思生全之者乎。至爾屢次章奏。

聖上明鑒。久已晰彼之曲。諒爾之真。始降敕書。諭止戰爭。仍歸和好。爾又何必屢以此事為

言耶。二十二日。噶爾丹遣丹濟喇。及格壘沽英。以所覆奏疏。授臣。臣等詰之曰。達賴喇嘛。使合及伊拉古克三胡土克圖等。亦為此事。將至。亦以此語覆之。抑或有他語乎。丹濟喇以其汗之言來覆。曰。達賴喇嘛所言之事。若與

聖上敕諭相同。我自無他說也。二十四日。噶爾丹西向遊牧。臣等於次日起行而歸。得旨厄魯特喀爾喀皆職貢之國。頃者兩國交惡。相

攻朕不忍見伊等無知爭殺不得安生特遣大臣開導曉諭仍前和好今噶爾丹稱聖上洪仁惠育衆生欲使和協共享太平我亦與其中聖上指示願得遵行已具悉矣該部知道○丙戌

上駐蹕灤河西○丁亥

上駐蹕米峪口○己丑

上駐蹕三屯營○以兵部右侍郎吳璥為湖廣巡撫○庚寅

上駐蹕龍井關○辛卯

上出龍井關駐蹕灤陽口○壬辰

上由大安口入駐蹕湯泉○癸巳

上詣

暫安奉殿奠酒舉哀隨詣

孝陵奠酒舉哀又至

仁孝皇后

孝昭皇后

孝懿皇后陵舉哀○是日

上駐蹕薊州○戶部議覆直隸巡撫于成龍疏言兵丁藉月糧度日今歲天旱米豆草價騰貴請於原折價外增添一半其所請過浮應令巡撫將時價詳加核實奏明再議

上曰今歲直隸地方旱荒米豆草束折價若不增給兵丁必至苦累可如該撫所請增給宣府古北口等沿邊地方見有積穀可將此米支與附近兵丁不必折給其賑濟亦令動支此米

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十二



大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十三

監修總裁官光祿大夫太保兼太子太傅保和殿大學士兼戶部尚書二等伯加四

級馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十八年己巳十一月甲午朔

實錄卷一百四十三

上駐蹕三河縣○以故三等阿思哈尼哈番沙

思體理之孫扎世襲職○乙未

上駐蹕通州○丙申。

上回宮詣

皇太后宮問安○辛丑。

上詣

皇太后宮問安○

上諭大學士內務府總管等朕因

皇太后所居

寧壽舊宮歷年已久特建

新宮比舊更加弘敞輝煌今已告成應即恭奉

皇太后移居可傳諭欽天監敬謹選擇吉辰禮

部詳考典禮以聞○癸卯冬至祀

天於

圜丘。

上親詣行禮○遣官祭

永陵。

福陵。

實錄卷一百四十三

昭陵。

暫安奉殿。

孝陵。

仁孝皇后

孝昭皇后

孝懿皇后陵○停止次日朝賀○甲辰喀爾喀

扎薩克色冷阿海台吉遣使進貢賞賚如例

○乙巳。

上詣

皇太后宮問安○

上幸南苑行圍○予故河南河北總兵官林寶祭葬如例○陞前鋒統領阿席坦為正白旗蒙古都統以正黃旗護軍統領班達爾沙為前鋒統領以鑾儀衛鑾儀使四格為正黃旗護軍統領○壬子

上回駐暢春園○予故太子少師內大臣三等公費颺古祭葬如例○癸丑

上回宮○甲寅

上詣

聖祖實錄卷一四三

皇太后宮問安○諭戶部朕念小民衣食惟田畝是賴必年穀順成斯生計無乏若遭罹荒歉饘粥尚且艱難正賦安能輸辦今年湖北亢旱為災已遣官會同該督察勘今據將武昌等府所屬二十九州縣八衛所災傷分數勘明具奏朕心深用軫念倘不亟加蠲恤恐致流移失所武昌等四府今年錢糧前已全蠲其被災二十州縣四衛所康熙二十九年

聖祖實錄卷一四三

上半年地丁錢糧著與蠲免荊州安陸二府所屬被災九州縣四衛所本年地丁錢糧除已徵在官外其未經徵收及二十九年上半年錢糧亦盡行蠲免爾部速行該督撫通行曉諭務使均沾實惠以副朕拯濟窮黎至意如民人或致流散不肖官役朦混侵蝕及仍行私徵者將該督撫一并嚴加處分爾部即遵諭行○乙卯予故福州將軍伯佟國瑤祭葬謚忠愍○丙辰吏部等衙門議覆都察院

左都御史馬齊疏言數年以來厄魯特喀爾喀不睦互相征戰

皇上屢遣大臣諭以溫綸令其罷兵業已和好復又背盟喀爾喀大敗來歸

皇上復遣大臣通為曉諭厄魯特欽奉

明命將兵退回今歲喀爾喀饑饉又遣大臣往賑以致厄魯特喀爾喀及腹內蒙古傾心歸服此誠亘古之所未有也臣辦事理藩院見凡所題所理之事止用滿洲蒙古文字並未

兼有漢文。今請於事竣之後，兼用漢文注冊。庶化服蒙古之功德，昭垂永久。應如所請。添滿洲漢軍漢字堂主事一員，翻譯漢字滿洲筆帖式。每旗各一員。漢軍筆帖式，每翼各二員。從之。○厄魯特額林臣台吉疏言：臣父楚虎爾吳巴錫，乃厄魯特胡他蓋圖哈爾呼喇第三子也。楚虎爾吳巴錫生子五人：長子班第，為噶爾丹所殺；次子阿南達，三子羅卜臧，胡土克圖，四子勞章，俱歿。五子額林臣，即臣也。臣親兄班第，長子多爾濟塞卜騰，在噶爾丹所。次子，即與巴圖爾額爾克濟農同居之慙都台吉也。康熙十五年，噶爾丹伐臣父楚虎爾吳巴錫，執之，殺臣親兄班第，分散臣屬裔。監守臣父子，去歲厄魯特喀爾喀作亂，交戰。守臣之人，乃臣屬下舊人，為所分散者，皆背噶爾丹而向臣。臣得間而攜臣子弟台吉十餘人，弓箭手五百餘人，計一千餘口，來投皇上。臣父不能得脫，見在噶爾丹所。臣來至巴

圖爾額爾克濟農。額爾德尼和碩齊地方，與臣兄子慙都台吉同居。安插何地，作何措置，伏候

皇上加恩。得旨：額林臣台吉，為噶爾丹所禁，今逃出歸降，其令與慙都台吉等暫且同居，並令約束其下。毋致盜竊生事。○戊午，兵科給事中朱雲條奏：天時已屆嚴寒，減死發遣人犯，請暫令圈守。至春發遣。部覆：無庸議。得旨：依議。流徙人犯，遇有勢力者，每羈禁不嚴，及至發遣，又輾轉遷延，其貧困之人，無力營求者，即肆行凌虐，瀕於死亡。向來此等情弊甚多。嗣後如遇有勢力之人，即行發遣，不得遲延。其有貧困之人，毋許凌虐致斃。著戶刑二部堂官不時詳加稽察。如有前項情弊，立行指叅，從重治罪。○以故三等公費颺古之子喇爾泰襲爵。○己未，以鑲黃旗護軍統領穆圖為前鋒統領，鑲黃旗蒙古副都統洪海為本旗護軍統領。○管理修書總裁事務原任

刑部尚書徐乾學請假省墓并請以奉旨校讐之

御選古文會典明史一統志諸書帶歸編輯允之○庚申以

孝懿皇后神牌升祔

奉先殿

上親詣

奉先殿告祭○理藩院題烏斯尼哈白塔住持喇嘛羅卜臧宜寧等稱伊師喇木占巴喇嘛

復轉生於世祈請往聚議不准行

上曰蒙古之性深信詭言但聞喇嘛胡土克圖胡必爾汗不詳其真偽便極誠叩頭送牲畜等物以為可以獲福長生至破蕩家產不以為意而奸宄營利之徒詐謂能知前生事惑眾欺人網取財帛牲畜敗壞佛教諸蒙古篤信喇嘛久已惑溺家家供養聽其言而行者甚眾應將此等詐稱胡土克圖者嚴行禁止○辛酉遣滿漢大學士各一員恭點

孝懿皇后神主是日恭捧

神牌升祔

奉先殿

十二月癸亥朔

上諭大學士等曰朕覽書籍邊外諸處各蒙古等在明代時屢侵邊境即於伊各蒙古內亦互相戰鬪不得寧謐

太宗文皇帝統馭以來各蒙古皆安靜矣如朕所見三十年來各蒙古俱獲安生極其恬息

彼等歡欣稱道謂從未聞有如此太平令我諸蒙古安然共享昇平者皆出自聖恩所賜伊桑阿等奏曰

皇上視天下百姓盡如赤子故使內外之民各得其所如此○甲子

上詣

皇太后宮問安○乙丑以次日

皇太后移居寧壽新宮遣都統化善告祭

太廟○諭戶部朕撫育蒸黎務期休養閭閻疾

昔時軫朕懷。今覽總督范承勲奏。雲南屯地錢糧。自康熙二十一年。至二十七年。每歲拖欠。懇請分年帶徵。朕念雲南百姓。前曾供億王師。繼又遷移叛屬家口。運送勞瘁。本年正賦。輸將尚屬艱難。復令帶徵逋租。必致益滋困累。著將歷年所欠屯賦銀七萬一千二百餘兩。米麥等項十萬七百餘石。盡行蠲免。以示朕軫念民生至意。其令該督撫通行曉諭。務使得沾實惠。如有不肖官員。私行徵比者。

該督撫指名題參。從重治罪。爾部即遵諭行。○予故雲南楚姚蒙景總兵官牛鳳翔祭葬如例。○丙寅未時。

皇太后移居寧壽宮。儀仗全設。

上率王以下。內大臣。侍衛等行禮。○浙江提督陳世凱。以陞見入京病故。遣領侍衛內大臣公舅舅佟國維。二等侍衛馬武往奠茶酒。給其子扶櫬銀三百兩。回籍時。令其馳驛。○旌表安徽烈婦曹氏。拒姦全節。被斧殞命。河南

烈女邢氏。拒姦不辱。帶勒殞命。各給銀建坊如例。○戶部議覆。直隸巡撫于成龍疏言。長蘆新增鹽引。原因軍興需餉。暫議加增。數年以來。積引難銷。請賜豁免。查康熙十四年。因軍需。按引加增五分。已於康熙二十五年停止。今所增新引。乃康熙十七年。按人丁加徵。並非因軍需所增。應不准行。得旨。長蘆新增引課。著照該撫所題豁免。○丁卯。

上詣

皇太后宮問安。○陞鑲黃旗護軍叅領覺羅海篤。為蒙古副都統。○免江西寧州等二十八州縣。袁州等四衛所。本年分旱災額賦。有差。○戊辰。陞禮部左侍郎張英。為工部尚書。光祿寺卿。郎赫。為大理寺卿。○先是。

上以江南儀真河閘。關係運道。命河道總督王新命。江南江西總督傅拉塔。漕運總督董訥。詳閱議奏。至是。王新命等疏言。儀真河閘。為上江漕艘經由要道。閘外江口北新洲一帶。

俱係乾涸。而北新洲之外。又有沙漫洲。平鋪於江中。橫亘二三百丈。難以築壩。若自沙漫洲尾。從北新洲腹內。向東北斜開引河。以通四閘。不能保無坍塌。似應仍挑北新洲舊河身。直通四閘。一切糧艘。令循沙漫洲尾。轉入新河口。可以通行。其日久或有淤阻之處。應聽河臣酌量挑濬。下所司知之。○庚午。以敖漢故多羅郡王薩穆珀爾子阿敏達賴襲爵。○辛未。達賴喇嘛遣使善巴陵堪卜。入貢請安。且密奏言。我起行時。往達賴喇嘛所未見第巴出語我曰。達賴喇嘛。令奏聖上。但擒土謝圖汗。澤卜尊丹巴胡土克圖。畀噶爾丹。則有利於生靈。此兩人身命。我當保之。奏入。

上遣班雜爾喇木扎木巴。額木齊格隆等齎敕諭達賴喇嘛。敕曰。朕恭膺

天命。統御率土人民。無分中外。皆欲使之罷征息戰。各享安樂。以免散亡。諸處之民。有困窮

來歸者。必使之得所。初無異視。爾喇嘛承奉釋教。濟度衆生。朕與爾同一意也。厄魯特喀爾喀。向於朕為職貢之國。亦供奉爾喇嘛為施主。聞兩國交惡相攻。朕與爾會同諭其罷兵。使相和睦。發敕遣使。不啻再三。此朕與爾念厄魯特喀爾喀相攻。必有一家敗亡失所。而欲止其戰爭。同歸於好。原非有偏徇一家之意也。後厄魯特喀爾喀。不從朕與爾之言。竟至交戰。喀爾喀敗窮。極來歸。朕受之。安插邊塞內外。給米糧牲畜。以濟其困。若等如往歸爾喇嘛。想喇嘛亦必如是以養之也。今爾喇嘛所遣使人善巴陵堪卜。奏稱爾之言曰。當擒土謝圖汗。澤卜尊丹巴胡土克圖。畀噶爾丹。伊等身命。我當保之。凡作君作師者。濟窮繼絕。乃不易之常經。今如擒土謝圖汗。澤卜尊丹巴胡土克圖。而畀噶爾丹。是偏於一家矣。朕與爾向來欲厄魯特喀爾喀相與和好之意。安在乎。朕與爾向來之意。舉無所偏

底是以屢屢遣使往諭。即今亦仍冀其和好也。目下朕遣尚書阿喇尼。使於噶爾丹。據其所奏。言噶爾丹敗於策妄阿喇布坦。下人散亡。畧盡。又極饑窘。至以人肉為食。喇嘛使人亦曾到彼。想亦聞之耶。倘噶爾丹不得已而來歸朕。朕亦當愛養之。使得其所。有執之以畀其仇者乎。朕撫視萬邦。有如一體。意無偏徇者如此。爾喇嘛行事。利濟衆生。想善已陵。堪卜所奏。未必為喇嘛之言。如果喇嘛之言。何以不具疏來奏乎。朕心疑之。特撰敕遣詢。著將此項原由。明白具本回奏。○壬申。陞通政使李光地。為兵部右侍郎。○癸酉。

上詣

皇太后宮問安。○陞福建漳州總兵官金世榮。為浙江提督。○甲戌。諭領侍衛內大臣等。孝莊文皇后再期致祭。朕本欲親詣行禮。因頭痛灼艾。至今未愈。祭期已在目前。太醫院官再三勸阻。謂候值寒感。不可出行。其令皇太

子。諸皇子前往恭代行禮。○陞廣儲司郎中多弼。為光祿寺卿。○乙亥。以廣東左翼總兵官劉顯芳。為鑲藍旗漢軍副都統。○丙子。厄魯特噶爾丹。多爾濟奏言。蒙

聖明軫念。鄂齊爾圖。汗。賜羅卜臧。滾卜。遊牧之地。正將遷移。聞喀爾喀。厄魯特。交亂興戎。因率兵前往。未能全徙。地方遠隔。且去年遭遇旱災。牲畜倒斃。人民困苦。難以遷移。伏乞鑒恤。得旨。噶爾丹。多爾濟。著授為諾顏。遣達虎前往傳旨。並查貧民。○先是。領侍衛內大臣索額圖等。奏。臣等抵尼布潮城。與鄂羅斯國來使費要多羅。額禮克謝。會議。彼初猶以尼布潮。雅克薩。為所拓之地。固執爭辨。臣等以鄂嫩。尼布潮。係我國所屬。毛明安。諸部落舊址。雅克薩。係我國虞人阿爾巴西等故居。後為所竊據。細述其原委。開示之。因斥其侵犯之非。復宣諭

皇上好生德意。於是費要多羅等。及鄂羅斯國



人衆皆歡呼誠服。遂出其地圖。議分界事宜。共相盟誓。永歸和好。疏合。

上命議政王大臣集議。議政王大臣等奏言。羅刹潛據雅克薩諸地。擾我虞。合三十餘年矣。皇上念其冥頑無知。不忍興師剿滅。發官兵駐黑龍江。待其悔罪。因執迷不悟。乃命攻取雅克薩城。所俘槩行釋放。未幾。羅刹重至雅克薩。築城盤踞。復令官兵圍困。勢極窮蹙。會其主遣使乞和。

皇上即許撤圍。兼令大臣以義理曉譬之。鄂羅斯國人始感戴。覆載洪恩。傾心歸化。悉遵往議。大臣指示。定其邊界。此皆我

皇上睿慮周詳。德威遐播之所致也。應於議定格爾必齊河諸地立碑。以垂永久。勒滿漢字。及鄂羅斯喇第訥蒙古字於上。今雖與鄂羅斯和好。邊界已定。但各省有官兵駐防。例應仍照前議。於墨勒根黑龍江設官兵駐防。至是遣官立碑於界。碑曰。大清國遣大臣與鄂

羅斯國議定邊界之碑。一將由北流入黑龍江之綽爾納。即烏倫穆河。相近格爾必齊河為界。循此河上流不毛之地。有石大興安。以至於海。凡山南一帶。流入黑龍江之溪河。盡屬中國。山北一帶之溪河。盡屬鄂羅斯。一將流入黑龍江之額爾古納河為界。河之南岸屬於中國。河之北岸屬於鄂羅斯。其南岸之眉勒爾客河口。所有鄂羅斯房舍。遷移北岸。一將雅克薩地方。鄂羅斯所修之城。盡行除毀。雅克薩所居鄂羅斯人民。及諸物。盡行撤往察漢汗之地。一凡獵戶人等。斷不許越界。如有一二小人。擅自越界捕獵偷盜者。即行擒拏。送各地方該管官。照所犯輕重懲處。或十人。或十五人。相聚持械捕獵殺人搶掠者。必奏聞。即行正法。不以小故沮壞大事。仍與中國和好。毋起爭端。一從前一切舊事。不議外。中國所有鄂羅斯之人。鄂羅斯所有中國之人。仍留不必遣還。一今既永相和好。以後

一切行旅有准令往來文票者許其貿易不禁。和好會盟之後有逃亡者不許收留即行送還○丁丑

上詣

皇太后宮問安○陞貴州貴西道高起龍為江南安徽按察使司按察使○戊寅喀爾喀達爾漢親王諾內等題扎薩克信順額爾克戴青善巴扎薩克丹津額爾得尼台吉等請於寧夏橫城平羅等處准其貿易理藩院議此等地方向來並不令蒙古貿易其可否貿易之處行文總督提督詳議具奏

上曰信順額爾克戴青善巴等既稱寧夏等處地方准其貿易甚有益於窮人不必行文於總督提督議且暫令其貿易不為例俟來年盟期再議○陞內閣學士凱音布為總督倉場戶部右侍郎○轉禮部右侍郎王颺昌為左侍郎陞內閣學士顧沂為禮部右侍郎○以順天府府尹黃斐為通政使司通政使○

予故大理寺卿拉弼祭葬如例○予湖廣陣亡永定營守備贈遊擊孟泰祭葬如例○朝鮮國王李煥遣陪臣朴泰尚等進

孝懿皇后香賞賚如例○己卯諭大學士九卿詹事科道等今歲京畿遇旱小民餬口維艱數經蠲免錢糧散給賑濟而雨雪尚未及時朕心未安茲雖值新正上元令節朕軫念小民生計彌切憂勤汝等亦宜體朕軫恤民生至意共加惕勵時厯乃心今當封印之時慎勿各圖逸樂每日皆齊集午門前以救災恤民之道詳悉計議○陞廣東雷州副將張仕選為福建漳州總兵官調直隸宣府總兵官藍理為浙江定海總兵官以原任湖廣襄陽總兵官許盛為宣府總兵官○命建造浙江定海縣城○戶部議覆戶部郎中鄭都等疏言臣等遵旨會同盛京戶部奉天府府尹親至各屬地方詳察旗民地畝分立界限嗣後分界之地不許旗人民人互相墾種以滋爭

端。如有荒地餘多。旗民情願墾種者。將地名畝數。具呈盛京戶部。在各界內聽部丈給。庶界地分明。旗民各安生業。不致互相爭告。應如所請。從之。○叙出征羅刹功。授鑲紅旗前鋒叅領牙爾泰。為拜他喇布勒哈番。正藍旗佐領鄂洛順。為拖沙喇哈番。餘一百三十一人。各紀功有差。○庚辰。

上詣

皇太后宮問安。○甲申。

孝莊文皇后再期致祭。命皇太子允初。皇三子允祉。

皇四子胤禩。前往行禮。○乙酉。

上詣

皇太后宮問安。○諭禮部。今歲直隸地方亢旱。小民粒食艱難。已經蠲免錢糧。兼發帑金倉粟。及准輸助米穀賑濟。但三冬雨雪鮮少。朕心仍切焦勞。即進膳羞。亦為損減。無非軫念民生。自竭誠悃。來歲正月祈穀祝文。著該衙

門更撰。將朕朕懇恤民之意。切實撰寫進覽。○丁亥。

孝莊文皇后忌辰。遣官祭。

暫安奉殿。○順天府進春。○戊子。諭大學士等。今歲直屬地方亢旱。穀未收穫。民生困極。被災九分十分之民。錢糧俱經蠲免。又行賑濟。惟七分八分被災者。錢糧雖經蠲免。恐有不能度日。至於窮困者。亦應賑恤。可交與直隸巡撫于成龍。速行察明以聞。○又諭大學士等。近直隸巡撫于成龍奏稱。直隸地方被災之民。蠲免錢糧。又行賑濟。俱獲生計。止有旗下莊頭。度日維艱等語。大臣官員。及富家莊莊屯之人。其被災州縣居住旗人。有不能贍養伊莊屯人口者。亦應察明賑濟。爾等可與九卿酌議以聞。○己丑。

上詣

皇太后宮問安。○大學士等遵旨會議。今歲亢

旱。我

皇上軫念八旗護軍兵丁。已增與一倍錢糧。伊等莊屯人口。足以養贍。應將護軍兵丁莊屯人口不議外。或窮寡婦。及屯居倚田為生者。又或家無披甲人。止食一鐵匠之糧。此等窮人。應察明酌量賜恤。

上曰。兵丁雖已增添錢糧。其窮困之人。見在家口尚不能養。何能養及莊屯人口。可將此等人。察明再議。○辛卯。命山西巡撫葉穆濟。親

平定三十二

二十一

往蔚州廣昌等處。被災地方。動支存庫銀兩。並附近存貯米穀。賑給饑民。○壬辰。歲暮。裕

祭

太廟。遣領侍衛內大臣公舅舅佟國維行禮。○

遣官祭

永陵

福陵

昭陵

暫安奉殿。

孝陵。

仁孝皇后。

孝昭皇后。

孝懿皇后陵。○遣官祭太歲之神。○旌表八旗

節婦。滿洲希爾塞妻覺羅氏等四十二人。蒙

古沙里妻巴氏等八人。漢軍李有魯妻蔡氏

等八人。各給銀建坊如例。○是歲。人丁戶口

二千三十六萬三千五百六十八。田地山蕩

畦地。五百九十三萬一千八百一十三頃四

平定三十二

二十二

畝有奇。徵銀二千七百三十七萬一千三百

二十七兩有奇。米。豆。麥。六百九十五萬二百

八十一石有奇。草。二百二十五萬二千八百

四十一束。茶。十五萬九千八百一十五引。行

鹽。四百三十五萬六千一百五十引。徵課銀

二百七十六萬六千八百四十二兩有奇。鑄

錢。二萬八千九百九十三萬六百五十有奇

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十三

實錄卷一百四十三

三

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十四

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十九年庚午春正月癸巳朔

實錄卷一百四十四

一

上詣

堂子行禮還宮拜神畢率諸王貝勒貝子公內

大臣大學士侍衛等詣

皇太后宮行禮御太和門王以下文武各官外

藩王及使臣等上表朝賀停止筵宴○朝鮮

國王李焞遣陪臣俞夏益等表賀冬至元旦

萬壽節及進歲貢禮物宴賚如例○丁酉孟春

享

太廟遣領侍衛內大臣索額圖行禮○遣官祭

太歲之神○己亥。

世祖章皇帝忌辰遣官祭

孝陵○辛丑。祈穀於

上帝

上親詣行禮○諭內大臣等朕於國家政務竭  
力勤求。是非自任。從不委於臣下。即如遷移  
吳逆之事。索額圖奏稱建議之人。應請正法。  
朕堅持獨斷。必令遷移。彼時十三省用兵數  
載。天下大事。皆朕一人獨任。亦曾推委爾等  
乎。前年湖廣兵叛。眾議紛紜。朕謂此亦何難。  
遂命綠旗兵丁。即行剿滅。又平定鄂羅斯之  
事。滿漢諸臣咸謂彼距中國道遠。難以成功。  
朕謂此事斷不可中止。即遣大臣前往。導朕  
指示而行。鄂羅斯隨即款服。朕未嘗自伐其  
功。但不似爾等稍有功績。即有人代為表揚  
也。朕乃萬姓之主。惟以兆庶未安。此衷不能  
稍釋。至於無知之人。妄生議論。朕毫不介意  
也○壬寅。

上詣

皇太后宮問安○癸卯。諭大學士等。戶部尚書  
麻爾圖為人甚懦。不能如顧八代。蘇赫各陳  
已見。惟聽人之言而行。著帶原降三級。再降  
五級。隨旗効力○諭戶部。朕撫御區宇。夙夜  
孜孜。惟期厚民之生。使漸登殷阜。重念食為  
民天。必蓋藏素裕。而後水旱無虞。曾經特頒  
諭旨。著各地方大吏。督率有司。曉諭小民。務  
令多積米糧。俾俯仰有資。凶荒可備。已經通  
行。其各省徧設常平。及義倉社倉。勸諭捐輸  
米穀。亦有旨允行。後復有旨。常平等倉積穀。  
關係最為緊要。見今某省實心奉行。某省奉  
行不力。著再行各該督撫。確察具奏。朕於積  
貯一事。申飭不啻再三。藉令所在官司。能俱  
體朕心。實有儲蓄。何至如直隸地方。偶罹旱  
災。輒為補苴之術。嗣後直省總督巡撫。及司  
道府州縣官員。務宜恪遵屢次諭旨。切實舉  
行。俾家有餘糧。倉庾充牣。以副朕愛養生民

至意。如有仍前玩愒。苟圖塞責。漫無積貯者。將該管官員及總督巡撫。一并從重治罪。爾部即遵諭通行。○甲辰。諭戶部。朕惟阜民之道。端在重農。必東作功勤。然後西成有賴。畿輔地方。去歲遭罹荒歉。已經蠲免錢糧。特發帑金。兼支倉粟賑濟。雖小民餬口有資。其籽粒牛具。恐多匱乏。今時屆首春。田功肇始。若弗經營措給。將誤假載之期。播種不齊。倉箱何望。直隸被災州縣。衛所窮民。有不能自備牛種等項者。該撫督率有司。勸諭捐輸。及時分行助給。務令田疇徧得耕耨。毋致稍有荒蕪。八旗官兵。皆倚屯莊收穫。用以資生。若有被災貧乏。耕作無力者。該都統等。通行各該佐領酌量伙助牛種。所有莊田。勿致播種後時。以副朕敦本勸農愛養兵民至意。爾部即遵諭通行。○乙巳。諭大學士等。比年以來。部院滿洲司官。各處奉差理事。頗著勤勞。自郎中以下。有職掌官員以上。可加察核。以頒恩

賚。是察核也。分一二三等為序次。其不入等次者。各部院堂官繕摺具奏。此內有曾經別部題奏而復用者。無庸序入。因公呈悞而復用者。仍序之。○賜內大臣侍衛等蟒緞。綬足有差。○丙午。以上元節。賜外藩科爾沁扎賴特喀喇沁鄂爾多斯阿祿科爾沁毛明安巴林喀爾喀貝勒額駙台吉塔布囊及內大臣大學士上三旗都統副都統侍衛等宴。○丁未。

上詣

皇太后宮問安。○己酉。大學士等奏曰。前者。

皇上以前明宮殿樓亭門名。開載一摺。并

慈寧宮

寧壽宮

乾清宮妃嬪宮人及老嫗數目。摺子發出。令臣等觀看。并抄錄存貯衙門。又奉諭旨。朕以天旱。欲省減宮人及所用器物。詳加查察。因自來未嘗有餘。故不能再減。爾等將前明宮



中每年所用銀兩及金花鋪墊銀兩數目亦為察閱。臣等察前明宮內每年用金花銀共九十六萬九千四百餘兩。今悉已充餉。又察前明光祿寺每年送內所用各項錢糧二十萬餘兩。今每年止用三萬餘兩。每年木柴二千六百八十六萬餘觔。今止用六七百萬觔。每年用紅螺等炭共一千二百八萬餘觔。今止用百萬餘觔。各宮牀帳輿轎花毯等項每年共用銀二萬八千二百餘兩。今俱不用。又察前明宮殿樓亭門數共七百八十六座。今以本朝宮殿數目較之不及前明十分之一。至前明各宮殿九層基址牆垣俱用臨清甄木料俱用楠木。今禁中修造房屋出於斷不可已。非但基址未嘗用臨清甄。凡一切牆垣俱用尋常甄料。所用木植亦惟松木而已。臣等以所察各條并

皇上發下摺子。令九卿詹事掌印不掌印科道官員徧觀。諸臣皆曰我

皇上百凡撙節儉約。臣等向所共知。但未能詳悉。今觀事事減省。至矣極矣。又禮云天子后立六宮。三夫人。九嬪。二十七世婦。八十一御妻。此皆有名數者。至所使宮人婦女以數千計。唐太宗乃有唐令主。觀其一次遣發宮人。已及三千。則其餘更有數千人可知。今除

慈寧宮

寧壽宮外。

乾清宮妃嬪以下。使令老嫗洒掃宮女以上。

合計止一百三十四人。可謂至少。不獨三代以下所無。雖三代以上亦未有如此者。

皇上節儉盛德。誠超邁千古矣。○調工部尚書蘇赫為戶部尚書。陞兵部督捕左侍郎席柱為工部尚書。○陞詹事府少詹事王澤弘為內閣學士兼禮部侍郎。○九卿等奏。

皇上因天時亢旱。宵旰焦勞。

聖容清減。恭請調攝。

聖躬。以慰中外臣民之望。得旨。朕自臨御以來。

夙夜兢兢。勤求治理。念切民依。冀登安阜。去歲畿輔早荒。雖經蠲租發帑賑濟窮黎。朕猶軫念未已。卿等奏請調攝朕躬。寬釋朕慮。知道了。卿等職任俱關重要。各宜恪體朕衷。持廉秉公。實心盡職。毋得營私結黨。師生親友互相徇庇。聽受囑託。遇事推諉。自圖便安。務期於國計民生實有裨益。該部知道。○庚戌上詣

皇太后宮問安。○

上幸暢春園。○陞理藩院郎中布彥圖為內閣學士兼禮部侍郎。○陞廣東韶州副將呂孝德為廣東左翼總兵官。○兵部題原任雲南貴州總督趙良棟遵旨將隨征周應泰等効力處察明咨部。并求將隨征之人除周應泰等外其餘未經題叙者亦許其察明具奏。得旨。趙良棟首倡進取四川。又直抵雲南省城。止率伊標官兵奮勇剋取得勝橋等要地。逼近城郭立營。勞績茂著。所屬官員亦俱同心

隨征効力。此疏內事情著九卿詹事科道會議具奏。○癸丑

上幸南苑行圍。○陞河南南汝道項一經為貴州按察使司按察使。○扎魯特多羅貝勒扎穆故遣官致祭。○命發山西大有倉米穀賑濟太原大同二府屬饑民。○甲寅直隸巡撫于成龍以井陘道員缺保舉湖廣武昌府知府武廷适。漢陽府知府戴夢熊。黃州府知府王輔請加揀用。部覆無庸議。得旨。用人之權關係最為重大。于成龍收羅別省官員之心破壞定例。將曾經超擢歷年未久如許官員保題。爾部不以為非。但稱無庸議殊屬不合。且既云直隸好官甚多。今並不能拯救饑民頻多流散如此。則平日才能所辦何事。武廷适等陞轉著停止。令其在任久遠効力。○丙辰大學士等奏。前遵奉諭旨以達賴喇嘛使者來往行走。地方官應付駝馬牛羊甚為苦累。著問明議奏。今臣等議嗣後若達賴喇嘛

有緊要事務差遣人來。駝馬等項。停其地方官捐給。動正項錢糧買給之。

上曰。依議。聞一應奉差馳驛官員執事人。不照定例乘驛馬。有擅乘營兵馬匹者。嗣後若有緊急事務。驛馬不敷。候該部奏過。許騎營兵馬匹。未經奏過者。毋得擅乘。○福建巡撫張仲舉疏言。宋儒朱熹。祖籍江南徽州府之婺源。朱熹父朱松。歷官閩土。遂家於閩。故有閩徽二派。前明有世襲五經博士二員。分主閩徽祀事。今據朱濬呈稱。係朱熹十八世嫡孫。額請承襲。查舊典。朱熹裔原有博士二員。請將朱濬承襲五經博士。以主閩派祀事。下部議行。○丁巳。

上自南苑回宮。○戊午。

上詣

皇太后宮問安。○戶部議覆。直隸巡撫于成龍疏言。直屬清苑等州縣。賑濟饑民。若米穀不敷。請動正項錢糧賑濟。應如所請。又疏稱。未

報成災州縣。間有饑饉民人。請一體議賑。應

無庸議。得旨。未報成災州縣饑民。著照該撫所題賑濟。餘依議。○以工部尚書席柱充經筵講官。○己未。戶部議覆。山東巡撫佛倫疏言。沂州等州縣衛所未完康熙二十八年錢糧。俟收麥之後。徵完報銷。應如所請。得旨。山東康熙二十九年地丁錢糧。全行蠲免。原欲使小民終年無有租賦。得以休息。均沾實惠。若將未完帶徵。必至借端混擾滋弊。此本內康熙二十八年錢糧。理應於歲內全完。今乃稱仍有未完。顯係地方官員明知今年已經蠲免。故行延緩逋欠。詳請帶徵。希圖乘此混將已蠲錢糧。侵蝕肥己。該撫並不詳察。即為具題。請於康熙二十九年麥登之後徵完。殊屬不合。著嚴飭。其錢糧未完各官。仍照定例處分。這未完錢糧。著於康熙三十年帶徵。○調刑部左侍郎席珠。為兵部督捕左侍郎。轉刑部右侍郎。噶世圖。為左侍郎。陞通政使噶

爾泰為刑部右侍郎○陞江西布政使王樛為順天府府尹○以一等侍衛布喇為正黃旗滿洲副都統○庚申喀爾喀土謝圖汗以所部六千餘人乏食請賑部議不准

上命以獨石口倉粟每戶給以四斗遣理藩院戶部司官各一員會同土謝圖汗監視散給又車臣汗澤卜尊丹巴胡土克圖等俱以乏食來告前後千萬計

上皆命按口給之○辛酉

上詣

皇太后宮問安○內閣九卿詹事科道以皇上聖容清減公請行幸湯泉

上傳諭曰朕因去年天旱屢念民生夙夜焦勞至今未釋茲值東作方興尚無雨雪朕心倍深憂慮爾等所奏已悉之矣○

上因噶爾丹肆掠喀爾喀命理藩院侍郎文達至喀爾喀墨爾根濟農所確規噶爾丹情形○壬戌旌表四川節婦周氏湖北節婦陳氏

杜氏陶氏吳氏各給銀建坊如例○吏部題各部院衙門出關差回京官員本無候考核不進衙門之例嗣後差回官員如有借端推諉不進衙門理事者令該部院衙門及科道稽察題奏從之

二月癸亥朔予故固山貝子章泰祭葬立碑如例○予故總督倉場戶部侍郎洪尼喀祭葬如例○予故浙江提督贈太子少保陳世凱祭葬謚襄敏加賜銀三百兩○甲子議政王大臣等遵旨議覆和碩安親王岳樂薨逝查順治八年岳樂襲封伊父郡王順治十四年恩封親王冊內並無世襲字樣今岳樂之子馬爾渾仍應封為多羅安郡王得旨馬爾渾著襲封多羅安郡王○喀爾喀額爾德尼濟農遣使進九白年貢宴賚如例○陞廣西按察使盧崇輿為江西布政使司布政使○以正黃旗原任副都統李林隆為漢軍副都統○乙丑

上詣

皇太后宮問安○諭內閣九卿詹事科道等昨歲畿輔荒歉朕慮民食維艱或至流離失所既蠲除其田租參復特發帑金三十萬兩并動支常平等倉粟令該撫徧行賑貸蓋期災黎得所毋使離散也今聞通衢相近之民雖已獲沾恩澤而僻壤窮簷究不能以自存至於越鄉去土者甚衆夫小民流移若此則司牧大吏所賑救者安在耶前所發三十萬帑金未審如何散給所在人民有無轉徙應遣部院大臣往加詳察至於四方流民率多就食京師今年五城粥廠雖倍給銀米寬其期日但恐饑氓漸集無以偏贍罔克均沾恩惠宜增設粥廠擇各部滿漢賢能司官俾親賑焉爾等其會議以聞尋議覆遣部院堂官分為四路察勘有賑濟不實者令即叅劾其五城粥廠再添設五處各遣賢能司官親往散給每日給米二十石銀十兩并前五城原設

粥廠俱令散至六月終止得旨著侍郎索諾和。阿山。席珠。齊穡。李振裕。李光地。王維珍。徐廷璽。分四路馳往巡察并遣滿漢賢能司官於五城增設粥廠賑濟○陞兵部督捕左理事官傅臘塔為通政使司通政使○諭大學士等爾等所進明史朕已詳閱遠過宋元諸史矣凡纂核史書務宜考核精詳不可疎漏朕於明代實錄詳悉披覽宣德以前尚覺可觀至宣德後頗多訛謬不可不察○丙寅

上謁

暫安奉殿

孝陵是日啓行駐蹕夏店○丁卯

上駐蹕邦均○戊辰

上駐蹕馬伸橋○己巳

上詣

暫安奉殿行禮奠酒舉哀隨詣

孝陵行禮奠酒舉哀至

仁孝皇后

孝昭皇后。

孝懿皇后陵。奠酒。舉哀。是日。駐蹕湯泉。○戶部遵諭議奏。八旗不能贍養之莊屯人。及窮官護軍撥什庫兵等之莊屯人。共二萬二千四百二十八人。每人給米一石。至於孑身寡婦。退甲護軍。撥什庫。及無馬甲。止給一兩錢糧者。其家口莊屯人。共六萬三千七百一十九人。每人亦給米一石。得旨。此等人。俱應給米糧。可令速給之。○庚午。

上詣

暫安奉殿。奠酒。舉哀。隨詣

孝陵。奠酒。舉哀。是日。回鑾。駐蹕孫家莊。○先是。直隸地方。雨雪未敷。

上軫念民生。日夜焦勞。沿途見耕種農民。即遣人訪問。是日。自早至夜半。時雨大沛。

天顏有喜。顧扈從諸大臣曰。得此雨澤。既種之田。固可發生。而未種之田。亦可耕種矣。朕甚喜慰。諒爾等之心亦同也。○辛未。

上駐蹕邦均。○命理藩院尚書阿喇尼。都察院左都御史馬齊。為議政大臣。舊例。理藩院尚書。左都御史。皆不與議政。至是。著為令。○戶部議覆。浙江巡撫張鵬翮疏言。定海山。即古之昌國縣。原有富都。金塘蓬萊。安期四鄉。至明代。去三鄉。止存富都。即今之定海山。茲據民人金廷清等。認墾金塘蓬萊二鄉田地。應准其開墾成熟。照例起科。從之。○壬申。春分。朝。

日於東郊。遣鎮國公都統蘇努行禮。○

上駐蹕通州。○癸酉。

孝康章皇后忌辰。遣官祭

孝陵。○

上回宮。詣

皇太后宮。問安。○甲戌。

上御經筵。講畢。賜大學士。九卿。詹事。及講官等宴。○內閣。九卿。詹事。科道等。以雨澤霑足。具疏稱慶。

上曰諸臣稱雨澤霑足。固當歡悅。但去年大旱。民困未蘇。其填溝壑者。不知凡幾矣。昔漢文帝為三代以下令主。賈誼猶以處厝火積薪之上。而謂無危為喻。以今較之。如火已然。可無慮乎。且今雖得雨。不知夏秋若何。其當遠慮深思。愈加軫恤。何得稱慶。○予故副都統拖沙喇哈番穆成額。副都統佟嘉年。各祭葬如例。○乙亥。大學士等奏。臣等遵諭問九卿河工官員。應否揀選補授。據九卿云。河工事宜。應用諳練人員。向因河臣揀選題補。恐生囑託之弊。故臣等議停。今思河務甚為要緊。請仍令河臣題補。

上曰。河工為漕運民生所係。凡應修之處。若不預修。則河隄一決。害民甚大。或所修不固。一經潰決。監修官屬獲罪非輕。是職司河務官員。所得者少。所失者多。為利則輕。為害則重。自今河道官員。可令該督揀選題補。○調湖北按察使李鈺。為廣西按察使。司按察使。陞

山西河東道王毓賢。為湖北按察使。司按察使。○丙子。戶部尚書王鵬。以疾乞休。慰留之。○丁丑。遣大學士阿蘭泰。祭

先師孔子。○遣官祭

先農之神。○

上詣

皇太后宮問安。○賜卓異知府高緝睿等。蟒服有差。○戊寅。祭

大社

大稷。

上親詣行禮。○諭大學士等。朕近日身體違和。明日移駐瀛臺。部院各衙門奏章。俱交內閣轉奏。○己卯。

上移駐瀛臺。○江南江西總督傅拉塔疏言。江南百姓感戴

聖恩。起造龍亭。建立石碑。其碑文進呈御覽。

上曰。蠲免錢糧。原欲使小民物力稍舒。漸登殷



阜前已頒諭旨。民間建立碑亭。頌揚德意。雖出羣黎愛戴之誠。但恐致煩民力。嗣後地方官員。不得借端修葺碑亭。以滋擾累。○命發常平倉穀。賑濟江南邳州。昨寧等八州縣。并徐州衛。被水災饑民。○庚辰。

上奉

皇太后。幸暢春園。○諭大學士等。部院衙門事件。恐以朕在外調攝。致章疏稀簡。可令照常送本。朕披覽自有暇也。可通諭各部院知之。

○辛巳。

上詣

皇太后宮問安。○壬午。議政王大臣等會議。安親王岳樂之子馬爾渾。已襲封郡王。查定例。親王一子封世子。其餘子封貝勒。郡王一子封長子。其餘子封貝子。又親王庶出子。授為輔國將軍。郡王庶出子。授為奉國將軍。岳樂所封之親王。並非世襲之爵。其子岳希。原封僖郡王。袁端。原封勤郡王。吳爾占。原封貝勒。

塞冷額。塞布禮。原授輔國將軍。塞冷額之子僧額。原授奉國將軍。俱照岳樂親王之爵封授。似屬太過。今馬爾渾既襲封為多羅郡王。應照定例。將岳希。袁端。吳爾占。封為固山貝子。塞冷額。塞布禮。應授為三等奉國將軍。僧額。應授為奉恩將軍。得旨。岳希。仍留郡王。其子襲封之時。應照固山貝子例封授。袁端。吳爾占。著為固山貝子。塞冷額。塞布禮。僧額。仍留原職。○予故副都統二等阿達哈哈番。原品解任。商奕圖。祭葬如例。○癸未。

上詣

皇太后宮問安。○甲申。九卿等議覆。原任雲南貴州總督趙良棟。親領兵馬。在雲南地方。攻取城池。勞績顯著。應作何加恩。伏候上裁。其所題白守仁等。止稱隨征効力。並未照例指名保題。應移咨趙良棟。令其詳察。俟保題咨送到部。注冊錄用。瞿洪升。張友成等。雖投誠後。有效力功加之處。例不應用。其所請

注冊錄用。無庸議。得旨。趙良棟由四川進雲南時。破賊取城。効力甚多。可給與拜他喇布勒哈番。瞿洪升。張友成等。亦同伊行走。俱准其錄用。餘依議。○丙戌。遣官祭

歷代帝王。○

上詣

皇太后宮問安。○丁亥。清明節。遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。○轉吏部右侍郎李振裕。為左侍

郎。調兵部督捕右侍郎趙士麟。為吏部右侍

郎。○戊子。

孝昭皇后忌辰。遣官祭

陵。○以原任吏部尚書陳廷敬。為都察院左都御史。○庚寅。

上詣

皇太后宮問安。○辛卯。以都察院左都御史陳

廷敬。充經筵講官。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十五

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十九年庚午三月壬辰朔

實錄卷一百四十五

上自暢春園回宮○戶部議覆直隸巡撫于成

龍會同巡鹽御史江繁疏請蠲新增天津鹽

引課餉查康熙十七年御史傅廷俊條奏增

加遵行已久應無庸議得旨新增天津鹽引

可如該撫等所題蠲免○陞左副都御史許

三禮為兵部督捕右侍郎○禮部右侍郎顧

沂丁父憂命回籍守制○予故副都統三等

阿達哈哈番吳西祭葬如例○癸巳

上幸暢春園詣

皇太后宮問安○諭理藩院尚書阿喇尼等今

喀爾喀汗等率眾來降應令四十九旗與之

會同大閱其令議政王大臣等集議尋議覆

皇上聲教遠被喀爾喀土謝圖汗車臣汗及諸

濟農台吉等皆傾心來歸應出臨大閱永使

安輯其四十九旗會閱之事今歲暫停俟來

年照例與喀爾喀會閱得旨著於七月舉行

餘如議○甲午

上詣

實錄卷一百四十五

皇太后宮問安○乙未

上詣

皇太后宮問安○禮部等衙門議覆山東道御

史徐樹穀疏請纂修

三朝國史應如所請得旨

太祖

太宗肇造丕基永垂謨烈神功聖德千古莫倫

世祖統一寰區弘開景運治化基隆光昭天壤

且當時勲舊翊贊勤勞若不及時彙輯成書

恐歲久人湮。諸臣事蹟。致有闕畧。依議即行編纂。昭示奕禩。應行事宜。著內閣翰林院會同詳議具奏。○戶部議覆。河東巡鹽御史索禮疏言。陝西省花馬小池。并臨鞏三府鹽課。去河東衙門遼遠。不便徵收。請令甘肅撫臣就近管轄徵課。應如所請。從之。○予故左都督管浙江定海總兵官加贈太子少保黃大來。祭葬。謚壯勇。○浙江巡撫張鵬翮疏。請建造定海縣城垣。學宮倉庫監獄。從之。○己亥。

宣統元年一月四日

三

### 上詣

皇太后宮問安。○庚子。陞內閣學士王澤弘為禮部右侍郎。少詹事王士正為都察院左副都御史。○鎮海將軍楊鳳翔。以老病乞休。允之。○壬寅。伊拉古克三胡土克圖疏言。臣等十二月初五日。至他米爾之北齊勞圖河。河之兩岸。俱有噶爾丹兵馬踪跡。臣與濟隆胡土克圖。尾之前往。令商南多爾濟齋疏歸奏。求給行糧。運至軍前。

上命運殺虎口倉米三十石。隨商南多爾濟前往。○癸卯。

### 上詣

皇太后宮問安。○先是。理藩院以大閱事奏遣司官二員。乘驛赴阿南達。文達所預調俄僕土喇等處。駐扎之喀爾喀台吉集兵設站以待。至是。商南多爾濟歸奏噶爾丹情形。

上諭理藩院尚書阿喇尼曰。爾等昨議遣司官二員尚未前往。今著一員。至鄂爾多斯發兵一千五百。以貝勒松阿喇布率之。一員至歸化城。發兵五百。喀爾喀達爾漢親王及四子部落。共發兵一千。以達爾漢親王諾內率之。檄侍郎文達。令預發喀爾喀墨爾根濟農。教巴額爾克阿海。蘇泰伊爾登台吉之兵。共三千名以待。以蘇泰伊爾登。拖多額爾得尼率之。偕調兵司官。往文達所齋。三月。糧隨文達赴土喇河。仍自京遣大臣一員。與文達。阿南達。偕統其軍。爾同紀爾他布。速赴阿南達所。

往之地。先檄阿南達來京。再詣文達所。自屯軍之地至汎界。酌派喀爾喀人等。安設驛站。○命都統額赫納護軍統領馬喇。前鋒統領碩鼐等。出征。

上諭之曰。朕已遣侍郎文達。往調喀爾喀親王諾內等兵。共三千。爾等至歸化城。與文達即率其兵赴土喇。與阿喇尼。紀爾他布等會。爾等習於兵事。機宜無俟朕言。其就水草善地。牧養馬駝。前進。仍各賜內廐馬駝。以行。○乙巳。兵部左侍郎王維珍等疏言。臣等遵旨查閱直隸各府州縣衛所地方。其未被災之處。已皆得雨。收成可望。其已被災者。自沿途大路。以至鄉僻山村。徧行查勘。賑過饑民萬萬均荷。

皇恩。兼以

聖誠格天。雨雪時降。農事漸徧。可待麥秋。並無流散饑斃之人。所至村莊。老幼男婦。百十為羣。望

闕叩謝。感激懽呼。難以言盡。或立碑勒文。或焚香祝

聖。此則愚氓感恩激切。出於至情者也。報聞。○丙午。

上詣

皇太后宮問安。○己酉。

萬壽節。停止行禮筵宴。○遣官祭

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。○遣官祭真武東嶽城隍之神。○

庚戌。

上詣

皇太后宮問安。○辛亥。戶部議覆雲南巡撫王繼文疏言。雲南黑井鹽課。前因官兵衆多。吳

逆題請加增。今全滇恢復之後。逆屬家口。盡行遣發。投誠人員。安插各省。食鹽甚少。此項加增課銀。懇祈豁免。應如所請。從之。○壬子。陞少詹事田喜霽。為內閣學士兼禮部侍郎。○癸丑。禮部會同兵部議覆。兵科給事中能泰疏言。奉天府滿洲。蒙古。漢軍。考取生員。及生員。監生。鄉試。應照京師八旗之例。於未入場之先。令奉天將軍。副都統等。驗射馬步箭。能者准其考試。不能者不准入場。至會試時。同京師舉人。一體考試馬步箭。應如所題。從之。○冊封和碩純禧公主。下嫁科爾沁台吉般迪。授般迪。為和碩額駙。○丙辰。

上奉

皇太后。自暢春園回宮。○丁巳。直隸巡撫于成龍疏言。前奉部撥賑濟銀三十萬兩。尚不敷用。請續發銀兩。以備接賑。部議不准行。

上命再撥銀五萬兩散賑。○陞京口副都統張思恭。為京口將軍。○工部議覆漕運總督董

訥疏言。運河沿北一帶水淺。漕艘不能速行。請放南旺湖水。以裨漕運。應如所請。

上諭大學士等曰。南旺湖之水。自來流入運河。朕去歲南巡。回鑾時。沿隄而行。細閱河勢。知南旺湖之水。至分水龍王廟分流。俱入南北運河。當日始建隄岸之人。經營甚善。今若使南旺湖之水。盡入北流。則南運河將至水淺矣。可傳從前勘河諸臣及靳輔。問明回奏。○戊午。大學士等奏曰。臣等遵旨。問從前勘河諸臣。暨靳輔等。據勘河諸臣云。我等勿勿行過。所見不甚詳明。靳輔云。南旺湖水。若使之偏入北河。目前雖少有裨益。及糧艘齊集時。南運河必至水淺。

聖見誠然。

上曰。此湖水。可令總河詳議善後之圖。以裨漕運。應開應閉。亦令酌行。○諭刑部。刦盜被鄰居之人。及衆人擒獲。或為被盜之家。人擒獲。皆應賞勵。盜若抗拒。捕者被創。應依行間受。

傷例賞之。爾部議奏。尋議覆。嗣後擒獲強盜之人。及拒捕被傷之人。俱分別一、二、三、四等。給賞銀兩。著為定例。通行直隸各省。八旗內府佐領遵行。從之。○己未。

上詣

皇太后宮。問安。○庚申。

上以康熙二十四、二十五兩年內所閱通鑑。

御製論斷一百有七則。命贊善勵杜訥。交起居

注館記注。○理藩院題。喀爾喀察罕巴爾台

吉。已授扎薩克。請照蒙古貝勒例給賞。其子

噶爾旦台吉等。照四十九旗台吉例給賞。

上曰。察罕巴爾台吉。當喀爾喀未敗之先。來奏

喀爾喀基業未定。必至於敗。彼時臣必來歸。

後果踐其言。率所屬來歸。可嘉。今照郡王例

給賞。餘如議。○辛酉。刑部左侍郎噶世圖。以

老疾乞休。允之。

夏四月。壬戌朔。享

太廟。

上親詣行禮。○癸亥。遣官賑濟察哈爾。及八旗遊牧蒙古窮丁。○甲子。諭內大臣公舅舅佟國維等曰。據阿南達奏言。厄魯特與拖多厄爾德尼戰。頗被殺傷。其襲西布推哈灘巴圖爾時。兩人共一騎。有斬木為兵者。且聞來侵。昆都倫博碩克圖。而至今未到。想已狼狽。必有退回俄儂之勢。阿南達欲帶行礮。并禁軍前往。相機征剿。朕非不知禁軍足以克敵。但路遠艱於糧運。朕前率察哈爾兵行獵。見其人材壯健。皆思効力。可選精銳六百。左翼令阿要率之。右翼令博爾和代率之。馬駝牛羊。於八旗大場內派出。兵各攜五月糧。再於漢軍每旗選章京一員。領行礮八門。及礮手前往。檄阿喇尼額赫納知之。○又諭曰。比聞厄魯特策妄阿喇布坦。阿奴與噶爾丹交惡。情事未悉。應頒敕書詢其故。并量加恩賚。令理藩院擇賢能司官一員。送往嘉峪關。交侍讀學士達虎。即令其前往宣諭。達虎事竣。著乘



驛來京。此遣去官及達虎同事之主事奔襲。仍留邊外。偵取消息。不時報聞。賜策妄阿喇布坦及阿奴敕曰。朕撫育萬邦。率土之人。皆欲其協和安輯。今聞爾等與噶爾丹不和。致啓爭端。爾厄魯特向修職貢。恭順惟謹。今乃內自交惡。必有其因。朕甚憐之。遠聞之言。虛實難據。特遣侍讀學士達虎齎御用各色緞二十疋。賜策妄阿喇布坦阿奴。其以爾等交惡之由。明告使臣。毋隱。○乙丑。

上詣

皇太后宮問安。○以大學士王熙為三朝國史監修總裁官。大學士伊桑阿。阿蘭泰。梁清標。徐元文。為總裁官。尚書張玉書。張英。左都御史陳廷敬。侍郎李振裕。庫勒納。內閣學士朱都納。星安博。際布彥圖。郭世隆。彭孫通。副都御史王士正。詹事尹泰。為副總裁官。敕曰。朕惟帝王肇基垂統。綏御萬方。駿業弘謨。必勒諸簡冊。傳示無窮。所以炳耀豐功。宣

揚至治。甚盛典也。我

太祖高皇帝。誕膺寶籙。鼎命維新。締造丕圖。規模宏遠。

太宗文皇帝。道隆作述。運啓休明。式廓禎符。燕貽景祚。

世祖章皇帝。統一寰區。化成治定。中和懋建。聲教遐敷。惟

列聖之相承。冠百王而首出。鴻猷峻德。巍煥難名。緯武經文。昭垂無斁。舉凡勦亂安邦之畧。

立綱陳紀之宜。用入行政之方。牖民成俗之

本。布於方策。歷久彌新。創制顯庸。燦然明備。

即當時勲舊諸臣。翊贊王室。宣力四方。亦莫

不託附風雲。懋彰勞績。惟從龍而應運。信昭

代之多才。朕夙夜紹庭。思闡

先烈。爰命儒臣。恭修

三朝國史。茲特命爾等為總裁官。爾其督率在

館諸臣。薈萃琅函。博蒐掌故。折衷至當。裁訂

成書。毋尚浮夸。而乖情實。毋徇偏見。而失公

平。母過質畧而意不周。該母務鋪張而詞多繁縟。務期事歸確核。文極雅馴。勤以董成。敏而竣事。庶幾垂型萬世。傳信千秋。以覲耿光。以揚大烈。稱朕意焉。爾其勉之。無忽。欽哉。○轉刑部右侍郎噶爾泰為左侍郎。陞通政使傳臘塔為刑部右侍郎。○已巳。諭戶部京城八旗官員兵丁暨各屯中家口貧苦者。已被恩澤。但直隸地方防守官兵家口尚未沾恩。其間有艱難困苦者。爾部遣司官等往察。以便賑恤。○八旗漢軍都統。副都統等疏言。臣等會議。火礮為軍中利器。每旗各發一具。恐不足用。請倍之。每礮派將領一員。軍校礮手二名。於臣等內遣一二人率之前赴土喇。得旨依議。李林隆人材勇健。練習軍務。著總管火礮。與阿南達偕往。尋又令都統楊文魁。副都統伊壘。率漢軍二百名。繼之行。○以翰林院侍讀李枬。充日講起居注官。○壬申。

上詣

皇太后宮問安。○以翰林院侍講李澄中。為雲南鄉試正考官。刑部主事劉滋。為副考官。右春坊右諭德徐嘉炎。為貴州鄉試正考官。內閣中書李有倫。為副考官。○以詹事尹泰。為通政使司通政使。○陞山西大同總兵官鮑敬。為鑾儀衛鑾儀使。○理藩院奏喀爾喀紀克巴台吉等。請市軍器。以備噶爾丹。從之。○乙亥。大學士等奏倉場侍郎凱音布等。以運河水淺。漕船難行。請交總漕總河。速加挑濬。臣等遵旨。問原任總河靳輔。若將運河水。從兩旁下埽築隄夾堵。令水流歸漕。則水必深。庶可行舟。靳輔云。

聖諭誠然。若從兩旁夾堵修築。則舟可行矣。上曰。此事若行文總河修築。則遲延日久。即令凱音布。同靳輔速往。從分水龍王廟。以基速動。正項錢糧。率地方官酌量挑濬。下埽束水。以濟漕運。○先是一等侍衛阿南達疏言。臣所率兵。請與阿喇尼兵合為一處。兵勢方壯。

上曰。兵事重大。其令阿喇尼等各陳所見。至是阿喇尼。紀爾他布奏曰。臣等竊思額赫納等兵若沿汎界而來。時候非宜。恐跋涉艱苦。況廟謨已定。應遵前諭。赴所指之地以行。至阿南達所領察哈爾兵。及行礮令前赴臣軍。其諸扎薩克兵。期會於綽嫩河。今車臣汗兵已抵綽嫩河西北。洮瀨河矣。臣等亦驛召前所調扎薩克兵來會於洮瀨河。至噶爾丹來從何路。及昆都倫博碩克圖在何處。訪問未確。俟所調兵至。遣人偵探。事當急行。則臣奏聞即發。緩則請旨後行。奏至。

上諭曰。阿喇尼。紀爾他布。仍往前所指示之地。額赫納等既往西路。止帶扎薩克及喀爾喀兵。恐力寡不敵。阿南達速領軍往額赫納處策應。仍遵前諭行。○丁丑。諭大學士等。蒙古秉性怠惰。不能深計生業。往歲小旱。即致饑窘。朕初意賑贍乏食之人。所需有限。及觀散給米穀之數至多。凡人生業各自勤勉。必籌

畫終歲之計。撙節用度。方可不致窮困。若每藉賑贍。終於生聚無益。今正當暄和之時。遣通曉蒙古事務重臣。會外藩之諸王。貝勒。貝子。台吉等。作何逐家教諭。令其各勤生業。旗內貧人。作何養贍。俾安樂利。凡此數者。當令其規畫久遠。詳細商酌。著議政王。大臣會同確議以聞。○又諭大學士等。此時亢旱。米價騰貴。八旗官兵秋季應支米石。可預給其半。○諭刑部。天時早乾。囤囤重罪。已令清理。今所在祈禱望雨甚殷。除死犯以外。凡拘禁。枷號。鞭責等罪。咸從寬釋之。○戊寅。

孝端文皇后忌辰。遣官祭。

昭陵。○諭倉場侍郎凱音布。原任河道總督靳輔曰。山東河道。自分水龍王廟以南。流入運河之水。不一而足。舟行無阻。分水龍王廟以北。匯入運河者。惟河南衛水而已。並無別渠相濟。南旺所蓄之水。又不能多。常致淤淺阻滯。今將駱馬湖之水。不令其自禹王臺流入。

沐河。俾駱馬湖之水蓄貯無洩。於運道有無裨益。至駱馬湖與南旺等湖相距地勢高低如何。山東東阿縣之鹽河及別河有可通入運河者否。河南衛河之外有別河可資以疏入運河者否。爾等訪其地諳練之人委曲諮詢。若有可措施之處。親加詳閱。繪圖來奏。○己卯。戶部議覆奉天將軍公綽克託等疏言盛京錦州開元遼陽蓋州諸處應積蓄米穀將奉天錦州二府地丁錢糧每年存剩銀五千餘兩解交盛京戶部轉發錦州等處城守尉酌量米價賤時陸續採買其部員所收牛馬稅銀三千餘兩交與倉官亦酌量買米收貯盛京倉內出陳易新交與奉天將軍管理得旨倉糧關係緊要著盛京戶部侍郎稽察收貯米穀每年仍將出入數目報部○左都御史陳廷敬疏奏言官建白不得撫拾細務上曰設立科道原欲其建言也至條奏之事是否可行自有裁定若必大事始言則言官難

分事之大小以致進言者少非所以集衆思廣衆益也○壬午。

上詣

皇太后宮問安○癸未以通政使尹泰兼管詹事府詹事事○陞陝西河州副將王弼為山西大同總兵官○甲申禮部議覆五經博士孔毓埏疏請建子思專廟應如所請照顏曾孟例於闕里孔廟西北隅建立專廟從之○乙酉諭大學士等曰太常寺鴻臚寺等衙門鳴贊官原擇其聲音弘亮者選用論俸陞為主事若等歷年未久乃由捷徑反越年久筆帖式先陞其聲音不善者取為鳴贊閱數年並未贊禮一次者有之可下旨太常寺鴻臚寺等衙門察見任鳴贊等官將聲音劣者題叅革其鳴贊以筆帖式補用如將劣者不行斥革朕察出并治罪焉○丁亥。

大清會典告成。

御製序文曰朕惟自古帝王憲天出治經世宜

民莫不立之章程。允釐庶績。二帝三王之成迹。畧見於尚書周禮。唐虞以九官岳牧綜理內外。而周則六卿分職。各率其屬。並以時亮天功。阜成兆姓。責有攸歸。斯事胥就理。上古之世。其事簡。其辭約。故見於書者。祇咨命數言。而敷政任功之意。周禮蓋詳焉。沿及唐宋。做為六典。輯為會要。悉本斯義。明初撰諸司職掌。其後因之。勒成會典。雖累代制作。不能盡同。要皆舉弘綱。詳細目。變通因革。亦各協其宜也。洪惟我

太祖高皇帝。肇造區宇。戡亂救民。當草昧締構之初。而法制維新。規模大定。

太宗文皇帝。式廓丕基。聿緯以武。聿經以文。典則科條。次第釐舉。

世祖章皇帝。同風六合。徧德萬邦。府修事和。聲教洋溢。凡所以黼藻至化。潤色鴻業者。郁郁彬彬。聚乎備矣。朕嗣歷服。三十年於茲。夙夜兢兢。繼承

祖考。憲章前謨。以仰邇乎堯舜禹湯文武致治

之隆軌。時飭羣臣。勤修職業。每建一事。布一令。務期上弗戾於古。下克誠於民。酌劑討論。其難其慎。然後赴所司奉行。夫朝廷之規制。損益。無一不關於黎庶。大中之軌立。則易而可循。畫一之法行。則簡而可守。制治保邦之道。惟成憲是稽。不慕重歟。用是特命儒臣纂輯會典。綱維條格。甄錄無遺。終始本末。犁然共貫。庶幾大經大法。炳耀日星。而導道路者。咸得有所據依矣。詩不云乎。不愆不忘。率由舊章。書有之。其爾典常作之師。我國家典章弘備。視前代加詳。悉皆本之實心。以相推準。而非緣飾虛文。鋪張治具。惟茲良法美意。相與世世恪遵。無斁。官治民察。以躋斯世於隆平。萬年無疆之休。將於是乎在矣。可不念哉。

○戊子。

上詣

皇太后宮。問安。○陞大理寺卿鄔赫為盛京刑

部侍郎○已丑先是京師雨澤未敷

上憂之是日大雨四野霑足

上出正陽門至南苑觀禾諭大學士等曰保定

等處未知雨足否可遣戶部司官善馳馬者

即往察勘○庚寅

上詣

皇太后宮問安○命發甘肅靖遠衛倉糧賑濟

靖遠衛旱災饑民

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十五

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十六

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣翁同書

總裁官光祿大夫文華殿大學士兼吏部尚書臣朱軾等奉

敕修

康熙二十九年庚午五月辛卯朔吏部以行

取知縣事照例請旨

上諭曰行取知縣以科道用者甚多科道職任

關係緊要著九卿各以平昔所知學問優長

品行可用者面同舉奏尋戶部尚書王鴻臚舉

清苑縣知縣邵嗣堯清廉慈惠兵部尚書李

天馥舉三河縣知縣彭鵬靈壽縣知縣陸隴

其居官有聲

上諭大學士等曰適九卿列薦有邵嗣堯陸隴

其彭鵬三人其服官廉介朕所素知爾漢大

學士亦有知者否。梁清標奏曰。三人允稱廉吏。徐元文奏曰。以臣所聞。湖廣麻城縣知縣趙蒼壁。牧民有聲。聞武昌兵譟時。所在州縣官。俱棄城潛去。惟趙蒼壁安撫百姓。修城預備。

上曰。彭鵬。邵嗣堯。陸隴其。趙蒼壁。俱准行取。○壬辰。

上詣

皇太后宮問安。○癸巳。

仁孝皇后忌辰。遣官祭

陵。○甲午。禮部等衙門題。各省典試官。命下之後。限五日起程。如故遲不行者。科道官題參。交部嚴行處分。從之。○乙未。

上御太和門視朝。文武陞轉各官謝恩。○命歸化城副都統阿毓。運殺虎口倉粟。赴都統額赫納等軍前。○丙申。

上移駐瀛臺。○戊戌。

上詣

皇太后宮問安。○庚子。陞大理寺少卿明額禮。為大理寺卿。○辛丑。

上詣

皇太后宮問安。○刑部等衙門議覆。汪南江西總督傅拉塔疏言。臣察審沭陽縣民周廷鑑。叩閭告太常寺少卿胡簡敬。父子兄弟。一門濟惡。霸佔民人妻女田產。誣良為盜等事。俱係情實。胡簡敬應革職。徒三年。胡旭。胡敷世。俱應絞。胡簡尤等。俱擬杖徒。巡撫洪之傑奉旨交審事件。不速行審訊。反收胡簡敬訴詞。明係徇情。應降三級調用。

上曰。朕早夜孜孜。勤思治理。日與在廷諸臣講求。無非愛養民生。恐其顛連無告。以致失所。若紳衿土豪倚勢橫行。凌虐小民。藐法縱恣。毫無顧忌。窮黎受害。何所底止。胡簡敬等一門濟惡。霸佔民人妻女田產。誣告盜情。致斃人命。闔縣之人。遭其毒害。種種惡蹟。昭然有據。督撫不行舉發。科道漫無糾劾。無非畏其



勢力。瞻徇情面。今已告發審實。若不嚴加處分。立置重典。何以為直隸各省不法紳衿積惡豪強之戒。胡簡敬等。應於彼處正法治罪。巡撫洪之傑。為地方大吏。平日既不能體察糾劾。及經告發。又不速行審治。遷延徇庇。殊負委任。應革職。著九卿詹事科道會同議奏。○喀爾喀額爾克阿海巴郎奏言。臣父扎薩克圖汗。喀爾喀七旗之長也。為左翼土謝圖汗所敗。屬裔分散。臣等又為厄魯特所收。棲於阿爾泰山之南。今乘間得出來投。伏乞聖恩賑恤恩養。俾得繼立。下議政王大臣等議。尋議覆。扎薩克圖汗。歷世恭順。職貢有年。似應繼立。查今年衆喀爾喀來降。已定期會閱。其所請應於會閱處定奪。從之。○癸卯。遣官祭。

關聖帝君○甲辰。

上詣

皇太后宮問安○乙巳。夏至。祭。

地於方澤。

上親詣行禮○丁未。

上奉

皇太后。幸暢春園○戊申。

上詣

皇太后宮問安○己酉。陞京口協領祖澤源。為京口副都統○以太僕寺少卿程甲化。為四川鄉試正考官。內閣中書王郎。為副考官。太常寺少卿錢三錫。為廣東鄉試正考官。行人司行人劉瀾。為副考官。吏科掌印給事中王惇。為廣西鄉試正考官。內閣中書蔣德昌。為副考官。翰林院編修陸棻。為福建鄉試正考官。行人司行人徐炯。為副考官○教漢多羅郡王阿敏達賴故。遣官致祭○盛京刑部侍郎鄔赫。陞辭。

上諭曰。聞盛京地方。囑託之事甚多。爾到任後。須奉公而行○

上諭大學士等曰。河道所關。至為重大。一二年來。雨水稀少。管河官視河道為常事。今年雨水似多。可馳諭總河。嚴飭該管官晝夜防視。務保河隄無虞。○癸丑。尚書阿喇尼疏言。臣前遣蒿齊忒都統勞章等。與郎中馬迪訪昆都倫博碩克圖所在。渡克魯倫河。過昆都倫博碩克圖。言我於正月。自俄儂遊牧。思近汎界。依我

皇上威靈。而聞厄魯特漸近。避之至烏爾呼納河。今厄魯特不知其何往。我兵微不敵。兩尚書駐軍洮瀨河。今將至軍前聽調。遣馬迪促其前進。仍遣勞章等偵噶爾丹。至博爾濟河。有馬濟者。澤卜尊丹巴屬下人。自厄魯特逃歸。問之。曰。噶爾丹於五月初三日。率兵渡烏爾扎河。將襲昆都倫博碩克圖車臣汗。及土謝圖汗。其兵四營。號四萬。實不過三萬耳。又將請兵於鄂羅斯。會攻喀爾喀。

上曰。似此。則阿喇尼等兵尚少。宜發科爾沁十

旗預備之兵二千。及禁軍每佐領護軍一名前往。其令議政王大臣議。尋議覆。兵宜速發。應令理藩院遣官乘驛前往科爾沁。於前所調遣預備兵內。選發二千。及台吉都統副都統各二員。佐領驍騎校各八員。齎四月糧。速赴阿喇尼軍前。其統轄是軍者。伏候

皇上特簡。其八旗滿洲蒙古前鋒二百名。每佐領護軍一名。每翼副都統一員。前鋒參領一員。前鋒侍衛署參領一員。前鋒校署侍衛二員。每旗護軍參領一員。護軍校署參領七員。其每翼所派副都統一員。亦伏候

皇上特簡。得旨。科爾沁兵令土謝圖親王沙津率之。左翼四旗。居遠難待。令沙津王儘所有兵率之先往。其四旗兵隨後進發。再令喀喇沁杜楞郡王扎什旗分發兵五百。以扎什率之。兩翁牛特旗分發兵四百。以杜楞郡王畢禮袞達賴率之。兩巴林旗分發兵四百。以額駙阿拉布坦率之。俱赴阿喇尼軍前。其禁軍

令副都統噶爾瑪羅滿色率之。每翼漢軍兵一百名帶礮前去。滿洲蒙古漢軍各佐領出駱駝一頭運糧。

上聞噶爾丹將借兵鄂羅斯。時鄂羅斯使人吉里古里伊法尼齊等在京。

上傳諭之曰。噶爾丹迫於內亂。食盡無歸。內向行劫。今乃揚言會汝兵。同侵喀爾喀。喀爾喀已歸順本朝。倘悞信其言。是負信誓而開兵端也。爾等可疾遣善馳者二人。歸告尼布潮頭目伊凡。徧諭鄂羅斯之衆。隨命鄂羅斯瓦什力齊克滿。馳驛先往。越三日。遣吉里古里伊法尼齊等歸。

○甲寅  
上詣

皇太后宮問安。○乙卯。兵部題。護糧官兵應於八旗滿洲蒙古漢軍各派將領八員。軍校八人。每駝押兵一名。出口外。交蒙古遞運。并以駱駝數目。及起行日期奏聞。

上命於大兵起行後。四五日遣發。取太僕寺駱

駝十二。以足一千二百之數。○丁巳。

上幸南苑行圍。○戊午。

上回駐暢春園。○己未。

上詣

皇太后宮問安。○尚書阿喇尼等奏。郎中馬迪報稱。自烏爾扎河前踰一日程。有厄魯特列營狀。

上諭曰。八旗兵及礮著即擇日啓行。阿南達等不必待額赫納。即載礮以往。其額赫納及科爾沁巴林翁牛特兵。俱著星馳赴阿喇尼軍。○頒發內版四書五經於禮部。○旌表河南節婦李氏。福建節婦陳氏。給銀建坊如例。六月。庚申朔。○壬戌。

上詣

皇太后宮問安。○戶部奏。給發出征官兵家人兩月行糧。及帶去預備之米。俱應發古北口倉內所貯米糧。給發時。應遣臣部司官二員。同霸昌道監放。

上曰。所給之米。能帶去者。令馱兩月之糧前往。不能者。則令少帶。聞有不能帶米。或致貨賣者。亦有棄之而去者。可令爾部侍郎阿山前往給發。戶部又奏曰。出征官員秋季俸銀。及兵丁四個月錢糧。應預為給發。

上曰。伊等起程甚速。各給銀十兩。令其修理器械。給與一月錢糧。餘依議。○乙丑。九卿遵旨議覆。原任太常寺少卿胡簡敬。一門濟惡。種種不法。胡簡敬應坐光棍為首例。立決。其倚勢作惡之胡旭。胡敷世。應論絞。洪之傑。身為封疆大臣。不行參奏。奉旨審理。又不連結。徇情護庇。稽延時日。應革職。得旨。胡旭。胡敷世。依擬應絞。令監候。秋後處決。胡簡敬。從寬免死。并伊子弟。俱發河南安插。開墾荒地。洪之傑。著革職。餘依議。○丙寅。諭內務府。王泉山河水所關甚巨。西山一帶碧雲香山卧佛寺等山之水。俱歸此河。從前此河由清龍橋北匯入清河。後因欲引此水入京城。將高處濬

河之兩旁。復加謹防。固以分水勢。今值霖雨之際。水勢漫溢。隄岸衝決數處。爾等速將閘板啓放。使河水暢流。一面令工部將衝決之處。速行堵築。○丁卯。先是。

上諭喀喇沁杜楞郡王扎付。率兵護餉。不必隨征。至是。遣其子垂扎木素奏曰。

恩命令臣護運軍糧。所以體恤臣者。甚至。但臣雖不材。久蒙恩養。苟可自効。敢不報稱。臣先請備兵九百。為國先驅。今願以臣所屬塔布囊巴圖爾等。率兵五百護餉。臣身率兵四百効力軍前。從之。○戊辰。

上詣

皇太后宮。問安。○庚午。戶部議覆。福建巡撫張仲舉疏言。據閩海關監督殷達禮詳稱。民間採捕魚蝦。并貿易鋤口之物。奉旨俱免收稅。今逐一確查。分晰應免稅銀。共六千四百九十四兩有奇。著為則例。永遠遵行。應如所請。從之。○辛未。兵部題海澄公黃芳泰遺疏。請

以公爵令其弟黃芳度繼子黃應繼承襲。俾得安葬殉難者之柩。應無庸議。得旨黃芳泰係功臣之裔。可如其所請。令黃應繼在籍安葬。○壬申。

上詣

皇太后宮問安。○諭議政王大臣等曰。頃聞厄魯特窮困。沿克魯倫河下流而來。其遣人諭科爾沁巴林翁牛特兵速赴阿喇尼所。遣員外郎鐵圖往諭兩烏朱穆秦兩蒿齊忒兩阿霸垓兩蘇尼特八旗。除前所發之兵外。自王以下。有願効力者。速赴阿喇尼所。令鐵圖視其啓行。令學士布彥圖催督前軍駐汎界。不時至軍前探聽。我禁軍及火礮俱速令前往。再發八旗前鋒二百名。每佐領護軍二名。預備以待。噶爾丹來市易者。有阿卜都喇額爾克寨桑等。尚在歸化城。理藩院其遣官往諭。言噶爾丹且至。爾等毋妄動。行且有所差遣。其集人畜以待。○癸酉。兵部遵旨議發八旗

滿洲蒙古兵。其統領全軍大臣。伏候特簡。上命宗室公都統蘇努統領全軍。鑲黃旗副都統覺羅海篤領左翼。鑲紅旗副都統牛尼有領右翼。即日又令議政王大臣。以克魯倫等處地名及程途遠近。詢問新來喀爾喀。○江南江西總督傅拉塔。疏叅大學士徐元文。原任刑部尚書徐乾學。縱放子姪家人等招搖納賄。爭利害。民所行劣跡共十五款。江蘇巡撫洪之傑。趨附獻媚。甚為溺職。得旨所叅本內各款。從寬免其審明。徐元文著休致回籍。○乙亥。

上詣

皇太后宮問安。○調偏沅巡撫鄭端為江蘇巡撫。○以翰林院編修張希良為浙江鄉試正考官。戶部郎中王謙為副考官。翰林院侍講顧蔭為江西鄉試正考官。禮部郎中黃軒為副考官。翰林院編修周金然為湖廣鄉試正考官。吏部員外郎曾華蓋為副考官。○山東

巡撫佛倫疏言。東省累民之事。第一賦役不均。凡紳衿貢監戶下。均免雜差。以致偏累小民。富豪之家。田連阡陌。不應差徭。遂有奸猾百姓。將田畝詭寄紳衿貢監戶下。希圖避役。積習相沿。牢不可破。若不力為禁革。小民困苦。何日得除。請通限二月之內。將從前詭寄田畝。許其自首。盡行退出。嗣後凡紳衿等田地。與民人一例當差。庶積弊一清。而小民得免偏枯之累矣。得旨。紳衿等優免丁銀。原有定例。其鄉紳豪強。詭寄濫免。以致徭役不均。偏累小民。積弊已久。今該撫所奏。改正釐剔。具見實心任事。並不瞻徇。直省應一體行。九卿詹事科道會同確議具奏。○戊寅。

上詣

皇太后宮問安。○尚書阿喇尼等奏報偵探厄魯特兵駐扎克魯倫之阿爾灘額墨爾地方。臣等欲待大兵而行。恐厄魯特兵追躡昆都倫博碩克圖。沿烏爾順河至喀爾喀河地方。

烏爾順河。距喀爾喀河甚近。喀爾喀河。距汛界僅一日程。臣軍若往波衣爾之地。慮反出其後。以此竟赴波衣爾之南。他奔他什海以禦之。奏至。

上諭曰。噶爾丹踰枯倫波衣爾。深合事關緊要。理宜豫備。王沙津如未起行。令率所調科爾沁兵。往前年紀爾他布等駐防之地。備之。若沙津已起行。著達爾漢親王班第率兵往備之。其教漢土默特貝勒厄爾德木圖。公烏忒巴喇等旗兵之未調者。令往備達爾腦兒前所派出每佐領禁兵二名。作速遣行。再於每佐領下。應派護軍驍騎各五名。豫備以待。其以阿喇尼奏。速檄額赫納知之。著議政王大臣集議。尋議應如敕諭。令理藩院遣官馳驛前往。

上曰。蒙古兵令攜兩月行糧。其教漢奈曼科爾沁土默特兵。令貝勒厄爾德木圖。公烏忒巴喇統之。其率科爾沁兵。往紀爾他布駐防之

地。令內大臣蘇爾達率前次將校乘驛前往。其再發之軍。每佐領撥護軍五名驍騎三名。包衣佐領兵亦照此派發。令都統宗室喇克達。彭春。護軍統領苗齊納。楊岱。副都統扎木素。海瀾。塞赫。康喀喇。統之。其副都統邁圖。署為前鋒統領前去。再派出漢軍都統公舅舅佟國綱。都統諾邁。凡派發火器營兵之事。令彼請旨。再派諸王從征。軍行日期。交欽天監選擇。令前所撥兵。輕裝於初旬速行。其輜重。令每翼留官校押往。尋命和碩康親王傑書。多羅恪慎郡王岳希從征。○庚辰。先是。福建安溪縣革職知縣孫鏞。首告福建巡撫張仲舉。布政司張永茂等。將藩庫錢糧。侵蝕肥己一案。奉旨。差吏部郎中吳爾泰等。往福建審理。至是。浙江福建總督興永朝疏稱。郎中吳爾泰等。將張仲舉等。摘印看守。請開缺另補。上曰。此事極為重大。吳爾泰等乃一司官。將此事妄為張大。亦未可定。著內閣學士郭世隆

前往察審。○諭兵部。前遣教漢。奈曼各旗兵。備達爾腦兒。今不必前往。令速赴科爾沁。達爾漢親王軍前。兵部選材能司官。四日馳至盛京。發兵二三千。令將軍。副都統領之。速赴達爾漢親王班第軍前。兵部遵旨。遣郎中恩丕。馳至盛京。將軍綽克託。副都統博定。隨發盛京及開原。興京。東京。遼陽。廣寧。錦州。易州等城兵共三千。率之以行。○辛巳。以工部尚書張英。兼翰林院掌院學士。○諭兵部。噶爾丹追喀爾喀。已進汎界。朕將親往視師。從征諸王。出喜峯口。公蘇努等所領之軍。隨朕行。令諸王先朕進發。先檄知尚書阿喇尼等。理藩院遣司官。星馳以往。其令議政王大臣集議。尋議諸王軍。以七月初四日起行。其從征之兵。每翼遣副都統一員。駕發日期。初六日為宜。奏入。上諭曰。前所撥每佐領護軍二名。初一日先發。諸王率每佐領驍騎一名。於初四日繼發。朕



於初六日啓行。方值農時。邊內不必列營。海  
篤。牛尼有。人才素優。從諸王行。扎木素。康喀  
喇。同蘇努行。所發驍騎署。叅領與王偕行。其  
中著有勞績。人材勇健者。詢該都統。委為夸  
蘭大。○壬午。諭大學士等。所派漢軍一千五  
百鳥鎗兵。各賞銀十兩。如不遣發。免其追取  
○免河南開封。彰德。衛輝。懷慶。四府屬二十  
四州縣。本年分旱災額賦有差。○癸未。陞湖  
廣布政使于養志。為偏沅巡撫。浙江布政使  
卞永譽。為福建巡撫。○烏朱穆泰。額爾德尼  
貝勒。博木布疏報。六月十四日。厄魯特至烏  
爾會河東烏闌之地。臣屬人民多被刼掠。臣  
遣護衛額克濟爾往視。見噶爾丹之弟。憨都  
台吉。送之至噶爾丹所。謂曰。我攻我仇喀爾  
喀耳。不敢犯中華界。聞尚書阿喇尼。率兵而  
北。何故。澤卜尊丹巴土謝圖。汗車臣汗。皆在  
何地。額克濟爾以不知對。奏入。  
上諭曰。噶爾丹已至烏爾會河。軍宜速出。其軍

中無火器者。與禁軍前所發兵。及盛京兵。俱  
應增發。令議政王大臣。速行詳議。尋議應於  
馬場。催取馬匹。公蘇努之兵。仍於初一日起  
行。前所發之前鋒護軍。攜見馬於初二日發  
後。派之前鋒護軍。驍騎。於初三日俱發。令各  
都統一員。護軍統領一員。副都統一員。率之  
至邊外水草寬衍之地。駐候。諸王軍。於初四  
日起行。直隸巡撫。天津鎮。三屯營。協標。下火  
器兵。再發一千。并發宣化府鎮標兵一千。藤  
牌兵一千。俱令宣府總兵官許盛率之。與諸  
王同發。京城兵。每佐領。應增派護軍二名。每  
旗護軍叅領一員。每叅領護軍校署護軍叅  
領一員。每翼副都統一員。八旗火器營兵。增  
發一千。所增發護軍。及火器營官兵。俱護  
駕而行。至盛京兵。增發二千。令將軍。及副都統  
統之。吉林烏喇兵二千。將軍親率之。俱令赴  
科爾沁。達爾漢親王軍前。與前所發盛京兵  
會。遣兵部官乘驛往。再取巡捕三營馬八百

給與軍士。京城大兵陸續遣發。

皇上親統大軍。相繼而行。理藩院檄諭四十九旗。令各備兵。分汛哨探。并檄阿喇尼額赫納阿南達等軍知之。奏入。

上諭曰。後所發護軍各二名。令都統阿席坦。副都統那泰。希禪。率之。俟朕啓行後。續發。至副都統噶爾瑪等所領兵并礮。令內大臣阿密達往統之。不時偵探奏報。以候朕至。總兵官許盛既帶操練藤牌軍一千名。其標兵可選六百。出張家口。令前鋒叅領索柱。巴圖魯引之。由岱陰達巴漢之路。往赴阿密達軍前。其直隸巡撫天津鎮標兵一千。令三屯營副將師帝賓率之。隨諸王而行。俱攜兩月糧。巡捕營馬八百匹。給火器營兵。比聞驛站廢弛。令直隸巡撫于成龍整理。其綠旗候選軍官。武進士舉人。及林興珠等革職官員。有願効力者。令與火器營兵同行。如有勞績酌量擢用。其曉諭之。都統彭春。護軍統領楊岱。副都統

塞赫。於初二日起行。都統喇克達。護軍統領苗齊納。副都統海瀾。於初三日起行。未幾許盛已行。復令回宣府聽調。○甲申。

上奉

皇太后。自暢春園回宮。○

上將出師。遣使賜噶爾丹敕曰。朕統御宇內。懷柔萬邦。惟願率土生民。咸得其所。相與協和。無分中外。夫兵凶器。戰危事。互相仇怨。無有已時。非計也。故遣尚書阿喇尼。散秩大臣吳巴錫。扎薩克大喇嘛阿齊圖。綽爾濟。一等待衛阿南達。傳諭令罷兵息戰。爾回奏云。聖主施仁撫育。令共相協和。以享康泰。我亦與焉。伏願指示安樂之策。聞聖上將盡驅出喀爾喀之人。不勝懼怖。不敢以殺我弟多爾濟。扎卜為憾。所奏甚明。今乃聞爾復興兵伐喀爾喀。故遣尚書阿喇尼。防境內之不靖者。今烏朱穆秦遣使至爾所。爾言中華與我一道同軌。我不敢犯界內地方。而又闖入汛界。掠烏

朱穆秦人畜是背前言而隳舊好也。且朕前所遣伊拉古克三胡土克圖等。至今不歸。爾誠何意耶。今遣員外郎阿爾必特祐。宣賴。齎敕諭爾。爾尚可以改圖。爾既入邊。我諸部王及貝勒。台吉等。行且興兵擊爾。故亦遣來使止之。卹爾至矣。其速給還所掠。歸我使人。爾其明白回奏。是日。即以遣使諭噶爾丹事。檄知諸軍。○乙酉。以禮部尚書張玉書為文華殿大學士兼戶部尚書。○以翰林院侍講學士王頊齡為陝西鄉試正考官。刑科給事中錢紹隆為副考官。翰林院侍讀學士王尹方為江南鄉試正考官。兵部主事裴袞為副考官。○丙戌。諭戶部。朕撫育蒸黎。勤求民瘼。務期休養。漸至阜安。閭閻間有疾苦。朕衷時切軫念。近見廣東高瓊等府。地丁各項錢糧。歷年逋欠。如係官役侵漁。及豪強頑梗。抗不輸納。自應嚴追。倘因丁缺地荒。不能輸納。仍行徵比。照例考成。則小民既困。追呼有司。復惟

忝罰。徒滋擾累。終無裨益。著該督撫。以各州縣舊欠錢糧。不能辦納情由。詳悉察明具奏。○丁亥。九卿議直隸各省鄉紳名下田地。應照山東省與民人一例差徭。

上曰。山東省清釐賦役。可如議行。其直隸各省令各該督撫確議具奏。○時噶爾丹沿喀爾喀河而進。追及昆都倫博碩克圖。昆都倫不能禦。僅以身免。阿喇尼等聞噶爾丹駐兵索約爾濟河。連夜率兵往襲之。至則噶爾丹已向烏爾會河去矣。具疏以聞。

上命阿喇尼等。仍躡厄魯特後。偵其所至。奏報額赫納等軍到。且勿與戰。俟達爾漢親王班第兵盛。京烏喇滿洲兵齊集。同夾擊之。如噶爾丹潰敗。令阿喇尼等窮追。便宜行事。檄諸軍量馬力疾行。齊會形勝之地。以俟禁軍。○戊子。諭議政王大臣等曰。康親王傑書。恪慎郡王岳希。副都統海篤。牛尼。有率前所發驍騎。每佐領各一名。於初二日起行。出張家口。

屯歸化城。如大同兵可用。聽王等隨宜調遣。其厄魯特貿易人馬。託言乘用盡收之。直隸巡撫率兵一千駐遵化。西安將軍尼雅翰副都統巴賽。栢天郁率滿洲兵二千。漢軍兵一千。屯寧夏。其寧夏綠旗兵亦令預備。○尚書阿喇尼等奏報。與厄魯特戰於烏爾會河地方。厄魯特兵二萬餘。掠烏朱穆。秦男女牲畜輜重徐行。溯水上流遊牧。臣等偵知之分兵二隊。乘夜往襲。二十一日昧爽。於烏爾會河地方。及其營。令所選蒙古勇士二百餘攻之。令喀爾喀兵五百驅其所掠。未及戰。諸扎薩克及喀爾喀兵爭取其子女牲畜。陣動不能止。遂退。厄魯特分兩翼陣而立。我軍次隊繼進。厄魯特發鳥鎗軍退。前隊兵及喀爾喀兵復進。喀爾喀畏其鳥鎗先却。諸扎薩克兵力薄亦退。厄魯特增兵從山上繞出我左右。我軍因火器營未至不能進。遂歛歸。駐鄂爾折伊圖。以俟諸軍。

上以示議政王大臣。尋部議。阿喇尼。紀爾他布等違命輕戰。以致失利。俱應革職。同往官員俱革職。得旨。阿喇尼。紀爾他布。俱革去議政。降四級調用。紀爾他布。仍留佐領。餘如議。○時噶爾丹歸。我使商南多爾濟以其情陳奏。上起滿丕為理藩院郎中。鄂齊理為員外郎。往諭噶爾丹。命之曰。爾等往諭噶爾丹。據商南多爾濟來奏。言尚書阿喇尼等不請旨而即擊汝。非本朝意也。阿喇尼防守地方。汝闖入汎界。肆行刦掠。職寄所關。不得不戰。皇上恐諸扎薩克擊汝。前已遣使諭止之。今又遣我等來諭。商南多爾濟奏汝言與中華一道同軌。我但索土謝圖汗。澤卜尊丹巴而已。至邊境之內。不敢纖芥犯。而我尚書阿喇尼等遽加以兵。甚為過當。其以此曉諭之。○封故固山貝子章泰之子吞珠為鎮國公。○旌表山東節婦王氏。給銀建坊如例。○己丑。

上詣

皇太后宮問安○

上以厄魯特兵入汎界。馬場亟宜防護。乃遣副都統馬錫調察哈爾兵往駐形勝之地。以備之。○喀爾喀扎薩克台吉額爾克阿海等。率千餘人劫掠。學士布彥圖以聞。

上諭發察哈爾兵備之。遣軍校檄阿喇尼。令與額赫納阿南達兵會。毋以前戰未捷。遽懷退怯。其收集兵馬。嚴行警哨。如各扎薩克之兵不足恃。皆令內移。喀爾喀有橫行者。禁輯之。

自古北口至西巴爾臺。令兵部遣坐驛筆帖式設站。自西巴爾臺至阿喇尼所。令蒙古設站。學士布彥圖設站畢。撤張家口驛。其坐驛筆帖式軍校。赴伊處酌用。兵部侍郎沙穆哈前往安驛。直至布彥圖所。令巡撫于成龍。星速來京。整理近京驛站。其標下所調之兵。及天津鎮標兵。俱選賢能將弁。率往遵化。兵部遣官疾馳往諭。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十六

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十七

監修總裁官光祿大夫太保兼太子太傅保和殿大學士兼戶部尚書一等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十九年庚午秋七月庚寅朔享

實錄卷一百四十七

太廟遣領侍衛內大臣公舅舅佟國維行禮○

調工部尚書張英為禮部尚書○陞京口副

都統董元卿為京口將軍○戶部議覆直隸

巡撫于成龍長蘆巡鹽御史江蘩疏言長蘆

行鹽地方惟宣屬最苦請將額引除去聽民

自煎食鹽仍照舊額納課應如所請從之○

科爾沁土謝圖親王沙津遣署副都統蘇爾

米二等護衛根都等往偵噶爾丹至察克墩

望見噶爾丹前哨次第屯列且營壘甚近沙

津即率所備兵前進具奏以聞

上諭曰大兵陸續前進朕亦親往姑勿與戰以

待各路軍至齊發毋失機宜其檄王沙津知

之○辛卯噶爾丹深入烏朱穆秦地

上命和碩裕親王福全為撫遠大將軍皇子允

禔副之出古北口和碩恭親王常寧為安北

大將軍和碩簡親王雅布多羅信郡王鄂扎

副之出喜峯口內大臣舅舅佟國綱佟國維

內大臣索額圖明珠阿密達都統蘇努喇克

實錄卷一百四十七

達彭春阿席坦諾邁護軍統領苗齊納楊岱

前鋒統領班達爾沙邁圖俱叅贊軍務諸軍

前發惟佟國維索額圖明珠留京俟大將軍

至陰山馳往會之○諭兵部本朝自

列聖以來戰必勝攻必克所向無敵者皆以賞

罰明法制嚴兵卒精銳器械堅利人思報國

殫心奮勇之所致也今軍行其令各該都統

以下察核軍實凡甲冑弓矢諸器械務令犀

利堅好其盔甲俱繫號帶馬駿尾書旗分佐

領姓名。其行也。視大纛整隊齊發。有零星前後錯行。及醉酒者。該管官立拏懲責。其止也。各按旗分隊伍。分列屯扎。有前後錯亂者。罪及該管大臣。馬無印。箭無名。各罰以銀。給拏獲者。竊取鞍轡什物馬匹者。視其多寡治罪。失火者。亦從重究懲。官兵廝役。所過百姓蒙古地方。毋騷擾。毋搶掠。毋踐踏。有擅離營伍入村落山谷奪人財物者。軍法從事。罪及本主。及該管官。軍士廝役逃亡。在汛界內。立行察拏治罪。如出汛界外。該管大臣。即遣官兵窮追務獲。立斬以徇。如不能獲。則將往追將卒。從重治罪。其逃人之主。及該管官。一并嚴行察懲。既出我境。哨探斥堠。務期嚴密。如曠野交兵。對陣見敵。王貝勒貝子。公大臣。不按次序攙越前進。及見賊兵寡弱。不復請令。冒昧前進者。有功不叙。仍治以罪。其進也。須齊列緩轡。按隊前行。如自離其隊。而附人後。或自棄其伍。而入別行。或他人已入。而獨留不

進。身死家沒。及重責革罰。分別治罪。如整齊而進。擊敗賊兵。厥功維均。勿以畧分先後。致生爭競。至彼不抗我軍。而奔潰。則選精兵良馬逐之。列隊躡踪而進。如前忽遇伏。或賊兵有旁抄者。則後隊接戰。夫兵者。所以討逆而安順也。領軍大臣。果能嚴束其下。不使良民受害。朕不靳厚賞。否則罰亦無赦。凱旋之日。有以兵器私售蒙古者。本人治罪。并及該管官。馬乃大軍急需。須視水草善地。小心護養。起行時。則留將卒察遺失之馬。視驢尾所繫字樣。交還原主。如係疲馬。則開明馬色數目。交所在官司人民蒙古。善行牧養。報知兵部。如有匿而騎用。及殺之棄之者。治以罪。其遺失疲馬之人。亦開明馬色。報兵部存案。恐官兵未能徧知。爾部其刊布曉諭之。○兵部題撫遠大將軍和碩裕親王福全等奏。殺虎口密邇歸化城。請撥大同綠旗兵前往。以聽調遣。應如所請。於大同鎮標遣馬兵六百。步兵



內。或藤牌。或火器。一千四百。令叅將遊擊等率之。於七月初十日內。至殺虎口。其總兵官玉璧。尚未受事。或徑赴大軍。或仍留大同。應候旨行。

上曰。此所撥兵係鮑敬舊轄。即令率之前往聽調。王璧蒞任後。仍留防守地方。○諭理藩院大將軍裕親王。率大兵出古北口。其令侍郎沙穆哈。學士布彥圖。自阿喇尼設站之處。酌撥附近旗分人馬。尾隨大軍。設立驛站。○壬辰。副都統噶爾瑪疏言。臣率兵往會阿喇尼等。六月二十七日。至阿霸垓。聞前軍已與噶爾丹交鋒。乃遣人探兩尚書所在往會之。以兵力單弱。便宜於附近調察哈爾左翼四旗兵。每旗百名以行。越二日。與阿密達軍會於岡阿。得旨。前已調發察哈爾兵八百。左翼兵無庸再調。今撫遠大將軍將出塞。應令阿密達等暫駐岡阿。偵明蘇努軍行實信。與之齊赴克勒。以候大將軍至。如聞厄魯特內向。即

回與大軍合。其檄知之。○陞廣西按察使李鈞。為福建布政使司布政使。廣東按察使李燁。為湖北布政使司布政使。浙江按察使馬如龍。為浙江布政使司布政使。湖廣下荆南道張勛。為福建按察使司按察使。○撫遠大將軍和碩裕親王福全等奏。臣等既身率重兵。其切近噶爾丹處。偵探奏報機宜。似宜備文。令臣等知之。

上曰。自後奏報軍機。皆令馳赴軍前。爾等接視封進。有所見。即附奏以聞。○諭理藩院額赫納軍。從何路往達阿喇尼所。較為接近。其諭阿喇尼等。遣能員速往迎之。兵力薄弱。恐突遇敵兵也。阿喇尼所駐地。如有可虞。漸移入內。謹防斥堠。又聞喀爾喀行劫驛馬。其曉諭嚴禁之。○癸巳。諭戶部。朕撫育黎元。勤思治理。足民之道。宜裕蓋藏。從來水旱靡常。必豐年恒有積儲。庶歉歲不憂饑饉。如康熙二十七年。頗稱歲稔。誠使民間經營撙節。早為儲侍。

何至康熙二十八年。偶遇旱災。室皆懸罄。總因先時無備。遂至餬口維艱。比蠲除正賦。特發帑金。分行賑濟。所在官司。悉仰體朕懷。竭力從事。被災之衆。始獲安全。倘非拯救多方。則筑黎必流移失所。今霖雨時降。黍苗被野。刈獲在即。可望有秋。惟恐愚民不知愛惜物力。狼籍耗費。祇為目前之計。罔圖來歲之需。縱今年獲屢豐。亦難漸臻殷阜。應行直隸各省督撫。嚴飭地方官吏。家諭戶曉。務俾及時積貯。度終歲所食。常有餘儲。用副朕軫念民依。綢繆區畫至意。爾部即遵諭行。○一等侍衛阿南達疏言。臣等六月初十日。自伊克噶扎爾起行。至布爾漢布喇克。尚書阿喇尼。檄令臣等率察哈爾兵。并職。至他奔他什海。臣因選兵五百。前赴至岡阿。則阿喇尼已回就大軍。臣乃疾行至阿霸垓。聞阿喇尼在西喇西巴爾臺集兵。噶爾丹已東走矣。臣等馬疲糧乏。僅以歸化城副都統阿毓璽。所運來米

一百石。散給士卒。尚餘米百馱。阿毓璽護之。與臣等同行。迎就大軍。

上命阿南達等。與阿喇尼。噶爾瑪兩軍。就其近者往會之。額赫納兵。恐亦糧盡勢迫。其檄阿南達。速往迎之。入汎界。副都統阿毓璽所解米百馱。量給阿南達兵。餘留以給額赫納軍。令阿南達酌行。○安北大將軍和碩恭親王常寧奏。臣既出喜峯口。當由何道進兵。

上曰。視其道之近者。往與大軍會。其出古北口之兵。糧儲多。爾等未會之際。糧宜節省。出邊後。有助糗糧者。聽助。籍其姓名以聞。所助牛羊。俱收畜。及時以散給之。炎暑軍行。恐人馬勞苦。其令晝止夜行。○乙未。

上御太和門。遣撫遠大將軍和碩裕親王福余帥師出征。賜之敕印。

上出東直門。視諸軍啓行畢。回宮。○丙申。命內大臣阿密達。率兵與阿喇尼。阿南達。巴林翁牛特等軍。齊至克勒。候撫遠大將軍和碩裕

親王福全軍○諭內大臣舅舅佟國維等京  
城大軍絡繹出邊阿霸喀阿霸哈納蘇尼特  
蒿齊武等兵無所調用不必赴尚書阿喇尼  
軍前著於各旗形勝之地駐扎嚴防喀爾喀  
新來之衆妄行○內大臣蘇爾達疏言臣於  
六月三十日至科爾沁見達爾漢親王班第  
駐圖思噶爾圖山兵到者僅半喀喇沁阿霸  
喀索曼兩土默特兵亦未到臣俱移文及檄  
盛京兵促其前來俟到日整飭軍伍進發奏  
至命議政王大臣集議其恭親王兵應否停  
止一并議奏尋議蘇爾達去時敕諭甚悉其  
恭親王兵且勿去但令預備前已檄王沙津  
等姑勿與厄魯特戰以俟大兵今蘇爾達等  
亦應俟諸軍齊集遣人約大將軍兵協力以  
進得旨恭親王兵可勿備餘如所議其令裕  
親王及叅贊大臣等知之○丁酉

上詣

皇太后宮問安○戊戌陞廣西左江道唐宗堯

為廣西按察使司按察使山西河東道劉元  
勳為廣東按察使司按察使浙江金衢道孫  
允恭為浙江按察使司按察使○諭內大臣  
舅舅佟國維等曰朕夜來思及一事方欲傳  
諭適諾木齊岱來奏蘇爾達之語與朕意相  
符朕觀噶爾丹退回二宿之地似欲潛逃如  
俟京城大兵至始追之恐不及聞盛京烏喇  
兵俱已起行十日內即到矣其令阿密達全  
軍及公蘇努軍中視有壯馬者選出即簡出  
征大臣一員統領而往沿途擇水草善地剋  
期到彼如噶爾丹欲逃即行追剿無失機會  
若彼來迎敵則我軍切勿急行以待大兵姑  
遣使往諭之曰汝闖入我汎界尚書阿喇尼  
等不得不迎戰汝向與天朝修貢通好此來  
追喀爾喀耳今喀爾喀剗奪我外藩肆行悖  
亂亦與我朝相失聖上特遣和碩裕親王及  
皇子來與汝申明禮法自茲以往永定盟好  
汝不聞前者我朝出兵至鄂羅斯以禮和好

不戰而歸乎。汝其謹俟王及皇子之至。如此往復遣使。以羈縻之。大兵可俟阿喇尼等。所有扎薩克兵。及阿南達兵。其馬既不堪用。著阿南達親押火器。速往與盛京烏喇。科爾沁兵會。阿南達所留之兵。著一人管轄。駐於見居之地。不時探報。蘇努等所餘之兵。尾此軍後。聯絡坐臺哨探。其令議政王大臣集議。尋議。

上諭已極周詳。其統領此軍之大臣。及管轄阿南達所留兵之人員。恭候特簡。

上曰。著索額圖統領。偕阿密達先往。令阿密達及蘇爾達。泰酌而行。索額圖。阿密達前去。則攜前鋒叅領石圖與俱。并量選前鋒兵帶往。至則視其情形。如彼能待。則俟大軍而行。不能待。則遣人羈縻之。必不得已。則明諭之曰。聖上遣皇兄及皇子。與汝相見。非惡意也。汝乃不俟而去。非汝之不軌乎。雖聖上戒勿戰。我不汝貸也。往復數四。度盛京烏喇諸扎薩

克兵且至。力足以勝。即便宜行事。如彼奔逃已遠。不便往追。則速奏。以便撤兵。蘇努及阿密達之軍。俱令蘇努率之。而往。除阿南達等押礮。及馬壯者前去外。其馬不堪者。酌留令副都統扎木素。噶爾瑪領之。駐阿喇尼等原駐之地。探噶爾丹聲息。及額赫納軍情。不時報聞。并防禦就近地方。作惡肆行之人。其查努喀。朱爾素。亦酌量帶往。調用。索額圖。取皇子允禔。廐馬百匹。乘以前去。○己亥。

孝懿皇后忌辰。遣官祭。

陵。○轉左都御史陳廷敬。為工部尚書。陞直隸巡撫于成龍。為都察院左都御史。○辛丑。領侍衛內大臣索額圖疏言。臣近閱阿喇尼奏。噶爾丹今在烏朱穆秦旗。分奇爾薩布喇克之地。如遵前旨。赴蘇爾達所。則似迂曲。臣已選蘇努軍中馬壯者。往與阿密達軍會。伏乞敕諭。趣盛京烏喇兵。科爾沁等旗兵。速赴臣軍。從之。○壬寅。

上詣

皇太后宮問安○噶爾丹遣達爾漢格隆奏言  
喀爾喀吾讎也。因追彼闌入汎界。向在

中華皇帝道法之中。不敢妄行。

上因賜來使筵宴賞賚。令齋敕歸諭之。敕曰。據  
爾使人達爾漢格隆陳奏。具見敬慎惻誠。朕  
統御天下。重信義而賤欺誑。前以七旗喀爾  
喀彼此構怨。與達賴喇嘛共議。遣大臣諭和。  
不意左翼興兵妄動。朕弗之直也。後喀爾喀  
為爾所敗。匍匐來歸。朕念普濟衆生之意。賜  
以米糧牲畜。所全活者無算。喀爾喀何利於  
朕。而施恩若是。皆朕不忍生民之顛沛故耳。  
是年出盟。方分別七旗曲直。昭雪扎薩克圖  
汗之事。欲仍前設立右翼。議未及定。爾兵已  
至。乘虛驟入。褫守汎界者衣服。出言不遜。朕  
亦不深責。六月二十五日。遣員外郎阿爾必  
特祜等問故。而阿喇尼等在邊。以爾公然闌  
入汎界。守邊責重。不能容忍。遽與爾戰。朕甚

非之。六月二十九日。復遣郎中滿丕齋敕諭  
爾及商南多爾濟。歸取行糧而已。豈有正事  
尚未議定。即可言執土謝圖汗。澤卜尊丹巴  
以畀汝乎。此皆使臣設計脫身而為此言也。  
汝謂與達賴喇嘛。道法為一。則當憐念衆生  
同心。以安喀爾喀。令七旗同享安樂。以仰副  
朕意。乃反肆殺戮。拆人妻子。離人骨肉。闌入  
汎界。掠及四佐領之人。揆之道法。可若是行  
乎。恐達賴喇嘛。未必使汝為此也。西寧報至。  
聞策妄阿喇布坦。以汝罪告之達賴喇嘛。將  
興兵伐汝。夫興戎。非美事也。朕且將與達賴  
喇嘛。共議調和。而聞汝已駐兵烏爾會河。故  
朕遣和碩裕親王及皇子大臣。量發滿兵而  
往。非討汝也。欲定議耳。前者遣大臣往鄂羅  
斯議事。亦發兵往。議畢而回。汝所夙知也。為  
汝計。其聽達賴喇嘛言。罷兵息戰。各享安樂。  
既合衆心。亦易畢事。如仍以前事為辭。妄行  
剽掠。則隳敗名教。自汝始矣。○諭理藩院索

額圖等行與蘇爾達會。爾衙門即遣司官一員偕噶爾丹使人達爾漢格隆等從喜峯口至索額圖等軍前。如索額圖等以使人為可遣歸。則遣之。如不可。則留之。○撫遠大將軍和碩裕親王福全等疏言。厄魯特今至奇爾薩布喇克之地。於盛京烏喇科爾沁調兵之處。不相涉。蓋稍在內矣。索額圖等若仍赴蘇爾達所。似覺迂曲。然已近巴林。臣等欲使索額圖等勿赴科爾沁而駐軍巴林。以待臣等當選馬疾行。尾隨索額圖而進。尚書阿喇尼等疏言。噶爾丹距臣軍所駐西喇西巴爾臺僅一日程。又侍衛阿南達率察哈爾兵五百及運米土默特兵二百已至臣所。并巴林翁牛特兵八百共一千五百名。臣等率之已與內大臣阿密達軍會。兩軍止三千餘耳。勢力單薄。請且駐朱爾亨布喇克等處。整兵以待禁軍。奏入。

上諭。速檄索額圖至巴林。候裕親王。王等亦不

必選馬疾行。率全軍赴巴林。并令人追蘇努兵之分行者。齊赴巴林。其阿密達阿喇尼等兵。速令內向。至我大軍去路以待。又前所發五旗。每佐領護軍二名。令恭親王領之。踰二日起行。王其約束軍士。所過毋踐禾稼。○癸卯。

上詣

皇太后宮問安。○

上巡幸邊塞。是日啓行。駐蹕牛欄山。○諭都統瓦岱等曰。據關係奏。噶爾丹於六月二十七日遣發其使人。及我撥什庫。次日潛師遁去。般第。蘇爾達等遣人躡視之。噶爾丹兵果已北去。朕之欲幸此軍者。以躬近行間。便指示也。今噶爾丹雖退。而喀爾喀方且橫行。剽掠驛遞。及諸扎薩克馬畜衣服。乘此大兵集會。朕乃親往視師。以靖喀爾喀之肆。俾知所畏忌。事可一舉而定也。○以內閣學士郭世隆為直隸巡撫。○甲辰。中元節。遣官祭。

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○

上駐蹕石匣○學士西拉奏員外郎阿爾必特

祐。宣賴奉使噶爾丹。不終使事。半路私歸。請誅之。

上可其奏。隨又諭大學士伊桑阿等曰。阿爾必特祐宣賴。罪本應誅。今暫免其死。前遣去筆帖式巴查爾。竟未見噶爾丹而歸。今俱帶之前去。出口後。或有差遣之處。亦未可定。若能効力。則貸其罪。否則誅之。○乙巳。

上駐蹕古北口○丙午。

上駐蹕古魯富爾堅嘉渾噶山○諭大學士伊

桑阿尚書。顧八代曰。朕沿途閱視。見所踐田禾。過於朕初時諭旨。部中文量者。惟恩格木噶山以南。過此並未丈量。何地非朕赤子。可令侍郎賽弼漢。即自口以北。至波瀨噶山。凡所踐田禾。作速明悉丈量。○諭內大臣蘇爾達等曰。查諸台吉及兵丁中。馬瘦糧少者。著留於阿魯昆都倫之地。擇善約束之。台吉統領駐防。其已到之土默特兵。令蘇爾達沙津般第等率之。俟盛京烏喇兵到。全赴巴林。以會大軍。其教漢等四旗兵未到者。速遣諭之。不必赴科爾沁。亦往巴林。并檄撫遠大將軍及叅贊大臣知之。如有所見。奏聞。○丁未。

聖躬違和。仍駐蹕古魯富爾堅嘉渾噶山○領侍衛內大臣索額圖奏。兵赴巴林。

上命內大臣阿密達尚書阿喇尼等率兵往會之。○命和碩康親王傑書等率兵往會撫遠大將軍和碩裕親王福全軍。○內大臣阿密達疏言。是月十五日。濟隆胡土克圖之拉木



扎木巴同伊拉古克三胡土克圖之尼隆格隆等來至臣所。告曰噶爾丹言我自入汎界秋毫無犯。

皇帝亦惠我幣帛敕書甚大德也。今乃聞侍衛阿南達率兵及諸路軍雲集。又聞有內大臣且至。土謝圖汗之子噶爾旦台吉亦在軍中。夫執鼠之尾。尚噬其手。今雖臨以十萬衆。亦何懼之有。臣等答之曰。奉命防邊。

上意勿與厄魯特戰也。我寧敢違旨乎。阿南達等。久已赴京。噶爾旦台吉不知所往。拉木扎木巴又曰。噶爾丹博碩克圖汗言。兩胡土克圖及商南多爾濟來事已定議。將於次日遣奏。而是夜兩尚書來襲我。入我兄子營殺及子女。不戰者如是乎。臣等答之曰。厄魯特闖入汎界。掠我烏朱穆秦。兩尚書不得已與之戰。今

聖上特遣皇兄皇子來。與噶爾丹定議。我等亦將內徙矣。臣因遣郎中哈爾吉卜。少卿把圖

與其使人偕行。臣又聞其從者曰。十五日噶爾丹引兵內進。屯於西巴爾台矣。奏至。

上命示議政大臣。○戊申。扈從大臣侍衛等合詞奏曰。此地風高寒暑無定。伏請

皇上回鑾。移駐內地。以養

聖躬。

上諭曰。朕躬雖覺違和。留駐數日。俟稍愈。即往軍前。相機調遣。○命安北大將軍和碩恭親王常寧。帥師會撫遠大將軍和碩裕親王福全軍。○以翰林院編修秦宗游。為河南鄉試正考官。工部郎中邱園。為副考官。○議政王大臣等。遵旨議覆。歸化城宜留兵防守。和碩康親王傑書軍。不必令赴大軍。應遣人迎回歸化城。其外藩兵。應調其半。至康親王所。又前所撥宣府鎮標兵一千。并藤牌手一百。候調遣者。令許盛率之。大同兵二千。備殺虎口者。令鮑敬率之。俱著速赴歸化城。康親王

軍前從之○予故內大臣三等阿達哈哈番  
覺羅武默納祭葬如例○己酉。

上駐蹕博洛和屯○和碩簡親王雅布隨  
駕至博洛和屯請往軍前効力。

上令趣赴撫遠大將軍和碩裕親王軍前叅贊  
軍務○內大臣阿密達疏言臣等駐軍木西  
峽濟隆胡土克圖遣衛徵格隆噶爾丹遣尊  
多伊格蘇爾為使見臣等於前鋒營述噶爾  
丹之言曰我雖入汛界索吾讐而已弗秋毫  
犯也乃今聞使侍衛阿南達率兵來至葫蘆  
谷爾河與兩尚書會阿南達奉

命使於我者數矣吾亦常饗之命講信修好宜  
遣之來議否則亦當遣尊於阿南達等者奏  
至。

上命示議政大臣○諭大學士伊桑阿等曰驛  
站奏報軍機關係重大其令侍郎額爾賀圖  
自此至裕親王軍自王軍至阿密達軍整飭  
驛站其兵部侍郎沙穆哈撤之令回○庚戌。

內大臣伯費揚古前鋒統領班達爾沙奉命  
赴科爾沁至布爾哈蘇圖地方與科爾沁軍  
會費揚古等奏聞。

上諭曰費揚古等不必與科爾沁兵齊來令速  
赴裕親王軍并檄蘇爾達等知之○以翰林  
院編修余志良為山東鄉試正考官兵科給  
事中朱雲為副考官翰林院檢討潘麒生為  
山西鄉試正考官大理寺右評事法標為副  
考官○諭撫遠大將軍和碩裕親王福全等  
軍機事宜不時報聞今朕與爾相距僅三百  
里而往來之信常遲非軍機所宜也其不時  
倣飭之○予故奉國將軍倭內祭葬如例○  
辛亥。

上夜間身熱心煩至黎明始得成寐諸大臣侍  
衛等不勝惶懼是夜俱集行宮前○壬子清  
晨諸大臣侍衛等合詞跪奏此地日中甚熱  
夜間甚涼寒燠不常兼以大風時至地方潮  
濕。

聖體益覺違和此間難於調攝懇祈

皇上即日回鑾以養

聖躬

上猶未允諸大臣侍衛等於行宮前長跪不起再三懇請

上曰此地寒燠不常似難調攝爾等諄諄叩請朕暫且回鑾日間甚熱每日日落後徐行二三十里可耳又諭扈從諸臣侍衛等曰朕來此地本欲剋期剿滅噶爾丹以清沙漠今以

朕躬抱疾實難支撐不獲親滅此賊甚為可恨至於歎息流涕隨命選擇肥壯馬匹分給隨駕火器營兵前鋒護軍令其馳赴於大軍前是日啓行駐蹕舍里烏朱地方○諭都統喀岱等曰今裕親王軍既在土爾垸伊扎爾其諭恭親王不必赴拜察令往會裕親王○癸丑

上駐蹕古魯富爾堅嘉渾噶山○先是

上以聖體甚覺違和命皇太子允初皇三子允

祉馳驛前迎是日允初允祉至行宮請安見聖體未寧

天顏清減畧無憂戚之意見於詞色

上以允初絕無忠愛君父之念心甚不懌令即先回京師○甲寅諭署理理藩院事左都御史馬齊學士西拉曰朕問二等侍衛吳達禪云喀爾喀土謝圖汗澤卜尊丹巴胡土克圖屬下貧不聊生者甚多可遣爾衙門司官一員至土謝圖汗處將至窮乏食者帶至張家口外相宜處同口北道動支張家口所貯之米日給飯食其食米人及所需米數俟進京時奏聞○先是

上諭裕親王等曰今兵漸與敵近斥堠宜嚴明噶爾丹處應作何羈縻以待盛京烏喇科爾沁之兵王等其遺之牛羊以老其銳氣疑其士卒商南多爾濟諳晰情形可與商也至是撫遠大將軍和碩裕親王福全奏言臣隨遣濟隆胡土克圖及噶爾丹之使偕驍騎校克

實圖原任員外郎筮賴遺以羊百頭牛二十頭持臣及皇子書語之曰我與汝協護黃教和好有年今汝追喀爾喀入我汎界。

聖上特命我等論決此事永久和好今汝使人言我汗已敬遵達賴喇嘛之諭夫講信修禮所關重大此役既就則一切皆宜矣今將於何地會議以決大事因遣書之便以牛羊為餽贈臣等不知諸軍至何地可待則待之如不可待則量力而進耳○撫遠大將軍和碩裕親王福全又疏言蘇努阿密達等兵俱已來會噶爾丹聲息漸近臣等今分大軍為三首隊每佐領護軍五名次隊每佐領護軍二名驍騎一名兩翼每佐領護軍驍騎各一名前鋒各二百名夸蘭太及將領等員臣等酌量分派餘前鋒四百名留臣等左右以備策應至三隊大帥重任也自忝贊大臣以下副都統以上在行間者皆奮欲前驅惟皇上所命奏入。

上諭曰火器營大帥不必易首隊令前鋒統領邁圖護軍統領楊岱副都統札木素塞赫羅滿色海蘭尚書紀爾他布阿喇尼率之次隊令都統楊文魁副都統康喀喇伊壘色格印率之兩翼令公蘇努彭春率之內大臣舅舅佟國維內大臣索額圖明珠阿密達與王等親督指揮視何處當應援親率兵赴之其恭親王軍到聽大將軍調用至噶爾丹使人速遣之○乙卯。

上駐蹕捕塔海噶山○丙辰。

上駐蹕喇嘛洞○丁巳。

上駐蹕恩格木噶山○戶部等衙門議覆山東巡撫佛倫疏言東省康熙二十九年分地丁錢糧盡行蠲免百姓莫不感戴惟是無地小民尚未得均沾。

聖澤臣仰體

皇上一視同仁之心傳集司道府官員勸諭紳衿富室將其地租酌量減免一分至五分不

等。應如所請。嗣後直隸各省。遇有恩旨蠲免錢糧之處。七分蠲免業戶。以三分蠲免佃種之民。俾得均沾恩澤。從之。○予故三等阿思哈尼哈番阿賚祭葬如例。○予故盛京刑部侍郎吳什巴祭葬如例。○戊午。

上駐蹕三岔口。○撫遠大將軍和碩裕親王福全等疏言。臣等欽遵諭旨。遣使羈縻噶爾丹。茲仍令前使持書往彼。曰。尚書阿喇尼等倉猝進兵。以至交惡。久經奏聞。今因博碩克圖汗索土謝圖汗澤卜尊丹巴之故。

聖上特遣我等來議永定和好。各遣貴顯大臣定議。博碩克圖汗屢以未嘗犯我國為辭。今乃掠我屬界。執其部長。不幾背前言乎。今以濟隆言定議修好。是以遣使奉書等語。但噶爾丹素行狡詐。未必不於克什圖歸來之前進兵。臣等當并力禦敵。務期不失機會。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十八

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十九年庚午八月己未朔日食。○

實錄卷一百四十八

上仍駐蹕三岔口。○庚申。

上駐蹕古北口。○先是。

上遣阿爾必特祐等赴索額圖軍前使於噶爾丹。至是索額圖疏言。阿爾必特祐等歸。偕濟隆胡土克圖使人拉木扎木巴。噶爾丹使人尊多伊格蘇爾。至營。問其情由。阿爾必特祐等述噶爾丹之言曰。所有情事。已同滿丕等遣使上奏。不復具疏。但以書問王與皇子內大臣安請遵商南多爾濟所傳。

明旨。以土謝圖汗澤卜尊丹巴昇我述濟隆之言曰。達賴喇嘛所以遣我者為

聖上與噶爾丹向來和好。急欲定此大事。以早復命耳。此事非王及皇子內大臣親身就我。或我親身來面議。不能定也。又視來人形狀。甚覺倉皇。有窺探大軍意。厄魯特見至烏闌滾地方。覓山林深摯。倚險結營。又聞其祭旗誦經。距我軍僅四十里。報聞。○辛酉。

實錄卷一百四十八

上駐蹕石匣。○撫遠大將軍和碩裕親王福全等疏報。七月二十九日。臣等聞厄魯特屯於烏闌布通。即整列隊伍。八月初一日黎明前進。日中見敵。設鹿角鎗礮。列兵徐進。未時臨敵。發鎗礮擊之。至山下。見厄魯特於林內隔河高岸相拒。橫卧駱駝。以為障蔽。自未時交戰。至掌燈時。左翼由山腰捲入。大敗之。斬殺甚多。右翼進擊。為河崖淖泥所阻。回至原處而立。本欲盡滅餘賊。但昏夜地險。收兵徐退。其噶爾丹死於亂兵與否。俟後查明另奏。得

旨嘉獎。下部議叙。○諭議政王大臣等。目前於西安發滿兵二千。漢軍一千。往寧夏駐防。今已大敗厄魯特。此所備兵著撤回西安。其綠旗兵亦令各回本汛。速檄康親王等偵探厄魯特敗兵奔潰者。即發兵堵剿。并檄知四十九旗各部長。○諭裕親王及叅贊王大臣等。卿等奏報大敗噶爾丹疏。初三日已到。此皆

上天鑒臨。

祖宗默祐。諸王大臣盡心。官兵効力之所致也。

朕聞之。焚香謝

天。不勝欣悅。此後當何以窮其根株。平其餘黨。熟籌始末。一舉永清。勿留遺孽。爾等其詳議以聞。○撫遠大將軍和碩裕親王福全等疏言。八月初一日。擊敗噶爾丹。薄暮收軍。次日即前進剿殺餘寇。見噶爾丹據險堅拒。故使我將士暫息。而噶爾丹適遣伊拉古克三胡土克圖來。復理前說。請以土謝圖汗澤卜尊

丹巴界之。且云一二日內。濟隆胡土克圖。即來講禮修好。臣等悉遵

聖諭。數噶爾丹前後逆惡而遣之矣。初四日。濟隆果率其弟子七十餘人來。言博碩克圖汗信伊拉古克三及商南多爾濟之言。深入汎界。部下無知搶掠人畜。皆大非理。

聖上乃一統宇宙之主。博碩克圖汗不過小部頭目。何敢妄行。但因索其仇土謝圖汗及澤卜尊丹巴致有此悞。彼今亦無索土謝圖汗之意。但祈

聖上慨允。以澤卜尊丹巴遣送其師達賴喇嘛榮光莫大矣。臣等謂之曰。土謝圖汗澤卜尊丹巴。即有罪愆。

聖上自加罪責。豈有因噶爾丹之言遂遣送達賴喇嘛之理。且汝往來行說。能保噶爾丹不乘間奔逸。掠我境內人民乎。濟隆言王及諸大臣仰體

聖上仁心。休征罷戰。彼焉敢行劫。亦斷不遠去。



臣等謂之曰。汝雖保噶爾丹不敢妄行。但我各路兵。分行進剿。遇厄魯特。即行掩擊。必然之勢也。今我等仰體

皇上好生。許汝所請。當發印文。檄各路領軍諸王大臣。暫止勿擊。隨給濟隆等蟒袍。先遣其弟子馳報噶爾丹。臣等思噶爾丹乃狡詐之人。雖不可全信。但戰之次日。屢遣人來。必多窘迫。臣等欲即進剿。則厄魯特據險堅拒。俟其往來講解。以待盛京。烏喇。科爾沁諸軍之至。齊行夾擊。如有可除之機。斷不悞也。

上命議政大臣集議。尋議大將軍王等。既大敗厄魯特。乃不即行剿滅。明知濟隆行說。以悞我軍。而故聽之。豈不坐失事機。請敕大將軍王等。作速追剿。得旨。出征諸王大臣。當同心効力。大將軍王與皇子。失悞機宜。眾大臣不正言抗阻。軍律甚明。歸時斷不姑宥。此役所關甚鉅。今科爾沁。烏喇。盛京之兵。初四五間。可至達爾腦爾矣。若又失機會。不進逼之王。

與大臣等。此行何所事耶。○壬戌。

上駐蹕密雲縣南新莊。○癸亥。

上由密雲縣登舟。至牛欄山。○甲子。

上駐蹕三家店。○以翰林院侍講學士王掞。為

順天鄉試正考官。編修魏希徵。為副考官。○

乙丑。

上回宮。○丙寅。命都統希福。馳驛赴撫遠。大將

軍和碩裕親王軍前。叅贊軍務。○丁卯。

太宗文皇帝忌辰。遣官祭

昭陵。○戊辰。祭

大社

大稷。遣領侍衛內大臣公福善行禮。○己巳。

太祖高皇帝忌辰。遣官祭

福陵。○辛未。

上詣

皇太后宮問安。○

上諭大學士等。允禔聽信小人讒間之言。與撫

遠大將軍和碩裕親王福全。不相和協。妄生

事端。私行陳奏。留駐軍前。必致債事。著撤回京。○壬申。喀爾喀額爾德尼濟農彭楚克拉布坦遣使進貢。賞賚如例。○癸酉。先是撫遠大將軍和碩裕親王福全等疏言。噶爾丹迫於追襲。自什拉穆楞河載水。橫度大磧山。連夜遁走於剛阿憐爾。臣等欲追。而馬力不能前進。又恐噶爾丹去遠。因與濟隆胡土克圖約。使噶爾丹近我而止。以定禮好。遣侍衛吳丹。護軍恭領塞爾濟等。偕濟隆往諭之。至是裕親王等又疏言。吳丹塞爾濟與濟隆帶噶爾丹使人達爾漢格隆。西達額爾克寨桑持書至。告曰。噶爾丹跪於威靈佛前。稽首誓曰。若違此書。惟佛鑒之。其書詞云。達賴喇嘛明鑒。遣濟隆額爾德尼來責以禮法。今倘蒙皇上惠好。則自此不敢犯喀爾喀。謹以印文為驗。臣等閱書未載誓詞。仍遣濟隆等歸。開諭噶爾丹。增書誓詞。許其歸好。奏入。

上命議政王大臣集議。尋議噶爾丹乃極狡詐。

之人屢遣人以立誓為詞。今又剽掠克西克騰之三佐領矣。誓好不可深信。蘇爾達等軍已到。應立行剿滅。但王等親在軍中。事皆目擊。應准所奏。命噶爾丹堅誓而釋之。王等仍率大軍駐彼探噶爾丹出邊遠去實音。令蘇爾達軍照常防守。從之。○旌表直隸烈婦康朝選妻劉氏。拒姦不污。斧傷殞命。給銀建坊如例。○乙亥。諭議政王大臣等曰。今噶爾丹敗逃漸遠。應將無馬兵丁酌量撤回。邇來扎薩克蒙古內有出首與噶爾丹潛通往來者。彼此仇扳誣陷。亦未可定。應免察議。○免甘肅鎮原縣本年分電災額賦有差。○丙子。上詣皇太后宮問安。○諭大學士等曰。朕體較前大愈。久不見部院諸臣。思欲相見。明日當御門見之。○撫遠大將軍和碩裕親王福全等疏言。十一日遣伊拉古克三赴噶爾丹。十五日齎噶爾丹奏章還。其詞曰。伏蒙照鑒下情。普

使安全。正在懽懽。伊拉古克三來諭。以禮法事。永圖至信。理所宜然。未知如何。可以贊襄王事。伏冀

至仁皇帝鑒察。謹上書為永遠不絕之信誓云。又伊拉古克三云。噶爾丹頂佛像設誓曰。我自恃理直。追索土謝圖汗。澤卜尊丹巴。而深入汎界。置佛天於前。而不以已之罪為罪。可乎。佛天以仁恕為心。

聖上即佛天也。乞鑒宥我罪。凡有

諭旨。謹遵行之。今往界上。視水草善地。無人之處。駐扎候旨。尋又據濟隆持噶爾丹誓書來。且述噶爾丹之言曰。我蒙王及皇子大臣見憐。我正懽懽。伊拉古克三來。諭以永遠歸好之意。我思倚

皇上以為生。今往界外。駐候

聖旨。臣等思噶爾丹軍敗力窮。觀其語。不敢抗拒

皇上天威。願請寬宥。有倚我求生之意。雖不可

深信。既恭順奏請。伏祈

睿裁。奏至。命議政大臣集議。尋議噶爾丹不敢抗拒

天威。設誓請罪。既獻誓書。適符

皇上好生之心。請准所誓。令出邊候旨。再檄裕親王。內大臣蘇爾達等。仍俟噶爾丹出邊。另行請旨撤兵。

上許之。隨遣侍郎額爾賀圖等。同伊拉古克三。齎敕往諭噶爾丹。敕曰。朕統御宇內。率土人民。皆欲使得其所。雖窮壤異域之民。亦必撫育。各享安樂。此本願也。前者喀爾喀為爾所敗。來歸於朕。朕以天下之人。皆在朕覆育之中。扶衰濟困。乃元后當行之事。故受而育之。並非利七旗喀爾喀之土地。况朕興滅繼絕之意。非啻喀爾喀為然。諸窮困來歸者。一體撫而養之。是亦諭爾敕中所有也。爾厄魯特喀爾喀。兩相構怨。何所底止。必至塗炭。朕與達賴喇嘛。仁愛為心。特欲使爾兩國和好。罷

戰共享安樂。達賴喇嘛遣濟隆胡土克圖朕遣伊拉古克三胡土克圖商南多爾濟往赴爾所。爾乃達達賴喇嘛之教。及朕之旨。以迎喀爾喀為名。率兵入我邊汛。行劫烏朱穆秦。朕雖聞之。尚未深信。我朝用兵。越險阻。踰山海。以闢疆土。抗拒者誅之而已。無有他人入犯我境者。爾噶爾丹博碩克圖。豈不知之。後聞汝深入騷擾。朕仍念爾向來職貢通好。是以遣和碩裕親王。及皇子等授之以兵。與汝共議。非令討汝也。爾眾先動我兵。始舉是戰之後。王及大臣奏請再戰。而朕止之。盛京烏喇科爾沁軍。又請與戰。朕又以待爾回奏而止之。今爾以誓書來請罪求和。王及大臣體達賴喇嘛及朕好生之素心。按兵不行。追殺爾。今率爾兵出界而居。不得擅犯我屬下部落。喀爾喀一人一畜。亦不得有一人與眾部落往來通使。爾倘有窘迫。奏聞於朕。朕必如前旨撫養。斷不念爾舊愆。若再違誓言妄行。剽奪生事。朕厲兵秣馬。見俱整備。必務窮討。斷

不終止。○丁丑。遣大學士張玉書祭先師孔子。○

上御乾清門。大學士。學士等。九卿。詹事。科道。各官進前請安。○諭議政大臣等曰。噶爾丹雖認罪立誓。上書請降。但人殊狡詐。難以深信。我大兵撤後。背盟妄行。亦未可定。且諭噶爾丹。敕內有厲兵秣馬。見俱整備之語。仍宜發兵預備。萬一有悖叛之信。則夕聞朝發。即可撲滅。若待有變而後發兵。緩不及事矣。見在各佐領。有喂肥馬匹。著每佐領派護軍七名。甲兵五名六名。整頓備之。其即會議。尋議政大臣。以預備官兵人數啟奏。

上諭曰。左翼軍。令都統瓦岱。化善。護軍統領洪海。副都統方額領之。右翼軍。令都統喀岱。護軍統領惠蘭。副都統托賴。馬錫領之。以托賴署前鋒統領。據議每翼派都統一員。副都統二員。今減去副都統一員。其左翼特多派都統化善。此軍非為出征而派也。以噶爾丹雖

降。而人殊狡猾。不可深信。萬一叵測。所以派出備之。其以此故。曉諭官兵知之。○戊寅。朝鮮國王李焞。遣陪臣李濬等。恭進

孝懿皇后冊。謚大典禮物。宴賚如例。○己卯。秋分。夕。

月於西郊。遣吏部尚書鄂爾多行禮。○湖廣巡撫吳璵。疏言。前任糧道葉映榴。任內長支各標兵米八千一百石零。原領各兵逃亡解散。莫可追求。請免追賠。從之。○庚辰。

上奉

皇太后幸暢春園。○陞福建澎湖水師副將張旺為江西南瑞總兵官。○辛巳。

上詣

皇太后宮問安。○壬午。朝鮮國王李焞遵旨回奏。前請封側室張氏疏內。有應避諱字樣。不行避諱。又稱德冠後宮。實屬違例。惟候嚴加處分。得旨。李焞著從寬免議。○癸未。諭理藩院。今歲塞外歉收。見今張家口外。設立飯廠。

散賑喀爾喀等。倘有他處蒙古聞信前來者。查果係窮乏之人。俱著一體賑濟。○撫遠大將軍和碩裕親王福全等疏言。臣等議。每旗夸蘭大一員。每參領章京一員。前鋒參領。每翼二員。侍衛二員。其馬稍可者。每佐領護軍二名。前鋒二百。火器營兵四百。帶子母礮三門。鐵心礮五門。留後。其餘護軍驍騎包衣兵。令都統額赫納。前鋒統領班達爾沙。護軍統領馬喇。侍郎文達。副都統扎木素。噶爾瑪。羅滿色。康喀喇。色格印。張朝午。領之。於本月二十二日。啟行而回。盛京烏喇兵。二十日已會大軍。亦令撤回。臣所統大軍。俟吳丹等視噶爾丹出汎界回報。另奏請旨。○丙戌。吏部等衙門議覆山東巡撫佛倫疏言。郭琇係奉旨休致回籍之人。今違旨不行回籍。潛藏京城。明係串通朋黨。實緣生事。希圖復職。又稱郭琇父郭景昌。即郭爾標原係明末賊犯。正法。郭琇從前朦蔽。改名請封。其郭琇本身并伊

親祖。親父。嗣祖。嗣父。所得封誥。請一併追繳。應如所請。嗣後革職解任漢官。照旗員例。勒限五個月起程回籍。如不即行回籍。仍在做官地方。或在別處居住。俱照旗員逾限例處分。其地方官。亦照容留旗員例議處。各京官革職解任。休致。臣部知照。各原籍督撫。仍移咨都察院。轉交五城官員。嚴催起程。日期報部。外官回籍。亦行令該督撫。將起程日期報部。即知會原籍地方。亦令該督撫報部。著為令。從之。○烏朱穆泰和碩車臣親王蘇達尼故遣官致祭。○丁亥。

### 上詣

皇太后宮問安

九月。戊子朔。戶部題奉天將軍宗室公綽克託。戶部侍郎阿喇彌等。預給盛京出征官兵次年二月俸糧。又違例豫給五個月錢糧。應交部察議。其豫給俸餉。應扣除補項。

上諭大學士等曰。盛京兵丁。全恃田畝耕獲。及

月給糧餉。以為資生之計。昨歲盛京禾稼不登。貧困兵丁。艱於粒食。曾以屯糧頒發賑救。頃值軍興。遣一等侍衛齊蘭布。往調盛京兵丁。隨發諭旨。令無馬匹者。給與官廠馬匹。無行糧者。給以莊屯糧米。官兵踴躍。巡征倉卒之際。置辦一切軍裝。遂支領明年二月分應給俸餉。又豫支五個月錢糧。刻期進發。比厄魯特噶爾丹敗遁。盛京官兵。雖未接戰。而奮勇敢愾。深可嘉悅。今若將豫支俸餉。復行扣抵。則窮乏兵丁。必致生計艱窘。朕心殊切憫惻。所豫給明年二月分應支俸餉。及增給五個月錢糧。免其抵扣。仍令照常支給。以示朕愛養將士。軫恤疾苦至意。其大厚亦從寬免。交該部察議。又諭曰。前京城之兵。豫給五個月錢糧。若全扣之。亦必至困乏。其按月止扣一兩。以足其數。有事故則已之。此旨亦傳諭戶部知之。○庚寅。諭戶部。直隸順天保定河間真定順德廣平大名所屬並宣府等處被

災黎氓。殊為可憫。其康熙二十八年。未徵地丁二十六萬三千五百餘兩。糧五萬七千三百九十餘石。康熙二十九年上半年。應徵銀三十一萬一千五百餘兩。糧二萬八千七百二十餘石。盡行蠲免。○戶部議覆。河南巡撫閻興邦疏言。河南本年歉收。漕糧請暫免辦運。俟康熙三十年。補行徵解。應如所請。從之。○癸巳。

上詣

皇太后宮問安。○諭議政大臣等。軍中火器甚屬緊要。應令八旗滿兵。每佐領選護軍二名。驍騎三名。演習鳥鎗。○內大臣都統公舅舅佟國綱。以往剿厄魯特陣亡。靈輓將至。遣和碩額駙尚之隆。內大臣公坡爾盆。及侍衛等往迎之。并賜銀五千兩。○戶部議覆。山東巡撫佛倫疏言。本年正賦蠲免。秋成豐收。東省紳衿人民。及時樂輸。每畝收穫一石者。願捐出三合。以備積貯。合省計之。可得二十五萬

餘石。後遇荒年。小民亦不致乏食。應如所請。從之。○甲午。

上遣皇子允禔。

皇四子胤禔迎內大臣都統公舅舅佟國綱。靈輓。○免直隸玉田縣。梁城所。本年分水災額賦有差。○乙未。內大臣都統公舅舅佟國綱。靈輓至家。

上遣領侍衛內大臣公福善。及侍衛等。攜茶酒往奠於喪次。其八旗陣亡大臣官員俱遣內大臣侍衛等。各攜茶酒往奠。○丁酉。免甘肅寧州。本年分電災額賦有差。○諭大學士等曰。朕向聞蒙古臨陣。初雖驍勇。一敗北。即奔竄。首尾不顧。懦怯殊甚。頃我兵討厄魯特。厄魯特敗。旋奔高山頂。遁於險惡處。因我兵排列太密。敵人亂放鳥鎗。故有被傷者。且進退之際。海螺未鳴。此皆未熟於戰陣耳。從古行兵。未有不預操練者。向時八旗兵丁。每歲春秋校獵。比者恐馬疲於行。故暫停止。今春秋



二季令八旗官兵集於寬敞平原之地。排列陣勢。鳴鑼進退。以熟操練。○己亥。

上詣

皇太后宮問安。○諭議政王大臣等曰。聞在用兵處。議政大臣。及在此處。議政大臣內。有靜坐。不出一言者。與木偶何異。夫議論諸事。必使各出已見。方得其情。若竟無一言。則事何由得當耶。○癸卯。

上詣

皇太后宮問安。○甲辰。免甘肅涼州衛古浪所本年分旱災額賦有差。○乙巳。遣官祭歷代帝王。○遣官祭城隍之神。○諭議政大臣等。陣亡之人。例應賞卹銀兩。其大臣官員功罪。另行查議。暫停賞卹。著先將兵丁應給銀兩。速行散給。俾兵丁貧乏者。得以濟用。○禮部議覆。原任京口將軍張思恭疏請飭諭官兵人民。經過文廟。務須下馬。并禁學宮放馬污踐。應如所請。從之。○丁未。

上奉

皇太后。自暢春園回宮。○諭都統郎談。侍衛赫濟爾亨。常關係護軍叅領般第等。曰。古北口外。盜賊藏匿。莊村民人。常被擾害。爾等將石匣。古北口緝捕牆子路官兵。及金鈎屯打牲人等。酌量帶往古北口緝捕。尋即談等奏。臣等躡訪賊踪。至喜峯口外龍鬚門地方。賊首楊花臉率七十餘賊。據嶺抗拒。臣等率領官兵。上嶺圍之。盡殲賊衆。報聞。○戊申。命停止

本年內外秋決人犯。○兵部議覆廣東廣西總督石琳疏報。海賊方雲龍等。聚集奸徒。在安南國新安嶽山諸島。劫掠洋船。偽稱將軍。龍門副將葉昇。帥兵進剿。俱已擒獲。應令該督嚴審定罪具奏。得旨。擒獲各犯。俱係熟諳水性之人。著從寬免死。併伊妻子。解送來京。發往黑龍江充水手當差。○辛亥。

上詣

皇太后宮問安。○直隸巡撫郭世隆。陛辭。

上曰。凡接任好官者難。接任庸劣官者易。于成龍居官甚好。繼之者。好名難得。爾係有才之。合當勤謹竭力而行。○予故京口將軍張思恭祭葬如例。○壬子。兵部題。民間禁養馬。既不便民。馬亦稀少。嗣後請弛養馬之禁。聽從民便。著為令。從之。○甲寅。

孝慈高皇后忌辰。遣官祭。

福陵。○乙卯。江蘇巡撫鄭端。陛辭。

上曰。江蘇地方繁華。人心不古。鄉紳不奉法者多。鄭端奏曰。若鄉紳肆行無忌。自犯科條。臣惟有執法而已。

上曰。爾只須公爾忘私。亦不必吹毛求疵。在地方務以安靜為善。○喀爾喀土謝圖汗遣使進九白年貢。宴賚如例。○丙辰。兵部議覆。陞任直隸巡撫于成龍疏言。通州。昌平。順義等州縣。及榆林。土木等驛。係盛京喜峯及古北。張家殺虎諸口要道。原設之馬無多。每有大差。必須協濟。久已為累。請於通州等州縣量

增馬五百零八匹。分給各驛。古北口驛站。向係滿洲章京料理。原未設有文職。查大名府有通判二員。請裁去一員。改為順天府通判。駐劄古北口。專司驛站。仍聽霸昌通永二道管轄。至石匣地方。雖係腰站。去縣甚遠。應將密雲縣驛丞裁去。改設縣丞一員。駐劄石匣。管理馬匹廩給事務。應如所請。得旨。依議。所設順天府通判。著改為保定府通判。駐古北口。管驛站事。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百四十九

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十九年庚午冬十月戊午朔享

實錄卷一百四十九

太廟遣領侍衛內大臣公福善行禮○遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○頒康熙三十年時憲曆○撫遠

大將軍和碩裕親王福全等疏言員外郎蒙古爾等原解米一千五百石支給大軍外給

留後之兵扣至十月初十日止但伊拉古克

三胡土克圖侍郎額爾賀圖自八月起程月

餘不歸以此觀之噶爾丹似出邊遠遁矣駐

軍以待糗糧不足請檄喀喇沁王以車運致

上曰前王等疏言俟伊拉古克三等歸再請旨

撤兵今聞大兵前來哈嗎爾嶺以內此乃朕

圍獵最熟之地距有米之處祇二百餘里離

實錄卷一百四十九

喀喇沁既遠而欲動其兵馬以車運米此說

甚謬著議政大臣等集議之尋議大將軍福

全等不行請旨擅率大軍內徙俟歸日一并

察議今伊拉古克三額爾賀圖等尚未歸應

以前鋒護軍共四百名留大將軍處其餘兵

卒及火器營兵俱令撤回以車運米之請無

庸置議應將坡賴村之糧酌量足留後兵之

用所餘駱駝運往得旨著裕親王及索額圖

明珠費揚古阿密達留後其餘俱令還京餘

如議○已未諭大學士部院大臣等。今朕躬已愈。但因灼艾。未御乾清門耳。朕聽政三十年來。無日不見諸大臣。共相諮議。今處宮中。雖日理奏章。未嘗廢事。而與諸大臣懸隔。思之如有所失。且旗下引見題補諸事。恐致壅滯。向有大臣奏事乾清宮之例。自明日始。仍如常進乾清宮啟奏○喀爾喀蘇泰伊爾登台吉等。自軍前來京請安。賞賚銀幣鞍馬有差○庚申。

皇太后聖壽節。

上率王以下。文武大臣。侍衛等。詣

皇太后宮行禮。導

懿旨。停止筵宴○命左都御史馬齊署理兵部尚書事○諭大學士等曰。聞滿洲兵丁家貧者甚多。曩日滿洲初進京時。人人俱給有田房。各遂生計。今子孫繁衍。無田房者甚多。且自順治年間以來。出征行間。致有稱貸。不能償還。遂致窮迫。今將滿洲兵丁舊日債負。作

何清結。俾各遂其生計。俟出征兵丁回日。酌議之○辛酉。

上詣

皇太后宮問安○諭大學士等曰。盛京軍士皆能挽強。但其地雖有筋與鰓。而無牛角。所以軍士難得良弓。盛京既有筋鰓。及工匠。而戶部庫內。見貯牛角。今年即發角二千對。運至將軍公署。將軍等可監視造弓。散給軍士。自明年為始。每年以角一千對。給發盛京將軍○以故一等精奇尼哈番祖興邦之子關蔭。二等阿思哈尼哈番李闡之子李永陞。各襲職○壬戌。戶科給事中何金蘭疏言。

皇上用人行政。條例具舉。凡尋常啟奏之事。日勞

聖躬。臣誼難安。嗣後請定御門之期。或三日。或五日。事應面奏者。仍面奏請旨。至尋常奏章。俱交內閣。照例送進。

上曰。朕惟致治務在精勤。久道期於無斁。朕躬

親庶政。早夜孜孜。靡敢暇逸。冀與大小臣工。共圖熙績。據奏用人行政。條例具舉。尋常奏章。日煩臨御。臣誼難安。請酌定御門之期等語。朕三十年來。每晨聽政。面見諸臣。諮詢得失。習以為常。今若行更改。非勵精求治。初終罔間之道。且與諸臣接見稍疎。朕衷亦深眷念。此奏不准行。○戶部議覆黑龍江將軍薩布素疏言。墨爾根居住之總管索倫安珠護等。每年耕種官田二千餘晌。今官兵移駐墨爾根。請即以此項成熟之田。分給耕種。應如所請。從之。○諭大學士等曰。吳爾泰自主事優陞郎中。差往福建審理時。朕曾以所審事件。明白訓諭。吳爾泰至彼。妄滋事端。將眾知府盡令解任。州縣各官。概取供狀。聲言夾訊巡撫。恣意嚇詐。以致福建百姓。驚惶罷市數日。違朕諭旨而行。此等之人。不加懲治。則後之奉差審理事務者。罔知儆戒矣。吳爾泰著革去郎中。發往黑龍江効力。○戶部議覆。漕

運總督董訥疏言。廬鳳淮揚等各府州屬。覓被災稔。米色不一。本年漕運。請照豫省之例。惟取乾潔之米。紅白無收。永為定例。應如所請。從之。○歸順奇勒爾飛牙喀庫耶鄂倫春。四處頭目進貢。賞賚如例。○癸亥。諭大學士等曰。噶爾丹雖立誓而去。其人狡詐。不可深信。著於陝西各營步兵內。選素習征戰。人材壯健。善於步行。能用大刀連節棍者二千人。戍守大同宣府。以備明春有事時調遣。再須善用藤牌大刀。福建人數百。駐於石匣。以備調用。古北口石匣之軍。應設總兵官。即令與該部會同選擇。此駐防之兵。張家口亦選步兵一千名駐扎。即令宣府總兵官統之。此兩處新設兵糧。應較步兵錢糧增給。議政王大臣。其集議之。尋議。欽遵。上諭。應撤川陝總督。以陝西各營步兵內。素經戰陣。人材壯健。善於步行。能用大刀連節棍兵二千。其副將叅遊以下等官。量兵派出。著

總督巡撫提督總兵官親選。自延綏等處就近撥發。以一千戍守大同。一千戍守宣府。此官兵行糧及家口坐糧。該督撫照例給發。期於十二月到汛。俟來年夏四月無事撤回。古北口張家口各添設善用藤牌大刀兵一千。檄山東山西河南巡撫。以安插開墾福建人內。或能用藤牌。或能用大刀。善於步行者。每省挑選三百名。於十二月送到。該部亦於京城酌量招募。與各省兵共足一千。以六百駐古北口。四百駐石匣。設總兵官一員。副將一員。遊擊二員。守備四員。千總八員。把總十六員。令總兵官駐古北口。副將駐石匣。遊擊以下等官。各以其半分駐。仍令總兵官統之。召募兵到。該部會同總兵官選擇。其設於張家口之兵。著於直隸各營步兵內。有人材壯健。善於步行。能用藤牌大刀者。著巡撫總兵官親選一千。送往張家口。所設統領官員。亦照古北口石匣例。令宣府總兵官統之。此所設

總兵官一員。副將二員。恭候皇上簡授。遊擊以下官員。著總兵官選擇具奏。此兩處兵。皆每月給以銀二兩。米照常支給。得旨。此兵務足額數。朕當親閱。古北口創設藤牌軍。統轄之總兵官。務選習於戰陣。材技優長之人授之。使不時操練。襄陽總兵官蔡元。諳練戎事。著有勞績。著調授古北口總兵官。龍泉營叅將王廷標。著陞為副將。其張家口副將員缺。著兵部推補。○乙丑。諭領侍衛內大臣等曰。朕前有旨。欲臨大舅舅之喪。因朕躬有病。遲至此時。舅舅乃朕之嫡舅。忽爾陣亡。每一思之。痛不能已。朕此病之增。至今幾月者。亦是故耳。後日發引。必須一視其喪。朕心少慰。且往臨大臣之喪。例亦有之。公福善伯四格之祖歿時。太宗皇帝曾親往臨。舅舅為國効力陣亡。朕明日親臨。著令預備。○丙寅。領侍衛內大臣公舅舅佟國維等。奏佟國綱捐身報國。分所宜

然前者

皇上遣皇子迎其喪至家。又遣官奠酒。恩禮已重。今

聖體違和。正當灼艾之時。不宜傷悼。亡者有知。亦必不安。

上不允。俟國維及衆大臣又再三叩阻。

上曰。爾等僉曰不可。恐勞朕躬也。今且止。改時往臨。明日乃出殯之期。諸皇子及上三旗大臣。侍衛。部院大臣。俱令往送。○諭大學士等

曰。康親王之軍。今已無事。王等及八旗滿軍。綠旗兵。俱撤回。馬錫等兵亦撤回。至左翼四旗。察哈爾旗下管旗。叅領等官。各身率該旗兵。駐於正藍。鑲白二旗之末。防守勿離。有警速報。○戊辰。添設古北口外紅旗營。坡賴村二驛。各設壯丁五十名。馬五十匹。著古北口通判管理。○已巳。

上詣

皇太后宮問安。○蒿齊忒多羅郡王已扎爾故。

遣官致祭。○辛未。陞三屯營副將師帝賓為湖廣襄陽總兵官。○癸酉。兵部題黑龍江防守禦鈕莫舜等陣亡。請照例俱給與拖沙喇哈番。

上諭大學士等曰。鈕莫舜人材素優。於黑龍江恒滾等處効力甚多。既經陣亡。著從優給與拜他喇布勒哈番。餘如議。○命盛京五部各添設理事官一員。○甲戌。以原任前鋒統領碩岱為正白旗滿洲副都統。○喀爾喀色冷阿海台吉遣使進九白年貢。宴賚如例。○刑部等衙門議覆原任內閣學士今陞直隸巡撫郭世隆奉差福建審孫鏞首告巡撫張仲舉等一案。疏稱張仲舉侵蝕庫帑。擬斬監候。其布政使張永茂加派火耗。擬絞監候。按察使田慶魯等收受屬員節禮。擬杖徒。援赦免罪。仍革職。永不叙用。應如所題從之。○乙亥。

上詣

皇太后宮問安。○予陣亡內大臣都統公舅舅



佟國綱祭葬。加祭三次。謚忠勇。○陞廣東副都統鄂倫岱為鑲黃旗漢軍都統。○辛巳。諭吏部。盛京禮部侍郎朱善不能管束人員。甚屬庸劣。著革任。○諭大學士等曰。凡擬撰文。係翰林官職掌。理當加意詳慎。文中辭義務期克肖其人。何可意為輕重。今覽楊瑄所撰內大臣都統公舅舅佟國綱祭文。引用王彥章事蹟。極其悖謬。且見所撰祭文。每於旗下官員。多隱藏不美之言。於漢人則多鋪張粉飾。是何意見。爾等瞻徇情面。不行改削。朕豈容姑釋耶。王熙等奏曰。此文引用王彥章事蹟。果屬悖謬。

皇上所見極當。臣等但一時意見未及。何敢徇情。

上曰。此等撰文之人。若不削籍流竄。何以懲戒將來。爾等可即題奏。並傳張英及撰文者。以從前姚文然。魏象樞。葉方鵠祭文。與此祭文較看。尋部議。編修楊瑄革職。發奉天入旗當

差。禮部尚書兼管翰林院詹事府事張英。應降四級調用。得旨。楊瑄著依議。張英著革去禮部尚書。仍管翰林院詹事府事。○壬午。

上詣

皇太后宮問安。○兵部督捕右侍郎許三禮。以病乞休。允之。○發浙江寧紹倉米穀賑濟二府屬被水災饑民。○予故內大臣輔國公葉伯舒祭葬立碑如例。○甲申。

上詣

皇太后宮問安。○時噶爾丹敗遁出汛界。伊拉古克三胡土克圖侍郎額爾賀圖等齎敕追及之。噶爾丹具疏謝罪。疏曰。向以一道同軌。通使請安。貿易往來。間因喀爾喀變亂。使人失詞。遂生小釁。兩胡土克圖來宣布。

諭旨。使歸於好。

神聖垂慈。不勝懼悚。嗣以遠來糧畜置多。妄行獲戾。而伊拉古克三胡土克圖傳旨使全禮法。仍歸和好。既已加

恩。又許陳情。心甚喜悅。惟有欽遵。

諭旨奉行不違而已。

上諭大學士等曰。大將軍裕親王。著撤回。及防守遵化州綠旗兵。亦著各歸本汛。○乙酉。上幸南苑行圍。○以扎魯特故多羅貝勒扎穆子畢魯瓦襲爵。○陞宗人府府丞年遐齡。為內閣學士兼禮部侍郎。左副都御史王士正。為兵部督捕右侍郎。左副都御史單璧。為盛京禮部侍郎。○戶部等衙門題。古北口石匣。張家口三處。安設兵丁。添設總兵官副將等員。應蓋造衙署營房。請先發庫銀蓋造。令地方官捐補還項。得旨著動支正項錢糧。速行蓋造。不必捐補。餘如議。○喀爾喀墨爾根濟農等。遣使進九白年貢。宴賚如例。○丁亥。陞叅領佟徽年。為廣東左翼副都統。調杭州副都統邵鳳翔。為京口副都統。

十一月。戊子朔。

上諭理藩院馬迪至。奏噶爾丹已向俄僕爾去。

或襲車臣汗。刳其餱糧。亦未可定。應令附近彼處之喀爾喀遊牧內徙。其以此檄知阿南達。○庚寅。諭大學士等。本朝在盛京時。阿敏貝勒以棄灤州永平之故。曾取口供。大貝勒差往朝鮮。以不遵諭旨而行之故。曾取口供。又因來京兵丁鼓譟之故。曾取英王等口供。今王大臣回兵已近。其應取口供之處。爾等會同議政大臣等查看。

實錄。並兵部檔案啟奏。再此際兵部正在核議功罪。所關甚大。侍郎覺羅舜拜才力不及。暫停其行走。此缺令倉場侍郎凱音布署理。都察院。理藩院。兩衙門事少。令左都御史馬齊署理。理藩院尚書事務。○陞太常寺卿胡昇猷。為都察院左副都御史。以內閣學士朱都納。為都察院左副都御史。○壬辰。免雲南新興。河陽。二州縣本年分水災額賦有差。○甲午。

上幸玉泉山。○戶部議覆。四川陝西總督葛思

泰疏言。蜀省流寓之民。有開墾田土。納糧當差者。應准其子弟在川一體考試。著為例。應如所請。從之。○丙申。

上移駐暢春園。○戊戌。

上回宮。詣

皇太后宮問安。○陞左僉都御史周之麟。為太常寺卿。太僕寺卿魏雙鳳。為宗人府府丞。○已亥。以原任禮部尚書丁憂在籍熊賜履。為禮部尚書。○庚子。陞內閣侍讀學士南達海。為內閣學士兼禮部侍郎。左通政李元振。為太僕寺卿。○壬寅。

上御太和門視朝。文武陞轉各官謝恩。次喀爾喀達爾漢台吉等行禮。○免直隸武清薊州等五州縣本年分水災額賦有差。○喀爾喀扎薩克察罕巴爾台吉等遣使進九白年貢。宴賚如例。○癸卯。

上詣

皇太后宮問安。○甲辰。予福建陣亡把總郭偉

祭葬。廕一子。以衛千總用。○理藩院議。克西克騰四等台吉莫倫噶爾弼。効力行間。應授為三等台吉。得旨。莫倫噶爾弼。在行間偵探消息。在防汛處効力甚多。俱從優擢為一等台吉。令衆扎薩克知之。○廣東高州總兵官張英奇。以疾乞休。允之。○達賴喇嘛率西海諸台吉及噶爾丹等具疏請上

尊號。命議政王大臣會議。王大臣等議從所請。納其貢物。

上諭曰。朕統御宇內。冀中外人民咸無戕賊。共享昇平。是以前聞喀爾喀七旗兄弟不睦。特遣使於達賴喇嘛。欲使歸好。達賴喇嘛遣噶爾旦西勒圖。朕遣尚書阿喇尼前往。而伊等所行。不能仰體朕心。及達賴喇嘛之意。雖已和喀爾喀七旗。而喀爾喀與厄魯特相仇之故。實從此起。後聞交惡興戎。即遣使於達賴喇嘛。達賴喇嘛遣齊緝克他賴堪布。朕遣阿齊圖綽爾濟學士拜禮等。止彼相攻。乃伊等

不行宣諭止之。聽其縱戰。喀爾喀遂為所敗。朕不忍坐視。復遣使達賴喇嘛。相與同定兩國之好。達賴喇嘛遣濟隆胡土克圖。朕遣伊拉古克三胡土克圖。往說之。詎意兩人見噶爾丹。不行諭止。與之偕行。闌入汎界。搶奪人畜。朕出兵問罪。而兩人又不為諭止。立視其戰。我軍不得已而擊之。致厄魯特大敗。遠遁請罪。朕與達賴喇嘛。期於撫育衆生。而使臣故違意旨。遂至於此。如能使厄魯特。喀爾喀兩國和好。朕尚欲加達賴喇嘛嘉號。此皆任事行人。不能仰副朕心。是以喀爾喀殘破。厄魯特喪敗。朕心甚為隱痛。有何可賀而受尊號乎。其以是曉諭達賴喇嘛。諸汗衆台吉來使。貢禮賀物。其并發還。○旌表直隸節婦尹遇湯妻張氏。李琮妻蘇氏。宋淙妻孫氏。胡滄妻常氏。各給銀建坊如例。○丙午。

上詣

皇太后宮問安。○戊申。冬至。祀。

天於

圜丘。

上親詣行禮。○停止次日朝賀。○遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。○己酉。烏闌布通出征。王大臣等

回京。命止朝陽門外聽勘。皇子允禔。以議政

王大臣等取供時。應如何具供奉請。

上諭之曰。裕親王。係汝伯父。議政王大臣等取

供時。汝若與裕親王稍有異同。朕必責汝於

法。斷不姑容。裕親王福舍。初亦錄皇子允禔

軍中過惡。欲於取供時告白。至是。議政王大

臣等會同取供。允禔言我與伯父裕親王供

同。裕親王聞之。俯首良久。流涕曰。我復何言。遂直引為已罪。兩人全親親之誼。皆

上德意所致也。○多羅信郡王鄂扎等奏言。

皇上深慮噶爾丹奸狡。此役不行剿除。必貽後患。多派精兵。盡發火器。以裕親王福全為大將軍。王大臣為叅贊。指授方畧。務期盡滅根株。乃福全等調度乖方。既經戰勝。不能乘機剿滅。收兵又不鳴笳。賊敗不行追殺。反行文禁止蘇爾達等進兵。以致窮寇遁逃。殊誤軍

機。且未經請旨。率兵擅回哈嗎爾嶺內。應將裕親王福全。恭親王常寧。簡親王雅布。俱革去王爵。福全撤去三佐領。內大臣公舅舅佟國維。內大臣索額圖。明珠。阿密達。俱革職。都統公彭春。前鋒統領班達爾沙。護軍統領楊岱。苗齊納。俱解任。都統宗室蘇努。喇克達。都統阿席坦。諾邁。俱不准叙功。內大臣蘇爾達。費揚古。都統希福。副都統塞赫。羅滿色。俱罰俸一年。散秩大臣查努喀。革職奏入。得旨。噶

爾丹於烏闌布通。為我軍擊敗遁走。而領兵諸王大臣。不復追殺。反信濟隆胡土克圖議好之誑詞。遣人語內大臣蘇爾達等。令盛京烏喇諸路兵。勿與之戰。是以噶爾丹奔竄。過盛京烏喇。科爾沁軍營。竟不邀擊。縱之使去。其時蘇爾達。欲羈縻噶爾丹。與土謝圖親王沙津。達爾漢親王班第等。公同商議。選遣公主之子阿拉善。下人鄂漆爾。及郭爾羅斯台吉吳爾圖。納蘇圖。旗下佐領祈他邁。往令噶爾丹。且告將與之會語。噶爾丹不少留。倉皇宵遁。如使蘇爾達等邀擊之。則噶爾丹可以就擒矣。伊等不戰。乃大誤也。福全等俱應依議治罪。但此舉已擊敗厄魯特兵。噶爾丹遠遁。諸王大臣。槩從寬免革。福全。常寧。罷議政。與雅布。俱罰俸三年。福全撤去三佐領。佟國維。索額圖。明珠。蘇努。喇克達。阿錫坦。諾邁。俱罷議政。與阿密達。彭春。班達爾沙。楊岱。苗齊納。各降四級留任。蘇爾達。費揚古。希福。俱免

罰俸。塞赫羅滿色俱罰俸一年。查努喀著革職。火器營左翼戰功。照常議叙。尋兵部議叙。以火器營官兵及左翼交戰將士為頭等軍功。從之。○庚戌。予出征厄魯特陣亡副都統邁圖祭葬。加祭一次。謚忠毅。○壬子。鑲紅旗漢軍都統趙璟。以疾乞休。允之。○以左都御史于成龍。兼鑲紅旗漢軍都統。○免浙江餘姚等五縣。本年分水災額賦有差。○甲寅。戶部議覆漕運總督董訥。河道總督王新命。山東巡撫佛倫會題。河道關係漕運。開壩遲則竊重運。閉壩早則阻回空。今議每年閉壩之期。以十一月十五日為率。開壩之期。以正月二十六日為率。應如所請。從之。○陝西提督孫思克。以衰老求罷。慰留之。○乙卯。陞鑲黃旗叅領石元聲為杭州副都統。○以教漢故多羅郡王阿敏達禮之弟額森孟克襲爵。○丙辰。予故原任太子太傅內大臣吏部尚書中和殿大學士都統巴泰祭葬。謚文恪。○予

故副都統賽碧漢祭葬如例

十二月丁巳朔

上詣

皇太后宮問安。○戊午。以翰林院掌院學士張英。充日講起居注官。○以三等伯王毓秀為正紅旗漢軍副都統。○調浙江提督金世榮為江南提督。貴州提督馬三奇為浙江提督。陞江南京口水師總兵官陳奇為貴州提督。○以原任山西提學道朱震補山東按察使。司副使提調學政。禮部郎中蔣弘緒為廣東按察使。司僉事提調學政。工部郎中孫起綸為雲南按察使。司僉事提調學政。禮部郎中黃軒為河南按察使。司僉事提調學政。工部郎中邱園。為湖廣按察使。司僉事提調學政。刑部郎中華章志為貴州按察使。司僉事提調學政。戶部郎中高爾公為陝西按察使。司僉事提調學政。四川保寧府知府王家棟為四川按察使。司副使提調學政。四川遵義

府知府徐孺芳為福建按察使司副使提調學政。貴州石阡府知府胥琬為山西按察使司副使提調學政。戶部郎中王謙為江西按察使司僉事提調學政。戶部郎中王承露為廣西按察使司僉事提調學政。○己未。

上詣

皇太后宮問安。○噶爾丹疏言自喀爾喀變亂以來貿易不行。籲請恩賜白金以育衆庶。理藩院及議政大臣議無賜白金之例。

上曰噶爾丹籲請懇切著賜白金千兩。○庚申。上以

孝莊文皇后三替詣

暫安奉殿致祭。命皇太子允初皇三子允祉

皇四子胤禩隨駕。是日啟行。駐蹕通州。○

上欲臨舅舅佟國綱塋。舅舅佟國維率子姪奏曰臣兄効力陣亡乃人臣所當然亡者如果有知。

皇上此臨不但臣兄之魂未安臣父母之魂亦

必不安。

皇上斷不可臨。免冠再三叩請。

上如其請遂止遣皇子允祉奠酒。○吏部議覆盛京戶部侍郎阿喇彌疏稱盛京地方人民增添事務甚繁。見在官員筆帖式辦事不敷。請添設員外郎四員。筆帖式六員。翻譯筆帖式二員。應如所請。從之。○以翰林院侍講顧藻提督順天學政。○陞前鋒叅領碩鼐為鑲藍旗滿洲副都統。護軍叅領伊勒慎為鑲白旗滿洲副都統。○免江南六合等十五州縣衛本年分水災額賦有差。○辛酉。

上駐蹕三河縣。○壬戌。

上駐蹕薊州。○癸亥。

上詣

暫安奉殿行禮。奠酒。舉哀畢。駐蹕新城。○甲子。

上詣

孝陵行禮。奠酒。舉哀。至

仁孝皇后。



孝昭皇后

孝懿皇后陵奠酒。舉哀畢。駐蹕湯泉。○免江南江都縣高郵州本年分水災額賦有差。○乙丑。

上駐蹕遵化州。○丁卯。

上駐蹕三屯營。○以右春坊右贊善許汝霖提督江南學政。右春坊右諭德鄭開極提督浙江學政。○陞山東沂州副將霍維鵠為廣東高雷廉總兵官。○工部議覆山東巡撫佛倫

河道總督王新命會題。河道關係重大。前以沿河州縣僉夫苦累。將額編工食銀兩徵解。河員募夫應役。查河官無地方專司。僱夫恐致逃散。有誤挑浚。請仍令州縣僱夫解交。如有私派勒索包攬等情。糾叅治罪。應如所請。從之。○戊辰。

上駐蹕米峪口。○己巳。兵部以三路官兵踐踏田禾。業經戶部丈明賞給田主銀兩。其出兵都統公蘇努等請免察議。

上曰。蘇努彭春海蘭等出兵時。朕再三面諭嚴禁兵丁勿踐民田。蘇努等亦言臣等親身殿後。斷不至傷踐。今將田禾踐踏。議為無罪。不合。著再嚴議。○以故一等公佟國綱之子鄂倫岱襲爵。○宗人府左宗正固山貝子傳善以患病乞請解任。

上曰。朕因眷念傳善令襲貝子。乃向來全不勉力圖報。所行甚是乖亂。殊負朕眷念之意。著宗人府嚴行議處。尋議傳善應革去宗人府

左宗正固山貝子。為閒散宗室。從之。○庚午。上駐蹕三屯營。○予故左都督雲南曲尋總兵官李懋功祭葬如例。○以故三等阿思哈尼哈番阿賚之子達錫布襲職。○調浙江黃巖總兵官林本植為江南京口水師總兵官。○禮部題據宗人府咨稱。覺羅鄂禮妻布氏守節有年。請加旌表。應給銀三十兩。緞一疋。聽其自行建坊。從之。○辛未。

上駐蹕汗爾莊。○壬申。

上出龍井關。駐蹕蘭陽口北。○癸酉。

上駐蹕羅文峪。○甲戌。

上駐蹕湯泉。○乙亥。

上駐蹕新城。○丙子。賜守

陵弁兵執事人等銀幣有差。○吏部以三等待

衛佐領武丹奉差出邊為喀爾喀中途所害。

照陣亡例議叙。授為拖沙喇哈番。

上曰。武丹既議叙。同武丹身亡之塞爾濟博爾

和代。著一併議叙。○封原固山貝子章泰女

為縣君。婿耿奇祚為固山額駙。授鎮國公。登

色女為鄉君。婿阿西塔為鎮國公。婿秩四品

○喀爾喀車臣濟農遣使進九白年貢。宴賚

如例。○丁丑。

上詣

暫安奉殿。率諸王大臣等行

孝莊文皇后三替致祭禮。奠酒。舉哀畢。是日回

鑾。

上駐蹕薊州城南。○戊寅。

上駐蹕三河縣北。○己卯。

上駐蹕煙郊西北。○庚辰。

上回宮。○辛巳。

孝莊文皇后忌辰。遣官祭

暫安奉殿。○癸未。

上詣

皇太后宮問安。○乙酉。歲暮。祫祭

太廟。遣領侍衛內大臣伯費揚古行禮。○遣官

祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。○丙戌。賜朝正外藩科爾沁翁牛

特高齊忒扎魯特。蘇尼特。毛明安。土默特。郭

爾羅斯烏朱穆泰喀爾喀喇沁阿祿科爾  
沁鄂爾多斯巴林杜爾伯特阿霸哈納吳喇  
武奈曼毅漢克西克騰扎賴特阿霸壕王貝  
勒貝子公台吉塔布囊等及內大臣大學士  
上三旗都統副都統尚書侍郎學士侍衛等  
宴○旌表八旗節婦滿洲尼堪妻納氏等二  
十八人蒙古納噶楚賴妻博氏等七人漢軍  
吳朝林妻吳氏等十人各給銀建坊如例○  
是歲人丁戶口二千三十六萬三千五百六  
十八田地山蕩畦地五百九十三萬二千六  
百八十四頃二十七畝有奇徵銀二千七百  
三十七萬五千二百八十九兩有奇米豆麥  
六百九十五萬二百八十一石有奇草二百  
二十五萬二千八百四十一束茶十六萬五  
百九十八引行鹽四百三十五萬六千一百  
五十引徵課銀二百七十六萬六千九百九  
十七兩有奇鑄錢二萬八千九百九十三萬  
六百有奇

大清聖祖合天弘運文武睿哲恭儉寬裕孝敬誠  
信中和功德大成仁皇帝實錄卷之一百四十九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五十

監修總裁官光祿大夫太僕兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙三十年辛未春正月丁亥朔

實錄卷一百五十

上詣

堂子行禮還宮拜神畢率諸王貝勒貝子公內

大臣大學士侍衛等詣

皇太后宮行禮御太和門王以下文武各官外

藩王及使臣等上表朝賀照例筵宴○朝鮮

國王李燾遣陪臣李沆等表賀冬至元早

萬壽節及進歲貢禮物宴賚如例○辛卯祈穀

於

上帝

上親詣行禮○壬辰孟春享

太廟

上親詣行禮○遣官祭太歲之神○順天府進

春○癸巳

世祖章皇帝忌辰遣官祭

孝陵○

上諭大學士等曰今噶爾丹所屯之衆自俄儂

向喀爾喀墨爾根濟農而來應令八旗漢軍

都統選舉能員豫運大礮前至大同宣府駐

實錄卷一百五十

劄從前令各佐領秣馬十五匹後減去五匹

今仍令如數秣養又聞出征大臣官員將所

有丁壯抽取以護身致戰陣之時丁壯甚少

大小官員親隨甲士各有家人以後軍中抽

取之事應令停止此番兵丁原令帶兩月之

米今聞僅帶有二十日亦令嚴飭以後照數

攜帶不可減少○甲午

上奉

皇太后幸暢春園○庚子

上詣

皇太后宮問安○以上元節。賜外藩科爾沁翁牛特嵩齊忒扎魯特蘇尼特毛明安土默特郭爾羅斯四子部落烏朱穆泰喀喇沁喀爾喀巴林杜爾伯特奈曼阿霸哈納鄂爾多斯兵刺忒教漢克西克騰扎賴特阿祿科爾沁歸化城王貝勒貝子公台吉等及內大臣大學士上三旗都統副都統侍衛等宴○辛丑上元節。賜外藩王貝勒貝子公台吉等及內

大臣大學士上三旗都統副都統侍衛等宴

○壬寅

上詣

皇太后宮問安○丙午。賜朝正外藩王貝勒貝子公台吉等銀幣鞍馬有差○以順天府尹王樞為偏沅巡撫○喀爾喀伊爾登濟農等遣使進九白年貢。宴賚如例○丁未

上詣

皇太后宮問安○戊申。固山貝子傅善緣事革

爵。以其弟福存襲替○諭領侍衛內大臣蘇

爾達等喀爾喀會閱擬於清明前後往臨其集議之。尋議覆三月青草發萌時應出臨會閱其隨從大臣官員兵丁及會閱應行事宜令各部院請旨從之○封阿祿科爾沁貝勒楚依為多羅郡王以與厄魯特力戰受傷被執不屈故也○理藩院議叙扎魯特阿祿科爾沁等十二旗陣亡台吉官員得旨扎魯特二等台吉科克晉等四等台吉滾楚克塞爾濟厄爾德尼等阿祿科爾沁二等台吉董約特等勞績顯著歿於戰陣俱優贈為一等台吉賜達爾漢之號令其子承襲全給卹銀餘依議○先是噶爾丹認罪立誓上書請降

上以噶爾丹狡詐宜發兵預備至是發兵前往張家口獨石口等地方備之著議政大臣領侍衛內大臣八旗都統集議尋議覆前派每佐領護軍七名驍騎五名前鋒一名火器營兵二千今以此軍分遣張家口獨石口則張

家口應遣每佐領護軍四名。驍騎二名。前鋒兩佐領合一名。火器營兵一千。獨石口應遣每佐領護軍三名。驍騎三名。前鋒兩佐領合一名。火器營兵一千。奏入。得旨。赴張家口軍。令往大同。赴獨石口軍。令往張家口。其張家口一路。都統瓦岱。總領之。與都統喀岱。王永譽。護軍統領洪海。副都統方額。科爾代。喻維邦。偕往。大同一路。都統郎談。總領之。與都統公宗室化善。都統李正宗。護軍統領宗室惠蘭。署前鋒統領。副都統碩鼐。副都統馬錫田。象坤。郎化麟。偕往。此二路。俱授將軍印。自漢軍副都統以上。俱令叅贊。餘如議。○授都統瓦岱。定北將軍印。都統郎談。安北將軍印。○工部議覆。河道總督王新命疏言。清河縣黃河南岸。天妃壩石工。宜重加修築。以保運道。應如所請。從之。○己酉。

上詣

皇太后宮。問安。○以萬齊武故多羅郡王巴扎

爾弟雅穆畢爾襲爵。○庚戌。

上詣

皇太后宮。問安。○內閣學士田喜霽。丁母憂。命回籍守制。○刑部左侍郎高爾倖。以疾乞休。慰留之。○辛亥。

上幸南苑行圍。○兵部題。

車駕出閱。應撥前鋒統領一員。護軍統領。每翼二員。驍騎營都統。每翼二員。副都統各四員。得旨。都統莽奕祿。喇克達。諾敏。希福。蘇努。前鋒統領穆圖。護軍統領四格。托倫。馬喇。苗齊。納。副都統馬思喀。沙納海。碩岱。伊勒慎。趙山。羅滿色。牛尼有。葉儲赫等。著隨赴會閱。○刑部左侍郎噶爾泰。以疾乞休。允之。○予故副都統托賴。祭葬如例。○予故三等侍衛武丹。護軍叅領塞爾濟。祭葬如散秩大臣例。以前差往厄魯特。歸途為喀爾喀所害故也。○壬子。諭大學士等。聞噶爾丹刼掠墨爾根濟農。巴圖爾額爾克濟農。向青海而去。著將陝西

西安兵酌留守城外。其餘兵丁。命將軍親率之。川陝督標綠旗兵。命總督親率之。寧夏鎮標兵。命總兵官親率之。俱於寧夏備噶爾丹。致仕勇畧將軍趙良棟。見在寧夏熟習軍務。令與將軍總督酌議行事。又諭宣府大同兵。雖未嘗攻戰。而兩次出邊修整器械。亦已勞矣。今又令將軍等。於有事時。便宜率之而行。宜加恩賚。每兵著賞銀四兩。○癸丑。上還自南苑。詣

皇太后宮問安。○以固山貝子魯賓為宗人府左宗正。○甲寅。

上奉

皇太后。自暢春園回宮。○乙卯。以左都御史馬齊為兵部尚書。內大臣班迪為理藩院尚書。轉刑部右侍郎。傅臘塔為左侍郎。陞內閣學士布彥圖為刑部右侍郎。太僕寺卿李元振為都察院左副都御史。○丙辰。以故海澄公黃芳泰長子黃應纘襲爵。○以禮部尚書熊

賜履。兵部督捕右侍郎王士正。充經筵講官。○調鑲黃旗蒙古副都統覺羅海篤。為滿洲副都統。陞護軍叅領噶爾璧。為鑲黃旗蒙古副都統。

二月。丁巳朔。日食。○遣大學士王熙。祭

先師孔子。○諭大學士等。京師為輦轂重地。人民商賈。四方輻輳。京城內外。統轄必有專責。俾稽察奸宄。消弭盜賊。然後商民得以安堵。今城內地方。既屬步軍統領管理。城外巡捕三營。又屬兵部督捕衙門管轄。內外責任各殊。不相統攝。遇有盜案。反難查緝。嗣後巡捕三營。亦令步軍統領管理。京城內外。一體巡察。責任既專。則於芟除盜賊。安輯商民。庶有裨益。其三營事務。作何歸并管理。著九卿詹事科道。會同確議具奏。○以戶部郎中張潤民。為河南按察使司僉事。提調學政。○喀爾喀博碩克圖。崑都崙濟農等。遣使進九白年貢。宴賚如例。○戊午。祭



大社

大稷

上親詣行禮○

上詣

皇太后宮問安○陞翰林院侍讀學士王尹方為內閣學士兼禮部侍郎○以公孫徵灝為正白旗漢軍副都統○策妄阿喇布堪及阿奴等遣使達爾漢囊素奏與噶爾丹交惡始末。理藩院以聞。

上命厚加恩賜而遣之。并令郎中桑額護其行。其使人起行之先。令見噶爾丹來使。告以故○庚申。陞山東布政使衛既齊為順天府府尹○辛酉。

上御太和門視朝。文武陞轉各官謝恩○

上詣

皇太后宮問安○壬戌。以大學士張玉書。工部尚書陳廷敬。為會試正考官。兵部左侍郎李光地。兵部督捕右侍郎王士正。為副考官○

戶部議覆直隸巡撫郭世隆疏言。康熙二十八年分。宣化府屬保安州等被災地畝。未完錢糧。請分兩年帶徵。應如所請。得旨。保安州等處。既經被災。未完錢糧。俱著豁免○癸亥。遣官祭

先農之神○陞大理寺少卿唐朝壽為太僕寺卿○河南巡撫閻興邦疏報。康熙二十九年分。開墾荒田六萬四千三百十五餘畝。徵銀二千二百八十兩有奇。下所司知之○甲

子。

上詣

皇太后宮問安○乙丑。

上御經筵講畢。賜大學士。九卿。詹事。及講官等宴○陞內閣侍讀學士傅繼祖。為內閣學士兼禮部侍郎○丁卯。

孝康章皇后忌辰。遣官祭

孝陵○

上詣

皇太后宮問安○諭大學士伊桑阿阿蘭泰尚書馬齊班迪等侍衛阿南達來奏噶爾丹去年敗走以來日以北徙人畜屢斃刦掠無所獲近者噶爾丹親率兵來刦喀爾喀至阿爾哈賴地方又無所得皆徒步而返因敵已極今應於見在此地噶爾丹使人內撥發數人令巴扎爾齋敕乘驛與之同往噶爾丹所至巴圖爾額爾克濟農墨爾根濟農善巴額爾克戴青處各遣官一員令伊等皆內徙遠置哨探再語伊拉古克三胡土克圖令明告噶爾丹使人云汝輩厄魯特之人從噶爾丹而行失其生計主上憐之故遣汝等傳諭噶爾丹若降當厚加恩養若上果念汝等厄魯特前惡則不令策妄阿喇布坦使人見汝等矣巴圖爾額爾克濟農遣二郎保去墨爾根濟農善巴額爾克戴青著與阿南達議亦遣向日往來相識之人去○賜噶爾丹敕曰朕為天下一統主務使四海之內人民咸獲其所

以享太平雖向與本朝抗拒之國如窮迫來歸必拯而養之無不使得其所者喀爾喀向曾與本朝交戰窮而來歸朕並不念前罪受而撫養之朕濟困繼絕之心不但於喀爾喀為然也諸國有窮迫來歸者朕之撫養皆與此同前已有旨諭汝矣今聞喀爾喀逃來人等言汝厄魯特牲畜已盡無以為食極其窮困人被疾疫死亡相繼朕重念天下率土人民之命聞此困敝有不惻然軫念者乎況前已致諭於達賴喇嘛言噶爾丹如不得已而來歸朕亦受而養之使之得所今果窮困無食不能歸故土其移近邊汛朕當厚加恩賜如決計入降益從優撫養斷不至失所此朕俯視率土人民一體之實心勿貳勿疑汝亦曾誓不侵擾喀爾喀況我軍已在在設備矣若朕果有感汝困窮之事則不使策妄阿喇布坦使人見汝之人如此情事汝使亦皆知之自此以後汝之人無所刦奪不能歸故去

衆庶益至死亡。雖悔莫及。汝當熟籌之。其定計具本來奏。○戊辰。陞山東按察使楊廷耀為山東布政使司布政使。山東鹽運使喻成龍為山東按察使司按察使。○庚午。諭吏部庶吉士宋敏求等。教習已久。今加考試。應分別授職。除沈廷文查嗣韓已經授職外。宋大業。謝陳常。宋衡。高曜。李懋。吳世燾。湯右曾。姚士轟。劉灝。王懿。張復。彭殿元。郝士鈞。凌紹雲。俱授翰林院編修。宋敏求。魯瑗。宋如辰。彭始搏。顏光燾。鄒士璵。葉淳。潘宗洛。宋朝楠。范光宗。俱授翰林院檢討。沈愷。曹李斯義。俱以科道用。鄭梁。范光陽。高人龍。施震銓。汪徽。俱以部屬用。○予故內大臣晉進。滿洲副都統康喀喇。各祭葬如例。○予出征烏闌布通陣亡一等阿達哈哈番護軍叅領芭雅爾。祭葬如例。○癸酉。

上詣

皇太后宮問安。○諭戶部。八旗甲兵。國家根本。

當使生計充裕。匱乏無虞。向因剿除三逆。久歷行間。製辦軍器。購送馬匹。兼之戶口日增。費用益廣。以致物力漸絀。稱貸滋多。朕每念及。深為軫惻。若不大沛恩施。清完風逋。將愈至困迫。難以資生。今八旗滿洲。蒙古。護軍校。驍騎校。及另戶護軍。撥什庫。馬甲。并子幼。或無嗣。寡婦。老病傷殘。告退人等。家下馬甲。所有積債。爾部動支庫銀給還。漢軍每佐領。各給銀五千兩。令其償完。債負外。餘者各該都統收貯。以備公用。其口外駐牧八旗察哈爾兵丁。出征隨圍。凡有差使。一同効力。向並未給錢糧。亦屬可憫。嗣後察哈爾護軍校。驍騎校。護軍。撥什庫。著月給錢糧各二兩。甲兵及執事人。並太僕寺牧廠人役。著月給錢糧各一兩。俟其贍足時停支。爾部即遵諭行。又諭八旗兵丁。債負償完。恐猶有不得已而稱貸之事。若向部內借支。事務繁擾。今發帑銀。交與八旗。將各旗內部院堂官派出。會同該旗

都統副都統視其需用之事借給於每月錢糧陸續扣除如此則兵丁不至窘迫將來可免稱貸之累永有裨益矣○九卿等遵旨議覆京師輦轂重地應將巡捕三營歸并步軍統領管轄督捕都察院五城所管事宜俱交與步軍統領管理其三營一應拏獲逃盜等犯令該統領移送督捕刑部完結應換給提督九門步軍巡捕三營統領印信從之○甲戌予故兵部督捕右侍郎許三禮都察院左副都御史胡昇猷各祭葬如例○乙亥予故昭武將軍江南提督贈少傅兼太子太傅楊捷祭葬謚敏壯○丁丑春分朝

日於東郊遣吏部尚書鄂爾多行禮○

上詣

皇太后宮問安○吏部等衙門議覆刑科給事中鄭昱疏言凡内外文武官寄寓他省除革職提問者仍照例勒限驅逐回籍外其餘解任休致丁憂各官懇免驅逐聽其自便應如

所請得旨奉天四川回籍官員仍照見行例行餘依議○辛巳予故正黃旗遊牧地方叅領博爾和代祭葬如副都統例謚襄懿以同侍衛武丹等奉差往厄魯特歸途被害故也○壬午

孝昭皇后忌辰遣官祭

陵○甲申遣官祭

歷代帝王○賜古北口新駐兵六百名石匣新駐兵四百名各羊裘一襲○乙酉陞前鋒

叅領達寧阿為鑲紅旗滿洲副都統

三月丁亥朔○戊子

上奉

皇太后幸暢春園○翻譯通鑑綱目告成

御製序文曰朕惟自古帝王御世大經大法莫備於史唐虞三代之史尚書所載典謨訓誥皆是也自仲尼因魯史作春秋始編年繫月紀載之中褒貶寓焉大要歸於扶植綱常闡揚道法後之言史者必宗之宋司馬光奉詔

纂修資治通鑑。論者以為博而得其要。簡而周於事。朱熹本之為綱目。綱倣春秋。目倣左氏義例。森嚴首尾條貫。足以示勸懲而昭法戒。煌煌乎典章之總會。而治道之權衡也。前編則上溯羲皇。徵引經傳。足備稽考。續編則下逮宋遼金元。其中叙事。雖間得其實。然而議論偏私。紀載乖舛。往往有之。視朱熹所撰綱目。迥乎其不侔矣。朕撫御宇內。夙夜兢業。每思說命之言曰。學於古訓。乃有獲。朕於萬幾之暇。潛心六經。大義微言。孜孜殫究。以講求古帝王治天下之大道。於綱目一書。朝夕起居之時。循環披覽。手未釋卷。以是考前代君臣得失之故。世運升降之由。紀綱法度之所以立。人心風俗之所由純。事有關乎典常。言有裨乎治體者。靡不竟委窮源。詳加論斷。如是者有年矣。爰於內廷。設立書局。命翻譯呈覽。朕躬親裁定。為之疏解。務期曉暢無遺。歸於至當而後止。立有程課。自元旦以至歲

除。未嘗有一日之間。即巡幸所至。亦必以卷帙自隨。迄今三年有餘。全集告竣。將鐫梓頒行。儒臣請序其端。朕念是編所記述。皆有關於治天下國家之務。非等於尋常記載之書。法戒昭然。永為金鑑。凡我臣工。其各殫心觀摩。以體朕黽勉法古之意。且垂之奕世。使子孫臣僚。莫不奉為典型。酌乎治理。斯作君之道出其中。而作師之道亦出其中矣。是又朕惓惓此書之意也。夫。○庚寅。

上詣

皇太后宮問安。○壬辰。清明節。遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵○甲午。山西大同總兵官王弼請率標下官兵。隨大兵進剿。從之○乙未。

上詣

皇太后宮問安○先是。禮科給事中博爾濟疏言。盛京府州縣。俱設立學校。考取士子。盛京左右兩翼。亦應各設官學。酌選俊秀幼童。設立滿漢官教習。滿漢書馬步箭。即於盛京各部衙門筆帖式。烏林人缺出補用。得旨。京師八旗各佐領下幼童。由各佐領內。擇其優長之人。令其教習讀書及馬步箭。著九卿一并議奏。至是。九卿等議覆。盛京係發祥重地。教育人材。宜與京師一體。應如博爾濟所題。盛京左右兩翼。各設官學二處。將彼處俊秀幼童。各旗選取十名。每翼四十名。滿學各一十名。教讀滿書。習馬步箭。漢學各二十名。教讀滿漢書。習馬步箭。交與盛京禮部堂官。不時稽查操演。如盛京有各部衙門筆帖式。烏林人缺出。照例補用。滿學設滿文助教各一員。

漢學設通滿漢文助教各一員。俱由吏部考授。其漢學。令奉天府尹。於盛京生員內。擇其才學優長者各二名。令其教讀。學舍由盛京工部撥給。至於京師八旗子弟。讀漢書者。考取生員。舉人。進士時。仍令射馬步箭。能者方准作文考試。其餘幼童。十歲以上者。各佐領於本佐領內。選優長者各一人。滿洲旗分幼童。教習滿書滿語。蒙古旗分幼童。教習滿洲蒙古書。滿洲蒙古語。漢軍幼童。教習滿書滿語。並教習馬步箭。仍令各佐領。驍騎校。稽查。將此學名為義學。從之○丁酉。

上詣

皇太后宮問安○己亥。予出征烏闌布通陣亡佐領委署護軍叅領諸神保。祭葬如例○庚子。

上詣

皇太后宮問安○設盛京兵部衙門侍郎一員。理事官一員。郎中二員。員外郎六員。滿字堂

主事一員。翻譯主事一員。滿字筆帖式八員。翻譯筆帖式四員。○先是。理藩院題。臣等與內大臣阿爾迪等議。應於上都河。額爾屯河。兩間七溪之地。會閱。先期遣人調集左翼喀爾喀諸王。前至上都土爾根伊扎爾交界之地。右翼喀爾喀諸王。前至上都黑棚交界之地。以待。

上命大學士。與兵部大臣集議。至是議覆喀爾喀等。在兩處會集。應遣大臣分道先往。各令所在地方蒙古。駐於會閱七溪百里以外議事。

駕至之前。檄令前來。其喀爾喀等。已傳諭於四月十五日。來會於期約之地。

駕發日期。并請於命下之日。諭衆知之。奏入。得旨。四月十二日啟行。前行大臣。如何差遣。喀爾喀等。如何分別。何地安插。喀爾喀作何坐次。又前有噶爾丹之警備發之兵頗多。今噶爾丹遠去。其兵應減。爾等會同滿洲九卿詹

事科道定議。尋議覆。喀爾喀遇亂離散。先後來降。

皇上不忍坐視。伊等滅亡。安插汎界內外。賑給米穀牲畜。各令得所。又將車臣汗人等。編列旗隊矣。應俟會閱既畢。視汎界四周。暫令遊牧。至厄魯特事定後。仍遣往土喇。俄儂等處安插。前所發八旗兵。今應減去。率每佐領護軍四名。前鋒全隊。漢軍火器營兵而往。上三旗兵丁隨。

駕下五旗兵丁。出獨石口赴

御營。至張家口所備兵應俟

駕發之後。令將軍瓦岱等率領。支兩月糧。馬馱輕輓。出張家口。往正白鑲白察哈爾遊牧之地。隨其水草。在彼遊牧。會閱既畢。如何措置。該部再行請旨。至會閱之地。應備器物。俱令各該部院奏遣前行。奏入。得旨。如議。左翼著馬齊。布彥圖。額爾賀圖。西拉。紀爾他布。往右翼著班迪。索諾和。文達。達虎。阿喇尼往。○辛



丑。以編修張廷樞徐元正。充日講起居注官。  
○陞山西冀寧道張志棟。為福建按察使司  
按察使。○兵部議覆甘肅提督孫思克疏言。  
肅州係邊疆要地。請改設總兵官一員。以壯邊勢。  
應如所請。肅州設立總兵官一員。增兵二千  
一十五名。合協標舊兵。立中左右三營。每營  
設遊擊一員。守備一員。千總二員。把總四員。  
從之。○壬寅。

上詣

皇太后宮問安。○甲辰。

萬壽節。停止行禮筵宴。○遣官祭

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。○遣官祭真武東嶽城隍之神。○

丙午。策試天下貢士張瑗等於

太和門前。制曰。朕惟自古帝王。撫御方夏。文  
德聿修。武功克詰。是以遐方率服。庶績咸熙。  
川嶽効靈。永奏平成之治。甚盛軌也。朕誕膺  
眷命。式纘丕基。夙夜孜孜。勤求化理。念歸怙  
冒之中。則懷柔遠人。所以撫綏安全。俾其永  
霑德化者。何道而可。至於疆圉敕寧。兵農和  
輯。慎固封守。王政所先。其廣儲備。勤訓練。以  
為久安長治至計。抑何術之從也。比年河工  
修濬漸底安瀾。何以使隄防永固。漕輓迅通。  
雖有靈潦巨浸。恒無泛濫之虞。運道民生。咸  
有攸賴。其熟籌之。爾多士離經辨志。學古經  
術。所有涵養德性。興起事功。必講貫淹通。始  
可措諸實用。漢唐之箋疏。宋儒之訓詁。繁簡  
得失。義蘊精微。可得而悉指歟。薄海內外。凡  
聲教暨訖之地。既同入官。肝衡世務。講求素  
矣。各抒所見。詳著於篇。朕將親覽焉。○丁未。

上詣

皇太后宮問安○戊申。

上自暢春園回宮○己酉。

上御太和門傳臚。賜殿試貢士戴有祺等一百四十八人進士及第出身有差○

上幸暢春園○庚戌。

上詣

皇太后宮問安○壬子。宴衍聖公孔毓圻等於禮部○予出征厄魯特陣亡前鋒叅領格似特。祭葬。如副都統例○癸丑。

上詣

皇太后宮問安○甲寅。調兵部左侍郎覺羅舜拜。為盛京兵部侍郎○陞直隸通永道孟卜。為浙江按察使司按察使

實錄卷一百五十一

二十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五十

實錄卷一百五十一

二十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五十一

康熙三十年辛未夏四月丙辰朔享

太廟遣內大臣明珠行禮(丁巳)

上詣

皇太后宮問安 兵部議覆古北口總兵官蔡元疏言臣標止步兵六百名臣自帶隨丁一百五十名請照宣府鎮標例再增兵七百五十名為一千五百名分設左右兩營應如所請從之(戊午)轉兵部右侍郎沙穆哈為左侍郎陞左副都御史朱都納為兵部右侍郎(以故二等阿思哈尼哈番渣穆

實錄卷一百五十一

一

巴子色楞達什襲職(先是革職縣丞譚明命叩閭控吏部主事朱敦厚前任濰縣知縣時婪贓四萬餘兩下山東巡撫佛倫勒勘佛倫疏言朱敦厚加派婪贓經前任巡撫錢珏鞠審已得實據因朱敦厚跪求原任刑部尚書徐乾學貽書錢珏錢珏徇情檄行布政使衙既齊銷案除朱敦厚依律擬罪外徐乾學等並請敕部議處事下吏部及三法司議至是吏部會同三法司覆奏朱敦厚應絞原任山東布政使今陞順天府府尹衙既齊照例例降三級調用原任刑部尚書徐乾學原任山東巡撫錢珏並應革職譚明命係大計被忝貪官仍不敕用得旨衙既齊著照現任降三級免其調用徐乾

學錢珏俱革職餘如議(己未)

上詣

皇太后宮問安 旌表江南烈婦范邦佐妻張氏拒姦殞命給銀建坊如例 辛酉

上詣

皇太后宮問安 授殿試第一甲進士戴有祺為翰林院修撰吳昌黃叔琳為翰林院編修(壬戌)出征厄魯特叅領薩克星阿創發身故子祭葬如陣亡例(癸亥)

上詣

皇太后宮問安(教漢多羅郡王額森孟克阿霸垓多羅卓禮

實錄卷一百五十一

二

克圖郡王褚翁喀喇沁鎮國公烏忒巴喇等故遣官致祭

甲子

上奉

皇太后自暢春園回宮(乙丑)一等精奇尼哈番馬世泰老病解退以其子吳爾希襲替(丙寅)陞光祿寺卿多弼為都察院左副都御史(丁卯)

上欲巡察邊外蒙古等生計又以喀爾喀地居極北業雖進貢未嘗親身歸順今土謝圖汗等親率所屬數十餘萬人來歸特往撫綏安輯命皇長子允禔皇三子允祉隨駕是日啟行駐蹕牛欄山(戊辰)

上駐蹕密雲縣諭內大臣等爾等可親率侍衛等於沿途嚴約官兵人衆勿使踐踏麥田○己巳

上駐蹕石匣城○庚午

上駐蹕古北口閱總兵官蔡元標下官兵賜蔡元袍褂一襲銀五百兩馬一匹官兵銀兩有差○壬申

孝端文皇后忌辰遣官祭

昭陵

上駐蹕恩格木嚙山○癸酉

上駐蹕博羅諾地方○甲戌

上駐蹕西喇塔拉昂阿地方○乙亥

上駐蹕夏克圖昂阿地方○陞四川按察使董安國為貴州布

政使司布政使○吏部等衙門議覆江西巡撫宋學疏言在外漢軍文武官員并其家口緊催歸旗令取經過州縣沿途

交付印結臣竊謂此例止應行於有罪之員丁憂降調裁缺

候補等員俱有官職一槩沿途取結押送竟與有罪者無異似宜寬免俾得自由嗣後除休致病故并革職者仍照例沿

途取結押送外其丁憂降調裁缺候補等員免其沿途取結遞送止給定限咨文速行歸旗應如所請從之○丙子

上駐蹕三道營○丁丑

上駐蹕漢虎爾和洛昂阿之湯泉○戊寅旌表江南節婦程氏

夏氏苗氏陶氏雲南節婦黃氏唐氏陳氏李氏各給銀建坊如例○己卯

上駐蹕巴顏溝地方○辛巳

上駐蹕哈瑪爾昂阿地方○陞浙江寧台道趙良璧為四川按察使司按察使○廣東巡撫朱弘祚疏言高州府屬吳川縣

瓊州府屬臨高澄邁二縣自康熙十八年起至二十八年止未完地丁銀一十二萬八千六百兩有奇實係戶口稀少田

畝荒蕪所致應請盡行豁免從之○壬午

上駐蹕哈郎桂昂阿地方○癸未

上駐蹕上都畢喇地方○甲申

上駐蹕海拉蘇台昂阿地方○乙酉

上駐蹕多羅諾爾地方○差往喀爾喀議會閱事宜尚書馬齊等於途次迎

駕

上諭曰爾等將喀爾喀詳定次第分別條列行文部院馬齊等遵旨分別喀爾喀汗濟農台吉列為九等會同理藩院奏聞

得旨此敘賞事宜令內大臣明珠內務府總管費揚古戶部侍郎阿山禮部侍郎席爾達會同頒賞

五月丙戌朔先是遣內大臣索額圖一等侍衛吳達禪諭土謝圖汗澤卜尊丹巴胡土克圖曰是盟也朕躬與蒙古諸王

貝勒貝子公七旗喀爾喀會集爾等可將殺得克得黑墨爾根阿海及在喀爾喀妄為之事於朕未至以前自行陳奏土謝圖汗澤卜尊丹巴胡土克圖等隨各具疏請罪至是馬齊等奏土謝圖汗澤卜尊丹巴胡土克圖等盡壞喀爾喀生計致起兵端其引罪之疏妄稱扎薩克圖汗得克得黑墨爾根阿海背眾喀爾喀依附噶爾丹博碩克圖因用兵擊殺之巧辭掩飾殊屬不合應將土謝圖汗削去汗號為閒散台吉澤卜尊丹巴胡土克圖削去名號為小喇嘛仍令土謝圖汗管轄

上曰土謝圖汗兄弟內相構怨託征厄魯特起兵遂殺扎薩克

實錄卷一百五十一

五

圖汗使喀爾喀百姓流離皆其所致但伊曾遣使來奏云我欲附天朝惟恐不蒙容納然歸附之意已決今果率眾來歸朕故不忍治罪馬齊等又奏言扎薩克圖汗乃喀爾喀七旗之長累世抒誠進貢扎薩克圖汗名號似應仍令承襲

上曰扎薩克圖汗在日抒誠進貢若其子巴朗額爾克阿海尚在即應襲封但今已亡故而現在之子幼穉扎薩克圖汗之親弟策妄扎卜眾皆稱其賢意欲封為親王明日以此意諭眾喀爾喀等至車臣汗我朝已經襲封可仍存其汗號理藩院奏遵旨酌定喀爾喀坐次應令土謝圖汗澤卜尊丹巴胡土克圖扎薩克圖汗弟策妄扎卜車臣汗坐第一行餘分

七行以次序坐從之尋命喀爾喀七旗與四十九旗同列丁亥

上命土謝圖汗澤卜尊丹巴胡土克圖進行幄朝見土謝圖汗跪奏曰蒙

聖主殊恩臣等垂死之軀今得更生不能縷析敷奏惟願仰賴聖主恩庇自此安樂得所澤卜尊丹巴胡土克圖跪奏曰仁德高峻養育羣生弘施利益者謂之佛臣等蒙

聖主大沛洪恩特加拯救是即臣等得遇活佛也惟祝

皇上萬壽無疆

上賜二人茶又賜土謝圖汗數珠一串隨命大學士伊桑阿等

實錄卷一百五十一

六

傳諭喀爾喀等眾曰爾等七旗喀爾喀兄弟不睦朕特遣大臣會閱令將互相吞噬之人民各行給還誓言已定土謝圖汗等自食其言託征厄魯特起兵將扎薩克圖汗得克得黑墨爾根阿海執而殺之從此喀爾喀等心志攜貳以致國土敗亡生計遂失然雖窮困已極但能思朕夙昔愛養之恩來求歸附朕仍一體養育今土謝圖汗等將一切大過自行陳奏當此大閱之時若即懲以重罪豈惟朕心不忍爾等七旗能無愧於心乎若以輕罪處之目今生計全失俱賴朕惠養何從議罰故將伊等責其大過復原恕其情至扎薩克圖汗抒誠進貢業已有年無故為土謝圖汗等殘害殊為可憫今

其親弟策妄扎卜來覲宜即令承襲以示優恤諭畢喀爾喀汗大小衆台吉同奏曰土謝圖汗等蒙

聖主寬恕其罪又念扎薩克圖汗所屬人民散失將伊弟策妄扎卜恩令襲封誠為曠典臣等不勝懼忭感激惟仰祝於天而已奏入

上御行宮前黃幄陞座喀爾喀汗台吉等行三跪九叩禮畢以次序坐樂作大宴喀爾喀車臣汗及第二班次扎薩克之墨爾根濟農古祿西希等十四濟農台吉第三班次扎薩克之魏徵諾顏阿玉錫等十三大台吉俱令近

御座前

實錄卷百五十一

七

上親賜酒餘皆令侍衛等分賜之戊子

仁孝皇后忌辰遣官祭

陵○賜喀爾喀土謝圖汗澤卜尊丹巴胡土克圖扎薩克圖汗弟策妄扎卜車臣汗銀各千兩蟒緞綵緞各十五疋及銀器袍帽茶布諸物又賜濟農台吉等銀緞諸物有差復召喀爾喀土謝圖汗策妄扎卜車臣汗澤卜尊丹巴胡土克圖及濟農台吉等三十五人賜宴

上諭之曰昨日雖已賜宴朕復欲熟識爾等故特召入俾各陳所欲言爾等抒懷共語以饗斯宴勿因在朕前過於拘束也土謝圖汗車臣汗等奏曰

聖主如此深仁臣等恨歸順之晚耳惟願聖壽萬年俾臣等仰沐洪恩長享太平之福宴畢

上以策妄扎卜年幼以皇子所服衣帽數珠賜之○諭喀爾喀汗濟農台吉等朕承天命統御萬方惟思率土人民咸得其所安生樂業不致淪於滅亡中外同觀固有殊別前爾七旗喀爾喀等本皆兄弟乃互相爭奪吞噬人民以致不睦朕因此故曾特遣大臣往莅會所令爾等各相和協而土謝圖汗等自食誓言不違約會已定之議起釁用兵致為厄魯特噶爾丹博碩克圖所敗喪其國土汗台吉等不能保聚所屬人民其人民亦不能各保妻子紛紛潰散來求歸附爾等當此

實錄卷百五十一

八

困窮至極之際倘朕之衆扎薩克等各行收取爾喀爾喀早已無遺類矣朕好生之心本於天性不忍視爾等之滅亡給地安置復屢予牲畜糧糧以資贍養汗台吉仍留如故車臣汗仍令承襲又因爾等互相偷奪故於各處添設管轄扎薩克以便稽察且念爾等素無法紀故頒示定例令各遵行自古以來未有如朕拯救愛養若此者也朕既加愛養更欲令爾等勉息繁育用是親臨訓諭大行賞賚會同之時見爾等傾心感戴故將爾等與朕四十九旗一例編設其名號亦與四十九旗同以示朕一體仁愛之意土謝圖汗車臣汗名號俱著仍舊存留扎薩克圖汗無辜被殺且所屬人民離散困

苦已極深為可憫著將伊親弟策妄扎卜封為和碩親王其扎薩克之墨爾根濟農古祿西布扎薩克之崑都崙博碩克圖滾卜扎薩克之信順額爾克戴青諾顏善巴扎薩克之台吉色冷阿海扎薩克之額爾德尼濟農益楚克喇布坦伊等原係舊扎薩克著去其濟農諾顏之名皆封為多羅郡王台吉噶爾旦係土謝圖汗之長子且從枯倫白爾齊爾期會以後屢來朝貢著封為多羅郡王車臣汗之叔扎薩克額爾德尼濟農納穆扎爾雖係新扎薩克而勸車臣汗領十萬眾歸順又身為之倡奏請照四十九旗一例殊為可嘉著照舊扎薩克例去其濟農之名封為多羅郡王車臣汗之族叔扎薩

實錄卷五十一

九

克額爾克台吉車布登當征厄魯特之際効力行走偵探信息以馬匹助用於事不致有誤著授為多羅貝勒台吉西第西里土謝圖汗之親弟且所屬甚眾同土謝圖汗歸順著授為多羅貝勒車臣汗之叔祖車臣濟農車卜登達賴濟農阿南達額爾德尼濟農布達扎卜伊爾登諾顏達禮車臣汗之叔伊爾登濟農益蘇克皆去其濟農之名授為固山貝子白蘇特之察罕巴爾諾顏博貝布扎雖係新扎薩克當在喀爾喀地方時曾奏喀爾喀日後必敗敗時我來投歸天朝後喀爾喀國敗即踐前言歸順殊為可嘉亦著授為固山貝子洪俄爾戴青之佐理固山事台吉漢都歸順在眾人之先効力

行間被創著授為鎮國公土謝圖汗之同族台吉蘇泰伊爾登額爾克戴青諾顏善巴之同族台吉托多額爾得尼等誠心歸順効力行間此二人亦著授為鎮國公此外在事台吉與眾台吉等著該部一一察明具奏各與以應得品級自今以往爾等體朕愛養之恩各守法度力行恭順如此則爾等生計漸蕃福及子孫世世被澤若違法妄行則爾等生計既壞且國法具在凡事必依所犯之法治罪特諭○已丑

上出行宮御甲胄乘馬徧閱隊伍回下馬樹侯

上親射發十矢九中次命十五善射并硬弓侍衛等射

上御黃幄四十九旗王貝勒貝子台吉及喀爾喀土謝圖汗台

吉等跪奏云

實錄卷五十一

十

皇上御甲胄發十矢九中洵神武也隨大閱軍容八旗滿洲官兵漢軍火器營官兵及總兵官蔡元標下官兵各依次列陣鳴角烏鎗齊發眾大呼前進聲動山谷喀爾喀土謝圖汗台吉等悚懼失措有欲趨避狀

上笑諭曰此不過示爾等以軍容耳何懼之有土謝圖汗奏曰皇上軍威赫濯如此臣等不禁徬徨失措矣事畢各賜茶上回行宮 科爾沁土謝圖親王沙津等率四十九旗王貝勒日子公台吉等合疏請上

尊號



上諭大學士等曰吳三桂既平之後諸王大臣請上尊號未嘗准行今豈可許乎其以此諭王等知之賜四十九旗王貝勒貝子公台吉等袍帽銀兩等物有差 庚寅

上親閱喀爾喀營寨察其窮困者賞以銀布又大賚喀爾喀王貝勒貝子公台吉等牛羊 辛卯諭大學士伊桑阿尚書馬齊曰土喇地方應酌量遣兵探聽厄魯特人等有不能前去又不能內附者收之而來著領侍衛內大臣及議政大臣等集議尋議覆定北將軍都統瓦岱等一路護軍內應選擇兵士每佐領各派出一名及前鋒全隊四百名其管領奎蘭大以下官員令統領大臣量派往土喇偵探厄魯特聲息著攜

實錄卷百一十一

十二

帶兩月糧以行兵士每人各給肥馬五匹毋致行路稽遲其統率是軍者著定北將軍都統瓦岱護軍統領馬喇副都統碩岱噶爾瑪去伊等不諳路徑著帶墨爾根濟農郡王古祿西希信順郡王善巴之人前往奏入得旨瓦岱等所有火器營兵派發六百名及總管大臣以行并著瓦岱攜將軍印前往 先是令定北將軍瓦岱等兵出張家口駐正白鑲白兩旗察哈爾遊牧之地至是兵部奏會閱事畢除瓦岱等率兵往土喇偵探外其餘兵士應駐何地得旨除瓦岱所率兵外其他兵士俱發往郎談所 遣原任尚書阿喇尼侍郎布彥圖索諾和文達學士達虎等往編喀爾喀旗分佐領撥給遊

牧地方 壬辰奉差議事兵部尚書馬齊等疏言阿霸垓台吉奔塔爾首告烏朱穆秦親王蘇達尼之妻順附噶爾丹一案查蘇達尼之妻及台吉車根阿穆爾充科阿達里羅雷喇扎布等順附噶爾丹是實俱應即行處斬蘇達尼之妻應革封號撤去所屬之人蘇達尼已故應革去親王不准承襲二等台吉博託和喇扎布阿喇西博羅特及為嚮導綽克圖等曾送馬匹牲畜順附噶爾丹是實俱應即行處斬妻子入官撥什庫阿爾塔等為噶爾丹指路往來問訊送駱駝馬匹皆實俱應即絞其妻子應作何處治交與該部議奏博羅特乃應行正法之人護衛巴扎爾伊白葛爾將博羅特明知故縱使之逃走應照律即行處絞貝勒畢魯瓦將重罪之博羅特不交付的當之人嚴行看守應罰俸一年博羅特應傳諭四十九旗嚴行查究獲日即行正法得旨車根等應俱依議治罪從寬免籍沒家產及徹所屬之人惟將本身正法蘇達尼並未知情從寬免革親王仍與伊子承襲巴扎爾伊白葛爾俱從寬免死并籍沒著穿耳鼻示眾鞭一百畢魯瓦罰俸一年餘如議 召土謝圖汗澤卜尊丹巴胡土克圖等賜食并各賜金盤磁碗及

實錄卷百一十一

十三

御用帳房等物又賜澤卜尊丹巴胡土克圖鞍馬一匹上回鑒留兵部尚書馬齊料理會閱事畢來京 四十九旗王

貝勒貝子公台吉等跪路左喀爾喀土謝圖汗車臣汗及王  
貝勒貝子公台吉等跪路右

駕過喀爾喀土謝圖汗車臣汗王貝勒貝子公台吉等皆依戀  
不已伏地流涕

上諭曰朕欲攜爾等至京師路遙天暑爾等生長北邊恐不習  
內地水土朕再出邊時即召爾等來見也又諭四十九旗王  
貝勒貝子公台吉等曰邊外無城郭墻垣故不肖之人易於  
偷盜聞比年以來此風日熾馬牛牲畜多被攘竊邊外蒙古  
俱賴畜牧為業其家有牲畜可以資生之人恐被偷盜各將  
牲畜圈繫不行放牧必致瘦斃如此則雖可以資生之人亦

實錄卷五十一

十一

必致窮蹙而貧富同歸於困苦矣爾等宜不時曉諭所屬之  
人嚴加禁止使盜賊永息各安生業以副朕中外一體至意

○是日

上駐蹕鄂爾哲圖阿爾賓教拉地方 諭扈從諸臣曰昔秦興  
土石之工修築長城我朝施恩於喀爾喀使之防備朔方較  
長城更為堅固○癸巳

上駐蹕烏孫圖魯地方○甲午

上駐蹕巴顏哈達地方○乙未

上駐蹕喀爾必哈哈達地方○丙申

上駐蹕打虎兒鳴山○以故一等阿思哈尼哈番發色子明寶

襲職○丁酉

上駐蹕商堅蘇巴爾漢地方○兵部尚書馬齊料理會閱事畢  
復命

上命扈從回京○戊戌

上駐蹕鵠鵠溝地方○遣官祭

闕聖帝君○己亥

上駐蹕古北口城內○庚子

上駐蹕石匣城內○辛丑

上駐蹕密雲縣城內○壬寅

上駐蹕順義縣東大東莊○癸卯

實錄卷五十一

十四

上回宮詣

皇太后宮問安○甲辰諭大學士等倉場侍郎李廷松為人庸  
劣著解任○乙巳

上詣

皇太后宮問安○吏部尚書張士甄降三級調用以考察雲南

山西陝西湖廣四省學道駁查違例巧飾具奏故也○丙午

工部等衙門議覆古北口總兵官蔡元疏言古北口一帶邊

牆傾塌甚多請行修築應如所請

上諭大學士等曰蔡元所奏未諸事宜帝王治天下自有本原  
不專恃險阻秦築長城以來漢唐宋亦常修理其時豈無邊

惠明末我

太祖統大兵驅直入諸路瓦解皆莫敢當可見守國之道惟在修德安民心悅則邦本得而邊境自固所謂衆志成城者是也如古北喜峯口一帶朕皆巡閱緊多損壞今欲修之興工勞役豈能無害百姓且長城延袤數千里養兵幾何方能分守蔡元見未及此其言甚屬無益諭九卿知之○以永陵總尉覺羅阿塔為總管○已酉

上詣

皇太后宮問安○庚戌夏至祭

地於

增錄卷五十一

十五

方澤

上親詣行禮○辛亥禮部等衙門遵旨會議御史江繁條奏科場事宜查會試之分南北中卷原為因地取才起見行之既久其勢不能均平若不稍加變通恐遐方士子不能仰承皇上廣興文教樂育人材至意嗣後應於南北中卷內再分江南浙江為南左江西湖廣福建廣東為南右直隸山東為北左河南山西陝西為北右四川雲南為中左廣西貴州為中右仍照定例各計卷數之多寡憑文取中既於科場條例並無更改又於各省中額不致偏枯至安廬鳳三府滁和徐三州改歸南卷并仍行分經之處俱照禮部原議從之○陞陝

西肅州副將潘育龍為肅州總兵官○予故副都統倭內巴圖魯祭葬如例○壬子

上奉

皇太后幸暢春園○大學士伊桑阿等疏言欽惟

皇上聖德神功無遠弗屆惟喀爾喀素稱不馴自

太祖

太宗

世祖皇帝時以迄於今雖貢獻之使不絕於道而汗等恃其部族人民數十萬衆未嘗躬修臣節邇乃傾心臣服願列屬藩皇上察其誠懇編立旗分與我四十九旗等量功授秩賞賚頻

實錄卷五十一

十六

頒懷柔遠人之道至斯極矣允宜誕膺

尊號式昭鉅典以愜輿情得旨喀爾喀原係進貢之國伊等不和知其必敗曾特遣大臣諭令和好后乃渝約與厄魯特構兵窘迫來歸朕以好生之心撫綏養育曲盡周詳因此懇切抒誠願同四十九旗一例蓋理所必然且比年來旱澇頻仍民生猶未蘇息風俗猶未醇厚奢靡猶未盡止朋黨猶未悉除彼此援引陷害猶未屏絕理應時加詎勉殫心竭力尚恐不逮居然以為至治遠受尊號斷為不可卿等所奏已知之○旌表河南節婦李氏王氏各給銀建坊如例○癸丑

上詣

皇太后宮問安○陞山西布政使布喀為光祿寺卿○旌表湖廣節婦應城縣張桂芳妻羅氏江夏縣徐嚴妻馬氏各給銀建坊如例

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五十一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五十二

康熙三十年辛未六月乙卯朔諭大學士等喀爾喀厄魯特諭和之舉朕與達賴喇嘛同行之今喀爾喀已安插得所應遣使齎敕於達賴喇嘛使人所關緊要商南多爾濟既病著丹巴色爾濟去諭達賴喇嘛敕曰朕統御寰區以仁育為本撫養是先雖末陞異域之民有困窮而歸命者必受而養之使各得其所爾喇嘛奉行佛法廣度衆生而救苦難其心亦猶是也前以七旗喀爾喀兄弟內相侵奪外與厄魯特交兵朕與爾喇嘛諭令罷兵歸好後噶爾丹又追侵土謝圖汗澤

卜尊丹巴胡土克圖殺奪喀爾喀之人朕遣伊拉古克三胡土克圖爾喇嘛遣濟隆胡土克圖往諭噶爾丹爾使人不能仰副朕與爾之心噶爾丹稱兵大舉殺掠喀爾喀深入我邊汎之內朕稍發兵以問其故反與我兵拒戰至於大敗乘夜遠遁此彼來犯我非朕往伐之也彼所行違朕與爾好生善念自求窮困而已喀爾喀土謝圖汗車臣汗諸濟農諾顏台吉決志內附朕既已受而養之於本年四月躬親大閱喀爾喀之汗濟農諾顏台吉等皆執臣禮跪而稽顙諄諄與四十九旗同列朕設大宴厚賜之照四十九旗編為旗隊給地安插土謝圖汗自以妄舉興戎陳情請罪朕發衆喀爾喀議之

皆言加彼之罪則於我衆無光朕是以宥免其罪仍留土謝圖汗車臣汗之號又念扎薩克圖汗被殺冤痛屬下裔民散亡可矜授其親弟策妄扎卜為和碩親王其餘各分等級授以郡王貝勒貝子公台吉之銜明其法度昭其典章矣爾喇嘛普濟生靈向以喀爾喀國破為憂今已安措得所遣諭爾喇嘛知之爾喇嘛聞此必大歡喜也其左翼之喀爾喀無復可議至右翼扎薩克圖汗屬下人等被虜散亡有在爾喇嘛所者亦有在他處者爾喇嘛普濟生靈必能查明發歸原主也今厄魯特人等屢有歸降聞噶爾丹窮困已極無食而飢於此可見噶爾丹之獲罪於天矣未必不往歸爾喇嘛若果往歸作何措置惟爾喇嘛裁之噶爾丹遁去之時曾立誓而去倘違誓而稍犯我喀爾喀降人朕必發大兵分路前進務期剿滅之其時地方遙遠不及遣人齎敕於爾喇嘛亦未可定是以預遣教習唐古特文喇嘛丹巴色爾濟諭爾知之先是喀爾喀扎薩克丹津額爾德尼台吉奏厄魯特巴圖爾額爾克濟農劫其屬裔馬畜等物下議政大臣等集議至是議政大臣等議奏巴圖爾額爾克濟農前被噶爾丹劫掠窮迫來歸我

皇上加恩給地安插乃巴圖爾額爾克濟農不思報

皇上覆載之恩反要劫降人喀爾喀丹津額爾德尼人畜什物

應將巴圖爾額爾克濟農等逮至四十九旗地方安插兵部理藩院各遣官一員諭將軍尼雅翰率領寧夏所備西安滿兵全軍并令總兵官一員酌率綠旗官兵會同前往巴圖爾額爾克濟農所將喀爾喀丹津額爾德尼等被劫人畜什物俱照數追還尼雅翰等率兵押送巴圖爾額爾克濟農等不還化城交將軍郎談押護內送如巴圖爾額爾克濟農等不還所奪人畜什物不肯內徙安插即令尼雅翰等率大兵剿滅之奏入

上從之隨遣兵部郎中格什理藩院員外郎二郎保前往○諭

翰林院選拔庶常原以作養人材今科進士特加簡閱其楊

實錄卷五十二

三

中訥張曷姚弘緒陳汝成張環姜遴惠周惕王奕清狄億潘從律張孝時胡潤戴紱金潮江球楊名時王傳冉觀祖王者臣李燕生閻錫爵阿金張壽崗姜承燝張曾慶毛鵬李象元胡麟徵張翔鳳喀爾喀文志鯨劉琰何龍文等三十三員俱著改為庶吉士并修撰戴有祺編修吳曷黃叔琳分別滿漢書教習○調兵部尚書李天馥為吏部尚書以原任總督倉場戶部右侍郎石文桂補原官以刑部右侍郎傅臘塔充經筵講官○丙辰正白旗都統和碩額駙穆赫達所尚郡主薨遣官致祭○出征江西護軍叅領厄參特創發身故予祭葬如陣亡例○丁巳

上詣

皇太后宮問安○戊午陞右通政劉楷為光祿寺卿○壬戌封皇三女為和碩榮憲公主下嫁巴林鄂齊爾郡王子吳爾袞授吳爾袞為和碩額駙○癸亥調刑部尚書杜臻為兵部尚書工部尚書陳廷敬為刑部尚書陞吏部右侍郎索諾和為都察院左都御史○以兵科給事中郭洪為山西布政使司布政使○甲子內閣學士南達海以老疾乞休允之○乙丑

上詣

皇太后宮問安○丁卯授多羅安郡王馬爾渾女為郡君塔土默特多羅達爾漢貝勒厄爾德木圖為多羅額駙○旌表陝

實錄卷百三

四

西烈婦羅氏拒姦殞命給銀建坊如例○戊辰

上詣

皇太后宮問安○己巳予陝西陣亡把總張成卹銀廕一子以衛千總用○旌表山西節婦忻州王氏楊氏孝子翼城縣楊效榮純孝廬墓各給銀建坊如例○辛未陞刑部左侍郎管右侍郎事高爾位為工部尚書調刑部右侍郎布彥圖為吏部右侍郎陞內閣侍讀學士滿丕為內閣學士兼禮部侍郎○陞陝西寧夏道丹達禮為貴州按察使司按察使○命禮部左侍郎管翰林院掌院學士事庫勒納翰林院掌院學士兼管詹事府詹事事張英教習庶吉士○甲戌

上詣

皇太后宮問安○戊寅陞內閣學士邁塗為刑部右侍郎出征厄魯特護軍恭領胡虎創發身故予祭葬如陣亡例○教漢多羅郡王薩木聘爾故遣官致祭○庚辰予故原任少傅兼太子太傅保和殿大學士兼戶部尚書成克鞏祭葬如例○壬午增設理藩院員外郎八員○戶部尚書王鵬以病乞休慰留之○陞左副都御史李迥為刑部右侍郎

秋七月甲申朔享

太廟遣領侍衛內大臣公舅舅佟國維行禮○奉差兵部郎中格什等疏言臣等至寧夏會同將軍尼雅翰等率領西安滿

實錄卷百三

五

兵全軍總兵官一員領綠旗官兵四千往追巴圖爾額爾克濟農副都統柏天郁總兵官馮德昌等率兵出大威口追及巴圖爾額爾克濟農於阿里渾烏素之地再三諭令遷移巴圖爾額爾克濟農不從旋即遁去臣等隨報將軍將軍分兵為三隊追之至西喇布裏圖將宿臣等言當乘夜追及誅之次日往追則難及矣將軍不聽次日追三十餘里第三日至庫克布裏圖度不能及遂率兵還臣等度巴圖爾額爾克濟農必西去臣格什往甘州等處地方臣二郎保往涼州等處地方探視巴圖爾額爾克濟農駐牧之地奏入上命刑部侍郎邁塗前往察審尋邁塗審取口供具奏下部議

兵部議覆將軍尼雅翰稽遲怯懦失機應革去將軍並  
拖沙喇哈番不准折贖鞭一百副都統栢天郁革去副都統  
郎中格什員外郎二郎保俱革職總督葛思泰係封疆重臣  
部檄到日應即會同將軍尼雅翰等速議使巴圖爾額爾克  
濟農不致遁逃始為稱職乃遲悞軍機遣大臣往訊始云曾  
諫將軍尼雅翰巧飾具奏殊為不合應將葛思泰降二級調  
用得旨栢天郁葛思泰俱降五級留任將軍尼雅翰著逮至  
京監候絞格什二郎保革職尼雅翰等所率往官兵令總督  
葛思泰暫轄駐劄寧夏○戊子陞國子監祭酒圖納哈為內  
閣學士兼禮部侍郎○己丑調陝西延綏總兵官馮德昌為

實錄卷五十二

十

寧夏總兵官涼州總兵官柯彩為延綏總兵官湖廣襄陽總  
兵官師帝賓為陝西涼州總兵官福建臺灣總兵官王化行  
為湖廣襄陽總兵官○禮部題朝鮮國進貢使臣違禁私買  
一統志書查一統志載天下山川輿地錢糧數目所關甚重  
應將違禁私買一統志書之內通官張燦革職發伊國邊界  
充軍正使李沉副使徐文重等失於覺察並應革職朝鮮國  
王李煒姑免議得旨李沉徐文重從寬免革職餘如議以  
喀喇沁故鎮國公烏忒巴喇弟善巴喇錫襲爵○庚寅

上詣

皇太后宮問安○癸巳

孝懿皇后忌辰遣官祭

陵○予故副都統鄂莫克圖祭葬如例○甲午理藩院奏喀爾  
喀人等既與四十九旗同列則眾扎薩克自親王以下驍騎  
校以上凡請安進貢奏事或遣使或親來俱應照四十九旗  
例土謝圖汗車臣汗旗內自王以下驍騎校以上凡行事亦  
應與四十九旗同土謝圖汗車臣汗其身僅存汗號應令進  
九白之貢其來使仍令照前例行澤卜尊丹巴胡土克圖之  
使亦令照前例行奏入

上曰喀爾喀人等初降新行安插俟三年後依此議行澤卜尊  
丹巴胡土克圖亦著貢九白○丙申

實錄卷五十二

七

上詣

皇太后宮問安○戊戌中元節遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○諭兵部歸化城兵無事當徹著都統郎談副都



統碩鼐於在彼大臣內酌帶一員沿邊直至寧夏延綏西寧往勘大軍可行可止之地至於巴圖爾額爾克濟農前者米歸給地安插而養之助喀爾喀往征厄魯特竟不為効力且劫奪喀爾喀之事甚多灼知其必不能改故令遷徙居察哈爾之地奈彼素藏禍心是以遠遁朕以向加養育初無困之殺之之意欲居何地惟其所擇但不得擾害邊塞地方可令達虎書此原由遣人往諭巴圖爾額爾克濟農著一并議奏尋議今歸化城兵無事應撤但留在歸化城之厄魯特尚未去應撥每佐領護軍二名火器營兵四百名照兵數派官在歸化城週圍暫駐餘俱撤回此所留兵俟頭隊厄魯特起程後即回其調到大同宣府綠旗官兵亦令各回汛地暫留大臣伏候

實錄卷一百一

八

上命應著達虎抄謄敕諭遣發巴圖爾額爾克濟農俟彼作何回覆即令奏報得旨著都統喀岱李正宗副都統田象坤郎化麟留後將軍印交與喀岱泰領諾爾孫達米納夸塞蘇丹古爾哈著與郎談偕往勘視大軍可行可止之地事畢著郎談等一二緊要之人乘驛先來入奏○已亥陞順天府府尹衛既齊為都察院左副都御史○以故一等精奇尼哈番多爾濟子善巴一等阿思哈尼哈番費業冷子博爾屯襲職○予故原任副都統對泰原任內閣學士拜禮各祭葬如例○

庚子

上詣

皇太后宮問安 以杭州副都統穆維雍為福建臺灣總兵官壬寅定北將軍瓦岱疏言臣等至克魯倫遇西卜退哈灘巴圖爾納木扎爾托音伊等俱願來投哨探噶爾丹信息遁去已久遂於本月初四日回軍十八日進翁俄羅汎界報聞  
癸卯

上詣

皇太后宮問安 丙午吏部題兵部將鑲黃旗內大臣漢軍都

統參贊大臣一等公舅舅佟國綱陣亡功牌咨送臣部查舊

實錄卷一百一

九

例參贊大臣陣亡者給與拜他喇布勒哈番又一拖沙喇哈番但舅舅佟國綱係一等公不便加與官職應照公愛星阿例令兵部別議賞給得旨舅舅佟國綱給與拜他喇布勒哈番又一拖沙喇哈番令伊子承襲著為例○吏部議敘出征厄魯特功前鋒統領邁圖等三十二人應各授拖沙喇哈番得旨依議前鋒參領格似特効力年久勞績顯著著再加一拖沙喇哈番授為拜他喇布勒哈番 予故三等輔國將軍塞祐德祭葬立碑如例○予出征厄魯特陣亡員外郎委署火器營夸蘭大韓大任祭葬如例 土謝圖汗奏言  
皇上仁恩臣與子及所屬人民不勝歡忭臣思得膏腴之地竭

力春耕以資朝夕得旨來年春著理藩院遣官一員指授膏腴之地令其種植○已酉

上詣

皇太后宮問安○予故太子太師保和殿大學士兼禮部尚書杜立德祭葬加祭一次謚文端○諭大學士等曰杜立德在世祖皇帝時居官早著賢聲稟性厚重行事正大非若他人之徒務虛名也朕任用多年老成恪慎如遇事得其情理從不肯苟隨同列必於朕前直言敷奏從前在任時陳奏之處頗多可謂賢臣矣

閏七月甲寅朔

實錄卷一百五十二

十

上詣

皇太后宮問安○盛京刑部侍郎郭赫緣偷安溺職降五級以盛京武職効力○丙辰四川陝西總督葛思泰疏報臣差甘肅副將陳祚昌等哨探至昌寧湖有巴圖爾額爾克濟農之弟博際遣親信喇嘛格隆等來言素蒙

皇恩不敢背負今請在昌寧湖牧馬陳祚昌度其將往西海借名牧馬緩我軍機隨將格隆等監禁一面報臣及總兵官甘肅總兵官柯彩調遣遊擊李士達等領官兵四路進剿大敗蒙古兵殺五百餘人博際遁走追躡百餘里所獲牲畜器械無算生擒蒙古十五人並前監禁之格隆額林臣索諾木等

皆斬之下部議敘○免江西南昌等五府康熙二十三年至二十七年民欠未完額賦○戊午

上詣

皇太后宮問安○已未敘出征厄魯特功賞賚八旗火器營兵丁銀兩有差○庚申調戶部尚書蘇赫為吏部尚書陞禮部左侍郎管掌院學士事庫勒納為戶部尚書轉戶部右侍郎阿山為左侍郎陞內閣學士博際為戶部右侍郎○辛酉陞左僉都御史陳肇昌為順天府府尹○敘出征厄魯特功賞賚巴林喀喇沁官兵銀兩有差○壬戌以左副都御史多弼鑲黃旗滿洲副都統兼管武備院事馬思喀為內務府總管

實錄卷一百五十三

十一

調遷移

○乙丑四川陝西總督葛思泰請將陝西駐防官兵酌議更調遷移○上諭大學士等曰噶爾丹巴圖爾額爾克濟農皆係逃遁之人安敢侵犯邊境縱使侵犯沿邊官兵自足撲剿今並無他故葛思泰忽即內怯將久駐官兵奏請移駐各處兵丁駐防年久俱置有產業驟然更調往返遷移必致苦累且暫撥民房居住又必擾及閭閻兵民為國家根本久安長治之道惟在愛兵恤民培養元氣此所奏無益不准行○陞大理寺卿明額理為盛京刑部侍郎翰林院侍讀學士思格色為內閣學士兼禮部侍郎○丙寅

上詣

皇太后宮問安 戊辰授多羅貝勒魯克度女為郡君塔鄂羅為多羅額駙 己巳以故三等公倭赫之子傅爾丹襲爵

陞通政使尹泰為都察院左副都御史 陞河南按察使楊鳳起為湖南布政使司布政使 壬申

上奉

皇太后自暢春園回宮 予出征福建陣亡千總張元卹銀磨一子以衛千總用 癸酉

上諭大學士等副都御史衛既齊前議分南北卷時因邵遠平有江浙人盡奸詐之語遂信其為賢而保之邵遠平謂江浙

人盡奸詐伊之祖父獨非江浙人乎父為子隱子為父隱直在其中果如邵遠平之言則伊祖父兄弟皆奸詐人矣費祖

父兄弟以沽直名乃奸詐中之第一人也豈得謂之直哉況從來賢才不擇地而生十室之邑必有忠信朱子徽州人也

紹洙泗道統之傳江浙中豈無賢者衛既齊一假道學耳認理不明中無定見是以為其所愚也 甲戌調江寧副都統

倭賀為杭州副都統陞前鋒恭領鄂羅舜為江寧副都統

予故吏部尚書鄂爾多祭葬謚敏恪 乙亥 上巡幸邊外命皇長子允禔皇三子允祉

皇四子 皇五子允祺皇七子允祐皇八子允禩隨駕是日

啓行駐蹕湯泉 陞光祿寺卿布喀為大理寺卿 陞山西

河東道胡介祉為河南按察使司按察使 免江南海州桃源等七州縣本年分旱災額賦有差 予故都統三等公倭

赫祭葬如例 喀爾喀西卜退哈灘巴圖爾來降授為輔國公 丁丑

上駐蹕懷柔縣 戊寅

上駐蹕密雲縣 己卯

上駐蹕密雲縣陳穀莊 庚辰

上駐蹕古北口 辛巳

上駐蹕恩格木噶山 陞右通政羅秉倫為光祿寺卿 壬午

上駐蹕捕塔海噶山 以甘肅布政使噶通薩為光祿寺卿

八月癸未朔

上駐蹕喀布泰地方 甲申秋分夕

月於西郊遣護軍統領伯四格行禮

上駐蹕漠虎爾察罕地方 乙酉

上駐蹕布祿里昂阿地方 丙戌

上駐蹕穆祿喀喇沁地方 陞陝西按察使吳赫為山西布政

使司布政使雲南按察使許弘勳為河南布政使司布政使

予故戶部侍郎賽弼漢祭葬如例 丁亥遣大學士阿蘭

泰祭

先師孔子

上駐蹕愛里地方戊子祭

大社

大稷遣護軍統領伯四格行禮

上駐蹕愛里北己丑

上駐蹕穆祿喀喇沁昂阿地方庚寅

上駐蹕穆祿烏蘭哈達地方辛卯

太宗文皇帝忌辰遣官祭

昭陵

上駐蹕森濟圖哈達地方壬辰予出征厄魯特陣亡拖沙喇

實錄卷一百五

高

哈番莊爾祭葬如例癸巳

太祖高皇帝忌辰遣官祭

福陵

上駐蹕鷺和洛甲午

上駐蹕格爾齊老地方乙未

上駐蹕烏喇岱地方調鑲白旗滿洲副都統伊勒慎為西安

副都統調山西布政使吳赫為甘肅布政使司布政使陞

山西按察使能特為山西布政使司布政使廣東雷瓊道佟

世雍為雲南按察使司按察使予故陝西寧夏總兵官贈

右都督李嗣興祭葬如例丁酉

上駐蹕噶海圖地方戊戌

上駐蹕克勒烏里雅蘇台己亥

上駐蹕西爾哈烏里雅蘇台庚子

上駐蹕納林西爾哈地方辛丑

上駐蹕唐圖烏蘭哈達地方陞戶部郎中納壘為陝西按察

使司按察使壬寅

上駐蹕阿祿噶察地方癸卯

上駐蹕桂巴哈地方甲辰

上駐蹕布祿圖和洛乙巳

上駐蹕崑都崙郭爾地方陞福建按察使張志棟為江蘇布

實錄卷一百五

蓋

政使司布政使丁未

上駐蹕巴爾喀地方之湯泉戊申

上駐蹕孟克烏孫地方遣官祭

歷代帝王遣官祭城隍之神以監察御史巴錫為山西

按察使司按察使貴州巡撫田雯丁母憂命回籍守制

己酉

上駐蹕奇雅代和洛庚戌免陝西乾州咸陽等五州縣本年

分隸災額賦有差辛亥

上駐蹕穆祿和洛昂阿地方

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十二

實錄卷一百五十二

去

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十三

康熙三十年辛未九月壬子朔

上駐蹕瑚西哈台地方○癸丑

上駐蹕烏爾蒿齊特地方○以左副都御史衛既齊為貴州巡撫陞四川松茂道王清賢為福建按察使司按察使○陞長史赫碩塞為鑲白旗滿洲副都統○琉球國中山王尚貞遣陪臣溫允傑等齎表進貢方物宴賚如例○甲寅

上駐蹕蘇賽包地方○喀爾喀達拉瑪希里卓特巴來降授為多羅貝勒○以故阿霸垓多羅卓禮克圖郡王褚翁子塞楞

襲爵○乙卯

實錄卷一百五十三

一

上駐蹕大吉喀布泰昂阿地方○丙辰

上駐蹕冰窖地方○以故三等阿思哈尼哈番巴雅珥子戴通三等阿思哈尼哈番錫札保子富喀各襲職○予故左都督江西南瑞總兵官陳平祭葬如例○旌表直隸烈婦馬文瑞妻劉氏拒姦殞命給銀建坊如例○安南國王黎維正遣陪臣阮名儒等齎表進貢方物宴賚如例○丁巳

上駐蹕喜峯口○戊午

上駐蹕三屯營城南○己未

上駐蹕遵化州城西北○免山西夏縣等七縣本年分蝗災額

賦有差 庚申

上駐蹕湯泉 辛酉

上詣

暫安奉殿

孝陵奠酒舉哀畢至

仁孝皇后

孝昭皇后

孝懿皇后陵奠酒舉哀

上駐蹕新城 壬戌

上以

孝懿皇后再期忌辰率諸王大臣官員致祭

上駐蹕薊州 予出征厄魯特陣亡正黃旗參領門代祭葬如

例 癸亥

上駐蹕三河縣 甲子

上駐蹕通州 陞湖南按察使綠一信為湖北布政使司布政

使 乙丑

上回宮詣

皇太后宮問安 以禮部尚書熊賜履為武會試正考官工部

右侍郎王承祖為副考官 陞左僉都御史劉元慧為順天

府府尹 丙寅

上御太和門視朝文武陞轉各官謝恩次安南國琉球國使臣

等行禮 丁卯先是以噶爾丹敗遁及立誓請罪始末遣伊

什格隆齋敕往諭達賴喇嘛至是達賴喇嘛遣使德木本爾

囊素至疏言前者敬遵諭旨曾遣噶爾丹西勒圖往和喀爾

喀厄魯特因彼構兵不已復遣濟隆諭和濟隆回報言喀爾

喀厄魯特俱聽從立誓矣及見

皇上敕諭內有噶爾丹為大兵所敗認罪立誓之旨始知噶爾

丹不聽訓飭是以此地所遣人員無知無識伏乞寬宥

德木本爾囊素又述達賴喇嘛口奏云喀爾喀厄魯特交戰

之前土謝圖汗噶爾丹等遣使於西海台吉各請助兵達賴

台吉來告於我我謂喀爾喀厄魯特等和睦我則喜悅不願

有所偏助也四川打箭爐地方今西海扎什巴圖爾台吉領

兵駐防非有異念今俱已徹歸矣

上以達賴喇嘛向來恭順噶爾丹事必其使臣及屬下人通同

蒙蔽非達賴喇嘛意因賜敕諭之敕曰朕統御宇內以愛育

黎庶為本務使萬邦共享安樂前聞喀爾喀厄魯特交惡相

攻屢遣使於爾喇嘛以和兩國爾喇嘛從來奉命不違敬順

而行亦屢遣喇嘛說和奉差喇嘛諸人若能仰體朕與爾好

生之意盡心行事則喀爾喀厄魯特和好早息戰爭矣但爾

近侍與濟隆胡土克圖等皆有私意不體朕與爾之心濟隆

胡土克圖身在噶爾丹營中並不說和噶爾丹藉追喀爾喀為名闖入邊汛劫掠烏朱穆秦又不勸阻且噶爾丹與我軍交戰濟隆張蓋於山頂觀之而報爾以為竭力說和聽從立誓濟隆之去朕面諭以告爾喇嘛之言亦不行傳諭以前項事情揆之未必由濟隆一人之意亦爾近侍之人通同貪利而欺蔽爾徇庇噶爾丹之所致也爾豈有如是之心乎朕灼見與爾喇嘛無涉是以朕不責汝朕向來惟以實心待爾故將若輩行事違朕與爾之意遣敕諭爾知之至噶爾丹乞兵於達賴台吉而不許駐防四川打箭爐之兵盡撤已具悉所奏矣○戊辰

上詣

皇太后宮問安○調內閣學士傳繼祖為翰林院掌院學士兼禮部侍郎陞通政使黃斐為都察院左副都御史○已巳諭戶部朕頃巡行邊外入喜峯口見民間田畝多為蝗蝻所傷又聞榛子鎮及豐潤縣等處地方被蝗災者亦所在間有秋成失望則民食維艱朕心深切軫念倘及今不為區畫儲蓄恐至來歲不免饑饉之虞著行該撫親歷直隸被災各州縣通加察勘悉心籌畫應作何積貯該撫詳議具奏其被災各地方明歲錢糧若仍照例催科小民必致苦累著俟該撫察報分數到日將康熙三十一年春夏二季應徵錢糧緩至秋

季徵收用稱朕體恤民生休息愛養至意○庚午兵部題補西安將軍尼雅翰員缺

上諭大學士等曰西安將軍關係重大護軍統領馬喇才能素著於蒙古事亦諳練可陞補西安將軍其馬喇員缺著西安副都統伊勒慎陞補西安副都統員缺著正藍旗前鋒護衛西爾哈達陞補馬喇西爾哈達俱令作速赴任○諭戶部朕孜孜圖治軫切民依閭閻耕獲時勤諮訪其有以荒歉上聞者或蠲或賑旋即施行務令得所念河南一省連歲秋成未獲豐稔非沛特恩蠲恤恐致生計艱難康熙三十一年錢糧著通行蠲免並漕糧亦著停徵至山西陝西被災州縣錢糧

除照分數蠲免外其康熙三十一年春夏二季應徵錢糧俱著緩至秋季徵收用稱朕眷愛黎元撫綏休養至意○以公阿靈阿為鑲黃旗蒙古都統○陞廣東糧道劉樞為湖南按察使司按察使○予故保和殿大學士兼兵部尚書梁清標祭葬如例○辛未諭大學士等朕諮訪蝗蟲始生情狀凡蝗蟲未經生子而天氣寒凍則皆凍斃來歲可復無患若既經生子天氣始寒雖蝗已凍斃而遺種在地來歲勢必更生今年寒凍稍遲蝗蟲已有遺種朕心豫為來歲深慮宜及早耕耨田畝使蝗種為覆土所壓則其勢不能復孽設有萌孽即時驅捕亦易為力可傳諭戶部移咨被災各地方巡撫責



今有司曉示百姓務於今冬明春及早盡力田畝悉行耕耨俾來歲更無蝗患倘或田畝不能盡耕來歲蝗蟲復起亦須盡力驅捕無致為災 癸酉

上御經筵講畢賜大學士九卿詹事及講官等宴 甲戌諭大學士等河道關係緊要著戶部侍郎博際兵部侍郎李光地工部侍郎徐廷璽前往查閱靳輔亦著同去靳輔於河務最為諳練如黃河險工不能完固則運河中河俱壞著將黃河刷底深闊及所修險工之處從公閱看○陞大理寺卿布喀為內閣學士兼禮部侍郎○丁丑陞太常寺卿周之麟為通政使弟達西達爾扎襲爵○丁丑陞太常寺卿周之麟為通政使

司通政使○戊寅

孝慈高皇后忌辰遣官祭

福陵○

上詣

皇太后宮問安○辛巳以翰林院掌院學士傅繼祖侍講學士傅伸充日講起居注官○調西安副都統栢天郁為京口副都統

冬十月壬午朔享

太廟

上親詣行禮○遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○頒康熙三十一年時憲歷 癸未陞光祿寺卿

噶爾薩為大理寺卿 甲申

皇太后聖壽節遵

懿旨停止行禮筵宴○乙酉

上詣

皇太后宮問安○策試天下武舉於

太和門前○諭侍衛阿南達曰朕思黃河冰凍之時恐巴圖爾額爾克濟農等流兵侵犯喀爾喀地方應令鄂爾多斯吳喇忒喀爾喀等於冰解以前備之且以探聽信息著理藩院詳議具奏尋議覆鄂爾多斯六旗應撥兵三千吳喇忒三旗應撥兵五百扎薩克信順郡王善巴扎薩克公托鐸厄爾德尼扎薩克台吉圖巴丹津厄爾德尼此四旗應撥兵五百又扎薩克墨爾根濟農郡王古祿西希扎薩克公蘇泰伊爾登

扎薩克台吉墨爾根戴青車陵此三旗應撥兵五百令所撥兵各備於其地台吉都統副都統等管轄人員俱選擇有材幹善約束者派出其鄂爾多斯貝勒松阿喇布扎薩克信順郡王善巴扎薩克墨爾根濟農郡王古祿西希此三路每處撥官二員駐於適中之地探信有事則一面報部一面酌量調兵應援其總統三路兵之大臣伏候

聖裁得旨著阿喇尼紀爾他布諾木齊岱馬迪宣賴英古巴查爾畢雅思呼朗等前去仍令阿喇尼紀爾他布主之一切便宜行事○陞太僕寺卿唐朝彞為太常寺卿○丙戌

上御瀛臺紫光閣閱中式武舉騎射技勇○丁亥

上御瀛臺紫光閣閱中式武舉騎射技勇○戊子傳臚賜殿試中式武舉張文煥等二百人武進士及第出身有差○己丑

上詣

皇太后宮問安○命翰林院掌院學士傅繼祖教習庶吉士

庚寅四川陝西總督葛思泰疏報前因謝爾素地方番人為盜擅發弓箭射死參將朱震等部議令臣發兵剿殺隨密飭西寧總兵官李芳述酌帶官兵馳赴謝爾素地方八月二十七日在棋子山殺死賊番六百餘名生擒三十名將為首之華木爾加等審明正法下所司知之○壬辰

上詣

皇太后宮問安○陞參領周卜世為正黃旗漢軍副都統○癸巳以荊州將軍侯巴渾德為正黃旗滿洲都統○理藩院議覆外藩四十九旗輔國公每年給俸銀二百兩緞七疋令四十九旗扎薩克台吉及喀爾喀扎薩克台吉等應照輔國公之半支給從之○甲午以一等侍衛吳達禪為正白旗滿洲副都統○以監察御史戴吞為陝西布政使司布政使○以二等侍衛鄂克濟哈為正黃旗滿洲副都統○以故吳喇忒鎮國公達喇瑪迪子達拉瑪西禮襲爵○丙申理藩院議覆賞給阿祿科爾沁等七旗分貧人米穀

上曰此賞給米穀調蒙古駱駝馬匹運送時值寒冬輸輓殊難

況來領米穀之人不能運到必致沿邊糶賣則貧人不能皆沾實惠令應量米折銀給之庶到彼甚易而貧人得沾實惠也又諭理藩院曰投誠喀爾喀已給地居住今定例之初應將喀爾喀并議凡一應差役維均則人不偏勞差往扎賴特等處人役俱由喜峯口行走則喀爾喀等旗甚為偏累若出山海關由盛京地方庫口行走道路甚便不勞可至喀爾喀等旗亦免偏累古北口喜峯口外現各有五十家一村設為驛站自此至科爾沁等處其間亦須照此例於各旗內察出貧窮之人給與牛羊等物使為產業設立驛站則貧者咸得生理而各處亦免苦累其傳問朝正諸王貝勒台吉等具

奏○陞左通政嚴曾渠為太僕寺卿○丁酉

上詣

皇太后宮問安○諭大學士等曰朕聞陝西西安鳳翔等處年歲不登民艱粒食以致流移令遣學士布喀速往陝西凡被災地方親歷查看其作何賑濟之處會同總督巡撫速議以聞○免河南陽武等二十三州縣本年分旱災額賦有差○戊戌陞叅領馬自德為西安副都統○予故奉國將軍鄂明祭一次○己亥以喀爾喀故輔國公得克德黑墨爾根阿海子萬舒克襲爵○庚子

上詣

皇太后宮問安○辛丑陞少詹事徐潮為通政使司通政使○以原任兵部尚書紀爾他布為正黃旗滿洲副都統○癸卯以鑲白旗滿洲都統莽奕祿為荊州將軍○甲辰

上詣

皇太后宮問安○免山西岳陽等八州縣本年分蝗災額賦有差○丁未先是遣侍讀學士達虎等齎敕頒賞策妄阿喇布坦阿奴等歸至嘉峪關外被阿奇羅卜臧等劫去馬駝盈甲等物兵部檄令甘肅提督孫思克發兵征討至是孫思克疏言阿奇羅卜臧經臣遣發官兵征討斬殺四百餘人獲馬駝牛羊千計下所司知之○戊申工部尚書席柱高爾位侍郎

伊爾格圖齊構王承租各降五級調用以疏濬城河估費浮多故也○以翰林院侍講學士覺羅三寶充日講起居注官○免江南興化縣本年分蝗災額賦○己酉

上詣

皇太后宮問安○以冠軍使囊伍為鑾儀使

十一月辛亥朔

上詣

皇太后宮問安○癸丑冬至祀

天於

圓丘遣領侍衛內大臣公福善行禮○遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵○停止次日朝賀○丙辰免陝西渭南等二十一州縣本年分旱災額賦有差○丁巳以左都御史索諾和為工部尚書調總督倉場戶部侍郎凱音布為工部左侍郎盛

京工部侍郎圖爾宸為工部右侍郎陞吏部左侍郎李振裕為工部尚書內閣學士年遐齡為工部右侍郎戊午陞鑲白旗護軍統領伊勒慎為滿洲都統免河南滎陽等二十六州縣本年分蝗災額賦有差喀爾喀扎薩克圖汗之妻布尼達喇疏言

皇上出臨會閱我與子已郎欲赴會所訴先祖父名爵及扎薩克圖汗被害兩大事因于身故不獲赴會陳訴今特攜六歲之子克色克台吉而來寡婦孤兒惟

聖上鑒恤奏入下理藩院議尋議覆扎薩克圖汗之弟策妄扎卜已封親王克色克年幼未應受封所奏無庸議得旨扎薩

實錄卷五十五

三

克圖汗被殺殊為冤抑所存止此一子克色克著從優授為輔國公○已未諭吏部從來致治之道在正人心人心偏私則詐偽日生而習俗滋敝人心公直則器競自息而庶績允釐朕蚤夜孜孜崇尚德教蠲滌煩苛期與中外臣民共適於寬大和平之治凡大小諸臣素經拔擢咸思禮下逮曲全始終即或因事故歸或罹咎罷斥仍令各安田里樂業遂生惟爾諸臣亦宜奉職恪恭絕偏私而襄國事乃近見內外各官間有彼此傾軋伐異黨同私怨交尋牽連報復或已所銜恨而反囑人代糾陰為主使或意所欲言而不直指其事巧陷術中雖業已解職投閒仍復吹求不止株連逮於子弟顛

覆及於身家甚且市井姦民亦得借端凌侮蔑紀傷化不可

勝言凡若所行雖跡甚詭秘朕總攬機務已三十年此等情態知之最悉儻因仍陋習益致蔓延殊非朝廷所以體恤臣工保全愛惜之意夫讒譖媚嫉之害歷代皆有而明末為甚公家之事置若罔聞而分樹黨援飛誣排陷迄無虛日以致釀禍既久上延國家朕歷觀前史於此等背公誤國之人深切痛恨自今以往內外大小諸臣應仰體朕懷各端心術盡蠲私忿共矢公忠豈獨國事有裨即爾諸臣亦獲身名俱泰倘仍執迷不悟復踵前非朕將窮極根株悉坐以交結朋黨之罪爾部可即傳示中外使咸知朕意○壬戌轉吏部右侍

實錄卷五十五

三

郎趙士麟為左侍郎陞內閣學士彭孫通為吏部右侍郎內閣學士星安為盛京工部侍郎翰林院侍讀學士王掞為內閣學士兼禮部侍郎○癸亥陞吏部左侍郎薩海為都察院左都御史甲子差往陝西勘災內閣學士布喀回奏西安府屬咸寧等州縣衛鳳翔府屬郿縣等三縣米價騰貴百姓流移

上諭戶部陝西西安鳳翔等處年歲不登民艱粒食朕心深切軫念若不大沛恩施無以徧甦疾苦其被災各地方康熙三十一年額徵銀米著通行蠲免又聞甘肅地方秋收豐稔米價較平著該督撫會同詳議作何購買轉輸速行賑濟務使

比屋得沾實惠不致仳離失所以副朕撫恤災黎至意○以甘肅巡撫伊圖為總督倉場戶部侍郎內閣學士布喀為甘肅巡撫○陞鑲藍旗滿洲副都統碩鼎為前鋒統領○命山西省撥銀二十萬兩解赴陝西賑濟飢民○喀爾喀土謝圖汗澤卜尊丹巴胡土克圖等來朝進貢賞賚如例○予故通政使司通政使周之麟祭葬如例○乙丑

上幸暢春園○免陝西寧州鎮原縣本年分蠲災額賦有差○戊辰

上幸南苑行圍○陞侍讀學士達虎為內閣學士兼禮部侍郎○庚午轉吏部右侍郎布彥圖為左侍郎調兵部左侍郎沙

寶錄卷五

五

穆哈為吏部左侍郎管右侍郎事○陞鑲白旗蒙古副都統噶爾瑪為護軍統領○辛未

上自南苑回駐暢春園○兵部議覆湖廣總督丁思孔疏參均房右營守備張明令兵丁採取薪芻以致衆怨應將守備張

明革職

上諭大學士等曰朕思貧窮武弁家人必少細小事務差遣兵丁凡以小事控告專管官員朕從未准行若此端一開兵丁必致相聚各處控告汎守空虛將弁亦難以管轄此本著再議具奏尋議守備張明降一級留任罰俸一年從之○壬申

陞翰林院侍講學士李棟為內閣學士兼禮部侍郎○免湖

廣沅州等三州縣本年分水災額賦有差○免雲南昆明等十州縣本年分水災額賦有差○旌表安徽烈婦濮宗元妻胡氏拒姦殞命給銀建坊如例○癸酉

上自暢春園回宮○二等精奇尼哈番夏普因老病解退以其子夏襄元襲替○免直隸霸州等二十四州縣本年分旱災額賦有差○甲戌諭禮部自昔帝王敬天勤政凡遇垂象示

警必實修人事以答天戒頃欽天監奏推算日食當在康熙三十一年正月朔日食夫日食為天象之變且又見於歲首

朕兢惕靡寧力圖修省惟大小諸臣務精白乃心各盡職業以稱朕欽承昭格至意其元旦行禮筵宴俱著停止○乙亥

寶錄卷五

五

陞監察御史德珠為內閣學士兼禮部侍郎○陞參領阿蘭台祖良弼俱為陝西西安副都統○丙子轉兵部右侍郎朱都納為左侍郎陞左副都御史恕舒為兵部右侍郎○丁丑

上詣

皇太后宮問安○已卯一等阿思哈尼哈番昂阿木巴因病解退以其子荷善襲替○庚辰調湖廣永州總兵官盧崇耀為貴州大定總兵官陞福建臺灣副將李日烺為湖廣永州總兵官

十二月辛巳朔諭大學士等曰各省輓運京師糧米除一歲所需每年存餘幾何著查明具奏又諭曰治道以愛民為要

而利益民生務在均沾實惠朕屢蠲免地丁銀兩思完納漕糧一項小民良苦亦欲特賜蠲徵此念已久每歲餘米若足供一二年之需則漕糧亦可酌量免徵其荊州江寧杭州等大兵駐防處所亦酌量截留以為儲備民既現沾實惠或遇水旱之年更有裨益至於運丁賴運資生若停輓運須使運丁不至困窮著一并議奏○陞前鋒參領龍西庫為鑲藍旗滿洲副都統○壬午大學士等奏臣等會同戶部確查米數現今倉內儲米七百八十萬石有奇足供三年給放

上曰有米如許朕意將三十一年起運之米於江寧京口杭州荊州等處酌量截留將三十二年漕運盡行蠲免民生寬裕

實錄卷百五

共

於國實有裨益其下九卿確議尋九卿議覆京師根本重地漕糧輸輓關係國計似難輕議全蠲况五方雜處人烟湊集需用孔多若一年停運米既不能北來百貨價值亦將騰貴臣等公議將漕米照省分府逐年輪免二三年間即可周偏無有不邀

聖恩者矣得旨朕急思軫恤民生於都城人民食用之需未曾計及九卿議是○予故左都督管浙江瑞安營副將事劉順祭葬如例○甲申諭戶部朕撫馭區宇三十年以來早夜圖維惟以愛育蒼生俾咸臻安阜為念比歲各省額徵錢糧業已次第蠲豁其歲運漕米向來未經議免朕時切軫懷所有

京通各倉米穀撥節支給數載於茲今觀歷年儲積之粟恰足供用應將起運漕糧逐省蠲免以紓民力除河南省明歲漕糧已頒諭免徵外湖廣江西浙江江蘇安徽山東應輸漕米著自康熙三十一年始以次各蠲免一年至江寧京口杭州荊州大兵駐防地方亦應預行積貯著將康熙三十一年起運三十年漕米各截留十萬石存貯倉廩令該地方官敬慎守視以備需用爾部即遵諭行○陞兵部督捕左理事官佛葆為都察院左副都御史○丙戌理藩院題歸化城一帶地方耕牛八旗內佐領兩人共助一牛其耒耜等項俱移文山西巡撫預備

實錄卷百五

共

上諭曰所用耕牛不必令其幫助即於御廠內牛取用耒耜等項若令巡撫製備將仍委之屬吏一委屬吏必致累民其鐵器著支用庫銀製造從驛遞運送邊外未植甚多其木器即於彼處製用夫農田者人生之根本朕凡所至之地先察其土田邊外耕種必培護穀苗使高其壟此皆由土性寒而風又凜冽之故不如此則穀苗不能植立矣內地之田其壟不高各處耕種不同者皆隨其地土之宜也○丁亥

上詣

皇太后宮問安○理藩院題覆達爾河等種地積穀上諭大學士等曰邊外積穀甚屬緊要達爾河地方著交與內



務府派各莊壯丁耕種呼兒河地方令五旗王等莊屯人前往耕種其籽粒耒耜耕牛皆令豫備著派諳練農事官員前往監管布種完時酌留耘田之人收穫其農夫所食米穀著於古北口所貯米穀計口帶去席喇穆倫地方仍照前議令盛京人役前往耕種秋收之時有收穫多者該部將監管官員議敘具奏朕觀各處地畝肥瘠不同朕巡視南方見彼處稻田歲稔時一畝可收穀三四石近京玉泉山稻田一畝不過一石又見古北口穀田豐收之年一穗約三千粒口外近邊地方豐收之年穗幾萬粒此皆土脈不同故收穫亦異以此觀之達爾河等三處墾種所費無幾而所獲必多矣○戊

實錄卷一百五十三

十

子諭大學士等近因西安等處被災已令動支正項錢糧二十萬兩賑濟著戶部侍郎阿山內閣學士德珠前往驗給務使飢民均沾實惠○下嫁額駙尚之隆和碩和順公主薨逝遣官致祭○予故西安副都統黨務禮祭葬如例○出征厄魯特參領阿里馬創發身故予祭葬如陣亡例○已丑陞前鋒參領博託和為鑲白旗蒙古副都統○一等阿思哈尼哈番又一拖沙喇哈番阿圖海因庸懦革職以其子孫保住襲替以故三等阿思哈尼哈番巴惜子齊寶襲職 辛卯以翰林院掌院學士傳繼祖充經筵講官○壬辰諭兵部武職官員任寄封疆關係甚重必得其人始有裨益朕所簡閱素

悉之員俱已次第拔擢今宜選材以備任用爾部行文各將軍總督提督巡撫及無提督省分總兵官於武職官員內副將以下千把總以上有灼見人材勇健諳練軍務整飭營伍愛恤士卒及行間効力曾經立功者不論本省別省現任候補限文到三日內各舉所知保奏不必彼此會同其在內八旗漢軍官員有人材素優嫻於約束堪任要地者亦著都統副都統保奏○癸巳授故奉國將軍鄂明子扎克達為奉恩將軍○乙未

上御太和門視朝文武陞轉各官謝恩○

上詣

實錄卷一百五十三

十九

皇太后宮問安○丁酉調鑲白旗蒙古副都統那泰為滿洲副都統漢軍副都統蘇昌為蒙古副都統○順天府進春○戊戌

上詣

皇太后宮問安○免直隸永清等五十三州縣衛本年分旱災額賦有差○陞前鋒參領朱車為鑲紅旗蒙古副都統○予故三等精奇尼哈番前鋒統領班達爾沙祭葬如例○已亥上以

孝莊文皇后忌辰將屆躬詣

暫安奉殿致祭命皇長子允禔皇三子允祉



皇四子■隨駕是日啓行駐蹕夏店○庚子

上駐蹕薊州○辛丑

上詣

暫安奉殿行禮奠酒舉哀隨詣

孝陵行禮奠酒舉哀次至

仁孝皇后

孝昭皇后

孝懿皇后陵奠酒舉哀畢是日駐蹕新城○癸卯

上詣

暫安奉殿率諸王大臣等讀文致祭是日回鑾駐蹕黃崖口○

實錄卷五十五

二

陞叅領馮國相為鑲白旗漢軍副都統○甲辰

上駐蹕薊州○以故三等精奇尼哈番班達爾沙子巴理密襲

職○乙巳

孝莊文皇后忌辰遣官祭

暫安奉殿○

上駐蹕夏店○丙午

上回宮詣

皇太后宮問安○已酉歲暮祫祭

太廟遣領侍衛內大臣公舅舅佟國維行禮○遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○遣官祭太歲之神○

上詣

皇太后宮問安○庚戌賜朝正外藩教漢阿祿科爾沁阿霸垓

土默特蘇尼特烏朱穆秦喀爾喀科爾沁翁牛特高齊忒扎

實錄卷五十五

三

魯特四子部落毛明安阿霸哈納巴林喀喇沁奈曼克西克

騰王貝勒貝子公台吉及內大臣大學士上三旗都統副都

統侍衛等宴○旌表八旗節婦滿洲英阿達妻趙氏等二十

七人蒙古馬新帶妻客氏等十五人漢軍門有祿妻王氏等

十二人各給銀建坊如例○是歲人丁戶口二千三十六萬

三千五百六十八田地山蕩畦地五百九十三萬二千六百

八十四頃二十七畝有奇徵銀二千七百三十七萬五千一

百六十四兩有奇米豆麥六百九十五萬二百八十一石有

奇草二百八萬三千四百六十五束茶十五萬七千四百五

十三引行鹽四百三十三萬五千八百六十引徵課銀二百

六十九萬七千七百五十一兩有奇鑄錢二萬八千九百九十二萬一千五十有奇

實錄卷一百五十三

三

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十三

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十四

康熙三十一年壬申春正月辛亥朔

上詣

堂子行禮還宮拜神畢率諸王貝勒貝子公內大臣大學士侍  
衛等詣

皇太后宮行禮停止朝賀筵宴 午刻日食 朝鮮國王李焞

遣陪臣閔黻等表賀冬至元旦

萬壽節及進歲貢禮物宴賚如例○壬子

上詣

實錄卷一百五十四

一

皇太后宮問安○諭大學士等去歲陝西西安等處年穀不收  
固有積貯以致閭閻困苦至極已遣官賑濟之矣直隸所轄  
地方素有儲蓄或州縣稍有不登即以所儲米穀從均贍給  
是以民生獲濟良多今年豐歉尚未可知陝西省府州縣見  
存米穀之數應行察明先時預備至各省府州縣皆令積貯  
米穀數千石則裨益黎庶者大矣可下各該督撫等令各府  
州縣積貯米穀其所積穀數當逐一繕冊報部 甲寅

御座前

上取性理展開指太極圖謂諸臣曰此所言皆一定之理無可

疑論者又指五聲八音八風圖曰古人謂十二律定而後被之八音則八音和奏之天地則八風和而諸福之物可致之祥無不畢至其言樂律所闢如此其大而十二律之所從出其義不可不知如律呂新書所言算數專用徑一圓三之法此法若合則所算皆合此法若舛則無所不舛矣朕觀徑一圓三之法用之必不能合蓋徑一尺則圓當三尺一寸四分一釐有奇若積累至於百丈所差至十四丈有奇等而上之其為舛錯可勝言耶因取方圓諸圖指示諸臣曰所言徑一圓三止可算六角之數若圓圓則必有奇零其理具在目前甚為明顯朕觀八線表中半徑勾股之法極其精微凡圓者可以方算開方之法即從此出逐一驗算無不脗合至黃鐘之管九寸空圓九分積八百一十分是為律本此舊說也其分寸若以尺言則古今尺制不同自朕觀之當以天地之度數為準至隔八相生之說聲音高下循環相生復還本音必須隔八此一定之理也隨命樂人取笛和瑟次第審音至第八聲仍還本音

上曰此非隔八相生之義耶以理推之固應如是

上又曰算數精密即河道閘口流水亦可算晝夜所流分數其法先量閘口闊狹計一杪所流幾何積至一晝夜則所流多寡可以數計矣又命取測日晷表以

御筆畫示曰此正午日影所至之處遂置乾清門正中令諸臣候視至午正日影與

御筆畫處恰合毫髮不與諸臣等奏曰臣等今日仰承

聖訓得聞所未聞見所未見不勝懽慶之至丁巳

世祖章皇帝忌辰遣官祭

孝陵戊午孟春享

太廟遣內大臣明珠行禮遣官祭太歲之神辛酉祈穀於

上帝遣領侍衛內大臣伯費揚古行禮壬戌

上詣

皇太后宮問安

上幸暢春園甲子以上元節賜外藩教漢科爾沁阿霸垓土

默特蘇尼特烏朱穆秦喀爾喀翁牛特嵩齊忒四子部落巴

林喀喇沁奈曼王貝勒貝子公及內大臣大學士上三旗都

統副都統尚書侍郎學士侍衛等宴乙丑上元節賜外藩

王貝勒貝子公及內大臣大學士上三旗都統副都統尚書

侍郎學士侍衛等宴己巳

上幸玉泉山庚午

上幸南苑行圍賜朝正外藩王貝勒貝子公台吉等銀幣鞍

馬有差乙亥

上回宮詣

皇太后宮問安（丙子）差往閱視河工戶部侍郎博際兵部侍郎李光地順天府府丞徐廷璽原任河道總督靳輔自河工還以治河事宜并圖進呈

上詳閱河圖諭曰黃河沙灘消長本無定所緩水處可以設立滾水壩至急流處則滾水壩斷不可設自朕觀之其至緊要者無過於險工將錢糧實用於險工之處使之堅固斯可永保無虞矣先是欽天監題本年正月初一日辛亥日食查占驗有大臣黜近臣有憂等語是日

上諭大學士等曰朕觀自古帝王於不肖大臣正法者頗多今設有貪汙之臣朕得其實亦必置之重典此皆係於人事凡

實錄卷一百五十四

四

占候當直書其占語今欽天監往往揣度時勢附會陳說如去年視有旱狀則用天時亢旱之占講張殊甚可傳欽天監監正諭之（丁丑）諭大學士等前者纂修明史諸臣所撰本紀列傳曾以數卷進呈朕詳晰披閱并命熊賜履校讐熊賜履寫奏呈於洪武宣德本紀訾議甚多朕思洪武係開基之主功德隆盛宣德乃守成賢辟雖運會不同事蹟攸殊然皆勵精著於一時謨烈垂諸奕世為君事業各克殫盡朕亦一代之主也銳意圖治朝夕罔懈綜理萬幾孳孳懋勉期登邅隆若將前代賢君搜求其間隙議論其是非朕不惟本無此德本無此才亦實無此意也朕自返厥躬於古之聖君既

不能逮何敢輕議前代之令主耶若表揚洪武宣德著為論贊朕尚可指示詞臣撰文稱美倘深求刻論非朕意所忍為也至開創時佐運文武諸臣各著勲績列傳之中若撰文臣事實優於武臣則議論失平難為信史纂修史書雖史臣職也適際朕時撰成明史苟稍有未協咎歸於朕矣明代實錄及紀載事績諸書皆當蒐羅藏棄異日明史告成之後新史與諸書俾得並觀以俟天下後世之公論焉前曾以此旨面諭徐元文爾等當知之（戊寅）

上諭

皇太后宮問安（陞廣西蒼梧道董延祚為福建按察使司按

實錄卷一百五十五

五

察使）（己卯）大計天下各官卓異官八十七員貪酷官五十一員不謹官七十九員罷軟官三十六員年老官一百一員有疾官八十九員不及官八十三員浮躁官五十二員陞賞處分如例諭修明史諸臣朕自沖齡即在宮中披覽經史明實錄曾閱數過見其間立言過當紀載失實者甚多纂修明史宜加詳酌如弘治中太后思念崇王欲令入朝此亦情理之常且所封之地初不甚遠而一時大臣及科道官員交章爭執以為不可至云人民騷擾國勢動搖時已有旨召崇王矣竟因人言而止書言以親九族九族既睦若藩王就封必不可召見則自古帝王所云睦族之道謂何又正德實錄

載午朝罷後於御道得匿名文簿一卷傳旨詰問百官皆跪於丹墀時仆而暴死者數人暈而病者尤衆夏月雖天時炎熱何至人多暴卒且行間將士每披堅執銳戮力於烈日之中未聞因暑而致死豈朝堂之上病暈若斯之甚耶所云盡信書不如無書此之謂矣至於宦官為害歷代有之明如王振劉瑾魏忠賢輩負罪尤甚崇禎之誅鋤閹黨極為善政但謂明之亡亡於太監則朕殊不以為然明末朋黨紛爭在廷諸臣置封疆社稷於度外惟以門戶勝負為念不待智者知其必亡乃以國祚之顛覆盡委罪於太監謂由中官用事之故烏得為篤論耶朕宮中所用太監止令供灑掃奔走之役

實錄卷一百五十四

七

上詣

皇太后宮問安以故一等阿思哈尼哈番鄂爾濟圖之子關報襲職

二月辛巳朔吏部議覆山東巡撫佛倫疏言原任運河同知陳良謨告河道總督王新命勒取庫銀王新命題參陳良謨懸欠河庫銀兩今據陳良謨供王新命共勒取庫銀六萬七

百兩請將王新命調赴省城質審應如所請其河道總督事務暫交漕運總督董訥署理

上諭大學士等曰朕聽政以來以三藩及河務漕運為三大事夙夜靡念曾書而懸之宮中柱上至今尚存倘河務不得其人一時漕運有誤關係非輕董訥為人性刻恐其債事靳輔熟練河務及其未甚老邁用之管理亦得舒數載之慮靳輔著為河道總督王新命著解任遣戶部尚書庫勒納禮部尚書熊賜履前往會同該撫察審四子部落多羅達爾漢卓禮克圖郡王丹巴彭蘇故遣官致祭予故太子太保武英殿大學士吳正治祭葬諡文僖○壬午春分朝

實錄卷一百五十四

七

日於東郊遣內大臣護軍統領伯四格行禮○癸未差往陝西賑濟戶部侍郎阿山內閣學士德珠自西安回入奏上曰聞被災之民有流於襄陽者今情狀何如阿山奏曰民未曾流至襄陽聞有流於河南者自賑濟以後人民安輯且因正月兩次下雪未致流散失所

上曰正月雖雪二三月雨水不調麥田亦未可望人民流於襄陽者甚多爾未知之耳尋諭大學士等曰阿山為人庸劣奉差之事不能盡心凡事啓奏多涉兩可前同郭世隆遣往福建審事以病推諉疏內竟未列名著解任以郎中品級隨旗行走命山西巡撫葉穆濟賑濟浮山等十三州縣飢民

甲申諭戶部朕勤求治理念切民依凡有往來人等必以年歲之豐歉雨澤之有無一切閭閻情形備悉諮訪前聞陝西西安鳳翔各屬饑荒已經特頒諭旨蠲免錢糧並發帑金專遣大臣賑濟仍撥給別省錢糧刻期運送務使均沾實惠人獲更生近又聞頒賑之前尚有貧民散入四方流離失業勢不能復還鄉井倘不由加撫綏必致轉於溝壑深為可憫凡流民所至地方應令該省督撫董率有司區畫賑濟令各得所其賑濟過人口數目著具冊題報有能酌量資給俾回原籍者一并造冊具奏至於湖廣襄陽等處距潼關相近且道路平坦易於轉輸襄陽等處所有積貯倉穀應令該督撫運至潼關陝西督撫接受轉運庶於散給兵餉賑濟飢民均有裨益應作何輓運爾部作速詳議以聞○乙酉

上詣

皇太后宮問安○戶部等衙門議覆四川陝西總督葛思泰請敕甘肅巡撫布喀將所撥寧夏倉糧一十五萬石催運以濟軍需查此項米石數多難運應減去五萬石令該督撫照時價折銀支給其一十萬石仍令布喀急為催運又甘肅巡撫布喀稱平涼慶陽鞏昌採買之米及寧夏撥運之米尚未運完又有寧莊運送賑濟米七萬石百姓轉運艱難有誤耕作請停止所運寧莊米石應如所奏另撥山西省庫銀十萬兩

解交西安散給飢民從之○戶部遵諭議覆襄陽鄖陽等處積貯米穀發一十五萬石選賢能官員給與腳價運至秦省潼關陝西復遴委賢能官員接受運至西安用此米穀之處仍行題明得旨鄖陽山路崎嶇難於輸輓應停止鄖陽運米將襄陽等處米穀運送一十萬石其運送事宜遣部院堂官一員前往管理此運米俱見給腳價如陝西流民在襄陽者有情願運米即給腳價令其運送既有濟轉輸亦可俾流民還籍隨命刑部侍郎傅臘塔前往管理○丙戌

上詣

皇太后宮問安○差往耕種達爾河等三處地方田畝都統瓦代等請訓旨

上曰耕種之事最為緊要爾等諸臣善為經營管理邊外寒冷當及時廣播麥種將田隴深耕勤謹耘耨時將草根無令土壓若草重發芽則有妨田禾耕種若太稠密田禾雖覺可觀所得實少若稀疏耕種所垂之穗既好而所得甚多凡有河之處可造船捕魚更須愛養耕夫和睦附近蒙古耕種畢時將夫役酌量留於彼處其餘夫空費糧米先即遣回今年倘或米穀多獲不可因後人難以為繼遂致收多報少米穀收穫多少雖有人力亦賴雨澤及時耳○科爾沁永安固倫長公主薨遣官致祭賜塋誌○土默特多羅貝勒索諾穆老

病乞休以其子羅卜臧襲替（轉工部右侍郎年遐齡為左侍郎陞左副都御史李元振為工部右侍郎封固山貝子章泰女為縣君授其婿精奇尼哈番鄂都為固山額駙宗人府題一等阿思哈尼哈番覺羅馬克蘇因病解任查此世職係蘇爾馬之祖業穆濟所立蘇爾馬軍機革職無親兄弟給與蘇爾馬族叔馬克蘇承襲今馬克蘇解退應令馬克蘇之弟森特赫襲替得旨著蘇爾馬之孫佛寧額承襲丁亥遣大學士張玉書祭

先師孔子

上巡幸畿甸命皇太子允初皇長子允禔皇三子允祉隨駕是

實錄卷一百五十四

十

日啟行駐蹕南哥驛（轉戶部右侍郎博際為左侍郎調工部左侍郎凱音布為戶部左侍郎管右侍郎事轉工部右侍郎圖爾宸為左侍郎以鑲黃旗漢軍副都統沙納海為工部右侍郎土默特固山貝子溱濟斯扎布有罪革退以其兄拉斯扎卜襲替戊子祭

大社

大稷遣領侍衛內大臣索額圖行禮

上駐蹕霸州苑家口己丑

上駐蹕雄縣十里鋪辛卯

孝康章皇后忌辰遣官祭

孝陵四川陝西總督葛思泰等疏言西鳳二府被災飢民

皇上發銀二十萬兩賑濟又遣部臣阿山等親行驗給飢民均沾實惠正月初旬屢降雨雪麥苗將槁復甦災黎俱已得所得旨督撫係封疆大臣凡地方事宜俱應預行籌畫早為區處方有裨益去年西安鳳翔等處旱災若先有積貯米穀早行奏明賑濟小民必不至於饑荒流散葛思泰等既不能先事預防積穀備賑又不即行奏明及朕聞知遣官察看被災情形特諭蠲免錢糧復頒發帑金遣官賑濟近聞飢民尚有流至襄陽等處者甚多葛思泰等不據實陳奏乃屢稱災黎俱已得甦不至失所過於粉飾具奏殊屬不合總督葛思泰

實錄卷一百五十四

十一

著革職留任巡撫薩弼圖著革職免江西永寧縣康熙三十年分水災額賦有差以工部尚書索諾和充經筵講官癸巳

上駐蹕苑家口南甲午

上駐蹕永清縣信安鎮陞通政使徐潮為都察院左副都御史乙未

史

上駐蹕武清縣王慶坨丙申

上駐蹕東安縣遣官祭

先農之神刑部議覆貴州巡撫衛既齊審已故總兵李超掉換銅元寶一案應於其家屬追賠得旨近見察審事情文



武官同一案則文職推諉於武職者甚多武職在行間則敵愾死綏在封疆則扞禦災患身後復以懸空之事令其家屬賠償貽累妻子深為可憫此案並未審有實據遂議向李超家屬追賠可乎所議非是俟回京日批發 丁酉

上駐蹕南苑 遣官祭

歷代帝王 戊戌

上回宮詣

皇太后宮問安 清明節遣官祭

永陵

福陵

實錄卷一百四

三

昭陵

暫安奉殿

孝陵

仁孝皇后

孝昭皇后

孝懿皇后陵 九卿議覆戶部左侍郎博際等疏言黃河南岸

自徐州以上毛城鋪起至海口止北岸自大谷山起至雲梯

關以下六套止所有減水閘壩見無衝損數年以來黃河並

未出岸海口迅流無阻其黃河南岸之楊橫莊烟墩馬邏北

岸之朱家莊安東縣便益門南東門以上六處險工有未經

設立月隄下埽單薄之處令河臣起造月隄培埽修築其餘險工亦令預為修防查河工關係重要今靳輔既任總河俱應交與靳輔照侍郎博際等所議作速修築堅固如內有照原議難行應急應緩修造之處亦令總河酌量修造從之 己亥

上詣

皇太后宮問安

上御經筵講畢賜大學士九卿詹事及講官等宴 庚子

上奉

皇太后幸暢春園 調戶部尚書庫勒納為吏部尚書轉理藩

實錄卷一百四

三

院右侍郎文達為左侍郎陞內閣學士滿丕為理藩院右侍

郎 辛丑

上詣

皇太后宮問安 壬寅以故二等阿思哈尼哈番色黑子色克

圖襲職 癸卯陞光祿寺卿羅秉倫為通政使司通政使

調甘肅巡撫布喀為陝西巡撫陞甘肅布政使吳赫為甘肅

巡撫 陞參領許廷臣為鑲黃旗漢軍副都統 甲辰予故

吏部尚書蘇赫祭葬如例 乙巳調兵部尚書馬齊為戶部

尚書工部尚書索諾和為兵部尚書陞吏部左侍郎管右侍

郎事沙穆哈為工部尚書內閣侍讀學士溫保為內閣學士

兼禮部侍郎○丙午

孝昭皇后忌辰遣官祭

陵

上詣

皇太后宮問安○戊申予福建陣亡駐防杭州驍騎校劉養元

致祭銀兩○予雅克薩城陣亡協領牛莫舜祭葬如例 旌

耒浙江節婦沈氏梁氏沈氏呂氏等各給銀建坊如例 已

酉直隸巡撫郭世隆疏言永平所屬及豐潤玉田等處去歲

薄收米價騰貴奉天地方屢登大有頗稱豐盈請敕山海關

監督許令肩挑畜馱者進關轉糶

實錄卷二百五十四

十四

上諭大學士等曰郭世隆所請之處著速議行朕亦聞永平玉

田等處米價騰貴作何裨益於民不可不詳為計畫各皇莊

及王等之莊屯所積米穀必多如無伊主之言則莊頭等何

敢轉糶通州以東以至山海關此間所有皇莊及王等之莊

屯米穀數目爾等與戶部會同內務府總管并辦理王府事

務官員等公同查明照時價轉糶此米布散則青黃不接之

際於生民必大有裨益 陞刑科給事中嚴泰為甘肅布政

使司布政使

三月庚戌朔吏部題三等阿思哈尼哈番噶納海故應與其

子噶錫泰承襲得旨此世職原係伊祖德爾格爾戚畹加恩

並非効力行間所給之官伊族兄吳丹亦係可襲之人且軍

中効力捐軀此職著令吳丹之子佐領兼施沙喇哈番八什

承襲 辛亥

上幸玉泉山 壬子調刑部左侍郎傅臘塔為吏部左侍郎管

右侍郎事 癸丑喀爾喀多羅郡王噶爾旦多羅貝勒卓特

巴扎魯特鎮國公毛奇塔特故各遣官致祭 乙卯

上回駐暢春園 通政使司通政使羅東倫丁母憂命回籍守

制 丙辰內大臣阿爾迪理藩院尚書班迪等奉差往邊外

蒙古地方五路設立驛站請訓旨

上曰凡遇邊外事務皆用蒙古馬匹不但甚累蒙古且恐事亦

實錄卷二百五十四

十五

有誤今設立驛站雖費用國帑日後於蒙古裨益良多亦不

致遲延誤事最為緊要特遣爾等料理務加詳慎必將確然

不易可垂永久之策籌畫而行 轉刑部右侍郎邁達為左

侍郎陞左副都御史尹泰為刑部右侍郎 戊午

上詣

皇太后宮問安○辛酉湖廣總督丁思孔疏言請將武昌等營

水師船於洞庭湖操演

上諭大學士等曰武昌營沙船甚少非全部之兵不必於洞庭

操演朕觀京口船隻最為緊要有事可以調發肆應當不時

操演且舟戰甚難彼此乘船對敵固難倘對敵之際條爾登

岸交鋒更難且險。即如澎湖大敗水賊克取臺灣事後人皆視以為易。當未得之先朕豈遽以為易且舉一事與爾等言之當吳逆變亂聞在岳州湖中官兵與賊交戰扎喇克圖查庫等九船官員齊於將軍鄂內前言我等九船進則齊進同心破賊斷不相離。不諳者聞其語遂以為誠能奮勇効力若倣此而行未有不誤事者。戰陣之道彼此爭先方為有益。若互相觀望特為各保軀命而已。此九船前進並未擒獲賊船一隻則其觀望可知矣。此事止可欺鄂內輩其可以欺朕乎。朕曾以扎喇克圖等齊進之事詰問鄂內等俯首不能答一言。朕洞悉扎喇克圖之為人解其前鋒統領令隨征厄魯特又不冒死克敵以贖前愆反棄衆先奔立心奮勇之人豈如是乎。○陞前鋒參領索柱巴圖魯為鑲黃旗漢軍副都統。壬戌。

上詣

皇太后宮問安。乙丑。

上諭大學士等。河工關係運道民生非經歷諳練之人難以責成。靳輔赴任之前朕召入內廷與之久語觀其奏對情狀大非昔比則其衰病可知著順天府府丞徐廷璽前往協理。先是。

上諭大學士等頃有喀爾喀杜楞逃來言彼向在巴圖爾額爾

克濟農之弟博躋所博躋經我兵掩殺徒步逃去至伊巴賴之地遇巴圖爾額爾克濟農屬下祁齊克台吉等博躋取彼馬匹及糧糗往覓其兄食盡困極自相竊奪見在額濟內地。方額濟內之地距嘉峪關四日程。目下西安大兵正往戍寧夏可令侍衛阿南達攜杜楞至寧夏會同將軍馬喇提督孫思克及總兵官等詳議確探聲息。如巴圖爾額爾克濟農所居果近嘉峪關二郎保格什見在彼地可即遣伊等前往招撫。如抗拒不降即選發滿洲綠旗兵剿除之。至是阿南達等疏報巴圖爾額爾克濟農降。

上諭議政大臣等曰覽侍衛阿南達等奏報巴圖爾額爾克濟農已降將遣其子來朝。但其人未可深信或時序不宜馬匹羸瘦不得已而降令其子來朝往返之際馬匹休息又復遁逃亦未可定。將軍馬喇提督孫思克既身與相近自擊情形宜乘此機會共商徙入內地之策斷不可縱使復逸。尋馬喇等疏至言巴圖爾額爾克濟農屬下人共二千二百餘口絕糧窮困已極揆其情形必不復逃。

上命理藩院遣官一員至寧夏令巴圖爾額爾克濟農少攜僕從乘驛而來沿途酌撥綠旗兵遞送俟朝見後遣歸後巴圖爾額爾克濟農率其子雲木春台吉來朝優眷遣之。○諭大學士等甘肅提督孫思克久歷邊地勞績素著著加太子少

保給一拜他喇布勒哈番○以正白旗滿洲都統郎談為領侍衛內大臣調正白旗蒙古都統伯阿席坦為滿洲都統

丙寅

上詣

皇太后宮問安 丁卯

萬壽節停止朝賀筵宴 遣官祭

福陵

昭陵

暫安奉殿

孝陵

實錄卷一百五十四

大

仁孝皇后

孝昭皇后

孝懿皇后陵○遣官祭真武東嶽城隍之神 辛未

上詣

皇太后宮問安○壬申理藩院題喀爾喀多羅郡王古祿西希

旗分無牲畜之人衆請給與米糧得旨貧窮蒙古給與米糧

特為施恩贍養聞奉差放米官員往往誘買轉賣惟思利已

不論蒙古之果能度日與否而稱為窮苦者甚多嗣後朕若

察得其實必將該管堂官一并置之重典 諭大學士等寧

夏米穀運至西安路遙遠其於供應軍需賑濟飢民恐有

遲誤寧夏米穀由黃河運至歸化城甚易地亦甚近朕意自

歸化城由保德州府谷縣一路可至潼關則為益甚速領侍

衛內大臣郎談前鋒統領碩鼐等曾令閱視黃河著碩鼐帶

護軍參領布代及戶部司官一員將河之寬窄水之平迅從

某處至某處可以行舟或不可行舟及盤剝程途明白閱視

爾等啓奏時可傳郎談碩鼐偕來○以正紅旗都統公彭春

庸劣懶惰解都統任隨旗行走○癸酉大學士等偕領侍衛

內大臣郎談前鋒統領碩鼐入見

上問郎談等自歸化城至保德州府谷縣水路程次畢諭碩鼐

曰自歸化城由水路過保德州府谷縣至潼關一直河道爾

實錄卷一百五十四

元

宜詳閱如可輸運大有益於飢民此河道前令司官馬柰往

視虛誑不實爾須將可運水道並盤剝路程細心詳察勿於

前人閱視之處有所瞻顧○宴衍聖公孔毓圻等於禮部

陞安慶副將郭文魁為河南南汝總兵官 甲戌予故原任

太子太傅文華殿大學士兼刑部尚書馮溥祭葬諡文敏

貴州威寧總兵官王朝恩丁父憂命回籍守制 乙亥

上詣

皇太后宮問安 丁丑先是

上諭直隸巡撫郭世隆渾河隄岸久未修築各處衝決河道漸

次北移永清霸州固安文安等處時被水災為民生之憂可

詳加察勘估計工程動正項錢糧修築不但民生永遠有益  
貧民藉此工值亦足以贍養家口至是郭世隆疏言固安永  
清之北係渾河故道向有舊隄長七十二里今河雖移徙而  
米各莊以北每至衝決固安永清所屬田地常罹水患此隄  
不可不修但此處地勢北高南下若舊隄一修北水無歸則  
隄北居民仍受其患查永清東北向有舊河一道長五十四  
里因年久淤塞亟宜深濬使其順流歸淀至固安西北及沙  
岱等處今為渾河正流綿亘四十餘里濱河悉屬沙礫即使  
成隄難免衝潰令地方官飭附近居民不時疏濬部覆如所  
請從之 戊寅

實錄卷一百五十四

五

上詣

皇太后宮問安○諭大學士等國家設立科道本欲令其陳奏  
得失近日不見一人條奏爾等可將科道等官傳集曉諭俾  
各抒所見陳奏勿隱○陞大理寺卿噶通薩為都察院左副  
都御史監察御史法爾哈為通政使司通政使 改雲南永  
北協為永北鎮設總兵官遊擊等員從雲南貴州總督范承  
勳請也 達賴喇嘛班禪胡土克圖遣使進貢賞賚如例

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十四

實錄卷一百五十四

五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五十五

康熙三十一年壬申夏四月庚辰朔享

太廟遣領侍衛內大臣公舅舅佟國維行禮○調正紅旗蒙古

都統希福為滿洲都統陞護軍統領護已為正紅旗蒙古都

統護軍叅領蘇丹為正紅旗護軍統領○甲申

上詣

皇太后宮問安○刑部等衙門議覆戶部尚書庫勒納禮部尚

書熊賜履等察審原任河道總督王新命借用庫銀一案應

將王新命照監守自盜律擬罪同知陳良謨侵盜庫銀應斬

實錄卷一百五十五

守備李又隆私借庫銀應絞濟寧道韓作棟私借庫銀已經

還補應革職減等枷號得旨王新命等俱從寬免罪著革職

○添設雲南大理府城守遊擊一員守備一員千總二員把

總四員從雲南貴州總督范承勳請也○予故原任廣東副

都統巴喀祭葬如例○乙酉陞護軍叅領覺羅安圖為正紅

旗蒙古副都統○陞大理寺少卿李錦為光祿寺卿○旌表

湖廣節婦歐陽氏給銀建坊如例○丙戌旌表山西汾陽縣

孝子魏之憲廬墓多年孝思彌篤給銀建坊如例○丁亥予

故二等精奇尼哈番德爾格爾祭葬如例○陞雲南劍川營

副將馬聲為雲南永北總兵官○己丑

上奉

皇太后自暢春園回宮○諭戶部西安鳳翔所屬州縣因遇饑

饉已全蠲一歲錢糧今動支戶部庫銀一百萬兩速送至陝

西以備散給軍需賑濟飢民庶於地方大有裨益流民亦可

復還原籍矣○旌表湖廣湘陰縣節婦黃氏給銀建坊如例

○辛卯陞貴州黔西副將謝英為貴州威寧總兵官○壬辰

上詣

皇太后宮問安○癸巳命兵部尚書索諾和內閣學士德珠往

查山西平陽府以西被災未報地方賑濟飢民○陞內閣侍

讀學士戴通為大理寺卿○甲午

實錄卷一百五十五

上巡視畿甸田禾駐蹕通州新各莊○乙未

上回宮○丙申

孝端文皇后忌辰遣官祭

昭陵○丁酉

上詣

皇太后宮問安○諭大學士等陝西西安鳳翔饑荒朕夙夜軫

念有從陝西往來人員必親加詢問頃四川巡撫噶爾圖來

京陛見問所過陝西州縣情形噶爾圖奏稱西鳳二府百姓

流亡者多朕聞之不勝惻然應作何賑濟使飢民即偏沾實

惠爾等與九卿詳加確議即日具奏尋大學士九卿等遵諭

議覆陝西賑濟事宜應再遣大臣會同該督撫不論撥解銀兩及運送米石於被災州縣酌量人民多寡作速通行給散事後奏銷務使均沾實惠隨命戶部尚書王鵬工部尚書沙穆哈前往賑濟 戊戌

上移駐瀛臺○諭大學士等喀爾喀王貝勒貝子公台吉等向未入覲京師初次來朝者仍依原賞喀爾喀之例給之若曾經入覲一次已蒙錫予而復來者皆準四十九旗例頒賚其下理藩院註冊著為定例遵行○陞太僕寺卿嚴曾槩為通政使司通政使○鄂爾多斯和碩親王古魯故遣官致祭 己亥

上詣

實錄卷一百五十五

三

皇太后宮問安○兵部督捕侍郎席珠以啓奏逃人事件失查原案奏對不明命降三級隨旗上朝○喀爾喀固山貝子達里因老疾乞休以其子阿海成本襲替 庚子陞廣西按察使唐宗堯為河南布政使司布政使○河道總督靳輔疏言請復建新莊閘以利運道又仲家閘之下陶家莊地方應添造一閘使兩閘行運互相洩瀉尤於黃中兩河大有裨益下部議行 辛丑

上御瀛臺內豐澤園澄懷堂召尚書庫勒納馬齊等入上曰頃爾等進來時曾見朕所種稻田耶諸臣奏曰曾見過稻

苗已長尺許矣此時如此茂盛實未有也

上曰朕初種稻時見有於六月時即成熟者命取收藏作種歷年播種亦皆至六月成熟故此時若此茂盛若尋常成熟之稻未有能如此茂盛者朕巡省南方時將江南香稻暨菱角帶來此處栽種北方地寒未能結實一遇霜降遂至不收南方雖有霜雪然地氣溫暖無損於田苗諺云清明霜殺雨雪言不足為害也總之南北地氣不同節候各異寒暑之遲早全視太陽之遠近所以赤道度數最宜詳審欲定南北之向惟以太陽正午所到之處為準即指南針亦不能無偏設有鐵器在旁則針為所引亦復不準此是一定之理今將一片石以繩懸之使之旋轉俟其既定刻記所向南北復動如前其所向南北仍復不變即此可思其理所以凡物皆有自然一定之理庫勒納奏曰聞黑龍江日長夜短雖晚日落不至甚暗不知何故

實錄卷一百五十五

四

上曰黑龍江極東北之地日出日入皆近東北方所以黑龍江夜短日落亦不甚暗又命看澄懷堂後院所栽脩竹前院並內所栽人參及各種花卉

上指示曰北方地寒風高無如此大竹此係朕親視栽植每年培養得法所以如許長大由此觀之天下無不可養成之物也○予故蒙古副都統羅滿色祭葬如例 壬寅



上詣

皇太后宮問安○乙巳調戶部左侍郎博際為兵部督捕左侍郎以戶部管右侍郎事凱音布為左侍郎陞內閣學士思格色為戶部右侍郎○議政王大臣等議覆寧古塔將軍佟寶等疏言圖什屯四十里外有白都訥地方係水陸通衢可以開墾田土應於此地修造木城一座席北卦爾察等所住鄉村於此處甚近俟城工完日由水路搬移查前議科爾沁之王台吉等將所屬席北卦爾察打虎兒等一萬四千四百五十八丁進獻內可以披甲當差者一萬一千八百五十餘名分於上三旗安置今議齊齊哈爾最為緊要形勝之地應於席北卦爾察打虎兒內揀選強壯者一千名令其披甲并附丁二千名同鎮守齊齊哈爾地方令副都統品級馬補代管轄兩翼各設一防守尉每旗各設防禦一員俱屬將軍薩布素統領管轄白都訥地方修造木城一座將席北卦爾察打虎兒內揀選強壯者二千名令其披甲即位所造新城令副都統巴爾達到彼教訓管轄兩翼各設一防守尉每旗各設防禦一員俱屬將軍佟寶統領管轄再將席北卦爾察內與烏喇相近居住者揀選三千名移住烏喇地方令一千名披甲二千名為附丁從之○旌表江南烈婦劉子明妻傅氏逼嫁不從自刎完節給銀建坊如例○丙午陞通政使法爾

哈為都察院左副都御史○戊申

上詣

皇太后宮問安○陞少詹事胡什塔為光祿寺卿大學士王熙以老病乞休慰留之○己酉偏沅巡撫王樑疏報丈量田地新增六萬六千一百六十餘頃增額賦銀二十六萬三千三百餘兩增漕南等米共九萬四千六百餘石下部知之五月庚戌朔諭戶部尚書馬齊侍郎凱音布聞山西平陽府等處雨澤需足年麥豐收其值必賤可遣賢能官員往彼購買預為積貯不惟有益於民異日倘有需用時得所資矣隨命兵部右侍郎王維珍前往料理○諭大學士等遣往察看黃河之前鋒統領碩額等差回奏稱察看黃河自寧夏至潼關皆可舟運但龍王站一處水勢陡絕湍激不可行船其間由陸路起剝十里過水陡之處即由船運便可直至潼關西安矣既如此應差工部賢能司官一員會同巡撫葉穆濟於船窩裏地方造可載百石之船二百艘至龍王站下停泊預為備用又聞歸化城北翁俄等山產有材木令遣八旗鐵匠木匠歸化城派出夫役伐木鋸板運至湖灘河朔津口造裝載一百石之船二百艘此造船所需鐵與油麻等物自該部發往船工既畢之後將大同米石出殺虎口轉運至湖灘河朔津渡泊船之處俟彼時再議造船之暇自大同至湖灘河

朔工所其轉運之路應察看詳明預行料理○陞陝西臨洮道姜登高為廣西按察使司按察使○辛亥諭大學士等朕思積貯米穀最為要務誠有所積貯雖遇災傷斷不致於飢餓但小民不知儲蓄每遇豐稔之年恣意糜費及逢儉歲遂底困窮今時屆麥秋可敕各該地方官勸諭百姓比戶量力共相樂輸委積儲備州縣官將捐助者姓名與米數註冊秋成之後亦倣此行焉其春時乏食者貸與之至秋照數收入以為積蓄每年於麥穀告登之後勸勉捐輸則數歲之間倉廩充裕即罹災祲民食自可不虞匱乏矣○陞大理寺卿戴通為內閣學士兼禮部侍郎○陞貴州布政使將寅為太僕寺卿○壬子

寺卿○壬子

仁孝皇后忌辰遣官祭

陵○甲寅

上詣

皇太后宮問安○乙卯夏至祭

地於

方澤遣領侍衛內大臣索額圖行禮○丁巳陞光祿寺卿胡什

塔為通政使司通政使○以故一等阿思哈尼哈番又一拖

沙喇哈番佟詒詢之子佟維藩襲職○戊午陞製造庫郎中

舒樹為山西布政使司布政使○以散秩大臣伯舒敏為正

白旗蒙古都統○予故河南南陽總兵官史孔筆祭葬如例○己未

上奉

皇太后幸暢春園○壬戌遣官祭

關聖帝君○癸亥

上詣

皇太后宮問安○丙寅陞右庶子沈圖為光祿寺卿○陝西巡撫布喀疏言輓運寧夏糧十萬石至今未到請敕下甘肅巡撫嚴催輓運得旨凡積貯米穀總以備應急需支散賑濟西安鳳翔所屬被災朕心深切焦勞因令將寧夏糧石作速運

青錄卷五十五

上

往布喀前任甘肅巡撫時以寧夏道遠輓運艱難欲將長武附近州縣之糧運去自行陳請隨即允行今經數月乃布喀詐欺愚民輒稱百姓困苦邀取虛名總不竭力公事遷延推諉竟未運到頃調伊為西安巡撫又向西安之民巧示情面請敕甘肅巡撫速行輓運以陷人於罪專事奸巧希圖名譽舛誤委任稽遲急務莫踰於此理應即置重典以為邀虛名誤公事者之戒但伊尚有未完之事著將布喀革職戴罪留任寧夏等處糧石令其俱親身照數速行運赴西安至散賑之事布喀停其管理總督葛思泰同差往大臣協力賑濟倘布喀仍不作速運到稍有耽延定置重典決不寬宥該部知

道○予故都察院左副都御史噶爾薩祭葬如例○戊辰上詣

皇太后宮問安○庚午陞內閣侍讀學士庸愛為大理寺卿○

發穀虎口倉積貯米石賑濟喀爾喀多羅郡王善巴屬下窮

丁○癸酉兵部議覆廣東廣西總督石琳等疏言黎人地方

丁田無多不便設立州縣總兵官吳啓爵所奏於黎人地方

築建城垣添設官兵之處應無庸議

上曰閩瓊州與圖周圖皆服內州縣而黎人居中如果此處應

取古人何為將周圍取之而在內彈丸之地反棄而不取乎

不入版圖必有深意創立州縣建築城垣有累百姓部議不

准良是○理藩院題喀爾喀既與四十九旗同列請照四十

九旗例給與印信將土謝圖汗車臣汗親王策安扎卜三部

落分為三路土謝圖汗為北路喀爾喀車臣汗為東路喀爾

喀親王策安扎卜為西路喀爾喀以土謝圖汗管北路中軍

事扎薩克墨爾根濟農郡王古祿西希管北路左翼中軍事

扎薩克信順郡王善巴管北路右翼中軍事崑都崙博碩克

圖郡王滾布管北路中左軍事扎薩克貝勒西第希里管北

路中右軍事扎薩克公蘇泰伊爾登管北路中前軍事扎薩

克公托鐸額爾德尼管北路中後軍事扎薩克公萬舒克管

北路左翼左軍事扎薩克台吉車木楚克納木扎爾管北路

右翼左軍事扎薩克台吉丹津額爾德尼管北路左翼右軍

事扎薩克台吉班珠爾多爾濟管北路右翼右軍事扎薩克

達爾漢台吉巴郎管北路左翼前軍事扎薩克台吉衛徵諾

顏阿玉璽管北路右翼前軍事扎薩克台吉李塔爾管北路

左翼後軍事扎薩克台吉薩木濟忒管北路右翼後軍事扎

薩克台吉墨爾根代青車陵管北路左翼下軍事扎薩克台

吉土巴管北路右翼下軍事以車臣汗管東路中軍事扎薩

克額爾德尼濟農郡王納木扎爾管東路左翼中軍事扎薩

克額爾克貝勒車布登管東路右翼中軍事扎薩克額爾德

尼濟農貝子布達扎卜管東路中左軍事扎薩克伊爾登濟

農貝子彭蘇克管東路中右軍事扎薩克達賴濟農貝子阿

南達管東路中前軍事扎薩克車臣濟農貝子車卜登管東

路中後軍事扎薩克伊爾登濟農貝子達里管東路中下軍

事管理洪郭爾帶青旗務公慙都管東路左翼前軍事扎薩

克額爾德尼阿海台吉車林達什管東路左翼後軍事扎薩

克額爾克台吉塞稜達什管東路右翼後軍事以親王策安

扎卜管西路中軍事扎薩克郡王色冷阿海管西路左翼左

軍事扎薩克額爾德尼濟農郡王彭楚克喇卜灘管西路右

翼左軍事扎薩克察罕巴爾諾顏貝子博貝管西路右翼右

軍事扎薩克台吉額爾德尼哈灘巴圖爾滾占管西路左翼

前軍事。扎薩克車臣台吉吳爾占管西路右翼前軍事。扎薩克墨爾根濟農台吉索諾木伊思扎卜管西路左翼後軍事。扎薩克台吉額爾德尼滾布管西路右翼後軍事。俱授之印信。得旨上謝圖汗車臣汗暫停給印。餘如議。○陞安徽按察使高起龍為四川布政使司布政使。○甲戌。

上詣

皇太后宮問安。○丁丑。以故二等精奇尼哈番德爾格爾弟奎庫。一等阿思哈尼哈番綽什喜子吳爾圖各襲職。○二等阿思哈尼哈番羅思翰年老解退。以其子佛葆襲替。

六月己卯朔。○庚辰。調江西巡撫宋肇為江蘇巡撫。陞浙江

實錄卷百五十五

上

布政使馬如龍為江西巡撫。○陞鑲黃旗漢軍副都統索柱巴圖魯為前鋒統領。○癸未。予故前鋒統領穆圖祭葬如例。○甲申。

上詣

皇太后宮問安。○議政王大臣等議。覆奏差安設口外五路驛站。內大臣阿爾迪疏言。喜峯口外設立十五站。古北口外六站。獨石口外六站。張家口外八站。殺虎口外十二站。每站安丁五十名。量給與馬匹牛羊。應如所請。其應給馬匹牛羊銀兩。差大臣前往料理。又該旗扎薩克除公事外。不許擅動驛站。如有應動車輛。令眾扎薩克供應。照例給價。得旨。此五路

設立驛站之事。先於科爾沁鄂爾多斯兩路安設。即賞給賈牲銀兩。以副朕軫卹蒙古人丁之意。其餘三路。俟來年會議安設。隨命科爾沁一路著刑部尚書圖納去。鄂爾多斯一路著內閣學士德珠去。○丙戌。陞浙江驛傳道王興禹為江南安徽按察使。司按察使。○前鋒參領殷滋。以創發故。予祭葬如陣亡例。○戊子。

上詣

皇太后宮問安。○己丑。先是遣內閣侍讀海三岱往西寧。還歸降之羅卜藏賽音台吉。暫駐寧夏邊外。至是理藩院題據海三岱報稱。羅卜藏賽音台吉已至寧夏邊外。應遣臣衙門官一員將羅卜藏賽音台吉及其子女屬裔。自寧夏驛送至鄂爾多斯。自鄂爾多斯驛送歸化城附近安插。到日再議授職。從之。○庚寅。陞江西按察使蔣毓英為浙江布政使司布政使。○癸巳。

上詣

皇太后宮問安。○乙未。理藩院題科爾沁進獻席北卦爾察打虎兒人丁。先經議政王大臣等議。每丁賞銀八十兩。如不願領八十兩者。每丁一年給銀三兩。今查可以披甲之丁共一萬一千八百五十餘名。此內五千七百十九丁。情願每年領銀三兩。其六千一百三十九丁。情願領銀八十兩。其老病未

及年歲者。按戶各賞銀八十兩。從之。○戊戌陞貴州貴西道張奇抱為江西按察使。司按察使。江西驛鹽道張四教為廣西按察使。司按察使。己亥三等阿思哈尼哈番楊壽因病解退。以其子夸喀襲替。辛丑先是貴州巡撫衛既齊疏報黎平府屬古州司高洞苗人金倒等隱匿罪犯拒捕殺死官吏。至是衛既齊疏言黎平府高洞苗拒捕殺官一案。臣誤信知府張激副將侯奇嵩之言。曾題明發兵。後報稱進剿殺苗一千一百餘人。亦經具題。今始訪聞。因張激侯奇嵩私遣兵目索財。是以苗人拒阻。致殺張激等。畏罪誣飾。實無拒捕之事。并無勦殺苗人之事。知府張激副將侯奇嵩覓在嚴審。臣

實錄卷五十五

五

前輕信具題。亦難辭咎。得旨。凡事詳慎方善。衛既齊於此事輕率發兵。又稱將苗人殺敗。伊自行具奏。今乃云盡屬虛妄。將人參劾。果何為耶。朕自臨御以來。未見有如此錯誤者。著遣部院堂官會同總督詳加察審。如果係知府副將之罪。即於彼處。以軍法從事。苗人果不遵約束。亦酌量即行勦滅。不必往返奏聞。即行完結。尋遣吏部尚書庫勒納內閣學士溫保前往察審。○癸卯甘肅提督孫思克疏言。台吉慙都既與巴圖爾額爾克濟農一同來降。又與羅卜藏額林臣祁齊克等潛謀逃亡。欲赴策妄阿喇布坦。所隨發官兵追勦至庫勒圖地方。慙都遠遁。殺其所屬四十餘人。擒獲男婦馬駝等。祁

齊克自稱台吉。同謀逃遁。應正法。陣擒四十三人。隨祁齊克之九人。亦應正法。其妻子應否解京。所獲馬駝器械等物。應否賞給。有功官役。請旨定奪。下部議。尋議覆。祁齊克宜正法。宥其從人。妻子解京。其駝馬等物。賞給有功將士。得旨。祁齊克著免死。其妻子亦免解京。令與巴圖爾額爾克濟農完聚。餘如議。○喀爾喀鎮國公托鐸額爾德尼故遣官致祭。乙巳陞護軍叅領鄂輝爾為鑲黃旗漢軍副都統。旌表山東節婦齊河縣郭氏。泰安縣張氏。蒲臺縣杜氏等各給銀建坊。如例。丙午

上詣

實錄卷五十五

五

皇太后宮問安。○以右春坊古庶子額席赫充日講起居注官。

○發殺虎口等倉積貯米石賑濟喀爾喀和碩達爾漢親王諾內等六旗窮丁。

秋七月戊申朔享

太廟。遣領侍衛內大臣公舅舅佟國維行禮。癸丑

上詣

皇太后宮問安。丁巳

孝懿皇后忌辰。遣官祭

陵。以翰林院侍讀張榕端侍講王思軾左諭德沈灝左中允

黃夢麟編修彭寧求陳元龍鄭崐瑛宋大業劉灝檢討顏光

數克日講起居注官○戊午旌表江西節婦新昌縣黃國建妻朱氏黃國璋妻朱氏各給銀建坊如例○己未陞左通政楊爾淑為太僕寺卿○壬戌中元節遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○

上詣

皇太后宮問安○貴州巡撫衛既齊疏言土官盧君寵擾害苗民肆行兇惡應請革職其長子盧大乾素行不法不便仍准承襲應以次子盧大晉承襲

上諭大學士等曰土司習俗各異必順其性而撫治之方為得宜衛既齊每拘泥書本辦事欲強土司屈從其性在山東居官時朕以其有守擢為巡撫今觀其於土司之事屢生齟齬此等人不可專任著俟庫勒納等查審完結一并察明議奏○先是伊拉古克三胡土克圖請自察罕托灰遷其父吳巴

實錄卷百五十五

十五

實錄卷百五十五

十六

付及弟子往居松阿喇布貝勒地方上不許令遷歸化城尋伊拉古克三以其父病故奏請安葬上遣理藩院筆帖式常壽偕往至是常壽報云伊拉古克三渡黃河岔逸去理藩院以聞

上命大學士等議奏隨議覆伊拉古克三曾授總領喇嘛班第之職養已深理宜効力圖報而竟逃走大干法紀或逃往達賴喇嘛處或逃往青海處俱未可定應檄甘肅提督孫思克詳探如遇彼即行拏解如抗拒即行剿殺青海諸台吉亦應遣文諭如從之○予故江蘇巡撫鄭端祭葬如例○旌表河南節婦封邱縣張氏陽武縣何氏孟縣張氏唐縣韓氏陳

留縣石氏汝州朱氏等各給銀建坊如例○甲子

上詣

皇太后宮問安○調江西南瑞總兵官張旺為南贛總兵官陞貴州鎮遠副將葉日芳為南瑞總兵官乙丑旌表湖南節婦胡氏給銀建坊如例丁卯

上奉

皇太后自暢春園回宮予故輔國公蘇嚴祭葬立碑如例四川陝西總督葛思泰疏言請將襄陽運送之米所餘六萬石散給兵丁月餉

上曰已有旨將布喀運送米石支給不得貽誤其所運米石限



九月內盡數運至西安如官兵月餉有誤輓運米石踰期即照前旨從重治罪○己巳喀爾喀格楚爾喀屯以屬裔來歸得旨格楚爾喀屯既有屬裔佐領著居口外應附何旗安插兵部議奏尋議覆上三旗遊牧地方察哈爾內鑲黃旗蒙古人丁缺額應將格楚爾喀屯及其兩孫并屬裔一佐領附於蒙古鑲黃旗下至格楚爾喀屯屬裔有佐領官阿南太駝騎校扎木巴拉另戶蒙古壯丁及家下蒙古壯丁編為一佐領此佐領內已有舊管官員不必再設其護軍校前鋒護軍驍騎俱照察哈爾例補充從之○庚午貴州提督陳奇以老病乞休慰留之○辛未

實錄卷五十五

七

上詣

皇太后宮問安○壬申

上御太和門視朝文武陞轉各官謝恩○癸酉理藩院以効力年久撥什庫等引見

上曰伊等於事務何如侍郎文達奏曰伊等未為司官不曾辦事

上曰辦事在人何論曾為司官即如文達雖身為侍郎事情尚多未曉阿喇尼原係侍衛從未辦事自授理藩院尚書時即能通曉事務甚是勤勞原任都統紀爾他布擢授兵部尚書觀其辦事亦優朕臨御多年伺事未厭部院諸臣欲寬人罪

却不務求允當而故擬過重直待駁回旋即改為無罪或注意在此而飾詞在彼實欲為此而佯托為彼此等處最多大凡經理事務須以持平為當此引見諸人曾為撥什庫差遣年久熟知蒙古性情與地方形勢俟理藩院主事缺出將伊等一并選擇具奏○甲戌

上詣

皇太后宮問安○予福建陣亡杭州佐領薩爾泰祭葬如例○

乙亥

上巡幸塞外命皇長子允禔皇三子允祉

皇四子 皇五子允祺皇七子允祐皇八子允禔隨駕是日

實錄卷五十五

八

啓行駐蹕湯山○丙子

上駐蹕懷柔縣羅山屯○丁丑

上駐蹕密雲縣南沈莊



大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十五

實錄卷一百五十五

九

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十六

康熙三十一年壬申八月戊寅朔祭

大社

大稷遣內大臣護軍統領伯四格行禮

上幸古北口總兵官蔡元署令石叵副將王廷彪以下官員射  
又令善舞長鎗藤牌者各試所能是日

上駐蹕古北口城內○調湖廣沅州總兵官姚儀為雲南鶴麗

總兵官鶴麗總兵官林葵為沅州總兵官○已卯

上駐蹕恩格木噶山○庚辰

上駐蹕富爾堅噶山○辛巳

平林卷一百五十六

上駐蹕博洛和屯○壬午

上駐蹕波瀾噶山○癸未

上駐蹕汗特木爾達巴漢地方○調兵部督捕右侍郎王士正

為戶部右侍郎○予故原任西安副都統年老解任張泰祭

葬如例○予烏爾會河陣亡護軍參領牛赫祭葬如例○乙

酉

上駐蹕雲特木爾達巴漢地方○丙戌

太宗文皇帝忌辰遣官祭

昭陵○

上駐蹕克勒畢喇色欽地方○丁亥遣大學士伊桑阿祭

先師孔子○

上駐蹕西爾哈和洛○戊子

太祖高皇帝忌辰遣官祭

偏陵

上駐蹕西爾哈岳羅圖和洛昂阿交界地方○己丑秋分夕

月於西郊遣工部尚書沙穆哈行禮○

上駐蹕克勒烏里雅蘇台○刑部尚書陳廷敬丁父憂命回籍

守制○兵部議覆黑龍江將軍薩布素疏言白都訥等處駐

劄兵丁四千八百有奇○編佐領八十八上三旗應如所請

從之○庚寅

上駐蹕愛里柏敦交界地方○辛卯

上駐蹕拜已哈地方○壬辰

上駐蹕烏喇岱和洛昂阿地方○陞內閣學士王國昌為兵部

督捕右侍郎○癸巳

上駐蹕烏喇岱地方○陞西固原提督何傳以衰老乞休乞之

○乙未

上駐蹕布爾哈蘇台○禮部議覆欽天監監正格枚疏言頒給

蒙古歷照民歷式樣全行繕譯將部落之名註於歷內應如

所請從之○予故江西南贛總兵官詹六奇祭葬如例○丁

酉

上駐蹕舒虎爾郭爾地方喀爾喀澤卜尊丹巴胡土克圖土

謝圖汗和碩親王策妄扎卜多羅貝勒西第希里台吉多爾

濟尼爾德尼阿海等來朝○戊戌以原任工部尚書翁叔元

為刑部尚書○三等阿思哈尼哈番喀代年老解任以其子

吳發襲替○四川巡撫噶爾圖疏言清查四川戶口田糧除

補足原額外計新增戶名十九萬七千九百六十五口田地

八萬八千五百頃有奇應徵地丁銀兩等項十二萬五千九

百九十二兩零米三千六百三十三石零下部知之○調江

寧將軍博齊為西安將軍○己亥

上駐蹕烏里雅蘇台地方○庚子

上駐蹕阿巴諾爾蘇巴爾漢地方○辛丑

上駐蹕永安拜和洛昂阿地方○陞太常寺少卿李應薦為內

閣學士兼禮部侍郎○以正黃旗漢軍副都統李林隆為陝

西固原提督陞西寧總兵官李芳述為貴州提督○壬寅

上駐蹕永安拜達巴漢地方○以故喀爾喀多羅貝勒卓特巴

子薩穆多爾濟襲爵○癸卯賜喀爾喀澤卜尊丹巴胡土克

圖土謝圖汗和碩親王策妄扎卜多羅貝勒西第希里台吉

多爾濟尼爾德尼阿海等宴及袍帽緞蟒弓矢等物有差

甲辰

上駐蹕齊老圖達巴漢和洛○乙巳

上駐蹕伊瑪圖和洛

九月丁未朔

上駐蹕噶拜和洛○戊申遣官祭

歷代帝王○遣官祭城隍之神○

上駐蹕瑚爾布勒畢喇之朱爾哈岱昂阿地方○甘肅提督孫

思克疏言員外郎馬迪奉旨差往策妄阿喇布塔臣標下守

備高天福千總馬惟惇及兵三十名護行今據肅州總兵官

潘育龍報稱嚮導蒙古巴素歸報馬迪等行至哈密地方距

城五六里許駐劄有噶爾丹屬下蒙古五百許殺馬迪等盡

實錄卷一百五十六

中

平

刦馬駝行李而去執原任郎中格什守備高天福千總馬惟

惇并受傷未受傷兵共二十四人到哈密城據報以聞○已

酉

上駐蹕巴顏和洛○庚戌

上駐蹕湯泉○以喀喇沁行圍効力賜王扎什以下至官兵等

袍帽緞蟒弓矢銀兩有差○辛亥

上駐蹕華子營○湖廣巡撫吳瑛丁母憂命回籍守制○壬子

上駐蹕夏克圖和洛昂阿地方○癸丑

上駐蹕鶴爾營○甲寅

上駐蹕興州○乙卯

上駐蹕恩格木噶山○丙辰

上駐蹕古北口城內○予故戶部侍郎徐誥武祭葬如例○調

山西大同總兵官王弼為陝西西寧總兵官○丁巳

上駐蹕密雲縣南沈莊○戊午

上駐蹕順義縣大東莊○陝西興漢總兵官程福亮以老病乞

休乞之○己未

上回宮詣

皇太后宮問安○辛酉先是撥每佐領鎗手護軍各一名前鋒

親軍護軍各十名漢軍火器營兵二十名給與修整器械銀

各十兩左翼撥都統阿席坦宗室公化善護軍統領噶爾瑪

實錄卷一百五十六

平

副都統噶爾璧碩岱那泰方額火器營撥都統鄂倫岱副都

統孫徵灝右翼撥都統巴渾德希福護軍統領蘇丹副都統

鄂克濟哈趙山達寧阿龍西庫火器營撥都統諾邁副都統

李林隆前鋒撥統領碩鼎在京預備至是

上諭大學士等曰今所備禁旅之內每佐領撥護軍七名其前

鋒則簡四百名火器營兵則分其半於十月杪遣赴大同飼

養馬匹預備徵調應遣大臣令兵部奏請曾隨朕之每佐領

護軍一人可除出之至京師簡軍預備其事宜亦令具議以

聞尋議覆遣往大同預備之兵除前所撥預備兵內隨駕從

圍每佐領下護軍一名外所餘護軍七名俱令遣往每旗遣

護軍參領五員。每參領下遣護軍校五員。前鋒四百名。每旗或前鋒參領或前鋒侍衛各一員。前鋒校各三員。火器營兵一千每翼或協領或參領各二員。每旗章京各三員。驍騎校各三員。俱令其於十月下旬啟行至京城。所備見剩前鋒四百名。每佐領下撥親軍各一名。鎗手護軍各一名。驍騎各二名。火器營兵一千名。於此再增撥每佐領下護軍各二名。預備此項增撥護軍人等。亦賞銀十兩。所備之礮及因礮所撥部統副部統官兵。色衣官兵。依舊預備。既增撥護軍各二名。則每旗應增撥護軍參領各一員。每參領下撥護軍校各二員。所備大臣內應何人往備大同。何人預備京城。伏候

實錄卷五十六

六

上裁得旨著都統希福阿席坦護軍統領蘇丹副都統噶爾璧鄂克濟哈趙山方額火器營都統諾邁副都統孫徵灝去以希福為將軍授之敕印以護軍統領噶爾瑪為前鋒統領與都統諾邁護軍統領蘇丹俱為參贊留前鋒統領碩鼎於京城預備餘如議。壬戌調河南河北總兵官康調元為山西大同總兵官。陞湖廣黃州副將萬永祺為陝西興漢總兵官。癸亥陞護軍統領終齊納為江寧將軍。甲子刑部題秋審福建四川廣西情實緩決可矜罪犯得旨朕閱今年秋審冊各省情實罪人甚少除可矜者照例減等發落其情實各犯今年停其正法。乙丑以原任江蘇布政使李國亮為河

南布政使司布政使。厄魯特噶爾丹遣使額爾德尼綽爾濟請安進貢。疏言前為澤卜尊丹巴土謝圖汗之故陳奏三言乞以一言為定。初意即欲仰請弘仁發回七旗於故土。因地方既遠糧騎不足且未歸之前凡所留輜重俱被策妄阿喇布坦劫去諸物無存。今惟恃達賴喇嘛之恩得以安集。謹將從前遲久之處遣使陳奏請敕裁斷。

上諭大學士等曰覽噶爾丹奏詞語恭順詢諸來使亦無他故。今備兵而無所用似乎徒勞。士卒然噶爾丹非可信之人。如不之備萬一有事又貽後悔。應備與否爾等與議。政諸臣會議具奏。大學士等議覆噶爾丹必無他故。然備兵不過畧費

實錄卷五十六

七

錢糧並無所勞苦也。倘有警報自此出兵不若自大同前行。甚便。此軍似仍預備大同為宜。至京城前所預備之兵亦仍應預備。後增撥護軍二名。應請停止。得旨遣備大同每佐領護軍七名內減去一名。留於京城預備。兵內後增撥護軍二名著停止。尋敕諭噶爾丹曰朕撫馭天下惟欲率土無事。各享安樂。原不欲興戎耀武。荼毒生民。今爾疏稱為澤卜尊丹巴土謝圖汗之故上奏三言乞以一言為定。并請發回七旗於故土。前者爾喀爾喀厄魯特交惡相攻。朕念兩國皆奉貢之邦不忍坐視。黎民塗炭遣使於達賴喇嘛令屢諭爾等和好。爾不奉朕旨及達賴喇嘛之言戕伐喀爾喀七旗喀爾喀

人等紛紛離散各無衣食皆來歸朕求生然爾違朕之旨朕並未嘗介意乃爾復以追喀爾喀為名深入我邊徼直至烏闌布通地方及發兵問故爾兵輒先攘臂我軍始與之戰爾大敗窘迫跪於威靈佛前誓不犯中華皇帝屬下喀爾喀以及眾民印文誓書見在見証濟隆胡土克圖亦在及伊拉古克三胡土克圖往爾處爾頂禮達賴喇嘛所遺佛像而設誓曰我斷不違旨矣前者深入邊境已自知罪佛在此而敢不以此罪為罪乎聖上即佛天也乞姑宥我所奏亦甚明朕以爾誓言為信遂止各路軍馬不使窮追此亦爾所灼知也喀爾喀人等窮迫來歸若不收養則皆至死地是以朕親出閱

實錄卷一百六

八

安插近邊給糧米畜產以活之今尚窮困未甦死亡殆盡或一旗僅存數人喀爾喀並無糧畜如遣回故土誰養之乎且喀爾喀人等肯明知飢餓而歸死乎前以養喀爾喀之故曾敕達賴喇嘛遣諭爾等達賴喇嘛亦甚喜奏言喀爾喀如此窮餓博施惠養與佛慈悲同行聞之不勝懼怖博碩克圖原當從濟隆之言而竟不從大君宜責而誅之乃俯憐衆生有如赤子復垂恩宥今以其疏發汝汝其視之若達賴喇嘛致書於爾或有異言爾亦陳奏可也前聞策妄阿喇布坦與汝不睦流言未審虛實是以遣學士達祐等往問策妄阿喇布坦請朕加恩故遣員外郎馬迪等往頒恩賜並不欲收爾事

實錄卷一百六

九

而遣之也所差馬迪既為爾之人所害敕書見在爾所爾視之自不謬也今嘉峪關報稱馬迪同行之人名巴素者歸告曰我等八月十一日行至哈密有厄魯特噶爾丹屬下圖克齊哈什哈哈爾海達額爾克兩人為首率兵五百許奪去員外郎馬迪等馬駝行李戕害員外郎馬迪及筆帖式撥什庫等其他兵卒亦有被掠者亦有留於哈密者從來爭戰之國無害往來使人之理烏闌布通地方爾雖與我軍拒戰然前所遣使人察罕古英寨桑阿卜都賴額爾克寨桑等十有餘人俱遣大臣送出境外歸還於爾果宜加害則爾目下所遣使人朕即不許歸何不可乎爾前所奏言朕許以澤卜尊丹巴土謝圖汗昇爾此小人欲自脫其身而有此言耳果有此言豈不早諭爾乎况執來降之人以昇讐人有是理乎前亦嘗以此諭爾矣今爾背棄誓言索我降人喀爾喀害我奉差策妄阿喇布坦之使臣馬迪諸人以此觀之是爾陽奉達賴喇嘛之言而陰違達賴喇嘛之命全棄誓言生事起釁彰彰明矣達賴喇嘛曾令爾犯我使臣索我降人乎况喀爾喀人等朕已養之數年方且俟其生聚將擇可居之地安插之爾如此背誓生事本應不納爾使逐之歸去但念爾使皆係小人必至困迫是以放入仍使貢獻市易今將爾背誓及爾人害我使臣之事詳開敕中發爾使沙哈孫巴克緯爾般齊

往其餘俟市易畢遣歸其即查明害我使臣之事及爾欲陳之言具疏與見在羈留之人一并奏遣朕當熟籌一策焉以上情事已頒諭達賴喇嘛矣 敕諭達賴喇嘛曰朕奉承天命統馭萬邦惟以人民得所為至願是以率土有邦無不恪恭來享亦無不遵朕詔旨爾喇嘛領奉佛法濟度眾生西域蒙古亦遵奉爾喇嘛之教朕與爾往來通便歷年已久是以喀爾喀厄魯特之事朕多與爾喇嘛聞之前聞厄魯特喀爾喀交惡相攻朕遣使於爾喇嘛欲與爾共息其事使相和好爾即欣然發使同往噶爾丹所不啻三四矣噶爾丹竟不遵我諭和之旨而破喀爾喀以致喀爾喀窮極流亡無衣無食

聖訓卷之二十一

十

旬旬歸朕以求活然朕猶未嘗因拒命之故有惡於噶爾丹其後噶爾丹復偕追喀爾喀為名深入我邊境直至烏闐布通及發兵問故噶爾丹兵又先犯我顏行我軍始與之戰噶爾丹大敗不得已跪誓於威靈佛前謂永不犯中華皇帝屬下喀爾喀以及眾民誓書印文在見証濟隆胡土克圖亦在迨伊拉古克三胡土克圖前往噶爾丹頂禮爾喇嘛所遺佛像而誓曰我斷不復違旨矣深入邊界實我之罪佛在此敢不自服乎聖上即佛天也乞終宥我所奏甚明朕以噶爾丹誓言為信止各路軍馬不使窮追此亦噶爾丹之所明知也以敕諭爾喇嘛不啻數次矣喀爾喀人等困極來歸若不

收養則皆死亡是以朕親出閱安插近邊給糧畜以養之今尚窮困未甦僅有七旗之名死亡殆盡有一旗僅存數人者喀爾喀並無騎無糧倘遣歸故土其誰養之豈有明知飢餓而肯就死地者乎前以賑濟喀爾喀之故曾敕諭爾喇嘛亦遣諭噶爾丹爾喇嘛亦其喜言喀爾喀如彼窮餓全而活之真佛之慈悲也聞之不勝懼忤博碩克圖原應從濟隆之言而竟不從大君宜責而誅之乃俯恤衆生有如赤子仍加恩宥爾奏尚在今噶爾丹違棄誓言云為澤卜尊丹巴土謝圖汗之故上奏三言乞以一言為定發回七旗於故土又前聞策妄阿喇布坦與噶爾丹不睦流傳之言未審虛實故遣學

實錄卷之五十五

十

士達祐等往問其故策妄阿喇布坦請朕加恩勿絕乃遣員外馬迪等往頒恩賜並非欲敗噶爾丹之事也今嘉峪關報有員外郎馬迪同行之人名巴素者歸告曰我等八月十一日至哈密有厄魯特噶爾丹屬下圖克齊哈什哈哈爾海達顏額爾克兩人為首率兵五百許奪員外郎馬迪之馬駝行李器械戕害員外郎馬迪及筆帖式撥什庫等其他人等亦有被擒者亦有留於哈密者從來戰爭之國無害往來使人之理烏闐布通地方噶爾丹雖與我軍拒戰而噶爾丹所遣使人察罕古英寨桑阿卜都賴額爾克寨桑等十有餘人俱命大臣送之出境遣歸噶爾丹且喀爾喀人等朕方欲養之



數年待其生聚擇可居之地安插之噶爾丹背棄誓言素  
我措置已畢之澤卜尊丹巴土謝圖汗又將遣往策妄阿喇  
布坦之使臣戕害以此觀之誠反覆奸頑之徒也已將彼罪  
備開教內付其貢使齎往令彼覆奏噶爾丹陽奉爾言肆為  
欺罔陰則不從爾言不奉爾教生事妄行彰彰明甚不知爾  
意以為何如今以噶爾丹生事朕秣馬厲兵治具已畢俟噶  
爾丹回奏以決一策特以此故命伊什格隆齎教諭爾知之  
丙寅

上詣

皇太后宮問安○陞湖廣督標中軍副將劉國興為河南河北

實錄卷一百五十六

總兵官○丁卯

上御經筵講畢賜大學士九卿詹事及講官等宴○厄魯特噶  
爾丹遣使進貢賞賚如例○以故四子部落多羅達爾漢卓  
禮克圖郡王丹巴彭蘇子散濟扎卜襲爵○己巳陞江寧管  
理織造桑額為湖廣巡撫○予故西安將軍馬喇祭葬諡敏  
恪○辛未

上御太和門視朝文武陞轉各官謝恩次進貢喀喇沁王等行  
禮○

上幸暢春園○諭吏部學士圖納哈人其庸劣著解學士任於  
旗下員缺補用○修理曲阜縣孔廟成○壬申

上幸玉泉山大閱八旗前鋒護軍驍騎及火器營兵皆擗甲胄  
分翼排列

上由右翼至左翼遍觀畢登玉泉山巔御黃幄官兵皆吹角放  
大礮三次騎兵步兵齊放鳥鎗進止整肅旗幟烜赫

上問喀喇沁杜楞郡王扎什等曰此兵排列進止何如扎什奏  
曰此兵威武非常洵無敵之兵也教漢台吉俺答阿玉錫奏  
曰此兵由

皇上指示訓練故陣勢勇銳隊伍熟嫻蒙古兵斷不能若是整  
齊

上諭管侍衛內大臣蘇爾達等曰朕先有諭旨爾等練習之兵

實錄卷一百五十六

若進退不齊隊伍不整必以軍法從事今觀八旗官兵排列  
放大礮鳥鎗進退之時隊伍整齊嫻熟朕心甚悅可傳諭八  
旗都統前鋒統領護軍統領副都統及官兵咸使知之○癸  
酉

孝慈高皇后忌辰遣官祭

福陵○

上幸玉泉山巔御黃幄八旗官兵照前排列放礮火鳥鎗以次  
進退畢總管鳥鎗騎兵內大臣公長泰等奏曰臣等所練習  
鳥鎗兵請近

御前試放



上曰爾等所練習者幾種長泰等奏曰有馬上放一鎗又射一箭者有趨進時放鎗不絕者有連環旋轉放鎗者有跪而放鎗者有仰臥而放鎗者

上令趨進時放鎗不絕與連環旋轉放鎗二種試放隨令八旗鳥鎗騎兵亦照此二種試放

上甚嘉焉 乙亥

上回宮 諭兵部正藍旗都統宗室拉克達才力不及著革退  
○以內大臣公長泰掌鑾儀衛事務

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十六

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十七

康熙三十一年壬申冬十月丙子朔享

太廟遣領侍衛內大臣公福善行禮 遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○頒康熙三十二年時憲曆○吏部議差往呼爾  
河種地鑲白旗蒙古都統班達爾沙侍郎舒恕等不將田地  
勤行耕種俱降一級罰俸一年

上曰班達爾沙其人甚輕浮不稱都統之任前曾差往鄂羅斯  
凡事好為穿鑿並無實濟將班達爾沙革去都統隨該管王  
行走餘依議○丁丑陞鑲紅旗滿洲副都統阿爾法為護軍  
統領○和碩端靜公主下嫁喀喇沁杜楞郡王札什之子噶  
爾臧筵宴如例○戊寅  
皇太后聖壽節

上率王以下文武大臣侍衛等詣

皇太后宮行禮遵

懿旨停止筵宴○喀爾喀土謝圖汗澤卜尊丹巴胡土克圖遣使進九白年貢宴賚如例○已卯

上詣

皇太后宮問安○諭戶部陝西西安等處連歲凶荒繼以疾疫因而閭閻失業游致流移朕軫恤民艱焦勞宵旰自去歲冬月以來頒發帑金蠲免正賦輓輸積穀轉運漕糧屢次特遣大臣察勘多方賑濟念國家所重惟在養民目今秦省雖薄有秋收但民間匱乏已極倘非格外加恩無以使積困盡甦

實錄卷一百五十七

轉徙盡復陝西巡撫所屬府州縣衛所康熙三十二年地丁銀米著通行免徵從前所有積欠亦著通行豁免務俾比屋均沾實惠小民咸慶更生用稱朕子愛元元撫育安全至意爾部即遵諭行○陝西巡撫布喀疏言寧夏等處米石臣親身催運查原撥糧十萬石內除寧糧虧短及原叅咸陽縣知縣顧梅糧道郝惟謬缺額外於九月十一日實運到西安糧九萬二千二百石得旨這欠缺米石責令布喀於限內運完如稍有遲悞即照前旨治罪屢旨甚明今既經限滿尚欠七千餘石乃支飾報完顯屬巧辭希圖卸罪著交部嚴察議奏尋議覆布喀革巡撫任交刑部差官解來京從重治罪得

旨布喀著革任遣一等侍衛佟昌嚴拏來京 庚辰

上謁

陵命皇太子允初皇長子允禔皇三子允祉

皇四子允禵隨駕是日啟行駐蹕夏店以吏部尚書李天馥

為武英殿大學士四川陝西總督葛思泰以病乞休允之

以刑部尚書翁叔元充經筵講官 辛巳

上駐蹕蘭州城內 壬午

上率王以下文武大臣侍衛等詣

暫安奉殿行禮奠酒舉哀詣

孝陵行禮奠酒舉哀至

實錄卷一百五十七

仁孝皇后

孝昭皇后

孝懿皇后陵奠酒舉哀是日

上駐蹕湯泉 甲申

孝懿皇后三期

上率王以下文武大臣侍衛等致祭是日

上駐蹕新城 諭刑部朕保乂黎元務崇寬大每於刑獄之事

輒厘矜恤之懷秦省西安等處地方比歲游饑閭閻困苦業

已多方賑恤屢諭蠲租茲更大沛仁恩特加赦宥凡陝西巡

撫所屬今年秋審情實緩決人犯內除十惡及軍機獲罪不

赦外其餘自諭到日通著免死照例減等發落有見在雷擬未經結案者亦如之嗣後務令革心向善副朕法外生金至意爾部即遵諭行 陞山東巡撫佛倫為四川陝西總督以宗室董額為正藍旗滿洲都統 乙酉

上駐蹕孫家莊 丙戌

上駐蹕黃崖口營城內 丁亥

上駐蹕薊州城內 陞鑲白旗滿洲副都統赫碩塞為蒙古都

統 戊子

上駐蹕三河縣城內 己丑

上駐蹕通州新各莊 庚寅

實錄卷一百五十七

四

上回宮詣

皇太后宮問安 辛卯諭大學士等近欲發兵備大同但天時寒冷若竟無事則士卒徒勞倘不加預備萬一有警又恐不及朕意欲暫停發兵至大同以見在京城喂養之馬駝驅往大同等處飼秣如有當行之事立發京城所備之兵星馳而往即乘所飼之馬似於事無誤著將每佐領所喂駝一頭馬六匹發往宣府大同喂養可傳諭遵行 壬辰調湖廣巡撫桑額為山東巡撫 陞江蘇按察使高承爵為福建布政使司布政使 癸巳轉禮部尚書熊賜履為吏部尚書 陞前鋒叅領握赫為鑲紅旗滿洲副都統 乙未轉戶部右侍

郎思格色為左侍郎陞都察院左副都御史法爾哈為戶部

右侍郎光祿寺卿沈圖為都察院左副都御史 以工部左

侍郎年遐齡為湖廣巡撫 先是以前備巴圖爾額爾克濟農

之故撥鄂爾多斯六旗吳喇忒三旗喀爾喀七旗共兵四千

五百名各在本地預備至是理藩院題今巴圖爾額爾克濟

農業已歸城應請罷所備兵得旨依議令紀爾他布等遠展

哨汛以探聲息 丁酉諭大學士等國家設立言官職司耳

目一切吏治民生得失利弊皆宜殫心畢慮據實直陳近見

滿漢科道官員建白甚少殊非朕責望言路之意嗣後應各

矢公忠研求時務凡可以裨益國家之事悉據所見奏聞以

實錄卷一百五十七

五

俟採擇但不得懷挾私情紛更定制剿襲陳言浮泛塞責其

有真知灼見應糾劾者即行奏奏亦不得暗受囑託代人報

復苛責細事希圖傾陷著傳諭遵行 喀爾喀車臣汗遣使

進九白年貢宴賚如例 戊戌

上詣

皇太后宮問安 陞翰林院掌院學士張英為禮部尚書 陞

鎮江府知府王燕為江蘇按察使司按察使 陞石叵副將

王廷彪為古北口總兵官 己亥諭理藩院科爾沁和碩純

僖公主已經設立護衛其巴林固倫淑慧公主和碩榮憲公

主喀喇沁和碩端靜公主亦應設立護衛爾部議奏尋議覆

和碩純僖公圭照貝勒品級設立護衛其長史著帶孔雀翎今巴林固倫公圭和碩榮憲公圭喀喇沁和碩端靜公圭亦照貝勒品級設立護衛其長史帶孔雀翎額駙吳爾滾噶爾臧亦設立三等護衛六員從之○予故原任京口將軍楊鳳翔三等精奇尼哈番劉邦柱各祭葬如例○庚子諭大學士等近日光祿寺奏停薦新芽茶凡有類於此者俱宜停止其各省慶賀表箋每次遣官齋送不惟驛遞煩擾而齋送官員亦屬勞苦朕思凡物解京均於地方百姓有累省一件如去一病今將表箋停其每次遣官齋送或應照朝鮮國一年一次彙送凡事皆由督撫具題或著督撫彙收一次彙送爾等

實錄卷一百五十七

六

會同該部議之尋議覆各省慶賀表箋應按期交與督撫彙齊齋送停止遣官從之轉工部右侍郎李元振為左侍郎陞左副都御史徐潮為工部右侍郎調鑲白旗蒙古副都統蘇昌為滿洲副都統陞叅領恩額參為鑲白旗蒙古副都統陞左庶子艾肅為光祿寺卿辛丑陞內閣侍讀學士安布祿為內閣學士兼禮部侍郎以喀爾喀故多羅郡王噶爾璽子敦祿布多爾濟襲爵壬寅

上幸南苑行圍理藩院遵旨議覆烏朱穆秦故協理扎薩克事務台吉鄔達喇希之妻同伊子古木布扎布告稱前不附噶爾丹之人俱蒙恩議敘鄔達喇希首告其事尚未邀恩懇

請議敘應將鄔達喇希贈為輔國公以其子古木布扎布襲爵從之○癸卯命禮部尚書張英仍兼翰林院掌院學士詹事府詹事甲辰調甘肅巡撫吳赫為陝西巡撫陞甘肅布政使嚴泰為甘肅巡撫刑部郎中杜喜為甘肅布政使司布政使○乙巳旌表安徽烈女孫志道女孫氏拒姦被戮保節完貞給銀建坊如何

十一月丙午朔陞通政使嚴曾渠為都察院左副都御史○予故原任四川陝西總督葛思泰祭一次○丁未

上詣

皇太后宮問安○以鄂爾多斯故和碩親王古魯子董羅布襲

實錄卷一百五十八

七

爵○己酉翁牛特多羅郡王畢禮滾達賴故遣官致祭○庚戌

上御太和門視朝文武陞轉各官謝恩○調鑲黃旗蒙古都統

阿靈阿為滿洲都統○陞一等侍衛阿南達為正黃旗蒙古

副都統○癸丑

上詣

皇太后宮問安○陞左僉都御史宮夢仁為通政使司通政使

○以原任鑾儀衛鑾儀使林興珠補原官○甲寅河道總督靳輔疏言淮揚鳳徐所屬州縣地方各有開河築隄建造閘壩栽柳之處俱係民間納糧田地理應豁免錢糧至於兩河

歸故中河告成之後其黃水涸出及河湖低窪之處淤成膏腴熟地豪強占種而不納糧者亦復不少應查出陞科請敕下江南督撫就近清查得旨遣事若遣地方官丈量踏勘悉借端擾民著遣部院堂官前往會同該督撫將應豁免應陞科錢糧確查定議具奏尋命吏部尚書熊賜履前往確查○已未冬至祀

天於

園丘

上親詣行禮○遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○停止次日朝賀○庚申

上詣

皇太后宮問安○壬戌封輔國公瓦山女為鄉君授其壻馬雲翥為輔國公壻秩四品○甲子河道總督靳輔引病乞休允之○乙丑工部議覆河道總督靳輔疏言高家堰加築小隄

實錄卷一百五十七

中河挑濬河溝增高遠隄添造閘口俱應如所請

上曰中河甚為有益靳輔欲挑濬河溝加高遠隄又塞張莊運口修駱馬湖東西石閘水漲之時開之使流水落之時塞之使聚其言猶可至於高家堰隄外欲築一小隄此豈可乎且承受洪澤湖水全惟高家堰是賴將高家堰之隄築之使其益堅則可其外築一小隄有何益哉倘高家堰之隄衝決則一小隄能禦之乎此皆靳輔執其向時意見而行之也○丙寅諭大學士等前者諸臣皆議置靳輔於重典朕獨立意寬免由今觀靳輔修治河工不為無益但今年老有病已就昏耄未可定耳高家堰障淮敵黃最為緊要作何加修以期永遠堅固著大學士張玉書刑部尚書圖納前往察視○甘肅提督孫思克軍政自陳得旨孫思克簡任提督克副委任著加授將軍彈壓地方以示獎勵勞臣之意尋授振武將軍○丁卯噶爾丹之使厄爾德尼綽爾濟色卜登額爾克白克等挾噶爾丹書劄散布內屬蒙古

上聞之賜噶爾丹敕令來使齎歸敕曰朕統御萬邦惟願天下之民共享昇平無生事無作亂兼容并包誠心撫恤殘刻之事素所不為諸國遠人誠能恭順職貢不改其常朕益加愛惜施恩不絕若陽奉陰違狡詐百出者朕未嘗不知亦不寬竟每從寬教誡冀其改悔自新是以中外之人無不歸誠向

化雖極隱密之事必來奏聞無敢欺蔽今爾所遣奉貢使人持爾書來與朕屬下蒙古告以爾語皆以奏聞於朕朕盡知之矣此等謫詐止自欺取禍而已何能欺人且朕屬下蒙古皆世受泰養厚恩豈能負朕而墮汝計乎據爾書云為宗喀巴之法而行朕不得不將護持宗喀巴之法為之宣布本朝興龍之際延召達賴喇嘛至京此天下之所共知也康熙八年達賴喇嘛疏稱前蒙皇上惠賜臣敕印仗一統大君之仁慈平治土伯特國三部落而紅帽帕克木取兩族之人而去請將伊等還歸於噶爾馬朕即降旨特遣官取紅帽帕克木發還康熙十三年達賴喇嘛疏稱巴忒馬三寶瓦巴克什之

平集卷一百七十五

十

經請敕諭中國僧俗勿得誦習朕即降敕禁止僧俗槩不許誦習康熙十八年達賴喇嘛疏稱謹將平治漢人土伯特蒙古之要畧奏請睿覽其奏尚在蓋達賴喇嘛深知朕護持宗喀巴之法故凡事直陳無隱歷年通使不絕爾喀爾喀尼魯特之人陽則誑言為宗喀巴之法達賴喇嘛之教而行陰則違之率土皆知爾前者敗於烏闡布通之時汝屬下人皆驚懼而謗爾俱請降朕朕素無離間害人之意是以准爾等書訓爾等以依常安處勿懷異心此伊拉古克三胡土克圖所深知也至於策妄阿喇布坦雖聞與爾不協朕但恤其貧苦加之以恩而已未嘗使與爾交惡也此皆至實之情朕思爾

斷無此等謫詐之事必爾下人及爾使人欺爾而離間之耳然若輩如此行事豈使爾善全之意乎爾當熟計之朕凡有所聞見即與宣說向無隱諱特開始末降敕諭爾知之以散秩大臣覺羅席特庫為鑲黃旗蒙古都統諭禮部朕因陝西西安鳳翔之民困於饑荒時時軫念來歲元旦行禮筵宴似宜停止著問九卿尋九卿覆奏天下之大一隅偶爾被災自古所不能無去歲西鳳二府荒歉屢經賑濟今歲又稍有秋元旦行禮筵宴仍請舉行得旨照常行禮停止筵宴戊辰先是噶爾丹於烏闡布通之地為我軍所敗內大臣蘇爾達與土謝圖親王沙津達爾漢親王班第等共商遣阿喇善屬下人鄂漆爾等令止噶爾丹於是眾皆疑科爾沁已附噶爾丹將軍薩布素聞郭爾羅斯與爾圖納蘇圖台吉之言亦疑科爾沁密奏其有異心

實錄卷一百七十五

十一

上以科爾沁臣服已久必無此意全不疑之至是烏喇佐領必立克圖往厄魯特館中遇噶爾丹使人濟爾哈郎格隆語之曰吾乃科爾沁台吉濟爾哈郎格隆問曰爾識土謝圖王否必立克圖曰我係土謝圖王親信之人濟爾哈郎格隆遂延必立克圖入其廬飲之酒使誓於佛前出書一封授之令致土謝圖王贈必立克圖貂皮一張猩猩氈一件必立克圖以其事密首



上雷中尋遣內閣學士西拉召科爾沁土謝圖親王沙津來京  
考察天下軍政卓異官三十二員貪酷官十四員不謹官  
四十二員罷軟官四十一員年老官九十員有疾官五十一  
員不及官八十七員浮躁官三十六員陞賞處分如例

上諭大學士等曰朕思所參才力不及官員仍補授部院衙門  
殊未允當每有被參復用者仍復被參既因才力不及議處  
若仍補授錄用有何裨益著照伊等所降之級隨旗行走則  
旗下官員增多且伊等曾在部院辦事自能稱旗下之任至  
因公誣誤降級之員復用若仍算前俸則不久即陞應俟復  
用三年後無過稱職姑准算前俸則官員方知鼓勵有過者  
得少分別矣可將此旨明諭九卿○九卿等議覆河道總督  
靳輔疏言於黃河兩岸栽柳種草設立涵洞應如所請其挑  
濬河溝引水淤墊隄下積水之處又引水淤墊邳州低窪之  
處應令該督詳議具奏

上曰引黃冰內灌使淤平窪地雖云有益朕斷不肯輕信黃河  
水勢危險條而彼處深此處淺條而船被阻淤水勢變遷無  
定不獨黃河為然即如渾河之水數十年前其流尚在南苑  
中未幾漸徙而南在縣村落間猶去南苑未遠今則分為二  
支一支出新安一支出霸州其流愈遠矣朕曾問土人云元  
朝欲引運河之水通京師而未果想亦有所難行耳黃河水

實錄卷一百五十七

十一

勢湍迅欲引黃內灌使淤平窪地事屬危險難保萬全不准  
行○已已以扎魯特故鎮國公毛奇塔特子巴圖襲爵禮  
部左侍郎王颺昌以病乞休允之 庚午

上詣

皇太后宮問安 吏部等衙門議覆河道總督靳輔疏言河官  
之賢否得失惟總河知之最確嗣後大計如係管理河務兼  
有錢糧之責者總河督撫各行考核其專係河官令總河自  
行考核具題應如所請從之 辛未

上幸暢春園 癸酉以翰林院侍讀學士莫里普充日講起居  
注官

實錄卷一百五十七

十二

十二月乙亥朔○戊寅轉禮部右侍郎王澤弘為左侍郎以

原任吏部右侍郎王封濂為禮部右侍郎 壬午

上幸南苑行圍 陞太常寺卿唐朝彝為宗人府府丞 以左

都御史于成龍為河道總督 以禮部右侍郎王封濂充經

筵講官 甲申免江南鹽城興化二縣本年分旱災額賦有

差 戊子

上回宮詣

皇太后宮問安 己丑差往貴州審事吏部尚書庫勒納等回  
奉貴州巡撫衛既齊身為封疆大臣未經查出苗子實情即  
行用兵後又妄報陣殺多人應革職



上諭大學士等曰衛既齊不將苗子實情詳查明白輕信屬員報稱苗人反叛遽發兵往剿及兵到彼地寨內並無一人乃搜獲苗人逃避山間者僅十四人衛既齊竟奏稱與苗子對敵陣殺一千一百一十八人欺誑如此邊地全賴督撫提鎮彈壓今巡撫以軍事如此誑奏豈不啟釁邊疆衛既齊以忠誠道學自任今言行全不相符欺朕之人若不正法何以治天下衛既齊應以軍法從事庫勒納等曾問彼為何發兵衛既齊云我一聞殺令驚惶之至遂爾發兵忠誠道學之人如此輕舉妄動耶以此觀之衛既齊不過自為粉飾所行皆虛全無誠實爾等可將此旨傳諭九卿集議尋九卿議覆衛既齊

實錄卷一百五十七

古

齊啟釁邊疆深負

皇上委任至意應立斬得旨衛既齊當封疆重任乃於地方生事誑奏欺朕深為可惡著差刑部司官一員提拏到日再奏

辛卯

上詣

皇太后宮問安 陞漕運總督董訥為都察院左都御史 壬辰以原任四川布政使李輝祖為太常寺卿 陞鑲紅旗漢軍副都統郎化麟為漢軍都統 甲午調河南巡撫閻興邦為貴州巡撫 乙未調浙江福建總督興永朝為漕運總督 陞廣東巡撫朱弘祚為浙江福建總督 丙申以原任禮部

右侍郎顧汧為河南巡撫調安徽巡撫江有良為廣東巡撫免江南六合等十州縣本年分旱災額賦有差 予故河道總督靳輔祭葬諡文襄 予故原任禮部侍郎富鴻基祭葬如例 一等伯拔特瑪老病解退以其子額參襲替三等阿思哈尼哈番李仁龍患病解退以其子李桂蘭襲替三等阿思哈尼哈番多爾濟老病解退以其子碩色襲替 旌表江南烈婦周世昂妻趙氏逼姦不從受傷殞命給銀建坊如例 己亥

孝莊文皇后忌辰遣官祭

暫安奉殿 庚子

實錄卷一百五十七

十五

上詣

皇太后宮問安 辛丑諭大學士等聞西安米價仍貴流民還原籍者稀少朕為陝西地方民生常繫於懷必如何措施然後於民有濟蓋孽孽不置也先是聞自湖廣襄陽至陝西商州水路可達已遣郎中蘇赫納往視今問之內大臣索額圖乃亦乘船自商州至襄陽若西安米價仍貴則流民不能還籍商州到襄陽既有水路應將目下運到襄陽米二十萬石自襄陽水路運至商州自商州運至西安糶賣則飢民流民均得蘇息矣可遣內閣學士德珠會同總督丁思孔總兵官王化行等率河道劉燾將轉運米石及招還流民之事妥之

專理其自襄陽運至西安之米照湖廣價值止加算所運腳費與之貿易則米價即平於百姓大有裨益而流移之民亦獲速還故土所得米值齎至湖廣復買米糧亦依此法轉輸平糶當俟陝西流民悉還本籍米價既賤之後方行停止爾等會同速議以聞 壬寅先是

上以西北有警命戶部尚書馬齊兵部尚書索諾和往勘歸化城駐兵之地至是馬齊等疏言臣等查勘右衛與歸化城相近應移右衛人民出城外令住郭內城中蓋造房屋可以駐兵殺虎口外迤北五十里東西五十里內所有熟荒地畝近者給兵遠者給大臣官員歸化城小地荒田鹵難以耕種歸

實錄卷一百五十七

十六

化城西南三十餘里外有渾津村村南十里外有渾津巴爾哈孫舊城基址城北有大土爾根河週圍三里餘宜展此基址一面三里築土為城造房駐劄官兵城之四圍所有田地可取以給官兵耕種命議政王大臣等議尋議覆歸化城之渾津巴爾哈孫無城右衛見有城且近歸化城大宜駐兵其往駐時應撥每佐領護軍三名驍騎三名漢軍火器營兵一千駐劄統以將軍一員每翼護軍統領各一員滿洲副都統各一員漢軍副都統各一員每旗協領各一員佐領各七員防禦各七員驍騎校各七員其協領以實授參領遣往護軍每旗以實授護軍參領各四員護軍校各七員漢軍一千名

以每翼協領各一員每旗佐領各二員防禦各二員驍騎校各二員令其約束每佐領撥什庫六名護軍撥什庫驍騎仍照京城例給以錢糧駐兵既發之後按缺補足其喀爾喀阿爾薩蘭戴青等人丁三丁合披一甲可得甲九百六十五名以五十名為一佐領編成十九佐領嵩齊武郡王達爾瑪吉里迪旗下人丁亦以三丁合披一甲可得甲一百五十四名編為三佐領所餘人丁作為附丁選擇材幹善於約束之台吉頭目授以佐領驍騎校附歸化城土默特兩旗在歸化城四圍遊牧再發綠旗馬兵一千步軍二千駐劄設總兵官一員標下立為五營如有事當行此新設總兵官及宣大兩鎮標下官兵俱聽將軍調遣將軍以下大小官員口糧及馬之草料一槩停給以口外五十里以內荒地給之自力開墾右衛城內所有民房俱給價購買安插官兵上曰城內居民若令移於郭外必致困苦可勿令遷移照常居住若造官兵房屋城內難容即於城外建造此滿兵有事即行不必授田大臣官員宜給與口糧馬給草料務使勢力有餘至於綠旗官兵遇調用則宣大綠旗兵在近調發甚便停其添設其缺以滿洲官兵增駐所發護軍之缺應即補充驍騎火器營兵之缺應行停止官兵住房宜撥往駐大臣官員監修著再議尋議覆增設綠旗官兵應停止每佐領增發護

實錄卷一百五十七

十七

軍三名驍騎一名每佐領兵共十名其護軍每旗發實授護軍參領七員內以一員為夸蘭太設護軍校十四員以領之駐兵既撥之後其護軍之缺補足驍騎火器營兵之缺不必補足城內居民不必遷移官兵住房撥工部堂官一員駐防大臣內每翼一員及每旗護軍參領等各一員監造官員口糧照例給發馬匹草料夏秋停給令其牧放其口糧草料一半折給一半本色將大同府應徵地丁銀改徵本色以給官兵得旨每佐領減去護軍一名驍騎一名餘如議隨授都統希福為建威將軍噶爾瑪為左翼護軍統領四格為右翼護軍統領方額為左翼副都統馬錫為右翼副都統張素義為

實錄卷一百五十七

大

左翼漢軍副都統吳興祚為右翼漢軍副都統令駐右衛

以覺色為鑾儀衛鑾儀使 癸卯歲暮祫祭

太廟遣領侍衛內大臣伯費揚古行禮 遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵遣官祭太歲之神 順天府進春 甲辰科爾沁土謝圖親王沙津奉命來京

上召入諭曰昔烏蘭布通之役內大臣蘇爾達及爾等共商遣爾屬下人鄂漆爾等於噶爾丹眾皆疑爾等已附噶爾丹矣將軍薩布素等亦曾密奏以為爾等有異心今又有烏喇佐領必立克圖以噶爾丹遺爾之書密首朕思爾科爾沁自

太祖

太宗時歸附世世職貢相為姻親歷有年所爾必無此意朕畧無所疑沙津奏曰臣世受隆恩斷無依附噶爾丹之理本欲引誘噶爾丹曾遣鄂漆爾是實

實錄卷一百五十二

七

上密諭曰爾仍遣鄂漆爾誘噶爾丹至近地可也○賜朝正外藩烏朱穆秦喀爾喀科爾沁扎魯特王默特杜爾伯特鄂爾多斯興喇忒毛明安郭爾羅斯蘇尼特阿祿科爾沁四子部落翁牛特嵩齊忒奈曼巴林歸化城喀喇沁阿霸哈納款漢克西克騰阿霸垓親王郡王貝勒貝子公額駙台吉等及內大臣大學士上三旗都統副都統侍衛等宴 旌表八旗節婦滿洲南達禮妻富察氏等四十八人蒙古侯尚妻哈氏等五人漢軍江允中妻衛氏等七人各給銀建坊如例 是歲人丁戶口二千三十六萬五千七百八十三田地山蕩畦地五百九十七萬三千四百五十六頃三十四畝有奇徵銀二

千七百三十八萬五千六百三十一兩有奇。米豆麥六百九十五萬八千三百六十四石有奇。草二百八萬三千四百六十五束。茶十五萬七千四百五十三引。行鹽四百三十三萬三千四百三十引。徵課銀二百六十九萬七千一百六十三兩有奇。鑄錢二萬八千九百九十二萬五千四百有奇。

實錄卷一百五十七

十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五十八

康熙三十二年癸酉春正月乙巳朔

上詣

堂子行禮還宮拜神畢率諸王貝勒貝子公內大臣大學士侍衛等詣

皇太后宮行禮御太和門王以下文武各官外藩王及使臣上表朝賀停止筵宴。朝鮮國王李煥遣陪臣李侶等表賀冬至元旦

萬壽節及進歲貢禮物宴賚如例。丙午

實錄卷一百五十八

上詣

皇太后宮問安。諭大學士等聞厄魯特噶爾丹無所得食困迫已極仰食於其所屬番人而有來哈密之信哈密於我邊塞相去最近可發寧夏駐防滿兵令往甘肅提督孫思克處為之預備孫思克所轄官兵亦當令其整頓預備此外本省附近地方官兵有宜調發預備者令孫思克一面調發一面奏聞又貝子察汗巴爾之弟班第自青海來時由大草灘於邊內行來遇伊拉古克三胡土克圖亦由邊內而往如此潛行來往邊塞官員何以不復稽察耶此亦當移檄孫思克邊塞官員令其嚴加戒飭爾等會同兵部密議以聞。己酉

上奉

皇太后幸暢春園 庚戌孟春享

太廟遣領侍衛內大臣公福善行禮 遣官祭太歲之神 辛

亥

世祖章皇帝忌辰遣官祭

孝陵 癸丑

上詣

皇太后宮問安 甲寅戶部議覆四川陝西總督佛倫疏言西

鳳二府歲遇荒歉額銷鹽引暫減一半俟年豐照額行銷應

如所請從之 乙卯吏部議覆四川陝西總督佛倫疏言西

實錄卷一百五十八

二

安原設有督糧驛傳二道各理其事嗣將驛道裁去歸併糧

道統理未免顧此失彼請仍添驛道一員專管驛務應如所

請從之 丙辰

上詣

皇太后宮問安 戊午以上元節賜外藩烏朱穆秦喀爾喀科

爾沁扎魯特土默特杜爾伯特鄂爾多斯吳喇忒毛明安郭

爾羅斯蘇尼特阿祿科爾沁翁牛特高齊忒阿霸哈納奈曼

巴林敖漢克西克騰阿霸垓諸王貝勒貝子公台吉等及內

大臣大學士上三旗都統副都統侍衛等宴 己未

上詣

皇太后宮問安 上元節賜外藩諸王貝勒貝子公台吉等及

內大臣大學士上三旗都統副都統侍衛等宴 甲子差閱

河工大學士張玉書刑部尚書圖納還以河圖進呈

上問曰高家堰水勢如何另築小隄果有益否張玉書等奏曰

去歲黃河水大淮水被逼故洪澤湖水較高於往年今欲築

小隄之處距高家堰甚近若過洪澤湖水漲高家堰大隄衝

決小隄斷難保護前諭旨所云小隄無益極是

上曰朕前揆之事理以為無益爾等所議甚當詳閱河圖問曰

近來宿遷縣民生如何張玉書等奏曰宿遷縣民間生計較

勝從前自蒙

實錄卷一百五十八

三

聖主指授河道順利又南巡之後官吏奉公豪強畏法小民得

所 禮部題朝鮮國進貢禮物交該衙門查收得旨朝鮮國

世篤惓忱進貢方物克殫恭順頃復輸應軍需捐進烏鎗三

千杆可嘉年貢內黃金百兩及藍青紅木棉嗣後永著停止

理藩院題照例賞賜朝正科爾沁和碩土謝圖親王額駙

沙津等

上曰元旦朝覲蒙古王等賞賜俱依議其來請安遇元旦之王

貝勒貝子公台吉等著一體賞賜 丙寅陞福建布政使高

承爵為安徽巡撫 陞前鋒叅領費揚吾為鑲紅旗漢軍副

都統 辛未祈穀於

上帝遣領侍衛內大臣伯費揚古行禮 甲戌

上奉

皇太后自暢春園回宮

二月乙亥朔諭大學士等西安米價尚爾翔貴戶部可招募身家殷實各省富商給以正項錢糧並照驗文據聽其於各省地方購買糧米運至西安發糶所得利息聽商人自取之如此往來運販待西安米價得平之日但收所給原銀於地方大有裨益 和碩顯親王丹臻府失火

上親臨救視火遂熄 丙子

上命內大臣公坡爾盆等詣歸化城等三處督耕諭之曰種地

實錄卷一百五十八

四

惟勤為善北地風寒宜高其田隴尋常之穀斷不能收必藝早熟之麥與油麥大麥糜黍方為有益去歲往彼墾種之人朕曾以此命之因違朕旨多種蕎麥以致田禾失收爾等須問土人宜種何穀易得收穫朕曾問老農皆云將雪拌種可以耐旱爾等試為之朕前帶南方稻穀菱角種於京師雖以水泉灌溉因無南方池塘蓄養之水且又霜早難於成熟以此觀之若將此地穀種帶往北地亦難收成惟將來與大麥油麥糜黍及早播種庶可收穫爾等謹識朕言克勤無怠 丁丑遣大學士李天馥祭先師孔子

上詣

皇太后宮問安 諭兵部大同右衛駐劄大兵有事則大同總

兵官偕行其鎮標及殺虎口協鎮步兵俱當充為騎兵爾部其議之尋議大同鎮標步兵一千四百四十四名殺虎口協鎮步兵八百名俱請改為騎兵需馬二千二百四十四匹應動支本省朋扣銀兩令本鎮買給從之 予故輔國將軍喇克達祭一次造墳立碑如例 九卿議覆差閱河工大學士張玉書等疏言高家堰隄工惟史家列至周橋最為緊要若此隄失於隄防雖多築土隄數層俱屬無益自史家列至周橋止一萬四百餘丈隄工應令總河等作速加築三官廟等六口俟竹絡朽壞時改用石工其現在石工應築土培護之處加土培覆至高家堰之隄應於每年歲修後務令總河親身詳察勘明題報應如所題從之 戊寅祭

實錄卷一百五十八

五

大社

大稷遣內大臣明珠行禮 己卯

上御太和門視朝文武陞轉各官謝恩次朝鮮國使臣等行禮 旌表直隸烈女劉氏拒姦殞命給銀建坊如例 庚辰理藩院題先經議政王大臣議奏喜峯口等五路添設驛站奉旨此五路設站之事於喜峯口至科爾沁殺虎口至鄂爾多斯此二路先設其三路明年再設作何設立之處俟來春議



奏。今議於古北口至烏朱穆秦設立六站。獨石口至蒿齊忒設立六站。張家口至歸化城。四子部落設立八站。此三路設立驛站。悉照從前二路設立驛站之例。得旨依議。古北口一路著內閣學士安布祿侍讀學士席密圖去。獨石口一路著工部侍郎圖爾宸侍讀學士喇錫去。張家口一路著吏部侍郎布彥圖侍讀學士額赫禮去。辛巳陞福建按察使董延祚為福建布政使司布政使。壬午理藩院題員外郎馬迪等中途為噶爾丹人所害。策妄阿喇布坦立遣沙克海喇圖等來奏。

上賜策妄阿喇布坦敕曰。朕統馭寰區。撫綏萬國。中外一體。果

實錄卷一百五十八

六

能始終効順。則寵賚頻加。爾策妄阿喇布坦僻處窮荒。立心誠懇。貢獻方物。問安之使。不絕於道。是以屢遣達虎馬迪等加爾恩賜馬迪等。中途被害。爾即遣使奏聞。朕深嘉之。今全受爾所貢物。因爾使沙克海喇圖等歸。賜爾以御用綵緞十端。爾所密奏諸情。事朕已悉之矣。已圖爾額爾克濟農以前因逃遁。人民失散。奏請查歸。得旨已圖爾額爾克濟農失散之人。可令所司查歸之。癸未。

上御經筵講畢。賜大學士九卿詹事及講官等宴。吏部兵部議覆直隸巡撫郭世隆疏言。宣府所屬六廳俱係佐貳十衛俱係武弁。予以臨民。似為未協。宜裁六廳十衛。改設一府八

縣。應設知府一員。同知一員。通判一員。知縣八員。教職九員。縣丞二員。典史八員。驛丞七員。經歷一員。司獄一員。巡檢一員。又東城等六驛地處偏僻。差使無多。均宜裁去。應如所請從之。甲申諭大學士等宗族之始。皆一祖所生。當力敦親睦。共相愛卹。扶持以為生也。今見諸王以下畧無親睦之誼。或者同為宗室。以他祖父之名。名其子。若孫者。有之。今不定為共相愛卹扶持之道。長此安窮。朕意此後。入八分公以上諸吉。凶事會集之禮。依向所定者行之。如未入八分公以下。至於閒散宗室。其吉。凶之事。亦宜定會集儀式。若皆令八旗會集。則不勝其繁矣。其令本翼會集。馬喪事則一旗之中為

實錄卷一百五十八

七

之服。別旗。惟去其纓。又閒散宗室中有極貧者。一有吉。凶之事。諸王以下閒散宗室以上。各以其意量為資助。在出者。既不以為難。而得之者。亦良有所益。其會集時。自其身之品級以下者。而會集之閒散宗室。無品級者。則視其父之品級。會集。凡會集不至者。有司者察。參如此。則皆相識。而親不惟是也。有為不善者。遇之亦可教。以正。若貧宗室亦不困於為生。此欲我宗室和協優游。以安處之意也。又宗室中見在名字有犯者。宗人府悉察改焉。自茲以往。歲所送名。亦即詳察其有犯者。駁之。令改朕此旨。汝等同滿洲尚書侍郎宣示諸王及閒散宗室。令其會同定議。以聞。蘇尼特多羅杜楞郡王



阿毓錫故遣官致祭○乙酉

孝康章皇后忌辰遣官祭

孝陵 丙戌陞河南府知府汪楫為福建按察使司按察使

九卿議覆戶部郎中蘇赫納等疏言奉命勘襄陽府通陝西

商州水路自襄陽至商州所屬龍駒寨八百七十餘里有

淤淺及險灘應於未運米之前交地方官疏濬自龍駒寨至

商州城一百里雖有水道淺處甚多不能行船應將米由陸

路運至西安並應如所請將襄陽二十萬米石動運十萬石

至龍駒寨交陝西督撫陸路運至西安得旨著直隸守道邵

嗣堯前往會同料理○丁亥

上詣

皇太后宮問安○封喀爾喀羅卜臧賽音台吉為輔國公 戊

子春分朝

日於東郊遣吏部尚書庫勒納行禮○諭大學士伊桑阿戶部

尚書馬齊等聞噶爾丹難於食窮困已極來就食於哈密哈

密近在塞下若不預為設備乘隙生事其時不及防矣今雖

於甘肅令滿洲綠旗兵預備而兵力尚單可自京師每佐領

出兵二人由邊外往寧夏就提督孫思克處預備更換陝西

總督標下火器營兵出二千人馬兵出千人亦遣往孫思克

處令其預備爾等與議政諸臣會同領侍衛內大臣索額圖

郎談副都統阿南達議奏尋議京城應撥每佐領下護軍二

名鎗手護軍四百名驍騎四百名前鋒四百名由邊外至寧

夏赴提督孫思克所駐劄再檄陝西總督佛倫選擇本標火

器兵二千騎兵一千擇賢能官領至孫思克所預備并檄孫

思克整飭本標官兵俱遵前旨不時遠探如有機會勿致失

誤得旨增兵甚善應如所議軍中大臣不必多也領侍衛內

大臣郎談既嘗踏勘地方即授為將軍遣行副都統阿南達

曾經周行偵探亦應派出既發前鋒則前鋒統領碩鼐亦應

派出其餘大臣官員皆朕所簡授自酌量調用不得妄請從

軍所發皆見備之兵不可遲久限三月望內起行此地備兵

亦關緊要可即撥兵以補所發之缺尋授郎談昭武將軍印

以將軍博爾濟提督孫思克為叅贊右衛護軍統領伯四格管

轄護軍○和碩康親王傑書等遵旨會議王等以下入八分

公以上遇吉凶事照定例遵行外未入八分公以下以至閒

散宗室令本旗內相近者為之服其會集視其身之品級大

一等等者去纓會集宗室中有隔旗而原相為服者仍令為服

閒散宗室之隔翼者不必令集違者該衙門查叅其閒散宗

室中之極貧者有吉凶事諸王以下入八分公以上各助銀

一兩未入八分公以下以至閒散宗室各助銀五錢俱令食

俸者助之會集時令閒散宗室二十歲以上者會集其宗室

中有見在名字相犯者令宗人府詳查改易嗣後歲所送名亦即詳查其有犯者駁之令改得旨這所議未詳著會同滿洲大學士尚書侍郎等再議具奏 己丑諭大學士等往年山東旱曾遣尚書蘇赫禱於泰山今歲陝西郡縣雨澤雖布而往者數罹旱災矣夫華山關中名山也宜遣大臣祀之爾等會同禮部議以聞 達賴喇嘛疏言彭素克格隆達木奔爾囊素等齋到恩賜不勝懽忭

上諭之意臣已明曉屢欲使喀爾喀厄魯特修好而生靈合有災青弗能和協濟隆胡土克圖不克盡力雖有小愆仍求大君寬宥巴圖爾額爾克濟農倘許安插於西海可以保無盜

賊而教之遵行法度

皇上各項差員遇舊時駐牧之人忽生亂端皆難辨晰伏祈鑒宥蒙遣濟隆胡土克圖於噶爾丹諭彼遵誓但厄魯特大半附策妄阿喇布坦雖諭以修好若厄魯特不從而生亂端則西海大小土伯特力有不支伏祈鑒而察之至打箭爐等處地方在漢人與土伯特之間奉

皇上敕旨云土伯特行商者無用其止之是以土伯特仍照前行漢人地方雖有妄為之事如發蒙古前往恐不當

聖心是以未經遣發以上情事俱已口陳於彭素克喇嘛乞仍前頒賜溫諭奉至敕諭達賴喇嘛曰朕統御宇內撫綏萬邦

平定卷一百五十八

十

平定卷一百五十八

十

好惡不偏凡出令行政務本公誠以為懲勸前者濟隆胡土克圖違旨債事已發敕諭爾喇嘛知之今爾喇嘛疏言濟隆胡土克圖不能盡力雖有小愆仍望大君寬宥向為喀爾喀厄魯特之事爾喇嘛節次遣使皆不能體爾喇嘛之意後又遣濟隆胡土克圖亦不能體爾喇嘛之意反與噶爾丹偕行殺掠喀爾喀入汎界劫取牲畜所行兇悖以致厄魯特喀爾喀殘破人多死亡窮困至極凡奉使行人不悖旨而成事則賞以勸之違旨而敗事則罰以懲之國家一定之大法也如或不然則善人何以為勸惡人何以為懲乎至巴圖爾額爾克濟農前以困窮而來歸朕朕優恤之使居賀蘭山俾得其所乃忘朕養養之恩妄生猜貳四處奔竄今窮而復歸朕又宥其前愆安插之矣並無欲得其利欲用其力之心也今爾言巴圖爾額爾克濟農安插西海即可以無盜賊亦可教之遵行法度爾喇嘛何不即撥人夫乘便遷巴圖爾額爾克濟農種類盡至西海安插之乎爾喇嘛又言皇上各項差員遇舊時駐牧之人忽生亂端皆難辨晰伏乞鑒宥又言厄魯特大半附策妄阿喇布坦雖諭以修好若厄魯特不從而生亂端則西海大小土伯特力有不支伏祈鑒而察之朕遣使於爾喇嘛往來不絕途中無一錯爾喇嘛屬下人近邊而居歷年已久亦從未嘗啓釁生事况策妄阿喇布坦目下並無

妄為之事何所見而懸擬之乎苟有此等事端其時自有從公裁度之處爾喇嘛又奏打箭爐交市之事殆欲屯戍之意也今天下太平並無一事爾喇嘛與我朝往來通使歷有年所何嫌何疑爾喇嘛如設立駐防我內地必量增戍守中外俱勞況我內地兵丁約束甚嚴非奉朕旨何敢私出邊境爾喇嘛但須嚴禁屬下不使妄行有何費之可開戍兵之設似無用也特此遣大喇嘛垂喇克格隆根敦林辰格隆往諭  
庚寅

上巡幸畿甸命皇太子允初皇長子允禔皇三子允祉

皇四子 皇五子允祺皇七子允祐皇八子允禩隨駕是日

啓行駐蹕南苑 山西巡撫葉穆濟以病乞休允之 免江

南沐陽縣康熙三十一年分水災額賦 辛卯

上駐蹕永清縣南哥驛 壬辰

上駐蹕霸州苑家口 癸巳

上駐蹕雄縣十里鋪 乙未

上駐蹕新安縣段村 丙申遣官祭

先農之神

上駐蹕雄縣十里鋪 丁酉遣官祭

歷代帝王

上自十里鋪乘舟往苑家口中途登河隄覽閱隄工召直隸巡

撫郭世隆諭曰朕觀霸州所屬苑家口迤西舊隄傾圮處甚多今渾河泛濫西逼衆流出水之處又復窄狹其勢必致直衝南隄倘有潰決則大成文安等處必受水災殊為可虞爾可詳加估計動正項錢糧加增固築以防水患

上駐蹕霸州苑家口 調四川巡撫噶爾圖為山西巡撫以原

任偏沅巡撫于養志為四川巡撫 戊戌

上駐蹕永清縣南哥驛 己亥

上駐蹕南苑 予故鑾儀衛鑾儀使林興珠祭葬如例 庚子

孝昭皇后忌辰遣官祭

陵

上回宮詣

皇太后宮問安 辛丑諭大學士等衛既齊係降級調用一州

判耳以其素有虛名特復其原官以檢討又超擢為布政使

未幾內陞府尹累加遷擢至副都御史遂又授為貴州巡撫

身受國恩可謂至矣為府尹時其條奏疏中自謂比之召伯

君陳假若其所行者一二符其所言猶有可恕乃初至貴州

時遂私動兵革妄生邊事殺無罪苗民詐報軍功種種欺誑

凡此惡行雖常人所不為而彼以古人自況反不知忌憚而

為之蓋於彼所言畧不相顧而大負國恩矣彼平昔但務虛

名妄稱道學委之以事毫無實濟若不將此等人重懲則何

以倣後之欺世盜名者爾等同九卿名衛既齊問之（壬寅）大學士等奏臣等遵旨詰問衛既齊據供從前年少無知曾經狂妄陳奏任府尹時條陳職掌又妄引古人以召伯君陳為比罪當死及為巡撫不能仰體

皇上愛民之心安撫地方輕率用兵致使無罪苗民被戮罪當死發兵之後又不能詳察虛實竟憑報文妄行奏捷罪又當死更有何辨等語衛既齊應照九卿原議擬立斬得旨衛既齊著從寬免死發往黑龍江（○）

上幸暢春園（喀爾喀輔國公羅卜臧賽音請安進貢賞賚如例）○癸卯清明節遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。

三月乙巳朔○丙午

上自暢春園回宮○以秦省旱荒遣皇子允禔祭華山

御製祭文曰朕惟五嶽之祀載於虞書所由來遠矣稽考歷代

舊章國有慶典必舉告祭之文蓋以含靈布澤能錫福於斯民故禋祀惟虔禮至重焉西嶽華山之神聳峙關中照臨西土比年以來秦省左右亢旱頻仍百姓艱食流離轉徙未有寧居田疇荒蕪不能墾闢朕憫念焦勞罔間宵旰反復圖維或者因朕之不德或者有司之不肖以致雨暘失節重困吾民前者蠲租發賑屢遣大臣拯民疾苦守土巨僚亦已更置殫心竭慮以盡人事而蒸民猶未臻康食朕念國家以民為本民以食為天百穀蕃滋端賴雨澤順時霑足咸藉神功用是特遣皇子允禔虔申殷薦祇期默佑時沛甘霖俾三農常沾優渥之庥庶兆姓永享豐亨之樂錫民嘉祉丕慰朕懷不益光歟朕之斯舉非以媚神求福也惟敬為百姓請命爰布悃忱神其鑒之謹告○丁未

上奉

皇太后幸暢春園○吏部議覆江西巡撫馬如龍等疏言江西饒州府浮梁縣景德一鎮離縣四十餘里巡檢位卑不能控制請移該府同知駐鎮彈壓應如所請從之予故原任禮部左侍郎王颺昌祭葬如例○戊申

上詣

皇太后宮問安○和碩康親王傑書等遵旨再議親王以下奉

國將軍以上喪事會集為服之處俱經定例見在遵行外其奉恩將軍之喪令各於本支內視相近者為之服其會集視其身之品級大一等者去纓會集送殯上墳俱令前去閒散宗室之喪令於本支本旗內視相近者為之服其隔旗而原相為服者仍令為服奉恩將軍等及本翼二十歲以上閒散宗室俱去纓會集送殯上墳亦令俱去其會集惟於二十歲以上閒散宗室之喪令之會集親王以下奉恩將軍以上之喪亦令本翼二十歲以上閒散宗室等去纓會集送殯上墳俱去違者該衙門查叅其親王以下輔國公以上於本支中之章京閒散宗室之喪原相為服者亦令為服其應得封十五歲以上之閒散宗室之喪視其應得品級之大一等者令之會集閒散宗室之貧者有吉凶事諸王以下以至閒散宗室令各隨便資助俱令食俸者助之其未至二十歲而已食俸及曾資助過閒散宗室內之貧者有吉凶事亦令照此例資助其宗室中名字有犯者著宗人府詳查不論輩數今年小者更改若名字與已故者相犯則令見在之人更改歲所送名亦即詳查其有犯者駁之令改得旨依議十五歲以上皇子等俱行傳知凡有資助之處亦令一體助之已酉內閣以選取蒙古官學生八名充衙門貼寫奏聞上曰朕於包衣佐領下幼童特派專官教習文義騎射多有成

卷一百一十八

一

就即微賤之子亦皆可觀由此言之幼童惟在訓迪苟加意教誨未有不成熟者騎射與文字原宜並重不可偏廢滿洲通文義官員即用之行間未嘗不可近見國子監教習官學生甚屬委靡大不及前即八旗教習幼童亦皆懈怠幼時勤於教誨及長方得其用養育人材最為緊要見在八旗幼童務宜選擇良師勤加訓誨爾等傳諭該都統知之茲所取蒙古官學生係奏選用以故三等精奇尼哈番劉邦柱弟尼雅漢襲職癸丑戶部議覆察勘河工吏部尚書熊賜履等疏言淮揚鳳徐四府州屬之高郵山陽等十二州縣并淮大二衛開河築隄建閘栽柳拋廢田地三千七百二十八頃三十畝有奇應徵錢糧俱請豁免又海州山陽等六州縣并大河衛淤出田地一千一百三十七頃一十畝有奇應徵錢糧請於康熙三十二年起科並應如所請從之○乙卯吏部議覆巡視兩廣鹽課太常寺少卿沙拜疏言兩廣鹽政向屬撫臣兼理課餉引目係驛鹽道提舉司經管臣蒙皇上特恩簡用所屬之員自應照例改設將驛鹽道改為運司潮州一府離省遠行鹽亦多必得專員管理應將提舉裁去改設運同使之駐劄潮州催徵課餉府吏目裁去改設鹽運司知事提舉司廣盈庫大使改為運司庫大使批驗所大使改為運司批驗所大使廣州府有歸德等場惠州府有淡

卷一百一十八

七

水等場為鹽觔出產之所課餉之源必須設立分司催徵巡緝均應如所請從之 壬戌

萬壽節

上率諸王貝勒貝子公內大臣大學士侍衛等詣

皇太后宮行禮停止朝賀筵宴 遣官祭

福陵

昭陵

暫安奉殿

孝陵

仁孝皇后

孝昭皇后

孝懿皇后陵 遣官祭真武東嶽城隍之神 癸亥陞湖北糧

儲道王道熙為江西按察使司按察使 甲子

上詣

皇太后宮問安 黑龍江左翼副都統溫代以老病乞休允之

旌表湖廣節婦朱氏給銀建坊如例 己巳工部議覆直

隸巡撫郭世隆疏言臣欽遵

上諭至苑家口迤西舊隄逐處詳勘隄岸之北率多侵損原基

若止將隄南培厚猶恐浪搖水撼易於頽壞應於隄北加椿

填埽實以土方庶堪經久應如所題從之 庚午諭大學士

等各省解送物料其中亦有無用者亦有此間購買易得者

下戶部詳議其當解不當解者以聞 兵部題寧夏鎮標騎

兵二千四百步卒一千六百防守地方所關甚要今總兵官

馮德昌與將軍郎談等同赴甘州軍中則其標兵當酌量留

守應作何領兵總兵官印務應畀才能者代理令與總督將

軍提督商確奏聞得旨甘州有孫思克兵可令馮德昌獨往

其寧夏鎮兵趙良棟身係舊臣可暫行管領 癸酉理藩院

題喀喇沁多羅杜楞郡王札什子一品塔布囊垂札木素故

請照例致祭得旨垂札木素在園場行間効力人材甚優聞

其身故朕甚憫之著照公例優卹并賜銀一百兩

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百五十八



大清聖祖合天弘運文武睿哲恭儉寬裕孝誠信中和功德大成仁皇帝實錄卷之一百五十九

康熙三十二年癸酉夏四月甲戌朔享

太廟遣領侍衛內大臣公舅舅佟國維行禮 己卯

上詣

皇太后宮問安 壬午毛明安多羅貝勒圖巴故遣官致祭

調廣東瓊州總兵官吳啟爵為直隸天津總兵官陞福建臺

灣副將唐希順為貴州威寧總兵官丙戌理藩院題喀爾

喀台吉車陵扎卜呈稱我父達什台吉本土謝圖汗六扎薩

克中之一扎薩克也我向與族中弟姪六人及土謝圖汗叔

增錄卷三十九

父戴青諾顏之孫瓦齊賴恒喇胡土克圖之弟滾濟扎卜邊

噶爾丹亂俱往投鄂羅斯今謹集衆來歸我等願得與西卜

退哈灘巴圖爾同在克魯倫巴顏烏闡遊牧應如所請仍照

喀爾喀初來之例賞以袍服布幣從之丁亥諭大學士等

昨日皇子允禔奏往祭華山每日行一百七十八里逼近潼

關連雨三日泥濘難行一日止行百里至陝西見麥田甚好

問總督佛倫云雨水甚調麥田頗好故流民回籍者甚多將

播種銀兩發與州縣百姓時內有兩縣百姓云田已種完不

用庫帑將銀繳回有自甘肅及秦嶺來者問之皆云雨水均

調麥田甚好向日西安鳳翔飢民逃竄者衆今雖各回籍必

秋禾有收方得安業若秋禾不登將如之何朕實憂之見今  
畿甸稍旱著禮部虔誠祈雨 戊子

上詣

皇太后宮問安 己丑授輔國公納墨孫子訥圖為三等鎮國

將軍和碩康親王傑書子扎爾圖巴爾圖俱為三等輔國將

軍庚寅

孝端文皇后忌辰遣官祭

昭陵

上奉

皇太后自暢春園回宮辛卯陞索倫總管喀圖瑚為黑龍江

增錄卷三十九

左翼副都統以翁牛特故多羅杜楞郡王畢禮袞達賴子

頒第襲爵壬辰

上詣

皇太后宮問安諭兵部武鄉會試舊例射的以八十步為則

太遠善射者不能多中人材或致遺棄嗣後改為五十步以

中二箭為合式諭大學士等翰林官以文章為職業今人

好講理學者輒謂文章非關急務宋之周程張朱何嘗無文

章其言如是其行亦如是今人果能如宋儒言行相顧朕必

嘉之即天下萬世亦皆心服之矣傳諭翰林官知之○以翰

林院檢討許嗣隆為雲南鄉試正考官吏部員外郎談九乾



為副考官。編修甯世蕃為貴州鄉試正考官。戶部員外郎陳正為副考官。○癸巳。戶部遵諭議覆各省解送物料共九十項。京中無貨買之物。應令照舊解送外。查所解印書紙張。庫內見有存貯。白銅無應用之處。應將此二項停其解送。至於外解青粉等三十八項。價值并脚價合算。比在京師價貴。相應停其外解。如有應用此等物料之處。在京照時價採買。應用或遇時價騰貴。辦買不得者。具題行令出產省分解送。從之。○丁酉。

上詣

皇太后宮問安。○轉理藩院右侍郎滿丕為左侍郎。陞內閣學

士西拉為理藩院右侍郎。○予故漢軍都統趙璟祭葬如例。

○以散秩大臣伯心裕為正黃旗蒙古都統。戊戌。

上御太和門視朝。文武陞轉各官謝恩。已亥。調廣西左江總

兵官唐光堯為廣東瓊州總兵官。陞湖廣鎮寧副將趙廷棟

為廣西左江總兵官。○辛丑。兵部議覆直隸巡撫郭世隆疏

言真定府路當孔道。地方遼濶。將紫荊關副將移駐真定。改

為真定協。即於各關營內酌量繁簡抽調馬步兵丁一千四

百名。并真定原有兵六百名。足二千名。歸之副將統轄。應設

左右二營。守備除真定營守備留用。再以龍泉關守備移駐

應設千總四員。即以真定營千總二員留用。再以紫荊關千

總一員移駐外。另行添設千總一員。應設把總八員。即以真定營把總四員留用。外另行添設把總四員。龍泉關參將移駐紫荊。改為紫荊關參將。真定營遊擊移駐龍泉。改為龍泉關遊擊。俱應如所請。從之。○壬寅。喀爾喀多羅貝勒車布登。故遣官致祭。并賜銀一百兩。○癸卯。

上詣

皇太后宮問安。○出征厄魯特拜他喇布勒哈番護軍叅領吳大禪創發身故。給一拖沙喇哈番。予祭葬。如陣亡例。○以一等侍衛齊蘭布為正白旗蒙古副都統。

五月甲辰朔。○丙午。

仁孝皇后忌辰。遣官祭陵。○丁未。

上幸瀛臺駐蹕。○陞浙江溫州副將姚弘信為山西太原總兵

官。○戊申。戶部尚書王鴈以老病乞休。慰留之。○庚戌。兵部

題歸化城乃總要之地。增戍之兵甚多。應專設將軍一員。總

管歸化城。都統副都統訓練官兵。凡有當行事務。協同右衛

將軍而行。得旨歸化城初設將軍總管官兵。整飭訓練。關係

甚重。著領侍衛內大臣伯費揚古為安北將軍管理。○壬子。

上回宮。○頒

御書萬世師表匾額於國學。○癸丑。

聖躬違和不理事丙辰遣官祭

闕聖帝君丁巳先是以牋害員外郎馬迪事降敕詰問噶

爾丹至是噶爾丹遣使齎奏陳情

上命發敕令彼使人齎回敕曰朕躬膺

天命撫綏萬邦凡恭順之國無不加恩以示獎勸其有未孚者

亦必曲加優容以匡正其非使歸於善前者朕遣員外郎馬

迪等於策妄阿喇布坦為爾屬下土克齊哈什哈哈爾海達

顏額爾克所害敕汝查奏今爾疏言非但皇帝之使臣不宜

爾也向來小國使臣亦無殺害之事敕使因遇羅卜藏林辰

慙都深布札卜是以見殺其名土克齊哈什哈哈爾海達顏

聖祖實錄

五

額爾克之人雖在其內但原遣與哈密通問非自我教之行

劫也害使臣者乃羅卜藏林辰等見在塔爾納齊納爾地方

伊等情由想皇上早已洞鑒之矣諸凡大小罪過總祈皇帝

如天之度兼容并包爾於朕敕未到之前護送使臣同行之

格什等至嘉峪關奏其情事朕甚嘉許但爾既已立盟修好

則害我使臣之土克齊哈什哈哈爾海達顏額爾克等當即

擒拏治罪以戒後來橫行之人爾疏又言烏爾會地方兩尚

書擊我倘其事有成將欲置我等於不堪我等亦知非皇帝

之旨其時已籲奏矣爾前者借追喀爾喀為名犯我汎界掠

我人民尚書阿喇尼等因巡汎界遇之彼凜遵國法率汎界

蒙古兵與戰並非內地所遣之兵然此乃爾未誓以前事爾

既誓以後不得復執此以為言又前者爾於烏闕布通地方

首頂達賴喇嘛之佛誓不再違聖旨又跪於威靈佛之前誓

不再犯中華皇帝屬下之喀爾喀以及眾民爾今疏言昔當

濟隆胡土克圖內大臣吳丹塞爾濟之前跪告曰請將澤卜

尊丹巴土謝圖汗兩人於所奏三言中一言為定遂出七

旗歸於故土則皇帝覆育之蒙古再不為非矣今亦不敢異

於從前有所誑奏爾誓書印文猶存並無此等語爾奏此言

與誓書原辭自相悖謬且朕安集喀爾喀之事已檄知達賴

喇嘛并敕諭爾矣達賴喇嘛甚喜奏喀爾喀如彼飢困全加

聖祖實錄

下

愛養同佛慈悲聞之不勝懼忭誠撫恤眾生如赤子也其疏

前已示爾爾亦當詳觀之矣日者達賴喇嘛因與喀爾喀澤

卜尊丹巴胡土克圖土謝圖汗車臣汗諸台吉俱相隔數年

未遣使通問今特遣其弟子緯木巴喀巴額木齊往問朕恐

行路羈遲特遣官馳驛往送以此觀之達賴喇嘛以喀爾喀

等向為護法主加惠之意彰彰明矣爾今違誓仍索澤卜尊

丹巴胡土克圖土謝圖汗等豈合達賴喇嘛之意乎況近今

達賴喇嘛奏言倘厄魯特不從復生亂端西海大小土伯特

力有不支伏祈鑒而察之達賴喇嘛與我朝往來通使多歷

年所西海諸台吉不違朕旨恭順奉貢若厄魯特人等稍犯

達賴喇嘛地方及西海地方朕即立加征討斷不與也前者爾敗於烏闡布通歸時人畜多死極其窘迫沿途棄棄器械而去朕巡視汎界大臣直躡爾後皆目擊之今聞爾地之食窮困已極爾鄰近國土皆與爾為仇策妄阿喇布坦又與爾不睦從來諸國之人窮迫歸朕者養育皆如一體如爾窮迫來降前敕諭中已許活爾可即徙至近邊當加厚恩撫養毋疑毋畏至喀爾喀札木巴拉臧布胡土克圖乃此地敗壞釋教之罪人逃在爾所如果有用則留之不爾可即發回今頒緞十疋付爾使沙哈孫白克綽爾奔下齋往 辛酉夏至祭地於

聖祖實錄卷一五九

七

聖祖實錄卷一五九

八

方澤遣領侍衛內大臣公福善行禮 壬戌諭大學士等朕躬違和久未理事今已稍愈奏章著照常送進 丙寅以翰林院檢討宋敏求為四川鄉試正考官內閣中書王貫三為副考官編修謝陳常為廣東鄉試正考官行人司行人王興曾為副考官編修李懋為廣西鄉試正考官內閣中書張運為副考官檢討孫勳為福建鄉試正考官內閣中書李承祚為副考官

六月癸酉朔

聖躬大安御乾清宮西暖閣召諸王內大臣都統滿漢大學士滿尚書進見 甲戌

上御乾清宮召副都統上三旗侍衛漢尚書滿漢侍郎學士等官及內務府總管等進見 乙亥頒

御書學達性天匾額於江南徽州紫陽書院 禮部議覆國子監祭酒吳苑疏言八旗之人學習制藝者日多而中式之額太少請增加名數查鄉試滿洲蒙古原取中舉人十名今增六名共取中十六名漢軍原取中舉人五名今增三名共取中八名會試滿洲蒙古原取中進士四名今增二名共取中六名漢軍原取中進士二名今增一名共取中三名從之 丙子甘肅提標守備高天福奉差至哈密地方遇害贈署都司食書予祭葬如陣亡例 予故蒙古都統三等公諾敏祭葬如例 戊寅

聖祖實錄卷一五九

八

上奉

皇太后幸暢春園 辛巳

上詣

皇太后宮問安 壬午諭大學士等朕體已大愈矣行步並無妨礙折本及章疏照常面奏 癸未

上詣

皇太后宮問安 丙戌喀爾喀澤卜尊丹巴胡土克圖來朝進貢宴賚如例 以故三等阿思哈尼哈番阿賴子朱蘭泰襲職 戊子以翰林院檢討顏光燾為浙江鄉試正考官吏部

郎中司鉉為副考官編修宋大業為江西鄉試正考官戶部郎中王可大為副考官編修劉灝為湖廣鄉試正考官禮部郎中史陸興為副考官已丑大學士李天馥丁母憂命回籍守制庚寅九卿議覆河南巡撫顧汧疏言河南漕米俱向直隸小灘採買於民未便請改折停運應無庸議得旨覽該撫奏河南漕糧不出於本省百姓遠至直隸大名府小灘採買將漕米改折有益民生嗣後停止百姓採買但解京米石所關匪輕令該撫將改折銀兩親至大名府所屬地方照數採辦驗看起運倘有遲誤該撫從重治罪工部議覆河道總督于成龍疏言康熙二十五年所裁之柳不足因而購

宣統三年十一月

九

買濟用當日總河靳輔不料所裁柳不足用今將購買柳價一萬八千餘兩向經管各官追補未免苦累查需用柳枝之時各官未經詳明題報理應追補得旨柳條用於河工年久著照該督所奏免其追補旌表河南節婦譚氏潘氏曹氏成氏解氏各給銀建坊如例乙未免山西臨晉縣本年分電災額賦有差丙申福建巡撫卞永譽疏報據臺灣府諸羅縣所轄大武郡等社土官卓乃等呈有鄰近木武郡赤口等六社生番咸願附籍輸餉查男婦老幼共四百八十七名每年認納餉銀九十兩有奇下所司知之以故湖廣忠路安撫司土官覃承國子覃世藩襲職戊戌工部議覆河南

巡撫顧汧疏言榮澤縣北關外高家灣一帶黃河水勢全歸南岸衝塌堤根逼近城垣急應修築應令總河親身詳查具題到日再議得旨這工程不必行總河往察著照該撫所題修築己亥以翰林院編修汪灝為陝西鄉試正考官禮科掌印給事中王原祁為副考官詹事府少詹事李銑予為江南鄉試正考官戶部郎中強兆統為副考官旌表甘肅節婦侯天錫妻杜氏給銀建坊如例庚子

宣統三年十一月

一

上諭大學士等曰朕每見各省往來及請安之人必問地方情形雨水需足與否前問自江浙來者俱言今歲甚旱五月二十日尚未得雨朕幸江南深知彼處民生家無二日之儲所食之粟每日糴買若五月以後仍不得雨則米價騰貴貧民必至困苦此不可不預籌者著遣戶部才能司官二員一往江南一往浙江詳問督撫觀看雨水形勢來奏江浙地方雨水雖大若不沒禾穗則水消後禾即復舊故潞不足慮旱則所蓄之水盡涸直無計可施朕又曾見舟中滿載猪毛雞毛問其故則曰福建稻田以山泉灌之泉水寒涼用此則禾苗茂盛亦得早熟朕記此言將玉泉山泉水所灌稻田亦照此法果早熟豐收江浙稻田俱池中蓄水灌之池水不寒所以不用此也戶部工部議覆四川陝西總督佛倫疏言西安府省城駐防官兵家口約有數萬本色糧草俱於西安鳳翔

所屬州縣徵取百姓苦於解送查離省城四十里有曹店地方可通水路宜於彼處設立倉廩派官管理其通水路之州縣令其運至曹店交充入倉其不通水路之州縣有近省城者有近曹店者聽民就近運送應如所請從之 壬寅

上詣

皇太后宮問安○旌表山東節婦鄒平縣張氏臨邑縣王氏曲阜縣常氏平度州王氏各給銀建坊如例

秋七月癸卯朔享

太廟遣領侍衛內大臣索額圖行禮○戶部議覆四川巡撫于養志疏言四川新設會理州向屬土官管轄原無徵糧科則

欽定大清會典事例

卷一百一十五

一

今招徠陸車等四十三頭目共輸雜糧四十石有奇於康熙三十二年起徵應如所題從之 甲辰陞荊州協領和索利為荊州左翼副都統○乙巳兵部議覆山東巡撫桑額題參登州總兵官曹應鵠將已故功加官劉新等劄付給人頂替又將伊子曹文簡之名冒入叙功冊內保奏應將曹應鵠本身所得拖沙喇哈番及總兵官俱革去得旨曹應鵠著從寬免革拖沙喇哈番革去總兵官 丁未

上詣

皇太后宮問安 己酉以故三等公諾敏子三等侍衛馬爾賽襲爵以故三等阿思哈尼哈番覺羅郎圖子樹淑襲職

壬子

孝懿皇后忌辰遣官祭

陵 癸丑

上詣

皇太后宮問安○四川陝西總督佛倫等疏報秦省西鳳二屬雨雪霑足麥豆豐收秋禾茂盛流民回籍者已二十餘萬得旨秦省地方自連歲旱荒以來朕心時切軫念據該督奏今歲甘霖屢降麥豆豐收糧價漸減目今秋禾茂盛西成可望流民回籍者甚多所奏已知之○予故蒙古副都統理藩院左侍郎文達祭葬如例○予故原任山西巡撫葉穆濟祭葬如例○丙辰以喀爾喀故鎮國公托鐸額爾德尼兄吳巴達襲爵○丁巳中元節遣官祭

欽定大清會典事例

卷一百一十五

一

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵 己未陞守

陵副將韓佐周為廣東碭石總兵官 庚申工部議覆河道總督于成龍疏言高家堰重隄一工於康熙二十六年八月內興築二十七年三月停止各夫四散預給銀四萬四千七十兩無憑扣追仰請豁免應無庸議得旨這工程中止且已年久預支夫役銀兩著免追取 壬戌以翰林院編修高曜為河南鄉試正考官內閣中書房嵩為副考官 癸亥

上詣

皇太后宮問安 免山西滎河縣本年分電災額賦有差 以

毛明安故多羅貝勒圖巴子班第襲爵 以蘇尼特故多羅杜楞郡王阿毓錫子達禮札卜襲爵 丙寅以翰林院檢討

實錄卷百十九

十一

李朝鼎為山東鄉試正考官行人司行人劉愈為副考官檢討魯瑗為山西鄉試正考官內閣中書成康係為副考官

陞內閣學士常書為總督倉場戶部侍郎 己巳陞石叵副將呂八音為山東登州總兵官 庚午

上詣

皇太后宮問安

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百五十九

實錄卷百十九

十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百六十

康熙三十二年癸酉八月壬申朔甲戌

上詣

皇太后宮問安諭戶部朕撫御寰宇早夜孜孜惟以實惠及民俾登康阜為念廣西四川貴州雲南四省俱屬邊地土壤硠瘠民生艱苦與腹內舟車輻輳得以廣資生計者不同朕時切軫懷歷歲以來屢施恩卹廣西省康熙十六年通省錢糧康熙十七年十八年民欠錢糧貴州省康熙二十二年秋冬及二十三年春夏地丁錢糧又貴州四川二省康熙二十

實錄卷一百六十

二

五年未完及二十六年應徵錢糧雲南省康熙二十七年以前屯地積欠錢糧俱經次第蠲豁茲念育民之道無如寬賦矧邊省地方非再沛優恤之恩則閭閻無由充裕所有康熙三十三年四省應徵地丁銀米著通行蠲免仍行文該督撫徧加曉諭令人沾實澤以稱朕加惠遠省民生至意如有不肖有司借端朦混私自徵收者該督撫指名奏劾從重治罪爾部即遵諭行○兵部議覆廣西提督李林盛疏言思恩府及所屬之西隆州西林縣鎮安府泗城土府五城瘴毒較南太慶三府為尤甚營員不服水土者多嗣後思恩等五處守備缺出會同總督將廣西省年滿候推守備之千總揀選保

題應如所請從之○乙亥和碩額駙乃格所尚之郡主故遣官致祭丁丑遣大學士阿蘭泰察

先師孔子以翰林院侍讀徐倬為順天鄉試正考官編修

彭殿元為副考官戊寅祭

大社

大稷遣內大臣明珠行禮

上奉

皇太后自暢春園回宮己卯

上詣

皇太后宮問安諭大學士伊桑阿戶部尚書馬齊等朕聞襄

實錄卷一百六十

二

陽米石運至商州沿河一帶並無村莊民居相離甚遠水溜汛險逆流而上民夫甚為勞苦前遣學士德珠運米時朕曾諭至彼輓運倘有不合處及應奏事宜即行啟奏此所運之米專為陝西百姓預備今年陝西雨水及時麥田廣收秋稼亦茂民生已寧揀選戶部司官一員馳驛往問學士德珠總督丁思孔總兵官王化行等倘謂運米不至累民易於運到令伊等陳奏○陞工部郎中常綬為內閣學士兼禮部侍郎

庚辰

太宗文皇帝忌辰遣官祭

昭陵辛巳內閣學士王尹方疏請終養乞之壬午



太祖高皇帝忌辰遣官祭

福陵○

上詣

皇太后宮問安○癸未

上巡幸塞外命皇太子允初皇長子允禔皇三子允祉

皇四子○皇五子允祺皇七子允祐皇八子允禩隨駕是日

啟行駐蹕湯山○兵部議覆廣西巡撫王起元疏言粵西武

生甚少請停本年鄉試應如所請從之○甲申

上駐蹕懷柔縣○乙酉

上駐蹕密雲縣南沈莊○丙戌

康熙三十二年

上駐蹕古北口城內○丁亥

上駐蹕恩格木噶山○河南巡撫顧沂疏報豫省康熙三十一年分開荒地共一千六百頃有奇下所司知之○戊子

上駐蹕富爾堅噶山○己丑

上駐蹕博洛和屯○庚寅

上駐蹕巴顏喀喇地方○辛卯

上駐蹕汗特木爾達巴漢地方○免山西清源縣本年分水災

額賦有差予故廣東碣石總兵官劉澤深祭葬如例○壬

辰

上駐蹕穆穆喀喇沁地方○癸巳

上駐蹕雲特木爾達巴漢地方○甲午

上駐蹕愛里和洛○戶部議覆四川陝西總督佛倫等疏言而

安省會旗標官兵一歲所需本色糧米三十萬石有奇請預

於康熙三十二年秋收之際動正項錢糧賤價收買備貯明

歲一年軍需則明歲本色於秋登後徵收即可供後年之兵

米應如所請動司庫錢糧採買預備供支從之○免山西徐

溝縣本年分水災額賦有差○乙未秋分夕

月於西郊遣兵部尚書索諾和行禮○丙申

上駐蹕西爾哈和洛○丁酉陞提督順天學政兵部督捕右理

事官顧藻為內閣學士兼禮部侍郎○戶部議覆漕運總督

康熙三十二年

興永朝疏言江北蘆鳳淮揚等處漕糧請紅白兼收應不准

行得旨米取圓淨各隨其地所出不論紅白令兼收勿累百

姓○免山西榆次等三縣本年分水災額賦有差○戊戌

上駐蹕納林西爾哈地方○己亥

上駐蹕席北畢喇地方○賜來朝喀爾喀科爾沁翁牛特土默

特喀喇沁巴林敖漢阿霸哈納諸王額駙貝勒貝子公台吉

喇嘛塔布囊等及內大臣侍衛都統副都統部院大臣八旗

官兵宴○賜隨圍喀喇沁塔布囊以下至官兵袍帽繡帶銀

緞布疋有差○庚子

上駐蹕端靜公主府○內閣學士德珠疏言陝西流民已復田

皆耕種收穫米價平賤百姓得所應交陝西督撫十萬石之米現在陸續起運外其先運到龍駒寨西安糧道之米今既

無人糴買應歸入現運十萬石數內亦交與陝西督撫得旨

運米著停止其運到龍駒寨西安之米著交與該督撫收貯

免山西忻州介休等八州縣本年分水災額賦有差朝

鮮國王李亨因免年貢黃金木棉遣陪臣李桓上表謝恩附

貢方物宴賚如例

九月壬寅朔

上駐蹕布爾哈蘇台多羅安郡王馬爾渾母和碩妃薨逝遣

官致祭○癸卯

實錄卷一百六十

五

上駐蹕克勒和洛西爾哈和洛交界地方○甲辰

上駐蹕噶爾圖昂阿地方免山西太原文水三縣本年分水

災額賦有差○丙午

上駐蹕巴隆桑古斯台地方丁未

上駐蹕烏喇依地方免偏沅湘陰平江三縣本年分旱災額

賦有差○遣官祭

歷代帝王遣官祭城隍之神予故三等輔國將軍肉素

祭葬如例分四川陝西督標火器營兵二千名為左右二

營添守備一員分轄每營各設千總二員把總四員工部

議覆奉天將軍輔國公綽克託疏言修理盛京城垣需用夫

役在盛京兵民內按丁取用得旨盛京城垣關係重大著工

部侍郎圖爾宸前往會同該將軍盛京工部應作何修理詳

看議奏○戊申

上駐蹕烏里雅蘇台達巴漢地方○己酉昭武將軍郎談疏言

現擒哈密回子云噶爾丹屬裔牛羊已盡捕魚為生噶爾丹

在烏郎瑪耕種臣意將馬秣肥來春直臨和卜多索其同哈

密國人戕害使臣之土克齊哈什哈哈爾海達顏額爾克等

彼既起釁當乘機而行噶爾丹如不迎敵遁入深林則窮追

之即不獲其身而散其族屬誤其農田大兵回經哈密殺散

噶爾丹供賦之回子則其禾苗毀噶爾丹所恃以為常產者

實錄卷一百六十

六

彼自窮困矣奏至命議政王大臣會議尋議前噶爾丹戰於

烏闐布通退回之時誓不復擾我邊境近以欽差頒賞員外

郎馬迪等被害噶爾丹不及與知乃其種類所為已遣使請

罪蒙

上寬宥賜以敕書目下噶爾丹並無逼近邊塞之釁將軍郎談

所奏應無庸議但檄將軍郎談孫思克遣才能者遠行偵探

如獲噶爾丹實音具奏請旨其現擒哈密八人令將軍給以

換糧遣歸得旨此事所關甚大郎談等身在行間必有所見

進則易於奏功亦未可定倘有可乘之便此機亦不可失茲

軍行之期尚早當遣護軍統領蘇丹侍郎席爾達會同總督

佛倫佳與郎談博霧孫思克等將可進不可進與當進當守之事詳議回奏尋蘇丹等往會議聞噶爾丹有離和卜多之信且目下噶爾丹人力單薄馬畜鮮少斷不與大兵抗拒今率兵征剿糧餉關係重大噶爾丹遊牧為生無一定之巢穴所請來春直臨和卜多之奏宜罷之哈密回子向來納賦於噶爾丹等蒙古歷有年所非自今創始也蓋此等蒙古多有納賦之番人今以納賦於噶爾丹之故遽興兵擊散非所以仰體

皇上如天好生之至仁也既議罷征噶爾丹則所稱殺散哈密回子刈其禾苗之語當不必議但將噶爾丹之事付將軍孫思克遣綠旗材幹人員不時遠探聲息其回子八人禁在甘肅州哈密者乃諸使之通衢也宜令放歸併將

皇上好生至德大書告示付此回子等持往諭其頭目仍給此回子等糧騎從之○免山西定襄崞縣本年分水災額賦有差○工部議覆河道總督于成龍疏言中河乃漕運要道兩岸加築束水子隄量留涵洞庶運道無淤墊之虞應如所請從之○辛亥兵部議覆廣東廣西總督石琳疏言風颶日本國船隻至陽江縣地方計十二人請發回伊國應如所請得旨外國之人船隻被風颶至廣東情殊可憫著該督撫量給衣食護送浙省令其歸國○壬子

上駐蹕舒虎爾郭爾地方○免江西寧州上饒縣本年分旱災額賦有差○癸丑

上駐蹕森濟圖哈達昂阿地方賜喀爾喀澤卜尊丹巴胡土克圖上謝圖汗諸王貝勒台吉喇嘛等衣帽鞭帶弓矢刀鞍蟒緞裝緞等物有差甲寅

上駐蹕阿拜諾顏蘇巴爾漢地方○乙卯

上駐蹕齊老圖昂阿地方○丙辰賜喀爾喀多羅郡王崑都崙博碩克圖滾布等衣帽鞭帶等物有差○戶部議覆浙江巡撫張鵬翮疏言浙省今歲旱後得雨田雖補種節氣已過所收之米不堪辦供請將康熙三十三年之蠲免移免三十二

年之額徵應如所請從之○免湖廣蘄州黃岡等五州縣黃蘄二衛本年分旱災額賦有差○護軍統領蘇丹等疏言臣等查甘肅涼州在西北陲所植之苗惟麥黍豌豆而已甘州所屬雖畧種稻而不甚多大兵在甘州糧草不足乞令自京撥駐甘涼之大兵暫駐寧夏駐劄蘭州之西安兵暫駐蘭州其西安調至督標官兵發回省城西安官兵既皆在蘭州則西安將軍博爾濟應遣往蘭州從之○丁巳諭大學士等江浙二省今年夏旱雖不成災秋收諒必有限若漕糧照常徵收起運恐民食將至匱乏朕為此常切軫念除浙江漕糧已經改於今年蠲免外其江南漕糧今年或三分免一或免一半

俟至該省應蠲年分將今年所免米石照數補徵起運於漕糧既無缺少官民大有裨益著滿漢大學士等會同戶部堂官今場侍郎等作速確議具奏 戊午

上駐蹕噶拜和洛 已未

上駐蹕伊瑪圖和洛之布克達巴漢昂阿地方 庚申

上駐蹕巴達喇噶山 賜翁牛特協理旗分事務台吉鄂齊爾多羅貝勒額爾德布鄂齊爾土默特多羅貝勒額駙厄爾德木圖喀喇沁鎮國公善巴喇錫及隨圍喀喇沁塔布囊以下至官兵弓矢衣帽帶韉銀兩等物有差 辛酉

上駐蹕舍里烏朱地方 戶部等衙門遵旨議覆康熙三十年

實錄卷一百六十一

九

十二月內諭旨將江蘇漕糧於三十四年蠲免安徽漕糧於三十五年蠲免今年江省夏旱秋收諒必有限若漕糧照常徵收民食將至匱乏請將江蘇安徽今年漕糧三分免一此所蠲漕糧俟至該省應蠲年分照數補運得旨依議速行 壬戌

上駐蹕上都畢喇地方 癸亥

上駐蹕恩格木噶山 予故山西太原總兵官胡戴臣祭葬如

例 甲子

上駐蹕古北口城內 乙丑

上駐蹕密雲縣南沈莊 丙寅

上駐蹕順義縣大東莊 琉球國中山王尚貞遣陪臣馬廷器等進貢方物並請入監讀書官生梁成楫等歸國宴賚如例

○丁卯

上回宮詣

皇太后宮問安 盛京刑部侍郎明額禮以老病乞休允之 戊辰

孝慈高皇后忌辰遣官祭

福陵 已巳諭大學士等顧八代因在內廷供奉多年屢次擢用以至尚書今觀其人不宜留任部院著革去尚書以伊世職隨旗行走 庚午安北將軍領侍衛內大臣伯費揚古疏

實錄卷一百六十二

十

言散秩大臣杜思噶爾尚書班迪選來堪披甲蒙古三千六十五人俱到歸化城分為三十佐領伊等錢糧未到之前以大臣等自耕米穀給之又益以歸化城之貯倉舊米俟收割後令土默特官兵撥入夫車輛往殺虎口取米如數補倉運到蒙古真堪披甲附於滿兵一二年間即如旗下舊兵矣得旨此項蒙古兵勿安插歸化城令駐劄右衛量減往駐右衛滿洲護軍驍騎其官員仍照前所撥遣往訓練二年內可此旗下舊兵議政王大臣會議以聞尋議往駐右衛軍中每佐領下應減去護軍二名驍騎一名將此三十佐領官兵充為八旗蒙古驍騎駐劄右衛伊等既給口糧草料則兵丁應

每月給餉銀一兩官員給半俸至滿官不減照前所撥遣往訓練蒙古兵將所減護軍驍騎之住房撥給安插軍器諸物俱照滿兵例撥給未還以前不必給餉銀仍依前計口給米從之

冬十月辛未朔享

太廟遣吏部尚書庫勒納行禮○遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○頒康熙三十三年時憲歷○調山東布政使楊

廷耀為福建布政使司布政使陞山東按察使喻成龍為山

東布政使司布政使○壬申諭大學士等曰給事中彭鵬奏

今科順天鄉試疏內有請朕親審將主考同考官并舉人一

一窮究之語是謂諸大臣皆不可信矣若倚任之大臣既不

可信雖彭鵬亦可信乎況治天下不在拘執小節當敦崇大

體以和平御之如大小事皆朕一人親審則庶務何由畢理

且自古以來亦無此體即依彭鵬所奏將徐倬等親問必將

刑具取入宮內刑具乃不得已而用者朕亦何忍見之彭鵬

既係言官當勸朕寬大和平乃請親行刑訊朕實不解也著

九卿議奏○又諭曰前尚書科爾坤請練事務在戶部時著

有勤勞被參之事殊不明晰以其年邁不復任用可復尚書

銜○陞左副都御史佛孫為盛京刑部侍郎○古北口總兵

官王廷彪疏請給假葬親久之○癸酉

皇太后聖壽節

上率王以下文武大臣侍衛等詣

皇太后宮行禮○遵

懿旨停止筵宴○甲戌調工部尚書沙穆哈為禮部尚書○乙

亥

上御經筵講畢賜大學士九卿詹事及講官等宴○陞浙江紹

興副將周復興為山西太原總兵官直隸三屯營副將李鎮

鼎為直隸天津總兵官調湖廣襄陽總兵官王化行為山東

登州總兵官陞雲南援勦左協副將周化鳳為湖廣襄陽總

兵官○丙子

上以闕里

聖廟落成命皇三子允祉

皇四子○前住致祭

御製重修闕里孔子廟碑曰朕惟大道昭垂堯舜啟中天之聖禹湯文武紹危微精一之傳治功以成道法斯著至孔子雖不得位而贊修刪定闡精義於六經祖述憲章會衆理於一貫為往聖繼絕學為萬世正人心使堯舜禹湯文武之道燦然丕著於宇宙與天地無終極焉誠哉先賢所稱有生民以來未有盛於孔子者也往歲甲子朕巡省東方躬詣闕里登聖人之堂祇將祀事觀其車服禮器金石弦歌蓋徘徊久之不能去焉顧聖廟多歷年所丹雘改色榱桷漸圯用是愍然於心特發內帑專官往董其役鳩工庀材重加葺治經始於辛未之夏事竣於壬申之秋廟貌一新觀瞻以肅蓋深惟孔

實錄卷一百六十

十三

子之道垂範古今朕願學之志時切於懷每考天人性道之原修齊治平之要思以遠紹前緒膺迪生民凡所以尊崇褒顯者靡不隆禮竭誠以將景行仰止至意而況廟庭之地尤為聖人神明所憑依者哉今者登堂而陳俎豆入室而習禮儀營構既堅采章彌煥庶幾於朕心深有慰焉用是特遣皇子允祉敬展禋祀以告落成凡我臣民瞻仰宮牆倍增嚴翼尚益思敦崇德義砥礪倫常以不負朕尊師重道之意豈不休歟因勒貞石係以辭曰麟書啟瑞素王挺生上律下襲玉振金聲範圍百代陶甄萬類道備中和德參天地立型垂訓師道昭宣象懸七曜海納百川曩巡東魯臨河登岱歲

我尼山葵牆斯在虔恭展謁至德是欽宗風溥博教澤闡深洙泗之陽殿寢翼翼上棟下宇神靈安宅冬官特飭締造維新宏規大啟肅奉明禋聖人之居永以觀德千載傳心四方式則○命鑲黃旗漢軍副都統許廷臣管古北口總兵官事○丁丑

上詣

皇太后宮問安○戶部議覆漕運總督興永朝疏言嗣後白糧船隻回運之日旗丁如有掛欠除革運追賠外仍照監守自盜律治罪應如所請從之○予故總督倉場戶部侍郎伊圖荊州副都統燕泰各祭葬如例○戊寅戶部議覆陝西巡撫

實錄卷一百六十

十四

吳赫疏言招徠流民有地者既給與牛種銀兩以為耕種之資無地之民更為堪憐請與有地之民一例給銀安插應如所請從之○達賴喇嘛班禪胡土克圖遣使表貢方物賞賚如例○己卯陞步軍總尉薩穆哈為工部尚書○諭大學士等聞山東今年田收之後九月中蝗螟叢生必已遺種於田矣而今歲雨水連綿來春少旱蝗則復生未可知也先事豫圖可不為之計歟乘時竭力盡耕其田庶幾蝗種瘞於土而康爛不復更生矣若遺種即有未盡來歲復萌地方官即各於疆理區畫逐捕不使滋蔓其亦大有益也命戶部速檄直隸山東河南山西陝西巡撫等示所領郡縣咸令悉知必於

今歲來春皆勉力耕耨田畝。蝗蝻之災務令消滅。若郡縣有不能盡耕其田者。蝗或更生。則必力為捕滅。毋使蝗災為我民患。以原任福建按察使張勛為山東按察使。司按察使。先是留寓歸化城。四子有賽必定。額爾克白克。及沙和卓。納泰和碩齊。留寓張家口者。有莫洛等。原議與沙哈孫。額爾克白克。二同遣歸。至是理藩院題納泰和碩齊等四十戶。一百三十口。莫洛等十一戶。四十口。召至沙哈孫。額爾克白克等前諭之遣還。俱言居此年久。又無糧騎。斷不去也。沙哈孫。額爾克白克等言。伊等既無糧騎。我亦不能攜歸。是以令伊等仍住原地。其賽必定。額爾克白克。并沙和卓。共二百口。自

音錄卷一百六十一

十一

歸化城。遣行出。四子部落。汎界濟魯克。俄博地方。向沙哈孫。額爾克白克等歸去矣。納泰和碩齊。莫洛等。皆不願去。應暫留歸化城。得旨。納泰和碩齊等。著將軍等防護。俟噶爾丹使至遣歸。庚辰。諭大學士等。陝西。西安。鳳翔。二府地方。連被災傷。朕多方賑救。轉粟蠲租。又招集流移。散給牛種。然後四方仇離之民。漸次復還鄉井。今歲雖雨澤霑足。百穀阜成。而人民甫脫飢寒。未饒生計。若明歲應徵錢糧。即令輸納。誠恐閭閻儲蓄。終難充裕。西鳳二府屬被災州縣。衛所。康熙三十年糧米。照舊徵收。外其地丁銀兩。著通與蠲免。即行文該督撫。嚴飭各屬。徧加曉諭。務俾均沾實惠。以稱朕愛養休息

至意。如有不肖。有司。朦混私徵者。該督撫指名劾奏。從重治罪。將此旨傳諭戶部。免江南六合縣本年分水災額賦。有差。辛巳。諭大學士等。寧夏地方。最為緊要。總兵官馮德昌。趙良棟。劾其扣剋軍糧。馬匹倒斃。馮德昌著解任。此員缺。以登州總兵官王化行調補。免山西沁州定襄武鄉三州縣本年分電災額賦。有差。壬午。陞盛京刑部理事官沙哈里為都察院左副都御史。癸未。陞甘肅提標副將岳昇龍為山東登州總兵官。甲申。

上詣

皇太后宮問安。以翰林院侍講張榕端為順天武鄉試正考

實錄卷一百六十一

十六

官。左春坊左贊善陸恭為副考官。喀爾喀車臣汗遣使進九白年貢。宴賚如例。丁亥。設高家堰通判一員。中河通判一員。移揚河通判於高郵州。瓜洲鎮。鎮河道。開產事務。歸江防同知專管。鎮江府屬丹徒。丹陽。二縣河道。以各該縣縣丞專管。令該府通判管理。四川松潘總兵官高鼎。以老病乞休。允之。戊子。禮部題已故輔國公瓦山之玄照例請封得旨。瓦山人材優長。伊父原係貝子。其女著封為縣君。予故散秩大臣阿玉石祭葬如例。己丑。

上詣

皇太后宮問安。免直隸順天保定河間真定四府屬三十八



州縣本年分水災額賦有差。庚寅九卿遵旨議覆王科給事中彭鵬參順天鄉試主考徐倬等疏內語涉狂妄不敬應革職。

上諭大學士等是科鄉試若言有弊事無顯露若言無弊物論紛紛徐倬學問素優開列試官疏內並無其名朕令通行開列將伊點出本日即入貢院似乎無暇縱難言全無一二通關節者若云皆係屬託作弊則所取百有餘人屬託者必須數百人頃刻間何暇徧通關節作弊也彭鵬疏內有在朕前講論文章之語既係言職使盡其意可耳彭鵬又請照原卷刊刻頒行朕意亦以為是凡試官豈有不顧名節之理照原卷刊刻頒行天下則文章之優劣自不能掩試官亦知警戒矣向日徐乾學高士奇王鴻緒為言官參奏朕令其休致回籍今徐倬彭鵬元亦令休致回籍彭鵬係言官從寬免其革職。

上幸暢春園。免江南海州等八州縣衛本年分水災額賦有差。辛卯。

上以大閱幸玉泉山駐蹕。兵部議覆給假古北口總兵官王廷彪疏言古北一鎮所屬地方係沿邊要區遇有各營將弁缺出請以熟諳地方品缺相當之員選擇題補應不准行得旨古北鎮屬將弁員缺准該總兵官保題爾部仍行引見。

又議覆王廷彪疏言臣標及石匣新營皆係步卒古北實為重鎮請照直隸各省馬二步八經制之處應不准行得旨古北口石匣兵丁著照該總兵官所題准為馬二步八之數。

壬辰。

上大閱於玉泉山麓八旗大紅衣礮等火器騎步鳥鎗及前鋒護軍驍騎官兵各舉大纛旗幟分翼排列。

上躬操甲冑遍觀畢御玉泉山巔黃幄幄中吹海螺三次八旗官兵皆吹海螺三次火器營官兵放大礮三次騎步鳥鎗兵放鳥鎗三次官兵齊聲發號趨進軍勢威嚴火礮鳥鎗之聲響震山谷事畢樹侯。

辛卯

上親射。發十矢皆中。次命十五善射并硬弓侍衛等射。賜八旗官兵牛羊。是日回暢春園。甲午。

上自暢春園回宮。乙未。

上御太和門視朝文武陞轉各官謝恩。免江南全椒縣本年分水災額賦有差。戶部議覆四川陝西總督佛倫疏言秦省米糧價值近日遞減請停招商販糶應行文直省督撫停其販賣米石將原發庫銀照數收取從之。丙申。

上詣。

皇太后宮問安。命彰德府同知專管彰德河務廟灣同知兼管鹽城海州河務以直隸清河故城江南沛縣河道歸併東

省道員兼轄德州南河河道歸上河通判管轄○丁酉陞四川永寧副將卓策為四川松潘總兵官○鄂羅斯察漢汗遣使進貢大學士等將鄂羅斯進貢奏章繕譯進呈

上曰鄂羅斯國人材頗健但其性偏執論理亦多膠滯從古未通中國其國距京師甚遠然從陸路可直達彼處自嘉峪關行十一二日至哈密自哈密行十二三日至吐魯番吐魯番有五種部落過吐魯番即鄂羅斯之境聞其國遼闊有二萬餘里漢時張騫曾出使西域或即彼處地方明永樂嘗經出塞彼時以為甚遠按其所至之地離此亦不過千餘里史書所載霍去病曾出塞五千里想或有之今塞外尚有碑記可考至外藩朝貢雖屬盛事恐傳至後世未必不因此反生事端總之中國安寧則外藩不作故當以培養元氣為根本要務耳○喀爾喀土謝圖汗遣使進九白年貢宴賚如例○戊戌。

上詣

皇太后宮問安 免山西蒲州本年分水災額賦○以一等待衛隆科多為鑾儀衛鑾儀使

實錄卷一百六十

十九

大清聖祖合天弘運文武睿哲恭儉寬裕考敬誠信中和功德大成仁皇帝實錄卷之一百六十

實錄卷一百六十

二十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百六十一

康熙三十二年癸酉十一月庚子朔

上詣

皇太后宮問安○諭大學士等朕每日聽政必於辰刻中御門聞部院奏事大臣每日於黎明時齊集午門外久候方始入奏迨奏畢復各歸署理事無乃過勞朕觀大臣內有年及六旬者亦有六旬以上者此後於家中各進糜粥按時來奏亦不至遲誤大臣節勞養體亦可多為朕効力數年爾等可將朕旨傳與部院大臣知之○辛丑

上奉

皇太后謁

陵命皇長子允禔皇五子允祺隨駕是日啟行駐蹕烟郊贈故天津總兵官劉國軒為太子少保予祭葬如例旌表山東節婦焦毓慶妻郭氏給銀建坊如例壬寅

上詣

皇太后行宮問安○駐蹕三河縣段家嶺癸卯

上駐蹕薊州城內甲辰

上駐蹕龍門外○乙巳

上詣

暫安奉殿

孝陵行禮奠酒舉哀畢至

仁孝皇后

孝昭皇后

孝懿皇后陵奠酒舉哀是日

上奉

皇太后閱視

孝陵東旁

寶城○幸湯泉駐蹕○工部議履差往查勘盛京城垣工部左侍郎圖爾宸等疏言盛京城垣坍塌之處及城內舊池舊溝

俱應修理疏濬揀選盛京四部官員協同盛京工部監修應

如所請從之○丁未

上詣

皇太后行宮問安是日駐蹕遵化州城西北○戊申

上駐蹕三屯營城南○己酉

上駐蹕米峪口○辛亥免江南高郵等四州縣本年分水災額

賦有差○癸丑雲南貴州總督范承勳陞見

上諭曰爾係盛京舊人爾父兄累朝効力爾兄又為國盡節朕因見爾思及爾兄心為慘切不見爾八九年矣爾鬚髮遂皓白如此今因郊外寒冷將朕貂帽貂褂白狐腋袍賜爾此時

更換恐受風寒可明日服之來謝恩○甲寅

上詣

皇太后行宮問安○授故奉國將軍拜塞子馬富塔為奉恩將軍

乙卯

上駐蹕遵化州龍山南○丙辰

上駐蹕三屯莊○鑲黃旗二等阿思哈尼哈番覺羅勒德渾年

老解退以其子納沁襲替○丁巳

上駐蹕黃崖口○諭刑部今年直隸各省情實人犯著停決○

戊午

上詣

皇太后行宮問安○駐蹕邦均○己未

上駐蹕通州○庚申

上奉

皇太后回宮○諭大學士等今歲畿輔地方歉收米價騰貴通

倉每月發米萬石比時價減少糶賣其糶賣時止許貧民零

糶數斗富貴不得多糶轉販始於民生大有裨益又蒸造燒

酒多費米穀今當米穀減少之時著戶部速移咨該撫將順

永保河西府屬蒸造燒酒嚴行禁止○以原任山西布政使

郭渾為甘肅布政使司布政使○甲子冬至祀

天於

園丘

上親詣行禮○遣官祭

水陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○諭戶部朕念切民生時歷宵旰或在宮禁之中

或經巡省之地務以編氓疾苦備悉諮詢其從各省來京陛

見官員及往來奉使人等亦無不以該省雨澤曾否應時田

畝有無收穫並問閭閻資生情形一一體訪比年以來因國家

經費尚充遂將各省地丁額賦及舊欠錢糧節次蠲免即從

前未經停徵之漕糧亦逐年免徵總欲使海隅蒼生培固元

氣庶臻於家給人足之風今歲畿輔地方雖禾稼未獲稔收

初意小民餬口之需猶足資給生計未必遂致艱難頃者展

謁

夏之際時值益昂小民必艱粒食此朕目所親睹若來年錢糧仍然徵收朕心實有未忍順天河間保定永平四府康熙三十三年應徵地丁銀米著通行蠲免所有歷年拖欠悉與豁除行文該撫曉諭各屬務令人沾實惠以副朕子育黎元至意爾部即遵諭行○乙丑

上率王以下文武大臣侍衛等詣

皇太后宮行冬至慶賀禮御太和門王以下文武各官上表朝賀次鄂羅斯使臣行禮○丙寅

上詣

皇太后宮問安○諭大學士等朕前謁

聖祖實錄

卷一六一

七六四

陵時兵部侍郎恕舒隨從往往躲避朕未常見且人材甚屬不及著解侍郎任前保舉司官時各部止舉二三人督捕衙門司官甚少侍郎博際反保舉幾及十員中有定見之今豈如是乎觀博際舉止猥瑣全無大臣之體著降三級調用正藍旗輔國公都統化善年老著解都統宗人府右宗人任鑲藍旗副都統葉儲赫人材不及著解副都統任各部院內有年老疾病不能辦事才力不及者著該堂官查叅具奏爾等將此旨傳與各部丁卯皇子允禩生○戊辰以正紅旗滿洲副都統趙山為督捕侍郎正藍旗漢軍副都統伊壘以老病乞休得旨伊壘自授副都統以來並無効力之處人甚庸

劣著革去副都統○諭大學士等西安地方今年大豐西安分戌蘭州兵宜撤回西安設有噶爾丹之警西安亦近調之不久可到爾等會同議政王大臣等詳議具奏尋議寧夏既有京城大兵駐防應撤回駐防蘭州西安官兵令將軍博齊等率之回西安得旨所有京城大兵於來年草青時亦撤回餘如議命河道總督于成龍來京已巳陞內閣學士安布祿為兵部右侍郎調左副都御史沈圖為內閣學士兼禮部侍郎

十二月庚午朔

上詣

聖祖實錄

卷一六一

七六四

皇太后宮問安○免江南清河縣本年分水災額賦有差○未

上諭大學士伊桑阿等曰通都察院議處吏部誤議知府盧騰龍等革職一事將堂官降三級司官降四級俱調用所議甚當朕觀人之識見精神有限不能過其本來分量烏得無錯但自知其錯即宜承認若既知其錯而不承認飾圖文飾則其錯彌甚必致壞事前朕十三四歲輔政大臣理事時有誤行一事朕至今猶憶之彼時遇頒恩赦釋放罪犯曾赦一不應赦之罪人該部以不應赦而赦應否釋放請旨大學士李蔚奏欲將錯就錯朕問爾此言於此事尚可如過不應正法

之人誤行正法則人死豈能復生此言亦可乎。李蔚不能對大學士圖海奏此事實臣等之錯有何辯處。天下事惟人命至重。朕察之又察。然已行之事其中能保無誤耶。以輔國公齊克塔哈為宗人府右宗人。陞護軍統領楊岱為正藍旗蒙古都統。達賴喇嘛疏言為喀爾喀厄魯特事奉到敕旨并伊錫格隆所傳口諭。聞之不勝懼怖。諸凡蒙古皆奉貢天朝之國。而厄魯特不聽訓誡。近害敕使。又噶爾丹博碩克圖汗。以三事陳奏。其見責於

聖明極當。但臣已年邁國事大半第已主之已在睿照中。即第已向亦仰體

聖意實心行事。目前現遵旨而行。倘臣意有所未及力有所未到。伏祈時頒訓諭。又令伊錫格隆口奏云。吾國之事皆第已為主。乞

皇上給印封之。以為光寵。又第已令口奏云。願繳玉印乞給以金印。得旨此事頗大。著議政王大臣等會議。以聞。尋議達賴喇嘛自領給冊印受封以來恭順職貢有年。今以其身已老。國事皆第已主之。乞封第已授之印信。以光寵之。為之懇請。而第已又戴

皇上恩眷誠心乞請金印。應如所請。又按此玉印乃明朝給闡化王之印。今第已既已繳還應付所司從之。○壬申諭大學

士等。朕觀近日政務簡少。每日啟奏部院大臣中有年邁者甚屬勞苦。自後年六旬以外大臣令其量力。間二三日一來啟奏。至折本內遇緊要事朕有旨傳進爾等方來請旨。若無朕旨爾等將折本彙齊。亦間二三日一來啟奏。癸酉諭掌院學士傅繼祖等翰林院衙門甚屬緊要。凡翰林官每日作文寫字誦習講究。是其分內之事。各宜勤勉。以盡職掌。若有結交不肖。牽引妄行。遇學差缺出。恣為奔競。營求者不時訪

奏。○大學士等奏。皇上宵旰勤勞。勵精圖治。天下已享太平。事務亦極清簡。臣等敢請每日奏章交送內閣。

皇上隔三四日御門一次。聽理引見人員。與綠頭牌啟奏諸事。似於政事亦不致有誤。

上曰。朕聽政三十餘年。已成常規。不日日御門理事。即覺不安。若隔三四日。恐漸致倦怠。不能始終如一矣。此乾清門乃朕宮中。亦有何勞。但念年老大臣黎明從家中入奏。甚為勞苦。故有此諭。朕仍照常每日聽政。吏部題正黃旗二等阿達哈。哈番覺羅恭額。故無嗣。其世職應與伊兄三等阿達哈。番塞克森承襲。并為二等阿思哈。尼哈番從之。先是廣東巡撫江有良巡視兩廣鹽課太常寺少卿沙拜。彼此互奏奉旨著江南江西總督傅拉塔。福建浙江總督朱弘祚會審具

奏至是總督傅拉塔等查審巡視兩廣鹽課沙拜誣奏布政使張建績得解費銀一萬四千餘兩應革職巡撫江有良阻壞鹽法亦應革職得旨吏刑二部會同核擬具奏○丙子陞護軍參領關布為鑲藍旗滿洲副都統○正黃旗漢軍都統楊文燾以老病乞休得旨楊文燾任都統以來並未効力人材亦不及著解都統任仍以世職行走陞督捕郎中碩羅為都察院左副都御史○宴衍聖公孔毓圻等於禮部○予故奉國將軍拜塞祭一次丁丑免湖廣興國江夏等四州縣本年分旱災額賦有差○予故滿洲副都統達寧阿祭葬如例○陞正藍旗蒙古副都統查木揚為護軍統領○旌表直隸節婦高陽縣劉爾極妻李氏靜海縣高爾承妻鉅氏烈婦東安縣任義妻孟氏各給銀建坊如例已卯以內閣學士常綬充經筵講官○陞驍騎參領勒奇為正藍旗漢軍副都統○庚辰陞前鋒參領瓦邇達為正紅旗滿洲副都統護軍參領孫渣齋為鑲紅旗滿洲副都統辛巳

上詣

皇太后宮問安○賜出征厄魯特陣傷殘廢人員齊格等六十人一身價之半○壬午陞黑龍江協領拉自為黑龍江右翼副都統○癸未諭大學士等行間被創殘廢者雖已給身價之半而不食錢糧則貧者無以為生此等皆奮力行間至於

殘廢良可憫惻茲後若此殘廢中高可支持者充南苑門兵倉庫諸地老人缺給以錢糧前為護軍校驍騎校今又可支持者諸館之正副首領缺出用之○刑部右侍郎李迪疏請回籍還葬允之○陞正黃旗漢軍副都統周卜世為漢軍都統○甲申

上御太和門視朝文武陞轉各官謝恩○

上幸暢春園○乙酉免江南興化縣本年分水災額賦○以輔國將軍塞冷額為正藍旗蒙古副都統○丁亥

上幸南苑行圍○免山西河津榮河二縣本年分水災額賦○

禮部題據宗人府咨稱輔國將軍伯奇妻博爾濟金氏一等

侍衛勒克德妻高氏守節有年請加旌表應照例各給獎諭

敕一道及銀兩緞疋從之○戊子山西巡撫噶爾圖疏言

運湖灘河朔米石應否暫行停止得旨令陝西米石充足此

米石百姓勞苦此所運之米令其停止將船隻送至歸化城

等處加意收管○諭兵部本朝滿洲官兵從來精銳驍勇遇

寇必克所向無敵前厄魯特噶爾丹之役官兵不能悉體朕

意即行勦滅致失機會爾奏膚功朕心為之不懌故比年以

來簡閱官兵歲凡兩舉朕躬臨指示訓誨頃閱武時見諸士

平行列整齊隊伍明晰進退嫻熟嚴肅無譁所有軍令無不



遵守該管官員號令約束既嚴且善此皆官兵協志同心各加奮勵所致朕心深為嘉悅八旗前鋒護軍撥什庫騎兵等各賞給一月錢糧無職守官照護軍給一月錢糧火器驍騎兵亦照護軍賞給有管轄職守官悉賞給內庫緞疋其賞賜緞疋戶部會同總管內務府衙門議奏這次閱武時官員內有降級罰俸者俱准開復以示朕體恤將士申明賞罰之至意至八旗步軍官兵有察緝盜賊巡理道路等役甚多極為勞苦步軍亦各賞給一月錢糧管步軍官亦各賞給緞疋獎勵恤勞用稱朕意爾部即遵諭行○已丑吏部刑部議覆江南江西總督傅拉塔等審廣東巡撫江有良巡鹽少卿沙

賞纂卷五

七

拜五參一案均擬革職應如所題得旨江有良巡撫安徽居官不善調補廣東聲名又劣沙拜為人輕佻狂妄俱革職以原任貴州巡撫田雯為刑部右侍郎○庚寅陞護軍叅領胡什巴為杭州副都統○免浙江餘姚等三縣本年分水災額賦有差○免江南泰州本年分水災額賦○先是

上諭理藩院聞喀爾喀公西卜退哈坦巴圖爾納木札爾陀音札薩克台吉阿里雅阿爾薩蘭衛寨泰等自克魯倫前徙已至俄爾渾圖喇矣其和托揮特之根敦戴青不與眾喀爾喀同來在色校額地方今厄魯特未必不動而若輩不知遊行牧放恐猝遇厄魯特可著尚書班迪往諭根敦戴青并西卜

退哈坦巴圖爾等俱令內移不得越克魯倫巴顏烏爾遊牧未行根敦戴青使至得旨根敦戴青既有使來應發撥付來使攜歸著理藩院議奏尋議喀爾喀和托揮特根敦戴青疏言去年札爾布余札薩克圖汗等使臣繼臣伯之缺置之右無寅年噶爾丹西勒圖澤卜尊丹巴胡土克圖理藩院尚書喀爾喀兩汗授臣為札薩克卯年與濟喇克衛徵哈什哈交戰敗之已年與車臣諾顏交戰敗之往禦噶爾丹雖不之值曾殺察罕台吉以及眾兵與厄爾坤交戰擊斬之諾木齊台吉等叛擊取其半丹津陀音之子札郎阿伊爾札海台吉等叛還復擊而取之其他族類及我屬裔并眾飢人俱已收集

賞纂卷五

七

我部落叛入鄂羅斯者亦掠取以歸緣歷年征伐是以有誤請安查庫倫白爾齊爾之地原任尚書阿喇尼等前此會閱曾授根敦戴青為札薩克今根敦戴青未來其札薩克之處姑不議俟彼親至應授何秩安插何地另議奏聞來使達爾漢諾顏塔布囊言根敦戴青在杭愛今既誠心遣使請安進貢當移文諭之其文畧曰前者眾喀爾喀窮困來降

皇帝受之俱依品級加封編為旗分佐領撥給地方使各得其所矣惟爾根敦戴青獨留在後聖上聞之常念爾近厄魯特遊牧恐為彼所侵害特將此故遣大臣諭爾已皆點出今達爾漢諾顏塔布囊至以爾疏陳奏

聖上方知爾與車臣諾顏交戰。堵禦噶爾丹。擊殺察罕台吉。巴爾坤等。征討諾木齊台吉等之事。大加獎許。今爾仍在杭愛遊牧。不知有厄魯特侵害可慮之事否。是以檄爾。或爾仍在杭愛。並無可虞。或即欲內遷。可速備文來報。且爾既誠心奉貢。似宜親來請

皇上起居。我等職在所司。特檄諭爾。此文應用。臣衙門印信。令來使齎往。又聞公西卜退哈坦巴圖爾等。在土喇等地方。土喇乃厄魯特行路。若無妨礙。宜各於遊牧之地。遠設偵探。加意防禦。臣等亦備印文諭之。奏入。從之。○辛卯。調鑲黃旗漢軍副都統許廷臣為廣州副都統。理藩院員外郎馬迪差

實錄卷一百六十二

三

往策妄阿喇布坦至哈密被害。授一拖沙喇哈番。予祭葬如陣亡例。○甲午。孝莊文皇后忌辰。遣皇太子允初祭

暫安奉殿。上回宮。江南江西總督傅拉塔來京。陛見。賜貂帽銀鼠袍褂等物。乙未。四川陝西總督佛倫來京。陛見。賜貂帽銀鼠袍褂等物。○丁酉。歲暮。祭

太廟。上親詣行禮。遣官祭永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。遣官祭太歲之神。戊戌。賜朝正外藩科爾沁

烏朱穆秦喀爾喀厄魯特土默特郭爾羅斯扎魯特翁牛特

扎賴特西子部落毛明安阿霸哈納鄂爾多斯巴林奈曼王

貝勒貝子公台吉塔布囊等及內大臣大學士上三旗都統

實錄卷一百六十二

古

副都統侍衛等宴。旌表八旗節婦滿洲牛紐妻關氏等三

十九人。蒙古田木迷妻孔氏等七人。漢軍于中仁妻杜氏等

十人。各給銀建坊如例。是歲。入丁戶口二千三十六萬五

千七百八十三。田地山蕩畦地五百九十七萬三千四百五

十六頃三十四畝。有奇。徵銀二千七百三十八萬五千六百

三十一兩有奇。米豆麥六百九十五萬八千三百六十四石

有奇。草三百八萬一千八百七十三束。茶十五萬七千四百

五十三引。行鹽四百三十三萬三千四百三十引。徵課銀二

百六十九萬七千一百六十三兩有奇。鑄錢二萬八千九百

九十五萬八千六百七十有奇。

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十一

聖祖實錄

五

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十二

康熙三十三年甲戌春正月己亥朔

上詣

堂子行禮還宮拜神畢率諸王貝勒貝子公及內大臣大學士  
侍衛等詣

皇太后宮行禮御太和門王以下文武各官外藩王及使臣等  
上表朝賀停止筵宴朝鮮國王李焞遣陪臣柳命天等表  
賀冬至元旦

萬壽節及進歲貢禮物宴賽如例庚子

實錄卷一百六十二

十

上詣

皇太后宮問安○辛丑

上幸暢春園○乙巳

世祖章皇帝忌辰遣官祭

孝陵○戊申順天府進春○

上自暢春園回宮○庚戌孟春享

太廟遣領侍衛內大臣公舅舅佟國維行禮遣官祭太歲之

神○辛亥祈穀於

上帝

上親詣行禮○

上奉

皇太后幸暢春園○壬子以上元節賜外藩喀爾喀科爾沁烏朱穆秦阿祿科爾沁吳喇忒土默特郭爾羅斯扎魯特翁牛特敖漢扎賴特蘇尼特阿霸哈納巴林阿霸垓喀喇沁克西克騰鄂爾多斯杜爾伯特索曼蒿齊忒四子部落等王貝勒貝子公台吉及內大臣大學士上三旗都統副都統尚書侍郎學士侍衛等宴○癸丑上元節賜外藩王貝勒貝子公台吉等及內大臣大學士上三旗都統副都統尚書侍郎學士侍衛等宴○乙卯

上詣

皇太后宮問安。

實錄卷一百一十二

二

上以盛京年歲歉收命戶部尚書馬齊馳驛前往以倉穀支給兵丁○丙辰九卿議覆河道總督于成龍條奏修築黃運兩河應增設河道官員豁免民夫等事俱不准行于成龍明知難行之事故為條奏非大臣實心任事之義應革職。

上諭大學士等曰凡為臣者須行實事不當沽取虛名于成龍奏稱豁免民夫夫河道工程浩繁能不用民夫而可以集事乎且河道增設一官則民間多一事現在所設官員歷年以來料理工程並無違誤之處總之河工經理惟在得人不在增設官員也隨召于成龍問曰爾向日議河工事曾面奏減

水壩宜塞不宜開汝今觀減水壩果可塞乎于成龍奏曰臣彼時妄言減水壩宜塞於今觀之實不可塞。

上曰爾前言靳輔糜費錢糧並未盡心修築河工爾今觀之何如于成龍奏曰臣今亦照靳輔所修而行如果修築不善去年大水安能不至潰壞臣見去年大水不勝畏懼故請增修上曰既如此則爾所奏之非靳輔所行之是何以不明白陳奏爾排陷他人則易身任總河則難此非明驗耶又諭大學士等曰于成龍曾奏河道兩岸未見靳輔栽有柳樹朕巡歷南方搭河干之柳問之無辭以對又奏靳輔放水以濟民田百姓苦累朕問從何處放水所濟者何處之田奏曰臣未曾親

實錄卷一百一十二

一

見原任侍郎開音布管理下河工程時曾題參開官開高郵州南減水閘放水衝淹民間麥田朕後至其地觀之開閘洩水斷不至淹害麥田及問開音布所開何閘致淹麥田亦無辭以對此不過附會于成龍之說耳且未見裁抑董誥亦曾言之王鵬董誥李應薦係山東人皆畏懼于成龍于成龍任直隸巡撫時居官好亦曾効力但為人膽大凡事必欲取勝其所奏之事止徇人情面欲令人感彼私恩夫擢用人才乃朝廷之大權非為臣者市恩沽名所可擅行之事也至于成龍條奏內修理通州天津一帶河道及培修高家堰隄亦有當酌議處高堰保淮敵黃甚為緊要此處稍有疎虞則淮安

一帶州縣居民田廬皆受水害。此本再詳議具奏。○戶部議覆盛京戶部侍郎阿喇彌疏言盛京地方畝收奉旨運山東省米石至三岔口以濟軍民。今山東運來之糧現由金州等處海岸經過。請將所運糧米酌量截留減價發賣。再遼陽秀巖鳳凰城三處之人向來俱在牛莊買米。亦應照金州等處將糧米截留行文各該管官令其到三岔河購買運去。但運米與運穀不同。請將山東穀石令地方官酌量易米。則需船少。而船價亦較省。應如所請。行文山東巡撫等將穀二石易米一石。轉運得旨。依議速行。丁巳。

上詣

實錄卷五十一

中

皇太后宮問安。○戊午。賜朝正外藩王貝勒貝子公台吉等銀幣鞍馬有差。○己未。九卿議覆河道總督于成龍條奏高家堰等工程作何修築之處。應令該督察明具題。

上台于成龍問曰。如爾所奏興工修築。今年六月內能完工否。于成龍奏曰。即今准行備辦物料。亦需時日。六月內斷不能完工。

上曰。既如此。則已過發水時矣。有何益乎。諭大學士等曰。于成龍面奏雲梯關以下至海口。因水勢散漫。以致沙漸淤長。朕思海口為黃河入海之路。海口水勢迅急。方能刷沙。河水乃得順流。此為緊要所當疏濬者也。至於河南黃河隄岸單薄。

低矮。應宜加土培修。此等處再詳議具奏。○庚申。

上詣

皇太后宮問安。○振武將軍甘肅提督孫思克疏言蒙古頭目博濟聞伊兄巴圖爾額爾克濟農投降蒙恩。安插寧夏。賀蘭山今亦率其屬下男婦一百一十餘人來降。求與伊兄同居。上命理藩院遣官一員送博濟等至巴圖爾額爾克濟農所。令其完聚。○辛酉。諭大學士等。學政闕係人材甚屬緊要。朕觀原任御史陸隴其學問優長。操守甚善。直隸守道邵嗣堯於煩劇之事未見其長。而操守學問俱優。若以此等有操守之人補授。必能秉公校士。革除積弊。有裨學政。○壬戌。

實錄卷五十一

五

上奉

皇太后自暢春園回宮。○予故盛京戶部侍郎莽色祭葬如例。○鑲黃旗漢軍都統諾邁故遣皇長子允禔及大臣侍衛等往奠茶酒。○癸亥。以故一等阿思哈尼哈番劉允楨弟劉允桂襲職。○以原任都統張所知補正黃旗漢軍副都統。○甲子。九卿議覆河道總督于成龍於河工事宜。妄行陳奏。前後互異。應革職。枷責。其河南黃河險于應令接任總督察明具題。得旨。此事應照九卿所議行。但于成龍修河之事未完。著革職留任。帶罪圖功。○調安徽巡撫高承爵為廣東巡撫。○以兵部右侍郎李光地提督順天學政。○乙丑。諭大學士等。

四川陝西總督佛倫請修黃城爾舊城。朕覽其所進地圖。黃城爾地方實屬緊要。自甘州至西寧道里遙遠。若自黃城爾至西寧其路甚近。三日可達。令官兵駐防甚為有益。青海居住台吉等曾以為此地乃伊等地方。懇請給還。朕親政時。諭輔政諸臣。此係大草灘地方。與我朝最為要地。斷不可給。故至今。錄我版圖。凡遣往西邊官員復命者。朕常詢問地方形勢。亦嘗詳閱輿圖。故於邊疆要地無不記憶。此處駐防兵丁。事屬緊要。著該督會同提督等詳議具奏。○陞福建臺灣總兵官穆維雍為鑲黃旗漢軍副都統。○九卿議覆四川陝西總督佛倫疏言。臣奉旨查閱三邊陝西自肅鎮嘉峪關北邊。以至寧夏賀蘭山起處。俱係土築邊牆。自賀蘭山之勝金關起。至賀蘭山盡之平羅營原無邊牆。以山為界。自平羅營以至延綏汎地之黃甫川。亦係土築邊牆。至於甘肅涼莊一帶南山原無邊牆。俱係剷山掘壕為陡岸作界。其間陡岸壕塹甚多殘缺。又肅甘涼等處南山及寧夏之賀蘭山隘口原有石壘木柵堵塞。年久倒廢。人可越度。又西寧鎮汎之西石破鎮海西川一帶原有邊牆。其南山直抵河州北山直抵莊浪原無邊牆。皆係剷山為界。亦有年久頽倒。可以越度者。或平坦無蹟者。三邊牆垣歷年久遠坍塌已多。若不亟為修理。必致倒廢。但三邊延長遼遠。不能刻期修理。勒限完工。請於

每年漸次修補。今提鎮及專城之副將參將遊擊等量給步戰守兵工食。督其修理各隘口。應堵石壘木柵之處。亦令提鎮等酌量堵塞。其倒塌邊牆沙淤壕塹。應令兵丁修挖。俱應如所請。從之。○丙寅。江南江西總督傅拉塔。四川陝西總督佛倫。雲南貴州總督范承勳。陞辭回任。○以直隸守道邵嗣堯提督江南學政。翰林院檢討顏光燾提督浙江學政。○兵部議覆四川陝西總督佛倫疏言。日寧北橫城進口。由寧夏抵莊浪驛站舊路。通計一千八百餘里。若進橫城出口。勝金關。由中衛渡河直抵莊浪。纔九百一十里。較舊路近九百里。有奇。今應於勝金關添設一站。中衛添設一站。自中衛渡河由黃沙坡西行。經大勞壩沙圪堆蘆塘松山。四處各添設驛站。中衛勝金關驛務。即令中衛同知管理。大勞壩沙圪堆一驛。事務添設驛丞一員管理。仍聽中衛同知兼轄。移蘭州蘭泉驛驛丞管理蘆塘松山二驛。事務聽莊浪同知兼轄。俱應如所請。從之。○鄂羅斯察罕汗遣使進貢。賞賚如例。○丁卯。以刑部郎中陳義暉為河南按察使。司僉事。提調學政。禮部郎中王那為廣東按察使。司僉事。提調學政。刑部郎中岳宏譽為湖廣按察使。司僉事。提調學政。戶部郎中王綜為江西按察使。司僉事。提調學政。禮部郎中劉滋為山西按察使。司僉事。提調學政。禮部郎中史陸興為福建按察使。司僉事。提



調學政刑部郎中曾王孫為四川按察使司僉事提調學政  
禮部郎中林麟煊為貴州按察使司僉事提調學政兵部郎  
中朱大任為廣西按察使司僉事提調學政山西冀寧道張  
倬為雲南按察使司副使提調學政貴州思南府知府劉謙  
吉為山東按察使司副使提調學政浙江嚴州府知府武之  
亨為陝西按察使司副使提調學政○厄魯特巴圖爾額爾  
克濟農來朝進貢賞賚如例

二月己巳朔諭大學士等據戶部查奏霸州等十州縣存貯  
米五萬七千五百餘石穀八百石天津衛存貯米一萬石穀  
四萬四千一百餘石此米穀現在倉與否足以賑給與否若

冊錄卷五十一

足用則以餘米平價糶與百姓可行與否山東漕糧截留數  
萬石平價糶賣則穀價不貴於民生大有裨益今輒至何州  
縣平價以糶應截留米若干萬石即遣戶部司官一員至巡  
撫郭世隆處令其逐一迅速詳議繕摺付伊齎奏○庚午兵  
部題順承郡王下散騎郎員缺開列擬正擬陪人員請補

上曰王年幼左右宜用老成此散騎郎擬正之人與今日引見  
補授護衛之人皆童穉耳少年相聚何以導王為善都統希  
福歷官已久係所屬大臣可召來切責其補授散騎郎護衛  
二本俱發回另行揀選具奏○辛未

上御經筵講畢賜大學士九卿詹事及講官等宴○壬申諭大

學士等設立科道官員特為條奏政事今觀都御史以至科

道條奏者甚少問有條奏者每存私意或將不睦之人欲行

傾陷則托辭參奏此等情弊朕豈不知嗣後科道官員各宜

端其心術以有益國家之事條奏爾等可將此旨傳諭○封

多羅安郡王馬爾渾妹為郡君授其塔席納海為多羅額駙

○陞安徽布政使佟國佐為安徽巡撫○癸酉

上御太和門視朝文武陞轉各官謝恩○直隸巡撫郭世隆等

疏言臣遵旨會同戶部員外郎雍泰查霸州文安等州縣及

天津衛現在貯倉米穀共十萬餘石將此米賑濟霸州等州

縣飢民需用三萬石所餘米穀應減價糶賣其景州等州縣

冊錄卷五十二

將山東漕米截留平糶得貢霸州等被水災地方所有積穀

除散賑外餘著減價發糶其沿河一帶景州等各州縣衛所

著將山東漕米每處截留二十石亦發糶以平米價爾部行

文該撫責成州縣實心奉行務俾小民均沾實惠朕不時遣

人稽察如小民有不沾實惠將該管官一併從重治罪斷不

寬宥○予故散秩大臣三等精奇尼哈番白爾肯祭葬如例

○以一等侍衛莫爾渾為正黃旗蒙古副都統陞護軍參領

車納輔為鑲紅旗蒙古副都統○甲戌以吏部尚書熊賜履

兵部尚書杜臻為會試正考官兵部左侍郎王維珍工部右

侍郎徐潮為副考官以漕運總督與永朝為鑲黃旗漢軍



副都統○丁丑遣大學士李天馥祭

先師孔子○陞湖南巡撫王樞為漕運總督以原任湖北布

政使李燁為江南安徽布政使司布政使○以雲南提督諾

穆圖為鑲藍旗漢軍都統陞雲南永順總兵官偏圖為雲南

提督調雲南楚姚蒙景總兵官何應元為直隸古北口總兵

官○戊寅祭

大社

大稷遣領侍衛內大臣公福善行禮○

上詣

皇太后宮問安○己卯

實錄卷一百一十二

十

孝康章皇后忌辰遣官祭

孝陵○調湖廣襄陽總兵官周化鳳為雲南永順總兵官陞貴

州黔西副將張開元為雲南楚姚蒙景總兵官陞西永昌副

將祁伯勇為湖廣襄陽總兵官○庚辰

上巡幸畿甸命皇太子允初皇三子允禔

皇四子○隨駕是日啟行駐蹕南苑○以故三等精奇尼哈

番白爾肯子白青額襲職○辛巳

上駐蹕鳳河營○壬午

上駐蹕河西務○癸未

上駐蹕楊村○甲申

上駐蹕西沽○諭大學士等朕巡視所至見運河及渾河決口

民田淹沒甚為可憫著直隸巡撫郭世隆天津總兵官李鎮

鼎會同倉場侍郎常書自通州至西沽兩邊隄岸再自西沽

至霸州決口宜修之處閱視明白速行修築○乙酉

上駐蹕天津○丙戌

上駐蹕王慶坨○遣官祭

先農之神○丁亥諭大學士等通州倉米平價發糶米價頗

減於民大有裨益又沿河一帶州縣已截留山東漕運糶與

百姓誠恐不肖地方官員或增價發糶或糶與販賣之人以

致百姓不沾實惠著巡撫郭世隆不時巡察○陞貴州布政

使董安國為湖南巡撫山西平陽府知府石文晟為貴州布

政使司布政使○命山西大同府同知移駐右衛管理駐防

兵餉并添設倉庫大使各一員○戊子

上駐蹕信安鎮○己丑

上駐蹕苑家口○辛卯

上駐蹕趙北口○癸巳春分朝

日於東郊遣刑部尚書圖納行禮○予故鑲紅旗蒙古副都統

朱車祭葬如例○贈故福建海壇總兵官林賢太子少保予

祭葬如例○甲午

上駐蹕段村○

實錄卷一百一十三

十一

孝昭皇后忌辰遣官祭

陵○丙申遣官祭

歷代帝王○

上駐蹕趙北口○丁酉

上駐蹕范家口○戊戌

上駐蹕蔡家營○倉場侍郎常書等疏言臣等遵旨會看運河

隄工自通州至西沽地方共衝決李家口等五處應加修築

白駒廠等五處隄勢危險亦應修理其上桃花口北龍潭口

工程似屬可緩得旨此所奏李家口等衝決五處白駒廠等

險隄五處及上桃花口等緩工二處俱於運道民生關係緊

要當速加修築其需用錢糧常書等已估計具奏若另差官

料理必至逾期即著直隸巡撫郭世隆亟行修築俾運道民

生速有裨益○以喀爾喀故多羅貝勒車布登子汪札爾襲

爵

三月己亥朔

上駐蹕李賢村○庚子

上駐蹕南苑○辛丑

上回宮 旌表湖廣烈婦周禧妻白氏拒姦自盡給銀建坊如

例○壬寅諭大學士等朕前諭于成龍條奏河工事曾言王

鵬董訥李應鳳畏懼于成龍伊等奉如此嚴旨至今不行具

疏引罪辭職俛首戀位全無廉恥爾等可召集九卿將此旨

宣示王鵬董訥李應鳳等○癸卯

上奉

皇太后幸暢春園○一等精騎尼哈番班大爾沙因病解退以

其子蒙克襲替 陞護軍參領拜音佈為鑲紅旗漢軍副都

統與京城守尉耿額為寧古塔副都統○丙午

上詣

皇太后宮問安○差往盛京戶部尚書馬齊回京奏開元等八

城承德等九州縣倉中所貯米石散給兵民均沾實惠報聞

○命戶部郎中陶岱將截留山東漕米二萬石從天津衛出

海道運至盛京三岔口

上諭之曰此路易行但不可欲速船戶習知水性風勢必須相

風勢而行毋堅執已見其一路水勢地形詳悉識之此路既

開日後倘有運米之事全無勞苦矣 戶部尚書王鵬內閣

學士李應鳳各具疏引罪祈賜罷斥下部察議○丁未諭大

學士等禮部奏祭

奉先殿儀注將皇太子拜褥設置櫺內朕諭尚書沙穆哈曰皇

太子拜褥應設櫺外沙穆哈即奏請朕旨記於檔案是何意

見著交該部嚴加議處尋議尚書沙穆哈應革職交刑部侍

郎席爾達多奇均應革職得旨沙穆哈著革職免交刑部席

爾達多奇俱從寬免革職○左都御史董誥具疏引罪得旨大臣引咎自陳應據實明白具奏若支飾含糊即非臣誼董誥署理河道總督事時極言靳輔虛糜錢糧治河不善明係附和于成龍排陷靳輔今修築河工成效已著是非功罪定論昭然前會議河工事務時朕已面加嚴責董誥不即具疏引罪頃傳諭詰問始行陳奏乃復不將依附于成龍之處從實直陳虛詞粉飾冀掩衆人耳目殊乖大臣之體該部察議具奏○兵部題鑲黃旗佐領阿喇尼以老病乞休應令其照佐領品級解任得旨阿喇尼自任用以來龜勉効力奉差往察汛界時所統原非滿兵皆係喀爾喀人湊成隊伍以致失

實錄卷一百六十二

丙

事今年已老邁著復還原尚書品級解任○戊申清明節遣

官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵○辛亥。

上詣

皇太后宮問安○甲寅諭大學士等進士選取庶吉士教習讀書所以造育人材備他日之用司教習者理宜嚴加督課使之勤勉嚮學今考試庶吉士觀其所學甚劣較曩時庶吉士迴然不及此皆傳繼祖等教習怠弛不專心致志之所致也傳繼祖等交吏部嚴察具奏尋議覆傳繼祖張英教習不嚴均應革職得旨傳繼祖降三級調用張英降三級留任○左副都御史碩羅以老病乞休得旨碩羅陞授副都御史之後並無建白著以郎中品級休致○乙卯

實錄卷一百六十二

壬

皇太后宮問安○以四川陝西總督佛倫為禮部尚書仍理總

督事○丙辰

萬壽節停止朝賀筵宴○遣官祭

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵○遣官祭真武東嶽城隍之神○宴衍聖公孔毓

圻等於禮部○戊午策賜天下貢士畏之仙等於

太和門前制曰朕惟自古帝王統御寰區莫不以國計民生為首務其時人才蔚起吏治澄清府事修和羣黎康阜蒸蒸然躋斯世於熙皞何風之隆也朕臨御以來孜孜圖治軫恤民隱時切痼痼自三逆蕩平之後休養生息慮無不周頻年蠲復不啻數千百萬而被恩之地災沴旋告閭閻尚無起色其故何與黃運兩河所關綦重今雖修纂奏績已底安瀾何道而伴水固無虞萬世利賴與學校賢才所由出也此來膺斯職者因循陋習叢弊營私以致教育乖方士習凌競茲欲釐剔振興以廣棧樸作人之化何術之從與至於生民休戚

實錄卷一百一

七

視庶司賢否表率承宣端在大吏必內外臣工精白乃心奉公潔已而後吏飭民安茂登上理其激揚懲勸之方果安在與爾多士蘊懷康濟久矣其詳切敷陳朕將親覽焉○諭吏部選拔庶常原以教養人材儲備任用張禹玉等教習已久今加考試滿文不堪者甚多皆由教習督課不嚴庶吉士等肄業不勤所致不加處分無以警戒將來學士傳繼祖等已經議處外其滿文粗通者王傳揚中訥喀爾喀阿金揚名時張璠寶克勤李象元劉琰胡潤王者臣姚弘緒王奕清姜承燭徐日昉文志鯨並漢書庶吉士張曾慶潘從律冉觀祖戴綏俱照例授翰林院編修檢討仍著用心學習黃叔琳滿文

荒疎狃億學滿書未久俱著再教習三年張翔鳳毛鵬惠周

惕金潮張孝時胡麟徵陳絳陳汝成滿文甚劣俱照原甲第以知縣用張禹玉滿文全未學習竟不通曉著革職○吏部議覆戶部尚書王鵬左都御史董訥內閣學士李應鳳俱附和于成龍董訥自行陳奏又巧為掩飾應將王鵬董訥李應鳳俱革職得旨王鵬從寬免革職著以原品休致董訥李應鳳俱著革職○庚申

上自暢春園回宮○

上御乾清宮親定殿試貢士甲第諭大學士等曰通曉政事甚屬不易即如賑濟一事朕親訪聞被災地方百姓一遇賑濟

實錄卷一百一

七

則盈千萬人聚而就食若不得其人不得其法反致生事諸貢士策中論吏治皆言當實心任事大法小廉今言官建白甚少間有上疏者皆懷私心或所言似公實則假公濟私耳至督撫赴任時在京官員有親友門生在屬下者必相請託即欲叅劾不得不顧情面如果外而督撫內而言官皆從公據實叅奏則不肖之吏自無所容今諸生對策雖能言之若身當其任恐亦能言不能行也○旌表湖廣節婦楊氏守節四十年給銀建坊如例○辛酉上御太和門傳臚賜殿試貢士胡任興等一百六十八人進士及第出身有差○是日

上幸暢春園○諭戶部山西平陽府澤州沁州所屬地方前因蝗旱災傷民生困苦已經蠲免額賦並加賑濟而被荒失業之衆猶未盡覩幹寧其康熙三十年三十一年未完地丁錢糧及借賑銀米若仍令帶徵赴期完納誠恐閭閻力絀益致艱難著將所欠錢糧五十八萬一千六百餘兩米豆二萬八千五百八十餘石通行蠲豁用紓民力爾部行文該撫嚴飭該府州縣官悉心奉行務俾人沾實惠倘有已完在官捏稱民欠及已奉蠲免仍復重徵官吏作奸侵漁中飽一有發覺定以軍法從事遇赦不宥○壬戌

上詣

實錄卷一百六十三

六

皇太后宮問安○癸亥陞翰林院侍講學士傅德為都察院左副都御史○予故黑龍江副都統納秦祭葬如例○乙丑上自暢春園回宮○陞雲南貴州總督范承勳為都察院左都御史○贈故漢軍都統諾邁太子少保○予祭葬加祭一次謚襄恪○命黑龍江副都統移駐墨爾根城內○丙寅諭大學士等今值暮春草生之時噶爾丹與策妄阿喇布坦互相攻戰或至近吾邊境亦未可定著簡選西安滿洲兵一千五百名令將軍博霖親帥之敕書到日速赴振武將軍孫思克處預備若有邊警與孫思克商酌而行昭武將軍郎談等所帥之兵仍暫駐寧夏孫思克等若有所征行待其傳檄即時趨

實錄卷一百六十三

九

赴共相商酌以行○以原任內閣學士田喜霖補原官以倉場侍郎常書兼管翰林院掌院學士事○丁卯諭大學士等山東巡撫桑額奏所屬積貯米穀並無虧空此前任撫臣佛倫奉行之善也朕巡行霸州時聞大城縣知縣祖延泰散穀賑濟或有富戶冒稱飢民者查出即將其家所積之穀散給貧民因此並無假冒貧民得沾實惠是則奉行之善存乎其從前總督張長庚屈盡美巡撫白色純韓世琦等居官不善不數年間子孫窮困由此觀之徒貽惡名此輩所貪取者今安在哉且居官果善其光榮自不待言如江南將軍博霖調西安將軍起程之日兵民泣送屈盡美居官不善離任之時地方百姓皆為切齒居官善否舉朝之人及地方百姓自有公論豈能掩飾哉

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十二

實錄卷一百六十二

十

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十三

康熙三十三年甲戌夏四月戊辰朔享

太廟

上親詣行禮○

上幸暢春園○盛京禮部侍郎單壁以年老乞休允之○杭州  
將軍郭丕以老病乞休允之○己巳以故一等精奇尼哈番

巴爾彌特子多爾集襲職○庚午理藩院題今歲編審外藩

蒙古四十九旗人丁共二十二萬六千二百七十有奇內除  
隸公主郡主貝勒貝子公額駙台吉等三萬一千五百九

實錄卷一百六十三

一

十六丁外餘十九萬四千六百七十餘丁三丁內著一丁披

甲應披六萬四千八百九十一甲下所司知之○旌表直隸

烈婦王六妻王氏拒姦殞命給銀建坊如例○壬申陞光祿

寺卿父肅為盛京禮部侍郎○以倉場侍郎兼翰林院掌院

學士常書充日講起居注官○授一甲進士胡任輿為翰林

院修撰顧圖河顧悅履為編修○丙子

上詣

皇太后宮問安○戊寅調湖廣總督丁思孔為雲南貴州總督

○己卯諭理藩院今青草既出應遣人帶澤卜尊丹巴胡土  
克圖王謝圖汗之人與公西卜退哈灘巴圖爾使人同往至

公西卜退所。另撥材幹之人。訪實和托。揮特根敦戴青所在。地方即從彼處。細覘噶爾丹情狀。著班迪策妄諾爾布。奎色鄂齊爾杜喇爾前去。尋諭班迪等曰。爾等若往擒生口。則起豐端矣。姑探其動靜可也。惟以招撫和托。揮特根敦戴青等為要。爾等往彼宣朕諭旨曰。朕念噶爾丹與汝逼近。常恐為汝害。汝當移近西卜退哈灘巴圖爾納木扎爾陀音阿里雅等。遠設哨探。倘有警汝等同心併力而行。於事乃有大濟。此為汝等慮也。西卜退哈灘巴圖爾等現在土喇遊牧。汝等不論居何地。朕無所嫌。況噶爾丹事平之時。喀爾喀通國仍還歸故土也。爾等無兵如得消息。可即歸來。○陞翰林院侍讀

實錄卷一百六十三

十一

學士色特為光祿寺卿。○工部議覆直隸巡撫郭世隆疏言。霸州等處田被水淹。皆由于牙牙等河隄岸衝決未修之故。查大城縣趙扶村之南隄及龍王廟隄。青縣楊村隄起至東子牙村隄止。雄縣蒲淀五官淀之東隄。俱單薄不堪。應行修築。黑龍港河及大城縣王家口淤塞。俱應開濬。均應如所請。從之。○庚辰。諭翰林院選拔庶常。原以作養人材。今科進士特加簡閱。汪從汪隆李愔亨裴之仙龔鐸王頊熊華陳成永陳璋張逸少周道新陳豫朋叢澍張大有袁鍾麟黃龍眉楊顯陳恂阿錫台岳度朱輝珏陳允恭傅森張德桂拉都立黃中理周起渭吳隆元五哥海寶覺羅滿保陳守創管灝趙爾孫

吳甫生高其傳朱載法海殷元福等三十九員。俱著改為庶吉士。○諭大學士等。朕處深宮之中。日以閭閻生計為念。每巡歷郊甸。必循視農桑。周諮耕耨。田間事宜。知之最悉。誠能預籌穡事。廣備災祲。庶幾大有裨益。昨歲因雨水過濇。即慮入春微旱。蝗蟲遺種。必致為害。隨命傳諭直隸山東河南等處地方官。令曉示百姓。即將田畝亟行耕耨。使覆土盡壓蝗種。以除後患。今時已入夏。恐蝗有遺種在地。日漸蕃生。已播之穀。難免損蝕。或有草野愚民。往往以蝗不可捕。宜聽其自去者。此等無知之言。尤宜禁止。捕蝗弭災。全在人事。應差戶部司官一員。宣諭直隸山東巡撫。令申飭各州縣官員。親履隴畝。如某處有蝗。即率民擒捕。無使為災。其河南山西陝西等處。亦行文該撫一體曉諭。○辛巳。

上詣

皇太后宮問安。○陞正藍旗護軍統領查木揚為杭州將軍。○癸未。兵部議覆寧古塔左翼副都統巴爾達因驍騎校胡必圖年老。私將伊弟閒散都拉調補驍騎校。應將巴爾達降一級調用。得旨。巴爾達著降一級。來京補用。○甲申。孝端文皇后忌辰。遣官祭

昭陵。○封固山貝子敦達子蒲昌為輔國公。授鎮國公拔喀子法布蘭鎮國公。劉永子台渾俱為三等輔國將軍。輔國將軍



德倫子訥爾特奉國將軍賞揚蝦子詹布俱為奉恩將軍  
旌表雲南節婦梁氏蘇氏楊氏山東烈女林氏給銀建坊如  
例○乙酉以倉場侍郎兼翰林院掌院學士常書充經筵講  
官○已丑

上諭

皇太后宮問安○庚寅刑部等衙門議覆民人高弘擢毆死伊  
兄高弘先應正法

上諭大學士等曰此案原供內有高弘擢之父高昇因伊子高  
弘先暴惡先行砍害之語今悉刪去但希旨苟且定議人命  
關係重大即使旨意未當亦宜據理執奏況議此案者止滿

實錄卷三十一

四

洲官一員漢軍官一員似此關係人命事情不多令司官詳  
察會議苟且結案可乎將刑部官員嚴加申飭嗣後倘仍蹈  
前轍決不輕恕○九卿會議浙江巡撫張鵬翮疏言出洋貿  
易船隻地方官印烙給以票照許帶軍器出洋乃有內地商  
人在外國打造船隻帶有軍器出入關口既無印烙可據又  
無票照可憑地方官難以稽查請一槩禁止其暗帶外國之  
人偷買犯禁之物者并嚴加治罪應如所請從之○理藩院  
題科爾沁沙津以征布爾尼軍功封多羅貝勒今襲封王爵  
其所得貝勒應令其子阿必達襲封從之○辛卯陞原任湖  
廣巡撫吳璥為湖廣總督○陞正藍旗蒙古副都統宗室塞

冷額為護軍統領○理藩院員外郎二郎保疏報厄魯特台

吉巴拜係四厄魯特內杜爾伯特大台吉達賴之孫與其兄  
子齊克宗來歸得旨巴拜等習居邊外若來內地居住難以  
為生著理藩院遣官送至喀喇沁令扎什王撫養之○壬辰  
以倉場侍郎兼翰林院掌院學士常書禮部尚書兼翰林院  
掌院學士張英教習庶吉士○癸巳諭吏部前因新輔年老  
遣順天府府丞徐廷璽佐理河務今于成龍奏稱徐廷璽於  
河務未諳在彼無事著徐廷璽回京○甲午陞直隸守道劉  
煦為安徽按察使司按察使○丙申賜第已金印印文曰掌  
瓦赤喇哩達賴喇嘛教弘宣佛法王布忒達阿白迪之印

實錄卷三十一

五

○丁酉。

上諭

皇太后宮問安○子故原任內閣學士王尹方祭葬如例

五月戊戌朔工部以

天壇一帶挑沙鋪路給過工價繕摺呈覽步軍統領凱音布奏  
曰新修之路聽人照常行走不久又壞應派綠旗兵看守令  
往來之人止走兩旁勿行中路

上曰如此禁約殊於朕意不合蓋修葺道路者專以便民也派  
兵看守不許行走則修之何用若云禁行中路則看守之人  
必并禁及兩旁殊於行人不便仍聽人照常行走後若毀壞

令步兵稍稍算治。○安北將軍伯賈揚古疏言噶爾丹使人納木喀喇克巴喇木扎木巴喇嘛等率二千餘人稱請安進貢。臣即遣發官兵迎問實情。據噶爾丹使人言我等實來請皇上萬安。查其人數則有男子五百餘婦女僅僕千餘。

上曰噶爾丹使人著止於歸化城。遣滿丕往諭之。曰爾等陽為修好。潛留人為細作。各處窺探。是以止爾等於歸化城。問爾來意。視爾奏章再議。其前此流寓歸化城有納泰和碩齊等皆橫行不法。著交與來使。○九卿議覆工科給事中彭鵬疏。參提督順天學政兵部右侍郎李光地母故貧。應祿位不請終制。應將李光地解任。不准回籍在京守制。從之。○庚子。

仁孝皇后忌辰遣官祭

陵。○諭內閣盛京輓運原有船百艘。乃實有用之具也。存留預備。凡遇緩急為益良多。盛京工部無故奏而廢棄之。今年從山東天津所運之米。因之轉運之船遂致遲悞。盛京工部堂司官著該部嚴訊議罪具奏。○壬寅。

上詰

皇太后宮問安。○癸卯。諭大學士等。國家以用人為要。或有知其人可用。而避嫌不舉者。或有明知其人不善。而引為黨援者。自今九卿當各將所知居官賢能者。敬慎公舉。科道官職司耳目。誠能於所知賢者從公推薦。不肖者立行劾劾。則賢

者勸而不肖者懲。治道豈不美乎。可將此旨傳諭九卿科道。

○兵部題臣部前奉

上諭。檄選西安滿兵一千五百。令將軍博爾濟親率赴振武將軍孫思克所駐防昭武將軍郎談等之兵。暫駐寧夏。今川陝總督佛倫疏稱。邊外青草雖盛。而偵探蒙古並無犯邊消息。應暫停西安兵。仍令將軍孫思克等撥賢能人員不時遠探。如有噶爾丹消息。應行之事。即遵前旨。檄西安將軍博爾濟武將軍郎談各率預備之兵會商而行。

上曰寧夏近賀蘭山地居要害。若徹寧夏滿洲兵時將西安所備兵一千五百發至寧夏。爾部識之。可即檄知該督。餘如議。

○甲辰

上奉

皇太后自暢春園回宮。○諭禮部尚書兼管翰林院掌院學士事張英。翰林係文學親近之臣。向日講時時進見。可以察其言語。舉止。近日進見稀少。講官侍班。不過頃刻。豈能深悉。著將翰林院詹事府國子監官員每日輪四員。入直南書房。朕不時諮詢。可以知其人之能否。以備擢用。○陞護軍統領噶爾瑪為鑲白旗蒙古都統。○丙午。予故古北口總兵官王廷彪祭葬如例。○丁未。陞江蘇按察使王燕為湖北布政使。司布政使兩淮鹽運使趙世顯為江蘇按察使。司按察使。

陞鑲黃旗蒙古副都統扎木素為右衛左翼護軍統領鑲白旗滿洲副都統蘇昌為護軍統領○庚戌遣官祭

關聖帝君○辛亥

上詣

皇太后宮問安○以原任吏部左侍郎張集為兵部左侍郎管

右侍郎事○予故原任吏部尚書張士甄祭葬如例○陞正

紅旗滿洲副都統紀爾他布為滿洲都統以工部右侍郎沙

納海為寧古塔左翼副都統○壬子

上御太和門視朝文武陞轉各官謝恩○以詹事府少詹事朱

阜提督順天學政○予故蒙古都統赫碩塞祭葬諡敏恪○

實錄卷五十三

陞前鋒叅領費揚固為正藍旗蒙古副都統○癸丑杭州將

軍查木揚陞辭

上曰爾乃舊家大族之裔朕將爾由長史授今職爾蒞任後

訓練士卒輯洽兵民自巡撫以下府道以上皆當和睦若文

官與武官彼此協和則地方實有裨益至於遇事當慷慨擔

當不可苟且自求倖免推諉於人○戶部議覆江南江西總

督傅拉塔疏言鹽城高郵等處水涸田地求免徵糧應不准

行

上曰糧從地出此地尚為水浸若徵錢糧則於民甚苦致治之

道民為最要凡事於民生有益即宜行之此水浸之田皆令

免徵錢糧○甲寅諭翰林院朕流覽載籍見分類諸書雖各

有所長尚多未備唐類函可謂詳贍然唐以後典故藝文亦

未採錄可依唐類函體例自唐迄明輯成完書以資觀覽

陞正黃旗滿洲副都統鄂克濟哈為護軍統領○丙辰

上詣

皇太后宮問安○丁巳

上巡幸畿甸閱視河隄命皇長子允禔皇三子允祉隨駕是日

啟行駐蹕通州崔家樓○諭工部尚書薩穆哈倉場侍郎常

書河隄關係運道民生甚為緊要春間令天津一帶決口速

行修築因時方東作雨澤未霑甚切憂慮今新隄已成復得

時雨良慰朕懷爾等從陸路先至所築新隄處朕即乘舟往

觀兼閱民田或新隄有應增修處即令繕治○陞內閣學士

常綬為工部右侍郎護軍叅領嵩祝為內閣學士兼禮部侍

郎○諭內大臣等扈從衛士魚貫而行無得踐踏民田著派

侍衛等嚴查○戊午

上閱龍潭口新隄駐蹕武清縣紅廟○己未

上閱化家口新隄倉場侍郎常書奏曰新隄凡十二處緊要者

不過四五處

皇上若必加徧閱時當憚暑恐勞

聖躬

上曰朕軫念小民每罹水患特為閱隄觀稼而來雖屬煩勞朕固忘倦。

上閱黃須口等處詳視良久諭常書等曰此處決口水勢湍悍隄雖堅固中間猶覺稍低可令增修於前面另築一小隄以弱水勢大隄方保無虞耳其八百戶口王家甫口窪兒港口白駒廠口等薄弱之處咸令增修○是日駐蹕武清縣楊村○庚申。

上閱桃花口永安口李家口信父口柳灘口等處新隄諭常書等曰頃閱新隄一二處爾等以前述新隄與此相同請即回鑒朕以此處百姓困於水災惻然憫恤所築新隄若不徧閱朕心終未釋然故必周歷覽觀方令回棹今觀新築隄工甚屬堅固此地百姓可免數年水災矣○是日駐蹕武清縣蔡村○辛酉。

上駐蹕通州漕縣馬頭○壬戌。

上回宮詣

皇太后宮問安○丙寅夏至祭

地於

方澤。

上親詣行禮

閏五月丁卯朔○戊辰諭大學士等古聖先賢所著訓詞於

學者礪行之道讀書之法居官治民之事無不該備果能孳孳行之自有無窮之益又諭曰朕先慮翰林官壅滯故用數人於部院衙門所用數人學問皆優如有翰林缺出仍著開列陞補○和碩簡親王雅布生母妃薨致祭一次○工部議覆河道總督于成龍疏請毛城鋪石壩迤北建築月隄一道應如所請從之○庚午。

上御瀛臺考試翰林官員○辛未左都御史薩海以年老乞休允之○以奉國將軍鄂飛為鑲藍旗蒙古副都統○吏部議覆提督江南學政許汝霖疏言教職訓迪士子責任甚重請將由監生授教職者改授州縣佐貳官應如所請教諭改縣丞用訓導改主簿用從之○壬申。

上奉

皇太后幸暢春園○以一等阿思哈尼哈番霸州子霍尚襲職○陞左翼步軍總尉迂圖為正藍旗蒙古副都統長史穆森為鑲白旗滿洲副都統○理藩院題噶爾丹所遣奸細賽特與回國汗阿卜都里什特所遣奸細沙和卓及阿卜都來額爾克寨桑所留奸細伊巴里木他斯爾爾馬哈穆特庫爾班應令原審官刑部郎中蘇爾特理藩院主事常明帶往歸化城會同安北將軍伯費揚古當噶爾丹使人前正法其餘在此正法得旨賽特等不必押往歸化城著即於此地正法

○癸酉諭大學士等初四日召試翰林官於豐澤園出理學真偽論此亦書檮所有成語熊賜瓚見此軌大拂其意應據之字竟不據寫不應用之語執行妄用原任刑部尚書魏象樞亦係講道學之人先年吳逆叛時著議政王大臣議奏發兵魏象樞云此烏合之衆何須發兵昔舜誕敷文德舞干羽而有苗格今不煩用兵撫之自定與索額圖爭論成隙後十八年地震時魏象樞密奏速殺大學士索額圖則於皇上無干矣朕曰凡事皆朕聽理與索額圖何關輕重道學之人果如是挾仇懷恨乎又李光地湯斌熊賜瓚皆講道學之人然而各不相合李光地曾授德格勒易經李光地請假回籍時

實錄卷五十一

十一

朕召德格勒進內講易德格勒奏言李光地熟精兵務其意欲為將軍提督皇上若將李光地授一武職必能勝任反覆為李光地奏請爾時朕即疑之德格勒又奏熊賜瓚所學甚劣非可用之人朕欲辨其真偽將德格勒熊賜瓚等考試湯斌見德格勒所作之文不禁大笑手持文章墮地向朕奏云德格勒文甚不堪臣一時不能忍笑以致失儀既而湯斌出又向衆言我自有生以來未曾有似此一番造謠者頃乃不得已而笑也使果係道學之人惟當以忠誠為本豈有在人主之前作一等語退後又別作一等語者乎今湯斌雖故李光地德格勒現在也又熊賜瓚所著道統一書王鴻緒奏請

刊刻頒行學宮高士奇亦為作序乞將此書刊布朕覽此書內過當處甚多凡書果好雖不刻自然流布否則雖刻何益道學之人又如此務虛名而事干瀆乎今將此等處不過諭爾等聞知朕惟以治天下國家之道存之於心此等人議論又何足較也○甲戌

上諭

皇太后宮問安○陸前鋒參領阿爾納為正白旗漢軍副都統○乙亥理藩院題喀爾喀台吉車陵扎卜之父達什本土謝圖汗六扎薩克中之一扎薩克也因與滾濟斯扎卜遇噶爾丹之亂投入鄂羅斯今車陵扎卜收集其屬下六百餘人自鄂羅斯來歸應授為扎薩克一等台吉其屬下六百餘丁按例編為四佐領從之丁丑奉差往諭噶爾丹侍郎滿不噶爾丹疏回奏

實錄卷五十一

十一

上賜噶爾丹敕曰朕承天命統御萬邦凡恭順者獎勸以示優卹若謫詐者亦必匡正其非使歸於善而止爾噶爾丹於烏闡布通之地為我無所擊潰敗而走於時即可破爾矣朕軫念爾向來通貢不忍遽滅不使窮追停止各路進剿之兵遣內大臣吳丹等出使於爾爾在威靈佛前堅誓永不敢犯印文誓書猶在也朕謂爾不肯盟許爾使照常往來待爾無異意此情已屢經敕諭不必一一悉數今閱爾奏欲依達賴喇

使人前所定之議請將澤卜尊丹巴胡土克圖土謝圖汗  
界爾按爾前奏內有索澤卜尊丹巴胡土克圖土謝圖汗  
言內以一言為定將七旗發回故土已蒙許畀以澤卜尊丹  
巴胡土克圖土謝圖汗之語想此乃小人欲自脫其身而為  
此言爾果有此旨豈有不授爾敕者乎執來歸之人以畀其  
讐可乎敕諭甚明何嘗不解爾奏內之言爾亦未嘗不解敕  
內之言然皆烏闡布通戰前之事誓後不得復引以為辭况  
爾違朕前旨及達賴喇嘛之令伐喀爾喀致喀爾喀等窮迫  
來降朕賜之銀米牲畜以為養贍達賴喇嘛聞之甚喜奏言  
惠濟喀爾喀真如我佛慈悲噶爾丹者大君所當責而誅之

者也而俯恤衆生有如赤子復加寬宥達賴喇嘛此奏前已  
併敕諭發爾矣即安插喀爾喀之事亦敕爾知之矣倘爾噶  
爾丹為喀爾喀所敗而來歸命朕亦當受而養之斷不擒以  
畀喀爾喀也此即朕萬邦一體之意朕從來降敕與爾俱布  
至誠今爾不將馬迪被害之故回奏覆旨又將前者跪頂威  
靈佛之誓付之不論徒以使臣喇嘛為辭又將達賴喇嘛與  
朕處置已畢之事屢屢翻覆包藏禍心以圖構釁遣回子於  
內地為奸究偵探以此觀之則爾外奉宗喀巴之法而實入  
回回之教求欲朕扶助宗喀巴并達賴喇嘛之法彰彰明矣  
爾所行之事蒙古皆知之反側如是朕已秣馬厲兵但視爾

舉動耳爾又請沛如海之仁賜銀五六萬兩原諭謂近朕之  
前來請則加恩賚且許之互市爾皆不副朕旨豈有賜銀之  
理爾奏內又云扎木巴兒藏布言欲往西方我尚不攔阻往  
西方之人夫扎木巴兒藏布者壞達賴喇嘛之教行事悖亂  
爾知而故留不即發回是亦已矣至爾所遣回子奸細未識  
爾知而遣之抑爾種類中潛為之也今已將爾使人所留奸  
細內顧爾馬哈穆特一人活之令歸報爾餘皆正國法矣此  
事若爾果不知爾種類潛為之則此等壞事之人不可復留  
可將此人併顧爾馬哈穆特即於爾地正法雖然爾厄魯特  
喀爾喀之事朕與達賴喇嘛始終教誨發敕遣使不少矣爾  
不依誓書索喀爾喀不已且又以前不解我言語為辭是雖發  
敕遣使終無了期朕反覆思維不得不會問以定之此會也  
遣他人亦終無用必須爾親來與朕面議方可定也且以此  
情事敕諭達賴喇嘛爾如遵朕旨可速奏定會問之日與期  
約之地其遣奏時須爾丹濟拉丹津俄木布兩人內遣一人  
來其他微賤之人不能洞曉如爾難於會問則當如前誓不  
復及喀爾喀之事違誅害馬迪之人具奏請罪則仍許爾使  
往來互市如仍執迷不悟欲行詭譎則永絕爾使貿易爾覆  
奏未到雖有使來亦不許入爾現來之使本當不許市易但  
回子事或者爾原不知故權使市易併與前所留納泰和碩



齊同遣出境達賴喇嘛處亦以此教諭之矣今以諭爾敕書付爾使納木喀喇克巴喇木巴諾顏和卓齋往○丙子諭工部保護中河隄岸之子隄總河于成龍前奏稱最為緊要請急行修築今又奏言水勢盛長難以興工俟水涸時始行修治朕思河務所係甚重必待水涸始修倘夏秋水澤泛漲保無有衝決隄岸之事乎可速敕于成龍再加詳悉酌定具奏○陞護軍參領崇古禮為鑲黃旗蒙古副都統○丁丑陞長史齊世為正紅旗滿洲副都統○陞浙江嚴州副將王友臣為福建福寧總兵官翰林院題兵部督捕左理事官熊賜瓚於瀛臺

御試日所作文字內用

宗廟二字不擡寫又妄用不應用之語顯係不敬應將熊賜瓚革職等因得旨熊賜瓚係朕從優擢用乃不思圖報頃御試時見理學真偽論題即大拂其意於文內應擡寫之字竟不擡寫不應用之語輒行妄用本當嚴加治罪姑念其愚蠢無知從寬免處分 庚辰

上詣

皇太后宮問安○內閣學士田喜霖以病乞休允之 刑部等衙門題太監錢文才毆死民人徐二應絞監候

上諭大學士等曰凡太監犯罪斷不可宥尤宜加等治罪朕觀

古來太監善良者少要在人主防微杜漸慎之於始苟其始縱容姑息侵假事權迨其勢既張雖欲制之亦無如何如漢之十常侍唐之北司竊弄威權甚至人主起居服食皆為所制此非一朝一夕之故由積漸使然也太監原屬陰類其性情與常人不同有年已衰老而言動尚若嬰兒外似謹厚中實叵測必人主英明此輩始無由弄權朕聞明代諸君將本章批答委之司禮監司禮監委之名下內監此輩素無學問不知義理委之以事其能免於舛謬耶錢文才此案爾等記之至秋審時勿令倖免○壬午陞吏部左侍郎管右侍郎事傅臘塔為都察院左都御史○乙酉調正黃旗漢軍副都統

開音布為滿洲副都統陞一等侍衛宗室阿喀納為正黃旗漢軍副都統廣東碣石總兵官韓佐周為鑲藍旗漢軍副都統 鑲黃旗漢軍副都統興永朝以病乞休允之 丙戌旌表河南鄆城縣張氏祀縣劉氏舞陽縣席氏張氏祥符縣許氏延津縣鄭氏孟縣賈氏山東鄆城縣曲阜縣王氏沂州彭氏諸城縣徐氏膠州江氏並給銀建坊如例 己丑調倉場侍郎常書為吏部右侍郎仍兼翰林院掌院學士陞內閣學士德珠為總督倉場戶部侍郎翰林院侍讀學士席靈圖為光祿寺卿 庚寅

上詣



皇太后宮問安。○甲午。旌表直隸烈婦李氏山西烈女王氏。拒  
姦殞命各給銀建坊如例

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十三

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十四

康熙三十三年甲戌六月丁酉朔陞內閣侍讀學士陶岱為  
內閣學士兼禮部侍郎。陞前鋒叅領達佳為鑲紅旗蒙古  
副都統。吏部議盛京運米原有船一百隻因工部侍郎星  
安等無故朦混具題拆毀以致山東天津所運米石乏船轉  
運遂至遲悞殊屬不合應將侍郎星安理事官額爾赫圖俱  
革職得旨星安額爾赫圖俱著革職即於盛京披甲當差効  
力。○諭大學士等江南江西總督居官善者自于成龍以來  
惟傅拉塔一人傅拉塔和不流不畏權勢仰體朝廷委用  
之意愛恤軍民甚屬可嘉茲聞溘逝深為憫惻著從優賜卹

○辛丑。

上詣

皇太后宮問安。○陞左副都御史傅德為盛京工部侍郎授  
湖廣提督徐治都為鎮平將軍仍管提督事陞陝西定遠副  
將董大成為涼州總兵官。旌表安慶節婦徐氏趙氏程氏  
陳氏姚氏江氏各給銀建坊如例。丙午以原任戶部侍郎  
阿山為都察院左副都御史。陞左春坊左贊善陸某為內  
閣學士兼禮部侍郎。陞浙江象山副將曹成為廣東碣石  
總兵官。庚戌予故蒙古副都統雅達祭葬如例。旌表直

隸烈婦李氏青年守節逼姦不從殞命給銀建坊如例○壬子。

上詣

皇太后宮問安○以詹事府少詹事努赫克日講起居注官○

甲寅鑲白旗漢軍副都統祖植椿以老病乞休允之○丙辰

大學士等奏江南江西總督員缺九卿保舉吏部左侍郎布

彥圖等十二人

上曰布彥圖先在理藩院內閣時猶能効力自任吏部所行甚

穢聲名不堪朕以江南地方緊要欲得一端方之人命爾等

大臣保舉似此等人亦皆舉出爾大臣等意欲欺朕耶是誰

所舉著問明具奏原任雲貴總督今陞左都御史范承勳行

事堅定為人平易著補授江南江西總督令馳驛速赴新任

○陞護軍叅領瓦珥達為正白旗蒙古副都統○甲子。

上奉

皇太后自暢春園回宮○添設山西右衛同知一員○丙寅大

學士等覆奏侍郎布彥圖係吏部尚書熊賜履保舉

上問吏部尚書庫勒納曰布彥圖與爾同旗同部其人果可保

舉耶庫勒納奏曰布彥圖品行穢惡非可保舉之人

上曰如是爾何不阻之爾為尚書當矢志忠誠勉圖効力如布

彥圖之貪婪穢惡舉國共知何得聽人妄行保舉庫勒納免

冠謝罪

上曰自古漢人結為黨類各援引同黨之人以欺其上習以為

常滿洲素樸誠忠實今觀旗員亦各自結黨其中于成龍最

為強勝此中惟尚書索諾和並無黨類亦不來往大臣之家

愿慙安分此外孰無黨者焉能欺朕朕因布彥圖在理藩院

時塞外効力漸陞至侍郎不思圖報朕恩所行貪婪穢惡朕

甚惡之布彥圖著革去侍郎仍授為理藩院員外主事之職

服勞以愧之爾侍郎等不奮勉以副朕任用之恩如布彥圖

者朕亦必加處分斷不寬貸也○戶部議覆漕運總督王樑

疏言隨漕輕贖行月糧等項錢糧因限隔年奏銷是以各州

縣衛支解不清請照地丁錢糧例於本年冬季奏銷考成以

杜徵新補舊之弊應如所請從之

秋七月丁卯朔享

太廟遣領侍衛內大臣公舅舅佟國維行禮○陞戶部左侍郎

蔣弘道為都察院左都御史轉戶部右侍郎王士正為左侍

郎○陞內閣學士王拔為戶部右侍郎○戊辰。

上詣

皇太后宮問安○己巳轉吏部右侍郎常書為左侍郎仍兼翰

林院掌院學士調兵部右侍郎安布祿為吏部右侍郎○庚

午予故原任寧古塔副都統胡巴克泰巴圖魯蒙古副都統

牛尼有各祭葬如例○辛未陞護軍叅領黨艾為鑲白旗蒙古副都統 壬申諭大學士等文選司其屬緊要近聞文選司郎中劉始恢聲名頗方可令休致先年文選司郎中宋文運才雖平常而操守聲名甚好朕不次擢用府陞刑部侍郎今文選司無一能及之者爾等將朕旨曉諭吏部○尋殉難福建巡海道加贈工部侍郎陳啟泰浙江溫處道加贈通政使司通政使陳丹亦俱追諡忠毅○工部議覆山東巡撫桑額疏言山東新城等縣地方有李清河其南岸即係青沙泊岸身單薄每遇大水衝決不常請於泊之南涯築一堅隄濬泊使深廣足以容水可免衝潰之虞又有孝婦河其舊河淤塞新河淺阻各莊多被水患請將新河挑濬又自舊河頭至麻大泊西挑河一道使水歸漕應如所請從之○巴圖爾額爾克濟農疏報祁齊克逃遁遣莽奈哈什哈等追及之於穆爾格山諭之降不從莽奈哈什哈等與戰殺祁齊克及隨逃已雅克海桑等報聞○癸酉諭領侍衛內大臣等尚書班迪等疏言和托揮特之根敦戴青遣二十人往探噶爾丹消息行十日遇厄魯特兩人殺其一擒其一回詣根敦戴青所五日而至根敦戴青以所擒厄魯特之人皇上或有所詢問故奏聞遣來班迪等遇之詢問具奏問所擒厄魯特色楞供云噶爾丹於去年春冬間三次遣人窺根敦戴青所居處今年

正月來於庫克朔東抗幾爾查克地方居住等語根敦戴青聞噶爾丹移營近彼前進遂亦向內移營於土喇之西卜退哈灘巴圖爾處觀噶爾丹之前進情形當是圖根敦戴青而來不過則隨其蹤跡而求之來至土喇一帶地方搶掠邊境之喀爾喀亦未可定今時會既佳馬復肥壯可調寧夏歸化城及右衛之兵循克魯倫河於土喇等處往尋西卜退哈灘巴圖爾探彼情形消息若果噶爾丹來近土喇擾害喀爾喀我軍有可乘之機將軍等相度而行倘我師未至之先彼已過而前進則從後襲之趙良棟諸習軍務郎談前往時可與之偕行令趙良棟率寧夏火器營兵二百人寧夏兵即攜寧夏之米歸化城與右衛之兵即攜湖灘河朔之米此時機會甚便斷不可失爾等與議政大臣會議以聞擒來之厄魯特亦詳問之尋議覆發大兵至土喇等處聖諭至當應遵奉而行右衛大臣應留何人費揚古郎談希福三人中應以何人為將軍統領伏候上裁得旨右衛護軍三名著全發所留之兵酌留官員主之諸大臣盡行歸化城都統副都統著費揚古斟酌帶往寧夏近歸化城令即設兵速赴湖灘河朔支米隨費揚古希福軍後而行費揚古希福等兵及時支米作速起行費揚古乃領侍衛內大臣著授為將軍郎談希福仍留將軍印協謀而行至

原任尚書阿喇尼諳練蒙古事亦令前往率蒙古兵為大軍前哨牧養遺失馬匹侍郎滿不甚有効力之心近雖在服中亦令往理驛務與阿喇尼協力行事 甲戌

上幸暢春園 陞翰林院侍講學士馬爾漢為兵部右侍郎翰林院侍讀學士徐嘉炎為內閣學士兼禮部侍郎 丙子

孝懿皇后忌辰遣官祭

陵 辛巳中元節遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵 壬午兵部題建威將軍希福請將大同綠旗兵三千令總兵官率之與臣等同行又鑲藍蒙古旗分察哈爾

兵近殺虎口居住其八旗察哈爾俱接壤而居丁壯整齊秋

高馬肥請將伊等前鋒護軍驍騎酌量派發附各旗遣至臣

等軍前

上諭大學士等綠旗兵若多發往則其馬少且邊外地方米糧

青錄卷十四

六

何能運到朕前巡察邊外時曾帶古北口綠旗兵往沿途常

賞資食物瞻養然去時猶可及觀其回時情形甚憊隨朕行

走尚有苦累之處今希福亦能如此賞給予希福毋過一事

必生疑阻此番發往滿洲之兵已有八十有此兵力所向無

敵將軍費揚古勲舊大臣今駐防歸化城眾皆稱贊軍士亦

皆心服都統郎談邊外行走熟練於此事無不能辦者若又

遣希福往或致疑阻大事亦未可定此處關係甚大希福著

停其前往右衛新駐兵丁令將軍希福料理大同綠旗兵丁

不必多發著大同總兵官康調元親選五百名與將軍費揚

古一同前往至京城兵亦已預備察哈爾兵倘有緊要差遣

即與所備之兵一同調遣不必發往 諭戶部盛京等處去

歲禾稼不登粒食艱窘聞今年收穫亦未豐稔米穀仍貴倘

價值日漸騰湧則兵民生計恐致匱乏盛京等處地方關係

緊要朕心時切軫念宜預加籌畫作何恩給俾各資生著遣

部院堂官一員前往自甲兵以至匠役當差人等有不能餬

口者將人口數目查明賑濟 甲申

上幸湯泉 陞前鋒叅領樺善為鑲白旗漢軍副都統 丙戌

上自湯泉回宮 諸

皇太后宮問安 丁亥

上命大學士等於翰林官員內知有長於文章學問超卓者具

青錄卷十四

七

奏大學士等奏曰徐乾學王鴻緒高士奇韓荃文章詩賦頗為優長又進士唐孫華長於詩賦文章亦佳

上召唐孫華考試諭大學士等觀唐孫華文學實優但字不甚佳著額外授為禮部主事令於翰林院行走大學士等奏曰三朝國史典訓一統志明史尚未成書徐乾學王鴻緒高士奇韓荃等在籍皆文學素優之人若召令各纂一書書可速成上曰徐乾學等著來京修書徐乾學之弟徐秉義學問亦優並著來京韓荃原係內閣學士告假回籍不便與曾經處分之人一體取來修書著以原官召取來京戶部議覆山西巡撫噶爾圖疏言右衛駐防大兵供應米豆草束原議一半本色一半折給其一半本色內不數米豆草束或照改折之價或照改徵之價折給應令該撫會同將軍定議具題再議得旨此事關係緊要著戶部尚書馬齊馳驛速往會同該將軍等確議具奏鄂爾多斯多羅貝勒達爾扎故遣官致祭己丑

上詣

皇太后宮問安○贈故江南江西總督傅拉塔太子太保給拜他喇布勒哈番世職子祭葬加祭一次諡清端 庚寅

上巡幸邊塞命皇長子允禔皇三子允祉皇四子 皇五子允祺皇七子允祐皇八子允禩隨駕是日

啟行駐蹕三家店○以故一等阿思哈尼哈番託盤子金保襲職○山海關城守尉華色以奉職懈弛革退一等阿思哈尼哈番又一拖沙喇哈番命其子按圖襲替○封和碩康親王傑書女為郡主塔撥方授和碩額駙○辛卯諭大學士等密雲縣田禾失收今年雨水甚大著速行文倉場侍郎將通州倉所貯粟米以一萬石運至密雲縣五十石運至順義縣乘水方盛速行運到令其收貯是日

上駐蹕密雲城內○壬辰

上駐蹕陳莊○癸巳

上駐蹕古北口內○甲午

上駐蹕恩格木噶山○予故廣東副都統佟徽年祭葬如例

出征厄魯特拜他喇布勒哈番朱馬喇以創發故予祭葬如陣亡例 乙未

上駐蹕多和圖地方

八月丙申朔

上駐蹕千佛寺之後○丁酉遣大學士阿蘭泰祭

先師孔子

上駐蹕博和齊昂阿地方 戊戌祭

大社

大搜遣吏部尚書庫勒納行禮

上駐蹕營國昂阿地方○喀喇沁翁牛特土默特喀爾喀王貝勒貝子公台吉等來朝 己亥

上駐蹕朱爾哈代昂阿地方 山東巡撫桑額疏言登州等處米請從天津運至盛京三岔口

上曰運米至盛京實屬善政先所運米大有裨益學士陶岱現在天津此本著交陶岱將天津現存米五萬石從天津海口運至三岔口之處會同地方官員議奏○諭領侍衛內大臣等前聞噶爾丹來侵根敦戴青是以調即談等兵右衛兵歸化城兵令費揚古統之防備土刺乃尚書班迪等至今無報似乎無事今時漸寒兵士前進殊為勞苦又聞噶爾丹有趨

作錄本言不而

歸化城之意事雖未實向師防歸化城為是可令右衛兵回右衛歸化城兵即談兵俱回歸化城各秣馬設備大同總兵官康調元亦率其兵回大同趙良棟之來已近京城且令入覲而歸阿喇尼滿不暫在歸化城偵探此事令喇嘛商南多爾濟郎中奔襲自此地馳驛前去伊等未到之前如土喇有警將軍等仍便宜行事亦令商南多爾濟等為之探聽○庚子秋分夕

月於西郊遣兵部尚書索諾和行禮

上駐蹕哈瑪爾達巴漢之東 壬寅

上駐蹕哈瑪爾昂阿地方 癸卯

上駐蹕巴顏拖羅海地方○甲辰  
太宗文皇帝忌辰遣官祭

昭陵免廣東南海三水高要三縣本年分水災額賦有差予故蒙古副都統博托和祭葬如例 兵部議覆四川陝西總督佛倫疏言臣前疏請復黃城爾舊城安設弁兵控扼雪山稽察往來奸宄奉旨會同提督確議具奏今據甘肅提督孫思克等咨云黃城爾地方逼近雪山天氣寒冷難於耕種糧草無出修築城垣工程浩大應暫請停止至於大黃山大草灘之要路在大馬營地方原設守備兵力單薄應將守備裁去改設遊擊一員千總把總各一員馬步兵五百名駐守

實錄本言不而

二

大馬營仍令永固城副將兼轄肅州總兵官統轄并於大阿博墩東西築墩臺撥兵瞭望其唐家沙溝應令永昌副將派千把總各一員統領馬步兵輪流駐防至北邊硤口等處亦應添設把總一員馬兵三十名駐劄定羌廟令硤口守備管轄俱應如所請從之○理藩院題喀爾喀台吉恭額薩木頓等進獻巴爾虎二百四十餘丁應編為四佐領從之 乙巳

上駐蹕齊老圖昂阿地方 丙午

太祖高皇帝忌辰遣官祭

福陵○丁未

上駐蹕他斯哈哈達地方 兵部議覆四川陝西總督佛倫疏

言肅州鎮標馬兵尚少應添二百名再將步兵四百名改為馬兵共馬兵二千四百名步兵八百名分為四營添設遊擊一員守備一員千總二員把總四員甘州提標應添設火器兵五百名西寧鎮逼近青海亦應添火器兵五百名北川營逼近雪山應添馬兵七十名設遊擊一員添千總把總各一員鎮海堡步兵九十名應改為馬兵西大通地方把總一員應改為千總添馬兵二十名西寧之老鴉堡涼州之武勝營口等堡各將本堡步兵十名改為馬兵俱應如所請從之○設雲南省曲靖江廣西元江開化順寧武定景東八府學尋甸建水新興趙州劍州昆明宜良楚雄定遠保山和曲祿勸雲州姚州河陽南寧新平十七州縣學訓導各一員定新平和曲祿勸姚州四州縣童生入學額各八名○差往右衛戶部尚書馬齊回京疏言臣等會議右衛駐防官兵供應米豆草束一半不敷本色應照改徵之價支給自行採買本年冬季馬匹料豆應將大有倉米抵給一半料豆一半折給價值亦照改徵之價折給再右衛地方所出之草不多應將殺虎口東邊地方給與右衛官兵斫木割草又查殺虎口向有鑲藍旗馬廠旗下蒙古應令其於殺虎口東北酌量遷移從之 辛亥

上駐蹕森濟圖哈達地方○壬子予故原任都統根特察葬加

祭一次諡襄壯○甲寅

上駐蹕達爾達巴漢昂阿地方○丁巳

上駐蹕烏里雅蘇台昂阿地方○己未遣官祭

歷代帝王○遣官祭城隍之神

上駐蹕拜巴哈昂阿地方 賜喀爾喀澤卜尊丹巴胡土克圖

等衣帽蟒緞等物有差 辛酉

上駐蹕噶爾圖昂阿地方○壬戌

上駐蹕西喇諾海達巴漢和洛 癸亥

上駐蹕克勒畢喇地方 乙丑

上駐蹕克勒烏里雅蘇台 旌表陝西節婦戴成李氏各給銀

建坊如例



大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十四

實錄卷一百六十四

四

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十五

康熙三十三年甲戌九月丙寅朔

上駐蹕烏里雅蘇台達巴漢地方 戊辰

上駐蹕穆穆喀喇沁地方 己巳

上駐蹕坡賴噶山 大學士等奏請徹三等侍衛特古思等新  
設驛站

上曰極當徹此驛站歸化城有費揚古右衛兵亦多果有聲息  
自京而往甚便其昭武將軍郎談等兵亦著撤回 廣八旗  
滿洲蒙古童生入學額二十名共六十名漢軍童生入學額

實錄卷一百六十五

一

十名共三十名 予故杭州副都統索羅希祭葬如例 四  
川建昌總兵官王進才以老病乞休允之 庚午

上駐蹕漢虎爾察軍地方 辛未

上駐蹕舍里烏米地方 壬申

上駐蹕宜孫畢喇地方 癸酉

上駐蹕喇嘛洞 戶部題內閣學士陶岱等遵旨會議天津現  
存米不足五萬石之數應將直隸近河州縣米撥足五萬石  
俟來春自天津運至盛京三岔口應如所請

上曰直隸近河州縣之米著停止起運俟來春河南山東運米  
過天津截留五萬石從天津海口運往 賜喀喇沁多羅杜

撈郡王扎什等纓帽蟒緞銀兩有差○尚書班迪等疏言臣等遵旨遣筆帖式巴查爾撥什庫丹巴同澤卜尊丹巴胡土克圖土謝圖汗之使人并西卜退哈灘巴圖爾納木扎爾陀音等十人往覓和托揮特根敦戴青所在至色稜額之英格特布哈地方見之告以臣等前去之故根敦戴青隨即內徙而來至俄爾洪圖喇之白爾齊爾與臣等相見臣等傳旨諭之根敦戴青曰我等為厄魯特兵間阻屬下之人離散者多不能赴闕請

聖上萬安今蒙遣四大臣宣示

恩綸不勝懼忭願即與諸大臣入覲屬下之人賴採捕野獸為

實錄卷一百六十五

二

生惟伊魯諸處頗有野獸請安插伊魯等處臣等允其所請將伊所屬七百餘戶四台吉及千餘弓箭手共三千餘戶遷至伊魯等處安插隨令俄齊爾杜喇爾同根敦戴青起行赴京尋根敦戴青入覲

上加恩賜授為扎薩克多羅貝勒○甲戌

上駐蹕恩格木噶山喀爾喀車臣汗遣使進九白年貢宴齊

如例○乙亥

上駐蹕古北口○丙子

上駐蹕陳毅莊○丁丑

上駐蹕密雲縣○戊寅

上駐蹕三家店○免山東邱縣本年分水災額賦○己卯  
上回宮○以戶部右侍郎王揆為武會試正考官翰林院侍讀學士顧祖榮為副考官○庚辰

上御太和門視朝文武陞轉各官謝恩次喀爾喀進貢使臣等行禮○

上詣

皇太后宮問安○辛巳諭大學士等今歲雨水多通州以南新築之隄完固無恙惟東北舊隄衝決數處此皆有關於民田應速行堅固修築吏部侍郎常書向曾遣閱視今仍令常書前往詳看奏聞○陞甘肅按察使党愛為陝西布政使司布

實錄卷一百六十五

三

政使○壬午停雲南省鼓鑄從巡撫王繼文請也○以福州將軍石文炳為正白旗漢軍都統○癸未吏部題盛京戶部侍郎阿喇彌將山東運去之米不行均給兵丁又將秀巖地方應料理支給之米不親行料理應降五級調用

上曰阿喇彌自簡任侍郎以來並不勤勞効力凡事瞻徇情面支吾塞責甚屬庸懦盛京官員兵丁無一人稱其好者著革職同伊家口發往黑龍江披甲効力○陞雲南巡撫王繼文為雲南貴州總督貴州布政使石文晟為雲南巡撫○甲申諭戶部朕惟黎元率育全恃農桑每遇歲時豐穰比屋皆能自贍倘一經旱潦粒食無資即有俯仰不給之虞非相時緩

急而先事圖維則補助之恩難以遍沛頃巡歷邊外道經密雲等處地方見田畝歉收米穀價貴閭閻乏衣食不充目前既已艱難來歲何所依賴宜豫為籌畫用俾資生著遣部院堂官二員會同直隸巡撫親詣年歲不登之各州縣詳察明白應作何區處調濟確議具奏其八旗披甲當差及孤寡無依年老有疾中傷退閒人等有實係貧窶寔於謀生者著各該都統詳察姓名報部酌量恩恤○諭兵部凡地方防守官兵擒賊之時受傷身故者著給與身價銀兩著為令○陞陝西漢中副將施應元為四川建昌總兵官○旌表陝西洛川縣烈婦趙加祿妻康氏拒姦殞命給銀建坊如例○乙酉

上詣

皇太后宮問安○九卿議奏革職陝西巡撫布喀身任封疆於甘肅巡撫任內並不遵旨運糧以濟兵民將寧夏等處現運之糧停止擅動西安所屬長武等州縣之糧私行輓運又以運糧遲延之罪俱委於西安所屬官員及至調補西安巡撫復請令甘肅巡撫將寧夏之糧輓運又以遲誤之罪却委他人罔惜軍民乏食貽誤邊疆重事應將布喀擬斬立決其布喀所參巡撫吳赫將伊誣陷係吳赫參後布喀仇參應無庸議得旨布喀著改為應斬監候秋後處決餘依議○巴圖爾額爾克濟農疏言前者鄂齊爾圖汗時臣曾進貢往來自鳴

爾丹執鄂齊爾圖汗臣率族眾居青海數年後歸

聖化蒙恩不可勝計曾兩次遣使中途遇害俱不得達臣之族類困窮已極臣今願往指授地方編為參領佐領馳驅効力得旨巴圖爾額爾克濟農甚為可憫但達賴喇嘛奏請安插於彼青海地方姑允其說現今達賴喇嘛有使人至俟使至日當另有旨○丁亥

上御經筵講畢賜大學士九卿詹事及講官等宴○諭大學士等朕閱今年武闈試錄江浙人中武者多山西河南兩省各中一人如此恐致遺失人材武進士之文不過熟記成語抄寫舊套而已論文取中必致不均而人材亦多遺漏必以馬

步箭俱優人材出眾者為佳耳○戊子陞工部郎中囊吉里為甘肅按察使司按察使○己丑予故涼州總兵官師帝寶祭葬如例○庚寅

上詣

皇太后宮問安○陞盛京工部理事官帕海為盛京戶部侍郎○予故散秩大臣三等輔國將軍扎山祭葬立碑謚敏恪命兵部督捕右侍郎趙山右通政張雲翮工部給事中博爾濟兵科給事中趙心忭察勘各處報完河工○壬辰

孝慈高皇后忌辰遣官祭

福陵○予故漢軍都統和碩額駙穆赫達祭葬如例○命左副

都御史阿山往宣化府監督喂養軍需馬匹  
冬十月乙未朔享

太廟

上親詣行禮遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵（頒康熙三十四年時憲歷）丙申陞陝西巡撫

吳赫為四川陝西總督陝西布政使（愛為陝西巡撫貴州按察使丹達禮為貴州布政使司布政使）丁酉

皇太后聖壽節（遵）

懿旨免行禮戊戌策試天下武舉於

太和門前（戶部議覆漕運總督王樞疏言各省兌運漕糧

每石另徵耗米給與運丁以備到通盤剝等項之需嗣後各

州縣衛所徵收漕糧耗米務徵本色給與運丁如有徵銀折

給者請照私自改折漕糧例議處應如所請得旨各省漕糧

耗米該督撫嚴飭所屬官員務照定例徵收本色給與運丁  
如有不徵本色徵銀折給者漕運總督察奏治罪（己亥）

上御瀛臺紫光閣閱試武舉驛射技勇復設江南淮安清江  
廠船政同知改江寧廠船政歸江寧管糧同知兼理（庚子）

上御瀛臺紫光閣閱試武舉驛射技勇諭大學士等天下武

舉會試者或其人材可用驛射亦優而以不合式之故遺而

不錄者有之朕意殊為憫惜令兵部宣示有願効力與再試

者具呈候該部請旨再行考試遴選交火器營令其服習戎

事於會試時照常考校既晰知其人亦便於拔取有超羣者

即與錄用如此則人材不致遺棄於考試良有裨益矣（又）

諭大學士等朕聞奉旨遣往各省大臣官員沿途文官朝服

武官介冑以迎之此皆未當於理著禁止（辛丑）傳臚賜殿

試武舉曹曰璋等九十六人武進士及第出身有差（壬寅）

上詣

皇太后宮問安（癸卯）

上幸南苑行圍諭大學士等巡捕營職任關係緊要朕觀上

三旗在內當差漢軍執事人等皆最勤勞此中多有驛射甚

優行走熟練者不但隨處差遣不致遲誤即領兵對敵亦不

肯稍有退縮巡捕營員缺著步軍統領將上三旗漢軍執事

人內一并選擇具奏以兵部左侍郎王維珍為浙江巡撫

轉兵部右侍郎張集為左侍郎。陞浙江巡撫張鵬翮為兵部右侍郎。○陞監察御史禪卜為陝西布政使司布政使。○甲辰。

上自南苑回駐暢春園。○乙巳。

上以大閱幸玉泉山駐蹕。○陞江南提督金世榮為福州將軍。○工部議覆吏部左侍郎常書等疏。言臣等遵旨查閱河隄。通州至天津運河。要兒渡等處。隄岸衝決者八處。坍塌者二處。請交巡撫郭世隆速行修築。務於明年夏季完工。應如所請。得旨依議。此外兩岸河隄。如有單薄。應修處著郭世隆親往詳閱議奏。○喀爾喀土謝圖汗遣使進九白年貢。宴賚如

例。○丙午。

上大閱於玉泉山西南平曠之地。火器營護軍驍騎前鋒護軍驍騎等以次排列。

上躬擐甲胄乘馬過觀。御玉泉山巔黃幄。驗試火器畢。樹侯。

上親射。發十矢皆中。次命十五善射。并硬弓侍衛等射。賜八旗

官兵食。是日駐蹕玉泉山。○戊申。

上自玉泉山回宮。○庚戌。陞福建督糧道任鳳厚為貴州按察使。司按察使。○癸丑。

上詣

皇太后宮問安。○甲寅。兵部議覆昭武將軍郎談疏。言披甲人

等內有不遵法紀者。應照律治罪。

上諭大學士等曰。此事著嚴處。且頒給將軍等敕書內。首言勿得累民。凡行兵若無紀律。斷不能成事。前南方用兵時。不擾民者皆克成功。凡擾民之兵。無一成功者。易曰。師出以律。豈可任其擾害乎。○九卿議覆河道總督于成龍疏。言高家堰等處。隄工所關甚鉅。土隄易為水勢衝壞。請改建石隄。以為永久之計。併請於近隄開一小河。運送工料。臣等公議。准行。上曰。修此隄工。所需之石。從何處取辦。應用。此隄關係緊要。必須修築堅固。方可無虞。朕聞洪澤湖昔日俱係民田。因高家堰築隄。淮水泛溢。遂爾成湖。彼時之民。未必不怨。今高家堰

實錄卷之三

九

隄理應修固。但需用石料浩繁。若運辦不得法。恐致累民。雖動正項錢糧。給價募僱。然地遠工繁。或仍派於民。減給工價。亦未可定。朕前南巡。親覽此隄。極為緊要。惟恐擾民。故爾躊躇。必詳悉籌畫。方可舉行。至開運料小河。九卿所議。殊未明白。河道關係甚大。朕從十五歲。即為河道憂慮。今欲開小河。必指高家堰相近之處。往年靳輔在時。亦欲於高家堰另築一隄。於中浚小河。令從兩隄間通流。運送工料。九卿以兩隄之間。浚河則舊隄兩面受水。衝溢議不准行。今于成龍請開運料小河。即靳輔欲開小河之處。若將此開濬。勢必引入洪澤湖之水。浸潤衝刷。兼之湖水泛溢。河水盈漲。高家堰斷不

能保。況修隄土石並非高郵等處所出。與其於小河以小船載運。何如即由洪澤湖以商賈大船載運。此本著另議具奏。尋九卿議覆。高家堰等處改建石隄。為永久計。應如所請。速行建造。其開運料小河。必至引入洪澤湖之水。衝激高家堰。隄工應不准行。從之。○正黃旗二等伯納秦年老休致。以其子穆爾泰襲替。丙辰。命通州坐糧廳監督。以三年為滿。從倉場侍郎德珠等請也。○丁巳。內閣學士達虎以病乞休。允之。戊午。

上詣

皇太后宮問安。○己未。

上御太和門視朝。文武陞轉各官謝恩。○壬戌。大學士等以朝審情實重囚六十九人請旨。

上細閱招冊。勾決者四十五人。諭大學士等曰。諸案皆屢經覆奏。即行正法。不為寬濫。其再行監候者。亦於萬無可生之中。留一線生路耳。○癸亥。予故雲南貴州總督丁思孔祭葬如例。

十一月。乙丑朔。○丁卯。

貴妃鈕祜盧氏薨。諡溫僖。○己巳。冬至祀

天於

圓丘。遣領侍衛內大臣公舅舅佟國維行禮。遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。停止次日朝賀。○壬申。

上詣

皇太后宮問安。○喀爾喀澤卜尊丹巴胡土克圖遣使進九白

年貢。宴賚如例。○癸酉。吏部右侍郎安布祿工部右侍郎常綬等奏。臣等遵旨查直隸安州等十一州縣貧民十萬餘口。應賑米四萬餘石。

上諭大學士等曰。朕思直隸米價騰貴。小民艱苦。若僅照數給米。仍恐無益。著將此米一半散給百姓。一半照目前米價折銀給與貧民。所餘之米。著視時價減糶。則百姓既得銀兩。而糶米又易。庶民沾實惠。其安州等十一州縣康熙三十四年地丁錢糧盡行蠲免。○又諭曰。密雲順義附近地方。今年米穀未收。除常平倉米穀平價照常糶賣外。并將前轉運積貯之米。每月發千石平價糶之。遣戶部賢能司官各一員監視。

糴賣免江南邳州康熙二十四年至二十七年窪地民欠額賦。陞江西南贛總兵官張旺為江南提督湖廣督標中軍副將李日榮為廣東順德總兵官福建澎湖水師副將王國興為福建臺灣總兵官。丙子。陞戶部郎中勒德為內閣學士兼禮部侍郎。戊寅以原任刑部尚書陳廷敬為戶部尚書。以兵部右侍郎張鵬翮提督江南學政。○溫僖貴妃喪事停殯於朝陽門外鑲黃旗滿洲都統公阿靈阿舉家男婦守孝而阿靈阿與其長兄法喀素不相睦必欲致之死地乃造言其兄法喀與其三兄福保之妻踰牆調誘欲行姦汙以此播揚於眾。法喀奏聞。

平定回疆

平定回疆

上洞悉阿靈阿之奸偽面加誡飭阿靈阿兇毒益甚堅執前說。上震怒將阿靈阿革去都統并所襲一等公。○癸未。

上謁

暫安奉殿

孝陵命皇三子允祉

皇四子。皇八子允禩隨駕。是日啟行駐蹕烟郊。移江南

鳳陽關監督駐正陽關從江南江西總督范承勳請也。甲

申

上駐蹕邳均。乙酉

上駐蹕黃崖口。丙戌。

上駐蹕薊州孫家莊。丁亥。

上謁

暫安奉殿

孝陵行禮奠酒舉哀畢至

仁孝皇后。

孝昭皇后。

孝懿皇后陵奠酒舉哀。是日駐蹕湯泉。己丑

上駐蹕遵化州。庚寅

上駐蹕三屯營。辛卯

上駐蹕米峪口。癸巳。

實錄卷五十五

十三

上駐蹕沙澗。

十二月甲午朔

上駐蹕建昌營北。乙未

上駐蹕遷安縣長嶺峯。丙申

上駐蹕夾河地方。丁酉

上駐蹕遵化州鐵廠地方。戊戌

上駐蹕遵化州。己亥

上謁

暫安奉殿

孝陵行禮奠酒舉哀。是日駐蹕湯泉。庚子。



上駐蹕薊州孫家莊○辛丑

上駐蹕黃崖口○壬寅

上駐蹕將軍營地方○癸卯

上駐蹕三河縣馬房地方 甲辰

上回宮詣

皇太后宮問安 達賴喇嘛班禪胡土克圖遣使進貢賞賚如

例○諭八旗護軍校護軍等朕歷年於蒙古地方行圍勤勞

効力之人無有及我滿洲者此次官員兵丁盡皆整肅朕心

深為嘉悅是以偏加恩賚若率此兵以臨戰陣更復何憂然

兵丁所最仗者莫如馬匹爾等喂養馬匹甚不加意每致疲

乏皆由不善拴繫及不時飲水之故也爾等既養官馬若致

疲斃必須買補豈不為累又爾等衣帽雖係小節有關生計

爾等好用貂緞貴物不知一貂帽一緞衣其價值孤皮帽羊

皮袍數件爾等何用此貴物朕此次謁

陵原欲巡幸邊外見爾等衣裝單薄故不果行若用出師豈可

如此特降此諭爾等各宜謹誌 予故寧古塔副都統雅泰

祭葬如例 丁未諭吏部兵部安珠護因素有虛名朕屢加

試用授為奉天將軍前朕東巡之時安珠護於眾官員兵丁

前向朕奏言臣所管官員兵丁皆藐視臣朕雖知安珠護庸

懦無能止革去將軍仍授為管理索倫總管令其効力自為

總管後猶不改故轍選取虛名不能約束所屬之人安珠護

居官以來全無効力之處所行皆出於沽名此等欺妄無恥

之人不加懲治何以垂戒將來伊世職著革去不准承襲其

子安什布著留在京當差 理藩院題前鄂爾多斯多羅貝

勒達爾扎由固山貝子加封多羅貝勒未奉有世襲弗替之

旨今達爾扎故其子應不准承襲多羅貝勒

上諭大學士等曰達爾扎凡事誠心効力奮勇行間病篤時將

伊旗人齊集於朕差往御醫之前強起望闕叩首遍囑衆人

曰朝廷憐恤我等甚深汝等毋違我意善報皇上宏恩忠義

可嘉伊子旺束克著仍襲多羅貝勒○轉刑部右侍郎田雲

為左侍郎陞大理寺卿陳汝器為刑部右侍郎 陞廣東瓊

州水師副將林萬僖為江西南贛總兵官 戊申

上御太和門視朝文武陞轉各官謝恩 諭吏部觀部院衙門

官員皆係總計年俸補授因而庸劣者多爾等傳諭內閣及

部院衙門將庸劣之員各行叅奏 庚戌諭大學士等朕覽

福建浙江總督朱弘祚大計疏內有閩省地瘠民饑之語豈

福建全省之人盡皆饑薄乎原任四川巡撫張德地署理延

綏巡撫時曾奏延安邊地並無可舉博學鴻詞之人原任少

詹事邵遠平奏南方之人皆輕浮不可用朕思賢才不擇地

而生雖深山僻地豈無人才至於南方之人豈盡皆輕浮不

可用者。二人所言甚不愜於朕心。因皆罷斥。今朱弘祚又以  
此等謬言陳奏。殊屬不合。著該部察議具奏。尋部議朱弘祚  
應降四級調用。從之。○調鑲黃旗蒙古都統覺羅席特庫為  
滿洲都統。辛亥

上詣

皇太后宮問安。壬子。諭大學士等。武官品級比文官品級甚  
大。武官於行間効力。果有功績。品級自宜從優。今武官品級  
太過。宜作何裁定。爾等查議具奏。陞太常寺卿李輝祖為  
大理寺卿。○吏部題阿靈阿緣事革退。都統併公爵其一等  
公。應令阿靈阿子朝昆襲替。得旨。阿靈阿著留一等公。○刑

實錄卷百五十五

十六

部題阿哈尼堪盜伐風水禁地樹木。應立絞

上曰。此伐木處雖屬風水。然非內地。似此愚民。無知犯禁者。前  
此曾經寬宥。著枷責發落。旌表河南烈婦田玉才妻戴氏。  
拒姦殞命。給銀建坊如例。癸丑。順天府進春。工部議覆  
直隸巡撫郭世隆疏。言臣遵旨詳閱通州至天津運河兩岸  
隄工。衝決應修築者七處。應加修者二十五處。應令該撫速  
行修築。堅固從之。甲寅。以散秩大臣杜思噶爾為鑲黃旗  
蒙古都統。陞原任福建布政使李鈞為太常寺卿。乙卯  
上幸南苑行圍。戊午  
孝莊文皇后忌辰遣官祭

暫安奉殿。庚申。

上自南苑回宮。辛酉歲暮。裕祭

太廟。遣領侍衛內大臣公舅舅佟國維行禮。遣官祭。

永陵

福陵

昭陵。

暫安奉殿。

孝陵。

仁孝皇后

孝昭皇后。

實錄卷百五十五

十七

孝懿皇后陵。遣官祭太歲之神。壬戌。賜朝正外藩科爾沁

喀爾喀阿霸垓喀喇沁土默特。扎魯特烏朱穆秦杜爾伯特

郭爾羅斯毛明安巴林等諸王貝勒貝子公及內大臣大學

士。上三旗都統副都統尚書侍郎學士侍衛等宴。旌表八

旗節婦滿洲常舒妻赫氏等六十三人。蒙古恩克妻杜氏等

五人。漢軍陳應選妻李氏等五人。並給銀建坊如例。是歲

人丁戶口二千三十七萬六百五十四。田地山蕩畦地五百

九十七萬五千二百六十八頃五十四畝。有奇。徵銀二千七

百三十九萬五百六十二兩。有奇。米豆麥六百九十六萬五

千三十二石。有奇。草二百八萬一千五百四十二束。茶十五

萬七千四百五十三引。行鹽四百三十一萬九千三百七十引。徵課銀二百六十九萬五千二百八十二兩有奇。鑄錢二萬三千六百五十三萬六千五百五十有奇。

實錄卷一百六十五

九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百六十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百六十六

康熙三十四年乙亥春正月癸亥朔

上詣

堂子行禮還宮。拜神畢。率諸王貝勒貝子內大臣大學士侍衛等詣

皇太后宮行禮。御太和門。王以下文武各官外藩王及使臣等

上表朝賀。停止筵宴。○朝鮮國王李煥遣陪臣申琬等表賀

冬至元旦

萬壽節。及進歲貢禮物宴賓如例。○甲子

實錄卷一百六十六

上詣

皇太后宮問安。○先是

上巡行口外。諭黑龍江將軍薩布素曰。近有厄魯特蠢動聲息

爾可即歸整兵預備。設有事進剿盛京烏喇及爾處官兵可

會於形勝之地。相機前進。科爾沁兵亦令隨行。至是薩布素

疏言。臣遵諭查形勝之地。惟索岳爾濟山最為高大。臣擬派

官兵自盛京烏喇墨爾根三處至索岳爾濟山。一一丈量分

置程站。其無水之處。掘井以待。嗣後若索岳爾濟山之東北

枯倫貝爾等處有警。則與臣駐軍之地相近。臣即先進兵。烏

喇盛京兵繼之。若索岳爾濟山之西。烏爾會等處有警。則與

盛京相近。盛京兵先進。烏喇及臣處兵繼之。總期會於索岳爾濟山。以進奏至。從之。○丁卯

上詣

皇太后宮問安。○己巳

世祖章皇帝忌辰。遣官祭

孝陵。○辛未。祈穀於

上帝

上親詣行禮。○

上奉

皇太后幸暢春園。○壬申

書錄

上詣

皇太后宮問安。○癸酉。孟春享

太廟。遣領侍衛內大臣公福善行禮。○遣官祭太歲之神。○甲

戌

上詣

皇太后宮問安。○丙子。以上元節。賜外藩科爾沁喀喇沁土默

特毛明安喀爾喀阿霸垓巴林教漢王貝勒貝子。公台吉等

及內大臣。大學士。上三旗都統。副都統。尚書侍郎。學士。侍衛

等宴。○丁丑。上元節。賜外藩王貝勒貝子。公台吉等。及內大

臣。大學士。上三旗都統。副都統。尚書侍郎。學士。侍衛等宴。○

戊寅

上詣

皇太后宮問安。○諭大學士等。與永朝前請丈量湖南田地。有累於民否。治國之道。莫要於安民。或有不肖州縣官。將田地竟未行文丈量。而輒稱餘田加賦者。亦未可定。安有加增田賦。而全不累民之理。此事著湖廣總督吳璥詳察具奏。○乙酉

上詣

皇太后宮問安。○諭兵部。朕巡視京畿。見綠旗兵沿途奔走。無頃刻之暇。甚屬勞苦。深為可憫。問之。則云兵部內私用印信文移。護送家口等事甚多。除已往之事。不復察究。自後爾部

書錄

三

移文各處總兵官。將派出兵丁護送大臣官員事件數目。年終詳明造冊送爾部察奏。○諭大學士等。去歲於直隸山東河南山西陝西江南諸省下。詔捕蝗諸郡。盡皆捕滅。蝗不為災。農田大獲。惟鳳陽一郡。未能盡捕。去歲雨水連綿。今歲春時。若或稍旱。蝗所遺種。至復發生。遂成災沴。以困吾民。未可知也。凡事必豫防而備之。斯克有濟。其下戶部。速行文直隸山東河南山西陝西江南諸巡撫。亟宜耕耨田畝。令土瘠蝗種。毋致成患。若或田畝有不能盡耕者。蝗始發生。即力為撲滅。毋使滋蔓為災。○賜朝正外藩王貝勒貝子。公台吉等。銀幣鞍馬有差。○丁亥

上奉

皇太后自暢春園回宮○調正紅旗蒙古都統護巴為本旗滿洲都統○以翰林院侍讀學士顧祖榮張廷璣侍講學士王九齡俱充日講起居注官○戊子祭

大社

大稷遣領侍衛內大臣公舅舅佟國維行禮○庚寅

上詣

皇太后宮問安○兵部議覆白都納副都統沙納海疏言白都納地方應添設協領六員訓練席北卦爾察等應如所請從之○辛卯

實錄卷一百六十六

四

上幸湯泉○大計天下各官卓異官六十二員貪酷官九員貪官二十二員酷官三員不及官四十三員老疾官十五員年老官八十八員有疾官四十九員不謹官三十八員罷軟官二十三員浮躁官三十八員陞賞處分如例

二月癸巳朔禮部議覆黑龍江將軍薩布素等疏言墨爾根地方兩翼應各立學設教官一員新滿洲諸佐領下每歲各選幼童一名教習書義應如所請從之○甲午戶部題舊例八旗世職承襲之人未及年歲者亦支全俸但年幼承襲之人既未上衙門止應給與半俸俟年長上衙門之時再給全俸從之○丁酉遣大學士伊桑阿祭

先師孔子○

上自湯泉回宮詣

皇太后宮問安○戊戌春分朝

日於東郊遣戶部尚書馬齊行禮○諭大學士等近觀言官奏事或受人囑託或懷私賣本所奏之事俱非無故如原任侍郎鄭重有門生曾任陝西縣令為總督佛倫題參遂轉囑彭鵬將陝西全省官員俱行參奏豈有因一人之仇遂參全省官員之理凡任言官者但宜將關係國家得失生民休戚之事從直陳奏豈可受人囑託懷挾私仇賄賣本章而條奏乎如有此等之人必盡察出正法斷斷不恕○正藍旗滿洲副都統孫他哈以年老乞休允之○己亥陞直隸巡撫郭世隆為浙江福建總督○庚子陞正紅旗護軍參領鈕牛為本旗蒙古副都統○辛丑

實錄卷一百六十六

五

上詣

皇太后宮問安○陞正紅旗滿洲副都統齊世為本旗蒙古都統○鑲黃旗滿洲副都統覺羅海篤以老病乞休允之○癸卯

孝康章皇后忌辰遣官祭

孝陵○予故原任文華殿大學士兼吏部尚書李之芳祭葬謚文襄○甲辰大學士等以翰林院撰原任福建巡海道殉難

追贈工部右侍郎陳啟泰碑文呈覽

上曰陳啟泰殉節與他人不同觀其闕家之人逐一自盡畢伊然後自縊而死甚屬慘傷海賊進城見其家棺櫬如許亦為垂淚伊子陳汝器被海賊掣獲後方得出應將此等事俱行撰入觀此碑文詞意尚未詳盡爾等可查明另撰 乙巳

上詣

皇太后宮問安 丁未

上御太和門視朝文武陞轉各官謝恩 陞直隸守道沈朝聘為直隸巡撫山西河東道王國泰為廣東按察使司按察使 戊申調正紅旗蒙古副都統覺羅安圖為本旗滿洲副都統 正紅旗驍騎參領扎喇克圖為本旗蒙古副都統 予故都統紀爾他布祭葬如例 己酉

上詣

皇太后宮問安 庚戌遣官祭

歷代帝王 辛亥遣官祭

先農之神 以散秩大臣覺羅舒恕為鑲黃旗滿洲副都統 壬子

上詣

皇太后宮問安 癸丑清明節遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵 甲寅陞正藍旗護軍參領禪穆布為本旗滿洲副都統 乙卯

上詣

皇太后宮問安

厄魯特噶爾丹遣使他西蘭和卓請安入貢

并疏言

皇帝敕諭賜物不勝惟忭文內深意雖不盡曉奉有是則加恩非亦曲宥之旨始敢以後先情事歷為上陳使臣馬迪被害之事不獲詳知難於覆奏扎木巴爾臧布胡土克圖早已遁去所云約地會盟之事未便擅定俟後再行奏聞欲遣丹津俄木布丹濟拉往覲所需費力多則倉卒難辦少則為路甚遙是以陳情上奏回子所行之事實不知情伏念

皇帝恩養四十九旗蒙古及四厄魯特不啻赤子是以咸享安

樂奈澤卜尊丹巴及土謝圖汗二人背

皇帝之肯貌宗喀巴之法與達賴喇嘛之教以致諸蒙古盡皆

敗壞請將喀爾喀七旗發回故土澤卜尊丹巴及土謝圖汗二人亦仍照前奏奏上

上賜敕諭噶爾丹曰去歲諭爾敕內諸凡開示甚晰朕俯念中外咸在懷抱爾厄魯特與喀爾喀仇殺相尋日無寧息心實傷之且思爾等皆職貢之國朕一聚秉公舉無偏庇後喀爾喀窮迫來歸朕乃收撫以全其生命此亦朕矜恤羣生之至意也爾噶爾丹不遵朕言亦自失其生理而已於我四十九旗蒙古何敗壞之有今爾縱戕害使臣馬迪之人不正法請罪乃巧飾誑奏是爾違朕之旨迷惑回子之教壞宗喀巴與達賴喇嘛之法明甚朕是以遣回爾使不令進邊嗣後若仍

實錄卷一百六十六

怙非不悛蔑視前諭爾永勿上疏遣使貿易特諭○丙辰諭大學士等朕昨幸五龍亭因往視光明殿東柴殿內失火延燒處守巡官員兵丁盡皆曠誤凡諸守視之地以有關繫始設官員兵丁若此怠忽將來流弊其何底止可敕八旗滿洲蒙古漢軍都統副都統等嗣後各於本旗官員兵丁守視處身往不時巡察有曠誤者當叅奏則叅奏當答責則答責之步軍統領等巡察該管官員步兵之使其馬兵守視處並令巡察至於米倉所繫重要尤宜敬慎倘有疎虞守視官員兵丁必戮無赦其下八旗都統副都統等遵行毋怠 丁巳以太和殿興工遣官告祭

天地

太廟

社稷 戊午

孝昭皇后忌辰遣官祭

陵○庚申陞山西布政使舒樹為甘肅巡撫○辛酉

上詣

皇太后宮問安○兵部等衙門議覆更定武職官員品級除叅將遊擊大員品級仍照舊例不改外其掌印都司管屯都司僉書都司僉書署都司僉書四項俱陞遊擊應皆改授正四品守備改正五品守禦所千總改從五品衛千總改正六品營千總改從六品其見任者仍照原品從之

三月壬戌朔○癸亥

上詣

皇太后宮問安○諭大學士等翰林官撰擬文章是其專任善與不善皆應有鼓勵懲戒之處自是以後凡碑文祭文其撰擬人姓名及所撰之文或經俞允或被申飭一一記明有三次善三次不善者俱行奏聞○予故刑部左侍郎噶世圖祭葬如例 甲子

上奉

皇太后幸暢春園 予故輔國公托塞祭葬立碑如例 予故



副都統劉顯芳祭葬如例 丙寅

上詣

皇太后宮問安 丁卯陞光祿寺卿席密圖為都察院左副都

御史 戊辰

上詣

皇太后宮問安 庚午免山西河津榮河二縣本年分水衝田

畝額賦 辛未諭大學士等趙良棟疏訴其効力行間為同

時出征將軍章泰圖海賴塔穆占郎談等黨同隱蔽其勞績

且自言各處立功甚多並未議敘與趙良棟同時出兵將軍

等俱已物故此皆無證之言又稱明珠前差往鄂爾多斯過

實錄卷六十六

十

寧夏時伊魯將効力之處求為轉奏亦被隱蔽明珠回時曾

將趙良棟之言悉行陳奏可曉諭趙良棟知之彼又將佛倫

非毀因加張勇侯爵亦行忌嫉觀此趙良棟乃暴戾褊隘之

人也當時大兵自湖廣中路進克岳州又攻取陝西平涼恢

復廣東福建等省皆與趙良棟絲毫無涉朕惟欲保全功臣

但從寬大此本可發還趙良棟只將彼効力陳奏處該部議

敘可也 壬申

上詣

皇太后宮問安 癸酉授固山貝子章泰女為縣君壻顧魯為

固山額駙 陞工部郎中甘度為山西布政使司布政使

增盛京八城取進生員額數滿洲蒙古十名漢軍五名從府

丞金璽請也 甲戌

上詣

皇太后宮問安 已卯

萬壽節停止朝賀筵宴 遣官祭

福陵

昭陵

暫安奉殿

孝陵

仁孝皇后

實錄卷六十六

二

孝昭皇后

孝懿皇后陵 遣官祭真武東嶽城隍之神

上詣

皇太后宮問安 庚辰

上自暢春園回宮 是日

上幸南苑行圍 壬午

上自南苑回駐暢春園詣

皇太后宮問安 丙戌以侍衛石文英為正白旗漢軍都統

陞翰林院侍讀學士莫里普為光祿寺卿 免福建閩清等

三縣康熙三十三年分水災額賦有差 丁亥

上詣

皇太后宮問安 以鎮國將軍巴賽為鑲藍旗漢軍副都統

已丑

上自暢春園回宮 予故都察院左副都御史沙哈禮祭葬如

例 予故原任四川建昌總兵官王進才祭葬如例

夏四月壬辰朔享

太廟

上親詣行禮

上幸暢春園詣

皇太后宮問安 杭州副都統倭賀以老病乞休命以原品致

仕 丙申

上詣

皇太后宮問安 丁酉以翰林院侍講學士禪拜充日講起居

注官 戊戌阿霸垓多羅卓禮克圖郡王塞楞故遣官致祭

庚子戶部題天津開河工程行文附近州縣派夫定限挑

濬得旨若行文各州縣定限派夫必致苦累民間著停止行

文即發與雇價令天津等處雇民挑濬如此則公事告成而

窮民亦可資以度日矣 理藩院題達賴喇嘛及第巴皆遣

使奏請勿革噶爾丹策妄阿喇布坦汗號并加恩賜敕印其

西海等處一帶地方所置戍兵請撤回

上諭大學士等第巴乃外藩人何敢奏請徵我朝兵戍此特為

噶爾丹計耳我之守戍乃以噶爾丹闖入吾土之故向者噶

爾丹敗已將就擒因彼之濟隆胡土克圖來言噶爾丹乞降

始得亡命今噶爾丹仍索喀爾喀未已則我朝既不當罷戍

亦且當備師如噶爾丹來即行勦滅倘悔過乞降亦無有不

撫之之理爾等可會同理藩院侍郎滿丕備檄曉諭達賴喇

嘛及第巴知之 辛丑

上詣

皇太后宮問安 癸卯理藩院奏喀爾喀台吉車臣吳爾占以

噶爾丹情形來報曰去年噶爾丹居於孔圭濟達渾耕於烏

闌昆收斂各半其弓箭手千餘人稍有駝馬絕無牛羊掘土

中所產物以食杜噶爾阿喇布坦居於察罕色渾耕於扎巴

罕哈薩克圖亦收成一半其生計稍勝噶爾丹策妄阿喇布

坦尚未與噶爾丹通使伊拉古克三胡土克圖仍在噶爾丹

處並無舉動聲息去歲八月間聞京師發兵往赴根敦戴青

彼以為率之來討故集兵為備置哨偵探迨後無聲信始徹

回哨卒報聞 甲辰

上詣

皇太后宮問安 遣御史鍾申保內齊陀音胡土克圖齋敕往

召班禪胡土克圖 乙巳

上詣

皇太后宮問安○戊申

孝端文皇后忌辰遣官祭

昭陵○已酉兵部議敘勇畧將軍趙良棟應給與三等精奇尼

哈番趙良棟具疏辭

上曰趙良棟以所給職小故爾控辭昔大兵恢復雲南時大將軍賴塔等領兵從廣西進大敗黃草壩石門坎之賊直抵雲南首城大將軍章泰領兵從貴州入沿途殺敗賊衆亦抵雲南省城城中之寇出戰於歸化寺大敗之遂圍雲南趙良棟雖後至其首先倡議大兵進川及取得勝橋有功著該部一

實錄卷一百一十五

七

并再議具奏尋部議應授為二等精奇尼哈番得旨趙良棟授為一等精奇尼哈番○授故奉恩將軍鍾啟子猷啟為奉恩將軍○庚戌

上奉

皇太后自暢春園回宮○乙卯

上詣

皇太后宮問安○諭大學士等河南巡撫顧沂居官平常著降二級調用○丙辰

上御太和門視朝文武陞轉各官謝恩○諭戶部項山西巡撫噶爾圖等奏報四月初六日平陽府地震房舍倒塌人民損

傷隨經特遣司官星馳前往察勘情形比復傳問往來經過

及本籍人員具述屋宇盡皆傾毀人口多被傷斃受災甚重

朕心深切軫惻應作何恩卹著速議奏○諭大學士等平陽

府如此災沴或政事有應行應革者可傳集九卿問之其平

陽府屬見任京官之人欲歸視家室者不行開缺給假往視

○丁巳

上幸南苑行圍○已未陞大理寺卿李輝祖為河南巡撫○諭

大學士等聞外藩扎薩克人等或有私隨我朝遣赴達賴喇

嘛處之使臣而去者或有同達賴喇嘛使人前來不返故土

竟自留於歸化城各扎薩克處者噶爾丹乃狡詐之人具各

實錄卷一百一十五

五

處安插奸細偵探聲息之事顯然敗露猶自不服巧飾上奏

或令其屬下喇嘛潛隨達賴喇嘛之使人前來偵探反間亦

未可定嗣後宜嚴行禁止○理藩院議覆達賴喇嘛來使所

帶之人宜永行禁止不許存留

上諭侍郎滿丕等達賴喇嘛來使所帶之人若槩行禁止則外

藩蒙古不得私行貿易其心不服達賴喇嘛之人往來已久

不必限定來使所帶人數但來人有達賴喇嘛印信者納之

如無印信則非係達賴喇嘛之人即不納如此議定則不禁

而自絕蒙古亦皆心服矣尋理藩院議覆達賴喇嘛及諸扎

薩克之往來使人令其各給與符驗從之○授鎮國公門度

子鎮度為三等鎮國將軍。鎮國公額爾圖子賽音圖為三等輔國將軍。和碩恭親王常寧庶子海善奉國將軍經德子巴津泰俱為奉恩將軍。庚申戶部遵諭議覆賑恤山西平陽府地震被災人民應差部院堂官一員會同該撫查明壓死大口給銀一兩五錢小口給銀七錢五分有力不能修房之民每戶給銀一兩得旨賑恤平陽被災人民著馬齊馳驛速往察明被災地方本年應征錢糧停止徵收每一大口著增銀五錢人各給與二兩餘依議。辛酉予故原任甘肅巡撫嚴泰祭葬如例。

實錄卷一百六十六

十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百六十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百六十七

康熙三十四年乙亥五月壬戌朔奉差山西平陽等處賑濟戶部尚書馬齊請訓旨

上諭之曰爾傳諭巡撫噶爾圖平陽等處地震房舍倒塌人民壓斃伊應親身於彼處設廠居住將被災百姓救護候朕諭旨乃遽回省城殊屬不合除噶爾圖所奏外有地震重處爾可詳察閱視加恩賑給本年應徵錢糧停其徵收爾到彼處即曉諭眾民皇上為爾百姓深切軫念特遣大臣賑救爾眾民毋妄遷徙離散且恐因地震地方不良之人及鎮標兵丁借端搶奪擾害生民傳諭總兵官周復興親身率領官兵將此一帶地方善為防護其平陽府洪洞縣被災百姓爾會同巡撫噶爾圖親身往彼處賑濟務令均沾實惠 癸亥

實錄卷一百六十七

一

上詣

皇太后宮問安 陞正紅旗護軍叅領法喀為本旗漢軍副都

統 甲子

仁孝皇后忌辰遣官祭

陵 乙丑

上諭大學士等曰朕一聞平陽地震深切軫念即遣官馳驛察勘被災情形隨頒諭旨令該部速議恩卹又特遣大臣前往

賑濟停徵錢糧噶爾圖身為地方大吏與百姓誼同休戚乃目擊災傷不候賑濟大臣會同詳加籌畫親行賑濟覓遼爾回省殊屬溺職著嚴察議處具奏尋吏部議噶爾圖應革職交刑部得旨噶爾圖著革職免交刑部 丙寅

上詣

皇太后宮問安 諭大學士等爾等傳諭八旗滿洲蒙古都統各將前鋒護軍披甲兵丁之實無房舍者身自確察於此月初十日保奏凡官員子弟及有房舍與家僕披甲者皆勿察

丁卯

上詣

皇太后宮問安 隆太常寺卿李鈺為大理寺卿 辛未夏至祭

地於

方澤遣領侍衛內大臣公福善行禮 諭大學士等覽八旗都統所察無房舍者七十有餘人未為甚多京師內城之地大臣庶官富家每造房舍輒兼數十貧人之產是以地漸狹隘若復斂取房舍以給無者譬如剗肉補瘡其何益之有貧之兵丁僦屋以居節省所食錢糧以償房租度日必至艱難今可於城之外按各旗方位每旗各造屋二千間無屋兵丁每名給以二間於生計良有所益此屋令毋得擅鬻兵丁亡退

者則收入官大畧計之約費三十餘萬金譬之國家建一大宮室耳敕下欽天監相視汝等及八旗都統身往驗看宜建造之處奏聞 壬申

上巡視新河及海口運道命皇長子允根皇三子允祉隨駕是

日啟行至通州崔家樓登舟 癸酉

御舟泊通州合合站 甲戌遣官祭

關聖帝君

御舟泊武清縣北蔡村 乙亥

上閱寶家口隄岸以應加增築處指示巡撫沈朝聘總兵李鎮鼎等

實錄卷一百一

三

御舟泊武清縣天齊廟 予故輔國公英額祭葬立碑如例 丙子

御舟泊靜海縣白塘口 丁丑

御舟泊大沽 戊寅

上閱視海口命於其處立海神廟

御舟泊滄州鄧善沽 己卯

御舟泊武清縣小新莊 庚辰

御舟泊靜海縣楊柳青 辛巳

御舟泊靜海縣新莊 壬午

御舟泊清縣寧子口 癸未

御舟泊靜海縣北關（甲申）

御舟泊武清縣北倉（乙酉）

御舟泊武清縣北蔡村（丙戌）

御舟泊香河縣板曹口（丁亥）予故蒙古都統喇賽副都統達克薩

哈各祭葬如例（戊子）工部議覆直隸巡撫沈朝聘疏言請開濬

獻縣完固口及霸州栲栳圈舊河應如所請從之（己丑）丁亥

御舟泊通州石壩（庚寅）戊子

上回宮詣

皇太后宮問安（辛卯）己丑添設盛京刑部蒙古員外郎一員（壬辰）陞

山東布政使喻成龍為太常寺卿（癸巳）庚寅

實錄卷一百一十七

四

上幸暢春園（甲午）諭大學士等副都統齊蘭布等自盛京還奏言

今歲盛京亢旱麥禾不成米價翔貴雖市有鬻粟而窮兵力

不能糴遂致重困盛京根本之地可令侍郎朱都納學士嵩

祝等馳驛迅往會同盛京將軍副都統諸臣詳察窮乏者於

去歲海運米二萬石中動支一萬石計會散給今可食至秋

成餘一萬石平價糴之兵民均有裨益又諸地有告糧乏者

遣城守尉部員賢能者亦賑給之如二萬石不足散給發糴

其速以聞（乙未）陞內閣學士李枏為工部右侍郎

六月辛卯朔（丙申）甲午兵部疏叅右衛將軍希福等未收八旗

撥送馬匹以致虛費錢糧希福應革職護軍統領札木素內

大臣護軍統領四格副都統方額馬錫張素儀吳興祚等俱

降三級調用從之（丁未）喀爾喀貝勒根敦戴青探報噶爾丹行

裝已至扎布堪河阿喇布坦行裝已至敖拉海

上諭理藩院所報雖無實據亦應行文與歸化城黑龍江兩將

軍知之再檄喀爾喀諸扎薩克凡根敦戴青經行之地事遇

緊要即以馬匹支應毋誤（戊申）又諭領侍衛內大臣蘇爾達等

聞噶爾丹將從嘉峪關外過哈密之南昆都倫及額濟內河

往投達賴喇嘛應遣幹員往探若果噶爾丹於此取道此機

斷不可失應即行剿滅著副都統阿南達作速前往會同將

軍博爾孫恩克提督李林隆等公議確探擇便以行李林隆

實錄卷一百一十八

五

可選標兵一二百名速往甘州商酌行事兵部即檄將軍提

督等知之（己未）乙未以內閣學士溫保為山西巡撫（庚申）陞陝西

驛傳道張霖為安徽按察使司按察使遣官修築平陽府

地震倒塌城樓衙署倉庫（辛酉）丁酉以冊立皇太子允初祀遣

官告祭

太廟（壬戌）陞一等侍衛達利善為鑲黃旗漢軍副都統（癸亥）己亥

上自暢春園回宮詣

皇太后宮問安（甲子）諭理藩院歸化城土默特兩旗連年効力苦

累其歲貢石青等物永行停止（乙丑）庚子諭大學士伊桑阿阿

蘭奏數日間雨水過多若連綿不止民田恐致被損朕聽理

政事無日不念切民生今雨水如此或人事有所未盡命傳集九卿詹事掌印不掌印科道將應興應革事務宜各抒所見以聞。又諭禮部尚書張英數日來雨水過多慮傷田禾四月內又有平陽地震之災或者陰盛所致朕思天時與人事恒相感召未可謂災沴為天時適然之數全不關於人事也堯舜之時猶有都兪吁咈蓋古之聖人已治而益求其治已安而益求其安故兢兢業業始終如一朕朝夕以此警惕於衷三十餘年以來未嘗一日稍自寬假亦有請問日理事者朕不以為然惟存恒久之心時時乾惕耳朕思地方間有荒歉正可動人警戒之念古人所謂遇災而懼也朕於宮中費用從來力崇儉約期以有餘沛恩百姓若非撙節於平時安能常行蠲賑之事耶。辛丑

上奉

皇太后幸暢春園。陞江西按察使王道熙為山東布政使司布政使。陞天津總兵官李鎮鼎為廣東提督。奉差山西賑濟戶部尚書馬齊等回奏賑濟山西平陽府臨汾等十四州縣一衛地震被傷人民賑濟銀十二萬六千九百兩零停徵臨汾洪洞浮山襄陵四縣平陽一衛本年額賦下所司知之。壬寅陞內閣侍讀學士額赫禮兵部督捕左理事官齊禧俱為內閣學士兼禮部侍郎。陞鑲黃旗滿洲副都統覺

實錄卷五十七

五

實錄卷五十七

七

羅舒恕為右衛左翼護軍統領正紅旗滿洲副都統瓦爾達為右衛右翼護軍統領。癸卯諭大學士等時值久雨連綿乍止復雨將不利於田稼朕甚憫焉亟宜祈晴其傳禮部速議以聞。調鑲白旗蒙古副都統党艾為右衛左翼副都統鑲紅旗漢軍副都統拜音佈為右衛右翼副都統。甲辰陞國子監祭酒張榕端為內閣學士兼禮部侍郎。調鑲白旗漢軍副都統馮國相為右衛左翼副都統正紅旗漢軍副都統科爾代為右衛右翼副都統。乙巳戶部議覆倉場侍郎德珠等題揚州運丁吳坤等叩閭事

上曰漕船帶運鳳陽倉米原係累年存貯腐爛者總漕王樑勒令運丁收領窮丁賠補殊為可憫若令王樑等賠補亦未免少枉今俱著寬免此米亦不可發給官俸存貯別用又興永朝條奏內曾言江北漕船比他處較為狹小若載米過多自難裝載貨物今入令帶運鳳陽倉存貯之米益加累重若將漕船添造數隻宜於運丁有益爾等詳議以聞。諭大學士等沙河軍化城盧溝橋拱極城瀾上諸地教工部察勘凡有可營建兵房若干間者并入前造房事內議奏。戊申皇子允祿生。授故輔國公陶色子吳啟圖為三等鎮國將軍。己酉調鑲黃旗蒙古副都統崇古禮為本旗滿洲副都統陞鑲黃旗前鋒叅領席柱為本旗蒙古副都統。庚戌兵部奏



預備出征之副都統瓦爾達科爾代馮國相俱調補右衛副都統王毓秀病故伊等員缺請補得旨以正紅旗副都統扎喇克圖鑲藍旗副都統宗室巴賽正藍旗副都統喻維邦正黃旗副都統張所知派出預備從軍 辛亥

上詣

皇太后宮問安○盛京刑部侍郎佛葆降二級調用以偷創人參罪犯審理不明故也○壬子以順天府府尹劉元慧為宗人府府丞○調正紅旗蒙古副都統鈕牛為本旗滿洲副都統陞正紅旗前鋒參領沙濟為本旗蒙古副都統○甲寅山西太原總兵官周復興以病乞休久之○乙卯陞河南府知

實錄卷一百六十七

八

府孫居湜為江西按察使司按察使○太子太傅保和殿大學士兼禮部尚書王熙以老乞休慰留之○丙辰內閣學士陸藻以病乞休久之○戊午和碩額駙華善故賜馬二匹○己未陞內閣學士額赫禮為盛京刑部侍郎○庚申漕運總督王樑疏奏贛州衛千總楊奉等於漕船裝帶商人貨物上曰王樑將漕船所載貨盡行搜出棄置沿河兩岸所行甚暴從來總漕未嘗禁漕船帶貨而漕運並未遲誤今王樑禁止帶貨而漕運遲誤至今尚未到裝帶些微貨物於事何妨王樑不但暴戾凡事執拘宜令解任○諭大學士等茲後世職若以罪革斥其子勿准承襲令同父昆弟襲之無同父昆弟

者則宜削其職其下吏部定例以聞尋吏部遵旨議覆凡獲罪革職者不准其子孫承襲應與其親兄弟及親兄弟之子孫承襲如無親兄弟及親兄弟之子孫將其職銷去從之秋七月辛酉朔享

太廟遣領侍衛內大臣索額圖行禮○諭議政大臣等寧夏地方緊要宜設官兵駐防可遣官往彼監造營房○癸亥陞國子監祭酒臺濟為內閣學士兼禮部侍郎○甲子

上詣

實錄卷一百六十八

九

皇太后宮問安○乙丑以原任內閣學士病痊候補韓葵補原官○陞湖南巡撫董安國為漕運總督○予故漢軍都統三等伯石文炳祭葬如例○先是陝西道御史龔翔麟疏奏趙良棟矜功冒奏已蒙皇上隆恩給以一等精奇尼哈番今越例求賜田房乞嚴議定罪得旨著趙良棟明白回奏至是趙良棟遵旨回奏臣願在京居住因請房田實因戀

主心切今臺臣謂臣驕縱矜功何不矜功於十六載之前而乃矜功於十六載之後耶為衆排陷不得不備敘陳奏得旨趙良棟於康熙二十七年來京朕召至宮中趙良棟歷奏四川功績未敘實為屈抑言之至於流涕又明珠過寧夏時趙良棟入言功績未敘今謂十有六載從未矜功想年老遺忘朕

念其首倡建議進取四川俱從寬宥又趙良棟奏入京將及一載借貸銀二千餘兩著賞銀二千兩趙良棟年已衰老著回原籍調養已巳陞右衛左翼護軍統領覺羅舒恕為寧夏將軍庚午

孝懿皇后忌辰遣官祭

陵兵部侍郎朱都納內閣學士嵩祝往盛京賑濟回奏

上問曰盛京田禾及環近各城田苗何如嵩祝奏曰上下不等盛京地方比年失收今歲雖有收難支來歲

上曰盛京所貯之米尚有幾何若將賑給可支幾月嵩祝奏曰臣等差往賑濟計五十日所用不至二萬石今自天津海口

實錄卷五十五

十

所運及錦州積貯之米共十二萬石有餘若將賑濟可支六

七月

上曰海運皆有定時不可妄行來歲著令再運諭理藩院侍郎滿丕爾可赴將軍伯費揚古處率滿洲官兵駐劄歸化城

北形勝之地倘有警同費揚古相機行事陞正紅旗漢軍

叅領孟明世為本旗漢軍副都統廣東協領趙珣為鑲紅旗

漢軍副都統陞陝西肅州副將李士達為直隸天津總兵

官直隸通州副將毛來鳳為山西太原總兵官甲戌以內

務府總管馬思喀為鑲黃旗領侍衛內大臣乙亥中元節

遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵戊寅以原任鑲白旗副都統喀佳為本旗蒙古

副都統陞叅領雷繼尊為鑲白旗漢軍副都統庚辰

上奉

實錄卷五十五

十一

皇太后自暢春園回宮領侍衛內大臣郎坦故賜馬二匹

壬午諭吏部兵部各省督撫提鎮官員間令來京陛見原欲

以地方情形及兵民生計面加諮詢具有深意近見來京各

官輒以進川馬等物為辭多所置辦雖經却還但恐其在任

購買致貽地方官員兵民之累朕本欲詢兵民生計召令前

來若反致累兵民殊失朕之初意且川馬如果需用朕自頒

特旨令出產地方辦解何須進獻著通行嚴禁陞內閣侍

讀學士蕭永藻為順天府府尹陞江寧副都統鄂羅舜為

江寧將軍正藍旗蒙古副都統宗室費揚固為右衛左翼護

軍統領噶爾丹遣使梅塞桑布拉特和卓等上疏曰使臣

馬迪被害之故前經屢次覆奏無可另行陳奏之處至於會盟難自定奪奏聞

皇帝若遣丹濟拉丹津俄木布往覲固所願也但正在貧乏難以遣行至澤卜尊丹巴胡土克圖土謝圖汗七旗喀爾喀之事前經奏請乞准行前內大臣吳丹存日曾與濟隆胡土克圖議定乞如議行行商回子使人向常來往請安是以使往貿易又達賴喇嘛之事漸次興隆使四十九旗蒙古西厄魯特各在其地同享安樂乞照前行奏入命議政大臣議曰據噶爾丹使人梅寨桑等言噶爾丹今歲未嘗耕種馬匹烙印收集獵戶遊牧塔米兒之地意欲掠取根敦戴青順克魯

實錄卷一百六十七

十三

倫下流侵車臣汗科爾沁之西此言雖不足深信亦不可竟以為虛應檄黑龍江將軍薩布素加意哨探歸化城將軍費揚古處前已有侍郎滿丕前往應令相機行事目下遣尚書班迪探聽聲息俟到後令根敦戴青等入內遊牧使其遠設汛哨探信奏報噶爾丹使人梅寨桑應仍遣歸不必降敕將原疏發回奏上得旨著仍擬敕交來使齎回敕曰今春諭爾敕書實為明顯茲覽爾奏仍以不曉文義巧為飾說是爾故違朕旨也且爾歷來陳奏皆云行達賴喇嘛之教今春遣爾使歸後達賴喇嘛及第巴有疏以寬爾罪仍留汗號為請且云遵諭和之旨特遣賴楞堪卜達爾漢溫卜前赴爾處等語

今爾來使梅寨桑等言爾遊牧於塔米兒之地東向以行爾之所為必欲異於達賴喇嘛第巴之言者是為違其教乎是為不遵乎以此觀之爾口雖云不悖達賴喇嘛之教而竟不遵行明矣今爾既東向前來應仍會閱庶於事有定不然縱復遣官布告終屬無成其奏請會閱可令丹濟拉丹津俄木布二人齎來倘執故見不遵朕言嗣後永勿上疏通使○癸未予故漢軍副都統穆維雍祭葬如例○戶部議覆刑科給事中裴克珮條奏馬政事緊要洮岷諸處額茶三十餘萬篋可中馬一萬匹陳茶每年帶銷又可中馬數萬匹查茶斤中馬甚有裨益應將額茶并陳茶中得之馬給營驛外其餘馬牧放每年交秋將數十匹送至紅城口等處得旨茶馬事關緊要著遣專官管理○甲申

上詣

皇太后宮問安○乙酉

上御太和門視朝文武陞轉各官謝恩○諭領侍衛內大臣蘇爾達等據將軍伯費揚古報所差哨探塞冷特爾至塔米兒以內濟拉馬臺山遇厄魯特二十許人互發鎗矢而回正與梅寨桑所稱噶爾丹來至塔米兒地方之語相符此不可以不備著派盛京兵二千寧古塔兵一千以備倉猝黑龍江兵著將軍薩布素酌撥預備盛京人員之糧倘有兵興之事著

以盛京倉糧計日支給京城派出之兵亦著預備整齊如噶爾丹不來只在土喇左近竊伏或發大兵今冬進剿或肥秣馬匹來春往征爾等公同詳議以聞尋議我兵不必趨赴土喇但俟噶爾丹前來則一舉殄滅倘噶爾丹竟逡巡不進只竊據土喇應俟得實信當作何行事再為奏請從之○諭大學士等曰馬之所係甚重宜於四十九旗諸地購買歸化城可二千匹科爾沁可二千匹其餘諸旗定額購買爾等定議以聞此買馬事遣部院中曾出差者副以八旗蒙古護軍叅領侍衛各一人會同該王台吉等遵諭以行○予故原任內閣學士田喜霖祭葬如例○丙戌陞內閣學士阿爾拜為戶

實錄卷百五十五

五

部右侍郎○陞叅領胡什巴為寧夏左翼副都統以正紅旗蒙古副都統沙濟為寧夏右翼副都統○戊子諭戶部盛京地方比歲荒歉糧食艱難朕心軫念本欲巡行省問疾苦情形徧敷恩澤今雖停止東行而所在貧窶兵丁尚望臨幸是宜仍加恩卹用裨資生應作何等加恩爾部議奏又盛京兵丁錢糧兩季支領未支領前兵丁每至稱貸嗣後當月給今歲秋禾不甚豐茂恐生計漸艱今自冬以至來秋應作何賑給不致失所共計需糧若干著盛京將軍副都統會同盛京戶部侍郎察明詳畫具奏○江南江西總督范承勳疏言江西有漕糧之四十八州縣除南昌新建二縣外餘皆地處山

僻必須小船裝載至省城水次方可交兌糧艘向年俱係民

貼腳價官為解運祇因州縣官恐涉私派之嫌將此載入全

書康熙二十六年漕臣題參以各省並無支給腳價之處該

道違例支給應速照數扣追戶部行令查追至今十載無一

處報完者此項銀兩若責賠於官官已數更責賠於民又原

係民間貼出之價豈可再令賠補且以後若將此腳價停給

則僻處州縣之漕不免遲誤更為可慮懇恩此後仍聽支給

以前免其追賠部議不准行得旨江西所屬州縣多處山陬

百姓自願貼費將漕米運至水次著聽民貼運從前已經支

給者俱免追賠○福建巡撫卞永譽疏言原任福建總督范

實錄卷百五十五

五

承謨當耿逆之叛幽羈三載自縊殞身原任巡海道陳啟泰

矢守孤城從容自經皆已蒙贈諡今士民皆請立祠致祀從

之○己丑勇畧將軍趙良棟疏言

皇上念臣年老足疾令回籍調養但寧夏無明醫明醫多在江

南臣欲往江南就醫調治得旨著給與船隻前往○陞湖南

布政使楊鳳起為湖南巡撫

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十七

實錄卷一百六十七

七

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十八

康熙三十四年乙亥八月庚寅朔陞山東按察使張勛為湖  
南布政使司布政使 辛卯諭大學士阿蘭泰朕出巡後蒙  
古事情及諸奏章爾皆開看然後奏聞 又諭大學士等手  
成龍向經緣事革職今在河工殫極勤勞其總督原銜可復  
還之 陞內閣侍讀學士喇錫為內閣學士兼禮部侍郎  
議政大臣等遵旨議奏八旗每佐領護軍校以下弓匠以上  
共兵五十六名著一半拴馬每佐領下該拴馬二十八匹給  
與草豆錢糧喂養從之 壬辰

實錄卷一百六十八

十

上巡幸塞外命皇長子允禔皇三子允祉

皇四子 皇五子允祺皇七子允祐皇八子允禩皇九子允

禔皇十子允禔隨駕是日啟行駐蹕三家店 調西安副都

統馬自德為寧夏副都統陞前鋒叅領巴麟為西安副都統

○調鑲黃旗漢軍副都統鄂緝爾為本旗滿洲副都統 調

廣東副都統許廷臣為杭州副都統正紅旗滿洲副都統鈕

牛為廣東副都統 戶部遵諭議覆恩賞盛京兵丁應照康

熙二十一年行幸盛京加賞銀兩之例賞給從之 癸巳

上駐蹕密雲縣 諭大學士等去歲朕見此處高粱結實者少

批者多米價騰貴高粱一斗幾三百錢故將通倉米令運一

萬石至此處五千石至順義縣減時價發糶米價稍平一斗百錢民以不困北地寒冷米穀多至失收今河水方盛著將通倉米運至密雲順義各一萬石令貯倉備用 甲午

上駐蹕遼寧 諭領侍衛內大臣等正黃旗原任叅領戴哈因與人角口發往黑龍江並非大惡今聞其母年邁患念哭泣戴哈平日能孝事其母可知今爾等即傳旨兵部馳驛將戴哈速行取回 乙未

上駐蹕三岔口 丙申

上駐蹕喇嘛洞地方 予故三等阿思哈尼哈番班第祭葬如例 丁酉 遣大學士張玉書祭

先師孔子 戊戌

上駐蹕喇門嘴山 戊戌

太宗文皇帝忌辰遣官祭

昭陵 己亥

上駐蹕博洛和屯 科爾沁喀爾喀喇沁翁牛特土默特巴林王貝勒貝子公台吉等來朝 諭大學士等巴林翁牛特地方米穀不登著學士喇錫往察今年收成幾分米穀足供幾月者若干口全無米穀者若干口分別詳奏 己亥

上駐蹕張三營 庚子

太祖高皇帝忌辰遣官祭

福陵 諭大學士等喇錫輕浮不宜學士之任著仍為內閣侍讀學士 陞貴州大定總兵官盧崇耀為鑲黃旗漢軍副都統 辛丑

上駐蹕汗特木爾達巴漢地方 工部題請遣大臣閱視河工得旨閱視河工原欲查核有無浮冒情弊及隄工堅固與否侍郎趙山等往閱河工將總河並未修理之處及稱工程堅固如此則閱視何益今雖再遣大臣不諳水性亦照前人所行而已趙山等著嚴處議罪此後閱河著永行停止尋部議趙山應革職交刑部得旨趙山著為章京効力 西安將軍博爾疏報噶爾丹屬下回子塔什蘭和卓等五百許人過我

三岔河汎界肅州總兵官潘育龍擒解前來請皆拘留肅州邊內俟得噶爾丹確信再行遣回從之 壬寅

上駐蹕穆祿喀喇沁地方 癸卯 河道總督于成龍丁父憂命回旗守制 予故三等輔國將軍巴爾善祭葬立碑如例 予故議政領侍衛內大臣一等精奇尼哈番郎談漢軍副都

統三等伯王毓秀各祭葬如例 陞叅領朔色為江寧副都統 護軍叅領沙克都爾為正藍旗蒙古副都統 乙巳 秋分夕

月於西郊遣工部尚書薩穆哈行禮 丙午

上駐蹕克勤達巴漢地方 丙午



上駐蹕克勒和洛。先是京城豫備大兵派為三隊第一隊都統公宗室蘇努都統李正宗諾穆圖前鋒統領碩鼎護軍統領蘇昌副都統張所知孫徵灝扎喇克圖那秦喻維那宗室巴賽張朝午前鋒及八旗滿洲漢軍礮鳥鎗俱往每佐領下護軍一名上三旗包衣護軍六十名第二隊都統阿席坦噶爾瑪副都統莫爾渾碩岱護軍各二名第三隊都統護巴伊勒慎副都統秦布龍西庫護軍各二名至是

上諭內大臣明珠等曰聞噶爾丹有順克魯倫而來之信京城豫備兵三隊應令作速啟行第一隊於是月二十四日啟行所派諸王及兩班侍衛與俱二三隊行期各間一日盛京豫

聖祖實錄卷一六八

四

備兵二十寧古塔豫備兵一千著剋期會於烏爾會之地再檄黑龍江將軍薩布素令遣人遠探倘噶爾丹侵犯車臣汗地方聽酌量行事設有前來聲息即踵尾以進有用烏喇兵處可率之去不用仍令往會盛京兵盛京烏喇二處命副都統齊蘭布往諭之科爾沁兵分二千名來會於烏爾會之地土默特貝勒厄爾德木圖令速回將其所屬并貝子喇思查普旗兵酌派亦往與盛京兵會遣理藩院官一員赴教漢奈曼亦將兵酌派帶至巴林台吉阿喇卜坦處京師兵勿裹糧支領坡賴村米此處大臣侍衛官員等所有駱駝令往運坡賴村米給放在此兵卒前鋒參領李色著署左翼前鋒統領

其前鋒參領可於新滿洲內選員署之古北口總兵官何應元石匣副將馬進良於兩處官員內將人材壯健有馬匹者選二十員各攜軍器鳥鎗以來速檄知之。陞國子監祭酒傅繼祖為內閣學士兼禮部侍郎。陞江南淮徐道蘇昌臣為山東按察使司按察使。丁未諭議政大臣等豫備兵數過多當酌量裁減除滿洲漢軍隨礮官兵外每佐領下存護軍五名前鋒一名鳥鎗護軍一名八旗滿洲火器營兵四百名漢軍鳥鎗兵二千名共兵八千三百八十四名餘盡減去其豫備大臣俱令率兵全來每旗照所出兵數派官五員統之復諭議政大臣曰見今無甚緊急聲息頭隊兵行期定於

聖祖實錄卷一六八

五

是月二十六日二隊二十八日三隊三十日俱令齊備以待有急星速往調來兵三隊須擇水草善地牧養馬匹緩程前來。諭大學士伊桑阿曰聞噶爾丹果有來克魯倫河之信可令副都統阿南達自甘州回其兵仍留駐防禦西安將軍博爾濟著回寧夏速檄知之。戊申祭

大社

大稷遣戶部尚書馬齊行禮。已酉

上駐蹕克勒烏里雅蘇台。先是

上密諭科爾沁土謝圖親王沙津曰噶爾丹為人極其狡猾朕欲發大兵往征恐彼聞風遠遁及至撤兵彼又復來擾爾蒙



古今必立克圖噶爾丹遺爾書內既有乞爾遣人於彼之語爾可藉此遣人語噶爾丹云我科爾沁十旗俱已附爾矣爾可前來我等當從此地接應以此說之誘至近地於時朕親統大軍風馳電掣彼不及遠遁斷可滅矣爾可仍遣前所差鄂齊爾再往誘噶爾丹至近地至是沙津來朝

上遣侍郎西拉與沙津同往密授鄂齊爾說噶爾丹之計視其起行即以遣鄂齊爾之故密諭達爾漢親王班第及諸台吉（調漕運總督董安國為河道總督陞山東巡撫桑額為漕運總督○庚戌理藩院尚書班迪奏報遣往西卜退哈灘巴圖爾等處送文兵丁孟索和等報稱我等回至巴爾泰罕地方遠望厄魯特兵浩克魯倫河屯劄蹤跡甚衆西卜退哈灘巴圖爾納木扎爾陀音等已往陰山之北噶爾丹兵兩支隨後往追之謹奏聞

上諭議政大臣曰前備兵曾經減退仍宜備兵一隊於前減護軍三名親隨護軍一名再增每佐領下護軍各一名烏鎗驍騎一千二百名烏鎗護軍四百名按烏鎗驍騎之數派奪蘭大及章京統之其增發之護軍派實授參領統之諸王可於後隊兵內豫備八旗察哈爾地方有馬二千餘匹調取交部分給八旗以充拴養馬額都統護巴伊勒慎諾穆圖護軍統領蘇昌副都統龍西庫張所知亦著於後隊兵豫備其增發

實錄卷一百一

六

實錄卷一百一

七

之大臣俟朕進京另奏○辛亥賜喀喇沁多羅杜楞郡王扎什等袍帽緞疋等物有差○命護軍統領鄂克濟哈副都統扎喇克圖巡行邊哨○遣使齎敕往諭噶爾丹曰尚書班迪於八月二十二日奏報爾擁兵來西卜退哈灘巴圖爾友納木扎爾陀音等所居近地肆行掠奪前爾自烏闌布通敗竄時於內大臣吳丹前跪禮威靈佛像誓不再侵中華皇帝之喀爾喀與衆生靈爾之印文誓書昭昭具在且爾每有奏疏自謂遵行達賴喇嘛之教乃於朕與達賴喇嘛議結之事屢生齟齬蔑棄誓言是爾於其教名奉實違爾今來必有意應備奏陳朕自有裁奪此兵果爾親帥與否差五品官阿爾必

特粘前往確詢特諭○癸丑

上駐蹕噶爾丹地方○安北將軍伯費揚古奏言尚書班迪咨稱西卜退哈灘巴圖爾等已往陰山之北噶爾丹率兵尾進偏在歸化城之東北臣等一面差人令王善巴及喀爾喀諸扎薩克移入哨內一面將右衛兵交割副都統党父守歸化城臣親率大兵往四子部落蘇尼特等處駐劄相機征剿報聞○甲寅旌表廣東節婦南海縣黎氏從化縣李氏矢志茹荼持身端淑各給銀建坊如例○旌表廣東歸善縣孝子龐維則事親盡禮父歿廬墓三載給銀建坊如例○乙卯賜喀爾喀澤卜尊丹巴胡土克圖土謝圖汗多羅郡王敦多布多爾

濟等衣帽綴疋等物有差○喀爾喀車臣汗遣使進九白年貢宴賚如例○丁巳

上駐蹕烏喇岱昂阿地方○陞福建汀州副將王世誠為湖廣彝陵總兵官○已未陞福建布政使楊廷耀為山東巡撫○陞湖廣武昌道孟世泰為河南按察使司按察使○予故原任戶部尚書王隲刑部侍郎李迴內閣學士沈圖各祭葬如例

九月庚申朔

上駐蹕烏喇岱地方○壬戌

上駐蹕烏喇岱和洛之額爾滾郭爾昂阿地方○甲子陞廣西

實錄卷一百六十八

上

思恩副將李世威為貴州大定總兵官○定山海關稅額每

年二萬五千兩○丁卯遣官祭

歷代帝王○遣官祭城隍之神○戊辰

上回鑾駐蹕舒虎爾台地方○先是諭副都統齊蘭布侍衛拉

巴錫曰盛京年來歲歉恐軍士難以出征朕甚念之爾等前往會同彼處將軍副都統詢問軍衆令其出征官兵各給糧

兩月并給來歲一年俸餉至是齊蘭布等歸奏盛京官兵咸

願効力出征於九月初六日將軍綽克託副都統穆泰率之起行○已巳

上駐蹕森濟圖哈達地方○諭議政大臣舅舅佟國維等將軍

伯費揚古報稱噶爾丹將喀爾喀西卜退哈灘巴圖爾及納

木扎爾陀音等恣行剽掠即竄往土喇河順流而下西向庫

黑納塔爾納以去以此揆之彼實無意內來京師所發大兵

可暫還秣馬以待并檄盛京烏喇黑龍江將軍及科爾沁等

諸扎薩克其豫備兵且止仍檄將軍伯費揚古所領兵衆亦

權回本汎將馬匹加意喂養若令喀爾喀等入汎界內遊牧

恐有互相竊奪之事可檄尚書班迪令彼在汎界外附近處

暫居○庚午陞福建按察使汪楫為福建布政使司布政使

○予故滿洲副都統覺羅海篤山西太原總兵官周復興雲

南臨元澈江總兵官馬三各祭葬如例○辛未

實錄卷一百六十八

九

上駐蹕英額拜昂阿地方○壬申

上駐蹕齊老圖昂阿地方○癸酉

上駐蹕巴顏拖羅海地方○甲戌

上駐蹕三道營○乙亥

上駐蹕頭道營○丙子

上駐蹕鸛爾營○丁丑

上駐蹕恩格木噶山○盛京將軍公綽克託等疏言開原等處

馬甲月給米二倉斛步甲月給米一倉斛需米十三萬餘石

今倉米止二萬餘石不敷之米俟明年海運之米補給戶部

議倉米不足每兵月給四倉斗

上諭大學士等曰此議甚屬疎忽馬甲之中亦有人口少者步甲之中亦有人口多者一例按甲支給可乎海道運米不可豫必明年全到盛京田穀亦不可豫必明年全收凡事須曲盡籌畫豈可徇情定議此本發回令察明人口給米盛京數年失收務多蓄積宜將薊州山海關所貯之米作何輓運爾等議奏○改雲南平彝衛為平彝縣○琉球國中山王尚貞遣陪臣翁敬德等進貢宴賚如例○予故湖廣彝陵總兵官贈太子少保張忠孝祭葬如例○戊寅

上進古北口駐蹕遙亭○己卯

上駐蹕密雲縣○陞廣西左江道李成林為福建按察使司按

察使○庚辰

上駐蹕順義縣大東莊○諭大學士等開原等處給散兵丁米穀若令行查必稽時日兵丁或至重困著朱都納嵩祀前往將不能度日人口數目查明一面散給一面具題○辛巳  
上回宮詣

皇太后宮問安○壬午諭大學士等噶爾丹侵擾外藩去來無定備師剿寇應當熟籌著八旗滿洲蒙古漢軍都統以下阿達哈哈番叅領以上各官於各旗聚議噶爾丹如何剿除我兵如何設備議定由本旗陳奏苟言有可採朕即允行○癸未奉差盛京散米兵部侍郎朱都納內閣學士嵩祝請訓旨

上諭之曰將軍等請給米但言兵丁而已其

陵上執事人等及衆百姓並不言及此皆朕赤子爾等亦可會同將軍查明一并散給若使海運之米明年可到盛京兵民方可無慮嵩祝奏曰臣等前次散給正當甚乏之時故計口月給倉斗一斗五升今總發數月宜計口月給倉斗一斗明年麥收後尚可度日酌宜給至四月

上曰爾等可照先數目月給倉米一斗五升勿行減省麥收如可續食可給至四月爾等親加覈散○諭戶部直隸順天保定河間永平西府所屬地方今歲水潦傷稼三農歉收朕巡幸所至偏加諮訪聞高阜之產尚有秋成而卑下之田被潦

者多計所收穫不能相敵雖經勘災頒賑不致此離失所而額辦錢糧若仍行徵取則民力匱乏難以輸將朕心深切不忍著將四府康熙三十五年地丁銀米全與蠲免用示寬恤其霸州雄縣香河寶坻四處皆有水道可以轉輸每處著發米一萬石各差司官一員齎往照彼地時價減值發糶以資民食著行文該撫通行曉諭俾均沾實惠副朕軫念災黎至意○乙酉陞湖北布政使線一信為安徽巡撫○調鑲紅旗漢軍副都統費揚吾為西安副都統○雲南巡撫石文晟疏言滇省地方明初多係屯田每畝徵糧七斗二升不等吳三桂在滇將此屯租即為額賦以致歷年拖欠追比難完查通

省民田賦額惟河陽縣最重每畝徵糧八升一合八勺三抄伏懇將屯糧悉照河陽縣則起科得旨雲南屯田錢糧較民田額重數倍民人苦累嗣後屯田額賦著照河陽縣民田上則徵收該部知道丙戌

孝慈高皇后忌辰遣官祭

福陵丁亥

上詣

皇太后宮問安己丑先是

上諭大學士及部院各衙門堂官等各將屬員賢能者揀選保舉其才力不及年老有疾者亦甄別引見至是大學士九卿

書卷八

三

等以保舉郎中員外等官四十七員及甄別者四十二員引見

上曰此次參革官員甚多伊等皆由部院年久陞任原無罪過老病者著解任餘皆以旗缺補用此保舉官員朕未盡識郎中係朕親用之員朕皆知之其員外主事之中有年少堪任用者爾等可再行揀選尋大學士等又保舉九十五員引見得旨此次參革郎中員缺以揀選員外郎開列員外郎缺以揀選主事開列俱視其出缺之先後歷俸之淺深以次陞補其主事員缺著將筆帖式揀選補用再各省有操守清廉愛養百姓練達吏事之官亦著該督撫各舉二員或三員咨送

到日奏聞引見○湖廣總督吳興琬疏言臣遵旨詳察湖南丈

量田地自康熙三十年俱聽民間自報州縣官履畝丈勘完

糧實無累於民下所司知之○議政大臣等會議凡軍行馬

駝為重諸王貝勒貝子公大臣等不出征者應各出馬駝資

助再行文直隸山西山東河南各巡撫文武大小官員願急

公捐馬駝者皆定例議敘罪人內有願急公者亦准其捐馬

駝贖罪從之

冬十月庚寅朔享

太廟遣戶部尚書馬齊行禮遣官祭

永陵

書卷八

三

福陵

昭陵

暫安奉殿

孝陵

仁孝皇后

孝昭皇后

孝懿皇后陵 頒康熙三十五年時憲歷 壬辰

皇太后聖壽節

上率王以下文武大臣侍衛等詣

皇太后宮行禮遵

懿旨停止筵宴○諭議政大臣等噶爾丹既肆掠納木扎爾陀音在我亦當商榷舉事可派西安寧夏滿漢兵從西路進京師兵從中路進乘雪而行到彼時塞草青發可以前進其官兵作何議派師行糧食宜親攜幾月隨運幾月隨運之米或車載或駝負所需駱駝車輛幾何及廝役之名數口糧一并核算集議○癸巳諭大學士等右衛地方甚要將軍責任甚重惟伯費揚古堪任是職著授為右衛將軍仍兼攝歸化城將軍事務○增順天永平宣化三府驛站馬匹○甲午

上御太和門視朝文武陞轉各官謝恩○諭議政大臣八旗都統等朕觀京城八旗兵卒俱已熟練器械亦俱整齊倘有舉

實錄卷一百八

十四

動惟馬匹少缺前命滿洲蒙古漢軍各佐領下拴馬一半給草豆錢糧喂養但軍行以馬為重今可令衆兵各置馬一匹春冬則全給草豆錢糧自四月起發一半放青留一半拴喂至九月驅回照常拴喂此所置馬匹令兵丁各自小心飼養各交與該管官嚴行稽察設有怠玩從事以致馬匹羸瘦遲誤公用者則將該管大臣從重治罪其參領以下撥什庫以上以及拴馬之人俱照軍法治罪俟噶爾丹事畢之日仍照常養馬一半可通行曉諭○陞雲南鶴麗總兵官姚儀為鑲紅旗漢軍副都統○丙申

上詣

皇太后宮問安○諭議政大臣等傳諭沙木巴戴青墨爾根濟

農值雨雪時噶爾丹侵掠其疆界亦未可定宜簡發其兵并附近喀爾喀諸台吉之兵於諸處防守遠置塘哨探聽消息倘有噶爾丹之警敵勢寡弱量力可擊則以其兵擊之若敵勢衆多則設殿後之兵向歸化城內地移營雖退入內地亦不譴責也凡有動靜一面速報歸化城將軍一面奏聞○予故和碩額駙內大臣華善祭葬如例○己亥先是令喀爾喀等在汎界外地方遊牧至是侍讀學士伊道疏言喀爾喀退回路遠恐遭厄魯特之害得旨令喀爾喀在汎界內距扎薩克蒙古一二日程地方遊牧○庚子理藩院尚書班迪疏報

實錄卷一百八

十五

遣人至克魯倫河等處探得噶爾丹在裁格穆爾布爾哈蘇泰之地度冬俟雪後乃行復遣員外郎宣賴等往探自多羅忒延及巴顏額爾黑圖駐劄約三百戶駱駝牛馬千餘頭毳幕敝壞絕無羊羣奏至諭議政大臣等曰噶爾丹前有下雪時行走聲息今所報相符應飭兵豫備設彼於嚴冬妄進可即行剿滅今每佐領派前鋒一名親隨護軍一名烏鎗護軍二名護軍五名烏鎗驍騎一名漢軍火器營兵二千名以備可俱選人材矯健者其領兵大臣著兵部奏請再宣化府有草豆京師所畜馬匹內每佐領派馬十匹發往飼養咸令肥澤俟大兵行日每兵給京師馬三匹宣化府馬一匹其宣化

府餉養之事應差部院及旗下大臣各一員前往親督石衛將軍費揚古處可令檄知其所屬兵衆亦豫備以待○壬寅上詣

皇太后宮問安○諭大學士等都統噶爾瑪副都統碩岱著往駐左翼察哈爾地探厄魯特聲息設有警可傳集左翼察哈爾兵衆以待京師之兵○癸卯以翰林院侍讀席爾登充日講起居注官○陞廣西柳慶營副將楊彪為浙江溫州總兵官陝西涼州永昌營副將陸進忠為雲南鶴麗總兵官調直隸天津總兵官李士達為古北口總兵官山東登州總兵官岳昇龍為天津總兵官○丙午納木扎爾陀音以不遵諭內

實錄卷一百六十八

十七

移致為噶爾丹所掠又縱噶爾丹致書之人來京面縛請死特旨宥之○丁未添設墨爾根城防守禦四員齊齊哈爾城防守禦一員從黑龍江將軍薩布素請也○諭議政大臣等聞噶爾丹部落不過五六千人我大兵皆踴躍願戰而大臣官員逡巡退縮無意効力近噶爾丹於巴顏烏闌屯聚彼縱不敢深入或潛來邊徼掠我外藩亦未可定聞警後始遣大兵勢不能朝發夕至我進彼退我還彼來再三若此凡蒙古諸部亦大遭其蹂躪矣爾諸王大臣可與八旗都統前鋒統領護軍統領副都統等公同籌畫作何進止其詳議之尋議覆宜遣發師徒攜兩月糧赴巴顏烏闌進剿

實錄卷一百六十八

十七

上曰方今冬令噶爾丹雖不能親率其妻孥輜重前來或以遊騎潛掠汎界近地亦未可定然諒其人無多京師大兵不便輕發即遣往亦未必與彼相值莫若以蒙古兵應之見今墨爾根濟農善巴戴青各領兵一千歸化城有將軍伯費揚古駐劄西路事柄應全付與右翼察哈爾兵歸化城兵及四子部落以西所有扎薩克兵俱令酌量徵調其東路兵宜另派大臣管領兩蘇尼特兩阿霸垓兩阿霸哈納旗兵著索額圖前往收集鄂克濟哈扎喇克圖見赴汎界索額圖可偕之去喀爾喀土謝圖汗等及兩高齊忒兩烏朱穆泰兵著明珠偕阿喇尼恩額森前往收集俱令各駐要地探聽聲息都統噶爾瑪副都統碩岱朕已令於察哈爾左翼駐劄毋容遣動設有必不可已機務再行調取會同索額圖明珠等以行其理藩院官或別部院官聽其酌量題請帶往茲遣伊等非取其奮勇一試惟期一應聲息得其真實耳尚書班迪雖見在彼偵探猶恐京師大兵難遽定行止故復有此遣師之進退俟伊等報聞定奪○戊申授輔國公賚式女為鄉君塔爾習禮為輔國公塔秩四品○己酉陞廣東廣州副將楊鈞為山東登州總兵官○庚戌

上詣

皇太后宮問安○壬子諭侍讀學士伊道爾傳諭車臣汗等勿



以厄魯特為懼京師大兵及各路兵馬整備已就若噶爾丹  
今冬蠢動定當剿滅無遺若噶爾丹苟延至來春亦當不久  
殄滅也又喀爾喀巴爾瑚數百為羣肆行劫掠爾至日其以  
此信移檄科爾沁土謝圖王達爾漢王等各為防備又明珠  
等所往之地與爾所往之地相去非遠可互為通信其巴林  
之那木達克王等台吉阿拉布澤吳爾袞額駙等今在烏朱  
穆秦之地諭令毋擅移居再探都統杜思噶爾及滿洲前鋒  
兵信息馳報爾此行宜善自防護惟以哨探信息奏聞為要  
聞雪甚大雪之所屆遠近及某地可行某地不可行蒙古必  
知可問之蒙古遣人往汎界探取信息又爾於途次倘別得

實錄卷一百六十八

八

信皆即報聞又前遣喇錫往巴林亦當互以音息相通（陞  
內閣學士戴通為兵部督捕左侍郎工部郎中綬色為內閣  
學士兼禮部侍郎）丁巳授原任鎮國將軍病退常圖子察  
爾代為三等輔國將軍原任輔國將軍病退庫布素渾子蘭  
鼎為三等奉國將軍調湖南布政使張勛為山東布政使  
司布政使山東布政使王道熙為湖南布政使司布政使

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百六十八

實錄卷一百六十八

十九



大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百六十九

康熙三十四年乙亥十一月己未朔日食 庚申奉差盛京散賑兵部侍郎朱都納學士嵩祝回奏臣等遵旨以盛京倉米計口給散兵丁執事人等均需實惠報聞 直隸巡撫沈朝聘疏言宣化府龍門等縣霜災地方康熙三十四年額賦請分年帶徵得旨宣化府錢糧皆免徵并三十五年額賦亦令蠲免 陞福建臺廈道高拱乾為浙江按察使司按察使 壬戌安北將軍伯費揚古疏言噶爾丹在巴顏烏蘭之地宜分軍進剿

實錄卷一百六十九

一

上諭議政大臣等我大軍進剿噶爾丹宜分為三路東一路仍派盛京兵二千寧古塔兵一千黑龍江兵將軍薩布素酌派再派科爾沁兵四千令定期會合沿克魯倫進剿西一路徵調各處官兵總轄於費揚古由歸化城進剿中一路以京城每佐領下所餘預備兵六名及火器營兵與費揚古所請宣化府綠旗兵停其發往西路皆定為中路進剿此三路官兵俱令裹八十日口糧中路隨運米石著諸王大臣官員急公之駝馬馱運倘不足即動支正項錢糧雇車裝載西路軍糧應隨運幾日費揚古明白具奏至師行惟馬最要東光吳橋景州三處戶部見貯有芻豆每佐領下發馬十匹交地方官

飼養遣侍郎陳汝器往督之是師來年何月何日啓行著費揚古定議以聞 甲子盛京禮部侍郎艾肅以病乞休命以原品解任 陞光祿寺卿莫里普為通政使司通政使 浙江福建總督郭世隆疏言請改杭州理事同知為滿缺照山陝等省例揀選滿漢兼通之員補用從之 乙丑原任河道總督丁憂子成龍條奏河工事宜

實錄卷一百六十九

二

上諭大學士等朕於河務留心日久曾屢經閱視河道并詳察河圖今觀于成龍疏言龍王閘閘底漸虛應於五空橋等處建閘又高家堰運料甚難應開壩行運所言皆當先靳輔亦曾請濬小河運料此仍依靳輔所奏行方善此本可發見任總河如於運道民生實有裨益則一面估計興工一面具題倘有不可行處亦著逐一確議具奏大約清水勢盛足以蕩刷黃河積沙始得通流不致壅遏若淮弱黃強黃水倒灌則河口往往淤滯朕先閱河時親至高家堰徧察情形故悉其要領 諭理藩院歸化城四子部落喀爾喀達爾漢親王毛明安三吳喇武六鄂爾多斯千科爾沁其兵數已經派定應各傳示務屬兵秣馬以待至其餘旗分雖未派定兵數亦應先期曉諭其軍器馬匹俱各令預加整備以俟徵發 丙寅命都統伊勒慎護軍統領蘇丹副都統碩岱率增發兵赴西路命都統齊世預備出中路軍 諭刑部今年直隸各省情

實人犯著停決○丁卯。

上詣

皇太后宮問安○戊辰。等故原任禮部尚書介山祭葬如例。

厄魯特阿穆呼朗等四人。自巴顏烏闌來降。言噶爾丹向踞和卜多地方。本年二月至八月。於克魯倫河源處屯聚掠奪。

納木札爾陀音牲畜於巴顏烏闌作度冬計。兵有六千。策妄

阿喇布坦克駐厄輪哈必爾哈之地。與噶爾丹仍前不睦。絕

不通便。再噶爾丹竟欲舉兵內入。因伊拉古克三胡土克圖以路遠勸止。

上嘉其來歸。授阿穆呼朗等三品官。歸併上三旗。給田產衣食。

實錄卷百九

三

等物○己巳。

上詣

皇太后宮問安○安北將軍伯費揚古等疏言。墨爾根濟農等

見居蘇厄特王杜梭旗下。甌耳之地。寧夏將軍覺羅舒恕率

兵一千五百往歸化城北山後。厄勒蘇台地方屯備。臣親率

兵一千五百往四子部落旗分阿爾察圖蘇木哈達地方屯

備。副都統阿南達侍郎滿丕酌率喀爾喀兵赴阿爾察圖蘇

木哈達。以至甌耳地方擇兩間形勝處屯備。三處各行哨探。

倘有警。臣等公商行事。奏入從之○庚午。陞大理寺卿庸愛

為盛京禮部侍郎○命原任武英殿大學士李天馥入閣辦

事○以翰林院侍講辛寶為光祿寺卿○以翰林院侍講學士覺羅華顯充日講起居注官○壬申

上詣

皇太后宮問安○甲戌冬至祀

天於

園丘遣領侍衛內大臣公福善行禮遣官祭

永陵

福陵

昭陵

暫安奉殿

實錄卷百九

四

孝陵

仁孝皇后

孝昭皇后

孝懿皇后陵○停止次日朝賀○乙亥

上詣

皇太后宮問安○先是

上命副都統阿南達將伊拉古克三胡土克圖僧徒衛徵喇嘛

等交將軍伯費揚古查明具奏至是陸續解至京師理藩院

同三法司會審伊拉古克三胡土克圖所遣羅卜藏端魯卜

等往衛徵喇嘛家探信來為奸細煽惑蒙古之心衛徵喇嘛

等與伊拉古克三胡土克圖交通信息意欲迎噶爾丹之兵是實皆應立斬其衛徵喇嘛徒眾皆應鞭責交與盛京大喇嘛安插議入得旨此奏暫存之○陞兵部督捕右理事官員和諾為大理寺卿○安北將軍伯費揚古疏言巴顏烏蘭距歸化城約二千里西路進剿官兵除自齎糧八十日外應復隨運兩月行糧所調各路兵俱令明歲齊集歸化城二月二十日前後啓行

上諭議政大臣等曰可俱如費揚古所請其隨運之米可定為五十日見今大同附近諸處未經積貯草豆著戶部派才能官一員往同該撫約計馬二萬匹四十日芻秣之需速行購

實錄卷一百六十九

五

備京城每佐領下添撥西路之護軍三名烏鎗兵一名於今歲十二月望後起程至大同養馬四十日如期赴歸化城進發再宣化府見喂馬匹亦著帶往西路備用其中路進兵之期俟遣往費揚古處人回定奪○命丁憂河道總督于成龍以都察院左都御史原銜督運中路軍糧大理寺卿李鈞太常寺卿喻成龍協同料理○丁丑

上詣

皇太后宮問安

上大閱幸南苑○大學士會同兵部議奏西路進剿右衛兵五千京城增發兵三千四百七十大同綠旗兵五千合官兵

廝後共計二萬四千二百六十名有奇先經議政大臣議京城增發兵每名給馬四匹廝役一名各齎口糧八十日外每名月給米二倉斗以湖灘河朔米隨運其運車及馬騾草豆輓兵口糧等物俱著山西巡撫備給并遣才幹道官一員同知知州知縣等官四員同部院官四員隨車押運請於特簡于成龍等三大臣內分撥一人佐以一滿洲堂官速赴山西會同巡撫溫保料理諸務至中路進剿京中每佐領兵六名漢軍火器營兵二千及隨破兵共計八千一百三十名俱照西路例每名給馬四匹廝役一名破手綿甲軍八百八十八名兩名合一廝役又盛京兵二千寧古塔兵一千黑龍江兵

實錄卷一百七十

六

約二千宣化府綠旗兵三千合官兵廝役共計三萬二千九百七十名有零各齎八十日口糧外每名月給米二倉斗以通倉米運給其運車及兵夫馬騾需用食物俱著直隸山東河南三省巡撫備給押運官員亦著各該撫遴選與西路同再遣部院衙門才能官十二員每省派四員分管尾隨中路大兵前進其總理運務既經派出于成龍等諸事應令會同料理

上曰既派出于成龍等使之專任嗣後凡關運米機務即自行奏請不必會同該部押運官員亦著伊等選擇具題牽輓兵卒給與行糧餘如所議等故安徽巡撫佟國祚祭葬如例

戊寅命通政使司左通政喀拜協理中路運務。諭大學士等中路運米車四千輛若責令直隸山東河南三省捐雇恐各地方官不體朕意借端科派致累小民朕今並不動戶部錢糧特發內帑銀六萬兩著于成龍等督造似每車載六石及炊具營帳諸物過重可添造一千輛自足用矣。命光祿寺卿辛寶內閣侍讀學士范承烈督運西路軍糧。郎中殷扎納疏言臣等往諭喀爾喀公慙都等內移慙都竟執刻臣等四十餘人北徙行至五站外始釋臣等自行北徙。臣等南歸至慙都親兄台吉車卜登所告之以故車卜登言我不與我弟同叛今將率兵往追慙都。

實錄卷五十九

七

上曰台吉車卜登不與偕往殊為可嘉著將慙都鎮國公與車卜登襲封授為扎薩克。庚辰諭內大臣等用兵之道以賞罰為要今日大閱朕將降敕以昭示勸懲敕曰本朝用兵以來所向無敵野戰則勝攻城則克惟有弓矢劍戟為用自三逆叛後南方皆水田賊人雖用火器相持而凡遇之敵靡不摧敗朕以故洞悉特立火器製備鎗礮交發八旗由是我朝之神威益震於四域矣今噶爾丹遊魂假息於喀爾喀左近肆行竊掠朕欲一舉立殄是以整理諸路糧餉器械熟計而行是師之舉與昔不同茲爾將卒以下廝役以上各當勉力如遇敵自不必言倘遇敵奏凱而還朕必大沛殊恩陣亡

者除照常給賜身價外護軍則廕一子為七品官食俸駝驛則廕一子為八品官食俸如無子則照本身錢糧給其孀妻終老所借公庫官銀另加寬卹倘違軍令勿得仍望如前矜宥必照

太祖

太宗

世祖皇帝之律治罪宣敕畢於是列八旗官兵鎗礮為三隊第一隊以漢軍火器營烏鎗步軍居中礮位排列左右滿洲火器營烏鎗馬軍列於礮位兩頭第二隊以前鋒兵居中八旗護軍續列兩頭第三隊排列八旗護軍兩翼則設立應援兵

實錄卷五十九

八

上率太子諸皇子俱擐甲前張黃蓋內大臣近御侍衛大學士及兵部諸大臣俱擐甲扈從繼以豹尾鎗侍衛隨行鎗後建兩大纛上三旗侍衛俱擐甲整肅

上遍閱八旗兵陣及火器營軍容畢中立於馬軍之前鳴角三擊鼓步軍舉鹿角大礮眾兵齊進鳴金而止齊發鎗礮一次如此九進至十次連發大礮火器營馬步軍循環連發烏鎗畢各開鹿角為門後二隊馬兵逐隊出列齊鳴角大呼而進復鳴角收軍立於本陣結隊徐旋行伍甚整其殿軍擁後而立時噶爾丹處降人阿穆呼朗等見之驚駭戰慄上還至行宮前率皇太子諸皇子擐甲騎射

上騎射者再步射者再皆中的射畢賜官兵等宴○辛巳以故阿霸垓多羅卓禮克圖郡王塞楞弟達瑪林扎卜襲爵○癸未陞大理寺卿李錫為兵部督捕右侍郎○陞四川按察使趙良璧為浙江布政使司布政使○甲申諭西路督運光祿寺卿辛寶內閣侍讀學士范承烈等輓輸朔漠車輛甚為緊要爾等其會同山西巡撫動支正項錢糧速行備造勿致累民輓運兵卒給與行糧地方官有才具者任爾等選擇帶往其管兵官員與輓車人等亦必擇精壯者用之○乙酉命平陽總兵官毛來鳳率兵護運西路軍糧○丙戌上自南苑回駐暢春園○戊子命安北將軍伯費揚古為撫遠

實錄卷一百六十九

九

大將軍○先是遣五品官阿爾必特祐齋前往訊噶爾丹至是阿爾必特祐歸以噶爾丹奏章至其疏曰蒙降敕書不勝懼悚○辛未年來草美獸蕃乘便有行想

皇上亦鑒悉之矣念與蒙古疆界相近恐有妄行故為之禁止遣人一隊遺書道意而納木扎爾陀音等反以為往攻棄其牲畜而去至所云掠喀爾喀之事乃我界上行人所劫我不之知至達賴喇嘛所差濟隆胡土克圖與內大臣吳丹等所定之議前經節次上奏伏乞仍照前奏加恩雖有罪愆亦乞寬宥果若有理乞降溫旨不勝欣悅奏入得旨此奏暫存之勿與敕諭○喀爾喀固山貝子車卜登故遣官致祭

十二月己丑朔予故三等侯李廷燮祭葬如例○辛卯上自暢春園回宮詣

皇太后宮問安○壬辰陞太常寺卿喻成龍為大理寺卿○中路督運都察院左都御史于成龍奏言中路運米應兼用小車駝馬分載凡押運情願効力人員准臣帶往更請久歷邊疆之將弁數員責令巡徼得旨此路朕親歷俱係大道並無險嶺大河泥濘難行之處若用駝馬小車反覺煩雜不必兼備餘著大學士會同戶兵二部議奏尋議覆不論旗民有官無官人願隨運効力者准予成龍盡行題帶至米車分行前後晝夜巡防可調副將王起龍遊擊劉虎守備林之本等協力前往從之○甲午大學士伊桑阿等奏

實錄卷一百六十九

十

聖躬灼艾未愈時際嚴寒乞暫停御乾清門聽政應奏事俱交內閣轉奏

上曰朕每日聽政從無間斷閑坐宮中反覺懷抱不適爾諸大臣面奏政事朕意甚快體中亦佳今灼艾視前已愈國政緊要朕仍照常御門聽理或遇大風甚寒之日自另有旨諭大學士等西路輓輸較中路尤為要緊已遣辛寶等督運外再著原任兵部督捕右侍郎王國昌大理寺卿喻成龍往助增造運車四百輛亦著動支正項錢糧其情願効力人員無論山西及他省文武職官閒散人等俱准前去凱旋之日定

照軍功議敘○乙未陞河南開歸道祖文明為四川按察使司按察使○丙申諭大學士等前遣喇錫往察巴林等六旗貧乏者賑給米糧喇錫未曾遍察近聞巴林等六旗貧乏者不能聊生可速敕喇錫令率司官筆帖式察明六旗貧乏口數報內大臣明珠明珠可留坡賴村監視散給○增派中路軍中護軍參領每旗四員○丁酉先是命刑部尚書圖納赴陝會集將軍總督巡撫提督總兵官等於莊浪要地議西路進剿事至是圖納等疏言陝西一路進兵使出鎮彝由黑河托賴河交流處取昆都倫而進遂熟識路徑蒙古為嚮導但我軍進討糧糗俱係親攜倘事起卒然接戰之兵分力必

實錄卷五十九

十一

多請於萬名兵外益以綠旗兵三千以一總兵官統領尾大軍之後而進遇寇猝至以便守護輜重至我兵深入恐附近蒙古乘虛煽搖宜酌調固原提標官兵為之防禦再檄青海諸台吉與策妄阿喇布坦及吐魯番等使知罪在噶爾丹與眾無預至內地多巴係市賈集場恐噶爾丹使人潛居窺伺應令地方官不時嚴察從之○諭大學士等大將軍伯費揚古軍中著都統伊勒慎護軍統領宗室費揚固瓦邁達副都統碩岱并將軍舒恕皆為叅贊西路大臣既足用護軍統領蘇丹可使在中路○戊戌

上詔

皇太后宮問安○諭大學士等西路師行後預備出征之王貝勒貝子公等酌量撥往歸化城屯守○諭大學士等凡革職候缺官員及進士舉貢監生與無頂帶筆帖式烏林人內有願身入戎行竭力自効者准其前往凱旋之日俱從優議敘倘有被傷陣亡者亦優加恩卹倘本人年衰疾廢身不能前遣子弟代行行者亦准議敘著兵部通行曉諭○己亥命西安將軍博靈統滿洲兵振武將軍孫思克統綠旗兵偕副都統西爾哈達祖良璧馬自德巴麟從西路進剿固原提督李林

隆留守陝西甘肅副都統阿蘭台兼管綠旗兵駐寧夏副都統費揚吾駐西安○振武將軍孫思克疏言西寧總兵官韓

實錄卷五十九

十二

弼留守地方其寧夏總兵官殷化行涼州總兵官董大成肅州總兵官潘育龍貴州威寧總兵官唐希順陝西延綏鎮遊擊祁朝祥俱請令從征下議政大臣等議尋議覆應如所請帶往至尚書圖納所議隨大軍綠旗兵三千亦於四總兵官內酌撥統領從之○刑部尚書圖納等疏言陝西一路進剿發西安滿洲兵三千派副都統二員署前鋒參領八員署前鋒校十六員署蘭大一員參領四員驍騎校四員再發漢軍火器營兵一千派副都統一員署蘭大一員參領二十四員驍騎校二十四員又發綠旗兵共九千派總兵官及副將參將各



四員遊擊及守備各八員千把總各三十三員合滿漢綠旗官兵廝役等共二萬二千四百餘人各給以五月行糧從之

○庚子命撫遠大將軍伯費揚古以將軍事暫授叅贊寧夏將軍舒恕乘驛赴京師○免江西新淦建昌南康三縣本年分旱災額賦有差○辛丑諭大學士九卿等朕撫御宇內無日不念切國計民生比年直隸各省時遇旱潦又平陽府有地震之災朕屢發帑金倉粟賑濟蠲免錢糧百姓雖未至於流離恐未盡安生業各省綠旗官兵防禦勞苦深宜體恤至奏獻罪人雖罹法網亦可憫惻朕夙夜孜孜軫念於中者久矣今欲特頒詔旨廣沛恩施思嶽瀆諸神皆所以福佑斯民

實錄卷一百六十九

辛丑

宜遣官虔行致祭嚴飭地方大小官吏務期潔已奉公撫綏百姓綠旗官兵糧餉多有虛冒尅扣應行稽覈各省積年逋欠及帶征錢糧槩與豁免除貪官污吏行間犯罪與十惡等死罪外一切罪犯咸加赦宥令其自新爾等會議具奏○和碩簡親王雅布請西路軍前効力

上命在中路効力○命原任福寧總兵官許靖國率山西撫標兵西路押運○癸卯

上御太和門視朝文武陞轉各官謝恩○盛京兵部侍郎舜拜以病乞休允之○甲辰諭兵部師出以律苛奏膚功自我

太祖

太宗

世祖以至於今野戰必勝攻城必克所向無前雖士卒世受國恩捐軀報効實由我朝軍紀森嚴信賞必罰兼以兵馬精強器械整齊之所致也朕今次軍行特規酌舊制參以新謨爰著為令告我六師○大軍出征本都統護軍統領副都統叅領等審視官兵甲冑弓矢暨一切軍中器用務期堅利兵之盔尾甲背及戰矢之幹各記名其上馬烙以印繫尾處繫小牌書旗分佐領姓氏以為記號馬不烙印追銀二兩箭不書名追銀十兩給舉首之人一啓行時凡兵眾必各率行裝按旗隊以次前進不得零星散亂後先越走自出國門以至旋

實錄卷一百七十

辛丑

師當各遵守違者鞭責示警○在道毋離羣毋酗酒毋諠譁毋叫呼不遵者該管官即行捕責一所過地方不得擾害居民及蒙古部落如侵犯子女掠奪馬畜蹂躪田禾及擅離營伍入村莊山谷強取一物者兵丁廝役俱從重治罪其該管官及廝役之主一併議罪一邊境以內凡兵役在逃立刻緝拏依定例治罪出邊而逃該管大臣即發官兵務窮追捕以正軍法設追緝不獲往追人從重治罪伊主并該管官一併嚴處○下營務按旗列幕不密不疎如越旗亂次前後攙雜者將該管大臣官員分別治罪其兵役內有惡不畏法盜馬上零星諸物者懲以鞭責盜馬匹及鞍轡者視盜賊多寡按



律治罪。一出哨毋攜大纛。各帶本旗顏色小旗。遠距大營設哨。勤加巡視。比暮則還。就近地勿舉火。勿攜帳一人一騎。其馬備鞍以待。晝則近身牧放。夜則刈刳拴喂。設寇至探明。即飛報大營。若無寇妄報。與寇近不知以致傳報稽遲者。主將即將該汛坐哨官兵。立刻正法。軍前示衆。一值夜巡徼官兵。必張弓束服袴鞬。并解甲囊以備不可怠忽。無事人昏夜不得擅行行者。必問如衣服器械有異。即行擒拏。苟貪睡偷安。或人數缺少。該管大臣察出嚴治其罪。一與寇相近。管兵將軍大臣酌派前鋒參領率兵往探。務詳審賊情虛實。地勢險易。并嚴飭營中夜無燃火。一對敵列陣時。主將必度地據險。

實錄卷五十九

其

寇或布野。或結駱駝鹿角為營。我軍分列行陣。指明某隊某旗當擊敵陣某處。戰時鳴角進兵。戰畢仍鳴角收兵。官兵或棄其部伍混入他人部伍。或軼出本陣。往附他人尾後。或逡巡觀望。迨不進。照所犯輕重正法。籍沒鞭責革職。至我軍分陣進擊。某旗對陣敵堅不動。即發所備援兵助擊之。又對面臨陣時。王貝勒貝子公大臣官員或不依次誼闡擁入。或見敵寡不請擅進。此一次功不議仍以罪論。一敵陣動搖。我軍攻入當嚴禁官兵不得掠人畜財物。如不遵軍法貪行攫取者。重懲不貸。一敵敗北。即選兵馬追之。隨派隊伍接踵繼進。倘追兵墮其伏中。或遇寇遊兵。我後隊兵與之接戰。前隊

兵仍行追進。一師旋日當嚴行禁止。凡軍器不得售賣存留。與諸蒙古。違者從重治罪。該管官一并議處。一駝馬為師行要需。須擇水草善地牧放。夜則加意巡防。起營時留官兵於後收察遺失駝馬。審其印烙牌記。各交原主。其疲乏者。即於就近地方官或村莊居民。或扎薩克蒙古處辨色登數交與飼養。仍以其數報明兵部。如有將遺失駝馬隱匿棄用。或因其疲乏委棄宰殺者。嚴治以罪。令駝馬原主開明遺失疲乏駝馬顏色數目。亦報兵部登記。一軍需關係綦重。凡出征官兵。須各計口。按日支領攜帶。倘不如額查出。即從重治罪。一有職掌大臣官員。原各有親隨兵卒。不得復於大兵內抽取。

實錄卷五十九

其

以分兵勢。如委署人員及官之原無親隨兵卒者。許各抽一名。一凡大兵存駐處。毋令閒惰。每日較射磨礪器械。所領軍令不時宣諭。令其詳悉。夫兵者所以討逆安民。朕不得已而用。統兵大臣能體朕意。嚴束屬下官兵。於所過邊境內外。不輕取一物。使人民安堵如故。奏凱日自行陞賞。如縱官兵為非。擾害生事者。定加重處。凡茲軍令應通行曉諭各路官兵。如傳示不到。即將傳示之人。以軍法從事。爾部其以朕諭與前南苑所降之旨。一併刊頒。俾各凜遵。毋忽。諭議政大臣等。綠旗兵卒內有從本陣前進。趨入駱駝營鹿角營。眾人接踵齊進。殺敗敵寇者。第一名優陞千總。其督戰之員優陞二

級擢用。至綠旗將弁內有親身起入駱駝營鹿角營敗敵者優陞三級擢用。著以用印空劄頒發將軍提督總兵官凡綠旗官兵有顯著勞績者即照所定職銜填註給與。以鑲黃旗叅領伯馬思芳為鑾儀衛鑾儀使。乙巳以山西平陽府地震頒詔天下詔曰朕君臨寰宇子育元元惟以薄海昇平人安物阜為念或身處宮禁之中或巡歷郊圻之外勤求民隱宵旰弗遑故歷歲以來減賦蠲租省刑宥過凡有關於治理務實見於敷施顧邇者畿輔郡縣災傷疊告而山西平陽府屬復有地震之異雖賴所在倉廩素有積貯及時周賑幸免仇離而朕心祇惕不敢以水旱災沴視為氣數適然謂必

平錄卷一百九

七

政事之失宜方致陰陽之有忒反躬循省深儆予辜夫圖治之道莫先於養民逮下之仁莫重於寬恤茲特誕沛恩膏肆弘赦宥茂迎庥祉丕愜輿情於戲安民則惠覃敷益下之恩御衆以寬式廣好生之德布告天下咸使聞知○詔內恩款共二十條○丙午予故議政大臣都統護巴江寧將軍苗齊納各祭葬如例○丁未戶部題烏喇打貂鼠不足額該管官應議罪

上曰數年來因常捕故貂少但得如數而已以此議處是無辜獲罪若不得佳者朕但少御一裘何關緊要且貂價甚貴而又非必用之物朕亦不甚需之該部行文烏喇將軍議定到

日再奏○戊申盛京將軍綽克託疏言請於盛京戶部與奉天府所屬州縣內暫借豆草為秣養之用更請預支官兵一年俸餉

上諭議政大臣等曰前議計噶爾丹陝西兵由鎮彝取昆都倫一路大將軍費揚古兵由歸化城一路進發京師大兵由中一路進發既三路進剿則盛京寧古塔黑龍江兵尚無所用但軍需以馬為重其照將軍綽克託所請給與草豆飼養之責選才能官員專董其事該將軍副都統等公同巡督其預支俸餉俟有出師定期查前曾支領者給半年米支者給一年親齎口糧每名著攜三月我軍三路進剿噶爾丹或勢窮力竭沿俄僂東竄逃生令盛京寧古塔黑龍江三將軍除前派定兵數外再酌量增發相機撲滅可著副都統齊蘭布馳驛往諭○先是議政大臣等議發古北口兵二千名輓中路米車至是

平錄卷一百九

九

上諭于成龍等古北鎮兵素稱勁卒運米之役著另派其二千兵俱令從征所需口糧爾等議奏尋議覆古北口地屬緊要需兵捍禦應以一千五百名從軍五百名居守其口糧各齎八十日隨運兩月之米以增造車輛裝運從之○寧古塔將軍佟寶疏言請率兵一千五百名從征上諭議政大臣等前者爾等議以盛京兵一千寧古塔兵一千

黑龍江兵酌量派發。應令將軍佟寶不必增兵五百。仍照爾等前奏。俟行時。令各齋三月口糧。每人帶廝役一名馬四匹。合烏喇。見在二千九百餘匹之馬。派足四千。加意飼養。官兵啓行時。給一年俸餉。副都統沙納海。耿額將軍。酌帶一人從征。○以故二等阿思哈尼哈番。覺羅塞克森子拜音德。襲職。○陞山東沂州副將張玉麟為浙江溫州總兵官。○已酉上詣

皇太后宮問安。○陞奉天府府丞徐廷璽為奉天府府尹。○陞內閣學士傅繼祖為盛京兵部侍郎。翰林院侍讀學士覺羅三寶為內閣學士兼禮部侍郎。○調正紅旗蒙古都統齊世

實錄卷百零九

元

為本旗滿洲都統。○二等伯班第因病解退。以其弟霸圖襲替。○一等精奇尼哈番兼一拖沙喇哈番和善因病解退。以其子色特爾襲替。○以故二等阿思哈尼哈番百歲子白奇圖襲職。○免廣東保昌始興曲江三縣南雄一所本年分旱災額賦有差。○辛亥諭大學士等。古北口總兵官李世達告病。今當軍興之際。可陞石匣副將馬進良為古北口總兵官。石匣副將以劉虎補授。索額圖曾奏宣府總兵官許盛年老有疾。其令解任。此缺以通州副將白斌補授。皆令於年內速赴任所。白斌既到任。可選其標下兵卒前赴軍中。總兵官李世達令來京調養。病痊起用。○壬子原任郎中阿必達奏言

臣聞。慙都叛去。即會同喀爾喀王納木扎爾。台吉丹津陶賴等。往追時。慙都屬下台吉占巴喇。綽諾色楞等。始為慙都逼往。隨牧至海魯爾河。入據林中。不隨遊牧。慙都率兵來擊。占巴喇等逆戰奔還。自訴貝子盆楚克亦率兵來會。臣軍共追慙都戰於呼拉濟地方。慙都敗走。欲遣人追躡。台吉旺扎兒屬下胡進不付驛馬。以致稽悞。

上諭。理藩院曰。占巴喇等力戰來歸。殊屬可嘉。著賜與蟒服。緞布以示獎勵。王納木扎爾貝子盆楚克等。追逐慙都。具見報効。忠忱著將陣亡被傷姓名人數查明。議敘。後有用兵之處。免其徵調。胡進交該扎薩克鞭一百。嗣後凡有馳驛情事。立

實錄卷百零九

辛

行應付。勿得遲悞。再。檄知阿必達。當嚴查盜竊橫行。仍不時哨探聲息。○癸丑

孝莊文皇后忌辰。遣官祭

暫安奉殿。乙卯。諭大學士等。朕思察哈爾之兵。若不善飼馬

匹。恐不能同大軍前進。宜簡察哈爾左右兩翼各八百人。每

人各帶馬三匹。左翼屬中路屯宣化府右翼屬西路屯大同

府。與地方官協同善飼之。丙辰。歲暮。祭

太廟。遣領侍衛內大臣公福善行禮。遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵遣官祭太歲之神

上詣

皇太后宮問安以原任工部尚書降調熊一瀟為太常寺卿

丁巳賜朝正外藩科爾沁土默特阿祿科爾沁喀爾喀巴林喀喇沁阿霸垓主貝勒公台吉等及內大臣大學士上三

實錄卷一百六十九

主

旗都統副都統侍衛等宴旌表八旗節婦滿洲噶思哈妻

覺羅氏等五十三人蒙古阿敏妻杭氏等二十七人漢軍妻

洪亮妻黎氏等二十人各給銀建坊如例是歲人丁戶口

二千三十七萬六千五百五十四田地山蕩畦地五百九十七萬

五千二百六十八頃五十四畝有奇徵銀三千七百三十九

萬一百八十四兩有奇米豆麥六百九十六萬四千七百五

十八石有奇草二百八萬一千八百六十五束茶十五萬七

千四百五十三引行鹽四百三十一萬九千三百七十引徵

課銀二百六十九萬五千二百八十二兩有奇鑄錢二萬三

千六百九十四萬六千七百七十有奇

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百六十九

實錄卷一百六十九

主

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百七十

康熙三十五年丙子春正月戊午朔

上詣

堂子行禮還宮拜神畢率諸王貝勒貝子公內大臣大學士侍衛等詣

皇太后宮行禮御太和門王以下文武各官外藩王及使臣等

上表朝賀停止筵宴○順天府進春○朝鮮國王李焞遣陪

臣李世等表賀冬至元旦

萬壽節及進歲貢禮物宴齊如例○庚申

實錄卷一百七十

上詣

皇太后宮問安○諭議政大臣等除現在每佐領下預備兵六

名外著增派每佐領下護軍一名及烏鎗驍騎五百名其獲

罪人等及情願効力官員俱著隨此兵進發尋又諭所派烏

鎗驍騎五百名外每佐領下再增派一名俱著在中路尾大

軍後進發一有所用即聽指揮而行可派出都統杜思噶爾

石文英護軍統領鄂克濟哈副都統席柱法喀等預備○辛

酉

上奉

皇太后幸暢春園○壬戌諭議政大臣等出征馬匹所關甚要

著將兵士行李稱驗舫兩毋得過重以疲馬力爾等會議具奏尋議原定兵士每人所給馬四匹四人為一伍每人廝役

各一名一伍合計軍器糧以及一應用物兵重九百七十

五觔零一伍馬十六匹本身與僕從騎坐八匹外餘八匹每

駄應載一百二十一觔又每伍增給騾子一匹每駄應以一

百七觔合算從之○癸亥

上詣

皇太后宮問安遣官祭太歲之神○甲子

世祖章皇帝忌辰遣官祭

孝陵○京師地微震○乙丑諭領侍衛內大臣等前曾命陝西

實錄卷一百七十

上詣

兵於四月初旬進發若俟四月進兵似覺遲悞應令將軍孫

思克率陝西兵來至寧夏於三月初十前後出寧夏會大將

軍伯費揚古所往翁金之路兩軍會合後令伯費揚古將兵

酌量均撥分路前進著先差員作速往諭尚書圖納亦令速

往○命給墨爾根黑龍江齊齊哈爾三處官兵及編附右衛

蒙古官兵行糧○命天津總兵官岳昇龍率直隸山東馬兵

三百名懷慶總兵官劉國典率河南馬兵二百名護送中路

糧車○命延綏波羅營副將劉官統同陝西兵進剿○賞宣

化府大同府及古北口從征綠旗官兵銀兩○丙寅

皇太后宮問安。○戊辰

上奉

皇太后自暢春園回宮。○己巳孟春享

太廟遣領侍衛內大臣公舅舅佟國維行禮。○諭內大臣公長

泰管鳥鎗大臣太少每旗應設一員除前鋒統領碩鼐不可

別調外鑲黃旗派領侍衛內大臣馬思哈正黃旗派都統侯

巴渾德正白旗派護軍統領托倫正紅旗派公長泰鑲白旗

派護軍統領蘇昌鑲紅旗派副都統孫渣齊正藍旗派副都

統雅圖鑲藍旗派副都統宗室鄂飛。○福建陸路提督張雲

翼來京陛見請軍前効力命從中路出征。○諭督運都察院

左都御史于成龍等中路米車所載過重速輸沙漠恐馬力

難勝可再增造五百輛均分裝載。○庚午

上詣

皇太后宮問安。○諭理藩院侍郎安布祿曰高書班迪出哨日

久而又撥發從征著班迪歸辦行裝爾前往班迪所駐之地

凡事俱如班迪行爾亦已派軍中可即從彼地而往如班迪

處官員有願從征者令歸來治裝至彼處偵探人員應留者

留之若無要務可即遣歸。○辛未祈穀於

上帝遣皇太子允初行禮。

上御太和門賜出征運米文武大臣官兵等宴并蟒緞綢布有

差。

上奉

皇太后幸暢春園。壬申四川陝西總督吳赫疏言甘肅邊地

關係緊要今將軍孫思克等出征防守不可不嚴臣請酌選

標下官兵帶往甘州防守邊境并會同該撫採辦駝馬軍需

從之。○內閣侍讀學士伊道疏言鄉導朱爾渣哈等至厄折

武圖哈卜七爾地方見有人馬行蹤約四百餘沿克魯倫河

上流而去觀其形勢乃係厄魯特疏入

上令伊道再選精細能事之人探明實信速行奏報再檄知烏

朱穆泰阿祿科爾沁扎魯特科爾沁及黑龍江將軍薩布素

處嚴飭各旗汛界官兵加意防守。○撫遠大將軍伯費揚古

疏請於大同養馬八旗護軍內簡選二百名烏鎗護軍內簡

選八十名為前鋒從之尋命副都統碩岱署前鋒統領。命

選派蒙古官兵并發火箭三千解大將軍伯費揚古軍前

命調山東膠州副將周洪昇等押中路糧車。○癸酉

上詣

皇太后宮問安。○甲戌漢大學士九卿科道等疏言

皇上文德誕敷武功丕顯前者三逆負恩察哈爾作亂賴

皇上運用神謀皆立時授首又平臺灣以為郡縣數十年間凡

亘古聲教所未及者無不來享來王乃噶爾丹後馬小醜反

覆靡常

皇上赫然震怒命加天討機宜措置斷自

宸衷遣發諸路精銳之師分道並進天戈所指誅之決矣顧西路大兵已

特敕撫遠大將軍伯費揚古為帥而將軍舒恕博齊孫思克等

又率三秦滿漢大兵協剿惟中路將軍未蒙

簡命竊意

睿謨深遠將欲

親統銳旅掃清朔漠臣等愚陋之見竊以

皇上為百神之所憑依四海蒼生之所倚賴似不必以此稽誅

小寇躬臨壁壘伏冀

皇上特簡中路大將軍一人令統大兵與諸路並剿如慮道里

遠隔一切進止機宜調度為難或

駐蹕近邊指授方畧則諸路大軍自可祇奉

成命立奏膚功奏入得旨朕臨御以來日以愛養兵民為念未

嘗輕於用兵逮事征討方今宇內無事惟厄魯特噶爾丹違

背約誓恣行狂逞侵掠我臣服之喀爾喀恐漸致邊民不得

休息故特遣各路大兵分道並進務期剿蕩為塞外生民除

患向年烏爾布通之役朕以策誘噶爾丹入距京師僅七百

里許大兵已經擊敗乃竟中賊計致噶爾丹遁走彼時因朕

躬違和未得親至其地失此機會至今猶以為憾噶爾丹竄

伏巴顏烏蘭地方相距未甚遼遠以是不憚勤勞親臨邊外

相機行事此賊既滅則中外寧謐可無他虞假使及今不除

日後設防兵民益多擾累所奏已知之○乙亥振武將軍孫

思克疏言臣同尚書圖納公議派陝西綠旗兵九千於二月

初十日以前齊集甘肅養馬一月一同出邊但甘肅地方苦

寒青草發萌甚遲於三月二十日前後青草若萌即行出口

倘尚未萌達請再守候幾日再河西地方逼近蒙古應令提

督李林隆酌量帶領官兵駐紮甘肅防守

上諭諸王大臣大將軍伯費揚古兵於二月二十日前後進發

欽此

將軍孫思克兵亦應令於二月二十日前後自寧夏起程甘

肅肅州等處兵若調至寧夏路途遙遠其到必遲現今寧夏

有滿洲兵一千漢軍火器營兵五百應再增以西安滿洲兵

一千漢軍火器營兵五百以足三千之數再寧夏榆林二總

兵官標下綠旗兵共選派六千即令該總兵官率領同將軍

博齊副都統阿南達等於二月二十日前後自寧夏起程令

將軍孫思克將伊標兵酌量選帶速來寧夏如及期而至則

一同進發倘或不及可隨後踵進其滿洲漢軍兵丁馬匹未

及喂肥著該將軍總督等將存留滿洲漢軍并綠旗兵丁馬

匹內酌選肥健者更換付之其添給綠旗兵丁馬匹并運米



之駱駝馬騾俱令於各營及驛馬內選驍壯者給付一切事務令尚書圖納會同該總督巡撫提督等公商料理毋致有悞提督李林隆速往甘州駐劄酌量徵調官兵加意防守地方速檄知之○丙子

上諭管漢軍火器營都統李正宗是行有綠旗兵三千著令綠旗兵居中漢軍居兩旁綠旗兵再增帶虎角一百六十架○丁丑發坡賴村倉穀賑濟巴林等六旗分窮丁○己卯

上詣

皇太后宮問安○調雲南曲靖總兵官劉廷傑為鶴麗總兵官○鶴麗總兵官陸進忠為曲靖總兵官○庚辰

上奉

皇太后自暢春園回宮○辛巳諭領侍衛內大臣等官軍之廝役人等有能踰鹿角營而進擊者作何給還本主身價令其出戶以示勸勵爾等集議尋議覆官軍家下兵丁廝役或駱駝營或鹿角營或於曠野賊兵對敵之處有能首先躍入衆人接踵繼進以致殺敗賊寇其首先躍入之家下兵丁廝役及其父母妻子俱撥在佐領立為另戶照例計其人口給還伊主身價得旨依議其第二三前進者亦著照此例行○撫遠大將軍伯費揚古遵旨派西路軍中都統副都統等管自京發來八旗兵營壘以揚威將軍覺羅舒恕管兩黃旗以都

實錄卷一百一十七

★

實錄卷一百一十七

癸未

上詣

皇太后宮問安○授撫遠大將軍伯費揚古振武將軍孫思克揚威將軍覺羅舒恕等敕印○理藩院兵部遵諭議西路設驛自殺虎口以外應置驛六十處每驛設馬二十匹兩驛合設筆帖式一員撥什庫二名蒙古官一員兵十名於鄂爾多斯六旗內派馬五百匹再取直隸河南附近府州縣偏僻驛站中馬一千匹酌量安設六十驛需馬一千二百匹餘馬三百匹亦令帶往自西路以至中路軍前如有設驛之處可交大將軍伯費揚古即於此內馬匹酌量安設從之○諭議政

大臣等中路兵丁仍帶八十日糧外諸王大臣侍衛官員俱  
普帶百日糧。賜西路從征歸化城土默特官兵銀幣有差  
調安徽巡撫線一信為浙江巡撫以刑部右侍郎陳汝器  
為安徽巡撫。甲申諭安郡王馬爾渾輔國公賴士副都統  
迂圖等爾等往歸化城務揚軍威以示兵力強盛各處遠行  
偵探最為緊要爾等三人須同心効力不可互相推諉王與  
公皆年幼未曾歷練凡事宜與迂圖商酌而行迂圖亦不得  
推諉王等至朕行在與歸化城相近此時正當用兵之際不  
必差人請安。諭兵部等衙門大兵至巴顏烏爾開倘噶爾丹  
不敢迎敵從此遁去可預選察哈爾兵一千六百名喀喇沁  
翁牛特兵一千四百名再於大兵內及新滿洲諸王護衛喀  
爾喀兵內共選精兵一萬備足駝馬糧糧務將噶爾丹窮追  
剿滅。命正紅旗都統公彭春參贊西路軍務。乙酉  
上以親征噶爾丹謁  
暫安奉殿。  
孝陵命皇長子允禔皇三子允祉  
皇四子 皇五子允祺皇七子允祐皇八子允禩隨駕是日  
啟行駐蹕夏店。諭中路督運都察院左都御史于成龍等  
大軍討寇全資兵力內外滿洲漢軍綠旗諸路從征兵丁俱  
已各加恩賚其外省調集步兵輓運軍糧載途况瘁尤可軫

念所有每月應支銀米本營照常支給俾瞻養家口仍各給  
與行糧以為道路之資所運米石如悉依期輓至克濟軍需  
不致虧缺遲悞俟大兵凱旋准補入馬兵營伍用彰獎勵有  
効力勤敏才堪拔擢者爾等可記名稟奏以俟酌用兵丁勞  
苦飢寒凡督運大臣官員宜時加紓恤慰勉庶人爭自効踴  
躍赴功西路輓運兵丁亦照此例行爾等可移文各該巡撫  
通行傳諭示朕體恤軍士至意。以故奉恩將軍納蘇圖子  
亢古里襲職。丙戌  
上駐蹕薊州。  
大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百七十一

康熙三十五年丙子二月丁亥朔遣大學士李天馥祭

先師孔子

上詣

暫安奉殿

孝陵行禮奠酒舉哀至

仁孝皇后

孝昭皇后

孝懿皇后陵奠酒舉哀是日駐蹕湯泉 戊子祭

大社

大稷遣皇太子允初行禮

上駐蹕薊州○命戶部尚書馬齊往調喀喇沁翁牛特兵輓運

中路軍糧○己丑

上駐蹕三河縣○黑龍江將軍薩布素疏言黑龍江副都統喀

希瑚拉自俱願從軍効力得旨喀希瑚著從軍拉自著鎮守

地方 庚寅

上駐蹕通州○辛卯

上回宮詣

皇太后宮問安○諭領侍衛內大臣等噶爾丹為人狡詐未必

不指西向東我大兵若於三月初十日起行則四月二十五  
間方得至巴顏烏闌今不便待陝西兵中路行期宜改在三  
月初間西路費揚古兵行期亦改在二月望間至於汎界地  
方偵探情形事屬緊要宜增派官兵著於出征之前鋒內選  
派四十名再將出征上三旗侍衛及王貝勒貝子公等情願  
効力之護衛人員內派三十名發往侍郎安布祿處駐扎  
壬辰內閣學士陶岱往盛京賑濟并以天津海口運米至盛  
京事請訓旨

上曰從天津海口運米但以新造船與商船轉運尚恐船少應  
遣人往福建將軍督撫處勸諭走洋商船使來貿易至時用

以運米仍給以雇直其裝載貨物但收正稅免雜費往取

此船著各部院衙門派出賢能司官筆帖式各一員令馳驛

前去先是理藩院奏烏朱穆秦等旗扎薩克王貝勒貝子

公台吉等官兵應派在何路伏候

欽定得旨俟出兵臨期傳諭衆扎薩克等酌率本旗官兵於各

邊界預備至是

上諭曰目今蒙古兵衆正當馬匹羸瘦之時可止其來會大兵

著都統杜思噶爾理藩院章京宜賴馳驛前往令蒙古王等

將所屬兵丁內情願効力馬匹足供驅策者儘數派出駐烏

爾揮河地方預備青草牧肥馬匹以待遣用杜思噶爾等

宣諭畢可於汎界內來赴軍前○命中路大兵於二月三十日自京師起程西路大兵於二月十八日自歸化城起程○兵部理藩院奏中路設驛自京城至獨石口設四驛有額定驛馬不必增加外每驛用筆帖式一員撥什庫二名自獨石口外約設六十驛每驛馬四十匹至中路大兵到汎界後與西路聯絡處設十五驛每驛馬二十匹如相隔遠驛或不足再酌量增設中路大兵正站腰站俱兩驛合設筆帖式一員撥什庫二名扎薩克蒙古官一員兵十名其管理正站應撥理藩院兵部官各二員腰站各一員前去得旨此番出師諸物朕皆全備並無待後齎送之物飛馳之事亦少著每驛

實錄卷一百七十一

三

設馬二十四匹部院官筆帖式撥什庫調用將盡今設此驛有情願効力廢員每一驛可用兩三人坐塘効力并酌撥扎薩克蒙古內台吉章京兵丁監視馬匹如驛馬失盜被劫即依律治罪至草青後將蒙古之馬著該管台吉各自本旗酌帶赴驛協助傳報以此傳諭設驛地方衆扎薩克餘如議行○以前鋒統領碩果為鑲藍旗蒙古都統仍兼前鋒統領甲午諭中路督運都察院左都御史于成龍等爾等所運軍糧係計日按口預備一路車輛動搖或致虧耗可每石加一斗運往 命撫遠大將軍伯費揚古自京起行赴歸化城上剋期四月下旬令會中路大軍於土喇若噶爾丹從克魯倫

河而下與中路兵近西路兵遠則中路待西路之兵若噶爾丹在上喇與西路兵近中路兵遠則西路待中路之兵先是以冲天礮三門神威礮十門景山製造子母礮二十四門江南礮五十五門發往大同以備西路兵之用至是諭兵部著於新造礮四十八門內選八門派每旗礮手一名作速增解大將軍費揚古軍中 諭領侍衛內大臣等近視口外來報噶爾丹情形亦有東行之狀著黑龍江將軍薩布素立刻整備屬下兵馬遠設偵探如有用盛京寧古塔兵之處許彼星赴往召總轄調遣其左近蒙古亦當小心防備口外所報噶爾丹之事悉發與薩布素知之盛京寧古塔將軍處亦著

實錄卷一百七十一

四

檄知○陞大理寺卿喻成龍為刑部右侍郎○陞長史費仰古為鑲紅旗漢軍副都統○頒賜綿甲於從征將士 丁酉孝康章皇后忌辰遣官祭孝陵 戊戌以江南江淮興武二衛漕船去冬凍阻不能回南命每船賞銀二十兩 己亥

上奉

皇太后幸暢春園 厄魯特策妄阿喇布坦遣使囊素等請安進貢又奏噶爾丹奸惡乞遣還回子歸己

上賜以敕書敕曰朕為萬國元后惟以率土乂安咸享樂利為心其能體朕覆載之懷敬慎自持者朕必愛恤教育之其或

不循分誼包藏禍心恃安和之理者朕必懲創匡正之此朕統御寰區為人君之大道也今爾策妄阿喇布坦遣使請安貢獻方物又以噶爾丹奸詐為所侵凌與爾有不共戴天之讐披瀝情實齋奏入告誠心求恤朕為一統萬邦之主有不眷爾誠心効順之人乎查爾所奏回子之事今噶爾丹處雖無回子前來貿易此後或來朕必交該部查明如爾所請發往爾尚永懷敬順朕將添加恩賜馬前噶爾丹猖獗橫行闌入烏闌布通之時朕遣偏師大敗之欲即窮追將盡殲矣而噶爾丹乃長跪於達賴喇嘛所遺威靈佛前而誓曰不敢復侵中華皇帝之喀爾喀與眾人民載書加印姑免其誅滅而縱之朕殊不喜征誅今噶爾丹恃棄誓言戕我賚爾之使刻喀爾喀之人阻止班禪胡土克圖之來今又至已頗為闌動挫我人民內懷詭詐欲行禍亂其跡顯然朕為一統萬邦之主何得不加創艾是以發三路大軍誅討凡罪皆在噶爾丹他無與也但三路大軍其眾聲靈赫濯恐邊外之民不無震驚爾其遍諭爾之屬眾以至吐魯番諸處各令照常安居勿致驚潰持遣內閣侍讀常明理藩院司務英武為使賜爾花緞二十匹銀茶桶茶盆各一具狐腋蟒袍一襲貂帽一頂玲瓏鞋帶一圍皮鞭蟒襪各一對爾如有所欲言其遣人偕使臣來奏 宴賚策妄阿喇布坦使臣囊素等如例 辛丑

上詣

皇太后宮問安 撫遠大將軍伯費揚古疏言所遣看路副都統阿迪云汛界以外郭多里巴爾哈孫一路共十三站噶爾拜察罕庫騰一路共十七站每站皆有井十餘處俱令浚鑿非深掘不能得水臣到汛界外當酌量掘井以往

上諭議政大臣等據阿迪等奏其浚鑿之處仍係舊井並未嘗另行掘視井泉闕係軍行著喇嘛崗南多爾濟同副都統阿玉璽等馳驛赴伯費揚古處諭旨一到即令遣人前往掘井大兵仍照常進發商南多爾濟著留伯費揚古處一同辦事士寅諭大將軍伯費揚古米糧牲口關係緊要爾當遣兵

實錄卷一百七十一

防護其前後聞根敦戴青貝勒已進洪郭羅之內齊斯希卜地方爾兩隊兵勿悞認喀爾喀為厄魯特也特諭 癸卯春分朔

日於東郊遣領侍衛內大臣公福善行禮 甲辰諭禮部兵部朕統御中外念切撫綏惟務休養民生未嘗遽事征討比年以來海宇昇平閭閻樂業四方固已無事獨厄魯特噶爾丹荒裔狡寇肆逞凶頑自烏闌布通敗遁之後不自悔禍仍行狂逞悖天虐眾違蔑誓言侵掠我臣服之喀爾喀潛入巴顏烏闌之地心懷叵測逆狀已彰乘其竄伏近邊自應及時撲剿倘目今不行剪滅恐致異日沿邊防戍益累兵民聲罪迅

討事不容已。用是遣發各路大兵分道並進。朕特躬莅邊外。相機行事。以衆擊寡。以正誅逆。天意人謀。無不允協。此寇一殄。則邊塵蕩滌。疆圉輯寧。內安外攘。實在此舉。告祭

天地

宗廟

社稷。並一切應行事宜。著察例詳議具奏。予故奉國將軍齊爾弼祭一次。予故議政大臣鑲藍旗蒙古都統巴海祭葬如例。丙午。遣官祭

先農之神。諭議政大臣前命于成龍等。用內帑錢糧督造中路運米車四千輛。又兩次增造一千五百輛。今朕營需用

車輛。不必令地方官預備。即於增造車內分撥二百輛供應。

○諭領侍衛內大臣等。軍士接戰當預編隊伍。頭隊兵必多。諸王可俱編入二隊。兩脇之兵亦應派定。所選取勇士可編入頭隊。頭隊二隊及左右兩脇之兵為最要。軍士不得以前進相爭。爾等其集議之。尋議頭隊軍正中排設鹿角及綠旗。兵次以左右翼漢軍火礮鳥鎗之兵繼之。繼此則派左右翼滿洲火礮兵四百名。鳥鎗護軍每佐領一名。護軍一名。親隨護軍鳥鎗驍騎俱兩佐領合一名。勇士及情願効力者俱派在頭隊。其二隊每佐領護軍一名。親隨護軍兩佐領合一名。皇子及王貝子公等俱定在二隊。其左右兩脇每佐領護軍

一名。鳥鎗護軍。鳥鎗驍騎俱兩佐領合一名。行李令在二隊後。各隨本旗參領立於百步之末。再每佐領前鋒一名。鳥鎗護軍兩佐領合一名。內府護軍各執事人等及部院大臣官員筆帖式俱令在

御前。以備調用。察哈爾兵八百扎什王兵五百。另作一隊預備。追擊衆扎薩克之兵一至。即令與察哈爾兵會合。其派領兵接戰之大臣伏候

欽點

上從之。又諭火器營軍士既派在頭隊二隊。其火器營大臣即率之接戰。至於都統護軍統領副都統等俱係特簡大臣。人

材偉岸。並無庸懦者。頭隊二隊及兩脇可照各翼派定。昔

太宗文皇帝時。公彭春之祖和碩圖於南苑交戰。橫衝而入。奮勇破賊。故封以公爵。今有能越衆効力者。朕自不靳爵賞。若退縮不前者。治罪無赦。都統兼前鋒統領碩驍著統前鋒而行。提督張雲翼著與都統公鄂倫岱一處効力。副都統吳達禪齊蘭布令隨駕行。穆森等隨從皇子。不必編入隊伍。領侍衛內大臣目下無庸派出。俟臨期再行撥派。於是頭隊派都統蘇努杜思噶爾。右文榮護軍統領鄂克濟哈蘇丹。副都統崇古禮胡什巴。阿爾納莫爾澤扎喇克圖。二隊派都統齊世噶爾瑪。副都統席柱噶爾璧。阿喀納握赫。左脇派都統阿席

塔副都統達禮善那泰右脇派都統周卜世副都統法喀龍  
西庫○領侍衛內大臣等遵諭議定中路兵營

皇上駐蹕處為一營八旗前鋒軍列作二營八旗護軍及驍騎  
列作十六營八旗漢軍火器營兵隨礮兵礮手綿甲兵列作  
四營部院大臣官員筆帖式等列作一營左翼察哈爾兵列  
作二營宣化府及古北口綠旗兵各為一營至守護

御營官兵及執事人員俱交領侍衛內大臣護軍統領及內務  
府總管約束督理得旨鑲黃旗大營內著皇七子允祐都統  
杜思噶爾副都統達禮善內大臣額駙尚之隆督捕右理事  
官溫達鑲黃旗小營內著貝子蘇爾發副都統喀爾沁席柱

聖祖實錄卷一百七十一

九

正黃旗大營內著皇五子允祺都統侯巴澤德副都統阿喀  
納學士嵩祝內大臣布克陶正黃旗小營內著宗室公普奇  
都統周卜世副都統莫爾渾正白旗大營內著信郡王鄂札  
都統阿席坦副都統阿爾納侍讀學士席爾登正白旗小營  
內著宗室公吞珠都統石文英副都統胡什巴正紅旗大營  
內著皇四子 公長泰都統齊世副都統法喀原任尚書  
顧八代侍讀學士覺羅華顯正紅旗小營內著宗室公齊克  
塔哈護軍統領鄂克濟哈副都統扎喇克圖鑲白旗大營內  
著恪慎郡王岳希都統噶爾瑪著護軍統領桑邊副都統那  
泰鑲白旗小營內著貝子吳爾占護軍統領蘇曷鑲紅旗大

聖祖實錄卷一百七十一

十

營內著皇三子允祉公福善副都統孫渣齊侍郎席爾達學  
士三寶鑲紅旗小營內著宗室公蘇努副都統握赫正藍旗  
大營內著顯親王丹臻副都統禪穆布侍郎常綬正藍旗小  
營內著閒散宗室哈爾薩副都統崇古禮鑲藍旗大營內著  
康親王傑書原任內大臣阿密達副都統宗室鄂飛鑲藍旗  
小營內著貝子魯賓原任都統喀忒副都統龍西庫率領再  
八旗漢軍火器營鑲黃正白兩旗合為一營著都統公鄂倫  
岱副都統公孫徵灝正黃正紅兩旗合為一營著都統王永  
譽副都統張所知鑲白正藍兩旗合為一營著都統李正宗  
副都統雷繼尊喻維那鑲紅鑲藍兩旗合為一營著都統諾  
穆圖副都統宗室巴賽費仰古趙斌張朝午率領其察哈爾  
兵著貝勒多爾濟渣卜散秩大臣吳巴錫統領餘如議行○  
命裕親王福全恭親王常寧簡親王雅布從征於營後行○  
諭理藩院官兵馬駝及坐臺馬匹關係緊要應檄知衆扎薩  
克及喀爾喀扎薩克等嚴禁各旗偷盜如有干法者梟首示  
衆家產籍沒入官該扎薩克及該管人員從重治罪可違撥  
什庫馳驛前往通行曉諭 禮部題直隸各省節孝等應旌  
表者亦照八旗例俱於年終彙題從之 改江南裡河同知  
為江南通省管河道高家堰同知為山盱同知 以雲南故  
芒市安撫司放彌高子放天球襲職 丁未諭議政大臣等



軍士所齎米糧務如數攜帶。自啟行以至在途該管官員不時嚴查。倘有減數帶往者。將本身及該管官員一併從重治罪。有盜米糧馬匹。逃回及軍士縱酒殺人。或鬪毆傷人。扎薩克蒙古等盜我軍馬匹。軍士及廝役等盜貿易蒙古馬匹者。俱立行正法。昔時行軍。以廝役牧放馬匹。此番既派出軍士守視其庸劣不堪之廝役。可停其帶往。至於隨軍貿易之人。固不可少。若縱其貿易。又至紊亂。應於某營相近。即令某營之夸蘭大派出章京於一里外駐扎。准其貿易。嚴禁誼譁火燭。并戒沽酒。倘貿易人不遵法禁。偷盜馬匹米糧者。亦即正法。帶往之人一併治罪。軍士或將米私售貿易之人。或強買

實錄卷一百七十一

十三

搶奪者。定加重罪。可徧行曉諭。使咸知凜遵。○理藩院奏大兵經行蒙古地方。應令蒙古等沿途販賣駝馬牛羊等物。得旨爾院可另設一營。其販賣人等即在兩營內貿易。大軍十六營中。每營派官一員。專司貿易之事。如有指稱貿易行竊者。不分首從。梟首示衆。妻子家產籍沒入官。爾等即行曉諭。戊申先是遣御史鍾申保等往召班禪胡土克圖至是偕達賴喇嘛等使人至西寧。先以達賴喇嘛達賴汗疏奏內稱以  
皇上罷召之意。宣告班禪。但伊未曾出痘。不能趨赴。其班禪胡土克圖亦疏言

皇上罷召理應趨赴。但國俗大忌痘疹。不能上副

皇上之意。又第已疏言噶爾丹聞召班禪之信。遣人阻班禪胡

土克圖勿行。班禪遂不果行。章下所司命達賴喇嘛等使人

來京 己酉

上詣

皇太后宮問安 命宣化府總兵官白斌統領官兵從張家口

前至適中處會合大兵進剿 庚戌遣官祭

歷代帝王 諭兵部此番出征兵馬衆多。可分為兩路出口

將鑲黃正黃正白正紅四旗前鋒軍并綠旗營前鋒軍為一隊。繼以宣化府綠旗兵左翼察哈爾兵為一隊。繼以御營又

實錄卷一百七十一

十三

分四旗兵為四隊。漢軍火器營兵為一隊。出獨石口。再將鑲白鑲紅正藍鑲藍四旗前鋒軍并綠旗前鋒軍為一隊。繼以古北口綠旗兵為一隊。再繼以四旗兵。分為四隊。漢軍火器營兵為一隊。令其出古北口。軍行一日。一隊接踵進發。出獨石口之前鋒軍鑲黃正黃旗兵綠旗兵馬匹俱牧於路左。正白正紅旗兵及漢軍火器營兵馬匹俱牧於路右。其出古北口之前鋒軍鑲白鑲紅旗兵綠旗兵馬匹俱牧於路左。正藍鑲藍旗兵及漢軍火器營兵馬匹俱牧於路右。則牧場不致互相蹂踐。於軍士大有裨益。可通行傳諭。振武將軍孫思克疏言臣等率總兵官董大成潘育龍等兵俱已到寧夏。選

得臣標兵一千八百董大成兵一千二百潘育龍兵一千王化行兵三千合滿洲兵三千共為一萬料理出兵諸務畢臣與博霖等率兵於二月二十二日自寧夏起行總兵官董大成潘育龍王化行等俱陸續進發報聞○辛亥

上詣

皇太后宮問安○壬子

孝昭皇后忌辰遣官祭

陵○

上奉

皇太后自暢春園回宮○增貴州鄉試解額十名○予故太子

少保左都督廣東提督贈太子少傅許貞左都督順德總兵

官劉詒各祭葬如例○癸丑

上以親征噶爾丹遣官告祭

天地

宗廟

社稷○遣官祭太歲火礮道路之神○

上詣

皇太后宮問安○戶部尚書馬齊奉差調兵回京覆命

上諭曰此番派出征之王以下及大臣官員兵丁俱著給行糧

給輓運中路軍糧喀喇沁翁牛特兵軍器行糧○發張家

口倉穀賑喀爾喀多羅郡王敦多布多爾濟下窮丁○甲寅諭大學士等此次各部院衙門本章停其馳奏凡事俱著皇太子聽理若重大緊要事著諸大臣會同議定啟奏皇太子諭大學士阿蘭泰尚書馬齊佛倫朕啟行後爾等偕各部院大臣分為三班值宿禁城內○諭議政大臣等朕親統六師前進法律須極嚴明師行之日軍士俱先於郊次排列朕啟行後仍復入城逐旗按日而出務必隊伍嚴整○夸蘭大參領等各率本營行裝按隊伍前進不得分散錯亂倘馬驚人墮致失馬匹者令該夸蘭大章京及護軍校等親往尋獲中路軍雖行尚俟西路消息倘值天雨即令駐扎其後隊不必等候傳示亦行屯駐○再每營俱撥給醫藥凡軍士及僕從有患病者該夸蘭大即發醫調治倘病不能前行者報知該營皇子王等留住臺上將伊分內之米一併留給病痊仍令前進○或有病故者即留臺上俟旋師日帶回凡一應細事該營之皇子及諸王大臣夸蘭大等公同結案事關重大再行請旨○凡遇敵兵令我軍攻擊朕必詳審可攻之處始令前進○必不以軍士軀命為嘗試如臨陣遇敵不能奮勇敗賊必治以罪前行之前鋒倘望見敵兵必視有水草處駐扎以俟後隊軍至可通行曉諭八旗至於大將軍伯費揚古處亦應檄知令其通示○諭大學士等中路軍士甚眾後派之每佐領

護軍一名無庸帶往取其肥健馬匹給發前去軍士此存留  
每佐領護軍一名仍令照常預備俟有需用徵調即速起行  
再後隊之章京護軍校等亦俱停行著在京預備○命戶部  
尚書馬齊署理藩院尚書事 陞太常寺卿熊一瀟為大理  
寺卿○丙辰

上詣

皇太后宮問安先是科爾沁土謝圖親王沙津遵奉

皇上前降密諭潛遣鄂漆爾往約噶爾丹噶爾丹果沿克魯倫  
河而下掠喀爾喀納木扎爾陀音遂踞巴顏烏蘭

上聞之以機不可失不俟草莽即應往剿遂經畫糧餉調度各

實錄卷一百七十一

十五

路兵馬既畢於是日率諸王貝勒貝子公文武大臣詣

堂子行禮祭旗纛

親領六軍啟行駐蹕沙河○諭領侍衛內大臣公福善古北口

一路兵衆惟爾督率而行凡所過城池村舍恐軍卒搶擄當

行嚴禁兵丁馬匹最要須加意牧養朕所示法令極明毋使

有違出古北口後或有無知之徒以捕獸馳騁勞苦馬匹者

當嚴行禁止 諭領侍衛內大臣等軍士車輛不以次前進

俱並軌而行倘遇隘口阻滯則後軍必致遲悞嗣後大軍車

輛俱著依次前進毋得爭先以致壅塞 諭署理藩院事尚

書馬齊喀爾喀台吉波羅吳納漢遠來歸順且請隨征殊屬

可嘉著賜銀百兩所乘馬駝及需用什物可查明辦給令於  
翌日起程隨行

三月丁巳朔

上駐蹕南口 先是

上遣副都統阿迪等往汎界視水草回奏冰雪凝凍未能掘井  
上以用兵之道以速為貴大兵行期斷不可緩且出師時已當  
春季地脈將融雖冰凍可以疏鑿隨遣副都統阿毓璽等往  
汎界外掘井至是大將軍伯費揚古奏阿毓璽等於二月二  
十四日至巴爾幾烏蘭河朔哨口掘井數處去水尺許清泉  
湧出疏鑿甚易一如

實錄卷一百七十一

十六

聖算○戊午

上駐蹕榆林○遣左副都御史阿山祭居庸關山川之神○已

未清明節遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○

上駐蹕懷來縣○裁江南中河通判缺○庚申

上駐蹕石河○諭議政大臣等大將軍伯費揚古題報事情若俟到京再奏不免紆回遲緩應遣兵部大臣一員往土木一則料理驛站一則伯費揚古題奏本章一面開拆謄寫啟奏皇太子一面將原本馳奏尋議政大臣等以應派大臣奏請欽點得旨著侍郎馬爾漢去馬爾漢未到之先著侍郎朱都納暫往土木料理俟馬爾漢到交代畢即速來馬爾漢既來則兵部止存尚書索諾和一人著學士綏色署理朱都納既暫留土木嗣後凡關兵部事宜著交大學士伊桑阿管理 辛

酉

上駐蹕真武廟地方○喀爾喀貝子益楚克同子台吉沙穆畢爾至奏請父子隨軍効力

上允之隨賜蟒衣綿甲袍服帳房駱駝羊馬等物又命其在京之子台吉根敦扎卜仍回本部落 壬戌

上駐蹕鵲鴉堡 甲子

上駐蹕赤城縣 乙丑

上駐蹕毛兒峪○諭議政大臣等內殿馬撥一千匹兵部馬撥五百匹八旗佐領所養馬內擇其肥者撥一千五百匹共三千騎於每佐領所留護軍一百名內酌量派出令同內殿各

將此馬趕護於三月二十日起行出張家口約行二十餘日

可到此馬到時如正當對敵之際則給兵騎用甚有裨益即旋師時令兵丁騎用亦大有濟其趕護馬匹之護軍與內殿人亦應照出征人例給馬四匹此項馬匹著副都統管上驛院事宗室阿喀納二等侍衛鄂克濟哈等帶來○諭尚書班迪跟隨大兵安站甚屬緊要爾可留後安站而來著再傳諭驛站官兵凡有患病物故留於驛站者令官兵善視之大軍回鑾加賞資兵丁馬匹駱駝有羸瘦者令管站諸人牧養俟旋師時各歸本主○諭議政大臣等出口以後侵晨啟行日中駐扎每日一餐○諭議政大臣等前抵井事務皆交署前鋒統領夸色今著夸色至歐德等處地方偵探其掘井事著前鋒統領碩鼐料理 丙寅

上駐蹕獨石口城內○丁卯

上駐蹕齊倫巴爾哈孫○遣戶部侍郎阿爾拜祭獨石口山川之神○先是戶部侍郎思格色奉差往口外掘井至是復命上問一井供飲人馬幾何思格色不能對

上諭議政大臣等曰思格色為人昏憤居官亦不端著革職充卒伍從軍効力○增雲南鄉試解額十五名○諭議政大臣等凡掘井之處須以井居中大營並鑲黃旗兩營互相犄角則取水飲馬甚易不致爭鬪其井著派官兵看守無令汙壞

後隊兵著接遞交付。○賞給各營軍士及隨征蒙古等羊隻。  
○戊辰。

上駐蹕諾海和朔。○諭領侍衛內大臣等曰。今日朕五鼓起行。見炊烟甚多。朕每日一餐。凌晨即撤營就道。乃朕於起行之後。軍士尚在營中眠食。行李淹遲。著領侍衛內大臣。內務府總管武備院總管將領。導及駱駝頭目等。稽遲行李之故。察明回奏。領侍衛內大臣公舅舅佟國維等請罪。奏曰。此皆臣等庸懦不能管攝之故。乞。

皇上嚴加處分。得旨著暫停處分。効力贖罪。○

上自出京常以休息士馬為念。行十餘日。皆以漏盡輒起程。而

實錄卷一百七十一

十九

行李尚不能早至。軍士人等不得及早安營。

上因是五鼓即興。

親視馱載前發方啟行。比駐營時。日甫已刻。行李已畢至矣。於是士馬大得蘇息。諭領侍衛內大臣等侍衛官員人等。前令各領行李而行。今未見有隨行者。嗣後著各領行李至駐紮處。各相助安營。朕每日常於野次暫坐。若於朕前過者。俱勿下馬。是日。

上出行宮。令喀爾喀貝子益楚克等射。射畢。

上親率諸皇子并侍衛等射。

上連發五矢。俱中。兩翼侍立。蒙古諸王台吉及貝子益楚克等

皆驚異。讚美曰。射之神奇有如此耶。

皇上英武誠邁世矣。於是眾皆跪請視。

皇上之弓。

上笑以所持弓授親近侍衛吳什。傳示眾皆。遞相控引。竟不能張。乃復相顧驚嘆曰。如此勁弓。如何引滿耶。

上入行宮薄暮。又傳諭曰。天氣陰晦。恐即有雨。各將馬匹加意蓋護。著通行曉諭。已已。

上駐蹕博洛和屯。庚午。撫遠大將軍伯費揚古疏言。西路兵甚眾。如一處行走。春草必致踏壞。為此臣領自京發來大兵前行。將右衛大兵留一日。程使接續而來。於三月十三日可

實錄卷一百七十一

二十

至汛界。至時。詢明喀爾喀之鄉導。計到翁金。上喇。日期再奏疏入。

上以示議政大臣。辛未。

上駐蹕滾諾爾地方。雨雪交作。

上以軍士未即安營。雨服露立。俟眾軍士結營畢。始入行宮。營中皆炊飯。然後進膳。又遣御前侍衛海青以駱駝載帳房及食物柴炭。賜輓車未至之人。令棲息舉爨。壬申。先是遣前鋒參領納林往令將軍薩布素統黑龍江及盛京寧古塔三路大兵前進。至是納林還代薩布素奏言。臣率所屬之兵。於四月初草生之時。預先啟行。於雅爾濟泰周圍形勝之地。屯

扎其寧古塔兵令往磨爾春地方周圍相近處屯扎盛京兵令擇相宜處前進屯扎得旨盛京及寧古塔兵依將軍薩布素所奏前進屯扎薩布素著率所屬兵一千五百齎三月糧於四月初旬啟行前來克魯倫地方若有生已爾虎之人來時相遇則收集回來○癸酉

上駐蹕揆宿布喇克地方諭領侍衛內大臣等出古北口之前鋒兵見今已到應令合於前鋒兵營一同先行其次著兩路綠旗兵察哈爾兵隨行其次著鑲黃旗正黃旗兵在朕軍前行朕軍後著正白旗正紅旗隨行其餘各旗俱兩旗合軍照此隨行○蘇尼特多羅郡王額駙薩穆扎率領二等台吉

實錄卷一百七十一

五

扎卜等願從軍効力得旨自噶爾丹作亂爾等旗分信使往來供應驛馬食物顯著勞績至秋間定行重賞爾等時可徧諭爾旗諸王下軍民人等又諭王年邁免從征台吉扎卜垂扎卜蘇代納木扎卜畢立克等俱令隨征諭議政大臣等沙崗難行馬匹勞苦自揆宿布喇克至胡什木克道遠分為兩程自胡什木克至滾諾爾雖途近易到但皆沙磧僕從人等俱著步行兵丁有愛惜馬匹者亦聽步行仍令照常晨炊日食兩餐過此沙崗數處至平坦之地不必為馬慮矣甲戌

萬壽節停止慶賀筵宴 遣官祭

福陵

昭陵

暫安奉殿

孝陵

仁孝皇后

孝昭皇后

孝懿皇后陵 遣官祭真武東嶽城隍之神 乙亥撫遠大將軍伯費揚古疏言臣等率領大兵於三月十三日至汛界十五日臣率京城兵及大同綠旗兵於東路前進揚威將軍覺羅舒恕率右衛兵於西路前進預計程數四月初三日可至

實錄卷一百七十一

五

翁金二十四日至土喇二十七日至巴顏烏蘭

上命示議政大臣等諭衆知之○諭兵部理藩院朕回軍時必由此路應將隨軍米糧量留揆宿布喇克則目前車輛既輕而回京時取米亦易著派章京驍騎同蒙古官兵謹慎看守其蒙古官兵不必帶行糧前來將口糧加一倍給與從子成龍處領取分給 丙子

上駐蹕和爾博地方 諭議政大臣等前曾著前鋒兵綠旗兵在察罕諾爾地方等候今大將軍伯費揚古兵業已前進若大兵到時始行起程則遲悞日期現今古北口綠旗兵在昂幾爾圖地方彼等皆有車輛若不令前進俟大兵到時始令

起程。則大兵又致稽留爾等集議具奏。尋議前鋒兵綠旗兵不必在察罕諾爾等候。著古北口綠旗兵。見在昂幾爾圖者酌量趨赴在前之綠旗兵兩黃旗兵到察罕諾爾時令越過在前行走。已經奉旨。應從察罕諾爾即扎環營。問鄉導萬舒克云。至克魯倫河俱可兩旗並行。今仍著兩旗並行。前鋒兵距綠旗兵察哈爾兵兩日程前行。綠旗兵察哈爾兵距兩黃旗兵一日程前行在。

御營後之兵亦照此行。行走俟出汎界時將各兵總會於何處及前鋒如何行走之處再題請旨。得旨。前鋒兵著距綠旗兵察哈爾兵一日程行走。餘依議。○丁丑

上駐蹕昂幾爾圖地方。○先是。

上遣乾清門一等侍衛馬武侍郎阿爾拜察閱宣化府綠旗兵至是還奏臣等觀張家口兵七百名甚優護送礮位兵百名看守礮位鳥鎗兵三百名此四百名兵斷不可少。惟宣化鎮標馬兵四百名內有一二不堪者。然亦決不至貽誤。因令總兵官白斌仍率所帶兵一千五百名前往察罕諾爾地方候旨從之。諭議政大臣等尚書班迪隨大兵後安站。今著召班迪來令於前途相距一宿地方安站。○戊寅

上駐蹕胡什木克地方。諭議政大臣等兵丁疲乏馬匹應交與驛站收養。部給四匹馬內若有疲乏二三匹者察明即並

本人留於驛站。令於青草處牧放肥壯等候旋師。其察核沿途驛站馬匹并存留牲口米糧等物俱係緊要著在京吏部尚書庫勒納前來自存留米糧馬匹之驛站以至汎界令其往來稽查。庚辰

上駐蹕噶爾圖地方。予故浙江巡撫王維珍祭葬如例。謚敏愨。壬午

上駐蹕滾諾爾地方。癸未

上駐蹕郭和蘇台察罕諾爾地方。甲申

上駐蹕瑚魯蘇台

上以糧運所載太重恐難速行命員外郎雅肅傳諭于成龍將

多帶之米酌留所過驛中交蒙古官兵看守。俟至汎界再將正額米留一千石。出汎界後倘有用米之處即遣官催來。倘無用米之處亦遣官止之。○陞光祿寺卿李錦為太常寺卿大理寺少卿錢三錫為光祿寺卿



大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十一

實錄卷一百七十一

聖

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十二

康熙三十五年丙子夏四月丙戌朔享

太廟遣皇太子允禔行禮先是

上命理藩院員外郎霍尚於哈必爾漢等處巡視鑿井至是霍  
尚奏報自哈必爾漢至博木巴圖哈卜齊爾口以外鑿井之  
事已竣報聞諭內大臣等曰前因有雪故御營馬匹傳令  
使隨水草牧放今既無雪馬匹俱著放於左翼如有違令放  
於右翼者拏獲必加重處著通行曉諭○丁亥

上駐蹕蘇勒圖地方○戊子諭乾清門一等侍衛馬武曰自宣

化府取來礮二十四門需用最要著漢軍四旗火器營大臣

等照看一同帶來○己丑

上駐蹕哈必爾漢地方○先是遣侍衛克什圖主事保住使噶  
爾丹所至是坐臺員外郎席保住奏報克什圖等攜噶爾丹  
奏章步行而回

上問議政大臣料噶爾丹待我兵否諸臣奏曰前噶爾丹遣回  
阿爾必特祐等時一面作往工噶勞圖地方遊牧之狀却仍  
駐扎如故今觀其駐於土喇而遣回克什圖等或不待我兵  
而竟遁去可知也使克什圖等步行而回者是正欲其遲到  
雖出兵不能追及之意

上曰朕熟計噶爾丹情形久矣。噶爾丹之心必以為今當春令馬匹羸瘦。此路既無水草。沙磧瀚海。又甚難行。大兵勢不能到。至朕親來。彼萬難料及。故奪我使之馬。駝令步行而回。不過欲堅彼部下蒙古之心。示以不懼耳。非欲使我兵遲延。彼得遠遁也。朕先傳諭大將軍費揚古與約師期。今費揚古奏本月二十四日可至土喇。若依期而至。兩路夾攻。則噶爾丹在我掌握。安能復脫。若我兵先到。彼必連夜逃遁。費揚古兵縱少遲緩。必至土喇地方。噶爾丹以疲敝乍到之兵。費揚古迎擊。奇盡行殲滅。觀彼在我使者之前舉動。噶爾丹早已入我計中矣。○諭議政大臣等。至汛界時。應將眾人馬匹作何

實錄卷一百一十

上

酌留即行議奏。尋議察留疲瘦馬駝。自王以下大臣官員及有力者并人存留。將所留馬駝各令本人看守牧放。護軍驍騎執事人等。未留廝役。止留馬匹者。見今蒙古王等奉旨留住汛界。以此所留馬匹總付蒙古王等撥兵看守牧放。每翼分派部院官二員。會同蒙古王等管理從之。鄉導護軍統領蘇丹奏曰。

皇上回鑾時。仍經此路。則沿途所鑿之井。仍交與員外郎霍尚令所屬旗下蒙古修理看守。從之。庚寅。

上駐蹕和爾和地方。諭理藩院著檄尚書班迪遣賢能官員作速安設旁驛。○辛卯。

上駐蹕格德爾庫地方。喀爾喀台吉滾濟扎卜墨爾根阿海領四十餘戶來歸。命安插界內。壬辰。

上駐蹕塔爾奇喇地方。先是遣官於塔爾奇喇掘井。無水。駕至清泉。忽湧。導成巨流。人馬資用不竭。眾皆謂。

皇上洪福所致。無不大悅。癸巳。命大學士伊桑阿祭風雨之神。及界外山川之神。○

上諭行在兵部前鋒兵鑲黃旗兵。正黃旗兵。察哈爾兵。綠旗兵。此五營見在一處同行。伊等牧放馬匹。俱遵法度。今草甚茂。著將御營相近。迤西牧草。留以待用。行則在前。一程駐扎。勿相去太遠。○甲午。

上駐蹕僧色地方。行在兵部奏。黑龍江將軍薩布素於四月初六日起程。向克魯倫前進。應於何處會師。

上曰。薩布素之兵來亦無及。兵馬徒然勞頓。著薩布素近喀爾喀河擇好水草處。喂養馬匹。可移文薩布素知之。○諭內大臣等曰。茲已抵邊界。自明日始著列環營。乙未。

上駐蹕科圖地方。扈從大臣佟國維。索額圖。伊桑阿等奏。傳聞噶爾丹之去已遠。

皇上當徐還使西路兵前進。上召諸臣諭曰。朕以噶爾丹侵擾喀爾喀。及外藩蒙古。故秣馬厲兵。整軍運餉。分路進剿。曲盡籌畫。告祭。

天地

宗廟

社稷務期剿滅噶爾丹而還自兵丁以至廝役無不思滅噶爾丹者况爾大臣俱係情願効力告請從軍之人乃不奮勇前往遂巡退後朕必誅之不知爾等視朕為何如人我

太祖高皇帝

太宗文皇帝親行仗劍以建丕基朕不法

祖行事可乎我師既至此地噶爾丹可擒可滅而肯怯懦退縮乎且大將軍伯費揚古兵與朕軍約期夾擊今朕軍失約即還則西路之兵不可問矣還至京城何以昭告

天地

宗廟

社稷乎佟國維等叩首謝罪頃之前遣往哨探護軍叅領車克楚至言噶爾丹未嘗遁去仍在克魯倫衆始曉悟○議政大臣等奏京城送來馬三千作何給發兵丁

上諭曰自京城每佐領下出兵七名每人給馬四匹四人共驛一頭今每旗留八十名則八旗共留六百四十名矣合綠旗兵察哈爾兵自京城趕馬護軍二百名通共計算比原數仍多計每旗所留八十名兵丁之馬驛共三百四十有餘於此馬匹內揀臚壯者可得馬一百五十匹再添自京城帶來馬

實錄卷一百七十一

甲

實錄卷一百七十一

五

一百五十匹則每旗三百匹矣若給火器營兵每旗一百匹二總兵官下綠旗兵各五十匹馬自有餘所留兵八十名著留十五日口糧其餘米糧給與前去兵丁其補還此項米糧俟于成龍運米到時照數補給此馬三千匹內撥給兵丁所剩著交與上駟院其趕馬護軍二百名令歸各旗營內行走尋又諭在前之兵若將趕來馬匹復趕送前去則馬匹勞苦內御馬羣有馬八百匹在前將此馬內給前鋒兵一百匹給兩黃旗三百匹其在前行走之綠旗兵給兵部馬五十匹著馬思喀達利善安布祿看給其在後六旗兵漢軍火器營兵綠旗兵馬匹著索額圖將兵部趕來馬匹取其臚壯者五百匹并自京城趕來旗下馬匹照數看給內御馬羣馬一千匹不用給與其所留之兵著左都御史傅臘塔副都統海瀾在此駐扎總管兵馬遣人察看哨口偵探消息阿霸哈納貝子額林辰達什告請隨征

上曰爾隨征之意極是但今蒙古馬匹正在極憊之時爾等率領官兵將所留馬匹在好水草處公同看守牧放即與爾出兵効力無異務加意勤勉○禮部議覆福建巡撫卞永譽疏言耿逆叛亂之時福寧總兵官兵萬福福州府知府王之儀邵武府知府張端午江西建昌府知府高天爵建寧府同知喻三畏邵武府同知高舉侯官縣知縣劉嘉猷尤溪縣知縣

李墳福州城守營千總廖有功等守節殉難。請建公祠致祭。應如所請。從之。○以故鑲黃旗三等阿思哈尼哈番阿哈道之孫興麟。正藍旗一等阿思哈尼哈番兼一拖沙喇哈番他布代之子阿遇錫各襲職。○以兵部送至軍中馬匹羸瘦。革兵部左侍郎朱都納職。○戊戌。

駕出汛界。至蘇德圖駐蹕。○諭撫遠大將軍伯費揚古朕所統軍將至汛界時。即差護軍參領車克楚前鋒侍衛祁薩木往克魯倫左側。躡探聲息。今車克楚等還奏云。臣等初九日到伊扎爾地方。見有寇蹤。於是轉回。初十日遇沙津王所差鄂漆爾等言。噶爾丹於本月初間自土喇向克魯倫移營。第三

日我等歸時。噶爾丹在達爾漢教拉山。以此揆之。噶爾丹已近朕所統大軍矣。此寇乃極狡猾之人。如敗遁斷不趨土喇。必渡克魯倫。或從俄僕巴爾濟赴塞稜格。或繞巴顏烏蘭之後設伏。爾等兩隊兵見彼下克魯倫。若隨蹤而往。未必不入其伏兵之中。朕甚慮之。特遣藍翎侍衛殷濟納等諭爾可詳詢地界及彼脫逃之路。小心堵禦。不可以彼向下流行而輕之。特諭。○諭侍郎西拉侍讀學士喇錫曰。扎薩克王台吉等并喀爾喀王台吉等。應俱駐扎一營。著科爾沁達爾漢親王班第管領。○諭行在兵部見今噶爾丹由克魯倫河順流而來。住扎之處。大兵十日內可到。應行文于成龍。著將米糧陸續運至。勿致有誤。噶禮碩運米糧亦令隨後運到。總兵官岳

并龍著選所屬兵丁兼程趨御營前來。諭領侍衛內大臣索額圖曰。爾往傳諭後軍朕在瑚魯蘇台察罕諾爾地方駐營以待。著後軍趨赴前來。毋疲勞馬匹。○己亥。

上駐蹕瑚魯蘇台察罕諾爾地方。○諭議政大臣等。噶爾丹由克魯倫河順流已至伊渣爾厄爾幾納克地方。我西來兩路兵及中路兵俱近克魯倫河矣。噶爾丹勢蹙。或向東竄入。亦未可知。著盛京寧古塔兵前往索岳爾濟山屯扎。黑龍江兵亦赴彼會齊。可速撥行。○

上又慮噶爾丹向克魯倫西遠遁。乃遣理藩院撥什庫諾爾布

實錄卷五十五

喀爾喀納木扎爾王長史庫濟根等哨探。諭曰。聞噶爾丹順河下流行。恐我軍越過。爾等往克魯倫歐德哈爾哈地方潛渡河。伏於北山登高望之。○以翰林院編修宋衡為雲南鄉試正考官。吏部員外郎董思凝為副考官。翰林院編修湯右曾為貴州鄉試正考官。戶部員外郎萬懷為副考官。○命定軍行次序。前鋒軍在前。次八旗漢軍火器營。察哈爾宣化府古北口綠旗兵。次御營。並上三旗。次五旗。總兵官岳并龍至。亦同綠旗兵行。○辛丑。

上駐蹕喀喇芒鼐哈必爾漢地方。○宣化府總兵官白斌等率官兵迎。

駕。

上諭曰爾等俱經歷戰陣之人。若遇敵時宜各加勉勵。○壬寅。孝端文皇后忌辰。遣官祭。

昭陵。○陞內閣學士齊福為盛京工部侍郎。○諭內大臣等。爾等營內或哨口。或斥埃牧馬之處。終夜無使張燈舉火。違者。定行治罪。○癸卯。

上駐蹕席喇布里圖地方。○諭領侍衛內大臣索額圖。前行八旗前鋒兵。漢軍火器營與四旗察哈爾兵及綠旗兵。統領不可無人。著皇長子允禔與爾前往統領行走。朕十九日在今日所駐席喇布里圖地方停留。其八旗前鋒漢軍火器營察

實錄卷一百一十一

八

哈爾兵綠旗兵俱著於拖陵布喇克地方停留等候御營。○諭副都統吳達禮。御營後五旗中著正紅旗明日近至御營。聽上三旗都統指示扎營。其四旗至御營軍所過六七里外繞湖泊扎營。○乙巳。予故散秩大臣朱爾素祭葬如例。○丙午。

上駐蹕西巴爾台地方。○哨探撥什庫諾爾布等還奏言厄魯特實在塔爾幾爾濟地方。

上以示議政大臣及兩營大臣。授諾爾布布拖沙喇哈番職。餘賞賚有差。○丁未。撫遠大將軍伯費揚古奏言臣於四月初八日至翁金口東進兵。駐扎烏蘭厄爾幾地方。若寧夏兵於初

九日至烏蘭厄爾幾地方。臣等或一路進兵。或兩路進兵。會同定議具奏。若仍不至。據正月二十八日奔來喀爾喀逃人曾有噶爾丹今在土喇上流之語。臣等亦不便久待。即於初十日啟行進趨土喇矣。其寧夏兵到時著隨後進發。又鄉導等約畧計云。初十日自烏蘭厄爾幾起程行二十二宿於次月初三日可至土喇阿喇克山之西克勒河朔地方。

上諭諸王大臣曰。前因大將軍伯費揚古疏言四月二十四日可到土喇。二十七日可到巴顏烏蘭。是以中路大兵整旅安行。已來至近敵之地矣。伯費揚古沿途耽誤許久。不見奏聞。今忽奏稱改期。目前我軍既逼近噶爾丹。應不必待伯費揚

實錄卷一百一十二

九

古軍當即前行。爾等議奏。尋多羅信郡王鄂扎貝子蘇爾發等議。臣等切思噶爾丹若果有待我軍之意。則我亦可俟西路之兵矣。若不能禦我軍。欲行逃竄。則其地方寬闊。聞信預遁。必相隔遼遠。今量西路兵所到之期。緩行以待。兩路夾進。似為有益。領侍衛內大臣蘇爾達馬思喀等議。臣等前因伯費揚古原奏內有二十四日至土喇之語。度等待之期不甚久遠。故請俟伯費揚古兵至然後進發。今伯費揚古奏四月初三日至土喇。阿喇克山之克勒河朔。臣等詢問鄉導言。自阿喇克山之克勒河朔前行八宿。第九日始至巴顏烏蘭地方。噶爾丹若由巴顏烏蘭北逃竄。亦有去路。如此則等候

日期太遠。若我軍不進。噶爾丹不戰而走。一時難於追獲。今我軍似應前進。酌量而行。宗室公吞珠領侍衛內大臣公舅舅佟國維等議。中路大軍前進。宜近抵克魯倫河。前奉諭有欲遣使往噶爾丹之語。若伯費揚古之兵可待。即往來遣使延緩日期。以待伯費揚古之兵。若有可行。事宜我軍勢大。可即行剿滅。噶爾丹極其狡猾。如大軍不近抵克魯倫河。而噶爾丹順克魯倫河下流而去。則我大軍似難追及矣。得旨。遣乾清門侍衛馬武。往皇長子允禔營內。侍讀學士喇錫往五旗營內。商之。○遣侍衛額林辰齋。敕諭撫遠大將軍伯費揚古。曰。爾初七日奏言。五月初三日可到土喇爾原。奏言。四月二十四日。可到土喇二十七日到巴顏烏蘭。是以朕軍因水草無誤。定於二十五日間。到克魯倫河。今差前鋒視其行蹤。亦已獲其生口矣。噶爾丹有沿克魯倫河而下之勢。與我相隔五日程。此際爾等理應遣奏數次。則朕軍易於迎待。而爾等久不來奏。未知已到何地。恐稽時日。催趲而行。遂先於爾等。今或待或行。係在兩可。情事甚大。爾等如何行路。當速來報。因原議兩路兵。孰先到數日。有務須等候之約。是以朕且待且行。如必不得已。則當相機行事耳。特諭。○諭行在兵部。大將軍伯費揚古。兵行稍遲。朕緩行以待之。可行。文于成龍。乘此時將所運米。作速陸續運至。○先是。

上遣侍衛喀瓦爾達等。至古爾班圖爾罕地方。潛覘敵哨。至是喀瓦爾達等還。奏曰。臣等前後往踰巴爾代哈山。及清晨至西方圖爾罕山上。適敵哨方到。於山上覓水。臣等向克魯倫視之。見其有烟。厄魯特在此是實。○戊申。喇錫回奏。統領正紅旗。鑲白旗。正藍旗。鑲藍旗。及鑲紅旗。小營兵。諸王大臣等。議臣等以為。大將軍伯費揚古。兵至土喇之期尚早。若中路大兵。即行前進。使噶爾丹知皇上已至。旋即逃竄。便得脫矣。今視水草佳處。堪容八旗兵者。暫行屯駐。約計大將軍伯費揚古。兵至然後前進。則噶爾丹之後。已為所截。因而夾擊之。於事有益。縱令噶爾丹依克魯倫河順流而去。自有盛京。烏喇。黑龍江等處。兵在彼。而我大軍復抵克魯倫河。斷其歸路。亦復有濟。統領鑲紅旗。兵皇三子。允祉。領侍衛內大臣。公福善等。議臣等以為。大將軍伯費揚古。奏稱。遲延五六日。初八日出翁金口東。今噶爾丹見在巴顏烏蘭近處。若待伯費揚古。兵至時。日稍遲。恐賊聞風逃竄。亦未可知。即以中路大兵。剿滅賊寇。未為不足。既已近抵克魯倫河。似應一面移文。催西路之兵。一面使賊不及為備。前往擊之。馬武回奏。領侍衛內大臣。索額圖等。議應緩行。以待大將軍之兵。都統公鄂倫岱等。議應即行進兵。得旨。著見在此營內。議政大臣等。議奏。大臣仍持前議。口奏。得旨。至明。



日駐營處定奪○皇長子允禔奏臣等於二十一日至拖陵漢軍火器營所帶宣鎮神功礮二十四門因駕車驟匹已疲於二十二日晚始至又總兵官馬進良白斌言所帶八十日糧以二十日糧留貯和爾博地方見今已用五十日若糧能接濟不致稽遲

上命領侍衛內大臣索額圖料理火礮事務大學士伊桑阿查綠旗兵二十日口糧數目具奏○已酉

上駐蹕察罕布喇克地方○辛亥諭議政諸臣俟至拖陵地方再遣使於噶爾丹度伯費揚古等兵亦將到噶爾丹若遣使來我亦遣使頻往以待伯費揚古等兵彼若乘此逃竄必生

內變豈能完全耶諸臣奏曰

上諭至拖陵地方再行遣使甚是俟至拖陵時往來遣使以待伯費揚古等兵若噶爾丹接戰則兩路夾擊立行剿滅或逃或降至彼時再議

上是之○諭領侍衛內大臣等曰噶爾丹自以為無所畏憚煽惑諸蒙古竊踞克魯倫地方謂朕必不親征今我軍緊要軍器俱已備至若噶爾丹聞朕已至必先逃竄爾等欲戰耶欲使噶爾丹逃竄耶可各陳所見諸臣奏曰臣等之意聽彼逃竄似比戰為愈但所以使噶爾丹逃竄之計臣等不得而知上曰噶爾丹原係行劫小寇素無遠識信人誑言侵掠喀爾喀

以為我軍不能即至故敢竄伏克魯倫今大軍已近噶爾丹西路兵亦將至土喇爾等欲使之逃竄朕以為無難俟其少近遣使往諭云朕欲與親臨約盟爾可前來與我軍會議並不爾剿噶爾丹聞朕親來必連夜奔逃我軍即行追殺如向土喇退去必遇費揚古兵朕於此賊窟慮已久此次噶爾丹必然殄滅拒則糜爛竄則逃亡但于成龍所運之米恐不能應期而至耳伊桑阿等可撰敕呈覽俟少近遣往旋即進兵

○壬子奏

皇太后書曰臣違

慈顏日久所以未敢請安者軍中人來往頻數則語言清雜於

事機無益且臣意若仰荷

天祐速成大功將同捷音並奏也但瞻仰之懷形於夢寐茲特恭請

萬安此間水泉清而地氣涼臣體中甚佳諸皇子諸王大小諸臣以至軍士俱好臣所統兵無有滯悞咸整肅畢至糧車亦接續而來但以待伯費揚古之兵遂多需時日耳噶爾丹所存距我師甚近彼聞臣親帥兵來必爾逃竄今但臣一路進兵則恐其途徑既多彼將從他處奔突總之此行

天心眷顧似有可憑伏望

聖慈寬舒以待之五月初旬若得事竣約六月初十日可以還



京為此特具奏章。自瀚海內察罕布喇克地方馳聞。○商南多爾濟齊大將軍伯費揚古疏至。言臣等於初十日自烏蘭厄爾幾起程。至察罕和朔地方。將軍孫思克等亦於十一日至察罕和朔。臣等會議。將軍孫思克博齊各選精兵二千。與臣等一路前進。計程本月三十日可至土喇之阿喇克山。克勒河朔地方。來月初七日可至巴顏烏闌。

上命議政大臣等會議。尋議應照。

皇上前諭。至拖陵時。頻行遣使。以候伯費揚古之兵。兩路夾剿。得旨大兵或應即行前進。或應候大將軍兵至夾剿。仍著前後營諸王大臣。公同議奏。前營仍著馬武。後營仍著喇錫前

去。○癸丑。乾清門一等侍衛馬武回奏。前營皇子大臣等議。

皇上親統大兵。特為剿滅噶爾丹而出。又思遏賊歸路。調發西來二路兵俱至。正合。

皇上神謨。今兵力甚盛。正宜協力夾擊。剿滅噶爾丹。其遣使噶

爾丹及計大將軍伯費揚古等兵。近逼賊營。夾攻剿滅之處。

俱候。

皇上乾斷。侍讀學士喇錫回奏。後營皇子王大臣等議。與議政大臣同。

上諭。議政諸臣。朕所統大軍。不勞而至。人逸馬肥。以此精銳。人思敵愾。寇雖十萬。朕將用策。親御以擊之。一面遣使往說。倘

敵人力有餘。則聽與我戰。力不能及。則聽其走。但此寇若走。

恐在我有追悔之意。議政諸臣奏曰。噶爾丹若走。則吾事已

畢。當遣使往說。衆意合一。

上遂定遣使之議。甲寅。頭運米車到。遣乾清門一等侍衛馬

武齋糧給散總兵官馬進良白斌標兵。○乙卯。喀爾喀扎薩

克台吉車陵渣卜等奏。請隨軍効力。

上曰。爾等往來遊牧。以避厄魯特勞苦。已極。免往出征。各帶眷

屬。牲口往達里岡阿之東居住。朕回鑾時。指示地方安插。達

里岡阿地方。曾留馬匹牧放。著爾所屬人等。加意收管。勿使

盜竊。車陵渣卜復奏。願准臣兄子台吉多爾即渣爾都統。叟

爾單隨征。

上許之。又諭之曰。尚書班第令爾等向內遊牧。爾等不從。納木

扎爾陀音等。終為厄魯特所掠。若果向內地遊牧。何至於此。

爾等既與土謝圖汗附近。著隨征台吉多爾即渣爾都統。叟

爾單與西地西里貝勒同行。

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十二

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十三

康熙三十五年丙子五月丙辰朔

上駐蹕拖陵布喇克地方○諭領侍衛內大臣等步行廝後及  
羸瘦馬匹應留拖陵地方留總兵官白斌標下綠旗兵二百  
名馬進良標下綠旗兵一百名令其踞水濬壕築壘扎營留  
杭父令其總管撥總兵官岳昇龍所領兵二百名給白斌以  
補所留二百兵之缺又八旗滿兵內有馬匹疲憊不能前行  
者亦察明留之○諭行在兵部內府管駱駝首領郝尚圖等  
星馳運未到此著傳諭八旗李蘭太每旗給米三十石古北  
口宣化府綠旗兵給二十二日米及牛羊其米經留貯不敷  
八十日者亦著補給○內大臣等奏防護馬羣甚屬緊要除  
先到之前鋒兵及漢軍察哈爾營所設防護外應將見在此  
處五旗每旗派護軍五十人增入周圍防護再  
御營內領侍衛內大臣及護軍統領等仍照前輪班行走今既  
逼近厄魯特窺處之地

御營內既添設宿衛其防護等處不必著侍衛及內府護軍前  
往得旨侍衛及護軍等皆不令往亦為未可伊等各有所司  
無人看守且牧馬處有信息亦須令來報應著三旗內合派  
侍衛九員內府護軍十五人前往○諭行在兵部馬匹最為

緊要。嗣後安營不必向南宜各隨其方。惟視有水處周圍環繞。令兩黃旗居御營後。其餘悉照旗分次察哈爾兵漢軍火器營兵又其次綠旗兵於御營外環列。大營勿踐營中之草。所有馬匹盡則於各旗營外近處牧放。夜即收入營中。則馬匹不難於水草。而兵行大有裨益。丁巳諭議政大臣爾等中路西路兵所騎四匹馬內有借庫銀買者盡免還庫。佐領下兵丁各出私索賈給出征人者官給馬價。又大臣侍衛內務府官員等起程時預支秋季俸銀俱免扣除。諭行在兵部征討莫要於法令奮勇登先者錫賞。怯懦退後者議罪。俱係定例。岳昇龍馬進良白斌等係簡選任用之人。今已逼近

實錄卷五十三

二

噶爾丹。若遇敵交戰時。副將以下至兵衆人等有退怯違令者。著該總兵官正法奏聞。○諭內大臣等。藍翎侍衛興永朝著署副都統。於鑲黃旗漢軍火器營行走。召裕親王福全恭親王常寧簡親王雅布前赴大營。戊午。

仁孝皇后忌辰。遣官祭

陵。○諭內大臣公長泰曰。綠旗兵著列於鹿角中間。綠旗兵之次將兩翼八旗之漢軍礮位烏鎗排列。漢軍火器之次將八旗滿兵馬上所載之礮位分翼排列。鹿角後之頭隊兵令各按旗分排列。烏鎗護軍次列。護軍又次列。烏鎗騎。凡八旗俱照此排列。二隊兵著於頭隊後排列。傍隊兵既無礮傳將

漢軍子母礮。每旗給與兩位。此礮位著滿洲烏鎗手騎。兼管看護。陣勢著分張排列。長泰等隨遵諭繪陣圖進呈。得旨。照此遵行。諭行在兵部。五處驛站人及馬匹著留於原任。尚書杭艾處。其前途設站人員馬匹照常帶往安設。俟御營至克勒河朔即遣賢能官一員前往杭艾處。將所留五處驛站從塔爾渾柴達木一帶連行安站。令運米之車輛由此站路行走。俟五處驛站安置畢。將歐德哈爾哈一路驛站撤回。○命內大臣阿密達開散宗室哈爾薩都統喀代護軍統領桑道分隸兩脇軍中。○己未。命左都御史于成龍將後運糧內六七十石運運至拖陵預備。其餘米石俱留貯汎界近地。

實錄卷五十三

三

以備凱旋之用。○先是。

上諭俟到拖陵日遣使於噶爾丹。至是以敕書賜物及所獲厄魯特俄齊爾等四人。交公主長史多穆中書阿必達令一等侍衛喀瓦爾達一等台吉阿喇卜坦以兵衛之。送至燕國庫列圖。

上諭喀瓦爾達阿喇卜坦曰。爾等不必到克魯倫度其地形。古爾班圖爾罕已爾代喀當有敵人戍守。爾等若往克魯倫則畧迂遠。彼必截爾等之後。爾等勿得過燕國庫列圖。即從彼地遣多穆等前去。未遣伊等之前。縱所擒四厄魯特往致聲息可也。倘遇厄魯特勿與之戰。但令敕書使臣到彼則已。敕

諭噶爾丹曰朕統御萬邦惟以民命為重不喜殺伐爾尼魯特喀爾喀向奉職貢爾等交惡構兵以來朕未嘗偏徇而於爾有異視喀爾喀為爾所敗投朕之命如朕不救之則皆飢斃矣朕之濟人非特於喀爾喀如此也凡諸國窘迫來歸者朕亦一體救之已明諭爾數次爾奏章來索喀爾喀澤卜尊丹已胡土克圖土謝圖汗言之不已朕始終不以喀爾喀為直曾諭爾此事非懸議所能結當會盟以講之爾又以生計窘乏不能前來又以誓書所無之言屢向我使臣喇嘛支吾回奏阿喇尼巡行邊塞倖遇爾兵不待朕旨遽與爾戰因特遣王與皇子與爾會議爾屬下人又先抗拒以致交兵其時

中集卷一百三

四

所發他路之兵朕急遣人止之勿與爾戰爾前年至巴顏烏闐遂掠喀爾喀之納木扎爾陀音朕又特遣使問故約與議盟今朕與爾若不覲面定議不但爾國難存我邊民亦不得寧居因爾來既近故秣馬繕備朕於三月初旬起行西路兵於二月十八日起行黑龍江兵於四月初六日起行盛京寧古塔兵於三月起行今朕大軍已出汎界與爾逼近西路兵俱已到土喇東路兵俱已溯克魯倫河而來朕向崇禮義順天理而行不恃勢力戕滅他人朕果恃勢力則竟不遣使統各路之兵而剿滅爾無所不可朕乃不忍生靈橫被鋒鏑是以抒誠遣使朕與爾等覲面定議指示地界爾照舊貢獻買

易則爾國安善而我邊民亦安乃協朕保列國如赤子之意豈不休歟朕斷不以計誘人切勿疑畏朕來欲與各處將帥閱兵已傳令伊等勿戰非虛言也爾如不信可留朕所遣使臣內一人在爾地倘各處兵進而攻爾爾可差所留人止之一面遣爾前曾奉使為朕所識之人來奏朕統御萬邦豈肯訪人而破滅之爾或妄動而去則虛朕美意而生靈有不利矣朕茲開誠特賜爾煖帽蟒袍粧緞褂純金鈎弁巾纓帶一條及幣十端銀二百兩以公主長史多禪中書阿必達為使爾其籌之自古敵國無害使臣之理況朕與爾向無隙乎五日內遣爾使偕我使來覆特諭○庚申

實錄卷一百三

五

上駐蹕阿敦齊陸阿魯布喇克地方○理藩院奏言扎薩克喀爾喀諸王台吉等皆願從前隊先進得旨扎薩克喀爾喀王等領其護衛隨從一二人侍從朕側其餘共為一隊選其能者使領之俱在一處侍從朕後隨所指授即令前進○澤卜尊丹已胡土克圖土謝圖汗等奏曰我等七旗喀爾喀為噶爾丹所殘虐荷蒙

皇上救我等於患難之中俾得生全今噶爾丹侵擾我喀爾喀等不已又興兵來克魯倫地方

皇上親統大兵征剿臣等情願隨征効力

上諭曰朕係萬國之主凡小國危亡自當撫恤況爾等自

太宗文皇帝時即來朝貢。今噶爾丹侵害爾等不已。朕率大兵除暴安良。

上天必加佑庇。且朕念自

祖宗以來。撫綏小國。所向無敵。此番朕必成功。為爾二次雪怨。

爾等安居聽朕提音不必隨往。○辛酉。

上於途次。諭科爾沁。巴克什。古爾貝勒。及一等侍衛喀第由等。曰。古爾班圖爾罕等地方。有賊所設哨探。彼處有阿思哈圖山。爾等可在彼埋伏。賊必出阿思哈圖山。來窺我營。我軍前往追擒。爾等即行接應。是日。

上駐蹕枯庫車爾地方。○命喀喇沁王扎什。兼領察哈爾兵。○

實錄卷百十三

六

奉差護送多禪等。一等侍衛喀瓦爾達等還。奏言。臣等五月初五日。到克魯倫河。不見敵人蹤跡。初六日黎明。有厄魯特丹濟拉。率千許人來。截取馬羣。遂令侍讀學士殷扎納帶厄魯特名俄齊爾者前去。殷扎納與言我等係

聖朝使臣。不得無禮。又厄魯特俄齊爾。告以

聖上親來。將軍費揚古。亦下俄爾洪土喇而來。丹濟拉大駭失聲。遂領敕書收兵急去。○壬戌。偵知噶爾丹所在。

上躬率前鋒兵在前。諸軍繼次翼張而進。兵威之盛。彌山遍野。不見涯際。整齊嚴肅。肅然無聲。在途次。一等侍衛喀第由。遣人來奏。臣等奉旨前往阿思哈圖山探視。遇厄魯特數人。潛

窺我軍營壘。遙見我等倉皇逃遁。追至阿思哈圖山之東。遇巴克什。古爾貝勒等。共追逐之。

上笑曰。何必追逐。任其往報。亦足以破噶爾丹之膽也。○

駕至燕園庫列圖地方。將駐蹕地之水。侍衛兵什。率鄉導等過一平山。忽見泉源湧出。水極甘美。且充用有餘。

上大喜。亟往視閱。立營掘壕。遂駐蹕於西巴爾台。○中書阿必達等還。奏言。臣等進覲噶爾丹蹤跡。遇厄魯特二十餘人。謂臣等曰。聞

聖上親統大軍而來。乞暫緩師。噶爾丹在土喇往返須數日。

聖上敕書已連夜送往矣。請留一使於此。俟覆本到。以便齎回。

實錄卷百十三

七

并發哈什哈二人。護送至燕園庫列圖地方。

上復遣扎薩克喇嘛彭素克。格隆偕阿必達。往諭厄魯特。汝等欲我緩兵。我師在此地乏水。明日到克魯倫河。後當再緩行。是日。密諭各營安扎營壘如故。而營內悉撤去帳房。即

御營行帳幔城。亦俱不設。伏兵空壁以待。抵暮

上親巡視營伍。○陞太僕寺卿楊舒為內閣學士。兼禮部侍郎。○陞浙江溫處道佟國勳為江西按察使司按察使。○癸亥。

上以克魯倫河為噶爾丹必爭之地。乃分布隊伍。躬在前鋒前行。於途次。率數人登高執圓鏡遠望。見東有額爾德尼拖洛海山。西有山麓一帶。從已爾代哈。遙邇接河岸。隱見不甚明。

晰。

上諭科爾沁土謝圖親王沙津達爾漢親王班第喀爾喀車臣汗納木扎爾王西第西里貝勒益楚克貝子曰爾等各率爾屬下蒙古十許人往據西方巴爾代哈山麓高處俾作全軍從此經行之狀敵人來犯勿與之戰。誘之前來敵若有備則大兵爭先據河。○中書阿必達達撥什庫諾爾布還奏言臣等至克魯倫河厄魯特皆已去。視焉。○似適已二日。阿必達等仍追蹤前去。

駕抵克魯倫河。諭各隊領軍大臣曰。噶爾丹若據克魯倫河我兵奪河交戰。猶稍費力。今觀其不於此拒戰。而竟逃竄。是自

實錄卷一百三十三

八

開門戶以與我也。除此地外。他處斷不能拒我軍。審其情形必連夜逃遁矣。當輕騎急追之。是日

上駐蹕額爾德尼拖洛海地方。克魯倫布隆乃設哨卒。南向巴爾代哈北向塔爾幾爾濟。僧庫爾口。東向額爾德尼拖洛海。西向克魯倫河上流。內又立八旗防護。○前鋒統領碩鼐擒厄魯特至。言噶爾丹得釋回。四厄魯特問及黃幄布城網城進止。方信

聖駕親來。今日親至北方孟納爾山。遙望大兵隊伍行列規模。大驚。曰是兵從天而降耶。遂傳令衆人盡棄其廬帳器械逃去。

上命賜所擒厄魯特衣服。使撥什庫諾爾布追送與兩使臣。又遣喀瓦爾達往額爾德尼拖洛海探視有無賊寇。○甲子遣大學士伊桑阿祭克魯倫河之神。

上親率前鋒兵窮追噶爾丹。噶爾丹倉皇遁走。是後數日沿途大獲所遺器械帳房食用等物。是日距克魯倫布隆十八里地方駐蹕。○諭領侍衛內大臣等。今日據厄魯特降人言聞朕親率大兵四路並進。噶爾丹即行逃竄。朕若率綠旗步兵前進。則牽綴遲慢。今可揀選綠旗馬步會合大將軍費揚古向巴顏烏蘭追剿噶爾丹。其綠旗步兵應留大臣管轄。著隨後緩行前來。滿洲兵每旗留二十名。應派章京護軍校管轄。

實錄卷一百三十三

九

宣化府取來礮二十四門。亦著留下。漢軍礮十六門。能帶則盡帶往。若不能帶著。留礮一二門。所留之兵應派大臣一員統轄。克魯倫之克勒河朔地方。去此一百三十里。朕作二日程前行到彼。所留兵丁著作四日程前行到彼。撿鹿角兵有不能到者。著漢軍大臣等酌量調撥帶往前去。大學士伊桑阿等。隨將應派大臣職名入奏。得旨。內大臣阿密達著充將軍。副都統胡什已沙濟左副都御史阿山著為參謀。今從此分四日至克勒河朔。若有調遣者酌量趨行前來。○齎敕往諭噶爾丹。中書阿必達等還奏。臣等循克魯倫而上擒厄魯特庫濟。詢知噶爾丹往克勒河朔去。

上諭阿必達等爾以所擒庫濟為鄉導。齋教前往諭噶爾丹言。朕欲與爾約會而來。爾若不懼親身來議。否則於丹濟拉丹。津鄂木布。杜噶爾。阿喇布坦。內遣一二人前來定議。爾勿遁走。如或遁走。則事不能了。而爾與屬下人。俱致困斃。朕塞上居人。亦不得安矣。爾等追三日。如不能及。即回可也。敕文曰。朕以仁御宇內。養育羣生。惟禮義是尚。以祈天眷。是以昔曾發敕諭。盟議爾。又以生計極難。極窘。不能前赴為辭。於是朕一切待備。來至克魯倫河。欲與爾會盟。使之永安。度日抒我誠心。朕與爾親面定議。爾仍照舊職貢貿易。則爾下人得以寧居。而朕邊民亦得休息。朕斷不愚誑他人。爾勿疑懼。爾若

實錄卷三十一

十

疑懼。避去。則事無了期。而朕種種美意皆虛矣。近遣我使偕爾向日充使。朕所識認之人前往。令五日內遣回。特使齋賜爾銀幣。以公主長史多禪。及中書阿必達為使。不知爾國人受我使否。得至爾所否。朕使又不獲聞爾之言。是以又特遣扎薩克喇嘛彭素克格隆。仍以中書阿必達為使。朕今已到克魯倫河。爾其反覆熟籌之。或會盟。或另議。作速遣使來告。不則爾下人未必盡如爾心。爾未必安枕也。爾當細思。隨遣使來覆。朕用是抒撫恤之心。賞賚爾馬疲落後之令使之引導。遣至爾所特諭。以故靖海侯施琅子施世範。襲三等侯。乙丑。

上駐蹕扎克塞地方。○阿必達使撥什庫諾爾布還報。臣等到克勒河朔。見厄魯特下營處盡燬其廬帳。棄其什物而走。上復遣垂喇克扎木素格隆齋教往諭噶爾丹。敕曰。朕惟治道原期有益羣生。朕親統大兵。欲與爾共議俾羣生享其利益。故至此與爾相近處。兩次遣使。其到否未知。爾何竟無一次遣人來也。朕為天下大一統之主。不肯罔人而行。已經屢頒諭旨。爾仍不信。逃遁而去。兵仗器器盡皆拋棄。爾所屬之人乞降而來者甚多。爾生計迫蹙。朕所甚悉。爾前此無禮於朕。使朕皆置不問。將爾遺棄疾病之人。與來歸之人。盡皆收養。朕若存嗜殺之心。豈肯收養爾所屬之人。爾仍不信。遁去。

實錄卷三十一

十

今西路大兵已至巴顏烏爾。朕親統大兵至克魯倫河。黑龍江。盛京。寧古塔等處大兵皆會集於克魯倫河。又斷爾歸路之大兵亦已至厄嫩巴爾濟地方。爾即欲遁去。安可得乎。朕不忍生靈之塗炭。故復遣使前來。並不欲將爾剿滅。出自至誠。賜爾緞十疋。著大喇嘛垂喇克扎木素格隆為使前去。爾試反覆思之。若仍舊職貢而來歸順。可於丹濟喇丹。津鄂木布。杜噶爾。阿喇布坦。三人中速遣一人來。為此特諭。○丙寅。上駐蹕克勒河朔。○諭議政大臣等。噶爾丹遁狀甚急。今我選兵急追。將重礮留於此站。著阿塞達率兵駐扎克勒河朔。○陸浙江杭州城守副將藍瑗為福建金門總兵官。○丁卯。



上駐蹕拖訥阿林地方。○諭議政大臣等。噶爾丹逃竄已遠。沿途潰散。今應選兵裹糧躡踪追。官軍米糧所關甚重。兵丁所帶八十日口糧。日期將滿。于成龍所運米尚未到。若大兵前進。則距所運米太遠。回時糧餉必至窮匱。應使大兵迎糧而還。朕備有牛羊。斷然不致缺乏。西路大兵亦由中路來。料理糧務甚要。著議政大臣等議奏。又諭噶爾丹亡命奔逃。量已至巴顏烏蘭矣。若我全軍追趕。似不能及。應選兵輕騎追逐。除喀瓦爾達所領前鋒二百外。其餘前鋒盡行派出。滿洲火器營兵及親隨護軍亦盡派出。著追至巴顏烏蘭。遇巴顏烏蘭以北。不必前往。諸王等所屬之人。若自有二十日口糧。不用官糧者。亦令同往。其同回之兵。但留其至拖陵所需五日之糧。將餘糧著各旗大臣親驗給與前進兵丁。議政大臣等議噶爾丹震懾。

天威內自潰亂。亡命逃竄。應選兵追討之處。

上諭極為詳至。自應祇遵。得旨。依議。○命領侍衛內大臣馬思喀為平北大將軍。領兵追剿。都統巴渾德齊世護軍統領鄂克濟哈為參謀。都統杜思噶爾。石文英。王永興。噶爾瑪。李正。宗。護軍統領蘇丹。蘇昌。桑。邊。副都統達利。善。莫爾。澤。齊。蘭。布。係徵。灝。扎。刺。克。圖。雷。繼。尊。孫。渣。齊。費。仰。古。禪。移。布。喻。維。邦。已。賽。開。散。宗。室。哈。爾。薩。副。都。統。張。所。知。等。俱。隨。征。○戊辰。遣官

祭

關聖帝君。○奏

皇太后書曰。臣自出京。幾軍行在道。日惟訓習軍士。愛惜戰馬。周防哨瞭。申明賞罰。計程行四十日。可抵其處。因待伯費揚。古期會之。兵沿途駐師。不能如期而至。至於

上天仁愛。事事默垂眷佑。水泉乏絕之地。修爾清流沸湧。前克魯倫地。旱甚。草枯如冬。噶爾丹馬畜瘦斃。我兵甫至。而雨草遂茂。生來降之厄。魯特問我軍。云此地數日前青草曾無一莖。今何以忽焉而生。汝軍中誠有善於求雨者乎。又見我軍於河中捕魚。彼云。汝軍捕之。輒爾多獲。我等捕之一無所得。

於此見我等口祿絕矣。我軍追逐厄魯特。凡五日。見其所遺佛經帳房。所自殺婦人。稚子。及疾病之人。釜鬻。醃。具。網。罟。甲冑。鞍轡。衣服。食用。木器。並在釜之羹。在草之酪。盡其所有。貧窮度日之物。率皆委棄。其垂首鼠竄之狀。殊不堪觀矣。比問蒙古及喀爾喀等。如此捐棄逃竄。爾等視之以為何如。皆云。此不但棄其重物。雖輕物亦棄之。度日之資。咸盡矣。惟倉皇求生。並其所屬之人。皆不暇顧。又喀爾喀言。此即我等當日情形。我等叨蒙聖主恩養。得以有生。否則盡委溝壑矣。今噶爾丹誰復養。養必窮困盡絕而已。其言如此。臣觀之。果然。噶爾丹已經逃遁。料其斷不能復來。因灼見其情形。蹤跡如此。

遂酌遣將士窮追。往迎伯費揚古之軍。此行臣統大兵深合賊望風遁逃。全師凱旋。有誠大慶幸。至蒙古之性情地方之水草。兵法之宜守宜戰。宜招徠宜遣使。宜焚燬及斷其道路。防禦堵截。難易機宜。目所洞悉。身所經歷。咸已知之。自茲以後。亦甚易易矣。臣於六月初十日內。可至京師。臣此行乃國家福祉。

上天眷佑。為此不勝欣喜。悃切具奏以聞。

上班師。駐蹕克勒河朔地方。○是日清晨五色雲見。○諸王貝勒大臣等奏言。噶爾丹肆行暴虐。

皇上親統大軍出塞征討。一應調遣糧餉。營壘斥堠等事。俱煩

聖慮。籌畫周至。噶爾丹震悚。

天威。望風鼠竄。廟謨駿烈。超越往古。今日功成振旅。臣等請行慶賀禮。

上曰。朕自出師以來。惟欲前進。並不退却一步。或因駐蹕處稍有未妥。欲回數步。安設行帳。朕亦不允。今大將軍費揚古兵稍遑憩。亦將至巴顏烏闌。且所給兵糧日期將滿。六軍以糧餉為命。關係最要。凡此兵眾。俱屬朕多方保全至此。其中若有一二人艱於粒食。心實不忍。故一面以馬思哈為大將軍。將眾兵糧。湊足二十日給之。令其前討。扈從兵止留七日口糧。一面回軍至拖陵迎接糧餉。西路兵及兩路餉皆未如約。

而至。不稱朕心。朕猶有憾。諸大臣固請。又諭曰。朕預料噶爾

丹必遁。已密諭費揚古等截其歸路。今馬思喀兵又進。巴顏

烏闌兩路夾攻。噶爾丹料應難逃。大事已成。爾等欲稱賀良

是。但從征諸王大臣官員以及兵卒。皆欲在朕前効力奮勇

交戰。而不得一見敵以遂其意。於朕心猶覺歉然。噶爾丹雖

遁。必為伯費揚古馬思喀兵所大敗。捷音數日內即到。姑暫

俟之。○諭行在兵部侍郎阿爾拜著留此處。俟糧運到。目隨

平北大將軍馬思喀兵前往。○諭議政大臣等。朕明日起程。前途

水草不能容八旗。應與大將軍馬思喀為後勁之勢。著滿洲

兵各以四旗一日起行。其次著前鋒及八旗漢軍綠旗兵一

日起行。此兵著公長泰充將軍統領。學士高祝協理。凡伯費

揚古馬思喀奏章。著先開視再奏。朕所降旨亦著開視。機知

兩大將軍。應行事宜著酌量行之。○已已侍衛額林辰齋撫

遠大將軍伯費揚古疏至。言臣等欽遵諭旨。當即率大兵星

夜前進。但行程遙遠。馬匹少疲。而噶爾丹自布爾察克地方

以前十餘站盡焚有草之地。因另覓草地趨行。仍至於初三

日至土剌以擒噶爾丹之後。但祈

御駕稍緩。使臣得會師合剿。

上於途次聞之。喜諭眾大臣曰。朕統大兵窮追噶爾丹五日。若再前進。噶爾丹必成擒矣。因不得伯費揚古兵消息。手成龍

所運米又不善故遣馬思喀率兵往追。今伯費揚古於初三日至土喇則於朕本意相合。噶爾丹諒必不能竄去矣。

上駐蹕塔爾渾柴達木地方。○命內大臣明珠駐克勒河朔趙運糧餉給西路大兵。○以翰林院編修張瑗為四川鄉試正考官。戶部郎中陸鳴珂為副考官。翰林院檢討樊澤遠為廣東鄉試正考官。吏部郎中劉曾為副考官。翰林院編修吳昌為廣西鄉試正考官。禮部郎中曹貞吉為副考官。工科給事中党聲振為福建鄉試正考官。翰林院檢討王者臣為副考官。○庚午。

上駐蹕顧爾布喇克地方。○平北大將軍馬思喀奏報臣等十四日至巴顏烏蘭南十五里。過往哨之喀尼爾達攜尼魯特降人奔第來。言噶爾丹於特勒爾濟地方遇大將軍費揚古兵交戰。噶爾丹敗回。復列陣拒敵。我軍步戰而前。對壘之際見噶爾丹散亂奔竄之狀。我遂逃出來降。臣等率兵次於額格木爾地方。次日倍道前進。謹將投降奔第解送。得旨著作速機知京城。○辛未。諭大將軍伯費揚古爾於十三日擊敗厄魯特噶爾丹之事。據厄魯特降人奔第來告朕甚慰悅。

自五月初八日朕先士卒疾追五日。噶爾丹窘迫。拋棄器械。甲冑鎬釜帳房等物及羸病幼小。乘夜遁竄。朕親率大兵追至拖訥山。再欲往追。因爾各路兵會合不遠。兩軍既會。需米甚多。恐致缺乏。糧餉關係重大。量此窮寇。以爾兵自西而來。此處又發兵夾攻。即可剿滅。於是朕統大兵回迎糧米。以內大臣馬思喀為天將軍。授之大兵。奏給二十日糧。隨以帶來牛羊遣繼爾後。又遣運爾路兵糧。留內大臣明珠於克勒河朔地方料理。朕又給發馬駝充運糧之用。交與明珠。將見到米糧陸續運至爾軍。運到汎界米糧甚多。爾還師時。由朕所行之路而來。則米糧不致缺乏也。○諭議政大臣等。盛京烏喇黑龍江兵共六千名。內留黑龍江兵一千名。盛京兵一千名。著將軍薩布素副都統穆泰帶領駐紮岳爾濟山。直至七月。其餘兵丁令各回本處酌量其可至彼處之糧給發。其餘米糧盡撥給索岳爾濟山駐紮兵丁。○發革職侍郎思格色。至平北大將軍馬思喀軍前。以脩差遣。○平北大將軍馬思喀等奏報厄魯特察罕西達里哈什哈同丹已哈什哈帶百餘人來降。○予故內大臣阿爾迪祭葬。諡勤僖。○予故盛京工部侍郎傅德祭葬如例。○士申。

上駐蹕西拖陵地方。○喀爾喀多羅貝勒薩穆多爾濟故遣官致祭。○癸酉。

上駐蹕中拖陵地方。○先是十三日。上諭近御侍衛等曰。適朕心中似有先機。西路官兵今日必成功矣。至是捷報至。果於是日破噶爾丹。諸臣皆驚服。以為如

神○撫遠大將軍伯費揚古遣副都統阿南達奏疏言五月十三日臣軍正向昭莫多前進躡探之布達等至特勒爾濟口見厄魯特蹤跡遣人來報臣等即令署前鋒統領碩代副都統阿南達阿迪等率前鋒挑之因厄魯特勢衆碩代等且射且却誘至大軍將及昭莫多臣等令將軍孫思克率綠旗官兵居中京城西安滿洲漢軍官兵察哈爾諸扎薩克蒙古就東方山之高處右衛滿洲漢軍官兵大同總兵官康調元綠旗官兵喀爾喀扎薩克就西方沿河布陣謹遵

聖上預授之策令官兵皆步行噶爾丹率賊萬騎向前逆戰官兵奮勇自未至酉擊噶爾丹而大敗之分行追逐至特勒爾

平定縣志

大

濟口剿殺三十餘畧斬首二千餘級生擒百餘人俘獲子女駝馬牛羊兵器什物無算得旨嘉獎下部從優議敘○

上問阿南達交戰情形阿南達奏曰伯費揚古恐涉誇張故於疏內皆約畧言之其實交戰處斬賊三千餘級其餘被剿逃竄死於山谷中者屍骸枕藉生獲數百人殺噶爾丹之妻阿奴及賊之渠首甚衆惟噶爾丹引數騎逃出其零星逃散之賊投降大將軍馬思喀者千餘人據降人言噶爾丹適時部衆多出怨言噶爾丹云我初不欲來克魯倫地方為達賴喇嘛煽惑而來是達賴喇嘛陷我我又陷爾衆人矣

上問曰西路大兵若如前約於四月二十四日至王喇三十七

日至巴顏烏闌則更當何如阿南達奏曰誠若是則賊無一得脫矣

上顧諸大臣曰師行絕域即奏膚功皆

上天眷佑應先行叩謝乃於行宮南門外設香案親率諸皇子王大臣官員及外藩王行禮大學士伊桑阿張玉書恭捧諸王大臣文武官員慶賀表入奏

上曰朕為中外生民之主綏輯海宇愛養元元惟以率土乂安為念厄魯特噶爾丹擾亂邊塞心懷狡謀逆天虐民不容不行剿滅朕親率大軍遠出塞外聲討有罪噶爾丹聞風遁走希圖倖脫適與西路大兵相遇大將軍伯費揚古等奮勇力

平定縣志

大

戰大敗賊衆擒斬無算盡復其人口牲畜從此邊境寧謐不煩遠事征討四海蒼生可共享昇平之福朕心深切喜悅於是諸皇子在慢城內諸王及文武大小官員外藩王台吉在慢城外行慶賀禮○奏

皇太后書曰臣君臨萬邦撫御天下於茲三十餘年數經擾亂俱已削平惟噶爾丹自烏闌布通遁逃以來悖棄誓言搖動外藩此賊一日不滅則邊陲一日不寧是以前後周悉思繼不憚一身勞苦大漠沙磧多方跋涉自古迄今軍旅未行之路冒遠徂征出其不意以此強寇肝膽為之破裂不戰而逃臣竊追五日見其沿途將所用器物盡皆棄去已經遠去更

欲前追。以軍糧漸至短少。再四籌度。徒勞師衆。故度量敵人蹤跡。遣兵進追。於所遣兵補給二十日口糧。班師而還。業經馳奏以聞。荷蒙

上天垂眷。俯協人心。大將軍伯費揚古之兵。適至戰於特勒爾濟地方。剿殺噶爾丹賊衆子女。駝馬牛羊。盡皆俘獲。厄魯特今已殄滅矣。臣不獲定省

慈安。奉侍左右者凡八十日。盡剿賊衆。奏凱而旋。於六月初十內。可以抵京。此皆

上天默佑。凡在師中人等。罔不踴躍歡欣。臣之福慶駢集。所向有成。臣誠不自知也。不勝懇切屏營之至。謹具奏聞。○諭領

實錄卷一百三十三

辛

侍衛內大臣大學士等。爾等移文陝西總督巡撫提督總兵官等。將邊外邊內之多巴。西喇固爾等處。凡有噶爾丹所屬之人。即行收取。尚書圖納習知地勢者。會同料理。○甲戌

上駐蹕察罕布喇克地方。○諭理藩院。在後喀爾喀蒙古兵俱令散歸本地。至秋月赴京敘功。○諭八旗大臣。爾等皆朕簡用之人。今噶爾丹不能抗威。聞風而遁。諸大臣雖不得與戰。惟約束官兵。不擾沿途居民。不飲酒。不妄行搶奪。善飼馬畜。就水草小心牧放。不盜刈田禾。以飼牲畜。不踐踏田禾。不遺一人一騎。全使到家。此即爾等之効力也。如肆行搶奪。遺留人馬。事發斷不輕恕。○又諭天時炎熱。應令厄魯特降人暫居

實錄卷一百三十三

壬

張家口外。俟丹巴哈什哈等家口到後。酌給牛羊鍋帳等物。交侍郎西拉加意照管。○諭行在兵部。皇長子允禔著留中。拖陵料理賞兵事務。彼處所留大臣甚少。著公長泰侍郎常綬學士嵩祺前來協理。○先是以僧庫爾塔爾幾爾濟地方。恐有兇警。遣侍衛十五人護軍三十人赴內大臣明珠所以探聲息。至是以噶爾丹既敗。撤明珠酌留數人。餘俱撤回。○諭行在兵部。大軍運糧事關緊要。初在京與于成龍議定。八十日內。用兵丁自備之糧八十日外。用伊所運之米。著伊運至土喇。以備進剿之需。後將兵丁自備八十日口糧內。又減留二十日口糧之時。伊曾奏云。今兵丁只餘六十日口糧。食完即用臣所運米車輛。必不能至。朕即令駱駝首領郝尚圖等將減留二十日口糧。分載運至補給兵丁。今八十日期滿。于成龍等糧米。不但未運至土喇。雖免魯倫未到顆粒。已經著于成龍作速運米七十石前來。伊止將米一千餘石運到拖陵。今著作速移。各催其趨運前來。若不行速運。則于成龍等於遲誤軍需中。又加遲誤矣。○乙亥

上駐蹕西巴爾台地方。○丙子。夏至。祭地於

方澤。遣皇太子允初行禮。○

上駐蹕席喇布里圖地方。○留牧汎界蒙古王等行慶賀禮。

上諭曰爾等意中曾料朕此行可直抵克魯倫立奏大功而還如是之速乎朕尊為天子富有四海此番出征朕日食一餐夙興夜寐櫛風沐雨每至一處朕皆步行及聞噶爾丹確信朕親率前鋒窮追凡此持欲速滅先寇使爾等咸得安生故耳今噶爾丹已滅不但爾等永無侵擾之虞得享昇平之樂朕亦不復為爾憂勞矣諸蒙古王等跪奏云

皇上念我外藩蒙古不辭勞苦七日之內立奏膚功誠世所罕有功德如此誰不傾心歸服

上曰爾等於引路探信投馬掘井諸事甚為効力誠屬可嘉朕必重加賞賚朕首以汎界之內視為一家今土喇克魯倫以內皆為一家矣○丁丑

上駐蹕烏喇爾幾地方○諭領侍衛內大臣大學士等速行文撫遠大將軍伯費揚古平北大將軍馬思喀著徧諭我兵及扎薩克蒙古喀爾喀善巴王等王貝勒貝子所屬人並投誠厄魯特等將達賴喇嘛班禪胡土克圖第巴交通噶爾丹之文或唐古特字或蒙古字俱查明收取交一曉事賢能官作速馳驛送至御營事件不可遺漏○等故輔國公蒲昌祭葬如例○諭行在兵部著留運到米一百石於席喇布里圖俟大兵到時散給兵丁○戊寅

上駐蹕蘇德圖地方○諭行在兵部自喀喇芒鼎以前其草甚

實錄卷十三

五

茂著諭後營大臣疲乏馬匹不可遺棄須從容牧養務令前到步行僕從必加意撫恤勿遺一人前令步行僕從所到驛站給與飯食今朕回鑾途過僕從人等問之驛站並不給飯著傳諭各驛站自此以後若遇步行僕從務酌量給米遣發至交與疲乏馬匹必揀水草佳處牧放回時交還本主留皇長子允禔於大兵後沿途稽察如有違誤察出定行正法決不寬恕○諭議政大臣等給散在後二路大兵米糧關係緊急著于成龍駐拖陵喀拜駐蘇德圖李錫駐拖陵蘇德圖之間應付大兵米糧其纔到拖陵之米著暫留拖陵前路若有取用候明珠移文運往其未至拖陵之米隨所到之地即行

留貯其未出汎界之米亦隨處留貯俟大兵回時沿途應付其已出汎界未出汎界之米除應給大兵外所餘者運至一緊要處或賑濟窮蒙古或別有取用再行定奪○己卯

上駐蹕科圖地方○諭領侍衛內大臣等駐扎歸化城安郡王馬爾渾等著往愛必罕西刺穆倫之汎界於大兵進汎界之前暫行駐扎如有厄魯特逃竄投降者令其收取安郡王等如有用兵處可酌調附近蒙古兵如無用處不必調遣○賜隨征喀爾喀車臣汗吳默赫金幣扎薩克等白金有差○命公長泰回京○庚辰

上駐蹕塔爾奇喇地方○賜留牧蒙古諸王貝勒貝子台吉等

實錄卷十三

五



宴及白金○喀爾喀妻子老幼齊集行宮東門叩謝再造之恩

上諭曰朕君臨天下統御萬邦本無分於內外即絕域荒陬皆吾赤子一體眷念厄魯特噶爾丹逆天肆虐恃強陵弱擄掠喀爾喀等國朕不辭勞瘁親統大兵征伐剿滅今厄魯特之禍靖則朔方永清矣爾七旗喀爾喀自今以後各自樂業圖報國恩以副朕家視天下至意隨命原封貝子伊爾登濟農達禮等以次入幔城進見眾皆叩頭歡呼萬歲復賜茶及宴賞銀幣衣服有差自是以後至獨石口皆依此例每日貝勒貝子台吉等來行宮外慶賀朝謁貢獻駝馬牛羊不可數計

實錄卷一百一十三

帝

計。

駕行時男婦老幼拜跪路旁迎獻酒漿酥酪沿途環擁歡聲徧野○諭皇長子允禔將散給軍糧事務文明珠手成龍辦理允禔即自中拖陵啟行回京○辛巳

上駐蹕和爾和地方○壬午

上駐蹕蘇勒圖地方○喀爾喀土謝圖汗澤卜尊丹巴胡土克圖等慶賀剿滅噶爾丹謝恩

上召入行宮撫慰之各賜白金有差○癸未

上駐蹕察罕諾爾地方○賜阿霸垓蘇尼特等各旗分修道鑿井監牧人員白金有差○諭侍郎安布祿等手成龍所運麥

已過察罕諾爾者著撥給後隊官兵餘俱載回察罕諾爾地方其未至察罕諾爾及和爾博以南驛站所留之麥亦令運至察罕諾爾地方著于成龍等謹慎收貯察罕諾爾地方去阿霸垓蘇尼特甚近量派此六旗官兵看守○撫遠大將軍伯費揚古平北大將軍馬思喀疏言五月二十一日副都統阿南達傳

上諭西路糧餉未至軍前朕深切軫念爾等會議具奏臣等於噶爾丹大敗之後即撥察哈爾兵一百名遣往翁金倘遇有散行之厄魯特即行擒剿并移文看守翁金米糧之西安副都統西爾哈達與運糧侍郎王國昌等令加意防守二十二

實錄卷一百一十三

主

日光祿寺卿辛寶等所送米糧已到軍前其留翁金之麥辛寶等送往納喇特地方矣又臣於二十一日已遣喀爾喀貴都崙博碩克圖多羅郡王滾布下色爾濟等十人齎

上諭送齊思布忒克木齊克等處尋覓根數戴青去矣疏入命示議政大臣○甲申

上駐蹕噶爾圖地方○平故漢軍副都統姚儀祭葬如例



大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十三

實錄卷一百七十三

素

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十四

康熙三十五年丙子六月乙酉朔

上駐蹕昂幾爾圖地方。命理藩院檄青海薩楚墨爾根台吉  
等諭以噶爾丹敗逃及達賴喇嘛已死九年第已匿之。假其  
言誑誘噶爾丹作亂之故。令探聽噶爾丹聲息。倘彼西來即  
行擒解至噶爾丹女嫁於博碩克圖濟農之子并噶爾丹之  
人在青海者悉令執送。○內大臣明珠等奏臣等於多羅特  
地方遇西路大兵將運到米五百石。麪七千觔給之。奏入。報  
聞。○諭戶部工部天氣炎熱官兵進口時沿途應備冰水梅  
湯香薷湯以供衆人之飲。爾二部派官員速行料理。○丙戌  
上駐蹕揆宿布拉克地方。○丁亥  
上駐蹕滾諾爾地方。○戊子  
上駐蹕諾海河朔地方。○是日皇太子允初大學士阿蘭泰戶  
部尚書馬齊禮部尚書佛倫迎  
駕。○己丑

上駐蹕獨石口。○奏

皇太后書曰。臣違

聖母定省日久。惓切之忱。靡間時刻。遠塞徂征。荷天篤祐。誕奏  
成功。凱旋已於初五日進邊口。於沿途見蒙古生計。阿霸璘

蘇尼特等旗駱駝皆健馬匹較少牛羊饒裕。察哈爾八旗御牧地方較前頗覺殷富。我上都馬羣因途次經過臣咸視之。甚覺充盛。孽息今年塞草蕃廩。牲畜肥碩。湏酒乳酪家充。牧途中所進獻駝馬牛羊不可勝用。從軍之馬皆壯故大半遣留於口外馬羣。每日來迎於道旁者男婦幼穉約畧一二千人。臣旋鑣甚速。其追隨不及者且將隨至京師。途間趨迎拜舞者無算。口內禾苗暢茂。為此謹具奏聞。○諭大學士伊桑阿朕進獨石口。見今年麥禾俱盛。恐大兵陸續歸時或致踐踏。或偷盜喂馬。今將獨石口至懷來縣交付侍郎多奇。自懷來縣至京城。交付郎馬爾漢。及隨行部院官等率地方官沿途巡察。如有踐踏田禾偷取喂馬者立拿參奏。如有縱徇必以軍法從事。○庚寅。

上駐蹕鵲鴉堡。○辛卯。

上駐蹕懷來縣。○命大學士阿蘭泰尚書馬齊佛倫先回京師。○壬辰。

上駐蹕清河。○命皇太子允初先回京師。○癸巳。

駕發清河。設鹵簿。皇太子諸皇子諸王及在京文武大小官員出郭外五里道旁跪迎。八旗護軍驍騎步軍及近京閒散官員士民工商耆老男婦夾道捧香跪迎。上由德勝門入詣。

堂子行禮畢。回宮詣

皇太后宮問安。○甲午。以蕩平噶爾丹主以下文武各官行慶賀禮。○諭領侍衛內大臣等喀爾喀郡王善巴曾奏噶爾丹不可使久據克魯倫地方。應速征剿。此次用師善巴盡所有馬匹供我軍騎乘。甚著勞績。殊可嘉獎。貝子益楚克聞慙都逃遁。即遣人追捕。此次用兵。凡擒活口。偵賊信。亦懋著勤勞。應將伊等敘功。以示激勸。議政諸臣會議具奏。尋議覆郡王善巴應授為親王。貝子益楚克應授為郡王。從之。○乙未。

上奉

皇太后幸暢春園。○安郡王馬爾渾疏言奉旨於本月初五日。

赴愛必罕西喇穆倫汎界地方。以土默特兵交土默特都統阿必達等具隨來宣化府等處綠旗步兵千名交原領都司陳福等在歸化城候旨。

上命綠旗兵歸本汛。○諭大學士等此番出征地方形勢守亦可戰亦可。但得天時甚難。兵早出則天寒無草。乏水兵不能行。遲出則天暑雨水多。倘連日霪雨則樵採不敷。必致窘乏。此番兵出過無水之地而得水無草之地而草生寒暑俱調。此特

上天眷佑。故滅寇而成大功。並非人力之所能也。其以是傳諭九卿。○又諭朕茲出師見察哈爾之軍人皆壯健。効力為最。

其護軍每月應加餉一兩。至四十九旗士卒連年出征巡哨往返勞苦。每兵一名歲以六兩為率。給與三年。○副都統阿南達奏言。閭降人言噶爾丹逃向何方。知之不明。丹濟拉丹津鄂木布會丹津阿拉布坦於博羅之地。不久即別。率其屬下百餘人。往覓噶爾丹。丹津阿拉布坦率其屬下五百餘人。順博羅河下流而去。我等俱自彼地來。聞滾占之妻率其屬下人。從慙山南渡土喇河。溯塞稜河道走。其內自亂。伊德順柯爾寨桑等叛而內來。滾占之妻率兵與戰。伊德順柯爾寨桑敗。又噶爾丹所設尾後兵。明吾特布喇特兩處千許人。正當噶爾丹敗亂之時。見丹津阿拉布坦屬下人。婦孺從特勒爾濟口向博羅河而走。此千許人。追及之。奪其畜產。婦孺子中之佳者。往投喀爾喀。和托輝特之根敦藏青而去。

實錄卷一百一十五

四

上以示議政諸大臣。○諭大學士等。軍士所乘出征馬匹。到時監收。仍給錢糧。照常飼養。缺者。毋令按補。每佐領駱駝二隻。馬或二十匹。或三十匹。定數飼養。凡有軍事。可供需用。為益良多。至內殿發與騎乘之馬。到時亦俱交送內殿。隱匿不交者。亦或有之。著各都統嚴察。令其盡數送入。○撫遠大將軍伯費揚古疏言。五月二十三日。內大臣明珠等。送到米一百七十餘石。麩七千觔。於多羅特地方。均給兵丁。二十六日。臣至拖訥明珠等。續運到米八百七十餘石。給右衛及陝西寧

夏。大同。發回官兵。俟至納喇特將西路運到之米。支取口糧。各赴本汛。六月初一日。臣至克勒河朔。以克勒河朔之米一千二百餘石。計京城官兵及赴京之西安寧夏官兵及厄魯特降人口數。均給十五日米。訖。

上諭議政大臣等。伯費揚古奏。稱右衛及寧夏兵。自拖訥遣回。納喇特。未報西路之米。已到何地。著御史鍾申。保連湖灘河朔之米。前往迎之。丙申。

上詣

皇太后宮問安。○丁酉。振武將軍孫思克。奏言。奉命召臣來京。續又令西安官兵綠旗官兵赴京安息。臣與將軍博靈會商。

實錄卷一百一十五

五

以牲口疲瘦。京城距肅州遙遠。空勞往返。今將軍博靈等酌帶滿洲漢軍兵五百名。臣與總兵官潘育龍等酌帶綠旗兵五百四十五名。隨大將軍一齊赴京外。餘悉由歸化城一路入邊。各自遣歸本汛。又官兵及僕從在克魯倫一帶沿途地方蒙

皇上屢次加恩。賞給口糧。俱叩頭謝恩。得旨。運送西路米石未。到。恐大兵乏食。朕心深切軫慮。預先籌畫。將中路所運之米。迎至拖訥山。量兵丁所用撥給。今據奏。知兵丁得食。不致匱乏。朕心始寬慰矣。○吏部議奏。大學士伊桑阿。理兵部事。未預嚴飭坐臺官阿林。看護馬匹。致多倒斃。又不劾奏懲治。應革

職得旨伊桑阿著降三級從寬免革職○戊戌先是

上遣大理寺卿貝和諾往漕河封聞蓄水放糧艘抵通較速於  
昔至是貝和諾還奏

上曰濟寧以南各閘止賴一嶧山湖之水以濟其流豈可令其

啟閉不時耶此法既於漕運有益著每歲遣官行之○己亥

轉戶部右侍郎阿爾拜為左侍郎陞內閣學士陶岱為戶部

右侍郎○都察院左都御史蔣弘道以日疾乞解任允之○

陞鑲紅旗滿洲副都統孫渣齊為護軍統領○命停止本年

朝審秋審○庚子諭議政大臣曰薩布素兒領兵駐索岳爾

濟地方軍中所備之米扣至七月初五日為止今不預為籌

實錄卷一百七十四

六

度兵丁必致乏糧○盛京兵千名著遣回薩布素攜來兵千名

科圖地方有見貯米可至此駐防偵探著侍讀學士伊道隨

將軍薩布素往○以右春坊右中允索佑為浙江鄉試正考

官吏部主事唐孫華為副考官翰林院編修郝士鈞為江西

鄉試正考官戶部郎中陸德元為副考官翰林院編修姚士

鼎為湖廣鄉試正考官戶部郎中趙之隨為副考官○辛丑

援鄉導萬舒克博羅扎卜達濟桑阿伊魯爾圖索諾木馬哈

杜喇爾等為達爾漢○督運左都御史于成龍奏言臣奉旨

與內大臣明珠同在拖陵給平北大將軍馬思喀撫遠大將

軍伯費揚古官兵及土默特蒙古尼魯特降人口糧俱照人

數散給臣等於六月初九日自拖陵起行帶回餘米一千六  
百一十三石向察罕諾爾報聞○壬寅

上詣

皇太后宮問安○癸卯轉兵部右侍郎馬爾漢為左侍郎陞內

閣學士嵩祝為兵部右侍郎○以原任兵部左侍郎朱都納

為內閣學士兼禮部侍郎○以吏部左侍郎常書為翰林院

掌院學士刑部右侍郎尹泰為詹事府詹事俱仍帶侍郎品

級○以湖廣施南故宣撫司覃懋榮姪孫龍光襲職○辛

故正藍旗一等精奇尼哈番索諾慕察察葬如例○丙午先是

上遣侍讀學士喇錫傳諭大將軍伯費揚古曰科圖地方水草

實錄卷一百七十五

七

佳美伯費揚古兵到科圖後當暫駐守至是伯費揚古報遵

旨率官兵於六月十九日已到科圖

上諭議政大臣等近日諭將軍薩布素率兵千人往科圖駐扎

今伯費揚古疏但言奉旨已到科圖其兵數及投誠俘獲今

綠旗兵并子成龍之米作何截留之處並未明晰况阿爾薩

蘭衛塞桑進追噶爾丹喇錫又率車陵扎卜之兵五百進而

追之至遣回綠旗兵西安滿兵席爾哈達兵連米之車若何

寧夏官員未嘗一報著將軍舒恕侍郎滿丕乘驛速赴歸化

城將伊等遣回之兵席爾哈達等率領留駐翁金之兵已到

何地米得接濟與否查明具奏伯費揚古候措置諸事已畢

薩布素到科圖後。著令回京。○丁未。侍郎西拉等奏言。厄魯特降人丹巴哈什。哈察罕。西達里。哈什哈等。一百六十一口。到張家口外十八里臺地方居住。丹巴哈什等言。願得赴京。以供道路灑掃之役。

上曰。著諭丹巴哈什。哈爾等。雖係降人。俱有用之材。今天時炎熱。不宜入京。爾等姑在口外。俟以後軍中所解降人。俱到之日。當另有諭旨。又丹巴哈什等。無衣服鋪蓋。著於張家口。章京何芳處支領。○已酉。

上諭

皇太后宮問安。○諭議政大臣等。副都統兼長史穆森。薩克七

實錄卷一百一

八

子在鑲黃旗軍中。倨傲作勢。奏請已給兵丁之米。令伊執事人員支取。皇子日用之物。俱遲誤不給。其副都統長史職俱革去。○庚戌。調西安副都統巴麟。為鑲紅旗滿洲副都統。○賞奉差偵探蒙古布昂有美。○辛亥。理藩院奏言。據大將軍伯費揚古咨稱。前奉旨時方炎熱。著厄魯特降人。暫居張家口外。即遵旨將回國王阿卜都里什特尼魯特。台吉塞冷。扎卜。米塞桑等。共八百九十八名。交付土默特副都統阿迪。阿毓璽。撥官兵防護。送往張家口。侍郎西拉處。查厄魯特降人。既俟秋涼。安插善地。其押送官兵。應暫駐防守。俟安插後。回京。此項官兵。及厄魯特降人口糧。應交戶部。將張家口所

有之米撥給。從之。○諭禮部原任領侍衛內大臣一等公噶布喇之女何舍里氏。選入宮中。未經冊封。倏以疾逝。良用軫惻。今追封為平妃。應行禮儀。爾部察例議奏。○以翰林院檢討潘宗洛。為陝西鄉試正考官。刑部郎中劉體元。為副考官。翰林院檢討張明先。為江南鄉試正考官。戶科給事中呂振為副考官。○以故正白旗三等阿思哈尼哈番薩賴親兄三等侍衛薩哈查襲職。○壬子。轉吏部右侍郎安布祿。為左侍郎。調戶部左侍郎阿爾拜。為吏部左侍郎。魯右侍郎事。轉戶部右侍郎陶岱。為左侍郎。調盛京禮部侍郎庸愛。為戶部右侍郎。陞都察院左副都御史阿山。為盛京禮部侍郎。○陞湖

實錄卷一百一

九

廣總督吳璥。為都察院左都御史。○調江南提督張時。為福建水師提督。福建陸路提督張雲翼。為江南提督。○癸丑。調鑲白旗蒙古副都統喀佳。為本旗滿洲副都統。陞前鋒參領圖席布。為鑲白旗蒙古副都統。○皇長子允禔。遵諭自中拖陵。回至京師。○達賴喇嘛使人戈尼爾羅卜。臧帕克。已格隆等。奉諭自西寧至京。

上命領侍衛內大臣索額圖。大學士伊桑阿。傳諭曰。噶爾丹敗於烏闌布通。遁走之時。首頂威靈佛像。設誓云。不但望上屬下人民。即喀爾喀降人以外。再不敢復犯矣。去年又背誓至克魯倫地方。殘害喀爾喀。掠我降人。納木扎爾陀音。於是朕

親統大軍往討。噶爾丹懼而奔遁。適遇我防禦之兵。誅殺過當。噶爾丹率數人逃竄。餘者盡降。厄魯特遂滅。厄魯特降人告曰。達賴喇嘛久已脫縑矣。天下蒙古皆尊奉達賴喇嘛。如達賴喇嘛身故。理宜報聞諸護法主。以班禪王喇嘛之教。繼宗喀巴之道法。乃匿達賴喇嘛之喪。指達賴喇嘛之名。唆誘噶爾丹。朕屢遣使問之。第已皆不使與達賴喇嘛相見。偽居高樓之上。以示之。第已原係達賴喇嘛下管事人。朕優擢之。封為土伯特國王。乃陽奉宗喀巴之道法。陰與噶爾丹比。欺達賴喇嘛。班禪而壞宗喀巴之法。前遣濟隆胡土克圖至噶爾丹所。為噶爾丹誦經選擇戰日。朕為衆生往召班禪。沮而不遣。朕無責達賴喇嘛。達賴汗青海諸台吉之意。朕今遣使於達賴喇嘛。果達賴喇嘛尚在。則面見朕使。臣曉諭噶爾丹。遵朕旨行。朕凡事俱畧無介意。若仍誑我使人。不令相見。斷不輕止。至噶爾丹之誓濟隆胡土克圖等。見在其地。問之。豈有謬乎。今將遣使往彼。其來人或欲全歸。或欲數人先歸。爾等可詢明。隨其意遣之。○以寧古塔將軍佟寶所屬兵丁糧餉缺乏。未先奏聞。命革職。

秋七月乙卯朔。享。

太廟。遣領侍衛內大臣公舅舅佟國維行禮。○陞內閣學士綏色為刑部右侍郎。○丙辰。

上詣

皇太后宮問安。先是。

上諭總督倉場侍郎德珠等。通州至大通橋。開河向無民船往來。今應令小舟泛載於民。殊有利濟。著議奏以聞。至是。總督倉場侍郎德珠。右文桂遵旨。有通州至京城河道繪圖呈覽。上問曰。五處開口行船。有便於民否。德珠。右文桂奏曰。初奉旨時。臣等恐於運米有誤。今運丁及商人。互為推挽。甚是兩便。百姓各造小船。將通州貨物運至京師。甚易。而雨水時往來。行人亦便。皆感激。

皇恩。名其船曰便民。非臣等思慮所能及也。○

上召議政大臣滿漢大學士尚書侍郎學士等。示以北征機宜。諸臣敬閱畢。奏曰。噶爾丹窮荒巨寇。煽惑羣心。

皇上為中外生民計。親統六師。遠涉絕漠。

睿謨神算。百日之內。遂奏凱旋。開闢以來。勘定之畧。成功之速。

未有如我。

皇上者也。翰林院掌院學士常書張英奏曰。

皇上廟謨豫定。至後無不稔合。功德崇峻。美不勝書。伏讀。

御製前後次序。備極周詳。無非典謨訓誥。伏乞。

皇上將所紀載。俯賜臣等。俾得敬慎編摩。無諸簡冊。洵為億萬年之盛事也。



上允之○平故護軍統領阿爾法。祭葬如例○先是岳喇克扎木索格降。齎敕追授噶爾丹。至土喇噶爾丹已敗遁。岳喇克扎木索格降往副都統阿南達所求為代奏。至是隨大將軍馬思喀兵回京。得旨此喇嘛差往噶爾丹不到而回。著拘禁○丁巳。陞內閣侍讀學士哈山為內閣學士兼禮部侍郎○戊午。命內閣翰林院修平定朔漢方畧○侍郎西拉泰臣遵旨問降人丹巴哈什哈噶爾丹當往何處。丹巴哈什哈等曰我等以為噶爾丹必往投達賴喇嘛。所以不他往者。昔鄂齊爾圖車臣汗之子噶爾旦木巴之女阿海原與策妄阿喇布坦議婚。噶爾丹自取之。又殺策妄阿喇布坦之弟索諾木喇布坦。策妄阿喇布坦因率兵五千而逃。後噶爾丹往烏蘭布通策妄阿喇布坦。盡收噶爾丹之妻子人民而去。是策妄阿喇布坦所不可往也。若圖爾胡特之阿玉奇所。有仇人鄂齊爾圖車臣汗之弟在。道既遠。而阿玉奇之女又嫁策妄阿喇布坦。是阿玉奇所亦不可往也。噶爾丹與鄂羅斯差人貿易而已。原不相好。往鄂羅斯之路。有洪郭壘及罕二道。罕之路有明安特。忒稜古特諸人存俱係仇人。是鄂羅斯亦不可往也。噶爾丹向達賴喇嘛之去路。哈密雖係仇人。有噶爾丹屬下回子在。青海左側。有番子二千家在。青海諸台吉亦不沮之。如得到達賴喇嘛地方。則噶爾丹與第巴甚好。且噶爾

丹於為喇嘛時。居班禪胡土克圖所。謂唐古特國之托卜察一城人。乃噶爾丹前生尹咱胡土克圖時之徒也。故使為屬下有征賦之人在。沿途可得馬匹糗糧而無沮之之人。丹濟拉丹津鄂木布如與噶爾丹同在一處。斷不相離。必偕往達賴喇嘛處。

聖上今遣人率兵追討噶爾丹。但收離散者問之。自得噶爾丹去向實音。報聞○陞河南巡撫李輝祖為湖廣總督○陞都察院左副都御史席密圖為兵部督捕左侍郎。大理寺卿貝和諾為都察院左副都御史○陞鑲藍旗參領馬雲霄為西安副都統○已未。理藩院奏喀爾喀伊爾登卓禮克圖之子賓圖等。屢請從軍。遠延不赴。誑詐之罪殊為可惡。應將賓圖等四台吉及獨石口外所在三百五十二口。俱交內務府發辛者庫當差。

上免其內務府當差。查下五旗察哈爾丁壯缺少者。編附佐領著令披甲○庚申。諭戶部。朕親征時。爾宣化府牧養三旗駝馬所需草豆甚急。皆先派龍門赤城蔚州百姓供用。後給價值。恐小民不能如數支領。著該撫委地方賢能官查明照價估給。務令小民得沾實惠。以副朕撫恤至意。此地百姓供應軍需。修治道路。勞苦可憫。俟冬間當免其來年之賦○辛酉。以理藩院尚書班迪為鑲黃旗領侍衛內大臣。仍兼管理藩



院尚書事。○癸亥。命將王國昌等運到汎界餘米四千一百石零。除給與運往人員回日口糧外。餘悉賞給王善巴等七旗兵丁。○命督運都察院左都御史于成龍。通政使司左通政喀拜。留汎界。散給兵丁糧餉。兵部督捕右侍郎李綱。回京理事。○賞兩烏朱穆泰。克西克騰。坐塘人員銀兩有差。○命送降人厄魯特。綽克圖。巴圖爾。唐古特。寨桑等一百七十六人。至張家口外。與丹巴哈什。哈一同安插。○廣八旗滿洲蒙古漢軍。直隸各省鄉試解額。滿洲蒙古四名。漢軍二名。順天生員十七名。南北監生十四名。江南二十名。浙江湖廣福建各十七名。河南十五名。山西陝西各十三名。江西十八名。山東廣東四川各十四名。廣西十名。○陞大理寺少卿哈雅爾圖為內閣學士兼禮部侍郎。○陞河南布政使李國亮為河南巡撫。○以通政使司通政使莫里普。奉差寧夏。不能辦事。命革職。○甲子。

孝懿皇后忌辰。遣官祭

陵。○諭署理藩院事戶部尚書馬齊。噶爾丹為我大兵擊敗。今已無所往矣。阿南達見在西寧。應令率巴圖爾。額爾克濟農之兵。駐劄布隆吉爾等處堵禦。如得噶爾丹父子實音。即擒而誅之。可速撥行。○丁卯

上詣

皇太后宮問安。○戊辰。陞詹事府少詹事努赫為都察院左副都御史。內閣侍讀學士布福納為大理寺卿。盛京兵部理事官黃茂為通政使司通政使。○調四川提督吳英為福建陸路提督。陞直隸天津總兵官兵昇龍為四川提督。○己巳。中元節。遣官祭

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。○陞寧古塔副都統沙納海為寧古塔將軍。○禮部議覆國子監祭酒孫岳頌疏言。

皇上親統六師。刻期勦滅噶爾丹。請昭告文廟。勒石太學。應如所請。遣大臣一員。詣文廟祭告成功。

皇上一切討謨。勝算允宜。纂述大綱。勒石國學。史將碑文。摹搨頒發各省學宮。報聞。○辛未。以翰林院編修楊中訥為河南鄉試正考官。兵科給事中戴璠為副考官。○壬申。理藩院奏副都統阿南達咨稱。奉旨令阿南達率巴圖爾。額爾克濟農

之兵駐扎額濟內。古喇泰昆都倫布隆吉爾等處偵探噶爾丹父子聲息。但昆都倫布隆吉爾兩間相去有千餘里。已圖爾額爾克濟農兵少。恐難擒噶爾丹。乞面請訓旨。欽遵而行。得旨。向者伯費揚古阿南達所奏。俱云噶爾丹所率不及三十人。逃入林中。故令阿南達率已圖爾額爾克濟農兵。以禦其往投青海。今竟與原奏不合。阿南達不必來請訓旨。著即遵前諭速往。○甲戌。命運翁金所貯米。至大將軍伯費揚古軍前。○以喀爾喀王納木扎爾長史庫濟根。主益楚克護衛穆扎哈爾。奉差偵探軍功。授為拖沙喇哈番。賜號達爾漢。○命徹克爾。揮河留駐科爾沁等十旗蒙古兵。各歸部落。○陞

實錄卷五

七

雲南按察使佟世雍。為河南布政使司布政使。○撫遠大將軍伯費揚古疏報。右衛西安寧夏兵歸時。正在乏糧之際。蒙皇上豫先善畫。特遣御史鍾申保。迎之以米。始得飽餐。歡聲動地。報聞。○命釋喇嘛。垂喇克扎木素。格隆於獄。○彭素克格隆。齋敕往諭噶爾丹回奏。臣與中書阿必達。於五月初九日。往尋噶爾丹蹤跡。十二日。至滾噶寧臺。見無厄魯特形影。臣令阿必達。攜疲馬先回。以此情事奏聞。

皇上。臣獨追噶爾丹至特勒爾濟地方。遇厄魯特千許人。擒臣至俄爾坤河。臣夜間乘隙逃出。向內而行。於六月初七日。到特勒爾濟河。遇喀爾喀阿里雅扎薩克阿爾薩蘭衛寨桑。彼

言我等奉大將軍令。至愁山。昭莫多地方。收集逃潰之賊。擒得厄魯特男婦一百六十餘口。今於其中擇三十人。解送京師。爾可率之同行。二十九日到克勒河朔。見侍讀學士喇錫言。

皇上命我等率七台吉兵。往追噶爾丹。并探爾信息。臣以行事告之。喇錫使人送臣及厄魯特被俘三十人。入汎界。見大將軍伯費揚古。大將軍言如許人同行。則程途耽誤。當擇數人帶去。遂使厄魯特卓禮克圖達爾漢。克什津。卓禮克圖等六人。與臣偕來。

實錄卷五

七

上命卓禮克圖。津巴等。歸諭噶爾丹。遣理藩院官一員。帶至汎界。在附近旗分酌奏。坐馬口糧。撥鄉導指路前往。○上諭議政大臣等。大將軍伯費揚古。應令自科圖移駐善巴王汎界。因出侍讀學士喇錫。大將軍伯費揚古疏。命議政大臣集議。尋議。侍讀學士喇錫疏。言厄魯特額圖格來降云。噶爾丹戰敗奔竄。到他木爾之台庫勒地方。遣人收集丹津阿拉布坦。丹濟。塔丹津。鄂木布等。伊拉古克三胡土克圖。亦往與之合。大畧兵有五千餘。牛羊甚少。無廬帳者多。議欲往翁金一路。或瀚海四圍有居人。掠得牲畜。如根敦戴青。逸去。暫且偷生。或往哈密。如哈密仍前和好。則資其糗糧。以度今冬。如哈密與之反。願即攻而取之。以為根基。議既定。六月二十八

日自他米爾向翁金起程。閱三日我等逃出。又六月二十日。達賴喇嘛使人鄂木布來亦隨噶爾丹而行。又因住他米爾地方二十餘日。馬已漸肥。聞根敦戴青在塞梭格云。又大將軍伯費揚古等疏言。黑龍江將軍薩布素於七月十六日。已率兵到科圖。臣等遵旨。正擬領兵回京。得侍讀學士喇錫之報。知噶爾丹欲往翁金一路。已自他米爾起程。是以臣等率官兵住科圖候旨。今應令大將軍伯費揚古親身沿邊而往。酌調善巴手及附近旗分兵駐扎邊汛。噶爾丹前來即迎剿之。其與大將軍同處之兵將軍孫思克博齊俱令來京。餘總兵等官俱令率兵回汛。

實錄卷一百七十四

六

上曰。此乃大將軍伯費揚古未完之事。著率薩布素兵五百。酌取蒙古兵往善巴王邊汛諸地方偵探聲息。噶爾丹或在翁金或有過去之信。相機迎剿。著將軍薩布素率所餘兵五百駐扎科圖。如有厄魯特來降。令其收納。諭領侍衛內大臣等。前遣舍校與蘇尼特郡王額駙薩穆扎之子多爾濟扎卜等率兵往土喇偵探。今不必前往。著率伊等暫駐安郡王所居汛地。待大將軍伯費揚古至。聽其指揮而行。予故兵部督捕左侍郎戴通祭葬如例。丁丑以翰林院檢討鄒士璉為山東鄉試正考官。禮部郎中周爰訪為副考官。翰林院檢討徐日烜為山西鄉試正考官。工部郎中歐陽旭為副考官。

己卯。陞內閣侍讀學士倭倫為內閣學士兼禮部侍郎。○予故杭州副都統倭賀祭葬如例。○壬午。

上詣

皇太后宮問安。○癸未。諭議政大臣等。副都統祖良璧報稱。臣等運米赴納喇特地方。不料六月十八夜。遭大風雨。牲畜凍斃千餘頭。於巴罕厄里根地方。以候官兵。近者侍讀學士喇錫報稱。噶爾丹由翁金之路而去。據此。恐祖良璧等所運之米。被其侵掠。著差理藩院賢能筆帖式一員。乘驛速往祖良璧所。將此米支給官兵口糧外。焚所餘之米。作速各歸本汛。

實錄卷一百七十四

七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百七十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百七十五

康熙三十五年丙子八月甲申朔先是

上命員外二郎保齋前往諭青海諸台吉至是二郎保奏言臣至青海之察罕托羅海地方以部發印文示達賴喇嘛所遣管理青海事善巴陵堪布又告以擊敗噶爾丹之事堪布言此事大我不得獨主其議俟青海諸台吉同來會盟定議再覆七月初八日扎什巴圖爾等三十一台吉俱到盟所以撒文授之扎什巴圖爾言噶爾丹殺我鄂齊爾圖汗取我屬裔與我亦有讐但噶爾丹之女嫁博碩克圖濟農之子乃告之

實錄卷一百七十五

於達賴喇嘛而結姻者我等俱達賴喇嘛之徒俟啟聞達賴喇嘛視其言何如遵依而行非可任我等之意覆奏

上命議政大臣等會議尋議應令扎什巴圖爾等將達賴喇嘛作何定奪之處備文覆部並將此等情由增入達賴喇嘛敕諭內從之○諭商南多爾濟曰大將軍駐扎善巴王汎界地方正在有事之際爾可乘驛往會大將軍伯費揚古約駐扎之處著伯費揚古豫遣人檄知命左都御史于成龍所統運米官兵各歸本汛新陞提督岳昇龍來京命以科圖所存米除給黑龍江將軍薩布素官兵外餘交左都御史于成龍等運貯察罕諾爾八月內料理完畢回京○命肅州總兵

官潘育龍赴京○乙酉陞廣東肇高廉羅道崔俊為雲南按察使司按察使○丁亥遣大學士李天馥祭

先師孔子○戊子祭

大社

大稷遣領侍衛內大臣公福善行禮○

上詣

皇太后宮問安○己丑以翰林院侍講學士曹鑑倫為順天鄉試正考官侍講張希良為副考官○庚寅先是喀喇沁王扎什旗下附籍厄魯特台吉巴拜因屬下博克寨桑來朝附奏云聞投誠之厄魯特在張家口外者有臣屬下二三百人

實錄卷一百七十五

上諭署理藩院事戶部尚書馬齊曰此投誠厄魯特等著差官一員帶從前來降之台吉巴拜博克寨桑前往認識至是巴拜往認得屬下男婦等共一百七十五口

上命還之○辛卯以翰林院侍講邵穆布克日講起居注官壬辰

太宗文皇帝忌辰遣官祭

昭陵○調陝西肅州總兵官潘育龍為直隸天津總兵官以原

任古北口總兵官李士達為陝西肅州總兵官○癸巳

上詣

皇太后宮問安○陞盛京復州城守尉舒述為寧古塔副都統

○諭吏部山東巡撫楊廷耀居官甚劣著革職○議政大臣等議奏郎中滿都密報降人回回國王阿卜都里什特言昔年為噶爾丹所誘被執十四年今噶爾丹敗始得脫身來歸近聞噶爾丹在古爾班塔米爾臺庫魯地方度其困窮不能久居必往青海往青海有哈密吐魯番葉爾欽三路而哈密與嘉峪關相近有

天朝大兵葉爾欽有我回回兵二萬許在彼皆未必敢往恐當往吐魯番我願留子於此親往吐魯番以

聖上威德宣諭屬下眾回子又策妄阿喇布坦所居博羅塔喇與吐魯番相近往與合謀擒噶爾丹以報受辱之讐應令理

藩院遣官往召阿卜都里什特至京加之恩賜再遣官送出

嘉峪關得旨著遣官召阿卜都里什特及其子額爾克蘇爾唐赴京可傳諭云來京之後俱一同遣歸○甲午

太祖高皇帝忌辰遣官祭

福陵○命大喇嘛晉巴扎木素德木齊索諾木臧布主事保住

同達賴喇嘛使人齎敕往諭達賴喇嘛達賴汗班禪第巴及策妄阿喇布坦敕諭達賴喇嘛曰朕統御寰區以生成為務

尊崇佛教以道律為本故特往召班禪將以化導悖亂中外禮法歸一也爾喇嘛想已將朕深眷之心宣告班禪但第巴

與噶爾丹朋比恐嚇班禪言噶爾丹兵將要而殺之不遣之

行先是烏闐布通之役遣濟隆胡土克圖為噶爾丹誦經擇

戰日及噶爾丹敗又誘我軍講和遂使噶爾丹得以遠遁朕知喇嘛斷不作此舉動明係第巴指喇嘛之名而為之也至

噶爾丹大敗於烏闐布通之時頂爾所給威靈佛像於首誓不復犯歸降聖朝之喀爾喀乃去歲背誓至克魯倫內青城

地方掠納木扎爾陀音朕數遣使問故而怙惡不悛不見我使敢行無禮朕乃震怒調兵親統六師近逼噶爾丹彼猶不

知朕不忍遽加誅滅矜憐衆生死亡諭噶爾丹會盟以議喀爾喀之事差長史多禪中書阿必達齋敕且遣所擒厄魯特

生還曉以我兵各處堵截之事噶爾丹猶敢抗拒朕又遣彭素克格隆等問故而竟不遣歸朕沿克魯倫而上以探使人

聲息噶爾丹不能抗朕之威棄其廬帳器械什物遁至特勒爾濟地方遇我堵禦西路大將軍伯費揚古兵二戰而披靡

大敗臨陣阿奴等亦被殺斬有名寨寨等甚多共殺厄魯特二千餘其丹已哈什哈察罕西達爾哈什哈等皆來降盡獲

其馬駝牛羊噶爾丹棄其佛像經籍以及各色物件僅攜二十許人逃入林中朕留喀爾喀兵務索噶爾丹執而誅之噶

爾丹背盟兇惡已極以致絕滅此喇嘛來使親身灼見者也至降人厄魯特言達賴喇嘛卜云噶爾丹東行吉此種指使

噶爾丹及阻止班禪之事皆第巴目無爾達賴喇嘛之所為

也朕明知之朕不以爾事之有無介意是以別降旨於第巴茲為滅噶爾丹告捷禮以噶爾丹佩刀一阿奴之佛像一佩符一特遣使齎往並發伴敕禮緞十疋又朕嘗遣員外二郎保往諭青海扎什巴圖爾等台吉云如有噶爾丹之人在爾等地方執之解來據二郎保報稱青海扎什巴圖爾等三十台吉俱到盟所已將檄文遍給諸台吉扎什巴圖爾邀臣至其廬彼言我青海諸台吉近邊居住六十餘年未嘗生一事噶爾丹殺我鄂齊爾圖汗取我屬裔於我亦有讐但噶爾丹之女嫁博碩克圖濟農之子乃啟聞西方而結姻者也我等俱達賴喇嘛之徒凡事皆啟聞西方彼地之言何如則遵而行之不得據我等之意覆奏故檄扎什巴圖爾等遣人於達賴喇嘛後作何定奪速備文知會理藩院為此諭達賴喇嘛知之其扎什巴圖爾台吉等蒙古原文並發敕諭班禪胡土克圖曰朕撫御萬邦無分中外一視同仁尊崇佛教以道法歸一為要務今以達賴喇嘛已老爾胡土克圖道法不二勤修不倦誦經行善特往召爾胡土克圖朕將與爾同化導悖亂使中外道法歸一而第巴心懷嫉妒與噶爾丹朋比恐嚇爾胡土克圖言噶爾丹兵將要而殺之阻不使行先是烏闡布通之用兵也第巴亦指達賴喇嘛之名遣濟隆胡土克圖為噶爾丹誦經且擇戰日及噶爾丹敗後又詭言講和以

實錄卷五十五

五

實錄卷五十五

五

誤我軍使噶爾丹得以遠遁朕已別有敕諭第巴指出第巴種種助噶爾丹之事及阻爾不行之舉當噶爾丹大敗於烏闡布通之時頂達賴喇嘛所授威靈佛於首誓不復侵歸降聖朝之喀爾喀矣去歲背誓至克魯倫內青城地方掠喀爾喀納木扎爾陀音朕屢遣使問故而彼怙惡不悛不見我使輒行無禮朕乃震怒調兵親統六師近逼噶爾丹彼尚不知朕猶不忍遽滅之諭彼姑來會盟定議喀爾喀之事使長史多禪中書阿必達等齎敕釋所擒厄魯特生還曉以我兵各處堵截之事噶爾丹猶敢抗拒朕又遣彭素克格隆等問故竟不遣歸朕於是循克魯倫而上噶爾丹不能抗朕之威棄其廬釜器械什物遁至特勒爾濟地方遇朕所遣西路大將軍伯費揚古之兵一戰而披靡大敗臨陣阿奴等亦被殺斬有名寨寨無算共殺厄魯特有二千餘其丹巴哈什哈察罕西達爾哈什哈等人俱來降盡獲其馬駝牛羊噶爾丹盡棄其佛像經籍以至各色物件僅率二十許人遁入林中朕留喀爾喀兵務索噶爾丹擒而殺之噶爾丹背盟兇惡已極至於永滅特遣使諭知並發伴敕禮幣八端敕諭達賴汗曰朕欽崇佛教總持道法但皈道法之人則嘉之悖道法之人則懲之爾自顧實汗以來同心專尚宗喀巴之道與本朝和協至爾汗之身益誠信恪守成規頃者噶爾丹陽護宗喀巴之



佛教陰主悖逆之邪行詐傳達賴喇嘛之語遍地興戎殺掠喀爾喀毀壞道法而第巴反從中慙慙烏蘭布通之役遣有玷僧規之濟隆胡土克圖為之誦經且擇戰日及噶爾丹敗後又偕講和以誤我軍使噶爾丹得以遠遁後又指稱達賴喇嘛言東行吉種種煽誘噶爾丹遂敢背誓至土刺克魯倫等處劫奪我納木扎爾陀音朕始親率大兵出討分路剿滅之夫第巴者乃達賴喇嘛下司事之人理應篤敬道法今反不遵達賴喇嘛而欺凌衆人是以朕別有旨深加責讓惟爾汗不背前規朕使往時依然敬待每對使款接時豫以噶爾丹之事密使聞之朕灼知爾始終不渝甚堅且篤凡敗壞道

實錄卷一百七十五

七

法煽惑噶爾丹者汗殆知之也至青海諸台吉亦與之無涉是以特遣使以示褒善貶惡之意並發伴敕禮幣八端敕諭第巴曰朕崇道法而愛衆生故實心以護道法者加之眷祐陰誘人以壞道法者加之罪譴爾第巴原係達賴喇嘛下司事之人因爾不遵達賴喇嘛之語輔助道法朕是以優封爾為土伯特國王今觀爾陽則奉宗喀巴之教陰則與噶爾丹朋比欺達賴喇嘛班禪胡土克圖而壞宗喀巴之教先是爾以久故之達賴喇嘛詐稱尚存遣濟隆胡土克圖至噶爾丹所烏蘭布通之役為噶爾丹誦經且擇戰日及噶爾丹敗又以講和為詞貽誤我軍使噶爾丹得以遠遁朕為衆生遣人

實錄卷一百七十五

八

往召班禪胡土克圖爾又誑嚇班禪胡土克圖謂噶爾丹將要而殺之而不遣行青海博碩克圖濟農潛與噶爾丹結姻往來通使而爾又不舉發如噶爾丹博碩克圖濟農無爾之言有相與為姻者乎噶爾丹信爾唆誘之言故不遵朕之旨昔噶爾丹在烏蘭布通大敗而走之時首頂威靈佛立誓乃背棄誓言去年至克魯倫左側掠我喀爾喀降人朕特遣員外阿爾必特祐為使問其事因乃噶爾丹不即見我使臣敢行無禮繼又遣侍衛克什圖筆帖式薩哈連等為使仍前不見遣歸其後又遣主事保住為使亦如此遣歸是以朕大震怒調集各路兵馬親統六師近逼噶爾丹即欲率大兵剿滅之又又不忍衆生橫罹鋒鏑特遣長史多禪中書阿必達為使齎敕往諭噶爾丹曰朕將與汝會好言定議喀爾喀之事爾勿疑懼朕斷不欺罔人也

不意厄魯特噶爾丹仍兇惡不已又遣彭素克格隆齎敕特問其故仍未遣歸朕正待所遣使臣聲息邇克魯倫而上噶爾丹畏朕之威棄其子女廬釜而遁至特勒爾濟地方遇西路大將軍伯費揚古等大兵噶爾丹即來拒戰大兵乃進擊之噶爾丹不得旋踵遂大敗陣斬阿奴并斬沙津車臣寨桑古英寨桑孔郭羅額爾克寨桑根敦寨桑俄爾古克圖卜新寨桑額爾克台吉楚呼拉格隆厄魯特人二千餘被殺回回國王阿卜都里什特尼魯特台吉



慙都塞冷扎卜梅寨桑馬穆古英寨桑巴圖爾台吉顧祿默爾根台吉額林辰哈什哈古英吳巴什筆車齊等及厄魯特二千餘人皆來降盡獲其子女駝馬牛羊廬帳噶爾丹僅率二十許人而遁丹巴哈什哈察罕西達爾哈什哈等來降博碩克圖濟農遣往噶爾丹使人羅壘厄木齊等被擒皆言達賴喇嘛歿已九年矣達賴喇嘛者乃至大菩薩喇嘛本朝為護法之主交往六十餘年則其訃音即當奏聞於朕爾乃匿而欺衆倚噶爾丹以興戎其罪甚大降人丹巴哈什哈又告曰噶爾丹聞上親統六師已到克魯倫遁走之時語衆人曰我來此克魯倫非吾意欲深入也奉達賴喇嘛之旨云東行

實錄卷五十五

九

吉我是以深入蓋達賴喇嘛殺我而我殺爾衆矣朕思達賴喇嘛若存決無此等事明係達賴喇嘛亡後爾私指達賴喇嘛誑噶爾丹也爾之所行為道法乎抑為已行詐乎朕乃養育衆生之元后彰善癉惡斷然不爽爾果改過仍思遵宗喀巴之道奏明達賴喇嘛已故始末尊奉班禪胡土克圖使主喇嘛之教應朕之召遣之使來執濟隆胡土克圖以昇我解青海博碩克圖濟農所娶噶爾丹之女朕仍前待爾以優渥之禮不然數者或缺其一朕必問爾詭詐欺達賴喇嘛班禪胡土克圖助噶爾丹之罪發雲南四川陝西等處大兵如破噶爾丹之例或朕親行討爾或遣諸王大臣討爾爾向對朕

使言四厄魯特為爾護法之主爾其召四厄魯特助爾朕將觀其如何助爾也爾其速辦此事及正月星速來奏否則後悔無及矣為此特遣使臣往諭並發伴敕禮幣六端諭策妄阿喇布坦曰朕統御寰區遐邇一體仁育萬民皆欲使之共享安樂朕躬為一統之主懷保萬方獎善懲惡未嘗或爽先是爾陳奏噶爾丹之狡詐與侵害爾之實情誠心懇請眷恤朕嘉爾恭順全受爾之貢獻且以噶爾丹狂悖不靖闖入烏闌布通為朕偏師所敗跪誓於威靈佛前後又背誓害我使臣掠喀爾喀阻止班禪胡土克圖之來又至巴顏烏蘭將為禍亂其意顯露因發三路大兵剿殺噶爾丹諸事降敕

實錄卷五十五

十

詳諭矣朕親統中路大兵近逼噶爾丹即欲率大兵剿滅之又不忍衆生橫罹鋒鏑是以暫停撲剿遣諭噶爾丹使來會盟定議喀爾喀之事爾勿疑懼朕躬俟使臣覆奏溯克魯倫而上噶爾丹聞之心膽俱裂棄其子女廬帳釜鍤什物遁去遇朕所遣西路大將軍伯費揚古之兵於特勒爾濟之地噶爾丹即來戰大兵乃進擊之噶爾丹不得旋踵遂大敗斬噶爾丹之妻阿奴及厄魯特二千餘人丹巴哈什哈察罕西達爾哈什哈等人二千餘俱降盡獲其人口馬駝牛羊廬帳什物噶爾丹丹濟拉丹津鄂木布阿拉布坦等紛紛潰遁噶爾丹今已困窮矣爾向誠心肫篤請安進貢不絕於道與噶爾

丹有不共戴天之讐。噶爾丹窮兇極惡。不可留於人世。一刻尚存。即為生民之不利。務必剿除。以安厄魯特蒙古之生。今或流行爾屬下厄魯特地方。或奔往哈密地方。如生擒噶爾丹。則擒之來殺之。則以其首來。如此。則爾向來恭順之心。益著。而朕眷顧之恩。益無窮矣。至於達賴喇嘛班禪胡土克圖。達賴汗第巴等。皆有教諭之並。以其蒙發爾知之。主事保任。奏請訓旨。

上諭之曰。如第巴託言達賴喇嘛坐禪。不使相見。爾等取其根據。決絕而歸。如遣班禪來。則先奏聞。眾厄魯特有來降者。俱攜之來。如第巴又言達賴喇嘛將使垂中。為之卜。爾但詰之。

實錄卷一百五十五

十一

云。垂中所禱祀者。惟達賴喇嘛耳。達賴喇嘛倘有問。垂中而行之理乎。至達賴喇嘛身故。果實則言使班禪主喇嘛之教。爾務索濟隆胡土克圖而來。如第巴以殺濟隆革喇嘛為疑。爾則極口保之。如不遣濟隆來。爾則謂第巴曰。爾為一人而違聖上之旨。聖上豈輕已乎。爾在彼如過策妄阿喇布坦之使。爾以噶爾丹前後諸事詳告之言。我聖上無誅噶爾丹之意。至今猶使將軍留大兵以招撫之。爾事畢。即星速解歸。不得久留。丁酉吏部題兵部尚書索諾和辦理兵丁需用馬匹疲瘦應革職。

上諭大學士等曰。朕以索諾和才優。洵擢尚書。自任尚書後。並

不勤勉効力。此番軍務。彼全然不知。凡事惟圖塞責。不實心料理。如此。則任彼尚書。亦有何益。況彼身任中樞。於邊疆官兵情弊。不加詳察。一任怠玩。以致兵部事務。極其隳壞。著照所議革職。戊戌。

上諸

皇太后宮問安。庚子。免福建閩縣等五縣本年分旱災額賦。有差。辛丑。秋分夕。

月於西郊遣左都御史傅臘塔行禮。振武將軍孫思克。西安將軍博齊等來京。陛見。癸卯。侍讀學士喇錫疏言。臣等在慙山據厄魯特降人祁齊克墨爾根薩圖等言。噶爾丹到塔。

實錄卷一百五十五

十二

米爾後集眾共議。將視無兵之地。掠瀚海四圍。居人取其糗糧。以往哈密。丹津鄂木布言。哈密皆村落。我不慣居其地。於七月初四日叛。而西去。噶爾丹率兵追之。阿喇布坦亦自覓生路去矣。若丹濟拉斷不背噶爾丹也。我等明知大軍早還。向汎界大路而來。固近。然不識其路。土喇克魯倫乃我等所知之地。故從此路而來。據此。恐後降者。或從土喇而來。地方相去甚遠。無人收集。且噶爾丹丹津鄂木布交惡。相攻其潰散之人。亦未必不至土喇。慙山地方捕獸取魚。以度生命。是以臣等率車陵扎卜兵二百名。阿里雅扎薩克兵五十名。暫留慙山四圍守候。聲息遣人躡探報聞。撫遠大將軍伯費。

揚古疏言臣於七月二十五日已率黑龍江兵五百名自科圖赴善巴王汎界其達爾漢親王四子部落毛明安三吳喇武歸化城土默特乞各令發兵一百至臣所居善巴王汎界從之命徹坐臺官員甲辰陞步軍統領開音布為兵部尚書仍兼管步軍統領事丙午

上詣

皇太后宮問安諭大學士等今應移文將軍薩布素伊軍士之糧已給至十月初止若軍士率赴京師將馬匹飼養後遣則往返紆遠將軍薩布素所統軍士可委賢能之人自塞外遣還薩布素減省騎從親自來京若馬匹疲瘦軍士回汎維

實錄卷五十五

五

艱薩布素可并率至京飼養然後遣往薩布素不必再為請

旨一面啟行一面奏聞可也又諭大將軍伯費揚古駐師

善巴王汎界則安郡王可率軍士從容牧馬而還員外郎色

楞留於安郡王屯駐之地偵探聲息揚威將軍覺羅舒恕

侍郎滿丕疏言大將軍伯費揚古既領兵駐善巴王汎界臣

等請往大將軍軍中効力久之丁未

上自暢春園回宮陞江南安徽布政使李煒為山東巡撫

戊申

上御太和門視朝文武陞轉各官謝恩

上幸暢春園庚戌撫遠大將軍伯費揚古奏報厄魯特降人

丹濟多爾穆言噶爾丹聞喀爾喀等各歸故土遊牧思行劫掠遂自塔米爾前徙於七月二十五日至俄羅海腦兒駐扎今噶爾丹敗遁窘迫未必不踉蹌奔突因檄令舍梭率蘇尼特多羅郡王額駙薩穆扎之子多爾濟扎卜等親身帶兵速赴臣軍報聞辛亥

上詣

皇太后宮問安諭大學士阿蘭泰近日部中各官凡事不行速結惟務偷閒入署未久即散歸家偃息如此則政事有不墮積者乎朕聽政三十年夙興夜寐有奏即答或有緊要事輒秉燭裁決此爾等所共知也各官果能勤敏諸事何至遲

實錄卷五十五

五

誤可傳諭各該衙門將應結之事速行察奏以喀爾喀故

因山貝子車卜登子阿拉達爾襲爵外藩諸王貝勒貝子

公台吉等以

上親統六師蕩平朔漠請上

尊號章付內閣吏部議奏兵部左侍郎馬爾漢所遣牧馬官

員失令致多疲瘦應早職得旨馬爾漢著從寬免革職

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十五

實錄卷一百七十五

七

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十六

康熙三十五年丙子九月甲寅朔

上自暢春園回宮。回國王阿卜都里什特奏言臣被噶爾  
丹所擒受辱十有四年。仗

聖上天威滅噶爾丹臣得下降合家蒙高厚之恩。今又使送臣  
歸國臣到吐魯番探信或誅噶爾丹或擒解噶爾丹俟得實  
音歸臣舊居葉爾欽地方再來進貢請安但往葉爾欽必過  
策妄阿喇布坦地方恐厄魯特之心無常伏乞  
皇上敕旨開明臣已歸降勿得虐害

實錄卷一百七十六

一

上命大學士與議政大臣集議尋議覆應敕該部檄知策妄阿  
喇布坦阿卜都里什特等已歸降本朝今送歸故土勿致虐  
害嗣後厄魯特與回子當永相和好從之。戶部議覆江南  
江西總督范承勲疏言淮黃秋漲邳州等州縣衛軍民田地  
淹沒災民望食除將見存穀石賑濟外乞將見貯省城米十  
萬石按災輕重賑給應如所請得旨依議速行。乙卯  
上幸暢春園。先是理藩院奏陸續來降之厄魯特大小人口  
共一千五百餘人向暫在張家口安插應令伊等赴京  
上諭領侍衛內大臣等著取丹巴哈什哈等來京令副都統吳  
達禪乘驛而往同納拉善滿都遷來倘厄魯特有不願來內

地者即送赴大將軍伯費揚古軍前著各給馬一匹遣回令  
彼往諭噶爾丹言彼若來降亦待以顯榮其看守厄魯特等  
之察哈爾兵各歸本地至解厄魯特降人到京著邊關官兵  
綠旗官兵轉遞押解並令戶部理藩院賢能官各一員前往  
沿途給口糧食物既取伊等到京應令議政諸臣會議編入  
旗分佐領至是議厄魯特降人應編入鑲黃正黃正白三旗  
滿洲佐領其內有父子兄弟不可離者如編入一佐領為數  
浮多則扣算一佐領人口其餘編入本叅領內之佐領內有  
年老孤身附入人口少者之家給米贍養從之○丙辰

上詣

實錄卷一百七十六

二

皇太后宮問安○初回回國王阿卜都里什特與其子額爾克  
蘇爾唐久被噶爾丹拘執及噶爾丹敗後伊等始脫身來歸  
上憐其拘久困阨特賜銀幣遣候補主事四子楊國琳馳驛送  
還伊本處命領侍衛內大臣索額圖尚書馬齊一等侍衛馬  
武送至蘆溝橋○四川陝西總督吳赫奏報哈密回子頭目  
額貝杜拉達爾漢白克遣人進貢來降報聞丁巳撫遠大  
將軍伯費揚古奏王善巴哨卒來報八月二十四日在達蘭  
土魯地方見有厄魯特形影因調右衛兵一半前來  
上諭議政大臣曰前命安郡王及將軍薩布素來京今著停止  
各率兵赴伯費揚古軍前朕將往宣化地方行圍當減從而

往侍衛撥二百員御營撥三旗新滿洲護軍驍騎三百名撥

三旗親隨護軍每旗三十名八旗前鋒四百名火器護軍一  
千名每旗帶馬上礮三門此次隨駕前鋒護軍驍騎以佐領  
內拴喂之馬每人各給四匹侍衛內有無馬者亦各給四匹  
火器護軍千名分為兩營其馬匹將漢軍旗內所拴馬亦選  
與乘用此行不過試鷹諸色人等不得告請從行部院官員  
從少派出兵糧亦從少支取張家口貯有米在到彼再給○  
中路督運左都御史于成龍通政使喀拜於科圖地方撥給  
口糧事畢回京復命○陞廣西按察使張四教為江南安徽  
布政使司布政使○贈故浙江温州總兵官蔣懋勲太子少

實錄卷一百七十六

三

保子祭葬諡襄僊○鑲藍旗滿洲都統額赫納以年老乞解  
任允之○庚申吏部議覆兵部尚書帶管步軍統領事開音  
布疏言巡捕三營事務繁要請添設郎中一員主事一員應  
如所請從之○喀爾喀車臣汗遣使進九白年貢宴賚如例  
○辛酉諭戶部尚書馬齊兵部尚書開音布等噶爾丹窘迫  
已極近朕差阿南達以巴圖爾額爾克濟農之兵堵禦其外  
恐噶爾丹乘虛行劫巴圖爾額爾克濟農爾兩部檄總兵官  
王化行如噶爾丹往彼處即率兵往援并諭巴圖爾額爾克  
濟農知之先是以前淮黃交漲遣戶部員外郎綽奇閣黃河  
水勢至是回奏中河北岸之隄未遭水患其水已減六尺

上諭大學士伊桑阿等高朕逆料中河北岸之隄最為緊要定須堅固因命靳輔于成龍加意修治是以雖遇大水得無妨害若此隄一決不可言矣歷年之水無有大於今歲者此番無害則似可永固黃河之水從雲梯關入海雲梯關沙漲壅塞水每為其所阻以致退流河隄不能捍禦因而衝決今將淤泥挑濬河道加深所以水得通洩其利普矣○壬戌兵部議奏一等侍衛喀瓦爾達多羅額駙一等台吉阿拉布坦前奉命護送長史多禪等出使噶爾丹有勿過燕圖庫列圖之諭乃違旨越過燕圖庫列圖巡警不嚴致厄魯特奪去馬匹應將喀瓦爾達一等侍衛佐領阿拉布坦多羅額駙二等台吉革去得旨喀瓦爾達阿拉布坦等並非戰敗著從寬免○先是奉差修路侍郎多奇以獨石口一路修治不堪下部嚴察至是吏部議應將多奇革職送刑部得旨前以行軍凡事不可不嚴故將多奇交該部議罪今自軍中來見所修之路並無悞大兵往返著從寬免○癸亥

上詣

皇太后宮問安○命都統周卜世護軍統領托倫蘇丹塞冷額副都統吳達禪等護駕前行其餘大臣俱與大兵一同豫備○理藩院議覆四川巡撫于養志疏言臣遵旨會同烏思藏喇嘛營官等查勘打箭爐地界自明季至今原係內土司所

轄之地宜入版圖但番人藉茶度生居處年久且達賴喇嘛曾經啓奏

皇恩准行應仍使貿易番人之事應行文達賴喇嘛使曉諭營官遵行管理關係土司之事著土司管理勿致生事至打箭爐四交界之地該撫細查報部編入一統志可也從之○諭議政大臣等目下著右衛兵一半秣馬馬肥換伯費揚古帶往之兵前來秣馬大同著侍郎多奇宣府著侍郎席密圖監督飼養 乙丑

上奉

皇太后自暢春園回宮 諭兵部除前撥八旗前鋒四百名外

實錄卷一百七十六

五

再增發前鋒四百名朕於十九日發駕令大兵先一二日起行○侍讀學士刺錫疏言據厄魯特降人吳默赫墨爾根寨桑等言我向為丹津鄂木布護衛丹津鄂木布為噶爾丹所追料力不能敵遂分散其眾往投策妄阿喇布坦阿喇布坦亦自往空奎扎巴喀居住不預噶爾丹之事目下噶爾丹人止千餘馬駝亦甚少今天時漸寒大半無居無食噶爾丹必不能保有其下人殆必散盡矣報聞○副都統阿南達疏言

臣遵奉

皇上成算已於布隆吉爾及昆都倫額濟內諸處各遣官率兵駐扎哨探竊思坐哨之人若至嘉峪關肅州等處來報而後



超赴恐噶爾丹已過有失機會若臣親至布隆吉爾之都爾白兒濟形勢地方乃兩邊哨卒遞報之路但僅率巴圖爾額爾克濟農等設哨所餘兵一百五十人以往為力甚薄因與提督李林隆共議增綠旗兵四百子母礮二十門臣親率之於九月初三日自肅州起行矣報聞喀爾喀白蘇特扎薩克墨爾根濟農一等台吉索諾木伊斯扎卜等請以成哨偵探之事効力從之丙寅先是

上命撫遠大將軍伯費揚古帶黑龍江兵五百名駐扎善巴王汛界偵探衆皆不喻其故至是丹濟拉果以大兵奏凱回京喀爾喀善巴王等必出塞游牧可乘隙取糧率兵一千五百

實錄卷一百七十六

六

南來既到阿濟爾布都納地方適遇所遣卓禮克圖達爾漢巴克什津巴等告以大兵堵禦邊汛丹濟拉聞之大驚遣察哈代以書請降伯費揚古據書奏報而丹濟拉已遁去矣衆乃服

睿算之神○理藩院奏自張家口以外設蒙古驛至大將軍伯費揚古所駐地方應每驛設馬二十匹蒙古章京一員兵十名從之議敘厄魯特降人丹巴哈什哈察罕西達爾哈什哈俱授二品官為散秩大臣梅寨桑慈都俱授三品官俄欽為一等侍衛餘俱授職有差○賜振武將軍甘肅提督孫思克袍褂帽韉鞍馬等物○喀爾喀澤卜尊丹巴胡土克圖遣

使進九白年貢宴齊如例○丁卯以鑲藍旗護軍統領宗室惠蘭為本旗滿洲都統○戊辰

上御太和門視朝文武陞轉各官謝恩內大臣公常泰開列出征大臣職名入奏得旨左翼營內以領侍衛內大臣馬思喀都統公鄂倫岱護軍統領塞冷額主之右翼營內以內大臣公常泰都統侯巴渾德都統齊世主之其餘大臣各隨本翼隸在營內其前鋒營自有本翼大臣其去時左翼之營於十七日起行右翼之營於十八日起行○諭大學士伊桑阿此番出兵八旗官員及兵丁人等俱照今年出征例給兩月行糧如前已出兵今次又往各賞銀十兩朕所駐蹕驛中每驛使備空草以喂出兵者之馬照各處定例散給○刑部尚書圖納等奏報噶爾丹納貢之西賴古爾黃番黑番人等及噶爾丹所遣督催番人貢物之厄魯特達爾漢寨桑卜爾奇等共七千四百餘名俱傾心投順但督催貢物者係噶爾丹所屬之人不便令居原地已委官解京其西賴古爾黃番黑番人口衆多難以遷移應將邊外住居者俱令遷移邊內下所司知之○已諭理藩院是役經蒙古地方官兵馬駝擺站馬匹關係重大爾衙門可檄外藩衆札薩克喀爾喀札薩克各自嚴禁本旗盜賊如竊取官兵馬駝擺站馬匹什物借交易為名而來偷盜立正軍法梟首示衆該札薩克管轄人

實錄卷一百七十六

七



員從重治罪著嚴行傳諭喀爾喀土謝圖汗遣使進九白年貢宴春如例以兵部右侍郎嵩祝為鑲藍旗護軍統領陞廣東惠潮道魯超為廣西按察使司按察使諭署理藩院事戶部尚書馬齊喀爾喀一等台吉車陵達什軍中効力供應公差馬匹畧無遲悞著封為輔國公庚午厄魯特格壘沽英寨桑等遣察罕哈什哈來請降

上諭大學士等曰格壘沽英乃噶爾丹信任大臣遣使請降言噶爾丹困窮已極糗糧廬帳俱無四向已無去路目下掘草根為食八月初四日大雪深數尺昔謂蒙古之地不論經由何方皆可以行難以尋覓由今觀之皆有一定行路一定住處欲覓噶爾丹亦無所難草木非人所食惟厄魯特乃能延至此時然亦安能久也辛未

上詣皇太后宮問安調陝西西安副都統馬自德為江南京口副都統陞協領瓦爾大為陝西西安副都統壬申

上巡行北塞經理軍務命皇長子允禔皇三子允祉皇八子允禩隨駕是日啟行駐蹕昌平州命左都御史于成龍赴歸化城理西路糧務諭議政大臣等大同宣化所積草料甚多著於騎坐官馬之新滿洲護軍三百內使二百十名乘鹽池厰馬前去其九十名攜其所乘官馬九百匹往大同牧養

其大臣侍衛官員自備之馬亦攜往大同牧養解此項馬匹牧養時令三旗大臣各一員侍衛各三員前去其在前兩隊之兵亦發往大同牧養馬匹如此則不悞軍行於事大有裨益此所養馬匹著布克勒蘇永祚唐保住前往與侍郎多奇監牧命以哈灘巴圖爾滾占解京馬駝給調往大將軍伯費揚古軍前右衛兵丁癸酉

上駐蹕南口甲戌遣官祭歷代帝王遣官祭城隍之神

上駐蹕岔道諭兵部西路發回大同宣化府等處駱駝共八十六頭著交付郎多奇監牧乙亥

上駐蹕懷來縣城西以招撫噶爾丹丹濟拉敕書並所印刷蒙古文三百道遣理藩院主事丹巴齋發大將軍伯費揚古令其頒示陞內閣學士哈雅爾圖為兵部右侍郎侍讀學士羅察為內閣學士兼禮部侍郎丙子

上駐蹕沙城堡諭大學士阿蘭泰兵部大臣無隨行者爾可料理兵部事務諭戶部宣化府錢糧前已屢經蠲免但比年以來所屬各州縣牧養軍前需用馬匹又大兵絡繹往來各有支給經費而供億甚繁殊勞民力朕巡幸經臨深切軫念著將康熙三十六年宣化府屬地丁銀米全與蠲豁仍行文該撫通行曉諭俾民間均沾實惠以副朕寬恤黎元至意

丁丑

上駐蹕下花園撫遠大將軍伯費揚古奏報副都統祖良璧等收厄魯特丹濟拉於翁金

上諭議政大臣等噶爾丹為我軍所敗但存馬匹衣服奔逃而出食盡衣單漸及寒凍勢在必亡前據侍讀學士喇錫報稱噶爾丹由翁金之路而去朕即料其必將刦米故豫遣人諭祖良璧將米燒燬丹濟拉不知米已燒燬果至翁金今為祖良璧擊敗朕甚喜悅噶爾丹似此困極雖不進討亦必滅亡今但以招撫為要故朕諭大將軍頻遣噶爾丹降人往招之噶爾丹今雖不降其部落既散之後自來歸順矣○四川陝

實錄卷一百七十六

十

西總督吳赫疏言據披甲初泰等來稱副都統祖良璧奉

上諭將翁金之米分給兵丁餘皆焚燬九月初六日自翁金起程回本汛忽有蒙古兵自谷中而出薄我前鋒又入陣中相與混戰我等因路阻截難以復回故前來報信臣聞信親率兵二千星赴白塔隨宜援剿得旨吳赫著暫駐白塔偵探以黑龍江將軍薩布素患病命留歸化城調治○諭大學士阿蘭泰尚書馬齊前令右衛兵丁馬匹分牧大同宣化兩處右衛近大同將馬遠解宣化不若在大同為便但若在大同一處喂養恐累小民著侍郎阿爾拜前去與監牧內大臣酌量於附近州縣分養務給實價毋苦百姓○宣化總兵官白

斌來朝○戊寅

上駐蹕宣化府免江南山陽縣大河衛本年分水災額賦十三之三賜宣化府騎兵張家口步兵白金諭曰此銀爾等可留家中日用俟到張家口再給米糧爾等安營可附近行宮屯扎以便不時賞給○己卯

上駐蹕下堡○庚辰

孝慈高皇后忌辰遣官祭

福陵喀爾喀多羅貝勒根敦戴青遣使進貢請安並奏言聞皇上親統大軍滅噶爾丹已自率兵從塞稜格向內而來願以擒噶爾丹自効

實錄卷一百七十七

十一

上諭議政大臣等根敦戴青久無音耗朕甚念之今遣使來奏勦撫噶爾丹之餘黨則噶爾丹之滅速矣朕心大慰卿等亦必喜悅也可著諭來使如擒獲噶爾丹不必獻俘即在本處立決○命給喀爾喀多羅貝勒根敦戴青俸並賜裘帽等物○辛巳奏祝

皇太后聖壽書曰臣自離紫闥數隔晨昏瞻企彤闈日依左右頃當小春應律

聖誕欣逢臣身歷關山未獲捧觴介壽神馳禁禦唯思作頌呼嵩謹遙拜行禮所有年例進祝儀品呈上仰希俯鑒茲偶得野物附使申獻一味旨甘用達微誠於鴈塞

千秋有慶正昭景福於鸞階伏願

聖母壽厯靡涯與歲華而並永嘉禧茂集比山岳以增崇臣不勝懼忭翹切之至

上出張家口駐蹕察罕拖羅海地方 京師地震 壬午

上駐蹕喀喇巴爾哈孫地方 諭領侍衛內大臣蘇爾達等據

厄魯特降人言噶爾丹往博羅烏納罕空音扎巴哈等處地

方度冬令丹濟拉往就之所云博羅烏納罕者乃扎薩克圖

汗舊居之地距汎界有四十餘日之程大將軍伯費揚古進

兵之時右衛兵每人乘馬一匹以驢騾買裝其廐亦瘦料斷

不能到噶爾丹所在之地必自翁金等處因馬瘦而還則徒

實錄卷一百七十六

十三

勞無益朕所以使大同養馬者正欲探實噶爾丹所在如立

刻可行則於黑龍江六百兵內選前鋒二百新滿洲四百察

哈爾兵一千全用肥健馬駝充足米糧進剿乘其窮困可一

舉滅之噶爾丹業已盡破今我何故不深算剿滅之策而徒

勞人馬乎今速檄大將軍伯費揚古不必進兵至來年青草

萌時秣馬以待視噶爾丹所往剿而除之此際當頻遣厄魯

特降人招撫為要 四川陝西總督吳赫疏言九月二十三

日副都統祖良璧來見臣據言我等遵諭焚糧後於九月初

六日自翁金起行回本汎突有厄魯特賊人二千來截因急

令滿洲漢軍綠旗兵發鎗矢奮勇殺入賊分兩隊圍我於中

我等從東方殺出重整兵進戰仰仗

天威賊人大敗我

皇上豫料厄魯特或有刳米之舉先令燒燬故賊來時我軍毫

無瞻顧得以奮勇殺賊此皆

睿謀深遠之所致也疏入報聞 癸未

上駐蹕海柳圖地方 諭尚書班迪往歸化城遣人於鄂爾多

斯令彼左翼三旗調兵二百至黃河對岸以待 諭理藩院

咨爾喀台吉阿里雅阿爾薩蘭衛寨桑等戶口著遷於達里

岡阿地方與喀爾喀扎薩克車陵扎卜一同安插 諭大學

士等陝西以茶易換之馬匹關係緊要著學士朱都納帶理

實錄卷一百七十六

十三

藩院司官一員前往沿途謹護來京

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十六

實錄卷一百七十六

一百

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十七

康熙三十五年丙子冬十月甲申朔享

太廟遣皇太子允礽行禮 遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵 頒康熙三十六年時憲歷

上駐蹕鄂羅音布拉克地方 諭尚書馬齊大將軍伯費揚古

所領軍士甚為勞苦食用必致缺乏欲將朕所用牲口發去

道路遙遠必致疲瘠且到日必遲可遣人往尚書班迪處取

殺虎口大同等處見存銀五千兩遣官送至大將軍伯費揚

古軍前酌買皮裘牛羊等物給與從征軍士 命喀爾喀多

羅郡王色冷阿海台吉阿里雅等及厄魯特降人射畢

上率諸皇子射連中五天諸皇子皆屢中喀爾喀及蒙古諸王

台吉與厄魯特降人無不驚服

上問喀爾喀多羅郡王色冷阿海等喀爾喀厄魯特構兵之由  
顧諸王大臣曰今日喀爾喀厄魯特皆在朕直論其事彼皆  
向來貢獻本朝之國兩國交惡其曲不在厄魯特而在喀爾  
喀喀爾喀先犯厄魯特喀爾喀理曲是以其國為厄魯特所  
破但厄魯特假代喀爾喀為名進我境內烏闌布通之地為  
我師所敗已誓不復侵喀爾喀矣今又背誓入犯我邊汛屯  
於克魯倫之地則厄魯特理曲是以朕親統六師滅之天道  
昭然毫髮不與朕為天下萬國之主寧有徇徇之理乎喀爾  
喀王及厄魯特降人皆跪奏曰蒙

皇上伸明大義方知兩國致敗之由實我等所自取也 賜虎

實錄卷一百一十七

十

從大臣蘇爾達阿蘭泰馬齊蘇丹等馬駒各一匹 乙酉

上駐蹕胡虎額爾奇地方 以正藍旗故一等精奇尼哈番索

諾慕子那本渣布襲職 丙戌

皇太后聖壽節遵

懿旨停止行禮筵宴 撫遠大將軍伯費揚古疏言官兵馬瘦

已回汛界

上命議政諸臣議尋議伯費揚古因馬瘦回軍皆如

上所豫料今應檄伯費揚古給右衛兵到歸化城之米自歸化  
城支米歸右衛其餘米給黑龍江官兵伯費揚古駐扎汛界  
附近地方暫俟差往丹濟拉處使人津巴歸并收厄魯特降

人

上從之止命護軍統領瓦爾達留大將軍軍前 諭議政大臣  
等喀爾喀阿爾薩蘭衛寨桑以其幼主阿里雅來朝可令赴  
京師加之恩賜又車卜登貝勒之母來詣朕前此人

皇太后亦知之亦令其赴京進見 諭行在兵部副都統祖良

璧於翁金地方守護糗糧回師之時遇賊千人忽來侵犯率

領滿漢官兵奮勇直前大敗丹濟拉効力可嘉在事有功人

員著分別議敘具奏 丁亥

上駐蹕昭哈 賜沿途窮窶蒙古及進牛羊人等白金有差

戊子

實錄卷一百一十七

三

上駐蹕河約爾諾爾地方 諭議政大臣今招撫伊拉古克三

胡土克圖使其徒阿旺丹津前往暫赴大將軍伯費揚古軍

前此後有當遣人機會一同遣往 己丑

上駐蹕巴倫郭爾地方 撫遠大將軍伯費揚古疏言今噶爾

丹已遠遁臣遣回右衛兵一千給馬八百匹駱駝一百二十

頭令解至大同得旨著侍郎多奇收領牧養 庚寅

上駐蹕瑚魯蘇台 先是撫遠大將軍伯費揚古大破噶爾丹

於昭莫多生擒男婦三千許各給擒獲之主至是

上皆賜銀贖出使其父子夫婦兄弟完聚 辛卯

上駐蹕磨海圖地方 壬辰

上駐蹕喀喇烏蘇地方 正白旗三等精奇尼哈番孫承祖告  
休以其子孫蘭襲替 癸巳

上駐蹕察罕布拉克地方 甲午

上駐蹕喀喇河朔地方 諭大學士阿蘭泰尚書馬齊今歲歸  
化城一帶田穀既收價亦甚賤俟到歸化城扈從人員應支  
十日口糧可折價給發令彼自買其歸化城所貯之米原以  
豫備師行今存留此米如右衛兵或有調遣以之給散其張  
家口至歸化城增設腰站俱撤去將兵部馬直抵殺虎口安  
設又黑龍江兵出征日久據將軍疏稱行糧可至十一月初  
五日俟至歸化城時應派察哈爾兵五百新滿洲人一百前

實錄卷五十五

四

往代之 諭議政大臣兵丁僅十日不支糧猶可如駐紮日

久不支口糧可乎且歸化城地方牧草維艱應將多餘人役

羸瘦馬匹酌量遣發大同右衛等處喂養以備 乙未

上駐蹕白塔 諭內大臣等明日到歸化城停止圍獵歸化城

商賈叢集恐僕從或行騷擾及土默特蒙古盜竊兵丁馬匹

著交副都統阿迪嚴行禁止 丙申

上自白塔往歸化城因簿全設副都統阿迪等率官兵來迎民

間老少男婦皆執香集路旁跪接是日

上駐蹕歸化城 諭尚書馬齊曰視歸化城馬駝甚多其價亦

賤官員侍衛兵丁有欲借銀販買馬駝者奏聞借給騎官馬

新滿洲亦准借給 授輔國公宗室吳由女為鄉君塔德壽  
為輔國公塔 丁酉遣散秩內大臣吳巴錫等率察哈爾官  
兵赴大將軍伯費揚古軍前

上諭察哈爾官兵曰爾等並無俸糧而勤勞素著今遣爾等往  
聽大將軍指揮各宜勉力宣勞師旋之日定使爾等各得其  
所 諭大學士阿蘭泰學士倭倫往右衛給陣亡官兵身價  
銀免扣官兵所借官庫銀兩 以翰林院侍講許汝霖為順  
天武鄉試正考官侍講張希良為副考官 諭于成龍王國  
昌等爾等前此運米遲悞罪在不宥今許爾等運米効力贖  
罪 先是員外舍校同蘇尼特協理台吉多爾濟思喀卜等

實錄卷五十五

五

至安郡王駐劄之地哨探噶爾丹聲息至是舍校以兵丁口

糧將盡并無冬衣報部且請轉奏以候或撤或留之旨議政

大臣等奏言大將軍兵未撤則員外舍校所在台吉兵丁不

便遽撤

上曰著多爾濟思喀卜蘇代車木楚克納木扎爾衛徵諾顏阿

玉錫等於大將軍未撤兵之前與舍校同駐探聽其他兵丁

俱令撤回 予故內閣學士兼禮部侍郎毫濟祭葬如何

辛丑諭議政大臣等噶爾丹窘迫已極必亡命走哈密著撤

孫思克率所部兵赴肅州至副都統阿南達處豫備著將軍

博齊於西安兵內未行者選二千名亦赴阿南達處會同孫

思克探噶爾丹往哈密聲息即行勦滅。副都統阿南達疏言臣令噶爾丹多爾濟哨卒拜格往諭噶爾丹多爾濟言皇上待汝比眾不同將撫育汝汝反逃去與巴圖爾額爾克濟農擅去游牧其時爾年小不能禁止下人

聖上亦灼知之不深責爾也後噶爾丹多爾濟遣人來告曰皇上憐我祖鄂齊爾圖車臣汗使我與巴圖爾額爾克濟農接壤而居于之牧地因巴圖爾額爾克濟農擅自游牧我亦與之同往及

皇上敕旨到日我年方幼我母一婦人不能回奏每思此情何以得達今祈副都統將我奏事之人一同帶往臣語之曰厄

實錄卷一百七十七

六

魯特人不可信果欲遣使當於十月二十日遣人再到肅州報聞。壬寅遣乾清門一等侍衛馬武以牛羊迎賜大將軍伯費揚古軍前右衛官兵。副都統阿南達疏言奉諭令臣各路備兵臣自布隆吉爾地方使噶爾丹多爾濟來使齋文諭哈密回子達爾漢白克曰聞逃來人言丹津鄂木布叛噶爾丹而去丹津阿喇布坦亦往投策妄阿喇布坦噶爾丹自身不及千人在額河無口糧牛羊倘往投汝地可速遣人至噶爾丹多爾濟處令彼出兵助汝噶爾丹多爾濟乃我同朝之人汝其勿疑此外又傳語噶爾丹多爾濟曰哈密若有噶爾丹聲息報汝汝即遣人來報一面往助哈密協力而行灑

納泰都爾白兒濟各口撥人小心駐防哨探臣於十月十二日親至肅州同提督李林隆會商備綠旗兵二千在額濟內昆都倫等處仍坐哨探聽并令李林隆防守邊疆各自整備訖

上以示議政諸臣曰阿南達處處備兵朕甚為之喜。癸卯厄魯特降人桑扎卜等言噶爾丹於九月二十二日從枯倫百爾齊爾向哈密而去

上諭議政大臣等今噶爾丹已向哈密前去當乘此機會作速勦滅大同見有備養馬匹著大兵即由內地前往倘有不堪疲馬即易彼汎地綠旗兵之馬前行再速檄學士朱都納將伊解來馬七千聞旨即便駐扎自彼地方支取草料加意飼養。此前去大兵不論何處相遇即乘此馬匹而去使一章京陪鄂欣速至阿南達處倘噶爾丹在大兵未到之前已到哈密著阿南達等勿失機會爾等集議具奏尋議大同有前鋒八百鎗手護軍一千應令前往哈密其朱都納阿南達處應行文令遵諭而行

上曰另有商奪奏摺暫存速檄朱都納將伊解來馬聞旨之地即便駐扎用心飼養。諭大學士阿蘭泰等右衛官兵已經加恩賞給念大同綠旗兵亦經屢次隨征其陣亡及被創病故之人亦著照例驗給其無子嗣者亦照例賜祭。甲辰先



是昭莫多之捷有厄魯特曼濟受傷被擒至是曼濟以其妻子在噶爾丹所求歸

上命遣之至大將軍處偕阿旺丹津齎敕文諭噶爾丹丹濟拉等敕曰

皇帝敕諭噶爾丹丹濟拉等朕統御天下要以中外一體為務往者烏闌布通之役爾等雖經敗北朕尚欲與爾等會約以定喀爾喀之事故使命屢頒爾等乃違棄誓言搶掠納木扎爾陀音竟至克魯倫地方朕親率師欲與爾會同定議遣使申諭爾復狐疑不信不親見朕使及朕至克魯倫爾遂望風奔潰遇朕西路之兵爾先犯我顏行遂至喪師敗衄盡棄駝

寶錄卷百七

八

馬牛羊子女廬帳什物爾眾寨桑台吉等接踵來降丹濟拉格壘沽英車陵奔等寨桑十五人亦願歸服遣察罕哈什哈來陳奏悃誠朕已面諭遣還今朕又親率六師遠蒞於此且各處調兵邀截爾等妻子馬畜諸物俱已散亡衣食已盡勢迫無歸況時漸嚴寒朕不忍爾屬下厄魯特妻子相失窮困凍餓而死特遣諭招撫今重復降敕爾等若悔前愆俯首向化朕一體加恩撫恤俾各得所爾部下厄魯特亦得妻子完聚咸獲生全朕斷不念爾舊惡况爾部落人內有被我軍所俘其父母妻子尚在爾處不忍分離願歸故土者朕皆恩賚賜之坐騎糗糧即令遣歸使其骨肉完聚其欲內附不願歸

清 實 錄 康熙三十五年十月

者朕皆富貴之各得生養爾部人曼濟重傷為我軍所擒今

曼濟言其妻子尚在爾處因欲告歸朕是以給之恩賞賜以坐騎糗糧使齎敕遣回爾地爾等思尚能自存有能收養爾等之人否其熟籌之今已無所歸爾等可速領餘眾抒誠歸順朕必令爾等家富身榮各遂生養惜此厄魯特如許生靈被爾驅迫至於此極今若又不覺悟聽信匪言則後悔莫追矣爾其勿疑勿懼特諭 丙午諭內大臣等歸化城當留一大臣受厄魯特降人完其夫婦給以衣食著散秩大臣宗室永吉侍衛漢楚翰等隨駕至湖灘河朔仍回住歸化城安郡王等出行已久俟察哈爾兵往替與黑龍江兵同歸到歸化

寶錄卷百七

九

城後其隨從人等俱著回京將軍薩布素疾未愈不必隨駕將伊所帶官兵一百十人率往大同養馬以待大將軍伯費揚古處兵五百到時亦往大同養馬如大將軍處有急務即撥兵六百前赴大將軍處 以喀爾喀多爾濟青台吉行間効力授為扎薩克一等台吉 命督運于成龍等運湖灘河朔倉米一千五百石至大將軍伯費揚古軍前喀喇穆冷地方 丁未

上由歸化城駐蹕衣赫圖爾根郭爾之南 諭尚書馬齊朕詢侍衛馬武知右衛兵丁步行者多食亦缺乏可每人賞銀三兩 陞陝西甘肅布政使郭洪為甘肅巡撫 戊申右衛兵

九〇七

既到

上親視賜食命內大臣索額圖等傳諭曰戎行効力我朝之常朕欲勦滅噶爾丹親統大軍進討噶爾丹望風逃竄過爾西路之兵遂大敗之爾等乏糧步行而能奮勇敗敵殊為可嘉是以朕親臨賜食盡免爾等所借官庫銀加恩於得傷病故之人衆官兵叩首謝恩歡聲動地 授鎮國公宗室額爾圖女為鄉君壻阿巴爾圖為鎮國公壻 已酉  
上駐蹕達爾漢拜尚地方 山西巡撫溫保布政使甘度等來朝 遣喀爾喀和碩扎薩克圖親王策旺扎卜長史馬尼圖等齎敕招撫厄魯特丹津阿拉布坦丹津鄂木布敕曰

實錄卷一百七十七

十

皇帝敕諭丹津阿拉布坦丹津鄂木布朕統御天下撫恤黎元務使人人得所方愜朕懷先是爾厄魯特與喀爾喀互相讐怨朕特遣使頒諭令爾等永相和好而爾等俱違朕諭自起戰爭迨喀爾喀既敗而來歸朕為天下元后不忍坐視其滅亡是以納之注其名籍酌量封為王貝勒貝子公扎薩克與以厚祿咸致富貴俾各得所噶爾丹乃不顧朕拯救天下生靈借喀爾喀為兵端闢入烏闌布通之地既被我兵所敗雖詭誓遁逃朕猶數遣使頒諭令其會約以定喀爾喀之事噶爾丹心懷叵測違背誓言掠納木扎爾陀音越克魯倫而前朕親統大軍欲與會約特遣使往告噶爾丹狐疑不信不與

實錄卷一百七十七

十一

朕使一見及朕親至克魯倫即望風敗遁過朕西路官兵彼先逆戰遂至大敗子女牲畜盡被俘獲丹巴哈什哈等先來抒誠後沙克朱木等接踵歸附俱給以官職令其貴顯足其衣食使之富有固已各得其所其來降之衆內有子女被我兵所俘者皆行察出令其父子兄弟夫婦完聚今朕又親統六師各路皆已調兵阻截噶爾丹倘不來降必窮其所往爾丹津阿拉布坦丹津鄂木布前雖附噶爾丹然皆非倡亂之人今歸降之人皆云爾等與噶爾丹分析各居朕嘉爾猶知天道能自振拔憐爾之馬畜等物散失衣食已絕特遣和碩扎薩克圖親王之長史馬尼圖多羅郡王昆都倫博碩克圖之烏勒木濟多羅郡王墨爾根濟農之阿玉什又屬下之喇嘛羅卜藏班珠爾亦願招安爾等今同持諭前往其扎薩克圖汗之子先經離散朕已收留覓爾岳母令與相會封為親王食以厚祿頻加撫恤頃又賜以牛羊馬羣擇地令其游牧使之得安生業享有富貴此顯然明驗也敕書一到著即率爾部落來降前此依附噶爾丹之咎朕概不介意必待爾以富貴爾之部落亦使各得生業妻子完聚從容度日丹巴哈什哈等朕尚憐恤使之富貴况爾等乎若爾尚有疑懼今春策妄阿喇布坦之使來時稱爾與策妄阿喇布坦甚善皇上若滅噶爾丹請勿討丹津阿拉布坦令其與我會合且策妄

阿喇布坦屢遣使納貢敬慎有加故朕亦深加憐惜爾若同  
丹津鄂木布往附策妄阿喇布坦處朕亦不窮詰爾其向朕  
使明白回奏倘於此二者不審一自處傲倖於厄黑阿拉爾  
空屋賴齊斯希等處棲身苟免朕斷不姑容必會同策妄阿  
喇布坦根敦戴青貝勒等剋期進討爾其早作良圖特諭  
諭撫遠大將軍伯費揚古朕駐蹕歸化城地方凡來降之人  
再四詳問皆言噶爾丹向哈密去若果往哈密則朕意以為  
擒獲益易哈密距嘉峪關十二日程行走亦便故朕意將所  
領兵竟赴寧夏有調遣處可相機行事必將噶爾丹擒誅始  
愜朕志但朕啟行後噶爾丹及丹濟拉等若稱投降降而來爾  
等兵力單弱而右衛兵無馬朕慮及此故遣使與汝商酌汝  
等會議速行奏聞朕在湖灘河朔待之 庚戌

上駐蹕麗蘇地方 奏

皇太后書曰十月二十七日頒示

慈旨齋到裘服外衣不勝歡欣但此間河尚未凍帳房中不須  
置火天無風雲時尚暖燠間或一日思就清涼之處與

皇太后違離遙遠意者念如前此之征行過為繁慮也茲時此  
衣且不服俟再加嚴寒即歡忭而服之二十八日至黃河此  
即鄂爾多斯部落謹奏 辛亥

上駐蹕湖灘河朔地方 免直隸獲鹿等二十七州縣本年分

水災額賦有差 以西路出征兵丁勞苦倒斃馬一千二百  
三十四匹免其賠償

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百七十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百七十八

康熙三十五年丙子十一月甲寅朔免江南泗州等八州縣衛本年分水災額賦有差 丁巳命增給右衛兵冬春二季糧草 諭理藩院鄂爾多斯多羅貝勒松阿喇布奏請於察罕托灰以外地方准其部人捕獵耕種著如所請行 厄魯特布達里來降奏稱噶爾丹見存千餘之兵數日來食用困乏天時寒冽潰散逃亡及凍餓而死者甚多又火藥軍器遺亡殆盡其寨桑諾爾布亦即日率衆來降矣

上命遣布達里赴京 以喀爾喀故多羅貝勒薩穆多爾濟之

實錄卷一百七十八

子諾爾布班第襲爵 戊午

上駐蹕喀林施會地方 議政大臣奏員外郎二郎保報稱阿玉奇台吉發兵一千以塞爾濟札卜寨桑領之策妄阿喇布坦發兵一千以楚呼郎寨桑領之額爾克巴圖爾台吉親率兵千許俱會集於阿爾台以內土魯圖地方駐劄四面設哨如遇噶爾丹即執而殺之如或生擒即行解送又達賴喇嘛使人尼麻唐胡土克圖卓磨龍堪布丹巴囊素達賴汗之使人寨桑及喀爾喀澤卜尊丹巴胡土克圖在西方之喀尊等共一百七十餘人在十一月望間可到西寧邊口到日即欲進京奏請

聖安訪其消息為青海諸台吉之事而來其行甚急如到西寧邊口或特差人馳驛護送來京或照伊等常例行走俟部奏明移文到日以便遵行應撥理藩院官一員乘驛速至西寧將尼麻唐等暫行留住問明來意如有奏章即著齎來若應令進口則遣人往召不則即行遣歸并行文二郎保不時探聽阿玉奇台吉策妄阿喇布坦等備兵出行聲息

上曰差遣司官必致遲誤著行文二郎保親身問明來奏 已未

上自喀林施會渡黃河駐蹕東斯垓地方時天氣溫暖自喀林施會東西數里外河水疾流獨我軍濟渡之處水堅盈尺

實錄卷一百七十八

上命軍士等分三路墊土輜重渡河如履平地衆蒙古等咸驚

訝云從來黃河自北方寒處凍起如此溫暖河皆不凍獨在中間結成厚冰不但未見亦所未聞也 諭內大臣等大同所養新滿洲侍衛護軍執事人員馬匹著速赴軍前 免湖廣潛江等九州縣衛本年分水災額賦有差并發穀賑濟飢民 庚申以兵科掌印給事中能泰為甘肅布政使司布政使 辛酉免直隸雞澤縣本年分水災額賦有差 免江南海州等二十州縣衛本年分水災額賦有差 壬戌上行圓駐蹕察罕布拉克地方 癸亥 上駐蹕瑚斯台地方 甲子厄魯特諾爾布寨桑來降授以散

秩大臣并賜

御用猞猁襖貂帽 乙丑

上駐蹕夸拖羅海地方 諭議政大臣等視厄魯特人攜妻子  
來降則噶爾丹窮困已極但噶爾丹乃極狡之賊恐彼不得  
已來降乘我兵不戒竊奪零散喀爾喀財物逸去應著侍郎  
滿丕郎中桑隔往善巴王汎界地方駐劄不時差人出汎界  
外偵探如有聲息即收喀爾喀入汎界內越大將軍營安插  
一面星速馳報前已有文檄知令滿丕等到彼後口傳旨諭  
大將軍伯費揚古可也 予出征厄魯特陣亡右衛護軍叅  
領噶麟祭葬如例 丙寅撫遠大將軍伯費揚古奏

實錄卷一百一十八

主

皇上以噶爾丹丹濟拉若來求降慮臣兵力單弱右衛兵無馬  
特頒諭旨令臣等議奏臣請調太原滿兵晉撫標下騎兵共  
一千及大同殺虎口未出征騎兵五百速赴軍前

上諭伯費揚古曰太原府兵未嫻行陣且至歸化城將千里其  
綠旗兵止各乘一騎值此嚴寒即得到已不自支緩急用之  
必至誤事今撥火器護軍一千礮手二百四十前鋒二百六  
十共足爾所調一千五百之數為爾豫備目前馬甚肥衣亦  
厚此係隨朕親兵故極嫻熟朝聞信息晚即可行朕暫駐蹕  
於此俟噶爾丹實信今若來降即星速遣至行在如有噶爾  
丹來降之信若不速徹汎界外喀爾喀信其降而坐待之則

誤大事不淺矣近來丹濟拉差人詐降而又來襲糧餉可為  
明鑒今不待復誤當益詳慎遠慮可也 丁卯予故京口副  
都統柏天毓原任正白旗漢軍副都統楊蔭祥各祭葬如例  
戊辰京師地震 以甘肅按察使囊吉里所運翁金糧  
餉遲誤命革職 已已

上駐蹕哲固斯台 撫遠大將軍伯費揚古奏言臣遵奉諭旨  
於十一月十四日遣侍郎滿丕等駐扎他拉布拉克地方哨  
探噶爾丹聲息報聞 庚午撫遠大將軍伯費揚古奏言王  
善巴差長史伊白根來報噶爾丹使所屬格墨沽英等二十  
人來請納款已知會侍郎滿丕等令親身至厄魯特來人處

實錄卷一百一十八

四

或有奏章取來驗視如無奏章問明速報

上命議政大臣等速檄大將軍伯費揚古將格墨沽英本身及  
一僕人撥官一員星速乘驛押來本朝所差厄魯特津巴等  
如與伊等同至則俱令前來其餘厄魯特暫留枯卜地方如  
有奏章即著齎至格墨沽英寨桑等如未到伯費揚古處著  
遣從別路而來毋使窺見營壘亦不得令見伯費揚古 副  
都統阿南達奏十一月初七日哨卒來報見有飛塵臣率兵  
往邀其來路因彼已過追至百有餘里於素爾河邊皆拘之  
係達賴喇嘛使人達爾漢鄂木布青海博碩克圖濟農使人  
阿爾達爾寨桑彭素克台吉使人寨桑和碩齊又問其所往

言我等通問於噶爾丹今自噶爾丹所歸去見有噶爾丹使人與我等同歸查噶爾丹使人喇克巴彭楚克格隆等男婦子女五十餘人噶爾丹族姪顧益多爾濟及男婦子女三十餘人又卓里克圖等男婦子女十餘人臣親率兵為殿悉押至肅州交鴻臚寺綏黑圖遣達爾漢鄂木布前往外餘俱拘禁肅州候旨其噶爾丹囑託達賴喇嘛照看伊子塞卜騰巴爾珠爾書二并呈奏

上以示議政諸臣 辛未諭尚書馬齊左都御史于成龍等遵米至喀喇穆冷交付大將軍事竣之日即著伊等分駐各站辦理坐塘事務○副都統西爾哈達等奏請出兵効力

實錄卷一百一十八

五

上曰西爾哈達費仰古瓦爾大祖良璧馬雲霄著將軍博爾濟量帶往 癸酉噶爾丹多爾濟遣使請安

上諭尚書馬齊曰聞厄魯特之噶爾丹多爾濟近日窘乏著於甘肅藩庫內支銀千兩賜之并給來使銀兩 命安郡王馬爾渾兵自歸化城撤回 甲戌命撫遠大將軍伯費揚古減從乘驛星速前來商議軍中機務將軍著舒恕暫理 諭尚書馬齊曰多羅貝勒松阿喇布奏請運糧効力可令前鋒叅領阿魯一等侍衛巴楚喀偕往押運 免江南沔陽沛縣徐州衛本年分水災額賦有差 乙亥貴州安籠總兵官蘭泗以老病乞休允之 丙子

上駐蹕瑚斯台地方 免直隸滄州清苑等四州縣本年分水災額賦有差 戊寅

上駐蹕東斯垓地方噶爾丹使人格壘沽英至

上命領侍衛內大臣索額圖尚書馬齊詢之格壘沽英曰我從前貿易來京歸時噶爾丹問

天朝兵勢何如我言進口時見城池甚多各有兵鎮守人皆富足兵之強否雖不得而知但我等在寓所時有

聖上親近侍衛名蘇達者來買皮張年甚少而所執之弓甚勁我等俱不能開以我度之斷不宜輕動噶爾丹從此疑我至丹濟拉乃我至親我既投降降彼亦必來歸順矣奏入

實錄卷一百一十八

六

上召格壘沽英諭曰朕為天下元后萬國一家喀爾喀厄魯特向皆職貢本朝之國朕初無偏徇喀爾喀土謝圖汗執喀爾喀扎薩克圖汗而殺之又殺汝主噶爾丹之弟其曲實在喀爾喀後喀爾喀為爾國所敗前來歸朕朕憐彼十萬餘身命失其生路受而養之凡有人窮迫來歸者朕皆收養無分彼此不但喀爾喀即厄魯特今雖構兵有來降之人朕皆軫恤各使得生路量材授之官職雖被俘擄之人皆贖還其妻子完彼骨肉朕豈以喀爾喀厄魯特有異視乎前以噶爾丹無故闖入我境侵內地蒙古朕遣兵敗之於烏闌布通之地爾主噶爾丹窘極遁逃立誓不復犯邊朕向以至誠待人故

不遣兵窮追爾主逆天背誓離其故巢竊伏克魯倫地方侵掠納木扎爾陀音朕不得已統兵出塞然仍再三遣使約噶爾丹會盟修好此朕不嗜殺人之心爾主不自引罪朕始整兵進討噶爾丹不能抗我軍威日夜奔逃適遇西路預備之兵亦係噶爾丹先犯我軍故我師乃進戰大敗之汝今窮困至此極者皆爾等自取非朕欲陵之也爾既奉使而來弟公言之毋隱格壘沽英叩首奏曰

皇上仁育無私孰不傾心悅服噶爾丹若迷而不悟不歸仁化徒自取滅亡而已已卯諭議政大臣等天下當以仁感不可徒以威服今朕原無征噶爾丹之意皆噶爾丹所自取且

增錄奏書末

七

噶爾丹兇暴朕惟待以寬仁噶爾丹奸狡朕惟示以誠信嘗覽經史言惟仁者無敵今噶爾丹窮迫已極遣格壘沽英前來乞憐朕意仍欲撫之諸臣奏曰此真天地好生之心實從古所未有也

上曰古之將帥雖善用兵多戮已降或其身不得善終或子孫不昌此皆好殺之明戒也又古之人主或窮兵黷武好大喜功朕意不然惟願宇宙雍熙四海昇平家給人足各得其生而已格壘沽英可仍遣回 庚辰冬至祀

天於

圜丘遣皇太子允初行禮 遣官祭

永陵。

福陵

昭陵

暫安奉殿

孝陵

仁孝皇后

孝昭皇后

孝懿皇后陵

命停止次日朝賀 遣噶爾丹使人格壘沽英還命員外郎博什希筆帖式閻壽齋救偕往救曰

皇帝敕諭噶爾丹丹濟拉等前者遣察哈代又遣曼濟救諭爾

增錄奏書末

八

等如引罪來降則朕並無異視概為矜恤務使得所爾屬下厄魯特亦得見其妻子朕斷不念爾等過惡當詳計之有能收養爾等之人否今已無所歸矣爾等率其餘厄魯特作速來降朕必使爾等富貴各得其所今若仍不悔悟聽信匪人之言後悔難追毋疑毋懼亦已明白開諭汝等矣今爾噶爾丹丹濟拉又遣格壘沽英來奏曰蒙大沛恩綸不勝懼忭意必大加恩恤故遣格壘沽英覆奏朕以諸事詳諭格壘沽英遣之歸去前二次遣諭汝等敕內開載甚明但遵前旨速降之外更無別旨為此特差員外博什希筆帖式閻壽齋救前往特諭



上又諭格墨沽英曰爾還語噶爾丹令其親身來降否則朕必往討朕在此地行獵待爾限七十日內還報如過此期朕即進兵矣正立限遣發之時包衣大達都虎奏曰

御用米糧將盡矣

上怒曰達都虎搖惑衆心可斬也如糧盡則取湖灘河朔之米何慮之有糧雖盡朕必嚙雪窮追斷不回師宣諭後又將往幸邁達禮廟遣鄉導修路於時諸軍皆不喻既遣格墨沽英復使人隨之出二十里外

上遂傳令班師衆皆大悅是日駐蹕黃河西界薩爾虎拖舍地方○辛巳陞大理寺卿熊一瀟為都察院左副都御史○以

實錄卷一七八

九

監察御史格爾特為甘肅按察使司按察使○壬午封厄魯特巴圖爾額爾克濟農為多羅貝勒

十二月癸未朔甲申撫遠大將軍伯費揚古來自軍中

上命入行宮與語良久續召議政諸臣前諭曰朕謂噶爾丹乃熟於戰陣之狡寇滅之必需時日孰意一戰立至敗亡前者伯費揚古曾奏西路兵四月二十四日可至土喇二十七日可至巴顏烏蘭故朕即統軍前進後杳無聲息在察罕布拉克侍之數日若果西路兵如期而至兩路夾攻則噶爾丹之兵一人亦不能脫矣其時諸臣尚欲待之於拖陵朕計西路兵將到土喇朕軍不可不前遂統軍疾進雖噶爾丹懾我軍

威潰遁而西路以疲困之衆遇敵戰勝勢如破竹實為可嘉伯費揚古奏曰臣軍中機務皆謹遵

皇上指授手書密諭而行並未能別出意見有所効力況西路兵已糧匱馬之不能前進及聞

駕至克魯倫衆官兵無不奮發齊言

皇上出自深宮尚且先至敵境我等敢不冒死前進故不俟督催奮勇克敵噶爾丹之破敗皆

聖謨神武之所致奈臣庸劣以

皇上窮追困感之寇不能生擒以獻實臣罪也

上顧伯費揚古曰噶爾丹被我軍擊敗後散者散降者降故朕復親臨塞外欲相機而行今觀陸續降人及格墨沽英之言

實錄卷一七八

噶爾丹窮蹙是實朕意不忍悉加屠戮不如撫而活之故於爾未至之前朕即降旨招降費揚古奏曰

聖意迥出非常真天地好生之仁也○厄魯特車陵伊拉古克三胡土克圖遣使投誠命理藩院檄諭招撫之○乙酉

上駐蹕湖灘河朔之南以

御佩囊韃弓矢等物賜大將軍伯費揚古遣赴大軍○丙戌

上駐蹕秋倫鄂洛木地方○丁亥

上駐蹕哈當河朔之西○命領侍衛內大臣馬思喀率兵留駐大同秣馬以候調遣○戊子

上駐蹕西尼拜星地方 己丑

上駐蹕殺虎口城內 諭戶部朕惟治天下之要惟以久安民生為急顧欲安民生必除寇虐欲除寇虐必事師旅方今案宇昇平人咸樂業獨厄魯特噶爾丹狂逆邊塞荼毒生靈朕思為邊境人民永絕後患故特遣發銳旅分道進剿朕躬不憚勤勞以今歲春月親統中路大兵深入無水草之地直抵拖訥比噶爾丹聞朕親臨盡棄輜重倉皇宵遁適與西路大兵相遇大敗潰散俘獲其人口其寨桑等來歸甚眾而噶爾丹收殘賊千餘人仍竄伏於枯倫百爾齊爾等處地方朕因於冬月復統軍出邊相機勦撫行抵鄂爾多斯於是厄魯特

實錄卷五十八

七

人民來歸者絡繹相屬噶爾丹力窮勢蹙亦遣格豐沽英具奏乞降隨經頒示敕諭許其歸順惟是噶爾丹乃狡詐巨測之人其果否來降未可深信應仍屬兵秣馬待來歲出師撲勦務絕根株比年以來軍前需用馬匹在大同府屬牧養者甚多措辦草料等項雖俱支用正項錢糧而供應浩繁殊勞民力但必此賊盡滅然後邊外蒙古賴以輯寧而在內生民亦獲休息師旅之興大非得已該郡官民尚各勉力急公勿以煩苦為慮朕茲從邊外回蹕雲中深軫民力之艱用沛特恩以示寬恤康熙三十六年大同府屬州縣衛所應徵地丁銀米著全與蠲免俟噶爾丹殄滅之後朕自誕布德音渙敷

麻澤爾部即行文該撫通行曉諭俾咸悉朕惠愛黎元至意

特諭 庚寅

上駐蹕右衛城內 命前鋒統領碩鼐率兵屯駐右衛聽大將軍伯費揚古調遣 辛卯以右衛護軍統領宗室費揚古為右衛將軍 諭大學士阿蘭泰鑲白旗滿洲都統伊勒慎年邁庸劣著解任延綏總兵官柯彩居官不職失士卒心著解任前來 調鑲白旗漢軍都統郭布為本旗滿洲都統陞正白旗漢軍副都統雷繼尊為鑲白旗漢軍都統調右衛左翼副都統馮國相為正白旗漢軍副都統陞右衛護軍叅領宗室揚福為右衛左翼副都統張家口副將施世駿為延綏總兵官 諭大學士阿蘭泰山西巡撫溫保丁憂員缺著將內閣學士倭倫陞補溫保居官不善可傳諭倭倫毋效伊所為著即赴任 壬辰

實錄卷五十八

七

上駐蹕左衛城內 癸巳

上駐蹕高山城東 諭尚書馬齊今邊外蒙古馬瘦之時恐誤急務爾可前往沿邊安塘至寧夏并閱大兵所行之路來奏免江南上元等三縣本年分水災額賦有差并發倉穀賑濟 甲午

上駐蹕大同府城內 山西巡撫倭倫布政使甘度總兵官康調元等來朝 乙未

上駐蹕望闕屯 陞太常寺卿李錦為大理寺卿 以故二等

精奇尼哈番王用子子王珏襲職 哈密回子額貝都拉達

爾漢白克遣使奏言若噶爾丹來臣等相機竭力擒之若聞

聲息陸續奏聞

上以其誠心內附特賜蟒袍貂帽金帶等物 丙申

上駐蹕天城 丁酉

上駐蹕北舊場 柰曼旗下都統摩特鄂欽於從前派兵時規

避出征命革去都統解京當差 戊戌

上駐蹕宣化府城內 以順天府府尹蕭永藻為廣東巡撫

己亥

增錄卷一七八

七

上駐蹕舊保安城內 授青海額爾德尼台吉納木扎爾土謝

圖戴青封號 青海額爾德尼台吉納木扎爾奏請給黃草

灘地方捕獵遊牧

上以黃草灘已屬內地不准給 庚子

上駐蹕懷來縣 辛丑

上駐蹕昌平州城內 諭巡城御史等隆冬煮粥賑貧定例自

十月朔起至歲終止今歲歉收飢民覓食猶艱著展限兩月

壬寅

駕發昌平州皇太子諸皇子及在京文武大臣等迎駕

上由德勝門入回宮詣

皇太后宮問安 陞翰林院侍讀學士席爾登為內閣學士兼

禮部侍郎 以內閣學士張榕端提督江南學政工部侍郎

李枏提督浙江學政 陞太僕寺卿楊爾淑為太常寺卿

陞湖廣寶慶副將林鴻為貴州安籠總兵官 予正白旗故

領侍衛內大臣輔國將軍宗室額奇祭葬如例 癸卯

上詣

皇太后宮問安 丁未

孝莊文皇后忌辰遣

皇四子 祭

暫安奉殿 諭領侍衛內大臣大學士等朕此次出師察獲回

增錄卷一七八

七

回國王阿卜都里什特子孫及阿爾虎里白克等妻子今即

速遣還之可馳諭川陝總督令回回國王阿卜都里什特暫

止還國侯伊等眷屬到時令其完聚偕往 命大將軍伯費

揚古酌發總管觀寶官兵前往大同整治器械牧養馬匹預

備明春出征 庚戌領侍衛內大臣公福善等遵諭議叙厄

魯特降人土克齊寨桑等分別授職得旨著以土克齊寨桑

米寨桑韓都台吉為一等侍衛以馬穆古英寨桑哈爾巴達

爾漢寨桑丹巴額爾德尼寨桑授為二等侍衛津巴巴奇

阿穆呼郎鄂羅思授為三等侍衛八拜台吉吳山岱杜噶爾

額爾克索諾木車陵授為藍翎庫濟思希達爾漢哈什哈霍

岱授為七品官 撫遠大將軍伯費揚古遵旨覆奏噶爾丹使人歸去經過地方所設哨汛彼俱窺見將哨汛移遠已令散秩大臣策旺諾爾布往多羅郡王滾布處侍衛鄂齊爾杜扯兒往和碩親王善巴處嚴加巡察倘噶爾丹來降即將噶爾喀遷汎界內集兵在後護送報聞 辛亥

上詣

皇太后宮問安、歲暮給祭

太廟遣兵部尚書開音布行禮 遣官祭

水陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵 遣官祭太歲之神 諭大學士等黑龍江吉林

烏喇地方頻歲不登可移文盛京將軍令整繕船隻將盛京

倉儲米穀以彼地人力運五千石至莫爾渾阿敦之地積貯

之 又諭今歲自天津海運至盛京之米已給散科爾沁貧

乏之眾來歲仍當自天津運米至盛京其轉運船隻不必用

福建浙江二省者止用天津船輓輸一次可諭侍郎陶岱

又諭去歲霸州等處州縣曾運通州之米與被災百姓減價

平糶閭閻甚為得濟今年水災更甚應如去歲運米於各州

縣平糶可敷直隸巡撫沈朝聘何州何縣當運米若干與民

懋遷之其作速詳具摺奏聞勿緩俟開印時也 諭戶部朕

惟治安天下惟期民生得所而欲民生得所必以數恩寬賦

為要朕於一切事務少有動用民力之處即塵懷殷切刻不

能忘比年以來因厄魯特噶爾丹狂逞逆命遣發大兵分道

進剿軍興供億不得已而煩民力甘肅所屬各州縣衛所及

榆林等處沿邊各州縣衛所適當師行要道喂養軍前需用

馬匹並大兵往來經過各項措辦雖俱支給正項錢糧而供

億繁多閭閻勞苦朕心深用軫念著將康熙三十六年甘肅

巡撫所屬州縣衛所陝西巡撫所屬榆林等沿邊州縣衛所

地丁銀米盡行蠲免行文各該撫徧加曉諭務俾小民均沾

實惠稱朕體恤黎元至意甘肅所屬銀米既經全免需用錢

糧著於鄰近省分作速撥給爾部即遵諭行 副都統阿南

達奏言臣遵旨令喀爾喀等部下人充鄉導查自寧夏至翁

金河二千一百餘里自翁金至薩克薩特呼里克一千餘里

薩克薩特呼里克在什爾哈之南喀喇阿濟爾罕山之陽自

翁金前往道由什爾哈及通金乃抵其地自嘉峪關至哈密

約二十日內路程。哈密之東有巴爾庫爾自嘉峪關前往亦二十日內路程。由巴爾庫爾至薩克薩特呼里克約九日路程。報聞。壬子賜朝正外藩科爾沁阿霸垓土默特翁牛特郭爾羅斯敖漢喀爾喀巴林喀喇沁等王貝勒貝子公及內大臣大學士上三旗都統副都統尚書侍郎學士侍衛等宴旌表八旗節婦滿洲溫查妻查氏等九十四人蒙古班第妻趙氏等二十三人漢軍孫兆龍妻曹氏等十一人直隸各省節婦王英妻田氏等九人各給銀建坊如例。是歲人丁戶口二十四十一萬三千八百八十二。田地山蕩畦地五百九十八萬六千四百五十四頃六十七畝有奇。徵銀二千七百三十九萬七千四百二十四兩有奇。米豆麥六百九十六萬八千一百三十二石有奇。草二百八萬一千六百一十二束。茶十五萬七千四百五十三引。行鹽四百三十一萬九千三百七十引。徵課銀二百六十九萬五千二百八十二兩有奇。鑄錢二萬三千七百六萬三千五十有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百七十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百七十九

康熙三十六年丁丑春正月癸丑朔

上詣

堂子行禮還宮拜神畢率諸王貝勒貝子公內大臣大學士侍衛等詣

皇太后宮行禮御太和門王以下文武各官外藩王及使臣上表朝賀停止筵宴○朝鮮國王李惇遣陪臣李焜等表賀冬至元旦

萬壽節及進歲貢禮物宴賚如例○甲寅。

上詣

皇太后宮問安○乙卯。諭兵部朕欲駐蹕右衛近則易於調遣其出師日期著於二月初後選擇。尋欽天監奏擬於二月初六日辰時從之○諭理藩院尚書班迪等令觀噶爾丹勢甚窮蹙天與不取坐失事機應撥兵預備今次出兵亦分為兩路兵各三千名此兩路兵不必預定期約令相機而行。綠旗營派兵從少馬則從多方可與滿兵同行米則照常隨行外沿邊有牛羊可買者動支正項錢糧每路各買牛羊二萬發去於軍資大有裨益至運米以馬駝為要亦當多備須選賢員往甘州寧夏採買爾等集議以聞尋議覆大同所有前鋒

四百烏鎗護軍一千。火器營兵二百黑龍江兵五百並留駐大同新滿洲護軍二百駐扎寧夏副都統阿蘭台兵七百共合三千令一路進征將軍博齊率西安兵二千見駐肅州再令將軍孫思克於所屬標營內選兵一千每人酌給馬匹合為三千令一路進征應給綠旗兵之馬即於綠旗兵馬內選肥壯者給與至所需駝馬騾驢牛羊在肅州寧夏採買每處選部院賢能官五人與督撫地方官會同採買得旨軍中所需駝馬牛羊在寧夏者交西安副都統阿蘭台採買在肅州者交駐扎宣化侍郎席密圖往肅州採買著照時價勿得短少。至大將軍伯費揚古如目下有事仍率前鋒統領碩鼎所備之兵而行如目下無事在大同養馬俟出兵則率前鋒與是軍同行黑龍江兵應令往右衛屯駐預備餘如議尋差侍讀學士阿爾賽等十員分往寧夏阿蘭台肅州席密圖處會同監買○命副都統西爾哈達馬雲霄隨西安將軍博齊出兵○丙辰。

上幸南苑行圍○丁巳。

上回宮○戊午。

上諭議政大臣大學士等行兵者以道路為至要朕已召嚮導萬舒克博洛等若輩到時遣嚮導親近一等侍衛僧圖同見駐大同之護軍參領車克楚前往寧夏選西安官兵內勇健

者百人率至古爾班賽堪地方詳細閱視道路去來約需四

十日伊等於途間或遇噶爾丹之人則生擒之相敵即殺之

若與伊拉古克三胡土克圖相遇亦並擒之諭大學士等

兩路出征兵丁其盛中器械百口口糧當用牲口幾何此次

兵丁行李須較去年春季兵丁行李從輕估算著與部院大

臣會議尋議今次出兵每兵一名從僕一人給馬五匹四兵

合為一伍其帳房器用等物俱照前帶去前帶八十口糧

今帶百口將馱子比前減輕每馱得九十四觔其于成龍王

國昌喻成龍李鈺喀拜辛保范承烈等俱情願効力運米應

將軍夏兩路隨運之米交伊等運往命下之日著于成龍等

實錄卷一百七十九

三

速往寧夏將押米綠旗兵丁口糧等物及派管理官員等事

與該督撫會同料理所買牛羊隨其所得押送得旨陝西總

督及甘肅巡撫內著一員來寧夏理事餘如所議諭兵部

著黑龍江將軍薩布素回京養病以賢能官一員為首領代

管兵丁已未

世祖章皇帝忌辰遣官祭

孝陵庚申孟春享

太廟遣禮部尚書佛倫行禮遣官祭太歲之神辛酉祈穀

於

上帝

上親詣行禮

上奉

皇太后幸暢春園壬戌

上詣

皇太后宮問安癸亥給大將軍伯費揚古官兵僕從口糧

甲子順天府進春乙丑

上詣

皇太后宮問安丙寅以上元節賜外藩科爾沁阿霸垓高齊

忒土默特阿霸哈納翁牛特敖漢扎魯特喀爾喀巴林喀喇

沁等王貝勒貝子公及內大臣大學士侍衛等宴丁卯上

實錄卷一百七十九

四

元節賜外藩手貝勒貝子公及內大臣大學士侍衛等宴

戊辰奉差寧夏戶部尚書兼署理藩院事馬齊以察勘行途

宿次並安設驛站事竣回京覆奏報聞副都統阿南達疏

言臣欽遵

皇上密旨傳諭哈密額貝杜拉達爾漢白克遣其子郭帕白克

率兵於巴爾思庫爾地方擒逆賊噶爾丹之子塞卜騰巴爾

珠爾及微特和碩齊等解至臣軍前

上命示議政大臣等己巳議政大臣等議覆振武將軍孫思

克疏言哈密額貝杜拉達爾漢白克報稱噶爾丹有至巴爾

庫爾之狀臣請於二月二十日前後進布隆吉爾等處探聽



應令孫思克等遠設斥堠以探實音如噶爾丹至巴爾庫爾等處孫思克等作速領兵赴勦毋失機會如噶爾丹尚未有來信則二十日前後不必往布隆吉爾去候旨而行從之

諭原任勇畧將軍趙良棟頃尚書馬齊自寧夏回奏卿臥病不能動履用是深軫朕懷特賜人參鹿尾馳示存問尚其善加調攝俾夙疾頓痊副朕眷注至意○理藩院題烏朱穆泰阿霸垓萬齊忒阿霸哈納土默特喀爾喀王貝勒貝子公等情願自備馬匹從軍効力

上曰伊等馬畜不足著各歸家不必從軍後有奏請者皆以此旨示之○庚午

上詣

皇太后宮問安○賜朝正外藩王貝勒貝子公台吉等銀幣鞍馬有差○諭撫遠大將軍伯費揚古得駐扎肅州副都統阿南達疏報擒噶爾丹之子塞卜騰巴爾珠爾於哈密之地時當燈節眾蒙古及投誠厄魯特皆齊集暢春園西門其疏一到眾皆大悅爾獨居邊塞不得在朕左右殊深軫念故抄阿南達報文發爾知之並賜昨肉鹿尾關東魚等物即如與爾相見朕躬安爾無恙否噶爾丹作何料理不失機會朕與諸臣議定後另有旨特諭 辛未命都統蘇努巴渾德阿席坦齊世塞冷額等出征

上諭曰兵衆不齊行趨前落後勞馬甚多爾等當嚴趨行其嚙雪之馬不可即飲水又大同兵再令支三月錢糧食米在右衛設虎口支取其大同新滿洲護軍二百仍令在大同喂馬候駕即將此諭旨交兵部速發馬思喀 壬申諭內大臣等前以投誠來京厄魯特應與建房居住故命議政諸臣集議令厄魯特在此病故者甚多其將伊等送至張家口外交與各該旗參領監管管應給糧餉仍照常分給則伊等可以謀生矣既安插張家口外應停止建房○癸酉

上詣

皇太后宮問安○甲戌諭大學士等曰觀九卿凡保舉人員非

係師友即屬親戚是皆漢人相沿惡習天下官員朕一人何能周知惟左右大臣是賴誠善者善而惡者惡據實敷陳則善者勸而惡者懲矣國家事安有不理者乎況科道乃耳目之官如總兵卓策柯彩許盛居官最為貪鄙朕聞其軍民皆怨乃為懲治前此科道官曾有題參者否爾等以朕旨宣諭倘後仍蹈前轍必不寬貸又諭曰朕向曾諭近侍曰溫保改行矣及巡歷山西觀通省無一好官巡撫溫保迎至邊外觀其動作無一善狀即保舉之員亦無一人可用似此則人皆不可信矣 江南江西總督范承勳河道總督董安國等疏言臣等會勘河道自永安以至邳宿二州縣閘王廟一帶亟

宜修築得旨河道事務關係重大不可遲延俱著依該督等所奏速行修理雲梯關乃海口要地此處淤沙深濬則黃河入海不致阻滯著總河每年遣才能河官專理毋致壅塞諭大學士等觀明史洪武永樂所行之事遠邁前王我朝見行事例因之而行者甚多且明代無女后預政以臣陵君等事但其末季壞於宦官耳且元人譏宋明復譏元朕並不似前人輒譏亡國也惟從公論耳今編纂明史著將此諭增入修明史敕書內○調鑲白旗護軍統領蘇昌為右衛左翼護軍統領○諭理藩院戶部屢年以來察哈爾八旗官兵從征効力甚苦伊等向無俸糧自今察哈爾官員著比照京官俸量減給與目下護軍暫給二兩驍騎暫給一兩以後護軍每月仍給二兩驍騎一兩爾等作速定議具奏即於二月支俸時給之尋議覆八旗察哈爾在邊外者及世襲官俸應照京官俸四分減三給之叅領佐領以下等官應照京官俸減半給之前鋒護軍每月一名給二兩驍騎及執事人員每月一名給一兩此官員內有見食俸者仍照常給與見任官員內有世襲者當照減等之數量給年幼官員尚未當差宜停其給與所給官兵俸糧俟行役既罷生養充足之日再行奏止從之○乙亥

上詣

皇太后宮問安○吏部題正藍旗一等阿思哈尼哈番雅爾泰故無親子孫兄弟應以親伯之子根度襲職得旨著與雅爾泰叔祖之子鄂通多承襲○以翰林院侍讀揆叙充日講起居注官○調吏部左侍郎安布祿為理藩院右侍郎○丙子命領侍衛內大臣馬思喀為昭武將軍先往寧夏○旌表福建烈婦邱氏孀居遇暴不從慘死給銀建坊如例○戊寅上奉

皇太后自暢春園回宮○己卯

上詣

皇太后宮問安○諭戶部淮揚徐各處去歲水災小民困苦萬

實錄書末

狀朕心深為憫惻康熙三十五年各項錢糧著盡行蠲免其三十四年未完錢糧於三十七年帶徵著即通行曉示務使災民均沾實惠○山西大同總兵官康調元以老病乞休允之○轉吏部右侍郎阿爾拜為左侍郎調戶部左侍郎陶岱為吏部右侍郎轉戶部右侍郎庸愛為左侍郎○陞都察院左副都御史貝和諾為戶部右侍郎○免順天府密雲縣康熙三十五年分額徵豆二十餘石○庚辰陞江南江西督標中軍副將俞益謨為山西大同總兵官○予故都察院左副都御史黃斐祭葬如例○辛巳以戶部郎中賽璋為山西按察使司僉事提調學政禮部郎中周爰訪為江西按察使司僉

事提調學政戶部郎中陸鳴珂為山東按察使司僉事提調學政工部郎中歐陽旭為雲南按察使司僉事提調學政工部郎中左峴為廣東按察使司僉事提調學政禮部郎中卜景超為貴州按察使司僉事提調學政戶部郎中陸德元為陝西按察使司僉事提調學政刑部郎中張仕可為河南按察使司僉事提調學政戶部郎中汪徽為福建按察使司僉事提調學政

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百七十九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百八十

康熙三十六年丁丑二月壬午朔欽天監豫奏日食分數上諭大學士等曰日食雖人可豫算然自古帝王皆因此而戒懼蓋所以敬天變修人事也若庸主則諉諸氣數矣去年水潦地震今又日食意必陰盛所致豈可謂無與於人事乎可諭九卿如有人事應修改者悉以奏聞 陞大理寺少卿梅銅為太僕寺卿 陞湖北按察使王毓賢為貴州布政使司布政使 癸未調內閣學士哈山為都察院左副都御史陞通政使黃茂為內閣學士兼禮部侍郎 以鑲黃旗漢軍都統公鄂倫岱為領侍衛內大臣陞鑲白旗蒙古副都統圖席希為本旗護軍統領 督運都察院左都御史于成龍等奏此次運米九千止有臣等七人恐前後不能管攝請遣旗員及情願効力人等分管押運至牽駝負米乃蒙古兵所習請將附近地方之鄂爾多斯兵從多派出使之牽駝

上曰旗員及効力人等並准帶往大同見有察哈爾兵一百六十名爾等經其地可率之前去其鄂爾多斯貝勒該管官員一并帶去又諭曰馬聚一處必至受傷著以肥馬在前魚貫而行但所負過重則遠道難以長驅爾等酌量可負二百觔者率以百觔為準至運之之法亦照坐塘遞運為便于成龍

等奏請帶理藩院官及勘合大牌隨行

上從之 甲申命大學士伊桑阿領侍衛內大臣索額圖舅舅公佟國維公福善內大臣明珠公長泰尚書席爾達侍郎哈雅爾圖安布祿努赫學士黃茂護軍統領高祝孫渣齊蘇丹托倫前鋒統領碩鼎等從征 召督運都察院左都御史于成龍等問曰爾等何日起程于成龍奏俟効力運米官齊集同行

上曰爾此意即謬矣人臣宜以國事為重勤勉自効豈可援引朋類當此軍務緊急爾宜率先啟行餘令陸續隨往若必俟眾同行豈不誤事爾自任巡撫及為總河惟知援引私人其

實錄卷一百八十

二

後運米亦仍如此爾在河工曾帶二百餘人前往迄今未用一人欲任意援引得乎爾又云寧殺于成龍至効力人等不可不用此語豈非沽名干譽之意乎朕已屢加嚴飭爾竟不悛何也朕於國家之事未嘗膠執已見惟虛已以視機宜即用兵之道亦復如是一日之中千變萬化朕統大兵至克魯倫時亦視賊之形勢隨機而應並不豫立已見論語云母意母必毋固毋我聖人之言至當不易爾惟執已見前此運米已因待眾誤事今又欲俟眾同行此意不過欲扶助黨類令其感激耳用人之權豈人臣所得專擅朕今用人若有保舉官員亦必就中論俸陞補即素所深知者亦視其効力之處

酌量用之否則俱使論俸朕乃天下之主用人之際尚不肯任意為人臣者乃妄意自擅可乎大抵欲援助人者後必自己獲罪爾其戒之 以刑部郎中劉體元為廣西按察使司僉事提調學政雲南永昌道王琯為湖廣按察使司副使提調學政 陞左僉都御史常翼聖為順天府府尹 乙酉上詣

實錄卷一百八十

三

皇太后宮問安 諭吏部都察院國家設立都御史及科道官員以建白為專責所以達下情而祛壅蔽職任至重使言官果能奉法秉公實心盡職則閭閻疾苦咸得上聞官吏貪邪皆可釐剔故廣開言路為圖治第一要務近時言官條奏參劾章疏寥寥雖間有入告而深切時政從實直陳者甚少此豈委任言路之初旨乎自今以後凡事關國計民生及吏治臧否但有確見即應指陳其所言可行與否裁酌自在朝廷雖言有不當言官亦不坐罪自皇于諸王及內外大臣官員有所為貪虐不法並交相比附傾軋黨援理應糾舉之事務必大破情面據實指參勿得畏怯貴要瞻徇容隱即朕躬有失亦宜進言朕決不加責其有懷挾偏私借端傾陷者朕因言察情隱微自能洞悉凡屬言官尚各精白乃心力矢忠謹以無負朕殷切責望至意爾部院傳諭行 吏部遵旨將起復原任科臣蘇俊等五員職名開列啟奏

上曰科道職司耳目年來並無一人陳奏故朕將見任言官嚴飭又將伊等起復言路必大開矣此後條奏內如果可行即批准行否則俱批知道了若一概交部議覆必多更張成例之弊况朕令其陳言原欲聞軍國要務如但以浮詞細故塞責陳奏殊非朕求言本意丙戌兵部題西路出征陣亡病故官兵請加恩卹

上曰中路出征病故官兵亦當察明加卹其隨征病故督捕侍郎戴通著亦加恩卹山西道御史周士皇疏言小醜已極困窮計日就戮請

御駕不必再臨沙漠

實錄卷行分

四

上諭大學士等曰覽周士皇條奏雖臣子之情當然但周士皇未知其中之故耳噶爾丹兇惡一日不可姑留前在烏關布通地方猖狂肆逆朕已遣兵敗之猶不悔過復竊伏我克魯倫地方朕親統大軍勦除畧盡今窮困已極故乘此機會親臨塞外酌量調度前三逆反叛吳三桂煽惑人心遂至滋蔓竟至榆林等處朕日夜綢繆調遣大兵幾費心力方得撲滅今蕩平年久人遂視為易事且窮兵黷武好大喜功朕所深戒朕亦曾作詩發明此意著諭明周士皇伊所奏雖不當朕亦不罪也丁亥遣大學士李天馥祭先師孔子是日

上行兵寧夏命皇長子允禔隨駕設鹵簿出德勝門駐蹕昌平州以吏部尚書熊賜履禮部尚書張英為會試正考官都察院左都御史吳璥刑部左侍郎田雯為副考官以鎮國公門度為纂修

王牒總裁大學士阿蘭泰王熙兵部右侍郎覺羅三寶內閣學士羅察為副總裁陞盛京戶部理事官噶禮為通政使司通政使戊子祭

大社

大稷遣戶部尚書馬齊行禮

上駐蹕岔道副都統阿南達疏報自哈密擒獲厄魯特土克

實錄卷行分

五

齊哈什哈並其妻子女共四口由驛遞解京命議政大臣議奏尋議土克齊哈什哈係害使臣馬迪之首犯相應將土克齊哈什哈並其子扎卜立決其妻女給馬迪之家為奴得旨土克齊哈什哈之子扎卜著免死亦給馬迪之家為奴餘依議上諭大學士伊桑阿據員外郎阿爾必特祐疏言達賴喇嘛另有一疏并口奏三語據來使尼麻唐胡土克圖云達賴喇嘛第巴曾囑不得妄與他人俟見聖上方許呈覽今朕親臨邊境著阿爾必特祐將尼麻唐胡土克圖及卓爾磨隆堪布減其從役馳驛帶來諭內大臣等輜裝行時約束最為緊要若照常專令大臣管理視為故套嗣後著大臣二員每

旗侍衛十員護軍校三人管束大臣職名每日開列具奏朕親閱派遣侍衛不論新舊輪班派出管轄輜裝馱載或偏即扶助之一遇險阻之地照看管束朕躬時或在輜裝之前或在輜裝之後巡視查問若違誤必行治罪派出大臣等所管轄日期每日記之 己丑

上駐蹕懷來縣城西 奉差達賴喇嘛理藩院主事保住回至莊浪疏言臣於十一月二十二日到烏斯藏奉

聖旨一一曉諭第已第已奏言臣庸流末品蒙

皇上俯念達賴喇嘛優封臣為土伯特國王臣正思仰答

皇恩焉敢違

實錄卷百十

六

聖旨而附逆賊噶爾丹乎況臣之榮顯安樂皆

皇上所賜臣苟背

皇上而向他人必當壽數夭折總之謹遵

聖旨而外更無異詞至

上諭四事第已回奏云

皇上聖明先知達賴喇嘛明歲出定遣兩喇嘛前來識認臣心甚喜溫春喇嘛向與達賴喇嘛同居十年今伊識認自能立辨此兩喇嘛俟至達賴喇嘛出定驗明回奏其時衆疑自釋至前者

皇上遣內齊陀音胡土克圖等召班禪胡土克圖時自達賴喇

嘛及臣等皆遣使勸令赴京彼初亦願往後因來使口出恫喝過激之言遂云不往迨使臣歸後噶爾丹之使始至臣並不借噶爾丹巧辯即班禪胡土克圖亦豈肯聽噶爾丹之言乎

皇上必欲班禪赴京臣焉敢違旨當啟聞達賴喇嘛必諭令班禪約定赴京之年交後去之喇嘛晉已扎木素奏明其時作何加恩遣使總祈

睿鑒至濟隆胡土克圖於烏闌布通之役不遵

聖旨致事未成反在噶爾丹與尚書阿喇尼交戰後德懋噶爾丹賀之以白首帕故臣籍沒其家產遷之於喀木地方今欲

實錄卷百十

七

遣之與欽差赴京所在遼遠往返須兩三月恐為日遲久在皇上好生之心於濟隆胡土克圖必不加誅罰臣當委婉引來與晉已扎木素同往以副

聖意至博碩克圖濟農與噶爾丹結姻之事在喀爾喀厄魯特未交惡之前阿奴尚在策妄阿喇布坦之際即已結姻其餘

臣雖不敢保而青海八台吉俱達賴喇嘛弟子但願為

皇上効力並無二心臣可保其不背

皇上也

皇上仁愛天下黎民有如赤子噶爾丹之女已嫁博碩克圖濟農之子免送京師不致夫婦離散此臣所禱而求之者也我

土伯特人不諳禮法止以無知獲罪臣未嘗知而故犯也即有無知之罪乞欽差奏明

皇上伏祈寬宥仍賜溫旨等語遂於十二月初十日以覆奏本章交臣起程而歸臣今至莊浪先將第巴奏答情由具本由驛遞馳奏外其第巴覆疏并賀滅噶爾丹表使人囊素楚奈臣親身隨後帶來到京又喇嘛晉巴扎木素等疏言前者奉旨謂臣等二人素識達賴喇嘛著驗明回奏而第巴又謂達賴喇嘛前身見在是實爾等可看明回奏竊思

皇上遣委之事尚未明晰如何可棄之而去是以臣等公議將給達賴喇嘛款書賞賚諸物不曾頒給俟達賴喇嘛出定時

驗明再歸復命故特留此

上報聞且以示議政諸臣 四川陝西總督吳赫疏言大軍所需駝馬奉旨於肅州寧夏等處購買今甘肅巡撫郭洪興侍郎席密圖等於肅州購買臣則往寧夏與副都統阿蘭台公同督買但思駝馬係大兵急需一時購買未必足數請暫借西安八旗及各標營馬八千五百匹派出官兵送至寧夏以應大軍之用其各標營缺馬令陝西巡撫動支正項錢糧照時價給與兵丁買補從之 庚寅

上駐蹕沙城堡 理藩院主事諾爾布疏言臣於康熙三十五年十一月二十九日到塞稜額之都蘭努和地方多羅貝勒

根敦額爾克戴青已於十一月初三日病故十二月二十六

日丹津阿拉布坦處有達什等男子六人及婦女幼穉共二十三人逃來言噶爾丹丹濟拉皆在巴格爾察罕烏爾克地方丹津阿拉布坦在扎巴哈之濟思布隆地方丹津鄂木布從古爾班塔米爾率三百人叛噶爾丹往洪郭羅而去十一月初一日噶爾丹差車陵奔言於丹津阿拉布坦云我今在巴格爾察罕烏爾克地方勢不能居哈密城中有糧欲往彼處爾今何如丹津阿拉布坦云我亦將往河卜多地方留車陵奔兩日遣還本月十七日從扎巴哈之濟思布隆向河卜多游牧而去我等隨至濟達渾地方逃出丹津阿拉布坦有七百許人噶爾丹及丹津阿拉布坦之人逃回策妄阿喇布坦者甚衆

上曰多羅貝勒根敦額爾克戴青及阿爾薩蘭衛寨桑之處有厄魯特男子婦人仍著主事諾爾布筆帖式鄂禮鄉導達濟鎖諾木等自王古祿西希貝勒汪扎爾旗分取馬駝糗糧赴根敦額爾克戴青阿爾薩蘭衛寨桑處盡收伊等所有男子婦人徐徐遷至汎界地方如其內婦人有喀爾喀已娶為妻及單身男子或不願來者聽之勿強 辛卯

上駐蹕上花園東 諭大學士伊桑阿今欲遣大臣一員攜青海扎什巴圖爾台吉之使鄂木布博碩克圖濟農之使羅豐



額木齊博碩克圖濟農之族子額爾德尼台吉屬下納木喀拉木扎巴等往青海諭令其台吉等來覲著都統杜忠噶爾台吉阿拉卜灘德木楚克並少卿薩爾徒去 理藩院題侍郎滿丕解送降人厄魯特阿玉什等夫婦阿克楚必夫婦及幼童一名索諾木往歸化城交收管厄魯特之副都統阿迪上命發厄魯特阿玉什等至張家口交坐塘官員俟後來厄魯特到歸并撫養 壬辰

孝康章皇后忌辰遣官祭

孝陵

上駐蹕宣化府 議政大臣等議覆副都統阿南達疏言噶爾

寶錄卷百十  
十  
賈多爾濟至臣所告曰我寨桑阿昭赴京蒙

皇上俯念我祖鄂齊爾圖車臣汗降以溫綸我不勝歡躍噶爾丹乃殺我祖父不共戴天之仇我力雖不能報復今幸天兵勦蕩我願率領所部從大軍効力事畢赴京叩謝

皇恩應如所請從之 副都統阿南達疏言臣遣喀爾喀扎薩

克台吉索諾木伊思查卜台吉玉木楚木藍翎侍衛布達等

率一百四十人於哈密以內四五日程呼已塔爾賽哈等地方坐哨於二月初一日起行報聞 諭撫遠大將軍伯費揚

古朕以二月初六日出京於十一日至宣化府觀此際情形噶爾丹窮困已極雖欲歸降自彼至此亦豈易易寧夏地方

去噶爾丹所在薩克薩特呼里克格隔特哈朗古特甚近已令參領車克楚近御侍衛僧圖等領西安寧夏兵一百人前至伊克教拉探視伊等報稱於二月初三日已起程矣為此諭知朕意欲令將軍孫思克博霖等領兵三千人為一路出嘉峪關或取道哈密或取道巴爾庫爾前進俟車克楚還時所值路可行則更以三千兵為一路出寧夏進新勘之路設不可行則以兩路為一路擇地而進事宜可濟朕欲往寧夏親視大兵糧餉地方情形汝意更復云何特為商畧其遣往第巴處主事保住報文付去令知 癸巳

上駐蹕左衛南 諭副都御史努赫爾每日親率科道官一員

寶錄卷百十  
十  
在於輜重之後如沿途跟役人等妄行之徒有掠奪民物相

攘鬪者即行查拏指名奏 副都統阿南達報解噶爾丹之子塞卜騰巴爾珠爾等並噶爾丹所差往哈密取糧之鄂木克圖哈什哈等二人及噶爾丹送與桑克拉什胡土克圖等書四封於二月初三日起程赴

御營

上諭議政大臣等曰前既陣斬噶爾丹之妻阿奴喀七今又生擒其子賊之本根已斬噶爾丹雖各處偷生其年老邁能延幾何其子為我所獲是乃天之所賜也凡用兵之道要在乘機噶爾丹窮迫已極宜乘此際速行勦滅斷不可緩朕今親

臨寧夏相度機宜調遣軍士賊聞之必魂魄俱喪其部屬亦必張皇而別部蒙古聞朕親臨寧夏各欲見功扼噤爾丹而圖之彼若不自盡亦必為人擒獻克成大事正在此舉又諭曰朕親歷行間塞外情形知之甚悉自古以來所謂難以用兵者是也其地不毛間或無水至瀚海等砂磧地方運糧尤苦而雨水之際樵爨頗難區畫不周豈可妄動朕今親臨寧夏凡有可用兵之地必詳察行道水草全備馬駝糧糗等物然後起程稍有可疑雖諸臣勸行朕亦不允也 一等侍衛米依奏前噶爾丹以臣充使率回子一千五百人來至汎界地方侍郎滿丕止臣不許前進差臣齎敕書回噶爾丹處此

實錄卷百十

三

項回子一千五百人俱往投青海後噶爾丹遣人至扎什巴圖爾台吉處令其收留此項回子勿使往

皇上及圖爾胡特策妄阿刺布坦處今

皇上招集噶爾丹屬下之人此項回子原係臣帶來之人臣願隨前往青海大臣將回子等收來

上允之 命給巴圖爾額爾克濟農所收屬裔口糧撥兵護送

至賀蘭山 甲午

上駐蹕懷安縣 議政大臣等議覆西寧坐哨員外郎二郎保疏言阿齊滾布巴圖爾台吉遣圖卜新寨桑馬木特來請聖安并言青海諸台吉聽從我台吉之言如蒙

聖上加以恩綸我台吉遵依而行自即歸降矣查招撫青海諸

台吉已經派遣大臣今應令來使圖卜新寨桑馬木特隨奉差大臣前往另頒諭旨與阿齊滾布巴圖爾台吉令與奉差大臣共商相機招撫從之 理藩院右侍郎安布祿疏言副都統阿南達解到投降之厄魯特台吉察罕多爾濟顧蒙多爾濟等應俟伊等父母妻子到日另行奏聞得旨伊等俱係投誠有功之人著交山西巡撫送至大同善養之其父母妻子戶口到日令其完聚仍暫養於大同 乙未

上駐蹕天城 諭大學士伊桑阿修理道路專責之地方官恐至太過可遣鄉導官役保布宣修一車可行之道足矣山西

實錄卷百十

三

道路著按察使已錫道員王輔鳩工督修令侍郎常綬前去按站備辦草料柴薪并豫備尚書庫勒納等解到駝馬所需草料柴薪渡黃河後陝西路濶無庸大修或有宜畧修處著常綬等驗視令地方官修之尚書馬齊所派宿程太近若役保布宣照朕此行以五六十里為一程若修路太過勞及百姓責在役保布宣與地方官無涉也 丙申春分朝日於東郊遣都察院左都御史傅臘塔行禮 遣官祭先農之神

上駐蹕陽和城 督運都察院左都御史于成龍等至大同上命先赴寧夏候駕 丁酉

上駐蹕聚樂城 諭內大臣等著傳旨與貝勒松阿喇布令噶爾丹已將成擒其子塞卜騰巴爾珠爾已被獲近聞噶爾丹在薩克薩特呼里克之南格爾特哈朗古特地方衆僅四百人又青海諸台吉俱降見有人來請安朕今親臨寧夏著將右翼三旗貝勒公台吉等兵共派二千以備調遣爾蒙古裝載駱駝監管牧放素能習練可豫備以待俟朕到寧夏應從何路前進候旨行著侍衛綽克圖前去傳諭左翼王貝勒貝子台吉等毋以朕往寧夏間道前來請安爾等有能効力者往貝勒松阿喇布處伺候以聽指揮 諭副都統吳達禪右衛所有厄魯特降人著撥戶部理藩院官各一員解往張家口曼都處如伊等馬駝羸瘦難行著內務府郎中董殿邦助之沿途糧草及賞賜衣服等類亦令董殿邦給與董殿邦可住右衛如大將軍處解到厄魯特即收養之如解到者多則逐隊送往張家口俟青草出後董殿邦往歸化城住待大將軍解到厄魯特即從外送往張家口曼都處 戊戌

上駐蹕大同 諭大學士伊桑阿自古帝王巡狩凡所過地方前代帝王陵寢先賢墳墓及名山大川皆行致祭此其盛典也朕今巡行沿途所經其有古帝王陵寢先賢墳墓名山大川皆詳察具奏應致祭者祭之 諭內大臣等侍郎多奇阿爾拜俱派出養馬多奇先派數月較阿爾拜所養者羸瘦急

實錄卷百十

古

實錄卷百十

十五

玩軍需著革職軍前効力俟回時拏交刑部 諭右衛將軍宗室費揚固山西巡撫倭倫等頃給發右衛官兵丁米豆草價值較時價減少以致窮兵苦累亦未可定又詢察大同府所屬州縣衛所之民運送右衛官兵馬匹所用草束殊為苦累可將官兵之馬各留一匹於右衛餘馬發附近州縣衛所酌派官員兵丁看守飼養小民可免運送之苦此後每草一束作何給價著議政大臣大學士在事官員會同爾等議奏 山西巡撫倭倫大同總兵官俞益謨等來朝 己亥陝西岷州六寺番僧丁桑節落旦等進貢宴齋如例 庚子

上駐蹕懷仁縣 諭撫遠大將軍伯費揚古朕於十七日抵大同分析兵馬十九日由邊內起行赴寧夏今噶爾丹如此窮蹙斷不至於用兵萬一有噶爾丹前來聲息須星速報聞朕當從寧夏進襲其後如噶爾丹屬下人來降或遣使來當訊明速奏 辛丑

上駐蹕鄭家莊東 諭山西巡撫倭倫陝西巡撫党愛甘肅巡撫郭洪等朕比年出師勒寇總期又安邊徼永輯民生茲厄魯特噶爾丹業已勢蹙力窮畏死悔罪遣使具奏乞降朕特親統六師再臨邊塞相機勦撫因乘便巡覽邊境形勢察視軍民生業遂發禁旅取道邊外朕自大同從內地前赴寧夏一路地方見緣邊州縣地土瘠薄軍民生計艱難朕心深切

軫念一切御用所需皆自內廷措辦不以煩民扈從人員俱極簡少市易之物悉依時值誠恐有強取抑價等事已令都察院及科道官逐日稽察糾劾其經過城堡衛市輒多結綵殊覺擾累嗣後著通行禁止乘輿巡幸本為安民豈可反勞民力爾等務嚴飭有司不得借端科派仍張示曉諭俾窮簷編戶咸悉朕曲體民依至意 陞山東登萊道高緝睿為湖北按察使司按察使 壬寅

上駐蹕榆林村前桑乾河崖 奉差達賴喇嘛理藩院主事保住回至

御營以第巴疏呈奏

平錄卷之十

七

上以示議政大臣等曰第巴之疏爾等意以為何如議政大臣等奏曰第巴差尼麻唐胡土克圖面奏今尚未到應俟伊到日再行議奏

上曰朕意與爾等之意不同朕閱經史塞外蒙古多與中國抗衡自漢唐宋至明歷代俱被其害而克宣威蒙古並令歸心如我朝者未之有也夫兵者凶器聖人不得已而用之譬之人身瘡瘍方用鍼灸若肌膚無恙而妄尋苦楚可乎治天下之道亦然亂則聲討治則撫綏理之自然也自古以來好勤遠畧者國家元氣固不虧損是以朕意惟以不生事為貴達賴喇嘛蒙古等尊之如佛第巴者即代達賴喇嘛理事之人

噶爾丹叛逆皆第巴之故因朕遣主事保住嚴頒諭旨第巴悚懼悉遵朕諭奏辭甚恭自陳乞憐畏罪矢誓此亦敬謹之至矣至達賴喇嘛身故朕已悉知今第巴云遣尼麻唐胡土克圖前來代彼密陳其情想尼麻唐胡土克圖到後必奏明達賴喇嘛已經身故懇朕為伊等掩飾達賴喇嘛與我朝交往六十餘年並未有隙第巴既如此奏懇事亦可行即此可以寬宥其罪允其所請第巴必感恩而眾蒙古亦歡悅矣諸臣奏曰

聖算至神非臣等所及○癸卯

上駐蹕朔州城○甲辰

平錄卷之十一

七

上駐蹕大水溝地方○乙巳

上駐蹕義井地方○予故終養回籍原任甘肅總兵官二等精奇尼哈番王用子祭葬如例○丙午

上駐蹕三岔堡○授蒙古一等鄉導額蘇克阿南達等為達爾漢襲四次餘各賜銀有差○丁未

孝昭皇后忌辰遣官祭

陵

上駐蹕李家溝地方先是鄉導官言李家溝無水及行至河曲縣界見渠中有水問之鄉人云水至兩三日矣

上既駐蹕水忽從山溝湧出俄頃長至二三尺而成河人馬資

用不竭鄉人聚觀咸驚異云此地向無大水今因

聖主臨幸所以山川效靈百神助順從此可為永遠之利矣

戊申

上駐蹕輦鄆村是日途次山嶺險峻從人輜重難行

上親督近侍協助俟其過盡然後啟行先是尚書馬齊設驛派程奏輦鄆村僅二井水少從人皆以乏水為慮

上甫至行宮南山之下見有水痕眾趨視之地中各處湧泉頃刻流溢眾咸歡呼曰昨言水少水即驟至今言水少甘泉又復湧出如此神異誠

天之所以佑

實錄卷百八

九

聖主也 諭山西巡撫倭倫朕撫御區宇念切民依故不憚勤勞親歷邊境惟孳孳以靖寇安民為急茲聞約扈從人員從大同一路緣邊地方進指寧夏因徧察閭閻生聚及土壤肥瘠收穫豐歉之狀邊民生計維艱朕心深用軫惻雖一切供御之物纖毫不以累民而乘輿臨幸宜特敷庥澤以示恩卹除大同額賦已有諭旨豁免外其經過奇嵐州河曲縣保德州所屬地方並各衛所康熙三十六年應徵地丁銀米通與蠲免爾即行令該管官吏張示徧諭務俾窮鄉僻壤均霑實惠以稱朕撫育黎民至意 己酉

上駐蹕保德州 諭山西巡撫倭倫聞爾居官好家計亦貧特

賜爾御用貂服一襲朕理政事日以民生為念爾能以朕如保赤子之心保民即所以報朕也爾其識之 庚戌上自保德州渡河駐蹕府谷縣城南 遣官祭黃河之神

實錄卷百八

九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百八十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百八十一

康熙三十六年丁丑三月壬子朔命領侍衛內大臣公福善

索額圖等查隨駕人員內有馬羸者著調換綠旗兵營馬每

匹給銀五兩○癸丑

上駐蹕孤山堡西○皇子允禮生○先是命主事薩哈連出神

木邊往詢從邊外至榆林及至寧夏之路計幾宿水草何如

至是覆奏自神木出邊至榆林共三百二十里凡五宿俱砂

路自邊關外至寧夏之正路無人知之但由神木過鄂爾多

斯貝勒汪舒克所居阿都海之地接擺站大道有一路從此

而往則自神木至寧夏計八百七十里凡十四宿但自神木

邊至察罕扎達海五十家驛路中水草柴薪無誤行道砂多

自察罕扎達海至橫城只路平水畧少奏入報聞著薩哈連

親出榆林邊問蒙古自榆林至寧夏之路并水草亦照此開

明在榆林候駕○予故議政大臣兼領侍衛內大臣蘇爾達

祭葬諡恪僖加賜銀五百兩○陞和碩顯親王長史魯伯赫

為鑲白旗蒙古副都統○甲寅

上駐蹕卞家水口○撫遠大將軍伯費揚古奏報厄魯特多爾

濟等挈妻子駝馬等物來降

上命傳多爾濟至御營其男婦馬駝交歸化城副都統阿第料

理○乙卯

上駐蹕神木縣○副都統阿南達遣護軍校阿奇納等解噶爾

丹之子塞卜騰巴爾珠爾至

上命侍衛引之入見塞卜騰巴爾珠爾伏地不敢仰視

上問曰爾父噶爾丹窮困已極降乎否耶塞卜騰巴爾珠爾惶

恐奏曰臣穉子無知想

皇上天威自必降也問以他事皆戰慄不能對隨遣送塞卜騰

巴爾珠爾等至京師命皇太子傳諭諸王內大臣及八旗大

小官員兵民人等閱視交理藩院拘禁○丙辰

上渡屈野河駐蹕○命自榆林至橫城口照鄉導官所分宿次

安設驛站俟駕至寧夏後撤回○賜哈密額貝杜拉達爾漢

白克及伊子郭帕白克等彩幣袍褂白金有差○丁巳

上駐蹕柏林堡西南○議政大臣等議覆哈密額貝杜拉達爾

漢白克疏言臣遣子郭帕白克擒噶爾丹子塞卜騰巴爾珠

爾必為四部厄魯特所仇其中左翼之怨尤深臣哈密微弱

所尤懼者策妄阿喇布坦也請敕理藩院移文青海諸台吉

及策妄阿喇布坦諭以哈密既已歸誠勿得侵擾應如所請

從之○諭議政大臣等朕至寧夏後方調甘肅兵前行似乎

少遲此時噶爾丹窮極之際西安滿兵二千甘肅綠旗兵一

千俱久在甘肅馬亦肥矣機會不可失宜速進薩克薩特呼

里克之地搜勦噶爾丹。此滿漢兵各帶百日糧。嘉峪關至薩克薩特呼里克地方甚近。不必運糧。如噶爾丹已通此軍計。糧而歸。各賞銀十兩。此外另有當行當奏之事。孫思克博爾濟阿南達等公議具奏。其哈密擒獻之俄摩克圖哈什哈遣至伊等軍中。倘有可行之機。即行進勦。如噶爾丹已遠遁。則差俄摩克圖哈什哈往諭之言。我軍非來征討。實來招撫。爾可速降。至遣寧夏兵駐郭多里巴爾哈孫地方。備禦之事。當檄將軍孫思克知之。○廣東巡撫高承爵丁母憂。命回旗守制。○戊午。

上駐蹕高家堡南。○陝西巡撫党愛按察使納璽迎。

實錄卷一百一十

三

駕。

上曰。爾等皆地方大僚。凡事當身先率下。朕巡狩親臨見爾等。竟不盡力。驛中備馬五百匹。而並無到者。緊急事務。豈可誤乎。若謂爾等老病。又未嘗早陳。今正有事之際。朕豈使爾等晏然罷去乎。此後宜小心効力。否則必治罪。○昭武將軍馬思喀疏報原任勇畧將軍趙良棟病故。

上召隨駕總兵官白斌等。諭曰。趙良棟偉男子也。行間著有勞績。但性躁心窄。每與人不合。有時奏事。朕前亦言語粗率。朕保全功臣。始終容之後。有疾朕嘗遣賜藥食。彼所奏無不准行。此特欲有疾者喜悅而速愈耳。今聞奄逝。朕殊為惻然。聞

趙良棟存日。與總兵官王化行不相能。朕至寧夏。務為其妻子區處。使之安生。斷不使受害於其仇也。○陞陝西神木副將周文英為四川松潘總兵官。○撫遠大將軍伯費揚古疏報厄魯特達喇什等率男婦一百餘人來降。將達喇什解赴御營。其餘男婦俱送交歸化城副都統阿第處。

上命示議政大臣。○議政大臣等議。覆振武將軍孫思克疏言。臣奉命率兵一千。與滿兵一路進勦。但遇敵交戰。則營中輜重不可不守。請再撥兵五百名。倘遇敵交戰時。以此兵守營。應如所請。從之。○己未。遣官祭。

歷代帝王。

實錄卷一百一十

四

上駐蹕建安堡東。○諭大學士等。隨駕人員搶奪強買民物。朕皆差官查拏。從重治罪。但恐京城後來者。及離大營在一二日後。至者。搶奪強買民物。亦未可知。著曉諭經過沿途地方官員。如有此等事。查拏指參。從重治罪。其衆人車輛不得攔阻。著通行傳諭。○庚申。

上駐蹕王關潤。○諭行在兵部。聞總督吳赫總兵官王化行於本月初六日自寧夏來迎駕。總督料理糧餉馬匹事甚緊要。不必前來。如已起行。適旨即刻歸去。總兵官王化行照常來迎。著速行檄知。○辛酉。

上駐蹕榆林。○主事薩哈連查明榆林至寧夏路程。回奏。自榆



林至橫城共七百三十餘里分為十宿水甚少路有大砂又有沿邊外至安邊一路共四百七十餘里凡七宿路雖小有砂而水草足用及問安邊以外到寧夏之路無人知之

上即命薩哈連往視安邊至寧夏之路○壬戌

上出邊駐蹕他喇布拉克地方○諭議政大臣等凡調遣外藩兵馬之事俱已交大將軍伯費揚古如皆請旨而行則有倉卒軍機必致遲誤嗣後俱聽大將軍便宜調遣○諭大學士等州縣已各論其地方大小積貯米穀兵丁所駐沿邊衛堡亦屬緊要其榆林等處衛堡亦照州縣大小中積貯之例將米穀積貯預備著交與該巡撫○癸亥

上駐蹕哈留圖郭爾地方○甲子清明節遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵

上渡無定河駐蹕庫爾奇拉地方○命學士黃茂同榆林總兵

官施世驃於安邊等九處視鄉導役保等所指下營之地每處增鑿井五口○給西安將軍博霖所領滿兵各馬二匹○副都統阿南達奏報哈密額貝杜拉達爾漢白克解到滾占之妻奴渾達喇所使之人厄魯特恩克達爾漢寨桑據云噶爾丹自被

聖上擊敗以來並無糧食難以為生故滾占之妻奴渾達喇去歲八月間離噶爾丹採捕禽獸度命欲投青海差至哈密乞糧是以被執解來

上以示議政諸臣○阿南達又奏言據噶爾丹多爾濟遣其寨桑阿好來報云我舊屬多爾濟阿兒達爾哈什哈等六口於

去年十二月內來言我等貧不能存去歲八月辭噶爾丹欲往舊主噶爾丹多爾濟處噶爾丹云汝去吾不汝阻即在吾左右吾不能養汝汝到彼可語噶爾丹多爾濟曰汝姐阿奴在日言我必以女鍾齊海嫁噶爾丹多爾濟我已允之矣今汝姐已沒此女或娶或不娶唯汝裁之其言如是我非欲娶此女但以其為噶爾丹囑我屬下人之言故令相告耳為此奏聞

上以示議政諸臣○乙丑

上駐蹕扎罕布拉克地方○諭行在兵部著前鋒侍衛祁薩木長史庫濟根為首領率侍衛津巴穆扎哈爾鄉導侍衛阿南

達羅卜臧什喇卜并選擇寧夏所有新滿洲三人帶往伊克敦拉巴漢教拉相度地里○副都統阿南達奏言三月初六日噶爾竄多爾濟遣其人阿爾達爾莽奈來言策妄阿喇布坦遣人致書於我我亦遣俄產等五人往答因此移知并送策妄阿喇布坦之書內云汝與我向為婚姻互相唇齒言歸於好亦衆所知後博碩克圖之事衆所共知然與我兩人毫無干涉如仍前和好想互有利也今聞彼遣阿兒達爾哈什哈來招爾將以其女妻之思其情殆因無定居之策故誑汝是實倘爾墮其計而娶其女則與衆為戎首倘謂我言不妄則毋結姻若以為妄亦唯尊裁問阿爾達爾莽奈曰猶有口

實錄卷一百八十一

傳之言否據云策妄阿喇布坦言我輩向來同好請仍前歸好恐墮其局而娶其女又前因行人之便寄書二次欲與和好何以竟不見答特遣人羅卜臧厄林辰往詢此言之外並無他語并將策妄阿喇布坦所寄噶爾竄多爾濟之書呈奏上命示議政諸臣○阿南達又奏言喀爾喀畢力克圖寨桑等背恩逃去諭降不從反來拒戰及至擊敗仍向青海而去今將前後所擒巴爾達等男婦子女四十三口驛解前來上命議政諸臣會議尋議應將見獲四十三口內男子正法子女俱賞給擒獲効力蒙古綠旗官兵俟獲畢力克圖寨桑之日再議從之○丁卯

上駐蹕通阿拉克地方○主事薩哈連勘明邊外之路回奏云自安邊由口外至橫城共四百八十里凡七宿惟三處有水其餘當宿之地無水草亦惡邊外不可行故告之鄉導布筵筏保等前去從邊內編次宿站報聞○理藩院奏前因駕出榆林由邊外幸寧夏故自榆林起設驛至橫城口內止候駕臨寧夏撤去今

駕出榆林進安邊應不必設驛至橫城口但設至安邊候駕進安邊撤去其所設驛馬仍各交安塘筆帖式等趕解地方官護送至寧夏得旨邊外草佳此馬從外趕赴寧夏○戊辰上駐蹕安邊城東○恭奏

實錄卷一百八十一

皇太后書曰本月十六日駐營鄂爾多斯之境同噶拉克水泊皇太后慈旨以臣生日賜金銀茶壺二執齋到臣懽忭拜受仰惟

母后於二千里之外常為思念寄以如許之物臣臣非不知榮懷之切也去年出塞自春中之月至夏之中自秋杪之月至冬之末今復春將盡矣遠在原野不克侍左右而問安者亦祇為此一噶爾丹耳今賊子就擒其下離散乘此之時不可不盡去其根株臣至寧夏相機會而行為此謝恩謹奏○先是諭議政大臣等噶爾丹窘迫東向逃竄亦未可定應發滿洲綠旗兵攜百日糧至郭多里巴爾哈孫地方偵探堵禦將所

運米順黃河而下。分行之時。以駝騾馱運。著馬思喀與于成龍會議具奏。並著檄問寧夏叅贊諸臣。至是馬思喀等議覆。應發西安兵王化行兵京城。前鋒兵帶馬馱子。毋礮八門。是軍支百日糧。令總督吳赫速運糧到寧夏。備辦牛車三百輛。從之。○諭大學士等。速檄寧夏諸大臣。勿得遠來迎駕。以勞馬力。止令於黃河對岸迎接。其餘將士俱俟駕到寧夏之日。於近城地方迎接。○寧夏總兵官王化行迎。

駕并奏請

皇上行圍花馬池。以觀軍容。

上曰。朕行軍二次。深悉軍情。今噶爾丹未滅。馬匹關係緊要。寧

實錄卷一百一十

九

夏兵來花馬池。往來須七八日。馬必疲乏。夫獵細事耳。以擒獲噶爾丹為急。今罷獵而休養馬匹。以獵噶爾丹何如。爾速遣人傳諭所屬官兵。勿來花馬池。俟朕至寧夏閒暇之日。閱爾軍容。○已已。

萬壽節停止朝賀筵宴。○遣官祭

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵。○遣官祭真武東嶽城隍之神。○庚午。

上駐蹕定邊城。○撫遠大將軍伯費揚古解送來降厄魯特羅

卜臧汪扎爾格楚爾阿旺拉卜灘班第等至。

御營。并據稱噶爾丹尚在薩克薩特呼里克居住。天使博什希

閻壽等二月初一日到十五日見噶爾丹。在噶爾丹附近居

住者有丹濟拉阿拉爾拜等屬下共百戶。

上宣諭議政大臣。○尼麻唐胡土克圖等至行在。以第巴奏章

密奏。

上隨將彼奏章及所獻達賴喇嘛之像於原封之外面同伊等

實錄卷一百一十一

十

加封。押以鈴記。而諭之曰。朕數年來久知達賴喇嘛已故。若達賴喇嘛尚存。則僧已陳布胡土克圖噶爾丹西勒圖齊七克達賴堪布濟隆胡土克圖等。斷不如此妄行。喀爾喀厄魯特亦不致破壞。故朕降旨切責之。今第巴輸誠吐實。密以奏朕。朕亦為之密藏也。○辛未。

上駐蹕花馬池。○諭內大臣等。朕今已到寧夏。可檄知大將軍

伯費揚古二應事務。俱由鄂爾多斯地方新設驛站馳報。

諭領侍衛內大臣索額圖內大臣明珠大學士伊桑阿前者

朕以達賴喇嘛身故已久。第巴隱之。附和噶爾丹行事。故差

保住嚴詰。第巴預料第巴必自陳達賴喇嘛已故。乞為彼隱

諱。向亦曾與爾等言之。今彼差尼麻唐胡土克圖至。果密奏達賴喇嘛身故已十六年再生之小達賴喇嘛已十五歲。乞皇上暫隱之。勿聞於衆。與朕昔語爾等之言畧無少異。又諭曰。保住尚有未完之事。著與尼麻唐胡土克圖同往。賜達賴喇嘛使人尼麻唐胡土克圖等漆鞍羊裘蟒袍布帛白金等物有差。○理藩院奏主事已雅思呼朗報稱奉旨將原効力布顏努等十三人自湖灘河朔起至寧夏安十三塘已將安塘日期知會大將軍報聞。○壬申。

上駐蹕安定堡。○理藩院題尼麻唐胡土克圖羅卜臧凱尊囊素等齋到達賴汗慶賀擊敗噶爾丹一疏及第已二疏并所獻禮物請旨。

實錄卷一百一十一

十一

上以第已二疏命議政大臣等議奏。尋議覆第已疏言達賴喇嘛避忌坐禪。五年出定令尼麻唐胡土克圖密奏已奉

聖諭。應不議外。又疏言蒙召班禪胡土克圖今當遵旨問明班禪胡土克圖或即令赴京或另日前往定議再奏。應令將班禪胡土克圖赴京年月徐徐定議具奏。又言請俟後拘解濟隆胡土克圖伏乞

皇上留其身命。但濟隆胡土克圖係達賴喇嘛遣和喀爾喀厄魯特之人。乃竟不和解反導噶爾丹入境與我軍交戰。情罪可惡。前已有旨不誅濟隆胡土克圖。然務必解送來京。又言

噶爾丹女或令離異與否伏候

聖裁噶爾丹抗

君逆賊其女斷不得留於青海務令解送來京。又言臣以無知或有違

聖意之事伏乞寬宥。今當謹遵

聖旨竭力自効。祈俯念達賴喇嘛錫以溫綸。應如所請遣使頒諭從之。○癸酉。

上駐蹕興武營西。○振武將軍孫思克疏言奉旨令臣等乘噶爾丹窮困之時帶百口糧速往薩克薩特呼里克一帶地方進剿。但馬匹未能齊備。求敕兵部不論何項馬匹速解甘州。臣等即一面起程。一面奏聞。

實錄卷二百一十一

十二

上諭機會不可失。孫思克博齊等兵著即取伊附近綠旗兵之馬。如可不誤即令起行。一面奏聞。如不能得則扣糧減兵。即取所減兵之馬。馱糧而行。自寧夏進剿之兵朕意不過二千或二千五百。伊等如謂減兵則寡而難行者一處駐扎。止令寧夏之兵進剿。○甲戌。

上駐蹕清水營。○撫遠大將軍伯費揚古奏報自厄魯特處逃出滾濟鄂爾齋圖二人來降。言係喀爾喀扎薩克圖汗屬下人於倭羅會湖地方與厄魯特交戰。擄在丹津阿喇布坦處。并言筆帖式合色長史馬尼圖於正月十八日到丹津阿喇

布坦處我等二十三日逃來時尚未相見我等來時丹津阿喇布坦在布顏圖河不知將何所往聞噶爾丹在薩克薩特呼里克丹津鄂木布出洪郭羅矣不知何往丹津阿喇布坦等捕獸度日如不獲獸殺駝馬為食下人嗟怨言

皇上於西方處處屯兵盡執噶爾丹所差使人我厄魯特令無路可行矣奏至

上報聞且以示議政諸臣 乙亥

上駐蹕橫城（鄂爾多斯貝勒松阿喇布奏向准臣等於橫城貿易今乞於定邊花馬池平羅城三處令諸蒙古就近貿易又邊外車林他拉蘇海阿魯等處乞發邊內漢人與蒙古人

一同耕種

上命大學士戶部兵部及理藩院會同議奏尋議覆應俱如所請令貝勒松阿喇布等及地方官各自約束其人勿致爭鬪得旨依議日後倘有爭鬪蒙古欺凌漢人之事即令停止）宴衍聖公孔毓圻等於禮部（丙子）

上自橫城渡黃河駐蹕河崖（遣官祭黃河之神）諭大學士等趙良棟乃為國宣力建功之人不必以其躁急性偏為意今已身故來朝經過其門欲遣皇長子及部院諸臣往視致祭一次陳福曾為國効力適至此地亦應致祭一次（督運部察院左都御史于成龍等奏運米關係重大或緊隨大兵

或另設策運致伏候

皇上指示遵行

上曰米隨大軍運往重載長行馬駝必致委頓不若從驛站遞運更番休息為宜鄂爾多斯今已備四月之糧告請情願効力著伊等設百站遞運甚便又設站一事計自寧夏至郭多里巴爾哈孫大畧一千二百里自郭多里巴爾哈孫至伊克敖拉巴漢敖拉計行九日之程爾等扣算此路酌量安設又問曰見有船幾隻每船裝幾何一次可運米幾石于成龍等奏去歲有船百餘隻俱在河內但恐有損壞者請交總督吳赫作速修整一船計裝三十石今有船百隻則一次可運米三千石

上曰爾等船裝不盡之米著以駝馬馱運三千兵減去五百則駝馬有餘馱運自裕爾等計二千五百兵口糧帶往著作速修船勿得遲悞（丁丑）

上駐蹕寧夏（諭大學士等朕臨此地著查寧夏官兵去年在昭莫多翁金地方陣亡者兵丁賜之卹銀官員著遣官致奠）命按月給厄魯特降人叻墨圖等食糧（戊寅諭四川陝西總督吳赫曰朕巡幸沿邊地方詢察閭井生聚及土田沃瘠之狀自晉及秦經行三千餘里直抵寧夏所以勤求民隱至殷且切朔方資大河之灌注疏渠溉田宜於稼穡當茲春

氣暢遂正三農盡力南畝之時。誠恐有司官員不體朕懷。因車駕經臨。調遣師旅。借辭供億。擾累小民。東作有妨。西成奚望。今一切軍需芻糗。俱儲備足用。至扈從簡約。馬悉放牧。並不以供辦草豆動煩民力。爾可傳飭有司。勿借端科派違者治罪。務使地方百姓各安本業。屢無廢市隴不輟耕。以副朕親歷邊圉軫恤民依之至意。己卯諭內大臣等。今即酌量寧夏兵前到郭多里巴爾哈孫地方之日。檄令大將軍伯費揚古率兵來會。遣官祭賀蘭山之神。庚辰。

上出寧夏北門閱綠旗馬步兵操演畢。

上率諸皇子及善射侍衛等射。

實錄卷一百一十一

五

上親射二次發矢皆中。賜總兵官王化行白斌以下及官兵等宴。又遣近侍以

御用之物均賜衆兵王化行等率官兵謝

恩。歡聲動地。撫遠大將軍伯費揚古疏報出使噶爾丹之員

外郎博什希筆帖式閻壽同噶爾丹使人喇木扎卜丹濟拉

使人羅卜臧等并格壘沽英及其妻子十三口俱到邊哨先

以博什希奏摺驛送進呈。博什希等摺奏云正月二十九日

距噶爾丹所居薩克薩特呼里克以內二日之程抵台吉吳

思塔處止臣等母前。次日格壘沽英往告噶爾丹。二月初二

日噶爾丹使綽什希已圖爾來先領

敕書。十四日綽什希已圖爾來請相見。次日日落時噶爾丹至野外坐巖上。令臣等遠坐。使二人夾臣膝坐兩旁。不令近前。迭相傳語。噶爾丹曰。我聞

皇上沛此恩綸。不勝欣藉。自今

聖上凡有所諭。惟遵

旨以行而已。我之言已在疏內。我之意已語我使人。使人到日

當口奏也。語畢乘馬而去。丹濟拉遣其下常達里來言蒙

聖恩。口授格壘沽英以諭臣之

旨。即欲遵行。奈噶爾丹疑臣不復差遣。臣是以將中心欲奏之

言俱告之格壘沽英矣。今不便請欽差相見。是日綽什希已

實錄卷一百一十二

六

圖爾率拉木扎卜來云。昨派格壘沽英為使。彼挈其妻子潛

逃。是以另派拉木扎卜代之。奏疏及一應言語俱在。是人臣

博什希等於二十五日自薩克薩特呼里克起程。途過自京

前去之察哈代。言我與吳爾占扎卜之母達爾扎哈什哈之

妻子同行。至中途被劫。將吳爾占扎卜之母等劫去。我捧

敕書步行。已授噶爾丹。吳爾占扎卜之母等遇噶爾丹屬下阿

爾拜家人。送噶爾丹處。已交還吳爾占扎卜矣。其達爾扎哈

什哈之妻子家人亦交吳爾占扎卜暫養。又途過自京前去

之曼濟言。我於正月初二日見噶爾丹。授以

敕書。噶爾丹問



聖上之兵如何。我對曰。不知其數。兵甚多。并言丹已哈什哈察罕什達爾哈什哈已授職為內大臣。在京沙克珠木亦為內大臣。隨

駕而行。衆厄魯特俱加愛養。有離散之人。各處尋覓。

皇上親視配合。噶爾丹默然無言。一日。噶爾丹至諾顏格隆家。丹濟拉阿巴吳爾占扎卜俱在坐飲酒。吳爾占扎卜謂噶爾丹曰。我輩自去年冬以薩克薩特呼里克獸多。故居於此。今獸已駭散矣。如往降

聖上。則往近之。如不降。當另圖一策。首鼠兩端。而待斃乎。且爾欲扶法門之教。致四厄魯特七旗喀爾喀已畧盡矣。爾國已

實錄卷百八

上

破父子夫妻離散。究無補於法門之教。反造罪業而已。噶爾丹默然無一言。所有人丁共三百餘。其他俱各捕獵。遠去馬甚少。臆甚瘦。視噶爾丹情狀。大約不降。丹濟拉有欲降之意。又吳爾占扎卜之母歸謂噶爾丹曰。彼國大兵多。富而且盛。中華皇帝乃活佛也。敵人母子遣使完聚。爾等從前亦曾聞有。是否。其餘非常之舉。言之不盡。阿旺丹津言奉

旨。差我使於伊拉古克三胡土克圖。故不往噶爾丹所居地方。又不知伊拉古克三胡土克圖所在。是以與曼濟同歸。於是帶諸人同行。三月初九日至哈密圖布拉克地方。遇格墨沽英。言我見噶爾丹述

中華皇帝口傳之

旨云。爾以追喀爾喀之故而來犯我。爾之理曲。我之理直。故天佑我而擊敗爾。爾雖為我敵。而朕不以擊敗爾為喜。爾今無所往矣。此天之下。君無大於朕者。如倚朕為生。必得生路。爾果來歸朕。則寬爾之罪。寵榮養育。爾雖欲不降朕。豈於爾漫然而已乎。宣諭畢。噶爾丹默然無語。問我曰。

中華皇帝大畧何如。我對曰。爾降則不奪爾汗號。待以寵榮。使衆人咸得生路。丹濟拉引我於無人之地。問曰。

中華皇帝亦曾道及我乎。我言。

實錄卷百八

大

中華皇帝不時向我言。爾丹濟拉貌偉材長。丹濟拉言我曾謂噶爾丹當降已一二次。而不聽吾言。其狀亦疑我。爾試言之。如降。則我為使而往。視丹濟拉情狀。有欲降之意。我在噶爾丹處六日。亦自竭力勸諭。而噶爾丹實無降意。仍遣我同使。我思噶爾丹一無實意。而我又充使來。誰可乎。是以攜我妻子六十餘口。馬百餘匹。駱駝四十餘頭。來歸。

聖上。及到什魯特地方。伊拉古克三胡土克圖親率百餘人。猝然掩至。我身及妻三子一幼孫共十三口。帶馬三匹。駱駝一頭而出。我媳及其餘人。馬駝什物俱被劫去。我右肩背下洞。中烏鎗傷。臣今帶格墨沽英及其子吳巴什察哈岱曼濟等。分作二起。星馳前來。為此謹奏。



上諭議政大臣等曰博什希等已歸至邊哨先具本奏言格壘沽英攜其妻子來降噶爾丹亦遣使來俟伊等到時問明噶爾丹或降或他去方可進兵今速檄孫思克博靈止其進兵俟事明檄知而行○遣理藩院主事保住署主事薩哈連齋敕往諭第巴偕尼麻唐胡土克圖同行敕曰朕臨御天下統

理萬邦溥播仁恩懲創亂逆其誠心恭順者必加獎賴焉爾布特達阿卜地前與噶爾丹同謀凡事必徇厄魯特而行濟隆胡土克圖敗乃公事爾堅留不遣其時朕謂達賴喇嘛若在斷不至此故嚴加詰責茲爾奏言聖上嚴旨下頒心甚憂懼今惟欽遵聖諭隨力報効倘軫念達賴喇嘛乞降溫綸諄

實錄卷一百八十一

十九

切奏請爾既知過引罪朕豈不念達賴喇嘛通使修禮歷有年所乎且朕若不加眷恤爾土伯特國豈得安其生耶其濟隆胡土克圖乃達賴喇嘛所特遣以合喀爾喀厄魯特之好者也彼竟不使喀爾喀厄魯特和好反導厄魯特入我境內與我軍交戰情罪甚為可惡務必擒解彼之身命朕俱准爾所請寬宥之其班禪胡土克圖應於何年月日來朝爾從容定期具奏至噶爾丹與朕抗我師大克之兇惡逆賊情罪重太其女斷不許留於青海爾必解來若不解送則罪歸於爾矣如噶爾丹果悔罪來歸其時另有處分今尼麻唐胡土克圖至將爾奏請之言俱已密奏朕前朕亦密有諭旨朕之

素懷惟願率土之合咸躋雍和共享安樂斷不容摘發隱私傾人家國嗣後爾宜益加恭順勿違朕旨朕盡棄爾前罪嘉惠如初如此則爾土人民大蒙利賴爾之榮貴可獲長享矣為此特遣正使理藩院主事保住副使署主事薩哈連以降敕例賜幣六端保住等請訓旨

上諭之曰爾等到後待第巴勿如從前舉動宜加和婉授敕畢爾等仍前作禮進幣但謂第巴曰皇上統領大兵已臨寧夏因前事四款爾皆遵旨皇大悅故不進兵至爾尼麻唐胡土克圖來密陳達賴喇嘛出定之事上皆知之矣亦有密旨諭尼麻唐胡土克圖矣此事除皇上與尼麻唐胡土克圖卓

實錄卷一百八十二

二十

爾唐隆堪布及御前侍衛拉錫四人外餘皆不知也自此以後皇上一應諭旨爾惟敬奉而行則皇上愈眷顧爾矣況達賴喇嘛講信修禮已歷六十年有不念及者乎且謂爾務使諦穆胡土克圖與我等同赴京上將使之誦經如服水土則令駐錫如不相宜亦即遣還較尼麻唐胡土克圖更加優待再口宣旨云噶爾丹之子及其屬下大臣以至部伍皇上俱收而納之矣至爾等前往可於扎什巴圖爾台吉處取詣地里之鄉導而去既到西方歸來之時可於第巴處取驛馬乘歸上項事情爾等備文用部印帶往至喇嘛津巴扎木素等爾等即攜之而歸○喀爾喀固山貝子阿南達故遣官致祭

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百八十一

實錄卷一百八十一

三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百八十二

康熙三十六年丁丑閏三月辛巳朔日食先是厄麻唐胡土克圖以第巴語密奏達賴喇嘛沒已十六年小達賴喇嘛生今年十五因欲俟相合年歲始聞之

天朝皇帝及衆施主故定於今年十月二十五日方出定放參若於他處俱令以達賴喇嘛出定相告未嘗明悉其故

上以第巴既輸誠密奏亦暫為秘之欲俟十月初旬宣示內外四十九旗及喀爾喀諸處至是奉使策妄阿喇布坦處司務英古歸奏云臣齋部文至策妄阿喇布坦處彼大喜即遵旨

實錄卷一百八十二

十

領兵來剿噶爾丹行二十里至薩克薩特呼里克有達賴喇嘛使人達爾漢厄木齊來言達賴喇嘛身故已十有六年小達賴喇嘛已十五歲爾等各居其地不得興兵策妄阿喇布坦遂按兵而退臣知其不能復行亦還達賴喇嘛已故西北諸人皆已聞之又副都統阿南達疏言噶爾丹多爾濟遣人來告達賴喇嘛第巴遣人致書於我云諭青海諸首領俱於正月二十八日在察罕托落海地方會盟繕修器械可令爾屬下人亦繕修器械務如期必到盟會之地我以向不與彼盟會是以不往

上命議政大臣等集議尋議覆第巴無故令青海諸台吉繕修

器械又約從來未與盟會之噶爾圖多爾濟其意叵測且策妄阿喇布坦親領兵往剿噶爾丹之時第已遣人撤回以此觀之第已仍黨噶爾丹而誑我其跡顯然恐第已以彼所居遼遠謂我不知其詭計應令所司詳列此情令尼麻唐胡土克圖及主事保住等詢明第已來奏從之○副都統阿南達奏言臣所遣駐哈密之家入海喇圖解送來降之厄魯特津巴車爾貝來據云噶爾丹謂我受

皇帝敕書以為叛彼曾被拘執正月初一日彼遣十五人躡覓塞卜騰巴爾珠爾以我授之帶至瀚海止給馬一匹棄之而去我於是步行向哈密而來我來時噶爾丹仍在格格忒哈

平傳卷一百一十二

七

郎古忒地方兵不過五六百名馬駝之外並無牛羊又曾遣哈什往探洪郭羅人等情形尚未歸來其勢似必向洪郭羅阿濟爾汗等處而去此兩處未知馬往臣思噶爾丹之兵不過五六百所乘馬駝外並無他畜正急遽擾亂之際

皇上睿謨周至曾諭臣相機進兵臣料其斷不能出

皇上廟謨之外不勝欣躍臣見駐劄布隆吉爾地方侯孫思克博齊兵到後即竭力進征以圖報効隨驛解津巴車爾貝前來

上命示議政大臣○理藩院奏副都統阿南達咨言厄魯特台吉滾布察罕帶屬下人一百二十五口來降報聞○副都統

阿南達奏言策妄阿喇布坦咨稱閱來文已備晰倘彼從此過必不使之脫去已遣阿玉什之子臧濟扎卜率兵二萬起行矣又備文開明諸事原由差諾海齋送爾矣聞噶爾丹仍在格格忒哈郎古忒其他俱無食四散我欲探明噶爾丹去向已留下兵馬一枝因我遊牧地方近於白帽故先已回去奏入

上以示議政諸臣○壬午

上登寧夏南門巡城閱降○諭內大臣等大兵行期暫緩米應先運至白塔爾等會同督運左都御史于成龍等將所有船隻酌留渡口備用外其餘船隻盡行載米運往但此地水手

實錄卷一百一十二

三

不甚諳練黑龍江之兵頗習於船可發二百名令率本地水手乘此時裝運二次其大兵所攜四箇月口糧俟至白塔再行散給○督運左都御史于成龍奏請以船十五隻交地方官一員及臣等隨行官二員同押以便約束水手米分為六隊頭隊喻成龍二隊范承烈三隊王國昌四隊辛保五隊李鈞六隊喀拜前後臣親督之俱自寧夏散趕馬駝至白塔再各收所運之米自陸路運往得旨如議今採買牲畜之御史顧素等及隨駕部院官員並無所事著令押運米糧并去歲運米者爾等亦帶往○癸未副都統阿南達疏言額貝杜拉達爾漢白克呈稱策妄阿喇布坦謂我降歸

皇上又以我擒獻其種類因而大怒拘我使人倘致興戎不可  
無虞疏入下議政大臣等集議尋議覆前額貝杜拉達爾漢  
白克來降恐策妄阿喇布坦及青海諸台吉侵擾已經檄令  
各嚴禁其下人勿得侵擾哈密矣請以此諭知額貝杜拉達  
爾漢白克如策妄阿喇布坦索取爾處所擒之人不得擅發  
從之○諭領侍衛內大臣公福善索額圖馬思哈大學士伊  
桑阿等黑龍江之兵効力心切故薩布素自稱馬壯朕今巡  
城見黑龍江軍中馬匹羸瘦若將此馬乘用恐歸時必致疲  
斃伊等若有行走之事朕另當給馬將伊等之馬於察罕托  
海地方牧放遣人送往歸化城俟事畢各乘已馬歸本處則  
易到也○諭大學士伊桑阿今寧夏綠旗兵已撥五百人以  
備征剿如兵不遣則已若行每名賞銀十兩○甘肅提督李  
林隆疏言請撥臣標兵二千分守大黃山之西從之○甲申  
撫遠大將軍伯費揚古疏言噶爾丹下諾爾布寨桑族兄額  
林辰哈什哈等共十三口來降言噶爾丹丹濟拉原在薩克  
薩特呼里克今丹濟拉移往齊察蘭去噶爾丹所居之地有  
兩日程  
上以示議政大臣并令吳達禪拉錫問丹濟拉與噶爾丹離散  
之故額林辰哈什哈言丹濟拉因捷噶爾丹近侍額木齊是  
以離散○乙酉召回奉使第巴主事保住等至

上諭之曰朕遣爾等傳致第巴敕文及口諭俱無庸更改但以  
第巴致書於噶爾丹宜多爾濟及差人阻止策妄阿喇布坦之  
兵又英古歸奏達賴喇嘛身故之事俱已傳播是以追回爾  
等問之尼麻唐又第巴所獻達賴喇嘛像及奏章朕於原封  
上在伊等前加封今著此地諸喇嘛同尼麻唐折視乃泥塑  
達賴喇嘛之像其頭已斷此項情由爾等可宣問第巴并將  
轉生之小達賴喇嘛看明回奏達賴喇嘛身故策妄阿喇布  
坦諸人已悉聞之可將此項始末凡途中所遇之人皆曉諭  
之○命理藩院遣官將默爾根綽爾濟以下喇嘛等俱傳集  
旃檀寺拏丹木巴塞爾濟并其徒俱禁理藩院中并查此十  
六年差赴西域之喇嘛逐一取供來奏○陞湖南按察使劉  
檉為雲南布政使司布政使○戊子午故副都統巴麟祭葬  
如例○予昭莫多陣亡二等侍衛折勒爾德祭葬如例○已  
丑  
上召四川陝西總督吳赫西安副都統阿蘭台寧夏總兵官王  
化行原任總兵官王朝海馮德昌及副將道員等諭曰朕往  
者未嘗臨邊不獲目覩邊地之苦今巡行至此視沿邊地方  
土瘠民貧但兵丁甚精銳黃河以西榆林一帶比他處實勝  
然兵雖良如不善撫綏而困苦之則兵雖良無用也善撫綏  
者但將其應得錢糧如數支給即是養兵之道若不知撫綏

雖多給國帑兵丁斷不能沾實惠爾等武臣多出身行伍一旦居官頓忘在昔為兵之苦而扣剋糧餉於心何忍今雖未員當計日後漸臻大任可不存心愛惜兵丁乎朕又聞營中虛懸兵數冒食錢糧各處皆然陝西尤甚且或聞朕來見抬丁壯以補足原額者亦有之總之督撫提鎮當盡心體恤下察免其餽獻則下寮不知貧苦下寮既不貧苦則斷不剝兵以自肥矣爾大小官員各有俸祿養廉衣食並無所缺倘扣剋虛冒即罹於罪關係利害非輕即今總兵官柯彩練兵甚精前亦曾經効力後以操守不好致人疾怨朕徹彼回京大都武臣之中勇敢果毅出力効用者多而操守潔清者少有

實錄卷一百八十二

六

慎於履任之初而渝於後者趙良棟操守頗好恢復雲南秋毫無犯在武臣中可謂良將矣爾等居官俱當法之但不可效其驕矜耳又聞總兵官師帝賓操守甚清雖身後而軍士尚愛戴之凡有功而居官好者朕皆擢用矣其一時聲名甚佳日久改節者皆年齒漸增貪貨賄計身家而坐此失也爾等其遵此訓旨通行曉諭○諭昭武將軍馬思喀等今噶爾丹窮迫已極兵多則用之不盡而進發亦覺繁重此但用護軍鎗手六百前鋒五百烏喇兵四百綠旗兵五百共二千兵即足矣前鋒烏喇兵俱已派出應給伊等馬駝之數俱已奏訖護軍鎗手驍騎礮手伊等馬四匹外再加增給一匹除有

駱駝之兵外無駱駝兵丁每二人合給駱駝一頭將所需駝馬及所攜四箇月米數查明具奏○庚寅和碩康親王傑書薨予祭建墳立碑謚曰良○先是遣筆帖式合色長史馬尼圖等齎敕往撫厄魯特台吉丹津阿喇布坦丹津鄂木布至是撫遠大將軍伯費揚古奏言侍郎滿丕咨稱出差厄魯特合色馬尼圖還言至布顏圖郭爾河見丹津阿喇布坦授以敕書丹津阿喇布坦答言

聖上敕書內令我及丹津鄂木布不得與噶爾丹同處我仰遵聖諭移往策妄阿喇布坦交界居住同丹津鄂木布候旨隨各遣使人偕合色馬尼圖前來

實錄卷一百八十二

七

上諭議政大臣曰著將丹津阿喇布坦使人等遣往侍郎滿丕處於彼地所留人內聽彼酌帶二十許人而往其馬駝乾糧等物給足遣之○辛卯諭四川陝西總督巡撫提督總兵官等朕宵旰勤民慮周遐邇緣向來巡幸未經親歷邊境頃特濟河而西循秦省沿邊地方延覽風俗諮詢疾苦見所在兵民築土屋以為居耕沙磧以為業生聚之計甚屬艱難朕惻然於衷軫念弗釋因思兵民倚賴全在將吏而將吏之表率惟督撫提鎮是視誠使督撫提鎮實能正己澄源則所屬守職奉公祿足自贍必無賸削兵民之事倘或積習相沿濫受屬員私饋因而所屬官弁節次求索取償於下文則加徵無

藝武則侵扣月餉勢不至於厲民剥兵不止如此而欲冀其疾苦日蘇生聚日盛烏可得乎夫秦地俗尚素稱簡樸邊方士卒尤屬精銳總恃撫馭得人斯於兵民胥益朕茲駐蹕寧夏持召該省督撫提督總兵官以下官員凡在鎮城者俱賜宴行宮面加諄諭無非期望文武大吏董率屬員以仰副朝廷愛兵恤民至意自今以後爾等其並體朕懷交相砥礪文職皆習知民事豈身作官吏不恤百姓之依武職多出身行伍豈甫為將領遽忘軍士之苦上官克謹廉隅屬吏各遵法紀馴至比屋殷阜列戍飽騰則兵民皆得其所而爾等亦與有休寵以視厲民剥兵身名俱殞者孰得孰失爾等其敬念

實錄卷一百八十五

之○諭議政大臣等孫思克博霖所將兵前曾撥三千人念兵馬衆多征行煩苦今選發滿洲綠旗兵二千人其所留兵丁馬匹增給前往之兵攜帶四月口糧遣赴阿南達所阿南達李林隆即統領此兵前往搜剿孫思克博霖率所留之兵暫駐甘州於事理為宜其于成龍運米停駐之所亦應遣兵防護令西安副都統阿蘭台領西安兵三百人前往駐扎其留駐寧夏之京城前鋒每旗二十名及烏鎗護軍礮火兵丁量行撥出隨朕前行餘仍令駐寧夏命大臣一人統轄大將軍伯費揚古傳諭附近旗分蒙古王貝勒貝子公台吉等有願自備四箇月餼糧効力行間者即令前來効力又伯費揚

古軍前黑龍江兵一百人並令帶往酌照四月口糧選察哈爾兵攜四月糧會合於郭多里巴爾哈孫之地咸令統轄其伯費揚古駐扎之地著起舒料理侍郎滿丕仍駐原成處尋伯費揚古等疏言見在軍前之喀爾喀達爾漢親王貝勒公台吉及附近地方之喀爾喀和碩親王台吉率其護衛附丁前來籲請願各帶自己四箇月糧赴軍前効力又喀爾喀土謝圖汗及貝勒台吉等俱願從軍効力允之○諭議政大臣等輓運糧餉及隨營安站之事朕與鄂爾多斯松阿喇布貝勒言之彼奏稱青草生時我兵三千能運米設站今應自白塔以外運米設站俱委鄂爾多斯松阿喇布貝勒令會同于

實錄卷一百八十五

成龍等商酌而行白塔以內安設驛站之事交與總督吳赫西安副都統阿蘭台兵三百名亦交與于成龍又馬思喀所統之兵若祇攜帶一月口糧其三月口糧及隨營之米載於船內一次不能全完必須再運大兵豈可無故守候應令馬思喀等兵攜帶兩月口糧其餘米用船輸運所剩之米衆力攜帶倘再有餘剩令于成龍酌量運至白塔大兵到白塔其間計十二日口糧將衆力馱載之米補給松阿喇布貝勒于成龍等隨營遞運之米應抵於何地應停於何地著大將軍伯費揚古參謀大臣會同于成龍等商酌定議爾等與于成龍詳議具奏○四川陝西總督吳赫疏言自寧夏至白塔應設



十臺。每臺應設馬二十五匹。揀選守備千總把總等官一員及領旗頭目二員管理站務。得旨。地方事重大。兵赫不便往設驛站。著大學士伊桑阿侍郎哈雅爾圖安布祿安設驛遞。不可差悞。餘依議。○理藩院侍郎滿丕疏言。厄魯特扎木素等來降。言我等三月初三日。在薩克薩特呼里克時忽。一日晚。似有礮聲。霧彌瀚海。噶爾丹營中擾亂。俱言滿洲兵近逼矣。遂遷至哈薩克圖哈喇阿濟爾罕地方。正擾亂之時。我等逃出。又丹濟拉離噶爾丹另遷於什爾哈戈地方。噶爾丹遣人兩次召之。丹濟拉不至。又遣人於杜哈爾阿喇布坦處。杜哈爾阿喇布坦奪取其馬畜。所去之人。步行而歸。又噶爾丹聞西路有阿南達兵防守。根敦戴青滿兵已圍取洪郭羅口。不知所往。在阿爾臺四圍遊行。欲往阿爾臺之陽。則山險而無野獸。欲往額黑阿喇爾。則畏杜哈爾阿喇布坦。據此。將扎木素同格墨沽英曼濟及其妻子并馬駝什物俱交驛站遞送至歸化城。發副都統阿迪安插。奏至上命示議政諸臣。○壬辰。奉差噶爾丹博什希及其使人喇木扎卜至。齋到噶爾丹疏言。奉到敕書。及使人格墨沽英口傳諭旨。不勝懼怖。但屬下人為大兵所敗。四處離散。正欲遣格墨沽英前往密奏。而彼忽逃亡。是以遣喇木扎卜前往口奏。喇木扎卜奏曰。噶爾丹言。

聖旨云。汝不能自活。則率眾來降。我居無廬。出無騎食。無糧我

屬下丹津阿喇布坦杜爾伯特之車陵滾占之子車陵多爾濟。俱不能自活。散去捕獸。不及招集。伊等諮問其意。俟集問之後。再行另奏。緣。

皇上有恤臣之旨。是以臣屬下人歸投。

皇上者甚多。伏乞發還臣所并乞。

聖上加恩。賜於失所之人。以活其命。

上曰。汝欲歸乎。抑留此地乎。喇木扎卜奏曰。臣有心告請而來。今臣之妻子俱在此地。臣他無所往。

上諭內大臣等。大兵起行之前。當遣人招撫噶爾丹丹濟拉。此差。不必遣本朝之人。前與塞卜騰巴爾珠爾同擒者。有噶爾

丹孔母之子丹濟扎卜。再撥願往之厄魯特人齋敕而往。一面遣使。一面進兵。達賴喇嘛身故已十有六年矣。第已指達賴喇嘛之語。以誑噶爾丹。彼信其誑。自言為達賴喇嘛之教。而恣肆橫行。以此等事。明開教內。照樣刊刻。多印付丹濟扎卜等。遍行傳示。并遣使諭策妄阿喇布坦。令乘此機會。亦興兵剿滅之。敕諭噶爾丹曰。去冬命爾早降。則予以富貴。給以資產。眷顧煦育之。即爾所屬厄魯特之眾。亦各得見其妻子。遂其生業。故遣使偕格墨沽英往宣敕。旨。今使者喇木扎卜至。覽爾所奏。謂未明朕旨。觀爾辭意。一無真實。而請給還來奔之厄魯特。豈惟厄魯特之眾。雖爾子塞卜騰巴爾珠爾。及



爾乳母俱已被獲。今皆養。與徽特和碩齊同居。爾若來歸。即令爾子與爾相聚。否則爾有何功。遂還爾厄魯特之衆。爾欲歸降。應及早來。若不歸順。徒遷延時日。何益。況達賴喇嘛已故。朕亦知之。曾嚴敕第巴。第巴又遣尼麻唐胡土克圖上表來賀捷。且奏稱達賴喇嘛已沒十六年。其轉生之胡必爾。今年已十五歲。則爾之指稱達賴喇嘛。以為護法欺誑衆人者。已顯露矣。爾所欲逃匿之地。厄魯特來降者多。朕已悉知。即使遁入洪郭羅險固之地。諸路皆可進剿。爾因迫若此。尚何力拒守。即今已無歸所矣。今歲即不擒汝來。歲當復發兵追討。必不中輟。汝其詳審之。故遣丹濟扎卜察罕代舒魯等

實錄卷一百一十一

上

齋吉特諭。敕諭丹濟拉曰。朕為天下元后。善善惡惡。乃不易之至理也。去歲遣格墨沽英等歸。敕內開載。爾名復使格墨沽英傳諭。今格墨沽英等來。爾之辭意。皆已備陳。爾今能致噶爾丹來降。必當封為貝勒。昇以殊榮。如不能致爾一身歸順。亦能不失富貴。況爾以下之人。先降者皆釋其罪。顯榮優養。爾應悉聞。已往之過。概不介意。爾曾密奏若省臣罪。臣請投降。故特專賜敕旨。盡宥前罪。敕到。其速降。朕為大君。豈改成命。特諭敕諭厄魯特之台吉塞桑哈什哈。并其衆人曰。朕無分中外。皆欲其各安生理。樂育昇平。至於誅戮征伐。原非本懷。爾厄魯特等。附從噶爾丹。所在侵掠。雖有所得於人。而

已之祖父戰死。妻孥被掠者。亦云衆矣。今所餘之人。不被創受傷者。甚鮮。死亡之餘。其存幾何。因從噶爾丹之故。以至窮迫無歸。困苦已極。屢頒諭旨。命噶爾丹前來歸順。則凡爾厄魯特之衆。朕必俱加養育。使之各得其所。乃噶爾丹怙惡不悛。並不以爾衆為念。不思歸順。他日兵臨。則爾衆難免俘戮。故特諭厄魯特之衆。爾若能各攜族屬妻子來降者。朕皆養育。使得其所。前所降者。已加養養。爾衆亦當聞之矣。特諭。○遣工部侍郎常綬等。齋敕諭策妄阿喇布坦曰。爾歷來請安納貢。克恭克順。朕亦加眷顧。恩施頻及。噶爾丹奸詭性成。雖彼至感靡不嫉害。即將厄魯特之四部。喀爾喀之七旗。致令

實錄卷一百一十二

上

破亡分裂。又以追襲澤卜尊丹巴土謝圖汗等。為名。侵我邊境。屢擾不已。朕因於去歲。數遣兵親行征剿。直抵克魯倫土喇地方。大破噶爾丹陣。斬甚衆。其妻亦被誅戮。冬間復遣兵西出。哈密地方。獲其子塞卜騰巴爾珠爾等。今窮迫已極。所屬大小寨桑。哈什哈等。相繼來降者不絕。其餘附從之人。及寨桑等。流離逃散。俱欲投順。密報前來。今噶爾丹僅餘子身率領數人。隨處飄遁。爾當亦聞之矣。爾前奏稱噶爾丹若近逼我。去必竭力擒剿。又言隨聖上指示。効力盡瘁等語。噶爾丹允惡已極。有如魑魅。斷不可留。今數道遣發大兵。搜討夫噶爾丹與爾素。有深讐。乘其困迫。應起兵復讐。進剿。且達

賴喇嘛久故。第巴詐飾其尚在之狀。故嚴飭第巴。而第巴大懼。遣尼麻唐胡土克圖來言。達賴喇嘛亡故已十六年。其再生胡必爾漢已十五歲。據實陳奏。則噶爾丹所稱達賴喇嘛之法者。其為欺誑衆人也明矣。欲爾明悉。故特遣工部侍郎常綬內閣侍讀學士伊道侍衛克什圖等齎敕諭爾。且加恩賜賞綵緞十端。特諭○先是撫遠大將軍伯費揚古疏報伊拉古克三胡土克圖欲往黃河兩岸盜馬。請發兵防禦。至是命散秩大臣巴當阿護軍統領孫渣齊散秩大臣策旺諾爾布護軍統領圖席希等。各率官兵齎四十日糧。分兩路往擒之。○達尼魯特恩克歸。招撫滾占之妻奴渾達喇及其子。

實錄卷一百八十二

十四

車陵多爾濟。又命理藩院行文諭之曰。爾之恩克。自哈密城擒解前來。今遣往爾所。爾等如欲降當即前來。斷不可與噶爾丹和好。毋以爾夫曾與我軍交鋒。被創為懼。朕非欲得爾之人衆也。若欲奔策妄阿喇布坦。可即前往。朕不之罪。若欲奔青海。則我軍見在西路。朕賜爾文持往。令彼放行。○癸巳諭議政大臣等著。檄大將軍伯費揚古。由寧夏進發大兵。於閏三月十七日起行。伯費揚古可率其兵。於四月初十日外十五日內。赴郭多里巴爾哈孫地方。○諭行在兵部護軍統領鄂克濟哈。駐居寧夏。著將見在厄魯特男婦子女三十八口。交鄂克濟哈。伊等食物。照常給養。嗣後厄魯特由此路來。

者。俱令鄂克濟哈收養於寧夏。其來降及各處解來厄魯特著鄂克濟哈報明男婦子女人名。新從噶爾丹處來及緊要人。開明年貌數目。送赴行在。提取某人據所指名字解送。至鄂克濟哈處撫養之厄魯特。應送歸何處。俟敕下遵行。○命厄魯特降人格豐沽。著為散秩大臣。其子吳巴付。為一等侍衛。○先是以寧夏宜設兵駐防。命建造營房。至是諭議政大臣等。今賊勢困迫。已極。寧夏設兵駐防無益。此所造營房。令地方官查明給還原主。令其居住。○甲午。寧夏紳衿兵民人等聞。

駕起行。齊集行宮前。叩懇留數日。以慰羣情。

實錄卷一百八十二

十五

上曰。朕欲掃蕩寇氛。以安黎庶。特幸寧夏。經理軍務。駐蹕十有餘日。曩者南巡。凡所巡幸之處。未有駐蹕至三日者。且邊地硯瘠民生艱苦。朕甚憫之。朕尾從人衆。恐多留一日。即滋百姓一日之擾。朕已定十五日起行。爾等誠懇之意。朕已知悉。又向者曾欲使禁軍駐防此地。恐民間居處狹隘。已命將房舍查明。給還原主。爾等即回故居可也。紳衿兵民等。惟呼叩謝。奏請。

御製聖訓。勒之貞珉。光垂奕世。

上曰。朕巡幸原欲安民。今製文頒賜。則百姓運碑。在匠轉致煩苦。不必行。紳衿兵民等復懇請。

上命大學士等議奏。大學士伊桑阿等奏曰：「人民叩請皇上親製聖訓勒石垂久，洵為盛事。應如所請，從之。」

御製碑文曰：諭寧夏文武官員兵民人等，朕體天育物，日以治安為念。雖身在宮庭，而心恒周四海。頃因指畫軍務，不憚勤勞，遂泣寧夏。無非為盪滌寇氛，綏人生靈計也。緣邊千餘里，土壤磽瘠，惟寧夏洪流灌輸，諸渠環匝，巡覽所至，甚愜朕懷。夫農桑者衣食之本，積貯者殷阜之原。爾官吏宜董勸父老子弟，三時力田，以盡地利。比屋勤殖，以裕蓋藏。縱使歲偶不登，亦可無憂匱乏。若夫秦風健勇，自昔為然。其在朔方，尤勝他郡。爾等或職居將領，或身隸戎行，尚各屬精銳，以効干城。禦侮之用，斯國家有厚賴焉。至於忠信慈惠，服官之良軌，考弟齒讓，生人之大經，法紀不可不明，禮教不可不肅。勿以地處邊陲而不治，以經術勿以習尚氣力而不澤，以詩書總期上率下從，庶幾馴臻雅化。茲樂與返蹕，距靈朔雖遠，而瞻念塞垣，如在几席。爾等誠能敬體朕言，將吏協恭，兵民咸理，生聚日益，厚風俗日益淳，則疆圉實有攸裨。朕心亦用深慰。慎勿視為具文，率朝廷惓惓輔導之意，欽哉。諭大學士伊桑阿著將所議兩路進兵追剿噶爾丹撥置馬匹糧米及設站之事，俱查奏朕將覆覈之。大學士等查呈。

御覽

實錄卷一百八十二

七

上曰：「各項事務議論區畫，俱已詳盡。今噶爾丹無所逃矣。噶爾丹或降或自盡，不必為我所擒。朕將親至船站視兵馬起行。」

暫駐蹕於彼地，聽其聲息。倘有朕當親行之事，則行之。諭昭武將軍馬思喀著都統仄巴、渾德、齊世將軍薩布素、都統兼前鋒統領碩額、護軍統領嵩祝、總兵官王化行俱為叅贊。既與大將軍伯費揚古會將軍馬思喀亦為叅贊。至總兵官王化行去歲出征噶爾丹之役，見其人材矯健，隊伍整齊，尤著勞績。大將軍伯費揚古來亦奏其功。綠旗總兵官向無授為叅贊之例。著王化行於此役軍中為叅贊，賜孔雀翎。○諭大學士伊桑阿：朕明日向白塔行。凡報事者若俱自舊站至寧夏追赴，則迂而且遠。朕何地駐蹕，即將舊站就行在所移趨。前此之行，尚書班迪亦如此。著侍郎安布祿、依黃河西岸駐扎。自總督處取船一隻，撥理藩院賢能官二三員在侍郎安布祿處備之。將外站每日向行在所移趨，其站不足則再增。嗣後從內出之事，則出殺虎口，由外新設之站而來。從外入之事，則由新設之站，馳入殺虎口。其以此傳諭，如違悞者，死。侍郎安布祿甚糊塗，著交明哈雅爾圖勿悞驛務。○乙未，上自寧夏城往白塔，是日啟行。駐蹕堯甫堡。○丙申，上駐蹕流穆河西岸。諭大學士伊桑阿：陝西巡撫愛按察使納璽俱已衰老，今用兵之時，伊等不能勝任，俱著解任。党

實錄卷一百八十二

七

愛速赴行在。山西按察使巴錫著授為陝西巡撫。其納墨員缺著以郎中鄂海陞補。○丁酉。

上駐蹕哨馬營西南隅之峽河西岸。○調鑲紅旗蒙古副都統達倭為本旗滿洲副都統。陞驍騎參領孫琬為鑲紅旗蒙古副都統。○調福建興化總兵官王萬祥為臺灣總兵官。臺灣總兵官王國興為興化總兵官。○戊戌。

上駐蹕哨馬營。○喇嘛商南多爾濟等疏言。前奉

上諭青海眾台吉何時入朝。何人前來爾等作速奏聞。今青海四姓厄魯特諸台吉願覲

聖上。阿喇卜坦等及西寧屬下回子頭目業已起行矣。其達爾

實錄卷一百八十一

六

寺掌教垂臧胡土克圖溫都孫寺掌教達賴綿爾濟喇嘛及十三寺院之囊素通事等并厄魯特人眾皆願來朝。又扎什巴圖爾台吉言。我此地厄爾德尼巴圖爾台吉素行甚高。眾台吉凡事皆推之以為長。故我勸其前來。乞

聖上加恩。比和碩特一姓之台吉。又青台吉遣伊子羅卜臧入覲。扎什巴圖爾台吉請遣使進貢。又原屬噶爾丹之人有姓徽特之色稜厄爾克台吉。出逃來歸。又有姓徽特之五六歲童子及噶爾丹之兄趙特巴巴圖爾之子姓鍾阿爾名塞卜騰扎爾車臣戴青不得親往。此外更無有名之人。往居青海者。奏入。

上命議政大臣集議。尋議行文商南多爾濟除先奏來朝台吉不議外。著見欲來朝為首之人。將胡土克圖喇嘛及留守地方台吉之子弟自行酌量分別。伊等行時。率之俱來。從之。○己亥。

上駐蹕石嘴子西南隅黃河西岸。○庚子。予故理藩院侍郎西拉祭葬如例。○辛丑。

上駐蹕石臺西北隅黃河西岸。○諭內大臣明珠鄂爾多斯貝勒松阿喇布等各率其兵隨駕勞苦。爾其率學士黃茂齋銀前去。同左都御史于成龍賞鄂爾多斯。見到之兵。務使均沾實惠。○又諭內大臣。前者侍衛色克圖探路而歸。奏稱此路

實錄卷一百八十二

七

猶有去歲運米人役遺骸。嗣後交與管輜重大臣。若遇遺骸俱收埋。立為一塚。每日收埋幾何。至駐蹕處奏聞。○揚威將軍覺羅舒恕奏。言侍即滿丕。送到來降厄魯特羅卜臧格素爾及其弟達什夫婦。據云我等雖隸噶爾丹下。實乃喀爾喀也。今自什爾哈地方乘馬五匹逃出。聞噶爾丹在薩克薩特呼里克游行。其左右有諾顏格隆阿喇爾拜。率百餘人。兵思塔台吉率百餘人。丹濟拉阿巴。丹濟拉塔拉思倫博羅齊率三百餘人。吳爾占扎卜。色稜車陵布木等率百餘人。各先後散行。駝馬每人止一匹。亦有無馬者。並無牛羊。捕獸為食。不得獸。則殺馬駝為食。又聞滾占之妻察罕古英寨桑塔爾寨

桑等所居名波爾哈。至丹濟拉原與噶爾丹同處。日夜不離。近因丹濟拉捷噶爾丹近侍額木齊自此分離。噶爾丹不言往棲之地。我等不得而知。伊拉古克三胡土克圖去冬在古爾班賽堪。今不知其所在。杜哈爾丹津喇布坦去冬在布顏圖郭爾河。丹津鄂木布進洪郭羅後。又出洪郭羅矣。據格素爾語如此。茲先驛送達什前來。報聞。○予故奉國將軍宗室永德祭一次。○壬寅。

上駐蹕黃河西岸環洞。○癸卯。

上駐蹕黃河西岸黃差頭灣。○撫遠大將軍伯費揚古以去歲未能剿滅噶爾丹。請解大將軍任。

實錄卷一百八十二

二十

上不允。○命停止黑龍江官兵留於揚威將軍覺羅舒恕處。

命前調甘肅提督李林隆標兵二千仍回固原。○福建巡撫

卞永譽丁父憂。命回旗守制。○予故靖海將軍靖海侯太子

少保施琅祭葬。加祭二次。謚襄壯。○予故原任雲南貴州總

督卞三元祭葬。謚恪敏。○予故福建金門總兵官加贈太子

少保陳龍祭葬如例。○甲辰。

上駐蹕黃河西岸雙阿堡。○命運米左都御史于成龍等發軍

糧由白塔陸運。即令鄂爾多斯貝勒松阿喇布貝子根都什

希卜貝勒汪舒克公杜稜員勒爾祿什希卜主董羅卜等及

其屬下兵丁分為六隊隨管運諸大臣陸續進發。○乙巳。

上駐蹕黃河西岸沙裏樹。○奉差青海諸台吉多羅額駙阿喇卜坦台吉德木楚克回奏曰。臣等欽遵

聖訓。諭青海扎什巴圖爾博碩克圖濟農等諸台吉咸願服從

聖化。請於四月來朝。

上諭議政大臣等青海諸台吉來朝。若於口外受之。恐於典禮

不備。且伊等於四月起程。正遇塞內炎熱。著在九十月間。朝

於京師。○丙午。

上駐蹕黃河西岸白塔。○諭大學士伊桑阿原任侍郎趙士著

交將軍馬思喀。令同原任侍郎恩格色。一同解送牛羊前去。

或有差違。招撫噶爾丹。并効力行走之處。遣此二人。將光祿

實錄卷一百八十二

三

寺少卿常在革職。交將軍馬思喀。令其於軍前効力。將郎中

碩稽等所送之羊。撥三千隻。送於將軍馬思喀軍中。○己酉。

上駐蹕黃河西岸船站。親視八旗前鋒黑龍江兵起程。遇馬駝

中稍有疲蹇者。皆以內殿馬駝易之。

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十二

實錄卷一百八十二

三

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十三

康熙三十六年丁丑夏四月庚戌朔享

太廟遣禮部尚書佛倫行禮

上駐蹕狼居胥山

駕出行宮親臨大路閱視八旗鎗手綠旗兵起行○諭議政大  
臣等此地至兩狼山地方一百二十里無水應於子成龍等  
未到之先集軍中駱駝送米過此無水之地令內大臣明珠  
都統噶爾瑪王永譽押去到後著噶爾瑪王永譽留彼守米  
著明珠帶回駱駝舊歲中路進兵各驛備米供給兵廝商販  
故人不乏飢此次進兵所關甚要凡事不得不周詳籌畫朕  
已遣往寧夏取米五百石矣俟到後留貯於此隨來兵丁亦  
酌量留之著一大臣駐此管轄將此米從驛站陸續緩運每  
驛量留米俟回師之兵廝商販乏糧者給之上駟院起來馬  
一千四百餘匹亦留於此擇水草善地牧放肥壯俟回師之  
兵有乏馬者給之鄂克濟哈仍駐寧夏凡馳報之事由新設  
邊外驛站馳送則路近而無誤總督吳赫船站照常安設船  
站以外今設蒙古驛站馳報軍機理藩院以行途宿次奏  
言黃河內地荆棘叢密沿岸泥濘難行湖灘河朔不知其路  
但知車根穆冷至穆綯和朔之路自此地渡河為第一宿驛

實錄卷一百八十三

一



於布克感有五十餘里食黃河之水第二宿駐於和多都五十里食車根穆冷之水第三宿駐於阿齊五十里食車根穆冷之水第四宿駐於巴顏和邵五十里食車根穆冷之水第五宿駐於哈喇圖以內有四十餘里食車根穆冷之水第六宿駐於濟爾馬臺有四十餘里食車根穆冷之水第七宿駐於塔巴納有五十餘里食車根穆冷之水第八宿駐於呼戶烏素四十里食黃河之水第九宿駐於穆納和朔之南濟勒磨墩四十里食黃河之水下所司知之○辛亥

上駐蹕黃河西岸船站地方○壬子諭議政大臣等自寧夏往擊伊拉古克三胡土克圖之西安兵○日著仍赴寧夏其由

實錄卷五十五

二

西路往擊伊拉古克三胡土克圖之西安兵綠旗兵○日著俱留甘州護軍統領圖席希等○日著乘驛趕來○命留領侍衛內大臣索額圖於船站管理水路設站事務○命原任陝西巡撫克愛赴昭武將軍馬思喀軍前効力○癸丑

上由船站至黃河西岸歐德地方駐蹕○撫遠大將軍伯費揚古疏言黑龍江兵願備四個月口糧隨征効力從之○甲寅上駐蹕黃河西岸達希圖海地方○諭大學士伊桑阿四川總兵官馬子雲欲率回子襲噶爾丹之後回子生性無義曾三擒其主以獻噶爾丹其兵豈可用乎本朝之兵所向無敵若有事時已不可勝用矣安用外國之兵古來用外國兵鮮有

善者宋用金兵滅遼復用元兵滅金金既滅元遂滅宋此其明驗也初噶爾丹并吞吐魯番葉爾欽薩馬爾漢哈薩克等千餘部落本朝並不之問當厄魯特與喀爾喀戰時本朝若助厄魯特今如何能破噶爾丹乎噶爾丹既克喀爾喀直侵內地朕始領兵剿滅前定海總兵官藍理曾請率所屬藤牌兵進剿沙漠地寒冰凍與南方迥別藤牌兵雖強夏尚可用自八月以至三月豈但交戰即藤牌亦不能執此皆人地不相宜所謂紙上談兵者也馬子雲粗鄙不識大義可曉示之○諭議政大臣等今諸事俱畢惟噶爾丹僅存各處逃竄大兵前進搜剿不久旋師路必由此當逐站致米師回乏糧者以米給之來降之厄魯特青海來朝之台吉等俱由此來米糧馬匹已留於此則駐此而理事者尤為緊要朕本欲駐此親理其事但天下事太是以回鑾著留領侍衛內大臣索額圖并都統阿席坦噶爾瑪王永譽護軍統領蘇昌副都統巴賽等於此○丙辰

上登舟起行泊海喇圖地方○揚威將軍覺羅舒恕疏言厄魯特俄爾遮圖祈齊克來降據云噶爾丹留我捕獸以供其女鍾齊海三月十一日到阿察阿穆塔台地方我乘夜逃來時噶爾丹曾遣人約丹濟拉會於阿察阿穆塔台一同屯扎後商往厄黑阿喇兒西北遊牧噶爾丹下人但捕獸為食困



寔已極特此奏聞報聞○提督浙江學政工部右侍郎李柟  
丁母憂命回籍守制○丁巳

御舟泊薩爾奇喇地方○揚威將軍覺羅舒恕疏言厄魯特丹  
木巴扎木素來降據云我於三月十五日自阿察阿穆塔台  
處來歸聞噶爾丹諾顏格隆阿喇爾拜丹濟拉阿巴拉爾孫  
吳爾占扎卜色楞車陵布木吳恩塔等俱會於阿察阿穆塔  
台次日將過楚呼里渡瀚海而去不知其何往噶爾丹之人  
不過五六百馬駱各有一二匹每日殺馬而食噶爾丹之子  
塞卜騰巴爾珠爾被擒噶爾丹未曾聞知特此奏聞報聞○  
戊午

實錄卷一百八十三

四

御舟泊崇奇克地方○予故福建福寧總兵官許靖國祭葬如  
例○已未

御舟泊庫克布裏圖地方○庚申

御舟泊阿拉克莫里圖地方○喀爾喀多羅貝勒根敦戴青故  
遣官致祭○陞監察御史戴納為山西按察使司按察使  
命直隸各省選拔文行兼優之士府學起送二名州縣學各  
起送一名滿洲蒙古各起送二名漢軍起送一名為拔貢生  
赴國子監○辛酉

御舟泊布祿爾拖惠地方○予故原任江寧副都統穆成額祭  
葬如例○壬戌

御舟泊鄂兒綳阿木地方○賜喀爾喀額爾德尼班第達胡土  
克圖及其弟子尚柱普蟒衣銀幣有差○癸亥

御舟泊達拉布隆地方○賜撫遠大將軍伯費揚古上駟院馬  
五十匹駱駝十匹○旌表直隸烈婦朱氏拒姦身死給銀建  
坊如例○甲子

御舟泊布古圖地方○撫遠大將軍伯費揚古疏報康熙三十  
六年四月初九日臣等至薩奇爾巴爾哈孫地方厄魯特丹  
濟拉等遣齊奇爾寨桑等九人來告曰閏三月十三日噶爾  
丹至阿察阿穆塔台地方飲藥自盡丹濟拉諾顏格隆丹濟  
拉之婿拉思倫攜噶爾丹尸骸及噶爾丹之女鍾齊海英率

實錄卷一百八十三

五

三百戶來歸丹濟拉因馬疲瘠又無糧糗是以住於巴雅恩  
都爾地方候旨其吳爾占扎卜色稜阿巴塔爾阿喇爾拜額  
爾德尼吳爾扎忒喇嘛等帶二百戶投策妄阿喇布坦而去  
額爾德尼寨桑吳恩塔台吉博羅齊寨桑和碩齊車林奔寨  
桑等帶二百戶投丹津鄂木布而去除將齊奇爾寨桑等九  
人馳送行在外臣等於十三日統領大軍前往丹濟拉所住  
巴雅恩都爾地方即押丹濟拉等前來如其心懷反覆即行  
剿滅

上諭今噶爾丹已死其屬下三百餘戶帶噶爾丹之尸噶爾丹  
之女來降著大將軍伯費揚古精選帶去之兵往覓丹濟拉

所在押護前來。餘兵遣回。黑龍江兵路遠亦遣回。費揚古所統之兵既足。阿南達一路音亦令撤回。遍檄商南多爾濟杜思噶爾及衆扎薩克俱令知悉。于成龍等所運之米亦令停止。○議政大臣等奏噶爾丹乃狡猾巨寇。獲罪於天。

皇上不憚勤勞。三次出討。噶爾丹勢盡途窮。今果自盡。悉符

聖算。臣等請行慶賀禮。

上曰。噶爾丹之死。乃

天之所助。宜先謝

天。遂設香案於行宮外。

上率文武官員行拜

天禮畢。

上回行宮。文武官員行慶賀禮。是日甘霖大沛。○吳喇忒達爾

馬什里公旗下台吉南冲來朝。○乙丑。

御舟泊薩察莫墩地方。○丙寅。

孝端文皇后忌辰。遣官祭

昭陵。

御舟泊都惠哈拉烏蘇地方。○丁卯。

御舟泊都勒地方。○授奉國將軍永德子寧精為奉恩將軍。

丹濟拉使人齊奇爾寨桑至。奏曰。噶爾丹閏三月十三日身

死。即於是日焚其尸。攜噶爾丹之女鍾齊海及諾顏格隆拉

思綸程貝臧布尼爾巴噶卜楚陳奔自阿察阿穆塔台起程。宿十站到巴雅恩都爾候旨而行。見在右翼壯丁四百共人口千餘。每丁各有馬一匹。共駱駝一百五十頭。此外並無他物。

上曰。據奏噶爾丹尸已焚。著大將軍驛遞其骨速來。齊奇爾寨桑應令乘驛發至大將軍軍前。或先遣彼即赴丹濟拉所。或同大兵帶往大將軍身臨邊地聽其酌行。○賜厄魯特齊奇爾寨桑蟒袍褂帶。○戊辰。

御舟泊烏蘭拖羅海地方。己巳。

御舟泊特木爾興爾虎地方。以通政使官夢仁為福建巡撫。

○庚午。

御舟泊烏蘭腦爾地方。○辛未。

御舟泊濟特庫地方。○議政大臣等議奏。塞卜騰巴爾珠爾乃獲罪於天。逆賊之子。今噶爾丹既死。其子當即梟示。傳首於

四十九旗。喀爾喀衆扎薩克噶爾丹骸骨到日。粉骨揚灰。其

徽特和碩齊乃塞卜騰巴爾珠爾乳父。亦應斬首。免其梟示。

得旨。俟朕回鑾後再奏。○壬申。

御舟泊哈喇烏蘇地方。○癸酉。

御舟泊珠爾地方。○甲戌。

上登陸駐蹕黃河西岸喀喇蘇巴克地方。厄魯特降人諾爾

布察桑等以剿滅噶爾丹奏請行慶賀禮。

上諭之曰往者噶爾丹以追逐喀爾喀為名直入我扎薩克烏  
闐布通地方故朕命裕親王及皇長子率師往剿之噶爾丹  
大敗使濟隆胡土克圖往復陳說自今以往不敢再犯邊陲  
噶爾丹頭頂威靈佛以誓此爾眾所共聞者也嗣後無故過  
土喇潛處已頗烏闐地方掠我臣服之納木查爾施音故朕  
親率六師聲罪致討然猶不忍遂加誅滅再四遣使諭以和  
好而噶爾丹怙惡不悛朕故整師進剿噶爾丹不能當我軍  
威驚潰奔逃逼我西路大兵奮擊大敗之此皆噶爾丹違天  
背盟以致禍患及身國隨以亡朕但思掃除殘暴拯救羣生

實錄卷一百八十三

誠惻懇懇求符天理故大軍所向無水之方靈泉感沸不毛  
之地瑞草蕃滋山川效靈百神顯佑聞噶爾丹所至之處必  
有烈風暴雨災異頻逢驚聞我軍之來寢食俱廢反復思維  
無計能逃窮急仰藥而亡由此觀之天可違乎其助順惡逆  
亦顯然矣夫與朕為敵者惟噶爾丹而已與眾何涉不惟噶  
爾丹在日爾等降者必加恩撫恤即今噶爾丹已死凡有降  
者朕亦如爾輩恩育豈忍異視耶然噶爾丹之滅朕之大小  
官員當奏請慶賀爾輩素皆受恩於噶爾丹之人不當奏請  
諭大學士伊桑阿前山西巡撫倭倫以去歲山西數州縣  
歉收今米價甚貴奏聞頃噶爾丹殲滅天下悉已無事唯愛

養兵民為要務山西米價騰貴民生困苦朕聞之中懷軫惻  
危從前來大臣侍衛官員執事人自船站坐來之船見有水  
手若至湖灘河朔後將自船逆流牽挽回至寧夏甚難前亦  
曾諭總督吳赫就此船將湖灘河朔積貯米或五千石或再  
加多量行裝載交巡撫倭倫派賢能屬員轉運順流而下至  
保德州此時價減糴於民大有裨益著學士黃茂率同部院  
司官二員前往侍郎安布祿留此監發米石○予故原任鑾  
儀衛鑾儀使鮑敬葵葬如例○乙亥

上駐蹕喀喇蘇已克地方○革侍郎席密圖職以採買牛羊事  
畢不趨赴行在也○丙子

實錄卷一百八十四

上駐蹕郭爾紀庫布拉克地方○撫遠大將軍伯費揚古疏言  
厄魯特車陵台吉并屬下龔格厄爾克率部眾百許人及其  
妻孥來降報聞○丁丑

上駐蹕烏闐巴兒哈孫地方○散秩大臣巴當阿護軍統領圖  
席希等疏言臣等至恩克所逃洪郭羅地方並不見伊拉古  
克三胡土克圖踪跡聞其向祁齊布納洪郭羅阿濟而漢去  
矣是以臣等各從原路還師報聞 護軍統領鄂克濟哈疏  
言厄魯特滾木察罕等率其家屬來降

上命送至張家口○以原任兵部右侍郎提督順天學政李光  
地為工部右侍郎○戊寅

上駐蹕席納拜星地方。○已卯。  
上駐蹕呼烏蘇地方。

五月庚辰朔

上駐蹕諾木渾單喇地方。○喀爾喀扎薩克多羅郡王色冷阿海阿霸垓多羅郡王吳爾占噶喇卜。阿霸哈納貝子額林臣達西等來朝。○辛巳夏至祭

地於

方澤遣戶部尚書馬齊行禮。○

上駐蹕阿祿十八里臺地方。○阿霸哈納多羅貝勒薄昭等來朝。○撫遠大將軍伯費揚古奏報遵旨選擇前鋒四百名護

實錄卷五十三

+

軍鎗手五百名每旗礮各一門。八旗驍騎礮手八十名。察哈爾兵二百名寧夏綠旗兵二百五十名往覓丹濟拉所在。巴雅恩都爾地方收集丹濟拉餘俱遣回。左都御史于成龍所運之米請以三分之一運至郭多里巴爾哈孫以備回歸之用。其餘二分即留見在運到之地。至遣回一千一百餘官兵僕從止給一月口糧。可以到歸化城等處。其黑龍江官兵俟到歸化城再支倉糧帶去。又臣等公議遣散秩大臣丹巴哈什哈等前往曉諭丹濟拉曰爾既誠心來歸何不輕身先攜噶爾丹骸骨并其女來其屬下人隨後徐來方為恪遵上意以是作蒙古書用印鈐封令丹巴哈什哈持往訖。

上曰使人於蒙古應遣從軍効力者乃差散秩大臣丹巴哈什哈前去殊為草率。至發回黑龍江等處兵及撥糧諸事俱如所奏行。○壬午。

仁孝皇后忌辰遣官祭

陵。○副都統阿南達疏言臣等率兵於四月十八日至巴爾庫爾哨探者報云丹濟拉已起行不在屯劄之地。乃問逃來之杜喇爾據稱我未出逃之前丹濟拉與衆議時皆言我等或暫栖巴爾庫爾不則往投

實錄卷五十三

+

聖上丹濟拉言我等不便久居巴爾庫爾當乘人未覺之先急從喀斯渡瀚海將噶爾丹骸骨及鍾齊海送至達賴喇嘛所吾心盡矣。是以臣等至彼營地視之行跡似向布克達額冷哈巴爾罕而去。臣等急向瀚海南竟趣喀斯口以禦之十九日自巴爾庫爾起行矣。

上命議政大臣等議尋議覆前者大將軍伯費揚古遣散秩大臣丹巴哈什哈至丹濟拉所令其來降已作蒙古書用印發去矣。又齊奇爾寨桑來奏曰丹濟拉言爾往投

聖上此處四圍皆我仇人如久住巴雅恩都爾倘人知之未必不來侵犯故我於瀚海四圍處處留踪如我離巴雅恩都爾而他往我必埋書於此而去爾往奏

聖上歸來若我不在此則覓得我所埋之書便知我所在矣。曾

以此言密語我人無知者又問厄魯特降人格墨沽英言噶爾丹身存之日曾集衆寨桑商其所往一無可去而止今丹濟拉以寡弱之衆游行數月欲往達賴喇嘛所料其必無是事此正合齊奇爾寨桑處處留跡之言逃人杜喇爾不知故言欲向達賴喇嘛而去應將目下大將軍伯費揚古疏抄發阿南達等知悉從之○諭議政大臣等著將戴罪國功之趙山恩格色遣一人於丹津鄂木布遣一人於丹津阿喇布坦副以蒙古將領筆帖式曉諭噶爾丹已死招撫其衆伊等若招得丹津阿拉布坦丹津鄂木布即與俱來如事不成或未至其地半途而回著大將軍即於軍前正法○又諭肅州總

書錄卷一百八

上

兵官李世達病故地方緊要定邊副將麥良璽人材健壯著授為肅州總兵官速令赴任不必從征○賜厄魯特授誠台吉等馬匹有差○阿霸坡多羅卓禮克圖郡王達馬林扎布及達爾漢貝子策林敦羅布等來朝 癸未

上駐蹕格爾齊老地方○蘇尼特多羅杜楞郡王達禮扎卜馬齊忒多羅郡王雅穆畢爾蘇尼特多羅貝勒沙利等來朝

甲申

上駐蹕色德勒黑地方是日閱太僕寺牧場馬匹○撫遠大將軍伯費揚古疏報厄魯特鄂里哈之子車陵率其屬七十餘戶男婦共二百五十許來降得旨將車陵遣赴御營其屬下

人等令解至張家口交監養厄魯特官員一同安插 澤卜尊丹巴胡土克圖土謝圖汗等來朝○乙酉

上駐蹕察木喀地方○賜阿霸坡蘇尼特萬齊忒阿霸哈納郡王貝勒貝子等馬匹澤卜尊丹巴胡土克圖土謝圖汗等牛羊 蘇尼特一等台吉徒巴西希布等來朝○丙戌

上駐蹕齊齊爾哈納地方是日閱慶豐寺牧場牛羊○等故議政大臣刑部尚書圖納祭葬謚文恪○丁亥

上駐蹕魁吞布拉克地方是日閱禮部牧場牛羊○以翰林院侍講張希良提督浙江學政○蘇尼特多羅郡王額駙薩穆扎子垂基恭蘇隆來朝○戊子

書錄卷一百九

上

上駐蹕布爾哈思蘇台是日閱上駟院牧場馬匹○賜科爾沁喀喇沁阿霸坡喀爾喀阿霸哈納羊貝子等牛羊○賜澤卜尊丹巴胡土克圖黃蟒喇嘛衣一領帕十五方緞十疋銀五百兩土謝圖汗給帽一頂蟒衣一襲金帶一副緞十疋銀五百兩達西察木皮爾陀音金黃蟒喇嘛衣一領緞二疋銀五十兩 蘇尼特多羅郡王額駙薩木扎來朝 己丑

上駐蹕三岔地方○賜蘇尼特多羅郡王額駙薩穆扎等牛羊

庚寅

上進張家口文武官員兵丁士民等跪迎是日駐蹕宣化府城內 撫遠大將軍伯費揚古疏言都統碩鼐送到厄魯特吳

蘭等三人稟稱我等係伊拉古克三胡土克圖下逃出之人  
去年九月伊拉古克三胡土克圖已離噶爾丹採招為食至  
伊克敦拉等處度冬今年三月自納默黑圖雅蘇圖向西遊  
牧其下人口共有三百許向薩克薩特呼里克而去是以臣  
等率領大兵照常前進一面撥兵交昭武將軍馬思喀同叅  
贊都統侯巴渾德都統齊世都統前鋒統領碩爾都統石文  
英往追伊拉古克三胡土克圖務期剿滅即遣降人吳蘭在  
馬思喀軍中引路

上以示議政大臣○理藩院員外郎常祿疏言臣偕喀爾喀伊  
爾登濟農郡王彭蘇克往收喀爾喀逃出齊卜齊努特人等

實錄卷五十三

五

於閏三月初四十二等日至噶爾達台河等處收服喀爾喀  
齊卜齊努特之窩齊爾圖孟克舒稜格俄木布齊齊克土卜  
新等及其下弓箭手共一百五十餘人安插於吳爾順河報

聞○辛卯

上駐蹕新保安城內○諭議政大臣等溫保居官甚劣苛虐百  
姓至於已極前乃自奏其居官甚善萬民頌美欲為樹碑由  
今觀之沿途衆庶無不願食其肉而怨讟之者况溫保不比  
他人彼嘗為學士朕愛惜斯民之意豈不知之甘度居官亦  
最庸劣今蒲州民變逃入山中若輩如能素勤撫恤百姓豈  
遂抗匿至此巡撫倭倫往彼招撫倘不順從欲將溫保甘度

拏赴彼處正法然後用兵今思其服官汙濁股削小民殊為  
可恨此等貪官不加誅戮衆不知警著議政大臣部院堂官  
會同議奏尋議覆溫保甘度居官惡極應皆正法以警衆人  
請將溫保甘度革職嚴拏赴京交與刑部從之○壬辰遣官  
祭

關聖帝君

上駐蹕懷來縣城外黃寺 皇太子允初大學士阿蘭泰尚書  
馬齊佛倫等迎

駕 策妄阿喇布坦遣使進貢賞賚如例○癸巳

上駐蹕昌平州城內○命皇太子允初大學士阿蘭泰尚書馬

實錄卷五十三

五

齊佛倫等先回京師○陞內閣學士朱都納為兵部督捕左  
侍郎太常寺卿楊爾淑為通政使司通政使 陞江南京口  
水師總兵官林本植為湖廣提督 甲午

上駐蹕清河地方○乙未

駕發清河設國簿皇太子諸皇子諸王及在京文武大小官員  
出郭外五里跪迎八旗護軍驍騎步軍及京城附近紳衿士  
庶工商耆老男婦俱扶老攜幼陳設香案沿門結彩執香跪  
迎

上由德勝門入詣

堂子行禮畢回宮詣



皇太后宮問安。○丙申諭大學士及九卿等曰朕前巡行直隸山東江南浙江見地方人民皆各安生業大小官員恐朕不時臨幸咸兢兢守法奉職以為他省類皆如此頃由大同歷山西陝西邊境以至寧夏觀山陝民生甚是艱難交納錢糧其火耗有每兩加至二三錢不等者前曾面問總督吳祿據言西安等府距省甚近收耗尚輕若沿邊所在地方火耗不免加重矣至於山西特一小省聞科派竟至百萬民何以堪科道官因朕已經訪聞始行參劾並未言於未發覺之前者亦屬何益○又諭曰塞外情形不可臆度必身歷其境乃有確見昔朕欲親征噶爾丹衆皆勸阻惟伯費揚古言其當

實錄卷一百八十三

十

討。後兩次出師皆朕獨斷若非朕親統大軍追襲噶爾丹使少留餘息彼必復聚難以遽滅矣明時為恢復河套議論紛紜致大臣夏言曾銑受戮自朕觀之此地無甚關係若控馭蒙古有道則河套雖為所據安能為患控馭無道則何地不可為亂蒙古游行之地防之不可勝防專言收復河套亦何益乎。至行師之道調軍轉餉必一人兼綜其成事乃易濟前西路進兵時將軍博爾孫思克等專管軍務不與輓運專責地方巡撫等官轉餉迨後糧餉稽遲兵丁困餒致有道殫項朕自白塔至船站猶見有遺骸皆遺鄉導沿途掩埋朕統大兵由中路進時多方籌畫催督糧餉比及旋師無一人受餒

實錄卷一百八十三

十

且支給西路之兵俱獲全還。今沿途各站多貯米糧雖隨營貿易之人皆不乏食。此次寧夏之行料理糧餉悉有次第然後進兵所以直至回軍供應皆足無或稍悞以此觀之兵食兩事斷宜一手區畫此後倘遇行師當永以為法朕又觀塞外運糧最難昔唐宋及明嘉靖時皆用兵西陲不知當日作何轉運之法朕此次寧夏之行不用車輛所需駝馬騾驢悉自京城發往恐有不敷復給公帑採買預備一切什物皆由官運畧不累民○又諭曰御史甯爾講奏請朕回鑾以為回鑾之後賊必潛來因而擒之此真不諳事理之言塞外荒漠雖甚寥濶而蒙古所行之路所居之地必依水草資生是以亦有定所朕於蒙古等經行路徑一一洞悉所以遣發官兵數道圍困皆扼賊之要害噶爾丹迫蹙已極計無所出遂飲藥以死甯爾講全不知兵故其言如此○丁酉

上詣

皇太后宮問安。○諭吏部國家舉行大計原期黜陟明使大法小廉以為又安民生之本所關甚重比年以來督撫等官視為具文每將徵員細事填註塞責至真正貪酷官員有害地方者反多瞻徇庇護不行糾參以致吏治不清民生莫遂重負朕愛養元元之意殊可痛恨今當舉行大典各督撫等官應洗心滌慮力改前轍矢公矢慎整肅官方務期薦舉一



合俾衆皆知勸糾劾一人。俾衆皆知儆。倘仍苟且因循徇私溺職。國法具存。必不輕恕。○陞左都御史傅臘塔為刑部尚書。左副都御史努赫為禮部右侍郎。○陞護軍參領胡式巴為白都納副都統。○以領侍衛內大臣公鄂倫岱兼管鑲黃旗漢軍都統事。○戊戌。諭吏部等衙門。朕頃以狡寇嚙爾丹未滅。調度軍務親莅塞外。因念切民依。巡歷邊境。所至咨訪。目擊山西陝西緣邊一路。地皆沙磧。難事耕耘。人多穴居。類鮮恒業。其土壤磽瘠。固已生計維艱。而地方遼遠。疾苦無由上聞。大小官吏。不能子愛小民。更恣橫索。遂使里井日漸虛耗。比年用兵以來。一應軍需。糈餉俱動支正項錢糧。儲峙供

實錄卷百十三

本

應從不取辦。閭閻乃各府州縣官員。借端私征重收火耗。督撫布政使等官。又不仰體朝廷恤民至意。糾察貪污禁革。加派反多。瞻徇曲庇。又或該督撫庸懦懈弛。因而筆帖式及衙門人役。無所忌憚。擅作奸弊。以致民生滋感。朕心深切軫惻。今外寇已經蕩平。惟以綏乂地方。拊循百姓。為急務。山陝兩省關係緊要。應作何撫恤休養。著九卿詹事科道詳議。以聞。尋議覆。山陝里井艱難。皆緣督撫有司不能仰體皇上軫恤黎民之意。橫徵私派之所致也。應請敕下山陝督撫。務期洗心滌慮。正己率屬。嚴飭所屬官員。屏絕苞苴。嚴禁私徵重耗。其貪污虐民者。立行糾參。至筆帖式衙門人役。擅作

奸弊。滋擾地方者。亦必嚴加懲處。凡有不利於民應革事宜。督撫即為確查革除。或遇水旱災傷。當即奏聞。如督撫仍前因循徇庇。屬員不能撫綏百姓。特將督撫革職。從重治罪。從之。○諭大學士等。爾等可傳諭兵部。選擇少壯而善馳騁者。或司官或筆帖式一員。馳驛速往山西。巡撫倭倫處。問伊招撫之事。若何。並沿途田禾及天時雨水。協和否。詳閱還奏。○己亥。

上奉

皇太后幸暢春園。辛丑。陞禮部左侍郎席爾達為都察院左都御史。內閣侍讀學士布泰為內閣學士兼禮部侍郎。○刑

實錄卷百十三

十一

部尚書翁叔元以病乞休。命原品休致。○壬寅。以左都御史吳璥為刑部尚書。陞兵部右侍郎張鵬翮為都察院左都御史。○諭大學士等。今嚙爾丹已平。天下無事。惟以察吏安民為要務。然官吏之賢否。民生之休戚。所關朕一人端居深宮。何能徧知。此番巡行山陝。或先聞其有聲名而居官不善者。有之。或並未聞其聲名而居官實善者。有之。此皆上下相隔。不能通達之故也。雖古聖君以知人為難。朕豈料溫保行事。一至於此。往者浙江山東等處地方官。以朕不時巡幸。各加勉力。操守皆優。山陝官員。則劣甚。朕恨貪污之吏。更過於嚙爾丹。此後澄清吏治。如圖平嚙爾丹則善矣。○給事中鄭昱

條奏平定噶爾丹慶賀大禮頒詔款項

上曰凡頒敕詔皆人主之事非人臣所宜言自古不以頒敕為善政者以其便於惡人而無益於善人也鄭呈妄以詔款陳奏念係言官特從寬宥著大學士嚴飭之 癸卯禮部題平定噶爾丹武功告成臣等詳稽典禮應遣官祭告

天地

太廟

社稷

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵及嶽鎮海濱歷代陵寢闕里并加上

徽號命史館諸臣編輯平定北寇方略昭示無極

上曰喀爾喀厄魯特原皆納貢之國因其交相不睦屢諭和好

乃仍構釁致起兵爭噶爾丹曾破回子中之薩馬拉罕布哈

爾哈薩克布魯特葉爾欽哈思哈爾賽拉木吐魯番哈密諸

國其所攻取降服者一千二百餘城乃習於戰鬪之國也喀

爾喀焉能抵敵是以七旗數十萬衆一歲之中喪亡畧盡喀

爾喀之汗諾顏台吉等知朕養養蒙古夙有厚恩悉皆款塞

來歸其時若不允其內附恩養得所必皆淪入於厄魯特則

爾時噶爾丹之勢力不言可知矣允其內附而恩養之噶爾

丹必假此釁端與我朝構難凡此情事皆經熟籌受納喀爾

喀非漫然而為之也噶爾丹假索取喀爾喀為名遂犯我邊

境尚書阿喇尼帥蒙古兵逆戰於烏爾會之地我師大北噶

爾丹乘勢遂直抵烏闌布通距京師未及七百里斯時諸王

大臣及國家諸悉軍務之人不在行間者少矣適朕躬以違

和還京左翼軍雖能勝敵而右翼軍不能制勝大臣而下以

至軍士陣亡被創者甚衆噶爾丹亦自知其無濟歸路遭罹

瘟疫得還科卜多者不過數千人耳當是時即豫知其勢雖

大損必復稱兵報怨六年以來烏闌布通之役時屢朕懷因

是訓練軍旅諮訪形勢正經理武備之時噶爾丹果復舉兵

寇掠喀爾喀之納木扎爾托音於克魯倫之地朕思此賊不

可以尋常寇盜視之詔武臣三品以上咸陳滅賊方略會同

詳議舉朝皆以為難其言賊當討滅者不過四人朕以為此

賊斷當亟圖遂昭宣大義祭告於

天地

宗廟

社稷之靈克成厥勳。倘事或未成。則受喀爾喀之內附。致厄魯特之兵爭。糜中國之脂膏。事朔荒之邊塞。窮兵黷武。其名恐未能免矣。今我師所至。

上天佑助。無水之地而靈泉湧出。不毛之地而庶草蕃蕪。事悉稱意者。此皆國家之福。將士之勞所致也。今西北永遠寧謐。其不致蒙咎者。即幸矣。自今以往。務益殫勵。精始終如一。治安之日。愈求治安。其祭告諸典禮。俱依議行。徽號不必上。○和碩顯親王丹臻等疏言。

皇上聖德神功。超越千古。臣下私衷。請崇加

實錄卷百十三

三

尊號。以光鉅典。未蒙俞允。臣等欽惟十餘年以來。

皇上永清四海。手致太平。下臺灣。殲滅察哈爾。定鄂羅斯。收喀爾喀。從古未經服屬之疆土。悉隸版圖。其梗化於朔漠以外者。獨厄魯特。噶爾丹耳。今噶爾丹又復剽滅其同族之青海台吉。皆刻期來朝。又素臣服於厄魯特之喀察諸回人。亦皆輸誠効命。治化之隆。蔑以加矣。昔年三逆蕩平。羣臣請崇上尊號。奉旨不允。及收服喀爾喀。又經上請。亦未允行。於時廷臣再疏陳奏。曾有諭旨。以噶爾丹尚未撲滅。命將原本收附。閣中茲噶爾丹既滅。羣臣遭遇昌時。欣覩盛事。合詞上願。實出至誠。仰乞

皇上曲鑒下情。特賜俞允。臣等幸甚。天下臣民幸甚。得旨。所奏已悉。著仍遵前旨行。大學士等奏請上

尊號再三陳懇

上曰。朕覽史書。帝王事業。貴始終如一。不以徽號為貴。上世無論矣。即明代亦無受尊號者。後人並不非之。朕自御極以來。不曾念及一己。只為天下生民計。夙夜焦勞。惟恐一時怠慢。不克有終。況噶爾丹之滅。由於

上天之駕祐。

祖宗之福佑。眾將士之勤勞也。朕何有焉。

皇太后崇加尊號允宜。朕之徽號不必加。亦不必再奏。○乙巳。

實錄卷百十三

三

陞戶部郎中齊世武為山西布政使司布政使。○丙午。

上詣

皇太后宮問安。○轉禮部右侍郎努赫為左侍郎。陞內閣學士楊舒為禮部右侍郎。○旌表福建烈婦鄧氏拒姦殞命。給銀建坊如例。○丁未。陞左副都御史嚴曾渠為兵部右侍郎。浙江黃巖總兵官趙弘燦丁父憂。命回籍守制。予故荊州副都統和索利祭葬如例。

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十三

實錄卷一百八十三

五

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十四

康熙三十六年丁丑六月己酉朔陞盛京戶部理事官戴都  
里為都察院左副都御史 庚戌

上詣

皇太后宮問安 諸王貝勒貝子公滿漢文武官員及遠近士  
民赴暢春園恭請

皇上允受神聖文武大德廣運尊號

上諭曰朕御極四十年雖自始至終孜孜不倦而吏治尚未澄  
清民生尚未豐裕士卒尚未休息風俗尚未淳樸且旱潦災

實錄卷一百八十四

一

異亦復相仍方今外寇既靖正宜休息生養徒加尊號何益  
於治朕蕩平噶爾丹機宜未嘗有失苟天下共能知之朕願  
足矣崇上尊號不必行毋復再奏 命盛京禮部侍郎阿山  
以禮部侍郎銜管翰林院掌院學士事 辛亥陞叅領徐九  
如為浙江黃巖總兵官○命裁江南京口水師總兵官缺改  
設副將屬京口將軍統轄標下三營裁去右營歸并中左二  
營 甲寅禮部題

聖駕親征朔漠所過之名山以及勦賊之戰地請磨崖勒石俾  
塞外億萬載臣民咸知今日之成功峻烈自開闢所未有從  
之 國子監題請將

親征朔漠一切訐謗勝算纂集大綱同祭告

先師文勒碑國學更將碑文摹搨頒發天下學宮從之

左通政喀拜為內閣學士兼禮部侍郎丙辰陞前鋒叅領

諸滿為荊州副都統丁巳陞左副都御史哈山為盛京禮

部侍郎○陞光祿寺卿錢三錫為太常寺卿○戊午

上詣

皇太后宮問安辛酉諭刑部尚書傅臘塔爾部事關人命甚

屬緊要自圖納任刑部以來勤勉供職事甚修舉屬員至今

稱善今乃簡爾以任此職終色亦素稱賢能司官如邁塗則

辦事庸常所賴者惟汝二人○諭大學士等曰河工事重朕

實錄卷百全

二

嘗留心察訪聞董安國於河工不親巡歷凡事俱委馮佑馮

佑為人朕深知之向以諳練河務為靳輔所奏用靳輔役之

如奴隸今董安國目為正人信任倚用不知若輩惟解營私

決不肯秉公盡職也○癸亥陞宗人府府丞劉元慧通政使

嚙禮俱為都察院左副都御史以禮部侍郎管翰林院掌

院學士事阿山充日講起居注官甲子副都統阿南達疏

言臣等遣台吉雲楚木西安前鋒署總尉吳通保遊擊楊奇

張當知等率兵五百名前往堵嚙斯口臣等因俟散秩大臣

丹巴聲息緩行至色爾騰地方遇嚙斯多爾濟使人俄濟

通問於策妄阿喇布坦而還言丹濟拉已遣人往策妄阿喇

布坦處通好見住吉木色地方待其使回觀此丹濟拉往附  
策妄阿喇布坦是實臣等在此俟丹濟拉無益欲徹嚙斯口  
兵起行而回

上諭丹濟拉往投策妄阿喇布坦是實著阿南達等軍俱回阿

南達量率兵馬暫往布隆吉爾等處探聽聲息再檄阿南達

遣人同嚙爾多爾濟之人哈密回子之人往策妄阿喇布

坦處宣諭朕旨再將阿南達疏及遣使之故檄內大臣索額

圖大將軍伯費揚古將軍馬思喀等從鄂爾多斯驛路而回

侍郎滿丕亦著回來著侍郎安布祿率察哈爾兵每旗十名

將領二員至滿丕所居駐劄將軍舒恕亦著回來今大兵既

實錄卷百全

三

撤前所帶四月糧又令備兩月糧米多餘留令于成龍等同

大兵運至船站收囤鄂爾多斯達賴布喇克地方交鄂爾多

斯王貝勒等撥兵看守支給留駐船站之大臣台吉等官兵

丁卯

上詣

皇太后宮問安己巳諭兵部漢軍兵內劣奴甚多安肯勤養

馬匹朕行軍以來知滿兵精銳臨陣驍勇較漢軍相去遠矣

應將漢軍烏鎗兵裁革滿洲烏鎗兵增補其官馬俱撥給滿

洲旗分予故原任勇畧將軍雲南貴州總督兼一等精奇

尼哈番趙良棟祭葬加祭一次謚襄忠癸酉

上詣

皇太后宮問安 乙亥陞盛京刑部理事官額倫特為通政使司通政使 丙子陞左通政金璽為光祿寺卿 丁丑命大學士伊桑阿阿爾泰王熙張玉書李天馥尚書熊賜履張英為纂修平定朔漢方畧總裁官內閣學士覺羅三寶羅察喀拜韓奕顧藻禮部侍郎翰林院掌院學士阿山刑部右侍郎管詹事府事尹泰為副總裁官 戊寅山西巡撫倭倫疏言請建

萬壽龍亭恭勒

聖諭永戴

皇仁

上諭大學士等曰何事建立龍亭若果善民自感頌大同田薄民窮其建立龍亭著停止至倭倫奏稱大同地方飼馬萬匹全不費民力自朕觀之前此大同養馬不過六千未始不用民力朕因民勞苦故將康熙三十六年錢糧盡免朕凡事俱務實行不尚虛譽爾等可曉示之先是撫遠大將軍伯費揚古疏言散秩大臣丹巴等至巴雅恩都爾並無丹濟拉踪跡因遣阿玉什等齎臣所發丹濟拉書往追丹濟拉又將軍馬思喀等咨言伊拉古克三胡土克圖自所宿磨海圖郭爾已去七八日不能追及得旨前者遣內大臣策旺諾爾布散

秩大臣巴當阿兩路往擒伊拉古克三胡土克圖緣兵馬糧餉扣數發去是以指地疾往限日立歸此馬思喀之所灼知也伯費揚古遣馬思喀時所發官兵太多是以重滯不能追及伊拉古克三胡土克圖昨丹木巴哈什哈歸朕亦知其勢斷不能獲伊拉古克三胡土克圖曾諭議政諸臣今果如朕所諭矣著檄索額圖阿南達知之至是大將軍伯費揚古會同馬思喀疏言散秩大臣丹巴等直至楚庫爾戈必並無丹濟拉踪跡大兵直至磨海圖郭爾不能追及伊拉古克三胡土克圖目下大兵似可即回但趙山恩格色差往招撫丹津阿拉布坦丹津鄂木布已將四十日矣今軍食尚足且察罕諾爾等處水草入佳是以臣等共商將官兵移進環察罕諾爾住二十日以養馬畜而候趙山等聲息此間若招致厄魯特則收之押護而來若二十日內無聲息則臣等率領官兵起程而回至達爾漢親王諾內喀爾喀親王善巴及貝勒公台吉等因無事故皆遣回前以察哈爾八旗官兵馬瘦奉旨留於守米之地伊等籲請効力前來今無事亦遣回報聞河南南陽總兵官郭文魁丁母憂命在任守制

秋七月己卯朔享太廟遣內大臣明珠行禮

上詣

皇太后宮問安 奉命來京原任陝西延綏總兵官柯彩以老乞休命原品致仕 庚辰昭武將軍馬思喀等疏言臣遵旨率兵由坐塘之路經鄂爾多斯地方回來行程遙遠恐馬駝臙落是以臣等率兵仍自郭多里經歸化城之路進張家口上以示議政諸臣 辛巳理藩院疏言臣等會同大學士阿蘭泰尚書馬濟遵旨往旃檀寺召集默爾根綽爾濟各寺喇嘛一一取供查丹巴色爾濟阿齊圖格隆巴咱爾喇木扎木巴俱係大喇嘛奉

皇上差遣往達賴喇嘛處乃知其已故而謂之尚在通同第巴誑奏殊為可惡應將丹巴色爾濟阿齊圖格隆巴咱爾喇木

實錄卷一百一

六

扎木巴擬絞監候秋後處決家產人口入官以丹巴色爾濟巴咱爾喇木扎木巴之徒交默爾根綽爾濟安置京城各寺廟以阿齊圖格隆之徒交歸化城彭蘇克喇嘛安置彼處寺廟得旨丹巴色爾濟從寬免死革去住持大喇嘛抄沒家產單身發往盛京任棲一廟阿齊圖格隆各處差遣効力從寬免死并抄沒革去住持大喇嘛准其住本廟巴咱爾喇木扎木巴亦從寬免死并抄沒革去大喇嘛餘如議 壬午浙江黃巖總兵官徐九如請訓旨

上諭之曰南北情形不同操演兵丁各隨土地之宜不可拘泥以北方操演之法為善且旗人為總兵者甚少爾須盡心効

力毋自貽羞可也 禮部尚書兼管翰林院掌院學士詹事府詹事事張英以老乞休慰留之 詹事府少詹高士奇奏請終養命加詹事府詹事銜回籍終養 癸未大學士等擬尊上

皇太后壽康顯寧徽號

上命滿大學士等往奏

皇太后

皇太后不允大學士等回奏

上復令奏請奉

皇太后旨皇帝懋建弘敷予不勝忻悅際此昌期予心慰矣尊

實錄卷一百一

七

加徽號向雖有例並非斷不可已者著停止我心始安大學士等回奏

上命大學士等集議甲申大學士等復奏請

皇太后奉

皇太后旨皇帝既不受尊號這加徽號不必行大學士等議奏

皇太后不受徽號懿旨已經三頒相應謹遵

懿旨

上曰三次力請

皇太后既不允應謹遵

懿旨 理藩院題喀爾喀土謝圖汗請以其祖母族人厄魯特



托爾果特阿玉什等之子孫四十餘台吉請安進貢應不准行得旨台吉衛寨桑龔格俄波俄欽車卜登三都卜俱如土謝圖汗奏請准其請安進貢餘如議 贈故廣東提督李鎮鼎右都督于祭葬如例 乙酉

上詣

皇太后宮問安 丙戌先是撫遠大將軍伯費揚古疏言臣感冒傷寒更兼體弱不能率兵前行得旨伯費揚古不必候大兵著即歸馬思喀既見嵩祝後率大兵養馬徐行而歸尋諭撫遠大將軍伯費揚古覽奏朕衷不勝隱惻今噶爾丹既死諸事俱畢兵亦當撤所遺丹濟拉吳爾占扎卜伊拉古克三胡土克圖數人所往何處有確聞之時發檄取之當即解來目下爾所到察罕諾爾距邊哨有幾許遠朕即撥醫人食物給驛遣往朕此諭到速將爾病勢如何來奏至是伯費揚古疏奏謝恩并言臣於六月二十三日以官兵交將軍馬思喀臣仗

皇上福澤病已少愈身命可以無礙但腰腿猶痛不能起立養病前行量力圖歸庶瞻仰

天顏之前可冀臣病全痊顏色復舊疏入報聞 戊子 孝懿皇后忌辰遣官祭

陵 以和碩康良親王傑書子椿泰襲封和碩康親王○振武

將軍孫思克疏言喀爾喀扎薩克圖汗屬下蒙古曼達爾什率男婦一百六十餘人來降得旨著撥官護送來京 庚寅

上詣

皇太后宮問安 陞太常寺卿錢三錫為宗人府府丞 壬辰 策試天下貢士汪士鋐等於

太和殿前制曰朕惟治天下之道必期柔遠能邇察吏安民俾世臻清晏之休人享耕鑿之利庶薄海內外無一物不得其所頃因邊隅不靖恭行天討茲巨憝既殄西北塞外悉已蕩平朕中外一視念其人皆吾赤子覆育生成原無區別其何以撫循綏集使竄匿者不致於仇離向風者得遂其食息

歟外氛既滌內治宜修綏輯地方予愛百姓惟司牧者是賴倘使貪墨不除則民生何由休養朕澄清吏治於黷賄敗檢之人素所深悉近復嚴加誡諭法在必懲但恐積習相沿未盡悛改今欲使大法小廉人懷恐懼羞惡之心共勵羔羊素絲之節其何道之從也至於黃運兩河為運道所係比年以來水潦頻仍時有衝決已支百餘萬金錢興工修築尚未底績何道而疏濬得宜悉免泛溢之患隄防孔固永無潰決之虞使國計民生均有攸濟歟爾多士淹通經術留心當世之務蘊於中者素矣其各抒所見詳切敷陳朕將親覽焉 朝 鮮國王李煒遣陪臣崔錫鼎表賀朔漢蕩平進貢禮物宴賚

如例封朝鮮國王李煥子李昀為世子 癸巳中元節遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵 甲午

實錄卷百十四

十

上奉

皇太后自暢春園回宮

上諭殿試讀卷諸臣曰作文者無不論理然徒能言而不能行亦奚益哉朕觀性理一書大指只一誠字人可不以誠自勉乎 乙未以平定朔漢遣官告祭

天地

太廟

社稷

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵

上御太和門傳臚賜殿試貢士李蟠等一百五十人進士及第出身有差 丙申以

太和殿成遣官告祭

天地

實錄卷百十四

十一

宗廟

社稷 以平定朔漢遣官告祭

先師孔子 以鑲黃旗副都統盧崇耀為廣東提督 以出征昭莫多正白旗護軍校署前鋒侍衛夸達創發身故照陣亡例授拖沙喇哈番 丁酉

上御太和殿王以下文武各官以平定朔漢并

太和殿告成上表行慶賀禮頒詔天下詔曰朕君臨天下早夜孳孳勤求治理惟恐一夫不獲其所初未嘗有岐視中外輕事兵戎遠伐異域之事厄魯特噶爾丹向與七旗喀爾喀同奉職貢嗣因兩國交鄰構兵喀爾喀汗等為所敗亟叩關

內附噶爾丹乃借辭追擊闖入我邊境恣行狂逞朕屢頒敕諭令其悔悟自新而狡寇不知省悟益肆鴟張其逆謀不測實有偏處近塞窺伺內地之漸朕思此寇包藏禍心倘不即行撲滅則異日必緣邊設防重滋民困何如及時聲討立靖根株於是昭告

天地

宗廟

社稷躬統禁旅不憚勤勞三出塞外去年夏賊踞克魯倫河自度力不能抗倉皇遁朕親追至土喇河適西路大兵遮截其後擊敗之於昭莫多賊勢大挫冬月復駐蹕鄂爾多斯收

實錄卷一百四

上

撫其降衆追絕其外援而賊益困感機會所在刻不可失遂以今年春西巡邊境從寧夏出塞遣發大兵兩路進剿而青海烏斯藏人等皆先後輸誠自効哈密國人又停獻噶爾丹之子於行在噶爾丹窮迫已極一聞大兵壓境計無復之隨於阿察阿穆塔台地方飲藥自盡揆諸料敵成謀適相符合自此寇氛盡滌邊圉永安而朕為民除害不得已而用兵之意亦可曉然共諭於天下臣民矣武功告成之會正太和殿鼎建工竣魏煥方新臨御伊始協氣集於九重觀瞻肅於萬國是用覃敷慶澤以上答

郊

廟

社稷之靈下協中外人心之望於戲懋武功而敷文德聿臻熙皞之風建宸極而肇皇圖永慶平成之治誕告中外咸使聞知詔內恩款三十六條加封撫遠大將軍伯費揚古為一等公西路出征叅贊以下官員各給拖沙喇哈番襲一次已亥以禮部左侍郎努赫內閣學士覺羅三寶羅察禮部侍郎管翰林院掌院學士事阿山充經筵講官辛丑

上詣

皇太后宮問安吏部遵諭議覆

皇上親統六師駐蹕寧夏甘肅巡撫郭洪係封疆大臣離寧夏

實錄卷一百四

上

止一二程竟不赴行在朝見今

聖駕還宮始塞責具題請

安殊屬不合應將巡撫郭洪革職交刑部拏問得旨郭洪著革職餘依議尋刑部問擬枷責命發黑龍江當差免三次出兵八旗兵丁所借官庫銀兩壬寅授一甲進士李蟠為翰林院修撰嚴虞惇姜宸英俱為翰林院編修保和殿大學士兼禮部尚書王熙以老乞休溫旨慰留之癸卯諭吏部庶吉士查昇等教習已久今加考試應分別授職除黃叔琳胡任輿顧悅履已經授職外滿漢書庶吉士張大有史申義張德桂查昇汪倭陳恂叢澍岳慶汪澂周道新閻錫爵周起

渭陳璋熊葦傳森陳夢球裴之仙高其倬覺羅滿保楊顯海  
寶俱照例授翰林院編修檢討江球吳甫生俱著以科道用  
林文英拉都立俱著以部屬用張壽崗張逸少陳豫朋朱斌  
陳守創殷元福俱著照原甲第以知縣用五格著照見在品  
級隨旗行走爾部即遵諭行○乙巳諭翰林院選拔庶常原  
以作養人材今科進士特加簡閱取汪士鋐徐樹本車鼎晉  
陳壯履王誥桑弋李鳳肅周燾陳至言余正健查賚許琳趙  
宸黼朱啟昆吳宗豐張元臣吳文炎阿珥賽孔尚先李林甄  
昭蔡珽李周望昌格鐵範金郭子蕃李牲麟李紹周阿進泰  
傅敏歐陽齊等三十一員俱著改為庶吉士并修撰李蟠編

實錄卷一百八十四

高

修嚴虞惇姜宸英分別滿漢書教習爾衙門即遵諭行○陞  
太僕寺卿梅鋐為太常寺卿命吏部尚書庫勒納等往給  
外藩四十九旗恩賞丙午諭兵部都統副都統典兵重任  
若但於本旗內選授則下五旗即有本旗之王掣肘辦事不  
得其正者甚多嗣後都統副都統員缺應於左右翼內不論  
旗分補授以故一等阿思哈尼哈番扎世子普明襲職  
戶部議覆陝西巡撫巴錫疏言各衛堡積貯米穀宜分撥沿  
邊各堡運貯應如所請

上曰此各衛堡米穀若責令承收官員自備轉運之費路遠而  
險勢必科派小民巡撫之奏戶部之議皆非也其俟秋成後

令該撫酌支正供買米運貯丁未

上詣

皇太后宮問安

上巡幸塞外命皇太子允初皇三子允祉

皇四子 皇五子允祺皇八子允禩皇九子允禔隨駕是日

啟行駐蹕三家店以內閣學士喀拜為甘肅巡撫刑部  
左侍郎邁達黑龍江副都統拉自以老病乞休俱以原品致  
仕○旌表河南烈婦王氏拒姦殞命給銀建坊如例

實錄卷一百八十四

十五

大清聖祖合天弘運文武睿哲恭儉寬裕孝誠信中和功德  
大成仁皇帝實錄卷之一百八十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百八十五

康熙三十六年丁丑八月戊申朔祭

大社

大稷遣吏部尚書庫勒納行禮

上駐蹕密雲縣 己酉

上駐蹕道亭 先是諭大學士阿蘭泰前者古北口總兵官馬進良率兵往克魯倫時倒斃駱駝五百有餘至今尚有一百五十匹未經抵償此項理應償補但恐官弁科派累兵今噶爾丹已滅著免其抵償到古北口時爾可名集官兵將此偏

實錄卷一百八十五

十

行曉諭至是古北口總兵官馬進良率所屬官軍迎

駕阿蘭泰遵旨召集官兵徧宣

上諭官兵皆歡呼謝恩 庚戌

上駐蹕三岔口地方 辛亥

上駐蹕狼山地方 癸丑

上駐蹕劉家營地方 甲寅

上駐蹕托賴營地方 乙卯

上駐蹕博和齊達巴漢昂阿地方 丙辰

太宗文皇帝忌辰遣官祭

昭陵

上駐蹕噶拜昂阿地方 陞內閣侍讀學士壽鼎為內閣學士

兼禮部侍郎轉刑部右侍郎綏色為左侍郎陞內閣學士覺

羅三寶為刑部右侍郎陞左通政吳涵為太僕寺卿 原任

長史多禪因使往厄魯特被害照陣亡例授拖沙喇哈番

丁巳遣大學士李天馥祭

先師孔子 戊午秋分夕

月於西郊遣工部尚書薩穆哈行禮

太祖高皇帝忌辰遣官祭

福陵

上駐蹕巴顏和洛 命有羅卜臧端魯卜等交通伊拉古克三

實錄卷一百八十五

十

胡土克圖死罪發大喇嘛綽爾濟等處安置 己未

上駐蹕哈瑪爾昂阿地方 辛酉

上駐蹕巴顏拖羅海地方 喀喇沁王扎什額駙噶爾臧翁牛

特貝勒額爾德布鄂齊爾來朝 諭大學士阿蘭泰曰山陝

兩省最為要地以後文職缺人俱令奏聞朕酌量選用 副

都統阿南達疏報臣差護軍校阿奇納自色爾騰前去令從

布隆吉爾重整所設驛站將留貯之米運至長馬爾地方六

月二十六日阿奇納至噶爾重多爾濟所居西欣木地方驛

站噶爾重多爾濟親率二三十人至阿奇納所奪馬駝殺從

僕二人執阿奇納行三日至布隆吉爾方遣回臣即率兵追

噶爾圖多爾濟至布隆吉爾哈喇烏蘇地方又據坐塘撥什庫邊代報稱噶爾圖多爾濟逃去時其屬下人經過本驛奪五驛之馬駱駝而去又因丹濟拉來降先遣齊奇爾寨桑前來噶爾圖多爾濟遇之亦執之而行留於者爾渾台地方而去臣因丹濟拉來恐彼恰遇噶爾圖多爾濟故遣齊奇爾寨桑赫納等選滿洲綠旗兵共四百名以追噶爾圖多爾濟迎丹濟拉至噶爾圖多爾濟屬下見在招降人內有應取來者與我軍一齊帶至肅州交孫思克博濟解往招降吳能巴圖爾等兵一百九口輝特台吉羅卜臧屬人共八百口其喇嘛阿喇木扎木巴阿喇木班共三百口交台吉俄木布額爾德尼等由邊外徐行致之賀蘭山等處候旨

實錄卷五十五

二

上諭噶爾圖多爾濟乃誠心降附之人去歲使人來重加恩賜斷不逃遁但伊等以耕為業今棄其田禾忽然逃去必有不得已之情著理藩院行文將軍孫思克博濟等務必詳察明白具奏驛站關係重大應行文將軍孫思克等將被劫驛站作速添補馬匹不得誤事至策妄阿喇布坦處亦應將噶爾圖多爾濟逃去之事發教諭之諭策妄阿喇布坦曰噶爾圖多爾濟率其屬眾誠心來降安插耕種今忽留其下人盡棄田苗逃去其去必有不得已之情朕於噶爾圖多爾濟畧無責備之意伊係鄂齊爾圖車臣汗之孫倘往爾地欲居於彼

可收之好加撫養如欲歸來即行遣回朕於此降旨令收噶爾圖多爾濟遺留人等特諭（甲子）

上駐蹕齊老圖和洛（乙丑）以左副都御史噶禮為內閣學士兼禮部侍郎（丙寅）陞內閣侍讀學士扎賴為內閣學士兼禮部侍郎尋調為都察院左副都御史（工部左侍郎李元振以省親乞假允之）予故領侍衛內大臣兼議政大臣覺羅塔達祭葬如例（喀爾喀額駙敦多布多爾濟等迎駕）（丁卯）

上駐蹕他斯哈哈達地方（己巳）吏部右侍郎彭孫通以遷葬乞假允之（陞白都納防守禦關張為黑龍江左翼副都統

實錄卷五十六

四

庚午

上駐蹕阿拜諾顏蘇巴爾漢地方（辛未）

上駐蹕森濟圖哈達地方（壬申）

上駐蹕驚和洛（乙亥）

上駐蹕巴圖舍里地方（賜喀喇沁翁牛特喀爾喀王貝勒額駙台吉等銀幣有差）（丁丑）

上駐蹕尼魯斯台達巴漢地方

九月戊寅朔

上駐蹕烏喇低地方（己卯）遣官祭

歷代帝王（遣官祭城隍之神）

上駐蹕柏敦昂阿地方○庚辰

上駐蹕克勒烏里雅蘇台○辛巳

上駐蹕兩西爾哈交界地方○浙江巡撫線一信疏言原任溫處道陳丹赤永嘉知縣馬璵當耿逆叛時殉難請立祠致祀從之○癸未

上駐蹕穆祿喀刺沁地方○副都統阿南達疏言據回子額貝杜拉達爾漢白克報稱厄魯特丹濟拉率家屬七十九人來降於六月十五日至哈密城求請面

聖隨遣長子郭帕白克送丹濟拉已於六月二十八日啟行

上以丹濟拉向係名族授為散秩大臣其子多爾濟塞卜騰授

實錄卷一百八十五

五

為一等待衛俱安插張家口外編入察哈爾旗分佐領其屬

下人酌可用者披甲給以錢糧○調禮部左侍郎王澤宏為吏部右侍郎○轉禮部右侍郎王封濬為左侍郎○陞內閣學士

韓爌為禮部右侍郎○甲申

上駐蹕汗特木爾達巴漢地方○厄魯特台吉丹濟拉至

御營

上命之進見大學士阿蘭泰及郎中阿爾法引丹濟拉入

上獨坐毡帷內遠屏左右并令阿蘭泰阿爾法出獨留丹濟拉

語良久丹濟拉出驚謂諸大臣曰我乃叛逆罪人窮困始來

歸命乃

皇上畧不致疑盡屏左右召我入見且蒙

恩授我顯爵乃知

聖主至勇至仁如此令我誠心感戴永不敢有異心矣

上隨召阿蘭泰入諭曰爾等偕丹濟拉入者蓋以防不測也爾等所見雖是朕思凡人無不可以誠感丹濟拉雖來降其心

不無疑畏朕推誠如此伊必感激喜出望外斷無妄動之事

且伊倘妄動數百人朕亦不以為意況一人乎朕令爾等俱

出不留糧惟內者欲使丹濟拉之不疑也○乙酉

上駐蹕鄂爾和蘇台○丙戌

上駐蹕博洛河屯○丁亥

實錄卷一百八十五

六

上駐蹕喇門噶山○戊子

上駐蹕捕塔海噶山○己丑

上駐蹕恩格木噶山○琉球國中山王尚貞遣陪臣毛天相進

貢宴齊如例○庚寅

上駐蹕三岔口○以刑部尚書吳璥為武會試正考官侍講學

士王九齡為副考官○辛卯

上駐蹕遼寧○喀爾喀車臣汗遣使進九白年貢宴齊如例○

壬辰

上駐蹕密雲縣

上諭內務府總管海喇孫等膳房人花喇額楚哈哈珠子德住



茶房人雅頭伊等私在皇太子處行走甚屬悖亂著將花喇德住雅頭處死額楚交與伊父英赫紫園禁家中 癸巳

上駐蹕三家店 甲午

上回宮詣

皇太后宮問安 戊戌

上詣

皇太后宮問安 以戶部尚書陳廷敬戶部右侍郎王揆俱充經筵講官 己亥陞詹事府少詹事李錄予為內閣學士兼禮部侍郎○轉提督順天學政工部右侍郎李光地為左侍郎仍提督順天學政陞都察院左副都御史熊一瀟為工部

實錄卷百全

七

右侍郎○庚子以兵部尚書兼步軍統領開音布為鑲白旗滿洲都統仍兼管步軍統領事調鑲白旗蒙古副都統魯伯赫為鑲黃旗滿洲副都統正藍旗漢軍副都統勒奇為正白旗滿洲副都統陞前鋒參領宗室塞伯理為鑲白旗蒙古副都統護軍參領張庫為正藍旗漢軍副都統 壬寅

上御經筵講畢賜大學士九卿詹事及講官等宴 癸卯

上御太和殿視朝文武陞轉各官謝恩 甲辰

孝慈高皇后忌辰遣官祭

福陵 乙巳黑龍江將軍薩布素疏言沿河被水之十八莊計其人數將舊貯米糧散給

上諭戶部理藩院曰朕前至寧夏黑龍江將軍薩布素曾奏伊處收貯糧米三萬餘石年久漸朽與其積之腐爛何若散之為有益乎且出陳可濟軍糧易新便於收貯宜如所請行

陞左都御史席爾達為兵部尚書兵部右侍郎哈雅爾圖為都察院左都御史○授和碩安親王岳樂女為郡主壻福寧為和碩額駙 贈鎮平將軍湖廣提督徐治都太子少保○祭葬諡襄毅○丙午陞宗人府丞錢三錫為都察院左副都御史 丁未理藩院題請將巴圖爾額爾克濟農所有壯丁編為佐領另為一扎薩克鑄給印信明年令移至烏喇或附近之地居住

實錄卷百全

八

上曰若將巴圖爾額爾克濟農移住近地則沿邊別部蒙古其多豈可盡移乎蒙古事在治之得其道不在地之遠近著停其遷移其編佐領為扎薩克給印信俱依議 授原固山貝子章泰女為縣君壻福爾布為固山額駙○以禮部侍郎兼翰林院掌院學士阿山教習庶吉士

冬十月戊申朔享

太廟遣皇太子允初行禮 遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵（頒康熙三十七年時憲曆）己酉

上諭宗人府禮部國家樂育人材振興文教將使海內英雋之士靡不蒸蒸蔚起矧宗室子弟系託天潢豈無卓越之姿足稱令器允宜甄陶獎勵俾克有成考諸前史以公族應制舉入仕者代不乏人今屬籍所載日益繁衍除已授爵秩人員外閒散子姓素無職業誠恐進取之途未闢致嚮學之意漸

實錄卷一百五

九

隳嗣後八旗宗室子弟有能力學屬文奮志科目應令與滿洲諸生一體應試編號取中如此則賦質英異者咸服習於詩書而學業成就者不阻抑於仕進凡屬宗室人人得以自効而於朕興賢睦族之至意亦用是以允愜焉爾等衙門即遵諭行 諭兵部軍政大典五年一舉所以黜陟將弁砥礪官方使賢者知勸而不肖者知儆關係甚重每見督撫提鎮不能實心奉行軌向所屬需索部費恣意誅求因而將弁以下節次侵削重為兵害至於所舉所劾或瞻徇情面或庇護私交將克扣額餉虛冒兵糧濫受餽遺虐取規例實係貪酷及衰懦闊兄不能騎射之員不行參劾止將微員細事草率

塞責以致貪酷庸劣之輩無所戒懲而守法奉公宣勞盡職者遏抑不彰無所激勸殊負朝廷旌別淑慝之至意爾部可即通行各督撫提鎮此次舉行軍政務矢公慎力破積弊俾舉一人眾皆以為賢劾一人眾皆以為不肖庶激揚咸當而國家允收得人之效倘因仍陋習不加悔改後有發覺定將督撫提鎮等官一并從重治罪（哈密額貝杜拉達爾漢白克疏言臣既擒塞卜騰巴爾珠爾并噶爾丹屬下諸人厄魯特必不悅臣而哈密又素弱用是危懼伏乞庇而安之且臣所畏者策妄阿喇布坦也祈

實錄卷一百五

十

皇上降敕使勿害臣給臣敕印俾有時以無恐以保我疆土且使葉爾欽吐魯番等聞之必共欣羨各思嚮往更懇移回子屯於肅州凡朝覲往來俱自肅州乘驛使臣地聲息得時至聖上之前下議政大臣等議尋議覆額貝杜拉誠心向化擒噶爾丹之子及屬下人來獻殊為可嘉應議敘以示鼓勵額貝杜拉授為一等部長伊子郭帕白克白奇白克授二等部長分編旗隊並令伊子郭帕白克率一百人住扎肅州應給額貝杜拉管轄哈密國印遣理藩院郎中布爾賽奔墾前往分編旗隊又請給肅及請安進貢使人俱自肅州乘驛應如所請得旨依議肅用紅有應報聞之事准十五人乘驛 庚戌 皇太后聖壽節

上率王以下文武大臣侍衛等詣

皇太后宮行禮導

懿旨停止筵宴 辛亥策試天下武舉於

太和殿前 壬子

上御瀛臺紫光閣閱天下武舉騎步射技勇畢

上親射二次發矢皆中 兵部理藩院會同三法司奏言恩格

色趙山前奉旨差一人於丹津鄂木布差一人於丹津阿拉

布坦告以噶爾丹之死且招與俱來乃恩格色竟不到丹津

鄂木布所但同趙山至丹津阿喇布坦處前行七日即偕稱

糧騎告乏而歸明係違旨應立斬示衆得旨趙山至所指之

地其事已竣著令歸家恩格色竟不到所指之地著立斬

癸丑

上御瀛臺紫光閣閱武舉騎步射技勇擇繳煥章等十一人復

令步射四次騎射二次

上又率善射侍衛等射

上發五矢皆中諭大學士等曰今科落卷武舉人內安知無騎

射俱佳而被遺斥者乎如其回籍則已若有留此者令兵部

察明復試 調鑲白旗漢軍副都統公孫徵灝正白旗漢軍

副都統馮國相俱為鑲黃旗漢軍副都統以原任鑲黃旗副

都統興永朝為鑲白旗漢軍副都統陞陝西興漢總兵官萬

永祺為正白旗漢軍副都統 甲寅傳臚賜中式武舉繳煥

章等一百一人武進士及第出身有差 乙卯理藩院題厄

魯特丹津鄂木布使彭楚克車陳白克阿兒達爾鄂木布奏

稱欲往策妄阿喇布坦處但丹津鄂木布向與策妄阿喇布

坦不合應遣人招之使來此奏未可憑信

上允之差羅卜臧丹巴齋救前往救曰朕前聞爾與噶爾丹分

拆游行故差合色馬尼圖捧救諭以來降必使富貴優加恩

養爾如同丹津阿喇布坦往歸策妄阿喇布坦朕亦不究著

明白覆奏如兩無所歸欲於額黑阿喇爾洪郭羅等處據險

竄伏朕斷不容必刻期破之爾使人諾顏格隆臧布額爾克

俄木布阿旺達什等來奏云倘噶爾丹至我近地我必擒而

殺之歸降聖朝又以教書使諾顏格隆臧布齋去諭爾雖不

能擒殺噶爾丹而身率屬下來降亦必使之富貴而優養之

毋疑毋阻今爾竟不往歸策妄阿喇布坦仍另自游行豈因

爾向與策妄阿喇布坦不睦有歸噶爾丹之事故不便復歸

策妄阿喇布坦乎今噶爾丹身死國亡生擒其子塞卜騰巴

爾珠爾又擒伊拉古克三胡土克圖今爾不速來漸至日久

則爾生計亦漸迫若爾率屬下星速來降朕必加以厚恩優

待愛養目下丹濟拉車陵等來降俱使得所而愛養之爾亦

當聞之詳矣今軫念爾無所歸生計窘迫欲使得所之意爾

當壽之速來歸降毋貽後悔為此特遣爾幼時服役識認之人羅卜城丹已齋教往諭 陞光祿寺卿金璽為宗人府府丞 丙辰

上詣

皇太后宮問安 諭大學士等曰前回子奸細一事已正法二人釋放二人餘尚有監候者今問彼處來降頭目及丹濟拉等奏云並無回子為奸細之事前原係敵人而潛住內地故以奸細執之今噶爾丹已滅部落俱降其監候回子應從寬免死釋放 調鑲藍旗漢軍副都統巴賽為正黃旗蒙古副都統 丁巳以故三等阿思哈尼哈番鮑敬長孫鮑鐸襲職

聖祖實錄

卷一八五

予故都統郭布察葬如例 理藩院題厄魯特巴圖爾額爾克濟農應授何職於何處住牧得旨巴圖爾額爾克濟農授以目勒另為一扎薩克給與印信約其屬下人丁分編佐領住賀蘭山 戊午理藩院奏丹津阿拉布坦疏言合色等奉差齋到教書內令臣當兄弟同居臣原欲即往與之游牧因臣妻大病今年不能親身往覲不論所居何地總之請聖安進貢者也查丹津阿拉布坦原與策妄阿喇布坦不睦下人無食窮無所歸應遣使招來

上先行仍命其使人諾顏格隆臧布達什俄木布齋教而往敕曰朕前降敕諭爾來降今觀爾疏言尚在首鼠兩端凡來降

人員盡皆恩養使得其所爾當深思之作速來降為此即遣爾使人諾顏格隆臧布達什俄木布齋教往諭 都察院左副都御史札賴以疾乞休命解任調理病痊起用 己未一等伯額參以庸劣革退命其親兄四格襲爵 禮部尚書張英疏辭兼管翰林院掌院詹事府詹事事允之 庚申調刑部右侍郎覺羅三寶為兵部右侍郎陞右春坊右庶子孟額為刑部右侍郎大理寺少卿高裔為光祿寺卿 辛酉諭大學士等曰翰林院詹事府內滿洲官有自各部院以才能陞授者自後凡有差遣及審讞之事亦宜遣往朕觀翰林院滿洲漢軍進士出身者所學俱優若有差遣時可除正差之外

聖祖實錄

卷一八五

於伊等內著一員同往練習 壬戌陞通政使額倫特為都察院左副都御史 諭戶部比年出師討寇總為中外生民永圖休息故不憚勞苦遠歷邊塞其一切飛芻輓粟皆動支正供額賦不使累及閭閻獨是大兵牧養馬匹及三次師行出入皆經山西地方緣邊州縣衛所固屬勉力急公其餘郡縣雖非師旅所經亦有協辦轉輸行齋居送之事且該省歲屢不登穀價翔貴民間生計甚屬艱難朕乘輿頻臨目所親覩軫念殷切未嘗一日釋懷昨歲曾有諭旨俟噶爾丹殄滅之後誕敷德澤今寇氛蕩滌邊境安寧是宜格外加恩用綏黎庶康熙三十七年山西通省地丁銀米一槩蠲免爾部移

文該撫令徧飭所屬實心奉行務俾深山窮谷均沾德惠倘  
借端徵派澤不下究事覺定行從重治罪 諭大學士等從  
軍三次大小臣工著各加一級鎮國公蘇努著授為固山貝  
子仍留都統任 癸亥先是差工部侍郎常綬等齎敕往諭  
策妄阿喇布坦至是還疏言六月十五日臣等至策妄阿喇  
布坦所授以敕書賜物謂之曰爾昔有擒斬噶爾丹之奏今  
噶爾丹雖死而丹濟拉乃同逆之人近至爾地爾當擒之並  
噶爾丹男女及其骸骨畀我伊拉古克三胡土克圖乃本朝  
人得罪逃歸噶爾丹凡百禍端皆此人興之亦當執之與我  
策妄阿喇布坦言丹濟拉已遁至中國不必言矣鍾齊海無  
知之女噶爾丹已灰之骨不便相付臣等再三索取竟不之  
與續執伊拉古克三胡土克圖其弟托博克孟克里噶爾丹  
之子車陵三魯卜其母布林乳母察罕及程貝織布等交付  
臣等又達爾札納親哈什哈之妻色稜達什訴於臣等曰  
聖上使我與丈夫完聚故與吳爾占札卜之母一齊發放今聞  
丈夫自哈密擒解  
御前乞帶我去與我丈夫完聚臣等亦攜之而來車陵三魯卜  
在途出痘而死問伊拉古克三胡土克圖供曰仰負  
皇恩惟此大罪我復何辭等語謹此奏明  
上命議政大臣會議尋議覆伊拉古克三胡土克圖孟克里托

博克應凌遲處死程貝織布伊拉古克三胡土克圖之徒羅  
卜臧多爾濟應斬婦人布林察罕交該部安置得旨伊拉古  
克三胡土克圖孟克里托博克俱凌遲處死程貝織布暫緩  
決有要言問之令取來羅卜臧多爾濟隨其師行與彼無涉  
著免死餘如議議政大臣又奏曰先是侍衛巴布希津木巴  
邁伊拉古克三胡土克圖劫掠之時托博克與皮裘馬匹使  
巴布希等歸得旨問托博克果實則宥之尋解伊拉古克三  
胡土克圖等到京集諸王以下蒙古王文武大臣官員喇嘛  
等於黃寺磔誅伊拉古克三胡土克圖孟克里問托博克給  
巴布希等裘馬是實免其死 陞廣東右翼總兵官高登科  
為鑲藍旗漢軍副都統免江南海州等一十八州縣三衛  
本年分水災額賦 兵部題出征厄魯特陣亡護軍等應各  
給一子七品官食俸馬兵等應各給一子八品官食俸無子  
者照本身錢糧米石給其母妻終身贍養母妻子俱無者給  
銀祭葬從之 喀爾喀澤卜尊丹巴胡土克圖遣使進九白  
年貢宴費如例 甲子  
上詣  
皇太后宮問安 乙丑陞少詹事顧祖榮為詹事府詹事以  
禮部右侍郎韓菼兼管翰林院掌院學士事 兵部題隨撫  
遠大將軍公費揚古於昭莫多地方臨陣之京城右衛西安

衆官兵應敘為上上等軍功從之○丙寅以禮部右侍郎兼

管翰林院掌院學士韓菼侍講學士王頊齡侍講張廷樞俱

充日講起居注官○陞翰林院侍講學士達爾漢為通政使

司通政使旌表山西烈女王氏拒姦自盡給銀建坊如例

○戊辰

上謁

孝陵命皇長子允禔皇七子允祐隨駕是日啟行駐蹕夏店○

己巳

上駐蹕薊州○庚午

上詣

暫安奉殿○

孝陵行禮奠酒舉哀畢至

皇后陵奠酒舉哀是日駐蹕湯泉○諭內大臣等湯泉以東之

山照常禁止湯泉以西之山及遵化州至馬蘭峪曠野處不

必禁止著守

陵人等演習射獵○辛未

上詣

暫安奉殿致祭行禮遣和碩裕親王福金祭

孝陵皇長子允禔祭

皇后陵是日

上駐蹕遵化州○壬申

上駐蹕三屯營○癸酉

上登景忠山行圍殪二虎是日駐蹕米峪口○安南國王黎維

正遣使進貢宴賚如例○甲戌刑部以太監劉進朝逃出訛

詐議罪奏聞

上曰劉進朝乃禁中役使之入逃出已屬可惡况又於所逃處

嚇詐有司宜照光棍例議罪嗣後太監有與同罪者以此為

例○子昭莫多陣亡鑲黃旗護軍參領常武祭葬如例○乙

亥

上駐蹕閭家屯○以散秩大臣一等公阿靈阿掌鑾儀衛事務

○理藩院題喀爾喀故貝子阿南大之妻雖欲將貝子與其

第三子丹金承襲但其長子滾褚克又經具呈相應請旨

上曰蒙古人欲各為札薩克不相統屬朕意伊等若各自管轄

愈善○昔

太祖

太宗時招徠蒙古隨得隨即分旗分佐領封為札薩克各有所

統是以至今安輯宜如阿南大之妻所請令其第三子承襲

貝子其長子滾褚克倘欲另為札薩克亦可封之○丙子

上駐蹕湯泉○以和托輝特故輔國公根敦戴青子松津僧額

襲爵旌表直隸烈婦張鳴鳳妻郝氏拒姦身死給銀建坊

如例

實錄卷百五

元

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十五

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十六

康熙三十六年丁丑十一月丁丑朔

上駐蹕孫家莊 戊寅

上行圍獵二虎是日駐蹕中營 喀爾喀土謝圖汗遣使進九

白年貢宴費如例 己卯

上駐蹕崙山集 庚辰

上駐蹕圖東地方 辛巳

上回宮詣

皇太后宮問安 甲申 兵部議敘督運大臣于成龍等加四級

實錄卷百六

三路運米墊道官員分四等議敘得旨于成龍授拜他喇布  
勒哈番塞赫復副都統職布雅努以侍郎用餘依議 乙酉

冬至祀

天於

園丘

上親詣行禮 遣官祭

永陵

福陵

昭陵

暫安奉殿



孝陵

仁孝皇后

孝昭皇后

孝懿皇后陵 停止次日朝賀 丙戌諭戶部朕頃謁

陵時見用小錢者甚衆所換之數亦多舊錢及兩局之錢使用者少此實非益民之事也今歲田禾大有而米價仍貴詢之土人皆云錢賤所以米貴又問小錢從何而來皆云由山東來者多由此觀之自古以錢法為難誠然先年科爾坤佛倫管錢法時題請將錢式改小朕每謂錢改小易改大難錢價若賤則諸物騰貴後因題請再三方始准行今果如朕言爾

錢法

上

等即同九卿將錢法如何方能盡善確議具奏諭大學士等嗣後凡遇行兵以武官委署戶部兵部總尉之例著永行停止可將二部司官特行派遣戰勝敘功之時伊等不得與如此則伊等即可作明證諸事自從公料理將此交與該部著為定例爾等亦記之封下嫁喀爾喀多羅郡王敦多布多爾濟之公主為和碩恪靖公主戊子諭大學士等凡關人命事朕再三詳閱務期平允昨見高陽縣盜案情有可疑特差司官覆審今據奏張三等果非真盜嚴刑誣坐希圖銷案沈朝聘竟不詳察草率完結定罪具題殊屬不合著三法司會同吏部議處己丑振武將軍孫思克疏言見在甘州

之西安滿兵一千請暫住蘭州得旨令邊方無事甘州所駐西安滿兵仍回西安先是甘肅巡撫舒樹疏奏甘肅按察使囊吉里遲誤軍糧

上命將囊吉里革職交尚書馬齊會同吏部審理至是馬齊等奏臣等以囊吉里事移咨大將軍公費揚古據稱囊吉里所運糧米依限運至翁金並無違誤應復原職從之辛卯上御太和殿視朝文武陞轉各官謝恩免江南泗州等四州縣本年分水災額賦有差癸巳京師地震甲午諭大學士九卿等朕自臨御以來早夜孜孜以敬

地震

三

天勤民為念不敢少有逸豫偶遇災變則尤悚然靡寧今次地震朕心不勝兢惕方今外寇初平海宇無事而災變示警不可不加修省朕披覽前史如漢之文景宋之仁宗亦有此異因其克修人事遂獲長享太平其他遇災不警視為適然卒致宸替可為炯戒每見內外大小官員多圖暇逸怠於職業能實體朕懷留心民事者甚少茲宜各殫乃忱共勤實政以為修弭之道一切政事有應行應革者爾等可悉心講求集議具奏安南國王黎維正疏言臣國牛羊蝴蝶普園等三處為鄰介土司侵占請救地方官給還時雲南巡撫石文晟來京陛見

上問以安南邊境事石文晟奏曰牛羊蝴蝶普園等三處明時

內屬自我朝開闢雲南即在蒙自縣徵糧至康熙五年改歸開化府屬已三十餘年並非安南之地伊輕聽妄言擅行具奏而又遣兵到邊是時臣同督臣仰體

皇上柔遠至意令防守人等不得輕動臣思此地久入版圖且在內境斷不宜給還

上命大學士等詳議尋議安南國王黎維正不察本末輕聽妄言遽遣兵於邊疆駐扎生事妄行應行文申飭從之○乙未陞鑲白旗護軍統領圖席希為正白旗蒙古都統○以太子少師一等公領侍衛內大臣福善三次出兵加太子太保○丁酉大學士九卿等遵諭議覆因地微震

實錄卷六十六

四

皇上特頒諭旨深懷兢惕此誠古帝王因事加警之盛心伏思地者臣道地道失常咎在臣等今臣等庸劣不能仰承

聖意修舉職業自今內外大小臣工惟有循省過愆益加惕勵臣等不勝惶恐得旨地震示警朕深切悚惕念致治之道無如愛民生重民命朕總攬幾務於一切閭閻生計及人命事情罔不殫精研究在外直隸各省親民之官務訪求民間疾苦實心愛養其關係人命案件必詳審實情俾無冤抑在內大小官員咸宜勤慎奉職力加改愆以共副朕實圖修省弭災之至意○戊戌禮部議覆朝鮮國王李焞疏言請於中江地方貿易米糧應不准行得旨朕撫馭天下內外視同一體

並無區別朝鮮國王世守東藩盡職奉貢克効敬慎今開連歲荒歉百姓艱食朕心深為憫惻彼既請難以救凶荒見今盛京積貯甚多著照該國王所請於中江地方令其貿易

諭大學士等浙江巡撫線一信居官甚劣著革職○陞雲南貴州督標中軍副將劉應隆為陝西興漢總兵官直隸石匣營副將劉虎為廣東右翼總兵官○辛丑陞山東布政使張勛為浙江巡撫○刑部右侍郎孟額以病乞休允之○以原任甘肅按察使囊吉里為山西按察使司按察使○癸卯上御保和殿青海扎什巴圖爾台吉土謝圖戴青那木扎爾額爾德尼台吉益楚克台吉等來朝行禮畢命喇嘛商南多爾

實錄卷六十六

五

濟引近

御座前

上諭扎什巴圖爾曰爾父額實汗自

太宗文皇帝至今進貢請安輸誠已久今至爾身往來不絕朕至寧夏時遣大臣等至爾處爾等即欲來陞見朕又恐天暑爾等未便故云俟秋涼時來朝爾已年高遠涉至此殊可嘉尚又諭曰朕並非威懾爾等前來不過欲令天下生靈各得其所朕之尊不在爾等之來否所望爾等各遂安全克副朕好生之至意耳○賜青海扎什巴圖爾台吉等數珠袍褂銀幣鞍馬有差○甲辰諭大學士等各省被災地方巡撫先行

奏聞俟部覆之後始行察勘被災分數。直隸山東近地猶可。若遠省則往返奏請為時既久。雖議蠲賑與民無及。嗣後有被災宜報者。即將分數一并察報。該部亦一并議覆。乙巳遣戶部侍郎貝和諾往奉天督理朝鮮糶米事務。丙午諭刑部。每見廣東省所題盜案糾集夥黨。多至數十人或恣行焚劫。或勒贖子女種種不法。皆由文武各官不能化導百姓。禁戢奸頑所致。嗣後該督撫提鎮及各司務實心教養。綏靖地方。以副朕息盜安民至意。該部即行嚴飭。○陞都察院左副都御史戴都里為刑部右侍郎。以內閣學士壽彝為都察院左副都御史。

十二月丁未朔以正白旗蒙古副都統齊蘭布為

福陵總管。○戊申兵部題翁金戰勝副都統祖良璧及官兵應議敘四等軍功。得旨丹濟拉驟襲糧餉。祖良璧率官兵破敵。可嘉。著改為二等議敘。○己酉諭大學士等。近見學士甚不逮前。席爾登黃茂啟奏折本不能明晰。俱解任。著隨旗對品調用。○戶部遵旨議覆盛京所貯米石運至中江地方貿易。應令殷實誠信之人。取具地方官印結。前赴盛京領米。輓運其米價銀兩俱照盛京時價交與盛京戶部。所賣米石不許過倉石二萬石。其朝鮮進貢來使有買穀帶去者。聽其糶去。又鹽商張行等呈稱。情願前往朝鮮貿易。應令將銀買倉米。

二萬石運至貿易。俟朝鮮國歲稔之時停止。此時運往米石。令伊國特所產之物酌量兌換可也。從之。旌表肅州烈婦王有君妻王氏。拒姦不從。舍生殉節。給銀建坊如例。庚戌上詣

皇太后宮問安。辛亥免江南山陽高郵三州縣本年分水災額賦。○陞中路運糧候補按察使劉曜為山東布政使。司布政使。○癸丑免江西星子等九縣本年分水災額賦。有差。○兵部題二等侍衛達魯肯等應敘為上等軍功。侍講禪布等並非往統軍馬數內之官。不准算功。傳宣護軍校向無議敘之例。亦不准敘功。至大將軍伯費揚古咨言。胞莫多乘戰

勝之時。不能生擒噶爾丹。至今懷慚。未敢請功。查恩詔內大將軍伯費揚古已經優陞為一等公。毋庸另議。從之。○考察天下軍政。卓異官四十五員。貪酷官四員。年老官一百十三員。才力不及官一百三十一員。浮躁官四十三員。罷軟官四十二員。有疾官六十八員。不謹官三十九員。分別陞賞處分如例。○旌表安慶烈婦楊桂妻王氏。拒姦身死。給銀建坊如例。○甲寅諭大學士等。曰朕屢次出兵。看來為將誠難。一應軍務惟在相機而行。固不可急。亦不可緩。如阿喇尼紀爾他布過於急。而為賊所敗。馬思喀等又過於緩。而致伊拉古克三胡土克圖逃脫。去年中路出兵時。雖以眾論俟大將軍公

費揚古。然以此為至論。亦屬不可。彼時公費揚古。於五月十三日。若不到昭莫多。則噶爾丹豈不脫逃乎。故為將者必相機調遣。方能濟事。其餘庸流。則多有失策矣。○乙卯議政大臣等奏。大將軍公費揚古。遣將軍馬思喀等。追伊拉古克三胡土克圖。不及而歸。又隨軍羊隻。不委賢能將領。小心收養。以致疲損。且為兵丁給米事。詔旨下頒。不行宣諭諸軍。應將馬思喀議政大臣。領侍衛內大臣。管滿洲火器營大臣。內務府總管佐領。加一級。盡行革去。巴渾德齊世碩。勇不急往。追擒伊拉古克三胡土克圖。而隨軍羊隻。又致疲損。應將巴渾德革去。議政大臣。都統管滿洲火器營大臣。並加二級。以候

實錄卷六

上朝。齊世革去。議政大臣。都統。並加一級。以佐領上朝。碩勇革去。議政大臣。都統。管滿洲火器營大臣。並加二級。留前鋒統領任。議政大臣。護軍統領。嵩祝。將隨軍羊隻。不小心交付。以致疲損。又不提醒將軍馬思喀。將諭旨傳諭諸軍。應削去加一級。罰俸一年。戶部署總尉米里布。詐稱將軍之令。短給官兵羊隻。應革職。擬絞監候。秋後處決。戶部署總尉班布爾善。改換前供。順口抵飾。應革職。枷號三個月。鞭一百。不准折贖。正黃旗護軍參領禪步驍騎參領桑哥。正紅旗驍騎參領長命。護軍參領一等阿達哈。哈番。又一拖沙喇哈番。加二級。伊德渾。鑲藍旗驍騎參領三等阿思哈。尼哈番。佐領加一級。

實錄卷六

九

席積渾。鑲黃旗前鋒參領特古思。正黃旗前鋒侍衛署參領阿哈占。正白旗前鋒參領畢揚古。里侍衛博福。齊正紅旗前鋒參領赫雅圖。侍衛索爾孫。鑲白旗前鋒參領阿玉。侍衛黑碩。紫鑲紅旗前鋒參領柯卜。朔正藍旗前鋒參領託合齊。侍衛渾達。禮鑲藍旗前鋒參領喀爾吉山。等。口供不實。附和巴渾德等。俱應降三級調用。有加級者。准抵銷。伊德渾。既附和巴渾德等。又求額納布。換其原供。應革職。將所襲世職。與應襲之人。承襲。得旨。馬思喀。辦內務府事。尚好。革去。議政大臣。領侍衛內大臣。管滿洲火器營大臣。從寬留任。其內務府大臣。佐領。巴渾德。革去。加二級。仍降三級。從寬留任。齊世革去。加一級。仍降四級。從寬留任。碩勇。革去。加二級。從寬留任。此案內官員等。惟奉行耳。其實皆在主之者。伊德渾。革職。從寬留任。禪步等。從寬免其調用。各帶所降之級。留任。米里布。依擬處絞監候。秋後處決。班布爾善。不准折贖。枷號三個月。鞭一百。餘依議。○丙辰。以正白旗滿洲都統伯阿。席坦。為領侍衛內大臣。○陞光祿寺卿辛寶。內閣侍讀學士錢齊保。督捕右理事官溫達。俱為內閣學士。兼禮部侍郎。辛寶仍兼管光祿寺事。兵部議敘設站人員。

上曰。設站人員。惟議加級。甚為可憫。伊等自去年設站至今。尚未更替。設站既久。將馬更替。餵養於殺虎口。而搬運糧米一

應馳報毫無遲誤其勞苦更甚於西路兵丁再于成龍運糧人等有革職者應復原官今隨旗上朝將此本發回著另議陞直隸易州副將韓天伏為廣東高雷廉總兵官封和碩簡親王雅布子雅爾江阿為世子授原任輔國將軍臺音布祿子塞爾黑為三等奉國將軍奉國將軍齊塞子甘僧為奉恩將軍以翰林院檢討阿金克日講起居注官調右衛副都統宗室揚福為正白旗蒙古副都統辛酉

上幸南苑行圍以詹事府少詹事徐秉義克日講起居注官鑲黃旗二等阿思哈尼哈番增壽因病革退以其子福保襲替壬戌鑾儀衛鑾儀使馬思芳軍政自陳命以原品休

平定縣志

十

平定縣志

十

致○旌表江寧烈婦徐氏拒姦自縊給銀建坊如例癸亥免直隸霸州等十七州縣本年分旱災額賦乙丑諭大學士伊桑阿阿蘭泰右衛屯駐禁軍原因噶爾丹之事預為之備也今噶爾丹之事已畢此兵仍令全駐則供給易秣轉運維艱可留滿洲驍騎一千其蒙古分編佐領駐防之兵全行留駐此外護軍及驍騎火器營兵俱應調回四十九旗之貧乏蒙古有令沿邊居住者俱察出遣至右衛歸隸蒙古佐領下作為甲士甘肅巡撫喀拜疏言甘肅五學士子自設科以來從未中式一人請將甘涼等十學另編字號取中從之兵部遵諭再行議敘湖灘河朔等三路設站人員

上曰噶爾圖等俱係廢官伊等尚令復職而見任官員情願効力設站自去冬以至於今尚未更換勞苦殊甚部議僅為加級未當又諭曰朕凡事惟從公耳彼西路武官將伊等功勞訴於大將軍咨部于成龍亦為運米之人言至此輩並無有為之言者朕若不言誰復為此輩言也誠以効力而論則此輩亦甚効力矣准其以應陞之缺先用今軍務已竣著將諸人俱徹回廣東南澳總兵官楊嘉瑞四川北總兵官馬子雲軍政自陳命以原品休致湖廣沅州總兵官林葵江西南贛總兵官林萬禧均以自陳照溺職例革職丁卯免江南鹽城等六州縣本年分水災額賦陞陝西涼州總兵官董大成為鑾儀衛鑾儀使調正藍旗滿洲都統宗室董額為正白旗滿洲都統旌表河南烈婦溫氏拒姦斃命給銀建坊如例戊辰

上自南苑回駐暢春園庚午

上大閱於玉泉山西南列紅衣大礮火器馬步烏鎗軍士及前鋒護軍驍騎分翼排列

上躬探甲冑登玉泉山御黃幄諸軍鳴螺擊鼓齊進金鳴衆止如是者九第十次鎗礮齊發收軍歸陣隊伍精嚴旗幟顯赫時來朝之青海台吉扎什巴圖爾等皆相顧戰慄驚歎曰天朝軍威精嚴堅銳如是可畏也我輩生長沙漠窮荒不惟目

未經見即耳亦未曾聞軍威如此所向又何敵弗克乎

上閱畢樹侯親射發五矢皆中次命十五善射并硬弓侍衛等

射畢賜八旗官兵牛羊 辛未

孝莊文皇后忌辰遣官祭

暫安奉殿

上自暢春園回宮詣

皇太后宮問安 乙亥歲暮裕祭

太廟

上親詣行禮 遣官祭

永陵

實錄卷六

三

福陵

昭陵

暫安奉殿

孝陵

仁孝皇后

孝昭皇后

孝懿皇后陵(遣官祭太歲之神) 丙子賜朝正外藩鄂爾多

斯喀爾喀阿霸孩土默特烏朱穆秦科爾沁喀喇沁巴林教

漢阿霸哈納厄魯特王貝勒貝子公台吉等并內大臣大學

士上三旗都統副都統侍衛等宴(旌表八旗節婦滿洲隆

色妻何氏一人蒙古孟根妻陳氏等八人直隸各省節婦王

鳴鳳妻林氏等五十四人貞女俞氏等六人孝子周瞻此等

四人各給銀建坊如例 是歲人丁戶口二千四十一萬六

百八十二田地山蕩畦地五百九十八萬六千六百六十八頃三

十四畝有奇徵銀二千七百三十九萬七千六百三十八兩

有奇米豆麥六百九十六萬八千四百五十二石有奇草二

百八萬一千六百三十五束茶十五萬七千四百五十三引

行鹽四百三十一萬九千三百八十引徵課銀二百六十九

萬三百八十二兩有奇鑄錢一萬三千八百六萬三千六十

有奇

實錄卷六

三

大清聖祖合天弘運文武睿哲恭儉寬裕孝敬誠信中和功德

大成仁皇帝實錄卷之一百八十六



大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百八十七

康熙三十七年戊寅春正月丁丑朔

上詣

堂子行禮還宮拜神畢率諸王貝勒貝子內大臣大學士侍衛等詣

皇太后宮行禮御殿王以下文武各官外藩王及使臣等上表朝賀停止筵宴○朝鮮國王李煒遣陪臣李桓等表賀冬至元旦

萬壽節及進歲貢禮物宴費如例○庚辰

實錄卷一百八十七

上詣

皇太后宮問安○辛巳祈穀於

上帝

上親詣行禮○議政大臣等題厄魯特扎什巴圖爾台吉乃青海台吉之統領與土謝圖戴青納木扎爾額爾德尼台吉彭楚克台吉等率其所屬誠心歸化當封何爵伏候

上裁得旨封扎什巴圖爾為親王土謝圖戴青納木扎爾額爾德尼為貝勒彭楚克為貝子○壬午孟春享

太廟

上親詣行禮○遣官祭太歲之神○

上奉

皇太后幸暢春園○癸未

世祖章皇帝忌辰遣官祭

孝陵○丁亥

上詣

皇太后宮問安○庚寅以上元節賜外藩喀爾喀鄂爾多斯阿霸璉土默特烏珠穆秦科爾沁喀喇沁巴林敖漢厄魯特阿霸哈納諸王貝勒貝子台吉等及內大臣大學士上三旗都統副都統侍衛等宴○策妄阿喇布坦遣彭蘇克喇木扎木巴多爾濟寨桑等進貢并疏言第巴將達賴喇嘛圓寂之

實錄卷一百八十八

牛

事虛而不宣斥正傳之聖徒班禪自尊其身有玷道法詐稱達賴喇嘛之言以混亂七旗喀爾喀四厄魯特好事樂禍正未有已祈

皇上睿鑒俾法門之教無玷使衆生爭自濯磨

上召彭蘇克喇木扎木巴多爾濟寨桑至前問以疏參第巴之故奏曰

聖主曾諭云凡有衷情不必疑忌悉皆奏聞今者第巴監禁班禪不使人見奉事紅帽兩喇嘛名德爾端多爾濟扎卜者說稱即見世達賴喇嘛化身其行不端有乖道法台吉是以參奏



上諭之曰。休息兵戎。令宇內昇平。始云道法。若以護法為辭。必生弊端。如爾等雖招撫回子。曾滅其教。亦能令其皈依佛法。跪拜喇嘛。否。今天下太平之時。惟令各行其道。若強之使合。斷不可行。四十九旗扎薩克蒙古等。迄今六十餘年。朕視如一家。初喀爾喀厄魯特。搆兵時。朕曾諭達賴喇嘛。令從彼處遣人往解。朕亦於此處命大臣等前往諭之。使其相和。不意達賴喇嘛之使。竟偏向厄魯特。彼時朕即知達賴喇嘛當已物故矣。若彼尚存。決不為此。第巴之搆。費噶爾丹。人盡知之。又假託達賴喇嘛之言。請將澤卜尊丹巴胡土克圖。土謝圖汗。執之以昇噶爾丹。今者澤卜尊丹巴胡土克圖。土謝圖汗。

實錄卷一百七

三

親身皆在此處。前土謝圖汗於鄂羅海諾爾地方為噶爾丹所敗。彼時曾遣一寨桑來奏云。臣等係歷來進貢請安之國。若蒙主上憐惜。收育我等。即投順前來等語。今不但澤卜尊丹巴胡土克圖。土謝圖汗等。即七旗之喀爾喀數萬蒙古。歸順前來。朕皆收養。離散者使之完聚。待斃者使之生全。令其各得恒業。至於澤卜尊丹巴胡土克圖。土謝圖汗。朕皆待以優禮。未嘗有替。衆蒙古以第巴為達賴喇嘛傳戒之人。皆緘口不敢議。朕曾以敕諭往責第巴。彼甚心服。具疏認罪。朕因宥之。嗣後第巴若改前行。敬奉班禪達賴喇嘛。則已。若仍怙終不悛。朕不但不寬貸第巴。即其親密之青海台吉等。朕亦

不輕恕也。前者青海台吉等。聞朕出師寧夏之信。盡皆震動。游牧移營而去。今者青海台吉等。以噶爾丹平定。親來慶賀。伊等並無過端。朕豈肯加兵。朕統馭天下。總願宇內羣生咸獲安堵。豈有使爾兩國生釁之理。凡事惟期安靜而已。○辛卯。上元節。賜外藩諸王貝勒貝子公台吉等。及內大臣大學士。上三旗都統副都統侍衛等宴。○庚子。

上奉

皇太后自暢春園回宮。○辛丑。

上御太和殿視朝。文武陞轉各官謝恩。○諭大學士等。青海厄魯特親王扎什巴圖爾等。遣還時。此處給與馬駝。遣司官送

實錄卷一百七

四

往。總督吳赫達赴寧夏量撥馬駝。俟伊等至寧夏時。即應付遣之。其自京師乘往寧夏之馬駝。交與送往之官於草生時。在察罕拖海地方牧養。數日從塞外游牧而來。若草未生。則暫於彼處飼之。俟草生。加意牧養。帶回。賜朝正外藩王貝勒貝子。公台吉等銀幣鞍馬有差。○壬寅。湖廣總督李輝祖。河南巡撫李國亮。雲南巡撫石文晟。浙江巡撫張勳。陞辭。上諭之曰。凡居官以實心愛民為主。民雖愚終不能欺也。能實心愛民。民自知感。否則竭力矯飾。終難掩人耳目。朕在宮中。惟以百姓為念。督撫身在地方。與百姓最親。豈可不一心愛民。副朕委任之意。一省之事。全在督撫。督撫潔已率屬。則府

州縣自然遵奉。爾等係封疆大臣。當自惜聲名。自立品望。朕巡幸浙江。江南。陝西。山西等處。百姓利病。俱所深知。山陝地瘠。地方官畧加朘削。情即顯露。然州縣之私派。皆由督撫布按科派所致。若止在州縣官。則所害者不過一州一縣。巡撫與布政使。通同妄行。則合省俱受其害矣。此等人朕斷不姑容。爾等識之。○諭大學士等。運往朝鮮國米石。著侍郎陶岱共運至三萬石。以一萬石賞賚朝鮮國。以二萬石平糶。○以征噶爾丹功議敘。封喀爾喀扎薩克台吉索諾木伊思扎卜為輔國公。授喀爾喀台吉哈米爾戴青巴圖爾為一等台吉。○旌表山東烈婦朱自明妻張氏。拒姦被殺。給銀建坊如例。

○癸卯。

上以巡幸山西五臺山詣

皇太后宮問安畢。命皇長子允禔。皇三子允祉。隨駕。是日啟行。

駐蹕良鄉縣寶家莊。○甲辰。

上駐蹕涿州長溝二里橋。○命皇長子允禔。大學士伊桑阿至

金太祖。世宗陵奠酒。○乙巳。

上駐蹕涿州永陽

二月丙午朔

上駐蹕易州唐湖。丁未遣大學士阿蘭泰祭

先師孔子。○

上駐蹕滿城縣。○戊申。祭大社。

大稷。遣戶部尚書馬齊行禮。○免浙江宣平縣康熙三十六年分電災額賦有差。○己酉。

上駐蹕完縣。○庚戌。

上駐蹕曲陽縣鎮里。○辛亥。

上駐蹕阜平縣張家莊。○諭戶部。據山西巡撫倭倫泰。平定州等十一州縣連年歉收。米價騰貴。民間乏食。朕心深為軫念。此十一州縣所欠康熙三十六年錢糧。行令該撫查明到日蠲免。並將各倉所貯米穀。即行賑濟。毋致流離失所有妨耕種。○壬子。

種。○壬子。

上駐蹕龍泉關。○以征噶爾丹功議敘。封厄魯特貝勒巴圖爾額爾克濟農子雲木春為輔國公。○理藩院題振武將軍孫思克解到厄魯特。慙都及其妻女男婦共十人。據慙都云。我係杜哈爾阿喇布坦親兄。噶爾丹族姪。烏爾布通之戰。與噶爾丹同敗於王師。往投策妄阿喇布坦。將我拘禁七年。盡取我屬裔。後噶爾丹敗於昭莫多。我兄子滾楚克率四十戶人投策妄阿喇布坦。策妄阿喇布坦乃釋我。交與滾楚克。我率屬下百餘戶人。內向逃來。至齋力納木地方。因雪大不能行。故盡留衆人。至巴爾庫爾地方。為郭帕白克所執。送振武將

軍孫思克解部得旨慙都遠來歸朕殊可憐憫著授為台吉  
附鑲黃旗察哈爾佐領中安插○癸丑

上駐蹕菩薩頂○甲寅春分朝

日於東郊遣刑部尚書傅臘塔行禮○乙卯大計天下官員卓  
異官五十四員貧酷官四十員不謹官七十一員才力不及  
官六十九員罷軟官二十員年老官一百三員有疾官八十  
三員浮躁官六十二員分別陞賞處分如例○丙辰

孝康章皇后忌辰遣官祭

孝陵○

上回鑾駐蹕五臺縣時厄魯特親王扎什巴圖爾等隨

實錄卷五十七

駕巡幸至是還還扎什巴圖爾等以受

恩深重感激叩辭而去○丁巳

上駐蹕龍泉關○戊午

上駐蹕阜平縣張家莊○己未

上駐蹕曲陽縣鎮里○庚申

上駐蹕完縣○免江南泗州康熙三十六年分水災額賦予

故白都納副都統舒述祭葬如例○辛酉

上至保定府登舟泊東門外○壬戌

御舟泊清苑縣張家莊○癸亥

御舟泊新安縣郭里口○予故漢軍副都統費仰古祭葬如例

○甲子遣官祭

先農之神○遣官祭

歷代帝王○

御舟泊霸州苑家口○乙丑以故奉恩將軍希常子中德襲爵

○陞雲南糧儲道張仲信為廣東按察使司按察使○戶部

議覆廣西道御史張泰交疏言山東濟南兗州青州三府屬

泰安等州縣連歲災荒巡撫李煒並未奏聞請敕該撫速行

賑恤應如所請得旨此事情爾部保舉賢能司官二員前往

會同該撫賑濟○丙寅

上駐蹕固安縣○丁卯

實錄卷五十八

上回駐暢春園○戊辰

上回宮詣

皇太后宮問安○己巳清明節遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○庚午。

上奉

皇太后幸暢春園。諭大學士等山東巡撫李焯居官不善地方饑饉百姓乏食竟不奏聞及至言官奏始行具疏朕為人君於國計民生日切存心詳加審慮李焯身任巡撫不知撫恤百姓著革職○又諭大學士等遣戶部曾經保舉司官二員於被水災沿河之保定霸州固安文安大城永清開州新安等州縣截留山東河南漕糧每處運致一萬石積貯俟米價騰貴時平價糶賣○又諭大學士等霸州新安等處此數年來水發時渾河之水與保定府南之河水常有泛漲旗

實錄卷一百八十七

九

下及民人莊田皆被淹沒詳詢其故蓋因保定府南之河水與渾河之水滙流一處勢不能容以致汎濫渾河著原任河道總督于成龍往察保定府南河著原任河道總督王新命往察作何修治令其水自分流詳勘繪圖議奏今值農事方興不可用百姓之力遣旗下丁壯備器械給以銀米令其修築伊等往時部院衙門司官筆帖式酌量奏請帶往於十日之內即令啟行○陞陝西西寧總兵官韓弼為鑾儀衛鑾儀使調西安右翼副都統阿蘭台為西寧總兵官○辛未孝昭皇后忌辰遣官祭

陵○陞鑲黃旗滿洲副都統覺羅樹庶為正藍旗滿洲都統

調江西南昌總兵官葉日芳為南贛總兵官陞

孝陵副將石如璜為江西南昌總兵官真定副將張大受為湖廣沅州總兵官鑲紅旗參領兵洪為四川北總兵官京口水師副將周洪并為廣東南澳總兵官甘肅提標中軍副將魏敷為陝西涼州總兵官○兵部議覆四川巡撫于養志疏言蜀省協餉每年至六七十萬兩未曾另設夫役運送請照各省協餉例每年撥銀二千兩雇夫運餉查雲貴等省並未設運送協餉夫役應無庸議得旨四川驛路居民稀少非他省可比此給發運送協餉夫價著照該撫所題行○工部議覆漕運總督桑額等會勘開濬下河條奏○高郵湖之水勢宜分一車兒埠入海之口宜開一丁溪入海之口宜通一小海場入海之口宜開一草堰場洩水之閘宜增一運河之水勢宜分應令將各項工程估計具題從之○河南巡撫李國亮疏言榮澤縣城北臨黃河丹沁二水會歸黃流逼城甚險舊榮陽郡基址高阜請將縣城移建此地以免衝決從之○壬申直隸巡撫沈朝聘以老病乞休允之○命原任河道總督于成龍以總督管直隸巡撫事以兵部督捕右侍郎李鈞為山東巡撫○乙亥

上自暢春園回宮以原任黑龍江副都統因病告休拉自為鑲黃旗蒙古副都統○以征噶爾丹功議敘封鄂爾多斯貝

勒松阿喇布為多羅郡王。公杜楞為固山貝子。○陞山西按察使囊吉里為甘肅布政使司布政使。監察御史覺羅巴哈布為山西按察使司按察使。

三月丙子朔。

上御經筵講畢。賜大學士九卿詹事及講官等宴。○以原任通政使司通政使羅秉倫補原官。○陞護軍參領法豹為鑲紅旗漢軍副都統。○丁丑冊封皇長子允禔為多羅直郡王。皇三子允祉為多羅誠郡王。

皇四子○皇五子允祺皇七子允祐皇八子允禩俱為多羅貝勒。○直隸巡撫于成龍原任河道總督王新命奉使查勘

渾河清河恭請訓旨。

上諭之曰。清河發源太行山脈。會漳河子牙河滹沱河易水諸流。其勢雖盛。但堅築隄岸以遏之。即歲潦亦可無虞。又漳河支流經大城縣入子牙河。其勢湍悍。數年以來。文安大城諸處屢遭水患。皆此河之故也。爾等宜詳悉查勘。至渾河發自馬邑。其源甚微。每遇大水之年。則橫流汎濫。致淹民田。詳審其故。蓋由渾河淤沙既多。或遇春時水乏。保安以下居民。又引河水灌田。沙礫壅墊河身。積高露雨水發。則避高就卑。水勢瀾漫。遂致田土衝沒。爾等惟挑濬淤沙。河之兩岸掘五六尺深闊。令水得暢流。當不至於漲溢矣。爾等須詳視具奏。築

隄濬河工。竣設立河未。委官監視。及時預為挑濬。遇旱歲力去淤沙。庶無水患矣。

上辛暢春園詣

皇太后宮問安。○戊寅。以原任兵部督捕右侍郎王國昌補原官。○陞湖廣布政使王燕為貴州巡撫。○命內閣侍讀學士伊道等齎敕往諭策妄阿喇布坦曰。覽爾疏言。第已掩匿達賴喇嘛圓寂之事。斥班禪而自尊。有玷道法。好事如此。恐禍正無已。又爾所遣彭蘇克喇木扎木巴多爾濟察桑等。曰奏爾之言云。第已監禁班禪。不使人見。奉事紅帽兩喇嘛名德。爾端多爾濟扎卜者。即見世達賴喇嘛化身。亦以是兩喇嘛之言謂之達賴喇嘛而已。並非班禪之言。是以可疑。第巴壞法門之教。罪不可容。本朝與達賴喇嘛交往七十餘年。第巴原係達賴喇嘛執事下人。因軫念達賴喇嘛。欲使扶持道法。是以優封為土伯特國王。乃以久故之達賴喇嘛詐稱尚存。以欺眾。唆囑爾丹興戎。所行不軌。今又奏稱俟班禪胡土克圖往觀之時。奏明。而又不遣班禪。且致書求爾勿遣。觀此其情已極昭著矣。爾所奏良是。爾抒實情。思為法門之教。班禪胡土克圖之事。而勿奏第巴隱深許之。為此特差內閣侍讀學士伊道。近御侍衛拉錫二等侍衛克什圖。內閣侍讀常明三等侍衛津巴為使。以伴敕例。賜御用綵緞十端。○調正藍

旗蒙古副都統逕圖為鑲白旗滿洲副都統以一等侍衛蘇滿為正藍旗蒙古副都統○理藩院題請差大臣往四十九旗蒙古及邊外喀爾喀等處會盟得旨四十九旗著尚書班迪內大臣崇古禮永吉去邊外喀爾喀著戶部尚書馬齊都統吳達禪理藩院侍郎滿丕去○寧夏總兵官王化行以本姓殷具疏請復允之○甲申。

上詣

皇太后宮問安○鑲藍旗滿洲副都統關布以年老乞休允之

○以原任右衛副都統科爾代為鑲藍旗滿洲副都統○乙酉山東巡撫李鈞以病乞解任調理允之○工部議覆河道

卷一百八十七

十一

總督董安國疏言工科給事中屠粹忠條奏寬免歲修民夫查黃運兩河險汎甚多若將民夫豁免專責河兵必致貽誤今酌量減免民夫一千八百五十名應如所奏從之○丙戌上詣

皇太后宮問安○丁亥陞貴州按察使任鳳厚為湖廣布政使司布政使○戊子諭大學士等聞湖廣江西江南浙江廣東廣西福建陝西山西米價騰貴是必糜費於無益之事湖廣江西地方糧米素豐江南浙江咸賴此二省之米今此二省米價騰貴誠為可虞酒乃無益之物耗米甚多朕巡幸直隸等處見雖有禁造燒酒之名地方官不甚加意未嘗少止著

令嚴禁以裨民食○己丑以兵部督捕右侍郎王國昌為山東巡撫陞護軍叅領年清阿為西安右翼副都統庚寅上詣

皇太后宮問安辛卯直隸巡撫于成龍以渾河圖形呈覽奏曰臣同西洋安多等自霸州至郎城履舊河形細加丈量由永清固安至張協有舊隄一道約有七十里尚可幫修水溜亦在此處可以挑濬

上曰朕經行水災地方見百姓以水藻為食朕曾嘗之百姓艱苦朕時在念是以命爾於雨水之前速行濬河築隄使田畝得耕百姓生計得遂不知六月內可告成否于成龍奏曰臣

卷一百八十七

十四

董率分修各官作速辦理六月內可以完工壬辰

上詣

皇太后宮問安○以投誠厄魯特散秩大臣諾爾布一佐領丹津阿拉布坦屬人一佐領隸鑲黃旗察哈爾旗分散秩大臣達木巴一佐領一等侍衛多爾濟塞卜騰一佐領隸正黃旗察哈爾旗分散秩大臣車陵一佐領二品官巴拜一佐領隸正白旗察哈爾旗分散秩大臣沙克朱穆一佐領隸正紅旗察哈爾旗分散秩二等侍衛鄂嫩巴圖爾一佐領隸鑲白旗察哈爾旗分散秩三等侍衛吳巴什一佐領隸鑲紅旗察哈爾旗分散秩三等侍衛吳巴什一佐領隸鑲紅旗察哈爾旗分散秩三等侍衛韓都

一佐領隸鑲藍旗察哈爾旗分每佐領各設前鋒二名親軍二名護軍十七名撥什庫六名驍騎二十四名跟隨兵一名俱照其族屬分編 癸巳

萬壽節停止行禮筵宴 遣官祭

福陵

昭陵

暫安奉殿

孝陵

仁孝皇后

孝昭皇后

孝懿皇后陵 遣官祭真武東嶽城隍之神 乙未

上詣

皇太后宮問安 丙申調刑部右侍郎喻成龍為兵部督捕右

侍郎以原任工部右侍郎徐潮為刑部右侍郎 丁酉刑部

遵旨議覆陝西咸陽縣民張拱等叩關呈告康熙三十二年

原任巡撫布喀等以民乏籽粒不能耕種給民購買銀兩官

吏侵蝕並不給發等情應行文該督撫察明到日再議從之

庚子諭大學士等今承平無事八旗佐領所飼馬匹每佐

領或留六騎或留七騎其餘以四月發往牧地於九月初旬

仍復來京每歲如此則錢糧不致虛耗而羸馬亦得以蘇息

矣其更代監視每旗副都統一員參領二員率領官員兵丁於水草佳處遊牧 戶部議覆戶科給事中姜楠疏言陝西長安永壽華陰等三縣倉米虧空請嚴加查核應如所請令該督撫查明得旨此倉米事情甚屬年久著刑部尚書傅臘塔左都御史張鵬翮前往會同該督撫詳察並將借給籽粒事務查明具奏 辛丑

上詣

皇太后宮問安 鑲黃旗護軍統領洪海以年老乞休允之

陞鑲黃旗蒙古副都統崇古禮為本旗護軍統領 壬寅

上自暢春園回宮 以刑科給事中彭鵬為貴州按察使司按

察使



大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十七

實錄卷一百八十七

二

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十八

康熙三十七年戊寅夏四月乙巳朔享

太廟。

上親詣行禮○

上幸暢春園詣

皇太后宮問安○已酉諭大學士等人命所關重大朕數年以  
來將為盜者止誅首惡為從者從寬免死發往黑龍江朕曾  
問及將軍薩布素此等罪犯聚集或致生事據奏新滿洲兵  
衆多將兇徒分給為奴勢孤力散惡不能逞由此觀之不但  
全活甚衆且新滿洲資益良多矣○庚戌

實錄卷一百八十八

十

上詣

皇太后宮問安○予故滿洲都統喀岱祭葬如例○壬子加工  
部侍郎銜

陵寢郎中邁塗故賜馬二匹銀三百兩○甲寅諭大學士等西  
路陣亡右衛西安撥什庫及披甲人等其子給與應得品級  
若令來京則貧者遷移多累著停其前來仍留原處供職○  
理藩院議覆烏朱穆秦親王色登敦多卜奏懇將克勒和朔  
等地給伊屬下就食人耕種應如所請得旨理藩院等處  
稽滯此耕種關係蒙古諸人生計若不速遣必致經霜失時

著速派司官即日行○工部左侍郎圖爾宸以年老乞休允之○乙卯以扎魯特輔國公根都西布布故遣官致祭○丙辰予故蒙古副都統達爾泰祭葬如例○丁巳

上詣

皇太后宮問安○以原任寧夏副都統沙濟為鑲藍旗蒙古副都統○戊午諭大學士等盛京將軍公綽克託人材庸常所保題引見人員俱極不稱其屬下兵皆不遵約束奉公事差違聞有半途私歸者爾等會同宗人府察議尋會奏盛京將軍公綽克託人庸劣應革職得旨綽克託著革去將軍回京○轉工部右侍郎常綬為左侍郎陞內閣學士羅察為工部右侍郎○已未敘剿滅噶爾丹功授西安將軍參贊博齊等八十五員護軍統領參贊宗室費揚固等一百九十二員正白旗議政副都統碩岱等一十五員各世職有差○庚申

上詣

皇太后宮問安○辛酉

孝端文皇后忌辰遣官祭

昭陵○壬戌工部議覆河南巡撫李國亮疏言儀封縣蔡家樓及宋家營西鄭州關家橋河勢頂衝均無重隄可恃請各築月隄一道應如所請從之○癸亥刑部尚書傅臘塔左都御史張鵬翮奉差往陝西審事恭請訓旨傳臘塔奏曰臣等往

陝西查核長安華陰永壽等三縣倉米并察借給籽粒事務但給民籽粒之案歷年已久當時官員有陞遷者有罷黜者現任官員不知者多誠屬難查

上諭之曰此事日久株連者亦多布喀等雖奏給民籽粒實未給民所以至今徵催不獲反致百姓告理此項銀兩爾等切須詳察○

上諭大學士等廣東海關收稅人員搜檢商船貨物概行徵稅以致商船稀少關稅缺額且海船亦有自外國來者如此瑣屑甚覺非體著減額稅銀三萬二百八十五兩著為令○理藩院奏策妄阿拉布坦疏言臣之與哈薩克構兵非得已也

昔噶爾丹擒哈薩克頭克汗之子以卑達賴喇嘛故頭克使人乞臣關說求還其子與彼完聚臣乃使人於達賴喇嘛索得頭克之子撥五百人護送歸之頭克反盡殺臣五百人後又殺臣屬下吳爾赫德巴圖爾台吉掠取其人民續又掠我吳梁海百餘戶人臣妻父阿毓奇以其女歸臣使妻兄三濟札布送臣之妻後又要戰於路去歲秋臣商人自鄂羅斯歸彼又掠之哈薩克屢來犯臣有如許過惡臣是以興兵而往

聖上謂臣喜事好兵故陳此自白又丹津鄂木布聽讒與噶爾丹同殺其兄索諾木阿拉布坦後臣與噶爾丹分散各自游

行。丹津鄂木布又偕阿奴喀屯往就噶爾丹。今窮迫而後來歸。臣若使彼逸居恐又聽讒害臣。臣是以拘而禁之。為此遣使阿布都拉厄爾克寨桑薩木坦達爾漢鄂母布等奏聞。

上命示議政大臣。○甲子。陞內閣侍讀學士恩丕為內閣學士兼禮部侍郎。○戊辰。

上奉

皇太后自暢春園回宮。○以喀爾喀固山貝子達禮故遣官致祭。○予故通政使司通政使楊爾淑貴州巡撫閻興邦各祭葬如例。○己巳。

上御太和殿視朝。文武陞轉各官謝恩。○諭宗人府多羅溫郡

實錄卷一百八十八

四

王延壽行止不端。並不思効力行。走甚屬員恩。此王原非承襲之爵。乃增封之王。伊父為人。原亦平常。著將延壽革去王爵。授為貝勒。又固山貝子袁端各處俱不行走。但與在外漢人交往。飲酒妄資。亂行著黜革。鎮國公明端為人庸劣。懶惰亦著黜革。向來王貝子公等。時常上朝。近不上朝。再右翼公等。內亦有懶惰不行走者。著宗人府會同領侍衛內大臣等。將懶惰不行走者題參革退。尋議鎮國公劉永門度懶惰。應革退。普貴原有瘋疾。今雖痊愈。不便令其行走。亦應革退。得旨。劉永門度依議。黜革。鎮國公根度為人甚屬乖張。肆無忌憚。亦著黜革。普貴向來行走尚優。既稱瘋疾已痊。著照常行。

走。○陞雲南騰越副將雷如為河南南陽總兵官。○庚午。諭大學士等。薩布素任黑龍江將軍。年久諳練地方事務。亦得官軍之心。席北打虎兒編入佐領。已數年矣。理合遵行禁令。今佐領阿木瑚朗等曠誤防哨。不可不嚴加處分。阿木瑚朗巴林俱革職。交薩布素聽其懲治。嗣後若有此等不遵法紀者。令薩布素酌量治罪。奏聞。○辛未。命增雲南府州縣學廩膳增廣生員及文武童生入學額數。○壬申。

上詣

皇太后宮問安。○以固山貝子蘇努署理奉天將軍事務。○以

陝西提督李林隆為鑲紅旗漢軍都統。調正紅旗蒙古副都

實錄卷一百八十八

五

統安台為鑲藍旗滿洲副都統。陞驍騎參領哈克三為正紅旗蒙古副都統。○癸酉。

上巡幸漕河。閱視要兒渡等隄岸。命皇長子多羅直郡王允禔

皇三子多羅誠郡王允祉隨駕。是日啟行。

御舟泊通州崔家樓。

五月甲戌朔。

上登陸。巡視武清縣隄岸。眾民跪叩。奏曰。要兒渡地方自蒙皇上修築。迄今永無水患。此處隄岸正當水勢衝射。請於隄岸之外另築一隄。

上曰。此隄岸之外。若另作一隄。爾等田畝豈不多致。呂廢。眾民

奏曰原非一家田畝。即稍入隄內。於小民亦無大損。倘河水一決。其患更甚。

上曰。轉盼間雨潦將屆。今歲不及修築。暫立木椿。堅護隄岸。另開小河。以洩水勢。今歲田畝。可以無虞。俟明春雨水前。另築重隄。爾等田廬。俱得安固矣。

上至合河站登舟。是日。

御舟泊武清縣紅廟埂子。○乙亥。

御舟泊武清縣黃家莊。○丙子。

仁孝皇后忌辰。遣官祭

陵。○

實錄卷一百八十八

六

御舟泊天津土城。○丁丑。

御舟泊滄州格沽。○戊寅。

上自滄州大沽營至海口新建海神廟。○

御舟泊滄州鄧山沽。○己卯。

御舟泊武清縣楊家莊。○庚辰。

御舟泊武清縣楊村。○辛巳。

御舟泊武清縣打魚莊。○壬午。

御舟泊通州崔家樓。○癸未。

上回宮。詣

皇太后宮問安。○諭大學士等。門度根度乃貝勒尚善之子。今

兩公爵俱革。尚善別無公爵之子孫。則其爵遂絕矣。著交宗人府議奏。尋宗人府奏。門度之祖費颺。武係輔國公。門度應襲公爵。得旨。門度著襲封輔國公。○又諭大學士等。朕巡閱

天津沿河隄岸。見山東飢民流移至直隸者尚多。小民遭此荒歉。若仍於秋間徵其逋欠。百姓豈能上納。泰安州等二十

七州縣。本年錢糧。著於來秋徵收。○甲申。戶部議覆倉場總

督德珠等疏。言直隸朝鮮等處米貴。將各省漕糧截留。一十

五萬石賑濟。請令有漕各省督撫。於本年秋收時買補帶運

還倉。應如所請。得旨。此截留賑濟等項所費米石。若令有漕

省分採買帶運。則小民運丁必致苦累。京倉米石。充裕所用

實錄卷一百八十八

七

之米無多。採買補額。著停止。○丙戌。遣官祭

關聖帝君。○丁亥。夏至。祭

地於

方澤。

上親詣行禮。○戊子。

上御太和殿視朝。文武陞轉各官謝恩。○庚寅。諭大學士等。覽

科道衙門月終註銷案件。但奏稱無違限之事。而事務若干

件。於幾日完結。並未開載。此後應將事件數目。並完結日期

於疏內詳列具奏。○署奉天將軍事貝子蘇努。陞辭。

上諭之曰。盛京事務廢弛已極。公綽克託觀射時。不辨士卒驕

射優劣惟務閒談。爾至任。勿復蹈此轍。又盛京地方習俗頗壞已極。聞兵丁派出差役。不去者有之。去而私回者有之。爾至其地。擇其尤者嚴處一二人。若輩始知懲創矣。○戶部議覆山西巡撫倭倫疏言。靜樂等五縣未完康熙三十六年錢糧。請緩至本年十月全完。應如所請。得旨。山西省康熙三十七年錢糧已有諭旨通行蠲免。今靜樂等縣未完康熙三十六年錢糧。倘於本年徵收。則小民仍有催徵之累。爾部不行詳察。照該撫所題具奏。殊屬不合。其未完錢糧著於康熙三十八年帶徵。○辛卯。以蘇尼特故多羅郡王薩穆札子垂基恭蘇隆襲爵。○山西太原總兵官毛來鳳以病乞休。允之。○

實錄卷一百八十八

八

調廣東高雷廉總兵官韓天佑為山西太原總兵官。○壬辰。上詣

皇太后宮問安。○以固山貝子蘇爾發為宗人府右宗正。○調廣西提督李林盛為陝西提督。○癸巳。以戶部郎中趙之隨為雲南按察使司僉事提調學政。○戊戌。

上奉

皇太后幸暢春園。○己亥。戶部議覆廣東巡撫蕭永藻疏言。康熙三十四年粵東錢貴開爐鼓鑄。今錢價日輕。請將鼓鑄停止。應如所請。從之。○辛丑。兵部等衙門議覆雲南貴州總督王繼文疏言。魯魁山賊首擦捏等剽掠彝村。伏弩暗傷新嵒。

營守備張廷柱。臣會同臨元總兵官王洪仁遣發流土官兵勦撫。追斬賊首擦捏。其在事有功人員。統聽部議。查魯魁山賊係山林小賊。無議敘之例。應將在事人員無庸議敘。得旨。魯魁山賊眾盤踞總督范承勳巡撫石文晟俱曾明晰面奏。官兵勦殺擦捏等賊。可嘉。在事有功人員俱著議敘。以示鼓勵。○刑部等衙門議奏原任侍郎多奇救養軍需馬匹怠玩不謹。致馬匹倒斃。有誤軍務。應斬立決。得旨。多奇人甚庸劣。在大同牧養馬匹。並不勤慎。慢視軍需。應行正法。姑念其人樸實。著免死。發往黑龍江。○壬寅。

上詣

實錄卷一百八十八

九

皇太后宮問安。○命裁上林苑衙門。其監丞及良牧蕃育二署署丞俱著裁去。○調福建水師提督張旺為廣西提督。陞雲南元江副將馮天惠為廣東高雷廉總兵官。貴州定廣副將沈勇為廣東順德總兵官。

六月甲辰朔。

上詣

皇太后宮問安。○乙巳。吏部議覆雲南巡撫石文晟疏言。雲南省元江開化廣南廣西四府烟瘴地方。請照粵西南寧等四府保題之例。即於滇省郡縣中選擇廉能素著熟悉風土者調補。或於滇省應陞官員內陞授。并照福建臺灣例。三年內

稱職即行陞擢。又鶴慶順寧永昌三府鄰近蒙番接連中甸外逼烏斯藏之地甚為緊要。必得壯年勤敏郡守庶可捍禦統攝。乞簡選賢員補授。五年稱職亦即陞擢。俱應如所請嗣後元江四府屬知府以下知縣以上准其保題調補。教官雜職報部調補免其具題。其鶴慶等府府官缺出臣部照山陝二省例奏聞簡補從之。○戊申。

永陵總管覺羅阿塔以年老乞解任。從之。○陞驍騎參領德承格為

永陵總管。○辛亥。調福建陸路提督吳英為福建水師提督。陞福建臺灣總兵官王萬祥為福建陸路提督。○壬子。

上詣

皇太后宮問安。○甲寅。以故三等阿思哈尼哈番博爾和代子

滾布塞楞襲職。○乙卯。

上詣

皇太后宮問安。○宗人府題固山貝子袁端鎮國公劉永根度明瑞等革退伊等所屬佐領請旨定奪。得旨袁端佐領著給與安郡王馬爾渾根度佐領著給與公門度。明瑞佐領著給與公吞珠。劉永四佐領查從何人掣出著給與原人。○陞廣西按察使魯超為廣東布政使司布政使。○免江南高郵等六州縣康熙三十六年分水災應徵丁銀四萬五千有奇。

實錄卷一百八十八

十

丁巳。予故漢軍都統郎化麟廣東順德總兵官李日榮各祭葬如例。○改四川梁萬營參將為化林營參將移駐化林。化林營原設守備改為中軍守備。撥梁萬營千總二員把總三員馬步兵三百七十五名歸併化林營。梁萬營存守備一員把總一員馬步兵二百名。從四川提督岳昇龍請也。○戊午。議政大臣等奏第巴疏言濟隆胡土克圖向日通使。因初到厄魯特地方不能成功。實出無可奈何。今濟隆胡土克圖有疾是以畧至遲延。此時前去心殊憂慮。祈如

諭旨勿致傷其身命。鑒宥遣回等語。查第巴以久故之達賴喇嘛詐稱尚在差濟隆胡土克圖於噶爾丹所。烏闡布通之役

實錄卷一百八十八

十

濟隆胡土克圖為噶爾丹誦經擇日交戰。又噶爾丹與尚書阿喇尼交兵之時濟隆胡土克圖獻噶爾丹手帕。濟隆胡土克圖情罪甚大。理當立斬。但康熙三十六年三月諭第巴旨內有寬宥其身命之語。請將濟隆胡土克圖並其弟子發正陽門東城下龍泉菴交步軍統領及近廟官兵看守。該部酌量支給飲食。第巴請遣回濟隆胡土克圖之語無庸議。又班禪胡土克圖疏言前差內齊陀音宣皇上敕旨召臣入京。達賴喇嘛第巴亦曾遣使相促。但臣所學者淺不能為功於道法。且未出痘疹是以不往。並非第巴沮止等語。查員外郎保倭巴齋敕往使於班禪胡土克圖此所

奏亦無庸議從之○土默特固山貝子拉斯扎卜故遣官致祭○已未

上詣

皇太后宮問安○戶部等衙門議覆雲南巡撫石文晟疏言吳三桂等三逆及孫延齡屬下脫逃人員或潛匿山谷或在土司地方藏形改姓或逃入魯魁山內緝之愈嚴畏罪思脫相聚為匪請將此內情罪可惡法不容恕者指明姓名徧行嚴拏其餘悉令免緝至於諸逆下士卒係各省之人其在逃者已奉旨免其查拏其歸順者內有間散之人令其開墾荒地輸納錢糧子弟准其一體應試應如所請從之○戶部等衙

實錄卷一百八十八

主

門議奏河南任城等八衛運丁張文安等叩閭呈告河南漕糧原在直隸大名府小灘鎮兌運原任巡撫李輝祖題准改遷河南衛輝府水次路途遙遠山谷崎嶇輓運甚難請仍改歸小灘鎮應將河南漕糧改於小灘兌運從之○兵部題征剿噶爾丹有功綠旗官員振武將軍孫思克等二百六十一人應從優各加二等議敘得旨綠旗官兵同滿洲大兵剿滅厄魯特在事有職任守備以上官員著給與拖沙喇哈番令承襲一次餘依議○庚申設直隸保定府理事同知一員從直隸巡撫于成龍請也○辛酉山西巡撫倭倫疏報汾州府屬寧鄉縣臨縣山賊劫掠村莊抗拒官兵賊首安守榮劉虎

等千餘人脅從者五六百人屯住永寧州骨脊溝臣會同太原總兵官韓天伏率領弁兵相機剿撫下部知之○癸亥

上詣

皇太后宮問安○予故滿洲副都統龍西庫葬如例○丙寅上詣皇太后宮問安○丁卯兵部議奏正黃旗漢軍副都統宗室阿喀納捏稱有病乞休應革職鞭責得旨阿喀納著革職免其鞭責○兵部議奏原任步軍校雅雅母泰等因有功牌應給半俸得旨該部但以殘廢之人議給半俸其陣傷告退何以並未議及若輩於行間被創不能供職深為可憫宜加特恩○

實錄卷一百八十八

主

戊辰大學士張玉書子母憂命回籍守制○盛京工部侍郎齊璿以病乞解任允之○陞江南廬鳳道盧崇義為廣西按察使司按察使○庚午

上詣

皇太后宮問安○壬申陞宗人府府丞金璽為都察院左副都御史



大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十八

實錄卷一百八十八

市

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十九

康熙三十七年戊寅秋七月癸酉朔享

太廟遣領侍衛內大臣索額圖行禮以刑部尚書吳璥為保  
和殿大學士兼刑部尚書○陞內閣侍讀學士蘇赫納為盛  
京工部侍郎○甲戌諭大學士等朕三次親征勦滅噶爾丹  
皆

祖宗庇佑所致朕奉

皇太后躬詣盛京謁

陵告祭但此時秋禾盛長若由山海關而行恐致踐踏田畝可

取道口外前往○丁丑

上詣

皇太后宮問安○己卯京師地震○陞叅領王傑為福建漳  
州總兵官○兵部議覆四川陝西總督吳赫疏言陝西邊疆  
緊要請將沿邊武弁及督標副叅遊守不論加銜大小止按  
見任相當者選擇保題補授查守備遊擊叅將副將無越銜  
陞轉之例應無庸議得旨陝西沿邊地方武職官員及督標  
員缺俱係緊要果係居官素優越陞一二等者該督等保題  
引見准其補授若越陞三等以上者不准○刑部等衙門議  
奏原任山西巡撫溫保布政使甘度橫征科派激變蒲州百

姓溫保甘度應擬立斬。太原知府孫毓璘將庫內收貯銀二萬八千五百兩有奇侵沒入己。應將孫毓璘照侵盜錢糧例擬斬。監候得旨溫保甘度已經革職從寬免死。孫毓璘依議。應斬著監候秋後處決。○庚辰以左都御史張鵬翮為刑部尚書。○陞太常寺卿梅鋐為宗人府府丞。○鑾儀衛鑾儀使韓弼以老病乞休允之。○壬午。

孝懿皇后忌辰遣官祭。

陵吏部右侍郎陶岱等疏言臣等遵旨賑濟朝鮮於四月十九日進中江臣等隨將賞米一萬石率各司官監視給該國王分賑其商人貿易米二萬石交與戶部侍郎貝和諾監視。

實錄卷百九

二

貿易據朝鮮國王李煒奏。

皇上創開海道運米拯救東國以甦海濱之民飢者以飽流者以還目前二麥熟稔可以接濟八路生靈全活無算下所司知之。

御製海運賑濟朝鮮記曰朕聞救災拯患王政所亟是以夙夜求莫雖在遐荒絕域猶若痼瘵乃身矧屬在藩維苟有疾苦何忍一日置也康熙三十六年冬朝鮮國王李煒奏比歲薦饑廩庾告匱公私困窮八路流殍相續於道籲懇中江開市貿易以甦溝瘠俾無殄國祀朕深為惻然立允其請遂於次年二月命部臣往天津截留河南漕米用商船出大沽海口。

至山東登州更用雞頭船撥運引路。又頒發帑金廣給運值緩徵鹽課以鼓勵商令將盛京所存海運米平價貿易。共水陸運米三萬石內加資者一萬石朝鮮舉國臣庶方藜藿不飽獲此太倉玉粒如坻如京入賜之食莫不忭舞忻悅凋瘵盡起該王具表陳謝感激殊恩備言民命續於既絕邦祚延於垂亡蓋轉運之速賑貸之周亦古所未有也朕念朝鮮自皇祖撫定以來奠其社稷綏其疆宇俾世守東藩奉職修貢恩至渥矣茲者告饑不憚轉輸數千里之勞不惜糜費數萬石之粟環國土而戶給之非獨一時救災拯患實所以普澤藩封而光昭。

實錄卷百九

三

先德也是烏可以無記。○甲申奉天左翼副都統穆占以老病乞解任得旨穆占若果身病應早請解任聞朕欲幸盛京奏請解任殊屬不合著革職。○乙酉陞戶部左侍郎王士正為都察院左都御史。○戶部題原任陝西巡撫布喀叩閣呈告四川陝西總督吳赫於借給籽粒案內侵蝕四十萬餘兩請與吳赫等質審應將布喀發往陝西交尚書傳臚塔張鵬翮等與總督吳赫等質審從之。○丙戌陞護軍參領沙賴為正黃旗漢軍副都統。○陞左僉都御史王焯為太常寺卿。○丁亥中元節遣官祭。

永陵。

福陵。

昭陵。

暫安奉殿。

孝陵。

仁孝皇后。

孝昭皇后。

孝懿皇后陵○添設齊齊哈爾城倉官一員筆帖式二員從黑

龍江將軍薩布素請也○庚寅轉戶部右侍郎王揆為左侍

郎○陞左副都御史錢三錫為戶部右侍郎○辛卯吏部議覆

雲南道御史荆元寶疏言州縣官有牧民之責為任甚重請

實錄卷之九

四

嗣後每月州縣官掣籤之後令其隨本引見應如所請得旨

依議同知通判等官亦著引見○戶部議覆漕運總督桑額

疏言江南建平縣漕糧正耗粳米四千餘石本縣不產粳米

每於他郡採買請嗣後停其採買將該邑土產秈米交兌應

無庸議得旨建平縣改徵秈米於民有益著照該督所請行

○以鄂爾多斯故多羅貝勒旺來克弟達西拉卜坦襲爵○

癸巳予故奉國將軍索飛祭葬如例直隸巡撫于成龍疏

言霸州等處挑濬新河已竣乞賜河名并敕建河神廟得旨

照該撫所請賜名永定河建廟立碑○乙未工部議覆漕運

總督桑額等估計開濬下河應准行

上諭大學士等曰下河入海之處朕雖未及親覽嘗聞人云鹽

城一帶地極窪下海水反高建閘無益倘河高海低水性趨

下雖不疏濬勢必決開一道以歸於海明代於海口設閘遇

河水高則啟閘以注諸海河水平則閉閘以禦海水前雖特

令于成龍凱音布修治毫無裨益今桑額居官雖優但此事

非身親閱歷者難以懸擬必深悉水性洞徹地形之人方可

定議爾等問九卿并淮揚等處人在朝者確議具奏○丙申

上奉

皇太后自暢春園回宮○陞太僕寺卿吳涵為都察院左副都

御史○以故一等阿思哈尼哈番又一拖沙喇哈番長保子

實錄卷之九

五

萬神保襲職○免江南鹽城縣海州大河衛本年分水災額

賦有差○添設直隸贊皇縣守備一員千總一員把總二員

馬兵四百名從直隸巡撫于成龍請也○丁酉

上御太和殿視朝文武陞轉各官謝恩○戊戌諭大學士等朕

巡省盛京車駕既發之後副都統吳達禪到日令其馳赴行

在已有諭旨矣其餘大臣及眾官奉差回時不必前來又各

處赴京陛見臣工如有應俟啟奏之事令其暫候如無事待

奏令各回本任○已亥諭大學士等今叛逆噶爾丹骸骨已

經搜獲不日解至而遺孽就俘亦拘繫在此應如何處置爾

等會同議政王大臣滿漢九卿詰朝集議以聞○大學士等

奏曰開濬下河間之九卿及在朝淮揚人等九卿云淮揚人俱言開濬下河有益然此事關係甚重應令漕運總督桑額會同總督巡撫確議具奏

上顧于成龍曰爾意若何于成龍奏曰姚二沼船廠蘆壩等河若行挑濬於民有益

上曰朕幸五臺山回欲觀渾河清河因由霸州而來朕意渾河清河俱匯流霸州城南原欲沿河修築隄岸不意至霸州詢地方百姓據云渾河原經固安縣後因遷徙匯合清河流至霸州二河水勢浩大以致泛濫為災朕遂更初見一從民言於固安縣開河事乃有成朕並不固執已意爾等為總督巡

實錄卷一百一十九

木

撫者能如朕之不固執乎然此河道甚短易於修治南省地形窪下水勢浩濶難於修築不比此河今若挑濬姚二沼等河爾果能保與民有益否于成龍奏曰水性年年變異無有一定臣何敢永保其無虞

上曰河工緊要必熟諳地形水性之人能確知其利害方於民有益于成龍奏曰桑額為人遇事尚能斟酌今九卿議令桑額與總督巡撫會同確勘定議具奏

上曰著依九卿議 陞直隸守道于準為浙江按察使司按察使吏部議覆福建道御史劉珩疏言秦晉兩省道府州縣暨各省布政使按察使缺出九卿詹事科道保舉賢能官員

請即於會議班次各書保舉之員實事數端確有憑據者不得以空言舉薦其保舉陞用人員如日後貪婪事發將原保舉之官照督撫徇情薦舉例議處應如所請從之 調正白

旗蒙古副都統宗室楊福為奉天左翼副都統 以廣東提督盧崇耀為廣州將軍陞陝西寧夏總兵官殷化行為廣東提督調江西南贛總兵官葉日芳為陝西寧夏總兵官浙江黃巖總兵官趙弘燦為江西南贛總兵官 庚子以固山貝子蘇爾發為鑲黃旗滿洲都統 議政王大臣等議奏噶爾丹者乃逆天負恩之賊也侯侍讀學士喇錫取其骸骨到京後應照吳三桂粉骨揚灰例擣為細末拋散通衢塞卜騰巴

實錄卷一百一十九

木

兒珠爾乃逆賊噶爾丹子未當存留應立斬梟示差理藩院司官一員乘驛將首級往示四十九旗喀爾喀各扎薩克至塞卜騰巴兒珠爾乳母之夫徽特和碩齊亦應處斬程貝臧布前因有要言質訊奉旨暫且停決茲事已畢亦應處斬得旨徽特和碩齊當免程貝臧布當誅此事俟朕回鑾可也喇錫到日著單身馳驛趨赴行在 直隸巡撫于成龍疏言贊皇縣地處重山界聯三省久為山賊藏奸之藪

皇上矜憫伊等無知不即誅戮命候補參議道李毓桂等推誠招撫容其自新今據賊首李斗等聞命歸誠於本月十七日赴臣衙門就撫下部知之 辛丑

上奉

皇太后詣盛京謁

陵命皇長子多羅直郡王允禔皇三子多羅誠郡王允祉皇五子多羅貝勒允祺皇七子多羅貝勒允祐皇九子允禔皇十子允祹皇十三子允祥隨駕是日啟行駐蹕三家店○以故一等精奇尼哈番許世文子許重琦襲職○陞右通政勵杜訥為太僕寺卿○添設直隸保定河間二府屬管河同知各一員州判一員縣丞三員主簿四員從原任河道總督王新命請也○兵部等衙門議覆山西巡撫倭倫疏言永寧州等州縣呂梁交山骨脊溝諸處匪類易於潛踞查交城縣山內

實錄卷五十九

原有靖安堡距骨脊溝八十餘里應將此處改為靖安營調平陽城守營守備一員千總一員把總一員於平陽營抽兵二百二十一名太原營內抽兵五十名防守平陽城守營仍留把總一員兵一百五十名分防岳陽浮山二汛歸併平陽營叅將管轄應如所請從之○刑部等衙門議奏山西巡撫倭倫疏報寧鄉等州縣山賊安守榮劉虎等聚賊五百餘名劫掠村莊官兵進剿雖自行投首但聚眾行劫殺傷兵民安守榮劉虎等十四人應立斬梟示其餘賊犯賀之榮等一百九十四名亦應照律立斬其未獲各犯李霧等二百十二名應嚴行緝獲另結得旨安守榮劉虎等於該撫等兵到即率

眾迎降俱從寬免死發往奉天安插賀之榮等一百九十四名俱從寬免死李霧等二百十二名俱免緝

八月壬寅朔

上駐蹕密雲縣 先是

上遣內閣侍讀學士喇錫等齎敕往諭策妄阿喇布坦曰爾與爾叔噶爾丹分離以來誠心恭順聘貢不絕朕亦不時加恩遣問噶爾丹逆天違背朕旨令永滅矣其屬下大寨桑諸喇嘛俱已來降止丹濟拉吳爾占扎卜數人茫無所歸流行而已近者副都統阿南達報稱丹濟拉攜其子多爾濟塞卜騰拉思倫等來降噶爾丹之居噶爾丹之女鍾齊海程貝藏布

實錄卷五十九

九

之妻及其穉子諾顏格隆俱被爾所遣堪都等截留伊拉古克三胡土克圖往投爾所吳爾占扎卜色梭阿巴等爾已擒之阿喇爾拜自縊死車陵布木往投丹津鄂木布此項人等皆黨惡之人不可一日容者也若在爾地亦不利於爾故特遣敕諭爾朕旨一到爾立刻一併查拏及噶爾丹之尸與其女鍾齊海同朕使臣差人護解如此則爾始終恭順之心確著亦得長沐朕之恩寵於無窮矣倘若隱匿不行擒解不但爾歷年之恭順皆虛即爾貿易之人亦永不許通行矣以上情事亦已明諭恐爾使人不能全記告爾特遣內閣侍讀學士喇錫理藩院司務英古齋敕往諭以伴敕例賜綠緞十端

至是策妄阿喇布坦以雲端格隆充使同喇錫等來獻噶爾丹骸骨。喇錫等奏聞。

上命喇錫等帶噶爾丹骸骨置京城外懸挂示衆。理藩院奏策妄阿喇布坦疏言噶爾丹多爾濟逃來往回子所居庫察城被揮持人等所殺其下人俱四散。噶爾丹多爾濟之母率寨衆數人向西而去矣。噶爾丹之尸鍾齊海兵爾占扎卜等之事前已曾奏請令奉

聖旨特遣使臣來是以將噶爾丹骸骨遣發。至鍾齊海及吳爾占扎卜等寨衆請以畀我。厄魯特降人在中國者仍請鑒恤。上命議政王大臣等議奏。尋議厄魯特降人俱係噶爾丹屬下。

實錄卷一百一十九

十

噶爾丹逆天違旨毒害生靈。

皇上親統六師三臨絕塞討而滅之。俘其屬衆。招之使來者有之。陸續來降者亦有之。並非策妄阿喇布坦之人。其奏請仍加眷恤之處。無庸議。噶爾丹多爾濟往回子所居庫察城而被殺亦無庸議。至策妄阿喇布坦雖獻噶爾丹骸骨來而鍾齊海者乃噶爾丹之女。吳爾占扎卜等相助噶爾丹作惡。此輩不便容留。策妄阿喇布坦處應令將噶爾丹之女鍾齊海。吳爾占扎卜色稜阿巴車稜布木諾顏格隆等人仍遵前旨擒拏。差人起解從之。癸卯。

上駐蹕遜亭 甲辰

上駐蹕三岔口。○乙巳。

上駐蹕喇嘛洞。○丙午。

上駐蹕喇門噶山。○湖廣茅崗安撫使覃洪潮以病乞休。以其姪覃聲極襲替。丁未。遣大學士吳興祭

先師孔子。○

上駐蹕博洛和屯。喀喇沁多羅杜楞郡王扎什等來朝。戊

申祭

大社。

大稷。遣吏部尚書庫勒納行禮。○

上駐蹕唐三營。○諭兵部嗣後巡捕營官員降級調用者仍著

實錄卷一百二十

十

以巡捕營員缺用。著為令。○己酉。

上駐蹕汗特木爾達巴漢昂阿地方。庚戌。

太宗文皇帝忌辰。遣官祭

昭陵。○

上駐蹕克勒地方。辛亥。

上駐蹕西爾哈畢刺地方。予故福建漳州總兵官張仕選祭

葬如例。○壬子。

太祖高皇帝忌辰。遣官祭

福陵。○

上駐蹕孟克唐圖交界地方。癸丑。



上駐蹕喀喇沁和碩端靜公主之第。○和碩端靜公主和碩額

駙噶爾臧進宴。以故三等阿思哈尼哈番朱蘭泰叔薩克

查襲職。以兵部郎中胡世藻為河南按察使司僉事提調

學政。○兵部議覆雲南貴州總督王繼文疏言魯魁山賊首

擦捏雖滅餘黨猶存新習一營孤懸賊窟請設汛增兵巡防

要害查江內慢干壩乃新平縣治適中之地應撥千總一員

駐防江外舊哈路果大口三家坡等處請增設四汛增兵三

百五十名臨元鎮原設楊武壩一汛就近歸入新習營添設

參將一員原設守備改作中軍守備又野賊非往新元即奔

楚景楚姚一鎮最為緊要查援勦兩協乃策應之師各撥千

實錄卷百九

三

總一員各帶兵二百名一駐南安州界牌一駐景東府福都

責令防守均應如所請從之。○甲寅喀喇沁多羅杜楞郡王

扎什等進宴。賜和碩端靜公主和碩額駙噶爾臧白金綵

緞。○喀爾喀澤卜尊丹巴胡土克圖等來朝。乙卯

上駐蹕白爾車爾地方。丙辰。

上駐蹕羅漢軍喇地方。教漢多羅郡王扎木蘇等來朝。丁

巳。

上駐蹕和賴薩爾巴爾昂阿地方。以故奉國將軍索飛子恩

特赫默為奉恩將軍。戊午。

上駐蹕忽蘭喀喇諄拖惠地方。免福建同安縣本年分水災

額賦有差。○巳未。

上駐蹕杭愛鄂洛木地方。○吏部議覆湖廣總督李輝祖疏言

湖南田糧不均奉旨均大改正偏沅巡撫楊鳳起因此案係

彼藩司任內承文造冊出過印結專怙已私罔恤民隱欲取

齊各屬並無不均印結混結斯案殊屬溺職應將巡撫楊鳳

起照例革職從之。○予故廣州將軍拜音達禮祭葬如例。○

陞直隸真定副將王起龍為福建海壇總兵官。○庚申。

上駐蹕哈喇拖海地方。○教漢多羅郡王扎木蘇等進宴。辛

酉。秋分。

月於西郊遣工部尚書薩穆哈行禮。

實錄卷百九

三

上駐蹕烏闌岡安地方。○科爾沁和碩達爾漢親王額駙班第

等來朝。○壬戌。

上駐蹕朱爾哈代烏達地方。○教漢和碩額駙齊倫巴圖爾等

進宴。○癸亥。

上駐蹕嘉門蘇賽包地方。○甲子諭領侍衛內大臣索額圖等

皇太后父母所葬之地在發庫山相去二百里應於道路附近

處擇潔淨之地。

皇太后遂為祭奠。乙丑。

上駐蹕堆惠巴倫和洛。以一等侍衛覺羅通吉為正白旗蒙

古副都統。丙寅。



上駐蹕西喇穆倫畢喇地方○丁卯。

上駐蹕准巴蘇海地方○戊辰。

上駐蹕巴倫席喇鄂累地方○免江南壽州鳳陽等十二州縣

本年分水災額賦有差○已巳科爾沁和碩端敏公主和碩

達爾漢親王額駙班第等進宴○賜和碩端敏公主和碩達

爾漢親王額駙班第白金綵緞○庚午。

上駐蹕阿布達爾台地方○旌表奉天烈婦大圖妻法氏拒姦

被戮給銀建坊如例○辛未。科爾沁一等台吉畢力克圖進

宴○以左副都御史金甌為偏沅巡撫○調浙江溫州總兵

官張玉麒為福建臺灣總兵官○湖廣總督李輝祖疏報湖

南界連黔粵苗徭雜處本年七月十五日賊首黃明率黨吳

旦先等百餘人突至靖州城外執旗放鎗暗傷把總李成功

等靖五協副將楊雄追擊賊衆旋潰又湖南茶陵州與鄱縣

萬陽山連界本年七月二十四日有萬陽山賊首陳丹書率

衆擁入州城署州事永州府同知史在鑛等被傷劫印得旨

賊徒倡亂傷官劫印該管文武各官著嚴加察議具奏并敕

湖廣貴州廣西等三省督撫提鎮速行勦滅務盡根株毋致

滋蔓仍嚴束弁兵不得借端擾害良民

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百八十九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百九十

康熙三十七年戊寅九月壬申朔

上駐蹕克爾蘇地方○

上臨科爾沁和碩達爾漢巴圖爾親王滿朱習禮墓奠酒○科爾沁和碩額駙般迪來朝○癸酉

上駐蹕恩都爾拜地方○科爾沁多羅郡王代布等進宴○甲戌

上駐蹕科爾沁和碩純禧公主之第○和碩純禧公主和碩額駙般迪進宴○丙子

實錄卷一百九十

上臨科爾沁端貞長公主墓奠酒○丁丑

上駐蹕能諾黑席北地方○賜和碩純禧公主和碩額駙般迪白金綵緞○戊寅

上駐蹕拖爾惠地方○科爾沁台吉畢禮滾達賴等進宴○子故滿洲都統覺羅席特庫祭葬如例○巳卯

上駐蹕烏楚滾地方○諭大學士等曰時屆深秋雨澤霑足有益農事朕甚欣悅○賜來朝翁牛特教漢柰曼阿祿科爾沁

郭爾羅斯喀爾喀科爾沁喀喇沁土默特諸王貝勒貝子公台吉等白金綵緞有差○庚辰

上駐蹕博多隆地方○辛巳

上駐蹕伊屯昂阿地方○黑龍江將軍薩布素靈古塔將軍沙納海來朝○癸未

上駐蹕布爾哈畢喇地方○先是

上遣內閣侍讀學士伊道等齋教往諭策妄阿喇布坦至是策妄阿喇布坦以諾顏格隆厄爾巴噶卜楚付伊道等遣使滾

楚克等覆奏

上命議政大臣議奏尋議厄魯特來降之人原皆噶爾丹屬下之人並非策妄阿喇布坦之人所奏加眷恤之處仍無庸議

策妄阿喇布坦懇切請留吳爾占扎卜阿巴色稜等人應停解兵爾占扎卜等留給策妄阿喇布坦至鍾齊海者乃叛逆

噶爾丹之女也不許容留於策妄阿喇布坦處務令解來又策妄阿喇布坦疏言第巴凡事越理而行前經具奏今仍不改查第巴欽遵

上諭擬於來年三月遣發班禪來京策妄阿喇布坦所奏之處無庸議從之○諭策妄阿喇布坦敕曰朕撫養億兆凡恭順

竭誠者必厚待加恩前以吳爾占扎卜阿巴色稜等輩皆助噶爾丹之人恐留於爾地又復作亂亦未可定故命爾解來

今爾疏言吳爾占扎卜阿巴色稜等非臣所應分之人但臣人力甚少而哈薩克等人又皆與臣為難臣得伊等可以助

力據實陳情朕矜爾諄懇之意許停解吳爾占扎卜阿巴色

稜矣。至鍾齊海爾疏言於爾為妹乞皇上垂憐即以卑臣。但鍾齊海爾乃噶爾丹親女不得與他人為此。此斷不許留於爾地務必差人解來。如此則許爾照常通使行商。爾若仍不肯解來爾不得復通使矣。至厄魯特來降朕者原皆噶爾丹屬下人。噶爾丹違朕之旨毒害生靈。朕親率兵剿滅其屬衆有俘獲而來者。有陸續歸降者。並非爾之人。所奏不准行。又爾疏言第巴自臣前次奏後聞其凡事背理而行。中國亦常洞鑒之矣。朕已嚴敕第巴使遣班禪。第巴欽遵朕旨奏覆於來年三月遣班禪來。爾之所奏朕已知之。特諭○敕進剿噶爾丹功授正白旗防禦莫爾渾等十六員。世職有差○陞宗人府府丞梅錫為都察院左副都御史○設直隸永定河南岸北岸分司各一員。從直隸巡撫于成龍請也○甲申遣官祭歷代帝王○遣官祭城隍之神○

實錄卷一百九十

三

上駐蹕伊爾門畢喇地方○乙酉  
上駐蹕烏雲海蘭地方○丙戌  
上駐蹕木舒地方○丁亥  
上駐蹕奇塔木畢喇地方○戊子  
上駐蹕法塔哈鄂佛羅地方○己丑遣大學士伊桑阿祭松花江之神○庚寅以故二等阿思哈尼哈番席達子多勒濟襲職○工部議覆浙江巡撫張勛疏言本年七月十三十四兩

日颶風大作。海潮越隄而入。衝決海寧縣塘一千六百餘丈。海鹽縣塘三百餘丈。應行令該撫作速修築從之 壬辰

上駐蹕穆赫林鄂莫地方○癸巳

上駐蹕扎星阿地方○賜黑龍江將軍薩布素寧古塔將軍沙

納海白金綵緞有差○甲午

上駐蹕塔庫翁鄂洛地方○乙未

上駐蹕捕塔海噶山○湖廣總督李輝祖疏報茶陵州叛賊陳丹書等於本年八月初六日被官兵擊敗逃奔安仁縣。至衡

州府城外放火攻門。被衡州協官兵追殺至常寧縣城擒獲

賊首陳丹書等下部知之○丙申陞安徽按察使張霖為福

實錄卷一百九十

四

建布政使司布政使○丁酉

上駐蹕吉林烏喇地方○戊戌

孝慈高皇后忌辰遣官祭

福陵○兵部議覆直隸巡撫于成龍疏言固關經制兵丁原設

有七百餘名。因歷年裁汰抽調僅存馬步兵丁二百零七名

除分防各關口止留馬兵三十七名步兵七十三名。汎廣兵

單不足以資防禦。今既添設參將自應酌增弁兵。請將王家

坪裁存馬兵九十名照數撥給固關添設千總一員把總一

員管轄。應如所請從之○陞太僕寺卿勵杜訥為宗人府府

丞○己亥諭大學士等黑龍江將軍薩布素授任以來為國

効力訓練士卒平定鄂羅斯勤勞可嘉著給一等阿達哈哈  
香令其世襲喀特胡初授黑龍江副都統時協助薩布素撫  
綏安輯及有事於鄂羅斯又復効力著給世襲拜他喇布勒  
哈番吉林烏喇地方其先告訐事務甚多自沙納海為將軍  
詳加勸導深得官軍之心其以朕親御蟒袍纓帽賜薩布素  
喀特胡沙納海爾等可於衆前諭之○庚子諭大學士等朕  
親臨烏喇著將應正法罪犯今年停決其緩決者仍監候可  
矜者即行完結爾等與將軍沙納海會同查明具奏至盛京  
時亦照此諭行此後有犯者不准寬免○辛丑

上駐蹕黑圖畢爾漢地方

實錄卷百廿

五

冬十月壬寅朔享

太廟遣領侍衛內大臣公坡爾益行禮○遣官祭

永陵。

福陵。

昭陵。

暫安奉殿。

孝陵。

仁孝皇后

孝昭皇后

孝懿皇后陵○頒康熙三十八年時憲曆○

上駐蹕庫勒訥畢喇地方○癸卯。

上行圍射殲二虎其一虎卧於山下驚鳥鎗聲而起。

上隔澗發矢穿其脇虎應弦倒斃新滿洲等俱大駭奏曰從未

聞隔澗望影能射倒猛虎者是日駐蹕奇爾賽畢喇地方

○甲辰。

皇太后聖壽節。

上率扈從王以下文武大臣侍衛等詣

皇太后行宮前行禮導

懿旨停止筵宴○敕封

皇太后駐蹕之山為壽山○

實錄卷百廿

六

上駐蹕布爾喀畢喇地方○乙巳。

上行圍射殲一虎一豹是日駐蹕海瀾畢喇地方○先是

上親征朔漠蕩平厄魯特噶爾丹諸王大臣等請立碑太學以

垂萬世至是

御製碑文曰惟

天盡所覆海內外日月所出入之區悉以畀予一人自踐阼迄

今蚤夜殫思休養生息冀臻熙皞以克副維皇大德好生之

意庶幾疆域無事得以偃兵息民迺厄魯特噶爾丹阻險北

陸因此一方人既荼毒塞外輒狡焉肆其兇逆犯我邊鄙虐

我臣服人用弗寧夫蕩寇所以息民攘外所以安內邊寇不

除則吾民不安。此神人所共憤。天討所必加。豈憚一人之勞。弗貽天下之逸。於是斷自朕心。躬臨朔漠。欲使悔而革心。故每許以不殺。彼怙終不悛。我師三出。絕塞朕皆親御。以行。深入不毛。屢涉寒暑。勞苦艱難。與偏裨士卒共之。迨彼狂授首。脅從歸誠。荒裔之長。來享闕下。西北萬里。濯燧銷鋒。中外入謐。惟朕不得已。用兵以安民。既告厥成。事乃蠲釋。貴災潔事。裡望為億兆昇平之福。而廷臣請紀功太學。垂示來茲。朕勞心於邦本。嘗欲以文德化成天下。顧茲武畧。廷臣僉謂所以建威消萌。宜貽斯績於有永也。朕不獲辭。考之禮王制。有曰。天子將出征。受成於學。出征執有罪。反釋奠於學。以訊讖

實錄卷一百九十

七

告。而泮宮之詩亦曰。矯矯虎臣。在泮獻馘。又禮王師大獻。則奏凱樂。大司樂掌其事。則是古者文事武事為一。折衝之用。具在樽俎之間。故受成獻馘。一歸於學。此文武之盛制也。朕嚮意於三代。故斯舉也。出則告於神祇。歸而遣祀闕里。茲允廷臣之請。猶禮先師以告克之遺意。而於六經之指。為相符合也。爰取思樂泮水之義。為詩以銘之。以見取亂侮亡之師。在朕有不得已而用之之實。或者不戾於古帝王伐罪安民之意云爾。銘曰。巍巍先聖萬世之師。敬信愛人。治平所基。煌煌聖言。文武道一。禮樂征伐。自天子出。朕臨域中。逾茲三紀。嘗見羹牆寤寐。永矢下念。民瘼上承。帝謂四海無外。盡隸侯

尉。維彼兇醜。潰亂典常。既梗聲教。遂窺我疆。譬之於農。患在螟螣。東昇不施。將害稼穡。度彼遊魂。險遠是怙。震以德威。可往而取。朕志先定。龜筮其依。屬車萬乘。建以龍旂。祝融駭驚。風伯戒途。宜暘而暘。利我樵蘇。大野水涸。川瀆効靈。泉忽自湧。其甘如醴。設為犄角。一出其西。一出其東。中自將之。絕域無人。獸羣受掩。五日窮迫。彼狂走險。大殲於路。波血其掣。剪其黨孽。俘彼卒徒。衆烏晝號。單馬宵遁。恐久駐師。重為民困。慎固戍守。還轅於京。自夏徂冬。雨雪其零。載馳載驅。我行再至。蠢茲窮寇。昏惑不悔。我邊我氓。以休以助。爰寧其居。爰復其賦。藩落老耄。斯恬斯嬉。歲晏來歸。春與之期。春風飄揚。

實錄卷一百九十

八

我旌旗。我今于邁。如涉我郊。言秣我馬。狼居胥山。登高以眺。閑彼彈丸。天降光罰。孤雛就羈。三駕三捷。封狼輿尸。既腊梟獍。既獮豺獍。大漠西北。解甲棄受。振旅凱入。澤沛郊卜。明禋肆赦。用迓景福。昔我往矣。在泮飲酒。陳師鞠旅。誓屈羣醜。今我來思。在泮獻功。有赫頌聲。文軌來同。采芣米藻。頌興東魯。車攻馬同。亦錫石鼓。師在安民。非出不得已。古人有作昭示此吉。緬惟虞廷。誕敷文德。聖如先師。戰慎必克。惟兵宜戢。惟德乃綏。億萬斯年。視此銘詞。命勒察罕七羅碑文。曰。康熙三十五年。歲次丙子。四月丙戌朔。十三日戊戌。大清皇帝征討厄魯特噶爾丹將六軍過此。

御筆勒銘惟

天所覆皆吾赤子。綏靖邊陲。殄滅蛇豕。山澤効靈。草蕃泉旨。荆衛斯經。貞石用紀。○命勒拖諾山碑文曰康熙三十五年歲次丙子五月丙辰朔十二日丁卯。

大清皇帝征討厄魯特噶爾丹。駐蹕拖諾山。

御筆勒銘。瀚海蕩蕩。臚胸決決。親御六師。我武維揚。震雷霆威。警日月光。剪厥兇醜。安定遐荒。○命勒昭莫多碑文曰康熙三十五年歲次丙子五月丙辰朔十三日戊辰。

大清皇帝征討厄魯特噶爾丹。大兵邀擊於昭莫多之地。盡殲賊衆。

御筆勒銘。

天心洪佑。翦逆摧兇。困獸西竄。膏我軍鋒。一鼓而殲。漠庭遂空。磨崖刻石。丕振武功。○命勒狼居胥山碑文曰康熙三十六年歲次丁丑四月庚戌朔。

大清皇帝討滅厄魯特噶爾丹。駐蹕狼居胥山。

御筆勒銘。登狼居胥。遡大河曲。遐播德威。以綏荒服。殄寇寧人。義正仁育。絕域來同。敷天永福。○陞陝西按察使鄂海為陝西布政使司布政使。理藩院郎中赫嘏為陝西按察使司按察使。○兵部議覆山西大同總兵官俞益謨疏言武臣舉劾定例二年一次。嗣後請改二年半一次。如遇軍政之年。將舉

効停止。應如所請。從之。○丙午。

上駐蹕牛磨順畢喇地方。○丁未。

上行圍鎗磴二大熊。是日駐蹕輝發地方。喀爾喀澤卜尊丹

巴胡土克圖土謝圖汗遣使進九白年貢。宴賚如例。○戊申。

上駐蹕費雅塔拉庫畢喇地方。○刑部議覆浙江巡撫張勲疏言烈女孫秀姑拒閤士積逼奸。噉指脫身。縫衣自盡。時當炎暑。顏色如生。貞烈實出尋常。例合旌表。應如所請。從之。○己酉。

上駐蹕富爾哈畢喇地方。○吏部等衙門議覆雲南巡撫石文晟等疏言雲南北勝州逼近蒙番。與永寧府接壤。查永寧府

並無城郭市廛。止設掌印同知一員。未立衙署。該地土司無

人管攝。請將永寧府裁去。以北勝州改為永北府。裁去知州

吏目。另設知府一員。經歷一員。并將永寧府掌印同知改為

永北府同知。北勝州原設學正一員。今改為永北府學教授

又順州向係州治。久經裁缺。屬鶴慶府。但去鶴慶府遠。而與

北勝州近。亦歸并新政。永北府管轄。均應如所請。從之。○調

浙江平陽總兵官李華為溫州總兵官。○庚戌。

上駐蹕巴顏鄂莫地方。辛亥。

上駐蹕鄂爾敏朱敦地方。免直隸豐潤縣本年分旱災額賦

十之三。○壬子。

上駐蹕馬秦寨地方○癸丑。

上閱興京城駐蹕

永陵西○甲寅

上率諸王大臣等謁

永陵行禮奠酒舉哀遣官至武功郡王禮敦巴圖魯墓恪恭

貝勒塔察墓奠酒○賜守

陵官兵銀緞有差○

上駐蹕薩爾滸地方○江南江西總督范承勳丁母憂命回旗

守制○陞河南按察使孟世泰為貴州布政使司布政使○

兵部議覆雲南貴州總督王繼文疏言貴州水西宣慰使安

實錄卷一百一

七

勝祖病故承襲無人請將宣慰使停襲其水西土司所屬地

方改歸大定平遠黔西三州流官管轄應如所請從之○奉

天將軍貝子蘇努來朝○乙卯

上駐蹕琉璃河地方○盛京文武官員兵民跪迎

聖駕○丙辰

上駐蹕

福陵東○丁巳

上率諸王大臣等謁

福陵

昭陵行禮奠酒舉哀是日駐蹕盛京城內○戊午

上率諸王大臣等謁

福陵

隆恩殿致祭○

上諭內大臣等曰開國佐運勲臣揚古利費英東額亦都三人

効力甚可嘉尚此三人墓朕祭

昭陵之日親臨奠酒其餘諸臣効力亦屬可嘉康熙二十一年

曾經祭奠者照前舉行賴親王薩哈廉克勤郡王岳托等墓

各遣大臣致祭尋揚古利費英東額亦都之子孫公福善等

奏曰

皇上欲親臨臣等之祖墓奠酒臣等不勝惶懼伏祈

實錄卷一百一

七

皇上停止

上諭之曰

太祖

太宗開國定鼎爾祖輔佐勲勞即爾等亦不能詳悉朕時閱

實錄知爾等之祖於開創時功績懋著深屬可嘉朕既親來謁

陵必當臨爾祖墓奠酒爾等無庸再奏○命發常平倉穀賑濟

海州鹽城等九州縣被水災飢民○陞左通政錢晉錫為太

僕寺卿○兵部議覆京口將軍董元卿等疏言京口原設墩

臺一百五十八座係左右二鎮管轄後裁去一鎮止一鎮三

營管轄今又裁總兵官改設副將止左右二營一十五百餘



兵管轄八百餘里汎地。誠有顧此失彼之患。請於裁兵之內。撥四百名添給兩營。應如所請。從之。○己未。

上率諸王大臣等詣

昭陵

隆恩殿致祭。○

上臨勲臣武勲王揚古利直義公費英東。弘毅公額亦都墓。設牀偏西北向。

上坐牀上置奠池。各奠酒三卮。隨從王大臣侍衛等及勲臣等子孫皆於墳院內叩頭。○庚申。

上詣

太祖

太宗所御宮殿。○陞浙江金衢嚴道董昭祚為安徽按察使司

按察使。○予故原任副都統二等阿達哈哈番祖澤椿祭葬如例。○禮部題朝鮮國王李煒遣陪臣徐文重等恭進許市

米穀及賞給米穀禮物。俱應照例查收。得旨朝鮮國為許市

米穀所進禮物著發還。餘依議。○辛酉。賜守

陵官兵執事人等及奉天官兵銀幣布疋。○壬戌

上奉

皇太后回鑾盛京文武大小官員及兵民商賈耆老婦女童穉等感戴

皇恩俱集郊外叩首歡呼焚香跪送。是日駐蹕佛札色地方。○癸亥。

上駐蹕五道河地方。○土默特多羅貝勒厄爾德木圖等來朝

○遣都統杜思噶爾祭察哈爾溫莊長公主墓。○甲子。

上駐蹕白旗堡。○乙丑。

上駐蹕二道井地方。○丙寅。

上駐蹕羊腸河地方。○土默特多羅貝勒厄爾德木圖等進宴

○丁卯。

上駐蹕興隆店地方。○諭戶部盛京係

列祖創興之地。朕謁祭

陵寢。咨詢民生。承德等州縣今歲田禾未獲全登。宜加恩恤。應

徵米豆概行蠲免。爾部即移文該府君遍示閭閻家喻戶曉

務俾均沾實惠。以副朕愛民至意。○戊辰。

上駐蹕驚頭堡地方。○己巳。

上駐蹕小凌河西岸。○庚午。

上駐蹕高橋驛。○戶部尚書馬齊理藩院尚書班迪等以四十

九旗及邊外喀爾喀會盟事奏聞。下該部知之。○喀爾喀車

臣汗遣使進九白年貢。宴賚如例。

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百九十一

康熙三十七年戊寅十一月辛未朔

上駐蹕寧遠州○壬申

上駐蹕中後所之東喀喇沁鎮國公善巴喇錫等進宴○癸酉

上駐蹕王保河地方賜錦州義州廣寧等處官兵銀緞有差  
吏部議覆直隸巡撫于成龍疏言永定河河流湍迅多致  
淤淺必需多員因時制宜以收成效應照黃運兩河之例於  
候選候補人員內擇諳練河務者赴工効力應如所請從之

○甲戌

上駐蹕山海關城西○乙亥

上駐蹕撫寧縣東○丙子

上駐蹕永平府西○丁丑

上駐蹕沙河驛○戊寅

上謁

暫安奉殿

孝陵是日駐蹕豐潤縣任子口○陞江西贛南道吳國柱為河  
南按察使司按察使○免江南高郵等五州縣本年分水災  
額賦有差○己卯

上駐蹕閭家屯○庚辰

上駐蹕新城○辛巳

上率諸王大臣侍衛等詣

暫安奉殿

孝陵行禮奠酒舉哀次至

仁孝皇后

孝昭皇后

孝懿皇后陵奠酒舉哀是日駐蹕邦均○壬午

上駐蹕通州城北○癸未

上奉

實錄卷百五十一

二

皇太后回宮○甲申大學士等以朝審情實各犯四十八人請旨。

上諭曰奏謝之成當豫為詳審臨時可以無冤若不慎之於先而伺察於死生呼吸之間豈有及乎如今日各案朕先已熟覽知其曲折猶欲與爾等斟酌而行遂展閱招冊詳審再三凡勾者三十五人○又諭曰朕初親政時滿洲無有關毆持刀殺人之事以後漸有犯者及今此風日甚可見習俗浸薄必使還淳歸厚斯為善耳先時滿洲往往輕斃其家人朕乃立為差等之罰今此風則少息矣○乙酉

上御太和殿視朝文武陞轉各官謝恩○諭大學士等開濬下

河民生攸繫朕為閭閻疾苦深切軫念曾命開音布孫在豐

于成龍王新命等專司開濬伊等俱奏工程告竣民生大蒙利益載在冊籍存部可考人亦具在可以質詢也由今觀之止是虛糜國帑水勢並未消滅田畝並未涸出所謂有益民生者果何在耶今桑額又奏當行開濬而九卿並不詳詰從前開濬諸人亦不稽考冊籍遽議准行如果此次開濬巨浸全消疆理盡復民業得濟朕於錢糧絕無吝惜即動發帑金令其興工而已至捐助事例並不宜先行即今山陝所捐銀米其事尚未明晰也若下河果如其所請疏鑿開濬而桑額等能保水即消田即出有裨於民以身家保奏則即令開濬

實錄卷百五十二

三

之御史吳甫生亦以此事條奏所言甚是可將其疏并發九卿詳詢前此督濬者復稽考諸冊籍然後確議以聞○又諭曰爾等移文奉差管理茶馬官所易之馬預備三千匹可遣理藩院戶兵二部賢能司官各一員前往於來年四月青草甫長之時取道塞外解送京師○諭兵部右翼前鋒統領碩鼐與著解前鋒統領任仍以鑲藍旗都統供職左翼前鋒統領索柱巴圖魯病久著解任鑲紅旗漢軍副都統法豹不能管轄著解副都統任以護軍統領行走○以正紅旗護軍統領蘇丹為右翼前鋒統領原任右衛護軍統領瓦爾達為正紅旗護軍統領正白旗蒙古都統圖席希兼管左翼前鋒

統領事。○丙戌諭大學士等朕君臨天下無分內外視同一體夙夜勤勞政事凡有益於民者務求必濟至於絕域荒陬之蒙古等無不撫育使各安其業咸遂其生近者巡幸所經放漢奈曼阿祿爾沁扎魯特等處見其水草甚佳為孳生蕃息之地而蒙古等漸至窘迫者由其牲畜被盜不敢夜牧故耳朕察知其情竄著原任郎中李學聖往翁牛特員外郎喇都渾往策妄扎卜主事奢冷往敦多布多爾吉等處以教育之此三處盜賊屏息漸得生理以此觀之其他處蒙古亦應照此例差才能之人教養一二年則蒙古得遂其生矣如其不然雖賞賜頻仍而蒙古不善營生有何裨益況蒙古王等各私其所屬諸凡問罪盡不得其當必遣內地官員教導一切事務始得就理爾等將朕此諭曉示八旗宗室覺羅滿洲蒙古漢軍內或見任官或草職之人或平人有願往教養蒙古者著伊等往彼教育消弭盜賊若遇彼處盜案即與該旗王等會同審理使伊等住一二年即便撤回誠能副朕諭旨効力勤謹朕當加不次之恩爾等即遵諭行○吏部議覆湖廣道御史李登瀛疏言直隸山東河南山西江南浙江江西陝西湖北等處舉人會試五科不中者方許揀選又需次數年始得補用請酌減科分揀選使得及時効力應如所請直隸等九省舉人會試三科不中者准其揀選知縣一科不中改

實錄卷百九十一

四

實錄卷百九十一

五

就教職者以州學正縣教諭補用從之○都察院等衙門會

議宣化總兵官白斌於惡棍周尚庫等爭奪煤窑率眾執械

傷人一衆並不發官兵擒拿有玷職守應革職從之○庚寅

冬至祀

天於

園丘

上親詣行禮○遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○停止次日朝賀○辛卯陞山西鴈平道李基和

為山東按察使司按察使○刑部等衙門議奏貴州巡撫王

燕疏報叛賊范文明吳旦先等侵犯湖廣靖州為官兵擊敗

范文明逃至貴州被獲合擬斬立決其黃明等俱匿廣西老

黃山產崗西山司及湖廣靖州等處應令該督撫會同廣西

湖廣督撫提鎮將黃明等嚴拏務獲以靖根株得旨此侵犯

靖州叛賊一案著郎中剛五達宋超前往將各處俘獲賊犯  
提集一處審擬具奏○壬辰議政大臣等議奏左都御史哈  
雅爾圖審理翁牛特貝勒厄爾德布鄂齊爾等隱匿盜馬賊  
犯一案所擬罪輕應將哈雅爾圖革職交刑部

上曰朕將此事交哈雅爾圖時曾面諭必正法凡蒙古等應養  
者固當撫恤應罪者亦必重懲哈雅爾圖將貝勒厄爾德布  
鄂齊爾僅擬罰俸一年殊屬不合且所審之事亦未明晰命  
部統覺羅書恕領侍衛內大臣阿席坦將哈雅爾圖著為章  
京偕往覆審具奏○諭大學士等盛京工部侍郎蘇赫納矯  
飾容貌倨傲自大持論顛倒著撤回於學士任試令辦事京

實錄卷五十五

口左翼副都統邵鳳翔衰邁已極著解任○又諭曰朕觀部  
院官員自論俸補授以來久未察劾以致年齒衰邁才力不  
及者甚多可令各部院衙門察其年老才劣并行走乖亂者  
叅奏將所叅之人引見○陞盛京禮部理事官白爾克為盛  
京工部侍郎○以刑部尚書張鵬翮為江南江西總督○陞  
叅領蔡毓茂為京口左翼副都統○癸巳宗人府奏盛京將  
軍公綽克托不行訓練軍旅應革去輔國公不准承襲并收  
其所屬佐領得旨綽克托任盛京將軍不訓練行伍以致軍  
旅廢壞情屬可惡著革公爵幽禁但照議不准承襲則英王  
一支絕矣此公爵著其子普照襲封○吏部議覆雲南道御

史馬希爵疏言州縣交代遲延逾限者甚多皆由知府司道  
等官之處分不過罰俸是以任意遲延及申報上司詳文又  
不明言因何遲延之故請嗣後州縣交代遲延由知府司道  
申報者務必詳明遲延之故或虧庫銀或缺倉糧不得隱匿  
如有徇庇者從重處分該督撫一并議處應如所請州縣官  
員交代於兩月定限之外如再遲延該督撫務將因何遲延  
之故逐一詳察明確據實題叅如止以遲延題叅不查明遲  
延之故將申詳之司道府等官俱照徇庇例各降三級調用  
督撫照含糊具題例降一級留任從之○甲午大學士伊桑  
阿阿蘭泰奏曰臣等年老凡請旨事件每有遺忘伏祈

實錄卷五十六

皇上別簡大學士共理政務  
上曰大學士最為重任必平坦雍和辦事敬慎者方為稱職至  
於記事學士可分任之爾二人著照舊供職○諭大學士等  
鑲藍旗漢軍副都統高登科人甚劣著革職○轉禮部右侍  
郎楊舒為左侍郎調刑部右侍郎戴都里為禮部右侍郎陞  
內閣學士辛寶為刑部右侍郎○陞山東膠州副將王應虎  
為浙江平陽總兵官○乙未諭大學士等福建巡撫宮夢仁  
安徽巡撫陳汝器居官俱劣著解任○諭戶部淮安揚州鳳  
陽等處近年水患頻仍漫漫隄岸田多淹沒耕種無從百姓  
艱於粒食朕時加軫恤屢賑屢蠲被災地方賴以安堵但念

久歉之餘恐致資生匱乏朕廑殷切未嘗稍釋於懷前此雖頻敷賑澤至再至三用裨羣黎生計猶恐開春東作農事艱難若不大沛恩施安能令小民各得其所著將海州山陽安東鹽城高郵泰州江都興化寶應壽州泗州亳州鳳陽臨淮懷遠五河虹縣蒙城盱眙靈璧等州縣並被災各衛所康熙三十八年一切地丁銀米等項及漕糧盡行蠲免務使民間均沾實惠以副朕體恤元元生息愛養至意嗣部即遵諭行○陞直隸三屯營副將尚宣為宣化總兵官○丙申調工部尚書李振裕為刑部尚書陞工部右侍郎熊一瀟為工部尚書○理藩院題張嘉胡土克圖納木扎爾格隆等違旨叩

實錄卷一百九十一

八

見第巴俱應擬絞得旨張嘉胡土克圖著從寬免絞革其胡土克圖之號納木扎爾格隆亦從寬免絞充發盛京○丁酉諭大學士等今時際隆冬正當水涸而董安國乃奏水長朕觀其所奏諸事皆於河道水性商協其宜殊不稱職著革任于成龍原任河道總督今河上工程皆其未完之事其下効力之人亦眾此缺著將于成龍補授速召來京陞見詳議河務令其馳驛赴任董安國未完各項錢糧及修築工程皆逐一交明于成龍可傳諭九卿知之又諭曰修治下河必將上流會赴下流宣洩遍加詳悉勘明始可酌定如果應行修治來年仲春舉行亦未遲悞○照修永定河多派京師官員分委

實錄卷一百九十二

九

同時興工庶可速竣又諭曰前諭西寧茶馬五千匹自邊外送三千至京此地需馬不甚緊要送二千足矣聞南省駐防軍士馬匹甚艱其餘三千送至荊州江寧杭州三處各一千給散軍士此馬由內地行值稼穡時必踐踏民田著及時遣部院賢能官赴彼領取起行沿途牧養盡心護送各至所派之處交該將軍○戶部議覆刑部尚書傅拉塔張鵬翮等疏言臣等遵旨查陝西長安等三縣倉米虧空一案原任長安縣知縣謝嵩齡永壽縣知縣萬廷詒經收米麥具見存者與該撫所題之數相符除折米銀十萬六千九百兩存貯布政司庫其各州縣寄貯鄉村寺廟等處米麥應交該督撫嚴催限三個月內運入省城永豐等倉華陰縣知縣董盛祚經收已完米麥亦限三個月內運入省城永豐等倉其未完米石已越七年應交該督撫委道員督催限本年十二月終照數全完如違此限該督撫即將董盛祚革職拏問嚴審治罪應如所奏從之○戊戌以一等精奇尼哈番唐之汾為鑲紅旗漢軍副都統陞叅領耿公忠為鑲藍旗漢軍副都統庚子陞江蘇布政使張志棟為福建巡撫以原任山東巡撫李鈞為安徽巡撫○原任廣西提督今調陝西提督李林盛來京陞見賜孔雀翎加授右都督十二月辛丑朔河道總督于成龍陞辭

上諭之曰聞淮揚河水泛漲清江浦百姓所居之地皆已被水夫洪澤湖實黃河之障洪水强盛力可敵黃則黃水不得灌入運河今淮水勢弱不能制黃全注運河黃水又復灌入且兩河相距甚近清江浦地處其中其一帶地方受泛溢之水勢所必然惟淮水三分入運七分歸黃運道始安復顧大學士等諭曰朕昔年巡視河工曾至大墩隄步行十五里詳加閱看今寰宇昇平海內寧謐惟河工關係運道民生朕數十年來夙夜縈懷留心研究故河道情形熟悉已久總之上流既理則下流自治矣桑額所奏開濬下河一事朕不即允行正是有益於彼桑額固居心平和為人誠實然遇事不免遲

實錄卷五十五

十

鈍易被人欺如此紛繁事務何以責其成功于成龍屢委以事尚克勉効河工事情緊急與于成龍較書內須入各部不得掣肘之語使得相機料理庶不悞事河務浩繁于成龍年已漸老且一身難以兼顧奉天府尹徐廷璽曾任河工尚諳練著即令前往協理河務又諭曰河務緊要董安國修築工程繁多恐致與于成龍等彼此推諉可遣部院堂官並率賢能司官前往會同漕運總督桑額將已完未完之工并所用錢糧數目逐一詳明察丈細造清冊齎來尋命戶部尚書馬齊督捕侍郎喻成龍工部侍郎常綬前往以工部左侍郎提督順天學政李光地為直隸巡撫○壬寅以原任工部

右侍郎李耒補原官○癸卯以原任奉天府尹王國安補原官○議政大臣等議奏盛京烏喇等處官兵不知法度不諳軍令皆由協領等員不能約束之故嗣後烏喇等處自協領以下驍騎校以上官員缺出俱於在京八旗內揀選才能者補授從之○甲辰雲南貴州總督王繼文來京陛見

上諭大學士等曰督撫乃封疆大臣陛見之時應將有司賢否小民疾苦詳明陳奏以裨治理夫民之苦樂皆係於官之賢否官賢則民安否則民之困苦無所底止矣是以考察官吏以獎勵廉潔為要今雲南貴州總督王繼文入覲並不陳奏及此如廣西提督李林盛居官甚優前者陛見所奏絕無隱諱問及廣西武弁賢否皆從公敷陳其言朕皆書而誌之矣○乙巳

實錄卷五十五

十一

上御太和殿視朝文武陞轉各官謝恩○丙午命裁詹事府滿洲少詹事一員諭德一員中允二員贊善二員正字二員錄事二員○戶部議覆山西巡撫倭倫疏言大同府屬地丁糧米原徵折色自康熙三十三年因駐防右衛官兵應支一半本色將糧米改徵本色查蔚州靈邱廣靈廣昌四州縣距右衛四五百餘里俱在萬山之中嶺高路狹運糧甚難請將蔚州等四州縣糧米仍改徵折色應如所請從之○丁未諭大學士等曰運河一帶惟黃水清水交匯之處甚屬緊要此處



得宜則他處易治。前日子成龍亦謂大墩地方緊要。此處修築堅固。始可無慮。此言極是。夫河務深微。不訪土著之人。不可而全聽其言。亦不可如向日天妃閘以板阻水。啟板行船。須五六十人。撙挽方得過。閘今已平緩。船隻不需撙挽。坦然而行。以此觀之。乃時候之不同也。○轉工部右侍郎李耕為左侍郎。陞內閣學士顧藻為工部右侍郎。○陞陝西西寧道劉殿衡為江蘇布政使司布政使。免浙江歸安等四縣本年分旱災額賦有差。戊申。以左春坊左諭德楊大鶴提督順天學政。○添設保定府理事通判一員。從陞任直隸巡撫于成龍請也。○以故湖廣椒山安撫使劉元敏子劉躍龍襲

實錄卷一百九十一

上

職。○己酉。鑲藍旗滿洲副都統科爾代以老病乞休。允之。○庚戌。諭宗人府。近日朕傳集諸王及閒散宗室於景山校射。者將以勸懲賢否也。及試。以射善射者頗多。朕心甚悅。具有品秩之宗室。俱為王府護衛官職。有遷轉之階。惟閒散宗室。雖有幹濟之才。亦無路上進。兆姓中凡有材者。尚選擇錄用。而朕宗室中之有才幹者。不獲登用。良可惜也。爾衙門將宗室中材幹壯健長於騎射者。詳查奏聞。朕將授為關廷侍衛。職官視其効力。若材力果優。勤於供職。即授以副都統參領。職任安於庸劣者。方罷斥之家。貧無力者。一并查奏。朕將籌其生計。○諭大學士等。緣事婦人拘喚至部院衙門。對簿鞫

問。於理未協。朕因此故。曾屢次頒發諭旨。今見因事牽連之婦人。仍有拘至公庭質訊者。嗣後除親身犯罪外。無論官員民人之妻。有事屬牽連。應行質訊之處。可遣司官筆帖式往其家問取口詞。其拘至公庭永行停止。○辛亥。理藩院奏蒙古賓客供給應行裁減。

上諭大學士等曰。滿丕意見庸劣所議殊屬不合。凡扎薩克皆有額設都統副都統等官。其諸王則有長史護衛典儀及各項雜職。非謂按其品秩。賜以食物為妄費也。伊等供給豈可概議裁汰。所宜核查者。實授職官之外。又妄開寨桑頭目及部下數百人。指名冒取供給。議裁蓋謂此耳。觀其所議。必理

實錄卷一百九十一

上

藩院官員通同蒙古捏造虛名瓜分肥己。是以不願朕之研究。此等情事朕洞知之。伊等不即改前非。竟議裁減。俟蒙古叩關之時。仍復欲准行耳。至喀爾喀前者未附我朝。故私設有寨桑頭目之名。今俱來降。已設扎薩克。授以護衛職官。又安得有寨桑之稱乎。若按其見授秩銜。賜之食物。彼亦知中國官爵之尊。願効力而服官矣。滿丕為人朕素知之。其材力雖有可取。品行則甚不端也。爾等其召而責之。○理藩院又奏。四十九旗哨兵安置各旗。凡地善巴王等請將伊等移居瀚海之外。

上諭大學士等曰。喀爾喀游牧之地。自色冷額以內為佳。察罕

腦兒者止一線之地。朕意欲東自戶輪貝爾鄂嫩巴爾濟北至色冷額河自色冷額至西陲南界伊克敖拉翁金粘倫百爾齊爾古爾班塔米爾自齊老圖之北至色冷額應指定疆界。今雖無兵戎之事而安設片埃於喀爾喀所居之地甚屬緊要。必須措置妥貼。可傳諭議政大臣。○命添設光祿寺大官署等四署滿署丞各一員。○吏部等衙門議覆四川巡撫于養志等疏言東川土府應改為東川軍民府。設知府一員。經歷一員。屬永寧道。設遊擊一員。守備一員。千總二員。把總四員。屬永寧協。其駐防兵丁一千。於雲南貴州四川三省就近東川地方兵內抽調。應如所請。從之。○以土默特故固山

實錄卷五十五

古

貝子拉斯扎卜子頒弟襲爵。○癸丑。陞大理寺少卿胡會恩為內閣學士兼禮部侍郎。○免湖廣鍾祥等七州縣本年分旱災額賦有差。○甲寅。戶部尚書馬齊等往查河工。請訓旨。上諭之曰。河防之事。甚屬緊要。關係民生之休戚。田廬之存沒。當不時巡視。稍有可慮。即行修補。乃不致大壞淹沒田廬也。董安國親勘之日甚少。以致河道潰壞。爾等前往核視。河工已修者。幾處未修者。幾處。但從公勸明。則于成龍董安國交代甚易矣。吏部議覆都察院左僉都御史王紳疏言。廣西省南寧等四府道員以下。教授以上官員。該督撫例將熟悉風土廉員保題補調。自巡撫王起元到任以後。從未將一人

題陞一人題參。應行令該撫查明具題再議。得旨。此事情著王起元明白回奏。○雲南貴州總督王繼文以老病乞休。允之。乙卯。以內閣學士布泰充經筵講官。丙辰。湖廣道御史朱廷鑑條奏。服滿候補人員內有特簡者。有卓異者。應不論班次。即行錄用。

上諭大學士等曰。覽朱廷鑑所奏。未必無故。但所言之事。有當於理。夫治國家者。以人才為要。朕親簡之官。如丁憂服滿起補。與降級及一概丁憂者。校年補授。何時得錄用乎。凡條奏合宜。即為准行。其間有私與否。朕不問也。○京口將軍董元卿以病乞休。允之。○丁巳。原任內閣學士黃茂等前往教養

實錄卷五十五

土

蒙古請訓旨。

上諭之曰。蒙古之性。懶惰。田土播種後。即各處游牧。穀雖熟。不事刈穫。時至霜降。穗落。亦不收斂。反謂歲歉。又因盜賊眾多。將馬畜皆置之近側。夜則圍之。宿處以致馬畜瘦斃。生計窘乏。且蒙古王貝勒貝子。公等俱各承襲父爵。年在童穉。率皆不能教養。所屬安輯民人。兼之族類性貪。見所屬有馬牛刀帶諸物。亦必索取。遂至困苦。難存四散。餬口不能禁止。亦不能收集。是以人皆窮乏。爾等至彼。查明實無生計者。賑給之。至於勸善懲惡。尤為要務。應會同蒙古王扎薩克等。嚴禁盜賊。如竿獲係兩旗下者。爾等即會同取供情實。立刻正法。示

懲。又必加意鞫訊。勿得枉殺無辜。蒙古地方多旱少雨。宜教之引河水灌田。朕巡幸所至。見張家口保安古北口及寧夏等地方。皆鑿溝洫引水入田。水旱無虞。朕於寧夏等地方。取能引水者數人。遣至爾所。朕適北巡。見教漢奈曼等處田地。甚佳。百穀可種。如種穀多。獲則興安等處。不能耕之人。就近貿易販糴。均有裨益。不須入邊買內地糧米。而米價不致騰貴也。且蒙古地方。既已耕種。不可牧馬。非數十年草不復茂。爾等酌量耕種。其草佳者。應多留之。蒙古牲口。惟賴牧地而已。且教漢奈曼等處。地方多魚。伊等捕魚為食。兼以貨賣。儘足度日。此故宜知之。凡有利益。朕不時指示。爾等當盡心勉

實錄卷百五

六

勵。以副朕意。其王員勒等。爾等宜與和好。凡事相商而行。有訓誨之處。須服其心。馴致協睦。蒙古性情。怠玩。愚蠢者固多。然亦樸直。但董理教導得宜。此輩亦易從也。戊午。諭大學士等。興起教化。鼓舞品行。必以孝道為先。節婦應加旌表。孝子尤宜褒獎。八旗豈無孝子。其居官殷實者。行孝乃分內事耳。貧人克盡孝道。誠為非易。如有身處貧寒。能盡孝於父母者。察明奏聞。○陞光祿寺卿高裔為太常寺卿。○己未。都察院左副都御史吳涵疏言。編修檢討等員。陞轉壅滯。請酌復舊章。編修檢討。照李濟注輯之例外。補一二人。少詹事侍讀學士侍講學士等官。照王士正徐潮顧藻。主九齡等之例。以

京堂各衙門調補一二人。

上諭大學士等曰。覽吳涵奏。翰林官壅滯所奏。極是。翰林官員。係進士內選拔者。教習三年。又行考試。擇其善者。始留衙門。不但伊等應陞缺少。以致壅滯。即滿洲漢軍翰林官。亦皆壅滯。其應陞缺少。俱與筆帖式較俸陞補。是以伊等陞轉甚遲。近見滿洲漢軍翰林所學。皆好。亦不減漢人。此奏朕已知之。不必令部議也。○理藩院奏。扎魯特輔國公根都西布布病故。應將其子多內襲爵。

實錄卷百五

七

伊子著傳其襲封。朕此番巡幸塞外。見科爾沁貝子吳勒木濟公格勒爾。為人庸劣。不能御下。其屬饑饉流離。亦不能收養。俱著革退。○陞陝西巡撫巴錫為雲南貴州總督。以戶部右侍郎貝和諾為陝西巡撫。以禮部郎中于漢翔為山西按察使。司僉事提調學政。○陞京口右翼副都統馬自德為京口將軍。○戶部議覆陞任直隸巡撫于成龍疏。言。截留漕米七千石。支給滄州駐防官兵。查此兵米。向係給銀採買。應將該撫所題。截留漕米之處。毋庸議。得旨。這滄州截留漕米。著照于成龍所奏行。○調鑲紅旗蒙古副都統車納輔為鑲藍旗滿洲副都統。陞護軍參領車克楚為鑲紅旗蒙古副都

統。庚申。以鑲黃旗滿洲副都統魯伯赫為戶部右侍郎仍

管副都統事。陞右通政江繁為光祿寺卿。草通政使司

通政使達爾漢職以前任淮安關監督虧空稅銀故也。移

江南鳳陽關駐臨淮縣從監督包住請也。旌表山東烈婦

喬加儼妻王氏拒姦被戮給銀建坊如例。辛酉。

上幸南苑行圍。乙丑。

孝莊文皇后忌辰遣官祭

暫安奉殿。丙寅。

上自南苑回宮。刑部尚書傅臘塔刑部尚書授江南江西總

督張鵬翮自陝西回京以所審籽粒事覆奏下戶部議。已

巳歲暮禘祭

太廟。

上親詣行禮。遣官祭

永陵。

福陵。

昭陵。

暫安奉殿

孝陵。

仁孝皇后

孝昭皇后

孝懿皇后陵。遣官祭太歲之神。庚午。賜朝正外藩烏朱穆

秦色林鄂爾多斯阿霸哈納萬齊忒阿霸垓毛明安蘇尼特

喀喇沁吳喇忒厄魯特喀爾喀郭爾羅斯扎魯特土默特克

西克騰科爾沁奈曼教漢翁牛特四子部落阿祿科爾沁歸

化城喀密諸王貝勒貝子公台吉等及內大臣大學士上三

旗都統副都統侍衛等宴。旌表八旗節婦滿洲穆塞妻馬

加氏等六十六人蒙古沙齊妻麻氏等十一人。漢軍方堅妻

王氏等三人直隸各省節婦妻王德妻楊氏等二十三人。貝

女羅學德聘妻蘇氏等二人各給銀建坊如例。是歲入丁

戶口二千四十一萬六千九百九十三。田地。山。蕩。畦。地。五百九十

八萬六千七百七十五頃三十四畝有奇。徵銀二千七百三

十九萬八千五百三十八兩有奇。米。豆。麥。六百九十六萬八

千四百七十二石有奇。草。二百八萬一千六百五十三束。茶

十五萬七千四百五十三引。行鹽四百三十一萬九千三百

八十引。徵課銀二百六十九萬五百八十二兩有奇。鑄錢二

萬三千八百六萬五千四百有奇。

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百九十二

康熙三十八年己卯春正月辛未朔

上詣

堂子行禮還宮拜神畢率諸王貝勒貝子公內大臣大學士侍  
衛等詣

皇太后宮行禮御殿王以下文武各官外藩王及使臣等上表  
朝賀停止筵宴○朝鮮國王李焞遣陪臣李彥綱等表賀冬  
至元旦

萬壽節及進歲貢禮物宴賚如例○癸酉

上奉

皇太后幸暢春園○甲戌

上詣

皇太后宮問安○順天府進春 丁丑

世祖章皇帝忌辰遣官祭

孝陵○戊寅

上自暢春園回宮 己卯孟春享

太廟遣領侍衛內大臣索額圖行禮 遣官祭太歲之神 辛  
巳祈穀於

上帝

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百九十一

上親詣行禮○壬午

上幸暢春園詣

皇太后宮問安○甲申以上元節賜外藩喀爾喀烏朱穆泰巴林鄂爾多斯嵩齊忒阿霸垓蘇尼特毛明安阿霸哈納喀喇沁吳喇忒厄魯特鄂爾羅斯扎魯特土默特克西克騰科爾沁索曼敦漢翁牛特四子部落阿祿科爾沁扎賴特哈魯王貝勒貝子公台吉等及內大臣大學士侍衛等宴○乙酉上元節賜外藩王貝勒貝子公台吉等及內大臣大學士侍衛等宴○庚寅

上奉

皇太后自暢春園回宮○辛卯諭吏部戶部兵部工部朕撫馭寰區又安中外孜孜圖治宵旰勤民期於天下咸遂生成物無不得其所今邊烽永靖西方無事獨是黃淮為患衝決時聞下河地方由廬漂沒朕軫念民艱屢遣大臣督修不惜數百萬帑金務期早綏黎庶乃歷年已久迄無成功今水勢仍復橫溢浸漫城閭沉沒隴畝以致民多失業董其役者未有上策可以宜民時屢朕懷未嘗少釋在內諸臣咸請朕親臨指示為一勞永逸之圖方今春時雨水減少正宜講求疏濬以遂安瀾爰諭吉南巡親加勘閱更以吳地襟帶江湖乃東南奧壤屬俗省耕兼行臨視凡一切往返供億已皆俾

辦於京師即途次日用所需亦令各衙門照本地時值採買

總於民間一無所累仍恐沿途官吏藉名科派致累閭閻故特頒諭嚴行申飭如有悖旨假託派索者察實即以軍法從事該地方大小文武官員不許與扈從官員藉稱親舊擅相飽遺違者與受人員並以軍法從事其扈從大小官員隨行僕從人等如有橫行生事者一并從重治罪凡經過地方百姓各安生業皆如常時務令無廢市廛不輟耕毋得惶遽引避其軍民人等懷挾私怨受人指使擅於駐蹕處所輒行告訐者一概嚴禁不准仍照衝突儀仗例嚴加治罪爾部即傳諭扈從大小官員人等并行各該督撫於各府州縣城市

鄉村通張告示儆行曉諭務令億兆通知以副朕體恤惠愛至意特諭○賜朝正外藩王貝勒貝子公台吉等銀幣鞍馬有差○壬辰

上詣

皇太后宮問安○多羅順承郡王寵寶薨逝以其親兄布穆巴襲爵○調鑲紅旗漢軍副都統趙珣為京口右翼副都統○癸巳以輔國將軍伽藍保為正白旗漢軍副都統理藩院題請差大臣往鄂爾多斯會盟得旨著尚書班迪去○甲午陞盛京兵部理事官李沙為通政使司通政使○乙未上御太和殿視朝文武陞轉各官謝恩○以故三等精奇尼哈



番張化國子張振興襲職。○吏部議覆湖廣道御史朱廷鉉疏言道府以下州縣以上丁憂起復官員內有特用卓異者請於單月內不入候補班次遇缺即用應如所請得旨所奏甚是選法原分單雙月今單月缺出依議選補非其應選月分若遇有缺將伊等原任何地并履歷開明摺子附於本內引見視其入地相宜補用。○丁酉諭大學士等武職官員掣籤後即准赴任雖有庸劣之員該管官多瞻徇情面苟且姑容嗣後武職掣籤官員著即引見其庸劣者當罷斥之。○喀爾喀土謝圖汗察罕故遣官致祭加賜銀一百兩。○戊戌以故三等公喇爾泰兄阿爾泰襲爵。○正藍旗漢軍副都統喻維邦以老病乞休允之。○刑部題鑲白旗蒙古副都統恩額參將本族革職不准叙用之敦卓克保舉佐領引見擬革職鞭一百不准折贖得旨恩額參著革職從寬免責。○己亥

上詣

皇太后宮問安。○庚子調正藍旗滿洲副都統禪穆布為右衛

左翼副都統

二月辛丑朔工部尚書熊一瀟以病乞休允之。○以浙江提督侯馬三奇為京口將軍陞江西南贛總兵官趙弘燦為浙江提督。壬寅諭大學士等詹事府詹事尹泰不到衙門故其屬官任意懈弛不知禮節著以原品解任仍令纂修書籍

○陞護軍參領瓜爾察為鑲白旗蒙古副都統調正白旗蒙古副都統瓦珥達為正藍旗滿洲副都統正白旗漢軍副都統伽藍保為蒙古副都統。癸卯

上南巡閱視河工奉

皇太后啟行命皇長子多羅直郡王允禔皇三子多羅誠郡王允祉皇五子多羅貝勒允祺皇七子多羅貝勒允祐皇八子多羅貝勒允禩皇十三子允祥皇十四子允禵隨駕自大通橋登舟是日

御舟泊近嶺地方。○甲辰

御舟泊新河長樂營。○予故原任吏部尚書科爾坤祭葬如例。

實錄卷九十二

五

○乙巳。

御舟泊河西務三里屯。○直隸巡撫李光地天津總兵官潘育龍原任山東巡撫李燁等來朝。○丙午

御船泊漢溝。○陞國子監祭酒特默德為詹事府詹事。丁未

遣大學士李天馥祭

先師孔子。○

御舟泊楊柳青地方。○扈從大臣等會議南多爾濟等奏請

禁止第巴遣人貿易應如所請

上諭曰前扎海保柱等來奏第巴與達賴汗曾會同商議以為今年乃班禪胡土克圖本命之歲不便前去請俟來歲三月



遣之。而阿南達等以為此係推諉之言。欲遣二郎保戶木德同彼前去催令速來。并駁其奏章。朕思阿南達之謀亦失之輕率。即使二郎保等前去能令班禪胡土克圖速來耶。第已以匿其奏章。禁其貿易。藉為口實。彼所屬之人皆賴貿易為生。朕為天下主。何必以班禪胡土克圖之故。泥於小見。禁其貿易。絕其生計乎。第已既稱來歲使班禪胡土克圖前來。且待至三月。如仍不遣來。則曲在彼矣。我朝惟圖理直。凡事豫為斟酌。然後行之。亦不為遲。朕已遣扎海等作速回京傳諭尚書班迪令其移文阿南達等。倘第已有奏章前來。即行轉奏。毋得攔阻。商南多爾濟等並不計此。即請禁止第已貿易之人。殊為未當。爾等准其議亦失之矣。尋班禪胡土克圖以未出痘疹。不敢赴京。奏請鑒恤。從之。諭領侍衛內大臣等朕念切民依。往開河工。凡隨駕官兵執事人員。量供使用。減少攜帶。酌其人數。分給官船。仍恐沿途或有紛擾。爾等再詳議裁減。以副朕愛民至意。戊申祭

大社。

大稷。遣刑部尚書傅臘塔行禮。

御舟泊周家嘴。

上登陸於行宮前。率諸皇子射復命綠旗官兵。射以總兵官滿育龍訓練有方。特賜

御服貂褂。○已酉。

御舟泊青縣流佛寺。庚戌。

御舟泊磚河。○內閣學士徐嘉炎以老病乞休。允之。以一等

侍衛宗室諾羅布為鑲紅旗漢軍副都統。廣西巡撫王起

元疏報生擒茶陵州叛案內賊首黃明。得旨此案已差官察

審。著一并審擬具奏。○辛亥。

孝康章皇后忌辰。遣官祭

孝陵。

御舟泊東光縣夏口。○壬子。

御舟泊桑園。○諭直隸巡撫李光地等漳河與滹沱河故道原

各自入海。今兩水合流。所以其勢氾濫。爾等往視。如漳河故

道可尋。即可開通。引入運河。如慮運河難容。即於運道之東

別挑一河。使之赴海。其可否脩浚情形。爾等閱後再奏。行

聖公孔毓圻。山東巡撫王國昌。總兵官楊鈞等來朝。○癸丑。

御舟泊洛坡屯。○甲寅。

御舟泊鄭家口。○免福建臺灣鳳山諸羅三縣康熙三十七年

分水災額賦有差。○乙卯。

御舟泊石人灣。丙辰。

御舟泊楊家園。漕運總督桑額河道總督于成龍來朝。理藩院題翁牛特貝勒厄爾德布鄂齊爾公奇塔特等。隱匿盜

馬賊犯應照例正法。左都御史哈雅爾圖察審不實。應革職。得旨。尼爾德布鄂齊爾奇塔特俱從寬免死。仍留貝勒公爵。罰俸五年。哈雅爾圖降五級調用。○丁巳

御舟泊臨清第二閘。戊午

御舟泊兩響閘。○原任刑部侍郎任克溥來朝。○陞詹事府詹事顧祖榮為內閣學士兼禮部侍郎。○設貴州清浪衛學教授一員。開州廣順永寧獨山麻哈五州學學正各一員。普安餘慶安化普定平越都勻鎮遠銅仁龍泉永從十縣學訓導各一員。取進文武生員額各八名。○免陝西南鄭等十二州縣康熙三十七年分水災額賦有差。○已未春分朝。

實錄卷百九十二

八

日於東郊。遣吏部尚書庫勒納行禮。

御舟泊東昌府李坡塢。○庚申

御舟泊陽穀縣管家堡。○辛酉

御舟泊張八臘口。○戶部尚書馬齊兵部督捕侍郎喻成龍工部侍郎常綬等勘視河工事竣回奏。臣等查勘漕運總督桑額所奏邵伯鎮南金灣小海場鮑家莊等處地方挑濬引河建造草壩俱屬無益。應無庸議。惟蝦鬚沙溝及興文閘草壩等處開濬於塞稍可洩水。應酌量挑濬。下工部議。尋工部議覆。應如馬齊等所奏。從之。○戶部尚書馬齊等奏請隨駕命前往宿遷縣等候。○諭領侍衛內大臣等朕閱視河工巡

幸南方奉侍

皇太后而來。自此前行俱是順流。並無留滯。或明日晚後日早朕當分行。祇乘所御一舟。減少扈從。晝夜前進。往閱黃河以南高家堰歸仁隄等處。隄防回至清口候。

皇太后船至朕親奉渡河之後。相視下河以北隄防。則日期與程途庶不相悞矣。○予故三等公喇爾泰原任工部侍郎席特納各祭葬如例。○壬戌

御舟泊安居。○癸亥

御舟泊南陽。○甲子。遣官祭

先農之神。○

實錄卷百九十三

九

御舟泊赤山。○乙丑

御舟泊黃林莊。○江南江西總督張鵬翮江蘇巡撫宋學敏安徽巡撫李鈞江南提督張雲翼提督江南學政張榕端等來朝。

○丙寅

孝昭皇后忌辰。遣官祭

陵。○

御舟泊石壩。○丁卯。遣官祭

歷代帝王。○

御舟泊流潦澗。○戊辰

上閱視黃河以南高家堰歸仁隄等工。回至清口奉迎。

皇太后舟泊清河縣開口○諭大學士等原任總河董安國原任河道馮佑將河工散壞本應治罪姑令於運口并陶家莊王家營等處挑濬引河築挑水壩縷隄截隄等工贖罪○已

御舟泊清河縣○陞詹事府少詹事徐秉義為詹事

三月庚午朔

上奉

皇太后舟渡河泊清河口○

上閱視高家堰歸仁隄等工諭大學士等朕留心河務體訪已久此來沿途坐於船外審視黃河之水見河身漸高登隄用

書錄卷五十二

十

水平測量見河較高於田行視清口高家堰則洪澤湖水低黃河水高以致河水逆流入湖湖水無從出之溢於興化鹽城等七州縣此災所由生也治河上策惟以深濬河身為要諸臣並無言及此者誠能深濬河底則洪澤湖水直達黃河七州縣無泛濫之患民間田產自然涸出不治其源徒治下流終無益也今朕親閱下河通海之口及射陽湖一帶填淤之處于成龍所帶効力人員甚多可作速分委并力開濬蓄積之水倘能稍淺庶幾有益至於黃淮二河交會之日過於徑直所以黃水常逆流而入今宜將黃河南岸近淮之隄更迤東長二三里築令堅固淮水近河之隄亦迤東灣曲拓築

書錄卷五十二

十一

使之斜行會流則黃河之水不至倒灌入淮矣再河流不迅急無以刷去河底之沙朕詳加諮訪河直則溜自急溜急則沙自刷而河自深宜於清口西數曲灣處試行濬直如直濬有礙漸將上流曲處歲加直濬庶幾黃河之險自除而河底漸深洪澤湖之水漸出七州縣之水患可漸息矣清口應修之處著于成龍等繪圖呈覽○諭漕運總督桑額河道總督于成龍協理河務徐廷璽等朕念河道國計民生攸關親行巡幸由運河一帶以至徐州迤南細加看閱見黃河底高灣多以致各處受險至歸仁隄高家堰運口等處見各隄岸愈高而水愈大此非水大之故皆因黃河淤墊甚高以致節年漫溢若治河僅築隄防不將黃河刷深終屬無益且運口太直黃河倒灌兼之湖口淤墊以致清水不能暢流各河與洪澤湖之水如何能敵黃水若將清河至惠濟祠埭灣由北岸挑引從惠濟祠後入河而運河再向東斜流入惠濟祠交匯黃水自然不倒灌朕欲將黃河各險工頂溜灣處開直使水直行刷沙若黃河刷深一尺則各河之水淺一尺深一丈則各河之水淺一丈如此刷去則水由地中而行各壩亦可不用不但運河無漫溢之虞而下河淹沒之患似可永除矣且攔黃壩灣曲馬家港窄狹雖將時家馬頭之口堵築而淮水不能暢流山陽南岸韓家莊等處險工甚屬可虞今應將清

口之西壩臺挑水壩。比東壩臺加長包裹清口在內。擇洪澤湖水深之處開直成河使湖水流。出黃河灣曲之處直挑引河使各險處不得受衝。其攔黃壩應行拆毀。時家馬頭決口俟黃水流定汰黃隄築成之日再行堵塞。至歸仁隄之建專為毛城鋪等處水漲衝決。於此攔回仍歸黃河之意。此隄亦應酌量修築。爾等係河臣。河務是爾等專責。務必將各州縣水災盡除。方不負朕南巡救民之至意。若挑挖引河原有工程。仍照舊令各官作速修防。不可怠忽。下河見有積水不可不引出歸海。俟引河工竣黃水歸入故道後再將下河串場河射陽湖蝦鬚沙溝一帶挑通引積水流。出歸海。庶河道永無衝決之患矣。○辛未。

實錄卷九十二

十一

上御小舟閱視爛泥淺等處。○諭戶部朕君臨天下期於黎民樂業各獲其所。凡興利除害之事靡不舉行。蠲免賑濟之恩靡不下逮。比年以來因淮揚所屬地方疊罹水患業已歲蠲額賦賑恤頻施。又動支數百萬帑金責令在河諸臣於應挑應築之處酌量修理。欲使泛濫之水滙歸入海被淹之田廬涸出庶底幹寧。乃糜費錢糧卒不能使積淹有歸。田廬未涸民生未遂。朕聞之惻然。軫懷值茲四海無事之時欲將一切修舉事宜詳閱指示。用是躬親臨幸沿途審視黃河水勢咨訪地方父老。比至歸仁隄高家堰量度地形高下應挑應築

一一明示河臣。惟是被淹地方米價騰涌生計維艱。朕目擊民依深用廛念。著將漕糧截留十萬石於高郵。實應興化泰州鹽城山陽江都受災七州縣各留一萬石。悉較時價減值發糶。餘米三萬石著於邳州留八千石。宿遷桃源清河安東四縣各留五千五百石。亦較時價減糶。此各州縣發糶之米著就近交與漕運總督河道總督邳州著遣司官一員前往監視。再截留米十萬石於揚州淮安各收貯五萬石。此應留漕糧不論何處米石著就近截留。爾部即遵諭行。○壬申。上閱視黃河隄岸駐蹕淮安府。○諭河道總督于成龍曰王公隄甚屬險要須加幫高寬修築堅固。○癸酉。

實錄卷九十三

十二

上奉  
皇太后登舟。○甲戌清明節遣官祭  
永陵。  
福陵。  
昭陵。  
暫安奉殿。  
孝陵。  
仁孝皇后。  
孝昭皇后。  
孝懿皇后陵。○

御舟泊界首○乙亥。

御舟泊高郵州○諭河道總督于成龍朕昨駐蹕界首用水平測量河水比湖水高四尺八寸湖水似不能越此隄而入運河但當湖石隄被水汕壞工程甚屬緊要著差賢能官員作速查驗修築○丙子。

上駐蹕揚州府○諭河道總督于成龍朕在清水潭九里地方用水平測量河水高湖水二尺三寸九分此一帶當湖之石隄甚為緊要。可速行修造。至高郵州地方見河水向湖內流。河水似高一尺有餘。趁黃河水未深之時急宜修理○丁丑。在籍守制大學士張玉書工部左侍郎李耕來朝○戊寅。

御舟泊江天寺○已卯。陝西西寧總兵官阿蘭台以病乞休允之○庚辰。

御舟泊新豐○諭領侍衛內大臣等此地麥田茂盛朕心深喜。此來原為民生。凡駐蹕處勿使踐踏田畝。至於隨駕兵丁已足守衛。此處之兵盡著發回。其將軍副都統及各官員等既係該管地方。著乘舟隨行。可徧行曉諭。凡有踐踏麥禾者。察出決不輕貸○諭河道總督于成龍朕自淮南一路詳閱河道。測算高郵以上河水比湖水高四尺八寸。自高郵至邵伯。河水湖水始見平等。應將高郵以上當湖隄岸高郵以下河之東隄俱修築堅固。有月隄處照舊存留。有應修隄岸。仍照

舊隄堅築。至於邵伯地方。因無當湖隄岸。河湖合而為一。不必修築隄岸。聽其流行。高郵東岸之滾水壩涵洞俱不必用。將湖水河水俱由芒稻河入守河。引出歸江入江之河口。如有淺處。責令挑深。如此修治。則湖水河水俱歸大江。各河之水既不歸下河。下河自可不必挑濬矣○辛巳。

御舟泊常州府○壬午。

御舟泊無錫縣○諭吏部朕以勤求民隱。閱視河工。特行巡省。一切供御之費。皆自內庭儲備。不取用於有司。而經過山東。江南。地方。各官備辦夫船等項。効力殊屬勤勞。此等官員有因公誣誤。罰俸。住俸。降俸。降級。革職。留任者。著察明。悉從寬

免。爾部即遵諭行○諭戶部。東南為財賦重地。朕時加軫念。頻歲以來。雖在邊塞用兵之際。未嘗不早夜殷殷。曉懷寬恤。茲以中外昇平。特事巡省。並閱河工。比至江南。親察民間。饒瘠之狀。見淮南北地方。疊罹水患。深用惻然。已經屢蠲。屢賑。仍命截留漕糧。減價平糶。其各州縣。雖市肆安輯。耕鑿恬熙。而額賦浩繁。民生拮据。歷年通負。計算日增。江蘇安徽所屬。舊欠帶徵錢糧。幾及百萬。念小民方供新稅。復急舊通。物力維艱。勢難兼辦。應沛特恩。豁免舊欠。除康熙三十三年恩詔內已經赦免外。其康熙三十四五六年。奏銷未完。民欠一應地丁錢糧。米豆麥雜稅。爾部行文該督撫。察明俱著免徵。務

飭有司悉心奉行俾窮簷部屋均沾實惠如有已徵在官說稱民欠希圖侵蝕肥己者一經發覺定從重治罪凡厥官吏軍民宜咸知朕意爾部即遵諭行○諭刑部朕愛養民生慎重刑獄凡有奏讞時示矜全茲鑒與南巡見沿途老稚男婦環跪歡迎朕甚嘉悅念此編氓皆吾赤子原期生聚教訓共底善良其或陷於刑章致因囹圄改過無路惻然傷之所經過山東江南兩省見在監禁人犯除十惡死罪及詔款不赦等罪並官吏犯贓不宥外其餘自康熙三十八年三月十五日以前死罪以下已結未結俱著寬釋此朕巡幸所至欲使並生之至意可通行曉諭令咸悉朕懷爾部即遵諭行○癸未

實錄卷百二十二

十六

御舟至蘇州閩郡紳士軍民跪迎

聖駕是日

上駐蹕蘇州府○甲申福建浙江總督郭世隆浙江巡撫張勛提督浙江學政張希良福建提督王萬祥溫州總兵官李華原任吏部侍郎彭孫適等來朝○諭大學士等朕巡閱河道將高郵州之湖與河水比量河水高四尺餘夫湖水既低四尺有餘縱水長一丈亦不至泛越且湖水亦斷不至高長丈許朕意欲暫留毛城鋪高家堰等處減水壩將高郵州以北減水閘壩盡行堵塞築高東岸隄防使在西之水不得泛越

則下河之水歸海而河道湖身皆出其時作何導濬再行定奪至於邵伯以南河湖合流奔江歸海想不至衝決其他處河道朕亦可保無虞獨黃河工程尚難決定相其形勢當緩圖之○戶部題刑部尚書傅臘塔等奏審陝西籽粒一案上諭大學士等曰凡審事者必當審明結案復命豈可疎畧觀傅臘塔等前往陝西察審籽粒一案畏人懷怨草率具覆張鵬翮於此事亦稍罷軟俟回京之後再行請旨○乙酉諭兵部前者京口江寧接駕官兵亦曾扈送朕恐踐損麥田盡行遣還今往浙江塘路甚狹隘可傳諭該管官員不必令官兵扈從○蘇州府屬官兵士民齊集行宮跪留

實錄卷百二十三

十七

聖駕傳諭爾等既再三誠請再留三日於十九日起程 丁亥萬壽節停止慶賀筵宴○遣官祭

福陵

昭陵

暫安奉殿

孝陵

仁孝皇后

孝昭皇后

孝懿皇后陵 遣官祭東嶽真武城隍之神 賜扈從文武大臣官員侍衛護軍等銀幣有差 戊子諭吏部戶部兵部朕



以黃淮衝決為患兼欲周知東南民生風俗特行巡省比親歷險堪詳加相度以疏導修築之法指授河臣刻期興作隨南涉江表徧察民依頃至蘇州府有浙江文武官吏及在籍官員等迎謁於行在言浙民望幸之心至殷且切合詞請懇不啻再三朕俯順輿情揚旌前發以三月十九日啟行自出京師以來一切供御之需皆出儲備其沿途日用令該衙門照各地方時價採辦一無有累於民如有官吏借名科派致擾閭閻者察實以軍法從事地方大小文武官員與扈從官員私相餽遺及扈從大小官員隨從人等有橫行生事者一并以軍法從事凡經過地方百姓各安生業皆如常時務令

宣統元年十一月

九

屋無廢市隴不輟耕毋得違違引避方今正屆農時所過田畝勿令踐踏其軍民人等懷挾私怨受人指使擅於駐蹕處所輒行告訐者一概嚴禁不准仍照衝突儀仗例嚴加治罪爾部即傳諭扈從大小官員人等并行該督撫於各府州縣城市鄉村徧張告示悉行曉諭務令億兆通知以副朕體恤惠愛至意○諭扈從翰林爾等有蘇松人不必隨至浙江可到家省親展墓

御舟泊吳江縣平望 己丑

御舟泊皂林 庚寅

御舟泊謝村 辛卯

御舟至杭州閩郡紳士軍民跪迎聖駕是日

上駐蹕杭州府 諭戶部朕因淮揚地方數被水患躬臨巡省目擊田廬淹沒之苦深加軫恤既截留漕糧以濟民生仍蠲除積欠以紓民困其昨歲淮揚兩屬被災錢糧曾經該督撫具題部議照例減免三分今念百姓餬口維艱安能辦賦應破常格用沛特恩淮安府屬海州山陽安東鹽城揚州府屬高郵泰州江都興化寶應九州縣並淮安大河二衛康熙三十七年未完地丁漕項等銀一十九萬兩有奇米麥十一萬石有奇著全與蠲免爾部行文該督撫即飭各州縣張示曉諭務體朕憫惻羣黎之至意俾窮鄉僻壤均沾實惠如有不肖官吏私徵侵蝕者察出定治重罪 戶部題山西布政使齊世武呈稱革職太原府知府孫毓璘虧空庫銀巡撫倭倫勒令各府知府公派認賠又革職大同府知府鄭淵中虧空庫銀倉米詳請題參巡撫倭倫批駁不允明係徇庇乞部題明遣官察審應行該撫倭倫一一明白回奏從之 癸巳改山西太原府通判為理事通判 甲午賜扈從額駙台吉等及內大臣侍衛護軍等銀幣有差 福建浙江總督郭世隆浙江巡撫張勛等率浙江滿漢文武大小官員紳衿兵民齊集行宮跪留



聖駕傳諭因天氣漸熱原擬明日起程爾等既如此敦請再留一日乙未諭吏部朕頃自江南巡歷浙省沿途供御悉經儲備不以纖毫取辦問問而地方官料理夫船等項一無缺悞殊屬勤勞此等官員有因公誑悞罰俸住俸降俸降級革職留任者著察明悉從寬免爾部即遵諭行○諭戶部朕以省方問俗巡歷三吳比至浙省見沿路農桑雖徧隴畝而地有肥磽時有豐歉歷年正供錢糧因輸納維艱致多通負已准分年帶徵而新舊之賦取給一時悉力作之民終難兼辦應通行蠲豁以弘庥澤除康熙三十三年以前恩詔赦免外其康熙三十四五六年奏銷未完民欠地丁錢糧米豆麥雜

中集卷百十二

二十

稅著一概免徵爾部行文該督撫責令有司悉心奉行務俾均沾實惠如有官吏以完作欠說詞侵蝕者察出定從重治罪爾部即遵諭行○諭刑部朕巡視東南行次浙省因官吏軍民依戀誠懇特留蹕數日以慰囑囑奏請之情獨念獲罪人犯身淹刑獄一千法網無由自新茲乘興經臨惻然矜憫用沛好生之澤聿示格外之仁該省各屬地方有罪犯見在監禁者除十惡死罪及詔款不赦等罪與官吏犯賊不宥外其餘自康熙三十八年三月二十六日以前死罪以下已結未結悉著寬釋可行文該督撫徧傳所屬張示曉諭爾部即遵諭行○福建浙江總督郭世隆浙江巡撫張勛等又率浙

江滿漢文武大小官員齊集行宮跪留

聖駕傳諭爾等如此詳請明日再留一日○丙申

上幸演武場親率諸皇子射

上親射二次發矢皆中又命十五善射硬弓侍衛等射次命官兵分班校馬步射既畢

上復率諸皇子及善射侍衛騎射

上初騎射中的的躍又騎射縱轡近的馬忽左逸

上即調執弓矢左射中的的躍眾環跪云

皇上神武洵天縱也○

上諭大學士等曰朕今觀杭州滿洲漢軍官兵皆善騎射嫺熟

中集卷百十三

二十一

滿話此皆將軍查木揚訓練所致今查木揚已故殊為可惜

大學士伊桑阿等奏曰

皇上今日騎射馬忽斜馳臣等以為不及發矢矣

皇上輒轉弓矢以左手射之且中的眾無不嘆異

上曰朕以馬逸而轉射何足稱奇耶○賜浙江湖州府知府陳

一夔父故溫處道陳丹赤

御書名垂青史匾額諭曰爾父為國殉難朕至今憫之賜此特

表爾父之忠○丁酉浙江滿漢文武大小官員紳衿兵民齊

集行宮跪留

聖駕

上不允。戊戌。

上奉

皇太后回鑾舟泊塘栖。已亥。

御舟泊三塔寺。

實錄卷一百九十二

十一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百九十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百九十三

康熙三十八年己卯夏四月庚子朔享

太廟遣領侍衛內大臣公坡爾盆行禮

上駐蹕蘇州府辛丑諭戶部禮部朕子育黎元勤求治理日

孜孜以施德澤厚民生為急務而江浙二省尤東南要地朕

時切軫念比歲以來蠲豁田賦賑濟凶荒有請必行無災不

恤雖漕項錢糧尚未蠲免者亦曾特旨蠲免愛養之道備極

周詳庶幾民生日益康阜用是乘輿時邁於視河事竣巡歷

江浙咨訪民間情形見淮揚一路既困潦災而他所過州縣

實錄卷一百九十三

一

察其耕穫之盈虛市廛之贏絀視十年以前實為不及此皆由地方有司奉行不善不能使實惠及民所以小民雖懷愛戴之誠而朝廷恩澤卒未下究朕目擊屢懷亟思拯恤截留漕糧寬免積欠另有諭旨惟各鹽差關差向因軍需繁費於正額外令在差官員以所私得贏餘交納充用今思各官孰肯自捐私索必仍行苛取商賈民困職此之由著將加增銀兩一概停罷以紓商民之累其兩淮鹽課康熙十六年曾加增四十萬兩今恐商人辦課維艱有漸致匱乏者著減去二十萬兩此外有應行應革事宜朕還都以後仍加商確次第舉行該督撫藩臬皆地方大吏亦著悉心體訪凡有可為民

興利除害者作速勘實陳奏嚴革雜派禁止刁訟俾胥吏不能作奸良民得以安業他官吏有悖旨妄行者許商民首告該督撫察出即行參奏朕視民如傷惟恐一夫不獲其所茲值海宇昇平兵革不事正當與民休息之時故特渙沛德音減徵寬稅以為閭閻留餘之力至於江南浙江人文稱盛入學名數前已酌定增額今著於府學大學中學小學各增五名舉行一次以示獎勵人才至意爾部即遵諭行 乙巳御舟泊望亭 予故右衛左翼副都統覺察葬如例 陞杭州左翼副都統丹岱為杭州將軍 丙午

御舟泊定堰 吏部議覆廣西巡撫王起元身任巡撫應遵定

中興卷一百一十

十

例將南寧太平慶遠思恩四府調補道府以下三年俸滿之員保題陞用今十餘年來並不保題一人及僉都御史王紳疏參奉旨明白回奏該撫又朦混掩飾具題應將廣西巡撫王起元降四級調用從之 戶部議覆浙江巡撫張勛疏言浙省開局鼓鑄已經兩載今錢價日平應行停止應如所請從之 旌表直隸東安縣烈婦陶子明妻張氏逼姦不從殞命給銀建坊如例 丁未

御舟泊丹陽縣 陞四川陝西督標中軍副將張岳為陝西

寧總兵官 戊申

上登陵駐蹕句容縣 己酉

駕至江寧閩郡紳士軍民跪迎是日

上駐蹕江寧府 裁江南通省管河道一員復設山清裏河同

知安清通判各一員添設盱眙通判宿桃通判各一員 庚

戌諭大學士等曰明代洪武乃創業之君朕兩次南巡俱舉

祀典親往奠醑今朕臨幸當再親祭大學士等奏曰

皇上兩次南巡業蒙親往奠醑今應遣大臣致奠

上曰洪武乃英武偉烈之主非尋常帝王可比著兵部尚書席

爾達致祭行禮朕親往奠 壬子

上至明太祖陵奠爵閱視陵寢諭大學士等曰朕今日往明太

祖陵寢致奠見其圯毀已甚皆由專司無人朕意欲訪察明

中興卷一百一十

十

代後裔授以職銜俾其世守祀事古者夏殷之後周封之於

杞宋即今本朝四十八旗蒙古亦皆元之子孫朕仍沛恩施

依然撫育明之後世應酌授一官俾司陵寢俟回都日爾等

與九卿會議具奏

上幸演武場率諸皇子射

上親射二次發矢皆中又命十五善射硬弓侍衛等射次命官

兵分班校馬步射閱畢諭河道總督于成龍曰朕閱視江寧

蘇州綠旗官兵騎射多不及著將弓馬不及者令在河工効

力爾即會同該督撫議奏尋江南江西總督張鵬翮等奏撥

江南督標兵江蘇安徽撫標兵共一千五十四名赴河標効

力下部知之 癸丑旌表陝西烈婦劉川明妻王氏拒盜守節身死給銀建坊如例 甲寅命修明太祖陵并懸卹

御書治隆唐宋扁額 江寧左翼副都統朔色以年老乞休得

旨副都統朔色為人甚劣著革職 乙卯諭戶部朕巡幸江

南偏察地方疾苦深知民間生計艱難將通省積欠錢糧盡

行蠲免所過州縣有被災甚重者俱經賑濟務俾得所茲聞

鳳陽府屬去歲潦災甚重是用破格加恩以示優恤康熙三

十七年該府屬壽州泗州亳州鳳陽臨淮懷遠五河虹縣蒙

城盱眙靈璧十一州縣並泗州一衛未完地丁漕項等銀米

著一概免徵爾部行文該督撫即飭該地方有司張示曉諭

令窮鄉僻壤咸悉朝廷曲軫災黎至意如有不肖官吏悖旨

私徵使百姓不沾實惠者察出定治重罪爾部即遵諭行

上自江寧府早西門登舟泊燕子磯 丙辰

孝端文皇后忌辰遣官祭

昭陵 丁巳

上駐蹕金山 戊午命減浙江鹽課加徵銀三萬一千三百兩

工部議覆山西巡撫倫疏言殷實商人願往殺虎口外

大青山等處採木者請令其赴部具呈給票守口官兵驗明

放行輸稅入口販賣查殺虎口外從無砍木之例應將該撫

所請無庸議得旨內外之民俱屬一體大青山木伐賣商民

均為有益著照該撫所請行 庚申。

上駐蹕揚州府 辛酉諭河道總督于成龍等運河東岸石工

殘缺者仍令照舊補修其土工隄內積水之處下埽幫築減

水壩俱堵塞堅固用心防護越壩更屬緊要亦著加幫防護

淮安府涇澗兩河必須挑濬深通毋任淤墊至於人字河若

有窄狹處亦當相機挑挖凡有洩水舊口修砌涵洞令民灌

田隄岸單薄處亦酌量加幫河身蝕隄務行修築朕業已指

示止高五尺底寬二丈頂寬七八尺以過水勢足矣至河員

不留心防範者須嚴加懲處切不可姑容致誤河工 陞貴

州按察使彭鵬為廣西巡撫 壬戌。

御舟泊邵伯鎮 癸亥。

御舟泊汜水 諭河道總督于成龍等運河東岸宜再加高寬

其涵洞與金灣濠水壩舊有河身民間用水灌田仍照例開

放減水壩著堵塞堅固用心防守為要至新加隄岸可選爾

帶來官員或五十丈或六十丈責令加意防守西隄土石各

工及高家堰工俱速行修理下河田地不過一二年可以涸

出矣 甲子

御舟泊淮安府 乙丑

御舟泊天妃廟 丙寅

上渡黃河御小舟閱視新埽諭河道總督于成龍曰黃河彎曲

之處俱應挑挖引河乘勢取直高郵等處運河越隄灣曲亦著取直

上登清口南岸召郎中朱成格等諭曰此南岸若不修挑水壩新挑引河必不能暢流當從朕所釘椿處修挑水壩二三十丈挑出水頭大溜向北俾引河流暢尾隄在陳家莊旱地築高五尺水長時從陳家莊南任其流去無礙此事關係緊要爾等即遵諭行陞江南鳳廬道佟毓秀為貴州按察使司按察使

御舟泊淮鎮○丁卯

御舟泊治河嘴○諭河道總督于成龍等曰清口速宜挑濬徐

實錄卷一百九十三

六

廷璽著往揚州去查看永安各石工并東西岸各工與堵塞減水壩工程令各官用心防守毋得疎虞○賜河道總督于成龍協理河務徐廷璽

御書扁額○戊辰

御舟泊夾溝○直隸巡撫李光地等疏言臣等遵旨查看漳河見在分而為三一支自廣平縣經魏縣元城縣至山東館陶縣入衡水歸運一支俗名老漳河自山東邱縣東北經南宮等縣與完固口合流至鮑家嘴而歸運一支俗名小漳河自邱縣西北經廣宗鉅鹿二縣合於滏河又經東鹿縣冀州合於漳沱河由衡水至獻縣完固口復分為兩支其小支與老

漳河合流至鮑家嘴其大支復經河間大城靜海三縣總入子牙河而歸淀查此三支兩支入運其一支又復分流入運則入運之水已多子牙河之水自減可無礙漕之慮但歸衛之河與老漳河皆有散漫淺平之處應酌量挑濬其完固口小支河應築鷄嘴壩及攔河壩逼水入河至於靜海縣田地淹沒因向年開廣福樓及閘留二莊口之故若竟堵諸口又有礙西隄請俟水退之後暫行堵塞至來春水涸於閘留二莊出水處挑成河道兩岸築隄束水歸淀則靜海縣地方不致淹漫而大城等州縣隄岸均無妨礙矣得旨著照該撫所題速行

實錄卷一百九十四

七

五月己巳朔

御舟泊韓莊閘○庚午

御舟泊大王廟○命江南江西總督張鵬翮扈從入京吏部右侍郎陶岱署理江南江西總督事 辛未

仁孝皇后忌辰遣官祭

陵○

御舟泊仲家閘○

御書聖門之哲扁額命懸掛于路廟 壬申

御舟泊白嘴是日

上登岸御黃幄閱視河標官兵射畢諭兵部尚書席爾達曰觀

沿河官兵甚為庸劣。傳諭于成龍著將不及者革退。(癸酉)

御舟泊安山(甲戌)

御舟泊李海務。諭戶部朕巡省民生風俗南至江浙茲以返蹕行經山東沿途延見父老諮詢農事。幸今歲雨暘時若二麥繼登小民可以無憂粒食。但前年被災泰安等二十七州縣生計尚未豐盈宜更加恩休養。所有康熙三十六年未完地丁銀米俱著免徵其康熙三十七年應徵錢糧原因災傷令於康熙三十八年完納。今念一歲之內並輸二歲之租恐物力艱難未能兼辦。著分作三年帶徵以示寬恤。爾部移文該撫轉飭有司明白張示務使窮鄉僻壤均沾實惠以無負

實錄卷五十一

八

朝廷曲軫民依至意。倘有不肖官吏私徵侵蝕致上澤不下及者察出定治重罪。爾部即遵諭行。(乙亥)

御舟泊戴家灣。諭大學士等黑龍江將軍薩布素辦事雖明敏然器局卑瑣。朕巡幸至烏喇每見其逢迎近侍朕聽政多年何事未歷。倉士端良夫豈不辨。彼近臣何能為也。今黑龍江副都統關褒等私動驛站一案其事俱實。著該將軍查審具奏。尋薩布素遵旨審覆副都統關褒疲勞驛站應革職枷責得旨著從寬免降五級調用。賜行聖公孔毓圻等

御書扁額(丙子)

御舟泊梁家淺(丁丑)

御舟泊鄭家口。(戊寅)

御舟泊白草窪。(辛巳。遣官祭

關聖帝君)

御舟泊張家莊。(壬午)

御舟泊河西務。(癸未)

御舟泊崔家樓。(改山清盱眙河營守備為裏河守備。添設高家堰河營中河河營守備各一員。陝西甘肅提督孫思克以老乞休慰留之。)(甲申)

上駐蹕通州。(乙酉)

上奉

實錄卷五十一

九

皇太后回宮。○丙戌。諭大學士九卿詹事科道等朕南巡至浙江見百姓生計大不如前。年來已將舊欠錢糧盡行豁免。其被災地方概行賑濟恩澤屢加。在百姓應比往年豐足。今反不及從前者皆因府州縣官私派侵取餽送上司或有沽名不受而因事借端索取更甚者至微小易結案件牽連多人遲延索詐者甚多。此等情弊督撫無有不知。乃不釐剔察叅反將行賄官員薦舉廉正官員糾劾以致民生失所殊失朕愛養元元至意且畿輔近地因朕不時巡察故無私派侵取等弊若各省督撫俱體朕愛民至意實力奉行自然吏治澄清萬民樂業。科道不畏人不徇情能將不肖劣員察訪糾叅

則有司亦知忌憚。今作何永革橫派嚴禁賄賂以察吏安民。爾等會同確議具奏。尋大學士等遵旨會議請飭各該督撫洗心滌慮正己率屬凡有貪污害民官員不時查叅地方應革積弊盡行革除如該督撫仍照前因循專事虛文塞責徇庇屬員或被科道糾叅或被害人首告將該督撫等一併從重治罪從之。又諭大學士伊桑阿等曰朕茲南巡見地方官員誠心為民者甚寡一切務虛名而無實效甚無取焉朕觀河工亦非難事任事者果皆竭誠効力加意奉公何難告厥成功耶若刷河底極深徑趨入海諸水仍出清口歸海則高郵等處不告水災而下河亦可無虞矣又見沿途鈔關

實錄卷一百九十三

十

已極頹敝皆由關差監督未經簡選但較俸差往其中貧窮卑猥者或將親戚家僕或傭雇人役挈之而往任此輩恣意妄行自有害於商賈且盤詰關津亦有害於百姓嗣後關差俱令本衙門堂官保舉始行差遣丁亥陞兵部左侍郎馬爾漢為都察院左都御史轉吏部左侍郎管右侍郎事王澤宏為左侍郎調戶部左侍郎王揆為吏部左侍郎管右侍郎事陞護軍叅領羅米為正白旗漢軍副都統護軍叅領瓦爾喀為正藍旗漢軍副都統四川巡撫于養志疏叅四川提督岳昇龍欺罔各款一受革職天全土司高一柱賄囑令帶罪護理今高一柱借稱謀逆重情專殺土民高于岳等八

人以致官民互訐臣行司提審提臣岳昇龍密拘犯證自行審理以圖掩蓋前愆一霸引行鹽驅逐小販以致商販失所一各鎮協營每歲勒坐空糧百餘名一借陞見為名將馬二百餘匹分發各鎮協勒索重價一因兵部職方司失火行令備造卷案備端扣剋兵糧一四川營內馬匹動支朋銀購買岳昇龍乃借端科派於通省遊守千把每員扣銀三十五兩通省馬兵每名扣銀二兩得旨此本內事情著工部侍郎羅察內閣學士布泰前往察審具奏四川巡撫于養志疏報打箭爐原係內地土司邊界自康熙三十五年勘明地界以來甚屬相安今因化林坪接壤西域設汛添兵乃擦道等處蠻番忽生狡變事關邊情理應文武會商而提臣岳昇龍剛愎自用並不使臣與聞遽行調遣官兵阻遏商旅禁絕茶米以致軍民惶惑得旨此本內事情亦著羅察等一併察審具奏○已丑

實錄卷一百九十三

二

上詣

皇太后宮問安以原任左都御史哈雅爾圖為內務府總管

壬辰夏至祭

地於

方澤

上親詣行禮 癸巳



上御太和殿視朝文武陞轉各官謝恩 大學士伊桑阿以老疾乞休

上謂大學士阿蘭泰曰伊桑阿為人厚重老成辦事年久爾二人自任大學士以來不生事端凡事推誠從公料理不獨朕知之天下無不知者非尸位素餐者可比伊桑阿雖以老疾求罷朕不忍令去也 以原任左都御史王鴻緒為工部尚書 以翰林院編修史申義為雲南鄉試正考官吏部員外郎李欽式為副考官翰林院編修王奕清為貴州鄉試正考官戶部員外郎沈崑為副考官 調鑲黃旗滿洲副都統鄂緝爾為江寧左翼副都統正藍旗滿洲副都統阿喇納為杭

州左翼副都統陞京口正紅旗協領汪世臣為廣州右翼副都統 調山東登州總兵官楊鈞為江西南贛總兵官陞直隸三屯營副將劉官統為山東登州總兵官浙江台州副將阮欽為福建汀州總兵官 甲午九卿議覆山西巡撫倭倫遵旨回奏布政使齊世武揭報原任太原府知府孫毓璘原任大同府知府鄭潤中虧空兩案齊世武將臣批駁之處一概隱匿惟存心傾害以捏報等款誣臣臣謹將齊世武欺罔朦蔽之實跡陳明臣等查布政使齊世武揭文及巡撫倭倫回奏疏內各項參差言詞互異又齊世武呈稱証見按察使巴哈布糧驛道李莖知府王輔等見在山西不便懸擬應

遣大臣往山西察審定議具題得旨此本內事情著戶部尚書馬齊前往察審具奏 戶部議覆陝西巡撫貝和諾疏言南鄭縣龍灣田地八頃三十七畝有奇因江水泛漲盡衝成河無從辦課請將錢糧永遠豁免應如所請從之 乙未轉兵部右侍郎覺羅三寶為左侍郎以原任陝西巡撫布雅努為兵部右侍郎

六月戊戌朔諭大學士等當今凡事俱可緩圖惟吏治民生最難刻緩諺云湖廣熟天下足江浙百姓全賴湖廣米粟朕南巡江浙詢問地方米貴之由百姓皆謂數年來湖廣米不至以致價值騰貴然楚省官吏並未奏報水旱又聞湖南百

姓甚苦皆由興永朝王樑楊鳳起三人相繼擾害所致見任總督李輝祖為人誠實辦事頗優但俱係于成龍薦舉欲其不徇情面將從前廢弛整理斷斷不能李輝祖可召進京以侍郎用原任左都御史郭琇前為吳江縣知縣居官甚善百姓至今感頌其人亦有膽量無朋比郭琇著補授湖廣總督令馳驛赴任 轉戶部右侍郎錢三錫為左侍郎調刑部左侍郎田雯為戶部左侍郎管右侍郎事轉刑部右侍郎徐潮為左侍郎以湖廣總督李輝祖為刑部右侍郎 己亥

上奉

皇太后幸暢春園 庚子吏部議覆河道總督于成龍疏言河

屬題奏各官員缺請照直隸捕盜同知例吏部停其銓選臣等選擇諳練河務人地相宜者循例保題吏部查核與例相符者具題補授應如所請從之 辛丑九卿議覆山西巡撫倭倫疏言被叅汾陽縣知縣李聯虧空庫銀一萬九千餘兩

並無分釐民欠署縣事汾州府通判韓開藩代李聯科派里民私徵完銀四十兩有餘布政使齊世武任情朦隱咎亦難辭請將齊世武等革職等因查布政使齊世武揭報巡撫倭倫一案見遣大臣往審此案亦應交與所差大臣一并審明究擬從之以理藩院侍郎滿丕為鑲黃旗滿洲副都統仍管理藩院侍郎事調正藍旗蒙古副都統蘇滿為滿洲副都

統以奉國將軍特克新為正藍旗蒙古副都統 甲辰

上詣

皇太后宮問安 直隸巡撫李光地疏言通州等六州縣額設紅剝船共六百隻剝運南漕計船一隻給地十頃以為運丁贍養之費倘遇水旱收入既寡仍照常令其修船雇夫是與民地同一被災而不得均沾蠲免之恩嗣後請一體蠲免部覆無庸議得旨此紅剝地畝若遇災傷著與民地一例蠲免

戊申

上詣

皇太后宮問安 予故吏部左侍郎趙士麟祭葬如例 庚戌

以翰林院編修馮雲驥充日講起居注官 壬子諭兵部墨爾根等處驛站馬匹車輛該地方官員輒以私事擅用屢次發覺著黑龍江將軍薩布素嚴行禁止 癸丑

上詣

皇太后宮問安 甲寅以翰林院編修凌紹震為四川鄉試正考官禮部員外郎劉謙為副考官翰林院編修胡潤為廣東鄉試正考官兵部郎中劉凡為副考官翰林院檢討姜承鼎為廣西鄉試正考官刑部員外郎陳宗彝為副考官翰林院檢討阿金為福建鄉試正考官工部主事潘鵬雲為副考官 乙卯諭大學士等黃河運河關係緊要今值伏汛水漲之

上詣

時應揀選賢能官員各處分守見隨于成龍効力官員甚多令其酌量揀選奏聞將河工危險之處分給看守 正紅旗蒙古都統一等公彭春以老疾乞休允之 丙辰

上詣

皇太后宮問安 以故雲南猛卯安撫使銜瑄子銜玘襲職 辛酉諭大學士等選授雲南貴州四川官員故違限期處分解任希圖另補善地其續選之員不能一時即至每致員缺久懸嗣後將此輩計月多寡革職留原任効力則不肖之徒知有處分赴任自速矣 理藩院題盜馬賊犯圖薩應擬正法

上曰往者塞外多盜近朕遣人教養蒙古申嚴法禁盜賊屏跡  
四十八旗各獲生理風俗稍醇而圖薩獨先犯禁決不可恕  
且此法非朕創之也

太宗文皇帝時因蒙古等無房舍牆垣法令若輕則馬匹難養  
故爾定法以警匪類嗣後有犯此者殺無赦九卿遵旨議  
覆刑部尚書傳臘塔等察審原任陝西巡撫布喀控告四川  
陝西總督吳赫等侵蝕籽粒一案應將原任總督今陞尚書  
佛倫降四級調用總督吳赫等革職其籽粒銀兩應免追徵  
百姓今在事官員賠償

上諭大學士等曰朕詳閱此案甚不明晰以布喀控告而處分  
吳赫若吳赫控告又將處分布喀乎況此案每奉批駁但擬  
加重有是理耶籽粒事及吳秉謙叩關一案并倉米事仍著  
傳臘塔張鵬翮赴陝西詳審壬戌

上詣

皇太后宮問安以鎮國公晉奇為正紅旗蒙古都統

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百九十三

大清聖祖合天弘運文武睿恭儉寬裕孝敬誠信中和功德大成仁皇帝實錄卷之一百九十四

康熙三十八年己卯秋七月戊辰朔享

太廟遣領侍衛內大臣公福善行禮○諭兵部近聞直隸各省經制額兵虛冒錢糧者甚多殊干法紀嗣後須痛加省改嚴行禁止如有仍前濫行冒支扣剋者事發定行從重治罪又直隸各省自副將以下把總以上官員督撫提鎮當不時嚴察如有衰老庸劣不諳騎射之員即行題參若互相徇隱或差官察出或經引見罷斥或經該部糾參該管各官一併嚴加處分不貸○庚午諭河道總督于成龍朕觀河圖要緊應

十三年十月

修者兩處前在南方曾面諭爾將人字河芒稻河急行挑挖聞至今尚未動工甚屬遲悞又河圖內歸仁隄便民閘等口俱已堵塞毛城鋪迤下各口尚未堵塞既將便民閘等口堵塞則毛城鋪等口所出之水由何處洩出必致散漫各處民大受害此處關係緊要宜速議奏○以故三等阿思哈尼哈番額聖格子進寶壽襲職○壬申贈雲南陣亡新嶺營守備張廷柱為都司僉事予祭葬如例○癸酉戶部尚書馬齊審理山西巡撫倭倫布政使齊世武互訐一案回京復命得旨所審事情著九卿會議具奏○刑部尚書傅臘塔江南江西總督張鵬翮因差陝西覆審散給籽粒等案奏曰前布喀狀

內千連尚書佛倫應帶往總督兵赫請解任與佛倫對質上曰吳赫著解任佛倫年老且係尚書不必帶往爾等此行務須從公審理勿更聽人言徇情面○甲戌裁廣州將軍標左營遊擊一員設中軍副將一員兼管左營事○丁丑

孝懿皇后忌辰遣官祭陵○戊寅

上詣

皇太后宮問安○己卯旌表河南烈女劉氏拒姦守貞慘傷殞命給銀建坊如例○庚辰命兵部尚書席爾達著理四川陝西總督事○四川提督岳昇龍疏言打箭爐原係本朝版圖

實錄卷一百九十四

十

竟被烏思藏強行侵占康熙三十五年欽差兵部郎中金圖等會同四川巡撫于養志查勘後仍霸踞如初吞占鹽地數千里侵奪番民數萬戶又在木鴉私造銃礮屯聚糧草臣因化林營兵單汎廣移參將駐防不意彼處喋吧昌側集烈等擅發蠻兵數千占住河東擦道若儀等堡不放客商來往臣一面禁阻茶烟米布一面密遣臣標中營守備李成瑛帶領官兵五百名前往化林營貼防臣已備咨督撫會商乃撫臣于養志私遣筆帖式額爾濟圖等往來調停不使臣與聞並擅止臣所遣防兵益見私通外番情迹得旨此所奏事情亦著羅察等一併察審具奏○旌表湖廣烈婦任仲嘉妻尤氏

逼姦不從捐軀自盡給銀建坊如例○壬午中元節遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○甲申河道總督于成龍疏報卽伯更樓高郵九

里等處被水衝決

實錄卷一百一十五

五

上諭大學士等曰朕慮各處開墾俱已閉塞天水一至必至泛

溢屢諭于成龍作速挑濬芒福人字兩河今竟未挑濬卒如

朕言著速行文巡撫宋學令親赴揚州淮安收養被水百姓

江西巡撫馬如龍前奏江西地方連年大熟今歲亦有秋著

行文馬如龍令速運米十萬石至揚州淮安交與宋學或煮

粥或賑濟相機行事○乙酉裁宗人府滿員外郎二員漢經

歷一員內閣滿侍讀三員滿撰文中書五員滿辦事中書八

員蒙古撰文中書一員蒙古辦事中書二員漢軍撰文中書

一員辦事中書四員漢撰文中書二員漢辦事中書六員吏

部漢軍員外郎四員戶部蒙古郎中四員蒙古員外郎五員

漢軍郎中二員漢軍員外郎六員漢主事四員禮部漢軍員

外郎二員兵部蒙古郎中一員滿員外郎一員蒙古員外郎

一員漢軍員外郎四員督捕滿員外郎二員漢軍員外郎二

員漢主事二員刑部漢軍員外郎八員工部滿員外郎一員

蒙古員外郎一員漢軍員外郎四員漢員外郎二員理藩院

漢院判一員漢知事一員漢副使一員滿司務一員蒙古司

務一員都察院漢軍御史三員漢軍都事一員通政使司漢

叅議一員大理寺漢寺丞一員漢寺副一員漢軍評事一員

起居注滿字主事一員漢字主事一員詹事府漢中允一員

漢贊善一員司經局漢正字一員漢錄事一員太常寺漢協

實錄卷一百一十五

四

律郎一員漢贊禮郎二員漢司樂二員先祿寺漢少卿一員

漢寺丞一員鴻臚寺漢序班四員行人司漢行人四員九

卿議覆戶部尚書馬齊疏言臣遵旨察審山西布政使齊世

武與巡撫倭倫互訐一案草職太原府知府孫毓璘原任大

同府知府鄭潤中虧空庫銀倉米等項俱實巡撫倭倫並不

查明題參將布政使齊世武詳文駁回反令知府李成龍代

孫毓璘捐補虧空又原任汾陽縣知縣李聯虧空案內有民

欠銀兩經汾州府通判韓開藩將民欠徵解巡撫倭倫反指

為科派以布政使齊世武等隱諱不報擅行題參應將巡撫

倭倫降三級調用布政使齊世武詳報孫毓璘等虧空經巡

撫駁回後並不再報。又於李聯輝空案內並未聲明民欠。應將布政使齊世武降一級調用。俱應如所題從之。○敕西路出征噶爾丹功歸化城副都統阿毓璽等二十員各給一拖沙喇哈番世職。○以兩淮白駒等十四場竈戶屢被水災。免康熙三十七三十八兩年應徵銀三萬三千六百兩有奇。○丙戌。

上詣

皇太后宮問安。○丁亥。工部侍郎羅察內閣學士布泰奉差往審四川巡撫于養志提督岳昇龍互參一案。請訓旨。

上曰。爾等往審之事。甚為緊要。宜從公審理。勿得偏私。此事發

欽定四庫全書

端甚少。而叅劾浸大。若竟據所叅究治。事必滋蔓矣。倘所叅是實。不必拘拏。止著離任議罪。○己丑。以內閣學士噶禮為山西巡撫。○以翰林院侍讀學士史夔為浙江鄉試正考官。翰林院檢討覺羅滿保為副考官。翰林院編修查昇為江西鄉試正考官。吏部郎中黃宮柱為副考官。翰林院編修陳夢球為湖廣鄉試正考官。中書科中書舍人蘇偉為副考官。○庚寅。以故四川酉陽宣慰使冉永沛子冉元齡襲職。○工部議覆河道總督于成龍疏。言運河各壩堵閉。全河之水俱由金灣三閘入。人字河。芒稻河。下江。水勢湍急。宣洩不及。以致漫溢。目下上流水勢俱各消退。獨高郵邵伯日見盈滿。請於

欽定四庫全書

鳳凰橋起至王家莊止。疏濬深通。直達灣頭河。又自董家溝起至朱家橋止。舊有河形。亦疏濬深通。直達八港口。則漫漲之水可以漸消。應如所請從之。○辛卯。以故一等阿思哈尼哈番巴顏圖子巴爾度三等阿思哈尼哈番額穆親叔之孫馬尼岱各襲職。○管理錢法戶部右侍郎魯伯赫疏言。寶泉局中現今收貯廢錢。攪鑄四年。尚屬有餘。且紅銅錢鉛多銅少。以致折耗甚多。請將紅銅錢小錢停其交送寶泉局。得旨。著戶部堂官親往驗看。議奏。尋戶部尚書馬齊覆奏。臣等親至寶泉局。將紅銅錢銷燬。驗看果係鉛多銅少。應如所請。停其收買。從之。

不

閏七月。丁酉朔。陞詹事特默德為內閣學士。兼禮部侍郎。仍管詹事。○戊戌。諭禮部。妃張雅氏。性行溫良。克嫺內則。久侍宮闈。敬慎素著。今以疾逝。深為軫悼。其諡為敏妃。應行禮儀。爾部察例行。○庚子。吏部尚書熊賜履以老乞休。慰留之。○四川提督岳昇龍疏言。巡撫于養志疏。叅臣為打箭爐生事發兵。并列款誣陷。臣查打箭爐各處地方。向係藏人霸占。撫臣從前查勘。受賄通同。不問侵占地方。止議貿易。目今詭謀密計。買囑藏番。徵兵仍將經制弁員。送與藏番為質。臣又查打箭爐通商賣茶。撫臣行私自便。每年發茶八十餘萬。已私受茶稅數萬兩。現有榮經縣私票。并各茶商可証得。旨。此

事亦著羅察等一併察審具奏。○壬寅山西巡撫噶禮陛辭上諭曰凡巡撫赴任朕俱有訓旨然遵諭而行者甚少山西地方被溫保科派迄今百姓受困倭倫居官雖無甚劣處而於科派不肖之員不行題參是以大失民心爾到任後務要勤勞愛民居官若好朕即超擢否則即行罷斥惟爾自取朕斷無所瞻徇也。○諭大學士等內閣學士恩至為人乖張使事奔競並不勤勞公事著革退。○以右春坊右庶子陳元龍為陝西鄉試正考官翰林院檢討海寶為副考官翰林院侍讀張廷樞為江南鄉試正考官戶科給事中姜櫛為副考官。○湖廣提督林本直疏報鎮軍一協逼近苗巢而紅苗尤稱悍

貴州奏

七

野夾於蜀楚黔三省之中出沒不常每潛聚伏草擒竊人畜勒銀贖取官兵巡防嚴緊則抵死格鬪本年六月初四等日截陷護糧遊巡兵丁六十餘名臣隨令中軍參將朱綬等統率漢土官兵追擒首惡以靖邊疆下部知之。○癸卯三等阿思哈尼哈番祁蘭布因年老解退以其孫繼壽襲替。○甲辰陞工部郎中滿都為山西布政使司布政使。○戊申

上詣

皇太后宮問安。○己酉陞監察御史白碩色為內閣學士兼禮部侍郎。○兵部議覆雲南貴州總督已錫疏言滇省地處極邊副將遊擊等缺出請照陝西例於現任參將遊擊守備內

揀選保題不論銜缺相當准其越陞一二等以收實效應無庸議得旨雲南地方甚為緊要副將遊擊員缺照該督所請行已錫曾為陝西巡撫陝西武職官員若有賢能者亦著一併保舉具奏。○庚戌

上奉

皇太后自暢春園回宮。○壬子諭禮部乳母瓜爾佳氏久侍宮掖保護朕躬殫竭惻忱恭勤素著詔勉夙夜咸合將奉之宜閱歷寒暑克盡調育之道每念疇昔未嘗暫忘比來嬰疾彌留竟爾溘焉長逝深為軫悼宜加恩封爾部議奏尋禮部議應封為保聖夫人從之。○江寧副都統鄂緝爾杭州副都統

貴州奏

阿喇納陛辭

上諭曰駐防各省滿洲兵丁若平時怠惰不加訓練豈堪効用朕頃南巡見浙江之兵頗優江南之兵甚劣今擢用爾等為副都統須親加訓練每日習射善射者錄用如有廝役及懦弱兵丁即行革退則衆兵鼓勵矣爾等其勉之。○以翰林院侍講學士陳論為河南鄉試正考官翰林院檢討喀爾喀為副考官翰林院侍講學士張廷璣為山東鄉試正考官翰林院檢討李象元為副考官司經局洗馬周金然為山西鄉試正考官翰林院檢討文志鯨為副考官。○癸丑上巡幸塞外命皇長子多羅直郡王允禔皇三子多羅誠郡王



允祉

皇四子多羅貝勒 皇五子多羅貝勒允祺皇七子多羅貝

勒允祐皇八子多羅貝勒允禩皇十三子胤祥皇十四子允

禔隨駕是日啟行駐蹕三家店○調鎮黃旗護軍統領崇古

禮為正藍旗護軍統領陞鎮黃旗滿洲副都統兼戶部右侍

郎魯伯赫為鑲黃旗護軍統領○刑部等衙門會議戶部郎

中剛五達等密擬湖廣茶陵州叛賊黃明陳丹書吳旦先等

一案查黃明係叛逆吳三桂下偽將軍康熙十九年大兵取

柳州時遁入苗峒後經查拏苗子韋朝相假獻首級黃明因

潛住產峒多年於康熙三十七年七月間糾結陳丹書吳旦

先等侵擾湖廣茶陵州攻圍衡州府俱被官兵殺敗黃明陳

丹書吳旦先等一百三十四名先後拏獲俱應照律不分首

從擬斬立決原任茶陵州知州趙國瑄因私派激變應照律

擬斬監候失察總督李輝祖應降三級調用巡撫楊鳳起已

經別案革職無庸議得旨黃明陳丹書吳旦先等三十八名

俱著即處斬華虞臣等九十六名從寬免死照例減等發與

黑龍江新滿洲披甲之人為奴趙國瑄私派激變之處著行

文湖廣總督郭琇查明再議李輝祖等處分尚輕著一併再

議具奏○甲寅

上駐蹕密雲縣○乙卯

上駐蹕遼寧○諭大學士等朕巡幸至此見田禾甚好可謂豐

年但各處皆有蝗蝻恐地方官民旗莊屯田禾已收遂

至怠忽今年若不將蝻子捕絕貽害來年悔之無及須於未

能翼飛之時預先滅淨即傳諭之○丙辰

上駐蹕三岔口○丁巳

上駐蹕喇嘛洞○戊午

上駐蹕宜蘇畢喇之楊樹溝○二等伯舒敏因病乞休以其子

伊雷襲替○陞內閣學士溫達為戶部右侍郎○工部議覆

河道總督于成龍疏言臣等遵旨查勘芒稻河開下通於江

河道寬濶應於開旁西岸另開河口可以宣洩至歸仁隄工

不議宣洩恐難保固臣等看白洋河原有胡家溝出水之處

請於此處隄裏挖河遙隄建閘兩旁各築迎水壩一道以敵

水勢如遇黃水泛漲即行下埽不許黃水到閘俟黃水退去

拆埽開閘放出清水揚州所屬東隄雖經簽釘排椿仍不足

資捍禦議加至頂寬四丈底寬十二丈高家堰一帶石工必

須加築寬厚徐州等處遙隄縷隄均應加幫黃河刷深之後

再將毛城舖等閘壩閉塞俱應如所請從之○己未

上過西拉諾海達巴漢命更嶺名為阿布達里○是日駐蹕邵

府營○翁牛特多羅杜梭郡王碩第等來朝○庚申

上駐蹕波羅營○喀喇沁和碩額駙噶爾臧公善巴拉錫等來

朝辛酉

上駐蹕汗特木爾達巴漢地方○壬戌

上駐蹕穆祿喀喇沁地方○以故二等精奇尼哈番奎庫子色  
普滕襲職○癸亥

上駐蹕愛里和洛○乙丑

上駐蹕克勒烏里雅蘇台西爾哈烏里雅蘇台之界○陞內閣  
侍讀學士滿篤為內閣學士兼禮部侍郎○以故一等阿思  
哈尼哈番蘇旦子哲庫襲職○調寧古塔副都統耿額為黑  
龍江副都統奉天右翼副都統博定為寧古塔副都統以奉  
國將軍成色為奉天右翼副都統

八月丙寅朔秋分夕

月於西郊遣左都御史馬爾漢行禮

上駐蹕土城地方○和碩端敏公主來請安○科爾沁和碩達

爾漢親王額駙班第來朝○丁卯遣大學士吳琰祭

先師孔子○和碩端靜公主和碩純禧公主來請安○喀爾

喀和碩親王車妄扎卜敦漢多羅郡王扎木蘇等來朝○戊

辰祭

大社

大稷遣戶部尚書馬齊行禮○

上駐蹕烏喇岱昂阿地方○固倫淑慧長公主和碩榮憲公主

來請安○巴林和碩額駙吳爾袞蘇尼特多羅郡王垂基恭

蘇隆等來朝○免江南天長桃源三縣本年分水災額賦有

差○已已諭大學士等朕前軫念蒙古生計特遣官教養已

各安生理無有不樂業者近聞巴林人等饑荒離散朕甚憫

之此係公主所居若令微員前去不能料理著護軍統領鄂

克濟哈學士蘇赫納至彼會同扎薩克等將巴林所存米一

千石賑之勿僅給公主人員也○離散之人令其招徠若人眾

米少再將坡瀨村米糧速行運轉行文至京仍照撫養教漢

等處例奉差官員有願前去撫養者令其奏聞○辛未

上駐蹕烏里雅蘇台達巴漢昂阿地方○烏米穆泰多羅貝勒

博木波等來朝○以固山貝子蘇爾發子塞勤為三等鎮國

將軍鎮國公額爾圖子訥音圖為三等輔國將軍奉國將軍

吳禮子圖衲輔國將軍費揚子子姚努奉國將軍鄂飛子鄂

齊俱為奉恩將軍○以翰林院修撰李蟠為順天鄉試正考

官翰林院編修姜宸英為副考官○壬申阿霸垓多羅郡王

吳爾占噶喇卜等來朝○癸酉

上駐蹕達賴達巴漢昂阿之宜蘇卑喇地方○甲戌

太宗文皇帝忌辰遣官祭

昭陵○嵩齊武多羅郡王雅穆畢爾扎魯特多羅貝勒畢魯瓦

阿霸哈納多羅貝勒薄昭固山貝子額林臣達西等來朝○

免浙江龍游蘭溪三縣本年分水災額賦有差○丙子

太祖高皇帝忌辰遣官祭

福陵○喀爾喀車臣汗多羅郡王納木札爾等來朝○丁丑

上駐蹕達爾達巴漢和洛○戊寅

上駐蹕努湖岱畢喇地方○己卯阿祿科爾沁多羅郡王垂伊來朝○辛巳

上駐蹕森濟圖和洛○壬午

上駐蹕音圖和洛○癸未

上駐蹕永安拜和洛○科爾沁達爾漢土謝圖親王額駙沙津來朝○免江南清河縣本年分水災額賦有差○旌表河南

烈女張氏守貞慘死給銀建坊如例○甲申

上駐蹕齊老圖昂阿地方○賜喀喇沁科爾沁喀爾喀款漢巴林蘇尼特烏朱穆泰阿霸坡蒿齊武阿霸哈納阿祿科爾沁

王貝勒貝子公額駙台吉等銀幣衣帽鞍馬有差○乙酉

上駐蹕瑚爾布勒畢喇地方○賜隨國蒙古官兵銀幣布疋有差○丙戌

上駐蹕海拉蘇台昂阿地方○喀爾喀澤卜尊丹巴胡土克圖等來朝○丁亥

上駐蹕古爾板庫特爾地方○陞四川按察使祖文明為福建布政使司布政使○諭吏部淮安揚州所屬被災地方甚為

緊要府州縣員缺俱著奏開選擇補授○吏部議覆吏科給

事中汪煜條奏河工官員甚為緊要請將題補通判以上各

員俱令隨本引見又近來新掣繁劇邊徼地方與叅罰停陞

之員往往巧借河工希圖規避請敕部詳查此等人員不准

留工補用再河工新舊人員不啻數千請敕下河臣將實在

効力人員報部查核外其餘掛名者俱令回籍回籍不得仍

留工所均應如所請從之○免江西建昌縣本年分水災額

賦十之三○戊子

上駐蹕鄂爾濟圖席拉地方○己丑

上駐蹕博洛和屯○庚寅

上駐蹕都勒諾爾地方○免浙江西安等三縣本年分水災額

賦有差○辛卯遣官祭

歷代帝王○遣官祭城隍之神○

上駐蹕塔奔拖羅海畢喇地方○免湖廣華容縣本年分水災

額賦有差○癸巳

上駐蹕扎木克圖諾爾地方○甲午

上駐蹕拖里呼諾爾地方○予故護軍統領議政大臣宗室塞

冷額祭葬如例○直隸巡撫李光地疏言直屬滹沱河漳河

遷徙不常臣遵旨飭沿河州縣官相視散漫淤淺處速行疏

濬今大名廣平真定河間西府屬州縣凡滹沱河漳河經流

之處開濬疏通由館陶入運老漳河與單家橋交流合至鮑家嘴歸運以分子牙河之勢下部知之  
上駐蹕昂古里海軍爾漢地方

實錄卷一百九十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百九十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百九十五

康熙三十八年己卯九月丙申朔陞雲南永昌道李興祖為四川按察使司按察使免湖廣安鄉縣本年分水災額賦有差○丁酉

上駐蹕喀木庫地方○戊戌

上駐蹕阿祿西巴爾台地方○裁四川陝西督標火器左右二營守備一員千總二員把總四員兵八百名歸併一營仍名為火器營添設參將一員停止陝西廣元戍防官兵裁督標五營兵丁一千名每營額定八百名○旌表山東烈婦楊文

實錄卷一百九十五

海妻鞠氏拒姦慘死給銀建坊如例○己亥

上駐蹕烏爾哈達地方○庚子

上進張家口至宣化府駐蹕○辛丑

上駐蹕保安州○琉球國中王尚貞遣陪臣毛龍圖等表貢方物宴賚如例○壬寅

上駐蹕懷來縣○癸卯

上駐蹕岔道○陞江南驛鹽道王然為山東按察使司按察使

○甲辰

上駐蹕杖頭村○喀爾喀土謝圖汗遣使進九白年貢宴賚如例○乙巳

上回駐暢春園○丙午。

上自暢春園回宮詣

皇太后宮問安○諭宗人府嚴妃喪未滿百日誠郡王允祉並不請旨即行剃頭殊屬無禮著收禁宗人府嚴加議罪辦理王府事務官王府長史等不行規諫甚屬可惡將伊等鎖拿從重治罪尋宗人府議奏誠郡王允祉應革去郡王爵辦理王府事務侍郎綏色辛保王府長史馬克篤一等侍衛哈爾薩等俱應革職枷號三箇月鞭一百不准折贖得旨允祉從寬革去郡王授為貝勒辛保馬克篤哈爾薩俱著革職鞭一百准其收贖綏色自任侍郎以來實心効力著從寬免罪革

實錄卷一百九十五

十

去管理王府事務○戶部議覆直隸巡撫李光地疏言直屬霸州水清宛平良鄉固安高陽獻縣等七州縣因疏濬新河挑挖堆土其占去民地一百三十九頃六十二畝請將康熙三十七年以後錢糧開除應如所請從之○戊申。

上諭大學士等曰各省採買物件科派累民不若折色解京官買總之累民之事雖纖毫亦不可行向日口外蒙古窮困人不聊生朕近年來任人經理多方撫育培植之今已家給人足樂業安生可見治民之道全在休養也○

上以于成龍所繪河圖示大學士等諭曰今四海太平最重者治河一事朕前巡視知水之不治由洪澤湖水勢甚太既不

能洩又加黃運兩河合併勢愈浩瀚以致泛溢昔時原有歸仁隄遂為捍禦此法最善今已淹沒不可考新輔則築減水壩名為減水而四處奔瀉漂決甚多彼但顧上河而不顧下河水何以治朕意惟有導河稍北使彼不得侵入清水而疏洩洪澤湖使之下流全用清水以刷沙淤如此則水自無不治矣今歲南巡見黃河逼近清口黃水倒灌以致淤墊洪澤湖水不出自高家堰減水壩流入高寶諸湖自高寶諸湖流入運河以致下河田地盡被淹沒淮揚所屬錢糧雖頻年蠲免賑濟動帑修理隄岸羣黎尚在水中朕深為軫念遂諭于成龍將洪澤湖出水隄岸令速完工近差工部官員往看清口仍然淤墊洪澤湖水仍未出口隄岸尚未告竣清口甚為緊要如不將清口挑濬湖水不出高家堰併運河隄工雖加高厚均屬無益爾等會同九卿詹事科道詳閱河圖速議具奏尋大學士等奏曰

聖諭河工事宜已極周詳應遵旨移文河道總督于成龍令速行修濬。

上曰新輔董安國于成龍但知築隄禦水至於改河身使北俾清水通流並未言及若不令清水通流雖修築隄岸黃水終致倒灌焉能禦之○諭吏部比年內陞官員少京堂懸缺者多翰林官甚眾陞遷壅滯爾等將現出京堂之缺及翰林官

職名一併開列。○陞左僉都御史王紳為大理寺卿。○吏部議覆吏科給事中馬士芳疏言楚粵黔蜀逼近苗穴最稱難治請將四省中如黎平茶陵東川平越等界連苗地府州縣員缺令督撫於本省中揀選題補應如所請從之。○予故福建海壇總兵官楊元弼祭葬如例。○調正白旗蒙古副都統覺羅通吉為鑲黃旗滿洲副都統以一等侍衛宗室愛音圖為正黃旗漢軍副都統陞王府長史屠克善為正白旗蒙古副都統。○庚戌。

上御太和殿視朝文武陞轉各官謝恩。○

上詣

實錄卷一百九十五

四

皇太后宮問安。○雲南臨元澂江總兵官王洪仁以疾乞休允之。○辛亥諭兵部正白旗滿洲都統兼管步軍統領開音布年老不能兼理兩任著解都統任仍管步軍統領事鑲白旗護軍統領蘇昌懶惰著革退。○陞鑲白旗滿洲副都統迂圖為本旗護軍統領。○以翰林院檢討覺羅滿保充日講起居注官。○癸丑以原任四川陝西總督吳赫為刑部右侍郎。○

甲寅

上詣

皇太后宮問安。○諭理藩院侍郎滿丕曰欲復蒙古生業必嚴盜禁不嚴則不能弭盜朕頃巡省歸化城曾問副都統阿迪

據云歸化城地方賊盜比前甚少朕曾諭爾務嚴盜禁嗣後倘有盜案必將爾等一併議處斷不姑貸。○丙辰

上御經筵講畢賜大學士九卿詹事及講官等宴。○調正藍旗蒙古都統楊岱為鑲白旗滿洲都統陞鑲黃旗護軍統領魯伯赫為正藍旗蒙古都統正白旗護軍統領拖倫為鑲黃旗蒙古都統正藍旗護軍統領崇古禮為鑲白旗蒙古都統仍各兼管護軍統領事。○浙江提督趙弘燦子母憂命在任守制。○戊午諭大學士等曰大學士阿蘭泰効力年久品行清純辦事敬謹朕聞其病篤先遣皇長子允禔往視朕尚欲親臨其第及允禔回奏業已昏迷隨聞溘逝朕深用震悼即遣

實錄卷一百九十五

五

皇子允禔等往視含殮大臣病故雖無輟朝之例朕心不忍可特停辦事一日著馬武同內大臣一員侍衛十員往奠茶酒賜鞍馬四匹銀二千兩至發引時皇子允禔允祐乾清門侍衛十員并五班侍衛往送。○諭理藩院他旗蒙古朕遣官養育俱各得所惟蘇尼特四子部落吳喇忒毛明安等旗分尚有貧人為盜其速為撫養之。○免直隸安州新安等三州縣本年分水災額賦有差。○調正紅旗蒙古副都統扎喇克圖為正黃旗蒙古副都統鑲藍旗蒙古副都統鄂飛為正紅旗蒙古副都統以一等侍衛佟保為鑲藍旗蒙古副都統。○己未。

上詣

皇太后宮問安○庚申轉戶部左侍郎管右侍郎事田震為左侍郎調工部左侍郎李枏為戶部左侍郎管右侍郎事轉工部右侍郎顧藻為左侍郎陞左副都御史吳涵為工部右侍郎○壬戌

孝慈高皇后忌辰遣官祭

福陵○癸亥

上詣

皇太后宮問安○大學士等奏臣等遵旨會議行查明代後裔俾守祀事但明亡已久子孫湮沒無聞今雖查訪亦難得實

實錄卷一百九十五

七

臣等愚見即委該地方佐貳官一員專司祀典以時致祭從之○甲子免直隸永清縣本年分水災額賦十之三

冬十月乙丑朔享

太廟

上親詣行禮○遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○頒康熙三十九年時憲歷○丙寅陞大理寺卿王紳為都察院左副都御史○以司經局洗馬周金榮充日講起居注官○免直隸宣化縣本年分雹災額賦有差○丁卯

皇太后聖壽節

上率王以下文武大臣侍衛等詣

皇太后宮行禮遵

懿旨停止筵宴○戊辰山東道御史呂琨疏參戶部郎中剛五

實錄卷一百九十五

七

達等奉差往審湖廣茶陵州叛犯黃明等一案需索供應嚇詐餽遺革職茶陵州知州趙國瑄供証可據請將剛五達究審得旨該部審明具奏○己巳

上諭大學士等曰凡上司居官有聲者其所舉之人必佳上司不善則所舉者亦屬庸劣然亦有居官先優後劣者亦有居小吏善而陞遷後改變者若始終如一行止不改者不多得也○予故福建汀州總兵官王國興祭葬如例○陞漕標中軍副將楊琳為雲南臨元澂江總兵官○庚午

上詣

皇太后宮問安○免直隸武清縣本年分水災額賦有差○予



故杭州將軍查木揚祭葬。謚敏恪。○壬申。陞光祿寺卿努赫為禮部右侍郎。○陞太常寺卿高喬為大理寺卿。○調正藍旗漢軍副都統瓦爾荅為鑲白旗滿洲副都統。○癸酉。

上詣

皇太后宮問安。

上諭大學士等曰。江蘇巡撫宋學疏請蠲免高郵等被水州縣雜項錢糧。此必前次蠲免時遺漏未題者。依該撫所請全行蠲免。朕見他處被災者尚好。惟下河附近之地。連年水淹。俱由清口之清水不得出。黃河之濁水。遂流入洪澤湖之故。朕憫念民田。晝夜勤思。必使清口之水得出。黃河從別道流去。

康熙三十八年九月

八

則民生始獲利益也。○又諭大學士等。黑龍江地方連歲歉收。著將烏喇收貯米糧。運至默爾根齊齊喀爾地方預備。若彼處有引水種田之處。著能耕種之人前去教導。交該部議行。○命原任河道總督王新命管理永定河工。○鑲白旗滿洲副都統那泰以年老乞休。允之。○調正白旗漢軍副都統羅米為鑲白旗滿洲副都統。○甲戌。

上巡視永定河。命皇長子多羅直郡王允禔。

皇四子多羅貝勒。皇十三子胤祥隨駕。是日啟行至高陵地方。諭原任河道總督王新命等曰。此河當水大之時。甚是湍急。此隄斷不能阻遏。必須修挑水壩。始為有益。○

上閱蘆溝橋以南河工。諭王新命等曰。此河性本無定。溜急易淤。沙既淤則河身墊高。必致淺隘。因此泛溢橫決。沿河州縣居民常罹其災。今欲治之。務使河身深而且狹。束水使流。藉其奔注。迅下之勢。則河底自然刷深。順道安流。不致泛溢。今朕通觀兩岸。將緊要應修處逐一詳審。爾等務期次第修築。遵諭而行。○

上駐蹕趙家營。乙亥。

上閱北蔡村夏莊村南蔡村等處。諭王新命等曰。於此三處從上流作挑水壩。束水必過長。長則大溜為其所逼。對岸淤處畧加挑濬。水即瀉入直流矣。著俟明春興工。又諭曰。官不清則

康熙三十八年九月

九

為民害。水不清亦無利於民。天下之濁者皆如此也。不清之官朕有法以正之。不清之水朕有策以治之。○

上駐蹕支子營。○丙子。

上巡視霸州河隄。居民跪迎道左。

上顧百姓曰。朕不辭寒冷。來巡河隄。特欲拯救爾等耳。居民叩

頭謝恩。歡聲動地。○

上閱南格驛曹家務郭家務等處舊河口。諭王新命等曰。此舊河口著修一長釘頭壩。堵塞之。若留此口水得灌入。則河即為其所奪矣。舊河近隄汕塌者。著加幫增築。○

上至郭家務村南大隄。以豹尾鎗立表於水上。親用儀器測驗。

諭王新命等曰測驗此處河內淤墊較隄外畧高是以冰凍直至隄邊。以此觀之。下流出口之處其淤高必甚於此。如此壅滯。安能暢流。此等隄工。卑矮可虞。若不預行修築。明春水發。難以堵禦。必自今冬下埽。加幫增高。不可取近隄之土。若取土成溝。水流溝內。有傷隄根。

上駐蹕水窖地方。○諭直隸巡撫李光地等。永定河自郭家務以下。河身淤高。若挑淤作河。恐虛費錢糧。無益於事。且隄內之地。較河身最窪。若將南岸之隄。作北岸之隄。前挑窄河。築高大之隄。逼河南移。方屬有益。這挑河築隄。或修石隄之處。李光地。王新命。同分司朝琦。估計。仍將挑濬舊河之處。亦并估計。尋直隸巡撫李光地等。奏臣等遵旨會查。自郭家務至隄盡處。共長七千七百四十丈。應挑河面寬十五丈。底寬八丈。深一丈。築南岸新隄。底寬六丈。頂寬二丈。高一丈二尺。從之。○丁丑。

上回鑾。閱張家莊北格驛。石佛寺等處隄工。諭王新命等曰。攔截淤灘。下埽時。必斟酌恰當。倘稍有參差。則水不入而功徒費矣。○

上駐蹕葛家屯。○戊寅。

上閱莊戶村。求賢莊等處隄工。諭王新命等曰。此河倘有灘漲。汕刷之處。俱須下埽。至南岸夏莊水溢之處。與舊河相近。關

係緊要。令預備物料。於挑汛未發之前。敬慎堅修。○

上閱趙村新開河。諭王新命等曰。此處因裝碇石稍低。若再加使高。○

上駐蹕南苑。○以翰林院侍講汪灝為順天武鄉試正考官。編修查嗣韓為副考官。○喀爾喀澤卜尊丹巴胡土克圖遣使進九白年貢。宴賚如例。○己卯。大學士李天馥故。遣大臣一員。侍衛十員。往奠茶酒。○庚辰。

上回宮。詣

皇太后宮問安。○免直隸寶坻縣本年分水災額賦有差。○辛巳。直隸巡撫李光地。原任河道總督王新命等。將修永定河

摺子呈覽。

上曰。爾等意欲如何。王新命奏曰。欲於南面遠隄之內修治。若向外面修治。恐有礙居民村莊。

上曰。若遠隄之內修治。俱是沙地。倘更壅淤。則低窪村莊盡在沙中矣。今永定河郭家務以下。壅淤已高出七八尺。若掘壅方濬河身。不但多需工力。必致歲歲壅淤。南隄之南地。最窪下。若隨其窪下。濬治於掘出之土。即行釘樁築隄。堅固。則修理最易。抑且北隄三層。於河更屬有益。爾等修理時。可將河口修窄。漸次放寬。於兩邊築隄。使高。大則水勢迅急。沙自不至於停住矣。若過村莊相近處。宜詳視妥當。委曲遠移。或砌

之以名。與村居無礙。始行修理。俟新修河工告竣。朕親臨視  
開放河水。○壬午。予故武英殿大學士阿蘭泰祭墓。加祭一  
次。謚文清。○癸未。諭大學士等。原任河道總督董安國。所濬  
引河及挑水壩。著發正項錢糧修理。給事中張睿條奏中河  
之水。由仲家開口流出。直射湖日。故不但清河之水難出。而  
黃河之水反易流入。所言甚是。今于成龍但以修築隄工為  
務。不以決出清河之水為要。爾等再議。著于成龍親至仲家  
閘。詳視議奏。尋大學士會同九卿等議覆。戶科給事中張睿  
所條奏。應令河道總督于成龍等。將仲家閘以下挑濬出水。  
或將董安國所挑引河以下酌量挑挖建閘。詳看具題。從之。

○甲申。

上詣

皇太后宮問安。○諭大學士等。朕撫御寰區。愛養兆民。務期人  
各得所。比年淮揚所屬地方。罹於水患。百姓田廬俱被淹沒。  
生業蕩然。深切軫念。屢經蠲租賑濟。乃黃河墊高。清口低下。  
淮水不能流出。百姓仍被水災。念此淮揚數州縣生靈。豈可  
不急為拯救乎。今或堅修高家堰隄岸。以束淮水。使之刷黃。  
或移清口於清江浦之左右。或另濬河道。以通舟楫。俱宜一  
一講求。此事關係甚鉅。爾等會同九卿詹事科道。細閱河圖。  
詳議具奏。○乙酉。免直隸霸州保定等六州縣本年分水災。

額賦有差。○丙戌。大學士等。以朝審情實各犯八十三。令請  
旨。

上諭曰。人命至重。今當勾決。命在須臾。尤不可不詳慎。爾等於  
此情實各案。既已閱訖。各有所見。皆當盡言。

上親展招冊。詳察各犯情詞。一一下詢。諸臣皆曰。可殺而後定。  
凡勾者五十人。

上曰。此等雖皆當死。然朕於伊等情罪當死之中。曲求可生之  
路。不忍輕斃一人也。○諭大學士等。淮揚百姓。頻被水災。陷  
於死亡。朕愍然傷之。河患不除。夙夜不能暫釋於懷。且百姓  
既被水災。存者必至流離轉徙。田多不耕。賦安從出。來年錢

糧。當於今年預為蠲免。庶災黎於水退時。可以各歸故鄉。安  
其生業。○丁亥。九卿遵諭。議覆河道總督于成龍等疏。言運  
河乃糧艘經由。要津為下河七邑上游。更兼高家堰六壩。流  
出之水。盡入於此。水勢浩大。河窄難容。前河道總督靳輔。於  
高郵南北。建設大小減水壩五座。雖隄岸保固無虞。而下河  
諸邑。均受水患。

皇上南巡。閱視令臣等大修隄岸。堅閉減水壩。下河麥禾。幸得  
收穫。茲遇伏汛。水發。致高郵邵伯等處。皆被漫決。臣等酌開  
減水壩二座。上下隄岸。方得保全。總緣高郵河身。與山陽寶  
應河身相等。驟乘高郵寶應諸湖之水。開壩則有礙於民田。

閉壩則有傷於隄岸。請將高郵減水壩俱改為滾水石壩。水長聽其自漫而保隄工。水小資其涵蓄以濟運道。又茆家園等六壩亦請改為滾水壩。其式與歸仁隄五堡滾水壩相同。至高家堰一帶石子年久坍塌。請通行加高五尺。以免歲修。均應如所請。從之。○戊子。

上詣

皇太后宮問安。○免直隸靜海縣本年分水災額賦十之三。○己丑。

上御太和殿視朝。文武陞轉各官謝恩。○諭大學士等鑲黃旗蒙古副都統拉自原係行間獲罪發遣黑龍江之人。後調回

實錄卷一百九十五

十四

京任用。為人甚屬庸劣。且又懶惰。著革退。○陞參領李繩宗為正白旗漢軍副都統。參領曹秉植為正藍旗漢軍副都統。○免湖廣沔陽州本年分水災額賦有差。○辛卯。大學士等以湖廣總督郭琇遵旨查明私派激變知州趙國瑄等事入奏。

上曰郭琇止將趙國瑄等事查出。並未敘及往審之剛五達等。公與不公之處。著移文郭琇。將剛五達等所審公與不公。及伊等途中曾否亂行。令其一併查明具奏。○免江南沐陽縣本年分水災額賦十之三。○甲午。

上詣

皇太后宮問安。○以李鍾為太常寺卿。

實錄卷一百九十五

十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一百九十五

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百九十六

康熙三十八年己卯十一月乙未朔冬至祀

天於

園丘

上親詣行禮○遣官祭

永陵

福陵

昭陵

暫安奉殿

孝陵

仁孝皇后

孝昭皇后

孝懿皇后陵○停止次日朝賀○丁酉江南道御史鹿祐疏參

順天鄉試正副考官修撰李蟠編修姜宸英等以賓興論秀  
之典為縱恣行私之地實為有玷清班請立賜罷斥

上諭大學士等曰順天鄉試所中式者童稚甚多物論騰沸大

殊往昔考試係國家大典所當嚴飭以示警戒御史鹿祐題

參可嘉著九卿詹事科道會同將李蟠等嚴加議處○免江

南邳州清河等十州縣本年分水災額賦有差○已亥

上諸

皇太后宮問安○諭戶部朕思小民生計惟農畝是賴必年穀

順成斯衣食無缺淮安揚州所屬州縣衛歷年以來河流浸

漫田廬編氓艱於粒食朕心深切軫念已將康熙三十八年

錢糧俱行蠲免今春南巡自覩民間疾苦恐致失所復將康

熙三十七年未完錢糧盡與豁除諭令所司將沿河隄岸堅

固修築乃修防未竣夏秋又致衝決田廬盡沒水中特命該

撫往駐被災地方動支積貯米穀並將漕糧截留親行賑給

今念清口河流未通民田仍遭淹沒耕獲無從百姓饘粥尚

且艱難今年租賦安能輸辦著將被災海州山陽安東鹽城

大河衛高郵泰州江都興化寶應等州縣衛康熙三十九年

地丁銀米等項及漕糧漕項銀兩盡行蠲免速令該督撫通

行曉諭務俾均霑實惠以副朕拯恤災黎之至意爾部即遵

諭行○以戶部尚書馬齊為武英殿大學士仍兼管戶部尚

書事禮部尚書佛倫為文淵閣大學士吏部尚書熊賜履為

東閣大學士禮部尚書張英為文華殿大學士○調兵部尚

書席爾達為禮部尚書仍署理四川陝西總督事以左都御

史馬爾漢為兵部尚書內務府總管哈雅爾圖為都察院左

都御史仍兼內務府總管事○調戶部尚書陳廷敬為吏部

尚書刑部尚書李振裕為戶部尚書兵部尚書杜臻為禮部

尚書以原任江南江西總督范承勳為兵部尚書左都御史王士正為刑部尚書陞吏部左侍郎王澤弘為都察院左都御史○庚子裁兵部督捕衙門督捕事務歸併刑部管理以裁缺督捕侍郎朱都納為兵部額外侍郎喻成龍為刑部額外侍郎○壬寅諭大學士等御史等官啟奏會議事常隨班奏對給事中各官無常啟奏之事有經年不見者嗣後著滿漢給事中各四員在起居注官下侍班又諭曰各部院設蒙古司官並無所辦之事俱著解任候補理藩院員缺○諭戶部朕君臨天下撫馭兆人無日不以休養生息為念嘉興元元共圖豐樂蠲租賜復時切於懷故從前於直隸各省權其緩急先後頻渙恩施今海宇昇平四方無事欲使普天率土咸登饒阜惟湖南地方素稱魚米之鄉比年雖年穀順成而民間猶未盡充裕是用格外加恩以綏黎庶所有康熙三十九年湖南所屬地丁雜稅等項錢糧著一概蠲免移文該督撫令徧飭所屬實心奉行務俾深山窮谷均霑實惠以副朕愛民如子至意爾部即遵諭行○戶部議覆福建浙江總督郭世隆等疏言浙江鄞縣沿海田地向藉塘閘禦潮今塘閘被潮衝倒決去田地一千七十餘畝其額徵銀米請永行豁免應如所請從之○予故武英殿大學士李天馥祭葬謚文定○癸卯

上詣皇太后宮問安○乙巳諭大學士等于成龍奏稱清江浦西界黃水高於淮水一尺淮水高於運河之水七尺運河之水高於平地七尺合而觀之淮水高於運河西隄外平地共一丈四尺今惟以清口自河之下流沿武家墩由清江浦之北另行改移中間河身量留八九十丈空地兩傍堅築石隄俾清水暢達此所當急議者夫清水建瓴迅下則易出黃水不致倒灌其石隄之間已為河身不煩挑濬即水漲之時其高不過等於運河安能泛越高家堰哉但如是改移朕恐別有所礙不能永遠故少為躊躇耳爾等確議具奏○九卿遵諭議覆河道總督于成龍等疏言邵伯更樓高郵九里等處漫缺臣已令該管官先將高郵九里缺口堵築其邵伯更樓缺口舊有涵洞隄內原有河形請疏挑寬深於河東築成土隄束水南入江可洩運河驟漲之水以固東西兩岸隄根再查運河一帶河身墊高皆因高家堰隄工未完黃流倒灌清口淤塞湖水不出之故今先挑挖爛泥淺等處引水敵黃以濟運河如高家堰一帶工程告成則清水自出矣均應如所奏作速挑濬修築完工至上諭或堅修高家堰隄岸以來淮水使之刷黃或移清口於清江浦之左右或另濬河道以通舟楫之處應令該督等親勘



連議具題得旨河工關係重大高家堰隄岸縱多方堅築清水亦不能出今惟當議移清口於他處兩岸俱用石工堅砌使清水流通朕南巡時曾以另開清口面諭于成龍彼亦奏稱淮水可從武家墩向清江浦移改此事著于成龍及徐廷璽會同河道各官觀看清口當移於何處即行詳議於歲前具奏○河道總督于成龍以疾乞假調理得旨于成龍准給假兩月調治河工事務著徐廷璽暫行署理其緊要事宜仍與于成龍商酌而行○丙午戶部議覆湖廣總督郭琇疏言黃州府屬黃梅麻城黃安三縣武昌府屬通山大冶二縣每年解荊州鄭陽等汛兵米二萬七千二百二十二石腳價倍於米價請改徵折色應無庸議得旨著照該督所請行○免直隸薊州玉田等七州縣本年分水災額賦有差○工部議覆管理錢法侍郎常綬疏言寶源局所鑄制錢每歲用銅一百二十萬觔各關解送銅觔於四五月始到正二三月無銅可鑄每向戶部題取制錢應用請收買民間自行銷燬錢銅一百萬觔攬和闢銅鼓鑄應如所請從之○土默特多羅貝勒厄爾德木圖故遣官致祭○丁未

上詣

皇太后宮問安○諭大學士等河圖繪於紙上平漫難辨高下朕欲改清口刻木製成一圖觀看易明著侍郎常綬前往河

工會同于成龍清口應否改移詳加看閱歲內著速回具奏○九卿遵旨磨勘順天鄉試中式舉人試卷併議覆江南道御史鹿祐疏參考試不公一案擬將順天正副考官李蟠姜宸英等革職

上諭大學士等曰此科考試不公已極且聞代倩之人亦復混入科場大典豈容如此此案若照議完結仍不知警著將所舉人通行齊集內廷覆試如有託故不到者即行黜革其考官等處分俟覆試後具奏○戊申

上以恭謁

陵寢命皇長子多羅直郡王允祿皇九子允禩皇十三子胤祥

皇十四子允禵隨駕是日啟行駐蹕順義縣新莊○巳酉

上駐蹕平谷縣○庚戌

上駐蹕克善集○辛亥

上駐蹕中營○壬子

上駐蹕馬伸橋○調貴州按察使佟毓秀為江蘇按察使司按察使陞福建驛傳道何顯祖為貴州按察使司按察使○江南額上縣本年分水災額賦有差○癸丑

上詣

暫安奉殿

孝陵行禮奠酒舉哀次至



仁孝皇后。

孝昭皇后。

孝懿皇后陵奠酒舉哀。是日駐蹕湯泉。○甲寅。

上駐蹕下營。○乙卯。

上駐蹕羅文峪。○丙辰。

上駐蹕白旗營。○丁巳。

上駐蹕龍井關。○戊午。

上駐蹕三屯營。○署理理藩院事戶部尚書馬齊等奏稱阿壩  
坡多羅郡王烏爾占噶喇布敦伊屬下人等牛隻被賊刦奪  
臣部與刑部各差司官一員帶領古北口喜峯口官兵查拏

實錄卷百六

七

具奏得旨蒙古生養之計惟馬匹牛羊是賴今賊衆行刦則  
蒙古生計必致困乏著侍讀學士喇錫將古北口喜峯口官  
兵酌量帶往緝拏○戶部議覆倉場侍郎德珠等疏言滿漢  
坐糧廳二員管理漕運收放宜久任以專責成請停其限年  
更換應如所請從之○己未。

上駐蹕大寨。○庚申。

上駐蹕韓家莊。○辛酉。

上駐蹕人字口。○壬戌。

上駐蹕呂閣莊。○癸亥。

上駐蹕湯峪。○諭兵部四川松潘地方甚屬緊要嗣後叅將遊

擊等缺出著該督揀選具奏○喀爾喀車臣汗遣使進九白  
年貢宴賽如例○甲子。

上駐蹕龍虎峪。

十二月乙丑朔。

上駐蹕郭格莊。○以鑲黃旗護軍統領瓜爾察為領侍衛內大  
臣○予故原任副都統喀齊藍原任禮部左侍郎履我斯各  
祭葬如例○丙寅。

上駐蹕皇莊。○丁卯。

上駐蹕通州。○旌表河南烈女張氏守貞慘死給銀建坊如例  
○戊辰。

實錄卷百六

八

上回宮。諸

皇太后宮問安○刑部題湖廣總督郭琇遵旨查參審理茶陵  
州叛案郎中剛五達等恣肆橫行擾害地方俱實請旨定罪  
上諭大學士等曰剛五達陛辭朕曾諭云爾係部院保舉賢能  
他日乃上進之人此行須從公審理斷不可顛倒是非倘行  
止妄亂決不輕恕今肆行無忌不加重治何以懲警著將剛  
五達等交刑部等衙門嚴加議處尋刑部等衙門遵旨審審  
剛五達應擬絞監候秋後處決。

上曰若輩即當正法以示懲戒何待秋後也著再議 以一等  
侍衛僧圖為鑲黃旗蒙古副都統○庚午轉吏部右侍郎王

拔為左侍郎調禮部右侍郎韓葵為吏部右侍郎陞內閣學士李錄予為禮部右侍郎辛未

上詣

皇太后宮問安○諭大學士等每年所買皮張儘足供用多買亦奚用耶即如朕內用沉香每年二百觔用尚有餘今辦解者已過數倍此等物件俱令察明量用採買其餘無用者悉停之○調工部左侍郎常綬為刑部左侍郎管右侍郎事轉工部右侍郎羅察為左侍郎調刑部右侍郎倭赫為工部右侍郎○壬申以工部郎中秘丕笈為陝西按察使司僉事提調學政禮部郎中喬士容為江西按察使司僉事提調學政

實錄卷六

九

刑部郎中陳朝君為河南按察使司僉事提調學政戶部郎中萬悌為四川按察使司僉事提調學政戶部郎中王祚興為湖廣按察使司僉事提調學政刑部郎中高聯璧為廣西按察使司僉事提調學政禮部郎中張孟球為雲南按察使司僉事提調學政禮部郎中陳正直為貴州按察使司僉事提調學政工部郎中徐炯為山東按察使司僉事提調學政刑部郎中臧大寧為廣東按察使司僉事提調學政戶部郎中司百職為福建按察使司僉事提調學政○癸酉諭吏部凡奉差官員理宜恪慎潔已辦理公務事竣即行復命庶不負委任之意嗣後如巡鹽權稅審事一應差遣各官倘有沿

途騷擾繞道妄行或公務已畢仍逗留地方借端生事或將所帶筆帖式撥什庫等私自遣往他處督撫即指名參奏以憑究治如督撫瞻徇容隱不行糾參事發一併議處爾部即遵諭行○甲戌免浙江鄞縣諸暨青田三縣本年分水災額賦有差○兵部議覆廣東提督殷化行疏言武職坐名題補人員如係曾經引見未逾六年者請免其咨送庶職守不至久曠應如所請參將以下官員引見未過三年坐名題補又臣部推陞者俱停其引見副將大員坐名題補時不拘年限仍照常赴京引見從之○乙亥

上詣

實錄卷六

十

皇太后宮問安○諭大學士等比年來未經京察是以各部院衙門官員行止雜亂才力不及怠惰偷安者甚多著傳諭部院衙門令各察明五日内即行參革○陞內閣侍讀學士范承烈為內閣學士兼禮部侍郎○丁丑調鑲紅旗漢軍副都統宗室諾羅布為鑲藍旗滿洲副都統以輔國將軍泰布為鑲紅旗漢軍副都統○己卯

上御太和殿視朝文武陞轉各官謝恩○

上詣

皇太后宮問安○順天府進春○兵部議覆湖廣總督郭琇疏言鎮草一協紅苗跳梁截陷弁兵臣等見在設策剿撫然謹

酌善後之計。莫若移鎮防險。查沅州鎮標兵一千九百五十名。此地往來大路無甚險僻。請將沅州鎮總兵官改為鎮草總兵官。帶本標將弁及兵一千名。移駐鎮草。合鎮草協原存兵一千一百名。共二千一百名。即將鎮草協副將改為沅州協副將。亦帶標員移駐沅州。統領沅州存兵九百五十名。酌分汛防。均應如所請。從之。○庚辰。理藩院題喀爾喀鎮國公席布退途中堵截逃亡巴爾虎。盡行剿滅。請加恩議叙。得旨著加封貝子。○免浙江餘姚縣本年分水災額賦有差。○浙江道御史廖騰奎疏。參安徽巡撫李鈞以久病殘軀。曠職守。應令休致。得旨著李鈞明白回奏。○辛巳。奉差查勘河工。

工部侍郎常綬等回奏。

上曰。爾等帶去改移清口河圖。伊等云。何常綬奏曰。于成龍等云。遵旨改移清口。則清水自是易出。但水泛時。兩邊堤岸。倘致衝決。保護為難。將高家堰減水壩堵塞。加幫修築。似有裨益。

上諭大學士等曰。于成龍等之意。以為改移清口。清水固易宣洩。遇水泛時。新修隄岸。難保無虞。必將高家堰減水壩盡行堵塞。而加築之。始有裨益。洪澤湖原係陸地。於此處築隄蓄水。與山東嶧山湖南旺湖相同。大水之年。納之以蓄水。大旱之歲。出之以助運。彼時河身窪下。故洪澤湖水一則敵黃。一

則濟運。今歲久沙壅。黃河底墊。不但黃水反高於清水。清水勢不能出。而黃水復致倒灌。於是洪澤湖底亦漸淤墊。高地丈餘。水面上浮矣。此清口所以淤塞也。爾等會同九卿確議。各陳已見。直言勿隱。○壬午。諭大學士等。元旦祫祭。奉先殿。捧請。

四祖神牌往來。朕心不安。爾等會同內務府。禮部。太常寺。考明代典禮議奏。尋大學士會同內務府等衙門。遵旨議奏。臣等查考明代典禮。並無捧請牌位之儀。我朝建立。

奉先殿於大內。奉。

太祖。

太宗。

世祖神主者。蓋欲於朔望薦新。及隨時祫祭故也。

四祖神主舊奉於。

太廟後殿。每年時享致祭。且歲暮又有祫祭。元旦復請。

神牌至。

奉先殿合祀。未免重複。嗣後遇元旦。

皇太后聖壽節。

萬壽節。於。

奉先殿行禮時。停其請。

太廟後殿。

四祖神牌即於

太廟後殿照

奉先殿典例遣官致祭則

四祖牌位不致往來捧請而我

皇上誠敬之心亦允愜矣得旨是○大學士等會議河工事務入奏

上問曰爾等作何會議伊桑阿奏曰將清口改移武家墩甚善但新築堤岸水泛時似難保無虞令給事中陳說以深濬河身為要結為摺子呈覽

上曰河身宜加深濬人所共知但難得其法耳朕亦留心於此

皆錄奏言李本

主

令永定河雖小彷彿黃水欲以水力刷濬之法試之使河底得深十月間往視之時曾諭李光地等令將河身束之使狹堅築兩邊堤岸若永定河行之有效即將此法用之黃河否則另當設法安可輕舉九卿內如有淮安揚州人令各抒所見奏聞侍郎李柟奏曰

皇上欲改移清口誠為善策但不加修高家堰堤恐高家堰之堤一決則淮安揚州一帶難保無虞請將高家堰堤工速加增修

上問曰高家堰若行修築水漲時泗州一帶得無虞乎李柟奏曰高家堰一行加修水漲時泗州一帶必稍有水患但淮安

等處地方所關最要

上曰洪澤湖之水長勢不得不將高家堰增築待加築高家堰後試觀清水由清口出否至於邵伯衝決之口若不預行修築則明春更可慮矣又諭大學士等曰若將高家堰減水壩堵閉建造滾水壩土堤加幫高厚則湖水必高黃水又大湖水不出之時高家堰堤工危險而泗州等處必至水淹爾等會同九卿詹事科道確議具奏○以太僕寺少卿張泰來提督江南學政鴻臚寺少卿姜楠提督浙江學政○癸未

上詣

皇太后宮問安○諭大學士等曰江南浙江學臣張裕端張希

皆錄奏言李本

主

良居官平常目今河工分理需人俱著發往効力其從前各省學差亦令協理河務○兵部議覆天津總兵官潘育龍疏言各省候選武舉請分屬督撫提鎮標下効用如果騎射嫻熟即題補千總把總用應如所請從之○予故二等精奇尼哈番布達察葬如例○甲申兵部議覆廣東提督殷化行疏言臣標將弁請照沿海例坐名題補查提標官員無坐名題補之例應無庸議得旨著照該提督所請行○旌表山東烈女子氏拒姦被戮給銀建坊如例○乙酉

上幸南苑行圍○九卿議覆左副都御史梅鋐疏言會試定例分南北中卷後又於南北中卷之內各分左右以致閱卷者

不盡衡文祇算卷數以定中額請仍照定例止分南北中卷  
繫去左右名色應如所請併將江南廬州等府滁州等州舊  
係中卷者俱歸南卷其雲南貴州四川廣西四省去其中卷  
名色每科雲南定為雲字號額中二名四川定為川字號額  
中二名廣西定為廣字號額中一名貴州定為貴字號額中  
一名康熙三十九年會試恩詔加額應將雲南四川各加中  
二名廣西貴州各加中一名從之○九卿遵諭議覆工部侍  
郎常綬等疏言臣等遵旨前往河工詳勘擬將清口改移於  
武家墩但見今物料未備恐明年雨水前不能完工漕運甚  
屬緊要雖改移清口其高家堰亦必須加幫應如所請將高

聖祖實錄

十五

家堰速行加幫高厚并挑挖引河二道遣部院堂官督催至  
邵伯更樓高郵九里等處決口至今尚未堵塞完工此亦關  
係運道亦應差部院堂官督催作速完工得旨依議這督催  
工程著范承勳主鴻緒主揆田雯布雅努喻成龍顧藻壽鰲  
王紳高裔去分修工程著董訥主樑朱弘祚江有良王起元  
宮夢仁線一信陳汝器王日藻衛既齊李應鳳馬世濟高承  
爵金鑑楊雍建去○己丑

孝莊文皇后忌辰遣官祭

暫安奉殿○庚寅

上自南苑回宮○辛卯諭宗人府衙門信郡王鄂扎貝子魯賓

已經革退衙門今衙門辦事無人著以簡親王雅布補授信  
郡王原缺辦理府事蘇努已授為貝子著補授魯賓原缺為  
左宗正蘇努原缺以輔國公普奇補授為左宗人又諭王雅  
布爾在衙門辦事不可如鄂扎懶惰其宗室內於射箭處有  
託病不去者即指名叅奏○癸巳歲暮祫祭

太廟

上親詣行禮○遣官祭

永陵

福陵

昭陵

聖祖實錄

一六

暫安奉殿

孝陵

仁孝皇后

孝昭皇后

孝懿皇后陵○遣官祭太歲之神○


上詣

皇太后宮問安○甲午賜朝正外藩科爾沁翁牛特阿祿科爾  
沁喀爾喀高齊忒阿霸垓扎魯特烏朱穆泰巴林鄂爾多斯  
郭爾羅斯毛明安敖漢喀喇沁阿霸哈納扎賴特厄魯特諸  
王貝勒貝子公台吉及內大臣大學士上三旗都統侍衛等

宴○旌表八旗節婦滿洲格爾特妻關氏等五人直隸各省  
節婦馬如飛妻陳氏等十人各給銀建坊如例是歲人丁  
戶口二千四十一萬八千九百九十六田地山蕩畦地五百九十  
八萬六千八百八十五頃三十四畝有奇徵銀二千七百三  
十九萬九千五百五十八兩有奇米豆麥六百九十六萬八  
千五百六十三石有奇草二百八萬一千六百六十六束茶  
十五萬七千四百五十四引行鹽四百三十一萬九千三百  
八十五引徵課銀二百六十九萬五千九百九十三兩有奇鑄錢  
二萬三千八百六萬五千四百有奇

大清聖祖合天弘運文武睿哲恭儉寬裕孝敬誠信中和功德  
大成仁皇帝實錄卷之一百九十六





統一書號: 11018·1355—6

定 價: 42.00 元